

Digitized by the Internet Archive
in 2011 with funding from
University of Toronto

CURSUS SCRIPTURAE SACRAE

AUCTORIBUS

R. CORNELY, I. KNABENBAUER, FR. DE HUMMELAUER

aliisque Soc. Iesu presbyteris

S. P. PIUS X

UT SANCTITATI SUAE OPUS HOC DEDICARETUR, BENIGNE CONCESSIT

PARS PRIOR

LIBRI INTRODUCTORII

V

LEXICON BIBLICUM

VOLUMEN II

D-L

PARISIIS

SUMPTIBUS P. LETHIELLEUX, EDITORIS

10, VIA DICTA « CASSETTE », 10

LEXICON BIBLICUM

EDITORE

MARTINO HAGEN S. I.

II

VOLUMEN SECUNDUM D-L

Cum approbatione Superiorum



PARISIIS

SUMPTIBUS P. LETHIELLEUX, EDITORIS

10, VIA DICTA « CASSETTE », 10

1907

Omnia iura vindicabuntur

PIO · X · PONTIFICI · MAXIMO

COMMENTARIOS · ISAGOGICOS · ET · EXEGETICOS
IN · OMNES · VETERIS · NOVIQVE · TESTAMENTI · SCRIPTVRAS
AD · SANCTORVM · PATRV
ET · VETVSTIORVM · SCHOLAE · DOCTORVM
IVNIORVMQVE · INTERPRETV
NORMAM · EXACTOS
ADHIBITIS · VBI · OPVS · FVERIT
RECENTIORVM · SCIENTIARVM · SVBSIDIIS
AVCTORES · OBSEQVENTISSIMI
SVMMO · ATQVE · INERRANTI · DIVINAE · VERITATIS · INTERPRETI
QVI · SINGVLARI · DIGNATIONE · BENIGNITATIS
ID · QVIDQVID · EST · OPERIS
NOMINI · SVO · INSCRIBI · PERMISIT
PIETATIS · ET · IMMOBILIS · FIDEI · PIGNVS · EXHIBENT
SEQVE · AC · SVA · STVDIA · OMNIA
ADDICVNT · DEVOVENT
SEDIS · APOSTOLICAE · DOCTRINAE · ADSERENDAE
SACRARVM · LITERARVM · AVCTORITATI
PRO · VIRIBVS · PROPVG NANDAE



JUL 13 1970

Cum opus, cui titulus est « *Lexicon biblicum* » editore Martino HAGEN, S. J., aliqui ejusdem Societatis revisores, quibus id commissum fuit, recognoverint et in lucem edi posse probaverint, facultatem concedimus, ut typis mandetur, si ita iis, ad quos pertinet, videbitur.

In quorum fidem has litteras manu nostra subscriptas et sigillo muneris nostri munitas dedimus.

Luxemburg, die 23 Januarii 1904.

L. S.

P. C. SCHAEFFER, S. J.
Prov. Germ. Praepositus.

IMPRIMATUR

Parisiis, die 16 Septembris 1904.

✠ FRANCISCUS, Card. RICHARD,
Arch. Parisiensis.

TABULAE GEOGRAPHICAE

	Columnae.
Regio ad lacum Genesareth.	391-5
Regio Jerusalem-Jericho	653-8
Jerusalem antiqua	664-713

TABELLAE ET SCHEMATA

Schema chronologicum dynastiae herodianaë.	503-9
Domus herodiana	507-8
Vita Jesu Christi chronologice disposita secundum quattuor evangelia.	724-34
Tabella genealogica familiae Jesse.	829-30

LEXICON BIBLICUM

D

DABERETH (הַדְּבֶרֶת cum articulo, Δαβερῶθ Ios. 19,12; דְּבֶרֶת, Δεβῶθ Ios. 21, 28; דְּבֶרֶת, הָיָה Δεβεῖρ וְאָז הָיָה Δαβῶר ex duplici translatione eiusdem nominis 1 Par. 6,72 [57]), urbs tribus Issachar in confinibus Zabulon sita, filii Gerson levitici generis tradita (Ios. 19,12; 21,28; 1 Par. 6,72). Apud Flavium Iosephum Δαβῆριττα (Bell. iud. II. 21,3; Vita 62) vicus in extremis Galilaeae finibus situs in Campo magno; apud Eusebium et S. Hieronymum (Onom. ed. Lag. 250,55; 115,20) Δαβερά, Dabira in monte Thabor regionis ad Diocaesaream pertinentis. Hodie *Debūriye* ad radices occidentales montis Thabor; ibidem secundum traditionem novem apostoli morabantur, dum Iesus cum Petro, Ioanne, Iacobo Thaborem ascendit.

Cf. *Robinson*, Palaestina III. 451; *Guérin*, Galilée I. 140-142; *J. Fahrngruber*, Nach Jerusalem ed. 2 II. 165. 176; *Neubauer*, Géogr. du Talmud p. 265; *Liévin de Hamme*, Terre Sainte 1897 III. 110; *Legendre* apud *Vigouroux*, Dict. de la Bible II. 1195-96; *D. Zanecchia*, La Palestine d'aujourd'hui 1899 II. 626.

DABIR. 1. Dabir (דָּבִיר, Δαβίρ), rex Eglon urbis in campestribus Iuda sitae (Ios. 10,3), qui cum aliis quattuor regibus foederatis a Iosue percussus et suspensus est.

2. Dabir (דָּבִיר, דְּבִיר, דְּבֶרֶה, Δαβίρ), urbs in montanis Iuda inter undecim urbes meridianas enumerata (Ios. 15,49); fuerat urbs regia Chananaeorum (Ios. 10,39; 12,13) a Iosue expugnata (10,38), ex qua Iosue Enacim exterminavit (11, 21); secundo expugnata est ab Othoniel (15,15-17; Iud. 1,11-12), civitas sacerdotalis (Ios. 21,15; 1 Par. 6,38).

Duplex urbi antiquitus nomen erat : Ios. 14,49 קְרִית־סֵנָה i. e. urbs legis(?), urbs palmae(?), urbs Senna herois(?). Vulgata : Cariathsenna, LXX πόλις γραμμάτων et Ios. 15,15; Iud. 1,11 קְרִית־סֵפֶר i. e. urbs libri vel forte urbs Sepher herois, ut aliqui minus probabiliter coniciunt, Vulgata : Cariath Sepher i. e. civitas litterarum, LXX Ios. 15,15 πόλις γραμμάτων, Iud. 1,11 Καριαθσεφέρ, πόλις γραμμάτων. Sed de archivis vel academiiis urbis Cariath Sepher ex documentis antiquitatis hucusque nihil innotuit. Magna cum probabilitate censetur esse vicus magnus *el-Dahariye* medius fere inter Hebron et Bersabee.

Cf. *Survey of West. Pal.* Mem. III. 402. 406 ss.; *Palmer*, Wüstenwanderung 305 ss.; *G. A. Smith*, Hist. Geogr. of the Holy Land p. 279. 280. 670; *Buhl*, Alt. Pal. 1896 p. 164; *Legendre* apud *Vigouroux*, Dict. de la Bible II. 1197-1200; *D. Zanecchia*, La Palestine d'aujourd'hui 1899 II. 258. 259.

3. Terminus Dabir (גביר לדבר, דַּבְרִי דַּבְרִי) commemoratur in describendis terminis tribus Gad Jos. 13,26 : a Manaim (Mahanaim) usque ad terminos Dabir. Indicari videtur terminus septemtrionalis montanorum Gad ab occidente orientem versus; attamen nullum vestigium loci Dabir exstat. Fortasse textus hebraeus vertendus est : terminus Lidebir; unde aliqui coniectant Lidebir non differre a Lodabar 2 Reg. 9,4 s. et 17,27; sed huius quoque loci situs ignoratur.

DABRI (דַּבְרִי, Δαβρι), vir de tribu Dan, pater Salumith, quae viro Aegypto nupsit et cuius filius lapidatus est, quia nomen Domini blasphemaverat (Lev. 24,11).

DADAN, DEDAN (דִּדָּן, Δαδάν, Δεδάν, Δαιδάν).

1. Filius Regma filii Chus (Gen. 10,7; 1 Par. 1,9) et frater Saba; vide infra.

2. Filius Iecsan filii Abraham et Ceturae (Gen. 25,3; 1 Par. 1,32) et frater Saba. Filii huius Dadan II. cc. recensentur Assurim, Latussim, Laomim. Praeterea populus Dedan commemoratur Is. 21,13; Jer. 25,23; 49,8; Ez. 25,13; 27,15, 20; 38,13. Ut ex his locis colligitur, Dedanitae erant vicini Edomitum, commercium exercentes cum Phoenicibus; per comeatus merces in Syriam et Palaestinam a mari Erythraeo deferrebant neque desunt indicia quaedam Dedanitas etiam in litore et insulis sinus Persici habitasse (*Movers*, *Phoenizier* II. 3 p. 303). Duo igitur populi Dedan videntur distinguendi esse, alter cushiticus a Dedan filio Regma oriundus et in litore insulisque maris Persici habitans, alter populus Arabiae septemtrionalis a Iecsan filio Ceturae oriundus, Idumaeis vicinus et illis Arabibus ceturaeis adnumerandus, qui partem Arabiae spectantem inter septemtrionem et occidentem incolebant; de metropoli huius populi ceturaei notant Eusebius et S. Hieronymus : Δαδάν, Dedan in regione Idumaea..... 4 mil. pass. a Φανῶ, a metallo Faeno contra aquilonem (*Onom. ed. Lag.* 251, 86; 116,26; Faeno autem i. e. Phumon Num. 32,41 non multum aberat a Petra septemtrionem versus.

Non desunt auctores, qui putent in omnibus locis biblicis supra citatis unum eundemque populum Dedan intellegendum esse, praesertim cum uterque Dedan dicatur frater Saba seu Sabaeorum. Neque improbabile est, si supponamus Dedanitas cushiticos iuxta sinum Persicum sedes fixisse, postea vero Iecsan vel quendam ex eius filiis matrimonio cum Dedanitis cushiticis iunctum novam tribum eiusdem nominis efformasse scil. Dedanitas ceturacos; his suppositis facile concipitur amborum fines utpote nomadum institutorumque more a sinu Persico ad Idumaeam usque patuisse (cf. *Gesenius*, *Thesaurus* p. 322).

DAEMONES, DAEMONIA (οἱ δαίμονες, τὰ δαιμόνια) sunt mali spiritus, qui ob rebellionem contra Deum visione beatifica, ad quam destinati erant, privati et in supplicium aeternum defecti sunt. Etymon vocis δαίμων certo deliniri nequit; ex opinione quorundam derivandum est a verbo δάω = docere (δαίμων = doctus, peritus), ex aliorum opinione a verbo δαίω = dividere. distribuere, ita ut daemon, daemonium sit distributor sortium humanarum seu divinitas quaedam. Apud scriptores classicos ea vox deos tum bonos tum malos designat et etiam Aet. 17,18 de diis gentilium adhibetur. In libro Tobiae malus ille spiritus Asmodaeus daemonium vocatur et remedia indicantur, quibus daemonium (Vulgata 6,8 : omne genus daemoniorum) pellatur (3,8; 6,8 s.; 8,3; 12,3. 14). In Novo Testamento mali spiritus passim daemones, daemonia appellantur.

Speciali nomine Satan (שָׂטָן i. e. adversarius a verbo שָׂטָן = adversari) in Vetere Testamento effertur iste, qui in rebellionem contra Deum primas partes egerat (1 Par. 21,1; Job 1,6. 9. 12; 2,1. 2. 3. 4. 6. 7; Zach. 3,1. 2); in Vulgata omnibus his locis legitur Satan, apud LXX ὁ διάβολος. Aliis quoque locis, ubi שָׂטָן nomen appellativum est et adversarium quendam significat, Vulgata retinet Satan (2 Reg. 19,22; 3 Reg. 5,4), sed 3 Reg. 11,14. 23 recte vertit : adversarium, dum LXX 11,14

Σατάν habent. In Novo Testamento Σατανᾶς, Satanas passim principem daemoniorum designat, sed etiam ad daemones inferiores refertur : si Satanas Satanam eiecit (Matth. 12,26; cf. Marc. 3,23); semel tantum appellativam significationem adversarii induit : recede post me Satana (Matth. 16,23; cf. Marc. 8,33).

Aliud nomen biblicum principis daemoniorum est ὁ διάβολος, diabolus (a verbo διαβάλλω = calumniari, insidiari, falso accusare in iudicio). Apud LXX praeter locos supra citatos solum Sap. 2,24 spiritus malus hac voce designatur, alias autem adversarii quidam. In Novo Testamento ὁ διάβολος plerumque idem est ac Satanas et tribus tantum locis (1 Tim. 3,11; 2 Tim. 3,3; Tit. 2,3) sensum appellativum habet, quem Vulgata exprimit.

Quoad alia nomina daemonum v. ABADDON, ASMODAEUS, BEELZEBUB, BELIAL.

Daemones existere et agere iam in Veteri Test. clare et immediate significatur. Id statim ab initio historiae generis humani Gen. 3,1 ss. manifestum est. Serpentem non qua serpentem ad Evam loqui, ex ipso textu facile patet. Etenim s. auctor in ipsa narratione creationis maximum discrimen inter animalia et hominem statuit neque animalia ratione et lingua praedita sibi finxit. Praeterea repetitis vicibus inculcavit omnia creata esse bona, unde malitia ac perversitas, quae ex serpente loquitur, non potest ipsi serpenti adscribi, etsi hic ratione praeditus esse supponeretur. Quare legentes ex ipsa narratione concludere poterant ac debebant serpentem nonnisi instrumentum esse alterius cuiusdam inimici calliditate, perversitate, odio in Deum et homines instructi et armati. Corroboratur haec conclusio aliis locis tum Veteris tum praesertim Novi Testamenti (Sap. 2,24; Ioan. 8,44; Hebr. 2,14; Apoc. 12,9; 20,2). Etiam clades futura diabolo et semini eius i. e. reliquis daemonibus et omnibus diaboli adiutoribus iam Gen. 3,15 annuntiatur (cf. Ioan. 12,31; Rom. 16,20 graece).

In libro Iob (1,6 ss. 2,1 ss.) Satan ipso

nomine primum inducitur et accusatorem invidum, inimicum ulciscendi cupidum, adversarium subdolum se prodit. In reliquis libris Veteris Test. Satan his tantum nominatim commemoratur. Permissione Dei, qui in Israel iratus erat (cf. 2 Reg. 24,1), Satan concitavit Davidem, ut numeraret Israel (1 Par. 21,1). Zacharias propheta (3,1 ss.) in visione contemplatur sacerdotem magnum Iesum (Iosue; cf. Esdr. 3,2) stantem coram Domino vel coram angelo personam Domini ducis ac rectoris populi gerente et Satan adversarium a dextris ipsius sacerdotis magni, ut prohibeat, insidietur, noceat; sed increpatio Domini restrictio potestatis diaboli est (*Albertus Magnus*). — In visione, quam vidit Michaeas, filius Iemla, propheta samaritanus (3 Reg. 22,19 ss. 2 Par. 18,18 ss.) diabolus, licet non nominetur, verissime ut spiritus mendax describitur; tota enim illa visio firmissimam Israelitarum persuasionem supponit esse malos spiritus, qui Deo permittente mores hominum pervertere et mala excitare studeant. Quantopere hominibus nocere cupiant daemones et tamen sine Dei permissione ne corpori quidem hominis quidquam mali inferre possint, declaratur iis, quae liber Tobiae de daemonio Asmodaeo narrat (3,8; 6,8 s.; 8,3; 12,3. 14 et v. ASMODAEUS).

Praeter locos citatos Veteris Testamenti, qui clare et immediate de daemonibus agunt, sunt nonnulli alii, qui saepius per errorem ad daemones referuntur, quamquam aut nullo modo aut solum positis quibusdam restrictionibus de diabolo vel angelis eius intellegendi sunt. Celebrem quaestionem de Azazel, cui die expiationis caper emissarius mittebatur (Lev. 16,8. 10. 26 hebr.) vide s. v. CAPER EMISSARIUS. Spiritus malus, qui Saulem exagitabat (1 Reg. 16,14 s.; 18,10; 19,9) censetur esse melancholia, quae utique a diabolo tentatore vel provocata vel aucta esse poterat. Maledictio in diabolum Eccli. 21,30 probabilissime est maledictio in adversarium quendam, non in diabolum. Apud Is. 13,21; 34,14; Bar. 4,35 non daemones silvestres et campestres in desertis locis circumvagari dicuntur, sed

species atque umbrae ex opinione populari ibidem habitantes. Militiam caeli in excelso Is. 24,21 nonnulli interpretes daemonia intellegunt, saltem indirecte. Sensu accommodato duo illi loci notissimi Is. 44,12 ss. et Ezech. 28,2 ss. ad superbiam angelorum rebellium a concionatoribus frequenter referuntur; accommodatio aptissima est, sed sensu litterali prior locus ad regem Babylonis, alter ad regem Tyri directe refertur. Compluribus denique locis Vulgatae (et plerumque etiam LXX) diabolus vel daemones nominantur, dum textus hebraicus eorum aut nullam mentionem facit (3 Reg. 21,13; Ps. 90 [91],6; 108 [109],6; Hab. 3,5; 1 Mach. 1,38 graece 36) aut indirectam tantum, quatenus de idolis gentilium agit (Lev. 17,7; Dent. 32,17; 2 Par. 11,15; Ps. 95[96],5; 105 [106],37; Bar. 4,7). Idola enim gentilium in LXX et Vulgata Ps. 95,5 dicuntur daemonia (hebr. vanitates), non quasi in idolis ipsis daemones praesentes fuerint, sed quia sacrificia idolis oblata, revera in daemonum honorem cedebant iisque offerebantur, ut ex 1 Cor. 10,20 elucet.

In libris Novi Test. eadem doctrina, quae in libris Veteris Test. de daemonibus tradita est, pluribus explicatur.

Quid diabolus contra regnum Dei molitur, per modum compendii ipso nomine continetur, quo simpliciter audit ὁ πονηρός, malus, nequam, nequissimus, malignus (Matth. 13,19. 38; Eph. 6,16; 1 Ioan. 2,13; 5,18). Imprimis adversarium Christi Domini se prodit. Tentator ad eum accedit, quem filium Dei esse suspicatur et a voluntate Dei sequenda avertere studet (Matth. 4,1 ss. Marc. 1,12 ss. Luc. 4,1 ss.); in energumenis Christo obviam factus victorem agnoscit eiusque indignationem ac potentiam deprecatur (v. DAEMONIACI); quem verum filium Dei esse certis testimonis cognovit (Marc. 1,24. 34; Luc. 4,34. 41), odio Dei impulsus usque ad mortem crucis persequitur, Iudae Iscariotae consilium proditoris suggerit (Ioan. 13,2; cf. 6,71) et in Iudam introivit, ut eum plenius possideret et ad perpetrandum facinus scelestissimum perduceret (Luc. 22,3; Ioan. 13,27; cf.

Luc. 22,53). Quid contra Ecclesiam Christi machinetur, declaratur parabolis seminantis et zizaniorum (Matth. 13, 19. 25. 39; Marc. 4,15; Luc. 8,12). Ab initio pereans diabolus peccatum adducere conatur (1 Ioan. 3,8). Sicut ad ipsum Christum tentator accedere ausus est, ita eos, qui Christi sunt, aggreditur (Act. 5,3) idque agit magna cum astutia (1 Cor. 7,5; 2 Cor. 2,11; 1 Thess. 3,5; 1 Tim. 3,6. 7; 6,9; 2 Tim. 2,26), sese quoque transfigurans in angelum lucis (2 Cor. 11,14), promovens errores, doctrinas falsas (1 Tim. 4,1), iterato tentans maiore vehementia, licet antea repulsus sit (Matth. 12,43-45; Luc. 11,24-26). Rabie saevissima illos aggreditur, qui ad salutem animarum procurandam vocati sunt (Luc. 22,31; 2 Cor. 12,7; 1 Thess. 2,18). In ipsa denique hominum corpora ingrediens potestatem adeo extraordinariam exercet, ut homines quasi inhabitet atque possideat (v. DAEMONIACI).

Regno Dei diabolus ex adverso opponitur ut princeps huius mundi (Ioan. 12, 31; 14,30; 16,11), qui se mundi dominum ac deum adorandum gerit (Matth. 4,9; Luc. 4,6) et potestatem suam in tenebris idololatriae manifestat (Act. 26, 18; Col. 1,13). Unde etiam vocatur deus huius saeculi (2 Cor. 4,4), princeps potestatis aëris huius, spiritus qui nunc operatur in filios diffidentiae (Eph. 2,2).

Regnum autem Satanae per Christum iam funditus deletum est (Luc. 10,18; Ioan. 12,31; 14,30; 16,11; 1 Ioan. 3,8); per mortem suam Christus destruxit eum, qui habebat mortis imperium i. e. diabolum (Hebr. 2,14) et liberavit eos, qui timore mortis per totam vitam obnoxii erant servituti (Hebr. 2,15; cf. Col. 2,14-15). Clades igitur Satanae cruce Christi obsignata et sancita est, sed usque ad consummationem huius saeculi nobis cum hoste maligno collectandum est. Exhortantur nos ad pugnam ipsi principes apostolorum (1 Petr. 5,8. 9, Eph. 6,11. 12), cui exhortationi statim accedit promissio virtutis supernaturalis, qua singuli hostem vincere valent (Eph. 6,16; 2 Cor. 12,7-9; Rom. 16,20 graece; Iac. 4,7; 1 Ioan. 5,18).

Neque tamen diabolus successu quo-

dam caret. Iam tempore Christi non derant, qui ex patre diabolo essent et opera eius facerent (Ioan. 8,41. 44); eorum exempla secuti sunt in ecclesia primitiva Corinthius ille incestuosus et duo apostatae Hymenaeus et Alexander, qui sententia excommunicationis Satanae traditi i. e. in regnum Satanae eiekti sunt (1 Cor. 5,5; 1 Tim. 1,20). Vicissitudines pugnae inter Satanam et ecclesiam Christi describuntur Apoc. 2,9. 10. 13; 3,9; 9,1-11; 12,3 ss.; 16,13. 14. Clades autem Satanae completa a consummatione huius saeculi initium sumet ac perpetuo durabit (2 Thess. 2,3 ss.; Apoc. 19,20; 20,1 ss.; cf. 1 Cor. 6,3). Atque ita totum genus humanum usque ad diem iudicii in duo regna divisum est, quorum alterum filios lucis, filios Dei, alterum filios tenebrarum, filios diaboli complectitur (Act. 26,18; Eph. 5,8; Col. 1,13; 1 Thess. 5,5; 1 Ioan. 3,10); nulla enim est participatio inter iustitiam et iniquitatem, inter lucem et tenebras, inter Christum et Belial (2 Cor. 6,14. 15).

Interna quoque regni Satanae constitutio in libris Novi Test. adumbratur. Diabolo, qui ab initio peccat (1 Ioan. 3,8), et angelis eius ignis aeternus paratus est (Matth. 25,41). Angelis peccantibus non peperit Deus, sed rudentibus inferni detractos in tartarum tradidit cruciandos in iudicium reservari (2 Petr. 2,4); in iudicium magni diei vinculis aeternis sub caligine reservati sunt (Iudas 6). Usque ad diem iudicii autem collocatio nobis est adversus principem potestatis aëris (huius), contra spiritualia nequitiae in caelestibus (Eph. 2,2; 6,12); adversarius diabolus tamquam leo rugiens circuit quaerens quem devoret (1 Petr. 5,8). Sed post diem iudicii omnes daemones in inferno perpetuo conclusi manebunt. Quaerentibus quomodo peccato ex Dei gratia exciderint, S. Iudas (v. 6) solum dicit angelos illos non servasse suum principatum (τὴν ἀρχήν), sed dereliquisse suum domicilium; cum praeterea dicatur Eccli. 10,15: « initium omnis peccati est superbia » et ex natura spirituali donisque praecellentibus enasci superbiam valde sit probabile, communiter censent an-

gelorum peccatum fuisse superbiam.

Multos angelos peccasse utique patet ex responsione daemonis: Legio mihi nomen est, quia multi sumus (Marc. 5,9; cf. Luc. 8,30). Sed audacius est asserere tertiam partem omnium angelorum cecidisse, cum dicatur Apoc. 12,4: « et cauda eius trahebat tertiam partem stellarum caeli et misit eos in terram »; eo enim loco non describitur lapsus angelorum neque opus est assumere imagine illa proclii caelestis inter Michaellem et draconem (Apoc. 12,7 ss.), quae tempus futurum adumbrat, etiam delineari eventum quandam olim transactum vel imaginem eventus futuri deponi ex re antea gesta. Unde satius est nos de numero malorum spirituum ignorantiam nostram fateri.

Illud vero certo affirmari potest, in angelis quoque peccatoribus aliquem quasi ordinem dignitatis reperiri. Calumniam pharisaeorum Christum ope Beelzebub principis daemoniorum eicere daemonia (Matth. 12,24; Luc. 11,15) inter ipsos daemones unum velut principem eminere supponit et aliis quoque locis Novi Test. omnino suadet inter daemones varios esse gradus malitiae ac potestatis (Matth. 12,45; 17,20; 25,41; 1 Cor. 13,24; Eph. 6,12; Apoc. 12,7. 9 et etiam Marc. 5,9). Regnum igitur Satanae (Matth. 12,26) ex una parte ordinem quandam membrorum exhibet ob diversitatem virium naturalium et malitiae obduratae in singulis daemonibus, ex altera parte unionem quandam ex communi omnium odio in Deum eiusque regnum et ex mutua oppressione, qua fortiores quique iugum servitutis aliis imponere conantur. Toti autem regno praest Satanas, ὁ ἡγεμὼν, fortis iste (Matth. 12,29) non titulo iuris, sed quia ipse viribus naturalibus, astutia, violentia reliquos daemones superat et in servitutem indignissimam redigit.

DAEMONIA (Is. 34,14) v. DRACO 3.

DAEMONIACI seu a daemonio vexati, daemonia habentes (δαμονιζόμενοι, δαμονισθέντες, δαιμόνια ἔχοντες).

Quod S. Iacobus dicit: « Daemones credunt et contremiscunt » (Iac. 2,19), ad oculum cernitur, quotiescunque Christus

daemoniacis obviam factus est. Homines tentare ordinarium est quod daemonebus a Deo conceditur; homines autem possidere, corpora eorum ingredi, membris eorum uti et quae vires humanas superant, efficere, homines possessos variis modis vexare atque torquere, modo quodam extraordinario daemonebus a Deo permittitur ad fines sanctissimos sapientiae ac providentiae divinae idque etiam sine ulla culpa hominis, quem daemon possidet.

Daemones revera quandoque in corpora hominum ingredi et ibi quasi habitare ex Christi eiusque discipulorum verbis ac modo agendi efficitur certissimum. Daemon in hominem ingreditur, ab eo exit, eiicitur. Interdum complures daemones simul unum hominem possident; Maria Magdalena a septem daemonebus liberata est (Marc. 16,9); daemoniacus in regione Gerasenorum tot daemones in se habebat, ut ipsi nomen legionis sibi imponent (Marc. 5,9; Luc. 8,30). Quantopere hoc domicilium daemonebus arrideat, facile apparet ex illa descriptione apud Matth. 12,43 s. (cf. Luc. 11,24 s.), quae ad possessionem diabolicam alludens obdurationem infidelitatis ob oculos ponit: « Cum autem immundus spiritus exierit ab homine, ambulat per loca arida, quaerens requiem et non invenit. Tunc dicit: Revertar in domum meam, unde exivi » etc.

Possessionem varii morbi consequuntur, ut furor et insaniam (Matth. 8,28; Marc. 5,2-5; Luc. 8,27. 29) vel privatio linguae (Matt. 9,32), caecitas ac privatio linguae (Matth. 12,22; cf. Luc. 11,14), surditas (Matth. 9,24), contractio ac distortio membrorum (Luc. 13,41. 46). Interdum in daemoniacis ea cernuntur fieri, quae epilepsiae peculiaris sunt (Matth. 17,16 s. Marc. 9,13 s. Luc. 9,37 s. et similia narrantur Marc. 1,23-28; Luc. 4,33-37). Huc etiam spectat, quod daemon lingua daemoniaci utitur, ita ut hic loquatur, aesi ipse daemon esset. Daemones coram Iesu lamentabili voce fatentur se Iesum agnovisse filium Dei Altissimi ac timorem iudicii sibi instantis aperte pandunt (Matth. 8,29; Marc. 1,24. 34; 3,11. 12; 5,7; Luc. 4,34. 41; 8,28); simile testimonium Philippis

in Macedonia S. Paulo et Silae socio eius dedit puella spiritum pythonem habens (Act. 16,16-18).

Christus daemonebros sanat daemones eiiciendo; testimonium daemonum, quod eum Messiam et filium Dei profitentur, repudiat (Marc. 1,25. 34; 3,12; Luc. 4,35. 41; cf. Act. 16,14); simul palam declaravit se in Spiritu Dei (Matth. 12,28), in digito Dei (Luc. 11,20) eiicere daemonia, quo calumnias Iudaeorum se in Beelzebub principe daemoniorum eiicere daemonia (Matth. 9,34; 12,24. 27; Marc. 3,22; Luc. 11,15. 19) refellat. Exorcismus, quo utitur, est verbum imperans (Matth. 8,16); filiam Syrophoenissae a daemone liberat matri asseverans illud exiisse (Matth. 15,28; Marc. 7,29. 30). Ex modo, quo daemones in regione Gerasenorum expelluntur (Matth. 8,28 s. Marc. 3,1 s. Luc. 8,26 s.), quam maxime elucet, quatenam sit daemonum malignitas, vilitas, impotentia.

Ex eadem divina sua potestate, qua Christus ipse daemones eiicit, apostolis quoque (Matth. 10,1; Marc. 3,15; 6,7; Luc. 9,1) necnon septuaginta duobus discipulis (Luc. 10,17 s.) potestatem eiiciendi daemonia communicavit eandemque omnibus promisit, qui in ipsum crederent (Marc. 16,17). Apostolos et discipulos hac potestate frequenter usos esse discimus (in Act. 5,16; 8,7; 19,12. Attamen eorum exorcismi non infallibiliter cum effectu coniuncti sunt, cuius rei causas ipse Christus assignat, primam: « o generatio incredula..... propter incredulitatem vestram » (Matth. 17,16. 19; Marc. 9,18. 22; Luc. 9,41), alteram: « hoc genus (daemoniorum) non eiicitur nisi per orationem et ieiunium » (Matth. 17,20; Marc. 9,28).

Tempore Christi erant etiam inter Iudaeos exorcistae, qui daemonia eiiciebant. Cum discipuli Christo indicarent alium quendam, qui non erat discipulus, in nomine Iesu eiicere daemonia, Christus eum non prohibet, sed potius velut fautorem et adiutorem suum commendat (Marc. 9,37 s.; Luc. 9,49. 50). Ex verbis quoque Christi: si ego in Beelzebub eiicio daemonia, filii vestri (i. e. discipuli vestri) in quo eiiciunt? (Matth. 12,27; Luc. 11,19) concludere licet quan-

doque saltem exorcistas Iudaeorum in nomine Dei eiecisse daemonia. Ceterum quam firmiter Iudaei persuasum habuerint esse possessiones vere diabolicas, inde etiam colligitur, quod Ioannis Baptistae severas animadversiones exosas habentes eius vitae rationem ad daemoneum auctorem referebant (Matth. 11, 18; Luc. 7, 33). De circumeuntibus Iudaeis exorcistis, quorum mentio fit Act. 19, 13. 14 vide s. v. EXORCISTA.

Eiusmodi possessiones diabolicas tempore Christi fuisse frequentiores sapienti Dei consilio permissum est. Nam frequenti daemonum eiectione eaque facillime verbo utique voluntatis facta ad oculum demonstratur Iesum esse illum, qui serpentis caput contritus sit, et inde cognosci poterat, quod Iesus pharisaeos monet: pervenit in vos regnum Dei (Matth. 12, 28; Luc. 11, 20). Praeterea dici potest daemones, cum Iesum cernebant causam Dei promoventem, maximos quos potuerunt exercuisse conatus ad ditionem et dominationem suam retinendam. Illud vero ex frequenti daemonum eiectione quam maxime elucet, quantum beneficium nobis Dominus noster et Salvator Iesus Christus contulerit, qui principem huius mundi foras eiecit et iugo servitutis ablato nos libertate filiorum Dei donavit.

Cf. Dav. Leistle, Die Besessenheit mit besonderer Berücksichtigung der hl. Väter, Dillingen 1887.

DAGON (דָּגוֹן, Δαγών). Erat idolum Philisthaeorum (Iud. 16, 23; 1 Reg. 5, 2 ss.; 1 Par. 10, 10; 1 Mach. 10, 84; 11, 4), sicut ait S. Hieronymus (ad Is. 46, 1): Dagon est idolum Ascalonis, Gazae et reliquarum urbium Philisthinorum. Victoriam de Samson Philisthaei attribuerunt Dagon; at Samson concussis columnis moriens tria millia domo ruente interfecit (Iud. 16, 23-30) in urbe Gaza. Cum arca Domini a Philisthaeis capta Azotum in templum Dagon esset translata et iuxta Dagon posita, sequenti die idolum reperit esse iacens prorum ante arcam. Restituerunt idolum in locum suum. Verum altera die idolum iterum iacuit in terra coram arca mutilatum, nam caput et duae palmae manuum abscissae erant super

linen. Propterea ingredientiens templum Dagon non calcabant limen (1 Reg. 5, 2-3). Caput Saul affixerunt in templo Dagon. Etiam tempore Machabaeorum Azoti erat templum Dagon (1 Mach. 10, 84; 11, 4; et quod legitur 1 Mach. 10, 83: et intraverunt in Bethdagon idolum suum, explicata: in domum seu templum Dagon). De urbe Bethdagon vide s. v., ex quo nomine patet cultum Dagon apud Chanaanacos quoque usurpatum esse. Apud Phoenices pariter Dagon in honore fuisse ex fragmentis Philonis Byblii patet (cf. Müller, Fragmenta Hist. Gr. III. 2, 14. 16. 20 p. 567. 568. 569). Quod aliqui putarunt in inscriptione Eshmunazar Dor et Ioppe vocari terras Dagon, dubium valde est; alii enim malunt legere et interpretari terras frumenti (דָּגָן). Idolum illud apud Assyrios quoque et Babylonios notum erat, apud quos Dakan, Dagan, Bel-dagan saepius legitur (cf. Schrader-Whitehouse).

De significatione nominis Philo Byblius affert: Δαγώνος ἐστὶ Σίτων (l. c.), et Δαγών ἐπεὶ δὴ εἶρε σίτον καὶ ἄροτρον ἐκλήθη Ζεὺς Ἀρότριος. Unde Dagon frumentum et aratrum invenisse dicit. Communis tamen explicatio est a voce דָּג piscis, ut deus pisciformis significetur. Cui acceptioni imaginibus quoque in nummis suffragium fertur; nam representatur apud Phoenices deus quidam piscem dextera tenens; apud Assyrios haud raro apparet figura in superiore parte usque ad lumbos humana et inde desinens in piscem. Ad quam explicationem recentiores aliqui, uti Wellhausen, etiam pertinere dicunt 1 Sam. 5, 5 quem textum legendum esse aiunt נִשְׂאָר דָּגוֹ שָׂרָן solum piscis eius remanserat in eo, ubi Vulgata: Dagon solus truncus remanserat (cf. F. de Hummelauer, Comment. in libr. Sam. p. 73). Negat quidem Schrader vocem derivari posse a דָּג piscis, deprehendit potius in Dagan typum acadicum, nihilominus deum pisciformem agnoscendum esse putat.

Cf. P. Scholz, Goetzendienst und Zauberbewesen bei den alten Hebräern 1877, p. 233 ss.; Movers, Phoenizier I. 143 ss.; Stark, Gaza und die philistaeische Küste 1852 p. 248. 331 ss.; Schrader-Whitehouse, Cu-neif. Inscript. and Old Test. I. 170; Vigou-

roux, La Bible et les déc. mod. ed. 6 III. 226-229; M.-J. Lagrange, Religions sémit. 1903 p. 131.

DALAIA, DALAIAS (דָּלַיָהוּ, דָּלַיָה; Δαλαία, Δαλαία, Δαλαας).

1. Sextus filius Elieonai ex posteris Zorobabel (1 Par. 3,24).

2. Princeps vicesimae tertiae classis sacerdotalis tempore Davidis (1 Par. 24, 18; Vulgata: Dalaian, LXX Δαλλαί).

3. Filii Dalaia cuiusdam, qui cum Zorobabel ex exilio redierunt, originem suam israeliticam ex genealogiis demonstrare non poterant (Esdr. 2,60; Neh. 7,62).

4. Pater Semaiae tempore Nehemiae (Neh. 6,10).

5. Dalaias filius Semeiae, unus ex principibus, qui regem Ioakim rogarunt, ne volumen oraculorum Ieremiae combureret (Ier. 36,12. 23).

DALAI AU v. DALAIA 2.

DALILA (דָּלִילָה, Δαλιζα), mulier, quae in valle Sorec habitabat et a Samson amata secretum roboris ei extorsit eumque Philisthaeis pro 5300 siclis argenti tradidit (Jud. 16,4-20). In ipso textu non explicite indicatur, utrum fuerit Hebraea an Philisthaea, utrum uxor Samsonis an meretrix. Quidquid dixeris, non desunt auctores, qui tecum sentiant. Sed vix dubium est, quin fuerit meretrix Philisthaea. « Sane fiducia qua Philisthaeorum reguli eam mulierem adeunt, Philisthaeam prodit, uti et modus despectum et odium redolens, quo eadem v. 19 cum Samson agit. Praeterea..... non tam fidenter principes adissent uxorem. Non tam facile in uxoris domo iterum atque iterum latuissent Philisthaeorum haud pauci » (F. de Hummelauer in h. l.).

DALMANUTHA v. MAGEDAN.

DALMATIA (Δαλματία), regio montana in orientali litore maris Adriatici, quae inde ab anno 9 p. Chr. seu finitis bellis ab Octaviano Augusto et Tiberio ibidem gestis erat pars provinciae romanae, quam Illyricum vocant. Illic Titus S. Pauli discipulus abierat ad praedicandum Evangelium (2 Tim. 4,10). Ipsum S. Paulum non procul a Dalmatia Evangelium annuntiasse colligitur ex Rom. 15,19.

Cf. Marquardt, Roemische Staatsverwaltung ed. 2 I. 299 ss.; H. Cons, La province romaine de Dalmatie, Paris 1882.

DAMARIS (Δάμαρις) mulier, quae cum Dionysio Areopagita et aliis a S. Paulo Athenis conversa est (Act. 17,34). Nonnulli cum S. Ambrosio (Ep. ad Vercell.) et S. Chrysostomo (De sacerdot. 4,7) eam Dionysii Areopagitae uxorem esse opinati sunt; quod ipso textu potius excluditur, quam suadetur. Ecclesia graeca eius festum celebrat die 4. octobris (Acta Sanctorum, Oct. IV. 697 s. 771 s.).

DAMASCUS. 1. Nomen. Damascus hebraice plerumque דַּמְשֶׁק vocatur, in libris Paralipomenon דַּרְבִּישֶׁן (1 Par. 18,5 s.; 2 Par. 16,2; 24,23; 28,5. 23). uti in lingua syriaca דַּרְבִּישֶׁן (Payne Smith Thes. 953; cf. 920); semel in hebr. דַּמְשֶׁק occurrit (4 Reg. 16,10), ubi tamen alii libri דַּמְשֶׁק legunt (v. D. Ginsburg not. in h. l.) et alii י ex י superscripto fluxisse putant; sed cf. syr. דַּרְבִּישֶׁתָּ Payne Smith 841. Graece ut plurimum forma Δαμασκός legitur (Act. 9,2. 8 etc.); pro nomine regionis occurrit ἡ Δαμασκηνή (Iudith 1,12; Vulg. v. 7 Damascus), quae in hebraeo אֶרֶץ דַּמְשֶׁק Syria Damasci (2 Reg. 8,5 s.; 1 Par. 18,5 s. hebr.), vel simpliciter אֶרֶץ Syria (3 Reg. 11,25; 15,18 etc.) appellatur. Idem cum hebraico nomen etiam in lingua assyriaca (Dimashqi, Dīnashqa, Dīmashqa) et aegyptiaca (Tīmasqu, Tīramaski) habetur; regio vero in textibus cuneiformibus plerumque mat (sha-) imērishu audit, quod proprie terram asinorum eius significat. Hodie urbs Dīmishq el-Shām vel simpliciter el-Shām, regio vero damascena Ghūta s. vallis fertilis vocatur. — De Gen. 15,2 v. Comment. Fr. de Hummelauer, A. Dillmann etc.

Cf. I. D. Michaelis, Supplem. ad lex. hebr. p. 452-6; W. Gesenius, Thes. 345 s.; Eb. Schrader, Keilinschr. u. Gesch. 6 s., id. Keilinschr. u. A. T. ed. 2. 138 s.; Frd. Delitzsch, Paradies 280 s.; P. Haupt in Ztschr. f. Ass. II. 1887, 321 s.; cf. ib. 452 s.; A. Löwy in Proc. Soc. Bibl. Arch. XI. 1889, 237; W. M. Müller, Asien u. Europa nach

altaeg. Denkmälern 162. 234 s.; *G. Kampffmeyer* in *Ztschr. d. D. Pal.-Ver.* XVI. 1893, 36 s.

2. *Descriptio.* Urbs Damascus ad radices Antilibani sita est in altitudine 691 metrorum super mare Mediterraneum; eius situs determinatur gradu 33° 30' latit. bor. et 36° 18' longit. orient. Circumdatur planitie magna et amoena, quam montes Hermonis et Antilibani versus occidentem et septentrionem (cf. Cant. 7,4), minor mons *Djebel el-Māni'a* dictus in parte australi, lacus seu paludes *Bahrāt el-'Ateibe* in oriente circumscribunt. Pluribus fluviis irrigatur, quorum praecipuus est *Nahr Baradā* (i. e. frigidus) ex Antilibano descendens et variis canalibus divisus planitiem totam percurrrens; alter fluvius *Nahr el-A'wadj* ex Hermone oriundus per australem planitiei partem ad lacum *Bahr el-Hidjāne* defertur. Probabiliter isti erant « Abana et Pharphar, fluvii Damasci », quos meliores omnibus aquis Israel praedicat Naaman princeps militiae regis Syriae (4 Reg. 5,12), quamvis nomen Pharphar hodie tertio fluvio minori *Nahr Barbar* inhaereat (v. ABANA, PHARPHAR). — Ager aquis illis irriguus fertilitate magna celebrer est et quasi paradisos floridus urbem circumdat, quae praesertim ab orientibus pulchra prae ceteris oppidis totiusque orientis oculus praeclarus praedicatur, ac merito « civitas laudabilis (hebr. civitas gloriae), urbs laetitiae » a propheta dicitur (Ier. 49,23). Hortorum illorum iam Salmanassar II., Assyriae rex, meminit (859-825 a. Chr.), cum se paradisos Damasci in oppugnatione urbis excidisse refert (fragm. Annal. 1. 16). — Urbs tota moenibus olim (Act. 9,23; 2 Cor. 11,33) sicut et hodie, circumdata erat. Magnum in ea templum Dei Remmon memoratur (4 Reg. 5,18), cuius fundamenta fortasse etiam nunc in muris templi maximi damasceni supersunt. Tempore S. Pauli « vicus rectus » in urbe exsistebat, in quo domus Iudae ac probabiliter etiam habitationes aliorum Iudaeorum sitae erant (Act. 9, 11); qui etiam hodie urbem fere mediam usque ad portam orientalem (*Bāb el-Sherqi*), iuxta partem civitatis a

Iudaeis occupatam, percurrrens eodem nomine appellatur (*Derb el-Mustaqim*). Ostenduntur praeterea domus Ananiae et Iudae, ac vel ipsa domus Naaman Syri, locus etiam, in quo S. Paulus per murum demissus traditur, atque extra moenia in coemeterio locus conversionis eius, aliaeque insuper pie memoriae : quae sane vix omnia satis firmo fundamento historico nituntur. Certe locus conversionis Apostoli secundum antiquiorem traditionem non in coemeterio prope urbem, sed secus viam, quae Damasco in Galilaeam et Ierusalem ducit, probabiliter prope pagum *Kōkāb* quaerendus est, ubi collis vicinus etiam nunc « collis S. Pauli » (*Tell Mār-Būlos*) appellatur atque ruinae ecclesiae antiquae adhuc apparent.

Cf. *U. J. Seetzen*, *Reisen ed. Fr. Kruse* I. 29-34. 133-40. 264-85. 291-312; item aliae itinera palest. descript.; *E. F. K. Rosenmüller*, *Bibl. Alterth.* I. 2, 284-9. 317 s.; *C. Ritter*, *Erkunde XVII.* 2, 1272-1428; *Kremer*, *Topogr. v. Damaskus in Phil.-hist. Denkschr.* Wien. Akad., B. V. u. VI. 1854-55; *R. Porter*, *Five years in Damascus*, 2 voll., London 1855 (ed. 2 ib. 1870); *E. Robinson*, *Neuere bibl. Forsch. in Palestina.* 578-610; *J. G. Wetstein* in *Ztschr. d. D. Morg. Ges.* XI. 1857, 475-525; *J. Sepp*, *Jerusalem ed. 2*, II. 358-85; *J. Fahrngruber*, *Nach Jerusalem ed. 2*, II. 229-37; *H. Sauvaire*, *Description de Damas* (ex arab.), in *Journ. Asiat. Sér. IX.* T. 3-7, 1894-96; *Baedeker-Benzinger*, *Palaestina ed. 5*, 328-56; *A. C. Dickie* in *Quart. Stat.* 1897, 269-82; *R. Ph. Spiers* ib. 282-301. — De loco conversionis S. Pauli cf. *Antonini* [Anonymi] *Plac. Itjn.*, c. 46, ed. *P. Geyer* p. 217; *S. Willibaldi*, *Hodeporicon a Sanct. Heydenh.* c. 13., ed. *Tobler-Molinier*, *Itinera* I. 2, 260; *N. C. Radzivil*, *Reyse, Meyntz* 1603. 42; *Neuer Welthott ed. J. Stöcklein*, T. II. pars 13, *Augsburg und Grätz* 1729, n. 307 p. 87; cf. *Stimmen aus M. Laach* LIII. 1897. II. 215 s.

3. *Historia.* Damascus primum tempore Abrahae in S. Scriptura commemoratur, qui « usque Hoba, quae est ad laevam Damasci » devictos reges orientales persecutus est (Gen. 14,15). Postea David Syros regionis damascenae (Vulgata : Syriam Damasci) Adarezer regi Soba consociatos, praelio percussos sibi subiecisse atque praesidium in urbe

posuisse legitur (2 Reg. 8,5 s.; 1 Par. 18,5 s.). At regnante Salomone libertatem recuperavit per Razon, filium Eliada, qui Damasei a sociis suis rex constitutus in Syria regnavit (3 Reg. 11,23-25). Successerunt ei Hezion, Tabremon, Benadad I., qui foedere cum Baasa, rege Israel, soluto, Asae, regi Iuda, societate coniunctus est (3 Reg. 15,18-20; 2 Par. 16, 2-4). Sequentes etiam reges Benadad II. (3 Reg. 20,1 ss.; 4 Reg. 8,7 ss.), Hazael (3 Reg. 19,15-17; 4 Reg. 8,7 ss.; 10,32 ss.; 12,17 s.; 13,3 s. 24; Am. 1,3 s.), Benadad III. (4 Reg. 13,3. 24 s.) varia fortuna cum regibus Israel et Iuda dimicarunt. Postquam deinde per aliquot annos Damascus a Ieroboam II., rege Israel, iterum capta et subiecta est (4 Reg. 14,28), sub Rasin primum quidem regem Phacee contra Achaz adiuvit (4 Reg. 15,37; 16,5 s.; Is. 7,1 ss.), mox vero per Theglathphalasar, regem Assyriorum, qui precibus Achaz permotus ascendit, capta atque vastata est, iuxta vaticinium Isaiae et Amos; rege Rasin occiso incolisque in exilium abductis urbs sub dominio regis Assyriorum remansit neque postea proprium regem habuit (4 Reg. 16,7-9; Is. 7, 4-8; 8,4; 10,9; 17,1-3; Am. 1,3-5, cf. 5,27). — Nihilominus etiam postea « lattrunculi Syriae » regnum iudaicum vexarunt (4 Reg. 24,2); unde denno per Ieremiam et Zachariam Damasco divina ultio annuntiatur (Jer. 49,23-27; Zach. 9,1), ac certe ab hostibus sibi succedentibus, toties Syriam vastantibus, etiam civitas damascena multa perpressa est. — Tempore autem pacis incolae, quorum urbs in via directa inter Mesopotamiam et oram maritimam sita erat, commercio cum Samaria (3 Reg. 20,34), Tyro (Ez. 27,18) aliisque urbibus coniungebantur, quibus praesertim *vinum pingue* de Chelbon, etiam regibus babiloniis acceptissimum (v. gr. *Nabuchodonosor*, Cyl. Grotef. col. 1,23 etc.), et lanam pretiosam (Ez. 27,18) ac pannum damascenum דְּמִשְׁקָא Am. 3,12; cf. *I. Knabenbauer* in h. l.) afferebant. — Etiam postea in libris sacris mentio civitatis damascenae occurrit (Ez. 47, 16 ss.; 48,4; 1 Mach. 11,62; 12,32), ac

tempore S. Pauli antonomiam quandam sub Arela, Nabataeorum rege, adeptae est (2 Cor. 11,32; v. ARETAS 2). Plurimi tunc in illa urbe erant Iudaei, ita ut plures ibi haberent synagogas (Act. 9,2. 20; cf. *Flav. Ios. Bell. iud.* II. 20,2; VII. 8,7), atque mox etiam ecclesiae christiana ibi florebat (Act. 9,2. 10. 13 s. 19. 25 etc.), quae praesertim mirabili S. Pauli Apostoli conversione confortata est.

Plura v. in art. de regibus illis damascenis; cf. *Flav. Ios.*, Ant. I. 6,4; 7,2; VII. 5,2; IX. 4,6; 12,3; XI. 8,3 etc.; *L. Müller*, Ad originem regni damasc. temp. Israelitarum, Lipsiae 1714; *I. C. I. Walch*, Antiquitates damascenae, Iena 1757; *Ch. Addison*, Damascus and Palmyra, 2 voll., London 1838; *Guy le Strange*, Palestine under the Moslems, ib. 1890,224-73; *E. Schürer*, Gesch. d. jüd. Volkes im Zeitalter J. Chr. ed. 3, Leipzig 1898, II. 117-20.

L. FONC.

DAMNA (דַּמְנָה; A Δαμνά, B omitt. nisi forte Σαλλά pro Damna haberi potest), urbs tribus Zabulon, levitis de stirpe Merari concessa (Ios. 21,35). Videtur eadem esse quae Remmon Ios. 19,13 seu Remmono 1 Par. 6,77[62]; v. REMMON 2.

DAMULA (melius *dammula*) vocatur a S. Hieronymo bis caprea, hebr. דַּמְּוִי dicta (Prov. 6,3; Is. 13,14), quam alias suo nomine appellat; v. CAPREA.

DAN (דָּן, Δάν). 1. Dan, filius quintus Iacob patriarchae et primus ex Bala ancilla Rachel genitus (Gen. 30,6; 35,25); origo nominis traditur in exclamazione Rachel: Indicavit mihi (יָדִיעָהּ *iudicavit me*) Dominus et exaudivit vocem meam dans mihi filium et ideoque appellavit nomen eius Dan (Gen. 30,6) i. e. iudicem vel forte indicatum a Deo, ut Flavius Ios. (Ant. I. 19,7) explicat: θεόκριτον ἂν τινες εἵποισιν κατὰ τὴν Ἑλληνῶν γλῶτταν. Idem lusus verborum habetur in benedictione Iacob: Dan indicabit populum suum (Gen. 49,16). Dan erat frater Nephthali; praeterea hi duo utpote filii ancillae Rachel maiore quadam ratione cum Ioseph et Benjamin filiis Rachel coniuncti erant. De ipso Dan nihil nobis

traditum est. Unus tantum filius ei attribuitur, qui Gen. 46,23 Husim, Num. 26, 42 Suham nominatur.

2. Dan tribus Israel. Sors tribus Dan circumscribitur Ios. 19,40-46. Territorium tribus Dan erat extensione minimum. Loco citato urbes Dan enumerantur, termini autem non delineantur; sed quia tribui Dan sors ultima assignata est, termini iam alibi sufficienter indicati erant scil. a septentrione sors Ephraim (Ios. 16,3. 5), ab oriente sors Benjamin (18,4), a meridie sors Iuda (15,9 s.); haec erat pars orientalis, minor et montana. Maior autem pars tribus Dan extendebatur occidentem versus usque ad mare et planitiem occupabat, quae infra Ioppen et Lyddam Sephela, supra Ioppen autem Saron nuncupatur; hanc igitur partem attingunt a meridie Philisthaea, a septentrione et oriente possessio Ephraim. Urbes Dan, quae maxime orientem spectant, sunt Aialon, Saras (Saraa), Esthaol, Hirsema (Bethsames); urbes maxime meridianae Accaron et Gethremmon; septentrionem versus regio circa Ioppen (etsi fortasse non ipsa Ioppe) in finibus Dan comprehendebatur (19,46). Nimium igitur limites Dan extendit Flavius Ios. (Ant. V. 1,22) asserens Danitas totam planitiem occidentalem adeptos esse ab Azot usque ad Doram sub Carmelo sitam.

Territorium Dan commendatur tum vicinitate tribuum potentissimarum Iuda, Benjamin, Ephraim, tum fertilitate soli; est enim illa regio campestris, qua maior pars Dan constituitur, campus frumentarius et hortus Palaestinae meridionalis (*Stanley*, Sinai and Palestine p. 258).

In historia Israelitarum tribus Dan non multum prominet. Princeps tribus anno secundo egressionis ex Aegypto erat Abiezer filius Amisaddai (Num. 1, 42). Apud montem Sinai de Dan numerabantur 62 700 viri bello apti (1,38. 39), qui numerus a sola tribu Iuda superatur (1,27), postea in caespitibus Moab 64 400 viri bellatores (26,42. 43). De tribu Dan erat Ooliab, qui fuit socius Beseleel in extructione tabernaculi (Ex. 31,6). In castris Danitae cum Aser et Nephthali ab aquilone tabernaculi constituti erant (2,25); iidem in itinere per desertum

novissimi gradiebantur (10,25). Oblationes Abiezer principis Dan in dedicationem altaris Num. 7,66-71 recensentur. Inter duodecim exploratores terrae Chanaan erat de tribu Dan Ammiel filius Gemalli (13,13), inter viros ad terram promissam sorte dividendam electos Bocci filius Iogli (34,22). Post ingressum in terram promissam Dan cum Ruben, Gad, Aser, Zabulon, Nephthali maledictionem in monte Hebal pronuntiavit (Ios. 8,33. 34), ut Moyses mandaverat (Dent. 27,13). Distributione terrae peracta Dan filiis Caath quattuor urbes leviticis tradidit: Eltheco, Gabathon, Aialon, Gethremmon (Ios. 21,23. 24).

Verum planitiem adeo fertilem antiqui habitatores terrae nullo modo Israelitis cedere parati erant. Amorrrhaei Danitas e planitie in montem repulerunt i. e. penitus fere ex finibus tribus Dan excluderunt (Iud. 1,34); immo ne ipsos quidem montes illis integre cesserunt (1,35). Domus quidem Ioseph i. e. Ephraim et Manasse aggravaverunt Amorrrhaeos et sibi tributarios fecerunt (1,35), sed ipsam planitiem non recuperant; discimus enim ex historia Samsonis Philisthaeos sicuti antea Amorrrhaeos istam regionem occupasse, Samsonem ex castris Dan (Mahane Dan) inter Saraa et Esthaol positus in vineas Thamnathae (Thamna, *Tibne*) et in vallem Sorec descendisse atque post certamina illinc in montana ascendisse (Iud. 13,25; 14,1. 5. 19; 16,4. 31). Ex his intelleguntur Iud. 18,4 dicta: usque ad illum diem (tribus Dan) inter ceteras tribus sortem non acceperat. Ex eadem ratione facilius explicatur, cur Danitae monitis Debborae et Barac, ut contra exercitum Sisarae opem ferrent, non obsecundaverint (Iud. 5,17). Finibus igitur angustioribus compressi novas sedes circumspeciebant et in regione Palaestinae maxime septentrionali civitatem Lais (Lesem) expeditione bellica occuparunt abhinc Dan nuncupatam et celebrem ex notissima illa formula: a Dan usque Bersabee (Iud. 18,1-31); vide DAN 3. Ex 2 Par. 2,14 inferri videtur Danitas istos septentrionales cum Phoenicibus vicinis matrimonia iniisse. Tempore Davidis adhuc locum suum inter alias tribus occupat Dan (1

Par. 12,35); in enumeratione 1 Par. 27, 22, in qua Aser omittitur, princeps tribus Dan Ezriel commemoratur. Ab hoc tempore nomen Dan non amplius de tribu, sed de sola urbe Lais usurpatur. Omittitur tribus Dan in genealogiis 1 Par. 2-12; ratio fortasse est, quia interierant, praesertim cum magna pars tribus sedes suas reliquerit et novae urbi longe disitae nomen suum indiderit. Dan etiam omittitur a S. Ioanne in numero signatorum (Apoc. 7,5-8). Praeterea v. symbolicam descriptionem terrae sanctae Ez. 48,1. 2. 32.

Indolem tribus Dan delineat Iacob in prophetia Gen. 49,16-18: « Dan iudicabit populum suum sicut et alia tribus in Israel (i. e. quamquam ex ancilla progenitus, tamen aliis tribubus nihil cedet in iuribus populi Israel tuendis); fiat Dan coluber in via, cerastes in semita, mordens ungulas equi, ut cadat ascensor eius retro (describitur audacia, calliditas, cupido facinorum arduorum, ut manifestatur in expeditione Danitarum contra Lais et in historia Samsonis Danitae praecelerrimi); salutare tuum expectabo Domine » (tessera bellica Danitarum: solus Deus hisce in proeliis victoriam dabit). Simili modo Moyses Deut. 33,22 effert fortitudinem bellicam Danitarum: « Dan catulus leonis, quet largiter de Basan », hebr. prosiliet de Basan i. e. sicut leo ex cavernis montium Basan, ut praedam arripial.

3. Dan urbs Palaestinae maxime septentrionalis notissima ex ista formula loquendi: a Dan usque Bersabee (Iud. 20,4; 1 Reg. 3,20; 2. Reg. 3,10; 17,41; 24,2. 15; 3 Reg. 4,25) et viceversa: a Bersabee usque Dan (1 Par. 21,2; 2 Par. 30,5). Nomen urbis primitivum erat Lais (Iud. 18,29) vel Lesem (Ios. 19,47). Eius incolae habitabant securi et quieti iuxta consuetudinem Sidoniorum in regione magnis opibus affluente, cui nomen Rohob, longo tamen itinere a Sidoniis distantes; hanc urbis conditionem diligenter explorati Danitae, cum novas sedes sibi quaererent, urbem repentina incursione captam incendio tradiderunt et rursum exstructam novo nomine Dan appellarunt; in hac urbe Danitae idolum illud, quod in monte Ephraim ex domo

Michae vi asportaverant, constituerunt et Ionathan levitam de familia Moysis descendentem, qui ex domo Michae se subducens ipsos secutus fuerat, sibi sacerdotem elegerunt (cf. Iud. 18,1-31). Ab illo igitur Ionathan descendebat familia sacerdotalis a sacerdotio aaronico distincta. De forma et natura istius idololatriae legi Moysis contrariae nihil certi statui potest. Permanebat autem idolum Michae in Lais-Dan omni tempore quo fuit domus Dei in Silo (18,31), tandiu scil. quoad Deus repulit tabernaculum Silo (Ps. 77,60), quod factum est arca a Philisthaeis capta; post tempus igitur Samuelis istud idolum non exstitit. De loco difficili 18,30: « Posuerunt... Ionathan... ac filios eius sacerdotes in tribu Dan usque ad diem captivitatis suae » cf. *F. de Hummelauer*, Comm. in Libros Iudicum et Ruth p. 310-312. Postea Ieroboam I. in Dan vitulum aureum collocavit ac sacerdotes constituit, qui non erant de filiis Levi (3 Reg. 12,29-31; 4 Reg. 10,29; cf. Amos 8,14). Cum aliis urbibus septemtrionalibus Dan a Benadad I. rege Syriae percussa est (3 Reg. 15,20; 2 Par. 16,4); brevi post tamen iterum regno Israel subiecta erat (4 Reg. 10,29; Am. 8,14). Abhinc nulla eius fit mentio.

Sita erat non procul a Libano et minoris Iordanis fontibus (*Flav. Ios. Ant.* V. 3,1), iuxta Pancadem (*Onom. ed. Lag.* 275,36; 136,15). Nunc *Tell el-Qādi* (i. e. collis iudicis) ad fontes *Nahr Leddān*, qui est medius et brevissimus inter tres fluvios, ex quibus Iordanis coalescit.

Ad eandem Lais-Dan a plerisque referuntur Dan Gen. 14,14 et Deut. 34,1 atque Dan silvestria 2 Reg. 24,6. Difficultatem parit duobus locis prioribus usurpatio nominis recentioris Dan, quod nonnisi aetate Iudicum urbi a Danitis impositum esse asseritur. Varia sunt quae ad locos illos recte diiudicandos considerari oportet. Primum quidem concedi potest a iunior scriptore nomen usitatus Dan substitutum esse antiquiori nomini Lais obsoleto (*Cornely*, *Introd.* II. 1 p. 91). Alia solutio difficultatis est eorum, qui dubitant, num Dan Gen. 14,14, quousque Abraham persecutus est Chodorlahomor eiusque

socios, sit Lais-Dan; non satis enim explicari videtur, cur Chodorlahomor in Mesopotamiam fugiens per illud oppidum Dan in radicibus montis Hermon ad unum ex Iordanis fontibus situm iter instituerit Damascum versus. Probabilissima denique solutio, quae neque mutationem textus neque aliud oppidum Dan a Lais-Dan diversum statuit, ex 2 Reg. 24,6 petitur. Ioab enim cum censum populi exciperet, ex terra Galaad pervenit in Dan silvestria (דַּן יַעֲרָ, Δανιδάν και Οδδάν).

Iamvero prope urbem Lais Pan deus, quem Phoenices Baal Iaan vel Dan Iaan i. e. dominum vel iudicem Iaan appellabant, celeberrimum possedit fanum, ut colligitur ex nummis Caesareae Philippi, quae prope Lais-Dan sita erant atque in desertae urbis locum successerat (cf. W. Smith, The Pentateuch, London 1868 p. 446-454). Minime igitur dubitandum est, quin urbi etiam nomen Dan Iaan fuerit. Unde Danitae cum urbem Lais occupatam hoc altero nomine in memoriam patris sui Dan nominarent, nomen urbis pristinum restituerunt, sed aliam nomini significationem attribuerunt (cf. Cornely l. c. et F. de Hummelauer ad Gen. 14,14 et ad 2 Reg. 24,6). Quodsi Vulgata 2 Reg. 24,6 vertit: Dan silvestria, ac si legendum esset דַּן יַעֲרָ, hoc nomine apte quidem describitur haec Dan in silvestribus sita, attamen nulla ratio sufficiens cernitur lectionis hebraicae relinquentiae neque sufficienter suadetur emendatio דַּן יַעֲרָ quam Driver ad h. l. proponit.

4. Dan (דַּן) legitur Ez. 27,19 in descriptione commercii Tyriorum cum Arabia; LXX autem nihil de Dan neque de Vedan legerunt. Locus est satis obscurus, cum de genuina lectione non constet. *Movers* (Die Phoenizier II. 3 p. 302) valde probabile censet Vedan urbem commercio celebrem indicari, quae hodie Aden vocatur, putat enim secundum Phoenicum pronuntiationem Aden emporium דַּן Uden vel Oden scriptum fuisse pro arabico دَن. *Roediger* (*Gesenius*, Thesaur. Appendix p. 85) nihil quidem probabilius habet quam agi

de urbe et emporio Aden, sed apud Ezechielem censet reponendum esse דַּן vel דִּנָן, nisi forte statuas דַּן ortum esse ex דִּנָן Ayin initiali abiecto. Ceterum animadvertit *Knabenbauer* ad h. l. illud γ in initio non esse coniunctionis particulam et proinde non esse legendum et Dan, cum in tota enumeratione a v. 12 nullus versus ab hac particula inchoetur. Alii alia coniciunt, sed textus mendosus videtur. *Cornill* ad h. l. pro דַּן דִּנָן legit וְאֶרְנָבֶן et Arnaban et hoc nomen refert ad sententiam praecedentem, ita ut regio Arnaban ceteroquin ignota indicetur, ex qua Tyrii vinum importaverint; laudatur quidem vinum regionis Arnaban in inscriptione Nabuchodonosor regis, sed emendatio illa utpote audacior et arbitraria admitti nequit.

5. Dan silvestria v. DAN 3. Aliqui putarunt Dan Iaan seu silvestrem fortasse esse locum a Lais-Dan distinctum scil. *Khîrbet Danian* ad orientem *Râs el-Nâqûra* seu Scalae Tyriorum (*Schultz, Conder*; cf. *Survey of West. Pal. Mem.* I. 152. 174); sed tales coniecturae, quae mera similitudine nominum externa nituntur, nullius momenti sunt.

6. Castra Dan prope Cariathiarim (Iud. 18,12), inter Saraa et Esthaol (Iud. 13,25); vide CARIATHIARIM, SARAA, ESTHAOL.

DANIEL (דַּנְיֵאל, Δανιήλ). 1. Filius secundus qui Davidi natus est in Hebron de Abigail Carmelitide (1 Par. 3,4; Δανιήλ, Α Δανουίλ). Idem 2 Reg. 3,3 appellatur Cheleab (v. s. v.).

2. Sacerdos ex familia Ithamar, qui cum Esdra ascendit de Babylone in Ierusalem (Esdr. 8,2). Idem nomen legitur Neh. 10,6 inter signatores foederis.

3. Daniel propheta, cuius laus praecleara iam apud Ezechielem consignata est, cum simul cum Noe et Iob nominetur (Ez. 14,14. 20) et eius sapientia celebretur (28,3); eius pietatem laudat Mathathias moriens (1 Mach. 2,60), eius vaticinium de abominatione desolationis ipse Christus commemorat (Matth. 25,15).

Anno quarto Ioaquim regis Iuda post pugnam ad Charcamis factam venit

Nabuchodonosor Ierusalem et abstulit spolia et captivos misit Babylonem. Inter eos erat Daniel. Eum fuisse ex nobiliore familia, iam eo patet quia erat inter pueros qui de semine regio et tyrannorum (Dan. 1,3) eligebantur, ut eruditi sapientia Chaldaeorum tandem munera obirent in palatio regis. Ex genere regio eum fuisse aliqui existimant (*Sanctius, Cornelius a Lapide, Kaulen*); at obstat Dan. 1,6: fuerunt inter eos de filiis Iuda: Daniel. Insignem legis mosaicae observantiam in aula regia exhibuit, quia et ipse proposuit et tres socios ad idem induxit, ne scil. polluerentur de mensa regis; quare petierunt sibi legumina et aquam. Et cum post decem dies vultus eorum apparerent meliores et corpulentiores prae omnibus pueris qui vesebantur cibo regio, Malasar, qui iis praeerat, facile pio illorum desiderio acquievit. Deus autem his pueris sapientiam, Danieli intellegentiam visionum et somniorum largitus est.

Hanc sapientiam Daniel egregie manifestavit in vindicatione innocentiae Susannae contra calumniam duorum senum, quam narrationem ab initio collocatam habemus secundum Theodotionem. Eo iudicio sapientissime instituto magnus factus est in conspectu populi (Dan. 13,64); mox etiam magnus et illustris factus est in aula regia. Nam quod magi et sapientes praestare nullo modo poterant et quod neminem in terra praestare posse asseruerunt, hoc ipse implorata cum sociis divina protectione praestitit: somnium regi quod habuerat et indicavit et explanavit, somnium illud de statua (Dan. 2). Daniel constitutus est princeps super omnes provincias Babylonis et perfectus magistratum super omnes sapientes Babylonis (Dan. 2,48). Aliud quoque somnium regis quod ipsius regis conditionem ac per aliquod tempus punitionem spectat, ei exposuit (Dan. 4). Atque regem per aliquod tempus revera insaniam quadam zoanthropica laborasse et ibidem narratur et eius rei vestigium deprehenditur in fragmento quodam Abydeni de Nabuchodonosor (apud *Eusebium*, Praep. evang. 9,44; *M.* 21,761). Sub Baltassar, filio Nabonidi, quem Na-

bonidus regiae potestatis participem fecerat, Daniel exponit scripturam quae in pariete apparuerat, cum rex et optimales deos suos laudantes vasa sacra templi Dei profanarent, et regni ruinam praedixit (Dan. 5). Babylon a Persis capta est. Sub Dario Medo (Cyaxare II. filio Astyagis?) Daniel insidiis invidorum impetitus est, qui ei coram rege invidiam creabant eo quod decretum a rege postulabant, quo sanciretur, ne quis per triginta dies quidquam peteret ab ullo deo, nisi a solo rege, ad agnoscendum scil. eius dignitatem. Verum Daniel, qui a rege constitutus erat cum duobus aliis principibus super satrapas centum viginti, non omisit ter in die apertis contra Ierusalem fenestris preces fundere ad Deum. Quare denuntiatus poenam decretam subiit; missus est in lacum leonum; sed incolumis sequenti mane a rege repertus est (Dan. 6).

Etiā apud Cyrum Daniel erat in honore (Dan. 14,1) et uti regibus antecedentibus ostensa est per Danielelem Dei veri maiestas et potentia, ita Cyro quoque. Nam Daniel non solum regi ad oculum demonstravit fraudem sacerdotum Bel et draconem quem deum venerabantur impune occidi ostendit, verum etiam, cum postulantiibus Babyloñis missus esset in lacum leonum, per sex dies ibi remansit illaesus; unde rex admirans Deo dedit laudem (Dan. 14). Placuit itaque Deo, uti anteaetis temporibus per Abraham, Moysen, per iudices et prophetas saepius externis nationibus suam manifestavit potentiam, ita etiam tempore exilii per Danielelem in aula regum suae divinitatis exhibere documenta. Ita scil. omnibus clare innotescere poterat, regnum Iuda esse prostratum non ob Iudaeorum numinis infirmitatem, et cladem illam non esse reputandam victoriam deorum babyloñorum.

Et Nabuchodonosor quidem didicit in magis impotentiam idolorum, in Daniele omniscientiam Dei caelorum, in seipso huius Dei vindictam expertus laudes Dei publice annuntiat; huius Dei omniscientia iterum agnoscitur quasi ab oblivione revocata in aula Baltassar regis; agnoscitur et praedicatur a Dario rege; huius

Dei potentiam Cyrus quoque deprehendit. Tali vero manifestatione Dei Iudaeorum necessario effici debuit, ut et Israelitae eius cultum fidelius amplecterentur et ut apud nationes quoque ipsi conciliaretur existimatio maior et honor. Et cum Daniel magna polleret auctoritate et dignitate in aula regia, consequens profecto erat, ut exsilibus multa commoda obvenirent. Ipse Daniel insuper iis eximium exhibuit pietatis exemplum.

Etiā ampliorem dignitatem merito sibi vindicat Daniel *propheta*. Insignia enim plane sunt eius oracula. Nam cernit quidem regni mundani potentiam et gloriam; at videt mentē prophetica omnia illa regna inter se subsequētia quomodo collabantur, dum regnum Dei ex parvis initii ortum orbem terrarum occupet; edocetur de tempore instaurationis messianicae, de populi sorte post exilium, de magna quadam impii regis infestatione, de ope divina, de angelorum protectione, de resurrectione mortuorum (Dan. 7-12,3).

Cf. R. Cornely, *Introductio in S. Scr.* ed. 2 II. 2 p. 466; I. Knabenbauer, *Comm.* in Dan. p. 3 ss.; Fabre d'Évieux, *Le livre du prophète Daniel* 1888 I. p. 1 ss.; Payne Smith, *Daniel*, London 1886; H. Deane, *Daniel, his life and times*, London 1888; Schoepfer-Pelt, *Histoire de l'Ancien Test.* ed. 3 II. 334 s. 349-352; F. Vigouroux, *La Bible et les découverts*, mod. ed. 6 IV. p. 174. 176. 255 ss. 278 ss.; F. Kaulen, *Einleitung* ed. 4. n. 386 ss.

DANNA (דַּנְיָא, 'Pevvá), urbs in monte Iuda (Jos. 15,49). Recensetur in prima provincia i. e. in parte meridiana montis Iuda; hinc vix poterit esse eadem quae *Idhna* hodierna seu ledna Eusebii et S. Hieronymi 6 mill. pass. ab Eleutheropoli Hebronem versus sita (Onom. ed. Lag. 266,30; 132,22), ut opinatur Conder (*Survey of West. Pal. Mem.* III. 303 et apud Hastings, *Dict. of the Bible* s. v.); *Idhna* potius eadem est quae Esna (vide s. v.). Danna ubi fuerit, nondum liquet.

DAPHCA (דַּפְחָא, 'Pφαχά), statio Israelitarum inter desertum Sin et Alus (Num. 33,12. 13); omissa est in Ex. 17,

1 sicut etiam Alus. Quaerendae sunt stationes Daphca et Alus inter desertum Sin (planitiem *el-Markha*) et Raphidim (*Wādi Feirān*). Coniiciunt nonnulli (M. Ebers, M. Jullien, F. de Hummelauer, Rendel Harris) Daphca esse *Mafka*, quo nomine aegyptiaca regio suffossionum Sinai designatur. « *Mafka* erat nomen gemmae, quae malachites vocatur et regio *Mafka* Aegyptiis erat ea Sinaitidis pars, ubi illas gemmas frequentissimas excavabant. Qui locus hodie audit *Wādi Maghāra*, ubi etiamnum Aegyptiorum inscriptiones et cuniculi in rupes acti conspiciuntur » (F. de Hummelauer). Complures alias coniecturas de situ stationis Daphca recensent A. Dillmann (ad Ex. 17,1) et Legendre.

Cf. M. Ebers, *Durch Gosen zum Sinai* 1872 p. 135 ss. 539 ss.; M. Jullien, *Sinaï et Syrie* 1893 p. 75; F. de Hummelauer, *Comm.* in Ex. Lev. p. 179; Rendel Harris apud Hastings, *Dict. of the Bible* I. 617; Legendre apud Vigouroux, *Dict. de la Bible* II. 1291. 1292. — Praeterea de ista regione *Mafka* v. W. Max Müller, *Asien und Europa* 1893 p. 133; F. Vigouroux, *Mélanges bibliques* ed. 2 p. 265; Baedeker-Benzinger, *Palaestina und Syrien* ed. 5 p. 218 s.

DAPHNE (Δάφνη i. e. laurus), lucus Appollinis et Artemidis prope Antiochiam Syriae, in quo asylo Onias pontifex officio privatus frustra refugium ab insidiis Menelai pontificis sibi quaesivit (2 Mach. 4,33). Loco citato vocatur Δάφνη ἡ πρὸς Ἀντιόχειαν, sicuti apud Flavium Jos. ἡ πρὸς Ἀντιόχειαν Δάφνη (Bell. iud. I. 12,5; 17,3) vel Δάφνη τῆς Ἀντιόχειας (Ant. XIV. 15,11); e converso Antiochia describitur ἡ ἐπὶ Δάφνη τῆς Συρίας (Ant. XVII. 2,1). Daphne 'lucus laurorum a Seleuco Nicator, cum Antiochiam Syriae conderet, Appollini dicatus est (*Iustin.* Hist. 15,4). Describitur ab Ammiano Marc. 19,12 : amoenum illud et ambitiosum Antiochiae suburbanum. Teste Strabone (XVI. 2,6) octoginta stadia in circuitu habebat, fontibus irrigabatur, in medio luo erat asyllum sacrum et templum Apollinis et Artemidis. Templum illud statua Apollinis ornatum anno 362 p. Chr. flammis combustum est (*Ammian. Marc.* 22,13). Uti

Seleucidis ita postea nobilibus Romanis Daphne erat locus quietis et voluptatis (*Flav. Ios. Bell. iud. l. 12,5; 17,3*). — Censetur esse hodiernus vicus *Beit el-Mā (domus aquae)* ad ripam sinistram Oron-tis, quo ab Antiochia urbe separatur.

Cf. *Riess, Bibel-Atlas ed. 3 p. 10; Baedeker-Benzinger, Pal. u. Syrien ed. 5 p. 433; E. Le Camus, Notre voyage aux pays bibliques 1890 III. 63-66; Legendre apud Vigouroux, Dict. de la Bible II. 1292-1293.*

DAPHNIS fons v. AIN 1.

DARA (דָּרָא et in compluribus mss.

דָּרַדָּא, quam lectionem praesupponunt Targum et Peshitta; cf. *I. B. de Rossi, Variar. Lect. Vet. Test. IV. p. 170.* — LXX Δαρά, quintus filius Zarae filii Iuda (1 Par. 2,7). Idem 3 Reg. 4,31 hebr. 5,11 scribitur Dorda (דֹּרְדָּא, B Δαράζα, A Δαράζα) et filiis Mahol accensetur. Unde latiore sensu filius i. e. ex posteris Zare fuisse censetur.

DARCON (דָּרְקוֹן, Δαρκων, Δορκων), unus ex servis Salomonis, cuius filii duce Zorobabel ex captivitate redierunt (*Esdr. 2,56 Vulgata: Dercon; Neh. 7,58*).

DARICUS (דָּרְכִּיּוֹן *Esdr. 2,69; Neh. 7,70 ss.; אֲדֶרְכִּיּוֹן 1 Chron. 29,7; Esdr. 8,27*) nummus aureus persicus, Δαρεικος; nomen generatim derivatur a Dario qui eum nummum excudendum curavit. Pondus eius aestimatur 8,40 gr. i. e. fere sexagesima pars minae babilonicae levioris. In parte anteriore cernitur sagittarius coronatus, manu sinistra arcum tenens, lanceam dextera. Cum eius nummi iam mentio fiat ante aetatem Darii Hystaspis, alii nomen non ad eum, sed ad anteriorem quendam Darium referunt (cogita de Dario Medo, *Dan. 5,31; 9,1*); et alii nomen illud non ad Darium spectare dicunt, verum derivari a voce persica *darig, dergah* (aula regia); vel vocem significare persice arcum regis, quia rex arcum tenens in nummo cernatur. Quae si consideraveris, non mirum est nummum hunc iam nominari tempore Cyri (*Esdr. 2,69*). Si autem eius mentio sit 1 *Chron. 29,7* tempore Davi-

dis, nullo modo erroris arguendus est auctor, sed usus est nomine ac nummo aequalibus noto, ut quantum collatum esset ad opus domus Dei aestimare posset, quomodo nos quoque nummos veteres et alienos explicare solemus comparatione cum nostris facta. In Vulgata darici non leguntur, sed solidi 1 *Par. 29,7; Esdr. 2,69; 8,27* et drachmae *Neh. 7,70* (a qua voce etiam fuerunt qui nomen hebr. derivarent). Apud LXX leguntur δαρεικοί 1 *Par. 29,7* et *Neh. 7,70; μναί Esdr. 2,69; lectio dubia est Esdr. 8,27 [δραχμῶν]*. — Vide s. v. PECUNIA.

DARIUS (דָּרְיֹוֹשׁ, Δαρειος). 1. Darius

Medus. Expugnata urbe Babylone Cyrus Darium Medium regio nomine gubernatorem instituit, uti legitur *Dan. 6,1*: et Darius Medus accepit regnum natus annos 62; pariter hebr. 9,1 qui constitutus erat rex super regnum Chaldaeorum. Cum in aliis historiae fontibus de Dario Medo altum sit silentium, quaeritur, quisnam eo loco intellegi possit Darius Medus, de quo *Dan. 6,1 ss.* Iam si narratio Xenophontis inspicitur, quae de Cyaxare II. refert, omnino in Darium Medium congruere videntur; Cyrus enim bellum gerit contra Babylonem quasi dux exercitus Cyaxaris; urbe expugnata Cyaxari munera obtulit, ei significavit Babylone palatium esse paratum, ut ibi quasi domi habitaret (*Cyrop. V. 5,1; VI. 1,6; VIII. 5,17*). Aetas quoque congruit; dicit Cyaxares (*VI. 1,6*) se esse Cyro seniore; Cyrus autem eo tempore erat vir 60 annorum (nam anno 529 a. Chr. diem obiit natus annos 70). Mores Cyaxaris eo modo describit Xenophon, ut optime perspiciatur, qua ratione *Dan. cap. 6* Darius totus a primoribus regatur eorumque voluntati cuncta concedat (sententias alias vide apud *Knabenbauer, Comm. in Dan. p. 172 s.*). Recentius statuit *Fl. de Moor* Darium Medium esse eum qui in annalibus Nabonidi legitur *Gubaru* et a Cyro sit institutus gubernator urbis (cf. *Revue des questions hist. Juillet 1894*). Quae sententia si assumitur, nullo modo iste *Gubaru* idem esse potest cum Gobrya de quo Herodotus narrat. Nam Gobryas Herodoti non est Medus, sed unus ex primoribus Persa-

rum (3,70), unus ex septem coniuratis qui contra Pseudo-Smerdim consurgunt, qui dicit rem non esse ferendam, ut nos Persae a Medo imperio subigamur (3, 73); alia quoque quae contra Gobryam militant vide in Comm. in Dan. p. 175.

Narratur Dan. 6,1 Darium constituisse satrapas centum viginti. Immerito id ut fictum traducitur; contendunt quippe teste Xenophonte Cyrum primum satrapas in provincias subiectas misisse et solum sex et teste Herodoto Darium filium Histaspis primum totum regnum in 20 provincias divisisse. At Xenophon loco allegato VIII. 6,1. 7 nullo modo dicit Cyrum *primum* satrapas instituisse, solum refert satrapas ab eo esse missos sex in Arabiam et Asiam minorem; neque Herodotus narrat 3,89 Darium *primum* regnum in provincias distinxisse. Ceterum regnum maius in provincias dividere iam diu ante Darium in usu erat. Iam Assyrius loquitur apud Isaiam: numquid non principes mei simul reges sunt (Is. 10,9)? idem elucet ex iis quae Iosephus ex Beroso affert (Ant. X. 11, 1; c. Ap. 1,19. 20; cf. *Richter*, Berosi Chaldaeorum historiae quae supersunt p. 64). Dein regnum babylonicum sub Nabuchodonosor esse in varias provincias distributum etiam consequitur ex Dan. 2,48. 49 et 3,2. — Daniel apud Darium magna auctoritate valebat (6,2). Unde odium et invidia aulicorum in eum exarsit, qui ut ei insidias struerent Dario persuadebant, ut decerneret: quicumque intra dies triginta rem aliquam petierit a deo vel homine, nisi a rege, mittetur in lacum leonum (6,4 ss.). Decretum stud non tamquam merum figmentum explosissent rationalistae, si duo considerassent. Prius enim ipsa narratione indicatur id solum excogitatum fuisse ad Danielem perdendum; ad hoc minime opus fuisse ut in toto regno promulgaretur; verum plane suffecisse, ut in aula regia Danieli innotesceret. Potuisse eiusmodi rem Dario persuaderi, ex iis quae Xenophon de moribus Cyaxaris refert (Cyrop. IV. 1,13 s.; 5,8; V. 5,2. 38. 41 s.) facile consequitur. Dein decretum tale non esse a priori reiiciendum quasi quod fieri nequeat, patet ex re plane simili quam tradit *Charlevoix* (Histoire

du Japon, Paris 1736 III. p. 401) revera praeceptam esse a Nobunanga, imperatore Japoniae (cf. *Delattre*, Les deux derniers chapitres de Daniel p. 37; *Knabenbauer*, Comment. in Dan. p. 7). Ceterum notum est reges laud raro in numero deorum esse habitos et a Persis quoque reges inter deos coli solere Curtius affirmat (8,5. 11); quare eiusmodi decreto postulabatur, ut rex tamquam aliquod numen agnosceretur et honoraretur. Mitti in lacum leonum omnino redolet mores babylonicos (cf. *Layard*, Discoveries p. 138; Transactions of the Society of Bibl. Arch. II. 1873 p. 362 ss.). Accusatores falsos seu calumniatores simul cum eorum familia puniri, a moribus eius temporis non erat alienum; vide praeter epistulam Artaxerxis Esth. 16, 18 etiam Herodotum 3,119.

2. Darius I. filius Hystaspis nominatur Esdr. 4,5. 24; 5,5; 6,1 etc. Is enim inquisitione facta et decreto Cyri reperto permisit reducibus ab exilio, ut templum aedificaretur in Ierusalem, ad quod opus in anno secundo Darii regis repetito adhortati sunt Aggaeus (1,1 s.; 2,1; 2,11) et Zacharias (1,4) prophetae. Templum completum est die tertio mensis Adar anni sexti Darii. Darius quoque, uti testibus inscriptionibus reges saepius facere solebant diis variarum gentium (cf. *Brunengo*, L'Impero di Babilonia e di Ninive II. p. 253. +03. 404), Deum Iudaeorum oblationibus factis honoravit (Esdr. 6,8 s.). Regnavit Darius 321-486.

3. Commemoratur descriptionem levitarum et sacerdotum factam esse in regno Darii regis Persarum Neh. 12,22. Uter Darius intellegendus sit, Darius II. scil. Nothus (Ochus, 423-405) an Darius III. Codomannus (335-330), disceptatur. Si de una tantum descriptione sermo est, uti Neh. 12,26 videtur asserti, tum prior Darius intellegi debet, neque ledboa in v. 22 pontifex erit, sed nominatur solum ut pronepos Eliasib ea aetate puer fortasse annorum decem. Sin autem de quattuor descriptionibus esset sermo (quae tamen nullibi commemorantur), quae sub quattuor pontificibus essent factae, Darius Codomannus deberet intellegi, cuius scil. aetate ledboa erat pontifex (cf. *Flav. Ios.* Ant. XI. 8,4). De

toto loco vide *Cornely*, Introd. II. 1 p. 360-361.

4. Darius III. Codomannus nominatur 1 Mach. 1,1 quem scil. percussit Alexander Philippi Macedo, semel apud Issum anno 333, iterum 331 apud Gaugamela. Nominatur l. c. Darius rex Persarum et Medorum, quo titulo utebantur reges a Cyro et deinceps; cf. Esth. 4,13 etc. Dan. 5,28; 6,16; 8,20.

DATHAN (דָּתָן, Δαθάν), filius Eliab, Rubenita, princeps populi, qui partem habuit in seditione Core (Num. 16,1-27; 26,9; Deut. 11,6; Ps. 105[106],17; Eccli. 45,22). Vide s. v. CORE 2.

DATHEMA 1 Mach. 5,9 : in Dathe-man munitionem (εἰς Δαθέμα τὸ ὀχύρωμα, Ἀ Δάμα, ἢ Δάβαιμα; Syrus : Ramthio). In hoc castellum Iudaei confugerunt, ut a gentibus se defenderent, auxilium a Iuda Machabaeo expectaturi (1 Mach. 5,9); nomine proprio omisso simpliciter munitio (τὸ ὀχύρωμα) vocatur 3,11. 29. 30 et fortasse etiam 2 Mach. 12,17 (vide s. v. CHARACA). Apud Flav. Iosephum (Ant. XII. 8,1 ed. Niese) scribitur Δαθήμα (Δαθέμα) τὸ φρούριον (ed. Dindorf Δάθεμα). Situs ex eo conici potest, quod Iudas et Ionathas Machabaei in Galaad profecti, cum Bosor (Bostra, hodie *Bosrā* in *Haurān*) expugnassent et succendissent, itinere nocturno ad castellum a Timotheo oppugnatum properarunt illudque obsidione liberarunt (1 Mach. 5,28-34; cf. Flav. Ioseph. l. c. 8,3). A nonnullis censetur esse *Athamān* prope *Der'āt* (Edrai) aquilonem versus (*Furrer, Riess*), ab aliis *el-Remthe* in Via Peregrinantium nec procul a *Der'āt* inter meridiem et orientem (*Wilson*), cui coniecturae favel lectio syriaca Ramtho. In eadem regione *J. P. van Kasteren* Datheima quaerendum esse indicat scil. vel in *el-Remthe* vel in *el-Hošn* inter meridiem et orientem ab *el-Remthe*, praesertim cum *el-Hošn* significet munitionem seu castellum et indubia vestigia antiquitatis ibidem cernantur; quo supposito urbs Bosor 1 Mach. 5,28 non in Bostra (*Bosrā*) quaerenda erit, sed cum eodem auctore meridiem versus a castello Datheima. Ceterum non constat castellum Datheima a Characa differre.

Cf. *Furrer* in Zeitschr. d. D. Pal.-Ver. XIII. 1890, p. 200; *Riess*, Bibl. Geogr. 1872, p. 17; *Wilson* apud *Smith-Fuller*, Dict. of the Bible s. v.; *J. P. van Kasteren* apud *Vigoureux*, Dict. de la Bible II. 1309. Alias coniecturas v. apud *Schenkel*, Bibellexikon I. 579; *Kittl*, Cyclopaedia of biblical literature I. 631; *Richm-Buehgen*, Handwb. des bibl. Altert. I. 299.

DAVID (דָּוִד vel דָּוִיד i. e. dilectus; Δαβίδ, Δαυίδ) nobili genere ortus (Ruth 4,18 ss.) et octo Isai filiorum minimus (1 Reg. 16,8; cf. 1 Par. 2,13) tam corporis robore et pulchritudine quam animi prudentia et fortitudine excelebat (1 Reg. 16,12. 18; 17,42; Eccli. 47,3).

1. A Samuele rex loco Saulis a Deo reiecti clam unctus (1 Reg. 16,13), tamen multo post regnum adeptus est.

E vita pastoricia ad aulam regis, quem animi aegrum musica cantuque deleneret, accessit et, cum probaretur, armiger regius factus est (ib. 16,14 ss.). Bello igitur Philisthaeorum exorto in castra profectus Goliath immanis magnitudinis hominem singulari certamine prostravit clademque hostibus intulit ingentem (1 Reg. 17). Quare sicut vulgi favorem sibi conciliavit, ita ex epinicio mulierum inepto in regis suspicio invidiam venit. Ut ab oculis auferretur, cohorti militum praefectus bellorumque casibus oblatus est; sed omnibus rebus tribunus militum feliciter gestis in conspectu populi egressus et ingressus gratiam non modo retinuit, verum etiam acquisivit; a Michole enim filia regia amari coepit. Hanc rex adversario, ut perniciem moliretur, condicionem uxoriae detulit ea lege, ut loco sponsalium centum praepntia Philisthinorum adferret. David autem fortuna secunda usus periculum adiit reque praestita Micholem in matrimonium duxit (1 Reg. 18). Neque tamen socerum placavit, sed prosperis rerum proventibus adeo irritavit, ut voluntatem parricidalem suis aperiret. Quam ob rem ipse a Ionathan sibi familiarissimo omnia edoctus aliquandiu ab aula abstinuit, amici autem opera in gratiam regis restitutus est. Sed novam laudem bellicam adeptus regis odium inflammavit hastaque, qua cithara canens confodiendus erat, motu corporis declinata in

domum suam aufugit; unde a satellitibus ad supplicium quaesitus, arte vero coniugis servatus ad Samuelem Ramatham venit. Ab insidiis lictorum ipsiusque regis ope divina cavit (1 Reg. 19) Gabaamque reversus epulis neomeniae caruit, ut per Jonathan animum patris exploraret. Odium regis implacabile esse cognito fuga sibi salutem petendam esse existimavit (1 Reg. 20).

Nobe, ubi ab Achimelech sacerdote cibo gladioque Goliath subornabatur, parumper commoratus ad urbem Geth contendere maturavit. Periculosissimus autem Philisthaeorum hostis cognitus et ad regem Achis ductus mentis insaniam, quae hominem antiquitus reddebat inviolabilem, sollerter simulata vitam servavit (1 Reg. 24). Cum in spelunca Odollam versaretur, quadringentos homines sive in angustiis constitutos sive condicionem domesticam indignatos collegit, quorum princeps parentibus apud regem Moab in tuto collocatis Gad propheta, ut videtur, et Abiathar sacerdote comitatus confinium Iudaeae perlustrabat. Hos quadringentos ut compesceret, dexteritate opus erat et prudentia atque virtute; quia re ad futurum regnandi munus optime instruebatur. Cives suos non videtur vexasse, sed ab iniuriis finitimorum strenue defendit (1 Reg. 22), sicut Ceilam oppidum obsidione Philisthiim liberavit. Inde cum vagus erraret, a Ziphacis proditus invasione Philisthaecum inopinato facta e manu regis persequentis ereptus est (1 Reg. 23). Ipse vero cum in Engaddi solitudine delitesceret, vitae inimicissimi sui sociis invitis generosus pepercit (1 Reg. 24). Crebris nomadam incursionibus, ut suos armis exercitaret, usus est. Quibus gladio usui erat, ut ii sibi cibaria praeberent, aequum erat; quare Nabalem hominem gregibus ditissimum cum pueros ad victum petendum missos ignominiose repulisset, nisi Abigail, uxor prudentiae plena, pacem deprecata esset, incastigatum non dimisisset. Eandem morte Nabalis paulo post viduatam in matrimonium duxit (1 Reg. 25). Ab insidiis regis, quamquam cum eo reconciliatus erat, tutus non erat; servata iterum vita eius odium restinxisse videbatur, nihilominus inconstantiam

veritus e patria discessit (1 Reg. 26). — A rege Geth tum benigne receptus cum sexcentorum satellitum familiis oppidum Siceleg incoluit, Iudaeos autem, a quibus eum Achis in perpetuum disiungere studuit, expeditionibus adoriri fraude interposita omisit; simulatis enim in patriam incursionibus fines Amalecitarum et nationum finitimarum petebat captivisque omnibus, ne fallacia patefieret, trucidatis praedam, cuius rex particeps erat, agebat opimam. Hac ratione tam lubrica animum regis amplius annum fellelit (1 Reg. 26. 27). — Tum vero Philisthaeis bellum adversus Israelitas redintegrantibus cum cohorte sua in castra proficisci iussus capitisque custos a rege factus in eam necessitatem incidit, ut aut cum civibus suis confligeret aut domino benefico deesset. Res autem prospere cessit; nam cum ceteri reguli ei diffiderent, cum suis domum rediit. Oppidum autem se absente ab Amelecitis succensum mulieresque captas esse vidit; cuius rei ipse, qui hostes crebris irruptionibus lacessivisset, auctor denotatus mortem aegre fugit. Oraculo autem consulto persecutus praedatores inopinato oppressit omniaque sua recuperavit. Ita suis reconciliatus animos quoque seniorum Iudae, apud quos commoratus erat, parte praedae distributa sibi devinxit (1 Reg. 29-30).

2. Cladem magnam in Gelboe monte Israelitas accepisse audito affectus ingenti maerore mortem Saulis regis et Ionathae amicissimi carmine praeclarissimo deploravit. Homine autem Amalecita, qui regem a se interfectum esse gloriabatur, perempto (2 Reg. 1) egressus exsilio Hebronem transmigravit. Quo seniores Iudae, quorum animos ad suas partes iam duxerat, convenerunt, ut eum venerantes regem consalutarent, cum ceterae tribus, quoad a Philisthaeis oppressae non erant, Isboseth, filio Saulis, adhaerent. Septem annorum concertatio fuit inter haec regna. David compluribus coniugiis initis potentiam augere studuit, copiis optime exercitatis plurimum valuit. Quare regnum eius maiora in dies capere incrementa Abneris neque virtute neque nece insidiosa prohiberi potuit. Tribus septemtrionales, quae

ad Davidis causam iam se acclinabant, facinore Iobis impunito sine dubio deterritae sunt, tamen paulo post Isboseth exstincto et innocentia regis patefacta ad Iudam se applicaverunt (ib. 2-4).

3. David igitur Hebrone, dum dies festus per triduum agitur (1 Par. 12,39), rex totius Israel constitutus est. Inde sedem Hierosolyma Iebusaeis erepta translulit, quae urbs et propter firmitatem et propter situm caput regni erat aptissimum (2 Reg. 5,1-10).

His de rebus solliciti Philisthaei omnibus copiis coactis invaserunt, sed in Baalparasim (ib. 5,17-21; cf. 1 Par. 14,8-12) et iterum prope Gabaam (ib. 5,22-23; cf. 1 Par. 14,13-17) devicti sunt. His claudibus dominatio eorum, quamquam bellum renovabant (ib. 21,18-22; cf. 1 Par. 20,4-7), in perpetuum fracta est; vel provinciam Geth cesserunt (1 Par. 8,1). — Item Moabitarum duae partes trucidatae, tertia vectigalis facta est (2 Reg. 8,2. 12; cf. 1 Par. 18,2. 4). — Gravius fuit bellum Ammonitarum. Ili legatos Hebraeorum, qui Hanoni regnum adepto gratulatum venerant, ignominia affecerant poenamque veriti cum Syrorum regulis foedus inierant. Dum Ammonitae ex Rabba egressi aciem instruunt, Syri obsidione Medabae relicta hostem a tergo aggressuri erant. Hos autem cum Iob lecta manu fugasset, illi praelio declinato intra moenia urbis se receperunt. Tum Israelitae propter anni tempestatem videntur redisse. Anno autem insequenti ab Adarezer egregiam victoriam prope Helam adepti singulis civitatibus devictis totam fere Syriam subegerunt. Item Idumaeos, qui in regionem australem irruerant, ad interuiccionem fere redegerunt. Tertio denique anno urbs Ammonitarum capta est hominesque in servitutem redacti. Iis bellis confectis quamquam minores seditiones postea factae sunt, tamen regnum externo periculo vacuum erat latissimeque tum a fluvio Aegypti usque ad Euphratem, a sinu Arabico usque ad Libanum patebat. Thou autem rex Emath et Hiram Tyriorum tyrannus amicitiam Davidis petierunt (2 Reg. 8; 10-11; 12,26-31; 3 Reg. 11,15 s.; 1 Par. 14,1; 18, 1-13).

Rex arcem Sion, quam ipse obtinuit

atque Civitatem David vocavit, operibus munivit et ab Hiram adiutus urbem, ut dignum regno caput esset, aedificiis exornavit (2 Reg. 5,9-11; 1 Par. 11,8). Splendorem aulae more principum orientalium grege pellicum aucto exaggerare studuit (2 Reg. 5,13). Sedem etiam rerum sacrarum illam urbem esse decebat; quare arcem ex Gabaam magno cum populi concursu transportavit et in novo tabernaculo collocavit (2 Reg. 6); templum autem aedificare Dei interveni velitus est (2 Reg. 7; cf. 1 Par. 17). — Universum porro Dei cultum constituit. Duos voluit esse summos sacerdotes: Sadoc Gabaae, Abiathar Hierosolymis munere sacro fungebatur (1 Par. 16,39 ss.). His aderant sex familiae levitarum; de quibus filii Gerson moderante Asaph Hierosolymis, filii Caath et Merari dirigentibus Heman et Idithun Gabaae cantores et musicos agebant (1 Par. 6,18 ss.; 15,5 ss.; 16,5. 41 ss.). Ad exitum vitae sacerdotes in 24 classes distribuit, quarum sedecim erant e genere Eleazar, octo e genere Ilhamar, singulasque praefecto subdidit. Singulis quoque mille levitas ad sacra peragenda tribuit. Quattuor milia levitarum in 24 classes dividorum cultum religiosum musica cantique illustrabant, quattuor milia ianitores erant, sex milia populum docuerunt et iudicaverunt (1 Par. 23; 24; 26). Neque dubium est, quin rex ipse psalmorum magnum numerum cantoribus subministraverit. — Nova regni forma duabus potissimum rebus a prisca discrepat; una est, quod omnes maioris momenti res, quae antea a senioribus vel legatis Dei extraordinariis movebantur, ab ipso rege administrantur. Altera est, quod senioribus, qui singulis locis officia iudicum exsequebantur, levitae legis mosaicae studiosi adsunt. Rex autem ipse hortatore extraordinario utebatur propheta, ministris communibus cancellario, scriba, vectigaliario (2 Reg. 8,16 ss.; 20,23 ss.; 1 Par. 18,15 ss.; 27,32 ss.). — Israelitas, qui arma ferre poterant, in duodecim partes distribuit, quarum singulae quotannis per mensem in armis erant (1 Par. 27,1 ss.). Totius exercitus robur erat illa cohors sexcentorum gibborum, quam solio patrio extorris iam aluerat. Porro

Cerethaeos et Phlethaeos videtur habuisse custodes corporis.

Ut quondam de Amalecita isto, qui unctum Domini a se interemptum esse simulaverat, et de percussoribus Isboseth aemuli sui supplicium sumpsit (2 Reg. 1 et 4), ita memor iurisiurandi, quo se posteros Saulis et Ionathae servaturum esse promiserat (1 Reg. 20,15; 24,22), Miphiboseth Ionathae filium ad aulam accersitum summo honore tractavit (2 Reg. 9,3 ss.); postea vero a Siba deceptus eum dimidia parte rei familiaris privavit (ib. 16,1 ss.; 19,24 ss.). Item de stirpe Saulis filios Merobis quinque et Resphae duos ad famem depellendam Gabonitis trucidandos tradidit (2 Reg. 21).

E rebus domesticis David mala percepit maxima. Multas enim uxores, quamquam vetitae erant (Deut. 17,17), duxerat; hac autem ratione pullulare coeperat luxuria (2 Reg. 19,35) peccandique periculum. Cui periculo rex succubuit. Bello enim Ammonitarum exeunte cum Bethsabee Uriae centurionis uxore adulterium commisit maritumque, ut suae famae et salutis adulterae consuleret, in acie perimendum curavit. Quo facto complicem duxit uxorem, quam potissimum amabat. Anno fere post Nathan proposita de ove pauperis parabola peccatum regi exprobravit poenaeque duplici morte liberorum et coniugum vitiatione denunciata paenitentiam iniecit. Utraque poena luenda erat; infans enim ex Bethsabee natus brevi mortuus est (2 Reg. 11-12). Porro Amnonem, filium regis maximum, qui Thamar sororem ex eodem patre genitam stupraverat, Absalom iniuriam ulturus in convivio cecidit (2 Reg. 13). Idem cum aliquot annos exsulavisset, populo, quem regni iam piguisse videtur, concitato rebellionem fecit urbeque occupata dominationis sancienda causa cum pellicibus regis palam concubuit. Rex sui studiosis stipatus, ab alienis (v. SEMEI) contumelia affectus trans Iordanem fugit, quo plurimi, ubi resipuerunt, confluabant (2 Reg. 14-16). Tripartito aggressus turmas seditiosas in saltu Ephraim fudit, ob caedem autem filii a Ioab contra mandatum suum factam in magnum luctum incidit (2 Reg. 16-18). Auctore tumultus sublato septemtrionales tribus

priores ad sanitatem redierunt, Iudaei autem, in quorum animis altius ira videtur haesisse, rogati demum obsequium praestiterunt. Hi vero praecoccupaverunt eum triumphantemque reduxerunt. Qui quod regem quasi furati essent, aegre ferentes tribus septemtrionales graviterque offensae ad Sebam Beniaminitam defeecerunt. Hos ut domaret, Amasam venia oblata rex copiis praefecit. Sed aemulo interfecto Ioab seditionem sedavit (2 Reg. 19-20).

Duabus calamitatibus terra vexata est: fame trium annorum, quae morte posterorum Saul depulsa est, et pestilentia trium dierum propter recensionem populi vanam immissa (2 Reg. 21 et 24). Anno vitae postremo senex, qui foveri non iam poterat, coniuratione Adoniae filii afflicus est; hic enim regnum, quod Salomoni delaturus erat, Ioab et Abiathar sociis appetivit. Sed opera Nathanis et Bethsabee Salomonem statim regem renuntiandum curavit. Postquam eidem Ioab et Semei supplicium commendavit, annos 40 (1033-1015) regio munere functus e vita decessit et in civitate sua sepultus est (3 Reg. 1-2,11; 1 Par. 28,29).

4. David sine dubio omnium regum Israel excellentissimus fuit. Quamquam ab incontinentia, crudelitate, nimia in suos indulgentia — quae vitia conditionibus principis orientalis et moribus illius aetatis minuuntur — remotus non erat, tamen maioribus praestabat virtutibus. Optime de populo suo meritus est; a vexationibus enim finitimorum eum liberavit et ad summum gradum potentiae adduxit. Porro et profanas et sacras res sapienter constituit regiamque auctoritatem primus stabilivit. Denique illud effecit, quod Hebraeis promissum erat fore, ut essent regnum sacerdotale, habent auctoritatem et sacerdotalem et regiam ab ipso Deo institutam. Ob haec praeclare gesta ab Ecclesiastico (47,2 ss.), summis laudibus effertur et in sacris litteris regibus, qui succedebant, exemplar proponitur. — Cf. H. Weiss, David und seine Zeit, Münster 1880; M. Meignan, David roi, psalmiste, prophète, Paris 1889.

DEBBASETH (דְּבַשֶׁת, Βαῖθὰρσεθ, Ἀδασοθαι), urbs in termino tribus Zabulon (Ios. 19, 41). De situ coniecturae sunt variae. C. R. Conder proposuit *Khîrbet Dabshe* ruinas in ripa sinistra *Wâdi Qarn* sitas. Sed hic locus, medius fere inter Ptolemaida et Gischala, potius ad tribum Aser pertinet neque ordini enumerationis Ios. 19, 41 ss. correspondet. Maiore cum probabilitate R. Riess proponit *Djebata* inter meridiem et occidentem a Nazareth. Ad eundem locum V. Guérin refert verba S. Hieronymi : « est... et alia villa Gabatha in finibus Diocæsareae iuxta grandem campum Legionis » (Onom. ed. Lag. 128, 17; sed cf. textum graecum Eusebii paulo diversum). F. de Hummelauer (ad Ios. 19, 41), emendandum esse coniicit ידבשת = ידבעל, nomen montis seu rupis, quae ea forma in altum emineret, ut appellaretur manus Baal, monumentum Baal, res sane aptissima ad terminum definiendum.

Cf. C. R. Conder in *Pal. Expl. Fund.* Quart. Stat. 1883 p. 134-138 et apud *Hastings*, Dict. of the Bible I. 543; R. Riess, *Bibel-Atlas* ed. 3 p. 10; V. Guérin, *Galilée* I. 336.

DEBBORA v. DEBORA 2 et 3.

DEBELAIM (דְּבֵלַיִם, Δεβελαιμ), pater Gomer mulieris, quam Osee propheta uxorem accepit (Os. 4, 3).

DEBERA (דְּבֵרָה i. e. דְּבַר cum He locali), urbs in confinibus Iuda et Benjamin prope vallem Achor (Ios. 15, 7). LXX vertunt : et tendit terminus usque ad quartam partem vallis Achor (ἐπὶ τὸ τέταρτον τῆς ψάραγγος Ἀχώρ) pro דְּבֵרָה legentes דְּבַר; hunc esse sensum genuinum loci vix credibile est. Dillmann ad h. l. libentius verteret דְּבֵרָה *retrosum* i. e. occidentem versus, si hic usus vocis geographicus aliunde confirmari posset. Aliam emendationem suggerit F. de Hummelauer : terminus septemtrionalis finium Iuda ascendit de rupe Boen בודברה עמק נעבך ad desertum vallis Achor. Vestigium nominis Debera, si nomen urbis supponitur, aliqui depre-

hendere sibi videntur in *Thoghret el-Debr* prope *Qal'at el-Dām* (Adomim) in via Ierusalem-Iericho vel etiam in *Wâdi Daber*; cf. *Legendre* apud *Vigoureux*, Dict. de la Bible II. 1328.

DEBITOR vide s. v. CREDITOR.

DEBLATHA (דְּבִלְתָּה et cum He locali דְּבִלְתָּה; Δεβλαθα) legitur Ez. 6, 14 : et faciam terram desolatam et destitutam a deserto Deblatha (hebr. a deserto usque ad Dibla). Indiciantur termini extremi Palaestinae. Desertum, ut alias frequenter, terminum meridionalem designat. Dibla autem est ignota. Unde iam S. Hieronymus (ad h. l.) coniecitavit pro *Dibla* legendum esse *Ribla*. Idem sentiunt *Pradus*, *Pintus*, *Maldonatus*, *Sa*, *Mariana*, *Cornelius a Lapide* etc. et recentiores *Michaelis*, *Gesenius*, *Davidson* etc. Rebla seu Reblatha in terra Emath ad Orontem sita ad terminum septemtrionalem Palaestinae vago modo indicandum omnino apta est, etsi ipsa iam extra fines terrae promissae sita erat (v. REBLA 2).

DEBLATHAIM (בֵּית דְּבִלְתָּיִם, Δεβλαθαίμ, Ὀλαθαιμ, Ἀ Δεβλαθαίμ, Vulgata : domus Deblathaim), urbs Moab (Ier. 48, 22; I. XX 31, 22). Eadem est quae Num. 33, 46. 47 appellatur Helmondeblathaim (הֶלְמוֹנְדֵּבְלַתַּיִם, דְּבִלְתָּיִם, Γελμων Δεβλαθαίμ), statio Israhelitarum inter Dibongad et montes Abarim. Quaerenda igitur est inter Dibon (*Dibān*) et montem Nebo, quibuscum Ier. 48, 22 una nominatur. In inscriptione lapidis moabitici Mesa rex Moab dicit Beth Diblathaim a se aedificatam esse (lin. 30). Conder (Heth and Moab p. 269) suggerit *Khîrbet Deleyat* inter *Wâdi Mōdjib* (Arnonem) et *Wâdi Zergā Ma'in* tum propter nominis aliqualem similitudinem tum propter situm locis citatis congruentem.

DEBORA, DEBBORA (דְּבוֹרָה i. e. apis).

1. Debora (Δεβόρρα) nutrix Rebeccae. Rebecam ad Isaac maritum suum proficiscentem comitata est, ut cum iis manderet (Gen. 24, 59). Eadem nuntium illum, de quo Rebecca Gen. 27, 45 loqui-

tur, ad Iacob in Mesopotamia exsulem delulisse et cum eo in terram Chanaan revertisse putatur ab aliquibus rabbinis; sed vide *F. de Hummelauer*, Comment. in Gen. p. 314. Mortua est, postquam Iacob ex Mesopotamia redux in Bethel advenit et sepulta est prope Bethel subter quercum; unde nomen loci illius: Quercus fletus (Gen. 35,8). Fortasse haec quercus Debora eadem est ac palma Debborae prophetissae (Iud. 4,5). Derelinquenda autem est opinio eandem quoque esse quercum Thabor 1 Reg. 10,3 commemoratam; haec enim erat inter sepulcrum Rachel et Gabaa (Saulis) i. e. e parte meridionali Gabaae, dum Bethel est e parte septentrionali Gabaae.

2. Debbora (Δεβώρα) prophetis, uxor Lapidoth viri alias ignoti, veri nominis iudex post Aod et Samgar. In poenam idololatriae tribus septentrionales oppressae sunt a Iabin rege Chananaeorum septemtrionalium, qui regnavit in Asor a parte occidentali lacus *Hüle* (v. ASOR 1 et IABIN 2). Gravior erat haec oppressio prioribus propter graviora peccata. Servitutem octo annorum Israelitis imposuerat Chusan Rasathaim, abstulerat Othoniel iudex; servitutem duodeviginti annorum imposuerat Eglon rex Moab, abstulerat Aod iudex; servitutem viginti annorum eamque gravissimam imposuit Iabin rex Asor, ad quam auferendam a Deo excitata est Debbora prophetis. Haec filios Israel iudicabat in monte Ephraim sub palma, quae nomine illius vocabatur palma Debborae, inter Rama Benjamin (hodie *el-Rām*) et Bethel. Instinctu prophetico adacta Barac filium Abinoem de Cedus Nephthali advocavit eique imperavit, ut cum decem millibus pugnatorum peditum de tribubus Nephthali et Zabulon, quae ab Asoritis plus quam ceterae tribus opprimebantur, montem Thabor occuparet; aptissimus copiis colligendis Thabor visus est, utpote in extrema tribu Zabulon ad austrum situs nec procul a confinibus Issachar distans. Monitis Debborae et Barac obsecundantes Nephthalitis et Zabulonitis opem praestiterunt Ephraim, Benjamin, Issachar et Manassaei cisiordanici; e contra Ruben, Gad,

Dan, Aser, Manassaei transiordanici sua privata commoda sectantes opem ferre neglexerunt; nulla mentio fit tribuum Iuda et Simeon, quae fortasse pugnis cum Philisthaeis nimium distinebantur et generatim magis in se conclusae et a reliquis separatae erant; cf. s. v. IUDA 2. Asoritarum exercitus, qui nongentos currus falcatos (hebr. ferreos) numerabat, duce Sisara magistro militiae regis Asor in planitiem torrentis Cison progressus est. Barac impetu nocturno de monte descendens castra Asoritarum adortus in fugam praecipitem vertit; ipse Deus hostilem exercitum ingenti turbine venti perterrefecit, quem Israelitae a tergo flantem, Asoritae ex adverso habuerunt. Ingens clades secuta, Asoritarum potestas penitus exstincta est. Ipse Sisara fugiens a Iahel, uxore Haber Cinaei, hospitio exceptus, sed inter somnum clavo per tempora infixus peremptus est. Huius victoriae laudes Debbora et Barac celebrarunt cantico, quod tota antiquitate appellatum est Canticum Debborae, cuius carminis auctor Debbora, concentor Barac merito dicuntur (Iud. 4 et 5).

3. Debbora (Δεβώρα), mater Tobiel patris Tobiae (Tob. 1,8 graece).

DECAPOLIS (ἡ Δεκάπολις) erat tempore Christi (Matth. 4,25; Marc. 5,20; 7,31) confoederatio politica decem urbium hellenisticarum, quae sicut aliae urbes hellenisticae ab ethnicis quoad maximam partem incolebantur, suis legibus res publicas administrabant, sed provinciae Syriae attributae legato Syriae parebant. Originem suam Decapolis probabilius aetate romana habuit; pleraeque enim urbes Decapoleos sunt urbes hellenisticae, quas Alexander lannacus subegerat, Pompeius autem Iudaeis ereptas libertate donaverat et provinciae Syriae attribuerat (*Flav. Ios. Ant. XIV. 4,4; Bell. iud. I. 7,7*). Illo igitur tempore decem urbes hellenisticae, ut conicere fas est, confoederationem quandam inierunt, quae Decapolis vocabatur. Singulas urbes enumerat Plinius (V. 18, 74): « Decapolitana regio a numero oppidorum, in quo non omnes eadem observant, plurimum ta-

men Damasceni..... Philadelphiam, Rhamniam, Scythopolim..... Gadara..... Hippon, Dion, Pellam..... Galasan (lege : Gerasan), Canathiam ». Decapolis nomen suum etiam retinuit, postquam numerus urbium, quae foederi se iungebant, auctus est. Ptolemaeus (V. 15, 22. 23) urbes Decapoleos recensens omnes a Plinio nominatas enumerat excepta Raphana, sed novem alias addit, quarum pleraque in septentrionali parte terrae transiordanicae et in vicina Damasci sitae erant; sed notandum est in editione *Müller-Fischer* (Parisiis, Firmin-Didot 1883-1901) apud Ptolemaeum V. 14, 18 legi Κολλης Συρίας καὶ Δεκαπόλεως πόλεις αἵδε, dum in editione *Nobbe* (Lipsiae 1843) illud καὶ deest. — Urbibus a Plinio supra nominatis addendae sunt Abila 12 mil. pass. a Gadara orientem versus (*Euseb.* Onom. ed. Lag. 223, 7; Corp. Inscript. Graec. n. 4301) et etiam Kanata (hodie *Kerak*), nisi forte haec ad fines Kanatha (hodie *Qana'āt* in *Haurān*) pertinet neque urbs distincta dici debet (v. CANATH). Omnes urbes Decapoleos erant transiordanicae, excepta Scythopoli (Bethsan). Cf. *Schürer*, Geschichte des jüd. Volkes etc. ed. 3 II. p. 416 ss.

DECIMAE. Mos dandi decimas est antiquissimus. Ita iam Abram dedit decimas ex omnibus Melchisedech regi Salem et sacerdoti victoria de regibus reportata (Gen. 14, 20); « intuemini quantum sit hic cui et decimas dedit de praecipuis Abraham patriarcha » (Hebr. 7, 4). Iacob quoque profecturus in Mesopotamiam vovet Domino, si res prospere cessura sit : cunctorum quae dederis mihi decimas offeram tibi. Lege mosaica iste mos confirmatur; quod Ex. 22, 29 generatim praecipitur : decimas tuas non tardabis reddere, accuratius determinatur Lev. 27, 30-33 esse scil. decimas de frugibus, de pomis arborum, de armentis et gregibus Domino sanctificandas; decimas frugum et pomorum posse redimi addita quinta parte pretii. Quomodo autem decimae Domino sanctificentur, explicatur Num. 18, 20 ss. : filiis Levi dedi omnes decimas Israelis in possessionem pro ministerio quo ser-

viunt mihi in tabernaculo foederis... praecipe levitis atque denuntia : cum acceperitis a filiis Israel decimas quas dedi vobis... decimam partem decimae... offerte Domino et dote Aaron sacerdoti, i. e. levitae ex decimis quas a populo accipiebant dabant decimas sacerdotibus.

Quae vero Deut. 14 praecipuntur, alia sunt ab iis quae Lev. 27 et Num. 18 traduntur. Nam ibi legitur : decimam partem separabis de cunctis fructibus tuis qui nascuntur in terra per annos singulos et comedes in conspectu Domini Dei tui in loco quem elegerit, decimam frumenti tui et vini et olei et primogenita de armentis et ovibus tuis (14, 22. 23). Quodsi quis longius abest a sanctuario, poterit decimas has vendere et pretium afferre ad sanctuarium et ex hac pecunia emere ad epulas institundas (14, 24-26), et commendatur, ne levitae neglegantur. Quae ut cum antecedentibus conciliarentur, Iudaei posteriores et multi interpretes statuerunt hisce praescribi decimas secundas, quae praeter decimam primam (Lev. 27; Num. 28) quotannis essent solvendae et ex quibus primo et secundo cuiusque triennii anno haberentur convivia apud sanctuarium et tertio quoque anno ditarentur egentes (Deut. 14, 28. 29). Huius acceptionis et explicationis documentum habetur Tob. 1, 6-8; et ita rem concipit quoque Flavius Iosephus (Ant. IV. 8, 22). Hanc decimam secundam etiam deprehendunt Deut. 12, 11. 17.

Verum praecipua difficultas contra hanc decimam secundam oritur ex Deut. 26, 12, quo loco ex genuina lectione LXX decima secunda ea vocatur, quae non quotannis solvenda est, sed semel tantum, tertio scil. anno a tempore quo familia quaeque sua possessione potita est. Unde decima illa (Deut. 12. 14) non potest esse altera seu secunda, quia tandem 26, 12 de secunda mentio infertur.

Ad rem enodandam leges has ad alia et alia spectare tempora dicendum erit. Et *F. de Hummelauer* quidem tempore iudicum ob hostium incursus et populi pauperiem legem de decimis solvendis ita usu esse attemperatam censet, uti Deut. 12. 14 legitur — ipsa rerum con-

ditione mutata mutari leges (cf. Comment. in Deut. p. 332 ss.). Aliis placuit rem invertere, scil. legem Deut. esse priorem et antiquiorem, legem Lev. Num. de decimis esse posteriorem.

In instauratione tempore Nehemiae promittunt reduces ex exsilio se duros decimas levitis et levitae iubentur decimam partem decimae suae offerre (Neh. 10,37. 38), et sicut de tempore Ezechiae regis refertur oblatas esse decimas omnium quae gignit humus (2 Par. 31,3. 6), ita sub Nehemia quoque omnis Iuda apportabat decimam frumenti, vini et olei (13,12). Ad decimas persolvendas Sapiens hortatur: in omni dato hilarem fac vultum tuum et in exsultatione sanctifica decimas tuas (Eccli. 35,11). Quam sedulo pharisaei fuerint in decimis persolvendis, constat ex evangelis. Dabant enim decimas eorum quoque quae lege non comprehendebantur: qui decimalis mentham et anethum et cyminum et reliquistis quae graviora sunt legis (Matth. 23,23; Luc. 11,42), et: decimas de omnium quae possideo (Luc. 28,12). Atque rabbini legem decimarum extendentes ita statuunt: regula generalis traditur de decimis: quidquid in escam cedit et custoditur et incrementum habet e terra, ad decimas solvendas tenetur. Porro alia etiam traditur regula: quidquid ab initio et in fine etiam esui idoneum est, quantumvis servari solet ut esca incrementum capiat, illud tenetur et dum parvum est et cum grande evasit; quod autem ab initio edule non est, tandem vero in escam cedit, id non tenetur donec esui idoneum fiat (tract. de decimis cap. 4; *Surenhusius*, Mishna I. p. 245). Praeterea vide *F. de Hummelauer*, Comment. in Deut. p. 328-331.

DECLA (הַלְקָה, Δελζά) recensetur septimus inter tredecim filios Iectan (Gen. 10,27; 1 Par. 1,21). Significatur itaque tribus quaedam Iectanidarum, qui Arabiam meridiionalem incolebant (v. IECTAN). Ipsum nomen, quod Chaldaeis et Syris (הַלְקָה) palmam vel palmetum sonat, regionem prae ceteris palmiferam innuit. Quare *Bochartus* intellegit regionem Minaeorum palmarum

proventu maxime feracem (*Strabo* XVI. 4,18; *Plin.* VI. 28,161). *Knobel* innuit accolae Wādi Nedjrān in septemtrionali parte Yemen, qui palmam velut sacram coluisse feruntur, vel tribum Khozaa, quae a Qakhtan descendens primitus in Yemen, postea circa Mekkam habitabat et palmam Ozza divinis honoribus prosequabatur. Regionem Nedjrān cum Decla etiam *F. Lenormant* convenire censet. Sed nihil certi constat.

Cf. *Bochart*, Phaleg 2,22; *A. Knobel*, Völkertafel der Genesis 1850 p. 196; *F. Lenormant*, Histoire ancienne de l'Orient 1881 I. p. 284.

DEDAN v. DADAN.

DEDICATIO. 1. Est dedicatio sacra quaedam caerimonia, qua res usui profano subtractae Deo consecrantur et ad obsequium sacrum destinantur. Ita cum tabernaculum omniaque vasa eius et cuncta supellex essent confecta, Moyses mandatum Domini accipit, ut omnia oleo unctionis ungat et consecret, ut sanctificentur (Ex. 40,9-11); quod cum fecisset, operuit nubes tabernaculum testimonii et gloria Domini implevit illud, quo signo Deus illam dedicationem comprobavit (Ex. 40,32). Cum ritu unctionis altaris coniuncta erat oblatio sacrificiorum (Ex. 40,23. 27; Lev. 8,10. 11. 28), in qua altaris dedicatione principes tribuum singuli sua offerebant dona (Num. 7,10-88). Sollemni modo templum Salomonis est dedicatum. Celebrabatur, sicut prior illa consecratio (Lev. 8,33), per septem dies oblatione plurimorum sacrificiorum cum ingenti populi concursu; prima die arca foederis in sanctum sanctorum inferebatur et Salomon oratione longiore publice expansis manibus fusa Dei gratiam et misericordiam efflagitabat. Etiam ea occasione gloria Domini implevit domum Dei (3 Reg. 8,1 ss.; 2 Par. 5,4-7,7). Et cum post exsiliium templum iterum esset exstructum et completum sexto anno Darii regis die tertio mensis Adar, fecerunt dedicationem domus Dei in gaudio oblati sacrificiis multis (*Esd.* 6,15-17) et cum demum civitas sancta moenibus esset munita, ipsi muri, quo Deus civitati civibusque largiorem suam praebere pro-

tectionem, levitis undique accersitis dedicabantur in actione gratiarum et cantico et in cymbalis, psalteriis et citharis et oblatis sacrificiis (Neh. 12, 27-42).

2. Festum dedicationis templi seu encaeniorum. Templum et altare, quod Antiochus Epiphanes cultu idololatrico profanaverat (1 Mach. 4,57), Iudas Machabaeus devictis Gorgia et Lysia de novo ad veri Dei cultum dedicavit oblatiis sacrificiis secundum legem; quae dedicatio maxima omnium laetitia diebus octo celebrata est (1 Mach. 4,53-58; 2 Mach. 2,20; 10,1-8); ut eius beneficii ac gaudii perennis maneret memoria et actio gratiarum, « statuit Iudas et fratres eius et universa ecclesia Israel, ut agatur dies dedicationis altaris in temporibus suis ab anno in annum per dies octo a quinta et vigesima die mensis Casleu cum laetitia et gaudio » (1 Mach. 4,59). Ad hanc festivitatem annum seu ad scenopegiam mensis Casleu celebrandam Iudaei palaestinenses invitant Iudaeos alexandrinus duabus illis epistulis, quae 2 Mach. 4,1-9 et 4, 10-2,19 (graece 2,18) leguntur. Haec celebrata annua commemoratur quoque Ioan. 10,22 : « facta sunt encaenia in Ierusalem et hiems erat ». Est scilicet mensis Casleu tempus Decembris. Eo festo Iesus docebat in porticu Salomonis; Iudaei eum volebant lapidare quia adeo clare suam asseruerat divinitatem. Iesus autem inde abiit trans Iordanem (Ioan. 10,22-40). Celebrabantur encaenia per octo dies domibus festivo modo illuminatis. Flavius Iosephus, postquam dedicationem templi a Iuda factam commemoravit, pergit : et ex eo tempore in hodiernum usque diem celebramus id sollemne quod dicitur Lumina (Φῶτα), hac, ut opinor, appellatione festivitati indita, quod illa nobis ex insperato affulserit agendi potestas (Ant. XII. 7,7). De ratione et modo lucernas accendendi et de numero quem Iudaei posteriores observare solebant refertur apud *Ugo- lini*, Thes. IV. p. 380 et 1057 ss. — Quae historiam institutionis encaeniorum spectant, vide s. v. *UDAS* 1.

DELEAN (דִּלְיָן, דללון), urbs tribus

Iuda, in secunda provincia Sephelae enumerata (Ios. 13,38). De situ nonnisi coniecturae exstant.

DELPHON (דִּלְפֹּן, Δελφών, in quibusdam mss. καὶ ἀδελφών et τὸν Δελφών), secundus ex decem filiis Aman (Esth. 9,7).

DELUBRUM ponitur in Vulgata non solum iis in locis ubi in textu originali de templis vel sacrariis idolorum sermo est, uti Ier. 43,12. 13; Os. 8,14; Ioc. 3, 5 et de locis diis sacris 2 Mach. 10,2 et 11,3 (τεμένη), verum etiam pro hebr. דְּמִזְבֵּי־קֹדֶשׁ qua voce designantur columnae ad aras Baal appositae quae dei erant symbola et soli sacra; ita Is. 17,8; 27,9; Ez. 6,6; 2 Par. 34,7; legitur quoque Is. 65,4 pro hebr. מְצֻרֵי־לֵזָאוֹיִם; videntur intellegi specus, loca abdita; item Is. 13,22 : in delubris (i. e. in palatiis) voluptatis.

DELUS (Δῆλος) insula in mari Aegaeo minima inter Cyclades recensetur 1 Mach. 15,23 inter illas regiones, quibus Romani anno 139 a. Chr. scripserunt, ne Iudaeis mala inferrentur. Erat sedes praecipua cultus Apollinis; in hac insula Apollo eiusque soror Artemis (Diana) nati esse credebantur. Ibidem Antiochus IV. Epiphanes altare (Apollinis) statuis circumdedit (*Polyb.* XXV. 10,12). Incunte saeculo 2. a. Chr. mercatores Tyrii in Delo insula coloniam condidisse traduntur (*Corp. Inscript. Graec.* 2271). Iudaeorum in Delo mentio fit apud Flav. Iosephum (Ant. XIV. 10,8. 14). Unde recte supponitur Iudaeos iam circa a. 139 a. Chr., de quo 1 Mach. 15,23 agitur, in Delo fuisse, etsi non quoad singulas minores urbes et insulas l. c. nominatas directa testimonia afferri possunt. Sufficit sane quod de tempore Sullae (c. 85 a. Chr.) Strabo testatur apud Flav. Iosephum (Ant. XIV. 7,2) orbem terrarum a gente Iudaeorum repleri et haud facile locum in toto orbe inveniri, quin hoc genus hominum sedibus exceperit et ab eo teneatur.

DEMAS (Δῆμας) adiutor S. Pauli (Col. 4,14; Philem. 24); non erat Iudaeus, siquidem una cum S. Luca op-

ponitur iis qui ex circumcisione erant. De eodem S. Paulus in captivitate romana altera scribit 2 Tim. 4,9: « Demas me reliquit diligens hoc saeculum et abiit Thessalonicam », quae verba alii (S. *Epiph.* Haer. 51,6) de apostasia explicant, alii de vita peccatis dedita, alii denique mitius de fuga laborum apostolicorum et amore quietis in urbe patria (Thessalonica?) consequendae.

DEMETRIUS (Δημήτριος). 1. Demetrius I. Soter, decimus rex Syriae (162-150 a. Chr.; aer. Seleuc. 151-162), filius Seleuci IV. Philopatoris, successor Antiochi V. Eupatoris (164-162 a. Chr.). A Seleuco IV. (187-175 a. Chr.) obses Romanam missus erat. Mortuo Seleuco Antiochus IV. Epiphanes frater Seleuci regnum occupavit, quod Demetrio debebatur. Post mortem Antiochi IV. (164 a. Chr.) Demetrius Roma aufugiens ad Tripolim Phoeniciae urbem appulit (2 Mach. 14,1; *Euseb.* Chron. I. 40,15 apud *Migne* 19,261 vel *ed. Schoene* I. 254). Antiochus V. et Lysias tutor eius ab exercitu suo traditi et iussu Demetrii occisi sunt (1 Mach. 7,1-4; 2 Mach. 14,1. 2). Demetrius novitati suae otium periculosum ratus finitimorum bellis opes augere statuit (*Iustin.* 35,1). Bacchidem in Iudaeam misit, ut vi armisque Alcimum pontificem Iudaeis obtruderet (1 Mach. 7,5-20). Cum Alcimus propter scelera sua a Iuda Machabaeo in angustias coniectus esset, Demetrius Nicanorem misit, is vero duobus proeliis superatus ipse interemptus est (1 Mach. 7,21-50; 2 Mach. 14,3 ss.). Sed eodem anno 161 a. Chr. brevi post hanc cladem Bacchides a Demetrio I. rursum in Iudaeam missus Iudam Machabaeum apud Laisam devicit (1 Mach. 9,1-18). Iudae, qui in ipso proelio occubuerat, successit Ionathas frater eius. Anno 158 a. Chr. Demetrius I. iterum Bacchidem contra Iudaeos misit; qui cum nihil contra Ionathan valeret, pace composita in Syriam rediit. Demetrius I. igitur per quinque annos insequentes (158-153 a. Chr.) rebus Iudaeorum se non immiscuit (9,57-73). Verum cum a. 153 a. Chr. Alexander Balas thronum Syriae appetere, Demetrius I. promissionibus

multis Ionathan sibi devincire studuit; at frustra. A Ionatha derelictus est et anno 150 a. Chr. ab Alexandro victus in proelio occubuit (1 Mach. 10,1-50).

Cf. *F. de Saulcy*, Histoire des Machabées 1880 p. 201-233; *E. Schürer*, Geschichte des jüd. Volkes etc. *éd.* 3 I. p. 170 s. 216 ss.

2. Demetrius II. Nicator, rex Syriae 145-138 a. Chr. (aer. Seleuc. 167-174) et iterum 128-125 vel 124 a. Chr. (aer. Seleuc. 184-188), filius Demetrii I. Anno 147 a. Chr. Demetrius II. cum Alexandro Bala, qui Demetrium I. regno et vita privaverat, de throno Syriae contendere coepit. Ope Ptolemaei VI. Philometoris, qui Alexandrum generum suum prope Antiochiam devicit, Demetrius II. regnum obtinuit (1 Mach. 10,67 ss.; 11, 1-49). Quamquam Ionathas Machabaeus pro Alexandro Bala contra Apollonium ducem Demetrii prospere pugnaverat (1 Mach. 10,69 ss.), tamen Demetrius II. Ionathan pontificem et principem agnovit eique litteras immunitatis a tributis misit (1 Mach. 11,20-37). In seditione Antiochensium rex auxilio Iudaeorum victor evasit (11,38. 41-52), sed promissis Ionathae factis non stetit (11,53). Interim vero Tryphone duce Antiochus VI. filiulus Alexandri Balae ex Arabia reversus Demetrium II. Antiochia expulit (11,39. 40. 54-56) et cum Ionatha foedus iniit (11,57-59). Iudaei ducibus Ionatha et Simone contra Demetrium II. felicia bella gesserunt (11,60-74; 12,24-34), donec perfidia Tryphonis Ionathas dolose captus et occisus est (12,39-54; 13,23). Brevi post Tryphon in Syriam reversus Antiochum VI. dolo interfecit, ut ipse cum Demetrio II. de throno concertaret (13,31. 32). Ex hoc tempore Iudaei duce Simone causam Demetrii II. sequebantur; is vero Iudaeis non solum tributa retro debita indulsit, sed etiam plenam ac perpetuam immunitatem a tributis concessit. Hoc igitur anno 170 aer. Seleuc. (143/142 a. Chr.) ablatum est iugum gentium ab Israel (13,33-44). Post diuturna cum Tryphone certamina Demetrius II. in Mediam progressus a Mithridate I. (Arsace VI.) Parthorum rege captus est (14,1-3). Decem annis, quibus

in captivitate retentus est (138-128 a. Chr.), Antiochus VII. Sidetes Tryphone victo et interempto regnavit (v. ANTIOCHUS 6). Dum Antiochus VII. Parthis bellum inferens in proelio occiditur, Demetrius II. e captivitate Parthorum dimissus regnum denuo occupavit (*Iustin.* 38,10; *Flav. Ios. Ant.* XIII. 8,4; *Euseb. Chron.* I. 40,20 apud *Migne* 19, 263 vel *ed. Schoene* I. 257). Regno politus statim eo usque superbiae ac levitatis progressus est, ut Ptolemaeo VII. Physconi bellum inferret; is vero juvenem quendam Aegyptium in Syriam misit, qui thronum armis peteret, composita fabula, quasi per adoptionem Antiochi VII. in familiam regiam esset receptus; juveni nomen Alexandri imponitur; a Syris cognomen Zabinae nactus est, quippe qui emptus (ἀγοραστής) a Ptolemaeo putaretur. A Zabina Demetrius apud Damascum victus primum Ptolemaida, dein navi Tyrum aufugit et ibidem navi egrediens interfectus est a. 125 vel 124 a. Chr. (*Flav. Ios. Ant.* XIII. 9,3; *Iustin.* 39,1; *Euseb. Chron.* I. 40, 20 quo loco Zabinam Alexandri Balac filium dictitatum esse legimus).

Cf. *F. de Sauley*, Histoire des Machabées 1880 p. 233-278; *E. Schürer*, Geschichte des jüd. Volkes *ed.* 3 I. p. 172 s. 232 ss.

3. Demetrius, faber argentarius, faciens aedes argentaeas Dianae, qui seditionem Ephesi in S. Paulum excitavit (*Act.* 19,23-40).

4. Demetrius, christianus fidelis (3 Ioan. 12).

DEMOPHON (Δημόφων), unus ex praefectis regionum, qui in Iudaeos sacrificia pergebant (2 Mach. 12,2), postquam Lysias, tutor Antiochi V. Eupatoris, pace cum Iuda Machabaeo composita in Syriam rediit (12,1; cf. 11,1-15).

DENABA (דנבא, Δεναβα), urbs regia Bela (Bale) regis Edomitarum, filii Beor (*Gen.* 36,32; 1 Par. 1,43). Eius nominis urbs in Edom assignari hucusque nequit. Est autem nomen, quod alibi frequentius invenitur. Erat Δάναβα in Syria palmyrena (*Ptol.* V. 15,24) [*ed. Muller-Fischer* 14,19], Δανάβη in Babylonia (*Zosimus*, *Hist.* 3,27). Teste S. Hieronymo erat villa Dannaia (Δανναία apud Eusebium) 8 mil. pass. ab Arcopoli sen Ar Moab pergentibus Arnonem et altera Dannaia super montem Phogor 7 mil. pass. ab Esbus sen Hesebon (*Onom. ed. Lag.* 114,32; cf. 249,36 mutilatum textum Eusebii), sed neutra ad terram Edom referri potest.

DENARIUS (δηνάριον) nummus argenteus romanus, aequivalens drachmam, constans decem assibus, ab anno 217 a. Chr. sedecim assibus. Denario merces diurna constuebatur (*Matth.* 20,2); simili modo Tacitus scribit de militibus, denis in diem assibus animam et corpus aestimari, ut singulos denarios mererent postulare milites (*Annal.* 1,17); stipendium militare annum pro legionariis tempore reipublicae romanae constuebatur denariis 120, a Caesare augebatur ad 225, à Domitiano ad 300 (cf. *Marquardt*, *Handbuch der röm. Alt.* III. 2 p. 76. 77). Centum denarii unam faciunt minam i. e. sexagesimam partem talenti; unde intellegitur durities servi cui remissa erant decem millia talentorum et qui tamen conservo noluit remittere centum denarios (*Matth.* 18,24. 28). Summa ducentorum denariorum ut minima efferitur Marc. 6,37, qua opus esset ut ex quinque millibus virorum unusquisque aliquid panis acciperet. Libram unguenti pretiosi quo Maria Dominum unxit in Bethania potuisse venundari plus quam trecentis denariis existimal Iudas Iscariotes (*Marc.* 14, 5; *Ioan.* 12,5). Olim insigniti erant denarii imagine deae Romae, postea imagine Caesaris (*Matth.* 22,20; *Marc.* 12, 16; *Luc.* 20,24). — De valore denarii vide s. v. PECUNIA.

DERBE (Δέρβη), urbs Lycaoniae ad quam Paulus apostolus in primo suo itinere apostolico pervenit (*Act.* 14,6. 19); ibidem cum Barnaba praedicavit et multos docuit. Inde reversi sunt Lysram et Iconium et Antiochiam. Derbe erat patria Gaii, minus ex sociis qui comitati sunt Paulum revertentem ex Graecia et per Macedoniam proficiscentem Troadem (*Act.* 20,4). Ex *Act.* 15,36; 16,1 elucet apostolum etiam post concilium apostolorum iterum invisisse coetum

fideliū in Derbe constitutum. Perperam aliqui ex Act. 20,4 collegerunt Timotheum fuisse Derbeum, cum tamen ex Act. 16,4 pateat eum fuisse ex Lystra oriundum.

DERCON v. DARCON.

DESERTUM in usu loquendi biblico est terra plus minusve inculta. Indolem regionum desertarum indicant variae voces, quibus in textu primigenio eae regiones designantur.

בִּדְבָר (*ἔρημος*, Vulgata : desertum, interdum : solitudo, rarius : eremus) est regio inculta gregibus pascendis apta (a rad. **דבר** pascere, sicut germanice *Trift* a *treiben*). Hac voce in Vel. Test. designatur praecipue magnus ille terrae tractus, qui a Sinai septentrionem versus extenditur, orientem versus a sinu Aelanitico et montibus Seir includitur, in qua regione Israelitae duce Moyse per 40 annos peregrinabantur. Itineris illius pericula describuntur Deut. 8,15 : ductor tuus fuit (Dominus) in solitudine magna atque terribili, in qua erat serpens flatu adurens et scorpio et dipsas et nullae omnino aquae, qui eduxit rivos de petra durissima. Quare apud prophetam Deus laudat populi fidelitatem, qua vocantem Dominum secutus sit in desertum (Ier. 2,2 hebr.), quamvis in ipso deserto haud semel tempore migrationis vario modo in Dominum peccaverint et ultionem divinam sint experti (cf. Ex. 16,2; 17,2; Num. 14,2; 16,2; 21,5; 25,4; Deut. 1,26; Ez. 20,8; Am. 3,25. 26). Huius magni deserti partes nominantur desertum Etham, Sur, Sin, Sinai, Pharan, Cades, Sin; desertum denique Bersabee terminat illas terras incultas et iam regiones cultas meridionales terrae promissae attingit.

Eodem nomine **בִּדְבָר** designantur desertum Iuda eiusque partes Maon, Ziph, Engaddi, Thecue, Ieruel, deinde in tribu Benjamin solitudo Bethaven, desertum (in) Gabaon, ad orientem Palaestinae desertum Idumaeae (4 Reg. 3,8), desertum Moab (Deut. 2,8), desertum Ier. 23,24 scil. arabicum et syro-arabicum, solitudo Cademoth, desertum Deblatha (sed vide s. v.), solitudo Gen. 36,24 scil. circa Callirrhoe, solitudo Gen. 37,22

prope Dothain; accedit desertum (*ἔρημος*) Bosor (1 Mach. 5,28).

עֲרָבָה (*ἔρημος*, etiam *ἔλος*, γῆ ἄνερως, Vulgata : desertum, solitudo, terra inhabitabilis, arens, deserta) est regio arida, sterilis eodem fere sensu, quo **בִּדְבָר** (cf. Is. 33,9; 35,1. 6; 40,3; 41,19; 51,3; Ier. 2,6; 50,12; 51,43 et hebr. etiam 5,6), unde saepius locis citatis in membris parallelis ponuntur **בִּדְבָר** et **עֲרָבָה**. Cum articulo haec vox designat vallem depressiorem *el-ʿAraba* et in forma plurali campestris Moab et Iericho (v. ARABA).

הָרְבֹת, plur. **הָרְבֹתִים** (*ἔρημος*, *ἐρήμωσις*, αἱ ἑρημαμέναι, *ὄνειδισμός*, *ἀφανισμός*, *οἰκοπέδον*, Vulgata : ruinae, ruinosa, desertum, solitudo, desolatio et Ps. 101[102],7 domicilium) designat siccitatem, loca sicca, vastationem, loca vastata; cf. Is. 5,17; 44,26; 48,21; 49,19; 52,9; 58,12; 61,4; Ier. 7,34; 22,5; 25,9. 11. 18; 44,22; Ez. 5,14; 13,4; 33,24. 27; 36,10. 33.

יִשְׁבִּיזֶן (*ἔρημος*, γῆ ἀνυδρος, Vulgata : vasta solitudo, desertum, inaquosum, invium) significat vastitatem, desertum (Deut. 32,10; Ps. 67[68], 8; 77[78], 40; 105[106], 14; 106[107], 4; Is. 43,19. 20) et cum articulo speciatim partem deserti Iuda prope Ziph (1 Reg. 23,19. 24 ὁ *ἱεσσαίμος*, 26,1. 3 ὁ *ἱεσσαίμος*, Vulgata 23,24 Iesimon) et parvam planitiem circa Bethiesimoth prope mare Mortuum inter septentrionem et orientem (Num. 21,20; 23,28).

In Novo Test. memorantur desertum Iudaeae (Matth. 3,1; cf. Marc. 1,4; Luc. 3,2), desertum in quo Iesus tentatus est a diabolo (Matth. 4,1; Marc. 1,12; Luc. 4,1) ad radices montis Quarantania (*Djebel Qarantal*) ut antiqua traditio fert, desertum iuxta Ephrem (Ioan. 11,54) seu desertum Bethaven, si Ephrem agnoscitur *el-Taibybe* prope *Beitin*, deserta loca in vicinia lacus Tiberiadis (Marc. 1,35. 45), desertum in quo prior multiplicatio panum facta est (Matth. 14,13; Marc. 6,35; Luc. 8,12) seu planities prope Bethsaidam Iuliada, desertum in quo altera multiplicatio panum facta est (Matth. 15,33; Marc. 8,4) ad orientem lacus Tiberiadis.

Extra Palaestinam nominantur desertum superioris Aegypti (Tob. 8,3) et Arabia (Gal. 1,17), ubi S. Paulus in solitudine ad munus apostolicum institutus est.

Desertum in S. Scriptura exhibetur velut imago mortis, desolationis, vastationis (cf. Ier. 46,19; 49,13; 50,23; Ez. 29,9; Iob 3,19; Soph. 4,2) et domicilium daemoneum (Tob. 8,3; Matth. 12,43; Luc. 11,24; Apoc. 18,2).

DESPONSATIO. Uti ex variis narrationibus colligitur, parentes providere solebant sponsam filio; cf. Gen. 24,3 ss.; 34,4; 38,6; Ex. 21,9; Iud. 14,2; exemplo Esau discimus quandoque filios etiam invitis parentibus sponsas elegisse (Gen. 27,46). Patri sponsae certum quoddam pretium solvendum erat (Gen. 34,12; 1 Reg. 18,23) vel alia erant obsequia praestanda; ita Iacob serviebat pro duabus uxoribus suis eorum fratri Laban per annos quattuordecim (Gen. 29,18. 20. 27) et Caleb promisit se daturum Axam filiam uxorem ei qui percusserit Cariath Sepher (Jos. 15,16), Saul filiam ei promisit qui percusserit Goliath (1 Reg. 17,25) et David ait: redde mihi uxorem meam Michol quam despondi mihi centum praeputiis Philisthim (2 Reg. 3,14; cf. 1 Reg. 18,25). Quando agebatur de desponsatione, etiam fratres sponsae consulebantur; ita Iacob noluit agere cum Hemor absentibus filiis, sed siluit donec redirent (Gen. 34,5). Ex Deut. 22,23. 24,25 consequitur ipsa iam desponsatione sponso et sponsae conferri iura matrimonii. Nam qui puellam desponsatam violaverit, dicitur humiliasse uxorem proximi sui et punitur ut adulter, et ipsa quoque desponsata, si alium admiserit, punitur morte ut adultera. Cum itaque desponsatione iam acquirantur iura coniugalia, in mysterio Incarnationis Angelus mittitur ad Virginem desponsatam viro; ita enim eius consulitur honori antequam tempus esset prodendi mysterium (Luc. 1,27). Ex desponsatione eo modo accepta etiam consequitur, recte loqui prophetam de *virgine* quae luceat de *viro* pubertatis suae (Iob 1,8). Si quis puellam nondum deponsatam violaverit,

dabit patri eius 50 siclos argenti et habebit eam uxorem neque unquam poterit eam dimittere (Deut. 22,28. 29). Certum pretium etiam nominatur Os. 3,2: fodi eam mihi quindecim argenteis et coro hordei et dimidio corae hordei.

Cum Messias tanquam sponsus, Ecclesia ut sponsa consideretur (Os. 1,19; Ps. 44; Is. 61,10; Ioan. 3,29), scribit apostolus: despondi enim vos uni viro virginem castam exhibere Christo (2 Cor. 11,2). Quae consideratio eo maiore iure inferitur, quia iam vetus foedus simili modo tanquam desponsatio quaedam sacra proponitur (cf. Ier. 2,2; Ez. 16,8).

DESSAU (Δεσσαύ) castellum, κάμη (2 Mach. 14,16), ubi Iudaei audito adventu Nicanoris et ope divina implorata cum hostibus congressi sunt (συμπίσσωσιν αὐτοῖς). Ceterum pagus hic ignotus est; neque iuvamur eo quod ex syriaco דשי vox explicatur tritura, vel potius ita explicari posse coniectatur.

DEUS. Natura Dei sublimi modo declaratur: ego sum qui sum, ἐγώ εἰμι ὁ ὢν (Ex. 3,14) i. e. plenitudo τοῦ esse Dei est illamque habet a se solo; quae declaratione iam continetur infinita Dei perfectio, aeternitas, immensitas, immutabilitas, potentia illa qua omnia quae esse possunt ac sunt ab eo habentur τὸ esse acceptum eique plenissime subdantur. Quae singula multoties varioque modo in s. litteris de Deo praedicantur. Ita cuncta quae existant ab ipso esse creata eiusque potentia sustineri, vide Gen. 1,1 ss.; Deut. 32,6; Ps. 32,9; 148,5; Sap. 1,14; 11,18; Eccli. 18,1; Is. 40,28; 42,5; 43,18 etc.; omnia quoque ab eo administrantur, reguntur, eius providentiae subsunt; cf. Iob 12,13-23; 23,13; 28,23-28; Ps. 45,2; 46,9; Sap. 8,1; 12,13; Eccli. 1,8 ss.; Is. 28,26; 40,22-31; 44,24-26; 45,7; Am. 5,8; 9,5. 6. 8 etc.; ipse appellatur et est Deus fortis, misericors, sanctus, magnus, propitiuss, clemens, salvator, protector, adiutor, excelsus, mirabilis, terribilis, in misericordia disponens omnia, fidelis, sempiternus, aeternus, primus et novissimus, scrutans corda et renes, iustus, revelans mysteria, laudabilis, gloriosus,

Deus zelotes, aemulator, qui gloriam suam alteri non det, cum ipse sit Deus solus (cf. Ex. 20,3; 34,6. 14; Deut. 7,9. 21; 1 Reg. 2,3; 2 Par. 30,9; Neh. 9,17; Esth. 16,4. 16; Iob 36,26; Ps. 7,10. 12; 30,3; 45,2; 67,36; 77,35; Sap. 15,1; Is. 44,6; 45,21; Dan. 2,28; 3,52; 9,14; 13, 42; 2 Mach. 1,24 etc.). Quo cognitio Dei modo etiam rudioribus apto tradatur, eius potentia, scientia aliaque attributa describuntur imaginibus ex ordine communi depromptis: oculi Domini multo plus lucidiores sunt super solem, circumspicientes omnes vias hominum et profundum abyssi et hominum corda inuentes in absconditis partes (Eccli. 23,28); si habes brachium sicut Deus et voce simili tonas (Iob 40,4); ita sermo fit de brachio Dei excelso, de brachio extento et manu forti, de magnitudine brachii eius (Ex. 6,6; 15,16; Deut. 5,15; 7,19 etc.); pariter et erunt oculi mei et cor meum ibi cunctis diebus (3 Reg. 9,3); scapulis suis obumbrabit tibi et sub pennis eius sperabis (Ps. 90,4); cum ceciderit non collidetur, quia Dominus supponit manum suam (Ps. 36,24); ecce non dormitabit neque dormiet, qui custodit Israel (Ps. 120,4); Dominus sicut fortis egrediatur, sicut vir prociator suscitabit zelum, vociferabitur et clamabit, super inimicos suos confortabitur (Is. 42,13) etc. Ut eiusmodi apta sunt ad cognitionem Dei ingerendam, ita sine ullo periculo proponi poterant quia Deum esse spiritum sine ulla corporis admixtione iam antiquitus clare docebatur: Moyses enim ulla imagine Deum representari prohibuit (Ex. 20,4; Lev. 26,1; Deut. 5,8) et de Dei manifestatione populum admonuit: vocem verborum eius audistis et formam penitus non vidistis (Deut. 4,12). Ex operibus Dei concluditur et explicatur eius magnitudo: cf. Iob 28,24 s.; 38,3-44, 25; Ps. 18,1-7; Eccli. 43,1-37; Is. 40,26; eius sublimitas declaratur comparationibus: quis mensus est pugillo aquas et caelos palmo ponderavit? quis appendit tribus digitis molem terrae? ecce gentes quasi stilla situlae et quasi momentum statera, et insulae quasi pulvis exiguus; omnes gentes quasi non sint et quasi nihil et inane coram eo (Is. 40,12-17),

qui extendit velut nihilum caelos et expandit eos sicut tabernaculum, extendens caelos solus, stabiliens terram et nullus mecum (Is. 40,22; 44,24).

In Vetere Testamento peculiari ratione sibi elegit populum Israel, quae electio iam praeparatur Gen. 9,26, dum Iahwe Deus Sem vocatur et quae in vocatione Abraham et in promissionibus ei datis primum nanciscitur effectum. Haec electio porro significatur foedere cum Abraham inito (Gen. 17), vi cuius foederis Deus se vocat Deum Abraham, Isaac et Iacob et posteros patriarcharum duce Moyse educit ex Aegypto et eos sollemni modo in Sinai assumit in peculium de cunctis populis, in regnum sacerdotale, in gentem sanctam (Ex. 19, 5,6; cf. Ier. 2,3; Ez. 16,8). Ideo Israel vocat filium suum primogenitum (Ex. 4,22) et populo singulari ratione leges praescribit ad omnem vitae rationem, domesticam, civilem, religiosam ordinandam, ita quidem, ut ipse esse velit peculiari modo eius populi rex (cf. Num. 23,21) et reges Iuda sedeant in throno regni Iahwe super Israel (1 Par. 28,5). Praeterea populum dirigit continua missione prophetarum et in rebus difficilioribus per Urim et Thummim interrogantibus respondet. Populo legem observanti adest protector ac remunerator benignissimus; recedenti a via Domini existit ultor; revertenti et veniam flagitanti praesto est adiutor.

Dum ratione plane singulari populi Israel curam gerit, simul tamen se manifestat moderatorem ac dominum omnium populorum. Etiam reliquos populos tamquam suos agnoscit filios (Ier. 3, 19); iis utitur ad sua consilia exsequenda, uti in vaticiniis prophetarum de nationibus externis pluribus proponitur. Iis quippe oraculis Deus modo sollemni declaratur gubernator ac moderator omnium, a cuius nutu ac voluntate omnia regna pendeant et qui ad sua consilia exsequenda cuncta dirigat et qui contra idola gentium suam manifestet maiestatem ac potentiam. Uti nationibus usus est ad populum suum praevaricatorem puniendum et demum in exilium abducendum, ita Cyrum aliosque reges excitat ad populum re-

ducendum et sanctuarium iterum erigendum.

Nomen Dei antiquissimum et maxime commune videtur esse El, apud Assyrios Ilu. De etymologica notione variae propositae sunt sententiae. Ita *de Lagarde* recurrens ad praepositionem אל ad, versus, El ait eum dicere ad quem omnes homines tendant, qui sit finis ac terminus desiderii omnium. Alii ex vocibus et phrasibus cognatis potius concludunt subesse radici notionem potentiae (cf. nomina hebr. pro quercu, terebintho et phrasin יש לאל est in potentia manus meae, ego possum); verum reiecta radice אל ob el (ilu) potius assumitur אלה esse validum. Inde autem derivari quoque censent Elohim, esse scil. formam pluralem vocis prioris. Ad El saepius additur Shaddai (Gen. 17,1; 28,3; Ex. 6,3) et vocatur Deus etiam Shaddai (Joel 1,13; Ruth 1,20. 21; saepius in libro Ioh); LXX παντοκράτωρ, etiam ὁ τὰ πάντα ποιῶν, ὁ ἰσχυρός, Vulgata communiter Omnipotens. Vocatur Deus quoque Altissimus, Excelsus (El elion, Gen. 14, 22), Sanctus, Sanctus Israel (saepae apud Isaiam). Verum nomina frequentissima sunt Elohim, Iahwe. Discrimen inter nomina haec multis in locis adverti potest hoc: Elohim nomen Dei est quatenus creator mundi est et gubernator nationum.

Forma pluralis declarat excellentiam (pluralis excellentiae, uti grammatici loquuntur). Nomen hoc etiam quandoque attribuitur aliis praeter Deum; ita iis qui munere suo quasi personam Dei gerunt; Ex. 21,6: offeret eum dominus diis; 22,8. 28 (cf. Deut. 19,18: stabunt ambo quorum causa est ante Dominum in conspectu sacerdotum et iudicum); sed nota posse verba hebr. melius ita intellegi, ut qui disceptant inbeantur adduci ad Deum i. e. ad sanctuarium. Sed Ps. 81,4. 6 iudices appellari deos non poterit negari (sed Ps. 46,10 Vulgata: quoniam dii fortes terrae vehementer elevati sunt, LXX ὅτι τοῦ θεοῦ οἱ κραταιοί; hebr. Dei sunt scuta terrae; valde exaltatus est) et apud LXX Elohim quandoque de angelis exponitur Ps. 8, 6; 96,7. Etiam idola gentium eo nomine

designantur haud raro (Gen. 31,30; 35, 2; Ex. 12,12; 18,11; 20,3. 23 etc.).

Iahwe יהוה (LXX ζῆλος, Vulgata: Dominus) nomen est Deo uni proprium, nomen incommunicabile, quod declaratur Ex. 3,14. Uti usu huius nominis Gen. 2,4 ss. et 9,26 (Iahwe Deus Sem) iam indicatur, Iahwe praeprimis Deus dicitur quatenus peculiari foedere vel pacto se hominibus manifestat, est quasi nomen proprium Dei foederis. Quare in foedere cum Abraham ineundo apparet Iahwe (Gen. 17,1) et in promissionibus foederis adimplendi, in promissionibus messianis (in te benedicentur omnes gentes) Iahwe loqui perhibetur (cf. Gen. 22,16; 26,2 ss.; 28,13). Inde quoque fit, ut cum promissiones illae de terra danda essent executioni mandandae, Deus periodo impletionis nomen illud sollemne praefigat, quo significet se qui sit ὁ ὢν foedus illud revera exsequi, se pro sua natura foederis constantiam, immutabilitatem testari et sublimitatem et ultimum foederis illius terminum quo homines perducatur esse visionem et fruitionem ipsius essentiae divinae. Et quia Deus hoc nomine impletionem promissionum spondet, frequens est ut promissis vel etiam minis addatur dictio: et scietis quod ego sum Iahwe; ita iam Ex. 6,7; postquam enim dixit: educam vos de ergastulo Aegyptiorum et eruiam de servitute ac redimam in brachio excelso et assumam mihi vos in populum, adiungit: et scietis quia ego sum Iahwe Deus vester. Ita simul clare explicatur quo sensu dictum sil v. 3: secundum nomen meum Iahwe non scitus sum eis (Abraham, Isaac, Iacob) i. e. illi impletionem promissionum non viderunt, me non experti sunt ut Iahwe, qui scil. rem promissam in opus iam deduceret. Ea sermonum Domini clausula frequentissime legitur apud Ezechiel.

In nominibus compositis nomen Dei Iahwe apparet in forma Iahu, ia, i; porro apud Babylonios Iau nomen erat signi i quo Deus exprimitur. Unde *Schrader* cum aliqua haesitatione, *F. Delitzsch* vero sine ulla haesitatione affirmant Iau esse idem ac hebr. Iahu et nomen Dei derivari a Babylonis; et addit *Delitzsch* Iahu fuisse semper nomen

Dei populare apud Israelitas, qui Iahwe non uti soliti essent; verum Iahu, quia ex lingua hebraea intellegi non posset, esse ab eruditis sacerdotibus et prophetis mutatum in Iahwe; porro deum Iau, Iahu etiam ab aliis esse cultum, uti nomina quaedam propria apud Phoenices, Philisthaeos, Hethaeos, Hamathenses, Ammonitas demonstrent (cf. *Delitzsch*, *Paradies* p. 159-164; *Schrader*, *Keilinschriften* und A. T. ad Gen. 2,4). — Quae tamen sententia nequaquam aliis viris doctis probatur; eam oppugnabant *Tiele*, *Philippi*, *Driver* (cf. *Studia biblica*, Oxford 1885 p. 4 ss.). Et merito quidem. Nam nullo modo ostendi potest Iahu, non autem Iahwe, fuisse nominis formam usitam; ubique enim legitur et scribitur Iahwe, immo in antiqua illa inscriptione quae a Mesa rege Moab nomen habet Deus Israelitarum scribitur יהוה; proinde Moabitae ipsi sciebant nomen Dei apud Israelitas populare et commune. Porro nomen hoc in verbis compositis fuisse apocopatam in Iahu, ex indole linguae facile consequi *Driver* significat, dum e contra affirmat, non posse satis explicari quomodo ex babilonico Iau oriri potuisset Iahu; ex analogia enim et norma legum phoneticarum debuisse ex Iau fieri Iô, quae tamen forma nunquam in fine verborum compositorum deprehendatur; si autem Iô in initio nominum priorum legatur, id nullatenus ei opinioni favere, cum ex regulis linguae hebraeae eiusmodi contractio explicetur. Insuper contendit nondum esse sufficienter probatum I apud Assyrios nomen fuisse deitatis.

Alii aliunde nomen Dei Iahwe repetunt. Et *Sayce* quidem qui omnino negat nomen quoddam Iahwe in mythologia babilonica reperiri, potius ab Hethaeis eius originem quaeri posse autumat; *King* ultimam eius nominis radicem in accadico an, anu deprehendi coniectat; *Stade*, *Tiele* nomen per Moysen fortasse a Kenitis esse acceptum censent probabile (cf. *Driver* l. c.); alii etiam originem esse ex Aegypto quaerendam imaginati sunt (de ea coniectura vide *Smith-Fuller*, *Dictionary of the Bible* s. v. Iehovah).

Ab ea nominis explicatione quae Ex.

3,14 traditur, haud pauci recedere malunt et formam Iahwe tamquam formam hiphilicam accipiunt. Iis iam praebat *Clericus* ad Ex. 6,3 explicans : יהוה faciet ut sit; « uno verbo graece non ineleganter dixeris γενεστωσεν existentiae effectorem »; atque simili modo *Gesenius*, *Lagarde*, *Kuenen*, *Schrader*, *Baudissin*, *Nestle*, *Schultz H.*, *Tiele* etc. Verum bene advertit *Driver* vix in ulla lingua semitica adhiberi formam causativam verbi יהוה; neque ullam esse rationem ad eam recurrendi formam apud Hebraeos plane inauditam, vide quoque in *Zeitschr. d. D. Morg. Ges.* XXXIX. 1883 p. 566 ss.; et *Delitzsch* quoque ait sine ulla ratione contradici derivationi Ex. 3,14 propositae (l. c. p. 161), immo formam hiphilicam neque in usu biblico neque postea reperiri, unde illam explicationem plane fieri nullatenus posse. Immo aliqui ad arabicum هوى recurrerunt nomen illud explicantes de eo qui facit cadere scil. pluviam, fulgura; ita *Robertson Smith*; mitto alia explicationis portenta, uti quod *Luzzatto* proposuit nomen esse compositum ex duabus interiectionibus וה qua designatur poena et הוה qua gaudium exprimitur, inde vocari Deum auctorem boni et mali.

Varia quoque proposita sunt de quaestione, quomodo יהוה pronuntiari debeat. Non esse pronuntiandum Iehova (de quo nomine et enuntiandi modo magnopere iam indignatus est *Genebrardus*) certum est et ipsa quoque nominis explicatione Ex. 3,14 demonstratur. Ea enim patefit nomen derivari a הוה (היה) et esse similem formationem, sicut Isaac, Iacob a verbis נקב, צחק formantur; unde plane fieri nequit, ut Iehova exoriatur. Insuper notum est in textu mas. voci adscripta esse puncta vocalia, quibus Adonai legerent, cum יהוה fuerit nomen ineffabile saltem temporibus posterioribus. Si spectatur illud אהיה Ex. 3,14, forma יהוה Iahwe omnino erit praeferenda. Pro a in prima syllaba etiam testantur formae יהוה et יהוה quod Theodoretus et Epiphanius referunt de nomine Ἰζή. Quare minus probabiles sunt formae Iehewe, Ichwe, Iihwe, quae etiam propositae sunt; alii malunt

lahwa, lahawa; quod etiam propositum fuit lahwo (cf. I A Ω Gnosticorum), recedit omnino ab analogia verborum in אלה. Merito hodie communiter lahwe pronuntiatur.

Mysterium SS. Trinitatis, seu in Deo esse plures personas, quod aliqui haud bene in forma plurali Elohim innui existimabant, melius dici poterit aliquo modo obscuro significari, cum Deus loquatur : faciamus hominem (Gen. 1,26; cf. 3,22; 11,7), quis ibit nobis (Is. 6,8). Dein sapientia Dei ita describitur, ut nihil deesse videatur ad illam in propria persona constituendam (cf. Prov. 8,12 ss.; Sap. 7,22 ss.; Eccli. 24,5 ss.). Verum revelatio huius mysterii omnino pertinet ad Novum Testamentum. (v. TRINITAS).

Pariter proprium est doctrinae a Christo nobis allatae, ut Deus a nobis adorandus sit et invocandus sub nomine patris. Quod nomen Deo quidem in Vetere quoque Testamento inditur Deut. 32,6, ubi pater populi Israel dicitur, similiter Is. 63,16 et 64,8 (Iob 34,36 legitur in Vulgata pater mi, sed versiones veteres longe aliud praebent); at Christo tamen docente hoc nomen suavissimum ac consolatione plenum libera fiducia a nobis usurpari potest, cum et orare nos iubeat : Pater noster etc. et toties de patre nostro caelesti sermonem inferat (cf. Matth. 6,1. 4. 6. 18; 7,11; 10,29; 18,14; 23,9 etc. etc.). Quam indolem paternam S. Ioannes optime delineat scribens : Deus caritas est (1 Ioan. 4,8). Uti in Vetere Testamento Dei cura et dilectio in omnes describitur : diligis omnia quae sunt et nihil odisti eorum quae fecisti (Sap. 11,25), ita pariter in Novo legimus : sic Deus dilexit mundum, ut Filium suum unigenitum daret, ut omnis qui credit in eum non pereat sed habeat vitam aeternam (Ioan. 3,16) et : Deus vult omnes homines salvos fieri et ad agnitionem veritatis venire (1 Tim. 2,4). Neque minus a Christo discimus quanta cura et providentia Deus singula disponat et quam provide hominibus prospiciat (cf. Matth. 6,26-32). Homini-bus malis Deus non subtrahit beneficia sua, quo exemplo Christum ad dilectionem inimicorum nos instituit (Matth.

5,44 ss.). Dei in peccatores respicientes misericordiam depingit in parabola filii prodigi (Luc. 15,20); sed ad coercendas malas quibus in peccatum propelluntur homines concupiscentias et ad vincendum inanem terrorem hominum etiam Deum flammis gehennae peccata ulciscensem nobis depingit (cf. Matth. 5,29. 30; 10,28; 18,8); Dei in peccatores ultionem apostoli quoque verbis gravissimis describunt (Rom. 1,18; 2 Petr. 2,4; Apoc. 21,8).

I. KNABENBAUER.

DEUTERONOMIUM. Ea voce red-ditur Deut. 17,18 et Ios. 8,32 hebr. כְּתָבִיבִיבִי; dicitur quippe in lege regis : postquam autem sederit in solio regni sui, describet sibi deuteronomium legis huius (LXX τὸ δευτερονόμιον τοῦτο) in volumine, et Ios. 8,32 : et scripsit super lapides deuteronomium legis Moysi (LXX τὸ δ., νόμον Μωυσῆ), quod ille digresserat coram filiis Israel. Unde vox significare videtur exemplar (transcriptum), vel ut alii explicant : duplum, vel iterationem, repetitionem. Sed prior notio de exemplari praeferenda videtur; etiam in Targum chald. פִּתְחָן exemplar transumptum, transcriptum explicatur (Abschrift, cf. *Paul de Lagarde*, Mittheilungen IV. p. 190).

In editionibus graecis et latinis eo nomine designatur liber quintus Moysis (hebr. elle haddebarim); nomen aliqui explicant, quia, uti in synopsi Ps.-Athanasii dicitur, « post acceptam in tabulis scriptam legem Moysis veluti secundam legem (δεύτερον νόμον) sermones huius libri ex divino praecepto Israelitis promulgavit » (apud *Migne* 28,308); potius est legis explanatio quaedam, exhortatio ad legis observationem inducens et efficax. — Quaestiones Introductionis biblicae tractare non est huius loci.

DEXTRALE sc. ornamentum; quae vox significat brachiale, armillam. Ponitur in Vulgata Ex. 35,22 pro hebr. כִּכְרִי (quam vocem Vulgata Num. 31,30 reddit muraennas); eam vocem explicant de globulis aureis ex quibus ornamenta, brachialia, armillae, catellae conficiebantur; LXX περιδέρια. Num. 31,30

in Vulgata eadem voce exprimitur hebr. **צִיָּבָה** annulus (eam vocem Vulgata Ez. 16,12 reddit circulum, LXX *τροχίσκον*). Eo ornamenti genere etiam Iudith usa est (10,3).

DIABOLUS v. DAEMONES.

DIACONUS (*δίακονος*). Praeter notionem generalem de famulis, ministris, qua *δίακονος* haud raro in textu graeco adhibetur, diaconi simul cum episcopis nominantur Phil. 1,1 et 1 Tim. 3,8, quo loco simul praescribitur quales esse debeant: diaconos similiter pudicos *σεμνούς* (ita se gerant, ut aliorum reverentiam mereantur), non bilingues, non multo vino deditos, non turpe lucrum sectantes, habentes mysterium fidei in conscientia pura; et hi autem probentur primum et sic ministrent nullum crimen habentes; diaconi sint unius uxoris viri, qui filiis suis bene praesint et suis domibus. Communitur censent Act. 6,3 institui diaconos, qui curam gerant pauperum. Ad eiusmodi ministrationem, qua subsidia a fidelibus collecta indigentibus distribuuntur, etiam accommodantur monita apostoli, quibus diaconi docentur, ut cum gravitate ac dignitate se gerant, ne alia apud alios dicant (aliter loquantur superioribus, inferioribus aliter), ne dum subsidia divitum colligunt bibacitati indulgeant, ne suum ex eleemosynis lucrum quaerant, ut pura mente pauperibus ut ipsi Christo ministrent etc. Praecipit porro apostolus, ut bonus habeatur delectus eorum qui ad tale ministerium assumuntur; opus esse ut bona suae domus administratione probaverint se esse huic administrationi aptos. Erant itaque diaconi adiutores episcoporum; verum eorum munus non sola cura pauperum fuisse circumscriptum, iam ostendit S. Stephanus Act. 6,8, ostendit Philippus Act. 8,5, qui praeterea officio praedicandi sedulo incumbabant. Unde concluderis diaconos iam ab initio etiam in ministerio verbi adiutores fuisse episcoporum; eos enim ad sacrum quoddam ministerium fuisse electos etiam eo suadet, quod oratione et impositione

manuum ab apostolis consecrabantur ad munus illud obeundum (Act. 6,6).

Ad curam pauperum habendam etiam mulieres pro mulieribus esse electas, ostenditur Rom. 16,1, ubi Phoebe nominatur *δίακονος* ecclesiae quae est in Cenchrus. Neque tamen de eiusmodi feminis diaconis sermo erit 1 Tim. 3,9: vidua eligatur non minus sexaginta annorum etc.; nam quae sunt ita aetate provectae, potius ipsae indigent ministratione aliarum; sed hae accensendae erunt iis de quibus apostolus loquitur l. c. v. 16, scil. quibus ut vere viduis ecclesia providere debeat, quia antea se ministerio pro aliis impenderint; proin eas videtur describere quae antea fuerint *δίακονοι* et quae nunc recipiantur in numerum eorum quae beneficio sustentationis e fidelium oblationibus fruuntur.

DIADEMA (*διδάγμα*) ornamentum capitis regum; vox ponitur in Vulgata pro **כִּתְרֵה** 2 Reg. 1,10; 4 Reg. 11,12; 2 Par. 23,11; etiam pro **כִּתְרֵה** corona 2 Reg. 12,30; Cant. 3,11; his quoque pro **כִּתְרֵה** tiara, fascia capiti circumvoluta Iob 29, 14 et Is. 62,3; in libro Esth. (1,11; 2,17; 6,8) ponitur pro **כִּתְרֵה** (*χίτρεος*, *αλδαρεος*): cidarim Persae regum capitis vocabantur insigne; hoc caerulea fascia albo distincta circuibat (cf. *Curtius* 3,5). Frequentius legitur *διδάγμα* 1 Mach. 4,9; 6, 15; 8,14 etc. de fascia candida quae tiaram circuibat.

DIANA (*Ἄρτεμις*), magna Diana Ephesiorum, ab Artemide Graecorum, sorore Apollinis, distinguenda Ephesi praecipue colebatur (Act. 19, 24. 27. 28. 34. 35). Eius nomen primitivum erat *Ἥρα* seu *Θήρα* (*Macrob.* Saturn. V. 22). Templum celeberrimum habebat Ephesi (vide s. v.), quod artifices imitatione expresserunt confectis parvulis aediculis argenteis, quae tamquam sacra pignora, amuleta et phylacteria, a cultoribus Dianae avidè emebantur ac gestari solebant.

Cf. I. T. Wood, On the antiquities of Ephesus having relation to Christianity in Trans. of the Soc. of Bibl. Arch. VI. 1878 p. 328; F. Vigouroux, Le Nouveau Test. et

les decouv. archéol. mod. *ed.* 2 p. 282-287; *Partly-Wissowa*, Real-Encycl. der klass. Altert. II. 1372. 1373.

DIBON (דִּיבֹן; LXX Διζών ul plurimum). 1. Urbs transiordanica primum a Moabitibus, deinde ab Amorrhæis occupata (Num. 21,30 cf. v. 29), sita in regione, quam Rubenitiae et Gaditae ad pastum gregum suorum uberrimam a Moysæ expostularunt et portionem acceperunt (Num. 32,3; Jos. 13,9), a filiis Gad reaedificata (Num. 32,34), sed tribui Ruben assignata (Jos. 13,17); notare iuvabit terminos inter fines Gaditarum et Rubenitarum utpote pastorum vix accurate servari potuisse. Eadem recensetur statio Israelitarum Dibongad דִּיבֹן-גָּד, Διζών Γάδ) inter lieabarim et Helmondeblathaim (Num. 33, 45. 46); additum *Gad* haud dubie eo explicandum est, quod Gaditae urbem reaedificaverunt. Tempore Isaiae et Ieremiae a Moabitibus recuperata erat; nam saepius in oraculis propheticeis contra Moab editis commemoratur (Is. 45,2; Jer. 48,18. 22) neque alia urbs quam Dibon intellegatur oportet Is. 45,9 (דִּיבֹן, Διζών, Vulgata : Dibon), ut iam S. Hieronymus ad h. l. monet et plerique propter allusionem ad דָּם (sanguis) a propheta intentam censent. Dibon ut urbs regia moabitica etiam confirmatur in inscriptione Mesa regis, qui se vocat Dibonitam (lin. 1; cf. lin. 21. 28). In eadem inscriptione (lin. 3) legitur : feci hoc excelsum pro Chamos in Qorcha; explicant autem Qorcha ex arabico calvitium, locum excelsum et glabrum illudque sumunt pro antiquo nomine vel saltem pro parte urbis Dibon, unde prope Dibon vel in ipsa urbe sanctorum Chamos in colle positum fuisse infertur, ut etiam Is. 15,2 aperte innuitur; cf. S. Hieron. ad h. l. Describitur ab Eusebio et S. Hieronymo villa pergrandis iuxta Arnonem (Onom. *ed. Lag.* 249,43; 115,8). Hodie *Dibān* hora et dimidia ab Arnone aquilonem versus distans, prope Aroer et iuxta viam, qua ab Ar Moab Hesebonem itur. In ruinis *Dibān* celeberrima illa inscriptio Mesa regis Moab reperta est (v. MESA).

❧ Cf. *Tristram*, Land of Moab p. 132 ss. (sed cf. p. 105); *J. Fahrngruber*, Nach Jeru-

salem *ed.* 2 II. p. 132; Zeitschr. d. D. Pal.-Ver. II. 1879 p. 8 ss.; *D. Zanechia*, La Palestine d'aujourd'hui 1899 II. p. 101. 102; *F. Buhl*, Alt. Pal. 1896 p. 268; *Bliss*, Expedition to Moab and Gilead in *Pal. Expl. Fund.* Quart. Stat. July 1895 p. 227-228. *J. P. van Kasteren* apud *Vigouroux*, Dict. de la Bible II. 1409-11.

2. Dibon (Neh. 11,25) v. DIMONA.

DIBONGAD v. DIBON 1.

DIDRACHMA (διδραχμὸν) est nummus argenteus, duas continens drachmas atticas, et aequans dimidium siclem. Erat tributum quotannis ab Israelitis templo Domini solvendum; de quo vide *Knabenbauer* ad Matth. 17,23. In Vulgata de didrachmis quoque mentio est 2 Mach. 4,19; 10,20; verum graece scribuntur ibi δραχμαί. — De valore vide s. v. PECUNIA.

DIDYMUS cognominatur S. Thomas apostolus (Io. 11,16; 20,24; 21,2); v. THOMAS.

DIES (דִּיּוּמָה, ἡμέρα), nomen primae filiae Iob, quae ei post sanationem a morbo nata fuit (Iob 42,14). Appellari poterat Dies i. e. clara, lucida, pulchra ut dies; probabilius autem appellabatur Columba (arab. *Yamām*); v. COLUMBA 3.

DIES. Dies dupliciter intellegitur. Modo designat diem solis luce clarum, modo comprehendit et diem et noctem. Utrumque habetur Gen. 1,14 : « Fiant luminaria in firmamento caeli et dividant diem (הַיּוֹם) ac noctem et sint in signa et tempora et dies (יָמִים) et annos »; quo loco dies opponitur tum nocti tum anno. Alterum autem exprimitur voce αἰὼς apud 2 Cor. 11,23.

Quando dies incepit tempore patriarcharum, certo sciri nequit. Sola creationis narratio aliquid indicat notissimis illis verbis, quae finitis singulis operibus adduntur : « et factum est vespere et mane בָּקֶר וָעֶרָב הָיָה יוֹם » dies unus » vel « secundus » etc. Ex quo dicendi modo effici videtur, primo mane unum diem absolutum esse, alterum incepisse, neque quidquam refert ad nostram rem, utrum vox diei (יּוֹם) proprio an translato sensu intellegatur.

Moysis tempore diem vespere incepisse in Lege clare enuntiatum est; de paschatis sollemnitatem haec praecipitur: Primo mense, quarta decima die mensis ad vesperam comeditis azyma usque ad diem vigesimam primam eiusdem mensis ad vesperam (Ex. 12,18) et de die festo expiationum: A vespera usque ad vesperam celebrabitis sabbata vestra (Lev. 23, 32). Samsonis sodales, quibus propositum problema intra septem dies convivii solvendum erat, dicuntur id septimo die ante solis occubitu solvisse et sponsorshipem vicisse (Iud. 14,18). Verba Ps. 54,18: «Vespere et mane et meridie narrabo et enuntiabo» eandem numerandi rationem exhibent.

Quo autem vespertini temporis momento, utrum solis occasu an prima nocte, novus dies inceperit, ex litteris divinis certo cognosci nequit. Ex locis Ex. 12,6; Lev. 23,5; Num. 9,3 apparet Iudaeos Phase Domini, quando immolandus esset agnus, celebrasse בין הערבים i. e. inter duas vespere. Tempus illud accuratius definitur Deut. 16,6: «Immolabis Phase vespere ad solis occasum» (בֵּין עֶרְבֵי כְבוֹד הַשֶּׁמֶשׁ). Ex his locis colligit Corn. a Lapide (in Ex. 4,21) primam vespere esse, cum iam sol declinat ad occasum, secundam esse ipsum solis occasum. Alii proferunt secundam vespere usque ad finem crepusculi vespertini: donec egrediantur astra (cf. Neh. 4,21). Crepusculum autem produci solet, quoad sol ad sextum gradum vel sextum cum dimidio directe infra horizontem lapsus est, quod spatium Hierosolymis tempore paschatis erat fere semihora.

Ceterum illa temporis determinatio: *inter duas vespere* a variis sectis Iudaeorum vario modo accipiebatur. Samaritani et Karaitae verbis Deut. 16,6 innixi primam vespere vocari censebant occasum solis, alteram crepusculum; cf. *Aben Esra* in Ex. 12,6. Pharisei vero et Rabbanitae, quorum sententiam *Rabbi Iarchi* in Ex. 12,6 exhibet, primam vespere intellegebant tempus, quo sol declinare incipit (arab. *vesperulam*, ubi *vesperascere* coepit, graece *δελγη πρωτα*), alteram vespere solis occasum (graece *δελγη δψτα*). Ex iis, quae Flav. Iosephus

habet (Bell. iud. VI. 9,3 et Ant. XIV. 4, 3), Phariseis tempus inter duas vespere interiectum erat ab hora nona diei usque ad undecimam i. e. ab hora tertia pomeridiana usque ad quintam. De sacrificio iugi vespertino, quod etiam inter duas vespere offerendum erat (Ex. 29,39. 41; Num. 28,4.8) docet *Mishna*, Pesachim 5,1: «Sacrificium iuge mactabatur hora octava et media et offerebatur nona et media, at vespera sabbati mactabatur septima et media ac offerebatur octava et media tam die profesto quam die sabbati». Ad quem locum notat *Maimonides*: «Initium temporis sacrificii iugis vespertini est a media hora septima usque ad finem diei; estque tempus quo umbra se dilatare incipit et unicuique ostendit longitudinem suam» et *Bartenora*: «Tempus mactationis sacrificii iugis est, quando se inclinant umbrae vespertinae, quod est ab hora sexta et media ac deinceps, quando sol inclinat versus occidentem; nam media sexta et media septima consistit in medio caeli et umbra non inclinat se, sed umbra hominis tota sub illo est. Dilatabant ergo tempus mactationis duas horas, propter vota et sacrificia spontanea, quae offerri non poterant post sacrificium iuge vespertinum» (apud *Surenhusium*, *Mishna* II. p. 150). Sed in hac quaestione notatu dignissima sunt, quae *D. Chwolson* (Das letzte Passamahl Christi u. der Tag seines Todes, St. Petersburg 1892, p. 37 ss.) ex discussione variorum textuum rabbinicorum erui posse existimat scil. tempus *inter duas vespere* fuisse crepusculum ab occasu solis (ineunte) usque ad apparitionem trium stellarum mediae magnitudinis (quibus tamen Venus non accensebatur) et huic crepusculo Iudaeos in Palaestina assignasse $1\frac{1}{3}$ — $1\frac{1}{2}$ horas.

Practerea in S. Scriptura varia diei tempora designari solent ex iis, quae ordine naturae per decursum diei fiunt; ita Gen. 19,15 hebr. cum ascenderet aurora; 32,24 usque ad ortum aurorae; 19,23 sol egressus est super terram et Lot ingressus est Segor; 32,31 ortusque est ei (Iacob) statim sol, postquam transgressus est Phanuel; Marc. 16,2 orto

iam sole; Gen. 18,1 in ipso fervore diei; 1 Reg. 11,11 ingressus est Saul media castra in vigilia matutina et percussit Ammon usque dum incalesceret dies (hebr. usque ad fervorem diei, uli Gen. 18,1); Prov. 4,18 dies perfectus, hebr. בְּכוֹן הַיּוֹם, stabile diei, meridies scil. quo sol videtur stare immotus, vel ut alii explicant, erectum, ut scil. distinguatur a tempore diei ascendente ad meridiem et descendente ad vesperam; Iud. 19,8 donec increseat dies; 19,9 dies ad occasum declivior est et propinquat ad vesperum; Gen. 24,63 inclinata iam die, hebr. appropinquante vespera; Gen. 15,12 hebr. sol erat prope occasum (וַיְהִי הַשֶּׁשֶׁשׁ לְבֹאֵם); 15,17 sol occubuit etc.

Dies alicuius saepius dicitur de mortis die; cf. 1 Reg. 26,10; Iob. 18,20; Ez. 21, 29. Apud prophetas dies Domini appellatur tempus, quo Deus iudicium est exerciturus; cf. Is. 2,12 dies Domini exercituum super omnem superbum; 13,9 ecce dies Domini veniet; Lament. 2,1. 22 in die furoris Domini; Soph. 1,7 dies Domini, 1,14 dies Domini magnus, 1,15 dies irae dies illa etc. Similiter in Novo Testamento dies Domini dicitur de altero adventu Christi ad iudicium et de iudicio universali; cf. 1 Cor. 3,13; 5,5; 2 Cor. 1, 14; Phil. 1,6 (usque in diem Christi Iesu; item 1,10; 2,16); 1 Thess. 5,2; 2 Thess. 2,2; vel etiam solummodo dies Hebr. 10,25: tanto magis quanto videritis appropinquantem diem. Sed Apoc. 1,10: fui in spiritu in dominica die, ἐν τῇ κυριακῇ ἡμέρᾳ explicandum est de die primo hebdomadis, qui illud nomen sortitus est ob resurrectionem Christi. Primum enim diem hebdomadis celebrem ac sacrum esse habitum a primordiis rei christianae, iam patet Act. 20,7 et 1 Cor. 16,2; in epistula quoque Barnabae legitur cap. 15: « agimus diem octavum in laetitia, in quo Iesus e mortuis surrexit »; et cf. *Dionys. Corint.* apud *Euseb.* *Hist. eccl.* 4,23.

I. G. HAGEN.

DIEVI (aram. דִּיּוּאִי, LXX Δευαῖοι) sunt gens Persarum subiecta imperio Esd. 4,9 commemorata. Asenaphar eos

in Samariam colonos deduxerat ex propriis sedibus. Ili Iudaeis ab exilio in patriam reversis et moenia Hierosolymorum aedificantibus etiam litteris ad Artaxerxen regem datis simul cum aliis populis obstituerunt. Quod inter Susanechaeos et Aelamitas recensentur, tribus susiana vel aelamitica putantur. Sinite Dievi iidem ac Δάοι sive Δάοι ab Herodoto (1,125) et Strabone (VII. 3,12), vel *Dahae* a Livio (35,48) et Curtio (8,3) memorati trahatque ab iis suum nomen provincia *Dahistan*, magis incerto continere quam probabiliter ostendere videntur.

F. ZORELL.

DILUVIUM (hebr. מַבּוּל forte a rad. assyr. מַבַּל *destruere*; LXX καταλυσμός a καταλύω = inundo) appellatur ingens illa inundatio, qua, quemadmodum refert liber Genesis, aetate Noë, ulciscendorum humani generis scelerum gratia terra conlecta est universa omnesque homines exstincti sospitibus Noë eiusque familia; unde alibi nuncupatur « aquae Noë » (Is. 54,9), « tempus iracundiae » (Eecl. 44,17). De eo in libris divinis agitur hisce locis: fuse narratur Gen. 6,1-9,19; obiter de eo aliquid perstringitur Sap. 10,4; 14,6. 7; Eecl. 16, 8; 44,17-19; Is. 54,9; Matth. 24,37-39; Luc. 17,26. 27; Hebr. 11,7; 1 Pet. 3,20. 21; 2 Pet. 2,5. — Iam primum ea tractabimus quae immediate diluvium praecesserunt, dein de ipso diluvio dicemus, denique subiungemus ea quae statim post finitum diluvium acta sunt.

I. Ante diluvium (Gen. 6,1-7,9). Praecessit tempus scelerum corruptionisque plenum (Gen. 6,1 ss.). Haec enim Deo fuit ratio tanta poena terram afflictiendi, quia viderat « quod multa malitia hominum esset in terra et cuncta cogitatio cordis intenta esset ad malum omni tempore »; quo versu dilucide improbitas hominum describitur ut intensive et extensive magna (« multa »), interna (« cogitatio cordis »), totalis (« cuncta »), radicalis (רָק רָק non nisi mala),

perpetua et habitualis (« omni tempore »), unde non mirum quod paenitebat Deum fecisse hominem in terra,

non utique eo modo quo homines paenitet, decrevitque hoc genus peccaminosum ex terra delere. Peccata autem quibus numen irritaverant fuere haec : peccata carnis per scelestas atque libidinosas connubia, violentia et iniustitia (הַכֹּזֵם), superbia ac contumacia (Sap. 14,6; Eccli. 16,8), frivola propriae salutis negligentia cum « praeconem iustitiae » Noë contempserunt, « increduli fuerunt », « exspectabant (verliessen sich auf, se reposaient sur) Dei patientiam », « edebant et bibebant : uxores ducebant, et dabantur ad nuptias usque in diem qua intravit Noë in arcam, et venit diluvium et perdidit omnes ». Solus Noë, vir iustus et perfectus fideique plenus, invenit gratiam coram Deo et a communi exitio cum suis domesticis cumque animalibus necessariis praeservabatur. Instrumento uti ad perdendos impios Deus voluit aquarum inundatione, ad iustos cruendos arca, i. e. navigio quodam permagno ligneo, quod a Noë construi iussit, indicatis accurate materie, forma, dimensionibus (cf. art. ARCA NOE).

Maxima hic ea quaestio est qui fuerint « filii Dei » (בְּנֵי הָאֱלֹהִים) et « filiae hominum » (בְּנוֹת הָאָדָם), e quorum connubiis generatio tam prava orta esse perhibetur. *Angelos* esse filios Dei quidam censuerunt, quod hi alibi eo nomine co-honestentur et hoc loco propter oppositionem ad natas hominibus filias aptissime intellegi videantur. Tamen cum fieri prorsus nequeat, ut purus spiritus matrimonium ineat (לֵקַח לְאִשָּׁה), et hic solorum hominum referantur peccata et soli homines puniti esse dicantur, interpretes catholici nunc vix non omnes « filios Dei » interpretantur *Sethitas*, secuti Ephraem Syrum, Chrysostomum, Theodoretum, Augustinum, Procopium, Rupertum, alios, et בְּנוֹת הָאָדָם filias *ceterorum* hominum scil. qui non a Seth originem traxerunt : quam sententiam eo confirmant quod Luc. 3,38 generatio Christi per Seth et Adam ad ipsum Deum reducitur, sicut Gen. 5,1. 3 Seth ad imaginem Adae, Adam ad imaginem Dei factus esse perhibetur, quae Sethitis

sufficiens ratio esse poterat sibi imponendi nomen filiorum Dei, et quod ita planior est ratio conexus inter Gen. 4-6; maxime vero si Gen. 4,26 referri dicas natam tempore Enos filiorum Dei appellationem (v. *F. de Hummelauer* in h. l.), plana erit sententia 6,2, nec opus erit ut cum *Franz Delitzsch* mediam opinionem excogites dicasque filios Dei seu deorum fuisse homines ab angelis (utique malis) *obsessos*, praeternaturalibus viribus praeditos a daemonibusque adactos ut daemoniacis artibus ac praestigiis mulieres effascinant sibi que copularent. Ex his igitur Sethitarum ad id tempus proborum cum stirpe iam depravata matrimoniis natum est genus moribus corruptis ac mente perversa Deoque ipsi infensa. Utrum ad hos solos ex mixtis ut ita dicam matrimoniis ortos filios nomen gigantum (גִּבּוֹרִים) referatur an ad maiorem partem vel etiam totum genus hominum, quod tum in terra erat, minus constat. Nomen (forte a rad. assyr. פֹּל = potentem, robustum esse) certo significat « gigantes », homines statura ac robore aliis potiores (Num. 13,34), ad quales progignendos matrimonia coniugum diversarum prorsus stirpium idonea esse nonnunquam observatum est.

Hi igitur « superbi gigantes » cum repressent terram sua iniquitate, Deum taedere quodammodo suorum operum coepit et iterato, ut videtur (Gen. 6,3. 7. 13), cum Noë sua consilia communicavit. Prima quidem sententia (6,3) mitior fuit, sive dicis hic Deum tantum diuturnam eousque hominum vitam ad mensuram annorum 120 redegisse, sive interpretaris cum statuisse genus humanum abolere quidem, sed spatium 120 annorum, quo resipiscere poenamque avertere possent, dedisse. Secunda sententia (6,7) iam est clarior atque universalior. Terlio (6,13) Deus Noë pro eius pietate eo remuneratur, quod cum ad se suosque servandos arcam aedificare iubet. Cum homines scelesti Noë ne fidem quidem praestarent, nedum converterentur, cumque tempus longanimitatis effluxisset, Deus tandem exequi quae praedixerat instituit, praee-

pilque patriarchae, ut cum coniuge, tribus filiis filiorumque uxoribus arcam ingrederetur. Ingressa sunt simul animalia numero definito, portam arcae ipse claudere dignatus est Deus incepitque post 7 dies diluvium.

II. Ipsum diluvium (Gen. 7,10-8,14). Anno vitae Noë 600., mense 2., die 17. incepit diluvium, initio anni computato ab autumno an a vere, inter doctores non convenit. Tum rupti sunt omnes fontes maris magni (hanc enim significationem תְּהוֹמֹת, ut vox assyr. *ti-hamtu*, fere habere solet : aliquo igitur modo aqua maris super continentem irruisse censenda est; Vulgata : abyssus magnae) et cataractae caeli apertae sunt, i. e. nubes atmosphaerae terrestres effundi coeptae sunt (cf. Is. 24,18; 4 Reg. 7,2; Mal. 3,10) et pluvia cecidit 40 diebus totidemque noctibus. Quo factum est ut in dies inundatio cresceret; « multiplicatae sunt aquae » immanemque arcae molem « elevaverunt in sublime a terra » (Gen. 7,17), tandem « omnia repleverunt in superficie terrae... operisque sunt omnes montes excelsi sub universo caelo, 15 cubitis altior fuit aqua super montes quos operuerat » (ib. 7,18-20), mensura sumpta probabiliter ab arca undis immersa. Quo effecit Deus id quod voluit : omnia enim animalia, quae extra arcam relicta erant, nempe praeter aquatica, universique homines exceptis iis qui in arca Dei manu gubernata (Sap. 14,6) erant, interempti sunt.

Ea aquarum altitudo demum inde ab 150. post inceplum diluvium die paulatim minuebatur. Tum enim Deus, recordatus Noë, adduxit ventum calidum vehementem super terram, quo sensim aquarum copia evanescibat, nec dubium quin simul etiam aliis modis aqua diffusa ac remota sit, ita ut iam 17. die mensis septimi arca in montibus Ararat (Vulgata : super montes Armeniae) subsisteret ac primo die decimi mensis montium conspecta sint cacumina. Post 40 inde dies Noë per fenestram corvum emisit ad explorandum rerum statum, qui in ipsam arcam amplius non rediit; deinde ter, septenis interiectis diebus

columbam misit, quae primum, cum residere nusquam potuisset, reversa est, tum ramulum olivae florentem ore retulit, denique cum tertium evolasset, reversa iam non est. Unde iure Noë animo coniecit, iam extra arcam in terra rursum vitam agi posse. Ac reapse sequentis suae vitae anni (601.) primo die Noë ipse, sublato paulum tecto, vidit terram esse siccam; secundi dein mensis die 27. omnino arefacta erat, ut iam incolae iterum posset; quare iussu Dei ex arca egressi sunt. De hoc diluvio iam quaestiones ponemus et quidem 1. de narratione biblica, 2. de ipsa re narrata seu de ipso diluvio.

1. Narratio, inquirunt, 1) *sitne una auctoris* an e duabus diversis ab aliquo « redactore » composita vel conflata in unum; haec enim posterior sententia Criticis modernis arrisit. Unam esse relationem probari certo potest. Neque enim solum tota illa methodus s. textum discerpenti et variis auctoribus adscribendi est tam arbitraria, subtilis, ac fundamento destituta, ut merito reprobetur; sed hic speciatim nullas solidas rationes afferunt, quibus sua placita sustentent. Duas quidem relationes non prodit nomen divinum positum hic Jahwe, illic Elohim : nam neque quod quoque loco nomen primitus scriptum fuerit, liquido dicere possumus, neque deest nobis ratio ac via, cur modo unum modo alterum adhibitum videamus, apte explicandi (v. *Cornely*, *Introd. ed.* 2 II. 1 p. 103; *Hummelauer*, *Comm. in Gen.*, *Introductio*).

At enim omnia aiunt bis referri : ergo duas haberi narrationes. Nihilominus si accuratius exempla ab iis allata inspiciantur, deprehendimus modo non idem dici (v. g. 6, 22 = Noë arcam aedificavit, 7,3 = proxime imminente diluvio animalia collegit ingressumque in arcam praeparavit), modo posteriore loco aliquid novi addi (7,6 et 7,11 e. g.), modo eadem repeti eo modo qui et narratori seni et testi oculato eventus tam grandis atque horrendi fuerit admodum congruus. Deprehendimus utramque illam narrationem, elohisticam et jahwisticam, fore separatim valde mancama et mutilatam (cf. *Cornely*, *Introd. ed.* 2

II. 1 p. 113). Quin etiam adversarios deprehendimus admirantes hanc narrationem, quae, quamvis sit ex frustis consuta, sit « exemplum simplicitatis cum maiestate copulatae grandisque pulchritudinis sine adminiculis artis »; « tautologiis relationis depingi terribilem immensi aequoris vastitatem tutoque supernatans, terroribus mortis circumdatum, arcae asylum » (*Franz Delitzsch*, *Neuer Commentar*). Habent igitur, quo explicant, etiamsi unum auctorem supponant, repetitiones.

Contradictiones quoque sibi reperrisse visi sunt, quae duos diversos auctores proderent. Verum quod 7,4 tantum pluvia praedicitur, sed 7,11 aliae insuper causae agunt, haec et talia non inter se pugnare facile patet, neque quod primum de omnibus animalium generibus bina, postea accuratius de animalibus mundis ac de volucribus septena [paria] in arcam Noë inferre iubetur. Imbrem 40 dierum et augmentum inundationis usque ad 150. diem non discrepare evidens est.

Ceterum unam esse et continuam mosaicam relationem unicuique certo persuadebitur inspecta narratione illius tabulae cuneiformis, qua, si ab additamenti poetici et polytheistici abstrahas, prorsus eadem eodemque ordine referuntur quae Gen. 6-9, quo elucet iam ante Moysen has narrationis partes hoc ordine in traditione fuisse conexas, elohisticas et iahwisticas (v. tabellam in *Vigouroux*, *La Bible et les découvertes* mod. ed. 6 I. p. 310 ss.; *Zeitschrift für kath. Theol.*, Innsbruck 1885 p. 633). Altera quoque nuper a *V. Scheil* inventa tabula babylonica vetustissima particulas « elohisticas » et « iahwisticas » continet.

2) *Ex quo fonte Genesis auctor diluvii narrationem hausert*, si quis interroget, optime ei et probabilissime respondeatur, hanc depromptam esse ex traditione inde a filiis Noë ad posterum transiente, initio forte tantum verbis ab una generatione ad alteram conservata, postmodum etiam litteris mandata; narrationem Babyloniorum ex eadem traditione ortam paulatim erroribus esse depravatam. Sic enim et similitudo et

discrepantia ambarum facillime explicari potest.

2. *De ipsa re, quae narratur*, quacere possumus, 1) *silne diluvium factum historicum*. In qua re quid sentiendum sit, credentibus narrationem biblicam esse partem libri inspirati scientibusque rem s. libris ac maxime verbis Salvatoris proponi ut vere actam neque unquam aliter a quoquam catholico esse explicatam vel intellectam, dubium esse non potest. Accedit hic gravissima eiusdem traditionis per multos populos a religione revelata alienos confirmatio. Etenim inveniuntur tum in litteris nationum excultarum (ut Romanorum, Graecorum, Babyloniorum, Indorum) tum in mythis barbarorum traditiones de quadam inundatione terrae immensa, remotissimis temporibus facta, magis minusve similes relationi biblicae. Enumerat *von Schwarz* (*Sintfluth und Völkerwanderungen* p. 8-18) 63 tales mythos a narratione biblica suo iudicio independentes, indicatis in unoquoque casu populis qui tradiderint et libris quibus contineantur, atque adumbratis brevissime fabularum argumentis; *R. Andrée* (*die Flutsagen*) vero inter 88 gentium fabulas diluviales quas excutit, censet 62 esse a narratione Hebraeorum et Chaldaeorum independentes: qui numerus nescio an augeri possit; ubi primum enim in aliqua fabula quidpiam est relationi biblicae valde simile, statim suspicatur, etiamsi aliunde minus sit probabile, influxum historiae biblicae. Sunt hi mythi (excepta, ut multi dicunt, forte Africa, quae tamen adhuc minus nota est, quam ut de ea certum iudicium ferre possimus, immo secundum alios certo habet tales mythos vel mythorum reliquias) per omnes partes terrae dispersi: et quamvis variis velut coloribus picti ac quamvis ridiculis erroribus depravati sint, tamen mirum quantum multi in id fere consentiant, replese aliquando aquam totam terram, paucissimis hominibus exceptis reliquos undis interiisse, numen inundationem hominibus vel immisisse vel praedixisse, rate servatos esse superstites, cui animalia quoque et plantae impositae quaeque in monte constiterit,

homines illos servatos exstitisse novi generis humani auctores. Ac licet nonnullas ex his fabulis ad inundationes quasdam locales unius gentis revocari posse concedamus, manet nihilominus tantus in hanc rem tot tamque variarum ac dissitarum et a mari vel magnis fluvii remotarum nationum consensus, quantus casu explicari non potest, sed sola veritate rei illa traditae: ut *Lenormant* rectissime hanc traditionem appellaverit « traditionem universalem » *זאת* *העולם* inter eas quae ad historiam primitivam humani generis referuntur » et *Franz Delitzsch* animadvertit sententiam eorum qui diluvium nihil velint esse nisi fabulam quandam popularem de Oceano caelesti orbi terrarum imfluente esse aequae videlicet probabilem ac si quis asserat, quae de Alexandri Magni in Orientem expeditione narrentur, esse formam quandam mythi de sole tenebras nebulasque matulinas vincente. — Maximi inter omnes momenti est traditio Chaldaeorum tam illa quae iamdiu nota erat Berosi quam ea quae in tabulis cuneiformibus nuper inventa est, quam docti anno fere 700 a. Chr. ex tabula circiter anno 2000 a. Chr. confecta transcriptam esse dicunt (immo illam tabellam eandem narrationem continentem, quam *V. Scheil* postea invenit, ipse putat scriptam esse anno fere 2140 a. Chr. n.).

2) Ad alteram iam maxime agitatam quaestionem accedimus, *quid et quatenus diluvium fuerit universale*. Aliquam enim universalitatem verbis s. textus doceri neminem fugit legentem. Tres vero universalitatis modos vel gradus distinguere possumus, primam *absolutam* seu *geographicam*, nempe si dicas totum globum terrestrem fuisse aquis circumdatum usque ad verticem summi montis et 15 cubitis ultra; — alteram, *mixtam* seu *anthropologicam*, inundatam quidem fuisse totam terram ab hominibus tunc inhabitatam omnesque omnino extra arcam homines extinctos, ceterum regiones reliquas aquis obrutas, saltem omnes, non esse; — tertiam, *relativam*, inundatam fuisse terram omnem familiae Noë cognitam totumque hos intra limites genus humanum

exterminatum, remotas vero aliquas patriarchaeque ignotas regiones seu nationes forte ab hoc flagello divino fuisse praeservatas. Duabus quaestionibus hanc de universalitate diluvii disputationem absolvemus, nihil ipsi definientes, sed simpliciter potissimas quibus cuiusque sententiae patroni nituntur rationes proponentes.

Quaestio prior: Fuitne diluvium geographice universale annon?

Universalitas absoluta sine ulla fere exceptione assereretur per complura annorum milia, donec saec. 17. a strenuis adversariis oppugnari coepit est; littera s. textus maxime ei primo aspectu favere videtur et persuasio totius antiquitatis. Quae res nolissima est nec fusius exponenda. Propterea etiamnum a quibusdam docetur, et *Kaulen* c. g. eam iudicat fide divina esse credendam utpote a Deo nobis revelatam (*Kirchenlexikon* ed. 2 XI. 357). Nihilominus proximorum duorum saeculorum inquisitione scientifica et theologia paulatim factum est, ut a longe plurimis theologis qui ex professo de diluvio tractant, iam sine haesitatione universalitas diluvii geographica dicatur negari posse atque esse neganda. Rationes eorum sunt fere hae:

a) *S. textus admittit restrictionem geographicam*; nam vocibus *הָאָרֶץ* et *הָאֲדָמָה* aequae inest significatio terrae particularis seu regionis (*pays*, *Land*), quo sensu substituto etiam aliae quaedam expressiones universales proportionaliter acutius circumscribuntur; insuper inesse passim in S. Scriptura expressiones hyperbolicas sensu restrictiore quam sonant intellegendas conceditur, praecipue ubi agitur de vindicta aliqua divina intimanda vel describenda, qualis fuit diluvium (cf. *Soph.* 1,2-4; *Gen.* 41,34. 57; *Ex.* 8,17. 31; 10,4-6. 12-13. 19; *Deut.* 2,25; 2 *Par.* 20,29; *Act.* 2,5).

b) *S. textus etiam innuit restrictionem geographicam*. Narratio enim ex mente narratoris explicanda est: narratores ergo diluvii, Noë eiusve filii, dum sua ipsorum fata narrant, censendi sunt loqui de iis quae ipsi noverunt ac viderunt, de terra, caelo, montibus, anima-

libus ipsis notis, non de re quam non viderunt: non autem viderunt ex arca totum orbem terrarum inundatum nec omnes terrarum montes oblectos, nec dicunt sibi id esse caelitus revelatum. Praeterea intra paucissimos aliquos dies aqua a summa altitudine eousque decrevit ut arca in montibus Armeniae conserderit, quorum altissimus est fere 3700 metris humilior quam summus Indiarum mons; ergo non de montibus Indiarum locutus esse censendus est. Item columba propterea dicitur in arcam revertisse quia « aquae erant super universam terram » scil. quatenus illa volaverat; aperto quoque tecto Noë vidit exsiccataam superficiem terrae. Ex his omnibus apparet patriarcham, cum diceret « terram », non totum orbem terrarum in mente habuisse. Loci vero extra librum Genesis, cum ad Genesin referantur nec novam revelationem communicare velle censendi sunt, non ampliore sensu quam ipsa genesis explicandi sunt.

c) *Non obest huic restrictioni traditio catholica.* Operae quidem pretium is facturus est qui adhuc accuratius ac profundius scrutabitur, eequae condiciones et proprietates consensum Patrum et generatim traditionem ecclesiasticam in re cum fide aliquatenus connexa constituant talem, ut evadat certum criterium veritatis catholicae. Tamen quamvis magnus in nostra causa fuerit veterum consensus, eum non fuisse talem qui nos ad credendum obliget, ex ipso facto concludendum est, quod iam passim eorum sententia est relicta.

d) *Traditio populorum, licet constaret omnes item totam terram dicere inundatam, non obesset:* sunt enim omnes deum, ubicunque nunc sunt, posteri Noë arca servati, unde plus nos docere quam Noë nequeunt.

e) *Ex scientiis variis naturalibus depromuntur rationes quae diluvium absolute universale non admittere videntur.* Nam tandem omnia, spreto legibus naturalibus, per miracula acta esse quis, nisi reveleetur, crediderit? Primum arca ad omnes animalium orbis species capiendas censetur fuisse prorsus insufficiens; nam optimis qui nunc

sunt libris zoologicis solarum v. g. avium plus 10000 specierum exhibentur: porro quantum spatii occupatum esset nutrimento annuo huius animalium exercitus? (celerum cf. art. ARCA NOE) qui animalia calidissimorum et frigidissimorum climatum contra naturam ad arcam commigrassent? porro ex arca dimissae multae species interissent partim a feris statim devoratae partim inopia nutrimenti apti consumptae; quantus etiam labor illis 8 hominibus in arca incubisset! Omissis difficultatibus botanicis alia addimus. Nisi illa aetate vel saltem illo anno superficiem telluris alius prorsus formae fuisse supponis, non habebis in « fontibus abyssi » et « cataractis caeli », quales intelleguntur communiter, satis aquae ad montes 9 chilometra altos aqua contegendos. Sunt quoque qui asserant inventos esse colliculos cineris vulcanicos inde a periodo quam tertiarium vocant certe nulla aquarum vi disiectos.

His igitur similibusque rationibus consideratis et pro certis habitis, cum etiam vestigia geologica diluvii, quae esse dicebantur, non pro talibus habenda esse in comperto sit, iam plurimi exegetae et theologi iudicant tuto posse a docenda universalitate diluvii absoluta cessari, et hoc iudicio supposito tota eorum disputatio est de quaestione altera.

Quaestio altera. Fuitne diluvium anthropologice universale annon?

Rationibus quas diximus si cui persuasum est universalitatem absolutam negandam, iam sic concludet legitime: « ergo si eo tempore, quo diluvium accidit, genus humanum limitibus illius territorii quod aquis tegebatur continebatur, fuit diluvium anthropologice universale; sin tum etiam extra hos fines homines vivebant, non fuit nisi relative universale ». Quoniam vero quo praecise tempore et ubi haec acciderint et ubi terrarum tum homines habitaverint, nos latet, directe ultra hanc disiunctionem progredi non possumus. Alia igitur ad propositam quaestionem procedunt resolvendam, quae ad hanc alteram reduci potest: « fueruntne, quo tempore diluvium accidit, extra terras aquis inunda-

tas homines »? Qui enim *universalitatem diluvii anthropologicam* defendunt, ostendunt S. Scriptura et traditione catholica negari homines, exceptis octo illis, ullos mansisse superstites : ergo decisam esse quaestionem nec licere catholico hanc universalitatem anthropologicam negare. Ad suam sententiam S. Scriptura fulciendam urgent expressiones generales quae ad homines referuntur : « homo, universa caro, universi homines, hominem quem creavi » ; « solum Noë », « paucas, i. e. octo animas salvatas » ; « originali mundo » Deum non pepercisse ; 2 Pet. 3,5 aiunt aperte doceri, ut olim mundus aqua interierit, sic sine saeculorum igne consumptum iri, sine dubio totum. Addunt Deum elegisse signum sui cum Noë posterisque foederis arcum caelestem qui ab omnibus videatur ; si autem cum parte hominum tantum foedus initum esset, eligendum fuisse signum aliquod Noachitis proprium. Gen. 9,19 porro Vulgata legit a filiis Noë disseminatum esse « omne genus hominum super universam terram ». Diluvium aiunt a Deo missum esse ad puniendos peccatores ; eos autem qui peccassent, fuisse « omnem carnem » i. e. omnes homines : ergo eatenus saltem terram fuisse inundandam, ut omnes omnino perirent. Porro quid tandem Deus promisit Gen. 9,11. 13? Namque inundationes geographicæ et anthropologicæ non-universales etiam postea factas esse scimus : ergo ne Deus videatur fidem fefellisse, videtur supponendum diluvium fuisse saltem quoad homines universale. Denique universalis, inquiunt, constansque in ecclesia catholica traditio universalitatem anthropologicam diluvii proponit velut elementum essenziale alicuius typi ab omnibus agniti et eo ipso ut veritatem cum fide catholica connexam ; etenim non potest arca esse typus Ecclesiae extra quam nulla salus est, si extra arcam quidam incolumes evaserunt.

Ille rationes, si non omnes, et aliquæ, a multis tam graves ac solidæ esse existimantur, ut censeant prorsus tenendam esse universalitatem anthropologicam et ulterius recedi ab universalitate diluvii non posse. Ac prorsus ita indicamus, cum solum posse tuto indicare :

« anthropologica universalitas potest salva fide negari », cui perspectum sit omnes modo citatas aliasque quæ afferuntur rationes esse falsas et inanes ; item, cum solum posse insuper indicare : « diluvium non fuit anthropologicæ universale », qui solidis ac certis probat argumentis, fuisse tempore diluvii homines extra territorium inundationis, vel alia afferret certa facta, quæ, nisi hoc supposito, aliter rationabiliter explicari non possunt. Talia facta vel argumenta certa adhuc allata sunt nulla.

Sed utique quaedam ex scientiis variis difficultates nascuntur subobscuræ, quæ tamen omnino facilem solutionem haberent, si diluvium non fuisse anthropologicæ universale dicere liceret. V. g. enorme discrimen quod inter Nigritas et populos Indo-Europæos intercedit multo facilius explicaretur, si ad illud efficiendum totum illud tempus quod ab Adamo creato effluxit præsto esset ; nam illud intervallum quod inter diluvium et antiquissima Aegypti monumenta, in quibus iam Nigritæ prorsus tales depinguntur quales nunc sunt ad hoc vix sufficere posse videtur. Ad eandem suspicionem alii eo adducunt, quod in multis libris legitur apud veteres Aegyptios et apud omnes tribus nigras mythum diluvialem nullum inveniri : id quod utique esset per se evidens, si hos diluvium non attigisset. Item secundum glossologos linguæ eorum populorum qui certo a Noë originem habent quorumque idiomatica Babylone confudit Deus, omnino aliter evolutæ esse videntur quam e. g. Mongolicorum. Præterea quidam populi item certo noachitici, cum suas historicas sedes occuparent, leguntur alias iam ibi nationes, quarum originem ignoramus, invenisse, e. g. in India Arii Dravidas, Medi « Protomedicos », Semitæ et Cushitæ in Chaldaea Accadios. Insuper Gen. 10, ubi populi a Noë oriundi, sane non omnes, enumerantur, maxime ii ipsi (Mongolii, Nigritæ) omissi sunt quos etiam physiologicæ et philologicæ a Noachitis multum discrepare constat. Denique dicuntur esse vel fuisse apud quosdam populos traditiones, ut apud Sinenses et Aegyptios, a diluvio illos populos esse præservatos.

Ob tales igitur rationes sunt qui suspicentur, diluvium fortasse non fuisse anthropologicæ universale, et solvere conantur aliquas difficultates contrarias: in eadem narratione, aiunt, expressiones « omnis terra, omnia animalia » accipere sensu restricto, « omnis homo » contra sensu prorsus absoluto esse duplici pondere et mensura uti; in tota diluvii narratione ubique mente esse suppleendum « in terra quatenus Noë innotuerat » et sic omnes expressiones quantumvis universales restringi; sic etiam esse accipiendum « mundum originale », nempe Noë notum; S. Petrum (2 Pet. 3, 3) non comparare et premere universalitatem destructionis sed certitudinem: « tam certo quam quondam mundus aqua periit, olim caeli et terra igne comburentur »; quoniam reapse « intra limites terrae diluvio mersae » nulli extra arcam Noë salus fuisset, manere etiam sic arcam typum Ecclesiae extra quam nulla salus, non minus quam domus Rahab meretricis vel serpens athenus idem praefiguravit, licet ea tantum pro certa aliqua multitudine medium necessarium salutis essent; quaedam interdum elementa alicuius typi magis peti ex modo quo ii in s. litteris exhibeantur quam ex rerum veritate: sic regem Melchisedech patre quidem et matre et genealogia non caruisse ac certe natum mortuumque esse, sed his in V. T. silentio pressis factum esse ut ille a S. Paulo diceretur « sine patre, sine matre, sine genealogia, neque initium dierum neque finem habens », eoque « assimilatus filio Dei » (Hebr. 7, 3). Arcum caelestem, pius illud universale diluvii non iterum futuri dicere forte possint ideo a Deo electum esse quia reapse hoc promittere voluerit omnibus hominibus, etiam iis quos tum diluvium non exterminasset. Verum cum id cum ingentibus quae postea quoque acciderunt, e. g. in Asia orientali, eluvionibus vix ullo modo conciliari posse videatur, ultimum huius sententiae patronis id remansit effugium, ut illud Dei promissum negarent ad alios pertinere populos quam eos qui a Noë originem traxissent. — Ceterum considerandum illis est, an illae difficultates non possint aliter expediri. Etenim

nonne e. c. si diluvio tempus multo prius ac remotius assignes, illa exceptio a differentis speciebus humanarum (*différences des races, Rassenverschiedenheiten*) et item linguarum petita evanuerit, et reliquae fortasse simul? Nam hoc solum dicunt se vix intellegere, qui ad tantas differentias in corporibus humanis et idiomatis efficiendas suffecerit spatium temporis tam breve, quantum ab aetate diluvii secundum usitatum chronologiam computata effluxit: concedunt ergo tolli hanc difficultatem, si hoc tempus fuerit longius, i. e. si diluvium acciderit prius. Iam vero quominus hoc supponamus, nempe diluvium factum esse tempore priore, quam communiter censetur, non prohibemur. Neque enim credere debemus, e. g. seriem patriarcharum, qualis in Vet. Test. exhibetur, esse continuam aut nullum in media forte serie omissum, aut in numeris transcribendis nullum unquam errorem accidisse: et quae in monumentis hieroglyphicis cuneiformibusque litteris scripta sunt, iis fere cogimur, ut longiora temporum spatia esse elapsa supponamus. Porro quo quid est magis praeteritum atque antiquum, eo facilius e memoria excidit tantoque minus mirandum est, si qui populi hebetissimo ingenio mythum diluviale amiserunt. Sed eo quoque absentia fabularum diluvialium apud Aegyptios et Nigritas, si probata esset, apte explicaretur, quod in continente torrida africana ac maxime in Aegypto inundationes potius beneficii loco haberi assueverant, non calamitatis. Minus tamen certum est quam quidam existimant, apud illas gentes memoriam esse nullam diluvii. De ipsis enim Aegyptiis antiquis dubitant; etiam apud quosdam Nigritas repertus est mythus diluvialis a christiana doctrina independens (*Franz Delitzsch*, *Neuer Commentar*, suo loco); et si aliae tribus dicunt, suos primos parentes e fenestra vel ianua ad terram descendisse, vel simul cum animalibus ex quadam caverna ad terram devenisse, vel propter inundationem ex alia regione huc immigrasse etc. (v. *Lücken*, *Die Traditionen* etc. p. 237 ss.), nonne haec sunt reliquiae huius de diluvio traditionis? — Quamdiu igitur certa facta, quae ad negandam universalitatem

diluvii anthropologicam cogant, nulla probantur, standum omnino est in ea.

3) *Quando diluvium terram inundavit*, quaeres. Certum est consensu omnium textuum, annum illum fuisse 600. vitae Noë. A creato primo homine vero erat annus secundum textum massorethicum 1636., secundum Samaritanum 1307., secundum LXX 2242., secundum Flav. Iosephum 2236.: ante Christum natum vero secundum *Klaproth* (Tableaux historiques de l'Asie p. 11) ex textu hebr. 2350, secundum *Lüken* ex textu hebr. 2253, ex Sam. 2903, ex LXX 3134. Circa computationes temporum antiquorum adhuc multas esse quaestiones minus exploratas, et pro certo atque indubio vix quidquam haberi posse notum est. Mirum tamen est, ut traditiones quoque populares, si quid de ipso tempore diluvii dixerint, in eandem fere aetatem assignandam conspirant: nam *Lüken* (Traditionen p. 267 ss.) ostendit Armenos turrim babylonicam aedificatam attribuisse circiter anno a. Chr. 2200, Assyrios vero diluvium circiter anno 2234 vel 2316, Graecos 2300, Aegyptios 2600, Phoenices 2700, Mexicanos fere 2900, Indos 3100. Sinenses vero historiae de terribili inundatione (fluvii Hoang-ho) anno 2297 a. Chr. facta referunt. Sed ut iam innumis testimoniis monumentorum aegyptiacorum et babyloniorum satis probabile, ne dicam certum, factum est, initia horum populorum et consequenter initia recentis generis humani a Noë orti ipsumque diluvium attribuendum esse aetati antiquiori.

4) *Ubi fuerit diluvium* (suppositum ut geographice parziale), S. Scriptura non dicit. Id solum refert « super montes Ararat » sen « Armeniae » constitisse arcam. Ergo fere certe aliqua pars Asiae talis inundata fuit, ex qua ipso undarum vel ventorum impetu versus Armeniam arca ferebatur. Babylonii diluvium accidisse dicunt in inferiore valle Euphratis ac Tigridis. Haec vero quaestio intime cohaeret cum sequenti.

5) *Quomodo seu quibus causis factum sit diluvium*, S. Scriptura non amplius exsequitur, nisi quod Deo auctori illud tribuit et « ruptos fontes abyssi ma-

gnae », « apertas cataractas caeli », cadentesque pluvias per 40 dies commemorat; quae iam supra explicavimus. Non adversatur s. libro is qui asserit, aliqua omnino naturali causa (a Deo ad hoc praevisa ac praecordinata) sine immediata actione Dei hanc inundationem ortam esse, et quo melius ea quae quisque affert, tempori, loco, narrationi biblicis congruunt, eo erit hypothesis probabilior. Ab assignanda causa explicandoque eventu diluvii abstinere plerique. Generatim ii qui de ea re tractant, allegant causas vel cosmicas (ut axin terrae cum cometa collisae subito mutatam) vel vulcanicas vel orogeneticas (i. e. terras ex Oceano emergentes aliis mersis) vel sismicas (terrae motus). Unus inter alios *Ed. Suess* (Das Antlitz der Erde, 1883) repetitis circa sinum Persicum terrae motibus, et turbonibus, irrumentibus in vallem Euphratis fluvibus marinis, profluentibusque ex rupta terra aquis subterraneis diluvium biblicum seu potius narrationem chaldaicam explicabat. Sed satis immerito ei a nonnullis est applausum (ut ostenditur *Stimmen aus M. Laach XXVII. p. 1 ss.*): nam ipsa expositio nec est verisimilis nec cum s. textu congruit; facit enim diluvium valde breve, arcam in valle Euphratis deponit, territorium diluvii tam arctis circumscribit limitibus, ut forsitan ne in Noë quidem mente « tota terra » inundata sit ac vix intellegi possit, quomodo haec inundatio animis populorum omnium tam alte inhaeserit. — Magis in his satisfacere primo aspectu alicui videri potest *Fr. von Schwarz* (Sintflut und Völkerwanderungen — liber secus in multis falsissimus atque in Sacram Scripturam blasphemus), qui diluvium explicare conatur effuso, cum disrupti terrae motu essent montes ab occidente adiacentes, ingenti mari interno Mongolico in planitiem Aralo-Caspian quam dicunt. Fuisse illud mare dicit Mediterraneo extensione fere aequale, profundum in genere (*Durchschnittstiefe, profondeur moyenne*) circiter 1350 metra, summis circumdatum montibus, in tantaque altitudine situm, ut eius superficies 6000 ped. angl., i. e. amplius 1800 m. supra Oceani aequor et 5000

ped. supra planitiem ab occidente vicinam emineret. Orta est igitur, in tractu montium, quibus in parte occidentali hoc mare continebatur, quodam loco partim, ut opinatur, terraemotu partim prorumpente aquâ fissura ingens usque ad radices montium, i. e. alta ad 5000 pedes = 1500 metra, lata 20-30 chiliometra, per quam m&maxima pars aquarum maris (plus 3.000.000 km cub.) cum ingenti impetu prorupit et totam late terram a septemtrione Persiae, Armeniae, Caucasi undis mersit, donec paulatim per Pontum Euxinum et mare Mediterraneum, certe vastatis litoribus atque insulis, in Oceanum Atlanticum et per planities in maria borealia diffudit. Supra diximus istam hypothesin primo aspectu alicui videri posse magis satisfacere. Etenim reapse habes hic « ruptos fontes maris magni », habes ingentem vastae regionis per complures menses inundationem, in dies ex « fontibus abyssi » crescentem, habes vere horribile spectaculum, certe eorum qui ei superstites erant animis alte infixum, habes arcam naturali aquarum motu versus occidentem trans lacum Oxianum et mare Caspium delatam ac fortasse, cum maior pars aquae Caucasicum a borea circumflueret, versus « montes Armeniae » portatam. Adverti quoque potest, etiam Persiam antiquis temporibus simili mari alte sito videri tectam fuisse quod similiter potuit v. g. versus Tigrin effundi. Verum ex altera parte hypothesis Schwarziana et a quibusdam viris scientiarum naturalium peritis pro improbabili habetur et, quod ad Sacram Scripturam attinet, illa eo excludi videtur, quod e& nequaquam explicatur, quomodo (ut narratur Gen. 8,4. 5), postquam inde a die 17. (27.) mensis septimi arca consedit, usque ad Kalendas decimi mensis nulla conspecta sint montium (tam videlicet vicinorum tamque aliorum) cacumina; immo Genesis videtur supponere arcam constitisse in loco altiore quam illa cacumina. — Aliis hypothesibus excogitatis hic proponendis supersedemus.

6) *Typus fuit diluvium* et umbra futurorum. Ex una quidem parte peccatores perdidit, ex altera idem arcam susten-

tavit eosque qui inerant servavit ac mundo novum genus hominum iustorum reddidit. Itaque diluvium et divinae vindictae signum et pignus, et aquae baptismalis qua salvantur, purgantur, renascuntur homines, typus evasit (2 Pet. 3,5; 1 Pet. 3,20. 21.)

III. **Post diluvium** (Gen. 8,15-9,17). Terra exsiccata, expectato acceptoque Dei mandato octo homines servati *arca excedunt*; emittuntur simul animalia, quaecunque in arca fuerant. Ac primum gratus Deo Noë altare aedificavit et *sacrificium obtulit*. Quod fuit Deo tam acceptum, ut statim ad misericordiam flexus erga fragile genus mortalium se non iterum tantam peccatoribus poenam inflicturum pollicitus sit (8,15-22).

Tum *Deus benedictionem* ab initio Adamo datam renovato generi humano *redintegravit*, aptasque generi conservando leges tulit, ut a) fecundis matrimoniis propagarentur, b) in creaturas omnes dominarentur, c) cibis vescerentur etiam animalibus (ante diluvium id non licuisse quidam inde inferunt, at ut videtur, non magis recte quam si quis ex velito tunc expressis verbis homicidio demonstraret hoc antea licitum fuisse), ne tamen carnem comederent cum ipso sanguine eoque crudeliores evaderent, d) hominum vitam sacrosanc&tam haberent, exceptis auctoritate divina homicidis qui (a legitimis superioribus) secundum talionis legem puniri possent (9,1-7).

Denique *pactum Deus cum Noë inivit* ac iureiurando (Is. 54,9) datoque pignore confirmavit: etenim id quod iam post ipsum primum sacrificium statuit ac promisit (8,14), iam sollemni foedere paciscitur, clarius annuntiat et arcum caelestem pignus datae fidei designat: qui ab eo tempore toto orbe misericordiam ac fidelitatem Dei praedicat (9,8-17). Cf. articulos NOE et ARCA NOE.

LITTERATURA. Vide libros citatos apud F. de Hummelauer in Gen., Reusch, L&ucken, Vigouroux, alios. Commentarios in Genesin enumerat Cornely, Introd. ed. 2 II. 1 p. 161 s. Praeterea v. Sch&ufer, Das Diluvium in der Bibel; de Regnon, Le déluge biblique et les races antédiluviennes; Reusch, Bibel und Natur ed. 4 Bonn 1876;

Schöpfer, *Gesch. des A. T.*, ed. 3, Brixen 1902; *Schöpfer-Pelt*, *Histoire de l'Ancien Testament* ed. 3; *Cetta*, *Il Diluvio*, Torino 1886; *A. Scholz*, *Die Keilschrift-Urkunden und die Genesis*; *Güttler*, *Naturforschung und Bibel*, Freiburg i. B. 1877; *Lenormant*, *Origines de l'histoire*, Paris 1880-84; *Thomas*, *Les temps primitifs et les origines religieuses*; *Vigouroux*, *Manuel biblique*, A. T., Paris.

De narratione biblica speciatim v. *Zeitschrift für kath. Theologie* 1877 p. 128 ss. (*Bickell*); ib. 1885 p. 595 ss. (*Flunk*); *Hallévy*, *Recherches bibliques* p. 115 ss.; *Loisy*, *Les mythes chaldéens de la création et du déluge* p. 82 ss.; *Vigouroux*, *La Bible et les découvertes modernes* ed. 6. I. p. 333 ss.; *Les livres saints et la critique rationaliste* ed. 4 IV. p. 241 ss.

De mytho babilonico v. *Euseb. Chronicon* I. 1 c. 3; *Kaulen*, *Assyrien und Babylonien* ed. 4 p. 169 s.; *E. Schrader*, *Die Keilschriften und das A. T.* ed. 2; *G. Smith*, *Assyrian discoveries* p. 184 ss.; *Chaldean account of Genesis* p. 263 ss.

De traditionibus populorum v. *Lüken*, *Die Traditionen des Menschengeschlechts*, Münster 1869 p. 189, ubi plures alii libri recensentur; *Lambert*, *Le Déluge Mosaique*; *R. André*, *Die Flutsagen*, ethnographisch betrachtet, Braunschweig 1891; *F. von Schwarz*, *Sintfluth und Völkerwanderungen*, Stuttgart 1894 p. 8-18; *de Girard*, *Le Déluge devant la critique historique*; *Lenormant*, *Histoire ancienne de l'Orient jusqu'aux guerres médiques* ed. 9 I. p. 55.

De universalitate v. *d'Avino*, *Enciclopedia dell'Ecclesiastico* ed. 3 I. p. 850; *Maigno*, *Les splendeurs de la foi* III. p. 1118; *Uboldi*, *Introd. in S. Script.* ed. 2 I. p. 753; *Bosizio*, *Die Geologie und die Sündfluth*, Mainz 1977; *Westermayer*, *Das A. T. und seine Bedeutung*, Schaffhausen 1861, I. p. 393 ss.; *Kaulen* in *Kirchenlexikon* ed. 2 XI. p. 337; *Stimmen aus M. Laach*, XVI. p. 31. 161. 395 (*Hummelauer* : cf. eisdem *Comment. in Gen.*); *Zeitschr. f. kath. Theologie* 1887 p. 630 ss. (*Breitung*); *Revue des questions scientifiques* 1886-88 (*Brucker*, *Robert*, *Motais*); *La Controverse* 1883-84 (*Lamy*, *Motais*, *Jaughey*, *de Harlez*), 1888; *La Science catholique* I. II.; *The Tablet* 1884 passim; *Brucker*, *L'universalité du déluge*, Bruxelles 1886; *Motais*, *Le déluge biblique*; *Piancianni* in *Civiltà cattolica* V. 4 (1862) p. 35 ss.

De explicatione physica v. *Klee*, *Déluge* p. 83-123. 205-332; *de Léonhard*, *Géologie* II. p. 722; *Hugh Miller*, *Testimony of the rocks* p. 344-48; *Girard*, *La théorie sismi-*

que du déluge p. 23; *E. Suess*, *Das Antlitz der Erde*, Prag 1883; *Gonzalez-Arriero*, *El diluvio universal de la biblia y de la tradicion*, Vergara 1892; *Fr. v. Schwarz*, *Sintfluth und Völkerwanderungen* p. 423 ss.; *Stimmen aus M. Laach* XV. 71. 173. 265. XXVII 1.

F. ZORELL.

DIMONA (דִּימוֹנָה, Πηγμόν, Δ Διμονά),

urbs in meridiana plaga tribus Iuda (Ios. 15,22). Onom. solum nomen commemorat. Probabilius eadem est quae Dibon (דִּיבֹן, LXX omitt.) a filiis Iuda post exilium denuo habitata (Neh. 11,25). *Keil* et *Billmann* in Ios. 15,22 probabilem opinionem admittunt Dimona = Dibon esse *Tell el-Dhib* prope *Tell'Arād* inter orientem et septentrionem. Quoad mutationem Dimona in Dibon cf. Is. 15,9 hebr., ubi Dibon altera transiordanica vocatur Dimon, de qua S. Hieronymus ad Is. 15,9 monet : « usque hodie indifferenter et Dimon et Dibon hoc oppidulum dicitur ». Verum *F. de Hummelauer* (ad Ios. 15,22) existimat Dibon Neh. 11,25 esse Dabir Ios. 15,49.

DINA (דִּינָה, Δεινα) filia Iacob ex Lia.

Cum Iacob moraretur (reversus a Laban) prope Sichem, Dina egressa est ut videret mulieres regionis illius. Ea occasione vi oppressa est a filio Hemor, principis Hevaeorum, nomine Sichem, qui eam uxorem accipere desiderabat. Quare Hemor, pater eius, precibus filii acquiescens, adiit Iacob eique et filiis Iacob proposuit, ut et Dina daretur filio in uxorem et Hevaei et ipsi inirent foedus et societatem. Ipse Sichem quoque suas adiunxit preces et promisit se facturum et praestitutum quicquid postulassent. Filii vero Iacob irati propter ignominiam sorori illatam fraudulenter conditionem ponunt, ut si velint Hevaei ius connubii, circumcisionem assument. Consentunt Hemor et Sichem et etiam popularibus suis persuadent, ut circumcisionem adoptent. Sed tertio die post, quo vulnus ex circumcisione acceptum gravissimum est, Simeon et Levi urbem ingressi viros trucidant, et reliqui filii Iacob in ultionem stupri praedam agunt. Facinus hoc reprehendit Iacob (Gen. 34,1-31) et Simeonis et

Levi furorem etiam in vaticinio ante mortem edito denuo reprobatur (Gen. 49, 5. 6); nam etsi iuste essent indignati de vi sorori illata, tamen nullo pacto iuste egerunt, immo iniustissime viros illos quos fraude deceperant trucidando. Quare mirum est aliquos reperisse contradictionem inter Gen. 34, 7. 13. 31 et Gen. 49, 5. 6. Verbis autem Iacob non licet opponere encomium Iudith 9, 2, quae non potest demonstrari Deo inspirante esse locuta, ut animadvertit *F. de Hummelauer*, Comment. in Gen. p. 312.

DINAEI (דִּנְיָאִי, Δειναίων) enumerantur Esdr. 4, 9 inter eas gentes, quas Asenaphar (vide s. v.) de Babylonia in Samariam transtulit; erant Iudaeis infensi et cum aliis Samaritanis apud Artaxerxem institerunt, ut Iudaei urbem Ierusalem aedificare prohiberentur. De Dinaeis nihil certi constat. *Ewald* coniicit eos nomen gessisse a civitate quadam Medorum, quae posterioribus quoque temporibus sub nomine *Deinaver* memoratur. *Franz Delitzsch* confert urbem *Din-sharru* (h. e. Din regis) Susae vicinam et idem refutat opinionem, quam *Schrader* proposuerat, Dinaeos esse *Da-ja-e-ni* sive *Da-ja-a-ni* in inscriptionibus Theglathphalasar I. aliorumque regum commemoratos scil. gentem Armeniae occidentalis, quam inter gentes orientales Esdr. 4, 9 recensitas non expectaveris. Alii denique suspicantur nomen non esse gentilicium, sed appellativum, ita ut Dinaei punctis mutatis potius sint דִּנְיָאִי i. e. iudices; pari ratione Apharsathachaeos qui cum Dinaeis immediate iunguntur, coniiciunt esse legatos seu commissarios (*G. Hoffmann*).

Cf. *Ewald*, Geschichte des Volkes Israel ed. 3 III. p. 727; *Franz Delitzsch* apud *S. Baer*, Libri Dan, Ezrae et Nehem. Lipsiae 1882, Praefatio p. x.; *G. Hoffmann* in Zeitschr. für Assyriologie II. 1887 p. 55.

DIONYSIUS (Διονύσιος), atheniensis, Areopagita i. e. iudicii in Areopago habiti assessor, qui cum Paulus in Areopago praedicasset ei adhaesit et credit (Act. 17, 34). Vide s. v. AREOPAGUS.

DIORYX (διώρυξ) canalis Eccli. 24, 41 (30 al. 28): « ego quasi fluvii dioryx »;

dicit s. auctor ex plenitudine sapientiae, quasi ex flumine magno, se aliquid hausisse; vel si verba haec ab ipsa sapientia dicuntur (uti ex Vulgata consequi videtur et ab aliis quoque explicatur), sapientia se dicit immensae sapientiae partem quae hominibus contingat; cf. v. 40: ego sapientia effudi flumina.

DIOSCORUS nomen mensis, uti necessario colligendum est ex 2 Mach. 11, 21; epistula enim Lysiae ad Iudaeos ita concluditur: bene valete. Anno 148, mensis Dioscori die 24, Διοσκοριου εικοστή τετάρτη. Sed cum talis mensis Διοσκοριου ceteroquin sit plane incognitus, variae prolatae sunt coniecturae. Probabilissima ea videtur esse qua statuitur intellegendum esse nomen mensis macedonici Δίος, Dius, uti in subsequentibus epistulis v. 33. 38 etiam nomen macedonici mensis Xanthicus reperitur. Interpres syrus etiam eum exprimit mensem qui macedonico Dio respondet. Dioscorus, Δίοςκορος, Διοσκούρος, nomen mensis erat apud Cretenses usitatum; unde versio latina sensu non caret, quo caret textus graecus. Alii nomen mensis macedonici Dystrus substituere malunt qui mensi Adar respondet.

DIOTREPES (Διοτρεπής) 3 Ioan. 9, 10: scripsissem forsitan ecclesiae; sed is qui amat primum gerere in eis Diotrepes non recipit nos; propter hoc si venero commonebo eius opera quae facit verbis malignis garruens in nos et quasi non ei ista sufficiant, neque ipse suscipit fratres et eos qui suscipiunt prohibet et de ecclesia eiicit. — Secundum lectionem codicum meliorum ἔγραψά τι, cui accedit S. Hieronymus (in Tit. 1, 9): scripsi etiam ecclesiae, Diotrepes epistolam Ioannis ad ecclesiam scriptam ecclesiae non communicavit, neque fratres quos Ioannes commendaverat suscepit. Erat φιλοπρωτεύων, homo superbus et primum gerere affectans. Fortasse coetus christiani in eius domo agebantur; ita enim facile intellegitur, quomodo aliquos ex ecclesia, ex coetu, eiicere potuerit. Ceterum de illo nihil notum est.

DIPONDIIUS, dipondius, nummus est qui aequal duos asses, Luc. 12,6 : nonne quinque passeret vaeneunt dipondio (ἄσσερον δύο). Denarius prius decem, postea sedecim assibus constabat. Assarium diminutivum est; apud rabbinos quoque nummus אִסָּר assarium natus est, qui tamen nummulus solum vigesimam quartam partem denarii constituere dicitur; cf. *Knabenbauer*, Comment. in Matth. ed. 2 l. p. 417. De valore vide s. v. PECUNIA.

DIPSAS v. SERPENS.

DISAN (דִּישָׁן), ultimus filius Seir Horraei, pater Ilus et Aram seu Aran, princeps tribus Disan (Gen. 36,21. 28. 30 LXX Δισών; 1 Par. 1,38. 42 LXX Δισών).

DISCRETIO SPIRITUUM vide s. v. CHARISMATA.

DISCIPULUS. Eo nomine vocantur in evangelis ii qui proxime Christum sequebantur tanquam eius comites et socii. Stricto sensu ita appellantur duodecim apostoli, dein alii septuaginta (Luc. 10,1) et sensu generali nominatur discipulus quicumque in Christum credidit eiusque doctrinam sequi et amplecti vult (cf. Luc. 14,26. 27). Quare in Act. nomine discipulorum designantur ii qui edocti ab apostolis et evangelistis fidem Christi susceperunt. — Eodem modo qui Ioanni Baptistae se addixerunt eiusque austerum vitae genus imitabantur, vocantur discipuli Ioannis (cf. Matth. 9,14; 11,2), ex quibus fuerunt Andreas et Ioannes (Ioan. 1,37 ss.), ita ut Christus primos suos discipulos a Ioanne praecursore accipere voluerit. Ipse Ioannes suos discipulos Iesu adiungere desiderabat (cf. Ioan. 3,27 ss.; Matth. 11,2).

DISCUS (δίσκος) est orbis lapideus vel ex metallo factus, quo iaculando Graeci se exercere et inter se certare solebant. Conqueritur s. auctor 2 Mach. 4,14, quod sacerdotes iam non circa altaris officia dediti essent, sed contempto templo et sacrificiis neglectis festinarent ad palaestram μετὰ τὴν τοῦ δίσκου πρὸς ἀλῆσιν (πρόσκλησιν) adhortatione ad discoboliam facta. Fortasse ludi illi athl-

lici incipiebant a discobolia, vel haec nominatur instar aliorum exempli gratia.


Discens quoque vocatur laus, catinus; cf. Matth. 14,8 : da mihi hic in disco caput Ioannis Baptistae (cf. Marc. 6,23 s.).

DISON (דִּישָׁן, דִּישָׁן, דִּישָׁן, דִּישָׁן; Δισών). 1. Quintus filius Seir, dux Horraeorum in Idumaea (Gen. 36,21. 26. 30; 1 Par. 1,38. 41; LXX 1 Par. 1,41 Δισών). Legitur quidem Gen. 36,26 דִּישָׁן; sed hoc mendum esse pro Dison suadent Vulgata, LXX, Peshitta et postulat locus parallelus 1 Par. 1,41.

2. Filius Ana filii Seir (Gen. 36,25; 1 Par. 1,40 hebr. 41; LXX 1 Par. 1,41 Δισών).

DISPERSIO (διασπορά) praecipuis dicitur de Israelitis inter alias gentes habitantibus, qui scil. dissipatione regni eieci sint e patria et dissipati (cf. Iudith 5,23); unde precantur : congrega dispersionem nostram (2 Mach. 1,27) et Iudaei dicunt de Christo : nunquid in dispersionem gentium iturus est (Ioan. 7,35)? i. e. ad Iudaeos qui dispersi sunt inter Graecos (εἰς τὴν διασπορὰν τῶν Ἑλλήνων). Inde, cum Christiani sint veri filii Abraham et Israel Dei (Gal. 3,29; 6,16), idem nomen transfertur ad Christianos inter gentiles dispersos; ita Iac. 1,1; 1 Petr. 1,1.

DIVERSORIUM. Ea voce vertitur דִּישָׁן Gen. 42,27 et 43,21 et Ex. 4,24 et Ier. 2,9, i. e. locus quo viatores pernoctant, sive quietem nocturnam capiunt sub tentorio vel in aliquo hospitio. Ceterum hospitia in oriente non praebebant viatoribus nisi locum quandam tectum; pro cibo ipsi curam suscipere debebant. Eiusmodi diversoria tamen puteo vel fonte instructa esse solebant. Uti ex Ier. 41,17 (hebr.) colligitur, quandoque a viro quodam in publicam utilitatem diversorium erigebatur et ab eius nomine vocabatur. Liberius vertit S. Hieronymus diversorium Iud. 18,3 et 3 Reg. 18,27. Eodem sensu Luc. 2,7 κατάλυμα, publicum hospitium; sed Luc. 22,11 diversorium intellegitur coenaculum, conclave in domo ad celebrandum coenam paschalem. Tempore quippe pas-



chatis cives hierosolymitani eiusmodi conclavia vel coenacula instruere et elocare solebant.

DIVINATIO. Israelitis omnia gener a divinationis, auguriorum celerarumque artium, quibus res futurae vel absconditae divinari posse apud antiquos Orientis populos passim credebantur, severe interdicta erant : Non augurabimini nec observabitis somnia (Lev. 19,26); non declinetis ad magos nec ab ariolis aliquid sciscitemini (19,31; cf. 20,6); non est augurium in Jacob nec divinatio in Israel (Num. 23,23). Varia genera divinationis recensentur in lege de prophetis Deut. 18,10 ss. : « nec inveniatur in te..... qui ariolos sciscitetur (קָסָם קַסְכִּיִּים) et observet somnia atque auguria (כִּמְנוֹן וּכְנִישָׁה) nec sit maleficus (וּכְשִׁיף) nec incantator (וְחָבֵר חֶבֶר) nec qui pythones consulat (וְיִדְעֹנִי וְיִשְׂאֵל אִיב) nec divinos (וְיִדְעֹנִי) aut quaerat a mortuis veritatem; omnia enim haec abominatur Dominus..... Gentes istae, quarum possidebis terram, augures et divinos audiunt; tu autem a Domino Deo tuo aliter institutus es ». Scilicet ut Deus homines ad eiusmodi artes pronos et ad secreta ac dubia exquirenda maxime propensos efficaciter a divinatione retraheret, munus instituit propheticum, ut a prophetis exquirerent voluntatem Dei in rebus dubiis et ab iis quoque edocerentur; quo munere prophetas quoque functos esse exemplis constat (cf. 1 Reg. 9, 6; 23,2 ss.; 3 Reg. 14,2; 22,7; 4 Reg. 1,2 ss. etc.).

Iamvero quoddam genus divinationis singulis vocibus significetur, non semper certo statui potest.

קָסָם vel כִּסְמָם sensu generali dici videtur divinatio, sortilegium, μαντεία et קִסָּם ariolus, augur, divinus, incantator, μαντις. Adhibetur ea vox de Balaam (Ios. 13,22), de Philisthaeorum divinis (1 Sam. 6,2), de prophetis babylonicis (Is. 44, 25), de pythonissa in Endor (1 Sam. 28, 8), generatim de falsis prophetis. Eiusmodi divinationis genus describit Ezechiel 21,21 [26] : « Stetit enim rex Babylonis in bivio, in capite duarum

viarum, divinationem quaerens, commiscens sagittas, interrogavit idola (Theraphim), exta consuluit (inspexit iecur) ». Ad quem locum notat S. Hieronymus : « Stabit rex in ipso compito et ritu gentis suae oraculum consulit, ut mittat sagittas suas in pharetram et commisceat eas inscriptas sive signatas nominibus singulorum, ut videat cuius sagitta exeat et quam prius civitatem debeat oppugnare; hanc autem Graeci βελομαντεῖαν sive βελοδομαντεῖαν nominant ». De Theraphim vide s. v. Praeterea inspiciebatur iecur victimae, ut ex eo augurium de rei eventu caperetur, qui divinandi modus apud Graecos ἰπατοσκοπία, apud Romanos extispicium audiebat.

נֶחֱשׁ plerique veteres interpretes referunt ad auguria ex avibus capta (ὠνοισμός, augurium, omen); sed divinatio ex avium observatione, etsi apud Graecos Romanosque usitata (Xenoph. Mem. 1,13; Ovid. Metam. 5,549 etc.), in S. Scriptura commemorari non videtur neque apud Orientales in usu erat nisi forte apud Iudaeos graecissantes aetatis posterioris. Alii נֶחֱשׁ interpretantur omen ex serpentibus (נֶחֱשׁ) petittum, alii cum Gesenio (Thes. p. 875 a) generatim omen a carmine magico dictum, quod levi susurro proferri solebat. Cf. Gen. 30,27; Lev. 19,26; Num. 23,1 s. 13. 23; 24,1; Deut. 18,10; 4 Reg. 17,17; 21,6; 2 Par. 33,6. Etiam notione ominis boni eadem vox adhibetur 3 Reg. 20,33.

Eadem vox נֶחֱשׁ adhibetur Gen. 44,5. 15, ad quem locum notat F. de Hummelauer, Comm. in Gen. p. 361 : « Augurari e scypho pertinet ad hydromantiam. Aliquos accipe modos, quo id apud antiquos fiebat (P. Scholz, Götzendienst und Zauberwesen bei den alten Hebräern. Regensburg 1877, p. 71) : vase aqua repleto apparebant in aqua formae quaedam futura praesagientes; coniectae in aquam gemmae, aurum et argentum varias ibidem formas describebant. Ut patet, hoc Iosephi augurium interpretes torsit..... Sed notanda Grotii solutio, agi posse de praesagiis divinitus immis- sis. Reapse si in Vet. Test. pontifex potuit ope Urim et Thummim oracula edere, quod nunc non sine superstitione possit

quis imitari, non video equidem, cur non potuerint esse in religione primitiva ritus aliqui futurorum praesciendorum a certis quibusdam viris legitime adhibendi Deoque tum probati, qui non nunc solum, sed vel lege mosaica abrogati sint neque inde a Moyse sine inanis superstitutionis nota potuerint adhiberi ».

עֵץ quid proprie significet, incertum est; LXX plerumque interpretantur *αλγισμός*, *αλγδών*, Vulgata: augurari, augures, divinationes. Aliqui vocem explicant augurium capere ex nubibus (עֵץ), alii cum Talmudistis fascinare per aspectum malignum (עֵץ). Designari videtur modus quidam occulta inquirendi cum idololatria coniunctus. Eiusmodi divinatio deprehenditur apud Chananacos (Deut. 18,14) et Philisthaeos (Is. 2,6). Tempore Abimelech erat prope Sichem אֵלֹן seu quercus augurum, quae nomen ab artibus augurum chananacorum acceperisse merito putatur. Israelitas de hoc genere divinationis, quod Lev. 19,26 et Deut. 18,10 severe interdictum erat, Isaias propheta arguit (2,6; 37,3) et eiusdem etiam reus erat Manasses rex impius Iuda (4 Reg. 21,6; 2 Par. 33,6). In nova theocralia temporis messiani ea quoque divinatio auferetur (Mich. 3,11).

אֹב est spiritus defuncti, quem necromantius ex inferis evocat atque de rebus futuris consulit Lev. 19,31; 20,6. 27; Deut. 18,11; 1 Sam. 28,3. 7 s.; Is. 8,19; 19,3; 29,4; 1 Par. 10,13; 2 Par. 33,6. Spiritus pythonicus vel divinationis erat in viro sive muliere necromantiam exercente Lev. 20,27; mulier in Endor erat בעֲרַת־אֹב = magistra pythonis, pythone habens. Secundario tantum ea vox adhibetur de arte necromantiae vel de iis, qui necromantiam exercent (1 Sam. 18,3; 4 Reg. 21,6; 23,24). LXX pythone interpretari solent ἐγγαστρομύθοι, unde explicari videtur arte ventriloquorum homines ab astutis illis incantatoribus esse deceptos et eo modo necromantiam esse exercitam plerumque; verum iis in rebus diabolum etiam suas quandoque egisse partes ex Act. 16,

16 ss. de puella spiritum pythone habente apertum est.

בִּשְׂף probabilis est incantatio magorum, qui formulis magicis maleficia patrare studebant (LXX *φαρμακός*, Vulgata: maleficus). Cf. Ex. 7,11; 22,17; Deut. 18,10; 4 Reg. 9,22; Is. 47,9. 12; Jer. 27,9; Dan. 2,2; Mich. 5,11; Nah. 3,4; Mal. 3,5. Vide s. v. MAGIA.

חֲבֵר חֲבֵר est fascinare fascinationem, incantare incantationem; vide s. v. MAGIA.

יִדְעָנִי (LXX *ἐπασιδός*, *γνώστης*, Vulgata plerumque ariolus) designat spiritum divinationis, qui in S. Scriptura cum spiritu pythonico seu necromantia consociari solet. Cf. Lev. 19,31; 20,6. 27; Deut. 18,11; 1 Reg. 28,3. 9; 4 Reg. 21,6; 23,24; 2 Par. 33,6; Is. 8,19; 19,3 etc. Apud Babylonios Dan. 2,2 recensentur quattuor ordines sapientum: arioli (חֲרָטְמִים) et magi (אֲשָׁפִים) et malefici (בִּכְשָׁפִים) et Chaldaei (כַּשְׁדִּים), quibus additur 2,27; 4,4; 5,7. 11 quintus ordo: aruspices (גְּזָרִין). « Sed quid singulis speciali modo attribui oporteat difficile dixeris. Censent חֲרָטְמִים incantatores fuisse ad malos genios coercendos et eorum maleficia avertenda, אֲשָׁפִים vates qui carmina in deorum laudem componerent, oracula interpretarentur et consilia deorum manifestarent, בִּכְשָׁפִים qui formulas mussitarent magicas ad mira efficienda, כַּשְׁדִּים qui ex astris vaticinarentur, denum 2,27 etc. גְּזָרִין qui ex variis signis naturalibus eventibusque coniecturas et auguria caperent » (*Kna-benbauer* ad Dan. 2,2). Adverte חֲרָטְמִים etiam apud Aegyptios in aula Pharaonis commemorari Gen. 41,8 (Vulgata: coniectores, LXX *ἐγγηγητάς*, Aquila *καρυσταστάς*), ubi evidenter designatur tribus sapientum, qui somnia interpretabantur. Ex somniis frequenter res futurae coniciebantur, cuius superstitionis se reos reddebant pseudoprophetae (Deut. 13,1; Jer. 23,25. 27; 29,8).

DIVITIAE. Ex norma veteris legis promittitur observantibus praecepta Domini felicitas, securitas, abundantia bonorum et fertilitas terrae (cf. Deut. 28,

3 s.; Agg. 2,20). Quare divitiae quoque considerantur tamquam merces quam Deus servis suis fidelibus tribuit. Ha divites nobis exhibentur patriarchae, Abraham, Isaac, Iacob; divitiae autem in eorum vita pastorica potissimum consistebant gregibus, sicut quoque Iob dives multitudine pecorum describitur. Posteriore tempore etiam auro, argento, lapidibus pretiosis divites erant David, Salomon. Et Salomoni qui sapientiam a Deo postulavit, Deus dicitur etiam dedisse, quae non postulaverat, divitias et gloriam (3 Reg. 3,13), ita ut magnificatus sit super omnes reges terrae divitiis et sapientia (3 Reg. 10,23). Eliam Iosaphat, regi pio, factae sunt infinitae divitiae et multa gloria (2 Par. 17,5) et de Ezechia rege quoque, qui placuit Domino, legimus: fuit autem dives et inclytus valde et thesauros sibi plurimos congregavit argenti et auri et lapidis pretiosi et aromatum et armorum universi generis et vasorum magni pretii, apothecas quoque frumenti, vini et olei et praesepia omnium iumentorum caulasque pecorum (2 Par. 32,27). Atque divitias tribui tamquam mercedem saepius enuntiatur: spera in Domino et fac bonitatem et inhabita terram et pascaris in divitiis eius Ps. 36,3 vel: beatus vir qui timet Dominum... gloria et divitiae in domo eius Ps. 111,1-3; et de sapientia eiusque donis dicitur: longitudo dierum in dextera eius et in sinistra illius divitiae et gloria Prov. 3,16, et: necum sunt divitiae Prov. 8,18 et corona sapientium divitiae eorum 14,24 et: finis modestiae timor Domini, divitiae et gloria et vita 22,4; neque aliter Sap. 8,5: et si divitiae appetuntur in vita, quid sapientia locupletius? Sed divites monentur, ut pauperibus ferant opem: oculos tuos ne transvertas a paupere; rogationem tribulati ne abicias et non avertas faciem tuam ab egeno Eccli. 4,1 s.; cf. Prov. 14,21; 19,17; 22,9; 28,27 etc.

Verum in divitiis etiam varia latere pericula non tacetur. Id iam apparet ipsa illa laude: beatus dives qui inventus est sine macula et qui post aurum non abiit nec speravit in pecunia et thesauris; quis est hic et laudabi-

mus eum? fecit enim mirabilia in vita sua Eccli. 31,8. 9. Divitias esse vanas, incertas, fugaces Sapiens monet (cf. Eccli. 5,9; Eccli. 18,25); quare iis non est gloriandum Ier. 9,23; neque enim divitiae proderunt, sed sola iustitia liberabit a morte Prov. 11,4; Eccli. 5,10. Serio quoque s. litterae docent ne quis confidat divitiis: divitiae si affluant nolite cor apponere Ps. 61,11; cf. Ps. 48,7; 51,9; 75,6 et Prov. 11,28: qui confidit in divitiis suis corruct. Porro divitias saepe esse incitamenta et fomenta vitiorum iam eo elucet quod tot reperiuntur contra impios divites reprehensiones; nam qui festinat dilari non erit innocens Prov. 28,20; unde melior est pauper ambulans in simplicitate sua quam dives in pravis itineribus Prov. 28,6; cf. 19,1; et quae sint haec itinera prava, pluribus describit Isaías propheta 5,8-23 et Ezechiel 16,16 s.; unde iam Isaías et Amos (6,1 vae qui opulenti estis in Sion) divitibus illud ingeminant vae quod postea Christus quoque in eos pronuntiavit. Haec divitiarum pericula Sapiens ob oculos habet dum precatur: mendicitatem et divitias ne dederis mihi, tribue tantum victui meo necessaria Prov. 30,8. Cum in lege vetere observationi mandatorum Dei promitteretur prosperitas, facile evenire poterat, ut divitiae et felicitas impiorum essent offensioni et admirationi, id quod praecclare describitur Ps. 72,2; sed: existimabam ut cognoscerem hoc; labor est ante me, donec intrem in sanctuarium et intellegam in novissimis eorum etc., et: dormierunt somnum suum et nihil invenerunt omnes viri divitiarum in manibus suis Ps. 75,6; cf. 51,9; 48,17.

In novi quoque foederis libris serio monemur de periculis divitiarum; vide s. v. AVARITIA. Christus eas comparat spinis quibus semen bonum suffocetur; fallacia divitiarum earumque deceptione suffocatur verbum et sine fructu efficitur (Matth. 13,22; Marc. 4,19). Christus dicit vae divitibus, iis scil. qui in iis suam habent consolationem (Luc. 6,24); divitiis earumque amore juvenis ille retinetur quominus perfecte Christum sequatur; unde Christus docet quam difficile sit ut dives intret in regnum

caelorum (Matth. 19,23) idque illustrat parabola divitis et Lazari (Luc. 16,19 ss.) et quam periculosum sit sibi thesaurizare neque esse divitem in Deum, alia docet parabola (Luc. 12,16). Quare monet ne quis sibi thesaurizet thesauros in terra, quos aerugo et linea demolitur et fures furantur, sed ut thesauros colligat in caelo (Matth. 6,20); monet neminem posse Deo servire et mammonae (Matth. 6,24). Sed simul declaratur pecunias illis solum esse obstaculo qui in iis confidunt (Marc. 10,24), posse quemvis eleemosynis sibi facere amicos de mammona iniquitatis (Luc. 16,9) qui eum recipiant in aeterna tabernacula. Atque recti usus pecuniarum exempla proponuntur in piis mulieribus quae facultatibus suis ministraverunt Domino et discipulis, in Zachaeo (Luc. 19,8), in Nicodemo et Iosepho ab Arimathaea divitibus (Matth. 27,57; Ioan. 19,39). Quis sit rectus earum usus, eodem modo docent Paulus (2 Cor. 9,6) et Iacobus (2,15-16), qui quam fluxae sint opes pluribus prosequitur (3,1-6).

Sublimiore sensu divitiae dicuntur de bonis spiritualibus (Hebr. 11,26); Christus propter nos egenus factus est, ut illius inopia nos divites essemus (2 Cor. 8,9) et apostolus vult, ut omnes evadant divites in omni verbo et in omni scientia, in fide et caritate, in bonis operibus (1 Cor. 1,3; 2 Cor. 8,7; 1 Tim. 6,18). Demum divitiae quoque dicuntur de Deo, qui est dives in omnes, qui invocant illum (Rom. 10,12), cuius divitiae bonitatis, divitiae gloriae, sapientiae et scientiae, divitiae gratiae celebrantur Rom. 2,4; 9,23; 11,33; Eph. 4,7; 2,7; et apostolus gloriatur quod ei data sit gratia haec in gentibus evangelizare investigabiles divitias Christi (Eph. 3,8; cf. Col. 1,27).

I. KNABENBAUER.

DIZAHAB (דִּזְחָב, καταχρύσεα, Vulgata: ubi auri est plurimum) recensetur Dent. 1,1 post Pharan, Thophel, Laban, Haseeroth, quibus nominibus regio migrationis Israelitarum a Sinai usque ad Iordanem delineatur. Onom. Eusebii et S. Hieronymi cum LXX nomen effert κατά τὰ χρύσεα (ed. Lag. 269,19)... Cata

Chrysea, id est ad aurea, sunt autem montes auri fertiles in deserto procul undecim mansionibus a Choreb (109,4). Ob nominis similitudinem aliqui (I. L. Burckhardt, Robinson) comparant portum Dhahab (Mersā Dhahab, Minā Dhahab) ad orientem montis Sinai situm in lingua sinus Aclaniticus, alii (L. de Laborde) obiciunt Dhahab nimis meridiem versus abesse ab itinere Israelitarum, alii (Raumer, Hummelauer) coniciunt Dizahab fuisse nomen nativum loci, qui Num. 11,34 ab eventu appellatus est Sepulchra concupiscentiae.

Cf. I. L. Burckhardt, Reisen in Syrien, Palaestina, ed. Gesenius II. 848; Robinson, Palaestina III. 160; L. de Laborde, Commentaire géogr. sur l'Exode et les Nombres 1841 p. 8; C. v. Raumer, Palaestina ed. 4 p. 481; F. de Hummelauer ad Deut. 1,1.

DOCH (Δόχ), arx seu munitiuncula (ὀχυρωματίον) exstructa a Ptolemaeo, qui erat filius Aboli, gener Simonis Machabaei, dux in campo Iericho a Simone constitutus et qui in arce Doch Simonem eiusque filios Matthiam et Iudam vi ac dolo interfecit (1 Mach. 16,14-16). Brevi post Ptolemaeus in eadem arce a Ioanne Hyrcano, tertio Simonis filio, oppugnatus est, ut Flav. Iosephus narrat, qui arcis nomen scribit Δόχον eamque supra (ἐπὶ) Iericho sitam esse dicit (Ant. XIII. 8,1; Bell. ind. 1. 2,3). Antiquum nomen merito agnoscitur in 'Ain el-Dūk, qui fons ad radices septemtrionales montis Quarantania (Djebel Quarantā) scaturit, 6 km a Iericho inter septemtrionem et occidentem, prope viam romanam, quae Ierichunte in Samariam ducit. Sed de situ ipsius arcis determinando variae sunt opiniones. I. P. van Kasteren eam componit cum ruinis castelli, quae in summo monte Quarantania inveniuntur et hodie dicuntur Tāhūnet el-Hawā i. e. molae venti; idem auctor testimonia adducit, quibus mons Quarantania et ante et post occupationem arabicam nomine Dūk (non Dūk) insignitus fuisse evincitur. Cf. Vigouroux, Dict. de la Bible II. 1454-6 et Revue biblique VI. 1897 p. 99-104.

DOCTOR. Haec voce quandoque explicatur דַּוְדָר; ita Dent. 29,10; 34,28 et

2 Par. 26,14; sed vox hebr. potius magistratum quendam, praefectum, exactorem significat; etiam מִבְּיָן 1 Par. 25, 7 eo modo exprimitur, uti מִבְּיָן Eccl. 9, 11, ita ut intellegens, sapiens tamquam doctor habeatur. In libris novi foederis dicuntur legis doctores iidem qui alias scribae nominantur i. e. interpretes et doctores legis mosaicae, qui a Iosepho (Ant. XVII. 6,2; cf. XVIII. 3,5) πατρίων ἐξηγηταὶ νόμων appellantur et magna pollebant auctoritate. Tempore Christi iam titulo rabbi (domine mi, dominus) honorabantur. Ceterum vide s. v. SCRIBA. Inter Christianos vocantur doctores qui in coetibus religiosus doctrinam Christi proponebant, quam studio et meditatione didicerant. Distinguuntur a prophetis qui immediato impulsu et inspiratione Spiritus S. loquebantur. Ceterum vide s. v. CHARISMATA. — Notione quadam eximia Paulus dicitur doctor gentium (1 Tim. 2,7; 2 Tim. 1,11).

DOCTRINA. In praedicatione apostolica Paulus distinguit doctrinam vel sermonem inchoationis ab altiore quadam sapientia, uti elucet ex 1 Cor. 2,6; 3,1 s. et Hebr. 6,1. Doctrinam communem describit Hebr. 6,1-3 eamque exponit quoque 1 Cor. 2,2 esse scil. Iesum Christum et hunc crucifixum, sed etiam doctrinam de eucharistia etc., uti ex epistula colligitur. Altiori autem doctrinae adscribit id quod de sacerdotio melchisedechiano exponit (Hebr. 5,11 s.; 7,1 s.). Gravissime invehitur in eos qui aliquam diversitatem doctrinae inducere conantur; cf. Rom. 16,17; 1 Cor. 15,12; 2 Cor. 11,13-15; Gal. 1,6-9; 5,12; Phil. 3,2; Col. 2,20 s.; 1 Tim. 1,19. 20; 4,1; 2 Tim. 2,17; 4,3; Tit. 1,11; 1 Ioan. 4,1; 2 Ioan. 10, 11.

DOCTRINA et **VERITAS** v. URIM et THUMMIM.

DODANIM (דָּדָנִים) populus a lavan i. e. a Graecis oriundus (Gen. 10,4). Praeter lectionem hanc quam tuentur Vulgata, paraphrasis chaldaica, Syrus, Arabs, invenitur altera Rodanim, quae apparet apud LXX Ῥόδοι et Samaritanum et etiam hebr. legitur 1 Chron. 1,7 (quamvis hoc loco codices 35 etiam Do-

danim praebeant). Qui alteram hanc sequuntur, cum LXX vocem explicant de Rhodiis; qui priorem, de Dardanis plerumque. De Dodona, Epiri urbe, non erit cogitandum, quia in ea enumeratione populi recensentur.

DODAU (דֹּדָא, Δωδα), pater Eliezer prophetae (2 Par. 20,37), qui Eliezer reprehendit Iosaphat regem propter foedus cum Ochozia.

DODO. 1. Pater ELCHANAN 2.

2. Pater ELEAZAR 3.

3. Pater THOLA 2.

DOEG (דֹּעַג, Δωγ), Idumaeus, qui praeerat pastoribus Saul regis. Cum David veniret in Nobe ad sacerdotem Achimelech et ab eo acciperet panes et gladium Goliath, Doeg ibi aderat testis horum (1 Reg. 21,7) et postea Sauli indicavit et iussu Saulis, qui de ope Davidi praestita iratus erat valde, irruit in Achimelech et sacerdotes et trucidavit octoginta quinque viros vestitos ephod lineo (1 Reg. 22,9. 10. 18). Inscrubitur psalmus 51[52] : cum venit Doeg Idumaeus et nuntiavit Sauli : venit David in domum Achimelech.

DOMINICA DIES Apoc. 1,10 est primus hebdomadis dies. Cum eo die Christus gloriose e sepulcro surrexisset, ille dies merito dies eius i. e. gloriae eius et victoriae appellatur. Atque eum diem statim ab exordio rei christianae esse sanctum habitum et celebratum, elucet 1 Cor. 16,2 et innuitur quoque Act. 20,7. Vide s. v. DIES in line.

DOMMIM v. PHESDOMIM.

DOMUS vide s. v. ARTES.

DOR v. HAMMOTH DOR.

DOR (דֹּר, דָּר; Δώρ), urbs antiqua reguli chananaei a Iosue expugnata (Ios. 11,2; 12,23), Manassitis occidentalibus in territorio Aser concessa (Ios. 17,14; 1 Par. 7,29), ex qua filii Manasse Chananaeos non exterminarunt (Iud. 1,27; cf. Ios. 17,12. 13), sedes principalis praefecturae salomonicae a Benabinadab administratae (3 Reg. 4,11). Eadem est quae 1 Mach. 15,11. 13. 25 vocatur Dora (Δωρ), in qua Tryphon ab Antiocho VII.

Sidete inclusus et oppugnatus est ingenti exercitu 120 000 peditum et 8 000 equitum atque navibus a mari Mediterraneo urbem cingentibus. — Legitur los. 41,2 נְפֹת דֹר (Vulgata : regiones Dor, LXX Φενηδεδῶρ), los. 12,23 נֶפֶת דֹר (Vulgata : provincia Dor, LXX Φενηδεδῶρ), 3 Reg. 4,11 נֶפֶת דָּאֵר (Vulgata : Nephath Dor, LXX Νεφθαδῶρ) i. e. excelsa Dor, clivi seu colles Dor; colles Dor merito agnoscuntur colles inter Carmelum et Caesaream, immo 3 Reg. 4,11 probabilius etiam planities Saron in Nephath Dor comprehenditur; cf. etiam s. v. NOPHETH.

Sita erat Dor 9 mil. pass. a Caesarea aquilonem versus (Onom. ed. Lag. 283, 3; 442,13 et 250,36; 415,22); hodierna *Tanfūra* (etiam *Tarfūra*) a ruinis antiqui situs nonnihil meridiem versus abest. Stephanus Byz. (s. v. Δῶρος) eam narrat a Phoenicibus esse conditam, qui ob plurima conclivia ibi reperta urbem ac portum extruxerint. In Tabula Peutinger. habetur *Thora* 8 mil. pass. a Caesarea, 20 mil. pass. a Ptolemaide quorum numerorum prior a vero haud aberrat, alter iusto minor est. S. Paula in Peregrinatione sua est « mirata ruinas Dor urbis quondam potentissimae ». Nomina sex episcoporum Dorensium nobis inde ab anno 518 p. Chr. innotescunt (*Le Quien*). Assyriace *Duru*.

Cf. *Reland*, Palaestina p. 738-741; *Rau-mer*, Palaestina ed. 4 p. 154; *Ritter*, Erdkunde XVI. 607 ss.; *Guérin*, Samarie II. 305-315; *Survey of West. Pal.* Mem. II. 7-11; *Le Quien*, Oriens christianus III. 574 ss.; *S. Paulae* Peregrinatio 5 apud *Tobler et Molinier*, Itinera hieros. I. p. 31; *Schraeder-Whitehouse*, Cuneif. Inscr. and Old Test. I. p. 156; *Schürer*, Geschichte des jud. Volkes ed. 3 II. 108-110; *Baedecker-Benzinger*, Pal. und Syrien ed. 5 p. 261. 265.

Quoad nummos cf. *Noris*, Annus et epochae Syromacedonum IV. 5,5 (Lips. 1696 p. 453-458); *Eckhel*, Doct. Num. III. 362 ss.; *F. de Sauley*, Numismatique de la Terre Sainte p. 142-148. 405, pl. VI. n. 6-12.

DORA v. artic. praeced.

DORCAS (Δορκάς); ita graece recte vertitur Act. 9,36. 39 nomen cuiusdam

discipulae Tabitha (Ταβίθα), quae insigni in pauperes beneficentia eminebat in urbe loppe et defuncta a S. Petro vitae restituta est (Act. 9,36-42). Nomen Tabitha scribitur aramaice טַבִּיטָּה, hebr. צְבִיטָּה i. e. δορκάς, dorcas, antilope. Gaudebant olim mulieres nominibus, quae a placidis animalibus petebantur (*Buxtorf*, Lexicon chald. talm. rabb. p. 848. 849; eodem quoque nomine vocabatur mater Ioas regis; צְבִיטָּה, Vulgata : Sebia (vide s. v.). Idem nomen muliebree etiam apud Graecos quandoque usurpabatur (cf. *Flav. Ios. Bell. iud.* IV. 3,5).

DORDA v. DARA.

DORMIRE dicitur notione translata de incuria, negligentia, tepore; cf. 1 Thess. 5,6 : igitur non dormiamus, sed vigilemus et sobrii simus, et similiter Rom. 13,11 : hora est iam nos de somno surgere. Alia translatione usurpatur de morte; ita saepe dormire cum patribus i. e. mortis quasi somnum dormire et coniungi in morte cum patribus 2 Reg. 7,12; 3 Reg. 2,10; 44,21. 43; 14, 20. 31; 15,8. 24; 16,6. 28 etc. etc.; metaphora de dormitione mortis, de somno mortis etiam ideo apta est quia notionem resurrectionis ad vitam suppeditat. Eo modo Christus quoque dicit puellam mortuam dormire, Lazarum mortuum dormire (Matth. 9,24; Ioan. 11,11) et Christus vocatur primitiae dormientium (1 Cor. 15,20). In libris novi foederis Paulus frequenter ea utitur metaphora; cf. 1 Cor. 7,39; 11,30; 15,6. 18; 1 Thess. 4,12 ss.; 1 Thess. 5,10 : sive vigilemus, sive dormiamus i. e. sive in adventu Christi inter vivos erimus sive inter mortuos; 2 Petr. 3,4 : ex quo enim patres dormierunt etc.

DORYMINUS (Δορυμίνης), pater Ptolemæi ducis 1 Mach. 3,38 et 2 Mach. 4, 45 graece. Opinantur aliqui eum esse eundem Dorymenem, qui contra Antiochum Magnum pugnavit, cum is invaderet Coelen Syriam (cf. *Polyb.* V. 61,9).

DOS vide s. v. MATRIMONIUM.

DOSITHAEUS (Δοσιθάεος), qui se sacerdotem et levitici generis ferebat, et Ptolemaeus filius eius anno quarto re-

gnantibus Ptolemaeo et Cleopatra attulerunt in Aegyptum versionem graecam libri Esther. Putant esse eundem Dosithaeum, de quo *Flav. Iosephus* c. Ap. 2,3; si hoc verum est, Ptolemaeus Philometor tum erat rex et versio graeca libri Esther iam exstilit c. an. 177 a. Chr.; cf. *Esth.* 11,1 et subscript. textus graeci in fine cap. 10; vide *Cornely*, *Introd.* II. 1 p. 419.

DOSITHEUS (Δωσίθεος). 1. Dux militum, qui sub Iuda Machabaeo pugnabat, et contra Timotheum felici successu arma gessit (2 Mach. 12,19-23).

2. Eques, vir fortis, qui erat de militibus Bacenoris et Gorgiam, Syrorum ducem, pallio eius arrepto ducebat, ut eum vivum caperet; verum eques quidam de Thracibus brachium Dositheae amputavit et Gorgiam ex periculo eripuit (2 Mach. 12,35).

DOTHAIN Gen. 37,17 vel **DOTHAN** 4 Reg. 6,13 (דֹּתַן et Gén. 37,17 etiam דֹּתַיִן cum He locali; Δωθαίνα Gen. 37,17; Δωθαίνα 4 Reg. 6,13), urbs Samariae, septemtrionem versus a Sichem sita, ubi Ioseph fratres suos pecora pascentes invenit (Gen. 37,17); neque procul a Samaria urbe aberat, ut ex historia Elisei elucet (4 Reg. 6,13). Praeterea legitur Dothain in Vulgata Iudith 4,5; 7,3 et in LXX Iudith 3,9 (τῆς Δωθαίνας); 4,6; 7,3. 18; 8,3 (Δωθαίνα); ex quibus locis efficitur Dothain in faucibus positam fuisse, quae ex planitie Esdreion aditum in montana Ephraim praebebant. Tempore Eusebii et S. Hieronymi ostendebatur Dothaim 12 mil. pass. a Sebaste (Samaria) aquilonem versus (Onom. ed. Lag. 249,38; 113,3). Hodie Dothain agnoscitur esse *Tell Dôthân* inter *Sebastiye* (Samaria) et *Djenîn* (Engannim), circa 18 km a *Sebastiye*, circa 8 km a *Djenîn*.

Cf. *Robinson*, *Neuere bibl. Forsch.* p. 158; *Van de Velde*, *Memoir* p. 308 et *Narrative I.* p. 364 s.; *Guérin*, *Samarie* II. p. 219-222; *Survey of West. Pal.* Mem. II. 169. 215; *Riess*, *Bibel-Atlas* ed. 3 p. 9; *Legendre*, *Carte de la Palestine*; *J. Fahrngruber*, *Nach Jerusalem* ed. 2 II. 161; *D. Zanecchia*, *La Palestine d'aujourd'hui* 1899 II. p. 579 s.; *Liévin de Hamme*, *Terre Sainte* 1897 III. 71; *L. Heidet* apud *Vigouroux*, *Dict. de la Bi-*

ble II. 1497-1501; *J. K. Zenner*, *Zeitschr. für kath. Theol.* XII. 1888 p. 740. 741.

DRACHMA, nummus argenteus eiusdem cum denario ponderis (2 Mach. 12,43; Luc. 15,8. 9). Denarius autem tempore Christi merces erat pro labore diurno (Matth. 20,10. 13). Drachma atheniensis centesima pars minae erat; drachma phoenicea paulo minoris ponderis erat. Ceterum drachmae antiquiores maius pondus habebant quam quae posteriore tempore eudebantur. Aetate Christi duae drachmae aequabant solum hebraeum dimidium (cf. Matth. 17,24. 27). — Neh. 7,70. 71. 72 nummus persicus daricus (דָּרַכְמָיִן) in Vulgata vertitur drachma. Daricus, nummus aureus, aequabat duas drachmas aureas vel 20 drachmas argenteas atticas. — De valore vide s. v. **PECUNIA**.

DRACO in Vulgata imprimis, conformiter usui veterum Graecorum et Romanorum, non animal aliquod fabulosum, sed generatim serpentem significat (cf. Ex. 7,9. 12. 13). Praeterea vero varias alias bestias designat, quae in hebraeo pluribus nominibus appellantur. Breviter singula recensamus.

1. תָּנִין vel etiam תַּנִּים (Ez. 29,3; 32,2), plur. תַּנִּינִים (תַּנִּינִים) explicatur in Vulgata *draco* (i. e. serpens) Ex. 7,12. 13, ubi vv. 9. 10 *coluber* dicitur; similiter Deut. 32,33 « fel draconum » est venenum serpentum, sicut Sap. 16,10 δράκόντων « draconum venenatorum dentes » de serpentibus dicitur. Etiam in Ps. 90[91],13 « conculcabis leonem et draconem » apte serpens intellegitur, sicut in verbis Siracidae « commemorari leoni et draconi » (δράκοντι) (Eccli. 25,23 gr. 16). Draco quoque magnus, quem Babylonii colebant, quemque Daniel absque gladio et fuste interfecit (14,22. 23 s. 27), serpens erat, quem etiam picturae in antiquissimis hypogaeis christianorum cum Daniele repraesentant; atque serpenti divinos honores a Babyloniiis tributos esse, frustra negarunt plures auctores; nam et scriptores veteres relationem intimam inter cultum Bel et serpentis testantur et inscriptiones cuneiformes illum cultum apud Babylo-

nios floruisse confirmant (cf. H. Rawlinson 19, 13 s.; E. Schrader in *Reichm-Baethgen*, Handwb. ed. 2 I. 328 s.).

Serpentem magnum etiam propheta intellegit, cum Nabuchodonosor, regem Babylonis, draconem assimilat habitationem Sion devoranti (Jer. 51,34), et pari similitudine « duo dracones magni » inter se pugnantes in libro Esther (10,7; 11,6) describuntur. Simili draconis i. e. serpentis specie vates in Apocalypsi diabolum, mulieri ac filio ejus insidiantem, vidit adorari ab universa terra, « serpentem illum antiquum », cuius invidia inde ab initio mors intravit in orbem terrarum (Apoc. 12,3 ss.; 13,2 ss; 16,3; 20,2; cf. Gen. 3,4 et Sap. 2,24). V. SERPENS.

A serpente aliquo magno etiam *fons draconis* (צֶן הַתַּיִן) prope portam urbis Ierusalem nomen accepit (Neh. 2,13). Vide artic. seq. — Alio sensu idem nomen hebraicum תַּיִן pro belua marina adhibetur, atque ita in Vulgata *draco* loco ceti ponitur Ps. 148,7; alibi S. Hieronymus bene *cete* vel *cetum* interpretatur (Gen. 1,21; Job 7,12; Is. 27,1). V. CETUS. — Denique eodem nomine appellatur crocodilus niloticus, qui in sermone prophetico figura est Aegypti; etiam hoc sensu *draco* occurrit in Vulgata Ps. 73[74],13; Is. 51,9; Ez. 29,3; 32,2.

2. Eadem hac ultima significatione hebr. לַיִתָּן, quod alibi a S. Hieronymo retinetur (Job 3,8; 40,20; Is. 27,1, in Psalmis 73[74],14 et 103[104],26 *draco* redditur. V. LEVIATHAN.

3. Ex magna cum nomine תַּיִן similitudine etiam פֶּן plur. תַּיִם et Lam. 4,3 *Kethib* (תַּיִן) in Vulgata, sicut a LXX interpretibus plerumque *draco* explicatur, quod potius de cane aureo (*Schakal*) exponendum est. V. CANIS AUREUS.

4. Praeterea etiam אֶרֶץ אֶרֶץ a S. Hieronymo *dracones* dicuntur (Is. 13,21). Nomen hoc semel tantum in S. Scriptura occurrit et animal ululans, velut bubonem aliamve noctuae speciem, vel etiam canem aureum vel lupum vel aliam feram deserti habitantem videtur denotare, quamquam Bocharto ferarum *ululatum* tantum significat Hieroz. I. 863-7, ed. Ros. II. 212-41.

5. Denique alii desertorum incolae צֶיִם semel in Vulgata *dracones* appellantur (Jer. 50,39). Aliis in locis explicantur *Aethiopes* (Ps. 71[72],9, ubi ex contextu fortasse צֶיִם *inimici* cum Olshausen aliisque legendum erit), *bestiae* (Is. 13, 21), *captivitas* (Is. 23,13), *daemonia* (Is. 34,14). Bocharto (I. c. 861-5, ed. Ros. II. 206-11) sunt felis ferae, Arabibus *dajwan* dictae, atque haec explicatio etiam recentioribus non videtur spernenda. Duae felis ferae species in Palaestina communiore sunt, *Felis maniculata* Rüppell et *F. Chaus* Gildenstädt, quae inter incolae locorum desertorum bene numerantur. Fortasse tamen etiam alia animalia in desertis degentia nomine צֶיִם designantur, quae difficile erit accuratius determinare. Fr. Hommel potissimum animal *Felis caracal* Gildenstädt (= *Lynx caracal* Schreber) vocatum significari censet.

De ultimis cf. Lennis-Ludwig, Synopsis I. 1 ed. 3 p. 183. 186; H. B. Tristram, Nat. Hist. of the Bible ed. 8. p. 66 s.; id. Fauna and Flora of Palest. 18 s.; Fr. Hommel, Namen d. Säugethiere 299 nota 2. 322 s. — De draconibus veterum cf. Bochart, Hieroz. II. 428-40, ed. Rosenm. III. 222-39, cf. 775-84; Sam. Oedmann, Verm. Samml. 4,35-48; H. O. Lenz, Zool. d. alt. Griech u. Römer 432-74; L. Lewysohn, Zool. d. Talm. 240 s.; A. E. Brehm, Tierleben ed. 3 VII. 223.

L. FOXCK.

DRACONIS FONS, (צֶן הַתַּיִן, πηγή τῶν σακῶν) Neh. 1,23 commemoratur, ubi Nehemias refert se a porta vallis ante fontem draconis ad portam stereoris transiisse. Ex situ horum portarum fons iste in superiore parte vallis Hinnom fuisse supponendus est, quam etiam Iosephus nomine vallis fontis (τὴν τῆς πηγῆς φάραγγα Bell. V. 12,2, ed. Niese 505) videtur designare (v. IERUSALEM II. 2). Idem scriptor ex eadem parte occidentali urbis piscinam serpentum (τῇ τῶν ὀφειῶν ἐπισκουλουμένη κολυμβήθρα Bell. ind. V. 3,2, Niese 108) commemorat. (v. IERUSALEM III. 5).

Cf. Pal. Expl. Fund. Quart. Stat. 1899 p. 57 The Dragon Well by Ph. Baldensperger et p. 57,58 Note on the Dragon Well by J. Thomas.

L. FOXCK.

DROMEDARIUS v. **CAMELUS**.

DRUSILLA (Δρουσίλλα), filia Agrippae I., soror Agrippae II., qui eam Azizo Emesorum regi cum circumcidi annuisset in matrimonium collocavit. Quod tamen connubium dissolutum est huiusmodi de causa, ut Flav. Iosephus narrat: «Felix quo tempore procurator erat Iudaeae, cum forte Drusillam conspexisset (namque omnes pulchritudine excellabat) mulieris desiderio tenebatur, et ex amicis suis Iudaeum, nomine Simonem, genere Cyprium qui se magum esse simulabat, ad eam mittens suadere nitebatur, ut relicto marito ei nuberet beatam facturum esse pollicens, si ipsum non fastidiret. Atque illa haud recte faciens volensque effugere sororis Berenices invidiam (nam propter pulchritudinem suam non leviter ab ea laesa erat), ut contra patria instituta ageret et Felici nuberet, se persuaderi sinit, cumque ex eo peperisset filium, Agrippam nomine vocavit. Sed quemadmodum is iuvenis cum muliere ista perierit, cum inflammaretur mons Vesuvius tempore Titi Caesaris postea declarabo» (Ant. XX. 7,2). Antequam Drusilla Azizo daretur coniux, desponsata erat Epiphani, Antiochi Commagenorum regis filio, qui tamen eius nuptias recusaverat ut qui Iudaeorum religionem sua relicta amplecti noluerit, licet ita se facturum esse puellae patri olim promiserat (cf. Ant. XIX. 9,4 et XX. 7,4). Felix vocatur a Suetonio (Claud. 48) maritus trium reginarum. Cum Drusillam ad adulterium induxisset, intellegitur, quomodo disputante Paulo de iustitia, castitate, iudicio futuro tremefactus noluerit ultra audire orationem; cf. Act. 24,24. 25.

DUDIA (דודי, Δωδία), praefectus secundae turmae exercitus Davidis 1 Par. 27,4; sed si confertur 11,12 et 2 Sam. 23,9, excidisse videndur verba: *Eleazar filius Dodo* (Dudia), Ahohites i. e. ex posteris Ahoe (1 Par. 8,4). In Vulgata 1 Par. 11,12 et 2 Sam. 23,9 דודי et דודי vertitur appellative: patruus eius. Vide ELEAZAR 3.

DUEL (דעאל, Num. 2,14 רעאל; Παρούλα ubique), pater Eliasaph princi-

pis tribus Gad (Num. 1,14; 2,14; 7,42. 47; 10,20).

DUMA. 1. Duma (דומא, Δουμά) recensetur Gen. 25,14 et 1 Par. 1,30 inter posteros Ismael; cf. Dumatha (*Steph. Byz.*), Domata (*Plin.* VI. 28,137), Dumatha (*Ptol.* V. 19,7 [ed. Müller-Fischer V. 18]; VIII. 22,3). Nomen itaque tribum et regionem significat in Arabia spectante inter septemtrionem et occidentem, quae regio hodie Duma saxeae (*Duma el-djandal*) appellatur. Controversia est significetne Duma Is. 21,11 idem; plerumque, cum dicatur: clamat ex Seir, intellegitur ibi Edom vel Idumaea, uti iam LXX habent. Fortasse propheta eam regionis appellationem prae communi elegit, ut ipse vocis notione appellativam *silentium, locum silentii* (de orco Ps. 94, 17; 115,17) innueret, ad quam conditionem gens et regio Edom apud Deum iam esset redacta.

2. Duma mbs montis Iuda (Ios. 13,32 hebr.) in Vulgata Ruma dicitur (v. RUMA).

DURA (דורה, Δωρὰ), campus provinciae Babylonis, in quo Nabuchodonosor rex statum auream erexit, quam adorari voluit (Dan. 3,1). Ex inscriptionibus cuneiformibus tres regiones *Duru* in Babylonia innotescunt. Nomen *Duru* ab assyriologis explicatur vallum, castellum, arx et usque ad hodiernum tempus frequenter usurpatur ad designandos colles. Ipsum locum, in quo statua illa erecta fuerit, a se reperlum esse censet *J. Oppert*; inveniuntur enim *Nahr Dura* i. e. fluvius *Dura* et *Tolul Dura* i. e. colles *Dura* circiter 8 km a Babylone inter meridiem et orientem; ibidem cernitur collis *el-Mokhattat* (*la colline alignée*), qui 6 m in altum elevatur supra basin quadratam 14 m et substructionem illius statuac aureae efformasse ab eodem auctore conicitur.

Cf. *Fr. Delitzsch*, *Paradies* p. 216; *Schraeder-Whitehouse*, *Cuneif. Inscr. and Old Test.* II. p. 127. 128; *J. Oppert*, *Expédition en Mésopotamie* I. 238 ss.; *Brunengo*, *L'Impero di Babilonia e di Ninive* II. p. 329; *J. Menant*, *Babylone et la Chaldée*, 1875, p. 244 et tabulam geogr. p. 261; *F. Vigouroux*, *La Bible et les découv. mod.* ed. 6 III. p. 303. 304.

E

EBAL. 1. Ebal (עֵבֶל, עֵבֶל) recensetur inter filios lectan Gen. 10,28; idem 1 Par. 1,22 scribitur Hebal (עֵבֶל, Γεμάν). Significatur itaque stirps quaedam lectanidarum, quos Arabiam meridionalem incoluisse constat (v. IEC-TAN). Etiam hodie nomine *Abil* et regio et varii pagi in *Yemen* designantur (*Halévy*, *Mélanges critiques* p. 86; *Dillmann*, *F. de Hummelauer* ad Gen. 10,28).

2. Ebal (עֵבֶל, פֶּאֶרְסָה, פֶּאֶרְסָה), ex filiis seu posteris Sobal filii Seir Horraei (Gen. 36,23; 1 Par. 1,40).

3. Ebal mons in Vulgata scribitur Hebal.

EBENINUS v. HEBENINUS.

EBRIETAS. Isaias propheta vehementer reprehendit principes Iuda ob ebrietatem 5,11, 22; pariter sacerdotes et pseudoprophetas 28,7; cf. 28,1. 3. Ebrietatem carpit Osee 4, 11 : vinum et ebrietas auferunt eam. Ebrietatis peruersitatem pluribus prosequuntur libri sapientiales; Prov. 20,1 : luxuriosa res vinum et tumultuosa ebrietas; quicumque his delectatur non erit sapiens; 31,4 nullum secretum est ubi regnat ebrietas; cf. 21,17; 23,30-33 describitur ebrietas et quae ab ea afferantur mala; item Eccli. 31,38 : vinum multum potatum irrationem et iram et ruinas multas facit etc. et 19,1 operarius ebriosus non locupletabitur et 26,11 mulier ebriosa ira magna, et contumelia et turpitudine eius non tegetur; cf. 19,2; 31,30. Quare apostolus quoque ebrietatem inter opera carnis recenset (Gal. 5, 21) et ebriosi christiani consuetudinem iubet vitari et ebriosos regnum Dei mi-

nime esse possessuros affirmat (1 Cor. 5,11; 6,10) et Christus monet : attendite vobis, ne forte graventur corda vestra in crapula et ebrietate et superveniat in vos repentina dies illa (Luc. 21,34; cf. Matth. 24,49). Quandoque ebrius, incubriatus is quoque dicitur qui hausto vino hilarior effectus est; cf. Ioan. 2,10. — Sensu translato dicitur ebrietas de stupore illo quo homines consilii inopes in maxima quadam adversitate corripiuntur; cf. Is. 29,9; Ier. 13,3; Ez. 23, 33; Iob 12,25 etc.

EBUR tempore Salomonis afferebatur navibus Salomonis et Tyrionum ex regione Ophir (cf. 3 Reg. 10,22; neque obstat quod ibi hebr. dicuntur naves Tharsis; nam uti 22,49 hebr. elucet, naves Tharsis appellantur quoque naves quae navigabant in Ophir). Ebur adhibebatur ad domos et palatia ornanda; unde dicuntur domus eburneae (3 Reg. 22,39; Ps. 44,14; Am. 3,15). Salomon habuit thronum ebore obductum (3 Reg. 10,18); Amos propheta invehitur in luxuriosos qui dormiunt in lectis eburneis 6,4; cf. Cant. 7,4; Ez. 27,6. 15. Ceterum v. ELEPHANTUS n. 3.

ECBATANA (ἑκβατῶνα, ἐν πόλει, Ἀ ἐν Ἀμαθῶ ἐν πόλει Esdr. 6,2; ἑκβάτανζ Tob. 3,7; 6,6. 18; 14,12. 14 graece; Iudith 1,1 ss.; 1,14 graece; 2 Mach. 9,3), urbs et caput Mediae, distans ab Oronte monte (hodie *Elvend*) stadia duodecim (*Diodor. Sic.* II. 13), eo fere loco quo hodie *Hamadan*. Ibi tempore acaestatis reges persiei et parthici degere solebant (*Strabo* XI. 13,1; *Xenoph. Anab.* III. 5, 15). Apud Herodotum (I,98) scribitur Ἀγβάτανζ. — Sunt etiam scriptores v. g.

E. Beurlier), qui solummodo Esdr. 6,2 et 2 Mach. 9,3 ad Ecbatana-*Hamadan* in Media magna referant, reliquos autem textus Tob. 3,7 etc. Iudith 1,1 etc. potius ad Ecbatana in Media septemtrionali seu Atropatene (Ecbatana secunda apud *Mosen Chorens*. Hist. Arm. II. 84), ubi hodie *Takti Soleiman* (*Rawlinson*).

De Tob. 5,8 (Vulgata : Rages civitas Medorum, quae posita est in monte Ecbatanis) v. s. v. RAGES.

Cf. *Ritter*, Erdkunde IX. 98-128; *Schrader-Whitehouse*, Cuneif. Inscr. and Old Test. II. p. 67; *Delitzsch*, Paradies p. 248; *Brugsch*, Reise nach Persien I. 363 ss.; *E. Beurlier* apud *Vigouroux*, Dict. de la Bible II. 1528-1532; *H. Rawlinson* in Journal of the Geogr. Society X. 1841 p. 46-53.

EC CETAN (עֶכְצָן, 'Αζαζάν), pater Iohanan de filiis Azgad (Esdr. 8,12).

ECCLESIA. Ea voce (cf. ἐκκλησίαν) generatim significatur multitudo hominum convocata et congregata. In veteris foederis libris communiter dicitur, ut קָהָל, de coetu populi Dei, de coetu Israelitarum, quae etiam ecclesia Domini vocatur (Num. 20,4) vel ecclesia populi Dei (Iud. 20,2) vel ecclesia Israel (3 Reg. 8,14) et plerumque coetus intellegitur religiosus, ad cultum Dei collectus. Sed etiam notione generali de aliqua concione adhibetur; cf. Eccli. 23,34; 33,19; 38,37 et Ps. 25,5 sermo est de ecclesia malignantium. In libris novi foederis plerumque dicitur de coetu fidelium Christi vel in universum (Matth. 16,18; 1 Cor. 12,28; Eph. 1,22; 3,10; 5,23 s.; Phil. 3,6; Col. 1,18. 24 etc.) vel de coetu fidelium in aliqua urbe vel regione; unde de ecclesiis Galatiae (Gal. 1,2) etc. mentio fit et de ecclesiis gentium (Rom. 16,4). Eodem nomine designantur coetus fidelium qui celebrantur ad cultum divinum exercendum, ad eucharistiam conficiendam, ad exhortationes et doctrinam tradendam (1 Cor. 14,34). Dicitur domestica ecclesia alicuius ecclesia seu fideles qui in domo alicuius sunt vel ibi congregantur (cf. Rom. 16,5; 1 Cor. 16,19; Col. 4,15). Notione profana de multitudine hominum casu collecta et tumultuante dicitur Act. 19,32 s. : erat enim ecclesia confusa.

Ecclesia Christi, ut ex locis citatis colligitur, est societas religiosa, cui finem proximum appetendum Christus proposuit sanctificationem hominum, finem ultimum clarificationem Dei per debitum cultum. Hanc societatem Christus dicit regnum suum, quod comparat eum grege in unum ovile collecto; ipse pastor gregis vicarios pastores Petrum et sub eo reliquos apostolos instituit. Nomen autem, quod societati supernaturali a se fundatae proprium esset, Christus elegit illud ecclesiae. Est igitur ecclesia Christi coetus hominum, qui eiusdem fidei professione et eorundem sacramentorum communione sub apostolicis pastoribus eorumque primatate regnum Christi in terris constituunt. Cf. *Ch. Pesch*, Praelect. dogm. ed. 3 I. n. 305-310.

ECCLESIASTES (Ἐκκλησιαστής), titulus Salomonis (Eccl. 1,1. 2. 12; 7,28; 12,8. 9). Si vim vocis graecae spectaveris, explicabis dici de eo qui ad audiendum agendumve in concionem venit vel qui concionem convocavit. Quam notionem S. Gregorius Nyssenus (hom. 1 in Eccl.) et Olympiodorus exprimunt (initio comment. in Eccl.) et quam S. Hieronymus quoque tradit addita posteriore applicatione : « Ecclesiastes graeco sermone appellatur qui coetum i. e. ecclesiam congreget, quem nos nuncupare possumus concionatorem, quod loquatur ad populum et sermo eius non specialiter ad unum, sed ad universos generaliter dirigatur » (in Eccl. 1,1). Si indolem libri consideraveris qui inscribitur: verba Ecclesiae, certe dicendum erit, ecclesiasten intellegi de *oratore* concionante vel de scriptore *oratorio* dictione utente (cf. *Gietmann*, Comment. in Eccl. p. 59). Quae sit vocis hebr. קהלת vis ac notio disceptatur; explicant collectorem proverbiorum, alii communissime concionatorem (קהל convocare et in coetum cogere? sed de tali coetu in ipso libro nulla est mentio); alii statuunt notionem קהל primariam esse *clamare, vocare*; unde *Gietmann* censet etiam in voce illa interpretanda non esse neglegendam exclamandi notionem :

« Ecclesiastes qui *exclamans* lamentatur rerum omnium vanitatem quasi praeconio fungitur, cum volentibus nolentibus denuntiat atque inoleat rem longe gravissimam. Emphasis enim quaedam iis locis quibus id nomen positum est, manifesto sentitur, evidentius quidem 1,2; 7,28; 12,8; sed etiam 1,1. 12 et 12, 9, tum quia appellatio huiusmodi non sine consilio profecto gravique ratione assumpta totiesque repetita est, tum quia, si exclamandi notionem subieceris, sit mirum in modum argumento libri consentanea. Atque hoc quodammodo pro firma demonstratione habeo, vocem קְהֵלֶת aliquo modo ad declamatoriam contentionem vocis referendam esse » (l. c. p. 61). Alias explicationes vide l. c. p. 63 et *Cornely*, *Introd. ed.* 2 II. 2 p. 153.

ECHAIA (עֲחָיָה, 'Axa), princeps populi, signator foederis (Neh. 10,26 hebr. 27).

ECHI enumeratur Gen. 46,21 inter filios Benjamin; vide s. v. AMIRAM.

ECREBEL (Ἐκρεβήλ), oppidum inter meridiem et orientem Bethuliae, hand procul ab altero oppido Chus seu Chusi iuxta torrentem Mochmur sito (Iudith 7,18 LXX; Vulgata omittit nomina Chus, Ecrebel, Mochmur; Itala scribit Chus, Etrebel, Machur). Nomen Ecrebel aliquibus interpretibus conservatum esse videtur in *'Agrabe*, de qua urbe s. v. ACRA BATHANE diximus. Cf. etiam *Survey of West. Pal. Mem.* II. 389.

EDDO (יֶדְדָּה; LXX omitt.), primus in pago Chasphia hand longe ab Ahava fluvio (Esdr. 8,17). Ad eum misit Esdras, ut pro sua auctoritate levitas et Nathinaeos ad iter in Ierusalem cum Esdra instituendum induceret; neque frustra: nam levitae quadraginta et Nathinaei ducenti viginti ex ea regione iter cum Esdra susceperunt (cf. 8,18-20). Ipse Eddo fortasse erat levita, neque obstat quod Nathinaei fratres eius vocantur; cum enim et levitae et Nathinaei ministeria sacra obirent, poterant vocari fratres eodem modo quo v. g. Sadoc summus sacerdos et sacerdotes fratres appellantur I Par. 16,39.

EDEMA (עֲדָמָה, Ἀρμαθ), urbs Nephthali inter Cenereth et Arama enumerata (Ios. 19,39). Hodie vel vicus *el-Damiye* inter Tiberiadem et montem Thabor (*Survey of West. Pal. Mem.* 1. 363. 384; *Zaneccchia*, *La Palestine d'aujourd'hui* 1899 II. 635) vel *Khirbet Adma* ad dexteram ripam Iordanis paulo infra lacum Tiberiadis (*Legendre*, *Carte de la Palestine*).

EDEN (עֵדֶן, Ἐδέμ). 1. Eden Gen. 4, 16 vide s. v. PARADISUS.

2. Filii Eden qui erant in Thalassar (4 Reg. 19,12; Is. 37,12) sunt iidem, qui apud Assyrios in inscriptionibus appellantur *Bit 'Adini*, domus *'Adini* et qui habitabant in parte quam maxime occidentali Mesopotamiae ad utramque Euphratis ripam ea fere in regione, ubi hodie sitae sunt urbes *Aintāb* et *Urfa* (cf. *Delitzsch*, *Paradies* p. 4. 263 s.; *Schrader-Whitehouse*, *Cuneif. Inscript. and Old Test.* II. 11). Atque eadem regio Eden Ez. 27,23 enumeratur, ubi sermo est de commercio Tyrionum cum Mesopotamia.

3. Beth Eden (Am. 1,5; Vulgata: domus voluptatis, LXX ἄνδρες Χαρράν), ut ex contextu patet, est regio quaedam Syriae. Videtur eadem esse ac Παράδεισος apud Ptol. V. 15,20 [14,16], urbs Laodiceae, hodie vicus *Ehden* itinere unius diei distans a *Ba'albek* nec procul a *Bsherre*, ubi cedri abundant (*Ritter*, *C. Th. Fischer*). Aliis autem Beth Eden videtur esse *Djäsie el-Kadime* hand longe a *Ribla* in septentrionali termino Coelesyriae sita, quam cum Παράδεισος Ptolemaei componunt, aliis vicus *Beit el-Djanne* (domus paradisi) ad radices orientales montis Hermon, aliis *Bit 'Adini* seu Eden Mesopotamiae.

Cf. *Ritter*, *Erdkunde* XVII. p. 650 ss.; *C. Müller-C. Th. Fischer*, *Claudii Ptol. Geogr.* 1883-1901 I. p. 977.

4. Levita de filiis Gersom tempore Ezechiae regis (2 Par. 29,12); idem videtur nominari 2 Par. 31,15 (LXX ὁδοῦ).

EDER. 1. Eder (עֲדָר, Ἐδέρ), levita ex posteris Merari tempore Davidis, filius Musi (1 Par. 23,23; 24,30).

2. Eder (עֲדָר, A 'Eðpαlv, B omitt.), urbs in meridie (Negeb) Iuda iuxta terminos Edom (Ios. 15,24). Situs ignoratur. Aliqui eam agnoscunt in *Khirbet el-'Adar* ad meridiem Gazae (*Survey of West. Pal. Mem.* III. 236), alii in *Khirbet Umm 'Adre* in *Wadi el-Sheria* (cf. *Buhl, Alt. Pal.* 1896 p. 185), alii denique suspicabantur eam non differre ab Arad et mera transpositione litterarum עֲדָר et אֲרָד exoriam esse.

EDISSA (הַדִּסָּה i. e. myrtus), nomen hebraicum, quo Esther appellabatur (Esth. 2,7; omittitur in LXX). Puellis baud raro nomina florum, plantarum indebantur; cf. Susanna (lilium).

EDNA (עֲדָנָה). 1. Unus ex filiis Phahath Moab, qui cum Esdra Babylone redierunt et uxores alienigenas duxerunt (Esd. 10,30; 'Eðvα).

2. Princeps familiae sacerdotalis de stirpe Haram, tempore Ioachim pontificis, filii Iosue pontificis (Neh. 12,15; Μαρναῖος).

EDNAS. 1. Ednas (עֲדָנָה, 'Eðvα), princeps millium ex tribu Manasse, qui cum aliis Davidi se adiunxit, cum ab Aphec in Siceleg rediret (4 Par. 12,20). In Vulgata nomen Ednas h. l. bis ponitur per errorem.

2. Ednas (עֲדָנָה, 'Eðvα), princeps exercitus in Iuda sub Iosaphat rege (2 Par. 17,14); praeerat trecentis millibus viro- rum robustissimorum.

EDOM (אֶדוֹם, 'Eðωμ) cognomen est Esau, quod sortitus est quia lassus ab agro redux cum vidisset pulmentum a fratre Iacob coctum, exclamavit: da mihi ut deglutiam (devorem) rufum hoc הָאֶדָם (vel ut alii censent scribendum הָאֶדָם; cf. *Dillmann* ad Gen. 25,30). Ceterum de Esau vide s. v.

Dicitur Edom de posteris Esau, de Edomitibus. Regionem Seir prius incolebant Horraei (Gen. 36,20 ss.); verum filii Esau eam occupabant deletis Horraeis (Deut. 2,22). Diu antequam Israelitae haberent regem, Edomitae iam regia dominatione gubernabantur. Eorum reges sat multi recensentur Gen. 36,31-39; reges non iure nativitatis sed electione

facta inter se successisse satis apparet ex modo enumerationis. Ex Cades misit Moyses nuntios ad regem Edom, ut permitteret fratri Israel transire per terram Edom; verum is superbe et dure recusavit (Num. 20,14-21; Iud. 11,17. 18); unde coacti sunt ex latere circumire illam terram; neque enim fratri Edom bellum inferre Deus tum temporis permisit. Sed quo animo hostili esset Edom contra Israel, satis iam tum declarabatur. Ex tempore Iosue et Iudicum nihil de Edomitibus refertur. Verum Edomitas saltem ultimo Iudicum tempore sese inimicos praebuisse patet ex eo quia Saul confirmato regno super Israel pugnabat per circuitum adversus omnes inimicos eius, contra Moab et filios Ammon et Edom et reges Soba et Philisthaeos et quocumque se verterat superabat (1 Reg. 14,47). David quoque Edomitas tenuit subiectos, non sine caede multorum (Ioab enim sex mensibus in ea regione moratus est et omnis Israel, donec interimeret omne masculinum in Idumaea, 3 Reg. 11,15. 16). David autem posuit in Idumaea custodes statuitque praesidium et facta est universa Idumaea serviens David 2 Reg. 8,14. Verum ex caede illa principum servatus est Adad alique de servis patris eius; isti fugerunt in Aegyptum. Benigne suscepti sunt a Pharaone et cum Adad adolevisset, Pharaoni ei dedit uxorem, sororem uxoris suae germanam. Mortuo David Adad reversus est in Edom et cum Salomon a via Domini declinasset, suscitavit ei Dominus adversarium ipsum Adad (3 Reg. 11,14). Atque ex eo tempore Edomitae sese dominio Iudaeorum subtrahere conabantur, et LXX addunt 3 Reg. 11,25 Israeli ab Adad (Ader) molestiam esse crealam ipsumque in terra Edom regnasse. Cum contra Iosaphat regem Moabitae et Ammonitae bellum moverent, etiam Edomitae egressi sunt ut pugnarent contra Iudam; sed percussi sunt (2 Par. 20,22); alias rex Edom simul cum Iosaphat rege et Ioram rege Israel egreditur ad bellicam expeditionem contra Moabitas (4 Reg. 3,9); unde vel subiectione vel foedere iunctus erat cum rege Iuda. Sed cum sub Ioram filio Iosaphat Edom recederet ne esset sub Iuda (4 Reg. 8,20; 2 Par. 21,

8), Edomitae regi Iosaphat subiecti fuisse videntur. Feliciter contra eos iterum pugnauit Amasias; ipse percussit Edom in valle salinarum decem millia et cepit urbem praecipuam Pelram (עֶלְמָרָא, Sela) vocauitque nomen eius Iecthel (4 Reg. 14,7) et Azarias, filius eius et successor regni etiam Aelath. regno iudaico restituit Edomitis inde expulsis (4 Reg. 14, 22). Verum Edomitae mox viribus resumptis regnum iudaicum denuo aggressi sunt; nam sub Achaz rege venerunt Idumaei et percusserunt multos ex Iuda et ceperunt praedam magnam (2 Par. 28,17). Atque ex eo tempore Edomitae immunes fuisse videntur a dominatione regis Iuda et cum Sedecias reges vicinos ad foedus contra Chaldaeos ineundum evocaret, etiam nuntii regis Edom ad eiusmodi foedus ineundum in urbe Ierusalem aderant. At ut alii, ita Edomitae quoque resistere Chaldaeis non poterant (cf. Ier. 27,2 s.).

Quantum gesserint Edomitae odium in Iudaeos, testes quoque sunt comminationes prophetarum contra eos. Iam Ioel propheta Idumaeam fore in desertum perditionis praedixit pro eo quod inique egerint in filios Iuda (3,19). Et Amos: super tribus sceleribus Edom et super quattuor non convertam eum; eo quod persecutus sit in gladio fratrem suum et violaverit misericordiam eius et tenuerit ultra furorem suum et indignationem suam servaverit usque in finem, mittam ignem in Theman et devorabit acdes Bosrae (1,11. 12). Imprimis gravis est visio Abdiae contra Edom: propter interfectionem et propter iniquitatem in fratrem tuum Iacob operiet te confusio et peribis in aeternum. Quae ab istis prophetis obiciuntur Edomitis, Edomitae patrarunt in calamitate illa iudaica, de qua 2 Par. 21,16 vel 23,23. 24 et 4 Reg. 14,13. Pariter cum Ierusalem a Chaldaeis expugnaretur, Edomitae tripudio et exultationi indulgebant odium vetus in Iudaeos explentes (cf. Ps. 136, 7; Lament. 4,21), quare iterato ab Ezechiele propheta iis vindicta iussu Dei annuntiatur (23,12 ss.), praesertim cum terram palaestinemam populo Dei in exilium abducto occupare vellent (Ez.

33,2 ss.; 36,3). Et vastitas illa atque destructio, quam praeter alios Ieremias quoque terrae Edomitae vaticinatus erat (49,7-22), confirmatur ab ultimo prophetarum; nam dum Israel ex exilio redux iterum gratiam Dei expertus est, Edom appellatur populus cui iratus est Dominus usque in aeternum (Mal. 4,3 s.).

Etiā tempore Machabaeorum odium illud inveteratum in Iudaeos manifestabant. Nam Edomitae quoque inter eos erant de quibus narratur: « ut audierunt gentes in circuitu quia aedificatum est altare et sanctuarium sicut prius, iratae sunt valde et cogitabant tollere genus Iacob, qui erant inter eos, et coeperunt occidere de populo et persequi; et debellabat Iudas filios Esau in Idumaea et eos qui erant in Acrabathane quia circumsedebant Israelitas et percussit eos plaga magna » (1 Mach. 5,1-3). Occuparunt Edomitae Chebron quoque; at ibi pariter a Iuda expugnati sunt (1 Mach. 5,63). Et, uti 2 Mach. 10,5 graece refertur, simul cum Gorgia vexarunt Iudaeos; cf. 2 Mach. 12,32. Demum Idumaei ab Ioanne Hyrcano subiecti et, si vellent in patria manere, coacti sunt circumcisionem subire et legibus iudaicis uti; « illi vero patriae suae amore tum circumcisionem admiserunt tum vitam in ceteris similiter ac Iudaei agere sustinuerunt » (*Flav. Ios.* Ant. XIII. 9,1; XV. 7,9); at irrisoria causa quandoque semi-Iudaei vocabantur (cf. l. c. XIV. 15,2). Tandem Antipater, Idumaeus, a Caesare totius Iudaeae procurator factus est (Ant. XIV. 8,5) et eius filius, Herodes, rex evasit Iudaeorum et post ipsum Archelaus (cf. Matth. 2,22).

Cum Edomitae continuo inimici essent populi Dei, Edom ponitur quoque tamquam typus omnium eorum qui regnum Dei oppugnant (cf. Is. 34,6; 63,1) et cum ex altera parte Edom quoque novo regno messiano dicatur inserendus esse (Is. 11,15; Am. 9,12), significantur eius regni messiani arma victricia quibus hostes quoque devicti evadant, quae Dei est clementia, participes bonorum Messiae.

EDOM, IDUMAEA. Termini terrae Edom in Vetere Testamento non indi-

cantur, sed ex obiter dictis aliquatenus definiri possunt. Nomina Edom et mons Seir fere convertuntur. Primitus quidem mons Seir illam solam regionem montanam designasse videtur, quae valli *el-'Araba* inter mare Mortuum et sinum Aelaniticum extensae ab occidente adiacet et confinia est deserto Pharan meridiem et occidentem versus, deserto Zin septemtrionem versus (Gen. 14,6; Deut. 33,2; Iud. 3,4). Postmodum vero tota regio montana ab occidente et ab oriente eidem valli *el-'Araba* adiacens appellata est terra Seir, mons Seir (cf. Deut. 2,1 s.; Ez. 25,8; 35,15 et forte etiam Gen. 32,3). Seungebatur itaque terra Edom Veteris Testamenti a terra Moab per *Wādī el-Hasā*, a Negeb (tractu australi) Iuda per desertum Zin et extendebatur usque ad sinum Aelaniticum et desertum Pharan. Cf. etiam s. v. GEBAL. Sine dubio regio ad orientem vallis *el-'Araba* protensa erat praestantior; in ea enim inveniuntur complures urbes, quae in Vetere Testamento terrae Edom adscribuntur; celeberrima urbs Petra seu Sela, quam Amasias rex Iuda cepit et Iectebel appellavit (4 Reg. 14,7 et v. IECTEHEL), Phunon (Num. 33,42), Bosra (de qua diximus s. v. BOSRA 1), Thophel (Deut. 1,1); iuxta sinum Aelaniticum erant duae urbes edomiticae Aelath et Asiongaber (Deut. 2,8; 3 Reg. 9,26).

Aetate Graecorum et Romanorum Edom appellatur Idumaea, cuius fines multo latius extenduntur quam Edom Veteris Testamenti. Ipsa Hebron in ditione Idumaeorum erat, donec a Iuda Machabaeo recuperata est (1 Mach. 5,65); Bethsura aquilonem versus a Hebron sita praecipuum erat munimentum Iudaeorum contra Idumaeos Iudaeam infestantes (1 Mach. 4,15. 29. 61; cf. textum graecum 4,29 et v. BETHSUR). A Flavio Iosepho in Idumaea etiam Amalecitis comprehenditur (Ant. II. 1,2) et tribui Simeon assignatur Idumaeae pars Aegypto et Arabiae contermina (V. 1,22). Ex aliis quoque locis (Ant. XII. 8,6; XIII. 9,1; Bell. Iud. IV. 9,7) colligitur ditioni Idumaeorum subiectas fuisse urbes Hebron, Ador, Maresa, Azotum. Videtur itaque terminus septemtrionalis Idumaeae assignari posse linea, quae ab

Azoto per Eleutheropolin (*Beit Djibrin*) Hebronem ducit.

Cf. *Reland*, Palaestina I. p. 66-73; *F. Buhl*, Geschichte der Edomiter 1893; *E. Hull*, Mount Seir 1889 p. 85 ss.

EDRAI (עֲדָרַי). 1. Edrai (LXX Ἐδράειν, Ἐδράειν, Ἐδράειν), urbs Og regis Basan, saepius cum Astaroth urbe principali regni Basan commemorata (Deut. 1,4; Ios. 12,4; 13,12. 31), prope quam Og ab Israelitis devictus et interfectus est (Num. 21,33; Deut. 3,1). Erat in territorio dimidia tribui Manasse transiordanicae attributo (cf. Num. 32,33). Recensetur Deut. 3,10 cum Selcha seu Salecha in extremis finibus Basan; sunt qui h. l. alteram Edrai statuunt ab urbe regia Og diversam (*Knobel*, *Keil* ad Num. 21,33 s. et Deut. 3,10), sed sine ratione cogente, neque probabile est praeter urbem saepe commemoratam et notissimam hoc uno loco alteram designari.

In Onomastico Edrai dicitur Adra, insignis Arabiae civitas 24 mil. pass. a Bosra (*ed. Lag.* 253,36; 118, 3) et s. v. Astaroth (213,35; 86,32): Adraa 25 mil. pass. a Bosra et 6 mil. pass. ab Astaroth. In Tabula Peutingeriana Adraha ponitur 24 mil. pass. a Bosra. Hodie nominatur *Edre'āt*, brevius *Der'āt* vel *Der'ā*, urbs 5000 fere incolarum in planitie montana, quam ab oriente et septemtrione Hieromax (*Yarmūk*) circumfluit, a meridie autem mons calcarius *el-Zumle* superat. Cavernas subterraneas urbis commemorat Guillelmus Tyr. (XVI. 10; apud *Migne* 201,650), qui praeter antiquum nomen Adratum etiam vulgarem tunc temporis appellationem: *civitas Bernardi de Stampis* tradit. Ruinas late extensas et cavernas subterraneas descripserunt *Wetzstein* et *Schumacher*. Aliqui denique agnoscunt Edrai etiam in *Ōtarua* inscriptionum aegyptiacarum (*Buhl*, *M. Müller*).

Cf. *Ritter*, Erdkunde XV 838 ss.; *Wetzstein*, Reisebericht über Hauran und die Trachonen p. 47 ss.; *Schumacher*, Across the Jordan p. 121-147; *F. de Sauley*, Numismatique de la Terre Sainte 1871 p. 373-377; *Pat. Expt. Fund.* Quart. Stat. 1890 p. 188-189; *W. M. Müller*, Asien und Europa

nach altaeg. Denkmätern 1893 p. 159; *F. Buhl*, *Alt. Pal.* 1896 p. 251; *Legendre* apud *Vigouroux*, *Dict. de la Bible* II. 1589 ss.

2. Edrai (I.XX *Ἐδραῖ*, urbs tribus Nephthali (Ios. 19,37). Censetur esse vicus *Yater* medius fere inter Tyrum et lacum *Hüle* (*Survey of West. Pal.* Mem. I. 205; *Legendre*, *Carte de la Palestine*; *Zuccchia*, *La Palestine d'aujourd'hui* 1899 II. 716). Sed ex opinione *F. de Hummelauer*, qui Ios. 19,35-38 non urbium Nephthali, sed arcium Tyriorum elenchum esse existimat, notissima illa Edrai transiordanica 19,37 agnosceunda est.

EDUCATIO. Quae curae infanti nato adhiberentur, indicavit Ez. 16,4; praecidebatur umbilicus, lavabatur, sale saliebatur ad firmanda membra et cutem et pannis involvebatur. Fere semper mater ipsa infantem nutrebat; cf. Gen. 21,7 ita Sara, 1 Reg. 1,23 Anna; 3 Reg. 3,21; Cant. 8,1; et satis diu lactabatur infans, nam 2 Mach. 7,27 dicit mater: lac tricenno dedi et alui; in die ablactationis Abraham fecit grande convivium Gen. 21,8 et Anna obtulit sacrificium 1 Reg. 1,24; unde coniicere licet eum diem sollemnem esse habitum. Puer circumcidebatur octavo die post nativitatem, quae caerimonia populo Dei adnumerabantur et quasi vere coram Deo vivere incipiebant; unde tum iis denuin nomen imponebatur. Spatio 40 dierum elapso (vel 80 dierum si puella nata erat) mulier sacrificium offerebat ad emundationem (Lev. 12,1-8); puer autem primogenitus sistendus erat Domino et quinque siclis redimendus; cf. Num. 18,15. 16. Etiam mentio fit nutricis; Debora vocabatur nutrix Rebeccae Gen. 35,8; cf. 24,59; Ex. 2,9; 4 Reg. 11,2.

Cura educandi et erudiendi liberos incumbit parentibus. Quandoque paedagogos quoque ad officium tale esse assumptos, ex ipso nomine *παιδαγωγος* concludimus; cf. Num. 11,2 et 4 Reg. 10,1. 5 et Is. 49,23; Nathan propheta curam Salomonis pueruli sibi commendatam accepit 2 Reg. 12,23. Quod sit praecipuum parentum munus in filiis educandis, Deus enuntiat in laude illa quam dedit Abraham: scio quod praecepturus sit filiis suis et domui suae post se, ut custodian

viam Domini et faciant iudicium et iustitiam Gen. 18,19. Cum enim hoc sit omnis homo: time Deum et mandata eius observa (Eccl. 12,13), ad id praecipua cura educationis dirigitur oportet. Unde parentibus dicitur: ne obliviscaris verborum quae viderunt oculi tui et ne excidant de corde tuo enuctis diebus vitae tuae, docebisque ea filios ac nepotes tuos, et: erunt verba haec quae ego praecipio tibi in corde tuo et narrabis ea filiis tuis, et: docete filios vestros, ut illa meditentur (Deut. 4,9; 6,7; 11,19). Ideoque iubentur explicare filijs quid significent caerimoniae illae coenae paschalis et quibus beneficiis olim populus a Deo sit donatus Ex. 12,26; 13,8; Ios. 4,6. 21; idque a patribus factum esse psalmista testatur: patres nostri narraverunt nobis, non sunt occultata a filiis eorum Ps. 77,3. 4. Similiter David voluit ut filii Iuda discerent carmen planctus de Saul et Ionathan 2 Reg. 1,18. Inculcatur filiis, ut honorent parentes Ex. 20,12; 21,17; Prov. 20,20; 23,22; 28,24; Eccl. 3,6 ss.; 7,29; 23,18 etc. et ut senibus reverentiam exhibeant Lev. 19,32; Eccl. 8,11 s. Parentes vero monentur, ut severa increpatione vitia filiorum coercerent ac puniant: virga in dorso eius qui indiget corde; livor vulneris absterget mala; stultitia colligata est in corde pueri et virga disciplinae fugabit eam; qui parci virgae odit filium suum, qui autem diligit illum, instanter erudit; virga atque correptio tribuit sapientiam, puer autem qui dimittitur voluntati suae confundit matrem suam Prov. 10,13; 13,24; 20,30; 22,15; 23,13; 29,15) et: filii tibi sunt? erudi illos et curva illos a pueritia illorum: filiae tibi sunt? conserva corpus illarum et non ostendas hilarem faciem tuam ad illas; qui diligit filium suum assiduatur illi flagella; qui docet filium suum laudabitur in illo; super filiam luxuriosam confirma custodiam etc. (Eccl. 7,25. 26; 30,1. 2; 49,9-11; cf. 26,13 s.). Atque virgines sese plerumque domi tenuisse etiam 2 Mach. 3,19 edicitur: eas quoque doctrina legis esse imbutas, exemplo docemur Susannae; nam parentes eius cum essent iusti erudierunt filiam suam secundum legem Moysi (Dan. 13,2).

De scholis quidem tempore antiquo non fit mentio. At nihilominus artem legendi et scribendi non fuisse incognitam licet concludere ex Iud. 8,14, ubi narratur (in textu hebr. et graeco) puerum (נַרְיָה vel iuvenem) ex Soccoth a Gedeone interrogatum ei scripsisse nomina principum et seniorum Soccoth, septuaginta septem viros. In Gemara (Baba bathra f. 21,4) narratur filium Gamalielis Iesum induxisse morem instituendi scholas puerorum in urbibus et Flav. Iosephus narrat Herodem puerum in ludum litterarium conmeasse (εἰς διδασκαλίου φοιτῶντα, Ant. XV. 10,3); se vero dicit natum annos quattuordecim ab litterarum amore laudem omnium reportasse, ita ut summi sacerdotes et primores urbis ad se ventitarent certius aliquid cognoscendi causa de legum sensu (Vita 2). — Tempore Antiochi Epiphanis ludi gymnasii Graecorum ab aliquibus qui moribus gentium plus aequo favebant inducti sunt, contra quos tamen s. auctor invehitur 1 Mach. 4,12-16; 2 Mach. 4,9-15. — Contra filios contumaces graves statuuntur poenae : maledictus qui non honorat patrem suum et matrem, et qui percusserit patrem suum aut matrem moriatur, item qui illis maledixerit (Deut. 27,16; Ex. 21,15. 17; Lev. 20,9; Prov. 20,20) et si quis coercitus obedire contempserit, apprehendent eum et ducent ad seniores civitatis et ad portam iudicii, et eius vitiiis declaratis lapidibus eum obruet populus (Deut. 21,18-21).

EFFEMINATUS. Ea voce plerumque redditur in Vulgata קְדֵיִשׁ seortum masculum, cinaedus; ita 3 Reg. 14,24, ubi de tempore Roboam refertur eiusmodi fuisse in terra; 15,12 eos ab Asa rege pio esse ablatos et pariter eiectos a Iosaphat 22,47 et a Iosia rege 4 Reg. 23,7. Verum Is. 3,4 : et effeminati dominabuntur eis, hebr. תְּלִלִים pueruli (ita communiter). Quod autem Prov. 18, 8 in Vulgata legitur, in textu massorethico non reperitur. Scorta eiusmodi in cultu deae Syriae (v. ATARGATIS) nefanda sua scelera patrabant.

EGENUS, EGESTAS vide s. v. PAUPER, PAUPERTAS.

EGEUS (עֶגְיָה, עֶגְיָה, Εγξ), eunuchus qui erat in civitate regia praepositus et custos mulierum regiarum, et cuius curae simul cum aliis virginibus Esther quoque tradita est, quae invenit gratiam in conspectu eius (Esth. 2,3. 8. 15). LXX nomen omittunt 2,3. 15; insuper legunt Εγξ 2,14 loco Suzagazi. Uti Clesias refert (Pers. 24) Ephesius quidam nomine Ἐγξας cum Xerxe rege versabatur.

EGLA (עֶגְלָה, Αἰγᾶλ), uxor David quae ei dum in Hebron moraretur peperit Iethraam (2 Reg. 3,3; 1 Par. 3,3). Cum l. c. dicatur uxor David, qui titulus quinque aliis uxoribus non tribuatur, aliqui putarunt eam fuisse uxorem primariam, fuisse, ut rabbini volebant, Michol; sed animadvertit F. de Hummelauer ad 2 Reg. 3,5 uxoris titulum Eglae ultimo adici, ut affirmetur omnes illas uxores fuisse, non concubinas.

EGLON (עֶגְלוֹן, Ἐγλώμ). 1. Rex Moab, qui Israelitas per duodeviginti annos oppressit regione Ierichuntina occupata, sed ab Aod iudice in aestivo coenaculo occisus est (Iud. 3,12-25 et v. AOD).

2. Urbs antiqua Chananaeorum (Ios. 12,12; LXX Αἰγλώμ), in campatribus Iuda, in secunda provincia Sephelae enumerata (Ios. 15,39; LXX B omitt., A Ἐγλώμ); eius rex Dabir cum regibus urbium Ierusalem, Hebron, Ierimoth, Lachis foedere iunctus urbem Gabaon oppugnavit, sed ipse a Iosue interfectus et Eglon in ore gladii percussa est; de situ urbis docetur, quia Iosue de Lachis in Eglon progressus est et de Eglon in Hebron ascendit (Ios. 10,3. 5. 23. 34. 36. 37; LXX Ὀδολλώμ). Correspondere videtur in Onom. (ed. Lag. 234,92; 103, 22 s. v. Bethagla) vicus Agla 10 mil. pass. ab Eleutheropoli Gazam versus; alibi autem Eusebius et S. Hieronymus (l. c. 233,45; 118,21) Eglon cum Odollam confundunt, cui confusioni lectio LXX Ios. 10,3 s. ansam praebuit. Nomen antiquum conservatum cernitur in *Khirbet 'Adjlān* quattuor horis ab Eleutheropoli occidentem versus.

Cf. Robinson, Pal. II. 657; Guérin, Judée II. 297. 298; Survey of West. Pal. Mem. III. 261. 278; Riess, Bibel-Atlas ed. 3; F.

Buhl, Alt. Pal. 1896 p. 192; *D. Zaneccchia*, La Palestine d'aujourd'hui 1899 II. 285; *Liérin de Hamme*, Terre Sainte ed. 4 II. 174; Zeitschr. d. D. Pal.-Ver. XVI. 1893 p. 53.

ELA (עֵלָא et 3 Reg. 4.18 נֵלָא; יֵלָא; יֵלָא et 1 Par. 4.15 אֵלָא, 9.8 יֵלָא),

1. Dux Edom (Gen. 36.41; 1 Par. 1.52; cf. dicta s. v. AELATH).

2. Pater Semei, unius ex duodecim praefectis Salomonis (3 Reg. 4.18).

3. Filius Baasa, rex Israel in Thersa per duos fere annos; contra eum rebellavit Zambri dux equitum, regem in convivio temulentum occidit omnemque domum Baasa delevit (3 Reg. 16.6 et 16, 8-14). Uti Baasa, ita Ela rex erat impius et idololatra.

4. Pater Osee ultimi regis Israel (4 Reg. 15.30; 17.1; 18.1. 9).

5. Unus e filiis Caleb filii Iephone (1 Par. 4.15).

6. Beniaminita quidam, filius Ozi (1 Par. 9.8).

ELAD (עֲלָדָא, Ἐλεάδ), unus ex filiis Ephraim, quos occiderunt viri Geth et quos luxit Ephraim pater multis diebus (1 Par. 7.21. 22). Cum adeo explicite dicatur: Luxit Ephraim pater eorum multis diebus etc. (7.22), assumendum videtur eo loco narrari aliquid, quod eveniret superstitute Ephraim (de quo v. 20), ergo coloniam Hebraeorum in Palaestina fuisse multo ante Exodum tempore, dum maior populi pars degeret in Aegypto, ut pluribus ostendere conatur *Fl. de Moor* (cf. *Revue bibl.* I. 1892 p. 407. 408; *Science catholique* 1894 p. 713); sed v. EPHRAIM 1.

ELADA (עֲלָדָא, Ἐλαδά), filius Suthalae filii Ephraim (1 Par. 7.20).

ELAI (Ἐλαία?), Simeonita ex maioribus Iudith (Iudith 8.1).

ELAM v. AELAM.

ELASA (עֲלָסָא; Ἐλεασά. Ἐλασά, Ἠλασά, Ἐλεασάν). 1. Unus ex posteris Hesron de stirpe Iuda, filius Helles et pater Sisamoi; enumeratur nomen inter illos tredecim, qui ab Oholai filia Sesan descendunt, quae Ieraa Aegypto, servo Sesan, nupsit (1 Par. 2.39. 40 et cf. 2.31).

2. Filius Rapha seu Raphaia et pater Asel ex posteris Saul (1 Par. 8.37; 9.43).

3. Sacerdos de filiis Pheshur tempore Esdrae (Esd. 10.22).

4. Filius Saphan (Ier. 29.3) et probabilis etiam frater Alicam, amici Ieremiae (cf. Ier. 26.24); Elasa et Gamarias a Sedecia rege legati ad Nabuchodonosor missi sunt, per quos eadem occasione Ieremias epistolam ad exules misit.

ELATH v. AELATH.

ELCANA (עֲלֻכָנָא, Ἐλκανά). 1. Filius secundus Core de stirpe Caath (Ex. 6. 24); eius fratres nominantur Aser (Asir) et Abiasaph. Ad eundem Elcana videntur referenda esse 1 Par. 6.23. 25. 36 (hebr. 6.8. 10. 21). Cf. tabulam XVIII. in Concord. Lat. huius Cursus p. 11 et *P. de Broglie*, Les généalogies bibliques in Congrès scientifique international des Catholiques I. 1888 p. 143.

2. Unus ex posteris Core (1 Par. 6.26. 35; hebr. 6.11. 20).

3. Pater Samuelis prophetae et filius Ieroham (1 Reg. 1.1; 1 Par. 6.27. 34; hebr. 6.12. 19). Incolebat urbem Ramathaim Sophim in monte Ephraim, unde Ephratacus i. e. incola tribus Ephraim appellatur, quamquam origine erat levita ex genere Caath et familia Core. Vivebat aetate Ieli pontificis; quolanis vir pius ascendebat in Silo, ut adoraret et immolaret; Annam uxorem, quamvis esset sterilis, singulari amore prosequabatur prae Phenenna altera uxore, quae ei filios filiasque pepererat. Precibus Annae Samuel a Domino donatus est et a parentibus Domino oblatus, praeter quem Anna tres alios filios et duas filias Elcanae donavit. Cf. 1 Reg. 1.1 ss.; 2. 11. 20. 21.

4. Unus ex maioribus Barachiae levitae in Netopha (1 Par. 9.16).

5. Vir ex posteris Core et socius David in Siceleg fugitivi (1 Par. 12.6).

6. Levita, unus ex duobus sanitoribus, qui praecedebant arcam, cum ex domo Obedom Hierosolyma transferretur (1 Par. 15.23); utrum sit idem atque Elcana 4, non constat.

7. Elcana secundus a rege Achaz i. e.

eius minister primarius, qui a Zechri, viro forti ephraimitico in pugna, qua Phacee rex Israel de Iuda victoriam reportavit, occisus est (2 Par. 28,7).

ELCESAEUS (עֶלְסָאֵי, ὁ Ἐλκεσαῖος)

designatur Nahum propheta (Nah. 1,1) i. e. vir ex vico Elcesi (vel Elqosh) in Galilaea, ut iure exponit S. Hieronymus: « Quidam putant Elcesacum patrem esse Naum..... cum Elcesi usque hodie in Galilaea viculus sit, parvus quidem et vix ruinis veterum aedificiorum indicans vestigia, sed tamen notus Iudaeis et mihi quoque a circumducente monstratus » (in Prol. ad comment.). Neque hoc testimonium S. Hieronymi repudiari potest eo, quod iste « circumducens » temere *responderit* de vico, ne forte ignorantiae accusaretur, uti vult *Gesenius*, Thesaurus p. 1211; etenim non interrogatur, sed sua sponte S. Hieronymum de illo vico edocuit. Unde plerisque Elqosh est vicus hodiernus *el-Kauze* prope *el-Rāme* (Rama, Vulgata: Arama) in Nephthali (*Legendre* apud *Vigouroux*, Dict. de la Bible II. 1647).

Verum aliae quoque opiniones de situ Elcesi mentione dignae sunt. Primum quidem traditio quaedam saeculo 16. exorta fert Nahum in Assyria in vico *Alqush*, qui duorum dierum itinere a Mossul ad ripam orientalem Tigridis fere septemtrionem versus a Khorsabad situs est, natum esse vel vixisse; quae traditio quam infirmis argumentis nitatur, ostendit *Knabenbauer*, Comm. in Proph. Minores II. p. 1.2. Alii (*Hutzig*, *Knobel*) vicum Nahum (*Kefar Nahūm*) i. e. Capharnaum, urbem ex Novo Testamento celeberrimam, prophetae Nahum patriam esse opinati sunt; sed obstat primo, quod in Vetere Test. nulla unquam eius vici sit mentio et secundo, quod Naum. elementum alterum vocis Capharnaum, non certo ad nomen Nahum prophetae referri potest. Alii denique suspicantur Elcesi esse vicum *Qessiyē* (omisso articulo arabico) prope Eleutheropoliū (*Beit Djibrīn*, Bethogabra) inter meridiem et orientem, provocantes ad Pseudo-Epiphaniū, De vitis prophetarum (*Migne* 43,409. 417) et ad Paulum episcopum Tellensem, qui annis 617 et

618 Velus Testamentum ex textu graeco transtulit in linguam syriacam. Et apud Ps.-Epiphaniū quidem in textu quem edidit *Tischendorf* (Anecdota sacra et profana, Lipsiae 1861, p. 111) legitur: Ἐλκεσαῖμ πέραν τοῦ Βητγαβρῆμ φυλῆς Συμεών. Iamvero pro Betabarem alii codices praebent Βήγαβρ et Paulus Tellensis Bet-Gabre. Sed Bet-Gabre est Betogabra, hodie *Beit Djibrīn* (v. ELEUTHEROPOLIS). Plura de textibus allatis exponit *E. Nestle* in Zeitschr. d. D. Pal.-Ver. I. 1878 p. 222-225.

ELCHANAN (עֶלְחָנָן, Ἐλκανάν).

1. Filius Iair, in Vulgata Adcodatus (vide s. v.), qui in bello contra Philisthaeos percussit Lachmi fratrem Goliath Gethaei (2 Reg. 21,19; 1 Par. 20,5).

2. Filius Dodo (דודו, Δουδί, Δωδωέ; Vulgata: patruī eius) ex Bethlehem, unus ex viris fortissimis in exercitu David (2 Reg. 23,24; 1 Par. 11,26); scribitur Elehanan in Vulgata 2 Reg. 23,24.

ELDAA (עֶלְדָּא, Ἐλδαα, Ἐλδαδά),

unus ex filiis Madian (Gen. 25,4; 1 Par. 1,33). Tribus eius nominis hucusque non innotuit. Sed in inscriptionibus himyariticis simile nomen Yedail pro personis usurpatum invenitur; cf. Zeitschr. d. D. Morg. Ges. XXVII. 1873, p. 648; *Delitzsch*, Genesis 1887 p. 348.

ELDAD (עֶלְדָּד, Ἐλδάδ), unus ex 70

illis, qui spiritu prophetico donati sunt, ut Moysen in populo gubernando adiuvarent. Cum Moyses illos ante tabernaculum stare fecisset, ut de spiritu, qui in ipso Moyse erat, acciperent, duo ex illis remanserant in castris scil. Eldad et Medad. Qui cum nihilominus prophetaient, Iosue eos prohibendos esse censuit, quod non mediante Moyse spiritum acceperint. Sed Moyses: Quid, inquit, acularis pro me? quis tribuat, ut omnis populus prophetet et det eis Dominus spiritum suum? (Num. 11,26-29).

ELEALE (עֶלְאֵל, Ἐλεαλί), urbs tri-

bus Ruben in regione uberrima ad pastum animalium (Num. 32,3, a Rubenitis reaedificata (32,37). Iam saeculo 8. ante Christum a Moabitis occupata est et saepius in prophetis oraculis con-

Ira Moab editis commemoratur (Is. 15, 4; 16,9; Jer. 48,34). Tempore Eusebii et S. Hieronymi ostendebatur villa grandis in primo ab Esbus (Hesebon) miliario (Onom. ed. Lag. 253,33; 118,6). Hodie cernuntur ruinae *el-'Al* (i. e. elevata) septentrionem versus ab *Hesbôn* (Hesebon) in colle, qui latum aspectum praebet supra meridianam partem regionis *Belqâ*.

Cf. Burckhardt, Reisen in Syrien, ed. Gesenius p. 623; Tristram, Land of Moab p. 339 s.; Duc de Luynes, Voyage I. 146; Survey of East. Pal. Mem. I. 16-19; F. Buhl, Alt. Pal. 1896 p. 266.

ELEAZAR (עֲלִיָּזָר, Ἐλεάζαρ).

1. Tertius filius Aaron (Ex. 6,23; Num. 3,2; 1 Par. 6,3; 24,1), matrimonio iunctus cum una de filiabus Phutiel (Ex. 6,25). Ipse cum patre Aaron et fratribus ad sacerdotium assumptus est (Ex. 28,1) unaque cum illis consecratus. Appellatur princeps principum levitarum et erat super excubitores custodiæ sanctuarii (Num. 3,32; 4,16). Post mortem violentam fratrum suorum Nadab et Abiu (Lev. 10,1 ss.) ipse erat filius maior natu Aaronis pontificis. Cum illi, qui in rebellione Core tentaverant incensum offerre Domino, igne absorpti essent, Eleazar iussus est thuribula colligere eaque in laminas producta affligere altari (Num. 16,37 ss.; Deut. 10,6); idem ritum parandi aquam lustralem peragere debebat (Num. 19,1 ss.). Mortuo Aaron ipse summus sacerdos est institutus (Num. 20,26 ss.) et ut talis in variis negotiis adstilit Moysi (Num. 26,1 s.; 27,2 s.; 31,6 s.; 32,2 s.) eiusque successor ioseue (Num. 34,17; Jos. 14,1; 17,4; 19,31; 21,1). Mors eius refertur Jos. 24,33 (v. Gabaath Phinees s. v. GABAA 10). In summo sacerdotio ei successit Phinees filius (Num. 25,11-13). De pontificibus ex familia Eleazar vide s. v. PONTIFEX.

2. Filius Abinadab in Cariathiarim, sanctificatus ad arcem Domini custodiendam, quæ tunc in domo patris eius asservabatur (1 Reg. 7,1).

3. Unus ex heroibus David, filius Dodo (דָּוִד, Δωδάλ, Vulgata : patruus eius), Ahohites, fortiter contra Philisthaeos

pugnans in Phesdomim (1 Par. 41,12. 13^a); loco parallelo 2 Reg. 23,9 habetur *Kethib* כְּתִיב, Vulgata : filius patruus eius, LXX Ἐλεάζαν υἱὸς πατρὸς ἐλάου αὐτοῦ υἱὸς Δωδάλ. Idem videtur esse perfectus secundae turmae in exercitu David (1 Par. 27,4); v. DUDIA.

4. Filius Moholi et frater Cis, levita tempore Davidis (1 Par. 23,21. 22; 24,28); v. CIS 3.

5. Filius Phinees, sacerdos tempore Esdrae (Esdrae 8,33); etsi non explicitè sacerdos dicitur, tamen sacerdotibus est adnumerandus, quia adeo arte coniungitur cum Meremôth sacerdote et ab his duobus duo levitae distinguuntur, quibus universis officium obtigit appendendi argentum, aurum, vasa sacra ex Babylonia in Ierusalem allata.

6. Unus de filiis Pharos, qui uxores alienigenas dimittere ab Esdra iussi sunt (Esdrae 10,25); in Vulgata scribitur Eliezer.

7. Levita, qui in dedicatione muri Ierusalem Nehemiae adstilit (Neh. 12,41 [42]).

8. Quartus filius Mathathiae, cognominatus Abaron (vide s. v.), qui in pugna ad Bethzacharam (vide s. v.) nobilem mortem occubuit (1 Mach. 2,5; 6,43-46). Idem in pugna anteriore apud Emmaus commissa ex libris sacris ante praeliandum legiti, ut animos inflammaret; eiusque nomen : Adiutorium Dei i. e. Eleazar milites tamquam signum seculi sunt (2 Mach. 8,23; Vulgata : Esdras, LXX Ἐλεάζαρος); cf. 1 Mach. 4,3.

9. Pater Iasonis legati Romam missi a Iuda Mach. (1 Mach. 8,17); hunc Eleazarum esse filium Mathathiae, Abaron cognominatum, certo affirmari nequit.

10. Unus de primoribus scribarum, nonagenarius, qui carnem porcinam ad imperium Antiochi IV. Epiphanis manducare fortiter recusavit et duram sustinuit mortem pro fide ac pietate (2 Mach. 6,18-31), probabilius in urbe Antiochia Syriae, ubi etiam septem illi fratres Machabaei (2 Mach. 7,1 ss.) mortem perpessi sunt.

11. Filius Eliud, pater Mathan inter proavos Ioseph sponsi B. V. Mariae (Matth. 1,15).

12. Nomen Lazarus abbreviatum est ex Eleazar (v. LAZARUS). Eodem modo in Talmude hieros. habetur לעזר abbreviatum ex אלעזר (cf. *Lightfoot*, Horae hebr. II. p. 646-647; *Levy*, Neuhebr. und chald. Wörterbuch II. 515 b).

ELECTA. Altera S. Ioannis epistula inscribitur ἐλεκταῖς κυρία Electae dominae. Quae sit Electa controversatur; aliqui eam matronam nobilem fuisse putant, quod tamen valde improbabile est. Soror eius iterum vocatur Electa: salutant te filii sororis tuae Electae v. 13; scribit apostolus se gaudere quoniam *de filiis tuis* ambulantes in veritate invenerit; item numerus pluralis in v. 8. 10. 12 etc. aliaque suadent probabilissimam esse sententiam Clementis Alexandrini, Hieronymi, Occumenii et multorum recentiorum intellegi eo nomine ecclesiam quandam particularem; nam etiam a S. Petro ecclesia romana vocatur ἡ ἐν Βαβυλῶνι συνελεκταῖς (1 Petr. 5,13) et cum in s. litteris habitudo inter Christum et Ecclesiam tanquam sponsi et sponsae describatur, non potest videri mirum cum Christus vocetur dominus, Ecclesiam appellari dominam (cf. *Cornely*, Introd. ed. 2 III. p. 682 s.).

ELECTRUM vocatur in prophetia Ezechielis (1,4.27; 8,2) metallum pretiosum hebraice הַשֵּׁכֶל dictum. Cum nomine hebraeo comparant aegyptiacum *asem*, quod pariter electrum designat, et *hsmn*, quod fortasse nomen erat aeris vel aurichalci; pariter in comparisonem adducunt assyriacum *eshmarū*, quod metallum aliquod pretiosum videtur denotare. Cf. *Bochartus* docta dissertatione finali in opere suo de animalibus biblicis multis ostendere conatur, הַשֵּׁכֶל Ezechielis esse aurichalcum. Sed non videtur probare, discedendum esse a significatione quam LXX et Vulgata indicarunt, quamque praefendam censemus. Est autem electrum, gr. ὁ ἤλεκτρος, metallum ex auro et argento compositum; plerumque cum duabus partibus auri tres partes argenti coniunctae apparent, sed etiam aliis variis modis unita reperiuntur, cum aurum in statu naturali fere semper argentum

vario gradu admixtum habeat. Cum duobus illis metallis pretiosissimis constaret, electrum maximi aestimabatur pulchrumque aspectum praebebat, ideoque verbis Ezechielis bene convenit. — Electrum hoc metallicum non est confundendum cum electro resinoso, quod *sucinum* (*Bernstein*, *Ambre jaune*) vocant (gr. τὸ ἤλεκτρον), de quo in S. Scriptura non videtur esse sermo. — Cf. METALLA.

Cf. *Sam. Bochart*, Hieroz. II. 871-88 ed. *Rosenm.* III. 876-900; *E. F. K. Rosenmüller*, Bibl. Alterth. IV. 1,59 s.; *M. Scheins*, De electro veterum metallico, Berolini 1871; *R. Lepsius* in Philol. u. Hist. Abh. d. Berl. Akad. 1871, 43-49. 122 s. 129-43; *A. Erman*, Aegypten 611; *id.* in Ztschr. f. aeg. Spr. XXX. 1892, 31-5; *Frd. Delitzsch*, Assyri. Handwb. 146 a (*eshmarū*).

L. FONCK.

ELEHANAN scribitur in Vulgata 2 Reg. 23,24 pro Elchanan (v. ELCHANAN 2).

ELEMOSYNA. Beneficentia et misericordia in egenos multum commendatur in s. litteris; Prov. 3,27: si vales benefacere, benefac; et 22,9: qui pronus est ad misericordiam benedicetur, et 28,27: qui dat pauperi non indigebit; qui despicit deprecantem sustinebit penuriam. Laudes eleemosynae singulari modo celebrantur in libro Tobiae: ex tua substantia fac eleemosynam et noli avertere faciem tuam ab ullo paupere; ita enim fiet ut nec a te avertatur facies Domini... eleemosyna ab omni peccato et a morte liberat et non patietur animam ire in tenebras etc. 4,7 s. et: bona est oratio cum ieiunio et eleemosyna magis quam thesauros auri recondere, quoniam eleemosyna a morte liberat et ipsa est quae purgat peccata et facit invenire misericordiam et vitam aeternam 12,8. 9; cf. 14,11. Daniel quoque admonet Nabuchodonosor, ut iniquitates suas redimat misericordiis pauperum 4,24; atque eadem est doctrina Christi, si iubet parari amicos de mammona iniquitatis Luc. 16,9 et si dicit: verumtamen date eleemosynam et ecce omnia munda sunt vobis Luc. 11,44. Pariter monet Sapiens: pauperi porrigite manum

tuam, ut perticiatur propitiatio et benedictio tua, et: non est bene eleemosynas non danti Eccli. 7,36; 12,3 s. cf. 18,12 s. et: ignem ardentem exstinguit aqua et eleemosyna resistit peccatis; eleemosynam pauperis ne defraudes etc. Eccli. 3,33; 4,1 s.; 7,10; 17,18; 29,15; 31,11. Et quanti haec misericordia habita sit, inde quoque elucet quod ipsa vox *iustitia* צדקה passim in notionem transiit benignitatis et misericordiae et liberalitatis et beneficentiae. Ita v. g. *Gesenius* Thes. p. 1151 eam notionem assignat pro Ps. 11,4; 24,5; Prov. 10,2; Mich. 6,5; Dan. 4,24; dein iam apud LXX ea vox saepe redditur ἐλεημοσύνη; ita Deut. 6,25; 24,13; Ps. 23,5; 32,5; Is. 1,27 etc. et in dialecto aramaica צדקא vox est pro eleemosyna.

Uti Christus vituperat superbam ostentationem in eleemosyna danda, ita eleemosynam commendat et laudat Matth. 6,2-4; eam commendat in parabola de Samaritano (Luc. 10,33 s.) et: vendite quae possidetis et date eleemosynam, facite vobis sacculos qui non veterascunt, thesaurum non deficientem in caelis (Luc. 12,33) et in ultimo iudicio misericordiam in egenos et opem iis praestitam constituit tamquam causam beatitudinis, duritiem tamquam causam damnationis (cf. Matth. 25,35-46). Atque primi Christiani hanc Christi doctrinam in opus statim deducebant: divites opes suas cum egenis communicabant ita ut iam nemo egens inter illos esset (Act. 4,32. 34). Eleemosynis multis Cornelius centurio Deo erat acceptus (Act. 10,2. 4. 31), Tabitha laudatur plena operibus bonis et eleemosynis quas faciebat (Act. 9,36). Barnabas et Saulus ab Antiochenis eleemosynas detulerunt egentibus in Iudaea (Act. 11,29. 30); Paulus apostolus multum commendat, ut collectae fiant (cf. Rom. 15,25; 1 Cor. 16,1 s.; 2 Cor. 8,1-9,15) et ipse postea coram Felice praeside dicit se eleemosynas facturum in gentem suam Ierosalem venisse. Ad opera misericordiae graviter adhortatur Iacobus (1,27; 2,13-16) et quanti eiusmodi opera habita sint ab initio rei christianae, demonstratur electione et institutione diaconorum (Act. 6,1-6), demonstratur quod cura egentium inter

charismata recensetur (1 Cor. 12,28 opitulationes, ἀντιλήψεις) et quod tanta sollicitudine describit apostolus quales esse debeant viduae quae ad ministerium pauperum admittantur 1 Tim. 5,9. 10.

ELEPH (הֶאֱלֵף; B omitt., A Σελάλεφ

qua voce in unum confunduntur Sela et Eleph), urbs tribus Benjamin inter quattuordecim urbes occidentales huius tribus enumerata (Ios. 18,28). Situs est ignotus. Censet *F. de Hummelauer* ad h. l. Sela ha-Eleph unicum nomen efficere.

ELEPHANTUS. 1. *Nomen.* Elephas (ἐλέφας) quo nomine in hebraeo appellatus sit, non constat: ipsum enim animal non commemoratur in S. Scriptura nisi in libris Machabaeorum graece scriptis. In lingua chaldaea et hebraea iuniore פִּיל nominatur, sicut in assyriaco *pīru*; unde simile fuisse nomen antiquum hebraeum aliqui supposuerunt. Alii ex nomine eboris שֵׁן הַבַּיִם (3 Reg. 10,22; 2 Par. 9,21), quod ex שֵׁן dens et הַבַּיִם ortum explicant (cf. assyr. *shūmī-pīrī*), hoc ultimum הַבַּיִם esse nomen hebraicum elephanti concluderunt, comparando nomen elephanti aegyptiacum *eb* et indicum *ibha* (ex lingua Tamil), et graecum *el-ephas*. — Ebur praeterquam nomine memorato, etiam simpliciter appellatione שֵׁן *dens* designatur; semel dentes eburnei ob externam quamdam similitudinem *cornua dentis* appellantur (Ez. 27,15 שֵׁן כַּרְנֵי-תֵּן, Vulgata: dentes eburnei).

Cf. *Pictet*, Journ. Asiat. 1843, Sept.-Oct., 133-66; *Chr. Lassen*, Handb. d. ind. Alterth. I. ed. 2, Leipzig 1867, 363-7; *F. Hommel*, Namen d. Säugethiere 324-7; *C. R. Conder* in Quart. Stat. 1896, 168 s.

2. *Textus S. Scripturae.* Elephanti in solis libris Machabaeorum occurrunt. Reges enim Syrorum, quibuscum Machabaeis pugnandum erat, ad bellum magno elephantorum numero utebantur (1 Mach. 1,18; 3,34; 6,30 ss.; 8,6; 2 Mach. 11,4; 13,2). Quae bestiae speciali arte ex India accepta (1 Mach. 6,37 « Indus, magister bestiae ») ad praelium edocebantur (ib. 6,30 εἰδότες πόλεμον et

turri lignea firma protectos aliquos milites praeliantes portabant (ib. 6.37, ubi per errorem scribae numerus militum 32, fortasse ex numero 32 elephantorum, videtur in textum irrepisse). In exercitu ita distribuebantur, ut hinc inde mille pedites et quingenti equites unamquamque bestiam circumdarent (ib. 6.35), atque dux specialis, nomine *ἐλεφαντάρχης* curam eorum habebat (2 Mach. 14,12; cf. 3 Mach. 5,4). Ad pugnam autem incitabantur potu vini generosi (cf. 3 Mach. 5,2) vel ostenso saltem « sanguine uvae et mori » (1 Mach. 6,34), fortasse ut excitata per subtractionem potus desiderati ira eo magis « acuerentur in praelium ». In bello vero propter ingentem suam molem saepe magnam cladem inferebant, sed audacia et fortitudine interdum occidebantur, uti Eleazari exemplum ostendit (ib. 6.43-46).

3. *Dentes* elephantorum inde ab aetate Salomonis frequenter in S. Scriptura commemorantur; Salomon enim primus sibi ebur comparasse ac praesertim solum eburneum sibi fecisse legitur (3 Reg. 10,18. 22; 2 Par. 9,17. 21). Etiam domus regia et turris ebore ornabatur (Ps. 44[43],9; Cant. 7,4), ac splendore huius operis eburnei Sponsus et Sponsa in Cantico assimilantur (Cant. 5,14; 7,4). Successores Salomonis atque ditiores de populo mox variam suppellectilem eburneam sibi comparabant (3 Reg. 22,39; Am. 3,15; 6,4; cf. Apoc. 18,12), ac Tyrii tantos sumptus in naves suas impendebant, ut lignis cupressinis ebore decoratis illas ornarent (Ez. 27,6). In palatio quoque Assueri funes byssini atque purpurei « eburneis circulis inserti » dicuntur in Vulgata (Esth. 1,6, omitt. hebr. et LXX). Optimum autem ebur aestimabatur indicium (Ez. 27,6), quod filii Dedan per Arabiam Tyrum usque deferabant (ib. v. 13). — Similiter atque in S. Scriptura, etiam in monumentis assyriacis et aegyptiis ebur inter res pretiosissimas memoratur ac variae res ex ebore factae vel ebore ornatae leguntur. Aegyptii autem praesertim ex Aethiopia et Nubia ebur suum acceperunt. Vide etiam EBUR.

De Assyriis cf. *Sennacherib*, Prisma Col. 3,36 s. (thronus, lectus eburneus); *Ram-*

mān-Nirāri, Tab. Kalach l. 20 (lectus eb.); *Nabuchodonosor*, Inscr. tab. magn. col. 9, 9-11 (portae); *Sargon*, Cyl. l. 63 (palatia); *Nabopolassar*, Inscr. templi Merodach col. 1,41-43 (varia supellex). — De Aegyptiis cf. *Wilkinson-Birch*, Manners and Customs l. pl. II. A et B; ib p. 413 fig. 185 etc.; *A. Erman*, Aegypten 659; *I. Lieblein* in Ztschr. f. aeg. Spr. XXIV. 1886, 12 s. (ebur ex Punt). — Pro tempore posteriore cf. *W. Heyd*, Gesch. d. Levantehandels, Stuttgart 1879, II. 588 s.

4. *Patria*. Licet autem India elephantis atque ebore semper fuerit ac sit celeberrima, nihilominus tempore Salomonis etiam non ita procul a Palaestina elephantii vivebant. Nam annales regis *Theglath-Phalasar I.* (c. a. 1400 a. Chr.) referunt, regem in finibus Harran et ad ripam fluminis Habur decem ingentes elephantos occidisse et quattuor vivos cepisse eosque et pelles ac dentes occisorum in civitatem suam Assur attulisse (Annal. col. 6,70-75). Etiam in obeliseo nigro regis *Salmanassar II.* (859-825 a. Chr.) elephantii ex terra Musri in tributum accepti describuntur (*A. H. Layard*, Monuments of Niniveh 1,55); nomine autem Musri hic regio Harran vicina videtur designari. Salomon igitur non necessario ad Indiam navigia sua pro ebore mittere debuit, atque etiam simias et pavos per mercatores Mesopotamiae obtinere potuit.

5. *Species*. Nostra aetate duae elephantii species distinguuntur: *Elephas asiaticus* Blumenbach, qui praesertim in India vivit, et *E. africanus* Bl., Africae centralis incola. Ex utraque specie ebur habetur, sed indicium etiam nunc prae ceteris optimum aestimatur.

Cf. *Sam. Bochart*, Hieroz. I. 247-73, ed. Ros. l. 233-68; *Fr. J. Schoder*, Hierozoici specimen l. 1-32; *G. C. P. ab Hartenfells*, Elephantographia curiosa, Erfordiae 1715; *P. Ekerman*, Diss. de Elephantis turrito, Upsaliae 1751; *E. F. K. Rosenmüller*, Bibl. Alterth. IV. 2,103-10; *C. Ritter*, Erdkunde IV. 1,903 ss.; *P. Armandi*, Hist. militaire des Éléphants, Paris 1843; *H. O. Lenz*, Zool. d. alt. Gr. u. Römer 160-84; *L. Lewysohn*, Zool. d. Tahn. 148 s.; *Chr. Lassen*, op. cit. 354-67; *H. B. Tristram*, Nat. Hist. of the Bible ed. 8,81-3; *I. G. Wood*, Bible Animals 302-12; *P. Cultrera*, Fauna bibl.

79-84; W. Houghton in Trans. Soc. Bibl. Arch. V. 1877, 348-50; *id.* ib. VIII. 1884, 123-31; *Leunis-Ludwig*, Synopsis I. 1 ed. 3 p. 233-5; A. E. Brehm, Tierleben ed. 3 III. 1-37; K. Möbius in Sitzungsber. der Ges. naturf. Freunde 1896, 23 s; G. Loreta, La zoologia nella Bibbia 236-59.

L. FONCK.

ELEUTHEROPOLIS (Ἐλευθεροπόλις) in S. Scriptura non invenitur, sed apud Eusebium et S. Hieronymum (Onomasticon) et in commentariis tum Christianorum tum Iudaeorum tam frequenter commemoratur praesertim ad situm urbium biblicarum determinandum, ut brevis mentio hic omitti non debeat. Apud talmudicos scriptores appellatur Bet Gubrin, apud Graecos et Romanos Eleutheropolis (*Relandus*, Palaestina p. 641. 749 s.). Nomen scribitur apud Ptolemaeum V. 16,6 [15,5] Βαυτογαβρί (— βριγ, — βρά), in tabulis Peninge-rianis Betogabri; fortasse apud Flavium Iosephum (Bell. ind. IV. 8,4) pro Βή-ταβρις quae in media Idumaea sita est, cum Rufino legendum erit Βήγαβρις i. e. Baetogabra. Hodie *Beit Djibrin*, qui vicus est fere medius inter Hebron et Azotum itemque fere medius inter Bersabee et Lyddam (Diospolim).

Cf. *Ritter*, Erdkunde XVI. p. 144; *Robinson*, Pal. II. 613 ss. 672 ss.; *Guérin*, Judée II. 307-311; 331-340; *Survey of West. Pal.* Mem. III. 257 ss. 266 ss.; *Neubauer*, Géogr. du Talmud 122 ss.; *D. Zancichia*, La Palestine d'aujourd'hui 1899 II. 275 s.; *Liévin de Hamme*, Terre Sainte ed. 4 II. 159 ss.; *Baedeker-Benzinger*, Pal. und Syrien ed. 5 p. 137.

ELEUTHERUS (Ἐλεῦθερος), fluvius qui Phoeniciam a Syria dividit et inter Tripolim et Aradum in mare Mediterraneum effunditur. Usque ad hunc fluvium Ionathas Mach. conitatus est Ptolemaeum VI. Philometorem regem Aegypti, cui in urbem Ioppen occurrerat (1 Mach. 11,6. 7); postmodum cum Ionathas persequeretur exercitum Demetrii II. Nicatoris, non comprehendit eos; transierant enim flumen Eleutherum (1 Mach. 12,30); ipse, ut videtur, in regionem syriacam arma inferre noluit. Est hodiernus *Nahr el-Kebir* (*fluvius magnus*), ut recentiores censent.

Cf. *Strabo* XVI. 2,12; *Plin.* V. 19,78; *Flav. Ios. Ant.* XIII. 4,5; 5,10; XV. 4,1; Bell. ind. I. 18,5; *Baedeker-Benzinger*, Palaest. und Syrien. ed. 5 p. 395; *Buhl*, Alt. Pal. 1896 p. 107.

ELIA (עֵלִיא). 1. Unus ex sex filiis Ieroham et ex posteris Benjamin in Ierusalem (1 Par. 8,17; *Ἐριά*).

2. Sacerdos de filiis Harim (Esdr. 10, 21; *Ἐλῆα*) et

3. Vir laicus de filiis Aelam (Esdr. 10,26; *Ἰλῆα*), qui uxores alienigenas duxerant.

ELIAB (עֲלִיָאב, *Ἐλιᾶβ*). 1. Filius Helon, princeps tribus Zabulon tempore quo census fiebat in deserto Sinai (Num. 1,9; 2,7; 7,24. 29; 10,6).

2. Filius Phallu ex tribu Ruben, pater Dathan et Abiron (Num. 16,1; Dent. 11, 6); idem praeterea habebat filium Nammel (Num. 26,8).

3. Filius Isai nati maximus (1 Par. 2,13) quem cum vidisset Samuel, ait: Num coram Domino est christus eius? Et dixit Dominus ad Samuelem: Ne respicias vultum eius neque altitudinem staturae eius etc. (1 Reg. 16,6). Superba eius indoles in dura reprehensione contra David fratrem iuniorum describitur 1 Reg. 17,13. 28. Filiam vel potius neptem Eliab, cui nomen Abihail, rex Roboam uxorem duxit (2 Par. 11,18). Tribui Iuda praeerat Eliab frater David secundum LXX 1 Par. 27,18; textus hebr. et Vulgata praebent Eliu, quod mendum librarii habetur.

4. Eliab 1 Par. 6,27 [12] v. ELIU 1.

5. Gadita quidam princeps, qui Davidi fugitivo, cum in deserto lateret, se adiunxit (1 Par. 12,9).

6. Levita, cantor secundi ordinis a Davide pro translatione arcae constitutus, qui nablis Iudebat (1 Par. 15,18. 20; 16,5).

7. Filius Nathanael in genealogia Merari patris Iudith (Iudith 8,1; Vulgata: Euan).

ELIABA (עֲלִיָאב, *Ἐλῆαβ*), unus ex heroibus Davidis (2 Reg. 23,32; 1 Par. 11,32), cognominatus Salabonites (v. SALEBIM).

ELIACHIM (אֱלִיָּחִים). 1. Unus e sacerdotibus, qui in dedicatione muri Ierusalem sub Nehemia tubis canebant (Neh. 12,40; LXX 12,41 Ἐλιαχιμ).

2. Sacerdos magnus in libro Iudith (Vulgata 4,5. 7. 11); LXX 4,6. 8. 14 Ἰωαχιμ. Vide IOAKIM 4.

ELIACIM (אֱלִיָּעִים, Ἐλιαχιμ, Ἐλιαχιμ). 1. Filius Heleiae, vir probus, qui pro Sobna praefectus palatii eligitur, quem Dominus servum suum appellat et laudat (Is. 22,20 s.). Idem cum aliis egressus est ad legatos Sennacherib regis Assyriorum eorumque minas et blasphemias Ezechiae regi retulit, a quo simul cum aliis missus est ad Isaiam prophetam (4 Reg. 18,18 s.; 19,2 s.; Is. 36,3 s.; 37,2 s.). Eadem verba, quibus Isaias (22,22) potestatem Eliacim, ministri domus regiae, describit, a S. Iohanne ad ipsum Christum transferuntur (Apoc. 3,7).

2. Filius Iosiae regis Iuda (4 Reg. 23,34; 2 Par. 36,4 Eliakim), a Necho rege Aegypti rex in Ierusalem constitutus et Iokim appellatus; v. IOAKIM 1.

3. Filius (vel ex posteris) Abiud et pater (vel ex maioribus) Azor, in genealogia Ioseph sponsi B. V. Mariae (Matth. 1,13).

4. Eliacim vel Eliakim in genealogia Christi (Luc. 3,30); is quattuor generationibus distat a David et proinde alius est ac Eliacim ex posteris Zorobabel Matth. 1,13.

ELIADA (אֱלִיָּאָדָה). 1. Unus ex filiis David, qui nati sunt ei in Ierusalem (1 Par. 3,8); v. BAALIADA.

2. Pater Razon regis Damasei et adversarii Salomonis (3 Reg. 11,23; LXX Ἐλιαδαξ).

3. Unus ex duobus exercitus Iosaphat regis, Beniaminita (2 Par. 17,17; cf. textum hebr.; LXX Ἐλιαδαξ).

ELIAM (אֱלִיָּאָם, Ἐλιάμ, al. Ἐλιάμ). 1. Pater Bethsabée, uxoris Uriae, postea uxoris Davidis (2 Reg. 11,3); idem 1 Par. 3,5 vocatur Ammiel; v. AMMIEL 4.

2. Unus ex heroibus David, filius Achitophel, Gelonites ex urbe Gilo (2 Reg. 23,34); idem 1 Par. 11,36 mendose scribitur Abia Phelonites.

ELIAS (אֱלִיָּהוּ, Ἐλίας, Ἠλίας, al. Ἠλίας), Thesbites de habitatoribus Galaad, propheta magnus et intrepidus magnisque a Deo miraculis insignitus. Vivebat eo tempore quo Achab rex Israel, incitatus ab uxore Iezabel, filia Ethbaal regis Sidoniorum (3 Reg. 16,31), cultum Baal et Astarthes quam maxime fovit. Neque id solum; verum cultum Domini plane exstirpare tentabat eo connivente Iezabel ideoque prophetas Domini occidit et qui ex eaede illa effugerant in speluncis absconditi degebant, quorum centum Abdias, dispensator domus regiae, abseonderat eos pascens pane et aqua (3 Reg. 18,4. 13). Cultoribus Dei occisis vel expulsi Iezabel suis sumptibus alebat prophetas Baal 450 et prophetas Astarthes 400 (3 Reg. 18,19). Quare facile patet quantopere idololatRIA praevaluerit eo tempore in regno Israel. Ut eam oppugnaret missus est Elias. Et primo quidem in nomine Domini annuntiat fore siccitatem complurium annorum, quo poenae genere (cf. Deut. 28,23) Deus errantes ad se reducere voluit. Hac itaque calamitate regi annuntiata (3 Reg. 17,1) Elias se abscondit in loco torrentis Carith, quo siccato iubetur ire in Sarephta Sidoniorum, ibique apud viduam commorabatur annona miraculose multiplicata; filium quoque viduae mortuum ad vitam revocavit l. c. 3-24. Pluvia terrae Israel non dabatur per annos tres et menses sex. Quanta calamitate regio affligeretur, uno ostenditur exemplo; Achab enim iussit Abdiam ire ad universos fontes et in cunctas valles: si forte possimus invenire herbam... et non penitus iumenta intereant; et ipse et Abdias diviserunt sibi regiones ut circumirent eas (l. c. 18,5. 6). Et calamitate ita ingravescente iam ex longiore tempore Achab rex sedulo in omnem regionem miserat ut Elias exquireretur. Cum enim Elias ei dixisset: non erit his annis ros et pluvia, nisi iuxta oris mei verba, vehementer cupiebat eum reperiri, ut scilicet quavis ratione ab eo impetraret cessationem calamitatis. Expertus enim erat ipso eventu verba Eliae non carere effectu. Tempore statuto, cum animi omnium iam ipsa

miseria essent aliquo modo emolliti Elias iubetur se sistere regi. Is primo quidem reprehensione Eliam studet terrere; at audacter Elias respondit: non ego turbavi Israel sed tu et domus patris tui qui dereliquisti mandata Domini et secuti estis Baalim (18,18). Tum proponit regi, ut ipso caeli iudicio dirimatur, uter sit colendus, Iahwe an Baal. Consentit rex iubens populum et prophetas Baal congregari in monte Carmel; obedit itaque prophetae fractus calamitate; populum quoque miseria iam esse aliquatenus edoctum de perverſitate idololatriae, manifestatur verbis Eliae: usquequo claudicatis in duas partes? etc. Iubente Elia sacerdotes Baal invocant nomen Baal de mane usque meridiem, dein incidunt se cultris — at frustra, signum de quo conventum erat, non apparet. Tum Elias populum ad se advocat, aedificat altare ex duodecim lapidibus et instruit sacrificium et quatuor hydrys aquae membra divisa bovis et ligna infundit. Invocato Domino cecidit ignis Domini et voravit holocaustum et ligna et lapides, pulverem quoque et aquam. Quo signo populus cadens in terram clamat: Iahwe est Deus. Elias autem in idololatrias, in prophetas Baal, iudicium exerceat in lege praescriptum (Deut. 13,1 s.; 18,20), iubet eos apprehendi et occidi. Statim quoque precibus Eliae impetrantur imbres. Iezabel autem cum andisset eadem prophetarum irata eadem quoque minatur Eliae. Elias fugit et venit in Bersabee in Iuda, indeque perrexit in desertum. Minis Iezabel discit regem animo inconstanti minime tuiturum esse cultum Domini; quare populum quoque mox reversurum esse ad idololatriam et se in vanum laborasse existimat; unde « petivit animae suae ut moreretur » (19,4), ex qua animi deiectione apparitione angeli erigitur; confortatus pergit ad montem Horeb, ibique apparitione Domini consolationem accipit et iubetur ire Damascum, ungere Iahazael regem super Syriam, et Iehu regem super Israel, et Elisum ungere prophetam (19,5-21).

Postquam Achab vineam Naboth occupavit eumque suadente Iezabel lapidandum curavit, Elias iubetur ei et Ie-

zabel poenas Domini denuntiare (21, 1-29). Etiam sub filio Achab, Ochozia rege impio, Elias causam Domini fortiter tuebatur. Regi aegrotanti qui miserat ad consulendum Beelzebub deum Accaron iubet nuntiari morbum esse ad mortem quia idolum voluerit consulere et eos qui ei mandatum regis perferunt ut descendant ad regem ignis assumit. Ita manifestat Dominus quantae sibi sit abominationi idololatria.

Insigni modo Elias a Deo honoratus est, quia cum opus eius in terris ad finem vergeret, filiis prophetarum in Bethel et in Iericho et Eliseo indicabat Eliam esse ab iis auferendum et quia vidente Eliseo Elias per turbinem curru igneo ascendit in caelum 4 Reg. 2,1-14; cf. Eccli. 48,1-13. Eum iterum missum iri ante iudicium ultimum, Malachias propheta vaticinatur 4,5. 6: et convertet cor patrum ad filios et cor filiorum ad patres eorum i. e. populi electi conversionem operabitur, de quo mysterio apostolus loquitur (Rom. 11,25). Idque Christus quoque confirmat dicens: Elias venturus est et resituet omnia (Matth. 17,11; Marc. 9,12) et eo modo verba intellexerunt multi SS. Patrum et theologum (cf. *Knabenbauer*, Comm. in Proph. min. II. p. 489 s.).

Quod legitur 2 Par. 21,12 ab Elia propheta litteras allatas esse Ioram filio Iosaphat, id varie explicari potest. Nam cum andisset eadem prophetarum irata eadem quoque minatur Eliae. Elias fugit et venit in Bersabee in Iuda, indeque perrexit in desertum. Minis Iezabel discit regem animo inconstanti minime tuiturum esse cultum Domini; quare populum quoque mox reversurum esse ad idololatriam et se in vanum laborasse existimat; unde « petivit animae suae ut moreretur » (19,4), ex qua animi deiectione apparitione angeli erigitur; confortatus pergit ad montem Horeb, ibique apparitione Domini consolationem accipit et iubetur ire Damascum, ungere Iahazael regem super Syriam, et Iehu regem super Israel, et Elisum ungere prophetam (19,5-21).

Quo sensu Ioannes Baptista appelletur Elias Matth. 17,12, satis declaratur Luc. 4,17: ipse praecedet ante illum in spiritu et virtute Eliae, ut convertat corda patrum in filios etc. In transfigu-

vertens eius sororem Rebeccam sponsam adduxit filio Abraham (Gen. 24,2 s.): sed in s. litteris nomen servi huius eo loco non edicitur. Fuisse Eliezer inde suaderi potest, quia cum servus ille praecesset omnibus, quae Abraham habebat, idem ille describi videtur, de quo 15,2 et qui iunior erat quam Abraham, quia Abraham ipsum fore heredem suum arbitrabatur.

Eliezer ex Damasco oriundum esse sequi videtur ex Gen. 15,2: *iste Damascus Eliezer*; sed in explicanda hac difficili expressione interpretes multum laborant. Aliqui verunt sine scrupulo: Eliezer Damascenus (*Gesenius, Knobel*); sed in textu habetur דְּמִישֵׁן sine addito, non דְּמִישֵׁן דְּמִישֵׁן Damascenus. Alii appositionem cernunt: Damascus scil. Eliezer (*Delitzsch, Keil*), quod sane mirum videtur. Alii delent illud: *iste Damascus* velut glossam (*Hitzig, Tuch, Olshausen*), sed quo iure non apparet. Melius explicat *Dillmann*: El heres domus meae erit Damascus Eliezeris, cui scil. urbi, ad quam Eliezer reversurus est, bona Abraham proderunt. Aliter nodum solvit *F. de Hummelauer* totum textum ita emendans, ut *Damascus* omnino evanescat et hoc eo magis attentione dignum est, quod apud omnes constat istum textum aliqua saltem corruptione laborare; ceterum idem auctor adnotat: « Restitutionem textus prioris interpretem tentare oportet, licet rem certo definire nequeat ».

2. Filius Moysis secundus, ex Sephora in terra Madian natus, quem Moyses hoc nomine appellavit dicens: Deus patris mei adinfor meus eripuit me de manu Pharaonis (Ex. 2,22; 18,4; 1 Par. 23,15. 17; 26,25; cf. etiam Ex. 4,20 ss.; 18,2. 3. 6).

3. Beniaminita, filius Bechor (1 Par. 7,8).

4. Sacerdos quidam, qui coram area Dei tuba clangebat, cum e domo Obedom in Ierusalem transferretur (1 Par. 15,24).

5. Princeps tribus Ruben tempore Davidis, filius Zechri (1 Par. 27,16).

6. Propheta, filius Dodan de Maresa, qui Ezechiae regi declaravit propter foedus cum Ochozia percussa esse opera

eius navesque contritas (2 Par. 20,37; cf. etiam 3 Reg. 22,50).

7. Princeps, quem Esdras a Flavio Ahava ad Eddo misit (Esdr. 8,16).

8. 9. 10. Sacerdos, levita, vir de populo, qui uxores alienigenas dimittere ab Esdra iussi sunt (Esdr. 10, 18. 23. 31).

11. Filius Iorim inter proavos Christi (Luc. 3,29).

12. Qui Esdr. 10,25 in Vulgata Eliezer scribitur, hebr. et graece Eleazar appellatur; v. ELEAZAR 6.

ELIHOREPH (אֵלִי־הֹרֶפֶחַ, Ἐλιόρηφ, A'Evρῆφ), filius Sisa, scriba Salomonis (3 Reg. 4,3).

ELIM (אֵילִם, et cum He locali אֵילִמָּה; Ἀλίμ, Ἀλίμ, statio Israelitarum inter Mara et desertum Sin sita, ubi erant duodecim fontes aquarum et septuaginta palmae (Ex. 15,27; 16,1; Num. 33,9). Ex opinione communiter recepta Elim hodie est Wādī Gharandel (*Ghurundel*) aquis et arboribus etiamnum abundans. Cf. *Legendre* apud *Vigouroux*, *Dict. de la Bible* II. 1680-1683; *Riess*, *Bibel-Atlas* ed. 3 Tab. II. E c.

Alii Elim magis meridiem versus quaerunt in directione ad montem Sinai (quos enumerat *Legendre* l. c.), c. contra *F. de Hummelauer* multo magis septentrionem versus scil. prope 'Ain Mūsā seu Fontem Moysis, qui quattuor tantum horis a Suez distat: « Omnino crediderim 'Ain Mūsā alterutrum esse locum, aut Maram aut Elim » (*Comment. in Ex. Lev.* p. 163).

ELIM putens v. BEER ELIM.

ELIMELECH (אֵלִי־מֶלֶךְ, Ἐλιμελῆχ), Bethlechemita, maritus Noemi, qui cum fames esset in patria, in regionem Moabitidem profectus est cum uxore et filiis ibique mortuus; eius consanguineus erat Booz (Ruth 1,2. 3; 2,1. 3; 4,3. 9). Booz et Elimelech in priore parte aevi iudicum vixisse concludere oportet ex Matth. 1,5: Salmon genuit Booz de Rahab, quae alia esse non potest quam de qua Ios. 2, 1 ss. et 6,17 ss. narratur; cf. *F. de Hummelauer*, *Comment. in Iud. et Ruth* p. 402.

ELIODA, filius David v. BAALADA.

ELIOENAI (עִלְיוֹנַי: 'Ελιονάιν, 'Ελιωνάι, 'Ελιονά, 'Ελιωνάι).

1. Filius Naaria ex posteris Zorobabel (1 Par. 3,23. 24).

2. Princeps quidam tribus Simeon (1 Par. 4,36).

3. Beniaminita, filius Bechor (1 Par. 7,8).

4. Beniaminita de filiis Semei (1 Par. 8,20); sed hebr. nomen est עִלְיֹנַי.

5. Septimus filius Meselemiae ex posteris Core, ostiarius in templo (1 Par. 26,3. 12); sed hebr. scribitur עִלְיֹנַי.

6. Filius Zarehe de filiis Phahath Moab, Babylone redux cum ducentis viris (Esd. 8,4); hebr. scribitur sicut praecedens.

7. Sacerdos de filiis Pheshur, qui uxorem alienigenam dimittere ab Esdra iussus est (Esd. 10,22); probabilius idem est, qui Nehemiae adstitit in dedicatione muri Ierusalem (Neh. 12,40).

8. Israelita de filiis Zethua, qui uxorem alienigenam ex mandato Esdrae dimisit (Esd. 10,27).

ELIPHAL v. ELIPHELETH 1.

ELIPHALETH (עִלְפָּאֵל, in pausa עִלְפָּאֵל: 'Ελιφάαθ, 'Ελιφאלά, 'Ελιφאלήθ, 'Ελιφάλέτ).

1. Ultimus filius David, natus in Ierusalem (2 Reg. 5,16; 1 Par. 14,7); idem 1 Par. 3,8 scribitur Elipheleth.

2. Alius filius David (1 Par. 3,7 et 14,3 quo loco עִלְפָּאֵל legitur); sed eius nomen deest 2 Reg. 5,16.

3. Filius Esac ex posteris Saul (1 Par. 8,39).

ELIPHALU (עִלְפָּאֵל: 1 Par. 15,18 'Ελιφανά, A 'Ελιφאלά, cod. Friderico-August. 'Ελειφανά; 15,21 'Ελιφαλό, A 'Ελιφάλιας, cod. Friderico-August. 'Ενφανάς), levita in secundo ordine levitarum, qui arcam Dei de domo Obededom in Ierusalem deduxerunt (1 Par. 15,18. 21).

ELIPHAZ (עִלְפָּאֵז, 'Ελιφάζ). 1. Filius primogenitus Esau ex Ada (Gen. 36,4. 10. 11. 12. 15. 16; 1 Par. 1,35. 36).

2. Primus ex tribus amicis Iob, Themanites (v. THEMAM) ex regione Idumaeae, qui statim post querelas Iob eum

impotentis impatientiae ac simulatae pietatis arguit et contendit non affligi calamitatibus nisi scelestos (Iob 2,11; 4, 1; 15,1; 22,1; 42,7. 9).

ELIPHELETH (עִלְפָּאֵל: 'Αλιφάλέθ, 'Ελφάτ, 'Ελιφάλάτ, 'Ελιφάλέτ).

1. Unus ex heroibus David, filius Aasbai (2 Reg. 23,34; idem 1 Par. 11,33 vocatur Eliphal filius Ur.

2. Ultimus filius David (2 Par. 3,8) v. ELIPHALETH 1.

3. Unus de filiis Adoniam, Babylone reversus duce Esdra (Esd. 8,13).

4. Vir de filiis Hasoni, qui uxorem alienigenam ex mandato Esdrae dimisit (Esd. 10,33).

ELISA (עִלְשָׁא, Samaritanus אֵלִישׁ: LXX Gen. et Par. 'Ελισά, Ezech. 'Ελεισαί; Syrus Gen. et Par. *Elisha*, Ezech. *Eles*), unus ex filiis Iavan (Gen. 10,4; 1 Par. 1,7). Cum sine dubio Iavan sint Iones (v. IAVAN), Elisa quoque gens graeca sit necesse est. Tempore Ezechielis prophetae « hyacinthus et purpura de insulis Elisa (אֵלִישָׁה, ἐκ τῶν νήσων 'Ελεισαί) facta sunt operimentum » Tyrionum (Ez. 27,7). Flavius Iosephus (Ant. 1. 6,1) et S. Hieronymus (Quaest. hebr. in Gen. Migne 23,951) interpretantur Aeoles, Targum Jonathan ad Ez. 27,7 בְּדִי־נֵי אֵלִישָׁה scil. Italiam inferiorem vel Siciliam. Talmudicis Elisa est vel Elis vel Aeolis (cf. *Neubauer*). A recentioribus Elisa intellegitur vel Carthago (*Stade*, *Meyer*) vel Sicilia respective Italia inferior (*Dillmann* ad Gen. 10,4; *P. de Lagarde*) vel maiore cum iure Peloponnesus (*Bochart*, *Halévy*) vel generatim populatio aeolica Graeciae europaeae (*Knobel*, *Lenormant*, *Legendre*, *F. de Humeau* ad Gen. 10,4). Cum Elisa componi posse videtur regio *Alashia* in documentis *Tell el-'Amarna* compluribus memorata, quam coniiciunt esse Cyprum

Cf. *A. Neubauer*, Géogr. du Talmud p. 424; *Stade*, De populo Iavan 8 s.; *E. Meyer*, Gesch. d. Alt. § 282; *P. de Lagarde*, Mittheil. 2,261; *Bochart*, Phaleg 3,4; *Halévy*, in Revue des études juives VIII. 14; *Knobel*, Voelkertafel p. 81; *F. Lenormant*, Les origines de l'histoire II. 2 p. 43; *Legen-*

dre apud Vigouroux, Dict. de la Bible II. 1686-88.

A. DEIMEL.

ELISABETH. 1. Elisabeth (עֲלִישָׁבֶת, Ἐλισαβέθ), uxor Aaron, filia Aminadab, soror Nahasson, mater Nadab, Abiu, Eleazar, Ithamar (Ex. 6,23).

2. Uxor Zachariae sacerdotis, Elisabeth (Ἐλισάβετ) de filiabus Aaron (Luc. 1,5), quae simul cum marito laudatur: erant iusti ambo ante Deum incedentes in omnibus mandatis et iustificationibus Domini sine querela. Elisabeth sterilis et aetate iam provecta singulari Dei favore mater effecta est Ioannis praecursoris Domini. Eam invisit beata Virgo nuntio angelico recepto; ad cuius introitum et salutationem Elisabeth sensil infantem in utero exsultantem et ipsa repleta est Spiritu Sancto et exclamavit voce magna: benedicta tu inter mulieres et benedictus fructus ventris tui etc. (Luc. 1, 41-45; agnoscit Mariam matrem Domini et eam beatam praedicat quia crediderit. Unde ei quod angelus beatae Virgini nuntiaverat divinitus patefactum est. Ipsa quoque prima est inter homines quae laudes Virginis celebrat et mysterium Incarnationis indicat. Neque silentio praetereundum est encomium Virginis ab ea annuntiari quae Spiritu Sancto repleta esse dicitur. — Cum in eo esset ut infans eius circumcideretur, contra cognatos firmiter asseruit nomen Ioannis ei esse imponendum (Luc. 1,57-60).

ELISAMA (עֲלִישָׁמָא, Ἐλισαμά, Ἐλισαμαί, Ἐλισαμαί, Ἐλισαμά). **1.** Princeps tribus Ephraim (Num. 1,10; 2,18; 7,48-53); censetur idem avus Iosue 1 Par. 7,26.

2. Unus e filiis David qui ei nati sunt in Ierusalem 2 Reg. 3,16; 1 Par. 3,8 (3, 6 legi oportet Elisua, non Elisama; v. ELISUA) et 14,7.

3. Unus ex posteris Ierameel primo-geniti Hesron (1 Par. 2,41).

4. Sacerdos quidam quem, uti toram sacerdotem, Iosaphat rex simul cum levitis compluribus misit ad docendum populum (2 Par. 17,8. 9).

5. Nomen hoc etiam, uti in filio Da-

vid, postea in genere regio invenitur; nam Ismahel qui percussit Godoliam mense septimo i. e. secundo post urbem a Chaldaeis incensam mense (4 Reg. 23, 8) vocatur filius Nathaniae filii Elisama de semine regio (4 Reg. 23,23; Ier. 41, 1). Cum autem in genalogiis non raro multi intermedii omittantur, etiam fieri posset, ut Elisama eo loco idem ille David filius significaretur.

6. Scriba foakim regis, secundum quem gazophylacium quoque templi appellabatur Ier. 36,12. 20. 21.

ELISAPHAN (עֲלִישָׁפָן, Ἐλισαφάν).

1. Filius Oziel filii Caathi, princeps familiarum Caathitarum; cum Nadab et Abiu, filii Aaron, offerentes alienum ignem igne essent absumpti, Elisaphan cum Misael iussus est a Moyse eos asportare extra castra; cf. Ex. 6,22; Lev. 10,1-5; Num. 3,30. Etiam postmodum tempore Davidis et Ezechiae levitae de posteris Elisaphan memorantur (1 Par. 13,8; 2 Par. 29,13).

2. Elisaphan filius Pharnach ex tribu Zabulon, ad terram Israelitis dividendam electus (Num. 34,23).

ELISAPHAT (עֲלִישָׁפָת, Ἐλισαφάν; al. -פָּאָת), unus ex quinque illis centurionibus quos foedere inito Ioiada misit per Iudaeam, ut levitas et principes familiarum in Ierusalem advocarent, quorum ope Ioiada filium Ochoziae Ios regem constituit et Athaliam impiam reginam occidit (2 Par. 23,1 s. et cf. 4 Reg. 11,4 s.).

ELISEI FONS, cuius aquas prope Iericho Eliseus sale immisso sanavit (4 Reg. 2,19 ss.) vide s. v. IERICHO.

ELISEUS (עֲלִישָׁע, Ἐλισαίε), filius Saphat, oriundus ex Abelmehula in valle Iordanis in regione tribus Issachar, a Domino per Eliam, qui cum pro se prophetam ungere iubetur, ad munus propheticum vocatus est. Erat vir satis opulentus; nam Elias eum reperit arantem in duodecim iugis bonum. Elias in signum vocationis ad munus propheticum misit pallium suum, vestimenti genus scil. prophetis proprium (cf. Zach. 13,4, super eum, qui salutatis parentibus se-

cutus est Eliam et ministrabat ei 3 Reg. 19,16-21. Antequam Elias curru igneo raperetur, petiit ab eo, ut fieret in se duplex spiritus eius (cf. Deut. 21,17, ut scil. tamquam filius primogenitus prae aliis prophetarum filiis duplicem partem hereditatis acciperet). Pallium Eliae sibi tulit et ex eo tempore multa et magna patrabat miracula : pallio percussit aquas Iordanis et divisae sunt et transiit Eliseus, iam hoc signo tamquam successor Eliae a Deo comprobatus, et filii prophetarum id videntes dixerunt : requievit spiritus Eliae super Eliseum et venientes in occursum eius proni in terram salutaverunt eum (4 Reg. 2,1-15) : prope Iericho sale immisso aquas sanavit; cum ascendenti in Bethel pueri illuderent, ultione divina Deus altero signo suum comprobavit prophetam. Uti Elias, ita ipse quoque in monte Carmeli aliquo tempore morabatur; deinde Samariam reversus est (4 Reg. 2,16-25). In bello moabitico regi Iosaphat victoriam de Moabitis praedixit 4 Reg. 3,1-27; mulieri viduae miraculo olei multiplici providit ea, quibus satisfaceret creditoribus; mulieri Sunamitidi, apud quam saepius divertebat, praedixit eam habituram esse filium, quem post complures annos mortuum ad vitam revocavit; cibum veneno infectum reddidit innocuum, panibus paucis magnam pavit multitudinem; Naaman leprosum iussit lavare in Iordane et mundatus est; Giezi famulum avaritia captum punivit lepra; aliaque patravit miracula quae 4 Reg. 4,1-8,6 narrantur. Eius fama etiam extra Palaestinae fines propagata est: ita Benadad rex Syriae per Hazael eum consultit de sua aegritudine, qua occasione Eliseus praedixit Hazael quae rex factus commissurus esset mala in Israel (8,7 s.). Per unum de filiis prophetarum Iehu unxit regem super Israel, cuius erat ultionem divinitus decretam exsequi in domum Achab (9,1 s.). Eliseus iam morti proximus praedicat Iosaphat regi Israel ter ab eo Syros victum iri; et qui vivus tot edidit mira, ne mortuus quidem cessare videbatur, nam cum cadaver fortuito in sepulcrum eius coniecerunt tetigisset ossa eius, revixit homo (13,14-21). Quare optime dicit Sapiens :

in Eliseo completus est spiritus Eliae, non pertimuit principem et potentia nemo vicit illum; mortuum prophetavit corpus eius, in vita sua fecit monstra (τέρατα) et in morte mirabilia operatus est Eccli. 48,14-15. Deus autem per Eliam et Eliseum tot edere voluit miracula, ut praeclaris istis suae potentiae documentis plebem quam reges impii ad idololatriam potenter inducebant potentius ad veri Dei agnitionem cultumque invitaret. Simili modo in initio rei christianae insignia edebantur miracula et plurima, ut obcaecatis illucesceret quid iam Deus ab iis postulare.

ELISUA (אֱלִישָׁא; Ἐλισουά, Ἐλισά), unus ex filiis David (2 Reg. 5,15; 1 Par. 14,5); eius loco legitur 1 Par. 3,6 Elisama (אֱלִישָׁמָא, Ἐλισά), quod mendosum est.

ELISUR (אֱלִישֻׁר, Ἐλισούρ), filius Se-deur, princeps tribus Ruben (Num. 1,3; 2,10; 7,30; 7,35; 10,18); Vulgata 10,18 scribit Helisur.

ELIU (אֱלִיָּהוּ et 1 Par. 26,7; 27,18 אֱלִיָּהוּ; Ἠλίσ, Ἐλιμωθ, Ἐλιωθ).

1. Proavus Samuelis prophetae (1 Reg. 1,1). Idem 1 Par. 6,27[12] vocatur Eliab et 6,34[19] Eliel; sed hae variationes amanuensibus deberi videntur.

2. Unus ex principibus millium de tribu Manasse, qui Davidi in Siceleg sese adiunxerunt eique auxilium praestiterunt (1 Par. 12,20).

3. Levita ex familia Core, filius Se-meiae, ianitor tempore Davidis (1 Par. 26,7).

4. Frater Davidis (1 Par. 27,18); sed LXX praebent Ἐλιζέ. V. ELIAB 3.

5. Unus ex maioribus Iudith (Iudith 8,1); deest in Vulgata.

6. Eliu (Ἐλιούς), ultimus interlocutor in libro Iob, filius Barachel, Buzites (in inscriptionibus cuneiformibus reperitur regio Bazu, quam *Delitzsch*, *Paradies* p. 307, prope Hauran sitam esse opinatur; ceterum Buz recensetur inter filios Nachor, fratris Abraham Gen. 22,21; est tribus arabica Ier. 25,23). Eius utique sermones Iob 32,1-37,24 a recentioribus plerisque censentur poemati esse additi

tempore posteriore i. e. non pertinere ad ipsum poema quale illud a primo poeta conditum fuerit. Praecipue arguitur ex diverso dicendi genere. Haec utique diversitas concedi debet. At nonne merito quaeri potest, cur non ipse poeta eam consulto effluxisse putetur? Nam omissis orationibus Elin nulla datur in libro Iob responsio ad quaestionem agitatam. Quod amici contendebant adversitatem omnem esse poenam peccatorum, Iob egregie refutavit. Cur igitur iusti quoque affliguntur? Iob quidem demum id fieri oculis Dei consiliis asseruit; at innovatis querelis hanc responsionem non satisfacere atque hominem plus velle intellegere idem clare ostendit. Unde fieri nequit, ut carmen hoc loco finiatur, nisi quis dicere maluerit carmen relinquere manere. Sermones vero Elin apfissime conferunt ad carmen perficiendum; nam in iis praestantur duo quae ad rem maxime pertinent: 1) quae Iob vehementius dixerat et quae in verbis eius facile falso intellegi possent, reprehenduntur et corriguntur et ad limites iustos rediguntur; 2) rationes cur iusti affligantur redduntur: ut scil. a peccandi periculis arceantur, ut a defectibus levioribus purgentur et in virtute proficiant. Adde rationem quae in prologo exponitur; ita demum carmen didacticum bene in se concluditur et absolvitur, in quantum id pro indole veteris foederis necesse est. Ceterum vide *Knabenbauer*, Comment. in Iob p. 368 s.; *J. Hontheim*, D. Buch Iob [Bibl. Studien IX. 1904, Heft 1-3] p. 10. 12. 20-39.

ELIUD (Ἐλισὺδ) in genealogia Christi Domini (Matth. 1.14. 15).

ELLASAR (Ἐλλασάρ, Ἐλλασάρ, sed in Vulgata Pontus regio vide s. v. ARIOCH).

ELMADAN (Ἐλμαδάμ) in genealogia Christi Domini (Luc. 3.28).

ELMELECH (Ἐλμελέχ, Ἐλμελέχ), urbs tribus Aser (Ios. 19.26). Est ignota. Vestigium tamen nominis fortasse conservat *Wādi el-Malek*, qui in torrentem Gison (*Nahr el-Muqatta'*) influat hand procul a *Haifā*.

ELMODAD (Ἐλμοδάδ, Ἐλμοδάδ) primus inter filios Iectan recensetur (Gen. 10.26; 1 Par. 1.20). Posterius Iectan peninsulam arabicam occupavit. Hucusque tamen tribus arabica eius nominis non immutuit. Pulavit quidem *Bochartus* (Phaleg 2.16) Almodad nomen dedisse Almodacis, qui Graecis Ἀλμουδιῶτι dicti in medio Arabiae felices prope fontes fluvii *Lar*, qui in mare Persicum exiit, habitabant (*Ptol.* VI. 7. 24); sed haec opinio hodie derelicta est (*Zeitschr. d. D. Morg. Ges.* XXII. 1868 p. 658 et cf. XXXVII. 1883 p. 48 de nominis explicatione).

ELNAEM (Ἐλναῖμ, Ἐλναῖμ, Ἐλναῖμ), pater duorum heroum Davidis (1 Par. 11.46).

ELNATHAN (Ἐλναθάν, Ἐλναθάν) 4 Reg. 24.8, alias Ἰωνάθαν. 1. Pater Nohestae matris Ioachim (Iechoniae) regis Iuda (4 Reg. 24.8). Idem videtur esse ille Elnathan filius Achobor, quem Ioachim (Eliakim) rex Iuda (pater Ioachim) cum aliis misit in Aegyptum, ut Uriam prophetam inde eductum ad se adducerent (Ier. 26.22). Vocatur idem princeps Ier. 36.12 et erat inter eos, qui in gazophylacio scribae congregati a Michaea filio Gamariae certiores facti sunt legisse Baruch sermones Ieremiae publice; eosdem sermones cum ipsi audissent rem ad Ioachim regem deferunt, qui librum afferri et legi iubet, sed auditis tribus vel quattuor pagellis scidit ac combussit; contradixerunt quidem regi Elnathan et Dalaia et Gamarias, ne volumen combureret, sed non audivit eos (Ier. 36.12-23). Qua in re Elnathan se magis probum praebuit quam anlea, cum Uriam ex Aegypto adduceret, quem a rege ad necem quaeri ignorare non poterat.

2. Nominantur Esdr. 8.16 tres viri Elnathan (LXX Ἐλναθάν, Νάθαν, Ἐλναθάν), quorum duo vocantur principes, tertius sapiens, quos Esdras misit ad Eddo (vide s. v.).

ELOHIM v. DEUS.

ELON nomen personarum et urbium.

1. Elon (Ἐλὼν, Ἐλὼν Gen. 26.34; Ἀ-

לֹוֹא 36,2) Hethaeus, socer Esau; filia Elon, quam duxit Esau, vocatur Gen. 26, 34 Basemath, sed 36,2 Ada. Itaque dici oportebit vel errorem esse amanuensium vel, uti haud raro moris erat, filiam dum matrimonium iniret, alterum nomen assumpsisse.

2. Elon (עֵלֹן, Ἀλλών) secundus filius Zabulon (Gen. 46,14), a quo familia Elnitarum (Num. 46,26).

3. Elon Iud. 12,11 est nomen hebr. iudicis, qui in Vulgata scribitur Alia-lon (vide s. v.).

4. Elon (עֵלֹן, Ἐλών), urbs tribus Dan (Ios. 19,43). Enumeratur inter Aialon (Yālō) et Themna (Tibne). Conder (Survey of West. Pal. Mem. II. 293) proponit Beit Ello ad septemtrionem Bethoron situm, sed hoc potius ad Ephraim quam ad Dan pertinebat. Eadem haud dubie erat Elon urbs praefecturae salomoniae a Bendecar administratae (3 Reg. 4,9); cum autem hoc loco pro Elon et Bethanan, ut Vulgata habet, ex hebraico legendum videatur Elon-Beth-Ianan, nostra Elon probabilius eadem est ac Bethanan q. v. — Alii Elon component cum Khirbet Wādi Ḥlīn prope Ḥlīn Shems seu Bethsames (cf. Zeitschr. d. D. Pal.-Ver. X. 1887 p. 137).

5. Legitur in Vulgata Ios. 19,33 terminum Nephthali coepisse de Heleph et Elon in Saananim; sed pro Elon vertendum est quercus vel quercetum (in) Saananim; legitur in Vulgata Iud. 4,14: vallis quae vocatur Sennim et erat iuxta Cedēs, quem locum F. de Hummelauer vertit: quercus in Sennim scil. nota illa quercus maxime ex facto ibidem narrando. Illud igitur quercetum Ios. 19,33 et Sennim (Saanaīm, Saananīm) a plerisque quaeruntur prope Cedēs Nephthali, quo loco etiam hodie multae quercus conspiciuntur. Sed idem interpretes (Comm. in Ios. p. 437) hanc Cedēs agnoscit in Khirbet Qedīsh 7 km infra Tiberiadem et Saanaīm in el-Sinnabra vel Šīn el-Nabra prope Tarichacām, ubi Iordanis e lacu Tiberiadis egreditur.

ELPHAAL (עֵלְפָּאֵל, Ἀλφάαλ, Ἐλφάαλ), princeps familiae beniaminiticae (1 Par. 8,14,12. 18).

ELTECON (עֵלְתֶּקֶן, Θεζούμα), urbs tribus Iuda in quarta provincia montis simul cum Halhul et Bethsur enumerata (Ios. 15,59). Quaerenda igitur est prope Hebrōn septemtrionem versus; hucusque ignota.

ELTHECE, ELTHECO (עֵלְתֶּקֶס, Ἐλθεσά, Ἐλθεσά Ios. 19,44; ἡ Ἐλθεσά Ios. 21,23), urbs tribus Dan (Ios. 19,44), levitis de familia Caath tradita (21,23). Situs ignotus est, sed non multum a Themna (Tibne) abesse potest. Nam Ios. 19,44 recensetur Elthece post Themna et Accaron seu Accaron. Iamvero in inscriptionibus cuneiformibus Sennacherib gloriatur, quod urbes Altagui et Taamnan (Themna) expugnaverit ac deinde contra Accaron progressus sit (Schrader-Whitehouse, Cuneif. Inscr. and Old Test. I. p. 159. 282). Vix dubium est, quin Altagui sit nostra Elthece. Coniiciunt esse hodiernum vicum Beit Likia inter Ierusalem et Lyddam (cf. Zanechchia, La Palestine d'aujourd'hui 1899 II. 408).

ELTHOLAD (עֵלְתֶּלָד, Ἐλθολάδ et Ἐρθολάδ), urbs in meridiana plaga tribus Iuda (Ios. 15,30), tribui Simeon attributa (19,4), adhuc tempore Davidis a Simeonitis habitata (1 Par. 4,29; hoc loco nominatur abiecto תֹּלָד Tholad). Est ignota.

ELUL (עֵלּוּל, Ἐלוῦλ), nomen mensis sexti anni hebraici (Neh. 6,15; 1 Mach. 14,27); vide s. v. MENSIS.

ELUZAI (עֵלּוּזַי, Ἀζαί), Beniaminita, qui Davidi in Siceleg se adiunxit (1 Par. 12,5).

ELYMAIS (Ἐλυμαίς) legitur 1 Mach. 6,1: « rex Antiochus (Epiphanes) auditum esse civitatem Elymaidem in Perside nobilissimam ». — Illic textus corruptione laborat. Urbs huius nominis non innotuit. Silentium scriptorum profanorum de tali urbe eo minus explicari posset, quo frequentius loquuntur de Elymaide seu Elymacae regione et de populo Elymacorum. Solus Flav. Iosephus (Ant. XII. 9,1) Elymaidis urbem mentionem facit, sed lectionem 1 Mach. 6,1 secutus. Melior lectio in compluribus

codicibus graecis (A, & et sex minusc.) reperitur: ἐν Ἐλυμαίς, ἐν Ἐλυμαίς. Merito igitur editiones criticae praebent ἐν Ἐλυμαίδοι. Elymais autem i. e. ܐܠܝܡܝܐ erat provincia regni persici. Vide s. v. AELIAM 1.

ELYMAS (Ἐλύμας) Act. 13,8 est nomen ex arabico petitum, quo se vocabat Bariesu (vide s. v.). Nomen significat sapientem; qua ratione haec sapientia nomine arabico designata fuerit, clare indicatur, cum nomen illud explicetur ὁ μάγος, magus.

ELZABAD (אֶלְזָבָד, Ἐλζαβᾶθ), levita de stirpe Core et familia Obededom, ianitor (1 Par. 26,7).

ELZEBAD (אֶלְזָבָד, Ἐλζαζέβ), Gadita, qui Davidi in Siceleg se adiunxit (1 Par. 12,12).

EMALCHUEL (Εἰμαλχουσί), dynastes arabs, cui Alexander Balas filiolum suum Antiochum tradiderat educandum; Tryphon, qui dux copiarum Alexandri fuerat, nullis diebus apud Arabem instabat, donec sibi committeret puerulum, quem regem Syriae (Antiochum VI.) constituit contra Demetrium II. Nicatorem (1 Mach. 11,39. 40). Nomen illius dynastae varie effertur Ἐμαλχουσί, Σιμαλχουσί, Σιμαλχουσί (assumpta littera σ vocabuli πρὸς praecedentis), in arabico fortasse اَمْلَحْوَلِي i. e. *regius*, *vir regius* vel probabilius يَمْلَحِي quod nomen legitur in inscriptionibus palmyrenis. Flavius Iosephus (Ant. XIII. 5,1. 3) et Syrus eum vocant *Malchus*, Diodorus (apud Müller, Fragm. Hist. Graec. II. p. XVII. n. 21) autem *Iamblichus*, quod idem nomen est eum יַמְלַחִי. Cf. *Schärer*, Geschichte de jüdischen Volkes... ed. 3, I. p. 234. — Praeterea vide s. v. ARABIA n. 4 in fine.

EMAN (הֵמָן). 1. Unus ex posteris Zarac filii Iuda (1 Par. 2,6); v. HEMAN 2.

2. Levita cantor sub Davide 2 Par. 5, 12; v. HEMAN 3.

3. Psalmus quoque 87 (hebr. 88) inscribitur Eman Ezrahitae (sed LXX Αἰρᾶν τῷ Ἰσραηλῑτι).

EMATH (הַמַּת, Ἐμάθ, Ἐμάθ, Ἡμάθ),

Ἡμάθ), urbs ad Orontem fluvium sita, postmodum a tempore imperii macedonici apud Graecos Epiphania appellata (Flav. Ios. Ant. I. 6,2). hodie *Hamā*. Erat urbs praecipua terrae Emath. In inscriptionibus cuneiformibus plerumque dicitur terra *Hamatti*, raro urbs (cf. *Schrader-Whitehouse*, Cuneif. Inscr. and Old Test. I. p. 90). Gens eius regionis refertur Gen. 10,18 et 1 Par. 1,16 ad Amathacum filium Chanaan. Ea regio saepe ut terminus septentrionalis Palaestinae assignatur (ad quem terminum exploratores a Moyse missi pervenerunt Num. 13,22; cf. Num. 34,8; Ios. 13,5; Iud. 3,3; 3 Reg. 8,65; 1 Par. 13,5; 2 Par. 7, 8. Introitus Emath (בְּאֶת הַקֵּת), de quo

locis modo citatis agitur, certe meridiem versus ab Emath quaeri debet et a plerisque inter Emath et Libanum ponitur v. g. circa urbem *Restan*, antiquam Arethusam Syriae secundae, ad Orontem inter *Hamā* et *Homs* (cf. Zeitschr. d. D. Pal.-Ver. VIII. 1885 p. 27); sed si cum *I. P. van Kasteren* admittitur terminum septentrionalem terrae promissae infra Libanum et Hermonem maiorem fuisse (Revue biblique IV. 1895, p. 23-36), etiam introitus Emath cum eodem auctore agnosci poterit *Merdj Ayūn*, planities inter *Nahr Līṭāni* et *Nahr Hāsḥāni*, per quam aditus fit ex Palaestina in Syriam Coelen seu vallem *Begā'a* (I. e. p. 29).

Regnum israeliticum in regionem Emath extendebatur regnantibus Davide (2 Reg. 8,9; 1 Par. 18,3. 9; Vulgata: Hemath) et Salomone (2 Par. 8,4). Quae tamen regni extensio haud diu obtinuit; nam legimus 4 Reg. 14,25 Ieroboam regem Israel restituisse terminos Israel ab introitu Emath usque ad mare solitudinis. Assyrii quoque repetito eam sibi subiecerunt regionem (cf. *Schrader* I. c.) et tempore invasionis Sennacherib inter regna quae Assyrii occupant Rabaces gloriabundus Emath quoque enumerat (4 Reg. 18,34; 19,13; Is. 10,9; 36,19; 37,13; cf. Am. 6,2). In Reblatha in terra Emath Nabuchodonosor filios Sedeciae regis occidit et nobiles Iuda et ipsi regi Sedeciae oculos eruit uti antea eodem loco Nechao rex Aegypti vinxe-

rat Ioachaz ne regnaret in Ierusalem (4 Reg. 23,33; 25,21; Ier. 39,6; 52,9. 27). Quae oracula minarum plena dicta sunt in Damascum, ea Zacharias quoque extendi ait in Emath quae ei contermina est (9,2); quae oracula partim impleta sunt, cum Alexander potitus est Syria Coele.

2. Emath Ios. 19,35 vide s. v. HAMMOTH DOR.

3. Emath Suba 2 Par. 8,3 a Salomone subacta legitur. Quatenam regio illa sit, interpretes non consentiunt. Alii explicant de Emath 1; alii de alia quadam Emath ab Emath magna (Am. 6,2) distinguenda, alii de regnis Emath et Soba illo tempore fortasse in unum regnum unitis.

4. Turris Emath Neh. 12,38; sed hebr. legitur hoc loco turris תִּירָה et idem nomen turris habetur hebr. Neh. 3,4, ubi in Vulgata nomen exprimitur numerale: turris centum cubitorum. Ceterum turris Hammea (vel, ut alii volunt, turris Mea) sita erat inter portam cui ab ovibus nomen erat et angulum urbis aquilonarem; cf. Zeitschr. d. D. Pal.-Ver. I. 1878 p. 80, ubi nomen Mea dicitur esse canaaniticum et iam a Iebusitis usurpatum; v. IERUSALEM V. 6.

EMER (Esdr. 2,59) regio v. EMER 2.

EMIM (עִמִּים, Ὀμῖμοι, Ὀμῖμοι) prius habitabant terram quae postea Moabitarum erat; erant gigantes et a Moabitibus nomen Emim (terribiles?) acceperunt (Deut. 2,10. 11). Percussi sunt Emim a Chodorlahomor in planitie Cariathaim (Gen. 14,5). Ad quam stirpem pertinuerint, dici nequit; nam eorum nomen, uti aliorum quoque, non legitur inter gentes quae Gen. 10 a filiis Noe descendisse dicuntur.

EMINENTIA explicatur hebr. עֵבֶשׂ (Job 28,18), quam vocem plerique crystallum exponunt, alio nomine קָרָה dictum (Ez. 1,22. Cf. E. F. K. Rosenmüller, Bibl. Alterth. IV. 1,26).

EMISSARIUS v. CAPER (emissarius).

EMMANUEL (עִמְּנוּאֵל, Ἐμμανουήλ)

i. e. nobiscum Deus (Matth. 1,23). Isaías vaticinatur 7,14: ecce virgo concipiet et pariet filium et vocabitur nomen eius Emmanuel. Quis eo nomine designetur, ipse propheta in subsequentibus clare explicat; nam 8,8 terram palaestinensem quae est et alias vocatur terra Iahwe, hereditas Iahwe (cf. 14,2. 25; 47,6; Os. 9,3; Ier. 2,7; 12,14 etc.) appellat terram Emmanuel, et etiam clarius 8,9. 10, quibus locis dicit omnes conatus et furores et consilia populorum iri prostratum, quia Emmanuel (hebr.). Porro idem explicatur 9,5-7: hostium impetum iri contrafactum, quia parvulus natus est nobis etc.; iam iste filius et plurimis nominibus et regni sui descriptione declaratur Deus et Messias. Quare in contextu vaticinii et cap. 8 et 9 quae sit natura, indoles, officium Emmanuel praeclare exponitur (cf. Knabenbauer, Comment. in Is. I. p. 167) et in capite 9 v. 5-7 et res et verba ita conformata sunt, ut ea quae 7,14 et 8,9. 10 dicta sunt magis elucidentur.

EMMAUS. 1. Emmaus (Ἐμμαούς), urbs in regione campestri, ubi Ptolemaeus, Nicanor, Gorgias duces Syrorum cum exercitu 40 millium peditum et septem millium equitum castra posuerunt et a Iuda Mach. in fugam coniecti sunt (1 Mach. 3,40. 57; 4,3). Eandem urbem Bacchides in bello contra Ionathan Mach. munivit (9,50; Vulgata: Ammaum). Emmaus, ab ineunte saeculo tertio p. Chr. Nicopolis appellata, sita erat in regione tribus Dan, ubi Iudaeae provinciae montana assurgere incipiunt, 4 mil. pass. a Gazer seu Gazara (Onom. ed. Lag., 244,17; 127,11), 22 mil. pass. a Ierusalem et 10 mil. pass. a Lydda (Hin. Burdig. apud P. Geyer, It. hier. p. 25). Eiusdem urbis Ἀμμαούς, Ἐμμαούς frequens mentio est apud Flavium Iosephum (Bell. iud. I. 11,2; II. 4,3; 5,1; 20,4; III. 3,5; IV. 8,1; V. 1,6; 2,3; 13,1; VI. 4,2; Ant. XII. 7,3. 4; XIII. 1,3; XIV. 11,2; XVII. 10,9). In Mishna appellatur אֶמְמוּס (Arachin 2,4; Kerithoth 3,7), apud Ptolemaeum Ἐμμαούς (V. 16, 7 [ed. Müller-Fischer 15,5]). Hodie vicus Ἀμῶς.

De altero vico Ammaus, rectius Amathus (Flav. Jos. edit. Niese) v. s. v. HAMMOTH DOR.

Cf. *Retand*, Palaestina p. 758-760; *Lightfoot*, Chorogr. Lucae praemissa c. 4, Opp. II. 479 s.; *Robinson*, Neuere bibl. Forsch. 190 ss.; *Kuhn*, Die städtische und burgerl. Verfassung des röm. Reichs 1864-1865 II. 356 s.; *Sepp*, Jerusalem ed. 2 I. 40 ss.; *Neubauer*, Géogr. du Talmud p. 100-102; *Guérin*, Judée I. 293 ss.; *Survey of West. Pal. Mem.* III. 14. 36 ss. 63 ss.; *Schiffers*, Amwas, das Emmaus des hl. Lucas 1890 p. 6 ss.; *I. P. van Kasteren* in Revue bibl. I. 1892 p. 80 ss.; *Schürer*, Gesch. des jüd. Volkes ed. 3 II. 183. 184 et cf. I. 640 in nota 142; *Zeitschr. d. D. Pal.-Ver.* VII. 1884 p. 209 s.; *Rückert* in Theol. Quartalschrift 1892 p. 558 ss.

2. Emmaus (Ἐμμαῶς castellum (ζώρη), quod erat in spatio stadiorum 60 (sed 160 legunt aliqui codd. et evangelium syr. hier., versio arm.) a Ierusalem (Luc. 24.13). Ubi hoc castellum quaerendum sit, multum controvertitur.

Emmaus Luc. 24.13 esse Nicopolim explicite affirmant Eusebius et S. Hieronymus: « Emaus, de quo loco fuit Cleophas, cuius Lucas evangelista meminit: haec est nunc Nicopolis, insignis civitas Palaestinae » (Onom. ed. Lag. 257.21; 121.6). Et S. Hieronymus peregrinationem S. Paulae describens: « repetitioque itineris Nicopolim, quae prius Emmaus vocabatur, apud quam in fractione panis cognitus Dominus Cleophae domum in ecclesiam dedicavit » (apud *Tobler et Molinier*, Itin. hieros. I. p. 31. 32). Similiter Theodosius circa 530: « Emmaus quae nunc Nicopolis dicitur... in qua Emmaus sanctus Cleopas cognovit Dominum in confectione panis; ibi et martyrium pertulit. De Emmaus usque in Diospolim (Lyddam) millia 12 » (De situ Terrae sanctae apud *P. Geyer*, Itin. hieros. p. 139).

Hanc sententiam antiqua traditione commendatam permulti amplexi sunt, ita quidem ut *Schiffers* (Amwas, das Emmaus des hl. Lucas 1890 p. 13-20) plurimis testimoniis allatis ostendat, ab Eusebio usque ad Relandum totius antiquitatis suffragio designari Nicopolim eo loco esse sitam ubi antea Emmaus

castellum apud Lucam nominatum fuerit (p. 20). Et cum S. Hieronymus assignet Nicopolim, interpretes eum secuti sunt sat multi ita *Beda*, *S. Bonaventura*, *Jansenius*, *Baronius*, *Lucas*, *Jansenius* iprensis, *Salmeron*, *Muldonatus*, *Sa*, *C. a Lapide*, *Marianus*, *Tirinus*, *Gordonus* etc.). Antiquae huius traditioni etiam lectio illa de stadiis 160 testimonium fert. Neque dici potest eam de Nicopoli sententiam excludi narratione Lucae. Nam ipsa narratione apparet illos duos abiisse ex Ierusalem, non post meridiem, ut plerumque assumunt, sed iam mane; de sola enim angelorum apparitione quae mulieribus facta est mentionem faciunt; nihil sciunt de apparitione Christi qua mane Mariae Magdalenae se manifestavit, nihil de apparitione aliis mulieribus facta. Neque cum dicant: mane nobiscum, quoniam advesperascit et inclinata est iam dies, de hora vespertina cogitandum est; nam ex Iud. 19.8 s. eiusmodi verba dicuntur, simul ac sol medium cursum diei peregit; bene enim ad eum locum notat *F. de Hummelauer*: « dies converti incipit meridie, quando sol ab ortu ad occasum vergere incipit; sane non intellegitur vespertinum tempus: cum enim iter ex Bethlehem in Silo sit septem circiter horarum (immo plus, ut alii affirmant), non poterat profectio in vespere differri, si iter esset eo die complendum ». Proinde, cum iam mane abierint in Emmaus, fieri potuit, ut eodem die reverterentur in urbem, etsi Emmaus statueretur Nicopolis.

Neque obstat urbem illam Emmaus, de qua in libris Mach. et apud Iosephum sermo fit, fuisse urbem sat magnam, quae tamen ζώρη a Luca appellatur. Ita recte appellatur, cum tempore Christi a priore conditione multum recessisset; etenim a Cassio Longino in servitutum redacta et postea a Quintilio Varo incendio est destructa (Flav. Jos. Ant. XIV. 11.2; XVII. 10.9; Bell. ind. I. 11.2; II. 5.1). Ex recentioribus hanc sententiam tueretur *Robinson*, *Guérin* (qui anceps haeret inter rationes pro *Amwas* et *Qubeibe*), *Schiffers*, *Conder*, *Guillemot*, *Bassi* (O. M.), *Knabenbauer*, *Zanvichia*, *L. Heidet*.

Alii vero castellum Emmaus quaerunt in *Qulonije*, qui vicus olim teste Flavio

Iosepho (Bell. iud. VII. 6,6) Emmaus (Ἐμμαῦς) vocabatur, sed eodem teste solum 30 stadiis ab urbe Ierusalem aberat; 30 enim stadia (non 60) feruntur in editionibus criticis (*ed. Dindorf, ed. Niese*). In *Quloniye* castellum Emmaus fuisse opinantur *Sepp, Schultzt, Caspari, Bourquenoud, Keim, Schürer, Buhl, Savi* (cum aliqua restrictione).

Alii denique castellum Emmaus quae-runt in vico *Qubeibe* occidentem versus ab *el-Djib* sen Gabaone et 60 stadia ab urbe Ierusalem; hanc opinionem defendunt *Zschokke, Schegg, Holzammer, Fillion, Raumer, Laurent, Liévin de Hamme, R. Buselli, Domenichelli, Rückert, Belser*.

Pro situ *Amwas* cf. *Robinson*, *Neuere bibl. Forsch.* p. 191-196; *Conder*, *Tentwork in Palestine* I. p. 14; *Guérin*, *Judée* I. 293 ss. *Galilée* I. 91 ss. et cf. *Judée* I. 257 ss. 348 ss.: *Schiffers*, *Amwas das Emmaus des hl. Lucas* 1890; *idem* in *Katholik* 1893 p. 337 ss. 398 ss. et in *Revue biblique* II. 1893 p. 26-40; *Kuabenbauer* ad *Luc.* 24,13; *Bassi* O. M., *Emmaus città della Palestina* 1888; *Guille-mot*, *Emmaus-Nicopolis* 1886; *Zaneccchia*, *La Palestine d'aujourd'hui* 1899 II. 370 ss. 394 ss.; *L. Heidet* apud *Vigouroux*, *Diet. de la Bible* II. 1748-1763.

Pro situ *Quloniye* cf. *Sepp*, *Jerusalem ed.* 2 I. 54-73; *Caspari*, *Chronologisch-geogr. Einleitung* p. 207; *Schultzt* in *Real-Encycl. f. prot. Theol.* ed. 2 XI. p. 771; *Keim*, *Geschichte Jesu* III. 555; *Bourquenoud* in *Études rel. hist. et litt.* 1863 p. 526; *Schürer*, *Geschichte des jüdischen Volkes* ed. 3 I. 641. 642 in nota 142; *Buhl*, *Alt. Pal.* 1896 p. 166. 186; *Savi* in *Revue biblique* II. 1893 p. 223-227 (qui castellum Emmaus circa Amosam inter *Quloniye* et *Qubeibe* quaerit).

Pro situ *Qubeibe* cf. *Zschokke*, *Das neutest. Emmaus* 1865; *Holzammer* in *Kirchen-Lexicon* ed. 2 s. v.; *Raumer*, *Palaestina* ed. 4 p. 187; *Laurent*, *Peregrinationes medii aevi* quattuor ed. 2 p. 77; *Liévin de Hamme*, *Terre Sainte* ed. 4 II. 248 ss.; *R. Buselli*, *L'Emmaus dimostrato e difeso* 60 stadi distante da Gerusalemme 1882; *idem*, *L'Emmaus evangelico* 1885-1886; *Domenichelli*, *L'Emmaus della Palestina* 1889; *Rückert* in *Theolog. Quartalschrift*, Tübingen LXXIV. 1892 p. 558 ss.; *Belser*, *ibidem* LXXVIII. 1896 p. 193 ss.; *P. Barnabé* O. F. M., *Deux questions d'archéologie palestinienne* I. L'Eglise d'Amwas, l'Emmaus Nicopolis II. L'Eglise de Qoubeibeh, l'Emmaus de St. Luc. Jérusalem 1902.

EMMER (אֶמֶר, Ἐμμερ). 1. Filius Mossollamith (1 Par. 9,12) seu Mossollamoth (Neh. 11,13), princeps classis sacerdotalis, quae erat decima sexta inter viginti quattuor classes a Davide sorte distributas (1 Par. 24,14). Ex eo sacerdotum ordine cum Zorobabel Babylone redierunt mille quinquaginta duo (Esdr. 2,37; Neh. 7,40). Sadoc de filiis Emmer partem muri Ierusalem aedificavit contra domum suam (Neh. 3,29). Duo ex eodem ordine, Hanani et Zebedia, enumerantur inter eos, qui uxores alienigenas duxerant (Esdr. 10,20). Phassur quoque sacerdos et praefectus primarius templi Ier. 20,1 dicitur filius Emmer; utrum ea appellatione solum filiis seu familiae Emmer adnumeretur an revera eius pater designetur, non constat.

2. Regio chaldaica, de qua aliqui duce Zorobabel in Iudaeam redierunt, qui originem suam israeliticam ex genealogiis demonstrare non poterant (Esdr. 2,59 Emer; Neh. 7,61 Emmer). Illa regio ignota est; v. ADON.

EMONA (כְּפַר הָעֵמֶנִי i. e. vicus Ammonitarum, קְרִי הָעֵמֶנִי: LXX Κερικὰ καὶ Μονί), urbs tribus Benjamin, inter duodecim urbes orientales enumerata (Ios. 18,24). Fortasse Kefr Ana ad septentrionem Bethel (*Zaneccchia*, *La Palestine d'aujourd'hui* 1899 II. 304).

EMOR, pater Sichem (Iud. 9,28); v. HEMOR.

EMUNCTORIA sunt instrumenta apta lucernis candelabri aurei septem-plicis emungendis; formam habebant forcipis, unde nomen hebr. formatum a עָקַה *capere, sumere*; facta sunt ex auro purissimo (Ex. 25,38; 37,23; Num. 4,9).

ENAC (עֵנָךְ et Ios. 21,11 עֵנָח: Ἐνάχ, Ἐνάχ), **ENACIM** (עֵנָכִים: Ἐναζίμ), stirps virorum procerae staturae, qui meridionalem partem terrae Chanaan incolebant, cum Abraham illuc immigraret et cum Iosue eam expugnaret. Appellantur stirps Enac, filii Enac, Enacim, filii Enacim. Exploratores, quos Moyses in Hebron misit, tres ibi invenerunt filios Enac seu principes familiarum, Ahiman, Sesai, Tholmai et Israc-

litis nuntiarunt, se vidisse monstra quaedam filiorum Enac de genere giganteo, quibus comparati ipsi quasi locustae viderentur (Num. 13,23. 29. 34; Deut. 1, 28; 9,2). At exploratores magna cum exaggeratione esse locutos, ut populum delerrent, ex eo quoque patet, quod Caleb postea filios Enac in Hebron quorum progenitor fuit Arbee homo magnus inter Enacim Ios. 14,13; 15,13; 21,11) exterminavit Ios. 14,12; 15,14; Iud. 1,20) et quod Iosue interfecit Enacim de montanis Hebron, Dabir, Anab et de omni monte Iuda et Israel urbesque eorum deleuit Ios. 11,21. 22). Iis comparantur Enim, populus tam excelsus, ut de Enacim stirpe quasi gigantes crederentur (Deut. 2,10. 11) et Zomzomim, populus proceras longitudinis sicut Enacim (Deut. 2,20. 21). Eorum reliquiae in urbibus Gaza, Geth, Azoto Ios. 11,22) cum Philisthaeis coaluerunt neque amplius in s. litteris commemorantur.

ENADAD (Neh. 3,18) v. HENADAD.

ENAIM (עֵינַיִם) quae est rarior dualis numeri forma: duo fontes seu duplex fons; Μαῖναι, ἡ Μῆναι(α), urbs in campes-tribus Iuda, in prima provincia Sephelae enumerata (Ios. 15,34). Probabilius de eodem loco agitur Gen. 38,14 (פְּתַח עֵינַיִם) i. e. ostium fontium, LXX αἱ πύλαι Αἰνῶν, Vulgata: bivium) et 38,21; ex contextu hic locus erat inter Odollam (Kh. 'Id el-Mā prope Eleutheropolim) et Thamna (Tibne). De situ accuratius determinando variae sunt coniecturae.

ENAN (עֵינַן, Αἰνῶν). 1. Pater Ahira principis tribus Nephthali (Num. 1,13; 2, 29; 7,78. 83; 10,27).

2. Filius Nathaniae et pater Melchiae de tribu Simcon recensetur inter maiores Iudith (Iudith 8,1; LXX Ἐλιάδ).

3. Villa Enan (עֵנַן, Ἀρσενῶν) assignatur tamquam terminus septentrionalis terrae promissionis (Num. 34,9. 10) ita quidem, ut ibidem terminus septentrionalis et orientalis conveniant; item ex Ez. 47,17 et 48,1 discimus atrium Enan iuxta fines Damasci fuisse (47,17 legitur הַצֵּדִק עֵינַן, Vulgata: atrium Enon, ἡ ἀλλὰ τοῦ Αἰνῶν). Censebatur esse

fons *Lebwe* in *Beqā'a*, situs in divortio inter Orontem, qui septentrionem versus et Leontem qui meridiem versus fuit (Keil ad Num. 34,9) vel etiam *'Ayān el-Dara* in descensu orientali Antilibani (cf. *Dillmann* ad Num. 34,9). Sed recentiore tempore *I. P. van Kasteren* in *Revue biblique* IV 1893 p. 23-36 defendit terminum septentrionalem terrae promissionis infra Libanum et Hermonem maiorem fuisse et villam Enan seu atrium Enon quaerit ad orientem *Bānīyās* (Caesareae Philippi), ubi duo vici *Hazūre* et *el-Hadr* aliquam similitudinem nominis cum הַצֵּדִק prae se ferunt, etsi nomen *Hazūre* potius hebr. הַצֵּדִק supponere videtur (l. c. p. 31).

ENCAENIA v. DEDICATIO 2.

ENDOR (עֵדוֹר, ἡ ἑνδὸρ fons Dor; Ἐνδὸρ), urbs in territorio Issachar, sed tribui Manasse tributa (Ios. 17, 11), ex qua filii Manasse Chananaeum expellere non valebant (17,12). Psalmista victoriam a Barac de Sisara duce Asoritarum reportatam refert ad Endor (Ps. 82 [83], 11), siquidem haec urbs est terminus orientalis planitie, quam torrens Cison percurrit; pugna illa commissa erat iuxta torrentem Cison, cuius undis cadavera hostium caesorum devolvebantur (cf. Iud. 4,7; 5,21). Celebris facta est Endor a muliere pythonem habente, quam ibidem Saul ante pugnam in planitie Esdreton et ad montem Gelboe commissam consuluit (1 Reg. 28,7). Apud Eusebium et S. Hieronymum describitur grandis vicus 4 mil. pass. a monte Thabor meridiem versus et iuxta oppidum Naim situs (Onom. ed. Lug. 226,23; 239,70). Hodie *Endūr* in descensu septentrionali collis vulcanici *Tell 'Adjāl*, ubi plurimae cavernae inter rupes adhuc conspiciuntur.

Cf. *Guérin*, Galilée I. 118-121; *Baedeker-Benzinger*, Pal. u. Syrien ed. 5 p. 271; *Survey of West. Pal.* Mem. II. 83. 84; *Zeitschr. d. D. Pal.-Ver.* XV. 1892 p. 111; XVI. 1893 p. 55; *Fahrngruber*, Nach Jerusalem ed. 2 II. p. 182; *Liévin de Hamme*, Terre Sainte ed. 3 III. 117; *Zuccchia*, La Palestine d'aujourd'hui 1899 II. 624 s.; *Buhl*, Alt. Pal. 1896 p. 216. — Dubium movet *F. de*

Hummelauer (Comm. in Ios. p. 393), refertur nomen Endor Ios. 17,11 ad illam Endor prope montem Thabor, quae in textu paralelo Iud. 1,27 non legitur et coniicit prope Dor urbem aseriticam fuisse fontem et vicum nomine 'Ain Dor seu Endor et Manassaeis obligasse non solum urbem aseriticam Dor, sed etiam fontem et vicum Endor prope Dor.

ENGADDI (עֵינֵי גַדִּי i. e. fons hoedi, Ἐγγαδδὶ plerumque saltem) urbs primitus erat Amorrhaeorum, quos Chodorlahomor devicit (Gen. 14,7), antiquo nomine appellata Asasonthamar (הַצִּנֹּן תְּכֵר i. e. amputatio palmarum; Ἀσασονθαμάρ, Ἀσασὸν Θαμάρ cf. 2 Par. 20,2); postea nomine Engaddi inter urbes deserti Iuda recensita (Ios. 15,62), mari Mortuo adiacens (Ez. 47,10). In deserto Engaddi David fugitivus delitescerebat (1 Reg. 24,1. 2) super faciem rupium ibicum (hebr.) i. e. super petras solis ibicibus pervias (Vulgata), quod etiam intellegi potest nomen proprium utique a loci natura derivatum (*F. de Hummelauer* in h. l.). Illuc Ammonitae, Moabitae, Edomitae conveniunt contra Iosaphat regem Iuda (2 Par. 20,2), ut inde per clivum Sis (20,16) Ierusalem versus ascenderent. De vinctis Engaddi loquitur sponsa Cant. 1,13 [14], de palmis Engaddi fortasse Eccli. 24,18 [14]: quasi palma exaltata sum in Cadès (ἐν αἰγαιόσις). Teste Flavio Iosepho (Ant. IX. 4,2) crescent illic palmae pulcherrimae et opobalsamum. Plinius (V. 17,73) vocat Engada oppidum secundum ab Hierosolymis fertilitate palmetorumque nemoribus. Apud Eusebium et S. Hieronymum (Onom. ed. Lag. 234,66; 119,12) dicitur vicus pergrandis iuxta mare Mortuum, unde et opobalsamum venit. — Hodie 'Ain Djidi fere in medio litore occidentali maris Mortui ad radicem rupium, quae 20 fere minutis a litore distantes praerupte in altum assurgunt; fons, a quo nomen loci, ex altitudine 65 m quasi per varios gradus descendit et antiquitus hortos, palmeta, vineta irrigabat.

Flavius Iosephus asserit (Ant. IX. 1,2) Engaddi ab Hierosolymis 300 stadia distare; de qua assertione cf. *Retlandum*,

Pal. p. 449. S. Hieronymus (in Ez. 47,10) videtur Engaddi ibi collocare, ubi aquae Iordanis plane cum mari Mortuo miscentur, ita ut fluvius dici possit finire et consumi; sed eius verba obscuriora sunt. Vide etiam s. v. BENEDITIONIS VALLIS.

Cf. *G. A. Smith*, *Historical Geography of the Holy Land* p. 269 s.; *Survey of West. Pal. Mem.* III. 384-386; *F. Buhl*, *Alt. Pal.* 1896 p. 41. 164. 165; *Zanecchia*, *La Palestine d'aujourd'hui* 1899 II. 110. 111; *Fahrngruber*, *Nach Jerusalem* ed. 2 II. 64. 77. 106; *Liévin de Hamme*, *Terre Sainte* ed. 4 II. 283; *Duc de Luyne*, *Voyage d'exploration à la mer Morte* I. 83 ss.; *Thomson*, *The Land and the Book* I. 312 ss.; *Baedeker-Benzinger*, *Pal. und Syrien* ed. 5 p. 198.

ENGALLIM (עֵינֵי-עֲלִילִים i. e. fons duorum vitulorum; Ἐναγκαλίμ) legitur Ez. 47,10 una cum Engaddi; hi duo termini in litore maris Mortui a propheta statuuntur, inter quos piscatores sagenas suas extendent ad plurimas species piscium ibi capiendas, ubi antea mortis imperium longe lateque extendebatur. S. Hieronymus in Ez. 47,10 notat: « Engallim in principio est maris Mortui, ubi Iordanes ingreditur ». Fortasse 'Ain Feshkha i. e. fons stercoris in superiore litore occidentali maris Mortui ex humo palustri inter cannetas prosiliens; aliquae ruinae fonti adiacent. Hic situs contextui Ez. 47,10 omnino congruere videtur.

ENGANNIM (עֵינֵי-נָגִים i. e. fons hortorum).

1. Urbs tribus Iuda in superiore parte Sephelae sita (Ios. 15,34). Textus LXX ita corruptus est, ut nomen discerni vix possit; Vulgata: Aengannim. Hodie *Khîrbet Umm Djîna* prope 'Ain Shems (Bethsames 1) occidentem versus.

Cf. *Survey of West. Pal. Mem.* III. 42; *Zanecchia*, *La Palestine d'aujourd'hui* 1899 II. 323; *Legendre* apud *Vigouroux*. Dict. de la Bible II. 1802; *G. A. Smith*, *Hist. Geogr. of the Holy Land*, Plate 1 et IV; *Buhl*, *Alt. Pal.* 1896 p. 195.

2. Urbs tribus Issachar (Ios. 19,21; Ἰσὼν καὶ Τομαζὴν, Ἀ Ἠγγαννίμ), filiis Gerson levitici generis tradita (Ios. 21,

29; LXX $\pi\eta\gamma\eta \gamma\epsilon\alpha\mu\acute{\alpha}\tau\omicron\nu$). Probabilius haec Engannim est illa domus horti 4 Reg. 9,27) inter Iezreel et ascensum Gaver sita (vide s. v. GAVER). Praeterea dubium est, sitne Anem eadem urbs atque Engannim (v. ANEM). Apud Flavium Iosephum Engannim est Ginea (ed. *Niese* $\zeta\acute{o}\gamma\eta\varsigma$ $\Gamma\upsilon\nu\alpha\zeta\eta\varsigma$ et $\Gamma\eta\nu\epsilon\acute{o}\varsigma$) in confinibus Samariae et Magni campi sita (Ant. XX. 6,4; Bell. ind. III. 3,4). Hodie vocatur *Djenin*, qui viens non multum supra duas horas a *Zer'in* (Iezreel) meridiem versus distat. Antiqua traditio christianorum palaestinsium fert decem leprosos a Domino sanatos esse in hoc oppido (cf. Luc. 17,44); attamen dubitari potest de origine istius traditionis, siquidem Burchardus de Monte Sion describens Ginnin (*Djenin*) oppidum muratum quidem, sed collapsum, situm in pede montis Elfraym (Quattuor peregrinationes medii aevi, ed. *Laurent* p. 52) eam prorsus tacet; iamvero iter Burchardi per Palaestinam anno 1283 factum est.

Notatu dignum est, quod *G. Maspero*, Sur les noms géographiques de la liste de Thoutmos III. qu'on peut rapporter à la Galilée, 1886, p. 9 probabile censet, nomen *Ganōlou Asnah*, hortos Asnah, esse novam designationem pro Engannim, praesertim cum *Asnah* (Vulgata: Asena) sit nomen viri (Esdr. 2,50).

Cf. *Robinson*, Pal. III. 385 s.; *Guérin*, Samarie I. 327-332; *Survey of West. Pal. Mem.* II. 44. 45. 116; *Zeitschr. d. D. Pal.-Ver.* XVI. 1893 p. 1. 55; *Fuhrngruber*, Nach Jerusalem ed. 2 II. 161; *Buhl*, Alt. Pal. 1896 p. 202; *Zanechia*, La Palestine d'aujourd'hui 1899 II. 583 s.; *Liévin de Hamme*, Terre Sainte ed. 4 III. 74 s.

ENHADDA עֵיִן הַדָּדָה i. e. fons acer seu velox; Αἰχμῆξ , Α Ἠναδδᾶ) urbs tribus Issachar (Ios. 19,21). Fortasse *Kefr Adin* prope *Djenin* (Engannim 2) inter septemtrionem et occidentem.

Cf. *Survey of West. Pal. Mem.* II. 45; *Legendre* apud *Vigouroux*, Dict. de la Bible II. 1806; *G. A. Smith*, Hist. Geogr. of the Holy Land, Plate I. VI; *Zanechia*, La Palestine d'aujourd'hui 1899 II. p. 587.

ENHASOR עֵיִן הָעֶסֶר i. e. fons pagi,

$\pi\eta\gamma\eta \text{'Ασῶρ}$, urbs munita Nephthali (Ios. 19,37). Censetur esse *Khirbet Hazire*, quae ruinae sunt fere mediae inter Sealam Tyriorum (*Rās el-Nāqūra*) et lacum *Hūle*. Contra hanc opinionem iam a *Renau* propositam obicit *Guérin* (Galilée II. 118), prope istas ruinas nullum fontem reperiri, a quo urbs nomen suum duxerit. Nihilominus plerique Enhasor cum *Kh. Hazire* componunt (Exploratores anglici; *G. A. Smith*, *Legendre*, *Zanechia*). Sed *F. de Hummelauer*, qui Ios. 19,35-38 interpretatur elenchum arcium Tyriorum per Galilaeam et transiordanicam, componit Enhasor cum villa Enan ad orientem *Bāniyās* (Caesarea Philippi).

Cf. *Renan*, Mission de Phénicie 1864 p. 674; *Survey of West. Pal. Mem.* I. 204; *G. A. Smith*, Hist. Geogr. of the Holy Land, Plate I; *Legendre*, Carte de la Palestine; *Zanechia*, La Palestine d'aujourd'hui 1899 II. 708.

ENNOM vallis. 1. Geennom i. e. vallis Ennom vocatur in S. Scriptura vallis « ex latere Iebusaci ad meridiem, haec est Ierusalem » (Ios. 15,8; 18,16; *latus Iebusaei*, hebr. $\text{בֵּיתֵי הַיְּבוּסִי}$, cli-vum australem collis occidentalis urbis hierosolymitanac videtur designare; v. IERUSALEM VI. 5); Ieremias eam dicit esse « iuxta introitum portae fictilis » (19, 2) שְׁעֵי הַהַרְסִית v. IERUSALEM V. 3). Terminus tribuum Iuda et Beniamin per hanc vallem ascendit « ad verticem montis qui est contra Geennom ad occidentem in summitate vallis Raphaim contra aquilonem » (Ios. 15,8). Etiam post exilium babilonicum filii Iuda dicuntur habitasse « in (hebr. *a*) *Bersabee usque ad vallem Ennom* » (Neh. 11,30; LXX ἐν Βερσαβᾶς tantum). Sub impiis regibus Achaz, Manasse aliisque populus in hac valle in loco Topheth filios suos per ignem idolo Moloch immolaverunt (4 Reg. 23,10; 2 Par. 33,6; Ier. 32,35). Quare Iosias illam contaminavit 4 Reg. 23,10) et Dominus per Ieremiam gravissimam incolis cladem minatur, ita ut *vallis interfectionis* s. *occisionis* בְּאֵר הַחַיְיָה appellanda foret (Ier. 7,31 s.; 19,2. 6; cf. 31,39).

Nomen quo hisce in locis vallis appellatur est *Geennom* (Ios. 15,8; 18,16), *vallis Ennom* גֵּי-הַנֶּחֱם [גֵּי-נַח] ; φάραγξ Ὀνόμ B, φ. Ἐννόμ A; etiam Γάεννυ B Ios. 18,16, Γάι Ὀννόμ A ib.), vel *vallis* (s. convallis) *filii Ennom* בֶּן-הַנֶּחֱם גֵּי [גֵּי-נַח] ; φάραγξ Ὀνόμ; semel γῆ βρονῆ Ἐννόμ B, γῆ Βροννόμ A 2 Par. 33,6, ubi Vulgata *vallis Benennom*. 4 Reg. 23,10 *Kethib* habet "גֵּי בְנֵי הַ", ubi *Qeri* הַ בֶּן גֵּי cum LXX Peshitta, Vulgata postulat), et semel in sola Vulgata *vallis filiorum Ennom* (Ios. 18,16). Eliam *convallis*, הַנֶּחֱם sine addito (Ier. 2,23; cf. *porta vallis*, שַׁעַר הַנֶּחֱם, de qua v. IERUSALEM V. 3) et *vallis cadaverum et cineris* נַחֲמָן הַנֶּחֱם (Ier. 31,39) vocatur. In N. t. nomen ex hac valle derivatum *genna* (γεννα Matth. 5,22. 29 etc.) ad infernum designandum adhibetur, sicut גֵּי-הַנֶּחֱם in scriptis talmudicis; pariter auctor libri Henoch hanc vallem maledictam aeternumque maledictorum habitaculum vocat (c. 27,1; cf. 26,4). Fl. Iosephus vallem hanc nomine « vallis fontis » videtur designare (τῆς πηγῆς φάραγγος Bell. iud. V. 12,2 *Niese* 503).

2. Ex descriptione libri Iosue satis apparet, vallem Ennom illam esse quae latus australe et occidentale urbis hierosolymitanae attingit, quaeque hodie *Wādī el-Rabābi* appellatur; atque huic etiam geographus arabs *Idrīsī* c. a. 1154, et incolae hierosolymitani, saltem sacculo elapso, nomen *Wādī Djahannum* tribuunt (*E. Robinson*, Palaestina II. 38; *J. Gildemeister* in *Zeitschr. d. D. Pal.-Ver.* VIII. 1885 p. 127; sed cf. *T. Tobler*, *Topogr. von Ierus.* II. p. 17 n. 8). Ab hac opinione, quae hodie satis communiter admittitur, dissentiunt *Eusebius*, *S. Hieronymus*, *Encherius*, *Ven. Beda* alique scriptores, etiam arabes, qui vallem orientalem s. Cedron esse *Geennom* contendunt; quamquam *S. Hieronymus* in commentariis in Ieremiam 7,31 et 32, 35 (*Migne* 24,733 A. 897 D) vallem filiorum Ennom « subiacere Siloe fontibus » ab iisque irrigari dicit. — Ab opinione utraque dissentientes *R. J. Schwarz* et postea *W. F. Birch* alique vallem En-

nom intra moenia veteris urbis, scil. partem inferiorem vallis Tyropoeon fuisse censent; quod, licet nonnullis ariserit, parum solidis argumentis videtur inniti.

De aliis v. IERUSALEM II. 2. — Cf. *Eusebius-Hieronymus*, *Onomastica sacra*, ed. *P. de Lagarde* 300,13 ss. 128,9 ss.; *Encherius*, De situ hierosolimitanae urbis, ed. *P. Geyer*, p. 127,9 ss.; *Ven. Beda*, De locis sanctis, ib. p. 309,9 ss.; *Fr. Quaresmius*, *Elucid. T. S. IV.* per. 7., c. 17 s., ed. *Venet.* II. p. 210-12; *I. Lightfoot*, *Centuria chorographica Matthaeo praemissa* c. 39; *H. Reilandus*, Palaestina p. 353; *E. F. K. Rosenmüller*, *Bibl. Alterth.* II. 1 p. 155 s. 164 s.; *E. Robinson*, Palaestina II. p. 38-41 et p. 32, nota; *Rabbi J. Schwarz*, *Das h. Land* p. 189 s.; *T. Tobler*, *Topogr. von Ierus.* II. p. 39-50; *Liévin de Hamme*, *Guide indicateur* ed. 4, I. p. 420 s.; *D. Zuccchia*, *La Palestina d'Oggi* I. p. 341-8; *Baedeker-Benzinger*, Palaestina u. *Syr.* ed. 5, p. 100-3; *W. F. Birch*, *Pal. Expl. Fund.* Quart. Stat. 1882, p. 55; 1889, p. 38; 1893, p. 330; 1897, p. 72.

L. FONCK.

ENOCH (Iudas 14) v. HENOCH.

ENON vicus v. ENAN 3.

ENOS (אֶנוֹשׁ, Ἐνώς), filius Seth filii Adam, pater Cainan (Gen. 4,26; 5,6. 7. 9. 11; 1 Par. 1,1). Iste coepit invocare nomen Domini (Vulgata et LXX Gen. 4, 26; sed textus hebraicus, Samaritanus, Syrus: tum coeptum est; Chaldaeus erronee: tum profanatum est; cf. *F. de Hummelauer* ad h. l.). Eidem vitae anni 903 adscribuntur (Gen. 5,11). In Vulgata Luc. 3,38 scribitur Henos.

ENSEMES (עֵין-שֶׁטֶחַ, Vulgata interpretatur: Fons Solis; הַ פֶּגַח הַ שֶׁטֶחַ, πηγή Βασιτανύς), fons per quem tendebat terminus aquilonaris Iuda (Ios. 15,7) et australis Benjamin (18,17); utroque loco recensetur inter fontem Rogel et ascensum Adommim, ordine utique inverso. A recentioribus agnoscitur esse *Hōd el-Azariye* seu *ʿAin el-Hōd* (gall. *la source de l'auge*; germ. *Trogquelle*), qui fons a christianis etiam fons Apostolorum dicitur et viginti minutis a Bethania Iordanem versus abest; aquae Ensesmes igitur erunt *Wādī el-*

Ἠθὺλ (vallis loci aquationis, quae vallis a fonte nomen habet).

Ab hac opinione satis communi recedit *L. P. van Kasteren*, qui fontem 'Ain el-Rawābe iuxta antiquam viam iericholimnam reperit et hanc viam una cum Wādī el-Rawābe fuisse terminum inter Iuda et Beniamin suspicatur (*Zeitschr. d. D. Pal.-Ver.* XIII. 1890 p. 116); unde etiam *Buhl* (*Alt. Pal.* 1896 p. 98) putat Ensembles potius in 'Ain el-Rawābe quam in 'Ain el-Ḥōḏ quaeri debere.

Pro opinione communi cf. *Van de Velde*, *Memoir* p. 310; *Guérin*, *Samarie* I. 159. 160; *Survey of West. Pal.* *Mem.* III. 42; *G. A. Smith*, *Hist. Geogr. of the Holy Land*, *Plate* I. IV; *Riess*, *Bibel-Atlas* ed. 3; *Fahrngruber*, *Nach Jerusalem* ed. 2 II. p. 61; *Zanecchia*, *La Palestine d'aujourd'hui* 1899 II. 6; *Baedecker-Benzinger*, *Pal. und Syrien* ed. 5 p. 148 (cum dubio).

EPAENETUS (Ἐπαίνετος), christianus quem S. Paulus salutatur *Rom.* 16,3: « dilectum mihi, qui est primitivus (seu primitiae) Asiae in Christo (melius: in Christum) ». Graecus textus receptus enim erronee vocat Achaiae primitias (cf. *I Cor.* 16,15). Asia intellegitur non tota Asia minor, sed romana provincia Asiae, cuius urbs praecipua erat Ephesus. In hac igitur provincia primus fuit, qui baptismo in Christum insereretur. Ex eo quod eius mentio fit immediate post Aquilam et Priscam (16,3), haud immerito concluditur eum ad fidem adductum esse ab Aquila et Prisca, qui iam ante tertium Pauli iter apostolicum Ephesi viam Domini diligentius exposuerunt (cf. *Act.* 18,24-26); eum etiam simul cum Aquila et Prisca Romam profectum esse valde probabile est. « Quidquid autem de hac opinione est », inquit *R. Cornely* ad *Rom.* 16,3, « moderni critici (*Weiss* etc.) profecto non nisi ridicule ex eo, quod Asianus fuerit, colligere volunt, eum etiam in Asia continuo habitasse pericopenque nostram Ephesi esse destinatum, aesi Asianis Romam venire non licuisset aut Paulus singulorum quos nominat itinera indicare debuisset ». Epāenetus in Graecorum Menologiis commemoratur die 30. Iulii, in latinis die 15. Iulii.

EPAPHRAS (Ἐπαφρᾶς), Colossensis et ethnico-christianus (*Col.* 4,12; cf. 4, 11, quem S. Paulus describit carissimum suum conservum et fidelem pro Colossensibus ministrum Christi *Iesu* 4,7. 8). Haud dubie Epaphras ecclesiam fundaverat Colossis et probabilius etiam Laodiceae et Hierapoli (4,13), quae sunt urbes Phrygiae Colossis vicinae et in valle Lyci, qui in Macandrum influit, sitae; istae ecclesiae faciem Pauli in carne nondum viderant (2,4). Epaphras se valde sollicitum exhibet pro istis tribus ecclesiis (4,12. 13) et S. Paulus Colossensibus contra fallacias philosophorum in memoriam revocat, quae ab Epaphra didicerant (1,7; cf. 2,6. 7). Unde apparet Epaphram propter istas turbationes ecclesiarum ad S. Paulum (Romam, ex opinione aliorum Caesarem) venisse neque rediisse, cum epistula per Tychicum Colossas mitteretur. A S. Paulo appellatur « conceptivus meus in Christo Iesu » (*Philem.* 23) i. e. qui sponte se Paulo adiunxerat in captivitate romana vel ex opinione aliorum caesariensi. — Sunt qui putent Epaphram esse eundem atque Epaphroditum (sed v. s. v.).

EPAPHRODITUS (Ἐπαφρόδιτος), christianus ecclesiae philippensis, quem S. Paulus describit « fratrem et cooperatorem et commilitonem meum, vestrum autem apostolum et ministrum necessitatis meae » (*Phil.* 2,25). Is apostolo in captivitate romana degenti dona Philippensium attulerat et gravi morbo Romae vix superato epistulam S. Pauli Philippos rediturus secum asportavit (*Phil.* 2, 25-30; 4,10-18). — Valde improbabile est Epaphroditum eundem esse atque Epaphram. Nomen Ἐπαφρόδιτος, Ἐπαφρόδιτος (*Vennstus*) erat satis frequens (*Tacit. Ann.* 15,35; *Suet. Domit.* 14; *Flav. Ioseph. Vita* 76). Epaphras erat Colossensis, Epaphroditus ad ecclesiam Philippensium pertinebat. Gratuito denique asseritur S. Paulum in epistula ad Coloss. usum esse forma nominis abbreviata, in epistula ad Philipp. forma plena et longiore.

EPHA (עֶפְרָיִם; Ἐφράϊμ, Ἐφραΐμ). 1. Primus inter filios Madian enumeratus (*Gen.* 25,4; *I Par.* 1,33); populus Ephra

negotiationem exercens, camelis abundans, aurum et thus ex Saba i. e. Arabia felice afferens nominatur Is. 60,6 una cum Madianitis, qui in litore orientali sinus Aelanitici habitabant, Cedarenis, qui greges pascebant inter Syriam et Babyloniam, et Nabataeis (Nabaioth) ismaeliticis eandem fere regionem incolentibus. *Delitzsch* (Paradies p. 304) et *Schrader-Whitehouse* (Cuneif. Inser. and Old Test. I. p. 132. 133) ex inscriptionibus cuneiformibus pro comparatione afferunt *Hajapa*, *Haipa*, quae est tribus Arabiae septentrionalis frequenter commemorata; *Halévy* etiam putat Epha nomen personae legendum esse in inscriptionibus Safa (cf. *Dillmann* ad Gen. 25,4).

2. Epha concubina Caleb filii Hesron (1 Par. 2,46); v. CALEB 2.

3. Epha in genealogia Iuda recensetur quintus filius Iahaddai (1 Par. 2,47); cuiusnam filius Iahaddai fuerit tacetur.

EPHEBIA v. GYMNASIUM.

EPHER (עֶפֶר). 1. Secundus inter filios Madian enumeratus (Gen. 25,4 Ἀφείρ, Vulg. Opher; 1 Par. 1,33 Ὀφέρ). Sedes posteriorum Epher pro certo assignari nequeunt. *Delitzsch* et *Dillmann* ad Gen. 25,4 *Wetzstein* secuti pro comparatione adducunt Ὀφρ, qui locus est inter *Abân* et montes *Tihûma*, a quo tota circum regio nomen *Nedjed* Ὀφρ habet. Antiquiorem opinionem de tribu quadam arabica *Ghifâr*, quod nomen ad עֶפֶר quam maxime accedit, *Dillmann* l. c. reprobendam esse censet.

2. Filius Ezra cuiusdam ignoti in genealogia Iuda (1 Par. 4,17; LXX Ἀφερ).

3. Unus ex principibus cognationum Manasse ab oriente Iordanis (1 Par. 5, 24; LXX. Ὀφέρ).

4. Epher terra (אֶרֶץ עֶפֶר, הָאֶרֶץ Ὀפֶר) una cum urbe Socho constituebat praefecturam salomonicam tertiam a Ben-hesed in Aruboth administratam (3 Reg. 4,10). Urbs principalis terrae Epher videtur esse urbs illa Opher (הָעִיר, Ὀפֶר), cuius regulum chanaanaeum Iosue percussit (Ios. 12,17). Iamvero urbes Ios. 12, 17. 18 enumeratae merito accensentur

urbibus Chanaan meridionalis vel rectius Chanaan mediae; inseruntur enim post urbes in Chanaan meridionali expugnatas Ios. 12,10 s. et ante urbes Chanaan septentrionalis Ios. 12,19 s. Unde probabilissimum fit urbem Socho una cum terra Epher coniunctam non esse illam Socoth montis Iuda (Ios. 15,48; hodie *Shuweike* infra Hebron), sed potius alteram Socho in campestribus Iuda (Ios. 15,33; *Shuweike* in septentrionali parte Sephelae). Terra Epher igitur in septentrionali parte Sephelae quaerenda est; desunt autem ulteriora vestigia nominum Epher (Opher) et Aruboth (אַרְבוֹת, Ἀρῶβθ).

EPHES DAMMIM v. PHESDOMIM.

EPHESUS (Ἐφεσος), metropolis Ioniae, sita ad ostium Caystri fluminis et mare Icarium inter Smyrnam et Miletum; ab anno 41 a. Chr. et deinceps sub Romanorum erat imperio et evadebat caput Asiae proconsularis. Portu duplici instructa urbs frequentissimo commercio celebris erat, sed multo magis celebris templo Dianae quod inter septem mundi miracula recensebatur. Templum antiquum Hierostratus, ut nomen suum eo facinore innolesceret posteritati, incenderat anno 355 a. Chr., et partim flammis absumptum est, at mox splendidius instauratum. Colebatur in eo ἄγαλμα διοπετίς, simulacrum quod caelitus delapsum esse ferebatur, confectum ex ligno cedrino (*Vitruvius* 2, 9) vel viteo (*Plinius* XVI 40,213) et auro obductum (cf. *Xenoph.* Anab. 5,3. 12), quo Diana repraesentabatur dea multimanimnia. Ad eius cultum undique homines maxima frequentia confluebant. Urbs ipsa gerebat honoris titulum νεωκόρος τῆς μεγάλης Ἀρτέμιδος, cultrix magnae Dianae, quia in ea eximius cultus Dianae constitutus erat. Templum eius imitatione exprimebatur aediculis argenteis, quae argentariis non modicum praestabant quaestum (Act. 19,24. 35). Paulus apostolus, cum in secundo itinere apostolico a Corintho in urbem Ierusalem proficisceretur, devenit Ephesum cum Priscilla et Aquila et ingressus synagogam disputabat cum Iudaeis; mox tamen reliquit Ephesum; remanserunt autem Priscilla et Aquila,

quibus sese adiunxit Apollo, vir eloquens et potens in Scripturis. Ita semina rei christianae Ephesi iacta sunt (Act. 18, 19 ss.), quae maxime exculta sunt ab apostolo Paulo cum is in tertio suo itinere apostolico plus duobus annis Ephesi moraretur (cf. Act. 19, 1 ss.), ita ut omnes qui habitabant in Asia audirent verbum Domini, Iudaei atque gentiles. Praedicatio apostoli insignibus quoque miraculis a Deo commendabatur et verbum Dei fortiter crescebat et confirmabatur (Act. 19, 11. 12. 20. 26) et ipse apostolus testatur Ephesi sibi apertum esse ostium magnum et evidens, sed simul adversarios esse multos (1 Cor. 16, 9). Quorum furorem expertus est in persecutione quam Demetrius argentarius suscitavit, quia praedicatione Pauli imminutus esset cultus Dianae et argenteis lucrum ereptum (Act. 19, 24 ss.). Apostolum in fundanda ecclesia ephesina plurima expertum esse pericula satis indicatur cum scribat se Ephesi ad bestias pugnasse (1 Cor. 15, 32), se talem subisse in Asia tribulationem, ut supra modum gravatus esset et iam de vita desperasset (2 Cor. 1, 8 graeco). Cum postea apostolus a Graecia in Ierusalem iter faceret, Ephesum quidem transnavigavit, at a Mileto mittens Ephesum vocavit maiores natu ecclesiae eosque de periculis imminuentibus edocuit. Ex captivitate romana epistolam dedit ad Ephesios. Post eam consultuit eidem Ecclesiae tum sua ipsius praesentia tum per Timotheum quem ibi reliquit, ut haereses nascentes supprimeret, tum per Tychicum quem in secunda captivitate romana Ephesum misit (1 Tim. 1, 3; 2 Tim. 1, 18; 4, 12). Quae fuerit conditio ecclesiae ephesinae tempore Domitiani discimus Apoc. 2, 1-7. Quod eo loco apostolus minatur : « movebo candelabrum tuum de loco suo, nisi poenitentiam egeris », postea in urbe impletum est; hodie enim urbs plane destructa est; prope eius ruinas non exstat nisi vilis pagus *Ajasuluk* nomine.

I. KNABENBAUER.

EPHI vide s. v. **MENSURAE**.

EPHOD (ἑφὼδ, ἑφὼδ), pater Hanniel ex tribu Manasse (Num. 34, 23).

EPHOD ἑφὼδ, ἑφὼδ : LXX et Vulgata

modo vocem retinent ἑφὼδ, ἑφὼδ, modo eam explicant ἐπωμῖδα, superhumeralis, humeralis. Ephod summi sacerdotis ex auro, purpura, cocco et bysso artificiose contextum erat; cf. Ex. 28, 6 s.; ephod aliud quod sacerdotes reliqui gestabant (1 Reg. 22, 18), Samuel ministrans coram arca (1 Reg. 2, 18) et ipse quoque David, cum coram Domino sacrum duceret chorum (2 Reg. 6, 14; 1 Par. 15, 27), erat linenum. Constabat ephod duabus plagulis et induebatur fere sicut casula nostra sacerdotalis, cui satis simile erat; carebat manicis; duae illae plagulae in partem corporis anteriorem et posteriorem dependentes in humero fibulis connexae erant, corpori autem cingulo adstringebantur (Ex. 29, 5). Ad divinum responsum exquirendum David iubet pontificem applicare ephod (1 Reg. 23, 9; 30, 7) i. e. induere ephod et per Urim et Thummim consulere Dominum. Nam in ephod pontificis, in parte anteriore habebatur ornamentum pectorale (Vulgata: rationale) forma quadrata ex opere plumario factum mensuram habens palmae et duodecim gemmis, quibus nomina tribuum insculpta erant, insignitum; in eo ponebatur doctrina et veritas i. e. Urim et Thummim (latior eius ornamenti descriptio modique quo cum ephod iungebatur legitur Ex. 28, 13-30). Eodem autem modo divinum responsum ut expetatur praescribitur Num. 27, 21 hebr. — Ex spoliis Madianitarum Gedeon confecit ephod (Iud. 8, 27). Proprietate vocis retenta cogitandum erit de veste sacerdotali valde pretiosa, uti ex v. 26 patet. Ephod confecisse videtur Gedeon in memoriam victoriae et tamquam sacrum quoddam donarium. Alii eo simulacrum designari volebant (ut eo loco iam vertunt Syrus et Arabs) ita ut statua vel simulacrum ab amictu aureo vel argenteo tamquam a vestimento quodam nominaretur (*Gesenius*, Thes. p. 135). Verum id a notione vocis longius recedit; neque obstat quod dicitur l. e. : et posuit illud in civitate sua Ephra; nam verbum idem hebr. עֶפְרָיִם dicitur 6, 37 de vellere expandendo in arca. Praeterea etiam 17, 3-5 praeter ephod mentio fit sculptilis et

theraphim; ergo ephod non intellegitur simulacrum. Cum ephod esset vestis sacerdotalis et adhiberetur a pontifice ad divinum responsum exquirendum, facile evenire poterat, ut Israelitae ephod illud a Gedeon confectum superstitione venerarentur (cf. *de Hummelauer* ad Iud. 8,27).

I. KNABENBAUER.

EPHRA. 1. Ephra (עֶפְרָא, Ἐφραθά, sed apud *Flav. Jos. Ant. V. 6,3* Ἐφρά), urbs familiae Ezri seu rectius Abiezritarum, civitas patria Gedeonis; ibidem Gedeon in sanctuario suo ephod illud constituit, quod postea occasio superstitionis ac ruinae factum est; ibi etiam sepultus est in sepulcro Iosae patris sui (Iud. 6,11. 24; 8,27. 32; 9,5). Ut ex contextu apparet, sita erat Ephra in sorte cisiordanica seu occidentali tribus Manasse idque confirmatur Ios. 17,1. 2. De situ accuratius nonnisi coniecturae exstant. *L. Heidet* (apud *Vigouroux*, Dict. de la Bible II. 1870) situm quaerit in Wādī Fara'a haud procul a Tallūza in vicinia Sichem.

2. Ephra (עֶפְרָא, Ἐφραζά) 1 Reg. 13,17 eadem urbs esse censetur atque Ophera tribus Benjamin Ios. 18,23), Ephraim (2 Reg. 13,23), Ephron (2 Par. 13,19), Aphairema (1 Mach. 11,34 graece), Ephrem (Io. 11,54), nunc *el-Taigybe* prope *Beitūn* (Bethel) inter septemtrionem et orientem. Contextus 1 Reg. 13,17 omnino indicat viam Ephra, qua Philisthaei ex castris in Machmas positos palabantur, a Machmas septemtrionem versus quaerendam esse. Cf. *F. de Hummelauer* ad h. l. et *Guérin*, Judée III. 43-51.

EPHRAIM (אֶפְרַיִם, Ἐφραΐμ).

1. Ephraim filius natu minor Ioseph patriarchae ex Aseneth filia Putiphare in Aegypto genitus ante septem annos famis; eius frater primogenitus erat Manasse (Gen. 41,50; 46,20. 27). Nomen filii minoris pater vocavit Ephraim i. e. *fertilitas duplex* dicens: Crescere me fecit (הַפְרִי) Deus in terra paupertatis meae (Gen. 41,52). Primum indicium superioritatis, qua Ephraim posteriore tempore Manassen primogenitum antecedebat, habetur in benedictione, qua

Iacob aegrotans Ephraim et Manassen in filios sibi adoptat et invito Ioseph fratrem natu minorem maiori praeponit, videlicet commutatis manibus dexteram illi imponens, qui a sinistra adstabat, sinistram illi qui a dextera adstabat (Gen. 48,1-20). Ante mortem Ioseph patriarchae familia Ephraim iam usque ad tertiam generationem propagata erat (Gen. 50,22 [23]). Ex vita Ephraim id unum traditur, quod filios suos, qui in campestria descenderant ad capienda pecora, a viris Geth occisis multis diebus luxit; unde ad uxorem ingressus filium ex ea susceptum vocavit Beria, eo quod in malis (בְּרִיָּה) domus suae ortus

esset (1 Par. 7,21-23); sed notatu dignum est inter posteros huius Beria eminere Ephraimitam celeberrimum Iosue filium Nun (1 Par. 7,27). Praeterea ex toto contextu 1 Par. 7,21-23 eruunt recentiores multo tempore ante Exodum Moysis coloniam Hebraeorum in Palaestina fuisse; cf. *De Moor* in *Revue biblique* I. 1892 p. 407. 408; *Science catholique* 1894 p. 713. Sed faciliorem eiusdem narrationis explicationem praebet *F. de Hummelauer*, Comment. in Numeros p. 182: « Quo tempore Ioseph a Pharaone summo honore habebatur... bene potuit Pharaon Ephraim filium Iosephi constituere cuiusdam in Iudaea urbis praefectum ducemque expeditionis praedatoriae in Gethaeo suscipiendae, cum exercitu non necessario e solis Hebraeis collecto..... Haec hypothesis plenam rationem reddit verbi *descenderunt* neque opus est alia effingere de Hebraeis palaestinsibus praemosaicis ». Genealogia Ephraim traditur Num. 26, 33-37; 1 Par. 7,20-28.

2. Ephraim tribus Israel. Termini Ephraim Ios. 16,4-8 describuntur. Ac primum quidem 16,4-4 describitur terminus australis territorii Ioseph (Ephraim et Manasse) a Iordane et aquis Iericho per Bethel, Luzam, Bethhoron inferiorem et Gazer usque ad mare. Deinde 16, 5-8 secundum *F. de Hummelauer* (ad Ios. 16,1 ss.) habetur descriptio mutila finium Ephraim, in qua desideratur terminus orientalis et prior pars termini australis, describitur autem altera pars termini

australis usque ad mare et terminus aquilonaris, qui a puncto fere medio, Taphua prope Sichem, oblique deducitur primum ad Iordanem, postea ad mare. Idem interpres Ios. 16,9 cernit urbium Ephraim elenchum multum vel potius solam inscriptionem elenchi, qui e textu exciderit; in qua inscriptione affirmantur urbes Ephraim detractae esse ex possessione Manasse, quia scilicet pridem totius domus Ioseph, cuius primatum obtinebat Manasse primogenitus, una fuerat possessio, a qua postmodum urbes Ephraim propriae separatae sunt. Accedit enumeratio possessionum Ephraim (1 Par. 7,28 et descriptio confinium Ephraim et Manasse Ios. 17,7-10. Orientem territorii Ephraim terminat Iordanis fluvius, meridiem tribus Benjamin et Dan, occidentem extremitas Dan, brevis tractus orae maritimae et extremitas Manasse, septentrionem Manasse. Flavius Iosephus (Ant. V. 1,22) tribum Ephraim porrectam esse dicit a Iordane fluvio usque ad Gazaram (ἄχρι Γαζάρων ed. Niese) et a Bethel usque ad campum magnum; quodsi Iosephus campum magnum, ut alias, intellegit planitiem Esdrelon, terminum septentrionalem non recte indicavit; eo usque enim Manasse, non Ephraim extendebatur.

Tribum Ephraim quoad maximam partem montana implent. Unde valles torrentibus rivulisque irrigatae abundant; imprimis fertilissimae sunt valles, quae occidentem versus in planitiem Saron descendunt. Fertilitati terrae addebatur securitas ab hostium incursionibus maxima, cum ex nulla parte aditus facilis in montana Ephraim pateret. Ceterum vide infra (n. 3. Ephraim mons).

In historia Israelitarum tribus Ephraim maiores partes egit et non nisi a tribu Iuda potestate et auctoritate superatur. Princeps tribus anno secundo egressionis ex Aegypto erat Elisama filius Ammiud (Num. 1,10). Apud montem Sinai de Ephraim numerabantur 40500 viri bellatores (Num. 1,32. 33), postea in caespitibus Moab 32500 tantum (26, 37), quo numero soli Simeonitae inferiores erant. In castris Ephraim cum Manasse et Benjamin ad occidentalem

plagam tabernaculi erat (2,18-24); eadem tribus in ordine itineris tertio loco proficiscebantur (10,22-24; cf. Ps. 79 [80], 3). Oblationes Elisama principis Ephraim in dedicationem altaris die septimo factae sunt ante oblationes filiorum Manasse, quibus dies octavus obligit (7,48-53). Inter duodecim exploratores a Moyse in terram Chanaan missos eminet decus et ornamentum tribus Ephraim, Osce filius Nun, a Moyse appellatus Iosue (13,9. 17; 14,6). Inter viros ad terram promissam sorte dividendam electos praeter Iosue erat Cammel filius Sephtan de tribu Ephraim (34,17. 24). Post ingressum in terram promissam Ioseph (Ephraim et Manasse) cum Simeon, Levi, Iuda, Issachar, Benjamin benedictionem in monte Garizim pronuntiarunt (Ios. 8,33. 34), ut Moyses mandaverat (Deut. 27,12). Hereditatem cisiordanicam primae ingressae sunt tribus Iuda et Ioseph (Ephraim et Manasse), post illas septem reliquae (Ios. c. 13; 16; 17; 18). Levitis de stirpe Caath in Ephraim concessae sunt Sichem urbs confugii, Gazer (Gazara), Iecmaam (seu Cibsaim), Bethoron (Ios. 20, 7; 21,5. 21; 1 Par. 6,66. 67 hebr. 6, 51. 52).

Hucusque Ephraim et Manasse frequenter coniunctim nominantur et communi nomine Ioseph reliquis tribubus opponuntur (Gen. 49,22; Deut. 33,13; Ios. 17,14-18; 18,5; Iud. 1,22) ac domui Ioseph etiam ceterae generationes filiorum Ioseph accensentur (Gen. 48,6); immo etiam post distinctionem possessionum (Ios. 21,3) filii Ephraim cum filiis Manasse mixtim habitabant; habebant enim urbes in medio possessionis Manasse (Ios. 16,9) et in continuis urbes Taphua Ephraimitis adscribebatur, etsi terra Taphua Manassitarum erat (Ios. 17, 8 cf. text. hebr.). Attamen brevi postea Ephraim principales partes agere coepit. Erant enim in eius territorio Sichem, ubi Ioseph patriarcha sepultus est (Ios. 24,32) et omnis Israel congregari consuevit (Ios. 24,1; 3 Reg. 12,1). Silo sedes arcae foederis et centrum religiosum Israel usque ad mortem Heli (Ios. 21,2; Iud. 18,31; 1 Reg. 1,3; 3,21; 4,3; Ier. 7,12; Ps. 77,60), praeterea

Thamnathsare urbs Iosue (Ios. 19,49) et Gabaath Phinees urbs Eleazari filii Aaron, in qua et sepultus est (Ios. 24, 33). Multitudo populi tanta videtur fuisse, ut aliqui extra terminos Ephraim peregrini sedes quaererent (Iud. 19,16). Accedit quod Ephraimitae cum tribubus fortissimis Manasse et Benjamin intine coniuncti erant; cf. supra et 2 Reg. 19, 20 ubi omnes tres nomine communi domus Ioseph comprehenduntur.

Statim ab initio Ephraimitis magna certamina subeunda erant cum Chanaanoe (Ios. 17,14-18); sed cum populus multus et magnae fortitudinis essent, adeo praevaluerunt, ut Chanaanacus in sola urbe Gazer seu in extremis finibus Ephraim tributarius habitaverit (Ios. 16, 10; Iud. 1,29; 3 Reg. 9,16). Egregiae fortitudinis ac roboris documenta Ephraimitae ediderunt tempore iudicium Aod (Iud. 3,27), Debboae (4,5; 5,14 cf. *F. de Hummelauer* in h. l.), Gedeonis (7, 24; Tholac (10,1). Praerogativam auctoritatis suae tanta aemulatione tuebantur, ut contra Gedeonem tumerent, quod in bello medianitico se contemptos putarent (Iud. 8,1-3); a Gedeone quidem blandis verbis demulsi sunt, sed eo mortuo totam fere eius domum exterminarunt (Iud. 9,1-3). Simili aemulatione adversus Iephthe conquesti sunt se ad bellum contra Ammonitas non fuisse vocatos et cum illius verbis pacificis probra obicerent, insigni clade a Iephthe affecti sunt (Iud. 12,1-6).

Ephraim inter tribus Israel principatum tenebat tempore Samuelis, qui, etsi origine levita, tamen civili attributione erat Ephraimita (1 Reg. 1,1). Saul quoque ex ea tribu erat, quae cum domo Ioseph intine coniuncta erat. Unde facile intellegitur, cur Saule mortuo Ephraim cum reliquis tribubus Isboseth filium Saulis regem agnovit contra David et domum Iuda (2 Reg. 2,9. 10). Occiso Isboseth inter quinquennium subsequens omnes reliquae tribus paulatim ad partes Davidis transierunt (2 Reg. 2,8-3,5) et cum David Hebrone rex ab universis tribubus agnosceretur, de filiis Ephraim aderant 20 800 viri fortissimi robore (1 Par. 12,30). In aula regia duo Ephraimitae inter principes duode-

cim erant, qui singulis mensibus 24 milibus singuli praerant (1 Par. 27,10. 14); eo tempore princeps tribus Ephraim erat Osee filius Ozazi (1 Par. 27,20). Verum antiquae querelae virorum Israel contra viros Iuda revixerunt occasione triumphalis reditus Davidis in Ierusalem (2 Reg. 19,41-43). Salomone regnante Ieroboam Ephraimita rebellio-nem movebat et idem post mortem Salomonis ex Aegypto, quo aufugerat, redux a domo Iuda defecit ac regnum septemtrionale decem tribuum constituit (3 Reg. 11,26-12,20). Abhinc historia Ephraim est historia regni Israel; atque tanta erat auctoritas Ephraim in regno Israel, ut nomina Ephraim et Israel apud prophetas frequenter converterentur (Is. 7,2 s.; 11,13; Ier. 31,20; Ez. 37,16. 19; Os. 4,17; 5,3 s.; 6,4; 12,1 et passim).

Neque tamen desunt indicia unionem theocraticam cum Iuda saepius ab Ephraimitis saltem nonnullis renovatam esse. Asa in Iuda regnante etiam de Ephraim sicut de Manasse advenae in Ierusalem venerunt ad foedus theocraticum renovandum (2 Par. 15,9). Ezechias rex ad Phase in Ierusalem celebrandum etiam Ephraim et Manassen invitavit (2 Par. 30,1 s.) et apud illos quoque idola demolitus est (31,1). Post interitum regni Israel idola in urbibus Ephraim subvertit Iosias rex (2 Par. 34, 6) eique reliquiae de Ephraim sicut de aliis tribubus pecunias ad templum instaurandum subministrarunt (34,9).

In vaticinio Iacobaeo ad Ephraim potissimum referenda est benedictio illa longior et facundior in Ioseph pronuntiata, cuius progenies in duas tribus Ephraim et Manasse effloruit (Gen. 49, 22-26); triplex benedictio Ioseph conceditur: numerosae prolis, victoriae de hostibus, affluentiae bonorum; et eius principatus inter fratres explicite commemoratur, attamen non promittuntur Iosephi florentes permansurae res usque ad Messiae adventum (cf. *F. de Hummelauer* ad h. l.). Eadem efferuntur in benedictione Moysis (Deut. 33,13-17), quae apte concluditur verbis: « hae sunt multitudines (myriades) Ephraim et haec millia (chiliades) Manasse ».

3. Ephraim mons (Ios. 17,15; 20,7; 24,30. 33; Iud. 2,9; 3,27; 4,5; 7,24 etc.) est nomen regionis montanae, quae a planitie Esdrelon usque ad montana Ierusalem porrigitur. Etiam vocatur mons Israel (Ios. 11,16. 21). Opponitur monti Iuda (Ios. 11,21; 20,7). Limes inter montem Ephraim et montem Iuda certo assignari nequit; hoc tamen constat tribum Benjamin saltem quoad maiorem partem monti Ephraim accensendam esse; nam regio inter Rama et Bethel erat in monte Ephraim (Iud. 4,5), Seba Beniaminita erat de monte Ephraim (2 Reg. 20,1. 21). Unde limes assignari poterit mons *Nebi Samuil* (893 m) aquilonem versus a Ierusalem situs. Mons Ephraim 3 Reg. 4,8 dicitur praefectura salomonica a Benhur administrata; quo loco intelleguntur sola montana tribus Ephraim tribu Benjamin exclusa, quippe quae propriam praefecturam (cf. 4,18) constituebat. In monte Ephraim speciatim recensentur mons Selmon prope Sichem (Iud. 9,48), montes Hebal et Garizim (vide s. v. GARIZIM), ille a septentrione, hic a meridie vallis Sichem. mons Gaas, a cuius septentrionali parte erat Thamnathasare urbs Iosue (Ios. 24, 30; Iud. 2,9), mons Amalec (Iud. 12,15), ubi Abdon iudex sepultus est in Pharaithon (*Far'ata*) urbe haud procul Sichimis Ioppen versus sita, mons Semeron, apud quem Ieroboam I. ab Abia rege Iuda devictus est (2 Par. 13,4). Montes altissimi sunt Garizim (868 m), Hebal (938 m), *Tell 'Ašūr* 1011 m. Fertilitas montis Ephraim effertur Ier. 50,19 et regionis circa Samariam Is. 28,1 s. Ipsa montana olivetis et ficetis consita sunt, valles torrentibus rivulisque irrigatae vinetis abundant et campos frumentarios efformant; occidentem versus ubi montana paulatim in planitiem Saron descendunt, pinguedo soli augescit; orientem versus, ubi montana praerupte in depressionem Iordanis descendunt, valles sunt breviores et steriles. Cf. *Stanley*, Sinai and Palestine p. 229. 234. 235. Hanc opulentiam atque abundantiam domui Ioseph praedixerat Iacob in benedictione sua Gen. 49,22 : « Filius accrescens Ioseph, filius accrescens et decorus aspectu, discer-

verunt super murum » etc. (cf. *F. de Hummelauer* in h. l.) et Moyses Deut. 33,13-17.

4. Ephraim saltus (2 Reg. 18,6). Absalom in terra Galaad castra posuerat (2 Reg. 17,26), David in Mahanaim (17,24. 27 hebr.); exercitus Davidis ab urbe egressus est in campum et factum est proelium in saltu Ephraim (18,6). Ergo saltus Ephraim non eis Iordanem quaerendus est (cum *Keil* in h. l. et *Winer*), sed trans Iordanem, ubi rex adhuc versabatur (cf. 19,15). Nominem Ephraim hunc saltum designari aliqui putant, quod reapse aliquo modo ad tribum Ephraim pertinuerit (*Valabius* ad h. l.), alii quod ibi Ephraimitae a Iephte insignem cladem (Iud. 12,4) acceperint (*Tirinus* ad h. l.), alii quod hic saltus e regione oppositus sit termino septemtrionali montis seu tribus Ephraim (*Mühlau*), alii quod in hoc ipso proelio Ephraimitae principalior pars exercitus Absalomis fuerint et clade sua originem novo nomini dederint (*Grove-Wilson*), alii aliter v. g. a vicinitate urbis Ephron (v. EPHRON 4) vel a colonia quadam Ephraimitarum in Galaad (*A. Henderson*).

Cf. *Winer*, *Bibl. Realwb.* ed. 3 I 334. II. 675; *Mühlau* apud *Richm-Baethgen*, *Handwb.* des bibl. Altert. I. 405; *Grove-Wilson* apud *Smith-Fuller*, *Dict. of the Bible* I. 976; *A. Henderson* apud *Hastings*, *Dict. of the Bible* I. 728 provocans ad Iud. 12,4.

5. Ephraim urbs (2 Reg. 13,23) v. APHAIREMA et BAALHASOR.

6. Porta Ephraim (4 Reg. 14,13; 2 Par. 25,23; Neh. 8,16; 12,39) est una ex portis urbis Ierusalem, sine dubio septentrionem spectans, ut ex nomine concludere licet, fortasse eadem ac hodierna porta Damasci; cf. IERUSALEM V. 2.

EPHRATHA seu **EPHRATA** (אֶפְרַתָּה et אֶפְרַת; Ἐφφαθὰ et Ἐφφαθὰ), secunda uxor Caleb (v. GALEB 2) filii Hesron, mater Ilur (1 Par. 2,19. 24. 50; 4, 4). Ilur autem dicitur pater Bethlehem 1 Par. 4,4; inde videtur explicari, cur incolae Bethlehem Ephrathaei appellentur (cf. Ruth 1,2; 4 Reg. 17,12) et ipsum oppidum Bethlehem eo designetur nomine (Gen. 35,16. 19; 48,7; Ruth 4,11; Mich. 5,2). Idem cognomen Ephrata

etiam alteri oppido esse attributum colligitur ex Ps. 131[132],6 : Ecce audivimus eam in Ephrata, invenimus eam in campis silvae (בְּשָׂדֵי יַעַר). Intellegi campos silvae Cariathiarim, in cuius loco excelso arca Domini et sanctuarium erat (cf. 1 Reg. 7,4), certum est. Iamvero Sobal filius Hur et nepos Ephratae dicitur pater Cariathiarim (1 Par. 2,30) eodem modo, quo Hur et eius filius Salma dicuntur patres Bethlechem (1 Par. 2,31; 4,4). Unde inferre licet sicut oppido Bethlechem, ita huic quoque urbi Cariathiarim cognomen esse additum Ephrata.

Sunt etiam interpretes, qui putent Gen. 35,16. 19 et 48,7 Ephratam intellegi debere de Cariathiarim et additamentum illud, quo Ephrata 45,19 et 48,7 de Bethlechem explicatur, esse glossam ex textu delendam; arguunt enim ex 1 Reg. 10,2 sepulcrum Rachel non prope Bethlechem fuisse, sed prope Ramam tribus Beniamin in via quae a Bethel ducit Ephratam i. e. Cariathiarim; sed haec ratio non videtur esse efficax (vide s. v. RACHEL).

Ephrataeus interdum quoque idem est ac Ephraimita (Iud. 12,5; 1 Reg. 4,1; 3 Reg. 14,26).

EPHREE (הֶפְרַי, Ὀψαρεῖ), filius Psammetichi II. (394-389), rex Aegyptiorum (389-370 a. Chr.) ex dynastia vigesima sexta (saitica) oriundus, a Manethone vocatus Uaphris, in monumentis aegyptiacis Uachabra, apud Graecos (*Herod. Diodor.*) Apries. Eius nomen in S. Scriptura nonnisi Ier. 44,30 occurrit, plura tamen de eo aliis locis habentur. Cum Nabuchodonosor Palaestinam invaderet, Hophra (Ephree) rex Aegyptiorum magno cum exercitu contra Babylonios profectus est atque effecit, ut ab obsidione urbis Ierusalem pro aliquo tempore recederent; quare Sedecias ultimus rex Iuda iugi babilonici impatiens iam opinabatur adesse opportunitatem Chaldaeorum dominationem evertendi atque idcirco legatos misit ad Ieremiam, ut apud Dominum intercederet (Ier. 37,3. 4). Verum Aegyptii proelio, ut videtur, a Babyloniiis victi in terram suam redierunt; Ierusalem maiore impetu ab ho-

stibus obsessa et expugnata est (Ier. 37, 5 s.; cf. Ez. 17,15 s.; 29,1 s.; 30,20 s.). Proelii istius inter Aegyptios et Babylonios, de quo in succincta narratione S. Scripturae nihil legitur, mentionem facit Flav. Iosephus (Ant. X. 7,3). Ceterum etiam post illam calamitatem, qua regno Iuda destructo Aegyptiis maius periculum imminabat, Ephree rex Iudaeis amicus erat eorumque fugitivos recepit in partes septentrionales, immo etiam in interiores regiones Aegypti (Ier. 41,16-18; 43,1 s.). Quae cum contra mandatum Dei fierent, Ieremias Aegyptiis expugnationem per Nabuchodonosor et multiplicem ruinam annuntiare iubetur (Ier. 43,8 s.; cf. Ez. 29,17 s.). Non deerant qui contenderent haec oracula non fuisse impleta (*Duncker, Volney, Hitzig, Graf, Ebers*); tacent enim Herodotus et Diodorus de expugnatione et depraedatione Aegypti per Nabuchodonosor facta. At hodie ex monumentis aegyptiacis et babilonicis constat Nabuchodonosor anno 37. regni sui (circa annum 568 a. Chr.) expeditionem in Aegyptum suscepisse et usque ad Syenen progressum esse (cf. *Wiedemann, Brunengo, Knabenbauer*). Quare testimonia Berosi et Megasthenis apud Flav. Iosephum (cont. Ap. 4,19. 20) de expeditione aegyptiacae Nabuchodonosor plane fide digna sunt. Ex eo igitur quod Herodotus (2,161-163. 169) et Diodorus (4,68) testantur Apriem prospere regnasse et feliciter contra Sidonem, Tyrum, Cyprum dimicasse, argui nequit contra expeditionem aegyptiacam Nabuchodonosor.

De ultimis denique fatiis huius regis exstat oraculum Domini : Ecce ego tradam Pharaonem Ephree regem Aegypti in manu inimicorum eius et in manu quaerentium animam illius, sicut tradidi Sedeciam regem Iuda in manu Nabuchodonosor regis Babylonis inimici sui et quaerentis animam eius (Ier. 44, 30). Notandum est his verbis non praedici Pharaonem traditum iri regi Babylonis neque eum mortem vi illatam subiturum; poterat oraculum impleri ac Iudaeis signum et pignus exhiberi in insigni aliqua clade et calamitate. Iamvero secundum Herodotum (2,162 s.) et Diodorum (4,68) Apries postquam infe-

liciter contra Cyrenen apud vicum Irasa pugnavit, ab Amasi duce militari in vincula coniectus et throno spoliatus est, postea autem populo mortem eius importune postulante suffocatus. Verum haec narratio non satis concordat cum aliis testimoniis aegyptiacis, quibus probari videtur Amasin et Aprien simul in Aegypto regnasse. Unde verisimile est Aprien insigni clade a Cyrenensibus inflata coactum fuisse, ut Amasin in regni consortium assumeret. Per sex annos (370-364 a. Chr.) una videntur regnasse; ita enim discrimen annorum explicari potest, quo Herodotus ei annos regni 23, Africanus 19 assignat. Quo mortis genere Hophra (Ephree) interierit, in monumentis non proditur.

Cf. *Wiedemann*, Aegypt. Geschichte p. 636 ss.; *Brunengo*, L'impero di Babilonia e di Ninive II. p. 308-322; *Knabenbauer*, Comm. in Ier. p. 494, 495; *Vigouroux*, La Bible et les déc. mod. ed. 6 IV. p. 244-253, qui Aprien a. 572 vel 571 mortuum esse dicit.

EPHREM legitur Ps. 77[78],9 pro Ephraim: Filii Ephrem (עֲפְרַיִם, 'Eppāiṣ).

intendentes et mittentes arcum conversi sunt in die belli.

EPHREM (Εἰφράμ) urbs, ad quam Christus paulo ante passionem se recepit (Ioan. 11,54). Vide s. v. APHAIREMA et BAALHASOR.

EPHRON (עֶפְרוֹן, 'Epprōn). 1. Ephron Hethaens, filius Seor, qui Abrahae 400 siclis argenti vendidit agrum prope Mambre (Hebron) situm cum spelunca duplici, in qua Sara uxor Abrahae sepulta est (Gen. 23,8-17; 25,9; 49,29, 30; 50,13). Vide etiam HEMOR.

2. Ephron mons in confinibus tribuum Iuda et Benjamin inter fontem aquae Nephtoa (hodie 'Ain Liftā) et urbem Cariathiarim (hodie Qaryat el-'Enab) enumerator (Jos. 15,9). Haud dubie designantur iuga montium, quibus ab oriente adiacet Wādī Hanīnā (vallis terebinthi ex opinione traditionis antiquae), a meridie via Hierosolymis Ioppen ducens (cf. *Dillmann* in h. l.). Alia suppositio, quam *Conder* (Pal. Expl. Fund. Quart. Stat. 1879 p. 95-99) defendit, Nephtoa esse Etam ('Ain 'Atān)


et Cariathiarim esse *Khirbet 'Ermā* prope Beit 'Atāb, vix probabilis dici potest.

3. Ephron urbs (*Kethib* עֶפְרוֹן, *Qeri* עֶפְרָתָה), quam Abia rex Iuda Ieroboam regi Israel eripuit (2 Par. 13,19); v. APHAIREMA et BAALHASOR.

4. Ephron urbs transiordanica, quam Iudas Machabaeus ab Astarothcarnaim iter Bethsan versus faciens expugnavit ac delevit (1 Mach. 5,46-52; 2 Mach. 12, 27). Priore loco describitur « civitas magna in ingressu posita, munita valde et non erat declinare ab ea dextra vel sinistra, sed per mediam iter erat ». Apud Flaviū Iosephum (Ant. XII. 8,5) dicitur in via ita posita, ut in alterutram partem declinandi potestas non fuerit. Videtur itaque in angusta quadam valle fuisse. Fortasse eadem est ac Gephirus apud *Polyb.* V. 70,12. Situs ignoratur. A nonnullis censetur esse *Kefrendje* iuxta Wādī 'Adjlān (*Riess*, Bibel-Atlas), ab aliis magis septentrionem versus quaeritur (cf. *Legendre* apud *Vigouroux*, Dict. de la Bible II. 1892).

EPICURAEI (Ἐπικουρεῖοι), philosophi qui doctrinis ab Epicuro (qui natus erat 341 a. Chr.) et discipulis eius traditis addicti sunt. Cum apostolus Paulus Athenis commoraretur, aliqui ex his philosophis cum eo disserebant Act. 17, 18. Epicuræi contendebant animam simul cum corpore mori, summum hominis bonum esse voluptatem, quam Epicurus quidem teste Seneca (ep. 85,18) ex virtute natam esse voluit, sed quam plerique alii delectationibus corporis contineri et haberi malebant; nam ut idem advertit: non dico, quod plerique nostrorum, sectam Epicuri flagitiorum magistratam esse, sed illud dico: male audit, infamis est (Vit. beat. 13,1). Cum Epicuræi immortalitatem animi negarent, inter eos qui audientes resurrectionem mortuorum irridebant certe quam maxime isti erant. Ceterum de ea secta vide *Zeller*, Philosophie der Griechen III. 1 p. 363 ss.; praesertim p. 420, 446 (edit. 3); *M. Guyau*, La morale d'Epicure, Paris 1886.

EPIMENIDES, poeta cretensis, cu-



ius verba allegat S. Paulus Tit. 1,12; cf. s. v. CRETA.

EPISCOPUS (ἐπίσκοπος). Ea voce red-
ditur Neh. 11,22 פקיד quae vox alias in

Vulgata vertitur praepositus, praefectus
cf. Gen. 41,34 et 4 Reg. 23,19 et apud LXX
τοπάρχης, ἐπιστάτης. Munus vero vel offi-
cium eiusmodi magistratus vel praepositi
dicitur פקיד quod vocabulum vertitur

episcopatus Ps. 108,8, unde verba de-
sumpta sunt Act. 1,20 : et episcopatum
eius accipiat alter i. e. officium eius et
munus accipiat alter, in locum ac mu-
nus quo ipse excidit alter eligatur. In
Novo autem Testamento dicitur ipse
Christus, Dominus et pastor bonus, epi-
scopus animarum nostrarum 1 Petr. 2,
25 qui scil. nobis praepositus est nostri-
que curam gerit. Porro dicuntur epi-
scopi qui ab apostolis constituti sunt
praesides coetuum fidelium. Eos autem
constitui ab apostolis mandato divino,
impositione manuum qua gratia Spiritus
sancti conferatur iisque veram compe-
tere potestatem regendi, indubie sacris
litteris declaratur; ita enim eos
alloquitur Paulus : attendite vobis et
universo gregi, in quo vos Spiritus san-
ctus posuit episcopos regere Ecclesiam
Dei (ποιμαίνειν, pascere, praeesse tam-
quam pastores, quae vox de imperio re-
gis quoque usurpatur; cf. hebr. 2 Sam.
3,2; 7,7; Ps. 78,71 etc.); id munus au-
tem conferri impositione manuum con-
sequitur ex eo quod Paulus monet Timo-
theum, ne neglegat gratiam (charisma)
quae ipsi data sit impositione manuum
presbyterii; quo munere quae officia et
iura contineantur quaeque in episcopis
exigantur, in epistulis quas pastorales
vocant satis describitur; cf. Act. 20,28;
1 Tim. 4,14; 2 Tim. 1,6; 1. Tim. 1,3; 3,
1-7; 4,11; 3,1 ss.; Tit. 1,5-14. Ipsos au-
tem episcopos debere si opus est alios
constituere episcopos vel presbyteros
(nam utriusque nominis eadem est no-
tio in sacris literis novi foederis) de-
monstratur rebus gestis et monitis apo-
stoli; cf. Act. 14,22; Tit. 1,5 : reliqui te
Cretae ut ea quae desunt corrigas et
constituas per civitates presbyteros si-
cut et ego disposui tibi. Atque eiusmodi
praesides cum vera regendi potestate

esse constitutos ex variis locis epistula-
rum elucet; cf. 1 Thess. 3,12; Hebr. 13,
17; 1 Petr. 3,1-4.

I. KNABENBAUER.

EPISTULA. Commercii per epistu-
las facti vel nuntii aut mandati per epi-
stulas missi rara est mentio tempore an-
tiquiore. David scribit epistolam ad Ioab
ducem exercitus eamque mittit per
Uriam mandans in epistula, ut Urias
percussus intereat (2 Reg. 11,14). Ioab
autem non per epistolam sed per nun-
tium Davidi indicat se iussa fecisse.
Quod David imperavit, secreto opus ha-
bebat. Iezabel scripsit litteras ex no-
mine Achab et signavit eas annulo eius
et misit ad maiores natu et optimates,
quibus indicavit qua ratione Naboth ca-
pitis damnandus sit 3 Reg. 21,8-10. Iehu
litteras bis dedit ad optimates Samariae
4 Reg. 10,1. 6. Prophetas quoque per
litteras munere suo esse functos, unum
saltem exemplum refertur : Elias (Eli-
seus?) per epistolam reprehendit Ioram
regem impium eique poenas a Domino
infligendas annuntiat 2 Par. 21,12-15.
Ezechias rex scribit epistulas ad Ephraim
et Manassen, ut venirent ad domum Do-
mini in Ierusalem et facerent phase; et
insuper perrexerunt cursores cum epi-
stulis a rege et principibus (cf. hebr. et
graece) in universum Israel et Iudam, in-
vitantes omnes ut redirent ad Dominum
2 Par. 30,1. 6-9. Cum Sedecias rex lega-
tos mitteret ad Nabuchodonosor, per
eosdem Ieremias misit epistolam ad ex-
sules Ier. 29,1 s. Etiam externos reges
misisse epistulas refertur; ita Hiram re-
gem Tyri ad Salomonem 2 Par. 2,11;
regem Syriae ad regem Israel, qua indi-
cat a se mitti Naaman ut a lepra curetur
4 Reg. 5,3; Sennacherib regem Assyrio-
rum ad Ezechiam 4 Reg. 19,14; Is. 37,
14; ad eundem quoque Merodach Bala-
dan 4 Reg. 20,12; Is. 39,1.

Frequentior usus litterarum reperitur
tempore posteriore. Reptito in libro
Esther epistularum est mentio quae mit-
tuntur ad gentes varias scriptae prout
quaeque gens legere poterat et annulo
regio signatae et earum quoque exem-
plaria perscribuntur 1,22; 3,12; 8,5 s.;
9,20. 29; 13,1-7; 16,1-24. Item in libris

Esdrae et Nehemiae Esdr. 4,7. 11 s.; 5, 6; 7,11. Neh. 2,7; 6,3. 17. 19. Etiam frequentius epistolae commemorantur in libris Mach. Occasione data propter utilitatem et institutionem fidelium apostoli quoque scribebant epistulas et ad ecclesias et ad singulos quoque. Ut epistula Pauli a ficta et supposita possit discerni, Thessalonicensibus sua manu scribit in line salutationem : salutatio, mea manu Pauli, quod est signum in omni epistula, ita scribo (2 Thess. 3,17; cf. Gal. 6,11); apostolum dictasse epistulas etiam patet Rom. 16,22 : saluto vos ego Tertius qui scripsi epistolam. Primo iam tempore inter Christianos epistulas commendatitias in usu fuisse, quibus inter se cognoscebantur et familiariter suscipiebantur, pariter discimus 2 Cor. 3,1.

Dum in epistulis temporis antiquioris solum paucis verbis argumentum indicatur, epistolae temporis posterioris multo magis accedunt ad formam epistularem quae inscriptione et salutatione continetur; v. g. Dario regi pax omnis (Esdr. 5,7); Rex maximus Artaxerxes... principibus et ducibus salutem (Esth. 13,1); Rex Antiochus senatui Iudaeorum et ceteris Iudaeis salutem (1 Mach. 11,27). Quam formam apostoli modo ad rem christianam maxime accommodato extulerunt : Paulus... Ecclesiae Dei... gratia vobis et pax a Deo Patre nostro et Domino Iesu Christo.

I. KNABENBAUER.

EPISTYLIA. Ita in Vulgata vertitur 3 Reg. 7,6 hebr. כָּז, quam vocem LXX ἀράξ, Targum et recentiores limen explicant. Pariter in Vulgata 2 Par. 4,12. 13 redditur גִּלְיֹת, LXX retinent γῶλῶθ, recentiores explicant de superiore parte columnae, quae in modum sphaerae, globuli formata sit, vel, ut aliis placet, in modum nodorum.

EPULARI ponitur in Vulgata haud raro, ubi in hebr. dicitur שָׂחָה laetari, gaudere; ita Deut. 12,12; 14,26; 16,11. 14; 26,11; 27,7 etc. epulari coram Domino i. e. laetari, cum laetitia diem agere festum coram sanctuario Domini; ponitur pariter pro כָּחַח Ps. 41,3 (hebr.

12,5) sonus epulantis i. e. tripudium celebrantis diem festum. Ponitur quoque eadem ratione pro ἐορτάζειν 1 Cor. 5,5; sed frequentius pro εὐχαρίσθαι; cf. Eccli. 39,37 (gr. 31); Luc. 12,19; 13,23. 24. 29. 32; 16,19; etiam pro ἐπεσχεύατε Iac. 5,5 epulati estis, uti Sap. 19,11 τρυφή, epulatio.

EQUUS. 1. *Nomen.* Equus hebraice communiter סוס (aram. סוסי, assyr. sīsū) appellatur; nominis etymologiam aliqui, invitis philologis, a regione Sussiana eorumque patriae vicina, derivant, alii ignotum supponere malunt. Altero nomine פָּרֶשֶׁת, Arabibus atque Aethiopibus cum Hebraeis communi, in S. Scriptura plerumque eques, sed etiam equus designatur (1 Reg. 8,11; 3 Reg. 5,6; Is. 21,7. 9; 28,28 Vulgata : ungula; Ioc. 2,4 etc.); eius etiam vocis etymon a Persia ductum a philologis reicitur, alia vocis explicatione indubia non proposita. Nomen minus consuetum equi est רֶכֶשֶׁת, quod in Vulgata 3 Reg. 4,28 (hebr. 5,8) *iumentum* (Mich. 1,13 *stupor*) explicatur; etiam רֶכֶשֶׁת, quod plerumque currum designat, aliquibus locis videtur potius equum significare (2 Reg. 8,4 Vulgata *iugalis*; 10,18 Vulgata *currus*; 1 Par. 18,4 Vulgata : *quadrigne*). — In antiqua lingua sumerica equus proprium nomen non videtur habuisse, cum asinus montium orientalium appelletur.

Cf. *Fr. Hommel*, *Namen d. Säugethiere* 44-46. 49. 53 s.; *id.* *Die Semiten* 1,402; *Th. Nöldeke* in *Ztschr. d. D. Morg. Ges.* XI. 1886,719. 739; *O. Schrader* ap. *V. Hehn*, *Kulturpfl. u. Hausth.* ed. 6, 53 etc.

2. *Textus S. Scripturae.* Apud Israelitas equus in S. Scriptura usque ad tempora Davidis non memoratur. Prima eorum mentio tanquam de futura regum possessione in lege Deuteronomii occurrit, ubi respectu habito ad reges aegyptios prohibetur, ne rex constitutus multiplicet sibi equos (Deut. 17,16). Apud Aegyptios vero multo antea equorum mentio fit (Gen. 47,17; 50,9; Ex. 9,3 etc.), quibus praesertim ad bellum utebantur (Ex. 14,9. 23; 15,1. 21 etc.). Conformiter etiam ex monumentis anti-

quis apparet Aegyptios saltem inde a dynastia decima septima et sequentibus multos ac pulcherrimos equos habuisse, quamquam tempore anteriore iisdem videntur caruisse.

Populi vero chanaanici, quibuscum Israelitae diu dimicabant, equis instructi erant, quibus praesertim ad trahendos currus bellicos utebantur (Deut. 20,1; Ios. 11,4 ss.; Iud. 4,3 ss.; 5,22 etc.); sed illi Israel ne equos proelio captos quidem sibi servabant, verum iussu Domini curribus igne combustis equos subnervatos ad cursum inutilis reddebant (Ios. 11,6. 9). Etiam Syri (2 Reg. 8,4; 3 Reg. 20,1. 20 ss.; 4 Reg. 6,14 ss. etc.) atque Babylonii et Assyrii (Is. 5,28; Ier. 6,23; 8,16; Ez. 26,7; IIab. 1,8 etc.), Macedones (1 Mach. 3,39; 6,33 etc.) aliique populi israelitici hostes, exceptis gentibus Arabiae septemtrionalis ac vicinorum desertorum (cf. Num. 31,32 ss.; Iud. 6,5; 1 Reg. 27,9; 1 Par. 5,24 etc.) semper praeter pedites etiam magnum numerum ex curribus et equis pugnantium ad bellum leguntur attulisse.

Israelitae autem sub regno Davidis equos alere coeperunt (2 Reg. 8,4; 13,1), sed etiam tunc haud admodum magno numero, cum inter « principes substantiae regis David » praepositus super boves, camelos, asinos, oves, non vero super equos recenseatur (1 Par. 27,29-31). Sub Salomone vero eiusque successoribus tum reges, tum privati plurimos sibi equos comparabant (3 Reg. 4,26 ss.; 10,25 ss.; 18,3; Is. 2,8; 30,16 etc.), eisque maxime ad usus bellicos, sed etiam ad trahendos currus (4 Reg. 9,21. 33) utebantur. In colendo autem agro bos primum locum servabat et rarius tantum equi opera videtur etiam in his laboribus pacis adhibita esse (cf. Is. 28,28). Unde etiam rex pacis non equo, sed pacifica asina vectus civitatem suam ingredi voluit (Zach. 9,9). In celeberrima quoque equi descriptione in libro Iob (39,19-25) potius usus bellicus equi respicitur (cf. *Homer.* II. 6, 506-514; *Vergil.* Georg. 3,83 ss.).

Praestantissimi vero equi ex Aegypto adducebantur (3 Reg. 10,28 s.; 2 Par. 1,16 s.; Is. 31,1; 36,9; Ez. 17,15), ubi equus tempore Salomonis centum quin-

quaginta siclis et quadriga sexcentis siclis constabat (3 Reg. 10,29; 2 Par. 1,17); fortasse tamen regio, unde Salomon equos accipiebat, potius terra *Musri* in Syria septemtrionali prope Ciliciam intellegenda est, cuius nomine postea *Misraim* i. e. Aegyptus substituebatur (cf. AEGYPTUS). Maxime etiam equi Armeni celebres erant et de « domo Thogorma » Tyrum usque afferebantur (Ez. 27,14; cf. *Strabo* XI. 13, 7; 14,9; *ed. Cas.* 525. 529). Arabici autem equi, nostra aetate celeberrimi, neque in S. Scriptura neque in scriptoribus antiquis profanis memorantur (*Hehn* o. c. 28 s.), probabiliter quia soli fere Arabes regionum septemtrionalium et maritimarum antiquis noti erant (*Hommel*, *Namen d. Säugeth.* 46-8).

Praeter usum bellicum S. Scriptura de equis non ita multa refert. Commemorantur ungulae firmissimae equi, praesertim antiquitus maxime necessariae, cum nondum ferro protegerentur (Is. 5,28), flagellum quoque et frenum ad impellendum et regendum animal (Prov. 26,3; Iac. 3,3). Variarum quidem colorum equi memorantur, sed praecipue candidi aestimabantur (Apoc. 6,2; 19,11. 14 etc.), quibus etiam duces ac principes uti solebant (*Herod.* 9,62; *Verg.* Aen. 3,537 etc.). Ab impiis regibus equi iuxta morem paganum Medorum etiam in sacrificium Soli consecrati leguntur (4 Reg. 23,11); qui mos Israelitis eo magis invisus esse debuit, quia equus, utpote animal salacissimum (Ez. 23,20), ad animalia immunda pertinebat.

3. Auctores profani. Quae ex auctoribus profanis atque ex variis historiae monumentis tum apud Babylonios et Assyrios, tum apud Aegyptios aliosque populos habentur, ea quae in S. Scriptura de equis referuntur, omnino confirmant. Communiter admittitur, equum (*Equus caballus* Linné) a specie quadam silvestri in Asia centrali originem ducere atque inde paulatim ad Babylonios et Assyrios, ad Syros et Palaestinos vicinosque populos atque ad Aegyptios esse propagatum, ac praecipue apud omnes populos antiquos ad usus bellicos esse adhibitum. Quae pluribus hic exponere non vacat.

Cf. *Sam. Bochart*, Hieroz. I. 96-181, *ed. Rosenm.* I. 31-147; *J. D. Michaelis*, Etwas von d. ält. Gesch. d. Pferde u. d. Pferdezucht in Palaest., in Append. ad Mosaisches Recht *ed.* 2, vol. III; *E. F. K. Rosenmüller*, Bibl. Alterth. IV. 2, 26-41; *H. O. Lenz*, Zool. d. ält. Griech. u. Röm. 199-208; *L. Lewysohn*, Zool. d. Talm. 136-9; *H. B. Tristram*, Nat. Hist. of the Bible *ed.* 8, 102-7; *id.* Fauna and Flora of Pal. 2; *J. G. Wood*, Bible Animals 248-63; *Fr. Hommel*, Namen d. Säugeth. 44-112. 356 s. 384; *P. Cultrera*, Fauna bibl. 59-65; *Lewnis-Ludwig*, Synopsis I. 1, *ed.* 3, p. 269-71; *A. E. Brehm*, Tierleben *ed.* 3, III. 38-59; *Ph. L. Martin*, Naturgesch. d. Thiere I. 1, 427-44; *P. Schegg*, Bibl. Arch. 92-5; *A. Otto*, Zur Gesch. d. ält. Haustiere, Breslau 1889, 73-7; *A. Zeller*, Das Pferd, d. Esel u. d. Hund in d. h. Schrift, Plauen 1890; *V. Hehn* op. c. 19-51. 527-9; *O. Schrader* ib. 51-5; *L. Anderlind* in Ztschr. d. D. Pal.-Ver. XVIII. 1895, 1-33; *A. Socin* ib. 183-8; *G. Loreta*, La zoologia nella Bibbia 191-4. — De equis ap. Assyrios et Aegyptios cf. *R. Lepsius*, Denkmäler 3, 10. 92. 93; *F. Chabas*, Etudes sur l'antiquité historique, Paris 1873, 421-57; *W. Houghton* in Trans. Soc. Bibl. Arch. V. 1877, 50-2; *G. Rawlinson*, Five great Monarchies *ed.* 4, 1, 232 s.; *Wilkinson-Birch*, Manners and Customs I. pl. II. B; I. 190-3; III. 299; *A. Erman*, Aegypten 649-52; *J. Duemichen* ap. *Brehm* I. c. 39 s.

L. FONCK.

ERASTUS (Ἐραστός). 1. Discipulus quem S. Paulus simul cum Timotheo ex Epheso misit in Macedoniam (Act. 19, 22). De eodem videtur esse sermo 2 Tim. 4, 20: Erastus remansit Corinthi.

2. Discipulus qui Rom. 16, 23 salutem Christilideles Romae degentes Erat arcarius seu quaestor ditissimae civitatis Corinthi, qui tributa et pecunias publicas administrabat. Quare adnumerandus est illis non nullis nobilibus (1 Cor. 1, 26) qui Christo nomen dederunt. Sunt qui putent de uno eodemque Erasto agi tribus locis citatis, Erastum scilicet, qui olim erat arcarius, officio suo renuntiasset et se Paulo comitem adiunxisse atque Rom. 16, 23 nominari solum ex munere antea gesto. Verum ex modo loquendi id non videtur probabile; etenim cum Rom. 16, 23 dignitatis mentio fiat, non autem aliis locis, satis clare indicatur de altero esse sermonem. Ceterum nomen Erasti frequentissimum erat.

ERCHUAEI (ערךאיי, Ἀρχαῖοι) nominantur Esdr. 4, 9 inter eos, quos Asenaphar (vide s. v.) ex regionibus orientibus in Samariam transtulit. Uti ex voce concludere licet, isti erant oriundi ex regione urbis Arach (vide s. v.).

ERICIUS. 1. Ericius in Vulgata dicitur animal hebr. עֶרֶץ appellatum (Is. 14, 23; 34, 11; Soph. 2, 14). LXX pariter ἐρῖνος vertit, Peshitta עֶרֶץ (Payne Smith 3687 s.). Inter animalia nominatur, quae in solitudinibus ac desertis locis degunt, neque alia de eo in S. Scriptura referuntur. Quamquam in diversissimas partes abiierunt interpretes, praesertim antiquiores, ex quibus alii ericium vel hystricem in terra viventem, alii testudinem vel castorem vel lutram aquae amantes, alii volucrum per aera volitantem exposuerunt, nulla tamen videtur ratio ab interpretatione seniorum et S. Hieronymi discedendi. Itaque nomine עֶרֶץ imprimis ericium (germ. Igel, gall. hérisson), fortasse etiam hystricem (Stachelschwein, porc-épic) significari censemus. Ratio prima est auctoritas veterum versionum, a qua sine rationabili causa non est discedendum; altera est nomen arabicum *qunfud*, quod idem est cum hebr. *qippod* et species utriusque animalis designat; tertia, quia et ericius (*Ericius europaeus* Linné, et alia species minor, ord. Insectivora) et *hystrix* (*Hystrix cristata* L. et *H. hirsutirostris* Brandt, ord. Rodentia) in Palaestina vicinisque provinciis frequenter inveniuntur, et solitudinissilenticque maxime amantes verbis prophetis optime conveniunt.

Cf. *Sam. Bochart*, Hieroz. I. 1035-42, *ed. Rosenm.* II. 454-62; *E. F. K. Rosenmüller*, Bibl. Alterth. IV. 2, 227 s.; *H. O. Lenz*, Zool. d. ält. Griech. u. Röm. 81-83. 156; *L. Lewysohn*, Zool. d. Talm. 100 s.; *J. G. Wood*, Bible Animals 80-6. 462-8; *Fr. Hommel*, Namen d. Säugeth. 339. 365; *H. B. Tristram*, Nat. Hist. of the Bible *ed.* 8, 101 s. 125 s.; *id.* Fauna and Flora of Pal. 10; *P. Cultrera*, Fauna bibl. 214; *Lewnis-Ludwig*, Synopsis I. 1, *ed.* 3, p. 207. 226; *A. E. Brehm*, Tierleben *ed.* 3, II. 358-70. 558-64; *G. Loreta*, La zoologia nella Bibbia 425-7.

2. Neque obstant argumenta, quibus *Tristram* cum aliis (*Cheyne*; *Hitzig*; cf.

Guthe ap. *Kautsch*. Alt. Test. Is. 14,23, contra Is. 34, 11; *Rothstein* ib. Soph. 2, 14) ערִיָּץ esse avem palustrem (*Ardea stellaris* Linné = *Botaurus stellaris* Stephens, germ. *Rohrdommel*, gall. *butor*, angl. *bittern*) evincere nititur. Nam textus Is. 14,23 non requirit animal in paludibus aquarum habitans, multoque minus avem palustrem, cum bene de variis partibus immensae Babylonis exponatur: pars erunt ruinae, ibique habitabit ericius, pars altera in paludes aquarum. Verba autem cap. 34,14 et Soph. 2,14 omnino excludunt avem vel aliam bestiam palustrem, cum ipsae ruinae desertae et nimio solis ardore exustae habitatio animalis ערִיָּץ dicantur, quae avi palustri minime conveniunt. Quod aliqua saltem ratione etiam patroni huius sententiae videntur animadvertisse, cum in variis locis variam proferant opinionem.

Cf. *H. B. Tristram*, Nat. Hist. 243 s.; *Fauna and Flora* 10, ubi nomini hystricis addit « heb. ערִיָּץ, generic »; ib. 111, ubi similiter nomini Botauri stellaris idem nomen addit; *Guthe* l. c. Is. 14,23 *Rohrdommel*, ib. 34,11 *Igel*. — De ave hac cf. *Leunis-Ludwig* l. c. p. 479 s.

3. In eodem capite 34. Isaiae atque in eodem contextu *S. Hieronymus* cum pluribus versionibus antiquis in v. 15 iterum *ericiū* vertit pro hebr. ערִיָּץ, quod una tantum littera a nomine ericii differt. At iterum ערִיָּץ eum illis interpretibus hic supponere prohibet contextus, qui ericiū jam nominavit et ערִיָּץ animal oviparum describit (וְיִבְרִימֶלֶת et ova parit, Vulg. et enutrivit catulos). Quare ערִיָּץ retinendum est, quod probabiliter serpentem iaculum (arab. *qiffāzeh*) designat. V. SERPENS.

L. FONCK.

ERIOCH legitur in Vulgata Iudith 4,6: in campo Erioch regis Elicorum, sed apud LXX: καὶ παρὰ τὸν Εἰριώχ ὁ βασιλεὺς Ἐλουαζών. Textus videtur esse corruptus. Aliqui putant Erioch non esse nomen regis, sed campi (*O. Wolff*, Das Buch Iudith 1861, p. 58). Plerique tamen illud nomen regis Aelamitarum esse admit-

tunt et campum explicant de campestri eius regni parte, quae parti montanae opponatur.

ERUCA v. LOCUSTA.

ESAAN (עִשָּׂאן, עִשָּׂאן), urbs tribus Iuda (Jos. 15,52); recensetur in secunda provincia montis Iuda. Fortasse *el-Simā* inter meridiem et occidentem a *Yuffā* (Iota) eiusdem provinciae (*Survey of West. Pal. Mem.* III. 313. 378); *Zanecchia*, La Palestine d'aujourd'hui, 1899 II. p. 261).

ESAU (עֵשָׂא, עֵשָׂא), filius Isaac et Rebeccae primogenitus (cf. Gen. 25,25), venator et agricola, dum frater eius Iacob vir simplex habitabat in tabernaculis; Isaac amabat Esau eo quod de ventionibus illius comederet et Rebecca diligebat Iacob. Indoles Esau profana (Hebr. 12,16) satis declaratur eo quod ius primogeniturae pro lentis edulio cessit fratri maxima levitate et incuria solum ad brevem illam famis sedandae voluptatem attendens: en morior, quid mihi proderunt primogenita? comedit et bibit et abiit, parvipendens quod primogenita vendidisset (Gen. 25,29-34). Indolem profanam pariter ostendit eo quod quadragenarius uxores alienigenas duxit, mulieres Hethaeas (Gen. 26,34 et 36,2) quae offenderunt animum Isaac et Rebeccae, ita ut Rebecca diceret: taedet me vitae meae propter filias Heth; si acceperit Iacob uxorem de stirpe huius terrae, nolo vivere (Gen. 27,46). Esau quidem iuramento interposito primogenituram in Iacob transtulerat; verum eum sibi benedictionem patris primogenito debitam videret praereptam a fratre, cum levitatis suae poenituit, irrugiit clamore et magno cum eiulatu et fletu benedictionem a patre postulavit; sed hereditatem benedictionis patriarchalis iam non consecutus est: Iacob factus est pater populi Dei, Esau eiusque posteri excluduntur a stirpe ex qua denuum Messias proditurus erat. Indolem a Deo alienam Esau etiam eo manifestat quod odio in Iacob stimulatus apud se cogitabat et aperte quoque minabatur: venient dies luctus patris mei et occidam Iacob fratrem meum (Gen. 27,1-43). Quare Re-

becca iacob quem diligebat furori eius subtrahere studuit suadens, ut abiret in Haran ad Laban; quod iter ut Isaac patri probaretur, Rebecca vehementer de uxoribus Esau conquesta se nolle vivere ait, si iacob acciperet uxores Chananaeas. Quare Isaac quoque iacobum ad iter illud faciendum et uxorem ex sua stirpe accipiendam hortatus est (— quae narratio aptissime in se concluditur, ita ut mirum sit criticos quosdam invenisse contradictionem, scil. ab uno narratore assignari causam itineris odium Esau, ab altero matrimonium cum cognata incundum —). Dum iacob per annos complures abest, etiam ira Esau subsedit atque eo magis pro sua indole benedictionem patriarchalem vel oblivioni dedit vel sibi esse ablatam non multum curavit, quia valde dives effectus est. Iacobo redeunti occurrit cum quadringentis viris et iacob adoravit pronus in terram septies, donec appropinquaret frater eius; tanta reverentiae et animi demissionis significatione Esau plane demulcetur et post longam absentiam sensus amoris fraterni animum eius pervadit: currens Esau obviam fratri suo amplexatus est eum stringensque collum eius et osculans flevit (Gen. 33,4) et dona oblata solum accepit quia iacob eum urgebat ut acciperet. iacob vero qua erat prudentia tamen non adeo confidebat affectui amoris et benevolentiae quem subito et inexpectato Esau ostenderat, sed noscens indolem Esau mutabilem noluit eum habere socium itineris, et Esau reversus est in viam Seir versus, ubi demum, uti ex Gen. 36,6. 7 patet, sedem suam fixit; nam divites erant valde et simul habitare non poterant nec sustinebat eos terra peregrinationis eorum prae multitudine gregum.

Esau nomine altero vocatur quoque Edom. Prioris nominis ratio indicatur Gen. 25,25: qui prior egressus est rufus erat et totus in morem pellis hispidus vocatumque est nomen eius Esau. Ipsum autem nomen עֵשָׂו *Zenner* explicat ex arabico, unde notio nominis habetur qua rufis pilis vestitus significatur (cf. Theol. Quartalschr., Tübingen 1889 p. 650). Nomen alterum Edom explicatur

Gen. 25,30: da mihi de coctione hac rufa, i. e. hebr. promitte mihi devorare ex rufa, rufo hoc עֵדֹם, quod nomen Edom factum est nomen gentis, quare Esau etiam vocatur pater Edom in monte Seir (Gen. 36,9). Ceterum vide s. v. EDOM.

In iacob et Esau demonstrat S. Paulus Deum pro sua liberalitate gratias distribuere; nam cum nondum nati fuissent aut aliquid boni egissent aut mali, dictum est: maior serviet minori i. e. ex sola Dei voluntate *aliquid excellentiae* collatum est minori; idque etiam manifestatum est in utroque populo, nam uti apud Malaechiam 1,2 habetur: iacob dilexi, Esau autem odio habui, i. e. uti ex contextu apud Mal. consequitur: utroque populo peccante gens iacob ex exilio revocata et restituta est; verum Edomitae poenis meritis deputati manent; nam: quodsi dixerit Idumaea: destructi sumus, sed reverentes aedificabimus... haec dicit Dominus exercituum: isti aedificabunt et ego destruam et vocabuntur termini impietatis et populus cui iratus est Dominus usque in aeternum (Mal. 1,4). iacob utique id sine ullo suo merito nactus est ut a Deo eligeretur pater populi electi, ut fieret patriarcha prae Esau primogenito, ut Deus diceretur Deus Abraham, Isaac et iacob (non Esau); unde in duobus hisce fratribus revera adumbratur quomodo Deus pro sua voluntate liberrima dona sua *praeclariora* distribuat cui voluerit nulla habita ratione excellentiae naturalis, quae propter ius primogeniturae in Esau reperiebatur. Ceterum Esau pro sua levitate ipse ius illud abiecit et matrimonio contracto cum mulieribus Hethaeis progeniem electam Abraham miscens cum gente idololatrica se reddebat indignum, cui daretur promissio, quae iacobo data est: benedicentur in te et in semine tuo cunctae tribus terrae (Gen. 28,14).

ESBAAL (עִשְׂבָּאֵל, Ἐσβαάλ), filius Saulis regis (1 Par. 8,33; 9,39); idem atque Isboseth (v. s. v.).

ESBON (עִשְׁבֹּן, Ἐσβών), unus ex posteris Bela primogeniti Benjamin (1 Par. 7,7).

ESCOL. 1. Escol (עֶשְׂקוֹל, Ἐσχωλ), frater Mambre Amorrhæi et Aner (Gen. 14, 13, 24); hi tres cum Abraham foedere iuncti eum in persecutione exercitus Chodorlahomor adiuverunt. In textu hebr. et Vulgata ordo fratrum est: Aner, Escol, Mambre (14, 24); sed apud LXX habetur Escol, Aner, Mambre atque hunc ordinem exhibet Flavius Iosephus (Ant. I. 10, 2: Ἐσχωλ ὁ πρῶτος ed. Niese).

2. Escol vallis (בְּקֵל עֶשְׂקוֹל; Vulgata: Nehelescol, torrens botri, vallis botri; LXX φάραγξ βότρου) fortasse nomen ducit ab Escol Amorrhæo, sicut ab eius fratre Mambre nomen habet convallis Mambre, immo ipsa urbs Hebron, quae Gen. 23, 19 et 33, 27 Mambre appellatur. Neque obstat, quod Num. 13, 23[24] nomen vallis ex eo explicatur, quod botrum portassent inde filii Israel; poterant enim Israelitae per modum paronomasiae cum nomine antiquo novam significationem coniungere, quae eventus ille in memoriam revocaretur. Ceterum nota derivationem nominis Nehelescol ab Escol Amorrhæo non esse nisi coniecturam. Ab Eusebio (Onom. ed. Lag. 300, 93) haec vallis quaeritur apud Gophnam (*Djfnā*) 13 mil. pass. a Ierusalem Neapolim (Sichem) versus cum dubitatione, a S. Hieronymo (Peregrinatio S. Paulae, apud *Tobler et Molinier*, *Itinera hieros.* I. p. 33) inter Hebron et Bethsur. A Iudæis Hebronem hodie incolentibus agnoscitur esse *Wādi Tuffu*, quae vallis Hebrone Eleutheropolim spectat et vinetis abundat; in eadem fere directione paucis minutis ab urbe Hebron invenitur fons inter vineta scaturiens *ʿAin Eskali* seu *ʿAin Kashkala*, quo nomen Escol conservari putatur (*Van de Velde, Guérin, F. de Saulcy, Liévin de Hamme, Zanecchia*). In eadem fere regione *Baedeker-Benzinger* et *F. Buhl* vallem Escol quaerendam esse censent scil. in valle *Wādi Beit Iskāhīl* inter septemtrionem et occidentem a Hebrone.

Cf. *Van de Velde*, *Memoir* p. 310; *Guérin*, *Judée* III. 215. 216; *F. de Saulcy*, *Voyage en Terre Sainte* 1865 I. 152; *Liévin de Hamme*, *Terre Sainte* ed. 4 II. 109; *Zanecchia*, *La Palestine d'aujourd'hui* 1899 II. 229-231; *Baedeker-Benzinger*, *Pal. und Sy-*

rien ed. 5 p. 134. 137; *Buhl*, *Alt. Pal.* 1896. p. 89.

ESDRAS (עֶזְרָא, Ἐσδρας).

1. Celeberrimus est Esdras sacerdos et scriba doctus in lege Domini qui anno septimo Artaxerxis regis favente rege et varia subsidia concedente multos ex exilio adduxit in urbem. Quibus itaque placuit cum eo ascendere, hos congregavit ad Ahava fluvium; cum autem ex levitis nemo advenisset, misit Esdras viros nobiles ad Eddo (vide s. v.), ut eius ope levitis quoque et Nathinaeis persuaderent ut se accingerent ad iter. Quod etiam perfecerunt. Esdras ibi praedicato ieiunio Dei opem pro itinere implorari iussit; « erubui enim petere a rege auxilium et equites qui defenderent nos ab inimico in via, quia dixeramus regi: manus Dei nostri est super omnes qui quaerunt eum in bonitate » (Esdr. 8, 22). Aurum, argentum, vasa consecrata domus Dei commisit duodecim sacerdotibus et decem levitis asportanda in urbem. Profecti a flumine Ahava duodecimo die mensis primi advenerunt in Ierusalem primo die mensis quinti et obtulerunt sacrificia. Esdras multo fervore in id incumbibat, ut vita colonorum moresque ad normam legis componerentur. Cum dolore magno advertebat non solum homines plebeios, sed levitas quoque et sacerdotes non paucos matrimonia iniisse cum alienigenis; quae uxores ut dimitterentur magna constantia effecit (cf. Esdr. 7, 1-10, 44). Quid egerit usque ad adventum Nehemiae anno vigesimo Artaxerxis regis quamvis libro eius non referatur, tamen facile concludi poterit tum ex eius studio observandae legis tum ex decreto Artaxerxis, quo dicitur missus, ut visitaret Iudaeam et Ierusalem in lege Dei, ut constitueret iudices et praesides, ut iudicent omni populo et ut animadvertant severe in omnes qui non fecerint legem Dei et legem regis (7, 14. 23, 26). Praeterea potestate a rege accepta urbem Ierusalem e ruinis instaurare incepit. Eum autem eiusmodi potestatem accepisse sequitur ex 9, 9: Deus inclinavit super nos misericordiam coram rege Persarum ut daret nobis vitam et subli-

maret domum Dei nostri et extrueret solitudines eius et daret nobis sepem in Iuda et Ierusalem. Cum enim domus Dei iam esset exstructa atque completa anno sexto regni Darii regis (6,15), clarum est anno septimo Artaxerxis istud « sublimare domum Dei et extruere solitudines, eius » non posse intellegi de ipsa aedificatione templi. Neque enim quidquam constat de templo iterum destructo. Proinde solitudines eius erunt solitudines quae circa templum sunt, ruinae urbis; et sublimare domum Dei idem erit ac novum addere splendorem templo urbe aedificata et munita. Ad hanc aedificationem et munitionem urbis spectat etiam illud « ut daret nobis sepem ». Porro moenia revera esse aedificata, sed machinationibus inimicorum iterum destructa, clare indicatur Neh. 1,2 ss.; nam anno vigesimo Artaxerxis cum Hanani ex Iudaea venisset ad Nehemiam isque de conditione Iudaeorum interrogasset, respondit Hanani inter alia : murus Ierusalem dissipatus est et portae eius combustae sunt igni. Quo audito Nehemias flet et luget diebus multis. Iam plane improbabile est Hanani loqui de destructione a Chaldaeis anno 586 facta, quam Nehemias non potuit ignorare, et Nehemiam tanto corripit dolore de re quam iamdudum cognitam habebat. Sed utrumque, et responsio Hanani et luctus Nehemiae, plane necessario evenit, si Esdras moenia et urbem aedificare coeperit et opus eius ab inimicis fuerit destructum (cf. 4,7-23). Postquam Nehemias anno vigesimo Artaxerxis advenit, moenia urbis exstructa sunt et Esdras die primo mensis septimi universo populo legit legem Dei et celebratum est festum tabernaculorum (Neh. 8,1-18) et die vigesimo quarto separatum est semen filiorum Israel ab omni filio alienigena et sollemni spon- sione principes, sacerdotes, levitae voverunt foedere percusso observaturos se esse legem Dei (Neh. 9,1-10,39). Per Esdram igitur studium legis maxime promotum est et ipse scriba velox in lege Dei (Esd. 7,6) quasi pater et parens censendus est scribarum vel doctorum legis, quorum erat legi Dei operam dare, eam explicare, docere, ad varias

vitae conditiones applicare. Quod Esdrae officium fabulis quoque exornatum est v. g. cum omnes libros sacros e memoria restituisse multosque alios divina inspiratione dictasse (4 Esdr. 14,40 ss.). Eum curam exhibuisse pro collectione et conservatione sacrorum librorum, ex ratione eius muneris studique et ex traditione satis constat (cf. *Cornely*, *Introd. I. ed.* 2 p. 43 ss.).

Usque ad nostra tempora receptum erat apud omnes Esdram venisse in urbem anno septimo Artaxerxis I. i. e. circa annum 437 a. Chr. et anno vigesimo eiusdem regis venisse Nehemiam, qui cum Esdra instaurationem religiosam perfecerat. Iam vero hodie tempus Esdrae et Nehemiae in quaestionem vocatur ab aliquibus et varie determinatur. Nam *Van Hoonacker* Nehemiam quidem sub Artaxerxe I. anno 445 in Ierusalem advenisse tenet; at contendit Esdram non advenisse nisi anno septimo Artaxerxis II. Macmonis i. e. anno 398 (cf. *Néhémie et Esdras*; nouvelle hypothèse... Muséon 1890; cf. *Zorobabel et le second temple*, Muséon 1892). Alii utrumque Esdram et Nehemiam ad tempus Artaxerxis II. reiciunt; ita *Kaulen* (*Einleitung ed.* 4 num. 247 ss.), *de Sauley*, *Havet*, *Imbert* (quorum libros enumerat *Ch. Huyghe* in periodico : *Revue des questions historiques* II. 1893 p. 6). Mentione digna vix est opinio quam *Bellangé* proposuit intellegendum esse Artaxerxen III. Ochum qui regnavit 338-337; nam Neh. 13,6 annus memoratur 32. Artaxerxis; sed Ochus solum regnavit per annos 21. Verum aliqua notanda sunt contra alias sententias.

Et priorem quidem non posse consistere bene demonstravit *Ch. Huyghe* l. c. Atque revera plane improbabile est ea quae de Esdra narrantur cap. 7 et seq. accidisse post Nehemiam. Nam tempore Nehemiae Iudaei ipsi rebus pro cultu necessariis provident (Neh. 10,32 ss.): sed cum Esdras iter instituit, colonia Iudaeorum ita pauper erat, ut regia liberalitate debuerit provideri Esdr. 7,20. Iam vero Nehemias Eccli. 49,13 laudatur tamquam is qui reipublicam restituerit et firmam stabilemque effecerit; ergo fieri nequit, ut quae de

Esdra 1. c. referuntur post Nehemiam facta sint. Cum Esdras venit in Ierusalem, ab aliis fortuito audit de matrimoniis cum alienigenis contractis quarto demum mense post adventum (9,4; 10,9). Sed si *antea* cum Nehemia iam eiusmodi matrimonia repudiasset, certe in altero suo adventu ipse statim inquisivisset, utrum haec lex esset observata necne, neque per quattuor menses expectasset, donec tandem ab aliis doceretur. Neque probabile est Esdram iuvenem qui eousque nihil fecisset tanta auctoritate valuisse, sicuti in tota illa narratione Neh. 8,2 ss. apparet; pariter improbabile, Esdram demum in senectute decrepita iter illud laboriosum 7,9 etc. suscepisse; si enim anno 445 cum Nehemia pro populo laboravit, legem explicavit populo et ita apud omnes in aestimatione erat, ut principes familiarum, sacerdotes, levitae ad eum convenirent explicationis legis accipiendae causa (Neh. 8,13), certissime plus annos 30 natus erat; ergo octogenarius fere iter molestum instituit? Nonne cuncta melius et aptius inter se connectuntur, si ille ordo temporis servatur qui in *uno* libro Esdrae et Nehemiae ipsa narrationis serie indicatur? olim enim et ab origine exstitit unus liber et solum postea a Iudaeis unus ille in duas partes est divisus.

Neque altera sententia, Esdram et Nehemiam tempore Artaxerxis II. (405-338) ea egisse quae narrantur, sustineri potest. Nam ratio quae a *Kaulen* affertur immerito profertur; contendit enim: Sanaballat de quo Neh. 2,10 ss. et 14,28 mentio fit a Dario Codomanno satrapen Samariae esse nominatum eumque postea ad partes Alexandri Magni transisse (*Flav. Jos. Ant. XI. 7,2 s.*); quare fieri non posse ut Artaxerxes in libro Neh. intellegatur primus eius nominis. Cum Darius Codomannus regnaret anno 336-330, haec conclusio consisteret, si apud Iosephum idem Sanaballat posset intellegi, de quo Nehemias refert. At utriusque narratio ita instituitur, ut de eodem Sanaballat apud Iosephum dicitur *missus* in Samariam satrapes a Dario ultimo rege;

proinde *venit* in Samariam Dario rege; Sanaballat vero in libro Nehemiae iam est in Samaria adveniente Nehemia. Ex Neh. 13,28 unus ex filiis Ioiadae filii Eliasib sacerdotis magni erat gener (גִּיּוֹרָם) Sanaballat; sed Nehemias sacerdotem hunc qui matrimonium iniit cum filia Sanaballat Horonitis fugavit a se (hebr.). Apud Iosephum vero Manasses frater Ieddoa et filius Ionathan (vel Ioannis; cf. Neh. 12,11) filiam Sanaballat in matrimonium ducit. Proin qui matrimonium iniit cum filia Sanaballat est secundum Neh. filius Ioiadae et *frater* Ionathan (vel Ioannis); secundum Iosephum vero est *filius* Ionathan et frater Ieddoa; proin non est sermo de eodem matrimonio, sed de matrimonio in subsequente generatione et alio prorsus tempore. Aliud tempus designari etiam consequitur ex eo quod in matrimonio uno Nehemias intervenit 13,28, in altero vero apud Iosephum pontifex et seniores hierosolymitani aegre ferunt fratrem pontificis uxorem habere generis externi; nihil apud Iosephum de Nehemia, de quo alio prorsus tempore agit scil. tempore Xerxis. Neque omitendum est indolem Sanaballat diverso modo describi: apud Nehemiam cernitur inimicus Iudaeorum qui eos subsannat et despicit et cogitat malum Nehemiae (Neh. 2,10. 19; 4,1; 6,2. 10 s.); apud Iosephum vult sibi conciliare benevolentiam Iudaeorum; apud Nehemiam Sanaballat ait: quid Iudaei faciunt imbecilles? et Tobias coram eo dicit: si ascenderit vulpes, transsiliet murum eorum lapideum; apud Iosephum Sanaballat scit (εἰδώς) praeclaram λαμπράν urbem esse Hierosolyma; ibi vocatur Horonites, hic Chuthaius genere ex quibus etiam Samaritani sunt. Quae omnia si consideraveris dices non de eodem Sanaballat esse sermonem.

Tempore Nehemiae sacerdos magnus erat Eliasib (Neh. 3,1). Iam series pontificum haec est: Iosue qui cum Zorobabel rediit in urbem genuit Ioacim, Ioacim genuit Eliasib (Neh. 12,10). Iam valde improbabile est ab Iosue qui circa annum 520 pontifex erat (Agg. 1,1) usque ad annum 385 i. e. ad annum 20.

Artaxerxis H. i. e. per spatium annorum 135 immo per maius spatium solum tres exstis-
 se pontifices. Quodsi etiam probabile existimaveris, inspicendum est
 id quod Neh. 12,24-26 habetur; enumerantur ibi levitae et ianitores qui vixe-
 runt in diebus loacim filii Iosue et in diebus Nehemiae ducis et Esdrae. Certe
 dici oportet levitas eos fuisse aequales et loacim et Nehemiae ducis et utriusque
 tempore officio esse functos (cf. v. 24 ut laudarent etc.). Sed ex lege mosaica
 levitae non fungebantur nisi ab anno aetatis 25. usque ad 30. (Num. 8,24. 25)
 vel ab anno 30. usque ad 50. (Num. 4,30). Iam perquam improbabile est inter lo-
 acim filium Iosue et annum 385 ne viginti quinque quidem annos intercessisse.
 Pater enim eius Iosue erat pontifex anno 520, immo iam 538; unde fieri nequit
 ut anno 385 eius filius in sacerdotio sit constitutus i. e. post spatium annorum
 143. Quare de tempore Esdrae et Nehemiae sententia antiqua communis reti-
 nenda est, quae nulli difficultati est obnoxia et in qua singula bene con-
 nec-
 tuntur et explicantur.

I. KNABENBAUER.

2. Sacerdos qui cum Zorobabel Baby-
 lone in Ierusalem rediit (Neh. 12,1);
 eius familiae princeps erat Mosollam in
 diebus Ioa-
 cim pontificis (12,13).

3. Unus ex principibus Iuda, qui in
 dedicatione muri Ierusalem Nehemiae
 adstiterunt (Neh. 12,33).

4. Esdras in Vulgata 2 Mach. 8,33
 mendose scribitur pro Eleazar (v. ELEA-
 ZAR 8.).

ESDRELON (Iudith 4,8; 4,5; 7,3;
 Ἐσδρηλὼν, Ἐσδρηλὼν 1,8; 3,9; 4,6; 7,3),
 nomen urbis et planitiei, quae alias
 Iezrael, Iezrahel (vide s. v.).

ESDRIN (Ἐσδρίν), dux militum in
 proelio, quo Iudas Machabaeus Gorgiam
 fugavit (2 Mach. 12,36 : οἱ περὶ τὸν Ἐσδρίν,
 Vulgata : qui cum Esdrin erant). Nomen
 videtur idem esse ac עֶזְרִי (1 Par. 27,26;
 LXX Ἐσδρή).

ESEBAN (עֶשְׂבָּן; Ἀσβάν, Ἀσεβών),
 princeps Horraeus, filius Dison filii Scir
 (Gen. 36,26; 1 Par. 1,41).

ESEBON (עֶשְׂבֹּן, Ἐσσεβόν), quartus
 filius Gad, enumeratus inter illos, qui
 cum Iacob Aegyptum ingressi sunt (Gen.
 46,16). Idem Num. 26,16 nominatur
 Ozni (עֶזְנִי, Ἀξενί), progenitor Ozni-
 rum.

ESEC (עֶשֶׁק, Ἀσῆλ), Beniaminita ex
 posteris Saul (1 Par. 8,39).

ESELIAS v. ASLIA.

ESEM urbs v. ASEM.

ESEQ puteus v. CALUMNIA.

ESER (עֶשֶׂר, Ἀσάρ, Ὠσάρ), sextus
 filius Scir Horraei, pater Balaan, Zavan
 et Acan seu Iacan, unus ex ducibus
 Horraeorum in monte Scir (Gen. 36,24.
 27. 30; 1 Par. 1,38. 42).

ESNA (עֶשְׂנָא, Ἰανά), urbs tribus Iuda
 in tertia provincia Sephelae (Ios. 15,43).
 Correspondere videtur Iedna Eusebii et
 S. Hieronymi (Onom. ed. Lag. 266,30;
 132,22) 6 mil. pass. ab Eleutheropoli
 Hebron versus sita; haec autem sine
 dubio est hodiernus vicus *Idhnā* inter
Beit-Djibrin seu Eleutheropolim et He-
 bron, ut iam *Guérin* (Judée II. 364-365)
 indicavit, etsi eam non ad Ios. 15,43 re-
 tulit.

Distingui debet ab altera urbe eius-
 dem nominis hebraici, quae in Vulgata
 vocatur Asena (vide s. v.).

ESPHATHA (עֶשְׂפָּתָא, Φατγάζ), ter-
 tius filius Aman (Esth. 9,7).

ESRIEL v. ASRIEL.

ESRON v. HESRON.

ESTAOL v. ESTHAOL.

ESTHAMO (עֶשְׂתָּמוֹ, Ἐσθαμόν), qui
 fuit de Machathi (1 Par. 4,19), secundum
 Vulgatam est filius uxoris Odaiae sor-
 ris Naham patris Ceila. Sed textus he-
 braicus explicari potest : Filii Odaiae
 eiusque uxoris, quae est soror Naham,
 sunt pater urbis Ceila cognominatus Gar-
 mita et (pater) urbis Esthamo Macha-
 thita i. e. fortasse ex posteris Maacha
 concubinae Caleb (1 Par. 2,48). Aliam
 eiusdem textus interpretationem vide s.
 v. GARM.

ESTHAMO, ESTHEMO, ISTEMO

(עֶשְׂתָּחֹל et Ios. 15,30 אֶשְׂתָּחֹל, Ἐσθα-
μών, Ἐσθαμός et etiam Ἐσθά, Ἐσθαί, Ἐ-
σθά Máz), urbs tribus Iuda in prima pro-
vincia montis sita (Ios. 15,30), cuius
pater dicitur Iesba filius Mered et Be-
thiae (1 Par. 4,17 et vide BETHIA), ci-
vitas sacerdotalis (Ios. 21,14; 1 Par. 6,
38[42]); recensetur inter urbes, ad quas
David post cladem Amalecitarum redux
in Siceleg dona de praeda misit (1 Reg.
30,28); de 1 Par. 4,19 vide articulum
praecedentem. Tempore Eusebii et S.
Hieronymi (Onom. ed. Lag. 254,70; 119,
18) Ἐσθαμὰ describitur pergrandis vicus
in Daroma ad Eleutheropoleos perti-
nens regionem. Hodie vicus *el-Semu'a*
tribus horis a Hebron meridiem versus.

Cf. Guérin, Judée III. 173-176; Riess, Bi-
bel-Atlas; Survey of West. Pal. Mem. 403.
412. 413; Zeitschr. d. D. Pal.-Ver. XVI. 1893
p. 19. 20; Zaneccchia, La Palestine d'aujourd'hui 1899 II. 250.

ESTHAOL, ESTAOL (Ἐσθαὼλ,

Ἀσθαὼλ, Ἀσά, Ἐσθαὼλ, Ἐσθαὼμ), urbs
tribus Iuda in prima provincia Sephelae
sita (Ios. 15,33), tribui Dan assignata
(Ios. 19,41); inter Saraa et Esthaol erant
Castra Dan seu Mahane Dan (Iud. 13,
25 et cf. 18,12), sepulcrum Samsonis
(Iud. 16,31) et sine dubio etiam habita-
lio parentum eius. De Saraa et Esthaol
exploratores missi sunt a Danitis quin-
que viri fortissimi, qui in monte Ephraim
et in terra Lais novas sedes pro Danitis
angustiore territorio pressis circumspicerent
(Iud. 18,2. 8. 11). In genealogiis
Iuda Esthaolitae sicut etiam Saraitae
referuntur ad cognationem Cariathia-
rim (1 Par. 2,53). Omnibus locis citatis
Esthaol una cum Saraa nominatur. Ex
testimonio Eusebii et S. Hieronymi sita
erat 10 mil. pass. ab Eleutheropoli aqui-
lonem versus in via, quae Nicopolim
ducit (Onom. ed. Lag. 255,87; 119,32).
Illi respondet vicus *Eshū'a* a Ierusalem
occidentem versus et paulo infra Nico-
polim (Amwās) situs. Vide etiam SA-
RAA.

Cf. Guérin, Judée II. 12-14 et 382; Sur-
vey of West. Pal. Mem. III. 25; G. A.
Smith, Hist. Geogr. of the Holy Land p. 218
in nota; Zaneccchia, La Palestine d'aujourd'hui

jourd'hui 1899 I. 109; Buhl, Alt. Pal. 1896
p. 195; Legendre apud Vigouroux, Dict. de
la Bible II. 1971; Zeitschr. d. D. Pal.-Ver.
X. 1887 p. 134. 135.

ESTHER (אֶסְתֵּר, Ἐσθήρ) nomen per-
sicum (stella) puellae quae hebr. הֶדֶרֶס,
in Vulgata Edissa (vide s. v.) vocabatur.
Erat filia Abihail ex tribu Benjamin fra-
tris Mardochoei; mortuis parentibus a
Mardochoeo in filiam adoptata est et
educata. Postquam Xerxes (Assuerus)
rex uxorem Vasthi repudiavit, puellae vir-
gines speciosae undique querebantur,
ut ex iis unam eligeret rex reginam.
Inter eas erat Esther quoque quippe
quae esset pulchra nimis et decora facie
(Esth. 2,7). Cum insigni venustate
insignem coniunxit modestiam; non
quaesivit muliebrem cultum, sed quae-
cumque voluit Egeus eunuchus, haec ei
ad ornatum dedit (2,15) et adducta est
ad regem mense decimo anno septimo
regis, quae ita ei placuit, ut diadema
regni poneret in capite eius camque facer-
et reginam. Esther autem non pro-
diderat cuius esset gentis; hoc enim ei
iniunxerat Mardochoeus, cuius monitis
etiam regina facta plane obsequebatur
ut eo tempore solita erat quo eam par-
vulam nutriebat (2,20).

Inter nobiles in aula regis Mardo-
choeus quoque erat (2,21; 11,3), qui
cum nollet genua flectere coram Aman,
principe in regis favore et amicitia,
maximam eius in se iram concitavit, et
quia utpote Iudaeus religionis causa re-
nuit flectere genua et sese prosternere
coram Aman, Aman odio flagrans in
eiusmodi gentis religionem et superbia
elatus omnes Iudaeos quos pariter sui
contemptores aestimabat perdere sta-
tuit. Pro superstitione gentili exquisivit
sorte quo die et quo mense caedes ac
perditio Iudaeorum sibi prospere eve-
niret. Sorte designatus est dies tertius
decimus mensis duodecimi. Aman vero
regi persuasit esse in regno gentem di-
persam iussa regis contemnente et
regno imminere periculum gente illa
per licentiam insolescente; « si tibi pla-
cet decerne ut pereat et decem millia
talentorum appendam arcariis gazae
 tuae » (3,9). Annuit rex et tradidit an-

nulum suum Aman, ut decreta conficienda ac mittenda curaret. Atque statim litterae ad universas provincias missae sunt quibus praecipiebatur ut die statuto Iudaei occiderentur et bona eorum diriperentur. Iudaei luctu ingenti tabescebant; Mardocheus quoque saeco indutus et cinerem in capite gerens clamore magno et eiulatu usque ad fores aulae regiae processit, ita ut Esther ea de re a suis puellis et eunuchis certior facta per Athach eunuchum causam luctus a Mardocheo exquireret. Hic re indicata et regio decreto misso eam monuit ut ad regem intraret et deprecaretur cum pro populo suo (4,1-8). Cum autem poena mortis proposita nemini liceret ad regem intrare, nisi esset vocatus, Esther haesit; Mardocheus vero iterum instabat monens eam providentia divina esse factam reginam, ut saluti populi sui prospiceret; quod si omitteret certissime fore ut sibi ipsi interitum adscisceret. Esther monitis acquiescit; postulat ut omnes Iudaei in urbe Susan pro se orent et ieiunium agant trium dierum ad Dei misericordiam implorandam; ipsa quoque eodem modo ieiunat et ferventi oratione Deum deprecatur (4,9-17; 4,1-19) et die tertio, quamvis non esset vocata, ad regem ingreditur regio ornata decora. Benigne suscipitur Deo scil. spiritum regis in mansuetudinem convertente et magna utens prudentia solum a rege petit, ut ipse et Aman veniant ad convivium quod paraverit. Idem quoque pro altero die postulat; prudenter enim magnum in se excitare studuit regis amorem et se in eius familiaritatem insinuare, quo certior esset pro regis indole petitionem suam non iri negatum. Ita enim simul cum maxima in Deum populi protectorem fiducia subsidia quoque humana diligenter esse adhibenda recte existimavit. Altero itaque die convivio celebrato rex iterum quaerit quae sit petitio eius. Sermone apposito a rege petit, ut sua ipsius vita et gentis suae vita servetur, ne crudelitas in regem redundet et auctorem pessimi consilii prodit Aman qui convivio intererat. Rex furore incensus e cubiculo egreditur; Aman corruit coram Esther pro se deprecans, cum ex

ira regis iam intellexisset suam ruinam; quae utique ei imminabat. In locum Aman elevatur Mardocheus qui iam antea optime de rege meritus erat coniratione duorum eunuchorum in regis vitam indicata. Pro more persico quo decretum regium revocare non licet, saluti Iudaeorum suadente Esther ita prospiciebatur, ut aliis litteris in omnes provincias missis Iudaei inhererent stare pro animabus suis et omnes inimicos suos interficere et bona eorum diripere. Quae litterae missae sunt mense tertio; hisce litteris Iudaeis nova lux oriri visa est, gaudium, honor et tripudium (5,1-8, 16; 16,1 s.). Ita Esther regina exstitit sua apud regem intercessione salvatrix populi et eius in reginam electione Deus iterum se praestitit protectorem populi ostendens se machinationes inimicorum pro sua providentia reddere posse irritas, ut eorum malitia in ipsos redundet.

Referri rem vere gestam, non confictam, etiam ex festo die patet qui in memoriam liberationis huius institutus est et qui tanquam Mardochei dies notus supponitur (2 Mach. 15,37); sollemnitates enim instituuntur ad res memorabiles celebrandas. Porro ea quae in libro Esther referuntur, ad indolem Xerxis regis eiusque mores et ad consuetudines persicas omnino congruere demonstrat pluribus *Cornely*, *Introd.* II. 1 p. 426 ss. Notari oportet textum hebr. libri esse incompletum, id quod explicatur ex eo quia liber in celebritate illa praelegebatur; verum cum celebritas illa mox liberiore modo ageretur, ea quae pietatem precesque continebant, e textu removebant eumque ad legendum breviorum reddebant. Ceterum de textibus cf. Introductiones in S. Scripturam.

I. KNABENBAUER.

ESTHON (עֶשְׁתָּו, Ἀσσαθών), filius Mahir, qui erat filius Caleb fratris Suae, ex posteritate Iuda (1 Par. 4,14); Esthon genuit Bethrapha (4,12) i. e. domum seu familiam Rapha.

ETAM (עֵיטָם; Ἀϊτάμ, Αἰτάμ). 1. Urbs tribus Simeon (1 Par. 4,32); deest loco

parallelo Jos. 19,7. Hodie *Khîrbet 'Aitûn* ab Eleutheropoli novem fere leucas anglicas meridiem versus. Cf. *Survey of West. Pal.* Mem. III. 261.

2. Urbs tribus Iuda, quam Roboam simul cum Bethlehem et Thecue extruxit i. e. amplificavit et munivit (2 Par. 11,6). Eadem recensetur inter undecim urbes, quas LXX inserunt post Jos. 15,39 tamquam quintam provinciam montis Iuda et quae in textu massorethico desiderantur. Ad eandem haud dubie referendum est, quod Flavius Iosephus (Ant. VIII. 7,3 et cf. 10,4) narrat Salomonem curru gestatum et veste candenti amictum prima luce solitum esse urbe egredi in Etam locum duobus schoenis ab Hierosolymis dissitum, hortis et aquarum laticibus amoenum et copiosum. Praeterea Talmudici testantur a fonte Etam in via Hebronem inter et Ierusalem aquaeductus fuisse in templum (cf. *Lightfoot*, Disquisitio chorogr. Ioanni praemissa c. 3, §. 5). Merito igitur urbs Etam quaeritur prope fontem 'Ain 'Atân, qui est unus ex quattuor fontibus in vicina regione lacuum Salomonis sitis prope *Urîās* paulo infra Bethlehem.

Cf. *Zeitschr. d. D. Pal.-Ver.* I. 1878 p. 152; *Guérin*, Judée III. 118. 303; *Baedecker-Benzinger*, Palaestina und Syrien ed. 5 p. 129 s.; *Zaneccchia*, La Palestine d'aujourd'hui 1899 II. 197-199; *F. de Saulcy*, voyage en Terre Sainte 1865 I. 148. 165. II. 35 s.

3. Quod legitur in genealogia Iuda 1 Par. 4,3 : Ista quoque stirps Etam, hebr. : Et hi patris Etam (vel Abi Etam), sensu caret et textus certe est corruptus. Utrum Abi-Etam sit nomen personae an appellativum : pater Etam i. e. conditor Etam vel cuius posterius in Etam habitabant, vix decidi potest. Quodsi de urbe sermo est, sola Etam tribus Iuda 2 Par. 11,6 intellegenda erit.

4. Etam petra (סִלֶּס עֵיטָם, ἡ πέτρα Ἑτάμ, Vulgata : petra Etam, silex Etam), in cuius spelunca Samson 300 canibus aureis in segetes Philisthaeorum immisisse abdidit (Jud. 15,8); cum Philisthaei ultionem capturi terram Iuda invaderent, descenderunt tria millia virorum Iuda, qui a Philisthaeis immi-

nentibus territi erant, ad illam speluncam et Samson permisit, ut duobus novis funibus ligatus de spelunca educeretur (15,9-13). Ex 15,9 colligitur hanc petram in tribu Iuda fuisse; Flavius Iosephus (Ant. V. 8,8) dicit Ἀράν fuisse petram naturam munitam (πέτρα ὀχυρά) in tribu Iuda. — De situ eius determinando variae fuerunt opiniones. In regione *Artûf*, quae in linea recta quinque horas Hierosolymis occidentem versus abest, petram Etam eiusque speluncam invenisse se existimat *Schick*; ibidem haud longe a *Khîrbet Marmîta* orientem versus est petra 'Arāk Isma'în iuxta *Wādî Isma'în* a septemtrione sita, quae habet magnam speluncam, ad quam descendere (cf. *Iud.* 15,8. 11) oportet ex quacunque demum regione veneris; idem auctor pluribus refutat opinionem, quam *Conder* proposuerat, petram Etam esse prope *Beit 'Atûb* magis Bethlehem versus quaerendam. Nihilominus *Conder* (apud *Hastings*), *Zaneccchia* et alii prope *Beit 'Atûb* petram Etam fuisse probabilius habent. Alii (*Guérin*, *Liévin de Hamme*) quaerunt petram Etam prope 'Ain 'Atân seu fontem 'Atân, quem cum urbe ETAM 2 componimus.

Cf. *Schick* in *Zeitschr. d. D. Pal.-Ver.* X. 1887 p. 144. 145; *Conder* in *Pal. Explor. Fund*, Name List p. 286 et apud *Hastings*, Dict. of the Bible I. 776^b; *Guérin*, Judée III. 118; *Liévin de Hamme*, Terre Sainte ed. 4 II. 91; *Zaneccchia*, La Palestine d'aujourd'hui 1899 I. 110.

ETHAI (אֶתַי). 1. Gethaeus, qui fideliter David fugienti adhaerens exemplum pulcherrimum fidelitatis praebuit eo tempore, quo Absalom adeo infideliter et turpiter egit in patrem (2 Reg. 15,19 ss.; 18,2. 5. 12; LXX 'Εθῆ).

2. Unus ex heroibus David, filius Ribai de Gabaath filiorum Beniamin (1 Par. 11,31; LXX Αἰβῆ); idem 2 Reg. 23,29 scribitur Ithai ('Εσθαῖ).

3. Ethai (אֶתַי, 'Ιεσθῆ), filius Roboam ex Maacha filia Absalom (2 Par. 11,20).

ETHAM (אֶתָם; LXX Ex. 13,20 'Οθώμ, Num. 33,6 Βουθάμ, 33,8 omittunt), castrametatio Israelitarum inter Socoth et Mara, in extremis finibus solitudinis sita

(Ex. 13,20; Num. 33,6), quae solitudo Num. 33,8 desertum Etham, Ex. 15,22 generaliore nomine desertum Sur audit. Desertum Etham sal magnum fuisse ex Num. 33,8 colligitur. Sine dubio Etham urbs vel arx, a qua desertum nomen habet, quaerenda est in confinibus Aegypti et deserti Sur, quod ad Arabiam perfinet. Ex iis, quae *F. de Hummelauer* ad Ex. 13,19, 20 exponit, Etham (aegyptiace *Chetem* = circumvallatio) erat arx exstructa prope ostium illius canalis, qui a Nilo apud Babasten per *Wādī Tūmīlāt* fluens in lacum *Timsāh* ducit; antiquitus autem mare Rubrum seu Saph longius ad septentrionem patebat, quam nunc patet scilicet usque ad lacum *Timsāh*. Unde merito infert *F. de Hummelauer*: «Erat ea (Etham) Aegypti clavis, qua parte terra Gessen desertum prospiciebat, cui etiam nomen inditum deserti Etham (Num. 33,8); erat simul emporium maris Rubri; nihilque magis erat obvium, quam ut Hebraei terra Gessen egressuri per Etham transirent. Sed aliud decrevit Deus, qui non populum solum liberare, sed Pharaonem confundere in animo habebat ». Haece generalis indicatio situs fundamento satis firmo nititur.

Varias coniecturas de situ accuratius determinando enumerat *Dillmann* ad Ex. 14,2: Etham esse *Bīr Abu Ruq* (*Schleiden*, Die Landenge von Sues 1838 p. 191), *Bīr Maktal* (*Ebers*), Daphnae seu *סֶהַרְפָּנָה* apud Ier. et Ezech. (*Brugsch*, L'Exode p. 25 ss.), *Bīr Sues* (*du Boys-Aymé*, *Hengstenberg*). Sunt etiam qui putent Etham non esse urbem vel arcem, a qua desertum nomen traxerit, sed regionem illam, quam papyrus Anastasi VI. appellat *Atuma*; ita *Naville*, qui regionem *Atuma* a lacu *Timsāh* occidentem et meridiem versus extensam fuisse existimat. Cf. *The Store City of Pitkom and the Route of the Exodus* ed. 3, 1887, et summarium huius operis in *Egypt. Explor. Fund.*, An Atlas of Ancient Egypt. ed. 2, 1894 p. 13-14.

ETHAN (יְתָן, Ἰεθάν, Ἀθάν, Ἀθάν).

1. Ethan Ezrahita 3 Reg. 4,31 (hebr. 1 Reg. 5,11) laudatur ob sapientiam, cum Salomon, ut eius summa sapientia

commendetur, illo sapientior esse dicatur. Qui eo loco simul cum Ethan sapientes nominantur: Heman, Chaleol, Dorda, iidem 1 Par. 2,6 filii Zare זָרֵךְ, זָרָא dicuntur. Unde Ezrahita זְרָחִיָּה, ὁ Ζαράτης vocatur tamquam ex posteris Zare. In titulo Ps. 88[89] eius nomen memoratur: Intellectus Ethan Ezrahitae. Filius Ethan est Azarias 1 Par. 2,8 (v. AZARIAS 8).

2. Ethan, levita ex familia Gersom et ex maioribus Asaph cantor 1 Par. 6, 42[27]; in genealogia inversa filiorum Gersom pro Ethan legitur Ioah 6,21[6].

3. Ethan, filius Cusi ex posteris Merari, princeps levitarum, cui una cum duobus aliis principibus Heman et Asaph cantus sacer et ministerium sacrum tempore Davidis commissum erat (1 Par. 6,44[29]; 13,17. 19). Sunt qui putent, hunc levitam esse sapientem illum Ethan Ezrahitam (3 Reg. 4,31) eumque dici Ezrahitam non ideo, quod a Zare descenderet, sed quod inter posteros Zare habitaret; quae opinio improbabilis videtur.

Probabilius autem Ethan, qui simul cum Asaph et Heman cantor erat in cymbalis aeneis concrepans (1 Par. 15, 19); idem est atque Idithun, cuius filii cum filiis Asaph et Heman a David in ministerium segregati sunt, ut prophetaient in citharis et psalteriis et cymbalis (1 Par. 25,1); v. IDITHUN.

4. Legitur Ps. 73[74], 15: tu siccasti fluvios Ethan (Ἡθάμ); sed explia יִתְּן (uti similiter Deut. 21,4; Am. 5,24; Iob 33,19) in hunc sensum: tu siccasti fluvios perennes i. e. qui semper fluunt, etiam tempore aestatis, quo torrentes siccantur; alluditur eo loco ad transitum per Iordanem (cf. Ios. 3,15-17).

ETHANIM (יְתָנִים, Ἀθανίμ) mensis (3 Reg. 8,2) i. e. mensis rivorum fluentium, qui est mensis septimus, alias Tishri; v. MENESIS.

ETHBAAL (יְתִבְעָל, Ἰεθβαάλ, Ἰεθβαάλ), rex Sidoniorum, cuius filiam Iezabel Achab rex Israel in matrimonium duxit (3 Reg. 16,31). Apud Flavium Iosephum scribitur Ἰεθβαάλος et

appellatur rex Tyrionum et Sidoniorum (Ant. VIII. 13,1); ex relatione Menandri Ephesii (cont. Apion. 1,18) erat sacerdos Astarthes, qui Phetelem fratrem suum ac throni usurpatorem interfecit et cum vixisset 68 annis, regnavit annis 32. In inscriptionibus cuneiformibus reperitur idem nomen regis cuiusdam sidonii sub forma *Tu-ba-lu* (*Schrader-Whitehouse*, Cuneif. Inscr. and Old Test. I. p. 87. 190).

ETHEEL (עֲתֵי, 'Eθtλ), Beniaminita ex maioribus Sellum (Neh. 11,7).

ETHEI (עֲתֵי, 'Eθt), filius Ieraa servi Aegyptii, ex filia Sesan genitus (1 Par. 2,35. 36).

ETHER, ATHAR (עֲתָר), urbs tribus Iuda in tertia provincia Sephelae enumerata (Ios. 13,42; 'Iθáz), tribui Simeon tradita (19,7; 'Ieθép). In enumeratione urbium Simeon 1 Par. 4,32 eadem alio nomine vocatur Thochen (תֹּחֶן, 'Θoz-zá); cf. *Keil*. ad h. l. et nota vestigium nominis Thochen etiam Ios. 19,7 haberi apud LXX inserentes 'Θαλχά inter 'Ερεμύων et 'Ieθép. Praeterea Ether lectio genuina pro Athach 1 Reg. 30,30 esse censetur (v. ATHACH). Apud Eusebium et S. Hieronymum (Onom. ed. Lag. 233, 78; 119,27) Ether dicitur villa pergrandis nomine Iethira ('Ieθepáz) in interiore Daroma iuxta Malatham (Μαλαθάμ); sed confundere videntur urbem Simeon cum Iether in australi monte Iuda (Ios. 13,48). Nostra Ether a recentioribus agnoscitur in *Khîrbet el-'Atr* prope *Beit Djibrîn* seu Eleutheropolim.

Cf. *Survey of West. Pal. Mem.* III. 261. 279; *Riess*, *Bibel-Atlas* ed. 3 p. 12; *Legendre*, *Carte de la Palestine*; *G. A. Smith*, *Hist. Geogr. of the Holy Land*, Plate I. IV; *Zanecchia*, *La Palestine d'aujourd'hui* 1899 II. 279, qui provocans ad Onom. (v. supra) existimat Ether cum *Kh. el-'Atr* componi non posse.

ETHI (עֲתֵי, 'Ieθt), Gadita, qui Davidi fugitivo se adiunxit (1 Par. 12,41).

ETHNAN (עֲתָנָן, 'Eθανáz), unus ex posteris Iuda, filius Assur patris Thecuac, ex Halaa genitus (1 Par. 4,7).

ETHNARCHA (ἔθναρχης), in Vulgata princeps gentis, praepositus gentis. Eo nomine appellantur, qui praefecti sunt alicui genti, sed dignitate regia non sunt insigniti. Tali auctoritate pollebant Simon Machabaeus, qui a magno conventu sacerdotum et populi et principum gentis et seniorum regionis (die 18. Elul anni 172 aer. Seleuc. seu mense Sept. 141 a. Chr.) declaratus est summus sacerdos, dux et princeps (ἔθναρχης) Iudaeorum in aeternum, donec surgat propheta fidelis (1 Mach. 14,47; cf. 13,1 et etiam 14,27 de quo loco v. ASARAMEL) et ethnarcha ille Damasci, qui nomine et auctoritate regis Arabum Aretae administrabat civitatem, quem Iudaei induxerant, ut ad comprehendendum Paulum apostolum custodes ad portas civitatis poneret (2 Cor. 11,32; cf. Act. 9,24).

Munus ethnarchae, qui Iudaeis alexandrinis magnam partem urbis Alexandriae seorsum incolentibus praeerat, hisce describit Strabo apud Flav. Iosephum (Ant. XIV. 7,2): « suis illis ethnarcha est, qui gentis res administrat et iudicia exercet curatque contractus et mandata, quasi esset reipublicae suis legibus utentis princeps » (cf. Ant. XIX. 3,2 de ethnarchis alexandrinis et *Schürer*, *Geschichte des jüdischen Volkes* etc. ed. 3 III. p. 40. 41). In Palaestina quoque Romani interdum ethnarchas constituerunt. Decreto Caesaris a. 47 a. Chr. Hyrcanus II. ethnarcha Iudaeorum cum iure hereditario successionis declaratus est (Ant. XIV. 8,5; 10,2 s.). Caesar Augustus Archelaum filium Herodis Magni Iudaeae, Samariae, Idumaeae ethnarcham constituit pollicitus regii nominis honorem, si dignam rege virtutem praestitisset (Ant. XVII. 11,4; Bell. iud. II. 6,3); immerito autem adnotat *Schürer* l. c. I. 450 ed. 3, Archelaum a Matthaeo 2,22 indiligenter (*ungenau*) appellari βασιλεύς sicuti etiam a Iosepho Ant. XVIII. 4,3 (vide s. v. ARCHELAUS).

Quae Origenes in Epist. ad Africanum §14 (*M.* 11,82. 83) de sua aetate testatur: « Certe nunc cum Iudaei Romanis imperantibus didrachma pendunt, quantum concedente Caesare in ipsos auctoritatem habeat ethnarcha, ut nihil differat ab eo,

qui regnum obtineret in gentem, scimus qui summus experti», procul dubio non ethnarcham proprie dictum constitutum esse arguunt, sed potius referuntur ad illud consilium lamniense, quod syndrio antiquo successerat et Romanis concedentibus iurisdictionem in litibus civilibus exercebat, forte etiam in criminalibus usurpabat.

ETHNICUS, gentilis, gentes. Hisce nominibus designantur qui non sunt originis iudaicae et qui cultum unius veri Dei ignorant, qui dediti sunt idolatriae. Potuisse gentes acquirere cognitionem veri Dei et proinde homines atheos vel idololatrias non sine sua culpa ignorare Deum, clare docetur in s. litteris. Id praeprius exponitur Sap. 13,1 s. et 14,15 quaedam de occasione qua oriri poterat idololatria tanguntur, quae quam stulta sit perstringitur Is. 44,12 s. Ier. 10,3 s. Bar. 6,1-72. Gentes cognovisse Deum totidem verbis affirmat Paulus apostolus; at simul declarat quomodo ad turpissimam idololatriam pervenerint: quia cum cognovissent Deum, non sicut Deum glorificaverunt aut gratias egerunt (cf. Rom. 1,19 s.); Deum non sine testimonio semetipsos reliquisse, verum sese satis opere creationis gentibus manifestasse neque longe abesse ab unoquoque, ita ut inveniri possit, idem repetito docet (Act. 14,16; 17,27; Rom. 1,19. 20); sed idem neglectum cultum Dei assignat causam, cur in tenebras mentis et in abominanda scelera devenerint (Rom. 1,21. 24. 26). Idem clare affirmat daemones suas agere partes in idololatria: quae immolant gentes daemoniis immolant (1 Cor. 10,20). At simul asserit gentes lege quadam naturali in cordibus inscripta doceri quid sit rectum, bonum, malum et proin iuste a Deo puniri, siquidem veritatem in iniustitia detinent (Rom. 2, 14-16; 1,18); nam ex prava voluntate procedere ait tenebras intellectus adeoque gentes eo devenisse, ut desperantes semetipsos tradiderint impudicitiae in operationem immunditiae omnis (Eph. 4, 18. 19) et scelerum sat longum lexit catalogum (Rom. 1,26-32; 1 Cor. 6,9. 10).

Populus Dei ipsa sua regione, legi-

bus, institutis a commercio cum gentibus arcebatur. Ingressuri Palaestinam iubentur aras et statuas eorum destruere; tamquam qui missi sunt vindices Dei ad scelera ingentia punienda iubentur gentes illas quam maxime peccatrices percutere usque ad interuersionem (Deut. 7,2; Sap. 12,6 s.); « non inibis cum eis foedus, neque sociabis cum eis coniugia » (cf. Ex. 23,32; 34,15. 16; Deut. 7,2. 3). Etiam a superstitionibus variis et artibus magicis gentium ut sibi caveant serio monentur (Deut. 18,9-14). Quotiescumque autem a lege et cultu Dei defecerunt, traditi sunt in potestatem et servitutem gentium, cuius rei perpetuum quasi commentarium praebent libri historici secundum mias Deut. 28,47 s. iam propositas. Si autem ad Deum conversi fuerint, habet Dominus inimicos corruentes in conspectu eorum (Deut. 28,7); quare prohibet quoque ne foedera incant cum alienigenis ad se contra hostes tutandos. Eiusmodi foedera severe reprehenduntur a prophetis (cf. Is. 30,1 s.; 31,1 s.; quam perversum id sit, expertus est Achaz Is. 7,17; 8,6 s.; 2 Par. 28,20. 21; Ier. 2,18; Ez. 16,28 etc.); Deus enim ipse populum, si fideliter legem servaverint, tueri voluit ab hostibus; quare Ezechiae regi ceteroquin pio male cessit amicitia cum Babylois (4 Reg. 20,12-18; Is. 39,1 s.) et frustra tempore obsidionis urbis expectarunt auxilium ab Aegyptiis (cf. Ier. 37,6-10).

Neque tamen istis prohibitionibus docetur odium in alienigenas. Verum e contra lege praescribitur: advenam non contristabis neque affliges; peregrino molestus non eris; sit advena inter vos quasi indigena et diligetis eum quasi vosmetipsos (Ex. 22,20; 23,9; Lev. 19, 33; Deut. 10,17-19) et sicut patriarchae, Abraham et Isaac, pactis cum alienigenis ad pacem habendam utebantur (Gen. 21,27. 32; 26,28). ita David quoque et Salomon emolumenta hand exigua derivabant ab amicitia cum Iliam rege Tyrriorum, cuius ope praepriis usus est Salomon ad templum magnifice construendum (cf. 2 Reg. 3,11; 3 Reg. 5, 1 s.); eodem modo simul cum Tyriis instituendam curavit classem quae ibat in

Ophir et inde portabat aurum, ligna thyina, gemmas pretiosas (3 Reg. 9,26; 10,11; 2 Par. 8,18; 9,10) etc. Pariter teste Ezechiele Iuda et terra Israel institores erant Tyriorum in frumento primo; balsamum et mel et oleum et resinam proposuerunt in nundinis eorum (27,17; cf. Act. 12,20). Negotiatio itaque cum alienigenis prohibita non erat; immo Deut. 15,6 promittitur populo fidei observatori legis: faenerabis gentibus multis (Deut. 15,6) et ab alieno faenus accipere et usuram licebat (Deut. 20,23). Tempore quoque Nehemiae Tyrii vendebant pisces filiis Iuda in Ierusalem (Neh. 13,16).

Quamdiu stetit regnum israeliticum et regnum iudaicum, filii patriarcharum exemplo gentium in multiplicem idololatriam inducebantur et in scelera ei adiuncta, de qua iniquitate pleni sunt libri historici et prophetarum. Poena condigna iis inflicta est ruina regni et abductione in regiones alienigenarum. Etiam multi ex iis qui ex exilio redierunt connubiis cum alienigenis initis fatalem illam cum vitiis gentium familiaritatem iterum fovere velle videbantur. Huic periculo vehementer atque feliciter sese opposuerunt Esdras et Nehemias; mulieres alienigenae expulsae sunt (Esdr. 9,1-10,44; Neh. 9,1. 2. Disciplina legis ita eruditus est populus, ut tempore Machabaeorum quamvis non deessent apostatae tamen fortiter contra aggressores legis dimicatum sit. Et quae fuerit postea multorum Iudaeorum in alienigenas mens ac sententia, nobis describit apostolus: confidis te ipsum esse ducem caecorum, lumen eorum qui in tenebris sunt, eruditorem insipientium, magistrum infantum (Rom. 2,19. 20); cui opinioni testimonium quoque reddit Petrus: vos scitis, inquit, quomodo abominatum sit viro Iudaeo coniungi aut accedere ad alienigenam (Act. 10,28), et Iudaeo-Christiani disceptabant adversum eum: quare introisti ad viros praepitium habentes et manducasti cum illis (Act. 11,2. 3)? Hisce illustratur quid sibi velit illud: si ecclesiam non audierit, sit tibi sicut ethnicus et publicanus (Matth. 18,17).

Singularem utique curam et provi-

dentiam Deus populo suo impertivit (cf. Ex. 19,3; Ps. 147,20; Rom. 9,4. 5), sed et gentibus quoque Deus pro sua bonitate opem tulit; diligit enim omnia quae sunt et nihil odit eorum quae fecit (Sap. 11,25). Cuius curae argumenta in s. literis reperiuntur sat multa. Nam praeter documenta illa generalia quibus asseritur gentibus non defuisse auxilia Deum cognoscendi (Sap. 13,1; Act. 14,16; Rom. 1,19 s.), Deum velle omnes homines salvos fieri et ad agnitionem veritatis pervenire (1 Tim. 2,4), multa sunt quibus haec Dei cura demonstratur. Ita gentes quoque numerantur inter filios a Deo eo quod Israel vocat filium suum primogenitum et eum inter filios dicit voluisse exaltare (cf. Ex. 4,22; Ier. 3,19); neque desunt occasiones quibus Deus se et suam potentiam et dominium rerum omnium gentibus manifestat; ita praecipuis per Moysen in Aegypto (Ex. cap. 3 s.) et quae Deus pro suis patravit, etiam aliis nationibus innotuerunt (cf. Ex. 15,14. 15) et Rahab dicit: audivimus quod Dominus siccaverit aquas maris Rubri ad vestrum introitum etc. et fatetur: Dominus Deus vester ipse est Deus in caelo sursum et in terra deorsum (Jos. 2,10 s.). Eliseus, Ionas, Daniel maiestatem Dei gentibus quoque annuntiabant (cf. 4 Reg. 5,8 s. Ion. 1,2; 3,2 s. Dan. 2,28 etc.); porro vaticiniis prophetarum contra gentes editis Deus se manifestat regem ac gubernatorem omnium (cf. Is. 13,1 s. Ier. 25,19 s.; 46,1 s. Ez. 25,1 etc.), ostendit in iis a suo nutu et voluntate regna terrae pendere et se ad sua consilia exsequenda uti gentibus. Cumprimis autem Dei consilium salutare de gentibus elucet in vaticiniis messianis. Promissio enim de regno Dei in terris stabiliendo et de bonis divinis hominibus communicandis ab initio omnes spectat gentes; in universum per semen mulieris promittitur victoria de insidiatore (Gen. 3,15), Iapheth habitabit in tabernaculis Sem, cui benedictio confertur (Gen. 9,27), in Abraham et semine eius omnes gentes benedicentur (Gen. 12,3; 18,18; 22,18; 26,4); regi Messiae in hereditatem dantur gentes et fines terrae (Ps. 2,8; 21,28; 71,8 s.), ad montem Dei

elevatum ascendent populi multi; terra repleta erit scientia Domini, Messiam deprecabuntur gentes, ille erit lux gentium, ut sit salus Dei usque ad extremum terrae, gentes ambulabunt in lumine gloriae Domini (cf. Is. 2,2; 11,9. 10; 42,6; 49,6; 60,3); tunc dicendum erit: benedictus populus Dei Aegyptus, opus manuum Dei Assur (Is. 19,25); tunc congregabuntur ad civitatem Dei omnes gentes (Ier. 3,17); ipse Messias loquetur pacem gentibus et potestas eius a mari usque ad mare et a luminibus usque ad fines terrae (Zach. 9,10) etc. etc. Hisce oraculis congruunt verba et mandata Christi (Matth. 28,19; Marc. 16,15; Ioan. 10,16; Act. 1,8), congruit praedicatio apostolorum; immo evenit, ut gentes quae non sectabantur iustitiam apprehenderent iustitiam, Israel vero in legem iustitiae non pervenerit (Rom. 9, 30. 31). Iudaei enim, cum gentes admitterentur in regnum Messiae sine lege mosaica media, sine circumcisione, repleti sunt zelo blasphemantes; vanitate sua nationali et odio in gentes concepto se ipsos excluserunt a regno Messiae (cf. Act. 13,43) et cum audirent Paulum narrantem Dominum sibi dixisse: vade quoniam ego in nationes longe mittam te, levaverunt vocem: tolle de terra huiusmodi; non enim fas est cum vivere; proficiunt vestimenta quasi iam iam eum lapidaturi (Act. 22,24 s.). Atque gentes priores in regnum Messiae ingressuras esse Iudaeis renuentibus Isaias iam praedixerat (Is. 65,12; Rom. 10,20) et Christus claris verbis et parabolis significavit (cf. Matth. 8,11; 21,43; 22,8). Ita igitur Deus, qui est Deus omnium, dives in omnes (Rom. 10,12) fecit gentes coheredes, medium parietem solvit, ut gentes iam non sint hospites et advenae, sed cives sanctorum et domestici Dei (Eph. 2,14 s.) et tamquam tales cernuntur in gloria: vidi turbam magnam quam dinumerare nemo poterat ex omnibus gentibus et tribubus et populis et linguis stantes ante thronum et in conspectu Agni, amicti stolis albis et palmae in manibus eorum (Apoc. 7,9). Hoc itaque consilium est Dei, qui omnia conclusit in incredulitate, ut omnium misereatur (Rom. 11,32); nam an lu-

daeorum Deus tantum? nonne et gentium? immo et gentium (Rom. 3,29).

I. KNABENHAUER.

ETROTH (עֲרֹתָהּ; Vulgata:

Etroth et Sophan; Σοφάρ, cod. A γῆν Σοφάρ omissa priore parte nominis), urbs a filiis Gad reaedificata (Num. 32,25). Secundum textum hebraicum non nisi una urbs Atroth Shophan indicatur, quae addito Shophan ab urbe Atroth (*Khîrbet 'Affârûs* v. 34 distinguitur. Situs accuratior ignoratur. Si vero propter nominis similitudinem in vicinitate *Djebel 'Affârûs* sita esse supponitur, iis urbibus accensenda erat, quae postea filiis Ruben traditae sunt (cf. Jos. 13,16. 17).

EUBULUS (Εὐβούλος), Christianus Romae degens, de quo S. Paulus scribit: salutant te Eubulus et Pndens etc. (2 Tim. 4,24). Ceterum nihil de eo innotuit.

EUERGETES (Εὐεργέτης), cognomen Ptolemaei III. et Ptolemaei VII. (IX.) regum Aegypti. Quaestio de Euergete, cuius mentio fit in Prologo ad Ecclesiasticum, intime connexa est cum altera quaestione de summo sacerdote Simone Oniae filio (cf. Eccli. 50,1-21); quare v. SIMON 2.

EUMENES (Εὐμένης) II. rex Pergami (197-159 a. Chr.), filius Attali I., erat socius Romanorum contra Antiochum III. Magnum, praecipue in proelio ad Magnesium (189 a. Chr.); quare Antiocho III. devicto accepit a Romanis de regno eius Indiam, Mediam, Lydiam (1 Mach. 8,8). Textus ita emendandus esse aliquibus videtur, ut pro India substituatür Ionia (*Grotius*) et pro Media Mysia (*Michaëlis*); Antiochus III. enim Indiam nunquam possederat et Mediam Romanis cedere non coactus est; ea vero, quae Eumeni II. de regno Antiochi III. a Romanis data sunt, indicat *Livius* 37, 33: « ut eis Taurum montem, quae intra regni Antiochi fines fuissent, Eumeni attribuerentur, praeter Lyciam Cariamque usque ad Maeandrum amnem ». Ceterum adverte s. auctorem 1 Mach. 8,1 s. referre, quae Iudas Mach. de Romanis *audivit*, ut nobis explicet, cur Iudas

foedus cum Romanis inire quaesierit; quare mirum non est ibi aliqua narrari, quae rumore quidem et fama ferebantur, sed rebus vere gestis ex veterum scriptorum testimoniis non comprobantur. — De Eumene II. cf. *Livius* 37,39. 41. 55. 56; 38,38. 39; *Epitome* 46; *Appian*. Syr. 31 s. 44; *Strabo* XIII. 4,2; *Iustin*. 31,8; *Polyb*. XXI. 8.1 s.; 13,5; 14,3 s. XXII. 7,7.

EUNICE (Εὐνίκη), mater Timothei discipuli Pauli apostoli (2 Tim. 1,5), quae vocatur Act. 16,1 mulier Iudaea fidelis et quae ante Timotheum fide sincera Christo nomen dederat, uti ex 2 Tim. 1,3 consequitur; ab ea sine dubio Timotheus ab infantia in sacris literis instructus est (2 Tim. 3,15).

EUNUCHUS (εὐνοῦχος) proprie qui cubiculum curat, cubicularius qua voce hebr. כְּרִים vertitur. Spadones apud exterarum gentes custodes erant mulierum; cf. Esth. 1,10; 2,3. 14; 4,4 etc.; Dan. 1, 3. 7 eunuchi quoque educationi puorum praeficiuntur. Verum Israelitis eiusmodi mutilatio lege erat interdicta; neque qui eam passus erat populo Dei poterat aggregari (Deut. 23,1). Si itaque in aula et in servitio regum Israelitarum mentio fit eunuchorum, hi vel alienigenae sunt (Ier. 38,7 Abdemelech, vir Aethiops eunuchus) vel vox כְּרִים adhibetur notione quadam generali de aulico et ministro regio. Neque unquam apud Iudaeos, quantum ex libris historicis colligi potest, isti qui appellantur eunuchi ad custodiam gynaecei adhibentur. Porro nequit dubitari quin vox כְּרִים etiam dicatur de eo qui non sit spado; exemplum habes Gen. 37, 36; 39,1 ss.; nam Putiphar dicitur eunuchus et tamen habet uxorem, quod exemplum qua notione apud Iudaeos vox valuerit probat, etsi quis falso diceret cum aliquibus criticis narrationes ibi diversas esse coniunctas. Praeterea eunuchi variis funguntur ministeriis, sunt belli duces (4 Reg. 18,17; 23,19 eunuchus, qui erat praefectus super bellatores viros) et ad varia officia a regibus deputantur (cf. 3 Reg. 22,9; 4 Reg. 8,6); unde facile explicatur cur nomen demum latiore sensu de ministris aulicis regum sit usurpatum.

Quamvis qui vere erant eunuchi non possent intrare ecclesiam Domini (Deut. 23,1), tamen uberes ipsis promittuntur favores et benedictiones Dei, si pietatem coluerint; cf. Is. 56, 4. 5; Sap. 3,14. Denum per quamdam analogiam dicuntur eunuchi a Christo Domino illi, qui sua sponte propter regnum caelorum vitam eligunt caelibem, quod verbum utique non omnes capiunt, sed quibus datum est; qui potest capere capiat (Matth. 19, 11. 12).

EUPATOR (Εὐπάτωρ) v. Antiochus V. s. v. ANTIOCHUS 4.

EUPHRATES (פְּרָת, Εὐφράτης), fluvius maximus Asiae occidentalis, assyriace *Pura-numu* i. e. fluvius magnus vel *Pura* i. e. fluvius et cum suffixo feminino *Purat* vel *Purattu*, persice *Ufrātu*, arabice *Frat*. Uti apud Assyrios, ita in sacris libris quoque fluvius magnus appellatur (Gen. 15,18; Deut. 1,7; 11,24; Ios. 1,4; Apoc. 9,14; 16,12), per antonomasiam etiam simpliciter הַנְּהָר, flumen (Gen. 31,21; Ex. 23,31; Num. 22,5; Ios. 24,2; 2 Reg. 10,16; 3 Reg. 4,21. 24; 14, 15; 1 Par. 19,16; 2 Par. 9,26; Neh. 2,7. 9; 3,7; Ps. 71[72],8; 79[80],12; Is. 8,7; 14, 15; 27,12; de Gen. 36,37 et 1 Par. 1,48 v. ROHOBOH 1). Euphrates est fluvius quartus paradisi (Gen. 2,14). Terra, quae posteris Abraham promittitur, designatur terra a fluvio Aegypti usque ad Euphraten (Gen. 15,18; Ex. 23,31; Deut. 1,7; 11,24; Ios. 1,4), quam latitudinem regnum Salomonis habuisse dicitur 3 Reg. 4,21. 24 [hebr. 1 Reg. 5,14]; 2 Par. 9, 26. Praeterea v. 2 Reg. 8,3; 4 Reg. 23, 29; 24,7; 1 Par. 5,9; 18,3; 2 Par. 35,20; Iudith 1,6; 2,14; Ier. 13,4-7; 46,2. 6. 10; 51,63; 1 Mach. 3,32. 37. Symbolice nominatur Euphrates ad designandum hostium impetum (Is. 8,7; 11,15; cf. Ier. 2,18). Sapientia Salomonis aquis Euphratis comparatur (Eccli. 24,36).

Euphrates in montanis Armeniae ex duobus fluviis, qui ab oriente occidentem versus fluunt, coalescit scil. ex Euphrate orientali (*Murad-sū*), qui oritur iuxta *Ala Dagh* montem 3125 m altum et ex *Kūra-su*, qui prope Erzerum prosilit. Brevi post coniunctionem Euphrates

cum multis flexionibus Taurum meridiem versus perumpit, a dextera parte tributarium *Sādjār* recipit paulo infra *Djerābis*-Europos (Charcanis), mox Mesopotamiam percurrens magis magisque inter meridiem et orientem dirigitur, a sinistra parte tributarios recipit *Belikh* prope *Rakka* (Niephorium) et *Khabūr* (Habor, Chaboras) prope *Karkesia* (Circesium), demum hand procul a vico *Korna* cum Tigride coniunctus *Shatt el-'Arab* i. e. flumen Arabum audit et in sinum Persicum effunditur.

Attamen antiquitus ostia Euphratis ac Tigridis inter se distabant, ut Plinius (VI. 27,130) testatur et documenta cuneiformia confirmant. Notum est illam regionem, quam *Shatt el-'Arab* nunc permeat, nonnisi paulatim ortam esse, cum mare continuo recesserit ac novos alluvii tractus litori concesserit.

Cf. *Schrader-Whitehouse, Cuneif. Inscrip. and Old Test.* I. p. 34 s.; *Delitzsch, Paradies* p. 169 s.; *Ritter, Erdkunde* X.; *A. H. Layard, Nineveh and Babylon* p. 19. 467. 474. 475. 492; *Chesney, The Expedition of the Survey of the rivers Euphrates and Tigris*, London 1850; *Loftus, Chaldaea and Susiana* p. 282; *H. Rawlinson in Journ. of the R. Geogr. Soc.* XXVII. p. 186.

EUPOLEMUS (Εὐπόλεμος), filius Ioannis filii Iacob (Azzōs), simul cum Iasone legatus Romam missus a Iuda Machabaeo, ut amicitia et societas cum Romanis constitueretur (1 Mach. 8,17; 2 Mach. 4,11). Fortasse idem est atque Eupolemus ille historiographus, qui de Iudaeae regibus scripsit a. 158/157 a. Chr. vel brevi post, cuius fragmenta exhibent Alexander Polyhistor (cf. *C. Müller, Fragm. Hist. Gr.* III. 207 s. fragm. 3. 13. 18. 20. 24), Clemens Alex. (Stromata I. 21 et 23 apud *Migne* 8, 877.900), Eusebius Praep. evang. 9,17. 26. 30-34 apud *Migne* 21,705. 728. 748-753), Chronicon paschale (ed. *Dindorf* I. 117), Georgius Cedrenus (ed. *Bekker* I. 87); quem ethnicum fuisse opinatur quidem Flavius Iosephus (cont. Ap. 1,23), sed Iudaeum asserunt Eusebius (Hist. eccl. VI. 13,7) et S. Hieronymus (De viris illustr. c. 38).

Cf. *E. Schürer, Geschichte des jüdischen Volkes etc.* ed. 3 I. 220. III. 351-354 et quae

ibidem de Eupolemo historiographo allegantur.

EUROAQUILO, nomen venti flantis ex regione aquilonari Act. 27,14, ventus typhonicus (i. e. ventus procellosus), ut ibidem vocatur, quia navis abripiebatur et ad insulam Caudani (vide s. v.) appellabatur. Lectio graeca fertur varia; vocatur enim ventus *εὐροαζύδων* quasi late fluctuans, vel apud alios *εὐροαζύδων* *Eurus* fluctus excitans (?) vel *εὐραζύλων* quae vox est ipsa illa quam h. l. praebet Vulgata.

EUTYCHUS (Εὐτυχός), iuvenis qui dum Paulus apostolus Troade, profecturus in crastinum, sermonem protraheret usque ad mediam noctem, somno oppressus e fenestra tertii coenaculi decidit, quem sublatum mortuum Paulus descendens et (ut olim Elias) incubans super eum ad vitam revocavit (Act. 20,7-10).

EVA v. HEVA.

EVANGELIUM (εὐαγγέλιον; voce etymologice designatur nuntius bonus, laetus; nomine *εὐαγγελίζεσθαι* LXX reddiderunt *בשר בשר* laetum afferre nuntium (cf. 1 Sam. 31,9; 2 Sam. 1,20; 48,19) et iam adhibetur vox de laeta annuntiatione beneficiorum messianorum Is. 40,9; 52,7; 60,6; 61,1. Atque eo sensu potissimum usurpatur in libris sacris novi foederis. Est quippe evangelium laetus nuntius de regno Dei, de Messia, de salute messiana, de doctrina et beneficiis Messiae. Dicitur evangelium Dei de Filio suo (Rom. 1,1. 3., quatenus Deus est auctor et largitor bonorum in illo nuntio hominibus oblato et quatenus Deus hunc nuntium, hoc praeconium laetum ac salutare hominibus mittit; dicitur evangelium de Filio quatenus Filius Dei illo nuntio praedicatur scilicet quis sit, quae egerit, quae bona attulerit, quae docuerit. Eodem sensu dicitur evangelium Filii Dei, Christi, Domini nostri, regni Dei vel regni i. e. de Christo, de regno (cf. Matth. 4,23; 9,35; Marc. 1,1. 14; Rom. 15,19; 1 Cor. 9,12; 2 Thess. 1,8 etc. etc.); evangelium salutis nostrae (Eph. 1,13), pacis (6,15), quia eo praeconio salus et pax nobis annuntiatur et nuntio illo ac-

cepto salus et pax in nobis efficitur; evangelium gratiae Dei, gloriae Christi, gloriae beati Dei (Act. 20,24; 2 Cor. 4, 4; 1 Tim. 1, 11), quia in eo praeconio haec nobis manifestantur et in rebus illo nuntio nobis patefactis haec eximio modo relucet. Dicitur spes evangelii i. e. spes quae nuntio illo messiano continetur et foveatur (Col. 1,23), veritas evangelii, quae ea annuntiatione docetur, vera doctrina quae ibi continetur (Gal. 2,3. 14); fides evangelii firma persuasio qua quis nuntium illum amplectitur (Phil. 1,27). Porro si Paulus dicit evangelium meum, nostrum (Rom. 3,16; 16,25; 2 Cor. 4,3 etc.) intellegit praeconium suum et modum quo ipse tradit evangelium; si loquitur de evangelio circumcisionis, praepulii (Gal. 2,7), quod Petro, sibi commissum sit, dicit salutem messianam quae annuntianda sit Iudaeis, gentibus, proin munus et officium praedicationis Iudaeis et gentibus faciendae. Advertendum itaque est in sacris libris evangelium nunquam dici de libro scripto, qui usus vocis ad tempora posteriora pertinet.

Ex notione evangelii colligitur quoque significatio *evangelistae*; est evangelista in sacris litteris is qui nuntium illum laetum, evangelium, perfert et annuntiat. Eo nomine in libris novi foederis appellantur praedicatores evangelii qui non accensentur apostolis. Ita vocatur Philippus qui erat unus de septem (Act. 21,8); cf. Eph. 4,11 et Timotheo scribit apostolus: opus fac evangelistae (2 Tim. 4,5).

EVI (אֵוִי, Ε῰ίς), unus ex quinque principibus Madianitarum, qui occisi sunt in proelio, quod contra Madianitas propter seductionem Israelitarum commissum est (Num. 31,8; cf. 25,1 s.). Idem los 13,21 scribitur in Vulgata Hevaeus; LXX Ε῰ί.

EVILMERODACH (אֵוִיל מֶרֶדַּח; 4 Reg. 25,27 Εὐλαμερῶδης, Ier. 52,31 Ὀυλαμερῶδης), filius et successor Nabuchodonosor, qui teste Beroso Chaldaeo (apud Flav. Ios. Cont. Ap. 1,20) duos annos regnavit (vel accuratius 562-559 a. Chr.) et anno trigesimo septimo transmigrationis Iochin i. e. anno quo ipse Evil-

merodach regnare coepit, Iochin e carcere liberavit eumque ad suam mensam adhibuit (4 Reg. 25,27-30; Ier. 52, 31-34); quae exaltatio erat quasi augurium quoddam, quod Deus populum suum iterum ad meliorem conditionem esset adducturus. Nomen regis babilonicum est *Avil* (*Amil*, ut alii legunt) *Marduk* i. e. servus *Marduk* dei, uti multa alia nomina similia reperiuntur *Amil-Assur*, *Amil Ea*, *Amil Bel* etc. (cf. *Strassmaier*). *Amil* autem vel *Avil* aramaice transcribitur אִמִּל (v. Corpus inscript. semit., Paris 1889, I. 2 p. 66), quare Evilmerodach nomen nequit dici cum *Gesenio* (Thesaurus p. 41), aliisque a Iudaeis ad linguae suae similitudinem esse detortum, ut ex eo *stultum* (cultorem) Merodachi efficerent.

Cf. *Strassmaier*, Die babil. Inschriften im Museum zu Liverpool, Leide 1885 p. 34; *Inschriften von Nabuchodonosor*, Leipzig 1889 p. 24; *F. Vigouroux*, La Bible et les déc. mod. ed. 6 IV. 339-340.

EVODIA (Εὐδία); de ea scribit Paulus: Evodiam rogo et Syntychem deprecor idipsum sapere in Domino Phil. 4,2; illas laborasse cum apostolo in evangelio, etiam dicit in v. 3; ex quo simul elucet eas esse revera mulieres (ἐνάτις, αἴτινες), non, ut aliqui putarunt, viros; insuper Εὐδίας nomen est viri. Eas itaque instantur adhortatur apostolus ad concordiam. Qua in re fuerint non unius sententiae, frustra inquiritur.

EXCELSA, עֵצֶל סֶלֶת, dicuntur altaria, sacella in montibus et collibus erecta, in quibus Israelitae sacrificare solebant vel Deo vel idolis. Antequam templum exstrueretur i. e. antequam Deus unum eligeret locum quem in una tribu se electurum promiserat (cf. Deut. 12,13. 14), valuit lex data Ex. 20,24: altare de terra facietis mihi et offeretis super eo holocausta et pacifica vestra in omni loco in quo memoria fuerit nominis mei i. e. ubicumque Deus singulari modo se manifestaverit. Ita Gedeon iubetur accepta revelatione: aedificabis altare Domino Deo tuo in summitate petrae huius super quam antea sacrificium posuisti (Iud. 6, 26) et David quoque iubetur constituere altare ibi, ubi angelus Domini percuteus

urbem peste steterat (2 Reg. 23,18; 1 Par. 21,13). Verum etiam templo erecto populus non cessabat cultum exercere illicitum in excelsis. In regno Israel hic cultus a rege Ieroboam maxime promotus est: fecit fana in excelsis, constituit in Bethel sacerdotes excelsorum, fecit de novissimis populi sacerdotes excelsorum (3 Reg. 12,31. 32; 13,33) et Israelitae aedificaverunt sibi excelsa in cunctis urbibus suis (4 Reg. 17,9; 23,19); ibi idololatriam et vitia ei coniuncta esse exercita ex Osee propheta et ex rebus gestis Eliae abunde constat. Etiam in regno iudaico excelsa retinebantur et sicut populus ante erectionem templi in excelsis immolabat (3 Reg. 3,2) et ipse Salomon quoque (3 Reg. 3,3), ita templo erecto pergebant. Nam continuo in historia sacra usque ad Ezechiam regem dicitur de unoquoque fere rege: excelsa autem non abstulit 3 Reg. 15,14 de Asa, 22,44 de Iosaphat, 4 Reg. 12,3 de Ioas, 14,4 de Amasia, 15,4 de Azaria, 13,33 de Ioatham; 16,4 Achaz immolabat victimas et adolebat incensum in excelsis. Ezechias autem, uti idololatriam extirpare studuit, ita excelsa quoque dissipavit (18,4. 22); verum impius eius filius Manasses ea iterum aedificavit et idololatriam summo opere fovit (21,3), quas abominationes Iosias rex demum sustulit (23,5) qui contaminavit excelsa de Gabaa usque Bersabee et excelsa quae erant in Ierusalem ad dexteram partem montis offensionis quae aedificaverat Salomon et excelsum in Bethel et omnia fana excelsorum in civitatibus Samariae abstulit et occidit sacerdotes excelsorum et combussit super altaria excelsorum ossa humana, ut scil. ea loca redderentur impura (23,8. 13. 15. 19. 20; 2 Par. 34,3).

In istis excelsis et Domino esse sacrificium, in aliis autem idolis elucet quoque ex iis quae narrantur v. g. 2 Par. 14,2 Asa subvertit altaria peregrini cultus et excelsa et 17,5 Iosaphat excelsa et lucos de Iuda abstulit; alibi dicitur eos ipsos non abstulisse excelsa, ut supra vidimus (cf. 2 Par. 20,34) i. e. excelsa quae Domino dedicata erant non abstulerunt; excelsa autem idolorum destruxerunt. Quae acceptio inde quoque confir-

matur, quia 2 Par. 14,2 et 17,5 excelsa commemorantur simul cum cultu peregrino et statuis vel symbolis idolorum (17,5 asherim). In cultum hunc excelsorum prophetae quoque invehebantur; cf. Is. 57,5-7; 63,7; Ier. 2,20; 3,6; 7,31; 17, 2. 3; 19,5; et aedificaverunt excelsa Baalim ad comburendos filios suos igni in holocaustum Baalim; Ez. 6,13; 16,16. 31: excelsum tuum fecisti in omni platea, unde simul discimus altaria erecta in quovis loco paululum editiore vocata esse בְּרִיחַ (20,28; 22,9; Os. 10,8; Mich. 1,5).

Cur eligantur montes, colles vel etiam construantur loca paulum editiora ad cultum divinum, explicari potest ex sententia omnibus fere gentibus communi, cum numen divinum habitet in excelso caelo, regiones caelo propiores cultui eius esse aptiores et ad cultum divinum opus esse, ut quis e rebus terrenis et infimis emergat. Est scil. ille cultus res quaedam sublimis, regione terrestri eminentior; quare omnino decere videtur, ut haec sublimitas exprimaturo loco selecto qui a communi regione sit remotus et habitaculo divino quasi appropinquet. Praeterea hic cogitandi modus quasi sancitur et commendatur eo quod Abraham sacrificium offerre iubetur super unum montium quem monstravero tibi (Gen. 22,2) et quod iam antea in monte erexit altare Domino (Gen. 12,8) et quod Iacob immolavit victimas in monte (Gen. 31,34).

I. KNABENBAUER.

EXCELSA redditur his hebr. רָמֹת

Iob 28,18 et Prov. 24,7 (cf. Ez. 27,16 Vulgata: sericum), vox dubiae significationis, quam plerique corallia explicant.

Cf. *W. Gesenius*, Thesaurus 1249; *J. Wellhausen*, Reste arab. Heidentums ed. 2, Berlin 1897, 163; *Gesenius-Buhl*, Handwb. ed. 13, 754 a.

EXCOMMUNICATIO. In s. litteris vox quidem excommunicationis non legitur, at res quam ea voce designamus indicatur. De excommunicatione synagogae vide s. v. ANATHEMA. Uti ethnici et publicani a coetu religioso Iudaeorum

exclusi erant, ita Christus declarat Matth. 18,17 s. excommunicandum esse eum, qui Ecclesiae iudicio non acquieverit et Ecclesiae sententiam apud Deum quoque ratam haberi. Eiusmodi sententiam exclusionis pronuntiavit apostolus contra incestuosum illum Corinthium (1 Cor. 5,3 s.), quem tamen acta poenitentia ab omnibus iterum magna caritate suscipi vult (2 Cor. 2,8); a commercio exclusum vult fratrem i. e. hominem christianum qui publice notus sit fornicator, avarus, idolis serviens, maledicus, ebriosus, rapax (1 Cor. 5,11). Simile quid iniungit Thessalonicensibus magna cum auctoritate, scil. in nomine Domini nostri Iesu Christi : ut subtrahatis vos ab omni fratre ambulante inordinate et non secundum traditionem quam acceperunt a nobis (2 Thess. 3,6) et : si quis non obedit verbo nostro per epistolam, hunc notate et ne commisceamini cum illo ut confundatur (v. 14). Neque aliter scribit S. Ioannes : si quis venit ad vos et hanc doctrinam non affert, nolite recipere eum in domum nec Ave ei dixeritis (2 Ioan. 10). Cf. etiam 1 Tim. 4,20; Tit. 3,10.

EXEDRA. Ea voce vertitur in Vulgata לְשֹׁכָה, conclave, cella; eiusmodi cellae complures erant in atriis templi, in quibus asservabantur quae ad templum pertinebant et in quibus sacerdotes quoque et levitae morabantur (cf. 4 Reg. 23,11; 1 Par. 9,26. 33; 23,28; 28,12; Ier. 33,2). Alias לְשֹׁכָה vertitur triclinium 1 Reg. 9,22, gazophylacium Ier. 36, 12; Ez. 40,17. 45; 42,1 etc. Neh. 10, 38.

EXERCITUS. De re bellica v. BEL-LUM.

Dens vocatur Dominus exercituum, Dominus Deus exercituum in libris Regum sedecies, ter in Paralip. et in libris propheticiis ducenties quadragies quinques (cf. Zeitschrift für alttestamentliche Wissenschaft 1886 p. 17); in Pentateucho, in libris Iosue et Iudicum istud Dei nomen non reperitur. Si de eius notione quaeritur, primum quod occurrit, est illud hebr. צְבָאוֹת plerumque dici de agminibus Israel (cf. hebr. Ex. 6,26; 12, 17. 31; Num. 1,3 etc.) et Ex. 7,4 dici

filios Israel a Domino exercituum meum et 12,41 exercitum Domini. Praeterea exercitus Israel vocatur acies Dei viventis 1 Reg. 17,26. 36 et 17,45 dicit David ad Philisthaeum : ego venio ad te in nomine Domini exercituum, Dei agminum Israel: bella quae Israel gessit dicuntur bella Domini, proelia Domini (Num. 21,14; 1 Reg. 23,28); ipse Dominus dicitur pugnare pro populo, esse in medio exercitu Israel et contra adversarios dimicare (Ex. 14,14; Deut. 20,4), egredi ante faciem bellatorum, ambulare in medio castrorum (Deut. 23,14; 2 Reg. 3,24; Ps. 43,10; 59,12; 107,12); qui ad bellum opem ferre renuerunt, maledictione obruuntur, quia non venerunt ad auxilium Domini, in adiutorium fortissimorum eius (Iud. 3,23). Ex hisce consequitur Dominum exercituum dici utpote ducem agminum Israel. Verum in hac notione minime est sislendum; immo ea ne praecipua quidem est et in sermone prophetico ea vix multis locis aptari potest. Unde alia quoque quaerenda est, quae eo ipso offertur quod agmina quoque caelestia, angeli, exercitus Domini, exercitus caelorum appellantur. Ita angelus qui Iosue apparet se vocat principem exercitus Domini (Ios. 5,13); Michaeas ait : vidi Dominum sedentem super solium suum et omnem exercitum caeli assistentem ei a dextris et a sinistris (3 Reg. 22,19) et Ps. 148,2 in membris parallelis : laudate eum omnes angeli eius, laudate eum omnis exercitus eius (hebr.) et item Ps. 102,21 et quantis agminibus Dominus sit circumdatus, nos docet Daniel : millia millium ministrabant ei et decies millies centena millia assistebant ei (7,10). Praeterea hebr. dicitur exercitus צְבָא caelorum de agminibus stellarum et de toto ornatu caeli; cf. Gen. 2,1; Is. 34,4; 40,26 : levate in excelsum oculos vestros et videte quis creavit haec; qui educit in numero militiam eorum et omnes ex nomine vocat; 45,12 etc. Quare nomine Domini exercituum praeclare declaratur maiestas et potentia Dei, cui praesto sunt copiae militares, agmina angelorum omnisque ornatus caelorum. Unde sollemne est apud prophetas eo uti titulo Domini, quo eius potentia, maiestas, gloria describi-

tur, tum in minis, reprehensionibus tum in promissionibus; utrisque enim ex illa maiestate et potestate maximum accedit pondus.

Titulus iste : Dominus sabaoth (κύριος σαβαώθ, saepius LXX exprimitur in Vulgata quoque Dominus virtutum, praesertim in Psalmis (v. g. 23,10; 45,8. 12; 47,9; 58,6; 68,7; 79,3 etc.); apud LXX varie : κύριος τῶν δυνάμεων, παντοκράτωρ.

EXORCISTA (ἐξορκιστής) vi vocis is dicitur qui adiuratione vel obtestatione (ἐξορκίζειν) daemones e corporibus expellit; Act. 19,13. 14 narratur septem filios Scevae principis sacerdotum invocasse super energumenos nomen Iesu dicentes : adiuro vos (ὁρκίζω) per Iesum quem Paulus praedicat; quibus tamen adiuratio male cessit. Dicuntur fuisse de circumventibus Iudaeis exorcistis. Quale exorcistarum genus circumverit, nos docet Flav. Iosephus (Ant. VIII. 2,5) narrans Salomonem reliquisse « formas adiurationum quibus vineta daemonia ita eiciunt, ut nunquam revertantur; atque hoc sanationis genus etiamnum apud nos plurimum valet; vidi enim ex popularibus meis quendam Eleazarum coram Vespasiano et filiis eius et tribunis reliquisque militibus, ex daemonum potestate ab iis obsessos liberantem. Modus curationis erat talis : naribus daemoniaci admoto annulo, cuius pala una ex radicibus inclusa erat quas indicaverat Salomon, paulo post ex naribus odorantis extrahebat daemonem » etc. (radicem illam describit Bell. iud. VII. 6,3). Verum fuisse apud Iudaeos qui non arte magica, sed nomine Dei invocato daemones expellerent diximus supra s. v. DAEMONIACI.

EXPIATIO. 1. Voce *expiare* plerumque vertitur כָּפַר etc.; quae sit notio vocis elucet v. g. Lev. 16,16. 48. 19 hebr. ubi in membro parallelo expiare (כָּפַר) redditur emundare, sanctificare (item v. 20. 30; 2 Par. 29,15. 17). Dicitur de hominibus quorum culpa, immundities levitica et legalis, sacrificio oblato vel lustratione facta auferitur; eodemque modo ipsa quoque culpa dicitur expiari. Res quoque expiantur, ita altare i. e. usui profano subtrahi, emundari, con-

secrari significatur oblato sacrificio et sanguine sacrificali asperso (Ex. 29,36; Ez. 43,20). Eodem modo dicitur sanctuarium expiari ab immunditiis filiorum Israel, quatenus aspersione sanguinis sacrificalis sanctuarium concipitur mundari et consecrari, quod praevercationibus Israel quasi maculatum cogitatur eo fere modo quo terra dicitur pollui et profanari peccatis habitantium (cf. Lev. 16,16; Ez. 45,20). Victima expiationis dicitur v. g. aries qui ad expiandum offerendus est (Num. 5,8); simili modo vocatur calamitas quae iam averti nequeat calamitas quae non possit expiari i. e. poena pro cuius ablatione iam non accipitur a Deo sacrificium (cf. Is. 47, 11). Saepius quoque hebr. כִּפָּה redditur in Vulgata expiare i. e. luere peccatum, auferre peccatum, immunditiam (cf. Num. 19,19. 20; 31,20; Ez. 43,20). Demum aqua expiationis dicitur aqua illa lustrationis, de qua Num. 19,13. 21; 31, 23; hebr. מֵי כִּפּוּר i. e. aqua impunitatis, qua scil. impuri (levitice) emundantur.

2. Sollemnis dies expiationis celebrandus erat singulis annis mense septimo decima die mensis. Eo die ieiunandum erat (quare Act. 27,9 dicitur dies ille ieiunium, et apud Flav. Iosephum dies ieiunii Ant. XIV. 4,3; 16,4), abstinendum a labore, sacer coetus in templo celebrandus et plura sacrificia offerenda (cf. Lev. 23,26-32; Num. 29,7-11). Maxime autem propria erunt diei ea quae Lev. 16,1-34 praescribuntur de sacrificio expiationis quod pontifex pro se et domo sua et quod pro toto populo offerre debebat, de ingressu in sanctum sanctorum, de expiatione sanctuarii, de capro emissario etc. Semel in anno i. e. hoc solum die licuit pontifici cum thuribulo et sanguine sacrificali, quem septies spargebat ad propitiatorium, ingredi in sancta sanctorum. In hoc sacrificio diei expiationis cernit apostolus typum expiationis per Christum factae : Christus (παράκλητος) pontifex futurorum bonorum per amplius et perfectius tabernaculum non manufactum, id est non huius creationis, neque per sanguinem hircorum aut vitulorum, sed per pro-

prium sanguinem introivit semel in sancta aeterna redemptione inventa (Hebr. 9,11. 12).

EXPLORATORES. Cum filii Iacob patriarchae frumenti emendi causa venissent in Aegyptum, Iosephus, ut eos probaret et exploraret, eos alloquitur : exploratores estis, ut videatis infirmiora (loca aperta, nuda, non munita, cf. hebr.) terrae venistis; immunita terrae huius considerare venistis (Gen. 42,9. 12); idque eo maiore verisimilitudine dicere poterat, quia in regionem Aegypti inferiorem adeo fertilem frequentes fiebant nomadum incursus; simul iis verbis quid velint exploratores satis declaratur. Ut terram Chanaan considerarent, qualis esset, et populum qui habitator est eius, utrum fortis esset an infirmus, si pauci numero an plures, misit Moyses duodecim exploratores, qui insuper referrent essetne terra bona an mala, essetne urbes muratae an absque muris, humus essetne pinguis an sterilis, nemorosa an absque arboribus; quibus quid sit explorare terram accurate describit (Num. 13,17-20). Qui terram lustrarunt a deserto Sin usque Rohob i. e. usque ad partem septentrionalem Palaestinae conterminam ditioni Emath (Epiphaniae ad Orontem sitae). Reversi sunt post quadraginta dies; verum exceptis Caleb et Iosue detraxerunt terrae quam inspexerant (Num. 13,33). Via illa per desertum Sin Palaestynam versus vocatur via exploratorum Num. 21,1. Cum essent in terra Amorrhaeorum, misit Moyses qui explorarent Iazer (Num. 21,32). Iosue quoque misit exploratores duos : ite, considerate terram urbemque Iericho (Jos. 2,1), quos Rahab suscepit et in sotario abscondit, ne a rege Iericho comprehenderentur et quibus modum revertendi ad suos ostendit (2,3-24). Hi ad populum reversi iis animos addiderunt : tradidit Deus omnem terram hanc in manus nostras et timore prostrati sunt cuncti habitatores eius (v. 24). De Iericho misit Iosue exploratores contra Hai quae est iuxta Bethel, qui regione explorata nuntiarunt sufficere duo vel tria millia virorum ad civitatem delendam (Jos. 7,2). Pariter ni-

serunt exploratores, viros quinque, filii Dan, dum sibi exquirere vellent possessionem (Iud. 18,2). David quoque per exploratores didicit, ubi Saul in deserto Ziph castrametatus esset (1 Reg. 26,4). Quam frequens fuerit adhibita ars ista explorandi, discimus quoque ex eo quod principes Ammonitarum et Hanon rex statim conatum explorationis suspicati sunt, cum David misisset ad regem, ut eum consolaretur de morte patris (2 Reg. 10,2 s.; 1 Par. 19,3). Explorandi subsidio usus est etiam Iudas Machabaeus (1 Mach. 5,38) et Ionathas « misit speculatores in castra ducum Demetrii et reversi nuntiaverunt quod constituunt supervenire illis nocte »; quare Ionathas suos vigilare armatos iussit (1 Mach. 12,26 s.).

EXSEQUIAE. Haec vox aliquoties legitur in Vulgata; sed in hebr. solum sermo est de planctu qui institui solebat; ita Gen. 50,10 : celebrantes exsequias planctu magno, hebr. et planxerunt eum planctu magno et gravi valde; item 2 Sam. 3,31 : plangite ante exsequias Abner, hebr. plangite coram Abner; 2 Par. 21,19 : et non fecit ei (Ioram) populus secundum morem combustionis exsequias, sicut fecerat maioribus, hebr. et non fecerunt ei combustionem secundum combustionem patrum eius (i. e. ad eius funus aromata non sunt combusta); 2 Par. 32,33 : et celebravit eius exsequias universus Iuda, hebr. : honorem fecerunt ei in morte eius universus Iuda. Ceterum v. SEPULTURA.

EXSILIUM tamquam poena assignatur Esdr. 7,26 decreto Artaxerxis in eos qui non fecerint legem Dei et regis. Alias inter poenas in transgressores statuendas eieccio e patria non reperitur apud Israelitas. Aliquo sensu dici potest Agar cum filio Ismael ista poena esse afflicta (Gen. 21,10), sicut Iephthe quoque eiectus est ex patria (Iud. 11,2). Nos quoque loqui solemus Israelitas esse in exsilium abductos; in s. litteris eo sensu mentio fit captivitatis, transmigrationis; vide s. v. CAPTIVITAS et TRANSMIGRATIO.

EXSUL. Exsules vocantur in Vulgata Num. 35,26. 32 ii qui propter caedem

commissam confugerunt in aliquam urbem refugii. Cum a domo paterna et urbe patria abesse deberent (usque ad mortem pontificis), ut secure degerent, aliquo sensu exsules vocari possunt. In textu hebr. solum sermo est de fuga.

EZECHIAS (חִזְקִיָּהוּ, חִזְקִיָּה; Ἐζεχίας). 1. Filius Achaz regis Iuda, rex Iuda; natus annos 25 incepit regnare et regnavit viginti novem annis (4 Reg. 18, 2; 2 Par. 29, 1). Matis illis quibus sub Achaz rege impio regnum affligebatur mederi studuit eo modo quo ex legis mosaicae norma et Dei promissione prosper rerum eventus sperari potuit. Idololatriae bellum indixit, eius loca et vasa destruxit, cultum divinum restituit, sacerdotes et levitas officii serio admonuit et sollemnitatem paschalem ab universo populo celebrandam curavit. Eius pietas in s. litteris multis laudibus commendatur (4 Reg. 18, 3 s.; 2 Par. 19, 2 s.; et Eccli. 48, 19-25). Dominus erat cum eo et in cunctis ad quae procedebat sapienter agebat; ipse percussit Philisthaeos usque ad Gazam et omnes terminos eorum (4 Reg. 18, 7, 8); cf. Is. 14, 29. Cum aegrotaret et Isaias iam ut domui suae prospiceret cum admonuisset, lacrimis et precibus (4 Reg. 20, 3; Is. 38, 1-22) a Deo impetravit, ut vitae eius adderentur anni quindecim. Proinde anno decimo quarto regni in morbum incidit. Signum autem promissionem divinam confirmans accepit, ut in horologio solari umbra regrederetur decem lineis.

Post sanationem advenerunt legati regis Merodach Baladan ex Babylonia, certe non tantum, ut ei acceptam sanationem gratularentur, verum ut cum eo foedus concluderent ad excutiendum iugum regis Assyriorum. Ezechias enim iam se belli peritum fortemque probaverat et Merodach Baladan qui conspiracyem quandam generalem in Assyrios excitare conabatur, ne suspicionem regis Assyriorum provocaret, alias rationes legationis mittendae praetendit (cf. Is. 39, 1; 2 Par. 32, 31). Laetus de tali honore Ezechias universa quae habuit legatis ostendit, divitias et apparatus bellicum, ut simul patefaceret se validum esse belli socium, neque recorda-

tur rex theocraticus Deum per prophetas semper reprobasse foedera cum extraneis. Quare mox a propheta Isaias reprehenditur et poena condigna domum suam esse afficiendam audit animo submisso. Morbum autem Ezechiae contigisse ante invasionem Sennacherib regis Assyriorum ex s. litteris indubie colligitur, quamvis ex ordine narrationis contrarium suaderi videatur. Nam regi aegrotulo fit promissio: de manu regis Assyriorum liberabo te; quae promissio certe datur eo tempore quo invasio instabat adhuc, non quando clade accepta Sennacherib iam non expeditionem in Palaestinam meditabatur. Dein morbo superato adveniunt legati quibus thesauros suos ostendit; sed cum Sennacherib terram invaderet et civitates munitas caperet, Ezechias omnes thesauros non solum domus suae sed templi quoque exhausit ad regem placandum (4 Reg. 18, 15, 16). Cur autem hi duo eventus ordine narrentur inverso, ratio repeti debet ex libro Isaias, ubi cap. 28-35 tempus describitur ante invasionem et modus quo propheta regem populumque ad eam praeparabat; hinc ipsa narratio statim subiungitur. Quia vero superbia illa regis occasione legationis babylonicae factum est, ut exilium praediceretur babylonicum, propheta eam narrationem de morbo et sequenti legatione praemisit alteri libri parti (cap. 40-66), in qua de liberatione ex exilio agere incipit.

Sennacherib anno 701 Palaestinam invasit. Ad quas angustias Ezechias reductus sit tum ex s. litteris tum ex inscriptionibus cuneiformibus patet; narrat quippe Sennacherib (cf. *Schrader, Brunnengo*) quadraginta sex urbes munitas et oppida innumerabilia a se esse expugnata, plurimos in captivitatem abducos, regem in urbe sua Ierusalem esse inclusum sicuti avem in cavea. Ezechiam solvisse tributum, triginta talenta auri et octingenta talenta argenti aliasque res pretiosas. Verum de sua clade tacet et tributum referens ultimo loco (quod tamen solutum est mox ab initio invasionis, 4 Reg. 18, 15, 16) quasi victor abscessisset callide rem ordine alio disponit. In summis rerum angustiis, quae

ad vivum describuntur 4 Reg. 18,17 s.; Is. 36,2, Ezechias rex duce et hortatore Isaia propheta se praebet fiducia in Deum animatum; qua fide id apud Deum consecutus est, ut peste in exercitum Assyriorum immissa centum octoginta quinque millia Assyriorum occubuerint et Sennacherib re infecta ex regione discesserit. — Ne, urbs penuria aquae laboraret in obsidione Ezechias obturavit exitum aquarum Gihon superioris et avertit eas subter ad occidentem urbis David, fecit piscinam et aquaeductum et introduxit aquas in civitatem, in quo opere rupes quoque ferro erat fodienda (cf. 4 Reg. 20,20; 2 Par. 32,30; Is. 22,11; Eccli. 48,19). Vide GIHON et Ierusalem III. 5 et 6.

Cf. *Schrader-Whitehouse*, *Cuneif. Inscr. and Old Test.* I. p. 278 s. II. p. 1 s.; *Brugnengo*, *L'impero di Babilonia e di Ninive* II. p. 16 ss. — De inscriptione Siloah, quae anno 1880 prope piscinam Siloe reperta est et a multis ad aquaeductum Ezechiae refertur, cf. *Zeitschr. d. D. Pal.-Ver.* III. 1880 p. 54; IV. 1881 p. 102 s. 250-271; V. 1882 p. 205-218.

2. Filius Naariae ex posteris Zorobabel (1 Par. 3,23).

3. Filius Sellum ex tribu Ephraim, vir princeps qui cum aliis hortante Oded propheta verbis gravibus effecit, ut captivi Iudaei ab Israelitis victoribus dimitterentur liberi (2 Par. 28,12).

4. Ezechias, a quo descendunt filii Ather, qui 98 numero duce Zorobabel ex exilio redierunt (Esdr. 2,16; cf. Neh. 7,21: filii Ater filii Hezeciae) et inter signatores foederis nomine Ater principis comprehenduntur (Neh. 10,17[18]).

5. Eiusdem nominis vir est Hezecia (Vulg.), princeps populi, qui cum Ater inter signatores foederis recensetur Neh. 10, 17[18].

EZECHIEL. 1. Ezechiel (יְחֶזְקִאל), Ἰεζεκιλ), propheta, filius Buzi, sacerdos (Ezech. 1,3; 24,24; Ps. 64,1; Eccli. 49,10). In terram Chaldaeorum captivus abductus est undecimo anno ante expugnationem et destructionem urbis i. e. anno 599 vel secundum alios 597, quando scil. Ioachim cum nobilibus a rege Nabuchodonosor translatus est in Babyloniam (cf. 4 Reg. 24,10 s.; 2 Par. 36,10; Ier. 29,2).

Anno quinto transmigrationis (594 vel 592) magnifica theophania ad munus propheticum vocatus est; Deus enim pro sua in exsules benevolentia et in documentum fidelitatis etiam inter exsules et in terra alienigenarum prophetam suscitare voluit. Morabatur Ezechiel in *Tel Abib* iuxta fluvium Chobar in terra Chaldaeorum i. e. in Babylonia (v. CHOBAR). Cum eo tempore et inter exsules et inter Iudaeos in Iudaea spes vigeret et a pseudoprophetis foveretur, fore ut regno babylonico mox everso exsules brevi redirent (cf. Ier. 28,3. 4; 27,9; 29,4), prophetae in id incumbendum erat, ut ostenderet spem illam esse falsam et inanem, exsilium esse poenam propter scelera inflicta, neque ruinam regni iudaici posse iam averti. Quare scelera populi exagitat, ruinam regni iudaici non solum verbis, sed quo sensus omnium vividius perecellantur actionibus quoque symbolicis annuntiat, obsidionem urbis, fugam Sedeciae, caedem plurimorum repraesentat. Ratio muneris eius est satis pro ipso dura et difficilis; mittitur ad contumaces et perversos qui quidem audiunt sermones eius, at non faciunt eos (33,30); satis dura quoque peragere iubetur et in se quasi partem poenae suscipere (4,4 s.) et ad calamitatem obsidionis Ierusalem praesignandam paratissimo victu sustentare vitam et mortem uxoris sine ulla doloris significatione ferre, quod sit exsulis portentum fore ut illis ne lugere quidem liceat de caede et ruina carissimorum. Saltem per annos 22 officio prophetico functus est; nam oraculum ultimum quod in libro consignatum est, pronuntiatum fuit anno vigesimo septimo transmigrationis (29,17). Reliqua quae de eo feruntur apud *Ps.-Epiphanius*, *Isidorum* (*Migne* 43,401; 83, 143) plane incerta sunt; cf. in *Actis Bolland.* April. I. p. 837.

Argumentum vaticiniorum eius symbolicae iam continetur in theophania qua ad munus propheticum vocatur. Dominus enim se ei ostendit iis circumdatum signis et imaginibus quibus se manifestat vindicem foederis violati et executorem pacti initi fidelem. Unde propheta quoque in parte libri priore effert iudicia Dei in Iudaeos et gentes exterarum (cap.

1-32), in altera instaurationem et executionem promissionum (cap. 33-48). Poenam a Deo infligendam et causas poenae, scelera populi, principum, pseudopphetarum prosequitur toto tempore usque ad expugnationem urbis Ierusalem. Qua urbe destructa incipit mentes dirigere ad instaurationem: ostendit quomodo vera resipiscentia opus sit ut ad eam praeparentur; modum declarat quo Deus instaurationem sit operaturus; auferet pastores malos, populum dispersum congregabit, bonum praeficiet pastorem, spiritu suo imbuet populum, adversarios reprimet. Uti liber incipit a visione, ita quoque clauditur visione qua ipsa instauratio symbolice repraesentatur tribus illis rebus ad eam necessariis: novo templo, novo Dei cultu, nova populi in terra sancta habitatione beata.

2. Idem nomen hebr. gerit, qui in Vulgata scribitur Hezechiel (v. s. v.).

3. Ezechiel (יְחֶזְקִאל, LXX B omitt.) legitur Esdr. 8,3 : « De filiis Secheniae, filius Ezechiel et cum eo trecenti viri » scil. cum Esdra de captivitate redierunt. Sed nomen proprium videtur omissum esse et cum cod. A LXX legendum : De filiis *Zathoe* Sechenias filius Ezechiel (Σε-χονίας υἱός Ἀζαήλ).

EZECIAS (יְחֶזְקִיא, Ἐζεκιᾶς), unus e progenitoribus Sophoniae prophetae (Soph. 1,4). Censent haud pauci eo nomine designari Ezechiam regem et prophetam regio sanguine esse clarum. At id improbabile est; nam in libris historicis non solum, sed etiam in prophetiis ii qui reges fuerunt nomine regis apposito designari solent. Quod cum hoc loco non fiat, gratuito regem notari asseritur; atque quoniam nomine Ezechiae plures appellantur, eo magis expectandum erat, ut regis nomen adderetur, si dignitas regia huic Ezechie nonquam propria fuisset. Neque veteres (cf. *Ps.-Epiph.*) nomen hoc ad genus regum retulerunt; retulerunt autem rabini; quod tamen figmentum rabbinorum videtur esse contemnendum. — Alii tamen monent ex omissio nomine concludi falso non designari regem, cum

in genealogiis id nomen non apponatur, uti apparet 1 Par. 2,4-15; 3,1 s.; atque nomine Ezechiae audito omnes de rege illo pio debuisse cogitare, nisi appositione quadam ab eo distingueretur : favere quoque locum, ubi vaticinatus sit Sophonias tempusque; Ierosolymis enim tempore Iosiac qui integro fere saeculo ab Ezechia distet Sophoniam munere prophético functum esse.

Ezechiam esse Ezechiam regem censent *Aben Esra; Hueltius*, Demonstr. evang. Prop. IV. p. 325; *A. Scholz*, Einleitung III. p. 604 ss.; *Vigouroux*, Manuel biblique ed. 9, n. 1102; *Holzhammer*, Handbuch der bibl. Geschichte ed. 4. I. p. 760; *Zschokke*, Hist. sacra Ant. Test. ed. 5 p. 267; *Schenz*, Einleitung p. 285; *Cornely*, Introductio in S. Script. ed. 2, II. 2, n. 315; *Haevernick*, Einleitung II. 2 p. 393; *Keil*, Einleitung p. 332 et Comment. p. 454; *Kleinert*, Obadiah etc. p. 159; *Gandell*, Speaker's Comm. VI. 159; *Hitzig*, Die kleinen Propheten p. 248; *Hastings*, Dict. of the Bible II. 376 a.

Ezechiam esse Ezechiam regem negant *Ribeira, de Castro, Corn. a Lapide, Calnet, Reinke* (Der Prophet Zephania p. 47). *P. Schegg, Trochon, Knabenbauer* (Comm. in Proph. min. II. p. 123), *Schoeffer*, Geschichte des Alten Testaments ed. 3 p. 385.

EZEL (הָאֶזֶל הָאֶזֶל; Vulgata : lapis cui nomen est Ezel; LXX τὸ Ἐγγὺ ἐκείνο). Iuxta lapidem Ezel David a Ionatha sedere iubetur et absconditus expectare, donec Ionathas trium sagittarum signo ipsi mentem Saul regis manifestaverit (1 Reg. 20,19). Cum radix אֶזֶל significet *abire, discedere*, non improbabilis est explicatio (*Lyrurus, Vatablus, F. de Hummelauer* ad h. l.) designari lapidem viatorium, quo via indicetur, lapidem abitus seu discessus. LXX hoc loco pro אֶזֶל legebant אֶרֶב (seu רֶגֶב a radice רֶגֶב *acervus lapidum* ei pro הָאֶזֶל legebant הָאֶרֶב *ille*; hinc : *iuxta acervum illum*. — Porro de eodem lapide Ezel legitur 20,41 : surrexit David de loco, qui vergebat ad austrum הַנֶּגֶב i. e. *de iuxta austrum*, LXX ἀπὸ τοῦ Ἀγγαζῶ).

Driver (Notes on the Hebrew text of the Books of Samuel 1890) emendat 20,19 :

בַּאֲצֵל : אֲצִל הָאֲרָגָב הָלֹ (ה'ל'אד) et 20,41 : אֲצִל הָאֲרָגָב. E contra *H. A. Poets* (Le Sanctuaire de Kirjath-Jearim 1894 p. 32) censet pro אֲצֵל emendandum esse עֵזֶר ac proinde lapidem Ezel eundem esse ac lapidem adiutorii (v. LAPIS ADIUTORII).

EZER (עֵזֶר). 1. Inter filios Hur filii Ephratha patris Bethlehem recensetur Ezer (LXX 'Ιεζιζ', pater Hosa (1 Par. 4, 4); Hosa videtur nomen et personae et urbis esse.

2. Unus ex filiis Ephraim, quos occiderunt viri Gethi et quos luxit Ephraim pater multis diebus (1 Par. 7,24; LXX 'Αζιζ); vide s. v. EPHRAIM 1.

3. Princeps ex tribu Gad, qui Davidi in Siceleg fugitivo se adiunxit (1 Par. 12,9; LXX 'Αζιζ).

4. Levita tempore Nehemiae (Neh. 12, 41 [42]; LXX B omitt. אֶזֶר 'Ιεζιζ).

EZIEL (עֵזִיָּאל; LXX omittunt), filius Araia, aurifex, qui partem muri Ierusalem aedificavit (Neh. 3,8).

EZRA (עֵזְרָה, 'Εσρ), pater Iether, Mered, Ephraim, Ialon ex posteris Iuda (1 Par. 4,17); de hoc textu vide s. v. BETHIA.

EZRAHITA vide s. v. ETHAN et EMAN.

EZREL (עֵזְרֵאל, 'Εζριλ), unus de filiis Bani, qui uxores alienigenas mandante Esdra dimiserunt (Esdr. 10,41).

EZRI (עֵזְרִי, 'Εσρι). 1. Quod in Vulgata legitur Iud. 6,11 : pater familiae Ezri et 6,24; 8,32 : familia Ezri, videtur ex hebraico (אֲבִי הָעֵזְרִי) explicandum ita, ut Ios pater Gedeon dicatur Abiezrita scil. ex posteris Abiezer (v. ABIEZER 1).

2. Filius Chelub operi rustico et agricolis a David rege praepositus (1 Par. 27,26).

EZRICAM (עֵזְרִיקָם, 'Εζριζάμ, 'Εζριζάβ). 1. Unus ex posteris Zorobabel (1 Par. 3,23).

2. Filius Asel ex posteris Saul (1 Par. 8,38; 9,44).

3. Levita ex familia Merari (1 Par. 9, 44); idem in Vulgata Neh. 11,15 Azaricam vocatur.

4. Princeps domus Achaz regis seu praefectus palatii, qui a Zechri Ephraimita interfectus est in pugna illa, qua bellatores Phacee regis Israel 120 000 Iudaeorum occiderunt (2 Par. 28,7).

EZRIEL (עֵזְרִיָּאל). 1. Unus ex principibus in dimidia tribu Manasse trans Iordanem (1 Par. 5,24; LXX 'Ιεζριλ).

2. Pater Saraiae principis in aula Ioakim (Eliacim) regis Iuda (Ier. 36,26; LXX 'Εσριλ).

EZRIHEL (עֵזְרִיהֵל, 'Εζριλ), filius Ieroham et princeps tribus Dan, quando David populum numerabat (1 Par. 27, 22).

FABA inter cibaria Davidi fugienti eiusque comitibus oblata recensetur (2 Reg. 17, 28) atque cum frumento aliisque frugibus ad faciendos panes adhibenda prophetae praecipitur (Ez. 4, 9). Significatio nominis hebraici (פול) non est dubia, quod etiam nunc Arabibus fabam designat; magno quoque consensu ab interpretibus veteribus (LXX αβυαμος, Peshitta גרומא, Chald. פולא etc.) pariter ac recentioribus retinetur. — Planta eo nomine designata, *Faba vulgaris* Mönch (= *Vicia Faba* Linné), ord. *Leguminosae*, ab antiquissimis temporibus in variis regionibus colebatur (*Homer.* II. 13, 589; *Herod.* 2, 37; *Phanias* ap. *Athen.* 2 p. 54; *Cato*, De re rust. 27; *Columella*, De re rust. II. 10, 3; *Plin.* XVIII. 12, 117-122 etc.), eiusque semina tum in sepulcris aegyptiacis, tum in ruinis iliaticis, tum in constructionibus subliciiis (*Pfahlbauten*) inventa sunt. Cibus satis vulgarem praestabat atque etiam in panem utilis erat. Confundenda non est cum faba aegyptiaca s. loto indico (αβυαμος αἰγυπτιακός) scil. seminibus *Nelumbii speciosi* Willdenow (= *Nymphaea Nelumbo* Linné), quae ex India oriunda fortasse a Persis in Aegyptum introducta est. Licet posteriore tempore doctores talmudici etiam de hac פולא ביצרייא loquantur (*I. Löw*, *Aram.* III. p. 313), S. Scriptura tamen eam non videtur respicere.

Cf. *Iul. Alexandrinus*, Epistola apologetica de Fabis veterum, Francofurti 1584; *I. Vesti*, De symbolo Pythagorae : Fabis abstineto, Erfordiae 1694; *I. H. Ursinus*, Arboreti bibl. Cont. 96-8; *A. M. Isink*, Disp. philol. de Fabis, Groningen 1712; *M. Hiller*, Hierophyt. II. 129 s.; *O. Celsius*, Hierobot. II. 106 s.; *Menke*, De le-

guminosis plantis veterum, Göttingen 1814; *H. O. Lenz*, Bot. d. alt. Griech. u. Röm. 726-9; *P. Cultrera*, Flora Bibl. 220; *H. B. Tristram*, Nat. Hist. of the Bible, ed. 8, 422 s.; *Leunis-Frank*, Synopsis II. 2 ed. 3 p. 122-4; *A. de Candolle*, Origine des pl. cult. 253-7; *V. Hehn*, Kulkurpfl. u. Hausth. ed. 6, 214 s.; *G. Schweinfurth* in Bull. de l'Inst. Ég. 1884 (extr. p. 5 s.); *Fr. Woenig*, Die Pflanzen im alt. Aeg. 34-46. 212 s.; *V. Loret*, Flore pharaon. ed. 2, 93 s. 111-13; *Engler-Prantl*, Natürl. Pflanzenfam. II. 13, 352; etc.

L. FONCK.

FABULA ponitur in Vulgata pro hebr. פִּנְיָה : eris in proverbium et fabulam i. e. in irrisorem Dent. 28, 37; item 3 Reg. 9, 7; similiter apud Latinos dicitur fabulam fieri vel esse, fabulam tota iactari in urbe. Eodem sensu Tob. 3, 4 : traditi sumus... in fabulam omnibus nationibus (LXX εἰς παραβολήν, aram. לְכִרְיָא). Porro ea voce redditur μῦθος Eccli. 20, 21 et saepius 1 Tim. 1, 4; 4, 7; 2 Tim. 4, 4; Tit. 1, 14; 2 Petr. 1, 16, quibus locis docet apostolus, ne intendant quidam fabulis et genealogiis interminatis; ineptas et aniles fabulas esse vitandas; qui a veritate sese avertant converti ad fabulas, non esse intendendum iudaicis fabulis etc. Quinam sint huiusmodi μῦθοι, varie explicare tentant; at probabilissimum est, cum de genealogiis quoque mentio iniciatur, intellegi commenta quaedam gnostica v. g. de emanationibus aeternum. Neque obstat quod de iudaicis fabulis sermo sit; nam primi haeretici gnostici ex iudaicis erant et prima semina errorum gnosticorum iam iacta esse tempore apostolico etiam aliunde constat (cf. Col. 2, 8; vide *Heule*, Der Evangelist Johannes p. 30. 42). Minus probabile est intellegi narrationes

confictas de Christo quales in apocryphis evangelis contineantur, vel signenta Iudaeorum de Messia, multoque minus narrationes Graecorum de diis etc.

In arte poetica species quaedam narrationis dicitur fabula. Ad eam fere accedere videtur narratio illa de arboribus quae regiam dignitatem recusant etc. Iud. 9,8-15 et quod respondit Ios rex Israel Amasiae regi Iuda : carduus Libani misit ad cedrum etc. 4 Reg. 14,9. nisi utrumque ad parabolas propius accedere existimaveris, quoniam minae et reprehensiones istis parabolis exprimuntur (cf. Zeitschr. d. D. Morg. Ges. XIV. 1860 p. 586).

FABULATORES (μυθολογοί) Bar. 3,23; plerique vocem explicant vel de sapientibus qui proverbii et parabolis propositis docebant, vel de iis qui res divinas se docere profitentur. Melius tamen vocem accipiendam esse de iis qui narrationibus alios delectant, monuit *Zenner* (Zeitschrift für katholische Theologie, Innsbruck 1894, p. 587); nam in variis inscriptionibus simul cum negotiatoribus et viatoribus memoratur narrator rerum iucundarum, ludicarum.

FACULA. Uti apud alias gentes, ita apud Iudaeos quoque gestacione facularum sollemnia celebrari solebant; ita festive consalutatur et suscipitur Iudith (13,16) et 2 Mach. 4,22 magnifice ab Iasone et civitate susceptus Antiochus cum facularum luminibus (διδουylα, facularum gestacione) et laudibus ingressus est Ierusalem. Ad sollemnitatem quoque nuptiarum gestatio similis luminum pertinebat (cf. Matth. 25,1). Sicut apud antiquos Graecos, ita probabiliter etiam apud Hebraeos faculae consistebant sarmentis pice illitis; vel etiam stuppa, panni, funes pice obducti adhibebantur; eiusmodi cogitandae erunt faces quas Samson ligavit ad caudas vulpium vel potius canum aureorum Iud. 15,4). Lumen facularum aptam praebet comparisonem : verbum Eliae quasi facula ardebat (Eccli. 48,1); cf. Is. 62,1; Dan. 10,6; Apoc. 8,10 et Zach. 12,6 ponam duces Iuda... sicut facem ignis in faeno i. e. facillime superabunt quiddid obstackuli repererint.

FAENUM v. FOENUM.

FAENUS v. FOENUS.

FAEX. Sors quae alicui contingit, saepius metaphora calicis exprimitur. Ita si quis iram Domini in se experitur, calicem Domini bibere dicitur. Unde calicem Domini bibere usque ad faeces i. e. usque ad imum exhaurire significat maximam Dei iram experiri neque ullam poenae inflictae imminutionem posse expectare; cf. Ps. 74,9; Is. 51,17; Ez. 23,34 : et bibes illum et epotabis usque ad faeces. Alia quoque applicatio a faecibus sumitur. Vinum enim quod diu super faeces suas imperturbatum in dolio residet, efficitur purum, suave, generosum; unde si Deus dicit : visitabo super viros defixos in faecibus suis (qui congelantur super faeces suas) eos designat qui in magna tranquillitate viventes nullaque adversitate agitati impiam suam indolem plane excoluerunt; residere super faeces est itaque vitam agere imperturbatam ideoque in vitiis perseverantem eisque in dies magis inhaerentem (cf. Ier. 48,11; Soph. 1,12). Quod Is. 49,6 in Vulgata habetur : faeces Israel, explicata secundum hebr. servatos ex Israel (LXX τὴν διασπορὰν τοῦ Ἰσραήλ).

FALCATI CURRUS; ita vertitur in Vulgata Iud. 1,19; 4,3. 13 רָכָב בְּרִיךְ i. e. currus ferri, uti in Vulgata quoque legitur Ios. 17,16 : non poterimus ad montana conscendere, cum ferreis curribus utantur Chananaei i. e. curribus ligneis quidem, sed qui ferro vineti erant et quadamtenus obducti, quos currus ferratos vocant. Eiusmodi curribus Aegyptii quoque utebantur. Currus falcatos i. e. currus qui temones, axes, radios curvaturasque rotarum falcibus lanceisque prominentibus instructa habebant, quales apud scriptores graecos Latinosque describuntur, secum adduxit contra Iudaeos Lysias (2 Mach. 13,2).

FAMES. Famen, penuriam alimentorum configisse in Palaestina et in regionibus vicinis saepius narratur in s. litteris; ita Gen. 12,10 sub Abraham, 26,1 sub Isaac; maxime celebris est illa in Aegypto quam Ioseph praedixit sep-

tem amorum Gen. 41,27 etc. In Aegypto est terrae sterilitas, si quando aquae Nili non satis assurgunt, ut regionem perluant; in Palaestina, si imbres vel temporanei vel serotini deficient vel si regio locustis devastatur (cf. Joel 1. 2). Deus populo peccatori minilatur se famem missurum esse (cf. Deut. 28, 20, 48; 32,24) et inter castigationes rebellibus inflictas simul cum gladio et peste fames nominatur (cf. Is. 31,19; Jer. 5,12; 44,12; 16,4; 27,13; Ez. 6,11 etc.); qui fame intereunt, sagittis famis dicuntur occidi Ez. 3,16. — De fame, quam Agabus propheta Hierosolymis Antiochiam veniens christianis praedixit, vide s. v. AGABUS.

Aliud famis genus Am. 8,11 memoratur: Deus scil. tempore calamitatis subtrahet consolationem per verbum propheticum quam alias mittere solebat, mittet famem audiendi verbum Dei in terram; cf. Ps. 73,9: iam non est propheta et nos non cognoscit amplius.

FAMILIA ponitur in Vulgata pro hebr. בית; v. g. Gen. 50,4 familia Pharaonis (domus Ph.) et similiter 47,24; dein pro עֲבָדִים v. g. Gen. 43,16 gavisus est Pharaon et omnis familia eius (servi eius); item pro עֲבָדָה Gen. 26,14; Iob 1,3 familia i. e. famuli, servi. Frequentissime vero ea voce redditur hebr. מִשְׁפָּחָה gens, cognatio; etiam aliquoties אֲבֹת בית domus paterna. Tribus enim dividebantur in familias, familiae in domos paternas; cf. Jos. 7,16. 17: inventa est tribus Iuda quae, cum iuxta familias suas esset oblata, inventa est familia Zare; illam per domos offerens (Iosue) reperit Zabdi, cuius domum in singulos dividens viros invenit Achan. Strictiore sensu voce familiae designantur qui in una domo habitant vel omnes alicuius heri famuli; latiore qui ad unam cognationem, gentem pertinent.

FAMULUS, hebr. עֶבֶד, adhibetur ut honorifica appellatio; ita famulus Domini appellatur Moyses (Jos. 1,13. 15; 8,31. 33; 11,12 etc.), Iosue (Iud. 2,8), David (3 Reg. 8,25 etc.). Qui loquitur, de se tanquam famulo eius ad quem

sermo dirigitur loqui solet, praesertim si ad virum magnae auctoritatis fit oratio vel si loquens animum demissum significare vult; cf. Gen. 42,11 nec quidquam famuli tui machinantur mali; ne irascaris famulo tuo 44,18; en famuli tui flagellis caedimur Ex. 5,16 (ita praepositi filiorum Israel ad Pharaonem); des nobis famulis tuis etc. Num. 32,5 loquuntur Rubenitae et Gaditae ad Moysen. Eodemque modo de alio quodam sermo inferitur; ita Iudas loquitur ad Ioseph: cum ergo ascendissemus ad famulum tuum patrem nostrum etc. Gen. 44,24. Quandoque famulus dicitur nomine servi cf. Gen. 41,12; Deut. 12,12; Jer. 34,11; vide s. v. SERVUS.

FANUM ponitur plerumque in Vulgata, ubi in hebr. de templo idoli legitur בית (domus); ita Deut. 3,29; Iud. 9,4. 27. 46; 1 Par. 10,10. Sed ea voce redditur quoque בְּמִזְבֵּחַ excelsum: Salomon aedificavit fanum (hebr. excelsum) Chamos 3 Reg. 11,7; cuius loci tamen sensus est: aedificavit sanctuarium, templum in loco editiore qui Chamos sacer erat, uti aliis in locis dicitur בֵּית בְּמִזְבֵּחַ, Vulgata: fana in excelsis 3 Reg. 12,31 et 4 Reg. 17,29. 32 vel in plurali 3 Reg. 13,32 (hebr. 4 Reg. 13,32) et 4 Reg. 23,19. In 2 Par. 14,5 fana habentur in Vulgata, in hebr. הַמִּזְבֵּיחִים statuæ scil. quae Baal solari consecratae erant vel columnae quibus Baal solaris repraesentabatur; demum 2 Par. 24,7 in Vulgata abundat fanum quod in hebr. non legitur. In 1 Mach. 5,43. 44 et 2 Mach. 1,15 fanum exprimit graecum τέμενος, qua voce proprie designatur locus profano usu exemptus et diis sacer; 2 Mach. 14,33 fanum reddit graecum σταβός (stabulum, sacellum).

FAR. 1. Far, hebr. כֶּסֶם, cum tritico, hordeo, lino in Aegypto colebatur, et quia serotinum erat, sicut et triticeum, grandine laesum non est (Ex. 9,32). In Vulgata etiam Lev. 2,16 inter oblationes primarum frugum spicae « in morem farris » contractae et pars « farris fracti » commemorantur, ubi textus hebraicus generalius fruges comminutas (גרֵם כֶּסֶם)

habet. E contra vox hebraica duobus aliis locis cum variis frumenti et leguminum speciebus occurrit (Is. 28, 23; Ez. 4, 9 pl. כֶּסֶּבִּים, cf. S. Hieron. in h. l.), ubi Vulgata viciam explicat. Ex verbis כֶּסֶּבִּים in marginibus agrorum post triticum serebatur, et ex Ezechiele ad panificium utile erat. LXX in libris Exodi et Ezechielis ἀλάζ, in Isaia ζέαν vertunt, ac similiter Aquila, Symmachus, Theodotion, Peshitta quoque et Targum (כִּנְתָּה) ador seu speltam interpretantur. Eodem sensu a S. Hieronymo, sicut ab aliis scriptoribus far pro farre adoreo s. spelta adhibetur. Ex versionibus posterioribus Graecus Venetus ὁ ἀλάζ i. e. avenae speciem habet.

2. Significatio vocis כֶּסֶּבִּים multis jam antiquitus satis dubia visa est, aliis inter leguminum, aliis inter frumenti species eam quaerentibus. At certum imprimis videtur, כֶּסֶּבִּים non inter legumina, sed cum frumento ponendum esse, ac non nisi ex confusione cum כִּרְשָׁה pro viciae specie haberi (I. Löw contra Wetzstein, Lagarde, Fleischer al.; cf. Löw, Aram. Pfl. n. 72 et 170, approbante Fleischer ib. p. 103, revocata priore sua opinione). Certum insuper videtur, כֶּסֶּבִּים tritici speciem designare, ac probabiliter eam, quam versiones antiquae intellexerunt *Triticum speltam* Linné. Ratio dubitandi de hoc ultimo inde habetur, quod haec species frigidiori potius caelo apta videtur (Plin. XVIII. 8, 83 « far contra hiemes firmissimum, patitur frigidissimos locos »), et quod neque in sepulcris et monumentis antiquis Aegypti (A. de Candolle, G. Schweinfurth), neque in antiquissimis constructionibus publicis (O. Heer) ulla indicia eius culturam antiquam testantur. Quare A. de Candolle potius *Triticum monococcum* Linné designari censuit, mutata tamen postea opinione hanc quidem speciem inter speltas vetustissimam originemque reliquarum agnovit, de כֶּסֶּבִּים rem in medio relinquens. Fortasse non omnino improbabilius quis *Triticum dicoccum* Schrank esse כֶּסֶּבִּים et ἀλάζ aegyptiacam suspicetur, cum species haec et speltae maxime

affinis et in monumentis aegyptiacis atque in constructionibus publicis inventa sit. At non minus probabiliter multi iuxta significationem propriam vocis et auctoritatem antiquorum revera *Triticum speltam* L. designari censent, eandemque speciem esse ἀλάζ et ζέαν, adorem ac far, de quibus scriptores profani frequenter loquuntur, quamquam veterum auctorum descriptiones accuratorem variarum specierum determinationem non admittunt (cf. Homer. II. 3, 196; 8, 564; Od. 4, 41. 604; Herod. 2, 36. 37; Theophr. Hist. pl. II. 4, 1; VIII. 1, 3; 4, 1; 9, 2 etc.; Varro, De re rust. 1, 63; Columella, De re rust. 2, 6. 8. 9; Dioscur. Mal. med. 2, 111-113; Plin. XVIII. 7, 30. 36. 61; 8, 81-4; 30, 298 etc.).

Cf. O. Heer, Pflanzen der Pfahlbauten, Zürich 1865, 6; E. Boissier, Flora orient. V. 672 s.; A. de Candolle, Origine des pl. cult. 291-4; G. Schweinfurth in Bull. de l'Inst. Egypt. 1886 (extr. p. 2. 5-8); id. in Verhandl. d. Ges. f. Anthrop. 1891, 654; G. E. Post, Flora of Syria 899.

3. A farre dicitur farina adorea, quae saporis grata laudatur (Diosc. I. c. 111) atque praesertim Aegyptiis cibum praeslabat (Herod. I. c.). Sunt qui etiam farinam illam optimam in lege oblationum praescriptam (סֶלֶת, Vulg. simila) adream fuisse censeant (P. Schegg, Bibl. Arch. 134). Ex farina autem crassiore, e zea et tritico parata et erimnon dicta, pullem vulgarem fieri Dioscurides auctor est (I. c. 112). — Nostra aetate *Triticum spelta*, licet non admodum frequenter, in Aegypto et Palaestina atque in reliquo Oriente colitur, quod immerito negat A. de Candolle (I. c.) et post ipsum E. Levesque.

Cf. P. Forskal, Flora aeg.-arab. p. 26; C. Ritter, Erdkunde XVI. 1, 483; XVII. 2, 1358; H. Steudner in Petermanns Mitteil. 1861, 310; Boissier I. c. 672. — E. Levesque in F. Vigouroux, Dict. de la Bible II, 1821-4, qui rationibus non satis firmis tritici speciebus reiectis sorghum praefert, nulli scriptori ante aeram christianam notum neque ullibi in Syria, Palaestina, Arabia, Aegypto spontaneae crescens inventum (A. de Candolle o. c. 306; V. Hehn, Kulturpfl. u. Hausth., ed. 6., 492 s.) neque ullo monumento antiquitatis in Aegypto certo probatum (de Can-

dolle l. c.; *G. Schweinfurth*, Verhandl. d. Ges. f. Anthrop. 1891, 654, contra *Fr. Woenig*, Pflanzen im alt. Aeg. 171-4 et *V. Lovel*, Flore pharaon. ed. 2, p. 25 s.).

De farre cf. praeterea *I. H. Ursinus*, Arboreti bibl. cont. 100-2; *M. Miller*, Hierophyl. II. 120 s.; *O. Celsius*, Hierobot. II. 98-101; *E. F. K. Rosenmüller*, Bibl. Allerth. IV. 1, 83 s.; *C. Sprengel*, Comment. in Dioscur. 2, 141-5; *C. Fraas*, Synopsis Florae class., München 1845, 307; *H. O. Lenz*, Bot. d. alt. Griech. u. Röm. 42. 62. 252 s. 257-9; *P. Cultrera*, Flora bibl. 151 s.; *Leunis-Frank*, Synopsis II. 1 ed. 3, p. 828; II. 2 p. 854; *Woenig* op. cit. 165. 167 s.; *J. Murr*, Die Pflanzenwelt in der griech. Mythologie, Innsbruck 1890, 151 s. 156; *Hehn* op. cit. 538 s. 542. — Cf. FRUMENTUM.

L. FONCK.

FARINA. Quod in Vulgata legitur Gen. 40,16 : ego vidi somnium quod tria canistra farinae haberem super caput meum, explica ex hebr. חָרִי de pane similagineo, non de farina; LXX *τρίτα καὶ ἀνὰ χονδριδιόν*. Et quod habetur Ex. 12,34. 39 farina conspersa et 2 Reg. 13,8 farina, hebr. כֶּמֶץ, explica de massa farineacea aqua subacta. Ceterum vide art. praec. n. 3 et s. v. MOLA.

FASCIA PECTORALIS; ita redditur Is. 3,24 פְּתִילִי quam vocem alii de pallio eleganti accipiunt; similiter iam LXX *χρῶν μεσσοπέφυρος*; et Ier. 2,32 fascia pectoralis hebr. קֶשְׂרִים, LXX *σκηθιοδεσμῆς* nominatur inter ornamenta sponsae; vocem hebr. explicant cingulum; eam reddidit S. Hieronymus Is. 3,20 murenulas (LXX *ἐμπλόγιον*) i. e. genus torquis.

FASTI 1 Par. 27,24 דְּבָרֵי הַיָּמִים acta diurna, commentarii de rebus gestis. Eiusmodi commentarios de rebus gestis regum Iuda et Israel esse scriptos et ex iis multa esse assumpta in libros Regum et Paralipomenon, ipsi hi libri testantur; cf. 4 Reg. 13,8. 12; 15,15. 21. 31. 36; 16,19; 20,20 etc.; 2 Par. 16,11; 23,26; 27,6; 28,26; 33,18; 35,27. Multi putabant res gestas regum litteris consignare fuisse eius qui nominatur בְּרִיכִי (Vulgata : a commentariis, quam vocem de cancellario, historiographo accipiebant ;

at haec explicatio certa non est (vide s. v. COMMENTARIUS).

FAUNI FICARII, i. e. proprie dii quidam silvestres, dicitur a S. Hieronymo Ier. 50,39 pro hebr. אֵיִם, quod speciem animalis ululantis atque in desertis locis degentis, probabiliter *canem aureum*, designat, et alibi ab eodem sancto Doctore *ululae* (Is. 13,22) et *onocentauri* explicatur (Is. 34,14). V. CANIS AUREUS.

FAX vide s. v. FACULA.

FEL. 1. Fel a S. Hieronymo dicitur hebraicum רֶאשׁ (s. רֶשֶׁת Deut. 22,32), quod in Vulgata bis etiam *amaritudo* (Os. 10, 4; Am. 6,13), semel *venenum* (Deut. 32, 33) itemque semel ob similitudinem vocis hebraicae *caput* explicatur (Iob. 20,16; cf. Eccli. 25,22 gr. 15). — Ex antiquis versionibus nihil certi de significatione huius vocis videtur erui posse, nisi quod pleraeque amaritudinem significatam intellexerunt. LXX enim plerumque *χολή* vertunt (Deut. 29,18; 32,32; Ps. 68[69], 22; Ier. 8,14; 9,15; Lam. 3,9), aliquando *θυμός* (Deut. 32,33; Iob. 20,16; Am. 6, 12), semel *κακός* (Ier. 23,15), semel *ἄγρωστος* (i. e. graminis species in agro crescens Os. 10,4). Pesbitta ut plurimum *amaritudinem* indicat (ברתא, ברירא, ברירא Deut. 29,18; 32,32; Iob. 20,16; Ps. 68[69],21; Ier. 8,14; 9,5; 23,15; Lam. 3, 5. 19; Am. 6,12), semel vero *caput* (רִישָׁא Deut. 32,33) ac semel *vepretrum* (רִישָׁא Os. 10,4). Itala similiter aut *fel* (Deut. 29,18; 32,32; Ps. 68,22; Ier. 8,14) aut *furorem* (Deut. 32,33; Iob. 20,16; Am. 6,13) aut *amaritudinem* (Ier. 23,15 *aqua amara*) aut *gramen agri* (Os. 10,4) exprimit. Easdem fere significationes in reliquis versionibus invenimus.

2. Ex iis quae S. Scriptura de רֶאשׁ refert, imprimis concludere possumus, *herbam* aliquam *amaram* significari; *herba* enim supponitur Deut. 29,18 (radix germinans רֶאשׁ), et praesertim Os. 10,4, ubi « super sulcos agri germinare » dicitur; *amarum* vero esse istam herbam, ex omnibus fere reliquis locis apparet (Deut. 32,32; Ps. 68[69], 22; Ier. 8,14; 9,15; 23, 15; Lam. 3,5. 19; Am. 6,13. Cf. Matth. 27, 34), in quibus רֶאשׁ auctoribus sacris figura est miseriae amarissimae atque iniuriae acerbae, ita ut pro quacunque

re amara adhibeatur. Proprie tamen herbam amaram significari etiam ex eo colligimus, quod frequenter simul cum absinthio nominatur (Deut. 29,18; Ier. 9,15; 23,15; Lam. 3,19; Am. 6,13). Praeterea cum Deut. 32,32 « *uva fellis* » (עֲנָבִי דֹשֵׁן) nominetur, aliqui fructum huius herbae amarae supponunt similem esse uvis vel baccis (*Rosenmüller*, *Winer*, *Tristram*); quod minus necessarium videtur, cum potius amaritudo uvarum, sicut in membro parallelo, respiciatur. — Plerique insuper herbam illam *venenosam* censent, eo quod eadem voce venenum aspidum appelletur (Deut. 32,33; Iob 20,16). At in aliis locis (cf. praesertim Deut. 32,32; Ps. 68,22; Ier. 9,15; 23,15; Lam. 3,5. 49) qualitas venenosa videtur excludi atque *amaritudo* herbae sola indicari, quae ad quaecumque rem amaram et inuicundam designandam inservit, adeoque etiam ad venenum aspidum transferri potuit.

3. Quodsi ulterius quaerimus, quaenam potissimum herba nomine isto designetur, varias a variis auctoribus propositas videmus. Cl. O. *Celsius* cicutam (*Conium maculatum* Linné), utpote maxime venenosam, nominat. *Michaelis* vel *hyosciami* speciem vel *Lolium temulentum* L., et *Oedmann* colocynthidem (*Cucumis colocynthis* L.) praeferebant censent. Pro hac ultima *Oedmanni* coniectura, quae etiam viro rei herbariae orientalis peritissimo G. E. *Post* satis arridet, praeter alia afferri posset, quod colocynthis etiam in lingua syriaca praeter ceteris herbis tamquam amara designatur (amaritudo agri, vel בִּרְרַת מֵרַחֵק בְּנֵי בִרְרִי et בְּנֵי בִרְרִי amari). — *Rosenmüller* autem varias plantas ראש appellatas supponit, puta Os. 10,14 *lotium* (approbante P. *Schegg*, Bibl. Arch. 275), Deut. 32,32 aliquam ex ordine Solanacearum speciem, alibi incertas alias. W. *Gesenius* papaveris speciem eius loco supponit, quam opinionem ceteris probabiliorum assumunt *Tristram* et *Henslow*.

Cum neque ex verbis S. Scripturae neque ex veterum auctoritate neque ex vocis in linguis hodiernis similitudine quidquam certi de plantae ראש specie

concludi possit, recentiores plerique rem in incerto relinquunt.

Cf. O. *Celsius*, Hierobot. II. 46-52; I. D. *Michaelis*, Fragen an eine Gesellsch. gelehrter Männer, Frankfurt a. M. 1762, 144-6; id. Supplem. in Lex. hebr. p. 2220-4; Sam. *Oedmann*, Vern. Samml. 4,83-93; E. F. K. *Rosenmüller*, Bibl. Alterth. IV. 1,118 s.; W. *Gesenius*, Thesaurus 1251; G. B. *Winer*, Bibl. Realwb. ed. 3, I. 427; H. B. *Tristram*, Nat. Hist. of the Bible ed. 8,447 s.; G. *Henslow*, Plants of the Bible 39 s.; G. E. *Post*, Flora of Syria 324.

4. Alia notione magis propria fel, פֶּלֶס, dicitur Tob. 6,5. 9; 11,4. 8. 11 de felle piscis, quod Tobias servare iubetur et quo oculos patris linit, ut visum recipiat. Felli quidem, uti patet, eiusmodi virtus per se non inest; attamen a veteribus saluterum et efficax remedium in aegritudine oculorum censebatur, quod de felle siluri affirmari ostendit Sam. *Bochart* (Hierozoicon II. l. 5, c. 14, ed. *Rosenmüller* III. 701). Angelus itaque ex communi hominum opinione loquitur, sicut comes juvenis locutus fuisset. Sannio autem oculorum simili modo efficitur quo Christus saepius luto, lotionem vel alia re tamquam instrumento ad lumen oculorum restituendum usus est.

L. FONCK.

FELIS v. CATTA et DRACO n. 5.

FELIX praeses, ad quem Paulus a Claudio Lysia in urbem Caesaream missus est (Act. 23,24. 26; 24,1-27). Coram eo Pauli causa agebatur Tertullo causidico accusante. Paulus defensione sua id effecit, ut praeses perspiceret non agi de crimine quodam sed de doctrina; unde dixit Felix se rem differre, donec Lysias descenderet. Paulus in custodia mansit; sui tamen libere ei poterant ministrare. Felix quoque mox apostolum vocavit et audivit ab eo fidem Christi; sed cum Paulus disputaret de iustitia et castitate et iudicio futuro, Felix tremefactus noluit audire; apostolum abire iubet addens: « tempore opportuno accersam te; simul et sperans quod pecunia ei daretur a Paulo, propter quod et frequenter accersens eum loquebatur cum eo »; nec tamen eum, cuius probitatem perspectam habebat, liberum

dimisit, sed volens gratiam praestare Iudaeis reliquit Paulum vinctum, cum biennio expleto accepit successorem Porcium Festum.

Antonius Felix, frater Pallantis, libertus, a Claudio Caesare provinciae Iudaeae praepositus est: Claudius, ut *Tacitus* scribit, Iudaeam provinciam equitibus romanis aut libertis permisit, e quibus Antonius Felix per omnem saevitiam ac libidinem ins regium servili ingenio exercuit (Hist. 5,9; cf. *Suetonius*, Claudius cap. 28; *Flav. Jos.* Ant. XX. 7, 1 et alio loco *Tacitus* de eo memoriae tradidit: cuncta malefacta sibi impune ratus tanta potentia (scil. Pallantis fratris) subnixo (Annal. 12,34). Ionathan pontifex cum a Caesare in Iudaeam procuratorem mittendum petierat et postmodum, cum Felix res male administraret cum saepe admonuit, qui tamen pontificem per sicarios occidendum curavit (*Iosephus* l. c. 8,3). Praeterea vide s. v. DRUSILLA. Cur Felix voluerit gratiam praestare Iudaeis (Act. 24,27), patet ex eo quod saevitia sua odium Iudaeorum sibi concitaverat; unde merito timuit ne ab iis de mala administratione apud Neronem accusaretur. Atque revera « primores Iudaeorum Caesaream incolentium Romam ascendunt et accusationem contra Felicem instituunt; dedissetque omnino poenas iniuriarum quibus Iudaeos affecerat, nisi Nero frater Pallantis qui tum maxime apud eum in honore erat, precibus supplicibus multa indulxisset » (*Iosephus* l. c. 8,9; cf. de Felice Bell. iud. II. 12,8-13,7). De quaestione chronologica vide *Schurer*, Geschichte des jüdischen Volkes ed. 3, I. p. 377, nota 38, ubi scripta sat multa de ea re satis controversa recitantur; ipse cum plerisque Felicem munere defunctum esse censet anno 60; aliter *Kellner* in Kirchenlexicon ed. 2 s. v. et cf. *Knabenbauer* in Act. Ap.

FEMINA. Apud Hebraeos femina non subiiciebatur durae servituti ac turpi, ut apud alias gentes fere moris erat. Hebraei enim s. libris de dignitate feminae edocebantur. Quae eius dignitas iam in narratione de creatione offertur. Deus enim qui hominem ad suam ima-

ginem creavit, masculum et feminam creavit eos et utrique benedixit (Gen. 1,27, 28) et mulier, ex costâ viri formata, ei tamquam adiutorium additur et Adam eandem secum in ea agnoscit naturam summamque cognationem: hoc nunc os ex ossibus meis etc. et quam intimo amore vir debeat adhaerere uxori, quaecum unum quoddam constituit, clare enuntiat (Gen. 2,18-24). Mulier itaque non est serva neque famula viri, sed socia eius vitaeque comes; vir tamen priorem dignitatis locum obtinet, uti pariter ex ordine modoque creationis et viri natura elucet, prout etiam Paulus ex creatione officioque mulieris arguit: mulier gloria viri est; non enim vir ex muliere, sed mulier ex viro; etenim non est creatus vir propter mulierem, sed mulier propter virum (1 Cor. 11,7-9); inde dignitas viri prae muliere infertur; sed ne haec praecellentia vergat in superbam dominationem addit: verumtamen neque vir sine muliere, neque mulier sine viro, in Domino; nam sicut mulier de viro, ita et vir per mulierem (v. 11. 12). Est itaque mulier sub viri potestate (Gen. 3,16), sed tamquam socia et adiutrix, quae viro adiuncta est ad finem generis humani obtinendum.

Atque haec dignitas feminae satis in historia populi Dei servatur. Haec elucet in Sara, Rebecca, Rachel, Debora munere iudicis fungitur simulque est prophetis et ea hortante Barac insignem reportat victoriam (Iud. 4,5; pari modo Holda dignitate prophetica insignita erat (4 Reg. 22,14), quam Helcias pontifex alique nobiles consulebant. Cum autem Deus propheticam dignitatem mulieribus quoque largiretur, totum sexum honore quodam affecit, similiter atque in nova lege per Mariae excellentiam sublimissimam aliquid splendoris sexui contulit. Ad propheticam dignitatem Anna quoque cantico suo fere accessit (1 Reg. 2,1-10). Feminae in festiva celebritate choros ducent et cantu sollemnitatem augent: sumpsit Maria prophetissa tympanum in manu sua, egressaeque sunt omnes mulieres post eam cum tympanis et choris (Ex. 15,20; ita pariter Iud. 11,34 et 1 Reg. 18,6 et Ps. 67,26. Insigni encomio praedicatur

mulier bona Prov. 31,10-31 et Eccli. 26, 1 : mulieris bonae beatus vir; mulier fortis oblectat virum suum et annos vitae illius in pace implebit; pars bona mulier bona; in parte timentium Deum dabitur viro pro factis bonis etc. v. 18-24; cf. Eccli. 7,21; 9,1. Neque minus dignitati mulieris consultum est legibus. Vir non potuit uxorem pro libitu repudiare; verum solum propter causam gravem (propter rem turpem) et scripto libello repudii (Deut. 24,1); si quis seduxerit virginem, dotabit eam et habebit eam uxorem (Ex. 22,26; Deut. 22,29 : non poterit dimittere eam cunctis diebus vitae suae); pariter consulitur filiae quam pater paupertate pressus vendidit in famulam (Ex. 21,7-11) et femina quoque alienigena, quae belli iure captiva erat, bene erat adhibenda (Deut. 21,11-15); sedulo quoque lege cavetur, ne filius primogenitus uxoris minus dilectae (si cui essent uxores duae) propter amorem alterius uxoris suo privaretur iure (Deut. 21,15 ss.). Feminae tamen non scribebantur heredes, si aderant filii (cf. Num. 36,1 ss.) neque uxori licebat dimittere virum seu libellum repudii dare. Ea in re mulier non eodem cum viro iure utebatur. Quae aequalitas in re matrimoniali in nova lege perfecte constituta est (cf. 1 Cor. 7,3. 4. 10. 11). Pariter verae mulieris dignitati prospiciebatur quoque gravissimis illis reprehensionibus quibus femina impudica, rixosa perstringitur (cf. Prov. 5, 1 ss.; 6,26; 7,5-27; 11,22; 19,13; 21,19; Eccl. 7,27; Eccli. 9,2-13; 23,28-30 etc.).

Sublimem rationem cur viri diligant uxores attulit Paulus eam repetens ex amore quo Christus dilexit Ecclesiam (Eph. 5,25), sed simul monet, ut mulieres debito contineantur ordine. Cum enim apostolus docuisset in Christo Iesu non esse masculum neque feminam (Gal. 3,28) et in re matrimoniali eodem iure uti virum ac mulierem, videntur mulieres quaedam eandem iuris aequalitatem etiam aliis in rebus appetiisse; ita Corinthi in coetibus religiosi se sistebant capite non velato. Quam maiorem libertatem apostolus reprehendit docens mulierem natura et conditione sua viro esse subiectam ideoque symbo-

lum subiectionis, velamen, gerere debere neque in ecclesia docere (1 Cor. 14, 3 s.; 14,34) saepiusque in epistulis monet, ut mulieres subditae sint viris (Eph. 5, 22; Col. 3,18); idem docetur 1 Petr. 3,1 : sicut Sara obediebat Abrahae dominum eum vocans (v. 6), atque ut caveant ab ornatu exquisitiore monet princeps apostolorum; idemque Paulus (1 Tim. 2,9) qui mulierum et viduarum officia pluribus prosequitur (1 Tim. 2, 11 s.; 3,11; 4,4. 9-16; Tit. 2,3-5). Uti Christo et discipulis eius ministrabant pie mulieres facultatibus suis (Luc. 8; 3), ita apostolus quoque ad similia ministeria viduas advocari vult : vidua eligatur... in operibus bonis testimonium habens, si hospitio recepit, si sanctorum pedes lavit, si tribulationem patientibus subministravit, si omne opus bonum subsecuta est (1 Tim. 5,9. 10). Idem apostolus qui dignitatem matrimonii tamquam mysterii magni praedicat (Eph. 5,32), praestantiam virginitatis pluribus commendat (1 Cor. 7,7. 8. 32. 34. 35); ex utraque autem doctrina consequitur dignitas feminae. Quae eo quoque commendatur, quia in piis illis mulieribus, quae Christo servierunt, cruci adstiterunt fortes et de mortuo atque sepulto adeo sollicitae erant, praeclaro exemplo cernitur, cuius pietatis, devotionis, amoris, fortitudinis capax sit sexus qui dicitur fragilior, utique non sine ope divina. Demum uti Ioel vaticinatus est : effundam de spiritu meo super omnem carnem et prophetabunt filii vestri et filiae vestrae et quidem super servos meos et super ancillas meas effundam de spiritu meo et prophetabunt (3,28; Act. 2,17. 18), Deus dona sua et charismata etiam feminis non negat, prout iam cernebatur in mulieribus compluribus veteris foederis (Maria, Debbora, Anna, Holda, Iudith) et etiam multo magis eluxit in regno et tempore messiano, de quo Ioelis oraculum agit. Iam vero si Deus tali honore sexum feminarum ornat, consequens est quod in ditione christiana habetur, ut scil. sua mulieri dignitas servetur et agnoscatur. Et quamvis Deus nulli unquam feminae donum contulisset charismatis extraordinarium, tamen

feminae sua constaret dignitas ex creationis et redemptionis beneficiis.

I. KNABENBAUER.

FENESTRA; ita Gen. 6,16 merito vertitur צֶהָר; proprie: lumen (viam, foramen luminis, fenestram) in area facies. Nomen magis usitatum est חֶלֶץ (id quod perforatum est) et cum fenestrae non vitro clauderentur, sed cancellis, clathris, etiam nomine אֲרֻבוֹת i. e. cancelli designantur (cf. Is. 60,8, quo columbarium clathris clausum intellegitur). Etiam חֶסֶד Eccli. 21,26 explicatur fenestra; alias חֶסֶד Eccli. 14,24; 2 Mach. 3,19; Act. 20,9. In Vulgata Joel 2,8 legitur: per fenestras cadent, hebr. יִשָּׁלַח (iaculum, missile, uti alias S. Hieronymus eam vocem vertit gladium Neh. 4, 11; Job 33,18; 36,12. pugionem 2 Par. 23,10, armaturam 2 Par. 32,5, unde explicant: pone gladios cadunt, ruunt (cf. Knabenbauer ad Joel 2,8). In fragmentis hebr. Eccli. 43,11 praecipitur de custodia filiae: in loco ubi moratur ne sit fenestra.

FERMENTUM. Israelitae cum festinato egredierentur ex Aegypto, tulerunt massam farinaceam (farinam conspersam i. e. aqua subactam) antequam fermentaretur et coperunt panes azymos (Ex. 12,34,39); quare in commemoratione egressus ex Aegypto i. e. in festivitate paschali per septem dies non licebat comedere fermentatum (Ex. 12,15 s.; vide s. v. AZYMA). Pariter abesse debebat fermentum ab oblationibus. Inter cetera quae in regno samaritano pecebantur, Amos propheta etiam reprehendit, quod sacrificent de fermentato (4,5). Si apostolus vult, ut expurgemus vetus fermentum, ne in fermento malitiae et nequitiae festos agamus dies, sed in azymis sinceritatis et veritatis (1 Cor. 5, 7, 8), inde simul discimus quid fermentum symbolice significet et cur a sacrificiis abesse delmerit. Atque fermentum esse imaginem corruptionis etiam elucet, si discipuli iubentur cavere a fermento pharisaeorum et sadducaeorum i. e. a perversa eorum doctrina (Matth. 16, 6, 12; Marc. 8,15), vel si fermentum

pharisaeorum dicitur hypocrisis (Luc. 12,1). Vinum vero illam fermenti, qua suo sapore massam farinaceam penetrat et inficit, effert Christus, dum regnum caelorum comparat fermento, quia scil. doctrina Christi apta est quae afficiat, immutet, elevet omnes conditiones vitae humanae et quia dummodo suscipiatur eiusmodi effectus creat. Utramque rationem, corruptionem scil. et efficaciam penetrandi et inficiendi, videtur apostolus spectare, dum monet Corinthios modicum fermentum totam fermentare massam (1 Cor. 5,6) idemque Galatis inculcat (5,9), ut scil. caveant a iudaizantibus qui tanto studio et aviditate illis ritus quosdam iudaicos persuadere volunt.

FERRUM. hebr. בַּרְזֶל. gr. σιδηρος.

inter metalla post aurum, argentum, aes locum habet (Num. 31,22; Jos. 22,8; 2 Par. 2,7; Is. 60,17 etc.). Licet illis vilius haberetur, satis magni tamen aestimabatur, ita ut in praeda ab hostibus capta specialis eius mentio fieret (Num., Jos. II. cc.). — Inveniebatur in ipsa terra promissa (Deut. 8,9. quae verba multi recentiores de lapidibus durissimis *basaltis*, ferrum continentibus, interpretantur), ubi etiam nunc in montibus Libani, praesertim in provincia *Kesrutan*, et in regione transiordanica (*Wadi Adj-lan*) ferrum rinde abundat. Praeterea Tyrii ex Arabia et Hispania ferrum cum aliis metallis accipiebant (Ez. 27,12, 19). Etiam *ferrum ab aquilone* commemoratur in textu massorethico et antiquis versionibus Ier. 45,12, ubi tamen H. Winckler loco בַּרְזֶל בַּרְזֶל בַּרְזֶל legendum censet בַּרְזֶל בַּלְ-עֶזְרָא, explicans verba de ferro montium Antilibani, qui assyriace *Ba'alzapuna* vocantur et ferro insignes erant (Alttestam. Untersucht., Leipzig 1892, 180, cf. 131). Alii ferrum ab aquilone refinensium textum de ferro optimo et durissimo interpretantur, quod a populo Chalybum, regionem septentrionalem prope Pontum inhabitante, nomen *chalybis* accepit (cf. I. Knabenbauer in Ier. 45,12). Eandem hanc optimam ferri speciem multi nomine פְּלֶדֶה (פלדות Nah. 2,3 hebr. 4 Vulg. *habenae*) designatam censent; sed

explicatio huius vocis et textus satis dubia videtur.

Ferrum autem rarissime in statu puro inventitur; plerumque variis mineralibus intermixtum est, ideoque per ignem in *fornace ferrea* (Deut. 4,20; Ier. 11,4) purgari et probari debet (cf. Eccli. 31,31 Vulg.; cf. 34,26 gr.); tales fornaces etiam nunc in Libano ad obtinendum ferrum in forma satis simplici et primitiva, sed lignis Libani funestissima, in usu sunt. — Metallum hoc a Siracida cum « initio necessariae rei vitae hominum » (Eccli. 39,31 gr. 26) enumeratur; licet fortasse usus eius aeris posterior sit, in S. Scriptura tamen primus « malleator et faber in cuncta opera aeris » simul et ferri appellatur Tubalcain (Gen. 4,22). Etiam apud Aegyptios usum ferri antiquissimum fuisse et iam primis eius historiae saeculis viguisse ex monumentis antiquis constat. Ad vasa tabernaculi ferrum non legitur adhibitum esse; sed iam tunc ferrum in omnium usu ac nobilissimum fuisse, verba Moysis saepius indicant (Lev. 1,17; 26,19; Num. 33,16; Deut. 19,5; 27,5 etc.). In constructione templi hierosolymitani autem cum aliis metallis ferrum quoque plurimum impensum esse refertur (1 Par. 22,2. 14. 16; 29,2 etc.). Pariter in usu profano ferrum ad varia instrumenta, secures (Deut. 19,5; 27,5; 4 Reg. 6,5), « ferrata carpenta » (2 Reg. 12,31, hebr. *se-rae*), cultros (ib.), manicas ac vincula et catenas (Ps. 149,8; Dan. 4,12), arma (1 Reg. 17,7; 2 Reg. 21,16; 23,7 etc.), vectes (Ps. 106[107],16), stilum scriptorium (Iob 19,24; Ier. 17,1) aliaque adhibebatur.

De aliis v. METALLA. Cf. E. F. K. Rosenmüller, *Bibl. Alterth.* IV. 1,60-3; *Leunis-Senft*, *Synopsis* III. 1 p. 297-9. 404-23; *Naumann-Zirkel*, *Elemente d. Mineralogie* ed. 13 p. 407-9. 466-9; R. Lepsius, *Die Metalle in d. aeg. Inschr.*, *Philol.-histor. Abh.* Berl. Akad. 1871, 102-12. 120; *Wilkinson-Birch*, *Manners and Customs* II. 247-51; *Ad. Erman*, *Aegypten* 611; *id.* in *Verhandl. d. Ges. f. Anthropol.* 1888, 180.

L. FONCK.

FESTIVITATES seu dies festi. Agemus in hoc articulo primum de tem-

poribus cultus divini, dein de tribus praecipuis festis annuis in genere, denique de minoribus quibusdam festis post exsilium exortis.

1. Ac primum quidem de temporibus cultus divini. Populus foedere cum Iahwe unitus quotidie cultu publico Deum prosequabatur (v. SACRIFICIUM IUGE matutinum et vespertinum). Sed ex ipso cultu divino, ex vita naturali ac sociali populi theocratici quasi natura duce dies festi maiores oriuntur, quorum plurimi ab ipso Deo Israelitis praescripti sunt. Tres classes dierum festorum apud Israelitas facile distinguuntur: 1) cyclus dierum festorum sabbaticus; 2) tria praecipua festa annua scil. paschatis, pentecostes, tabernaculorum; 3) dies propitiationis (dies 10. mensis Tishri). Quorum festorum id peculiare est, quod numero septenario reguntur. Etenim cyclus dierum festorum sabbaticus exordium sumit a sabbato, die septimo hebdomadae et gradatim evolvitur ad mensem sabbaticum i. e. mensem septimum Tishri (v. Neomenia mensis septimi s. v. NEOMENIAE), ad annum sabbaticum i. e. septimum quemque annum quieti consecratum (v. SABBATICUS ANNUS), ad annum iubilaeum i. e. quinquagesimum quemque annum, qui post septenas hebdomadas annorum seu post septies septenos annos ab ultimo iubilaeo celebrandus erat (v. IUBILAEUS ANNUS). Praeterea festum pentecostes (vide s. v.) seu hebdomadam post septem plenas a paschate hebdomadas celebrabatur, festa paschatis et tabernaculorum per septenos dies agebantur, dies propitiationis et festum tabernaculorum in mense septimo Tishri locum habebant; septem denique dies festi praeter sabbatum cessatione ab opere et sacra convocatione sanctificandi erant: dies prima et septima paschatis (dies 15. et 21. mensis Nisan), dies pentecostes, Neomenia mensis septimi, dies propitiationis, dies prima festi tabernaculorum (dies 15. mensis Tishri) et dies 22. mensis Tishri, quae septem diebus festi tabernaculorum superaddita erat quasi clausula omnium totius anni festorum. In lege de cessatione operis id discriminis advertitur, quod pro die sabbati et

die expiationis omne opus, labor quivis, omne negotium prohibeatur (cf. Ex. 20, 10; Lev. 23, 3. 31; Deut. 5, 14 et Num. 29, 7 hebr. et LXX), pro aliis diebus festis solum omne opus servile (cf. Lev. 23, 7. 8. 21. 25. 35. 36; Num. 28, 18; 29, 1).

Cum in libris historicis rarissime fiat aliqua mentio dierum festorum, non defuerunt, qui negarent festos illos dies, quos mosaicos dicimus, esse institutionis mosaicae. Verum adverti debet, quam pauca de plurimis annis in libris historicis referantur; unde mirum esset, si festos dies esse celebratos saepius commemoraretur, cum tamen festum celebrare non sit neque eventus maximi momenti neque res fere inaudita. At nihilominus satis eius quoque rei ingeritur mentio. Refertur Jos. 3, 10 phase esse celebratum die statuto et Iud. 21, 19 sollemnitatis Domini in Silo anniversaria memoratur; Elcana statutis diebus ascendit, ut adoraret et sacrificaret Domino in Silo, ubi arca Domini erat 1 Reg. 1, 3. 21. Salomon offerebat tribus vicibus per annos singulos holocausta et pacificas victimas 3 Reg. 9, 25 et 2 Par. 8, 13 : in sabbatis et in calendis et in festis diebus, ter per annum, id est, in sollemnitate azymorum et in sollemnitate hebdomadarum et in sollemnitate tabernaculorum. Ieroboam constituit diem sollemnem in mense octavo die 15. mensis in similitudinem sollemnitatis quae celebrabatur in Iuda (3 Reg. 12, 32). Uti maiorum, ita minorum quoque festorum non deest mentio v. g. calendarum i. e. novilunii 1 Reg. 20, 5. 18 ss.; 4 Reg. 4, 23; 1 Par. 23, 31; 2 Par. 8, 13; 31, 3. Etiam plura indicia reperiuntur apud prophetas; Is. 1, 13. 14 nominantur neomenia, sabbatum, festivitates aliae; 29, 1 singulis annis ordine suo celebrari dicuntur sollemnitates et 39, 29 fit allusio ad noctem sanctificatae sollemnitatis, ad phase; cf. Os. 2, 11; 9, 5; Am. 5, 21; 8, 5. 10. Neque ullo pacto asseritur 4 Reg. 23, 22 (cf. 2 Par. 35, 18) phase a diebus Iudicum usque ad Iosiam non esse celebratum, sed dicitur solum : non factum est sicut phase hoc (hebr.) i. e. ut Vulgata bene habet : nec enim factum est phase *tale* (cf. etiam

2 Par. 30, 26; Neh. 8, 17), quo modo loquendi non ipsa sollemnitatis negatur, sed modus quidam peculiaris maximae festivitatis ac laetitiae et concursus totius populi in comparisonem adducitur.

2. De tribus praecipuis festis annuis in genere.

Ter in anno, in festis paschalis, pentecostes, tabernaculorum lege statutum erat, ut omne masculinum coram Domino appareret (Ex. 23, 14-17; 34, 23; Deut. 16, 16; cf. 2 Par. 8, 13; Ez. 46, 9; Io. 4, 45; 7, 8; 11, 56; 12, 12; Act. 2, 5). Puerum ab anno aetatis duodecimo expleto hanc legem implere consuevisse innuitur Luc. 2, 42 et ex placitis quoque rabbinorum posteriorum confirmatur, qui puerum ab ea aetate ad ieiunandum et ad observationem legis maturum esse censebant et *filium legis* appellabant (cf. *Lightfoot*, Horae hebr. ad Luc. 2, 42; *Wetstein*, Nov. Test. ad Luc. 2, 42; *Patritius*, De Evang. lib. 3, diss. 38, cap. 1).

Attamen obligatio iam ante aetatem duodecim annorum adesse censebatur in Mishnae tractatu de sacris sollemnibus (Chagiga 1, 1) : « Omnes tenentur comparere excepto surdo, stulto et *minorene* (קטן), obturato, hermaphrodita, mulieribus, servis non libertate donatis, claudis, caecis, infirmis, senes et qui pedes advenire non poterant. *Quinam est minorenis?* quicumque nequit insidere humeris patris sui et Ierusalymis ascendere montem templi, sunt verba scholae Shammai. Schola Hillelis dicit; quicumque tenere nequit manum patris sui et Ierusalymis ascendere montem templi, uti scriptum est Ex. 23, 14 : tria festa » (apud *Surenhusium* II. p. 413). Cf. *E. Schürer*, Gesch. d. jüd. Volkes ed. 3 II. 425 s.; *A. Edersheim*, The life and times of Jesus I. 235 ss.

Quanta fuerit multitudo eorum, qui ad tria illa festa Hierosolyma ascenderent, testantur Philo De monarchia 2, 1 ed. *Mangey* II. 223 et Flav. Iosephus, qui ad festum paschalis 2700000 (Bell. ind. VI. 9, 3) vel ad 3000000 (II. 14, 3) hominum adfuisse refert, quo in numero utique incolae orbis comprehenduntur.

Talmudici tria illa festa sollemnia dicebant תעניתים, quia omnes Israelitae mas-

culi tenebantur ascendere ad ea pedibus suis (*Burton*, Lexicon chald. talm. rabb. p. 2204).

3. De minoribus quibusdam festis post exsilium exortis. Ut liberatio Iudaeorum per Estherem facta celebraretur, insituebatur dies sortium, Phurim (vide s. v.). Iudas Machabaeus festum dedicationis templi seu encaeniorum instituit (v. DEDICATIO 2 et IUDAS 1). Praeterea die 13. mensis Adar celebrabatur memoria victoriae, quam Iudas Mach. de Nicanore reportaverat (1 Mach. 7,26-49; 2 Mach. 15,1 ss.; cf. *Flav. Ioseph.* Ant. XII. 10,3). Simon Machabaeus constituit, ut die 23. mensis secundi Ijjar ageretur memoria expugnationis arcis in Ierusalem (1 Mach. 13,50-52). Secundum Vulgatam Iudith 16,31 ille quoque dies, quo Holofernes a Iudith occisus est, in numero sanctorum dierum habebatur et ex illo tempore a Iudaeis colebatur.

Accedit denique festum Ligniferii (ἡ τῶν ξυλοφορέων ἑορτή), cuius meminit *Flav. Iosephus* (Bell. iud. II. 17,6): « in quo mos est omnibus magnam lignorum vim ad aram comportare, ne quo tempore ad alendos ignes materia deesset (nunquam enim exstinguuntur) ». Eius festi in S. Scriptura mentio non fit; antiquitas Gabaonitae (Hevaei) perpetuo famulata ligna pro domo Dei caedendi adstricti erant (Is. 9,23); post exsilium vero Nehemias oblationem lignorum inter sacerdotes, levitas populumque sorte distribuit, ut ex ordine cognitionum statutis temporibus in domum Dei inferrentur (Neh. 10,34; 13,31); eam autem lignorum oblationem quasi sponte cum laetitia festiva factam esse facile concipitur. Iosephus festo Ligniferii assignat diem 14. mensis syro-macedonici Δωδ; (cf. loc. cit. cum II. 17,7) seu mensis quinti hebraici Ab; sed in Mishna (Taanith 4,5) novem dies speciales in anno recensentur ad hoc destinati, ut novem familiae in illis ligna afferrent. Ex testimoniis rabbinicis (Megillath Taanith §. 11; Mishna, Taanith 4,4. 5. 8, Megilla 1, 3; Gemara hieros. Taanith 68. 69. Megilla 70; Gemara bab. Taanith 28-31) apparet diem principalem Ligniferii fuisse diem 15. mensis quinti Ab (non diem 14. quem *Flav. Iosephus* assignat).

Plura de hoc festo vide apud *Otho*, Lexicon rabbin. p. 380; *P. Scholz*, Die heiligen Alterthümer des Volkes Israel II. 105-106; *E. Schürer*, Gesch. d. jüd. Volkes ed. 3 II. 260. 261.

FESTUS (Φῆστος). Antonio Felici in procuratore Iudaeae successit Porcius Festus a Nerone missus (cf. *Flav. Ios.* Ant. XX. 8,9; Bell. iud. II. 14,1). Cum a Caesarea Hierosolyma ascenderet, adierunt eum principes sacerdotum et nobiles Iudaeorum rogantes, ut Paulum Hierosolyma duci iuberet, quo in itinere ei insidias struere volebant. Verum abnuvit Festus iubens accusatores Pauli Caesaream venire, ubi Paulus servaretur. Reversus post aliquot dies Festus pro tribunali sedit; contra accusationes Paulus demonstrat se neque in legem neque in templum neque in Caesarem peccasse. Sed cum Festus Iudaeis gratiam praestare volens Paulum Hierosolyma mittere velle videretur, Paulus probe intellegens fore, ut traderetur Iudaeis inimicis infensissimis, iure suo civis romani utens Caesarem appellavit. Festus omnino perspexit nullum in Paulo crimen esse, sed agi solum de quaestionibus religionis; verum cum ipse quoque gratiam praestare vellet Iudaeis, Paulum non liberum dimisit; at cum Paulus civis romani coram tribunali procuratoris i. e. Caesaris esset accusatus, cum invitum ad tribunal provinciale amandare non potuit; unde quaerit: vis Ierosolymam ascendere et ibi de his iudicari coram me? a synedrio scil. me praesente? Sed quid Iudaei contra se molituri essent, Paulus satis cognovit; unde respondit: ad tribunal Caesaris sto... nemo potest me Iudaeis donare; Caesarem appello (Act. 24,27-25,11). Consilarii Festi vel assessores (*Suetonius*, Tib. 33) consenserunt appellationem posse admitti. Sed quo elogio scripto Paulus mitti poterat? De quo cum Festus dubitaret, Paulum produxit ad Agrippam regem, qui post aliquot dies cum Bernice uxore advenerat Festi salutandi causa (23,12-27). Coram hisce itaque Paulus vitae suae ac praedicationis rationem reddidit, et cum sermonem inferret de Christi resurrectione, insans Paule,

inquit Festus, multae te litterae ad insaniam convertunt. Agrippa autem Festo dixit: dimitti poterat homo hic si non appellasset Caesarem (23.28-32). — De eius administratione vide Ant. XX. 8,9-9,1; ex qua narratione sequi videtur Festum per breve tempus munus gessisse.

FICUS. 1. Ficus licetum, ficulnea) hebr. dicitur תְּאֵנָה, graece vero συζῆ et σύζων; fructus praecoqui primi temporis בכורה audiunt, immaturi vero פְּגָה (Cant. 2,13 Vulg. *grossi*), quam vocem alii de ficis tenerioribus intellegendam censent (P. Schegg, Bibl. Arch. 191, collato etiam Ez. 27,17 פִּנְגָּה, de quo v. BALSAMUM 1). Significatio nominis hebraici, linguis semiticis communis, dubia non est omnibusque arborem fici (*Ficus carica* Linné, ord. *Urticaceae*) eiusque fructus designat.

De variis fici nominibus cf. I. Löw, Aram. Pflanzennamen n. 335; P. de Lagarde, Mitteilungen I. 58-75; Fr. Hommel, Aufsätze u. Abhandl., München 1892, 93. 100-6; V. Hehn, Kulturpfl. u. Hausth. ed. 6., 94-7. 560 s.; O. Schrader ib. 99-101.

2. Fici patria satis probabiliter Arabia meridionalis censetur, unde saltem 2500 fere annis ante Christum in Aegyptum translata atque in alias quoque regiones praesertim circa mare Mediterraneum invecata est. Hodie pluribus varietatibus ibidem ubique colitur atque etiam non culta in variis locis in statu silvestri invenitur.

Cf. C. Ritter, Erdkunde XI. 537-49; Graf zu Solms-Laubach in Abhandl. d. Ges. d. Wissensch. zu Göttingen XXVIII. 1882; E. Boissier, Flora orient. IV. 1154; Lenné-Frank, Synopsis II. 2 ed. 3. p. 537 s.; A. de Candolle, Origine des pl. cultivées 235-8; Frz. Woenig, Pflanzen im alt. Aeg. 292-7; L. Anderlind in Ztschr. d. D. Pal.-Ver. XI. 1888, 79-81; G. Schweinfurth in Verh. d. Berl. Ges. f. Anthrop. 1891, 657; V. Lorel, Flore pharaonique ed. 2, 47 s.; A. Engler in Hehn op. c. 97-9; G. E. Post, Flora of Syria 730. — De ficu ap. Assyrios cf. A. H. Layard, Monuments of Nin. II. 14. 15. 22. 23. 24; E. Bonavia, Flora of the Ass. Monum., London 1894, 14.

3. S. Scriptura inter fructus prae-

stantissimos terrae promissae ficos frequenter commemorat. Exploratores a Moyse missi « de ficis loci illius tulerunt ad demonstrandam terrae ubertatem » (Num. 13,24), quam et Moyses ex ficis commendat (Deut. 8,8); pariter tempore Esdrae Hierosolymis venales afferebantur (Neh. 13,15) atque etiam prophetae signum sunt felicitatis terrae (Ioel 2,22) et a Sponso inter delicias horti regii enumerantur (Cant. 2,13). Cum ficulnea largis foliis suis ramisque expansis incundam praebeat in arboribus umbram (cf. Io. 1,48. 50), fructuque suo dulcissimo omnibus gratissima existat (cf. Iud. 9,10 s.), imago pacis et securitatis saepius dicitur habitare sub ficu sua (3 Reg. 4,25; Mich. 4,4; Zach. 3,10; 1 Mach. 14,12) et comedere de fructibus eius (4 Reg. 18,31; Is. 36,16). E contrario locus pessimus Israelitis est desertum, quia « nec ficum gignit nec vineas » (Num. 20,5), et inter calamitates poenasque divinitus inflictas recensetur quod « alienus comedet ficum tuum » (Ier. 5,17) et grando percussit ficulneas eorum (Ps. 104,33) et defuit folium de ficu (Is. 34,4) et non sunt ficus in ficulnea (Ier. 8,13) et corrumpitur ficus (Os. 2,12 hebr. 14) et decorticatur, unde clangit (Ioel 1,7. 12; cf. Am. 4,9; Hab. 3,17; Ag. 2,20).

Praestantissimae autem censentur ficus praecoquae (Is. 28,4 Vulgata *temperaneum*; Ier. 24,2; Os. 9,10; Mich. 7,1; Nah. 3,12); ac licet etiam ficulneae spontanee crescentes aliquos fructus ferant, cura tamen et labore servare ficum oportet, ut quis fructuum suavitatem et dulcedinem fruatur (Prov. 27,18; cf. Luc. 13,6 ss.). — Etiam in comparationibus biblicis saepe tum ficus bonae tum mae adhibentur (Ier. 24,1-8; 29. 17; Matth. 7,16; 24,32; Marc. 13,28; Luc. 6,44; 21,29; Iac. 3,12; Apoc. 6,13), ac praesertim in ficu illa sterili foliis orната Dominus imaginem populi religione ac pietate carentis, sed cultus rituumque pompam servantis ostendit (Matth. 21,19 ss.; Marc. 11,13 ss.). Nam cum ficulneae folium serius nascatur, quam pomum (Plin. XVI. 26,113), videns Dominus, more hominum agens, ficum habentem folia, rationabiliter fructum in

ea expectare potuit. — Remediis quoque aptus fructus fici censebatur, ac sicut iussu Isaiae imposita massa de ficis curavit ulcus Ezechiae regis (4 Reg. 20,7; Is. 38,21), ita etiam postea usus eius medicinalis cognitus erat atque hodieum remansit (*Dioscur.* Mat. med. 1, 183-6; *Plin.* XXIII. 7,117-30).

4. De foliis fici, quae consuerunt primi parentes, ut facerent sibi perizomata (Gen. 3,7) aliqui dubium moverunt, verane ficus an alia arbor in textu sacro intellegenda sit, ac parum quidem probabile censescentes ficum in horto paradisi existitisse plures potius arborem indicant, *Musa sapientum* Linné vel *M. paradisiaca* L. dictam (de qua cf. *Leunis-Frank* o. c. 768-70). Adamo eiusque coniugi folia prae buisse existimantur. At dubium mere negativum non sufficit, ut eidem nomini תאֲנִיָּה aliam in hoc loco significationem fingamus, neque folia arboris illius, 2-4 metra longa, apta apparent quae ad perizomata consuantur.

De cibi specie ex ficis parati, quam *mas-sam caricarum* et *palathas* S. Hieronymus vocavit, v. CARICAE, PALATHA. — *Ficeta* 1 Par. 27,28 ponitur pro hebr. שִׁקְבִּיִּים, i. e. sycomori. V. SYCOMORUS.

De ficu praeter auct. cit. cf. *I. H. Heidegger*, De Ficu a Christo maledicta, Amstelodami 1657; *I. H. Ursinus*, Arboret. bibl. 424-55; *M. Hiller*, Hierophyt. I. 150-70; *C. v. Linné*, De ficu, Upsaliae 1744; *O. Celsius*, Hierobot. II. 368-99; *E. F. K. Rosenmüller*, Bibl. Alterth. IV. 1,285-92; *H. O. Lenz*, Bot. d. alt. Griech. u. Röm. 421-7; *P. Cultrera*, Flora bibl. 386-96; *H. B. Tristram*, Nat. Hist. of the Bible ed. 8, 350-3; *P. Schegg*, Bibl. Archaeol. 189-91; *L. Schneller*, Kennst du das Land ed. 16, Leipzig 1899, 104-7, 278-88.

L. FONCK.

FIDEIUSSOR. De sponsione, cautione qua quis se pro altero obstringat nihil quidem reperitur in lege mosaica; sed eiusmodi sponsonem esse consuetudine inductam apparet ex variis quae in libris Prov., Iob, Eccli. leguntur. Data dextera fiebat sponsio (cf. Iob 17,3 hebr.; Prov. 11,15; 17,18; 22,26, hebr.). Si debitor non potuit vel noluit debitum solvere, creditor rem a fideiussore repe-tebat; immo eum vestimento, lecto spo-

liare potuit: tolle vestimentum eius qui fideiussor exstitit alieni et pro extraneis aufer pignus ab eo (Prov. 20,16) et 22, 26 s.: noli esse cum his qui defigunt manus suas (i. e. qui dexteras dant, sponsione se obstringunt) et qui vades se offerunt pro debitis; si enim non habes unde restituas, cur auferet lectum tuum sub te (hebr.; Vulgata: quid causae est ut tollat operimentum de cubili tuo). Unde dicitur multos cautione interposita perdidisse rem familiarem et e patria fugere debuisse: repromissio (ἐγγύη) multos perdidit dirigentes (κατεσθύνοντες) et commovit illos quasi fluctus maris; viros potentes migrare fecit et vagati sunt in gentibus alienis (Eccli. 29,24. 25). Quare sapiens monet: fili mi, si sponderis pro amico tuo, (si defixisti apud extraneum manum tuam (i. e. si pro alio dexteram dedisti sponsionis, cf. hebr.), illaqueatus es verbis oris tui... fac ergo, quod dico, fili mi, et temelipsum libera etc. Prov. 6,1 s. et: affligetur malo qui fidem facit pro extraneo; qui autem cavet laqueos (i. e. qui cavet a sponsione, cf. hebr.) securus erit Prov. 11,15; quare Prov. 17,18 hebr. stultus vocatur qui pro alio cautionem interponit et dexteram dat et similiter 22,26 datur monitum, ne quis se vadem praestet pro alio, cum sit periculum ne se ipsum bonis suis privet; cf. Prov. 27,13. Simul tamen indicatur boni viri esse sponsione sese pro alio obstringere; proin solum monetur ne quis id inconsiderate faciat; vir bonus fidem facit (ἐγγυάζεται) pro proximo suo Eccli. 29,19; solum is qui omnem abiecit pudorem derelinquet eum; quare qui eiusmodi beneficium accepit, monetur: gratiam fideiussoris ne obliviscaris; dedit enim pro te animam suam Eccli. 29, 20. At is quoque reprehenditur qui statim fideiussorem spoliatur: bona repromissoris (ἐγγύου) sibi ascribit peccator (29,22). — Sponsor pro Benjamin exstitit Iudas Gen. 43,9; 44,32.

FIDES. In Vetere Test. saepe ponitur pro hebr. אֱמִנָּה; ita v. g. 1 Sam. 26,23: Dominus autem retribuet unicuique secundum iustitiam suam et fidem i. e. fidelitatem; similiter 4 Reg.

12,15, ubi dicitur, eos qui acceperunt pecuniam eam in fide i. e. cum fidelitate, uti praescriptum erat, tractasse; item 22,7: verumtamen non supputetur eis argentum quod accipiunt, sed in potestate habeant et in fide; simili notione 1 Par. 9,22 et Ps. 32,4 Dei fidelitatem exhiberi dicitur in eius operibus; pariter Is. 11,5 fides i. e. fidelitas appellatur cinctorium renum Messiae; eiusmodi fides, fidelitas et constantia in lege Dei observanda praedicatur de tempore messiano Is. 33,6; eam abesse de suo tempore conqueritur Ieremias 5,1. 3; 7,28; verum scilicet multam esse fidelitatem Dei, unde spem concepit misericordiae Lament. 3,23 et si Deus de tempore futuro promittit: et sponsabo te mihi in fide (Os. 2,20), foedus novum constitutum iri asserit fidelitate et constantia et firmitate. Si Hab. 2,4 dicitur: iustus autem in fide sua vivet, notio ex oratione contexta est: vivet quia et quatenus fideli animo Dei promissionibus fidem adhibeat et spe inde concepta animum gerat excelsum mediis in calamitatibus; quare hoc loco notio credendi verbis Dei indeque fideliter ei adhaerendi polissimum subest, quae significatio verbo **האמין** inest (cf. Gen. 15,6; Ex. 14,31; Is. 7,9; 53,1 etc.). Significatione fidelitatis praeterea legitur Os. 5,9; Eccli. 6,15: amico fideli nulla est comparatio et non est digna ponderatio auri et argenti contra bonitatem fidei illius; item 22,28; 27,18; 40,12; 45,4; 46,17; 1 Mach. 10,27. 37. Verum aliis in locis eum designat animi actum aut habitum quo alteri creditur Eccli. 25,16; 49,12 et 2 Mach. 15,11, ubi de somnio fide digno sermo inferitur (**δυνασθον ἀξιοπιστον**); ex qua notione facile alia consequitur, qua alteri fideitur, ei fiducia exhibetur; cf. Eccli. 27,17. Ei significationi cognatum est, si fides ponitur, ubi graece legitur **ἐννοια**, uti 2 Mach. 9,26; 11,19 et similiter 42,8. Aliquibus in locis legitur in Vulgata fides, quos S. Hieronymus libere ad sensum vertit; ita Gen. 39,16; Lev. 6,2; Tob. 2,18; Esth. 6,3; 16,13. 23. Alia quaedam uti fidem facere Eccli. 29,19 vide s. v. FIDEIUS-SOR.

In libris Novi Testamenti fides plurimque occurrit ea significatione, qua alteri creditur, qua res quaedam propter auctoritatem alterius assumitur, creditur; unde fides saepissime dicit firmam persuasionem de aliqua re. Si haec firma persuasio habetur de Dei misericordia, bonitate, potentia, de Iesu Christi potentia, benignitate, per se ex ea oritur certa quaedam et firma fiducia; quare haec fiducia ipsa etiam voce fidei connotatur. Ad rectam fidei notionem hauriendam haec perpendenda sunt: centurio dixit: tantum dic verbo et sanabitur puer meus; Iesus respondet: non inveni tantam fidem in Israel; vade et sicut credidisti, fiat tibi (Matth. 8,8-13). Caecis sanationem petentibus dicit Iesus: creditis quia hoc possum facere vobis (Matth. 9,28)? Mulier sanguinis fluxu laborans tantam concepit persuasionem de Christi potentia, ut cogitaret: si tetigero tantum vestimentum eius, salva ero; et Iesus ei dicit: fides tua te salvam fecit (Matth. 9,20 s.) et ita in plurimis narrationibus evangelicisprehenditur firma quaedam persuasio de Christi potentia, cui fiducia atque adiuncta est. Praeclaram fidei descriptionem nobis dat Paulus fidem Abraham laudans Rom. 4,9. 18 s.; Abraham autem Deo loquenti et rem promittenti quae creditu erat difficillima credidit: haec est fides eius (Gen. 15,6; Rom. 4,3); et claram fidei descriptionem nobis proponit Hebr. 11,1. 3, fidem dicens firmum fundamentum vel firmam persuasionem rerum sperandarum et argumentum vel probationem certam de rebus quae sensibus non appareant. Fidem dicere firmam animi persuasionem elineet quoque ex Rom. 14,1. 23; ubi docetur eum qui cum dubio liceatne necne manducet peccare, quia non *ex fide*, omne autem quod non est ex fide peccatum est. Quid sit fides pariter elineet ex Acl. 13,7 s.; Sergius Paulus desiderabat audire verbum Dei quod Barnabas et Saulus annuntiabant; Elymas autem resistebat illis quaerens avertere proconsulem a fide i. e. ne crederet, ne ea firma animi adhaesione ampleretur: quae ipsi tanquam verba Dei proponebantur. Fides quoque egregie describi-

tur tamquam persuasio qua quis rem aliquam animo complectatur Hebr. 11, 6 : sine fide impossibile est placere Deo; credere enim oportet accedentem ad Deum quia est et inquirentibus se remunerator sit: unde dicitur fides ad Deum 1 Thess. 1,8; Hebr. 6,1, fides in Deum (1 Petr. 1,21 gr.) etc. vel res quae creditur exprimitur genetivo; ita saepe fides Iesu Christi, fides Filii Dei i. e. firma persuasio de Iesu Messia, laeta animi adhaesio qua quis Iesum Dei Filium credit; cf. Rom. 3,22; Gal. 2,20; ex qua fide vel per quam fidem homo docente apostolo iustificatur (Rom. 3,28. 30., quia haec fides est initium, radix, fundamentum iustificationis, cum remissio peccatorum et reconciliatio cum Deo haberi nequeat nisi ab eo qui in Iesum credens pretio sanguinis eius expiatur. Quam in Iesum fidem tamquam unicum salutis fontem apostolus operibus legis (ea fide destitutis) opponit. Haec animi de Deo eiusque Filio et generalim de rebus a Deo revelatis persuasio et firma adhaesio, ut retineatur, confirmetur, augeatur et crescat, sacrae litterae admonent (cf. Act. 14,21; 2 Cor. 10,15; Eph. 4,29; Col. 1,23; 2,7; 2 Thess. 1,3 etc.). Qui fidem habent dicuntur esse ex fide (Gal. 3,7). Fidem autem hanc non inniti sapientiae humanae, sed eam effici virtute divina et eam praestari Deo loquenti, apostolus clare docet: et sermo meus et praedicatio mea non in persuasibilibus humanae sapientiae verbis, sed in ostensione spiritus et virtutis, ut fides vestra non sit in sapientia hominum, sed in virtute Dei (1 Cor. 2,4. 5) et: cum accepissetis a nobis verbum auditus (praedicationis) Dei, accepistis illud, non ut verbum hominum, sed (sicut est vere) verbum Dei qui operatur in vobis qui credidistis (1 Thess. 2,13). Quae fides est lux, illuminatio mentis a Deo facta quam apostolus creationi lucis comparat (2 Cor. 4,3-6).

Haec firma animi persuasio necessario gignit fiduciam, spem, obsequium erga Deum quod observatione mandatorum bonisque operibus consistit. Quam arcte fides et fiducia inter se connectantur, apparet ex modo loquendi et exhortandi quo utitur apostolus Hebr. 10,19.

33-11,4. Fidem illam, qua homo non impellatur ad bona opera praestanda, S. Iacobus mortuam appellat, et ex operibus ostendi fidem, quae si operibus careat non possit salvare hominem (Iac. 2,17-26). Cum fides itaque sit persuasio, agnitio, cognitio, poterit fides eo modo usurpari quo eiusmodi vocabula notione quadam argumenti cognitione contenti adhibentur; ita dicitur: nunc evangelizet fidem quam aliquando expugnabat (Gal. 1,23), uti Estius explicat: quia Christi fidelibus extorquere fidem persequendo nitebatur. Eodem modo dicitur fidei obedire, audire fidem, fidem tradi (Act. 6,7; 24,24; Iudas 3), uti dici solet cognitionem tradere etc.

Uti in Vetere Testamento, ita quandoque in Novo quoque fides induit notionem fidelitatis; ita de Deo Rom. 3,3: numquid incredulitas eorum fidem Dei evacuabit? Item de humana fidelitate Gal. 3,22 tamquam fructu Spiritus sancti et Tit. 2,10: non fraudulentis, sed in omnibus fidem bonam ostendentes et similiter notione fidei datae 1 Tim. 5,12: primam fidem irritam fecerunt. — Ceterum vide s. v. CHARISMATA, CREDERE.

1. KNABENBAUER.

FIDUCIA. Ea voce in Vet. Testamento plerumque redditur בְּטִיחָא, etiam נִשְׁעָן (fulciri, fulcrum suum habere, reputare). Ut toto corde confidentiam ponamus in Deo monemur: habere fiduciam in Domino ex toto corde tuo (Prov. 3,5) et Asa rex oravit: adiuva nos, Domine Deus noster; in te enim et in tuo nomine habentes fiduciam venimus contra hanc multitudinem (2 Par. 14,11). Pariter: in timore Domini fiducia fortitudinis (Prov. 14,26). Tali fiducia Susanna in periculo gravissimo confortata est: fletus suspexit ad caelum; erat enim cor eius fiduciam habens in Domino (Dan. 13,35). Saepe fit admonitio ne confidentia et spes ponatur in hominibus, multo minus in idolis; ubi sunt dii eorum, in quibus habebant fiduciam (Deut. 32,37)? Et Hanani propheta dicit ad Asa regem Iuda: quia habuisti fiduciam in rege Syriae et non in Domino Deo tuo, idcirco evasit Syriae regis exercitus de manu tua

(2 Par. 16,7). Eius qui Deum obliviscitur fiducia est sicut tela araneorum (Job 8,14). Prophetæ reprehendunt eos qui fiduciam suam ponunt in auxilio extraneorum; ita Isaias invehitur in eos qui fiduciam habent in umbra Aegypti, in quadrigis eius, quam in ignominiam fore dicit (30,2. 3; 31,1); pariter monet Ieremias contritum iri urbes in quibus habuerint fiduciam; monet ne confidant vane in templo (5,17; 7,14). Tempore Ezechiae regis Rabsaces dux regis Assiriorum irridet Iudæos eo quod in Domino fiduciam habeant; Isaias autem regem et populum iubet firmam in Domino habere fiduciam, in cuius fiducia præmium e periculo erepti sunt (4 Reg. 18,19 ss. Is. 36,4 ss.).

In Novo Testamento ea voce exprimitur *θάρος* Act. 28,15, item *θαροῦντε* Matth. 14,27 i. e. bono vel forti animo estote; item *πεποθῆσις* 2 Cor. 3,4, cui notioni quoque congruit *πεποθότες* Phil. 3,3 : gloriamur in Christo non in carne fiduciam habentes. Verum plerumque ea voce redditur *παρρησία* quæ proprie est libertas in dicendo et quaedam audacia, seu alacris quaedam et imperterrita confidentia; ita Act. 4,29 : da servis tuis cum omni fiducia loqui verbum Dei; item Act. 4,31 : 2 Cor. 3,12 : habentes igitur talem spem multa fiducia utimur et 7,4 : nulla mihi fiducia est apud vos. In Christo Iesu nos habere fiduciam apostolus sæpius affirmat (Eph. 3,12; Hebr. 10,19 in sanguine Christi; 1 Thess. 2,2 in Deo; 1 Tim. 3,13 in fide Christi) non autem in carne (Phil. 3,3 *πεποθότες*); cf. Hebr. 3,6 et 4,16. Eodem modo monet S. Ioannes : et nunc, filii, manete in eo (in Christo), ut cum apparuerit habeamus fiduciam et non confundamur ab eo in adventu eius (1 Ioan. 2,28) et si cor nostrum non reprehenderit nos, fiduciam habemus ad Deum 3,21; cf. 4,17 et 5,14 : hæc est fiducia quam habemus ad eum, quia quodcumque petierimus secundum voluntatem eius audit nos. Eadem notione etiam *ἐπαρρησιάζεσθαι* redditur; ita Act. 19,8 : cum fiducia loquebatur verbum Dei per tres menses (Paulus Ephesi) et cf. 1 Thess. 2,2. — Hisce satis docemur, in quo fiducia ponenda sit, in quo vero

non, cur et quibus conditionibus alacri confidentia nos armare debeamus.

I. KNABENBAUER.

FIGULUS. Modus operandi figuli describitur Eccli. 38,32 ss. : figulus sedens ad opus suum convertens pedibus suis rotam, qui in sollicitudine positus est semper propter opus suum..., in brachio suo formabit lutum et autem pedes suos curvabit virtutem suam (i. e. pedibus rigorem lutū emollit); cor suum dabit ut consummet finitionem et vigilia sua mundabit fornacem. Similiter Sap. 15,7 : figulus mollem terram premens laboriose fingit ad usus nostros unumquodque vas. Prius enim lutum pedibus calcabatur (cf. Is. 41,25) donec satis molle efficeretur; dein rota figulari opus suum formavit, quæ rota figularis duabus rotis constabat, maiore inferiore, minore superiore (unde Ier. 18,3 : opus faciebat figulus *יָצַק עֲלֵהּ*) simili modo uti in mola manuarum. Vasa formata, vasa figuli probat fornax Eccli. 27,6. Ex Prov. 26,23 licet concludere figulis artem obducendi vasa materia quadam splendida non fuisse ignotam; legitur enim ibi hebr. argentum scoriarum obductum super testam (vas fictile). Figulos etiam instrumenta idololatriæ, idola, quandoque fecisse Sap. 15,8 indicatur : labore vano deum fingit de eodem luto. — De figulis quorum mentio fit 1 Par. 4,23 vide quæ disputat *De Moor* in periodico *La Science catholique* 1894 p. 714. — De agro figuli vide s. v. *HA-CELDAMA*.

FILIUS. Hæc vox modo multiplici adhibetur.

Notione primaria is dicitur filius qui a patre genitus est. Filiis præcipitur, ut honorent patrem et matrem (Ex. 20,12; Dent. 5,16; Matth. 15,4; Eph. 6,2) et severe animadvertitur in eos qui parentibus debitam reverentiam et obedientiam negant; qui percusserit patrem suum aut matrem, morte moriatur; item, qui iis maledixerit (Ex. 21,15. 17; Lev. 20,9; Prov. 20,20; Matth. 15,4); filius contumax et protervus lapidandus erat (Dent. 21,18-21). — Filii heredes sunt bonorum parentum, ita tamen ut

filii primogenitus partem duplicem accipiat (etsi fuerit filius uxoris odiosae; cf. Deut. 21,17); verum ob scelus commissum ius primogeniti in alium potuit transferri; cf. 1 Par. 3,1. Filii autem nothi ab hereditate excluderentur, uti in exemplo Iephte patet Iud. 11,1 s. — Habere filios referebatur ad divinam benedictionem; iis carere opprobrium verbebatur et tamquam castigatione divina inflictum considerabatur; cf. Gen. 13,2; 30,23 Rachel pariens filium dicit: abstulit Deus opprobrium meum; 1 Reg. 1,6; Ps. 112,9; 126,3; Prov. 17,6: corona filii filiorum; Eccli. 3,6: qui honorat patrem suum iucundabitur in filiis; Deut. 7,14: non erit apud te sterilis utriusque sexus; Is. 47,9; Luc. 1,7 etc. Inde quoque intellegitur lex leviratus (Gen. 38,8; Deut. 25,5 s.). Sed melior est unus (filius) timens Deum quam mille filii impii et utile est mori sine filiis quam relinquere filios impios Eccli. 16,3. 4 et Sap. 3,13 felix dicitur sterilis et quae nescivit thorum in delicto, dum maledictae et insensatae appellantur quae ex adulteriis filios concipere gestiunt. — Quamvis in utroque testamento obedientia filiis erga parentes saepius graviterque iniungatur (Lev. 19,3; Prov. 1,8; Eccli. 3,1-18; Marc. 7,10; Eph. 6,1-3; Col. 3,20; 1 Tim. 3,4), tamen etiam significatur accidere posse, ut filii, ne servitio divino desint, parentes debeant relinquere vel iis obsistere (cf. Matth. 10,37; 19,29; Luc. 9,59; 14,26). — Ex una parte dicitur Deus visitare iniquitatem patrum in filios in tertiam et quartam generationem eorum qui oderunt me (Ex. 20,5; Deut. 5,9; Os. 4,6; Ier. 32,18; Am. 7,17), ex altera parte autem: non occiderunt patres pro filiis nec filii pro patribus; sed unusquisque pro peccato suo morietur (Deut. 24,16; cf. Ier. 31,30; Ez. 18,20: filius non portabit iniquitatem patris etc. cf. 18,1-18). Quae duo facile inter se conciliantur. Ubique enim terrarum notum est posteros in se experiri mala quae maiores commiserint; si pater opes suas dissipaverit, filii in deteriore sunt conditione; si pater criminibus honorem civium perdiderit, tota familia subit ignominiam. Porro facillime fit, ut in-

doles patris impii etiam in filiis quasi renascatur; unde consortes et participes pravitalis paternae merito puniuntur; insuper quos Deus puniturus sit addit לְשׂוֹנֵי odientes me « et faciens misericordiam in millia his qui diligunt me » (Deut. 3,9. 10 hebr.).

Latiore significato filius quandoque dicitur pro nepote; ita Gen. 29,5 Laban vocatur filius Nachor, cum sit filius Bathuel, nepos Nachor; similiter Esdr. 3,1 cf. Zach. 1,1. Deum generatim filii dicuntur posterii; ita filii Israel, filii Levi, filii Ammon i. e. Israelitae etc.; homines dicuntur filii Adam Eccli. 3,21; Eccli. 40,1: iugum grave super filios Adam. Similiter sermo infertur de filiis Sion (Is. 66,8), filiis Ierusalem (Matth. 23,37). Filii Abraham vocantur et ii qui ab Abraham stirpe descendunt et ii qui indolem Abraham imitantur: cognoscite ergo, quia qui ex fide sunt ii sunt filii Abrahae Gal. 3,7; immo eam rationem esse longe potiore apostolus indicat: neque qui semen sunt Abrahae omnes filii Rom. 9,7. Porro nomen filii usurpatur etiam de eo qui erga alium subiectionem, obedientiam, amorem i. e. eos animi sensus quos filius in patrem habet exprimere vult. Ita Achaz misit nuntios ad Theglathphalasar dicens: servus tuus et filius tuus ego sum 4 Reg. 16,7; discipuli dicuntur filii, quia magistros observantia et amore prosequuntur qui quasi parentum officio fungentes et parentum partes supplentes eos erudiunt; ita filii prophetarum (3 Reg. 20,35; 4 Reg. 2,3 etc.); ita Paulus vocat Timotheum filium suum carissimum; eos quos praedicatione sua ad Iesum adduxit, quos spiritualiter genuit, filios appellat (1 Cor. 4,17; Gal. 4,19; 1 Tim. 1,2. 18; 2 Tim. 1,2; Tit. 1,4; Philem. 10: obsecro te pro meo filio quem genui in vinculis, Onesimo); 1 Petr. 5,3: Marcus filius meus etc.). Quare magister discipulum alloquitur: fili mi; exempla habes plurima in libris Prov. et Eccli., et Christus quoque discipulos eo nomine alloquitur: filioli (Marc. 10,24; Ioan. 13,33; 21,5 παιδία), uti alios quoque ad consolationem dandam et amorem suum exhibendum compellat:

confide, fili τέκνον Matth. 9,2) etc. Notio subiectionis effertur in filio mortis, filio irae etc. quo nomine appellatur qui morti est destinatus, irae Dei obnoxius; similiter filius gehennae, filius perditionis (cf. 1 Reg. 20,31; 2 Reg. 12,5; Matth. 23,15; Ioan. 17,12; Eph. 2,3).

Similitudine quadam cum generatione qua natura propagatur ii qui alicuius virtutis vel vitii naturam et indolem in se exprimunt filii vocantur v. g. filii roboris, sapientiae, lucis, obedientiae; filii iniquitatis (i. e. Belial), superbiae (2 Reg. 7,10; Matth. 11,19; Eph. 5,8; 1 Petr. 1,14 etc.). Similiter filii diaboli (1 Ioan. 3,10).

Sensu sublimiore dicuntur filii Dei qui a Deo creati peculiari quadam dignitate in eius regno praediti sunt. Ita appellantur filii Dei angeli, nobilissimae Dei creaturae (Iob 4,6; 2,1; 39,7; Ps. 28,1; 88,7); populus Israel, quem Deus singulari modo sibi elegit in peculium, in regnum sacerdotale, in gentem sanctam Ex. 19,5. 6^a, vocatur « filius meus primogenitus » (Ex. 4,22); et Deus dicitur pater populi et genuisse populum (Deut. 32,6,18) et Deus conqueritur: filios enutrivit et exaltavi, ipsi autem spreverunt me (Is. 1,2; cf. Is. 30,1. 9; 43,6; Ier. 3,14) et apud Osce dicit: ex Aegypto vocavi filium meum (11,1) et Ephraim dicitur a Deo filius honorabilis (Ier. 31,20); etiam uno loco alii populi filii appellantur, Deo de Israel dicente: quomodo ponam te in filios (Ier. 3,19). Si totus populus theocraticus vocatur filius Dei, non mirum est peculiari modo eam appellationem attribui regi theocratico qui sedet super solium Domini et qui pascit populum Dei; ita 2 Reg. 7,14: ego ero ei in patrem et ipse erit mihi in filium (quae verba proxime de Salomone dicuntur; cf. 1 Par. 22,10) et Ps. 88,28 de Davide: ego primogenitum ponam illum. Pariter eo nomine honorantur iudices: ego dixi: dii estis et filii excelsi omnes (Ps. 81,6) et etiam homines pii cultoresque Dei eximii eo nomine designantur; cf. Ps. 72,15; Prov. 14,26; Sap. 2,13.

Quo ultimo exemplo iam ad id devenimus, quod in iustis omnibus qui scil.

gratia sanctificante praediti sunt obtinet; hi enim sunt propter gratiam hanc, quae est participatio quaedam naturae divinae (2 Petr. 1,4), semen Dei (1 Ioan. 3,9), filii Dei, utique per adoptionem (vide s. v. ADOPTIO); sed cum ornati sint illa gratia et nati ex Deo dicantur (Ioan. 1,13; 1 Ioan. 3,9) et Deus eos genuerit verbo veritatis (Iac. 1,18; cf. Ioan. 3,3), elucet iustus modo multo excellentiore prae populo theocratico vocari filios Dei accepto spiritu Dei et spiritu adoptionis filiorum (Rom. 8,14. 15); quare in Novo Testamento iubemur orare ad Deum: pater noster et Iesus saepe Deum vocat patrem nostrum nosque hortatur, ut simus filii patris nostri caelestis, ut scil. eius sanctitatem quantum possumus imitatione exprimamus (Matth. 5,45; Luc. 6,35); unde peculiari modo, quia Deus est Deus pacis, pacificatores vocantur filii Dei (Matth. 5,9). Uti filii Dei, sunt etiam iidem heredes Dei (Rom. 8,17), quibus bona Dei obvenient. Haec tandem glorificatione appellatur revelatio filiorum Dei (Rom. 8,19); nunc enim filii Dei sumus, sed nondum apparuit quid erimus; cum apparuerit, similes ei erimus, quoniam videbimus eum sicuti est (1 Ioan. 3,2).

Alio omnino modo Iesus appellatur filius Dei. Discrimen iam apparet in eo quod vocatur filius Dei unigenitus, filius proprius. Quo sensu sit Filius Dei eruitur ex omnibus locis quibus divina eius natura probatur. Vide s. v. IESUS CHRISTUS n. 3.

Ipsae Iesus plerumque se nominat filium hominis. Quod nomen ex Daniele 7,13 petiit Messiam designat; vide s. v. IESUS CHRISTUS n. 2.

Alias filius hominis, filii hominum modus est loquendi in Vetere Testamento vel in parallelismo ad hominem vel ut designetur homo fragilis, mortalis, debilis, qui ipsa sua origine ab homine naturam fragilem, miseriis mortique subiectam manifestet. Ita Ps. 8,5: quid est homo quod memor es eius aut filius hominis quoniam visitas eum (Ps. 8,5)? quanto magis homo putredo et filius hominis vermis (Iob 25,6). Qui modus loquendi saepius cernitur, quando Deo opponitur homo: non est Deus quasi

homo ut mentiat, nec ut filius hominis, ut mutetur (Num. 23,19); si Dominus incitet te adversum me, odoretur sacrificium; si autem filii hominum, maledicti sunt in conspectu Domini (1 Reg. 26,19); similiter Ps. 10,3: oculi eius (Dei) in pauperem respiciunt; palpebrae eius interrogant filios hominum; Ps. 32,13: de caelo respexit Dominus, vidit omnes filios hominum; Ps. 106,8: confiteantur Domino misericordiae eius et mirabilia eius filiis hominum etc. Vel: quis es tu, ut timeas ab homine mortali et a filio hominis qui quasi faenum ila arescet (Is. 51,12)? Ezechiel propheta ab angelo vel Deo compelli solet: fili hominis (2,1; 3,1. 4. 10. 17. 23; 4,1. 16; 5,1; 6,2 etc.), qua compellatione admoneatur conditionis humanae fragilis et per se impotentis ad res altiores. Vult enim Deus ut animo demisso munus obeat propheticum et ut sibi conscius sit omnem vim et efficaciam derivari ab ope divina.

Praeterea non erit inutile notare quosdam modos loquendi hebraeos: ad designandam aetatem dici solet: Noe filius quingentorum annorum i. e. 500 annos natus (1 Reg. 13,1 in Vulgata legitur: filius unius anni erat Saul; in textu hebr. numerus iniuria temporum excidit, unde: filius ... annorum erat Saul). Dicitur filius senectutis patris vel iuventutis filius a patre sene vel iuvene genitus (Gen. 37,3; Ps. 127,4 hebr.). Dicitur lucifer filius aurorae (Is. 14,12; in Vulgata: qui mane oriebaris); sagittae dicuntur filii pharetrae Lament. 3,13, filii arcus Iob 41,20 hebr.; arietes filii Basan Deut. 32,14; populus appellatur filii areae meae i. e. populus afflictus et quasi miseriis triturator Is. 21,10; vinea facta est in cornu filio olei i. e. in colle pingui, ubere Is. 3,1; filii olei i. e. uncti a spiritu Domini ad munus theocraticum obeundum Zach. 4,14; filius noctis appellatur Ion. 4,10 ricinus, qui fit et perit una nocte; stellae comites appellantur filii (Iob 38,32) etc.

De filiis Dei et filiabus hominum Gen. 6,2 ss. vide s. v. DILUVIUM I. (col. 77).

FIMUS. Tamquam res immunda e castris debuit fimus removeri; quando

agitur de hostiis, praecipitur, ut cum pelle, intestinis extra castra comburatur (Ex. 29,14; Lev. 4,11; 8,17; 16,27; Num. 19,5). Notum est in regione orientali finum siccatum adhiberi ad ignem alendum; et igne e fimo boum accenso Ezechiel sibi panem afflictionis coquere iubetur (4, 13). In maxima victus penuria finus columbarum comedebatur; facta est fames magna in Samaria et tamdiu obsessa est donec venundaretur quarta pars cabi stercoris columbarum quinque argenteis (1 Reg. 6,25); turpi exaggeratione Rabsaces civibus hierosolymitanis exprobat quod iam ad eam miseriam redacti sint, ut comedant stercora sua. Sacerdotibus malis Deus summam declarat indignationem qua sacrificia polluta execratur: dispergam super vultum vestrum stercus sollemnitatum vestrarum (cf. Lev. 4,11; 8,17) et auferent vos cum eo (Mal. 2,3 hebr. i. e. simul cum stercore eiciuntur e templo). Quod legitur 3 Reg. 14,10: et mundabo reliquias domus Ieroboam, sicut mundari solet finus usque ad purum, destructionem declarat usque ad interuersionem. — In urbe Ierusalem porta stercoris saepius commemoratur (Neh. 2,13; 3, 14 porta sterquilini; 12,31), quae ex Neh. 3,13-15 sita erat inter portam vallis et portam fontis; proin in parte meridionali urbis. Vide IERUSALEM V. 3. 5.

FIRMAMENTUM. In rebus naturalibus sacrae litterae modo loquuntur populari sicut res sensibus exhibentur. Unde in narratione quoque creationis sermo est de firmamento, uti sensibus deprehenditur: fiat firmamentum (רָקִיעַ expansum); fiant luminaria in firmamento... et posuit stellam in firmamento caeli (Gen. 1,6. 14. 17) et: extendens caelum sicut pellem (Ps. 103,2; cf. Is. 40,22). Secundum aspectum quem praebet firmamentum describitur ut opus lapidis saphir, ut crystallum (cf. Ex. 24, 10; Ez. 1,22). In firmamento praecleara cerni opera Dei, unde Deus laudandus sit, psalmis enuntiatur (Ps. 18,2; 130,4); gloria sanctorum in resurrectione comparatur splendori firmamenti: fulgebunt quasi splendor firmamenti Dan. 12,3. In theophania quae Ezechiel exhibetur,

apparet super capita cherubim forma quaedam vel species quasi firmamentum quod crystallo simile erat (Ez. 1, 22).

Ceterum in Vulgata firmamentum varias voces hebr. exprimit; ita 2 Reg. 22, 9 factus est Dominus firmamentum meum כִּשְׂיִי (fulcrum) et in Ps. 17, 3 כִּיֶּי, item Ps. 70, 3 (petra); 3 Reg. 8, 43 exaudies in firmamento (בִּכְיִי) habitaculi tui; item v. 49; et omne firmamentum (בִּיטֵה) panis contrivit; posuisti firmamentum (בִּבְצֵר) eius formidinem; et erit firmamentum (בַּסַּת בַּר) abundantia frumenti in terra (Ps. 104, 16; 88, 41; 71, 16); firmamentum (כִּיד) est Dominus timentibus eum Ps. 24, 14 etc. Sap. 4, 3 firmamentum exprimit βᾶσις, Eccli. 3, 34 στερεώματα; item Eccli. 34, 19; 49, 17; 43, 1. 9 στερέωμα.

FISTULA vertitur a S. Hieronymo imprimis hebr. קָנֶה, quod Cant. 4, 14 inter aromata recensetur et alias rectius calamus explicatur. V. CALAMUS. — Praeterea fistula est instrumentum musicum, scilicet arundo pastorum (שִׁטְרִיץ), quae etiam nunc in Palaestina frequenter auditur; enumeratur inter varia instrumenta musica Dan. 3, 3. 7. 10. 13 (chald. כִּשְׂרוֹקִיתָא et v. 10 כִּשְׂרִיקִיתָא). — Ex similitudine etiam ossa magni Behemoth fistulae i. e. canales aeris dicuntur Job 40, 13 hebr. 18 (אֲפִיקֵי הַחַיֹּה). — Satis vexatus est textus qui legitur in historia captae arcis hierosolymitanae 2 Reg. 5, 8 « proposuerat David in die illa praemium qui percussisset Iebusaeum et teligisset domatum fistulas (יָגַע בְּצִנּוֹר) »; de quo cf. commentatores (F. de Hummelauer et al.) et art. IERUSALEM VI. et VII.

L. FONCK.

FLAGELLUM proprie est instrumentum ad caedendum loris confectum. Lex plagarum seu flagellationis haec erat: si eum qui peccavit, indices dignum viderint plagis, prosternent et coram se facient verberari, ita dumtaxat, ut quadragenarium numerum non excedant, ne foede laceratus ante oculos suos abeat frater tuus (Deut. 25, 2. 3). Postea

ne numerus iste excedatur a rabbinis statutum fuit, ut solum plagae triginta novem intelligerentur; id quod iam tempore apostolorum usu inductum fuisse, ex 2 Cor. 11, 24 discimus. Durius flagellandi modus indicatur 3 Reg. 12, 11. 14 et 2 Par. 10, 11. 14: pater meus, inquit Roboam, cecidit vos flagellis, ego vero caedam vos scorpionibus (fustibus spinosis, flagris aculeatis) et Iud. 8, 7: conteram carnes vestras cum spinis tribulisque deserti. Cruciatu flagellorum etiam saevitum est ab Antiocho rege in fideles Dei servos, quos flagris et tanreis caesos compellere studebat ad edendas contra legem carnes porcinas (2 Mach. 7, 1). In synagogis quoque poena flagellationis infligebatur; cf. Matth. 10, 17; 23, 34; Act. 5, 40. Crudelior erat flagellatio more Romanorum facta, cum ei nullus certus plagarum numerus esset praestitutus; instrumenta constabant loris, aculeis, funiculis; etiam nodi plumbei flagellis addebantur, acienlae, uncinuli, aculei ferrei scuticis inserebantur, quibus miserorum cutis ad costas usque et ossa lacerabatur. Et Iesum quidem crudelissime fuisse flagellatum, iam ex eo concluderis quod Pilatus eius aspectu sperabat fore, ut feroces Iudaeorum animi emollirentur. Cives romani lege Porcia et lege Sempronia ab eiusmodi poena qua solum servi et alienigenae castigabantur omnino erant immunes; quare ea voce: civis romanus sum, apostolus flagella a se avertit (Act. 22, 25 s.) et alias, cum se flagellari permisisset, ea voce magistratibus timorem incussit (Act. 16, 37 s.). — Obvia translatione flagellum dicitur de magna calamitate, qua quis vel a Deo vel ab homine afficitur. Ita sermo filii de flagello linguae (Job 3, 24) et Eccli. 26, 9: in muliere zelotypa flagellum linguae; Ps. 34, 13: congregata sunt super me flagella.

FLUMEN. Solo nomine fluminis designatur in libris Vet. Test. vel fluvius Aegypti, Nilus, vel Euphrates vel etiam Tigris (v. s. vv.).

FLUXUS vide s. v. IMMUNDITIA et MORBI.

FOEDUS. Generatim foedus est pactum certis conditionibus initum. Iam

Abram habebat foedus cum Mambre eiusque fratribus, qui cum in pugna cum regibus vi foederis adiuvabant (Gen. 14,13. 24); foedus cum eo expetiit Abimelech, ne sibi ab Abraham damnum inferretur, id quod Abraham spondidit postulans ne servi eius sibi puteum eriperent. Donis acceptis Abimelech se obstrinxit ad foedus fideliter servandum (Gen. 21,22 s.). Similiter foedus initum est inter Isaac et Abimelech, quod convivio celebrato sancitum est iureiurando (Gen. 26,29 s.); foedus quod inierunt Laban et Iacob iuramento, sacrificiis, epulis sacrificialibus conclusum est (Gen. 31,44. 54). Israelitae severe prohibentur ne foedus ineant cum gentibus terrae Chanaan (Ex. 23,32; 34,15; Deut. 7,2); eiusmodi foedera cum extraneis etiam a prophetis acriter reprehenduntur, utpote populo Dei indigna qui totam fiduciam in Deo ponere debeat; cf. Is. 28, 14 ss.; 30,1 ss.; 31,1; Ier. 2,18; 2 Par. 20, 37. Quam sancta habita sint foedera semel inita, exemplo est modus agendi Iosue cum Gabaonitis qui mendaciis suis foedus ab Iosue impetrarunt, quod foedus acceptis ab eis cibariis initum est. Fraude enim detecta foedus tamen servandum esse Iosue censuit : iuravimus illis in nomine Domini Dei Israel et idcirco non possumus eos contingere (Ios. 9,6 s.). Qua narratione simul edocemur de modo foedus ineundi : « susceperunt igitur de cibariis eorum »; valebat itaque eo iam tempore quod hodie apud tribus eius regionis obtinet; quocum cibum semel capiebant, cum tamquam socium et amicum habent et tuentur. Inde quoque explicatur foedus, pactum salis (Num. 18,19; 2 Par. 13,5), quia in convivio quo quis in socium et amicum suscipiebatur, necessarium illud condimentum non deerat. Alius modus foedus ineundi cernitur in Ionatha qui paciscens cum Davide partem vestimentorum Davidi dedit (1 Reg. 18,3. 4).

Sublimius foederis genus est quod Deus inire cum homine dignatur. Prima eius mentio fit, cum Deus in diebo diluvio Noe cum sua familia se servaturum promittit; ubi itaque illud : ponamque foedus meum tecum, Dei promissionem et sponsonem salutis continet. Noe ex

sua parte debet arcam fabricare et cetera quae Deus iubet praestare. Post diluvium Deus statuit pactum : nequaquam omnis caro ultra interficietur aquis diluvii et in huius foederis signum accipi iubet arcum suum in nubibus (Gen. 6, 18; 9,9 s.). Postea Deus ex genere humano unum elegit, in quo omnes gentes demum essent benedicendae et qui pater esset futurus populi electi. Cum eo Deus sollemniore modo foedus pepigit Gen. 15,9 s.; cernitur enim ibi modus pangendi foedus qui simili ratione apud alios quoque populos celebrabatur; immolatae quippe victimae dividebantur in duas partes et inter eas contra se positas paciscentes medii transibant, cuius rei significatio declaratur Ier. 34,18 : dabo viros qui praevaricantur foedus meum (sicut) vitulum quem conciderunt in duas partes et transierunt inter divisiones eius. Proinde isto transitu fidelem observationem foederis spondebant et ut in frustra conciderentur si non observarent sese devovebant. Promissio vero quam Deus foedere sancivit erat : semini tuo dabo terram hanc etc. Gen. 15,18. Quod foedus Deus mox confirmavit mutans Abram nomen in Abraham : patrem multarum gentium constitui te (Gen. 17, 5) et postulans, ut signum foederis adoptetur circumcisio, quae sit sponsio observationis foederis (Gen. 17,9 s.) : ambula coram me et esto perfectus (Gen. 17,1). Vi huius foederis initum cum Abraham et Isaac (Gen. 17,19) Deus populum ex Aegypto liberavit : ego audivi gemitum filiorum Israel quo Aegyptii oppresserunt eos et recordatus sum pacti mei (Ex. 6,5; cf. 2,24). Quod foedus demum in Sinai ita est completum, ut cum toto populo iniretur : si audieritis vocem meam et custodieritis pactum meum, erilis mihi in peculium de cunctis populis, in regnum sacerdotale et gens sancta (Ex. 19,5. 6) et populus spondidit : cuncta quae locutus est Dominus faciemus (v. 8). Deus itaque dedit leges quibus omnes populi conditiones optime constituerentur et promisit quamdiu foedere fideliter stetissent se illis adfuturum esse cum omni benedictionum eopia; foederis vero violationem se esse ulturum. Atque utrumque per totam populi

historiam cernitur. Foedus autem sinaiticum oblatiis sacrificiis sancitum est; uti Abraham victimas divisit in duas partes, ita Moyses sanguinem sacrificalem in duas divisit partes; unam partem fudit super altare, alteram misit in crateras et ex ea aspersit populum dicens: hic est sanguis foederis quod pepigit Dominus vobiscum super cunctis sermonibus his (Ex. 24,8). Atque velut signum peculiare huius foederis consideratur celebratio sabbati (Ex. 31,16); et sanctuarium a Deo constitutum, quo in medio populo suo versari cunIQUE ut Deus foederis regere vult, appellatur tabernaculum foederis, arca foederis. Uti apud homines foedus confirmatur convivio, ita sancta illa cum Deo societas exprimitur epulis sacrificialibus; quare de hoc foedere quoque usurpatur locutio: sal foederis (Lev. 2,13; Num. 18,19 etc.).

Præterea illa quæ stabili modo instituta sunt, etiam nomine foederis quandoque designantur. Ita quod posteris Levi sacrum ministerium commissum est, dicitur pactum Levi (Mal. 2,8); ius sacerdotum percipiendi certas sacrificiorum partes et primitias dicitur pactum salis sempiternum coram Domino (Num. 18,19); pariter: et erit tam ipsi (Phinees) quam semini eius pactum sacerdotii sempiternum quia zelatus est pro Deo suo et expiavit scelus filiorum Israel (Num. 25,13). Pariter quod Deus Davidi promisit 2 Reg. 7,14 de regno aeterno, David appellat pactum aeternum quod Deus secum inierit (2 Reg. 23,5). — Populus utique foedus illud initum sæpe violavit, præsertim idololatria (vide s. v.); neque tamen deerant qui populum ab apostasia revocarent, immo qui foedus renovandum et redintegrandum curarent; ita Iosue (Jos. 24,23 s.); Ioiada 4 Reg. 11,17; tempore Iosiae 4 Reg. 23, 3; Ier. 11,1; Esdr. 10,3; Neh. 9,38.

Iam prophetae rationem foederis quoque annuntiant pro tempore instaurationis gloriosae regni Dei, i. e. pro tempore messiano. Ita de servo Domini, de Messia dicitur a Deo apud Isaiam: dedit te in foedus populi (Is. 42,6; 49,8) i. e. ut sis mediator foederis pro populo, ut foedus denuo restituatur; eodemque modo vocatur Messias angelus testamenti

i. e. nuntius foederis (Mal. 3,1 hebr.). Et foedus messiani temporis pariter tangitur promissione: feriam vobiscum pactum sempiternum, misericordias David fideles (Is. 55,3) i. e. secundum promissa firma Davidi data, quæ leguntur 2 Reg. 7,14; pariter cf. Is. 54,10; 59,21; 61,8. Idem foedus tamquam novum annuntiat Ieremias 31,31 s. qui sicut Isaias quoque eius foederis naturam et indolem spirituales clare effert; cf. Ier. 32,40; 33,20 itemque Ez. 16,62; 34,25; 37,26. Porro uti vetus foedus sæpius tamquam foedus matrimoniale proponitur (cf. Is. 50,1; Ier. 2,2; Ez. 16,8 s.; Os. 2,2 etc.), ita novum quoque; unde Os. 2,19 sponsabo te mihi in sempiternum et Messias tamquam sponsus prædicatur in Ps. 44 et gens Messiae tamquam sponsa (Is. 61, 10).

Hisce plane concordant ea quæ Christus et apostoli statuunt. Et Christus quidem, simili modo uti Moyses sanguine sacrificiali foedus sinaiticum velus inauguravit, sanguine multo pretiosiore novum foedus condidit dicens cum clara ad illa Moysis verba allusione: hic est sanguis meus novi testamenti (Matth. 26, 28). Apostolos esse ministros novi testamenti S. Paulus asserit (2 Cor. 3,6) et quomodo a ratione foederis ipsa testamenti indoles non sit aliena, immo foedus hoc sit verum testamentum, vera dispositio mortis causa, apostolus docet Hebr. 9,16; scribimur enim heredes caeli morte Christi; et hæc testamenti ratio iam in vetere foedere erat indicata, quia illud quoque in sanguine, ergo morte victimæ intercedente, dedicatum est (Hebr. 9,18 s.). Quantopere autem foedus novum præstet præ vetere, multis explicatur modis. Id enim iam elucet ex eo quod vetus sit umbra, figura, novum autem habeat ipsa bona messiana; patet ex dignitate eius qui sponsor est novi foederis, Iesu Christi, qui ut Filius Dei, dignitatem angelorum et Moysis, infinite superat (Hebr. 1,4 s.; 3,2; 7,22); patet ex dignitate ministerii eius quod versatur circa sanctuarium caeleste (Hebr. 8,1, 6), ex pretio sanguinis sacrificialis per quem intravit in sancta aeterna redemptione inventa (l. c. 9,11 s.). Hoc porro foedere conscientia emundatur, una

oblatione consummantur sanctificati, fil accessus ad Sion montem et civitatem Dei viventis, Ierusalem caelestem et multorum millium angelorum frequentiam et ecclesiam primitivorum et indicem omnium Deum et spiritus iustorum perfectorum et testamenti novi mediatorem Iesum; hoc foedere via ad sanctuarium caeleste, ad ipsam Dei visionem aperta est (Hebr. 9,8. 14; 10,10; 12,22 s.); hoc foedere filii evadimus Ierusalem caelestis, cives sanctorum, domestici Dei, heredes Dei, coheredes Christi (Gal. 4, 26; Eph. 2,19; Rom. 8,17). — Nota ברית reddi foedus, pactum, testamentum (cf. Ps. Eccli.). — Vide etiam ARCA FOEDERIS.

I. KNABENBAUER.

FOENUM accipi debet in Vulgata notione graminis, herbae viridis. Ponitur enim pro hebr. עֵשֶׂב Deut. 11,5; 4 Reg. 19,26; Ps. 71,16 florebut de civitate sicut foenum terrae; Ps. 91,8; 101,5. 12; 104,35; 105,20; Prov. 27,26; Is. 37, 27; Dan. 4,22. 29; aliis in locis pro הָעֵשֶׂב Job 40,10; Ps. 36,2; 102,15; 103, 14 producens foenum iumentis; 128,6; 146,8; Is. 40,6. 7. 8; 51,12 quasi foenum arescet. Etiam ponitur pro עֲבִיר (manipulus) Ier. 9,22; Am. 2,3; Mich. 4,12; Zach. 12,6. In libris Novi Test. ponitur pro קטניות quae vox plerumque pro gramine viridi adhibetur. Notione generali graminis etiam foenum esse a nostro interprete acceptum patet; nam dicitur viride foenum (Marc. 6,39; Apoc. 8,7, flos foeni (Iac. 1,10; 1 Petr. 1,24). Gramen calore solis cito arescit, si secatur; quare ut imago fragilitatis humanae, gloriae citissime transeuntis adhibetur. Gramen aridum, siccum ad alimentum ignis inserviebat (Matth. 6,30; Luc. 12, 28).

FOENUS lucrum est quod creditor ultra pecuniae summam quam commodavit exigit. Israelitis interdictum erat foenus exigere a fratre i. e. ab Israelita (Deut. 23,19); ab alienigenis autem cum maius esset periculum sortis accipere licuit. Immo recensetur inter benedictiones quae legis observantiam consequuntur: foenerabis gentibus multis et

ipse a nullo accipies mutuum i. e. eris valde dives (Deut. 15,6; 28,12) et inter maledictiones: advena foenerabit tibi et tu non foenerabis ei i. e. eris indigens et pauper (Deut. 28,14). Foenerari et accipere mutuum saepe esse causam iurgiorum et inimicitiarum indicat Ieremias 15,10. Commendatur prudentia in foenerando Eccli. 8,15: noli foenerari homini fortiori te; quod si foeneraveris, quasi perditum habe; talis enim cogi vix potest ad reddendum debitum. Verum indigenti succurrere oportet et dare mutuum: qui facit misericordiam, foeneratur proximo suo; foenerare proximo tuo in tempore necessitatis illius (Eccli. 29,1. 2). Perfectionis evangelicae est docente Iesu: mutuum date nihil inde sperantes (Luc. 6,35). Utilissimum foenerandi genus assignatur: foeneratur Domino qui miseretur pauperis et vicissitudinem suam reddet ei (Prov. 19,17). Samuel puer quem mater Anna Domino consecravat vocatur ab Heli sacerdote foenus quod commodaverit Domino (1 Reg. 2,20 — explica h. l. foenus creditum, pecuniam creditam, sortem. Aliter in hebr.: reddat tibi Dominus semen de muliere hac pro re petita quae a Iahwe postulata est).

FONS. Comparatione instituta cum Aegypto terra Chanaan merito laudatur tamquam terra rivorum aquarumque et fontium (Deut. 8,7). Multa oppida a fontibus vicinis nominata esse v. s. v. AIN. Praeterea in S. Scriptura memorantur fons in via Sur in deserto sen puteus Agar (v. VIVENTIS ET VIDENTIS ME scil. puteus), duodecim fontes in Elim, fons in Rebla (v. AIN 1), fons Rogel, fons aquae Nephtoa, fons Taphua, fons Harad, fons invocantis de maxilla (v. RAMATH LECHI), fons prope Iezrahel (v. APHEC 4 et HARAD), fons Elisei (vide s. v. IERICO), fons Gilon, fons draconis (v. DRACONIS FONS), fons (puteus) Iacob (v. SICHAR); prope Haran in Mesopotamia erat fons (puteus), ubi Rebecca aquam hauriebat (Gen. 24,14 s.).

Cum aqua tantae sit necessitatis, non mirum est inter pastores iurgia exorta esse de possessione fontium (Gen. 26,19. 20); quare fodere et quaerere fontes

magni erat momenti et aqua inventa etiam carmine celebrabatur (Num. 21, 17). Tempore belli fontes quandoque obturabantur, ut hostes penuria aquae laborarent; cf. 4 Reg. 3, 19. 23; 2 Par. 32, 3. 4. 30; ita Ezechias obturavit superiorem fontem aquarum Gihon, ne Assiriis prodesse aquae, aquas autem occulto aquaeductu ad occidentem urbis David adduxit. Holofernes quoque posuit custodes ad fontes in vicinia Bethuliae, ut Iudaei obsessi siti adigerentur ad dedicationem (Iudith 7, 6-10). — Uti Is. 48, 1 dicitur: qui de aquis Iuda existis, ita Ps. 67, 27 de fontibus Israel i. e. qui ab Israel genus ducunt.

Cum fons, aqua viva, quae nunquam deficiat, res sit gratissima et exoptatissima praesertim in regionibus calidioribus, facile usus vocis translatus explicatur: ita Deus dicitur fons aquae vitae (Ier. 2, 13), fons sapientiae (Bar. 3, 12); ita sermo sit de fontibus salutis (Is. 12, 3), de fonte vitae qui sit timor Domini (Prov. 14, 27) vel lex sapientis (Prov. 13, 14) vel de fonte vitae qui sit apud Deum (Ps. 33, 10). Eodem modo Iesus cum sederet ad fontem Iacob loquitur de fonte aquae salientis in vitam aeternam (Ioan. 4, 6. 14, et Apoc. 21, 6: ego sitienti dabo de fonte aquae vitae gratis. — Ad abundantiae significationem adhibetur v. g. Prov. 6, 11: si impiger fueris, veniet ul fons messis tua.

FORMICA. 1. Formica, hebr. נְזִילָה.

his in Proverbiis a provida sua diligentia atque sollertia laudatur, qua sine duce aut praeceptore aut principe « parat in aestate cibum sibi et congregat in messe quod comedat » (Prov. 6, 6-8), populus quidem infirmus, sed sapientior sapientibus (ib. 30, 25). De significatione nominis hebraici quod Syris, Chaldaeis, Arabibus cum Hebraeis commune est, versiones antiquae atque interpretes omnes consentiunt. Ea autem quae ab auctore sacro laudantur, quod sollertes sint ac providae, atque sine capite in republica ordinate vivant, et tempore messis cibum sibi congregent in horrea sua, apprime formicis conveniunt, quarum variae species, praecipue *Atta* seu *Aphaenogaster structor* et *A. barbara*,

innumerabilibus turmis in Palaestina vivunt.

2. Rerum naturalium periti, cum cetera facile admiserint, inde a medio saeculo 18. fere usque ad nostram aetate aetatem illud unum inter fabulas reiiciendum censuerunt, formicas granis ac seminibus vivere eaque in nidos suos congregare. Nam cum in nostris regionibus frigidioribus formicae per hiemem torpore inertes inveniantur, et per reliquum tempus animale potius cibum sibi conquirant, simile quid de orientalibus speciebus gratis supponentes, auctores etiam gravissimi (v. gr. P. A. Latreille, P. Huber, etc.) errorem popularem in istis codicis sacri verbis suspicari sunt. At imprimis tota antiquitate omnibusque saeculis anterioribus usque ad 18. illud ipsum de formicis creditum esse scriptores omnium gentium omniumque temporum testantur, nec facile quis consensum adeo generalem erroneum dixerit. Dein hac nostra aetate, immo ultimis hisce decenniis veritas facti, quod supponunt verba textus sacri, a viris doctis variarum nationum (*Lespès, I. T. Moggridge, Forel, H. C. Mc Cook*, al.) ita variis observationibus confirmata est, ut iam non nisi ab ignorantia vel obtaecata stultitia in dubium vocari possit. Omnino igitur constat, neque unquam negari debuit, varias formicarum species palaestinenses et seminibus vivere et grana frumenti tempore messis in nidos suos congregare iisque per hiemem et aestatem sustentari. Quod vel anno salutis 1893 a *Riehm-Baethgen* ignorari (Handwörterbuch ed. 2 l. 80 b) sane mirum est.

Totam quaestionem egregie tractavit *E. Wasmann* in dissertatione « Die getreidesammelnden Ameisen in alter u. neuer Zeit ». Stimmen aus Maria-Laach XXXIII. 1887 (U.) 360-74. Praeter auctores ab ipso citatos, ex quibus *Sam. Bochartus* more suo rem doctissime exposuit (Hieroz. II. 588-602, ed. *Rosenm.* III. 478-97), cf. *E. F. K. Rosenmüller*, Bibl. Alterth. IV. 2 438 s.; *H. O. Lenz*, Zool. d. alt. Griech. u. Röm. 551-6; *L. Lewysohn*, Zool. d. Talmuds 328-31; *H. B. Tristram*, Nat. Hist. of the Bible ed. 8. 319-21 et 496-8; *I. G. Wood*, Bible Animals 616-22; *P. Cultrera*, Fauna bibl. 414-6; *A. E. Brehm*, Tierleben ed. 3 Pechuel-

Loesche IX. 270-91 (praes. 284); *D. Zancchia*, La Palestina d'oggi, Roma 1896, I. 63; *G. Loreta*, La zoologia nella Bibbia, Fornio 1901, 337-42. — De errore opposito recentiorum, qui formicae speciebus quibusdam americanis non modo factum in Proverbiis laudatum, verum etiam rationalem agriculturam concedebant, cf. *Wasmann*, I. c. 370-2.

L. FONCK.

FORNAX (כִּבְרֵן) Gen. 19,28 dicitur de magna fornace, calcaria, liquandis metallis apta; item Ex. 19,18 (et hebr. 9,8. 10); eadem notione כִּבְרֵן fornax ad metalla excoquenda et ad separandas scorias. Quare in usu translato : vos eduxit Dominus de fornace ferrea Aegypti (Deut. 4,20; 3 Reg. 8,31; Ier. 11,4) et tamquam aurum in fornace probavit illos Sap. 3,6; similiter Prov. 27,21 : quomodo probatur in fornace aurum, sic probatur homo ore laudantis. Eadem notione adhibetur אֶתֶּן Dan. 3,6 s.; cf. Eccli. 27,6 vasa figuli probat fornax (κάμινος; 38,29. 34; ardorem fornacis tripliciter superat ardor solis Eccli. 43. 3. 4.

FORNICATIO et voces similes fornicari, fornicator, dicuntur sensu proprio de vitio (cf. Gen. 38,24; Deut. 22,21; Eccli. 9,10; 26,12; 41,23; 1 Cor. 6,18); verum frequentius de idololatria et apostasia a Deo. Quia enim foedus Dei cum populo tamquam sacrum quoddam connubium considerabatur (cf. Is. 50,1; Ier. 2,2; Ez. 16,8 s.; Os. 2,2 etc.), idololatria et generatim infidelitas contra Deum nomine fornicationis, adulterii designabantur; quae nomina eo quoque aptiora erant, quia cum idololatria sacripissime varia immunditiei genera coniungebantur et ad ipsum cultum Astarthes fovendum exercebantur. Inde frequentes sunt locutiones fornicari cum diis alienis, cum Baalim, post deos populorum terrae; fornicari cum universis regnis (i. e. commercium et societatem inire), fornicari cum filiis Aegypti (foedus cum eis inire, quod scil. idem est ac confugere ad opem deorum implorandam), fornicari a Domino etc. cf. Ex. 34,13; Lev. 17,7; 20,6; Iud. 2,17; 8,33; 1 Par. 5,25; Is. 23,17; Ier. 3,1. 6; Ez. 16,15 s.; 23,3 s.; Os. 1,2 s.

Controvertitur quo sensu fornicatio dicatur Matth. 3,32; 19,9 et Act. 13,20. 29; 21,23. Alii enim apud Matth. cum de vinculo matrimonii sermo sit fornicationem intellegunt de eo casu ubi nullum existit matrimonium, ergo de coniunctione fornicaria, vel de matrimonio attentato (in gradibus iure divino interdictis); unde Christus diceret tum solum uxorem posse dimitti quando nullum extitisset matrimonium. Alii autem vocem explicant de peccato quovis carnali, quo commisso marito ius sit uxorem quoad torum et habitationem dimittendi *manente vinculo* (quia qui dimissam duxerit moechatur); vide utriusque loci explicationem apud *Knabenbauer*, Comment. in Matth. — Similis quaedam controversia de notione vocis agitur in decreto apostolorum. Nam alii censent interdicti fornicationem, quippe quae apud gentiles fere res indifferens sit habita, unde fuisse necesse ut explicite prohiberetur. Alii mirum videtur enumerari fornicationem eodem ordine quo esus carniū diis immolarum, suffocati, sanguinis. Unde putant ea voce interdicti matrimonia in gradibus illicitis, matrimoniumque incestuosum ea voce designari (cf. *Cornely*, Comment. in 1 Cor. p. 120).

FORTUNA v. GAD 4.

FORTUNATUS (Φορτύνος), Corinthius, qui simul cum Stephana et Achaico legatus missus est Ephesum a Corinthiis ad S. Paulum eique litteras Corinthiorum attulit (1 Cor. 16,17; quoad 16,13 v. ACHAICUS).

FORUM Ez. 27,14 dicitur de loco in quo res venales exponuntur : et mulos adduxerunt ad forum tuum. Alias adhibetur vox de loco urbis vel vici publico, valde frequentato, ubi cives conveniunt (Act. 17,17), ubi pueri ludunt (Matth. 11,16; Luc. 7,32; in eiusmodi locis publicis et ab hominum multitudine frequentatis pharisaei salutari desiderabant : amanti salutationes in foro (Luc. 20,46; Matth. 23,7); ibi quoque stabant qui ad laborem diurnum conducī volebant (Matth. 20,3 ss.). Locus quoque publicus intellegi videtur Marc. 7,4 : et a foro (reversi) nisi baptizentur non comedunt; alii tamen de loco commercii

quandoque accipiunt. In foro denique, ut in loco publico, etiam iudicia habebantur (Act. 16,19).

De Appii Foro vide s. v.

FRATER. Inter fratres primogenitus priorem obtinebat locum, id quod iure hereditatis quoque agnoscebatur; hic enim prae fratribus duplicem partem accipiebat (Dent. 21,17). Si agebatur de sorore in matrimonio collocanda, fratres quoque assentiri debebant (Gen. 24,30; 34,13). Maxime commendatur et laudatur concordia inter fratres : ecce quam bonum et quam iucundum habitare fratres in unum etc. Ps. 132,1 et : frater qui adiuvatur a fratre, quasi civitas firma (Prov. 18,19) et inter tria quae probata sunt coram Deo et hominibus primo loco enumeratur concordia fratrum (Eccli. 25,2) et : sex sunt quae odit Dominus et septimum detestatur anima eius..., et hoc septimum est : detestatur eum qui seminat inter fratres discordias (Prov. 6,16. 19).

Maxime proprie vox dicitur de fratribus germanis, uterinis; sed etiam de iis qui ab eodem patre, at diversis matribus, vel ab eadem matre, at diversis patribus sunt editi (cf. Gen. 42,13 Benjamin frater dicitur aliorum filiorum Iacob; Iud. 9,3. 21). Dein latiore sensu dicitur de propinquis; ita de filio fratris, uti Löt vocatur frater Abraham Gen. 14,14; filii Aaron, Nadab et Abiu, vocantur fratres Misaelis et Elisaphan filiorum Oziel patris Aaron Lev. 10,4; similiter in locis v. g. de filiis Zara : Iehuel et fratres eorum sexcenti nonaginta (1 Par. 9,6 etc.). Fratres quoque dicuntur qui sunt contribules; ita David loquitur ad maiores natu Iuda : fratres mei vos, os meum et caro mea vos (2 Reg. 19,12), et qui de tribu Benjamin sunt, dicuntur fratres Saul (1 Par. 12,2). Sensu etiam latiore frater designatur is qui est ex eodem populo; ita Hebraei dicuntur fratres Moysi Ex. 2,11; cf. Iud. 14,3; cum enim omnes Israelitae appellantur filii Abraham, filii Israel, consequens est, ut inter se vocentur fratres. Eodem porro fratris nomine designantur posterii Isaac et Ismael Gen. 16,12; Edomitae fratres dicuntur Hebraeorum :

transibitis per terminos fratrum vestrorum filiorum Esau Dent. 2,4. 8; cf. Am. 1,11; Abd. 10.

Porro fratris nomine appellantur quoque socius, ii qui foedere innesti sunt, amici, comites, qui a partibus alienis stant. Ita Iosue eos qui cum ipso exploratores erant fratres dicit (Ios. 14,8) et David loquitur ad milites suos : non sic facietis, fratres mei, etc. (1 Reg. 30,23) et dolet David de Ionatha : doleo super te, frater mi Ionatha (2 Reg. 1,26); Tyrii qui Idumaeis bellum intulerunt dicuntur non recordati esse foederis fratrum (Am. 1,9); socii et asseclae Iehu fratres eius nominantur 4 Reg. 9,2 etc. Notus est hebraismus : dixit vir ad fratrem suum i. e. unus ad alterum, vel dixerunt inter se; item : non docebit ultra vir fratrem suum dicens : cognosce Dominum i. e. alius alium non docebit (cf. Ier. 31,34).

Quare demum cum omnes homines descendant ab uno proloparente et Deum habeant creatorem et patrem, nomen fratris ita extenditur, ut designet omnem qui eiusdem naturae humanae est particeps; ita Gen. 9,5; Matth. 5,22; 7,3; Hebr. 2,11.

Fratris nomine etiam similitudo quaedam declaratur; ita Iob propter clamores lugubres quos edere cogitur dicit : frater fui draconum 30,29 (i. e. lugubres sonos edidi, uti canes aurei; cf. Mich. 4,8 vel Prov. 18,9 : qui mollis et dissolutus est in opere suo frater est sua opera dissipantis. Inde iam facile fluit, cur fratres vocentur qui eadem fide animos habeant coniunctos; ita in libris Novi Test. Christiani dicuntur fratres, idque iure potiore quia eadem regeneratione ex aqua et Spiritu Sancto filii Dei facti sunt, semen Dei in se habent (Ioan. 3,5; 4,13; 1 Ioan. 3,9. 10; 5,1), unde inter se fratres sunt. Insuper Christus iam vocavit apostolos suos fratres et fratres quoque eos qui in eum credunt (Matth. 12,48-50; 23,40; 28,10); quare eos esse inter se fratres clare affirmat. Unde eo nomine saepissime et fideles salutantur et ii qui socii sunt eiusdem numeris apostolici. Ut fideles inter se vocantur fratres, ita quoque fratres Christi appellantur; nam Chri-

stus eos iam eo nomine honoravit (uti modo dictum est), eos sacramento baptismi effecit filios Dei (adoptivos utique) et secum coheredes gloriae (Rom. 8,17), ita ut ipse sit primogenitus in multis fratribus (Rom. 8,29).

FRATERNITAS. 1 Mach. 12,10 : maluimus mittere ad vos renovare fraternitatem et amicitiam; ita scribit Ionathas Spartiatis fratribus; qui enim foedere iuncti sunt fratres quandoque dicuntur. Insuper Arius, rex Spartiatarum, olim scripserat Oniae inventum esse in aliquo scripto de Spartiatis et Iudaeis « quoniam sunt fratres et quod sunt de genere Abraham » (1 Mach. 12,21). Verum de hac cognatione praeter varias coniecturas nihil certi afferri potest. — Utitur ea voce S. Petrus ad coelum fidei-
lium designandum, quippe qui sint fratres. 1 Petr. 2,17: fraternitatem diligite: 3,9. Alias fraternitas ponitur in Vulgata pro φιλαδέλφια i. e. amor in fratres, amor fraternitatis Rom. 12,10; 1 Thess. 4,9; Hebr. 13,1; 1 Petr. 1,22; 2 Petr. 1,7.

FRATRES IESU. Nomine fratrum Iesu recensentur Matth. 13,55 ex modo loquendi Nazarethanorum: nonne hic est fabri filius? nonne mater eius dicitur Maria? et fratres eius: Iacobus, et Ioseph et Simon et Iudas? item Marc. 6,3 (pro Ioseph etiam legitur Iose). Praeterea de fratribus eius sermo fit Matth. 12,46; Marc. 3,31; Luc. 8,19; Ioan. 7,3. 5. 10; Act. 1,14; 1 Cor. 9,4. Non posse eos esse fratres germanos Iesu i. e. filios Mariae, etsi dogma de perpetua virginitate Mariae interim omittamus, iam inde patet, quod mater duorum explicite statuitur Maria, soror matris Domini, Maria Cleophae; hi duo sunt Iacobus et Ioseph (Matth. 27,23; Marc. 15,40; 16,1; Ioan. 19,25). Unde pater horum fratrum est Cleophas, mater Maria, soror (cognata) matris Domini. Ita iam probatum est fratres illos non esse fratres germanos. Si enim Iacobus et Ioseph non sunt proprii fratres, qui primo loco nominantur, etiam duo alii non possunt censi fratres. Insuper Iacobus apostolus vocatur Iacobus Alphaei (filius), apostolus autem Iacobus erat teste Paulo frater Domini (Matth. 10,3; Gal. 1,19); inde concludere

oportet vel eius patrem habuisse nomina duo (Cleophas, Alphaeus — id quod non fuisset inusitatum) vel Alphaei nomen esse idem quod Κλωπᾶ i. e. **יִשְׁכָּן** modo

lenius, modo durius esse pronuntiatum, quae est multorum sententia (cf. *Cornely*, *Introd.* III. p. 597; *Knabenbauer* ad Matth. 10,3). Huius autem Iacobi frater est Iudas (cf. Luc. 6,16; et in initio epistolae se vocat fratrem Iacobi). Unde iam pro tribus pater et mater assignari potest. Et cum in catalogis apostolorum cum Iacobo Alphaei et Iuda etiam Simon enumeretur, non videtur a vero alienum intellegi Simonem fratrem Domini. Quidquid est saltem duo certe inter apostolos enumerantur. Atque fratres Domini aliquos apostolis annumerari, etiam colligitur ex modo quo apostolus Paulus loquitur: alium autem apostolorum vidi neminem, nisi Iacobum fratrem Domini (Gal. 1,19) et: ceteri apostoli et fratres Domini et Cephas (1 Cor. 9,5; ubi ipsa gradatione et collocatione fratres apostolis annumerantur) et: visus est Iacobo, deinde apostolis *omnibus* (1 Cor. 15,7). Neque fratres Iesu ideo ab apostolis separantur, quod Ioannes scribit 7,5: neque enim fratres eius credebant in eum. Nam quid hoc loco vocet evangelista *non credere*, aliud non est nisi illos non habuisse *rectam* de Iesu Messia notionem. Adeo enim eius potentiam et dignitatem credebant, ut vellent opera eius fieri manifesta in Iudaea, ut ei dicerent: manifesta te ipsum mundo! Sed in *recta* de Iesu notione eo tempore reliqui quoque apostoli defecerunt. — Si itaque Iacobus filius erat Cleopae, fratres Domini erant eius consobrini; idem testatur Hegesippus (cf. *Euseb.* *Hist.* eccl. 4,22; *M.* 20, 380), qui etiam asserit Cleopam fuisse fratrem Ioseph fabri (cf. *Euseb.* *Hist.* eccl. 3,11; *M.* 20,248; *Epiph.* *Haer.* 78. 7; *M.* 42,708).

FRUMENTUM. 1. Generaliter frumentum dici possunt omnes plantae, unde farina ad panificium apta praeparatur; immo etiam generalius frumentum in Vulgata adhibetur pro omni cibo (**כֶּמֶן** Gen. 44,1; **ἐπισιτισμός** Iudith 2,9 gr. 18), cuius partem praecipuam, maxime orientalibus, frumentum constituit. Sen-

su specialiore frumentum dicuntur plantae gramineae cereales, quarum grana materiam panis praestant. Ita *frumentum* in Vulgata recte explicantur nomina hebraica כֶּרֶם s. כֶּרֶם, שֶׁבֶר, דָּגָן, et graeca σῖτος et σῖτον. Sensu vero specialissimo frumentum in Vulgata dicitur praecipua eius species triticum (חִטָּה, pl. חִטִּים, chald. חִטְיָא et חִטְיָין, more etiamnum variis populis usitato (ital. *formento* et *frumento*, gall. *froment*).

Cf. J. J. Clément Mullet, *Les noms des céréales chez les anciens*, Paris 1865; V. Hehn, *Kulturpfl.* ed. 6, 537).

2. Species frumenti nominibus istis generalibus comprehensae eae sunt, quae in campis Palaestinae regionumque vicinarum colebantur vel forte aliunde eo afferebantur. In S. Scriptura quattuor praecipue occurrunt: *triticum* (חִטָּה, σῖτος), *hordeum* (שֶׁבֶר, ζεῖθ), *far* s. *spelta* (בִּשְׁבֵּת, ὄλκας s. ἕξα), *milium* (דָּחַל, ζέγγρος, quod alii *sorghum* esse volunt); de quibus cf. sing. artic. — *Secale* atque *avena* in libris sacris non commemorantur, quorum cultura populis orientalibus nec antiquitus cognita erat neque nunc accepta est; pariter *oryza* et *zea* (*Mais*), quae nunc in Oriente frequenter coluntur, incolis antiquis notae non erant. Probabiliter autem nomine *tritici* et *farris* praeter varias tritici culti species etiam *Triticum monococcum* Linné et *Tr. dicoccum* Schrank comprehenduntur.

3. Frumenti culturam inde ab exordiis generis humani exstitisse ex pluribus S. Scripturae locis merito deducitur; neque enim homines primi temporis solummodo pastores gregum erant, more nomadum vagabundi ac domicilia sua hinc inde mutantes, sed in poenam peccati ipsi Adae posterisque eius imponitur, ut in laboribus comedat ex terra maledicta, et in sudore vultus sui vescatur pane (Gen. 3, 17-19), atque ex ipsis primorum parentum filii alter pastor ovium, alter vero agricola describitur (ib. 4, 2; cf. 5, 29; 8, 22; 9, 20). Pariter aetate patriarcharum Isaac non solum greges magnos pascibat, verum etiam frumentum « sevit in terra illa et

invenit in ipso anno centuplum » (ib. 26, 12), et cum filiis Iacob Ioseph per somnium putabat se « ligare manipulos in agro » (ib. 37, 7). Neque hisce sacrae historiae factis scientia ullo modo refragatur. Licet enim de origine ac patria variarum frumenti specierum laud facile quis certi aliquid definial, satis communiter tamen praecipuae species in ea regione indigenae supponuntur, unde Abraham cum familia sua iussu Dei egressus est. Praeterea prima vetustissimarum nationum monumenta historica frumenti culturam florentem apud Babylonios atque Aegyptios aliosque populos testantur, atque ipsa primordia scripturae antiquissimae idem pro Babylonia confirmant.

Cf. A. de Candolle, *Origine des Plantes cultivées* 284-319; Fr. Koernicke, *Arten u. Varietäten des Getreides (Körnische-Werner, Handl. des Getreidebaues I.)*, Bonn 1885, praes. p. 17-9; G. Schweinfurth in *Verhandl. d. Ges. f. Anthropol.* 1891, 651; *id.* ib. 1897, 267; Engler-Prantl, *Natürl. Pflanzenfam.* II. 2, 80-6, al. — De Babyloniis cf. *Urna*, Inscr. I. col. 3, 7-9; *Gudea*, Inscr. B, col. 1, 8-11; *Entena*, Inscr. I. col. 4, 1-5; *Singashid*, col. 3, 15-20; *Hammurabi*, Inscr. *Louvre* I. col. 1, 23-26 etc.; *Frd. Delitzsch*, *Entstehung d. ält. Schriftsystems*, Leipzig 1897, 125 s. — De Aegyptiis cf. A. Braun in *Ztschr. f. Ethnol.* IX. 1877, 295; *Wilkinson-Birch*, *Manners and Customs II.* 387-428 etc.; A. Erman, *Aegypten* 566-91; G. Schweinfurth in *Bull. de l'Inst. Égypt.* 1884 (extr. p. 2); *id.* ib. 1886 (extr. p. 2-8) etc.; Fr. Woenig, *Die Pflanzen im alten Aeg.* 164-74; V. Lorel, *Flore pharaonique ed.* 2, 21-6.

4. Frumentum in S. Scriptura frequentissime inter optimas terrae promissae fruges laudatur ac praesertim cum vino et oleo tamquam praecipua eius dos celebratur (Gen. 27, 28. 37; Num. 18, 12; Deut. 8, 8; 11, 14 etc.; 2 Par. 31, 5; 32, 28; Neh. 5, 11 etc.; Iudith 11, 12; Ps. 4, 8; Is. 36, 17; Ier. 31, 12; 41, 8; Os. 2, 8; Ioc. 2, 19. 24). Ex variis Palaestinae provinciis maxime Galilaea et planities maritima ac Carmelo usque ad urbem Gazam frumenti feracissima erat atque saltem ex parte hodieum est; praeterea etiam regio transiordanica iam antiquitus optimum frumentum ferebat (2 Par. 27, 3; Ez. 27, 17).

Fertilitas autem soli palaestincensis maxima erat, ita ut merito Dominus in parabola evangelica semen dixerit fructum dare aliud centesimum, aliud sexagesimum, aliud trigesimum (Matth. 13,8; cf. Gen. 26,12); quod nemo mirabitur, qui noverit etiam nostris diebus solum per tot saecula neglectum eiusdem esse fertilitatis.

5. Tanta autem copia frumenti in terra habebatur, ut Iudaei finitimis quoque nationibus cibaria praeberent, praesertim Phoeniciis, angustam in litore maris regionem inhabitantibus; quod iam in benedictione Iacobi morientis de Issachar et Aser innuitur (Gen. 49, 13, 20), et de Salomone expresse narratur, qui Hiram Tyrionum regi per singulos annos « coros tritici viginti millia in cibum domus eius misit » (3 Reg. 5,11; cf. 2 Par. 2,10. — *Eupolemos* ap. *Euseb.* Praep. evang. 9,33), iterumque de terra regis Herodis in Actibus Apostolorum refertur, quae Tyrionum ac Sidoniorum provinciam frumento suo aiebat (Act. 12,20). Idem de urbibus Dor et Ioppe, in planitie maritima sitis, inscriptio *Eshmunazar*, regis Sidoniorum, testatur. — Nihilominus non defuerunt anni, quibus magna in terra fames oriretur, eo quod messis defecisset sive cessante pluvia sive locustis omnia vorantibus sive hoste cuncta vastante seu alia de causa; tunc Palaestina quoque a finitimis regionibus ac praesertim ex Aegypto alimenta sibi quaerere cogebatur, uti iam Iacobo et filiis eius videmus accidisse (Gen. 42 ss.).

Cf. *F. C. Movers*, Phoenicier II. 1,307-10; III. 1,209-14; *C. Ritter*, Erdkunde XVI. 1,283; XVII. 2,1746; *H. B. Tristram*, Nat. Hist. of the Bible ed. 8,489; *P. Schegg*, Bibl. Archaeol. 131-40.

6. Inter varias inopiae frumenti causas S. Scriptura saepius *יָרָקוֹן* et *שָׂדֶפֶן* commemorat; in Vulgata primum vel *aerugo* explicatur (2 Par. 6,28, LXX ἀνεμοσφοβία), vel *aer corruptus* (Deut. 28,22, LXX id.; 3 Reg. 8,37 LXX ἐμπυρισμός), vel *ventus urens* (Am. 4,9, gr. πύρωσις; Ag. 2,18 gr. ἀπορία); alterum autem dicitur pariter *aerugo* (3 Reg. 8,37), vel *aurugo* (2 Par. 6,28, gr. ἄνερος; Ag.

2,18, gr. id.; Am. 4,9, ubi cod. Amiatinus rectius *aurigo* scribit; LXX ἀνεμοσφοβία; cf. Ier. 30,6) vel denique *rubigo* (Deut. 28,22, gr. ὄξυς). *שָׂדֶפֶן* scilicet est morbus, quo segetes praesertim adultae et spicis ornatae (Gen. 41,6. 23. 27) flante euro (*קָדִים*) afficiuntur, qui in Palaestina saepe vehementissimus, ex aridis desertis adveniēns « calidus et urens » plantas et segetes exsiccāt (Ion. 4,8; Ez. 17,10; 19,12) atque etiam hominibus multas affert molestias. *יָרָקוֹן* vero alium morbum designat, quo segetes ante tempus flavescent et steriles manent; probabiliter est *uredo segetum* (cf. 4 Esdr. 13,13), qua scil. spicae frumenti fungis minimis invaduntur et corrumpuntur; nomine scientifico fungi isti *Puccinia graminis* Persoon vocantur (*Leunis-Frank*, Synopsis II. 4 ed. 3. p. 308 s. II. 3 p. 538 s.).

De aliis v. AGRICULTURA. — De morbis frumenti v. monographias cit. ap. *G. A. Pritzel*, Thesaurus litt. bot., ed. nova, Lipsiae 1872-77, p. 444.

L. FONCK.

FRUTETUM in Vulgata respondet imprimis hebr. רָמִים i. e. rami, LXX οἱ κλάδοι, Ier. 11,16. Praeterea frutetum dicitur pro hebr. *יַעֲנַן* (Is. 7,19), quod alibi (ib. 55,13) *salunca* explicatur. V. SPINA.

FUCUS semel nominatur in descriptione idoli, cuius colorem fuso (φύζει) rubicundum facere dicitur artifex (Sap. 13,14).

FUGA IESU in Aegypto. Eius occasio narratur Matth. 2,13 s. Evenisse censenda erit post praesentationem in templo et statim post discessum magorum. Magi autem certe non advenerunt statim post natiuitatem; verum adventus tempus dimetiendum potius erit secundum tempus quod indicatur Matth. 2,16; occidit enim Herodes pueros a bimatu et infra, et id secundum tempus quod exquisierat a magis; nam diligenter dicit ab eis tempus stellae quae apparuit eis (v. 7). Ex qua inquisitione itaque conclusit puerum esse aetatis plus

unius anni tempore quo pueros occidi iussit. Mandatum autem hoc ab eo esse editum mox postquam magi abierant ex Bethlehem certum videtur. Nam magos esse profectos latere non potuit, eos non esse ad regem reversos in urbem, pariter statim innotuit; quare pariter non erit dubitandum quin Herodes simul atque innotuit suos in Bethlehem satellites miserit. — Iam *Tatianus* in evangeliorum harmonia, cui nomen est diatessaron, fugam post oblationem in templo posuit; *Eusebius* quoque ex tempore quod Herodes a magis exquisierat arguit biennium elapsum esse a natalitate usque ad magorum adventum (Quaest. evang. ad Steph. qu. 16; *M.* 22, 933; idem tempus assignatur in Chronico Eus. apud S. Hieronymum (*M.* 27, 362), idem apud S. Epiphanium (Haer. 51,9; *M.* 41,904). Huic sententiae conformis est modus quo in antiqua Ecclesia adoratio magorum imaginibus representatur, in quibus scil. Iesus apparet grandiusculus vel etiam sedens solus in throno (cf. *Garrucci*, Storia dell' arte fav. 213. 435; *Kraus*, Real-Encyclop. der christl. Alterth. II. p. 350).

Cur autem infans fuga debuerit subtrahi insidiis, cum alia multa Deo praesto essent subsidia, S. Chrysostomus (in homilia ad h. l.) explicat pertinere ad Dei potentiam etiam, ut hostes facile decipiat; dein cum Filius Dei voluerit apparere in infantili aetate, conveniens fuit, ut eo modo quo puerulus subtrahi solet insidiis servaretur et puerulus iam suo docet exemplo quod postea dicturus est: cum vos persecuti fuerint in una civitate fugite in aliam (Matth. 10,23). Haec fuga prolusio quaedam est persecutionis et odii in Messiam; iam portenditur Messiam a populo suo iri reiectum; iam cernitur oraculum Simeonis impleri: positus est in signum cui contradicetur, tubetur fugere in Aegyptum; eo tempore multi Iudaeorum ea in regione incolebant, ita ut Ioseph facile ibi subsidium invenire potuerit. Sed potior ratio altius erit repetenda. Patriarchae iam, uti Abraham et filii Iacob, vitae servandae causa descenderunt in Aegyptum; urbe a Chaldaeis destructa multi ad Aegyptios confugerunt, item tempori-

bus subsequentibus. Velus autem Testamentum est umbra, corpus vero quod illam proiecerit umbra est Christi (Col. 2,17); quare merito illa commemoratio ex alio eventu propheticè dicitur praefigurata: ex Aegypto vocavi filium meum (Os. 11,1; Matth. 2,15). Iesus hac sua commemoratione regionem Deo consecrasset videtur; unde laud immerito adnotat iam S. Chrysostomus in deserto Aegypti exstitisse solitudinem quovis paradiso praestantior, sexcentos scil. angelorum choros humana forma, virginum coetus. Et cum regio alienigenarum id praestet Messiae quod apud suos non invenerit, merito censent *Beda Ven.*, *S. Thomas* aliique praefigurari in ea fuga transitum regni Messiae ad gentes.

Ad quam autem regionem in Aegypto sacra familia se receperit incertum est. Assignant alii terram Gessen, in qua olim Israelitae commorati erant, quae regio ex ipso situ laud incongrua videri potest. Ex traditione satis antiqua christiani indigenae locum commemorationis S. Familiae venerantur in parte meridionali urbis veteris Cairo (*Maṣr el-'atīqah*) e conspectu Memphicos et in vico *Matariyeh* prope ruinas Heliopoleos; de qua traditione v. *M. Iullien*, L'Égypte, Lille 1891, 188-231; *id.*, L'arbre de la Vierge, ed. 4, Le Caire 1904.

FULLO bene dicitur hebr. כֹּהֵן scil.

pedibus caleans, qui scil. vestes sordidas lavat et pannos recentes condensat pedibus caleando adhibito nitro (cf. Ier. 2,22). Prope Ierusalem erat ager fullonis ad extremum aquaeductus piscinae superioris (4 Reg. 18,17; Is. 7,3; 36,2); de quo v. IERUSALEM III. 5. Fullones extra urbem negotiis suis vacabant; eos usos esse nitro vel sale livivii, concludere licet ex Ier. I. c.; quibus rebus aliis usi sint, incertum est (cf. *Hartmann*, Die Hebräerin am Putztisch I. p. 159 s.). Eos vestes reddidisse candidas valde, elucet ex comparatione quam adhibet evangelista ex ore Petri: et vestimenta eius (Iesu in transfiguratione) facta sunt splendentia et candida nimis velut nix, qualia fullo non potest super terram candida facere (Marc. 9,2). Etiam fons Regel saepe explicatur fons fullonis.

FUNDA. Ea utebantur ad iaciendos lapides non solum pastores (1 Reg. 17, 40) et venatores (Iob 41,19), sed milites quoque, qui fundibularii vocabantur (4 Reg. 3,25; Iudith 6,8; 1 Mach. 9,11). Ea in arte eximii erant Beniaminitae, inter quos erant « sic fundis lapides ad certum iacientes ut capillum quoque possent percutere et nequaquam in alteram partem ictus lapidis deferretur » (Iud. 20,16); etiam ad David cum esset in Siceleg, se adiunxerunt egregii pugnatores ex Beniamin tendentes arcum et utraque manu fundis saxa iacientes (1 Par. 12,2). Quid ipse David funda praestiterit contra Goliath (1 Reg. 17,49. 50), Sapiens quoque celebrat : numquid non occidit gigantem et abstulit opprobrium de gente? in tollendo manum saxo fundae deiecit exultationem Goliae (Eccli. 47,3. 6) et mulieres praecinebant : percussit Saul mille et David decem millia (1 Reg. 18,7). Etiam in oppugnatione urbium fundibularii suas praestabant partes (4 Reg. 3,25). Alias hi et sagittarii praebant exercitum (1 Mach. 9,11). Pelitur quoque a funda comparatio : erit anima domini mei custodita quasi in fasciculo viventium apud Dominum Deum tuum; porro inimicorum tuorum anima rotabitur quasi in impetu et circulo fundae (1 Reg. 23,29).

FUNICULUS, FUNIS. Sub imagine tabernaculi, cuius clavi non auferrentur in sempiternum et cuius funiculi non rumpentur, Isaias describit Ierusalem, civitatem Dei; utique illam urbem in qua repraesentatur regnum Dei, regnum messianum (33,20); de qua alibi quoque dicit : dilata locum tentorii tui... longos fac funiculos tuos et clavos tuos consolida (34,2). Gerere funiculos in capite signum est supplicationis et deditionis; dicunt enim servi ad Benadad, regem Syriae, qui devictus se absconderat : ecce audivimus quod reges domus Israel elementes sint; ponamus itaque saccos in lumbis nostris et funiculos in capitibus nostris et egrediamur ad regem Israel; forsitan salvabit animas nostras (3 Reg. 20,31). Funes adhibebantur ad metiendum; unde funiculus saepius intellegitur mensorius ad sortes

vel hereditates mensurandas et dividendas (cf. 2 Reg. 8,2; Am. 7,17; Mich. 2, 5; Zach. 2,1. 2). Quare sensu translato dicitur pro parte, sorte, hereditate : pars Domini, populus eius; Iacob funiculus hereditatis eius (Deut. 32,9) et filii Ioseph expostulant cum Iosue : quare dedisti mihi possessionem sortis et funiculi unius, cum sim tantae multitudinis (Ios. 17,14)? cf. Ios. 19,9; Ps. 15, 6 : funes ceciderunt mihi in praeclaris i. e. funes mensorii mihi regionem praeclaram metiebantur (unde in membro parallelo : et hereditas mea praeclara est mihi; cf. Ps. 77,54; 104,11 et in Vulgata 138,3 funiculum meum investigasti i. e. partem, sortem); item 1 Par. 16, 18; Esth. 13,17. Quare funiculus etiam pro regione dicitur; Soph. 2,5 : vae qui habitatis funiculum maris et hebr. Deut. 3,4 et 4 Reg. 4,13. Funiculus seu regula et mensura etiam ponitur, ut ad eam opus destructionis exigatur : et extendam super Ierusalem funiculum Samariae et delebo etc. 4 Reg. 24,13; Lament. 2,8 : cogitavit Dominus dissipare murum filiae Sion; tetendit funiculum suum i. e. extendit regulam, ut plane destruat et complanetur quasi ad filum, ut solo aequetur ad libellam; quae locutio illustratur Is. 34,11 hebr. : extendet super eam lineam tohu (vastitatis) et perpendiculum bohu (confusionis).

Porro funes etc. dicuntur translatione obvia de insidiis quibus homines capiuntur : funes peccatorum circumplexi sunt me i. e. laquei; item sermo fit in hebr. de funiculis i. e. laqueis inferni (Ps. 17[18],6; cf. 2 Reg. 22,6); pariter de iis quibus animi hominum adstringuntur et capiuntur Os. 11,4 : in funiculis Adam traham eos (i. e. quibus *homo* trahi solet), in vinculis charitatis; ita sensu malo Prov. 5,22 : iniquitates suae capiunt impium et funibus peccatorum suorum constringitur; cf. Is. 5,18; simili modo Iob 36,8 vinciri funibus pauperum. Miseriam quoque minatur Isaias, cum dicat : erit pro zona funiculus (3, 24). Demum symbolum servitutis qua cultui deae adstringuntur mulieres etiam cernitur Bar. 6,42 : mulieres circumdatae funibus in viis sedent; ad quem locum cf. *Herodotus* 1,199, ubi funiculum

per modum coronae capiti circumvolutum gerere mulieres ea occasione dicit.

FUNUS vide s. v. EXSEQUIAE et SEPULTURA.

FUR, FURTUM. Deus lege tuetur possessionem : non furtum facies (Ex. 20,15; Lev. 19,11; Deut. 5,19), tuetur quoque poenis in furem sancitis. Furem qui noctu domum ingreditur licebat occidere, non vero si orto sole hoc fecerit. Graviter animadvertebatur in eum qui iumenta vel pecora furabatur. Cum enim ea saepe in pascuis libere vagarentur et insuper heris essent quam maxime utilia, immo necessaria, opportunum erat ea graviore poena proposita lueri. Ita qui bovem vel ovem furatus occiderit vel vendiderit, reddet quinque boves pro uno, quattuor oves pro una; minore vero poena delictum expiatur, si inventum fuerit apud eum quod furatus est vivens, sive bos, sive asinus, sive ovis; duplum restituet. Si vero non habet, unde restituat, venumdabitur ipse fur (Ex. 22,1-4). Furtum autem aliarum rerum vel fraudem commissam reus expiare debebat integra restitutione facta et addita insuper quinta parte pretii; ita si quis depositum acceptum negaverit, vi quidquam iniuste extorsit; rem inventam non possessori reddiderit, vel fraude aliqua damnum intulerit (Lev. 6,2 s.; Num. 3,7. 8); « sin autem non fuerit qui recipiat, dabunt Domino et erit sacerdotis » (Num. 5,8). Pro peccato suo debebat insuper offerre arietem immaculatum de grege, ut sacrificio oblato oret sacerdos ad remissionem peccati impetrandam (Lev. 6,6. 7). Principes et iudices qui munera accipiunt ad ius suppressum et iniustitiam fovendam Isaias merito vocat socios furum (1,23); uti Osee 4,2 contribules suos furorum accusat, ita Paulus quoque (Rom. 2,31). Capitis damnabatur qui furatus fuerit hominem et vendiderit eum (Ex. 21,16). Rem sacram vel anathemate devotam furari, grave crimen reputabatur (cf. Jos. 7,24; 1 Par. 2,7). Cum Iudaeis interdictum esset concupiscere aurum et argentum idolorum, merito Paulus Iudaeis exprobrat τὸ ἱεροσυλεῖν (Rom. 2,22). Fures exclu-

sum iri a regno Dei apostolus docet 1 Cor. 6,10; similiter iam docuit Sapiens : qui cum fure participat, odit animam suam (Prov. 29,24). — Malos doctores Christus appellat fures, quia isti sua solum emolumenta quaerunt eaque iniuste sibi vindicant; quare addit : fur non venit nisi ut furetur et mactet et perdat (Ioan. 10,1. 10); quo loco aperte alludit ad descriptionem malorum pastorum apud Ez. 34,2. — Ut indicet Iesus se venturum tempore quod nesciatur ab hominibus, similitudinem sumit a patrefamilias, qui vigilaret utique si sciret qua hora fur venturus esset (Matth. 24,43); unde apostolus scribit Thessalonicensibus : ipsi diligenter scitis, quia dies Domini sicut fur in nocte, ita veniet (1 Thess. 5,2); item 2 Petr. 3,10; Apoc. 3,3; 16,13.

FURNUS (cf. s. v. FORNAX). Turris furnorum, cuius mentio fit Neh. 3,11 et 12,37, sita erat inter murum latissimum et portam vallis, fortasse prope portam anguli (cf. 4 Reg. 14,13); immo *Keil* suspicatur turrim hanc esse portam anguli (ad Neh. 3,11); inde enim optime explicari, cur in ea descriptione porta anguli non commemoretur, quae tamen porta etiam post exsilium exstiterit (cf. Zach. 14,10).

FUSUS 2 Reg. 3,29 : nec deficiat de domo Ioaab... leprosus et tenens fustum; quo tamen loco פֶּלֶךְ explicari oportebit de baculo, de scipione : innixus baculo prae morbo pedum et infirmitate, uti praeter recentiores etiam iam *Mariana, Gordonus* alique statuerunt. Qui fustum retinent, explanant : qui vili, muliebri officio vitam debeant sustentare. Sed cum vox iam a LXX reddatur eo loco συστάλη, certe non opus est de fuso et colo et de nendi arte cogitare. In laudibus mulieris fortis Prov. 31,19 haec nendi ars merito effertur : manum suam misit ad fortia (hebr. מִישֹׁרִי, ad eolum, uti iam *Mariana, Gordonus* alique ex veteribus et recentioribus interpretantur) et digiti eius apprehenderunt fustum i. e. tractant lanam, diligenter operi stamina ducendi versato fuso incumbit.

GAAL (גַּאֵל, Γαζλ), filius Obed, dux Sichimitarum contra Abimelech iudicem in apertam rebellionem prorumpentium (Iud. 9,26-41). Apud Flavium Iosephum nominatur ὁ Γαζλῆς (Ant. V. 7,3. 4 *ed. Niese*). Videtur fuisse homo vagus neque Sichimis oriundus, cuius adventu et armato praesidio Sichimitae animis ab Abimelech alienati audaciores effecti sunt. Reliqua vide s. v. ABIMELECH 2.

GAAS (גַּאָס, Γαζς et Ios. 24,30 Γαζαζδ), mons in montanis Ephraim situs, a cuius septemtrionali parte erat Thamnathsaere urbs Iosue, in cuius finibus ipse sepultus est (Ios. 24,30; Iud. 2,9; cf. Iosue 19,49. 50). Inter Gibborim davidicos recensetur Heddai (Hurai) de torrente Gaas (2 Reg. 23,30; 1 Par. 41,32) vel de vallibus Gaas illi monti subiectis; utrumque voci hebraicae satisfacit. Situs montis ceteroquin ignoti nonnisi ex situ Thamnathsaere urbis determinari potest; hanc esse *Khîrbet Tibne* (16 km a Bethel inter septemtrionem et occidentem) ostendit *Guérin* (Samarie II. 89 ss.), qui ibidem inter multas cameras sepulcrales ex rupibus excavatas sepulcrum Iosue detexisse sibi visus est anno 1863. Contradicit *Séjourné*, cui praeplacet *Khîrbet el-Fakhakhîr* 40 km aquilonem versus a *Khîrbet Tibne* (Revue bibl. II. 1893 p. 608-626); v. THAMNATHSARE.

GABA v. GABAA 2.

GABAA nomen est tum oppidorum tum collium. Nomina hebraica גַּבְעָה, גַּבְעָה, גַּבְעָה (Vulgata: Gabaa, Gaba, Gabae, Gabce, Geba) secundum *Gesenium* (Thesaurus ling. hebr. 259. 260) derivantur a radice inusitata גַּבַּע, cuius propria vis, quoad ex derivatis colligitur, erat: in-

star gibbi montisque elatus est, ita quidem ut modo altitudinis modo formae rotundae vis magis conspicua sit. — Satis difficilis est distinctio oppidorum et locorum, quibus in S. Scriptura nomen Gabaa (Geba) vel nomen cum Gabaa compositum tribuitur.

1. Gabaa (גַּבְעָה, Γαβαζ), urbs in montanis tribus Iuda, inter decem urbes tertiae provinciae post Maon, Carmel, Ziph etc. enumerata (Ios. 15,37). Sita igitur erat a Hebrone inter meridiem et orientem. Onom. (*ed. Lag.* 128,18 et 246,33) duos viculos Gabaa et Gabatha contra orientalem plagam Daromae sitos esse dicit; horum autem nullum vestigium exstat. — Praeterea in genealogia Iuda 1 Par. 2,49 Sue vocatur pater (dominus, possessor) Gabaa (גַּבְעָה, Γαβαζ); haec fortasse eadem est quae Ios. 15,37. Sed etiam alia erat Gabatha villa 12 mil. pass. ab Eleutheropoli distans et sepulcro Habacuc prophetae celebris (Onom. *ed. Lag.* 246,67; 128,32), cui respondere videtur vicus *Djebā'a* inter Eleutheropolim et Bethlehchem; is quidem a nonnullis (*Conder in Survey of West. Pal. Mem.* III. p. 25; *Guérin*, Judée III. 382) perperam Gabaa Ios. 15,37 dicitur, quae potius in vicinia Maon, Carmel, Ziph etc. quaerenda est; sed nihil obstat quominus *Djebā'a* sit illa Gabaa 1 Par. 2,49. S. Hieronymus quoque de Gabatha iuxta Bethlehchem in tribu Iuda loquitur (Onom. *ed. Lag.* 128,21).

2. Gabaa, Gaba, Gabae, Gabce, Geba (גַּבְעָה et interdum גַּבַּע propter pausam; LXX Γαβαζ, sed etiam Γαβαζ, Γαβέ, Γαβέθ etc.), urbs inter duodecim urbes orientales tribus Beniamin recensita (Ios. 18,24), sacerdotibus tradita (Ios.

21,17; 1 Par. 6,60 [45], terminos septentrionales regni Iuda designans (4 Reg. 23,8; Zach. 14,10 hebr.). De Gaba seu Geba nostra plerique auctores interpretantur 1 Reg. 13,3 : et percussit Ionathas stationem Philisthinorum, quae erat in Gabaa (LXX ἐν τῷ βουνοῖ) vel secundum aliquos auctores monumentum quoddam, cippum quendam a Philisthaeis in signum prioris alienius victoriae erectum. In ulteriore historia eiusdem belli philisthaici situs rupium Boses et Sene 1 Reg. 14,4. 5 ita describitur, ut Machmas a septentrione, Gabaa (Geba) autem a meridie in latere *Wādi Suweinit* collocetur. Cum his plene concordat descriptio itineris Assyriorum Is. 10,28. 29 : apud Machmas deponunt sarcinas, transeunt transitum (*Wādi Suweinit*) clamantes : Gaba diversorium nostrum (ad pernoctandum); quare tremuit Rama occidentem versus a Geba distans, fugiunt incolae Gabaa Saulis, quo Assyrii meridiem versus progressuri sunt. Propter situm rei bellicae tantopere utilem Asa rex Iuda munivit Geba Benjamin ex lapidibus et lignis, quae Baasa rex Israel muniendae urbi Rama praeparaverat (3 Reg. 15,22; 2 Par. 16,6). Ex captivitate redierunt filii Rama et Geba 621 numero (Esdr. 2,26; Neh. 7,30); Geba denuo a Beniaminitis habitabatur (Neh. 11,31). Eiusdem urbis mentio fit 1 Par. 8,6; 2 Par. 13,2; Neh. 12,29. Eadem quoque intellegi videtur 2 Reg. 5,25 : Percussit (David) Philisthim de Gabaa (sed LXX Παζών) usque Gezer; loco autem parallelo 1 Par. 14,16 omnes textus legunt : de Gabaon; res igitur dubia est. Locī 1 Reg. 10,5. 10. 13, de quibus etiam dubitatum est, rectius ad Gabaam Saulis referuntur; v. GABAA 5.

Nomen antiquum Geba conservat vicus *Djeba'* a *Makhmās* (Machmas) meridiem versus distans et interiecto *Wādi Suweinit* separatus.

Cf. Robinson, Palaestina II. 324 ss.; Guérin, Judée III. 67-70; Survey of West. Pal. Mem. III. 9. 94; D. Zaneccchia, La Palestine d'aujourd'hui 1899 II. p. 465. 466.

3. Gabaa Benjamin (גַּבְעָה בִּנְיָמִין) גַּבְעָה בִּנְיָמִין, sed Iud. 20,10 גַּבְעָה בִּנְיָמִין; Γα-

βὰς τῆς Βενιαμιν). Maxime nota est haec urbs a scelere nefando, quod eius incolae (filii Beliai) perpetrarunt in levitam eiusque uxorem a Bethlehem Iuda domum scil. ad latus montis Ephraim revertentes (Iud. 19,12. 14. 16 s.); ex contextu sita erat inter Ierusalem et Rama; habebat plateam seu forum quoddam publicum (19,15. 17. 20); inter habitatores suos numerabat 700 viros fortitudine ac dexteritate bellica egregios (20,15. 16). A Flavio Iosepho (Ant. V. 2, 8 ubi eundem eventum narrat) haec Γαζά Hierosolymis 20 stadia abesse dicitur; Rama autem Hierosolymis 40 stadia aberat (Ant. VIII. 12,3). Poena Beniaminitis ob illud scelus inflictā, urbis Gabaa expugnatio et incendium narratur Iud. 20,1-48. — De Gabaa Beniamin iterum sermo est in historia belli philisthaici 1 Reg. 13,2. 15. 16; 14,2. 16. Ex ipso textu haec eruitur series eventuum : Saul cum 2000 virorum in Machmas et monte Bethel castrametatur, Ionathas filius Saul cum 4000 viris in Gabaa Beniamin (13,2); Ionathas a Gabaa Beniamin contra Geba (*Djeba'*) progreditur ibique stationem (monumentum) Philisthaeorum destruit (13,3); Philisthaei vero undique ad arma convolantes exercitum Saul ex Machmas et Bethel eiiciunt et per fauces montium usque ad Galgala prope Iericho depellunt (13,4. 7); Philisthaeis apud Machmas castrametantibus Saul et Samuel de Galgalis Gabaam Beniamin ascendunt (13,15. 16), quam Ionathas toto tempore intermedio occupasse merito censetur; Ionathas eiusque armiger apud Geba (*Djeba'*) in saltum (*Wādi Suweinit*) descendunt et contra Machmas in septentrionali saltus latere ascendunt castra Philisthaeorum adorturi (14,1 ss.); sequitur clades Philisthaeorum.

Omnibus hisce textibus satisfieri videtur, si Gabaa Beniamin media fere inter Ierusalem et Rama agnoscitur *Tuleil el-Fāl* (collis fabarum); hunc situm Gabaa Beniamin vindicant plerique cum *Valentiner* in Zeitschr. d. D. Morg. Ges. XII. 1838 p. 161; aliqui lamen praeferrunt *Rās el-Tuwil* inter *Tuleil el-Fāl* et *Djeba'*. Difficultas aliqua in eo est, quod speculatores Saul, cuius castra erant in

Gabaa Benjamin (14.2. 16), perturbatio- nem ac tumultum in castris Philisthaeo- rum apud Machmas exortum discernere potuerint; sed supponere licet castra Israelitarum a Gabaa Benjamin per de- scensum montium fuisse extensa versus Geba et primam eorum stationem (*avant- garde*) ab ipso saltu non multum abfuisse, speculatores autem variis in stationibus dispositos signis vel nuntiis inter se communicasse.

De Gabaath filiorum Benjamin oriundi erant Ithai (Ethai) filius Ribai (2 Reg. 23,29; 1 Par. 11,31) et Samaa (Soma) Gabaathites, pater Ahiezer et Ioas Ben- iaminitarum, qui Davidi in Sieeleg fu- gitivo se adiunxerunt (1 Par. 12,3). Fa- cinus indignissimum Beniaminitarum in Gabaa commissum in memoriam re- vocatur Os. 9,9; 10,9. De eadem Gabaa signum periculi instantis veluti de spe- cula in regionem late personare exhibetur Os. 5,8.

Gabaa (Iud. 20,34; in textu hebraico : Gabaa in agro) ab aliis explicatur aliqua Gabaa campi distinguenda a Gabaa mon- tis (*Cassel* : Feldgibea und Berggibea), ab aliis ipsa Gabaa Benjamin, prope quam a loco certaminis aliqua via in agrum ducebat (*Keil* ad h. l.), ab aliis Geba (*Djeba*), ita ut Israelitae a Gabaa Benjamin fugerint partim versus Bethel, partim versus Geba. Apud *F. de Hummelauer* ad h. l. istae duae viae seu se- mitae explicantur duo ascensus, unus Gabaa descendens aquilonem versus, alter post descensum rursus ascendens versus Bethel; additur *in agro*, in campo scil. patenti, per quem Beniaminitae vagabantur Israelitis in saltibus adiectis delitescentibus. Ex variis hisee interpre- tationibus colligitur Gabaam (in agro) aut esse ipsam Gabaam Benjamin aut fortasse Geba, de qua diximus num. 1.

De Iud. 20,33 (Syrus : spelunca Gabaa; Targum Jonathan : desertum, planities Gabaa) cf. *F. de Hummelauer*.

4. Gabaa Saulis (גִּבְעַת שָׁאוֹל, LXX 2 Reg. 21,6 Γαζαὼν Σαούλ, Is. 10,29 πῶλις Σαούλ, alias solum Γαζαζά) haud dubie eadem est quae Gabaa Benjamin, ut ex locis citandis patebit. Hoc nomen non adhibetur nisi post Saulis publicam elec-

tionem, quando abiit in domum suam in Gabaa (1 Reg. 40,26; cf. *Flav. Ios. Ant.* VI. 4,6 : εἰς Γαζαθὴν ἐξ ἧς ὑπερχύε). Brevi post nuntius affertur in Gabaam Saulis de urbe lates Gabaad ab Ammo- nitis obsessa (1 Reg. 11,4). Sequuntur bellum ammoniticum, philisthaicum etc.; ob inobedientiam bello amaleciticō ad- missam Saul a Deo reiectus ascendit in domum suam in Gabaa (1 Reg. 43,34). In Gabaa (scil. Saulis) sollemne concilium sub terebintho in colle (hebr.) a Saule habetur. Ad Saulem in Gabaa Zi- phaei bis ascenderunt, ut Davidem in deserto Ziph latentem proderent (23,19; 26,1). Initio regni davidici septem viri de familia Saul in ipsa Gabaa Saul sus- pensī sunt a Gabaonitis (2 Reg. 21,6 et v. GABAON). In descriptione itineris Assyriorum Is. 40,29 incolae Gabaath Saulis fugitivi perhibentur, quoniam Sennacherib a Gaba (*Djeba*) et Rama meridiem versus progrediens Ierusalem petit. — Multum denique lucis affundit Flavius Iosephus (Bell. iud. V. 2,1), qui iter Titi versus Ierusalem describit; a Caesarea per Samariam Titus Gophnam (*Djifnā*) pervenerat ibique noctem mora- tus est; inde progressus cum statum diei iter confecisset, castra posuit in loco, quem Iudaei Spinarum vallem appella- bant apud vieum Gabath Saul (Γαζάθ Σαούλ) dictum ab Hierosolymis circiter 30 stadia distantem. Ibidem Tito coniuncta est legio ex Amaunte (Nicopoli) appropinquans (l. c. V. 2,3) scil. per viam Bethoron et Gabaon; iam vero hodie quoque illae duae viae a septentrione et ab occidente convergentes paulo supra *Tuleil el-Fāl* conveniunt. Hinc pro Gabaa Saulis citra dubium commendatur situs *Tuleil el-Fāl* vel fortasse *Khīrbet Rās el-Tawīl* una leuca anglica remotior ab Hierosolymis. Vallis illa Spinarum quae- nam sit, utrum ad dexteram an ad sini- stram itineris Titi, determinari nequit.

Loci dubii sunt 1 Reg. 10,5. 40. 13; probabilius tamen a Gabaa Saulis non differt collis Dei (10,5 LXX ὁ βουνὸς τοῦ θεοῦ, גִּבְעַת הָאֱלֹהִים), collis (10,10 LXX εἰς τὸν βουνόν, הַגִּבְעָה), excelsum (10,13 LXX εἰς τὸν βουνόν, הַבְּקָה).

5. Gabaa legitur in Vulgata 1 Reg. 7,

1; 2 Reg. 6,3.4 ad determinandum situm domus Abinadab, in quam viri Cariathiarim arcam Dei intulerunt. Sed cum

XX (ἐν τῷ βουνῷ) vertendum est: in colle.

omnis Abinadab in colle seu loco sublimiore prope Cariathiarim vel in ipsa urbe prominens digna videbatur, quae arcae Dei hospitium praeberet. Cf. *F. de Hummelauer* ad 1 Reg. 7,1.

6. Gabaa (Γαβαά, ἢ Γαβάν, Ἀ Γαβᾶ) legitur Iudith 3,14 (LXX 3,10). Secundum LXX Holofernes castra posuit inter Gaibai et Scythopolin (Bethsan). Vulgata vertit: venit ad Idumaeos in terram Gabaa. Correspondere videtur vicus *Djeba'* circa 5 km a Samaria (Sebaste) septentrionem versus distans (*Survey of West. Pal. Mem.* II. 135).

7. Gabaa Hachila v. HACHILA.

8. Gabaath (גַּבְעַת: Γαβαῶθ, Ἰαρίμ, Ἀ Γαβαῶθ καὶ πόλις Ἰαρίμ, Β Γαβαωθιαρείμ), urbs inter quattuordecim urbes occidentales tribus Benjamin enumerata (Ios. 18,28). *Dillmann* et *F. de Hummelauer* ad h. l. putant Gabaam Benjamin indicari. Alii hebraicum גַּבְעַת קְרִיָּאת de una aliqua urbe Gibeath-Qiriath interpretantur: sed hoc admissio numerus quattuordecim retineri nequit. Alii, supponentes nomen sequens Cariath esse corruptum ex Cariathiarim, interpretantur Gabaath collem scil. istum collem in Cariathiarim, de quo 1 Reg. 7,1; 2 Reg. 6,3. 4 (vide GABAA 3). Exploratores anglici pro Gabaath assignant *Djibia* tres leucas anglicas a *Qaryut el-Enab* aquilonem versus (*Survey of West. Pal. Mem.* III. 43). Ceterum cf. s. v. CARIATH.

9. Gabaath filiorum Benjamin (2 Reg. 23,29; 1 Par. 14,31) v. Gabaa Benjamin (supra n. 3).

10. Gabaath Phinees (גַּבְעַת פִּינְחָס, Γαβαᾶρ Φινεὺς), urbs in monte Ephraim, in qua Eleazar filius Aaron sepultus est; nomen sortita est a Phinees Eleazari filio, cui ab Israelitis in possessionem tradita erat (Ios. 24,33). Urbem, non collem designari suadet praepositio גַּבְעַת (secus גַּבְעַת expectanda erat). Apud Flavium Iosephum (Ant. V. 4,29) vocatur Γαβαῶθ. Eusebius et S. Hieronymus (Onom. ed. Lag. 246,67; 128,32) eam appellant Γαβαᾶς,

Gabiath in tribu Benjamin et indicant villam Gabatha 12 mil. pass. ab Eleutheropoli distantem et sepulcro Habacuc prophetae celebrem; sed hic situs intra fines tribus Iuda contineretur et respondere posset urbi Gabaa 1 Par. 2,49 commemoratae, ut diximus sub GABAA 2. Verum alibi Onom. (ed. Lag. 248,3; 130,5) meminit vici Geba 5 mil. pass. a Gophna Sichem versus distantis, ubi hodie vicus *Djibi'a* et *Khîrbet Seîâ*. Hunc esse situm Gabaath Phinees ostendit *Guérin*, Samarie II. 108 praesertim ex S. Hieronymo (Peregrinatio S. Paulae 15); S. Paula a Bethel Sichem versus progressa in monte Ephraim sepulcrum Iosue in Thamnathasare et Eleazari in Gabaath Phinees e regione venerata esse dicitur; iamvero Thamnathasare agnoscitur *Khîrbet Tibne* (*Guérin* l. c. p. 89 ss.); vicus *Djibi'a* a *Tibne* non multum abest orientem versus, in colle positus sicut *Tibne* in proclivitate montis, in mediis montanis Ephraim; pleno igitur sensu illud e regione venerata est verum esse probatur in hac opinione (cf. etiam *Guérin*, Judée III. 37). Recentius negavit *Séjourné* sepulcrum Iosue esse in Thamnathasare, sed intactam reliquit opinionem de situ Gabaath Phinees, cum indicationes S. Hieronymi de utroque sepulcro satis vagae sint neque situm vicinum postulent.

Cf. S. Hier. Peregr. S. Paulae 15 apud *Tobler et Motinier*, Itinera hieros. I. 37; P. M. *Séjourné* in Revue bibl. II. 1893 p. 625. Opinioni supra expositae de situ Gabaath Phinees, quam cum *Guérin* approbant A. *Dillmann* et *F. de Hummelauer* (ad Ios. 24. 33), opponitur traditio iudaico-samaritana a Mahommedanis quoque adoptata, Gabaath Phinees esse vicum *Awarta* prope Sichem a meridie (cf. *Zeitschr.* d. D. Pal.-Ver. II. 1879 p. 11-17; VI. 1883 p. 195-199; E. *Carmoly*, Itinéraires de la Terre Sainte 1847 p. 186. 212. 386. 445); quam traditionem sequuntur I. *Schwarz*, Das heilige Land 1852 p. 118. 355; *Survey of West. Pal. Mem.* II. 288.

11. Gabaath Saulis (Is. 10,29) v. Gabaa Saulis (supra n. 4).

12. In Vulgata גַּבְעַת גַּבְעַת seu גַּבְעַת saepius vertitur collis, ubi non urbs, sed locus editus indicari videtur:

a. Collis aquae ductus v. AMMAH.

b. Collis Dei communiter censetur esse Gabaa Saulis vel locus sacer proxime extra Gabaam Saulis situs (1 Reg. 10, 5. 10. 13); v. supra n. 4.

c. Collis Gareb v. GAREB.

d. Collis excelsus (Iud. 7,1) v. MORE collis.

e. Collis praeputiorum (Ios. 5,3), in quo Iosue filios Israel circumcidit; inde vocatum est nomen loci illius Galgala; v. GALGALA 1.

f. Collis Hachila seu Gabaa Hachila (supra n. 7).

13. Apud Flavium Iosephum (Bell. Iud. III. 3,1) commemoratur Gaba urbs equitum (Γαβαῶ πόλις ἵππῶν) monti Carmelo adiacens, in qua equites ab Herode rege dimissi domicilium habebant. Hodie *Djeba'* non procul a litore infra Carmelum.

GABAE v. GABAA 2.

GABAEAL (Γαβαήλ, Α Γαβαήλ), unus ex maioribus Tobiae (Tob. 1,1 graece tantum).

GABAON (גִּבְעֹן i. e. ad collem pertinens vel in colle exstructum; Γαβών), urbs Hevaeorum (Ios. 11,19; cf. 2 Reg. 21,2 ubi Gabaonitae vocantur reliquiae Amorrrhaeorum, quo nomine communi incolae primigenii terrae Chanaan designantur), caput urbium foederatarum, quarum incolae simulatione longi itineris Iosue et principes Israel deciperunt, ut iuramento horum principum interposito salvarentur, sed perpetuo famulatu caedendi ligna et comportandi aquas adstringebantur (Ios. 9,3-27; 11,19); foedere hoc Gabaonitarum cum Israel vehementer commotus est Adonisedec rex Ierusalem, quoniam urbs magna erat Gabaon et una civitatum regaliū et maior oppido Ithai omnesque bellatores eius fortissimi (10,1. 2); sed quinque reges duce Adonisedec Gabaon urbem obsidentes devicti sunt celebri illa pugna, qua Iosue soli imperavit: Sol contra Gabaon ne movearis (10,3-12). Gabaon erat terminus, a quo Iosue in prima sua expeditione Palaestinam meridionalem usque ad Gadesbarne subegit (10,41); postmodum recensetur inter 14 urbes occidentales tribus Benjamin (18,23) et sacerdotibus tradita est (21,17).

Iuramentum illud, quod Iosue Gabaonitis praestitit, primus violasse videtur Saul iniustitia illa, propter quam initio regni davidici fames saeviebat et poscentibus Gabaonitis septem filii Saul in Gabaa Saul (v. GABAA 4) suspensi sunt (2 Reg. 21,1-6). Iuxta piscinam Gabaon (cf. Ier. 41,12 aquas multas, quae sunt in Gabaon) locum habuit certamen bellicum singulare inter duodecim Beniaminitas ex Abneri exercitu et duodecim bellatores davidicos, a quo vocatum est nomen loci illius Ager robustorum (LXX apprehendentium) in Gabaon; et a certamine singulari ventum est ad proelium generale, quo Abner a Iobab devictus est ac fugiens Asaelem fratrem Iobab confodit (2 Reg. 2,12-23; 3,30). Ibidem iuxta lapidem grandem, qui est in Gabaon (vide s. v. AMMAH), Amasa filius Abigail a Iobab modo perfido interfectus est (2 Reg. 20,5-10). Verum utriusque sanguinem Iobab ibidem, ubi fuderat, sanguine suo luit; fugitivus in tabernaculo Domini, quamvis cornu altaris apprehendisset, iubente Salomone a Banaia filio Ioiadae occisus est (3 Reg. 2,28-34). Illo enim tempore tabernaculum erat in excelso Gabaon; David cum arcam in Ierusalem reduceret, illud in Gabaon transtulit et Sadoc sacerdotem eiusque fratres ibidem constituit, ut super altare holocaustomatis coram tabernaculo Domini iugiter mane et vespere holocausta offerrent (1 Par. 16,39. 40; 24, 29). Super altare illud in Gabaon Salomon quoque mille hostias in holocaustum obtulit cum universa multitudo Israel et cum Dominus in ipsa nocte ei appareret, sapientiam sibi postulavit et obtinuit (2 Par. 1,3-17; 3 Reg. 3,4 s.; 9,2). Templo exstructo Salomon tabernaculum illud ab excelso Gabaon accersitum una cum arca foederis in novam domum Dei intulit (3 Reg. 8,4). Ex captivitate duce Zorobabel 23 filii Gabaon redierunt (Neh. 7,25; cf. Esdr. 2,20 ubi Gebbar pro Gabaon legitur); viri de Gabaon in muris Ierusalem aedificandis opem praestiterunt (Neh. 3,7). Allusio Is. 28,21: sicut in valle quae est in Gabaon irascetur (Deus), refertur ad victoriam Iosue apud Gabaon, ubi Deus lapidibus grandinis hostes prostravit

(cf. *Knabenbauer* ad Is. 28,21). — Pro Gabaon 1 Par. 14,16 legitur loco parallelo 2 Reg. 5,25 Gabaa (sed LXX Γαζών), fortasse Geba (v. GABAA 2). Tempore belli iudaici prope Gabaon Cestius Gallus Romanorum dux a Iudaeis clade affectus est (*Flav. Joseph.* Bell. iud. II. 19,1); loco citato Fl. Iosephus Gabaon Microsolymis distare dieit 50 stadiis, alibi (Ant. VII. 11,7) 40 stadiis. Nomen hodiernum est *el-Djib*, qui vicus inter Ierusalem et Bethoron situs est a *Nebi Samwil* septemtrionem versus.

De Gabaon oriundi in S. Scriptura recensentur Samaias fortissimus inter triginta et super triginta. qui Davidi in Sicleg se iunxit (1 Par. 12,4), Meltias qui cum aliis Gabaonitis in muris Ierusalem edificandis opem praestitit (Neh. 3,7), Hananias pseudopropheta, filius Azur (Ier. 28,1-17). Ex maioribus Saul habitabat in Gabaon Iehiel pater i. e. dominus ac possessor Gabaon cum uxore sua Maacha (1 Par. 9,35), qui 1 Par. 8,29 Abigabaon vocatur.

Cf. *Robinson*, Pal. II. 350 ss.; *Guérin*, Judée I. 385-391; *Survey of West. Pal. Mem.* III. 10. 94 ss.; *Fahrngruber*, Nach Jerusalem ed. 2 II. 95; *D. Zaneccchia*, La Palestine d'aujourd'hui 1899 II. 356 ss.; *Liévin de Hamme*, Terre Sainte, ed. 4 III. 11 s.; *Legendre* apud *Vigouroux*, Dict. de la Bible III. 15-21, qui examinat ac diiudicat rationes pro Gabaon = *Nebi Samwil* allatas a *L. Heidet* in *Revue Bibl.* III. 1894 p. 321-356.

GABATHON, GEBBETHON

(גַּבְתֹּן; Γαζαθών, Βεγεθών, Γεθεθών), urbs tribus Dan (Is. 19,44), filiis Caath levitici generis tradita (24,23); brevi post scissionem regnorum Iuda et Israel in potestatem Philisthaeorum redacta est. Eam obsederunt Nadab, secundus rex Israel (3 Reg. 15,27) et postea Amri princeps militiae Israel, qui in castris ante portas Gebbethon rex declaratus est pro Zambri usurpatore (3 Reg. 16, 15-17). Amri ab obsidione Gebbethon cessavit, ut Zambri in Thersa oppugnaret; ex 3 Reg. 16,15 merito inferitur toto tempore Baasa et Elai, regum Israel tertii et quarti, identidem de Gebbethon dimicatum esse. Philisthaeis non videtur

esse erepta. Hodie fortasse *Qibbiye* inter Lyddam et *Khirbet Tibne*.

Cf. *Survey of West. Pal. Mem.* II. 297; *D. Zaneccchia*, La Palestine d'aujourd'hui 1899 II. 425.

GABBATHA (Γαββαθα, aramaice גַּבְבָּתָא) i. e. locus eminens; eo nomine designabatur locus prope praetorium in Ierusalem, ubi Pilatus sedit pro tribunali. Nomine graeco appellabatur λιθόστρωτος, quae non est explicatio nominis aramaici, sed eiusdem loci designatio non ex eius altitudine petita, sed ex eo quod solum vel pavimentum eius lapidibus vel tabulis lapideis erat stratum (Ioan. 19,13).

GABEE v. GABAA 2.

GABELUS (Γαβήλ). 1. Unus ex maioribus Tobit seu Tobiae senioris (Tob. 1,1 LXX).

2. Iudaeus habitans in Rages civitate Medorum, qui decem talenta argenti a Tobia seniore sub chirographo accepta Tobiae iuniori fideliter restituit (Tob. 1,17; 4,21; 5,8. 44; 9,3. 6. 8; 10,2; 14, 18; 12,3; LXX 1,14; 4,1. 20; 5,6; 9, 2. 5; 10,2). Erat Nephthalita sicut Tobias et egestate pressus (Vulgata 1,17).

GABER (גַּבֵּר, Γαβέρ), filius Uri, praefectus a Salomone constitutus in terra Galaad scil. in terra Sehon regis Amorrhaeorum et Og regis Basan (3 Reg. 4. 19) i. e. in tota terra transiordanica exceptis praefecturis a Bengaber et Ahinadab (4,13. 14) administratis.

GABIM (גַּבִּימ, Γαβίμ), vicus a septemtrione Ierusalem situs, de quo in descriptione itineris Assyriorum Is. 10. 31: habitatores Gabim confortamini (Vulgata) vel: congregabunt se (hebr. scil. non ad resistendum, sed ad fugiendum. Enumeratur post Gabaam Saulis et Anathoth. Erat igitur oppidum tribus Benjamin ab itinere Sennacherib non multum distans inter Ierusalem, Gabaam Saulis et Anathoth. Situs accuratius ignoratur. Vicus Geba 5 mil. pass. a Gophna Sichem versus distans, quem Onom. s. v. Gebin indicat, ordini enumerationis Is. 10,31 non respondet, sed referendus est ad Gabaath Phinees; v. GABAA 10.

GABRIAS (Γαβρίας), frater Gabeli (Tob. 1,14 LXX); sed 4,20 LXX pater Gabeli.

GABRIEL v. ANGELUS.

GAD (גַּד, (Γάδ). 1. Gad filius septimus Iacob patriarchae, genitus ex Zelpha ancilla Liae, frater natu maior Aser (Gen. 30,11-13; 35,26; 46,16. 18). Explicatio nominis Gad continetur verbis Liae, quae filio ex Zelpha genito dixit: Feliciter (גַּדִּי secundum *Kelhib*; LXX ἐν εὐχῇ) et idcirco vocavit nomen eius Gad (Gen. 30, 11). Legunt quidem Massorethae גַּד אֶזְרָא i. e. venit fortuna, quam lectionem commendant Targumim et Peshitta; eandem adoptarunt Aquila (ἐλθὲν εὐχωνία) et Symmachus (ἐλθὲν Γάδ). Verum lectio LXX traditionem antiquam videtur conservare et sensum optimum praebet: feliciter, profelicitate mea, mihi hic eventus faustus est. Tempore quo Iacob cum filiis suis in Aegyptum descendit, septem filii Gad recensentur (Gen. 46,16; cf. Ex. 1,4; Num. 26,15-17). Genealogia filiorum Gad traditur 1 Par. 2,2; 5,11-16 simul cum descriptione sedium, quas incolebant.

2. Gad tribus Israel. Possessio Gad ab oriente Iordanis sita partem septentrionalem regni Sehon Amorrhaei comprehendebat. Regnum Amorrhaeorum, quod inter tribus Ruben et Gad divisum est, extendebatur ab Arnone (*Wādī Mōdjib*) usque ad torrentem Iaboc (*Nahr el-Zerqā*) et insuper totam orientalem depressionem Iordanis a mari Mortuo usque ad mare Ceneroth (Genesareth) obtinebat (Deut. 3,12. 16. 17; Ios. 12,2. 3). A septentrione torrentis Iaboc patebat regnum Og Amorrhaei dimidia tribui Manasse attributum (Deut. 3,13; Ios. 13,29-31). Gad igitur media erat inter Ruben et Manasse transiordanicam; ipsa regionis formatione dividebatur in duas partes scil. depressionem Iordanis orientalem a mari Mortuo usque ad lacum Genesareth et regionem montanā, cuius terminum septentrionalem indicat Mahanaim a dextera regione torrentis Iaboc (Ios. 13,26), orientalem Aroer quae est contra Rabba (Rabbath Ammon, hodie *ʿAmmān*), meridiōalem Hesbon, occidentalem depressio Iorda-

nis. Tota regio Gad uberrima erat ad pastum animalium (Num. 32,4).

De historia Gad admodum pauca tradita sunt. Princeps tribus anno secundo egressionis ex Aegypto erat Eliasaph filius Duel (Num. 1,14). Apud montem Sinai de Gad numerabantur 45 630 viri bellatores (1,24. 25), postea in campstribus Moab 40 500 viri (26,18). In castris Gad cum Ruben et Simeon ad meridiam plagam tabernaculi erat (2,14. 15); cf. ordinem itineris per desertum 10,20. Oblationes Eliasaph principis Gad in dedicationem altaris Num. 7,42-47 recensentur. Inter duodecim exploratores a Moyse in terram Chanaan missos erat de tribu Gad Guel filius Machi (13, 16). Gaditae sicut etiam Rubenitae et dimidia tribus Manasse, cum essent pastores et pecoribus abundarent, portionem suam in regione transiordanica acceperunt; nihilominus fratres suos in terram promissionis subigendam armati praecesserunt, finita autem terrae occupatione a Iosue ad sedes suas remissi sunt (Num. 32,1-36; 34,14. 15; Ios. 1, 12 ss.; 4,12; 22,1-34). Post ingressum in terram cisiordanicam Gad cum Ruben, Aser, Zabulon, Dan, Nephthali maledictionem in monte Hebal pronuntiavit (Ios. 8,33. 34), ut Moyses mandaverat (Deut. 27,13). In territorio Gad urbs refugii designata est Ramoth Galaad (Deut. 4,43; Ios. 20,8 et v. RAMOTH GALAAD); levitis de stirpe Merari concedebantur Ramoth Galaad, Manaim seu Mahanaim, Hesbon urbs prius rubenitica, postea gaditica, Iaser seu Iazer (Ios. 21,7. 37; 1 Par. 6,63. 80. 81 hebr. 6,48. 63. 66). In cantico Dehborae Gad comprehenditur nomine Galaad et carpitur, quod trans Iordanem quiescens opem non tulerit (Iud. 3,17). David fugitivo in Sicleg se adiunxerunt de tribu Gad viri robustissimi et pugnatōres optimi, tenentes clypeum et hastam: facies eorum quasi facies leonis et veloces quasi caprae in montibus (1 Par. 12,8-14). Apud Gaditas praesidium sibi quaerebat Isboseth filius Saulis, rex in Mahanaim declaratus (2 Reg. 2,9). Cum autem David in Hebron rex ab universo Israel agnosceretur, de Rubenitis, Gaditis et dimidia tribu Manasse aderant 120 000 bella-

lores (1 Par. 12,37). Postmodum ipse David regno pulsus in territorium Gad se recepit (2 Reg. 17,22 s.). Iussu Davidis ministeria tum sacra tum civilia apud Rubenitas, Gaditas, et dimidiam tribum Manasse procurabantur a 2700 Hebronitis (1 Par. 26,32 et v. HEBRON 1). Inter principes tribuum tempore Davidis deest princeps Gad sicut etiam Aser (1 Par. 27,16 s.); cur desint, ignoratur. Ieroboam, primus rex Israel, ut trans Iordanem quoque regnum suum stabiliret, urbem gaditicam Phanuel munitionibus firmavit (3 Reg. 12,23). Nexus Gaditarum cum regno Israel cernitur regnante Iehu, cum Hazael rex Syriae fines orientales Israelitarum Gad, Ruben, Manasse percuteret (4 Reg. 10,33) et regnante Ieroboam II., qui in censu filiorum Ruben, Gad et dimidia tribus Manasse 44760 bellatores numeravit (1 Par. 5,17. 18). Brevi autem post, cum regnum Iuda regnantibus Ozia et Ioatham reffloresceret, eadem tribus regno Iuda pro aliquo tempore videntur paruisse, ut 1 Par. 5,17 innuitur. Ex 1 Par. 5,11. 16 discimus territorium Gad orientem versus extensum esse usque ad Selcha seu Salecha (hodie *Sal-khad*), urbem a meridie *Djebel Hauran* sitam. Bellum quo Agareni (vide s. v.) cum Ismaelitis foedere iuncti a Gaditis, Rubenitis, Manassitis transiordanicis devicti sunt, describitur 1 Par. 5,19-22; quanto tempore ante Theglathphalasar hoc bellum fuerit, determinari nequit. A Theglathphalasar Gaditae captivi in Assyriam abducti sunt una cum Rubenitis et Manassitis transiordanicis (1 Par. 5,26); ea opportunitate uti sunt Ammonitae, ut terram Gad occuparent, quod Dominus illis exprobrat affirmans Melchom deum Ammonitarum iniuria sibi arrogasse regiones Gaditarum (Jer. 49,1). Praeterea Gad commemoratur in symbolica descriptione terrae sanctae et novae Ierusalem Ez. 48,27. 28. 34 et in Apoc. 7,5.

Ex dictis indoles Gaditarum facile deprehenditur: erant opulenti pastores et bellatores robusti. Excellentia bellica praedicatur in vaticinio Iacobaco: Gad accinctus proeliabitur ante eum et ipse accingetur retrorsum (Gen. 49,19), quomodo cum demum hic textus in paro-

nomasia ludens interpretandus est (*F. de Hummelauer* ad h. l.). Latitudinem pascuorum et fortitudinem bellicam effert Moyses Deut. 33,20: Benedictus in latitudine Gad (hebr. Benedictus qui latitudinem dedit Gad i. e. Deus); quasi leo requievit cepitque brachium et verlicem.

3. Gad Videns (גָּדִידֵן, ὁ βλέπων, ὁ ὀρῶν) erat propheta, qui Davidi cum lateret in praesidio Odollam, videtur se iunxisse eique auctor fuit, ut relicto praesidio veniret in saltum Haret (1 Reg. 22,3). Idem Davidi ob numeratum populum poenam a Deo infligendam intimat (2 Reg. 24,11-19; 1 Par. 21,9-19). Sine dubio regi a consiliis erat; scripsit volumen de gestis Davidis (1 Par. 29,29) et opem praestitit in constituendis ac disponendis levitis in domo Domini cum cymbalis et psalteriis et citharis, cuius rei memoria tempore Ezechiae adhuc vigens erat (2 Par. 29,25).

4. Gad (Vulgata: Fortuna, LXX δαζιμόνιον) legitur in descriptione impiorum Is. 65,11: et vos qui dereliquistis Dominum, qui obliti estis montem sanctum meum, qui ponitis Fortunae mensam et libatis super eam; — aliis verbis: a Domino alieni et aversi, montis Sion divinarumque promissionum obliti mensam ponunt i. e. lectisternia parant pro Gad et pro Meni libamen implent (hebr.). Gad ut nomen appellativum *fortunae* dicit (cf. Gen. 30,11 LXX ἐν τύχῃ); ut idolum (cf. Baal Gad Jos. 11,17; 12,7) explicant de deo fortunae et in eo cernunt planetam, cui a Iove nomen est, quam stellam Arabes maiorem fortunam appellabant, dum stellam cui a Venere nomen est inditum, vocant minorem fortunam; hinc fil, ut Meni de hac stella et de dea eius stellae praeside accipiant communiter. In inscriptionibus ex Phoenice et Palmyra servatis nomen Gad saepius occurrit.

Cf. *Knabenbauer* in Is. 65,11; *P. Scholz*, Götzendienst und Zauberwesen bei den alten Hebräern 1877, p. 409 ss.; *F. de Sauley*, Numismatique de la Terre Sainte 1874 p. 1. 5. 373. 374, pl. XXIII 1-3.

5. Gad vallis 2 Reg. 24,3: eumque pertransissent Iordanem, venerunt in Aroer

ad dexteram urbis, quae est in valle Gad scil. Ioab et principes exercitus, ut numerarent populum Israel. Videtur esse sermo de Aroer Arnonis (v. AROER 4). Textus autem hebraeus illa vertendus est, ut *Gad* ad sequentem vocem trahatur: « venerunt... in Gad et usque Iazer », quae urbs in media fere tribu Gad sita erat; in hac explicatione directio itineris indicatur ab Aroer urbe rubenitica versus tribum Gad continuati. Ex quorundam opinione vallis Gad est vallis Iaboc superioris (*Nahr Ammān*).

GADARA vide s. v. GERASENI.

GADDEL v. GEDDEL.

GADDI (גַּדִּי, Γαδδί), filius Susi de tribu Manasse, explorator terrae promissae (Num. 13,12 [41]).

GADDI 1 Par. 12,8 et **GADI** 2 Reg. 23,36 in Vulgata velut nomen loci ponitur; sed in hebraico habetur גַּדִּי i. e. Gadita.

GADDIS (Γαδδίζ, Α Γαδδίζ), cognomen Ioannis Machabaei, qui inter quinque filios Mathathiae sacerdotis primus recensetur (1 Mach. 2,2). Apud Flavianum Iosephum (Ant. XII. 6,1): ὁ καλούμενος Γαδδίζ (sed Ant. XIII. 1,2: τὸν καὶ Γαδδῆν λεγόμενον *ed. Niese*); Iosephus igitur finale pro terminatione graeca habuit, sicut etiam Syrus: Gaddi. Respondere videtur nomen גַּדִּי (cf. Num. 13,12 [41]) denominativum a גַּד (fortuna), hinc formatum.

GADER (גַּדֶּר, Γαδέρ), urbs cisiordanica, cuius rex recensetur inter reges 31 a Iosue percussos (Ios. 12,13). Enumeratur una cum Dabir, Herma (Horma), Hered (Arad); hinc in regione australi Palaestinae quaerenda est. Probabiliter eadem est ac Bethgader 1 Par. 2,31. Situs ignoratur neque ullum indicium adest, ex quo cum una ex urbibus Gaderoth, Gador, Gadera, Gedor certo componi possit.

GADEROTH, GIDEROth (גִּדְרוֹת), urbs tribus Iuda in secunda provincia Sephelae (Ios. 15,41; LXX Γεδρώρ Vul-

gata: Gideroth), tempore Achaz regis a Philisthaeis occupata (2 Par. 28,18). LXX Γαληρώ, Vulgata: Gaderoth). Fortasse eadem est quae Cedron (1 Mach. 16,9) et Gedor (1 Mach. 15,39. 40); v. CEDRON (vol. I. col. 797).

GADEROTHITES (גִּדְרוֹתִי, ὁ Γαδαρῶνις) cognominatur Iezabad Beniaminita (1 Par. 12,4 cf. 12,2); eius patria igitur erat Gadera seu Gadera quaedam nusquam alias nominata in tribu Benjamin. Nomen antiquum prae se fert vicus *Djedire* prope Gabaon et Rama (*Survey of West. Pal. Mem.* III. 9). *Keil* in 1 Par. 12,4 cognomen explicat de Gadera tribus Iuda (Ios. 15,36), cum non repugnet aliquas familias extra fines tribus suae habitasse. Vide s. v. GEDOR 2.

GADGAD (גִּדְגָּד, i. e. caverna Gidgad; Vulgata: mons Gadgad, LXX ὄρος Γαδγὰδ), statio Israelitarum in deserto (Num. 33,32), enumerata post Moseroth, Benciaacan et ante Ietebatha. Eadem quattuor stationes ordine nonnihil mutato recensentur Deut. 10,7: Beroth filiorum Iacan, Mosera, Gadgad (גִּדְגָּד, Γαδγὰδ), Ietebatha. Conferri potest *Wādī Ghudhghūdh* ab occidente vallis *Araba* (Riess, Bibel-Atlas Tab. II DEc); hunc silum admittit *Ewald* (Geschichte des Volkes Israel *ed.* 3 II. 284); *Dillmann* ad Num. 33,32 praefert regionem montis Hor.

GADI (גַּדִּי, Γαδδῆς), pater Manahem regis Israel (4 Reg. 15,14. 17).

GADI (2 Reg. 23,36) v. GADDI.

GADOR (גִּדֹר, Γέραρα). Tempore Ezechiae regis Iuda aliqui principes Simconitarum profecti sunt ad introitum Gador usque ad orientem vallis (1 Par. 4,39), ut quaerent pascua gregibus suis et inventis pascuis uberrimis ibidem tabernacula sua fixerunt, postquam Chamitas inde expulerunt. Aliqui coniciunt hanc Gador non differre a Gader urbe reguli Chananaei Ios. 12,13; v. GADER. Attamen lectio LXX Γέραρα (cod. B et A), si praeferrenda est, potius suadet Geraram (*Khirbet Umm Djarrar*) a Gaza meridiem versus sitam in planitie pascuis uberrima; v. GERARA.

GAHAM (גַּחַם, Γαζμ), filius Nachor fratris Abraham, ex Roma concubina genitus (Gen. 22,24). De gente Gaham nihil innotuit. Nachoridae generatim omnes vel saltem plerique circa Hauran incoluisse dicendi sunt (cf. *F. de Hummelauer* ad h. l.). Regionem *Beni Djuhmu* inter fluvios *Yarmūk* et *laboc* sitam, de qua loquitur *I. L. Burckhardt* (*Reisen in Syrien, Palaestina etc. ed. W. Gesenius*, Weimar 1823 l. p. 423 ss. 449), nonnulli cum gente Gaham componunt, sed alii dubitant (*Riehm-Baethgen* *Handwb. des bibl. Altert.* l. 469) vel reiciunt (v. g. *Dillmann* ad h. l.).

GAHER (גַּהֵר, Γαζρ) Nathinaeus, cuius filii duce Zorobabel ex captivitate redierunt (*Esdr.* 2,47; 7,49).

GAIVS (Γάιος). 1. Gaius Macedo, S. Pauli comes, quem simul cum Aristarcho plebs ephesina vi comprehendit et in theatrum secum abripuit (*Act.* 19, 29).

2. Gaius Derbeus, S. Pauli comes, unus ex illis septem, quos Paulus ex tertio itinere apostolico rediturus Troadem praemisit, ut inde ipsum in urbem Ierusalem comitarentur (*Act.* 20,4).

3. Gaio carissimo S. Ioannes epistolam suam tertiam scribit (3 Ioan. 1). Coniiciunt aliqui eundem esse, qui in Vulgata scribitur Caius (vide s. v.).

GALAAD (גַּלְאָד, Γαλααδ). 1. Filius Machir filii Manasse (*Num.* 26,29. 30; 27,1; 36,1; *Ios.* 17,1. 3; 1 *Par.* 2,21. 23; 7,14. 17).

2. Pater Iephthe iudicis (*Iud.* 11,1. 2).

3. Gadita quidam (1 *Par.* 5,44).

4. Galaad (גַּלְאָד, ½ Γαλααδ), terra Galaad, mons Galaad. In Vetere Testamento Galaad sensu latissimo interdum designat totam terram transiordanicam, quatenus ab Israelitis incolebatur, in oppositione ad Chanaan terram cisior-danicam; sensu artissimo regionem inter fluvios *laboc* et *Yarmūk*; sensu autem maxime usitato regionem inter Arnonem et *Yarmūk*. Galaad hoc latiore et maxime usitato sensu accepta in duas partes dividitur per vallem fluvii *laboc* (*Nahr el-Zerqā*), a quo meridiem versus

usque ad Arnonem extenditur regio *Belqā*, septentrionem versus usque ad *Yarmūk* regio *Djebel 'Adjlān*; cf. s. v. **IABOC**. Duae istae partes, in quas tota Galaad per fluvium *laboc* dividitur, aperte distinguuntur (*Dent.* 3,12. 13; *Ios.* 12,2).

Conspectus historiae Galaad breviter adumbrandus est. Montis Galaad prima mentio fit in historia Iacob, quem e Mesopotamia in terram Chanaan revertentem Laban assecutus est in monte Galaad (*Gen.* 31,21 ss.); ea occasione tumulus erectus est, quem Iacob appellavit: acervum testimonii (גִּזְרֵי הַיְדֹשֶׁת, unde nomen

Galaad. Illinc Ismaelitae venerunt, quibus Ioseph venditus est, afferentes aromata, resinam et stacten in Aegyptum (*Gen.* 37,25). Erat terra uberrima ad pastum gregum, in qua Israelitae percussis Amorrhacis multam praedam fecerunt (*Num.* 31,1. 29. 39. 40; *Dent.* 2,36; 3,19. 12. 13. 15); Ammonitae autem, qui ab Amorrhacis ex ea regione pulsati fuerant, ad orientem Galaad circa *laboc* superiorem sedes fixerunt (*Dent.* 3,16), a quibus Deus arma Israelitarum prohibuit (vide s. v. **IABOC** et **IAZER**). Ex tribus refugii urbibus trans Iordanem a Moyse designatis duae erant in Galaad scil. Bosor in planitie tribus Ruben et Ramoth cum addito: in Galaad urbs gaditica (*Dent.* 4,43; *Ios.* 20,8); Ramoth in Galaad levitis de stirpe Merari concessa est (*Ios.* 21,37).

Moysei antequam moreretur, Dominus a Nebo culmine montis Phasga ostendit omnem terram Galaad usque Dan (*Dent.* 34,1); hoc loco Galaad sensu latissimo accipitur, siquidem Dan (Lais-Dan) ad radices montis Hermon sita est. In distributione terrae promissae pars inferior Galaad inter Arnonem et *laboc* seu regnum Schon Amorrhaei regis Hesebon Rubenitis et Gaditis concessa est scil. Rubenitis ab Arnone Hesebon usque, Gaditis a Hesebon usque ad Mahanaim paulo supra *laboc* fluvium (*Ios.* 12,2. 5; 13, 11. 25. 31); pars superior Galaad inter *laboc* et *Yarmūk* fluvios, quae ad regnum Og Amorrhaei regis Basan pertinebat, dimidiatae tribui Manasse attributa est, dummodo advertas Gaditis accen-

sendam esse regionem a laboe Mahanaim usque et totam depressionem Iordanis usque ad mare Galilaeae (Ios. 17,1. 5. 6). Tres illae tribus hereditatem suam transiordanicam ingressae sunt post finitam terrae cisiordanicae subiectionem (Ios. 22,9. 13. 15. 32). In cantico Debborae viluperium adversus Galaad prolatum omnes Israelitas transiordanicos comprehendere videtur (Iud. 5,17). De monte Galaad Iud. 7,3 cf. *F. de Hummelauer* ad h. l. In terra Galaad erant Havoth lair seu oppida lair (v. LAIR). Attamen Amorphaei ibi adhuc praevalebant (Iud. 10, 8) et Ammonitae in Galaad fixerunt tentoria principibus Galaad bellum illaturi (Iud. 10,17. 18). In pugnis Galaaditarum cum Ammonitis primas partes egit Iephth Galaadites (Iud. 11,5. 8. 11. 29). Ammonitis devictis proelium propter querelas Ephraimitarum exarsit, quo Galaaditae occupatis Iordanis vadis fugientes Ephraimitas dialecto agnitos conciderunt (Iud. 12,4 ss.). Inimicitiis autem compositis Galaaditae cum omni Israel in Maspha Benjamin congregati sunt (Iud. 20,1) exceptis habitatoribus Iabes Galaad, qui ob infidelitatem suam gladio percussi sunt (Iud. 21,8-14). Galaaditae denuo ab Ammonitis infestati, sed egregio facinore Saulis apud Iabes Galaad liberati sunt (v. IABES 1). Cuius beneficii memores filium Saulis Isboseth regem agnoverunt (2 Reg. 2,9); quo mortuo Davidi se subiecerunt et artius adiunxerunt, praesertim postquam Ioab urbem Rabbath Ammon expugnavit (cf. 2 Reg. 11,1; 1 Par. 20,1). A facie Absalomis fugitivus David in terram Galaad se recepit ibique in saltu Ephraim prope Mahanaim Absalom regno et vita privatus est (v. EPHRAIM 4). Census regni davidici a Ioab exceptus terram Galaad comprehendebat (2 Reg. 24,6). A Salomone Galaad (latissimo sensu accepta) in tres dividebatur praefecturas (3 Reg. 4,13. 14. 19). Elias Thesbites erat de habitatoribus Galaad (3 Reg. 17,1). Achab regnante Ramoth Galaad in potestate regis Syriae definebatur; quam urbem cum recuperare vellet, ipse Achab in proelio occubuit (3 Reg. 22,3 s.; 2 Par. 18,2 s.). In diebus Iehu omnis Galaad a Hazael rege Syriae vastata (4 Reg. 10, 32. 33; Am. 1,3), sed a Iero-

boam II. regno Israel restituta est (cf. 4 Reg. 14,23). In diebus Phacee regis Israel Theglathphalasar incolas terrae Galaad in captivitate abduxit (4 Reg. 15,29; cf. 1 Par. 5,6). Post exsilium Galaad ab ethnicis quoad maximam partem habitabatur, attamen Iudaei quoque ex captivitate reducecs salis magno numero illis intermixti erant, ut apparet ex narratione bellicae expeditionis, qua Iudas Machabaeus et Ionathas Iudaeos in Galaad iugo gentium liberarunt et in Iudaeam adduxerunt (1 Mach. 5,9 s.); per Galaaditum etiam Tryphon dux Syrorum, cum nihil contra Ierusalem valeret, in Syriam rediit (1 Mach. 13,22 in textu graeco).

Reliqua quae in S. Scriptura de Galaad referuntur, multum conferunt ad huius regionis descriptionem. Greges Israelitarum in Galaad multiplicabantur et usque ad desertum Euphratis pascebantur (1 Par. 5,9. 16). Infestationes Arabum non deerant; tempore Saulis tribus arabica Agarenorum a Rubenitis feliciter reiecta et sedibus pulsa est (1 Par. 5,10); aliquo posteriore tempore iidem Agareni denuo a Ruben, Gad, dimidia tribu Manasse devicti sunt (1 Par. 5,19-22). Tempore Davidis Galaaditae ob fortitudinem bellicam celebres erant (1 Par. 26, 31). David terram Galaad suam esse magna cum fiducia enuntiat (Ps. 59[60],9; 107[108]9). A Salomone coma Sponsae, cuius caput monti confertur, describitur defluens quasi greges caprarum cingentium verticem montis Galaad (Cant. 4,1; 6,4[5]). Ieremias celebrat resinam Galaad (Ier. 8,22; 46,11) i. e. resinam lentisci seu mastichen; idem propheta arcem regiam Iuda appellat Galaad (Ier. 22,6) vel propter silvas Galaad excelsas et magnificas vel propter unguenta et aromata ex herbis pascuorum Galaad confecta. Galaad recensetur inter regiones, in quibus populus Israel post divinam de Babylone ultionem liberatus pasce-tur et saturabitur (Ier. 50,19). Eiusdem mentio fit Ez. 47,18, ubi propheta Iordanem terrae sanctae terminum orientalem definit. In regione Galaad (vel in urbe Ramoth Galaad ex opinione multorum interpretum) Osee increpat cultum idololatrium vel si mavis idolorum fabri-

cationem et sanguinis maculam i. e. caedes, oppressiones (Os. 6,8; 12,11). Cruditates Syrorum (Hazeel) in Galaaditas plaustris ferreis discissos atque dissectos et Annonitarum eiusdem fortasse temporis in praegnantibus Galaad perstringit Amos (1,3. 13). Latam novae theocratiae diffusionem, quae domui Iacob i. e. Iudae et Benjamin promittitur, illustrat illud: Benjamin possidebit Galaad (Abd. 19). Excellens sanctitas coetus theocratici pascuis Carmeli, Basan, Galaad fertilissimis confertur (Mich. 7, 14). Multorum denique exsulum reditu terra Galaad habitatoribus ita implenda esse praedicatur, ut ultra terminos olim occupatos sedes sint fixuri (Zach. 10,10).

Uterior historia Galaad ex scriptoribus profanis supplenda est. Iam supra vidimus Iudaeos a gentibus oppressos ex Galaad in Iudaeam reductos esse a Iuda Machabaeo (cf. 1 Mach. 5,45). Postea Iudaei iteratis vicibus bellum regioni Galaad intulerunt. Iam Ioannes Hyrcanus I. (135-105), qui Simoni Mach. succedebat, illuc profectus Medabam urbem post sex menses obsidionis cepit (*Flav. Jos.* Ant. XIII. 9,1; Bell. iud. I. 2,6). Alexander Iannaeus (104-78) urbes Gadaram et Amathuntem expugnavit (Ant. XIII. 13,3; Bell. iud. I. 4,2), altera expeditione Galaaditis tributum imperavit et Amathuntem castellum destruxit, sed ab Obeda Arabum rege in angustias redactus fugitivus Hierosolyma rediit (Ant. XIII. 13,5; Bell. iud. I. 4,3. 4); felicius per tres annos (84-81 a. Chr.) bellum renovans urbes galaaditicas Pellam, Dium, Gerasam expugnavit et victor Hierosolymis cum honore exceptus est (Ant. XIII. 15,3; Bell. iud. I. 4,8); diem supremum obiit in Galaad ante muros Ragabae castelli, quod bello iterum renovato obsidebat (Ant. XIII. 15,3; Bell. iud. I. 4,8). Sed iam regnante Aristobulo II. (69-63) Pompeius urbes transiordanicas a Iudaeis aetate machabaeica subactas, ut Gadaram, Pellam, Dium, libertate donavit et provinciae Syriae attribuit (Ant. XIV. 4,4; Bell. iud. I. 7,7). Regnante Hyrcano II. (63-40) Gabinius proconsul Syriae Palaestinam in quinque synedria seu, ut videtur, conventus iuridicos distribuit, quorum capita erant eis Iordanem Ierusalem, Gazara, Iericho, Sepphoris, trans-

Iordanem Amathus (Ant. XIV. 5,4; Bell. iud. I. 8,3; pro Gazara Iosephus utroque loco citato scribit *Gadara*, sed de Gadara urbe hellenistica trans Iordanem a Pompeio provinciae Syriae attributa et libertate donata non esse sermonem per se patet). Mortuo Herode Magno, cui etiam Peraea parebat, eius filius Herodes Antipas Galilaeam et Peraeam obtinuit (Ant. XVII. 11,4), quae duae partes Beersoli veluti cuneo injecto distinebantur. Peraea autem eiusdem fere extensionis erat ac Galaad antiqua; termini enim Peraeae erant ab occidente Iordanis fluvius, a meridie Machaerus paulo supra Armonem, ab oriente Philadelphia seu Rabbath Ammon, a septentrione Pella (Bell. iud. III. 3,3); rectius tamen fines Peraeae septentrionales usque ad *Yarmūk* fluvium extenduntur, quia Gadara (hodie *Umm Qeis* seu *Mqeis*) metropolis Peraeae ab eodem Iosepho dicitur (Bell. iud. IV. 7, 3.)

Peraea a Iosepho describitur pleraque quidem aspera atque deserta et agrestior, quam ut fructus mansuetiores alat, landatur tamen ab eodem propter solum molle et admodum ferax, irrigatum torrentibus e proximis montibus multisque aquae perennis fontibus, consilium variis arboribus, maxime vero oleis, vineis, palmis (Bell. iud. III. 3,3). Ruinae urbium aediumque romanarum, quae hodie in terra transiordanica cernuntur, florentissimum eius regionis statum aetate romanorum imperatorum fuisse demonstrant (*Baedeker-Benzinger*, Palaestina und Syrien ed. 3 p. 161. 164 ss.).

5. Galaad urbs agnoscitur a multis interpretibus Ps. 6,8 et 12,11, dum alii non urbem, sed regionem Galaad intellegunt. Si prius, erit Ramoth Galaad, quam vocem vide; cf. *Knabenbauer* ad Os. 6,8. Aliqui cogitant de ruinis *Djil'ūd*, quae 10 km ab *el-Salt*, alii de ruinis *Djil'ūd*, quae 13 km ab *el-Salt* aquilonem versus inveniuntur, alii de labes Galaad.

De aliqua urbe nominis Galaad Iud. 10,17 mentionem fieri nulla ratio suadet. Neque Iud. 12,7 de aliqua urbe Galaad, in qua Iephthe sepultus sit, videtur interpretandum esse, sed potius cum *Bonfre-*

rio vertendum : in urbe sua Galaaditidis (cf. *F. de Hummelauer* ad h. l.).

GALAADITIS (Γαλααδίτις) 1 Mach. 5,17 s. et 13,22 appellatur regio transiordanica, quae alias (1 Mach. 8,9. 53 et alibi in Vet. Test.) terra Galaad designatur.

GALAL (גלל, Γαλαάλ). 1. Levita de filiis Asaph, incola Ierusalem post captivitatem (1 Par. 9,15).

2. Levita de stirpe Idithun (1 Par. 9,16; Neh. 11,17; LXX Neh. 11,17 nomen omittunt).

GALALAI (גלל; LXX pro nominibus Malalai, Galalai, Maai corrupte legunt Γαλαί, Γαμά, Αίτα), levita et musicus in dedicatione muri Ierusalem (Neh. 12,35[36]).

GALATAE (Γαλάται), nomen recentius pro antiquiore Κέλται vel Κέλται. iam ab ineunte saeculo quarto a. Chr. multae turbae celticae, sedibus suis in Gallia relictis; partim in Italiam irruerant, partim in Pannonia et Illyria nova sibi domicilia quaesierant. Exinde in Macedonia et Graecia praedam agebant; aliquae turmae, viginti millia hominum ducibus Leonorio et Luthario, praedae faciendae causa Byzantium perrexerunt et inde in Asiam minorem transfretarunt ope Nicomedis regis Bithyniae qui iis uti volebat in bello contra fratrem suum (a. 279 a. Chr.). Ab iis adiutus Nicomedes victoriam reportavit. Galatae autem in tres tribus divisi, Troemi, Tolistoboi, Tectosagi, incursionibus suis Hellespontum, Aeoliam, Ioniam et mediam Asiae minoris regionem devastabant, donec tandem ab Attalo I. rege Pergami gravi clade afflicti c. annum 229 in eo terrae tractu, cui ab iis nomen est Galatia, stabiles figere sedes cogerentur. Ita factum est, ut magna pars Phrygiae et aliquae regiones Cappadociae et Ponti nomen sortirentur Galatiae. Regio erat fertilis, irrigata ab Haly et Sangario fluminibus. Troemorum tribus occupabat partem ad orientem et septentrionem vergentem, cuius urbs praecipua erat Tavium; Tectosagi in media parte, in qua urbs Ancyra erat, sedem fixerunt; Tolistoboi regionem ad occidentem et me-

ridiem spectantem, cui caput Pessinus erat, sibi elegerunt. Cum Celtis sese adiunxissent etiam Galli Graecique, regio illa etiam Gallograecia vocabatur. In bello Antiochi Magni contra Romanos regi opem tulerant; quare Manlius Vulso ditionem eorum ingressus eos devicit (anno 189 a. Chr.) et reipublicae romanae subiecit (1 Mach. 8,2) ita tamen, ut propriis suis legibus regerentur. Notum est duos Galatarum principes, Deiotarum et Amyntam, titulo regio a Romanis esse ornatos. Immo Amyntas adeo usus est favore Antonii, dein Augusti, ut praeter Galatiam etiam Pisidiam, Isauriam et partes Lycaoniae, Pamphyliae, Phrygiae, Ciliciae regno suo additis acciperet. Verum eo mortuo Romani ditionem eius exceptis partibus Pamphyliae et Ciliciae in provinciam romanam, cui Galatiae nomen inditum est, converterunt (a. 25 a. Chr.); Ancyra urbs facta est sedes propraetoris.

Non defuerunt qui Galatas originis germanicae fuisse contenderent, ita ut epistula S. Pauli ad tribum germanicam scripta ab iis censeatur; ex catholicis *Hug* in eam concessit sententiam, complures ex protestantibus: *Olshausen, Baumgarten-Crusius, Rückert, Wieseler, Holsten, Meyer, Hilgenfeld*. Verum haec opinio a nullo qui archaeologiae, philologiae, rebus celticis et germanicis studium suum impendit sustinetur; quare merito derelicta est, ita ut non opus sit argumenta quae pro ea prolata sunt refutare et ostendere pluribus, veteres, uti Livium, Iustinum, Strabonem, eos semper Gallis vel Celtis accensuisse, a Germanis distinxisse. Utrumque satis ostenderunt *Grimm* in *Studien u. Kritiken* 1876 p. 211 ss.; *Hertzberg* ibidem 1878 p. 625; *Cornely*, *Introd.* III. p. 417. — Celtis obicit Caesar mobilitatem et levitatem ingenii, subita et repentina consilia, temeritatem innatam, ut levem auditionem habeant pro re comperta (Bell. gall. 2, 1; 3,8; 7,42); quam indolem eos cum initio rei christianae haud penitus exuisse, epistula S. Pauli sufficienter demonstratur.

I. KNABENBAUER.

GALATIA (Γαλατία), etiam Gallograe-

cia vocatur; vide s. v. GALATAE. Ex iis quae de Galatia exposita sunt, apparet Galatiam usurpanti sensu strictiore et latiore. Illo sensu complectitur regionem Asiae minoris, quae sit continis Paphlagoniae, Ponto, Cappadociae, Phrygiae, Lycaoniae, Bithyniae i. e. Galatia proprie dicta a Galatis potissimum inhabitata. Sensu latiore designat provinciam illam quam Romani Galatiam appellabant, ita ut praeter Galatiam propriam etiam illas complecteretur partes quae regno Amyntae additae erant, scil. partes Lycaoniae, Pisidiae, Pamphylicae, Isauriae. Unde quaestio orta est, sintne « ecclesiae Galatiae » quibus epistolam scribit apostolus, ecclesiae Galatiae proprie dictae, an potius ecclesiae Lycaoniae, Pisidiae, Pamphylicae, quas apostolus in primo itinere apostolico fundaverat (Act. 13,13 s.; 14,6. 23). Plerique priorem tenent sententiam, quae ipsa appellatione, qua eos utpote Galatas alloquitur, satis commendatur; eiusmodi enim allocutio apte iis solum fit, qui natione sunt Galatae. Neque verum est, Paulum semper adoptare in nominibus regionum morem loquendi romanum; nam Syria Gal. 1,21 non adhibetur eo sensu quo provincia Syriae apud Romanos usurpatur. Insuper in ipsis monumentis publicis quae a magistratibus romanis condita sunt Galatia adhibetur non solum de provincia romana, verum saepius de regione Celtarum (exempla praebet *Sieffert* in comment. ep. ad Gal. p. 40).

Nihilominus alii, e recentioribus *Perrot*, *Renan*, *Hausrath*, *Weizsaecker*, *Zahn*, *Wendt*, *Jacobsen* (cf. *Sieffert* l. c. p. 6), *Cornely* (Introduct. III. ed. 2 p. 416 s.), *Ramsay*, *V. Weber*, *Belsér*, affirmant nomine Galatiae apud S. Paulum designari Lycaoniam etc.: quorum argumenta vide apud *Cornely* l. c. Contra eam sententiam scripserunt *Grimm* l. c., *Aager*, *Wieseler*, *Holsten*, *Sieffert*.

S. Petrus priorem suam epistolam dedicat electis advenis dispersionis Ponti, Galatiae, Cappadociae, Asiae et Bithyniae (4,1), unde tamen non sequitur eum has ecclesias fuisse; id quod ipsa epistula excludi videtur (cf. 4,12. 23; 3,12). Galatiae regio, Γαλατική χώρα,

Act. 16,6 et 18,23, de Galatia proprie dicta erit intelligenda. Nam postquam *Derben* et *Lystram*, civitates Lycaoniae (Act. 16,1; cf. 14,6) visitavit, Phrygiam et Galatiae regionem pertransiit. Frustra contrarium contendit *Ramsay*, contra quem cf. *Expositor* 1894.

I. KNABENBAUER.

GALBANUS (in Vulgata; alias *galbanum*), hebr. קֶבֶבִּים, γαλβάνη, nominatur

inter quattuor aromata ad praeparandum thymiana sanctum necessaria (Ex. 30, 34) iterumque inter praeconia sapientiae (Eccli. 24,21 gr. 13), ubi eadem quattuor aromata cum aliis commemorantur. *S. Hieronymus* in priore loco cum LXX aliisque versionibus « galbanum boni odoris » coniungit: quod neque naturae galbani satis conforme videtur neque lectioni massorethicae, quae accentu distinctivo *Zāqef qatōn* haec duo membra disiungit; at accipiendo hebr. קֶבֶבִּים non pro odore bono, sed media significatione pro *aeri* odore, fortassis loco textus massorethici cum antiquis versionibus legi poterit הָלֶבֶן הַקֶּבֶבִּים (cf. *Michaelis*, Supplem. ad lex. hebr. 754 s.).

Nomen hebraicum galbani ab antiquis versionibus fere retinetur, et a recentioribus communiter admittitur significare γαλβάνην s. μετώπιον Graecorum et galbanum s. stagonitum Latinorum, scilicet succum seu lacrimam ferulae (γάργηρος) vel panacis (πανάκους) in Syria, ac praesertim in Amano monte nascentis (*Theophr.* Hist. pl. IX. 4,2; 7,2; 9,2; *Dioscur.* Mat. med. 3,87 al. 97; *Plin.* XII. 25,126), quae frequenter commemoratur et ad varias medicinas, ad sufflitum, praesertim serpentibus noxiisque animalibus fugandis, atque ad alios usus inserviebat (*Theophr.*, *Diosc.*, *Plin.* II. cc.; *Vergil.* Georg. 3,415; *Columella* VIII. 5,18; *Plin.* XIX. 10,180; XXIV. 5,21 s.; *Pallad.* I. 33,8, al.). Non quidem suavis, sed gravis potius odoris describitur, verum etiam ab Aegyptiis aliisque populis unguentis addebatur (*Plin.* XIII. 1,8), sive « ad continentium odorem in corpore » (*Plin.* ib.), sive ut « aromatum aliorum odorem acueret » (*M. Hiller*, Hierophyt. I. 430).

De planta ipsa galbanifera diu haesitatum est, atque omnino erronee *Bubon galbanum* Linné ex Africa meridionali oriundum etiam nunc ab aliquibus auctoribus creditur. Eius loco alia potius planta vere galbanifera atque in regione orientali indigena, medio fere saeculo elapso a *Buhse* ad radices et in latere australi montis *Demavend* in Persia boreali reperta, a recentioribus communiter tamquam galbani biblici parens admittitur, scilicet *Ferula galbaniflua* Boissier et Buhse. Pars inferior caulis crassi et basis petiolorum huius plantae ex ordine *Umbelliferarum* gummi galbanum dictum exsudant.

Cf. *B. Albert. Magn.* De vegetabilibus VI. 1,21 ed. *C. Jessen* 392 s.; *I. H. Ursinus*, Arboreti bibl. cont. 236 s.; *O. Celsius*, Hierobot. I. 267-71; *I. D. Michaelis*, Supplem. ad lex. hebr. 753-6; *E. F. K. Rosenmüller*, Bibl. Alterth. IV. 3,151-3; *G. B. Winer*, Realwörterb. I. 386; *E. Boissier*, Flora orient. II. 988; *L. Haynald*, Szentiräsi Mezgak es Gyantak termönövényei (De plantis biblicis gummiiferis), Kolozsvárt 1879, 32-6, qui inter tabulas egregiam imaginem coloribus pictam speciei affinis (*Ferula erubescens* s. *rubicaulis* Boissier) praebet; *I. Löw*, Aram. Pflanzennamen n. 115; *P. Schegg*, Bibl. Archaeol. 219 s.

L. FONCK.

GALEA. Cum caput militis galea esset legendum et protegendum, galeae ex aere conficiebantur. Ita saltem statuitur de galea Goliath (1 Reg. 17,3), de galea Saul (1 Reg. 17,38) et de galeis quas milites Antiochi Eupatoris habebant (1 Mach. 6,35). Quia 2 Par. 26,14 narratur Oziam regem cuncto exercitui praeparasse galeas, aliqui concluderunt ante eum non milites gregarios, sed solum reges et duces iis usos esse. At id certe ex eo loco non sequitur. Nam alias dicendum esset et clypeos et hastas et loricas et arcus et fundas militibus antea defuisse.

GALEM (Γαλέμ, Α Γαλλίμ) recenseatur inter urbes quintae provinciae montis Iuda, quae desideratur in textu massorethico et Vulgata, sed conservata est in LXX Ios. 15,39 et oppida prope Bethlehem et Ierusalem continet. Coniicitur esse *Beit Džālā* prope Bethlehem (*Sur-*

vey of West. Pal. Mem. III. 20; *Riess*, Bibel-Atlas ed. 3 p. 13).

GALGAL, GALGALA (גִּלְגָּל i. e. rota a rad. גָּלַ = volvere; Γάλαγλα forma pluralis), nomen complurium locorum Palaestinae.

1. Gulgala contra orientalem plagam urbis Iericho, ubi Israelitae castra posuerunt prima nocte post transitum Iordanis et duodecim lapides, quos de Iordanis alveo sumpserant, erexerunt (Ios. 4,19. 20); ibidem populus, qui in deserto natus erat, circumcisis est in colle praepitiorum, a quo eventu nomen loci vocatum est Gulgala secundum verbum Domini ad Iosue: Hodie abstuli (גִּלְגָּל *derolvi*) opprobrium Aegypti a vobis (5,9); ibidem primum phase in terra Chanaan celebratum est (5,10). In Gulgala erant castra Israelitarum eo tempore, quo partes Palaestinae meridionales subgebantur (9,1; 10,6. 7. 9. 15. 43; 14,6). De eadem Gulgala agitur Iud. 2,1. Tempore Saulis inter praecipua sanctuaria erat Gulgala; illuc enim Samuel quotannis ibat, ut Israel iudicaret (1 Reg. 7,16); ibi holocausta et victimae pacificae offerri consueverant (1 Reg. 10,8; 11, 14. 15; 13,4-15; 15,12. 21. 33). David rex mortuo Absalome ex terra transiordanica rediens Iordane traiceto Gulgalam venit, quo omnis Iuda regi occurrerat (2 Reg. 19,15. 40). Vetus huius loci religio Gulgalam, ut videtur, superstitioni et idololatriae commendavit, sin aliter ad hanc Gulgalam referenda sunt Os. 4,15; 9,15; 12,11; Am. 4,4; 5,5, quibus locis principales idololatriae sedes commemorantur; alii tamen his locis oppidum a Silo non longe dissitum (vide infra n. 3) intellegunt, ut notat *Knabenbauer* ad Os. 4,15. Iter Israelitarum de Setim usque ad Gulgalam tamquam insigne Dei beneficium in memoriam revocatur Mich. 6,5.

Notandum est in textu sacro nihil haberi, quo Gulgala urbs vel oppidum fuisse suadeatur neque eam ullibi sacerdotibus vel levitis attribui, ut Bethel, Sichem etc.; erat locus castrorum et propter religionem venerandus. Quare cautius videntur recipienda esse, quae

de situ loci tradunt Flav. Iosephus (Ant. V. 1,4) : 50 stadiis a Iordane, 40 stadiis a Iericho, Eusebius et S. Hieronymus (Onom. ed. Lag. 233, 65; 102, 25) : 2 mil. pass. seu circiter 16 stadiis a Iericho (cf. l. c. 243, 88. 94; 126, 14. 22. 29). Eius nominis locum anno 1865 detexit H. Zschokke scil. Tell Djildjāl septentrionem versus a Wādī Qelt et 45 minutis orientem versus a Rihā, quem situm plerique pro Galgala admittunt.

Cf. H. Zschokke, Beiträge zur Topographie der westlichen Iordanane 1866 p. 26 ss.; Pal. Expl. Fund. Quart. Stat. 1874, p. 36; 1894, p. 182; Survey of West. Pal. Mem. III. 173-175; 181-184; 191; Guérin, Samarie I. 117 ss.; Liévin de Hamme, Terre Sainte ed. 4 II. 292; F. Buhl, Alt. Pal. 1896, p. 180.

Sed alium situm pro Galgalis postulare videtur descriptio finium Iuda (Ios. 15,7) scil. ex adverso ascensionis Adommim; in descriptione termini meridionalis tribus Benjamin (Ios. 18,18) pro Galgalis scribitur גלילית (Γαλιλάθ, Vulgata : usque ad tumulos). Quare F. de Hummelauer (Comm. in Ios. p. 149. 150. 333) Galgala quaerit in faucibus Iericho, ubi duae de montibus valles iunguntur et iunctae in Arabam effunduntur : Wādī el-Qelt et Wādī Tal'at el-Dām seu ascensus Adommim; duriorum autem illam expressionem : in extremitate orientis Iericho (Ios. 4,19) emendandam esse coniecit : in extremitate faucium (ביער) Iericho. Falendum est has fauces, quae aquas habebant abundantes facilemque in montana accessum, aptiores fuisse pro castris, ubi Hebraei pluribus annis substituri essent, quam agrum inter Iericho et Iordanem intolerabilibus aestatis ardoribus expositum. Accedit, quod Galgala Iud. 3,19 ex contextu ad occidentem Iericho quaerenda est, siquidem Aod index a Iericho, ubi Eglon rex Moab residebat, locum idolorum seu Posilim prope Galgala praeteriens in Seirath montis Ephraim aufugit.

2. Rex gentium Galgal recensetur inter reges a Iosue percussos Ios. 12,23. Hanc urbem Eusebius et S. Hieronymus (Onom. ed. Lag. 244, 31; 127, 24) agnoscunt in villa Galgalis 6 mil. pass. ab Antipatride contra septentrionem.

Quodsi Antipatris hodierno Rūs el-'Ain correspondet, vicus Galgalis erit Djildjāliye vel ex opinione quorundam alter vicus Qildjiliye paulo magis ab Antipatride septentrionem versus distans. De eadem Galgala (Djildjāliye) in planitie Saron interpretandus est textus 1 Mach. 9,2, ut diximus s. v. ARBELA.

Verum LXX Ios. 12,23 aliam interpretationem suggerunt vertentes βασιλέα Γεζιζ; Γαλιλάζ. Unde F. de Hummelauer ad h. l. pro גלגל גזים corrigendum putat גלגל גי ים = vallis maris apud Gilgal i. e. vallis inter mare Cenereth et montes Galilaeae ad occidentem maris; גלגל in hac interpretatione est aut altera forma pro גליל aut eadem forma depravata.

3. Galgala, unde Elias et Eliseus descenderunt in Bethel, ut per viam Iericho Iordanem traicerent brevi ante Eliae assumptionem (4 Reg. 2,4), non potest esse Galgala in planitie Ierichuntina, sed a plerisque agnoscitur vicus magnus Djildjilyā inter Bethel et Sichem nec procul a Silo ex montanis Ephraim supereminens; etsi enim Djildjilyā (744 m) altitudine a Bethel (881 m) superetur, tamen ab isto vico montano descensus fiebat in Wādī el-Djīb, ut perveniretur Bethel versus. Eadem Galgala erat sedes scholae prophetarum; ibidem Eliseus pulmenti amaritudinem farina infusa abstulit (4 Reg. 4,38). Eadem quoque a plerisque agnoscitur Galgala, quae Deut. 11,30 e regione montium Garizim et Hebal esse dicitur; alii tamen (ut Dillmann ad h. l.) animadvertunt nomen Gilgal (i. e. circulus lapidum) compluribus per regionem locis editis et saxosis inditum esse potuisse. Probabilius etiam domus Galgal, quae Neh. 12,29 inter regiones recensetur, ex quibus cantores ad dedicationem muri Ierusalem confluxerunt, eadem est cum hac Galgala Eliae et Elisei.

GALILAEA (Γαλιλαία). In Vet. Testamento Galilaea (Γαλιλαία) legitur, ubi in hebraico גליל i. e. circulus, regio a rad. גלל (volvere) vel forma pluralis גלילות i. e. regiones, termini. Geliloth

Philisthaeorum commemorantur Ios. 13, 2 (sed v. *F. de Hummelauer* ad h. l.) et Ios. 3, 4 (hebr. 4, 4). Galil Ios. 20, 7; 21, 32; 1 Par. 6, 76[61] designat regionem seu planitiem, in qua Cedus Nephthali sita erat; cf. 1 Mach. 11, 63 : Κζδης ἡ ἐν τῇ Γαλιλαίᾳ. Galil 3 Reg. 9, 11 vocatur regio septemtrionalis tribus Nephthali cum viginti urbibus, quas Salomon Hiram regi Tyrionum dono dedit. Eadem Galil 4 Reg. 15, 29 tamquam distincta regio enumeratur inter regiones, quarum incolas Theglathphalasar in Assyriam transtulit. Haec regio maxime septemtrionalis Palaestinae, cuius termini accurate non definiuntur, quoad magnam partem a gentilibus (Phoenicibus) habitabatur, unde apud Is. 9, 1 [8, 23] vocatur גליל הגוים, Galilaea gentium; cf. Matth. 4, 15. Tempore exsilii tota illa regio ab ethnicis occupabatur neque postea explicitè docemur Israelitas reduces ibi sedem fixisse. Vestigium distinctionis in Galilaeam superiorem et inferiorem apparet Tob. 1, 1 et Iudith 1, 8 (graece).

Aetate machabaeica Galilaea iam clare a Iudaea et Samaria distinguitur, sed paucos tantum Iudaeos numerabat ethnicis intermixtos et ab illis oppressos, quos Simon Machabaeus a iugo gentium liberatos secum in Iudaeam proprie dictam abduxit (1 Mach. 5, 14 s.). Eodem tempore Palaestina in quattuor partes administrativas a Seleucidis divisa erat scil. Iudaeam, Samariam, Coelen-Syriam, Phoenicen (*Flav. Ios.* Ant. XII. 4, 1. 4); Galilaea, quae non nominatur, vel ad Coelen-Syriam vel ad Phoenicen accenseri merito creditur. In Galilaea Ionathas Machabaeus Syros devicit (1 Mach. 11, 63) et in dolos a Tryphone paratos incidens captus est (12, 47. 49). Cum praeterea eo tempore tres civitates (πόλεις) ex Samaria Iudaeae proprie dictae attributae fuisse legantur (1 Mach. 10, 30. 38), omnino probabile est Samariam et Galilaeam cum re publica Iudaeorum nonnisi a Ioanne Hyrcano (135-105) eiusque successoribus coniunctas fuisse. Hyrcani filius Aristobulus I. (105-104), quamvis Graecorum amator, tamen eo praesertim amore

patriae manifestabat, quod Iudaea debellata multam eius regionis partem Iudaeae addiderit et incolas, si in sua regione manere vellent, circumcidi et ad Iudaeorum leges vivere coegerit (*Flav. Ios.* Ant. XIII. 11, 3 ex auctoritate Strabonis et Timagenis); vix dubium est, quin haec de Galilaea imprimis dicta valeant. Anno 47 a. Chr. Antipater a Iulio Caesare procurator Iudaeae constitutus Herodem filium suum Galilaeae praefectum (σπαρταγόν) constituit (*Ant.* XIV. 9, 2; *Bell. iud.* I. 10, 4) eratque Galilaea pars regni, quod Augustus Herodi confirmavit. Herode I. mortuo Herodes Antipas tetrarcha Galilaeae et Peraeae constitutus est (*Ant.* XVII. 8, 1; 11, 4; *Bell. iud.* II. 6, 3), qui has regiones usque ad a. 39 p. Chr. obtinebat; cf. *Luc.* 23, 7. Cum autem a Caligula imperatore regno privatus in exilium mitteretur, Herodes Agrippa I. Galilaeam cum Peraea obtinuit (*Ant.* XVIII. 7, 1. 2; *Bell. iud.* II. 9, 6) et usque ad mortem suam (44 p. Chr.) regebat. Ab illo autem tempore tota Palaestina, sicut iam antea Iudaea et Samaria, a procuratoribus romanis, qui legalis Syriae parebant, administrabatur (*Ant.* XIX. 9, 1. 2; *Bell. iud.* II. 11, 6). Is rerum status permansit usque ad bellum iudaicum; sed aliquae partes Galilaeae et Peraeae a Nerone imperatore Herodi Agrippae II. concedebantur, videlicet Tiberias et Taricheae in Galilaea, Iulias cum quattuordecim vicis in Peraea (*Ant.* XX. 8, 4; *Bell. iud.* II. 13, 2).

Tempore Christi Galilaea erat provincia septemtrionalis Palaestinae cisior-danicae (*Luc.* 17, 11; *Act.* 9, 31), quae in S. Scriptura, apud Flavium Iosephum et in Mishna constanti usu loquendi distinguitur a Iudaea et Samaria, sicuti etiam a Peraea. Complectitur territoria Aser, Zabulon, Nephthali et partem septemtrionalem Issachar. Termini sunt a meridie Samaria seu montana Ephraim, ab oriente Iordanis et lacus Tiberiadis seu mare Galilaeae (cf. *Matth.* 4, 18; 15, 29; *Marc.* 1, 16; 7, 31; *Io.* 6, 1), a septemtrione Leontes fluvius, supra quem mons Libani assurgit, ab occidente ora phoenicia seu fines Tyri et Ptolemaidis. Intra hos limites Flavius Iosephus (*Bell.*

ind. III. 3,1) distinguit Galilaeam superiorem et inferiorem.

Galilaea superior secundum Flav. Iosephum protenditur a Thella vico Iordani proximo occidentem versus usque ad Meroth et a Baea vico Tyrionum finibus vicino meridiem versus usque ad Bersabe, qui vicus superiorem ab inferiore Galilaea distinguit. Quinam illi vici sint, vix eum aliqua probabilitate dirimi potest. In Mishna (Shebiith 9,2) limes Galilaeae superioris et inferioris assignatur Capharanania seu vicus Hanania, hodie *Kefr 'Anān* ab Accho (Ptolemaide) recta linea orientem versus nec procul ab *el-Rāme* et *Şafed*. Superiorem igitur Galilaeam fere totam implet mons Nephthali (Ios. 20,7), qui a Libano iuxta vallem Leontis usque ad lacum Tiberiadis extenditur, orientem versus abrupte ad Iordanem descendit, occidentem versus multis vallibus hac illac sine certo ordine intersecatur et paulatim ad oram maritimam tribus Aser deprimitur. Hinc facile intellegitur, cur viae publicae Galilaeam superiorem utpote imperviam circuierint, ut magna via quae a Tyro Caesaream Philippi ducit et altera quae a lacu Tiberiadis inter montem Nephthali et Iordanem ad aquilonem vergit. Urbs principalis est *Şafed*, a qua tertia via per Gischalam (*el-Djish*) et Cedus Nephthali ad angulum rectum Leontis fluvii ducit. Aquilonem versus eminent *Djebel Hānīn* (900 m) et *Djebel Djamle* (800 m), meridiem versus *Djebel Şafed* (838 m) et mons altissimus terrae eisiordanicae *Djebel Djermag* (1199 m); cf. Zeitschr. d. D. Pal.-Ver. XIII. 1890 Tab. 2.

Galilaea inferior secundum Iosephum l. e. extenditur a Tiberiade occidentem versus usque ad Chabulon (Χαβουλόων *ed. Niese*, nunc *Kabul*; v. CABUL) in confinibus Ptolemaidis et ab Exaloth (Ἐξάλωθ *ed. Niese*, hodie *Iksal*; v. CASALOTH et CESELETHIABOR) in planitie Esdreton septentrionem versus usque ad Bersabee. Alibi (Ant. XX. 6,1; Bell. ind. III. 3,4) terminum meridionalem Galilaeae inferioris fuisse dicit Gineaam (hodie *Djenin*; v. ENGANNIM 2) vicum in confinibus Samariae et Galilaeae. Indolem Galilaeae inferioris variae planities fru-

giferae et pulcherrimae, altitudine inter se distinctae, determinant. Prima est planities Ramae (*el-Rāme*) circa 400 m altitudinis habens, de qua per iuga collium descensus fit ad planitiem Ptolemaidis. Primae meridiem versus adiacet planities secunda *Sahel el-Baffauf* (139-156 m) seu magna planities Asochis nuncupata (Vita 41) a vico hodie ignoto. A planitie Asochis occidentem versus fit descensus ad tertiam planitiem intra Sepphorim, Bethlehem zabuloniticam et *Shefā 'Amr* sitam, ex qua *Wādī el-Melek* versus Cisonem inferiorem decurrit. A planitie Asochis orientem versus assurgit *Djebel Tur'ān* (341 m), a quo fere usque ad litus lacus Genesareth inferioris se extendit planities vulcanica *Sahel el-Ahmā* (circa 300 m); ad septentrionem *Sahel el-Ahmā* sunt cornua *Haffīn* (316 m) prope vicum *Haffīn* (113 m), ubi ex traditione posteriore sermo montanus Christi Domini habitus esse dicitur. Inter Sepphorim et Cisonem iuga collium ascendunt usque ad altitudinem *Nebī Sa'in* (488 m) et *Djebel el-Sih* (560 m) circa Nazareth (349 m), a quibus orientem versus seimetus prostat mons Thabor (562 m). Denique a collibus circa Nazareth et monte Thabor usque ad montana Ephraim seu Samariam se extendit magna planities Iezrael seu Esdreton, ex qua duae valles ad depressionem Iordanis ducunt, scil. *Wādī Sharrar* inter montem Thabor et Hermon minorem et *Wādī Djalūd* inter Hermon minorem et montes Gelboe in magnum campum Bethsan seu Seythopolis desinens. Ab occidente hanc infimam Galilaeae partem terminal Carmelus « olim quidem Galilaeorum, nunc autem Tyrionum mons » (Flav. Ios. l. c.). Cf. Zeitschr. d. D. Pal.-Ver. XIII. 1900 Tab. 2.

Galilaea inferior aptissima erat viis mercatorum et exercituum. Ab Accho (Ptolemaide) via in ipso fere limite superioris et inferioris Galilaeae ducebat Ramam (*el-Rāme*) et inde procedens apud *Şafed* iungebatur viae Galilaeam superiorem permeanti. Alia via ab Accho petebat Sepphorim et Tiberiadem. Frumentum ex terra transiordanica et Anranitide per viam Bethsan, Iezrael et

planitiem Esdrelon usque ad mare Mediterraneum vehebatur. Magna via mercatoria inter Aegyptum et Damascum a planitie Saron divergens et apud Magdeddo planitiem Esdrelon ingressa ad lacum Genesareth ducebat et inde *Via maris* nuncupata Iordane infra lacum *Hüle* traiecto Damascum petebat.

In Mishna (Shebiith 9,2) Galilaea triariam dispescitur in superiorem, inferiorem et vallem, quarum superior complectitur quicquid supra Capharananiam (*Kefr 'Anān*), quod sycomoros non sustinet, inferior quicquid infra Capharananiam quod fert sycomoros, vallis territorium Tiberiadis. Verum haec vallis iuxta litus occidentale lacus Tiberiadis merito Galilaeae inferiori adnumeratur.

Fertilitas Galilaeae a Flavio Iosepho (Bell. iud. III. 3,2. 3) summis laudibus celebratur: universa enim culta est et passim fructuum ferax, nulla eius pars otiosa, tota pinguis et pascua et omne genus arboribus consita, ita ut ubertate sua vel minime studiosos agriculturae alliciat. Oleo quod magni aestimabatur, abundabat regio circa Gischalam in Galilaea superiore (Bell. iud. II. 21,2; Vita 13). Imprimis autem regio Gennesar seu planities iuxta litus occidentale lacus Tiberiadis describitur natura simul et pulchritudine admirabilis, proferens arbores omnigenas, poma varia, ficus, noces, palmas, uvas, oleas, quae nullam arborem pro ubertate sua recuset et pugnantia in unum compingat (Bell. iud. III. 10,8).

Incolas Galilaeae fuisse numero copiosos ex Evangeliiis satis colligitur. Teste Flavio Iosepho (Bell. iud. III. 3,2) urbes erant frequentes et crebri vici ubique populosi propter soli bonitatem; exaggerare tamen videtur Iosephus addens, vicum, qui sit minimus, supra 1 5000 incolarum habuisse. Copia incolarum permagna etiam ex eo colligitur, quod Iosephus exercitum ad 100 000 tironum et amplius e Galilaea conscripsit et urbes vicosque 204 esse dicit, in quibus quindecim loca munita enumerat (Bell. iud. II. 20,6; Vita 37 et 43). Indoles incolarum erat pugnax et audax; Galilaei enim tot gentibus alienigenis

circumdati omni semper belli periculo resistebant neque formido unquam viros ab infantia pugnaces occupavit (Bell. iud. III. 3,2); cuius fortitudinis bellicae egregia documenta iam Zabulon et Nephthali, eiusdem regionis antiqui cultores, ediderunt tempore Debborae (Iud. 5,18). Hac indole adeo imbuti erant, ut seditionibus gauderent rerum novarum appetentes et natura apti ad mutationes (Bell. iud. I. 16,5; Vita 17); alia exempla vide s. v. IUDAS 9 (Iudas Galilaeus). Galilaei erant et haud dubie rebelles, quorum sanguinem Pilatus miscuit cum sacrificiis eorum (Luc. 13,1). Galilaea erat fomes seditionis, ex qua bellum iudaicum exarsit. Intra muros urbis Ierusalem a Tito oppugnatae Galilaei caedium civilium magnam partem egerunt, quorum facile princeps erat Ioannes de Gischala oriundus (Bell. iud. IV. 2,4 s.).

Mores quoque Galilaeorum in rebus minoribus non erant iidem ac Iudaeorum. Mishna commemorat discrepantias quoad iura matrimonii (Kethuboth 4, 12), quoad sponsum et sponsam (Iebamoth 4,10; Kethuboth 1,5), quoad pondera et nummos (Terumoth 10,8; Kethuboth 5,9; Chullin 11,2). Dialectus quoque Galilaeorum a iudaica discrepabat (Matth. 26,73; Marc. 14,70; Luc. 22, 59), quam discrepantiam etiam Talmudici variis exemplis illustrant; cf. *Buxtorf*, Lexicon chald. talm. rabb. col. 434 s.; *Lightfoot*, Centuria chorograph. Matthaeo praemissa cap. 87. Hinc intellegitur, cur Galilaei ab incolis Iudaeae proprie dictae minore aestimatione digni habiti sint (cf. Io. 1,46; 7,52); erant quidem incolae Galilaeae et Peraeae etiam genuino sensu Iudaei, attamen multipliciter cum alienigenis permixti, ita ut iudaismus perfectus et diuturno magisterio Scribarum ac Pharisaeorum plene imbutus in sola Iudaea vigeret.

Maximam autem gloriam huic regioni attulit Iesus Galilaeus (Matth. 26,69). In Nazareth Galilaeae puer Iesus proficiebat sapientia et aetate et gratia apud Deum et homines (Matth. 2,23; Luc. 2, 52). In Cana Galilaeae Iesus fecit initium signorum (Io. 2,11; 4,46. 54). Maiorem partem vitae publicae in Galilaea peregit. Capharnaum ad lacum Gene-

sareth civitas eius appellabatur (Matth. 9,1). In Galilaea erant civitates, in quibus factae sunt plurimae virtutes eius (Matth. 11,20 s.) et ibidem discipulis se manifestavit post resurrectionem suam (Matth. 28,7. 16; Io. 21,1). Duodecim eius apostoli erant Galilaei (Act. 1,41; 2,7); probabilis excipiendus est Iudas Iscariotes, cuius nomen explicatur *vir de Carioth* oppido tribus Iuda (v. CA-RIOTH 1 et ISCARIOTES).

Post destructionem urbis Ierusalem Galilaea erat sedes praecipua scholarum iudaicarum et rabbinorum doctissimorum. Synedrium Ierosolymis primum salmen seu Iamnia translatum est, postea vero Sepphorim et inde Tiberiadem migravit (*Lightfoot*, *Paregon* de excidio urbis etc. Sect. 3 s. et 7; *Opp. II*. p. 141. 144). Tiberiade in lucem prodierunt Mishna a Rabbi Iehuda Sancto compilata circa annum 190 vel ex alia supputatione 220 p. Chr. et postea circa annum 230 p. Chr. Gemara quae dicitur hierosolymitana (*Buxtorf*, *Tiberias* p. 21. 22). Post haec tempora autem studia litterarum in Babyloniam translata sunt, ubi Gemara babylonica prodit. Hodie quoque cernuntur ruinae synagogarum ex saeculis 2-4, immo fortasse ex primo saeculo p. Chr. in Galilaea superiore (*Kasium*, *Kefr Birin*, *el-Djish*, *Meiron*, *Nabartein*, *Qedis*?) et prope lacum Genezareth (*Tell Hüm*, *Keraze*, *Irbid*; cf. *Güerin*, *Galilée* I. 198-201; 227-231; 241 s.; II. 93; 100 s.; 337 s. (?); 429 s.; 447-449; *Survey of West. Pal.* Mem. I. p. 224 ss. 240 ss. 251 ss. 396 ss.).

GALLIM. 1. Gallim (גַּלְלִים), patria Phalti seu Phaltiel, cui Saul dedit Michol filiam suam, uxorem David (1 Reg. 23, 44; LXX Τομαζ); eadem recensetur inter urbes beniaminiticas, quae ab exercitibus Sennacherib Ierusalem versus properantibus terrore percellabantur (Is. 10,30; LXX Γαλλεῖα). Situs ignoratur. Eusebius et S. Hieronymus (Onom. 247, 78; 129,10) mentionem faciunt vici Galilaia seu Galla prope Accaron; sed contextus Is. 10,30 omnino postulat urbem tribus Benjamin, a qua fines Accaron nimum absunt.

2. Gallim (גַּלְלִים i. e. duo stagna;

Ἀγαλῆα), locus in Moab (Is. 15,8. In descriptione vastitatis Moab ululatus eius usque ad Gallim et clamor eius usque ad puteum Elim personare dicitur. Apud Eusebium et S. Hieronymum (Onom. 228,61; 98,10) assignatur vicus Agalleim seu Agallim 8 mil. pass. ab Areopoli (Rabbath Moab) austrum versus; ibi autem hodie non vicus eius nominis, sed urbs *Kerak* (Qir Moab) invenitur. Quibusdam eadem visa est quae Agalla ab Alexandro Iannaco Arabibus crepta apud Flavium Iosephum Ant. XIV. 1,4; verum editio *Niese* pro Agalla et Athone priorum editionum legit Ἐλζυθώνη, qua lectione supposita omnis similitudo nominum evanescit. Hodier-nus igitur situs Gallim seu Eglaim nobis non innotescit. Hoc tamen merito asseri videtur ab Isaia nominari et locum in parte meridionali Moab scil. Eglaim et locum in parte septentrionali scil. puteum Elim (v. BEER ELIM); cf. *Knabenbauer* ad Is. 15,8.

Distingue Gallim (Eglaim) ab Engal-lim (En Eglaim) Ez. 47,10.

GALLIO (Γαλλίον); proprio nomine appellatur Marcus Annaeus Novatus; sed postquam per adoptionem transiit in familiam Lucii Iunii Gallionis rhetoris, nomen Gallionis assumpsit. Frater erat Lucii Annaei Senecae philosophi, morum suavitate et amabilitate dulcis appellationem sortitus apud Statium et Senecam. Erat proconsul (ἀνθύπατος) Achaiae Act. 18,12, qua designatione ostendit auctor Act. se de rerum conditione bene esse edoctum. Cum enim Achaia primo fuerit provincia senatoria, dein Tiberio regnante imperatoria, sub Claudio iterum senatoria, dein alia iterum Achaiae conditio sub Nerone, alia sub Vespasiano (cf. *Tacitus*, *Annal.* 1,76; *Sueton.* *Claud.* 25; *Nero* 24; *Vesp.* 8; *Fellen*, *Apostelgeschichte* p. 344), opus erat accurata rerum cognitione, ne magistratus romanus titulo falso designaretur. Iudaei Paulum ad eius tribunal Corinthi adduxerunt eum violatae legis accusantes. Verum simulac Gallio adverit agi de lege iudaica, eos a tribunali abegit (Act. 18,12-17). Contemp-tum Iudaeorum verbis suis ostendit et

eo quoque quod ei nihil curae fuit, quod Sosthenes princeps synagogae ante tribunal perculiebatur. Sicut Seneca frater, ita ipse quoque Iudaeos probabilissime habuit gentem sceleratissimam.

GALLUS (ἀλέτωρ). 1. In historia evangelica gallus saepius memoratur. In primis Dominus negationem Petri praedicens tempus indicat galli cantu (Marc. 14,30; Matth. 26,34; Luc. 22,34; Io. 13,38); praedictionem impletam pariter omnes evangelistae testantur (Marc. 14,68. 72; Matth. 26,74 s.; Luc. 22,60 s.; Io. 18,27). Similiter Christus discipulos ad vigilandum monens, gallicinio noctis partem determinat: « Vigilate ergo, nescitis enim quando dominus domus veniat: sero an media nocte an galli cantu, an mane » (Marc. 13,35). Etiam gallina locum in Evangelio habet, ubi Dominus charitatem cordis sui erga civitatem ingratam pulcherrima comparatione exprimit: « Ierusalem, Ierusalem..., quoties volui congregare filios tuos, quemadmodum gallina congregat pullos suos sub alas, et noluisti » (Matth. 23,37; cf. Luc. 13,34; gr. ὄρνις).

2. Galli cantus (ἀλετοροφωνία), uti in verbis Christi apud Marcum (13,35) indicatur, proprie tempus medium inter mediam noctem et auroram designat. Eo enim tempore gallos magna voce cantare omnes norunt, atque inde partitionem temporis nocturni desumi etiam scriptores profani testantur (*Censorinus*, De die natali c. 19; *Macrobius*, Saturnal. 1,3; *Plinius* X. 21,46, al.; cf. *Bochart*). In Oriente autem iam circa mediam noctem galli prima vice cantare solent multoque accuratius, quam alibi, tempus suum custodiunt (cf. *Tristram*). Unde etiam veteres auctores frequenter de secundo gallicinio (Marc. 14,30. 72) loquuntur. Sed cum tempus gallicinii primi fere cum media nocte coincidat, ubi simpliciter de galli cantu sermo est, illud secundum gallicinium intellegitur. Atque ita Marcus de hoc secundo gallicinio expresse loquens cum aliis evangelistis optime cohaeret.

Cf. praeter comentatores in Evang. II. cc. (praesertim v. *I. Knabenbauer* in Matth. 26,34) *Sam. Bochart*, Hierozoic. II. 119-24,

ed. *Rosenm.* II. 688-95; *H. B. Tristram*, Nat. Hist. of the Bible ed. 8, 221 s.

3. Gallina, ex qua Dominus comparationem illam ad demonstrandum charitatis suae affectum desumpsit, in Evangelio Lucae simpliciter avis dicitur (13,34): graecus textus in utroque loco ὄρνις exhibet, quo nomine plerumque aves generatim appellantur. At haud inepte in versione Vulgata gallina exponitur, cum ὄρνις etiam a profanis scriptoribus (*Aristot.* Hist. anim. IX. 37 al. 50,1 etc.) sensu magis speciali pro gallinis usurpetur et comparatio illa praesertim ex obvio gallinarum exemplo vim magnam habeat (cf. 4 Esdr. 4,30. — *V. Bochart* l. c. 125 s., ed. *Ros.* 695-7).

4. Gallum domesticum tempore Christi Domini apud Iudaeos introductum fuisse omnes concedunt, neque nugae talmudicae eum Hierosolymis defuisse probant (cf. *Reland*, *Rosenmüller*). Originem suam praecipue ducit a specie *Gallus bankiva* Temminck (= *Gallus ferrugineus* Gmelin) dicta, Indiae septentrionalis ac vicinarum insularum indigena. Babylonii atque Persae primi eum ex India acceperunt et tamquam avem sacram venerati sunt; inde fere tempore bellorum medicorum et persicorum in Asiam anteriorem ac probabiliter etiam tunc demum in Syriam et Palaestinam videtur translatus esse.

Cf. *H. Relandi* Oratio de galli cantu Hierosolymis audito, Rotterdam 1709; *E. F. K. Rosenmüller*, Bibl. Alterth. IV. 2,353; *Leunis-Ludwig*, Synopsis I. 1 ed. 3 p. 449; *A. E. Brehm*, Tierleben ed. 3 V. 573-5; *Ph. L. Martin*, Naturgesch. d. Thiere I. 2, 426 s.; *V. Hehn*, Kulturpfl. u. Hausth. ed. 6,314-27; *O. Schrader* apud *Hehn* l. c. ib. 327-9.

De Babyloniiis cf. *W. Houghton* in Transact. Soc. Bibl. Arch. VIII. 1884, 97-100. Apud Aegyptios figura galli in monumentis non occurrit, sed gallina inter signa hieroglyphica pro littera w locum accepit; cf. *F. Chabas*, Études sur l'antiq. hist., Paris 1873, 407; *Wilkinson-Birch*, Manners and Customs III. 319 s.

5. Ex dictis vix mirum videbitur, gallum in Vetere Testamento, si textum primigenium respicias, non commemo-

rari. Fortasse generali illa expressione *volatilium*, quae cum aliis cibis Nehemiae ad distribuendum parabantur (Neh. 5,18 צפרים) etiam galli intellegi poterunt; cum etiam inter *aves altiles* Salomonis (3 Reg. 4,23 hebr. 3,3) locum habuisse, vix probabile videtur. Vulgata tamen quattuor aliis locis mentionem galli facit. Imprimis in libro Tobiae 8,11 « circa pullorum cantum » habet, ubi in textu graeco utriusque recensionis secundum codicem Vaticanum et Sinaiticum (ap. *Swete*) nihil simile legitur; fortasse id quod habet Syrus « *antequam illucescat* » mentionis de pullorum cantu occasionem dedit. — Deinde in libro Iob 38,36 Dominus inter alia quaerit « quis dedit gallo intelligentiam? », ubi in hebraeo est שָׁכֵן.

Rabbini eo nomine gallum domesticum intellegunt, eiusque intelligentiam in eo esse censent, quod diem a nocte discernat, vel quod laudet Dominum suum, ut vult paraphrasta chaldaeus (v. *Bochart* l. c. II. 115, *ed. Ros.* II. 682 s.); probabiliter etiam S. Hieronymus Rabbino magistro suam interpretationem debuit. At Iudaeus ille nugas videtur vendidisse, cum significationem nominis שָׁכֵן et interpretes et scriptores prorsus ignorent, atque gallum domesticum Iudaeis tempore libri Iob notum fuisse nulla ratione probetur. — Praeterea in libro Proverbiorum 30,31 inter « tria quae bene gradiuntur » cum leone et ariete s. hircio etiam « gallus succinctus lumbos » nominatur. Expressio hebraica יָרֵד כְּתָנִים proprie « succinctus lumbos » sonat, prout etiam Symmachus vertit (παραστριγμένον τὴν ὀσφύν). Addendo vero *gallum* S. Hieronymus rationem habuit aliarum versionum priorum, quae prorsus praeter verba textus primigenii de « gallo qui inter feminas alacriter incedit » loquuntur (ἀλέκτωρ ἐμπεριπατῶν θηλείαις εὐβύχως LXX, similiter Peshitta, paraphrasis chaldaica; item postea versio arabica; cf. *Bochart* l. c. 116, *ed. Ros.* 684 s.); etiam *Aquila* et *Theodotion* gallum interpretati sunt (ἀλεκτροῦν νότω). Quomodo vero gallus *succinctus lumbos* vocetur, haud facile quis dixerit, neque

constat, cuius animalis denominatio haec simpliciter tribuatur. Cum autem positioni inter leonem et arietem s. hircum potius animal quadrupes videatur respondere, plures cum *Bocharto* de equo exponere malunt (l. c. I. 102 *ed. Ros.* I. 40 s.), alii de cane venatico (*Prz. Deitzsch*, Comment. in Prov. I. c.) vel de zebra (*F. J. Schoder*, Hierozoici specimen 3,99 s.) vel de alio animali. De gallo autem non videtur esse sermo. — Denique in loco Is. 22,17 Vulgata *gallum gallinaceum* vocat, qui ex communi acceptione vocis hebraicae גָּבֵר *vir* dicendus foret; id S. Hieronymus ipse in commentario h. l. testatur, addens : « Hebraeus qui nos in veteris Instrumenti lectione erudit, *gallum gallinaceum* transtulit ». Etiam hic Hebraeus ille minus fide dignus videtur, cum גָּבֵר tantum in Talmude aliquoties gallum significet, atque etiam tempore Isaiae nihil de gallis apud Iudaeos constet.

Cf. praeter auct. cit. *H. O. Lenz*, Zool. d. alt. Griechen u. Römer 326-39; *L. Lewysohn*, Zool. d. Talmuds 194-9; *H. B. Tristram*, Nat. Hist. of the Bible *ed.* 8, 221-3; *J. G. Wood*, Bible Animals 421-4; *P. Cultrera*, Fauna biblica 274-8; *G. Loreta*, La Zoologia nella Bibbia 531-4.

L. FONCK.

GAMALIEL (גַּמְלִיֵּאל, Γαμλιήλ).

1. Filius Phadassur, princeps tribus Manasse (Num. 1,10; 2,20; 7,54. 59; 10,23).

2. Legis doctor honorabilis universae plebi (Act. 5,34), secus cuius pedes Paulus apostolus se dicit eruditum iuxta veritatem paternae legis (22,3). Secundum rationem temporis idem erit Gamaliel, qui in Mishna (Orla 2,12; Rosh ha-shana 2,5; Iebamoth 16,7; Sota 9,15; Gittin 4,2-3) Gamaliel senior appellatur, distinguendus a Gamaliel II., filio Simonis filii Gamalielis I., unus ex septem illis celeberrimis doctoribus, qui cognomine « rabban » (magister noster) honorabantur. Cum synedrium apostolos interlicere vellet, Gamaliel unus ex synedristis (non praeses synedrii, ut nonnulli opinantur), consilium dedit, ut dimitterentur liberi; si opus homi-

num esset, fore ut sicut alia per se dissolveretur; si vero ex Deo, non posse dissolvi (Act. 5,34-39). Traditione christiana cf. *Clement. Recogn.* 1,63 s.) fertur rei christianae postmodum nomen dedisse.

De Gamaliel I. generatim cf. *Surenhusius*, *Mishna* I. 315; II. 331; III. 308. 312 n. 13,314 n. 19, 315 n. 20; *Graunii Historia Camalielis Viteb.* 1687; *Wolff*, *Biblioth. Hebraea* II. 821 s.; *idem*, *Curae philol.* in Nov. Test. ad Act. 5,34; *Ewald*, *Geschichte des Volkes Israel*, ed. 3 VI. 256 s.; *Ginsburg* apud *Smith and Wace*, *Dict. of Christian Biography* II. (1830), p. 602-604; *Derenbourg*, *Essai sur l'histoire et la géographie de la Palestine* 1867 I. p. 341 s.; *E. Schürer*, *Geschichte des jüdischen Volkes etc.* ed. 3 II. p. 364.

De traditione christiana cf. *Epistola Luciani ad omnem Ecclesiam de revelatione corporis Stephani martyris primi et aliorum* (v. 3-4) apud *Surium*, *Vitae Sanctorum* IV. 502 s. [3. Aug.], apud *Baronium*, *Annal.* ad ann. 415, apud *Migne*, 41,807 s. in tomo VII. S. Augustini, *Appendix*; eandem epistolam commemorat *Gennadius Massiliensis*, *De scriptoribus ecclesiasticis* cp. 46. 47 apud *Migne*, 58.1084. 1085. Praeterea cf. *Fabrianus*, *Biblioth. graeca ed. Harles* X. 327. 725. XI. 623; *Photius*, *Bibliotheca cod.* 171 apud *Migne* 103, 500-501; *Nilles*, *Kalendarium manuale* (ed. 2, 1896) I. p. 232 s.

GAMARIAS (גַּמְרִיָּה, גַּמְרִיָּה, Γαμαρίας). 1. Filius Helciae a Sedecia rege simul cum Elasa Babylonem missus ad Nabuchodonosor; occasione huius legationis etiam Ieremias per eosdem epistolam ad exsules misit (Ier. 29,3).

2. Filius Saphan scribe, unus ex principibus in aula regis Ioakim; ex eius nomine vocabatur cubiculum in aedificio templi (Ier. 36,12. 13. 23).

GAMUL (גַּמּוּל, Γαμουλ), princeps familiae sacerdotalis, cui sors vigesima secunda a Davide designata est (I Par. 24,17).

GAMZO (גַּמְזוֹ, Γαμζω), urbs quae cum viculis suis Achaz regi Iuda erepta est a Philisthaeis (2 Par. 28,18). Hodie vicus *Djīmzū* prope Lyddam (Diospolim) inter meridiem et orientem, paulo infra viam, quae a loppe et Lydda Ierusalem versus ducit.

Cf. *Robinson*, *Palaestina* III. 239. 270. 271. 279; *Guérin*, *Judée* I. 325. 336; *Survey of West. Pal.* Mem. II. 297. *Zeitschr. d. D. Pal.-Ver.* XVI. 1893 p. 34. *D. Zanecchia*, *La Palestine d'aujourd'hui* 1899 I. 103; *A. Neubauer*, *Géogr. du Talmud* p. 98.

GAREB גָּרֵב, Γαρέβ, Γαρήβ), heros davidicus (2 Reg. 23,38; 1 Par. 11,40); cognominatur Iethraeus seu Iethrites (v. IETHRAEUS et IETHER 6).

GAREB collis, גִּבְעַת גָּרֵב, vocatur monticulus prope Ierusalem semel commemoratus in prophetia Ieremiae (31, 39; LXX Γαρήβ), ubi vates urbem Ierusalem denuo aedificandam praedicens, primo extensionem urbis septentrionem versus describit: « a turre Hananeel usque ad portam anguli »; deinde partem occidentalem addit: « a porta anguli funiculus mensorius ulterius extenditur recta super collem Gareb et vertitur Goah versus » (hebr.); mox latus australe ex parte vallis Ennom adiungit. Unde collis Gareb, de quo nil aliud traditum est, ab occidente Ierusalem quaerendus apparet, ibique probabiliter montem illum designat, « qui est contra Geennom ad occidentem in summitate vallis Raphaim contra aquilonem » (Ios. 15,8; 18,16), qui altitudinem 796 metrorum attingit; sola pars australis proprio nomine hodie *Djebel abu Tör* vocatur a peregrinis communiter *mons mali consilii* dictus (v. IERUSALEM II. 4).

Cum גָּרֵב speciem *leprae* significet (Lev. 21,20; 22,22; Deut. 28,27. Vulg. *scabies*), multi collem Gareb a leprosis appellatum censent, quibus ibi extra urbem (Lev. 13,46) manendum fuerit. Hodie etiam in dicto colle occidentali nova leprosorum domus (« auxilium Iesu » dicta) miseris refugium praebet.

Cf. *A. Neubauer*, *Géogr. du Talmud* p. 150 s. (= *Wādi Gurab*).

L. FONCK.

GARIZIM (גְּרִיזִים, Γαρίζιμ) et **HEBAL** (הֶבֶל, Γαβζλ) sunt duo montes vicini amoenissima valle Sichem seiuncti, Garizim meridiem, Hebal aquilonem spectans, qui Deut. 11,30 pro Israelitis in Palaestina orientali versantibus descri-

buntur esse : trans Iordanem, post viam occasus solis seu viam, quae a meridie aquilonem versus Palaestinam occidentalem permeat, in terra Chanaanici Arabam (planitiem, desertum) habitantis, e regione Galgala (v. GALGALA 3), iuxta vallem (querens) More. In monte Garizim benedictionem fidelibus Legis custodibus promissam pronuntiaverunt Iordane traiecto Simeon, Levi, Iudas, Issachar, Ioseph (Ephraim et Manasse), Benjamin, in monte Hebal maledictionem impiis intimalam pronuntiaverunt Ruben, Gad, Aser, Zabulon, Dan, Nephthali, ut Moyses antea mandaverat (Deut. 11,29; 27,12. 13; Jos. 8,33). Quod benedictio in monte Garizim, maledictio in monte Hebal pronuntiata est, *Rosenmüller* (Scholia ad Deut. 11,29) ex eo explicaverat, quod Hebal sterilis esset et saxosus, Garizim fontibus, hortis, vineis, olivetis instructus et sic ipsa utriusque montis facies bene et male precandirum in eo peragendum luculenter exprimeret. Sed haec diversitas hodie saltem tanta non est, ut istam interpretationem fulcire valeat. Melius dicemus Israelitis, qui orientalium more in regionibus discernendis orientem respiciunt, montem Hebal ad sinistram fuisse, Garizim ad dexteram partem, quam faustum quid sonare ex Gen. 35,18 constat. Accedit quod in monte Hebal ex mandato Moysis Iosue primum terrae cisiordanae altare Domino erexit, holocausta et hostias pacificas obtulit, Deuteronomium legis Moysis lapidibus insculpsit (Deut. 27,4 s.; Jos. 8,30 s.). De Hebal nihil amplius in S. Scriptura legitur.

De monte Garizim pauca addenda. Ioatham filius minimus Gedeonis in vertice quodam montis Garizim stans fabulam de arboribus regem quaerentibus Sichimitis proposuit (Iud. 9,7). In monte Garizim castellum seu munitionem fuisse, cui Antiochus IV. Epiphanes Andronicum praefecit, docemur 2 Mach. 5,23. Templi in monte Garizim exstructi mentio fit 2 Mach. 6,2 et Samaritanos in monte hoc adorare solitos esse dicit mulier Samaritana cum Domino colloquens (Io. 4,20. 21). Templum illud permittente Alexandro Magno Sanaballetes natione Cuthaeus, satrapa Samariae,

qui post pugnam apud Gaugamelam a. 331 a Dario defecerat, exstruxit et sacerdotem eius templi constituit Manassen pontificis hierosolymitani fratrem, qui filiam Sanaballetis uxorem duxerat et ob hoc connubium a Iudaeis honore sacerdotali privatus erat (*Flor. Jos. Ant. XI. 8,2-4*; cf. XIII. 3,4). Eusebius quoque Alexandri M. aetate hoc templum a Manasse in monte Garizim constitutum esse testatur (*Chronic. II. apud M. 19,488*). Ab Antiocho IV. Epiphane templum Iovis Hospitalis (2 Mach. 6,2) vel Iovis Hellenii (*Ant. XII. 5,3*) cognominatum est, a Ioanne Hyrcano autem devastatum et in ruinas redactum (*Ant. XIII. 9,1*). Sed hodie quoque reliquiae Samaritanorum in monte Garizim pascha celebrare solent. Ab antiquo enim tempore provocant ad Deut. 27,4 quo loco in Pentateucho Samaritano Garizim pro Hebal legitur; suspicantur autem plerique critici Samaritanos textum mutasse ob dogmaticam quandam rationem scil. ut templi sui auctoritatem contra Iudaeos defenderent. Perperam quoque Samaritani montem Moria, in quo Abraham filium Isaac in holocaustum oblaturus erat, Garizim esse affirmarunt.

A communi traditione de situ Garizim et Hebal recedunt Eusebius et S. Hieronymus (*Onom. ed. Lag. 242, 79; 126,4*), asserentes hos montes esse iuxta Iericho non iuxta Neapolim (Sichim). Unde concludendum esse opinatur *F. de Hummelauer* (ad Deut. 11,29) praeter montes Hebal et Garizim prope Sichem fuisse alios montes eiusdem nominis Hebal et Garizim prope Iericho ex opposito Galgalae (v. GALGALA 1) et rationem ex ipso s. textu affert : « Tam Deut. 27,4 quam Jos. 8,30 (cf. 9,6) suggerunt montes fuisse prope Iordanem in ipsa Araba ».

Garizim hodie vocatur *Djebel el-Tür* (868 m), Hebal *Djebel Eslāmiye* (938 m), ille meridiem, hic septentrionem versus a Sichem (*Nāblus*) et Sichar (*el-'Askar*).

Cf. *Robinson, Palaestina III. 314 ss.*; *F. de Sauley, Voyage en Terre Sainte 1865 II. 246 ss.*; *Voyage autour de la mer Morte 1853 II. 400 ss.*; *Guérin, Samarie I. 424 ss.*; *Survey of West. Pal. Mem. II. 148. 149. 187 ss.*; *Fahrgruber, Nach Jerusalem ed. 2*

II. 155. 156; *D. Zanecchia, La Palestine d'aujourd'hui* 1899 II. 521. 535-537; *Liévin de Hamme, Terre Sainte ed.* 4 III. 37 ss.

GARMI (גַּרְמִי cum articulo; Γαρμί), nomen gentilicium in textu obscurissimo 1 Par. 4,19 : « Et filii uxoris Odaïae sororis Naham patris Ceila, Garmi, et Esthamo, qui fuit de Machathi ». Sub v. ESTHAMO diximus, quomodo textus hebraicus melius explicari possit. Aliam interpretationem attentat *F. de Hummelauer* (Comm. in Num., p. 202-203), qui 1 Par. 4,17-19 de Mered eiusque uxoribus interpretatur et 4,19 vertit : « Et filii uxoris iudaeae alterius : Naham pater Ceilae Garmi et Esthamo Machathi et Simon ». Idem interpres animadvertit p. 203 : « Voces articulum habentes גַּרְמִי et הַבְּעֵתִי crediderim esse appositiones ad nomina sive virorum (Naham — pro altero viro scriptum nomen urbis Esthamo) sive urbium (Ceila — Esthamo), ut ab his duobus viris non omnes duarum urbium incolae sint orti, sed aliqui tantum ». In quacunque demum interpretatione Garmi est nomen gentilicium, de cuius origine nihil innotescit.

GASPHA (גַּסְפָּה, LXX omitt., α Γασφά), princeps Nathinaeorum in Ophel post instaurationem urbis Ierusalem (Neh. 11, 21).

GATHAM, GATHAN (גַּתָּם, Γαθάμ et 1 Par. 1,36 Γαθάμ), quartus filius Eliphaz filii Esau et dux tribus cuiusdam edomiticae ceteroquin ignotae (Gen. 36,11. 16; 1 Par. 1,36).

GAULON seu **GOLAN** (גֹּלָן, ἡ Γαυλών, ἡ Γολάν), urbs confugii tribus Manasse transiordanicae, filiis Gerson levitici generis tradita (Deut. 4,43; Ios. 20, 8; 21,27; 1 Par. 6,74[56]). Tempore Eusebii adhuc exstabat villa pergrandis Gaulon, a qua regio circumiacens nomen sortita erat (Onom. ed. Lag. 242,75). Videtur esse vicus hodiernus *Sahem el-Djölän* 18 leucas anglicas ab oriente lacus Tiberiadis situs (*Schumacher, Across the Jordan* p. 92). Apud Flavium Iosephum (Bell. iud. I. 4,4. 8; cf. Ant. XIII. 15,3) vocatur Γαυλάνη. Ab hac urbe

nomen traxit provincia Gaulanitis. Apud Flavium Iosephum distinguitur Gaulanitis superior et inferior atque inferiori adscribitur Gamala urbs ad ripam orientalem lacus Genesareth sita (Bell. iud. IV. 4,1); praeterea Gaulanitis Galilaeam ab oriente terminat (Bell. iud. III. 3,1). Unde Gaulanitis eadem fere regio est ac hodie *Djölän* scil. planities iuxta ripam Iordanis orientalem a fontibus Iordanis usque ad lacum Genesareth inferiorem protensa. Descriptionem regionis *Djölän* exhibet *Schumacher* in *Zeitschr. d. D. Pal.-Ver.* IX. 1886 p. 165 ss.; anglice *The Jaulan*, London 1888. Vide etiam s. v. BASAN.

GAVER (בְּעֵל־הַגֹּוֹר, ascensus Gaver, ἐν τῷ ἀνabάτειν Γαβ), ascensus iuxta Ieb-laam situs, in quo Ochozias rex Iuda ab urbe Iezrael (*Zer'in*) meridiem versus fugiens per milites Iehu apprehensus est et vulnus lethale accepit; inde vero fugam alia via usque ad Mageddo persecutus et ibi mortuus est (4 Reg. 9,27). Ieb-laam (*Bir Bel'ame*) ad meridiem Engannim (*Djenin*) sita est. Ochozias fugam a Iezrael per viam domus horti (בֵּית הַחֵן, Βαυχάιν) arripuit; haec igitur domus horti ex contextu non pars quaedam hortorum regionum erat, sed potius ab ipsa urbe aliquantum distabat. Iamvero Engannim seu *fons hortorum* (*Djenin*) non multum supra duas horas a *Zer'in* distat. Unde domus horti videtur ipsam Engannim designare. Ascensus autem ab Engannim ad Ieb-laam cursum Ochoziae tantopere retardavit, ut milites Iehu tandem Ochoziam assequi potuerint.

Cf. *J. Döller, Geogr. u. ethnogr. Studien* z. III. u. IV. Buche d. Könige 1904 p. 255.

GAZA (גֶּזֶר i. e. valida, munita; Γάζα), ex quinque urbibus praecipuis Philisthaeorum maxime meridiana et munitissima. Antiquissimi eius incolae erant Hevaei (Deut. 2,23) et Enacim, quorum reliquiae in Gaza, Geth et Azolo remanserunt (Ios. 11,22). Postea Chananaei seu Phoenices fines suos Gazam usque extenderunt (Gen. 10,19). Iosue terram promissam occupaturus usque ad eandem urbem progressus est, ipsam

tamen non subegit (Ios. 10,41; 11,22; 13,3). Tribui Iuda assignata (Ios. 15,47) et a filiis Iuda occupata (Iud. 1,18), sed brevi post a Philisthaeis recuperata est (Iud. 3,3; 13,4); introitus Gazae Iud. 6,4 extremos fines Israel indicat. Cum Samson populum Israel post quadraginta annos oppressionis de Philisthaeis ulcisceretur, Gaza erat theatrum conplurium eius gestorum, triumphii ultimi ac mortis gloriosae in templo Dagon (Iud. 15 et 16). Traditio Muhamedanorum et Christianorum adhuc locum indicat, ubi ambas portae fores cum postibus et sera apprehendit humerisque impositas portavit ad verticem montis, qui respicit Hebron; hic mons merito censetur esse *Diebel el-Munfir* prope Gazam inter orientem et meridiem. Sepulcrum vero Samsonis, quod Muhamedani in vicinia Gazae ostendunt, teste S. Scriptura (Iud. 16,31) inter Saraa et Esthaol quaerendum est. Gaza ut urbs Philisthaeorum nominatur 1 Reg. 6,17; sed postquam David Philisthaeos subiecit, in finibus extremis regni salomonici comprehendebatur (3 Reg. 4,24). Postmodum Philisthaei denuo insurrexerunt, unde prophetae vaticinia adversus Gazam et reliquas urbes Pentapoleos pronuntiant (Am. 1,6. 7; Soph. 2,4; Ier. 25,20; 47,3; Zach. 9,5); pro aliquo saltem tempore Ezechias rex Iuda Philisthaeos devictos usque ad Gazam subegerat (4 Reg. 18,8).

In bellis Aegyptiorum cum Assyriis et Babyloniis et Macedonum cum Persis multum et acriter de Gaza urbe munitissima concertatum est. Tempore Ieremiae unus ex Pharaonibus, probabilissime Nechao II., eam expugnavit (Ier. 47,1). Alexander M. eam post obsidionem duorum mensium cepit (*Diodor.* 17,48; *Flav. Ios.* Ant. XI. 8,3. 4; *Arrian.* 2,26. 27; *Curt.* 4,6). Inde ab hoc tempore Gaza magis magisque urbs hellenistica fiebat (*Flav. Ios.* Ant. XVII. 11,4; Bell. iud. II. 6,3). Proelia Ptolemaei Lagi cum aliis diadochis de Coele Syria occupanda etiam Gazam imprimis attingebant; anno 315 a. Chr. ab Antigono capta est (*Diodor.* 19,59). Anno 312 a. Chr. Ptolemaeus Lagi Demetrio filio Antigoni apud Gazam devicto urbem in difionem suam redegit (*Diodor.* 19,84). Post varias

regnum vicissitudines Gaza cum reliqua Palaestina in potestatem Seleucidarum transit (198 a. Chr.). Cum in regno Syriae Demetrius II. Nicator et Antiochus VI. (cuius tutor erat Trypho) de Hierono decertarent (145-143 a. Chr.), Gaza Antiocho restitit; qua de re Ionathas Mach. socius Antiochi VI. urbem obsedit et omnem circa regionem vastavit; Gazaei vero missis ad Jonathan munus et obsidibus amicitiam et armorum societatem Antiocho promiserunt (1 Mach. 11,61. 62; *Flav. Ios.* Ant. XIII. 5,3). Praeterea secundum omnes textus (LXX, Vulgata, Syrus) Gaza a Simone Mach. expugnata est (1 Mach. 13,43-48); verum pro Gaza legendum videtur Gazara (cf. *Fl. v. Ios.* Ant. XIII. 6,7; Bell. iud. I. 2,2); v. GAZARA. Anno 96 a. Chr. Gaza ab Alexandro Iannaeo eversa est et a Iudaeis tenebatur (Ael. XIII. 13,3; 15,4; Bell. iud. I. 4,2). A Pompeio, cum Syriam occuparet, libertate donata (Ant. XIV. 4,4; Bell. iud. I. 7. 7) et a Gabinio reaedificata est (Ant. XIV. 5,3). Illo igitur tempore secundum opinionem probabilissimam vetus Gaza derelicta et nova urbs paulo magis meridim versus exstructa est; cf. S. Hieronymi Onom. *ed. Lag.* 123,24: antiquae civitatis locum vix fundamentorum praebere vestigia, hanc autem, quae nunc cernitur in alio loco, pro illa quae corruit aedificatam. Anno 30 a. Chr. Gaza regno Herodis Magni (*Flav. Ios.* Ant. XV. 7,3; Bell. iud. I. 20,3) eoque mortuo iterum provinciae Syriae adiuncta est (Ant. XVII. 11,4; Bell. iud. II. 6,3). Tempore Claudii Imperatoris Gaza a Pomponio Mela geographo commemoratur: in Palaestina est ingens et munita admodum Gaza (*Mela* 1,11). Anno 66 p. Chr. a Iudaeis rebellibus vastata est (*Flav. Ios.* Bell. iud. II. 18,1). Aetate Eusebii et S. Hieronymi (Onom. *ed. Lag.* 242,66; 123,22) erat πόλις ἐπιστημος, insignis civitas Palaestinae. S. Antoninus Martyr vel potius Anonymus circa a. 570 p. Chr. urbem describit: Gaza autem civitas splendida, deliciosa, homines honestissimi, omni liberalitate decori, amatores peregrinorum (Itiner. 33 apud M. 72, 910 vel apud *P. Geyer*, Itin. hier. p. 180).

Restat ex Novo Test. unicus locus Act.

8,26 : Angelus autem Domini locutus est ad Philippum dicens : Surge et vade contra meridianum ad viam, quae descendit ab Ierusalem in Gazam; haec est deserta. *Relandus* (Palaestina p. 787) haec ultima verba non de via, sed de urbe Gaza intellegit; plerique tamen rectius ea verba de via accipiunt, praesertim cum angelus Philippum non de Gaza, sed de via eunuchi iter facientis docere voluerit; vide etiam s. v. BETH-SUR. — Primus episcopus Gazae fuisse dicitur Philemon, ad quem S. Paulus epistulam scripsit (*Le Quien*, Oriens christianus t. III. p. 604); in persecutione Diocletiani Silvanum Gazae urbis episcopum martyrio coronatum esse testatur Eusebius (Hist. eccl. 8,13).

Situm urbis describit Arrianus (Alex. 2,26) : « Abest Gaza a mari stadiis summum viginti et accessus ad eam est sabulosus et profundus et mare urbi propinquum limosum est ». Ab urbe distinguendus est portus Gazae, Majuma Graecis dictus, quem Constantinus M. de nomine filii sui Constantiam appellavit et urbem esse declaravit (*Euseb.* Vita Constant. 4,38; *Sozom.* Hist. eccl. 2,3), Iulianus autem isto nomine abolito iterum portum Gazae nominavit (*Sozom.* Hist. eccl. 5,3). Ceterum ea erat conditio huius portus, ut Gazaei nunquam commercio maritimo multum se dedecrent; florebat autem apud illos commercium mediterraneum.

Gaza probabilius eadem est, quae apud Herodotum (2,159; 3,5) *Κάζουρις* magna urbs Syriae appellata Sardibus haud minor esse dicitur. In inscriptionibus cuneiformibus scribitur *Khazzatu*. Urbs hodie vocatur *Ghazze*, portus *el-Mîne*.

Cf. de Gaza : *Felices Fabri* Evagatorium, *ed. Hassler* 1843 II. p. 378-379; *Reland*, Palaestina 787-800; *Robinson*, Palaestina II. (1841) p. 634-648; *Ritter*, Erdkunde XVI. p. 45-65; *Raumer*, Palaestina ed. 4 p. 192-194; *Sepp*, Jerusalem ed. 2 p. 617-627; *Guérin*, Judée II. p. 178-211. 219-221; *Survey of West. Pal. Mem.* III. p. 234 ss. et *Conder and Kitchen*, Large Map, sheet XIX, Reduced Map, sheet 13; *G. A. Smith*, Hist. Geogr. of the Holy Land 1894 p. 181-189; *Zeitschr. D. Pal. Ver.* VII. 1884 p. 1-14; XI. 1888 p. 149 159; *Clermont-Gan-*

neau, Archaeological Researches in Palestine II. (1896) p. 379-437; *Schürer*, Geschichte des jüdischen Volkes ed. 3 II. p. 84-89; *J. Döllner*, Geogr. u. ethnogr. Studien z. III. u. IV. Buche d. Könige 1904 p. 98-101.

Accedunt denique monographiae *K. B. Stark*, Gaza und die philistaeische Küste, Iena 1852; *Alb. von Hörnmann*, Gaza, Stadt, Umgebung und Geschichte 1876 (Programm des Knabenseminars der Diözese Brixen zu Rothholz).

GAZABAR (Esdr. 4,8 גַּזְבָּר cum articulo i. e. thesaurarius) v. MITHRIDATES 1.

GAZAM (גַּזָּא, Γαζα), Nathinaeus, cuius filii duce Zorobabel ex captivitate redierunt (Esdr. 2,48); idem Neh. 7,34 scribitur in Vulg. Gezem (LXX Γαζα).

GAZARA seu Gazer, Gazera, Gezer, Gezeron (גֶּזֶר et saepius גַּזָּר propter pausam; Γαζάρ, Γαζέρ, Γάζαρχα, Γάζαρχα et aliter), urbs antiqua Chananaeorum (Ios. 12,12), cuius rex Horam, cum regi Lachis opem ferret, a Iosue percussus est cum omni populo suo (Ios. 10,33), in termino meridionali tribus Ephraim sita inter Bethoron inferiorem et mare Mediterraneum (Ios. 16,3; 1 Par. 7,28; cf. *Flav. Ios. Ant.* V. 1,22), ex qua filii Ephraim Chananaeum non exterminarunt (Ios. 16,10; Iud. 1,29; 3 Reg. 9,16), urbs levitica filiorum Caath (Ios. 21,21; 1 Par. 6,67 [52]). Usque ad hanc urbem David Philisthaeos persecutus est (2 Reg. 3,25; 1 Par. 14,16); aliud bellum cum Philisthaeis in Gazer commissum recensetur 1 Par. 20,4; loco parallelo 2 Reg. 21,18 legitur Gob pro Gazer. Illo tempore urbs Israelitis non videtur subiecta fuisse; nam Pharaon eam expugnatam igne succendit et filiae suae uxori Salomonis in dotem dedit; Salomon autem eam statim reaedificavit (3 Reg. 9,15-17).

Eadem est urbs munitissima tempore Machabaeorum tum a Syris tum a Iudaeis occupata et acriter defensa (1 Mach. 4,45; 7,45; 9,52 etc.; 2 Mach. 10,32). De eadem sunt intellegenda, quae 1 Mach. 13,43-48 narrantur, quamquam LXX, Syrus, Vulgata legunt Gaza; id evincunt tum locus parallelus apud Flav. Iosephum (Ant. XIII. 6,7; cf. Bell.

ind. 1. 2,2), tum alii loci de Gazara agentes (1 Mach. 13,34; 14,7. 34; 15,28. 33; 16, 1. 19. 21), qui ad 4 Mach. 13, 43-48 respicere videntur et aptius explicantur, si lectio genuina 13,43 est Gazara.

Apud Eusebium et S. Hieronymum Onom. *ed. Lay.* 244,16; 127,10: Gazara villa 4 mil. pass. a Nicopoli septemtrionem versus distare dicitur. Nunc *Tell Djezer* 10 km a Lydda meridiem versus, a Nicopoli (*Amwās*) autem magis occidentem quam septemtrionem versus distans. Hunc situm omnino confirmant tum loci citati e prioribus libris Vet. Test., tum 1 Mach. 4,45: 7,45 (vide ADARSA); 14,34 (fines Gazarae et Azoti facile contigui esse poterant). In documentis *Tell el-'Amarna* appellatur *Gazri*, *Gaazri*. Medio aevo millibus christianis audiebat Moñs Gisardus (*Gisart*, *Gis-sart*).

De inscriptionibus, quae limites Gezer indicant, v. *Revue biblique* VIII. 1899 p. 109-117. 422-427. Praeterea cf. *Survey of West. Pal.* Mem. II. 417. 428-439; W. Max Müller, *Asien und Europa nach altägypt. Denkm.* p. 160; *Clermont-Ganneau*, *Recueil d'archéologie orientale* I. 351-391; III. 116-120; 254-268; D. Zanechia, *La Palestine d'aujourd'hui* 1899 I. 105; *Vigouroux*, *La Bible et les déc. mod. ed.* 6 III. 269; R. A. Stewart-Macalister, *The history and site of Gezer in Pal. Expl. Fund.* Quart. Stat. 1902 p. 227-232; *id.* *Report of the Excavation, of Gezer in Quart. Stat.* 1902 p. 317-375; 1903 p. 7 ss. 107 ss. 195 ss. 299 ss.; *Clermont-Ganneau*, A newly discovered Hebrew and Greek inscription relating to the boundary of Gezer in *Pal. Expl. Fund.* Quart. Stat. 1899 p. 118-127; J. Döllner, *Geogr. u. ethnogr. Studien* z. III. u. IV. Buche d. Könige 1904 p. 39-40.

GAZER (1 Mach. 3,8) v. LAZER.

GAZERA v. GAZARA.

GAZOPHYLACIUM (גִּזְרָה, גִּזְרֵה) v.

dicitur de cubiculis, de cellis quae in atrii templi, et ad portas exstructae erant; in iis asservabantur quae ad cultum requirebantur; ibi quoque ministri sacri commorabantur; quare complura gazophylacia nomine Gamariae, Elisamae, filiorum Hanan designantur (cf. 1er. 33,4; 36,10. 20). Supellex tem-

pli et opes, thesauri, in iis pariter recondebantur, et uti ex libris Mach. discimus, etiam publica litterarum monumenta ibi asservabantur (1 Mach. 14,49 gr., *Vulgata*: in aerario) et praeter pecuniam ad templum spectantem ibi quoque recondebantur et custodiebantur opes et pecuniae viduarum et pupillorum (2 Mach. 3,6. 10 s.).

In Novo Test. commemoratur Marc. 12, 41; Luc. 21,1; Ioan. 8,20 et quidem uti videtur duplici modo. Designatur locus in atrio mulierum, in quo secundum rabbinos tredecim arulae positae erant ad nummos qui offerrentur suscipiendos; arulae hae vel cistae vocabantur שִׁזְרוֹת

tubae, quia tubarum in modum formatae erant. Dein haec ipsa reconditoria pecuniarum etiam gazophylacii nomine appellabantur. Gaza vox est persica notione thesauri; גַּז apud rabbinos quoque in usu erat eadem notione. — Ex dictis elueet, quomodo dici possit Christum docuisse in gazophylacio, sedisse contra gazophylacium et vidisse quomodo turba iactaret aēs in gazophylacium. — Flavius Iosephus quoque scribit de gazophylacii in atrio mulierum templi (Bell. iud. V. 5,2; VI. 5,2: quin et gazophylacia combusta erant, in quibus infinita pecuniae vis, infinitae etiam vestes et alia ornamenta atque ut breviter dicam, omnis Iudaeorum congesta erat opulentia; cf. Ant. XIX. 6,1).

GEBÄ v. GABAA 2.

GEBAL (גְּבַל i. e. montanum a rad.

גָּבַל = contorsit. inde גְּבִירַי lunis, finis, terminus, series montium utpote regionem terminans; Γεβαλ) recensetur Ps. 82[83], 8 inter populos seu regiones israelitis hostiles. Eiusdem regionis nomen apud Flavium Iosephum est Gobolitis, nomen populi Gabalitae; Gobolitis et Amalecitis ut duae partes Idumaeae recensentur Ant. II. 1,2 (cf. III. 2,1); ex Ant. IX. 9,1 discimus ab Amasia rege Iuda in valle Salinarum non solum Edomitas (4 Reg. 14,7) seu filios Seir (2 Par. 25,11), sed etiam Gabalitis Γαβαλιται devictos esse. Apud Eusebium (Onom.) frequenter regio montana Idumaeae, quae circa Petram urbem est, Gebaleus

nuncupatur (*ed. Lag.* 264,84 : ἔστι δὲ ἡ ἀμφὶ τὴν Πέτρην Γεβελιγὴ καλουμένη *et* cf. 277,64; 211,89); alibi tamen Eusebii vocibus Idumaeae et Gebalenes ut eiusdem valoris ac latitudinis utitur (241,48 : ἐν τῇ Ἰδουμαίᾳ τῇ νῦν Γεβελιγῇ καλουμένη *et* cf. 294,78; 264,87). Accedit quod Targum Ionathan ad Pentateuchum pro monte Seir seu terra Edom semper substituit montem Gabla seu Gebal (Gen. 14,6; 33,16; 36,8; Num. 24,18; Deut. 1,2; 2,4); similiter Targum hieros., Targum Chron. et Pentateuchus Samarit. non raro legunt Gebal pro monte Seir textus hebraici. — Regio igitur illa, quae in Vel. Test. terra Edom seu mons Seir vocatur, apud Iudaeos aliud quoque nomen arabicum Gebal seu montanum sortita erat, quod in usu permansit. Hodie nomine *Djebal* designatur regio montana a mari Mortuo meridiem versus patens, quae a septentrione per *Wādi el-Hasā*, a meridie per *Wādi el-Ghuweir* circumscribitur.

GEBAL urbs, quae Graecis est Byblos, vide s. v. GIBLIH.

GEBBAI (גבאי, Γεββאי), Beniaminita, incola Ierusalem post instaurationem (Neh. 11,8).

GEBBAR (גבב, Γεββάρ) legitur Esdr. 2,20 pro Gabaon (cf. Neh. 7,23).

GEBBETHON v. GABATHON.

GEDDEL (גדל). 1. Nathinaeus, cuius filii duce Zorobabel ex captivitate redierunt (Esdr. 2,47 *Vulgata* : Gaddel, LXX Γεδδῆλ; Neh. 7,49 LXX Γαδῆλ).

2. Familia quaedam servorum Salomonis, quae duce Zorobabel ex captivitate rediit (Esdr. 2,56 LXX Γεδῆλ; Neh. 7,58 *Vulgata* : Ieddel, LXX Γαδῆλ).

GEDDELTHI (גדלתי, Γεδδολλαθει, Γεδδομαθει) unus ex filiis Heman cantoris de stirpe Caath (1 Par. 25,4; cf. 6,33), praefectus vicesimae secundae vicis seu divisionis cantorum (25,29).

GEDDIEL (גדיאל, Γεδδειάλ), filius Sodi, princeps ex tribu Zabulon, et unus ex duodecim exploratoribus terrae promissae (Num. 13,11[10]).

GEDELIAS (גדיאל, Γεδολιᾶς), filius Phassur, unus ex illis principibus, qui Sedeciae regi Iuda auctores fuerunt, ut Ieremias in lacum (cisternam vel foveam) coniceretur (Ier. 38,1). Aliqui coniectant Gedeliam esse filium illius Phassur, qui erat praefectus primarius templi et Ieremiam in nervum miserat (20,1). Sed res est incerta; nomen enim Phassur haud infrequens fuit (cf. 21,1).

GEDEON. 1. Gedeon (גדיון, Γεδεων), Beniaminita, pater Abidan principis tribus Benjamin (Num. 1,11; 2,22; 7,60. 65; 10,24).

2. Gedeon (גדיון, Γεδεων), Iud. 6 ss. (cf. Hebr. 11, 32), filius Ioas Manassaei, qui incolebat Ephraim civitatem cis flumen sitam. Irruebant tum quotannis in eam terrae sanctae partem Madianitae, Amalecitae desertique nomades, segestesque et greges abigebant. Gedeon ab angelo Israelis liberator designatus primum aram Baal subvertit, atque ab eo facinore nomen Ieroaal nanciscitur. Dein convocat Manassaeos cisiordanicos, Aseritas, Zabulonitas, Nephthalitas. A Deo duplici signo confortatur : vellus rore madescit, dum omnis circum humus sicca permanet; rursumque omnibus circum madentibus, solum vellus siccum reperitur. Iubente Deo ab exercitu dimittit Gedeon timidos omnes, mox praeterea eos omnes, qui prostrati e fonte biberunt, ut solos tandem trecentos secum retineat, timoris expertes fideque insignes, sed qui prae aliis pluribus aequae audacibus non ob maiorem fortitudinem maiusve robur, sed arbitrario ut ita dicam indicio essent selecti. Hi noctu tribus cunctis castra hostium ingressi, sine gladiis, faces ardentes lagenis inclusas manu gestantes, altera vero manu tubas, hostes sopitos lagenarum confractione, facium fulgore, tubarum clangore, ita terruerunt et perturbaverunt, ut se fugae omnes dederint et fugientes inter se confoderint. Fugientes Gedeon trans Iordanem procal insecutus et secundo inopinantes adortus est atque fudit, captis Madianitarum quibusdam regibus Zebec et Salmana. Revertens destruxit turrim Phanuel, cuius

incolae ipsi, dum eos reges insequerentur, annonam praebere insolenter recusaverant. Vocaverat autem post primum Madianitarum cladem Gedeon Ephraimitas, qui occupatis vadis Iordanis inter alios plures etiam duos Madianitarum principes Oreb et Zeb oppresserunt. Conquesti se prius ad pugnam non esse vocatos, blandis verbis a Gedeone eo facilius compescebantur, quod tandem victoriae et praedae partem haud spernendam suis manibus arripuissent. Ephram redux Gedeon Zebee et Salmuna ob trucidatos pridem eius fratres morti dat, hereditariam oblatam dominationem recusat, sed e praeda sibi expetens annulos aureos, quos auribus vel naribus insertos gesserant hostes, conficit pretiosum ephod pontificium, quo ipse et post ipsum filii induerentur in cultu lahwe (Iud. 8.23), seclusis sacerdotibus aaronitis, ac pontificali et sacerdotali honore fruerentur. Post eius vero mortem, qui a vero sacerdotio ante defece- rant, mox ipsum verum Deum deseruerunt et cum Baal foedus iecerunt. ludicis officio functus est Gedeon annis quadraginta. Genuit filios plurimos, quorum unus famosus Abimelech.

Ad typicam velleris Gedeonis rationem quod attinet, rorem Theodoretus et S. Augustinus (Lib. de peccato originali cap. 25; *M.* 44.400) interpretati sunt spiritualia dona, quae primum Hebraeis (velleri) dabantur exclusis gentibus, postea in gentes transferebantur exclusis ad tempus Hebraeis. Cf. *Orig.* (In Iud. hom. 8; *M.* 12, 983 ss.), *Aug.* (Quaestiones in Hept. VII. 49; *M.* 34, 813 s. — Enarr. in Ps. 45 et 71; *M.* 36, 521. 907), *Ps. Aug.* (De mirab. S. Scr. II. 6; *M.* 35, 2177), *Ambros.* (De viduis cap. 3 et De Sp. S. lib. I.; *M.* 16, 240. 705), *Hier.* (Epist. 58; *M.* 22, 581), *Procop.*, *Isidor.*, *Ps. Beda*, *Rhabanus*, *Rupert.* Porro cum dona spiritualia praeprimis incarnatione verbi Dei consistant, recte affirmat Ambrosius « pluviam illam Verbi rorem esse divini ». Qui ros cum in utero Virginis fuerit primum abundantissime et perfectissime receptus, rursum vellus recipiens imago est B. Virginis Mariae concipientis Verbum. Cf. *Petr. Chrysol.* (Serm. 143; *M.* 52, 583), *Ber-*

nard. (Super missus est Homil. 2 et In Nativ. B. V.; *M.* 183, 64. 441).

3. Gedeon Simeonita ex maioribus Iudith (Vulgata Iudith 8,1: LXX B omitt., A Γεδεών, apud *Suete* X et A Γεδεών).

GEDERA (גְּדֵרָה cum articulo i. e.

murus urbis, maceria vineae, caula seu mandra ovium; Γεδερὰ), urbs tribus Iuda in prima serie urbium Sephelae sita (Ios. 15.36) i. e. in provincia Sephelae mediterranea septentrionali. Eiusdem urbis mentio lit 1 Par. 4.23 hebr. : Isti sunt figuli habitantes in Netaim et Gadera (Γαδιρά, apud *Suete* B Γαδαρηρά, A Γαδηρά), ubi Vulgata vertit : Illi sunt figuli habitantes in plantationibus et in sepibus. Ad hanc urbem referri videntur, quae Onom. (ed. Lag. 245.39: 127.32) de Gedur in tribu Iuda annotat : « hodieque vocatur Gedrus vicus pergrandis in decimo miliario Diospoleos pergentibus Eleutheropolim ». Correspondere videtur *Khirket Djedire* a Diospoli (Lydda) inter meridiem et orientem nec procul ab *Amvās* (*Conder*, *Wilson*, *Riess*, *Selbie*, *G. A. Smith*). Ex aliorum autem opinione *Qatra* (de quo loco diximus s. v. CEDRON in vol. I. col. 797-8) inter meridiem et orientem a Iamnia cum Gadera componi debet (*Van de Velde*, *Guerin*, *Fillion*, *Buhl*, *Legendre*).

Cf. *Survey of West. Pal. Mem.* III. 13; *Wilson* apud *Smith-Fuller*, *Dict. of the Bible* I. 1110; *Riess*, *Bibel-Atlas* ed. 3 p. 13; *Selbie* apud *Hastings*, *Dict. of the Bible* II. 118; *G. A. Smith*, *Hist. Geogr. of the Holy Land*, Plate I. IV.

Pro situ *Qatra* cf. *Van de Velde*, *Memoir* p. 313; *Guerin*, *Judée* II. 35; *Fillion*, *Atlas géogr. de la Bible* 1890 p. 26; *F. Buhl*, *Alt. Pal.* 1898 p. 188; *Legendre* apud *Vigouroux*, *Dict. de la Bible* III. 150.

GEDERITES (גְּדֵרִיתִים ὁ Γεδερῖταις)

cognominatur Balanan, qui a Davide super oliveta et ficeta, quae erant in campestribus (in Sephela), positus erat (1 Par. 27.28); oriundus igitur erat de aliqua urbe nominis Geder.

GEDEROTHAIM (גְּדֵרֹתַיִם i. e.

duae caulae), urbs tribus Iuda in superiore parte Sephelae sita (Ios. 15.36), una cum Gadera enumerata (LXX Γαδηρά

καὶ αἱ ἐπαύλεις αὐτῆς). Vestigium Gederothaim urbis a Gadera distinctae non exstat. *F. de Hummelauer* (Comm. in Jos. p. 42. 271) censet nomen Gederothaim esse epexegema Gederac adscriptum et coniciit fuisse in eadem regione duas urbes contiguas seu duas unius urbis partes, Calebitarum unam, Zaraitarum alteram, utramque Gedor vel Gadera appellatam, quacque iunctim appellarentur Gederothaim seu duae Gedor. Cui coniecturae favet, quod in genealogiis Iuda appellatur 1 Par. 4,4 Phamuel Calebita et 4,18 Iared Zaraita pater (possessor) Gedor (גֶּדוֹר, גֶּדוֹר).

GEDOR (גֶּדוֹר, גֶּדוֹר), filius Iehiel patris (possessoris, domini) Gabaon inter maiores Saul (1 Par. 8,31; 9,37).

GEDOR (גֶּדוֹר) nomen urbium. 1. Gedor tribus Iuda (Jos. 15,38; גֶּדוֹר, א. גֶּדוֹר), in quarta provincia montis. Tempore Eusebii et S. Hieronymi (Onom. ed. Lag. 245,37; 127,30) appellabatur Γιδωρα, Gadora, villa in finibus Aeliae (Ierusalem) prope terebinthum. Nunc *Khîrbet Djedûr* inter Bethlehem et Hebron a via, quae has duas urbes iungit, occidentem versus distans (*Guérin*, Judée III. 380; *Survey of West. Pal. Mem.* III. 313. 354).

2. Gedor 1 Par. 4,4. 18 vide s. v. GEDEROTHAIM.

3. Gedor patria Ieroham Beniaminitae cuius filii Ioela et Zabadia David in Siceleg se iunxerunt (1 Par. 12,7; בִּן־הַגֶּדוֹר, LXX καὶ οἱ τοῦ Γεδωρ). *Keil* in h. l. defendit hanc esse Gedor in montanis Iuda (GEDOR 1), cum non repugnet aliquas familias unius tribus in finibus aliarum tribuum habitasse. Inter maiores Saul enumeratur Gedor filius Iehiel (1 Par. 8,31; 9,37); sed urbis beniaminiticae ab eo forte conditae mentio nulli fit. Neque confundenda est haec Gedor (si forte erat urbs Beniamin) cum Gadera seu Gadera, cuius existentiam ex cognomine viri (vide s. v. GADEROTHITES) et ex nomine hodierni vici *Djedire* cum probabilitate statuimus.

4. Gedor urbs Iudaeae (1 Mach. 15, 39. 40; Γεδωρα) v. CEDRON. (vol. I. col. 797).

GEENNOM i. e. vallis Ennom (Jos. 15,8; 18,16) v. ENNOM.

GEHENNA v. ENNOM et INFERNUS.

GEHON (גִּיְהוֹן, גִּיְהוֹן, גִּיְהוֹן), secundus fluvius paradisi (Gen. 2,13; Eccli. 24,37). LXX etiam Ier. 2,18 vertunt Γηων pro גִּיְהוֹן, quam vocem de Nilo communiter explicant. Quae de Gehon fluvio dici possunt, vide s. v. PARADISUS.

GELBOE (גִּלְבּוֹעַ, גִּלְבּוֹעַ) mons in tribu Issachar, qui inferiorem partem planitiei Esdrelon a campo Bethsan separat. Notissimus est clade Saulis (1 Reg. 28,4; 31,1. 8; 2 Reg. 1,6; 21,12; 1 Par. 10,1. 8); Philisthaei castrametati erant iuxta Sunam (*Sölem*), Israelitae super fontem prope Iezrahel (*Ain Djälûd* vel forte *Ain el-Maite* ad orientem *Zer'm* seu Iezrahel); Philisthaei Israelitas fugatos in ipsa montana Gelboe persecuti sunt et ibidem Saulem eiusque tres filios occiderunt; cf. APHEC 4. David plangens Saulem et Ionathan montibus Gelboe tantam imprecatur sterilitatem, ut cohibitis rore et pluvia ne primitiae quidem progerminet (2 Reg. 1,21); quodsi *Wellhausen* obicit, montes Gelboe constare sterilibus rupibus, parum ergo illis adaptari imprecationem sterilitatis, notandum est eos montes tempore Saulis non steriles, sed silvis consitos fuisse, ut ex Jos. 17,11. 15 s. merito colligitur; ceterum ut monet *F. de Hummelauer* ad 2 Reg. 1,21, montes Gelboe ex licentia poetica nonnihil latius accipi poterunt scil. inclusa ea parte campi Iezrahel, ad quam se proelium porrexerat. Insuper Jos. 17,12 s. et Iud. 1,27. 28 docemur Chanaanæos ex silvis illis non fuisse expulsos, sed tributarios factos ab Israelitis.

Describuntur «Gelboe montes alienigenarum in sexto lapide a Scythopoli, in quibus et vicus est grandis qui adpellatur Gelbus» (Onom. ed. Lag. 129,14; 247,81). Idem vicus Gelbus, qui nomen antiquum Gelboe conservat, hodie vocatur *Djebôn*. Nomen hodiernum montis est *Djebel Fuqû'a* usurpatum a vico *Fuqû'a*, qui medius fere ex montanis Gel-

boe eminet in vacuum positus. *Djebel Fuqū'a* (518 m) hodie sterilem aspectum praebet, in descensu meridionali nihil cultus est, septentrionem versus autem praeruptus et saxosus.

Cf. *Survey of West. Pal. Mem.* II. 75. 79-88. 90. 91; *Guérin*, Samarie I. 335. 336; *Riess*, Bibel-Atlas Tab. X. Dc; *Fahrngruber*, Nach Jerusalem ed. 2 II. p. 163; *D. Zaneccchia*, La Palestine d'aujourd'hui 1899 II. 588-590; *Liévin de Hamme*, Terre Sainte ed. 4 III. 78 ss.

GELONITES v. GILO.

GEMALLI (גמלי, Γαμαλι) pater Amiel exploratoris de tribu Dan (Num. 13, 13[12]).

GEMMA v. LAPIDES PRETIOSI.

GENEALOGIA. Tota narratio Geneleos innititur et quasi sustentatur genealogiis. Decies quippe recurrit eo in libro formula : haec sunt generationes; eoque modo per genealogias textitur historia ab Adam usque ad Noe enumeratis posteris Cain et Seth; pariter a Noe usque ad Abraham, enumeratis gentibus quae ex Iaphethi, Cham, Sem originem ducunt. In ipsa quoque stirpe electa narratio genealogiis pertexitur, ita quidem ut posterius Ismael ante historiam Isaac, generationes Esau ante historiam Iacob enumerentur. A filiis Iacob genus illud originem ducit quocum Deus foedus sinaiticum iniit. Genus illud secundum tribus et familias quomodo a filiis Iacob descenderit, exponitur Num. 26. 5-51.

Praeter has genealogias singulari cura stemmata nobilium virorum describebantur. Ita Moyses et Aaron, Beseleel, Ooliab (Ex. 6, 16 s.; 35, 30. 34), Salphaad (Num. 27, 1); plurima stemmata recensentur I Par. in primis octo capitulis. At in enumeratione maiorum varietas quaedam deprehenditur. Non raro enim membra quaedam intermedia omittuntur; ita a Levi usque Moysen solum recensentur Caath filius Levi, Amram filius Caath et pater Moyses; dum ab Ephraim usque Iosue enumerantur Thale, Thaan, Laadan, Elisama, Nun (I Par. 7, 25-27); I Par. 26, 24 nominatur Subael qui tempore Davidis erat prae-

positus thesauris; sed stemma eius brevissime describitur: Subael filius Gerson filii Moysi. In genealogia Esdrae Esdr. 7, 1, si conferatur cum I Par. 6, 4-15, deprehendetur sat multa membra esse omissa (ita inter Azariam, qui dicitur filius Maraiioth et Maraiioth desunt sex membra). Notum pariter est in genealogia Matth. 1 inter Ioram et Oziam omissos esse tres reges (Ochozias, Iosias, Amasias). Legimus Ios. 7, 1: Achan filius Charmi, filii Zabdi, filii Zare de tribu Iuda. Verum qua ratione hoc stemma confectum est? Agitur, ut deprehendatur sorte qui contra praeceptum Domini ex spoliis sibi aliquid retinuit. Iosue itaque applicuit Israel per tribus suas et inventa est tribus Iuda; quae cum iuxta familias suas esset oblata, inventa est familia Zare; illa per domos applicatur et reperitur Zabdi, cuius domum in singulos viros dividens Iosue invenit Achan filium Charmi. Unde quod habetur, filii Zabdi, filii Zare, nihil aliud significat nisi eum descendere ex illa cognatione seu familia quae Zare nomen gerit, ex illa domo cui est nomen Zabdi. Qua ratione in stemmate non enumerantur avus, proavus etc., sed solum ad quam domum, cognationem, tribum aliquis sit adscribendus. Sed pleraque stemmata tamen aliter esse confecta, ut revera avus, proavus etc. recenserentur certum esse videtur ex ipsa serie nominum, quibus scilicet non ampla quaedam cognatio, familia, domus, sed viri privati plerumque designantur; confer v. g. genealogiam David: Phares genuit Esron, Esron genuit Aram, Aram autem Aminadab, Aminadab genuit Nahasson, hic Salmon, Salmon Booz, Booz genuit Obed, Obed Isai. Isai David. Verum hic quoque complura membra esse omissa, iam ex eo patet quod Nahasson erat princeps filiorum Iuda in egressu ex Aegypto (Num. 1, 7; 2, 3; 7, 12; 10, 14) et quod Salmon genuit Booz de Rahab, Booz autem Obed ex Ruth (Matth. 1, 5).

Stemmata autem magna cura esse asservata, iam elucet ex multis illis quae in s. litteris recensentur, patet quoque ex eo quod communissime saltem patris nomen adscribitur. Qui reduces ex exsi-

lio scriptura genealogiae probare non poterant se esse ex genere sacerdotali, eiecti sunt de sacerdotio (Esdr. 2,62). Atque Flav. Iosephus quoque dicit se afferre generis sui successionem, prout eam in tabulas publicas relatum invenit (Vita 1) et cont. Ap. 1,7 ostendit quanto studio genus sacerdotale servetur purum et impermixtum et quomodo sacerdotes in regionibus alienigenarum degentes in urbem Ierusalem mittant descripta nomina parentum et maiorum additis testium nominibus. Eius studii argumenta quoque cernuntur in genealogiis apud Matthaeum et Lucam, eo quod « ibant omnes ut profiterentur singuli in suam civitatem » (Luc. 2,3) et quod memoriae tradi potest fuisse Annam de tribu Aser, Paulum de tribu Benjamin (Luc. 2,36; Rom. 11,1; Phil. 3,5), Zachariam sacerdotem de ordine seu classe Abia (Luc. 1,5).

De genealogiis Matth. 1 et Luc. 3 haec notanda sunt; utraque est genealogia Ioseph. Fuerunt quidem qui putarent a Luca referri genealogiam b. Virginis; qui itaque Luc. 3,23 explicarent: et Iesus... erat filius, ut putabatur, Iosephi (revera autem) Heli i. e. erat nepos Heli, patris b. Virginis. Quae tamen explicatio textui non consentanea est; nam Ἰωσήφ τοῦ Ἡλίου aliter concipi nequit quam ὦν υἱός;... Ἰωσήφ υἱοῦ Ἡλίου etc. Et si Lucas dicere voluisset Iesum fuisse quidem putatum filium Ioseph, revera autem fuisse nepotem Heli, certissime id clarius expressisset. Nullum eius sententiae indicium reperitur apud interpretes ante saec. 16. (cf. *Patritius*, De evangeliiis III. p. 87. 92), quamquam S. Hilarius in opusculo a Card. Maio reperto et edito (Nova Patr. bibl. I. p. 477) asserit, multos velle generationem quam enumeret Lucas deputari Mariae (cf. *Cornely*, Introd. III. p. 197).

Ut autem utriusque genealogiae diversitas explicetur, ad legem leviratus erit recurrendum, qua lege scil. quis duos patres habere poterat, alterum naturalem a quo esset genitus, legalem alterum, in cuius nomen et bona succederet. Iam Iulius Africanus (ex ineunte saeculo 3.) ad Domini secundum carnem consanguineos provocans eos haec tra-

didisse ait: Iacob et Heli fuisse fratres uterinos ex eadem matre Estha, quae ex priore marito Mathan (ex linea Salomonis) conceperit Iacobum, ex altero marito Matthai (ex linea Nathan) autem Heli. Cum Heli mortuus esset uxore sine liberis relicta, eius fratrem Iacob ex vidua Heli secundum legem leviratus genuisse Ioseph, qui proin filius exstiterit naturalis Iacobi ex posteris Salomonis, legalis autem Heli ex posteris Nathan (cf. *Euseb.* His. eccl. 1,7; *M.* 20,89 ss.; *Patritius* l. c. p. 94 s.; *Cornely* l. c. p. 198; *Knabenbauer* Comment. in Luc. 3,23). Eandem legem leviratus agnosces intervenisse, dum Salathiel a Matthaeo quidem filius dicitur Iechoniae, a Luca filius Neri.

Quaenam sint genealogiae quibus ne intenderent apostoli monet (1 Tim. 1,4; Tit. 3,9) aliter ab aliis concipitur vel de theogoniis gentium vel de genealogiis angelorum apud Essenos, vel de emanationibus spirituum, aeternum apud Gnosticos, vel de genealogiis Iesu vel solum de genealogiis in Vet. Test. descriptis, ex quibus occultae quaedam doctrinae deducantur. Iterum alii provocantes ad τὸ γενεαλογικόν apud Philonem cernunt declarari varias de patriarchis et Moyse narrationes et fabulas (cf. *Hort*, Judaistic Christianity 1894 p. 136).

I. KNABENBAUER.

GENERATIO, generationes. Ponitur vox in Vulgata pro hebr. תולדות et דור. Unde variam induit notionem. In Genesi enim, ubi saepius legitur: istae sunt generationes caeli et terrae, Noe, Thare, Ismael, Isaac, Esau, communiter explicant: haec est historia (cf. *F. de Hummelauer*, Comment. in Genesim p. 40); alias vox designat filios, postereros, progeniem, stirpes quae ex una aliqua familia exortae sunt (Num. 1, 20 s.). Saepissime ponitur pro דור: unde significat homines qui aliqua aetate vivunt, aequales; v. g. Gen. 7,1: te vidi iustum coram me in generatione hac. Eodemque sensu propter hebr. explicari oportet Is. 53,8: generationem eius quis enarrabit? quasi propheta dicat: quis explicet pravitatem hominum

illius temporis (et multos ita rite explicare, vide *Knabenbauer*, Comment. in Is. II. p. 310). Dein frequenter dicitur de posteritate, de successione, qua una aetas hominum ab alia excipitur; ita Gen. 15,16 : generatione quarta revertentur huc; Ex. 3,15 : hoc memoriale meum in generationem et generationem; 29,42 : sacrificium est Domino oblatione perpetua in generationes vestras. — Dicitur porro generatio pro potestate generandi; ita Is. 66,9 (Vulgata) : si ego qui generationem ceteris tribuo sterilis ero? aliter, notione passiva Ez. 16,3 : radix tua et generatio tua de terra Chanaan i. e. ortus tuus, origo tua. Eo modo quoque accipi potest liber generationis, βίβλος γενέσεως, liber originis, quo scil. genealogia seu catalogus progenitorum describitur (Matth. 4,1; cf. Gen. 5,1). A qua acceptione non est alienum quod Hebr. 7,6 in Vulgata habetur : cuius autem generatio non annumeratur in eis, decimas sumpsit ab Abraham i. e. Melchisedech qui non habet originem (genealogiam, ὁ δὲ μὴ γενεαλογούμενος ἐξ αὐτῶν) ex stirpe electa. Sensu sublimiore legitur 1 Ioan. 5,18 : sed generatio Dei conservat eum, ὁ γεννηθεὶς ἐκ τοῦ Θεοῦ τηρεῖ αὐτόν; est itaque idem ac natus esse ex Deo. Demum ponitur notione procreationis 1 Tim. 2,15 : salvabitur autem per filiorum generationem διὰ τῆς τεκνογονίας.

GENESAR v. GENESARETH (stagnum et terra).

GENESARETH. 1. Genesareth stagnum ἡ λίμνη Γεννησαρέτ appellatur Luc. 5,1 lacus ille celeberrimus, qui alias vocatur mare Galilaeae (Matth. 4,18; 15,29; Marc. 1,46; 7,31; Io. 6,1) vel mare Tiberiadis (Io. 6,1; 24,1), vel mare sine addito (Marc. 2,13 et saepius), in Vetere Testamento (Num. 34,11; Deut. 3,17; Jos. 11,2; 12,3; 13,27) mare Cenereth (גִּנְרֵת, Χενερῆθ) seu mare Ceneroth (גִּנְרֹת, Κενερῶθ, Χενερῶθ), denique 1 Mach. 11,67 aqua Genesar (Γεννησάρ); cf. etiam Is. 9,1 et Matth. 4,13 : via maris scil. maris Galilaeae vel Tiberiadis.

A Flavio Iosepho (Bell. iud. III. 10,7)

lacus Genesar (Γεννησάρ) describitur stadiorum 40 latitudine patens, 140 longitudine, aquae dulcis et maxime potabilis, limpidus undique in arenam ad litus desinens, varia alens piscium genera, figura et sapore ab alterius loci piscibus diversa. Plinius (Nat. hist. V. 15,71) cursum Iordanis annis describens dicit : « Ubi prima convallium fuit occasio, in lacum se fundit quem plures Genesaram vocant 16 mil. pass. longitudinis, amoenis circumseptum oppidis, ab oriente Iuliade et Hippos, a meridie Tarichea, quo nomine aliqui et lacum appellant, ab occidente Tiberiade aquis calidis salubri ». A modernis exploratoribus lacui attribuitur longitudo 21 km, latitudo maxima 12 km, profunditas circa 44 m, depressio infra mare Mediterraneum 208 m. Litori orientali imminet planities montana Gaulanitidis (plus quam 300 m alta), litori inter meridiem et occidentem planities vulcanica *Sahel el-Ahmā* (usque ad 300 m); inter septentrionem et occidentem colles sunt humiliores et etiam a litore remotiores, utpote per terram Genesareth seiuncti, de qua vide infra. Aspectus lacus caerulei inter montes modicae altitudinis conclusi multum abest a tristitia maris Mortui et potius amoenitatem lacuum Helvetiae aliquatenus in memoriam revocat. Aeque ut plurimum est placidum, interdum tamen ingentibus sed non diuturnis procellis exagitatum, praesertim quando venti ab aquilone et austro flantes intra circulum montium undique tenentur; Evangelistae compluries istas procellas ingentes et repentinas paucis ad verum exprimunt (Matth. 8,24; 14,24; Marc. 4,37; 6,48; Luc. 8,23; Io. 6,18). Navigatio frequens erat, ut ex Evangeliiis discimus; pugnam navalem Romanorum, qui rates construxerant contra scaphas parvas et piraticas Iudaeorum, describit Flavius Iosephus (Bell. iud. III. 10,9); hodie paucissimae tantum cymbae piscatoriae iuxta litus cernuntur. Piscium genera adhuc sunt varia et etiam rariora, quae alias non nisi in regionibus calidioribus inveniuntur; cf. Flavii Iosephi verba supra. Aqua est salubris ad bibendum; ab incolis litoris passim bibitur, postquam

per noctem in situlis foraminosis aëri exposita est, ut frigescat; calor enim in illa quasi pelvi montana multum praevaleret propter regionis depressionem supra indicatam.

Hodie lacus vocatur *Bahr el-Tabariye* ab urbe *Tabariye* (Tiberias), quae sola nomen urbis meretur ex multis florentissimis, quibus olim cingebatur; v. TIBERIAS. Dimidiae horae spatio infra Tiberiadem inveniuntur thermae *el-Hammâm*; v. HAMMOTH DOR. Prope istas thermas sicuti etiam prope aquas salvas aquilonem versus ab *'Ain el-Tābigħa* aqua lacus minus iucundo sapore inficitur.

Cf. *Ritter*, *Erdkunde* XV. 281 ss.; *Fahrngruber*, *Nach Jerusalem* ed. 2 II. 186 ss.; *Baedeker-Benzinger*, *Palaestina und Syrien*, ed. 5 p. 280 s.; *Buhl*, *Alt. Pal.* 1896 p. 113 s.; *D. Zancchia*, *La Palestine d'aujourd'hui* 1899 II. 644 ss.; *Liévin de Hamme*, *Terre Sainte* ed. 4 III. 126 ss.

2. Genesareth, Genesar terra (Γενναρῆς) Matth. 14,34 et Marc. 6,33 est illa regio, quae 3 Reg. 15,20 appellatur universa Cenneroth (בְּלִיכְנֶרֶת, כְּנַרְתָּא ἢ Χεννερέθ). Praeterea inter civitates munitissimas Jos. 19,35 enumeratur Cenereth (כְּנַרְתָּא in pausa pro כְּנַרְתָּא, Χεννερέθ).

Huius urbis nullum vestigium exstat; refert quidem S. Hieronymus (*Onom.* ed. Lag. 112,30) aliquam traditionem Chennereth antiquum nomen Tiberiadis oppidi fuisse; verum tenuis illa traditio merito relinquitur, et a plerisque urbs illa Cenereth magis aquilonem versus quacritur scil. in terra Ceneroth seu Genesareth, de qua nunc agendum est. Utrum haec regio nomen habeat a lacu an lacus a regione, dirimi non potest; neque enim constat lacum a forma citharae (כִּנֹּר) nomen accepisse. Terra Genesareth hodie communiter agnoscitur planities *el-Ghuweir* (seu *parvum Ghôr*), quae a medio litore occidentali paulo infra *Medjdel* (Magdala, Magedan) aquilonem versus usque ad *Khân Minye* paulo infra *Tell Hûm* (Capharnaum) protenditur. Florentissimum eius regionis statum Flavius Iosephus elato animo describit (*Bell. iud.*

III. 10,8) : « Gennesar autem lacum praetendit eiusdem nominis regio natura simul et pulchritudine admirabilis. Nullam enim ipsa arborem pro ubertate sua recusat atque omnigenas conservare agri cultores; aerisque temperies etiam diversis est accommodata. Nam et nuges, quae arborum maxime frigoribus gaudent, magna isthic crescunt copia; ubi etiam palmae, quae calore vigent, iuxtaque has ficus item et oleae, quibus aura mollior designata est. Naturae dixerit aliquis ambitionem esse, quae vim sibi met adhibuerit, ut in unum compingat pugnancia; annique tempestatum gratam quandam contentionem, unaquaque earum regionem illam veluti sibi propriam vindicante. Neque modo alit praeter opinionem poma varia, sed et diu conservat; nam et omnium praestantissima, uvas sane et ficus, per decem menses sine intermissione suppeditat, ceteros vero fructus per totum annum cum illis consenescentes. Ad aeris etiam temperiem accedit, quod et fonte irrigatur uberrimo, qui Capharnaum (Καφαρναούμ ed. Niese) ab indigenis appellatur. Hunc nonnulli venam esse Nili existimarunt, quod generat pisces Coracino (qui in Alexandrina palude alitur) similes. Longitudine autem regio iuxta litora lacus cognominis 30 stadiis extenditur et latitudine 20 ». Vix dubium est, quin haec omnia plus minusve conveniant planitiei *el-Ghuweir*, quae intra terminos supra descriptos longitudinem unius saltem horae et latitudinem 20 vel 30 minutarum habet. Maxima quidem eius pars hodie est quasi desertum alto gramine, carduis, vepribus, olearis consitum; attamen iuxta litus adjuvante hominum manu et opera etiam gignuntur triticum, hordeum, milium, citreum, melo, palmula, malum medicum, oryza, tabacum, arundo sacchari, xylon, indigofera. Duo fontes in hac planitie sunt *'Ain el-Tîne* iuxta *Khân Minye* et *'Ain el-Mudawwara* paulo supra *Medjdel*. Uter est fons ille uberrimus a Flavio Iosepho (l. c.) Capharnaum dictus? Aliqui cum *Robinson* respondent : *'Ain el-Tîne*, alii cum *F. de Saulcy* : *'Ain el-Mudawwara*. Felicius, ut videtur, *V. Guérin* fontem Capharnaum

agnoscit *'Ain Tābigha* (= Heptapegon seu « septem fontes ») in planitie omnihil altiore eiusdem nominis *Tābigha*, quae inter *Khān Mīnye* et *Tell Hūm* extenditur; ab hoc enim fonte altiore aquae in magnam partem regionis Genesareth diffundi poterant ope aquaeductus, cuius ruinae adhuc cernuntur. Praeterea planities *el-Gihuweir* ex collibus, quibus ab occidente cingitur, tres torrentes excipit: *Wādi el-'Amūd*, *Wādi el-Rabadīye*, *Wādi el-Hammām*, qui eam irrigant et in lacum Genesareth desinunt. Urbem Genesareth Jos. 19,35 V. *Guérin* agnoscit *Khīrbet Abu Shūshe* iuxta *Wādi el-Rabadīye*, dum Talmud hieros. eam prope Ennabrim Fl. Iosephi (Bell. iud. III. 9,7) 30 stadia seu circa 5,3 km infra Tiberiadem collocat (*Neubauer*).

Cf. *Robinson*, Palaestina III. p. 535 ss.; *F. de Saulcy*, Dict. des Antiquités bibl. 1859 p. 330 s. (apud *Migne*, Encycl. III. vol. 45); *Guérin*, Galilée I. 207 ss.; *Neubauer*, Géogr. du Talmud p. 214. 215; *Fahrngruber*, Nach Jerusalem ed. 2, II. 189; *Buhl*, Alt. Pal. 1896 p. 114. 225; *D. Zuncchia*, La Palestine d'aujourd'hui 1899 II. 651 ss.; *Baedecker-Benzinger*, Palaestina und Syrien, ed. 5 p. 283.

GENNAEUS (Γενναῖος), pater Apollonii (2 Mach. 12,2; v. APOLLONIUS 3).

GENTHON (גנתון, sed Neh. 12,4 גנתון), sacerdos, qui cum Zorobabel ex captivitate rediit (Neh. 12,4); eius familiae princeps in diebus Ioachim pontificis erat Mosollam (Neh. 12,16); idem nomen inter signatores foederis legitur (Neh. 10,6 [7]; Γενναῖος, Α Γενναῖος, Α Αγαθός).

GENTILIS v. ETHNICUS.

GENTIUM TABULA Gen. 10,1-31 est catalogus non individuum, sed populorum, in quo recensentur « gentes, non homines » (S. Aug. Civ. Dei 46,3 apud *Migne* 41,481). Non omnes mundi gentes in hac tabula enumerari manifestum est. « Ne illud quidem demonstrari potest voluisse s. auctorem, sive is Moyses fuerit sive auctor eo recen-
tor, omnium quas ipse nrat gentium elenchum texere. Notissimi quippe vel Moysis tempore, maxime in Aegypto,

erant Nigritae, qui et plurimi numero ibidem degebant et depicti in muris sat frequenter conspiciuntur. Desiderantur item Amalecitarum et aliarum quaedam gentes, quarum in Pentateucho sat frequens habetur mentio. Reapse, licet aliqua elenchi nomina nondum sint plane perspecta, affirmare tamen iam licet, auctorem solas recensere gentes familiae caucasicae, quae antiquitus Asiam anteriorem et adiacentes Europae et Africae tractus incolebant » (*F. de Humboldt*, Comm. in Gen. p. 293).

Secundum triplicem rationem sacer textus Gen. 10,3. 20. 31 dicit gentes esse divisas: secundum cognationes suas (momentum ethnographicum), secundum linguas suas (momentum linguisticum), in regionibus suis (momentum geographicum). Primarium est momentum ethnographicum, uti iam indicat nativus sensus verborum *filii* et *genuit*. Exhibetur vera genealogia affinitatem gentium et ex uno capite Noe originem describens.

I. Ad familiam iaphethicam referuntur

1. Gomer, probabiliter Cimmerii, Gimirrai. A Gomer descendunt 1) Ascenez, fortasse Armenia occidentalis; 2) Riphath, Paphlagones (Rhebas fluvius Bithyniae, Rhebantia ad Bosporum Thracicum); 3) Thogorma, Armeni.

2. Magog, Scythae (?).

3. Madai, Medi.

4. Iavan, Iones vel Graeci. Ad familiam Iavan pertinent 1) Elisa, Aeoles; 2) Tharsis, probabiliter Tyrrheni (dicti antiquitus Tursani, Tyrseni, Tursni, postmodum Tursci, Tusci, Etrusci) et forte etiam Tartessii in Hispania; 3) Cellhim, sensu strictiore Cyprus, latiore insulae maris Mediterranei orientalis et etiam regiones maritimae adiacentes; 4) Dodanini, Dardanii (?) vel forte Rhodii, ut coniunctum.

5. Thubal, Tibareni, assyr. *Tabal*.

6. Mosoch, Moschi, assyr. *Muski*, limi Colchis (assyr. *Kaski*).

7. Thiras, Thraeces (?) vel forte Tyrrheni (Tyrseni) de genere Pelasgorum, non illi quidem italici, qui Etrusci vocantur, sed aeoliae maris Aegaei, piratae famosi.

II. Ad familiam chamilicam referuntur

1. Chus, Aethiopes. A Chus descendunt 1) Saba in insula Meroe (?) vel forte orientem versus in litore maris; 2) Hevila, gens Avalitarum et sinus Avalites, hodie *Zeila*; 3) Sabatha iuxta Astaboram (hodie *Atbara*) Nili tributarium vel forte in Sabbatha (Sabota) metropoli Atramitarum (Chatramotitarum); 4) Regma, Rhammanitae (?) inter Minaeos et Chatramotitas vel probabilius Rhegma urbs in litore arabico sinus Persici (hodie *Redjam* in confinibus *Oman* et *Bahrein*); ad familiam Regma pertinent a) Saba, Sabaei in Arabia felice (cuius urbs primaria erat Saba seu Mariaba) et passim in Arabia; b) Dadan in litore et insulis maris Persici; 5) Sabatacha (?).

2. Mesraim, Aegyptii, quibus accensendi sunt 1) Ludim, aegyptiace *Lutu*, *Rutu*, Aegyptii proprie dicti; 2) Ananim, *Anu* in tota fere valle Nili dispersi; 3) Laabim, Libyes; 4) Nephthum, incolae Aegypti mediae (?) scil. *na-Phthah* i. e. pertinentes ad Phthah deum Mempheos; 5) Phetrusim, incolae Aegypti superioris; 6) Chasluim, Cassiotis (?) inter Pelusium et torrentem Aegypti; 7) Capthorim, probabiliter Creta vel secundum *P. de Cara* ora maritima Phoeniciae sensu lato i. e. Palaestinae et Syriae.

3. Phuth, gens *Punt* in litore Africae Somali et in obiecto Arabiae litore.

4. Chanaan, Palaestineses et Phoenices, e quibus enumerantur 1) Sidonii, quorum urbs in nummis dicitur mater Tyri, mater Aradi; 2) Hethaei tum extra tum intra terram sanctam, praesertim in montanis Iuda; 3) Iebusaei circa arcem Iebus (postea Iersalem); 4) Amorphaei, incolae montium cis et trans Iordanem; 5) Gergesaei ad occidentem Iordanis; 6) Hevaei, ramus Amorrhaeorum; 7) Aracaei circa Arcas inter Tripolim et Antaradum; 8) Sinaei iuxta Aracaeos, ab Arcis aquilonem versus; 9) Aradii incolae Aradi insulae; 10) Samaraei inter Aracaeos et Aradios; 11) Amathaei incolae Emath ad Orontem.

III. Ad familiam semiticam referuntur

1. Aelam, Aelamitae.

2. Assur, Assyrii.

3. Arphaxad, probabiliter Chaldaei. Ab Arphaxad descendunt per Sale et Heber 1) Phaleg (eiusque posterii Reu, Sarugi, Nachor, Thare, Abraham); 2) Iectan in Arabia meridionali; Iectanidarum tredecim tribus recensentur: Elmodad, Saleph, Asarmoth, Iare, Adoram, Uzai, Decla, Ebal, Abimael, Saba, Ophir, Hevila, Iobab.

4. Lud, Lydi (?).

5. Aram, Aramaei, ad quos pertinent 1) Us, Trachonitis (?) et Damascus (?); 2) Hul, Armenia circa montem Masium (?); 3) Gether in Mesopotamia (?); 4) Mes, fortasse Mesanaei in regione ad Tigridis Euphratisque ora, quae postea Mesene audiebat, assyr. terra *Mas*.

GENUA FLECTERE. In oratione ad Deum quandoque ad maiorem ostendendam reverentiam flectebantur genua; ita narratur 3 Reg. 8,34 de Salomone orante in dedicatione templi: utrumque genu in terram fixerat et manus expanderat in caelum. Esdras quoque orat curvatis genibus et expansis manibus (Esdr. 9,5); cf. 2 Par. 6,13; 29,30. Daniel autem tribus temporibus in die flectebat genua sua et confitebatur coram Deo (6,10). Isque corporis habitus tamquam signum adorationis a Deo postulatur dicente: mihi curvabitur omne genu (Is. 45,24) et qui non adoraverunt Baal, de iis dicitur: et derelinquam mihi in Israel septem millia virorum, quorum genua non sunt incurvata ante Baal (3 Reg. 19,18; Rom. 11,4). Iesus ipse in horto ante passionem positus genibus orabat (Luc. 22,41); positus genibus orat Stephanus (Act. 7,59), Petrus ponens genua oravit et oratione fusa Tabitham mortuam ad vitam revocavit (Act. 9,40); Paulus oratione habita ad presbyteros positus genibus suis oravit cum omnibus illis; pariter Tyri in litore ipse et omnes qui eum ad litus deduxerant positus genibus orantur (Act. 20,36; 21,5). Quem orandi modum Paulus etiam in epistulis commemorat Eph. 3,14: flecto genua mea ad Patrem Domini nostri, et Phil. 2,10 Iesu dignitatem et exaltationem ita describit, ut in eius nomine omne genu flectendum

esse dicat caelestium, terrestrium, infernorum. — Singularem orandi modum adhibuit Elias in vertice Carmeli, ut pluviam efflagitaret a Domino: pronus in terram posuit faciem suam inter genna sua (3 Reg. 18, 42).

Flexis genibus honor quandoque Christo quoque exhibebatur et petitio beneficii eo demissionis actu et studio ei offerebatur; ita Matth. 17, 14 accessit ad eum homo genibus provolutus ante eum dicens: Domine, miserere filio meo; pariter genu flexo leprosus petit sanationem et iuvenis ille flexo genu rogat: magister bone, quid faciam, ut vitam aeternam percipiam (Marc. 4, 40; 10, 17).

Hominibus quoque nobilibus flexis genibus honor exhibetur. Cum in Aegypto Ioseph esset publice honorandus tamquam secundus a rege, regio curru per civitatem vectus est clamante praecone, ut omnes coram eo genu flecterent (Gen. 41, 43; atque eo modo explicant אֲבָרָךְ vocem aegyptiacam: proice te; cf. *Gesenius-Buhl*, Handwoerterbuch ed. 13 p. 8; *F. de Hummelauer* ad Gen. 41, 43). Princeps, missus ad Eliam et timens similem sortem sicut acciderat aliis ante eum, curvavit genna ad Eliam et precatus est eum (4 Reg. 1, 13). Coram Aman cuncti servi regis flectebant genna; Mardocheus autem hunc honorem quem soli Deo exhibendum putavit noluit transferre in hominem (Esth. 3, 2 s.; 13, 12-14). Solebant reges quoque salutari in regia dignitate flexis genibus, praesertim in oriente; quare milites regiam Iesu dignitatem Indibrio habentes genu flexo ante eum illudebant ei dicentes: ave, rex Iudaeorum (Matth. 27, 29; Marc. 15, 19).

GENUBATH (גִּנְבַּת, Γενυβάθ), filius

Adad; mater eius, uxor Adad, erat soror uxoris Pharaonis; quare Gennubath in domo regia cum filiis regis educatus est (3 Reg. 11, 20 et v. ADAD 3).

GENUS vide s. v. GENEALOGIA.

GERA (גֵּרָא, Γερά). 1. Quartus filius Benjamin (Gen. 46, 21); sed LXX h. l. eum faciunt filium Bela primogeniti Ben-

iamin; item 1 Par. 8, 3 filiis Bela accensetur.

2. Pater Aod iudicis ex tribu Benjamin (Iud. 3, 15).

3. Beniaminita quidam, quo duce et auctore aliquae cognationes beniaminiticae ex Gabaa (Geba) in Manabath (vide s. v.) abductae sunt (1 Par. 8, 5. 7; de isto eventu nihil praeterea notum est).

4. Pater Semei Beniaminitae et adversarii Davidis (2 Reg. 16, 5; 19, 16. 18; 3 Reg. 2, 8).

Nomen Gera igitur apud posteros Beniamin perseverabat. Cf. tabulam genealogicam in Concord. Lat. huius Cursus p. 9.

GERARA (גֵּרָרָה, Γεραρά) urbs nominatur una cum Gaza in determinando termino Chanaan meridionali ad occidentem vergente (Gen. 10, 19). Abraham cum inter Cades et Sur habitaret, peregrinatus est in Geraris et cum Abimelech rege Gerarae foedus pepigit (Gen. 20, 1. 2 s.), ad quem textum *F. de Hummelauer* notat Geraram non necessario inter Cades et Sur quaerendam esse. Postmodum Isaac primum Gerarae, deinde in valle torrentis Gerarae commoratus cum altero Abimelech rege Gerarae foedus pepigit (Gen. 26, 1. 6. 17. 20. 26); cf. s. v. ABIMELECH 1. Post proelium in valle Sephata prope Maresam Asa rex Iuda Aethiopes Geraram usque persecutus est et omnes urbes per circuitum Gerarae percussit (2 Par. 14, 13. 14). Vix dubium est, quin ad eandem urbem, quam loci citati extremam Palaestinae esse evincunt, etiam referendi sint Gerreni (οἱ Γεραρηνοί, lect. var. Γεραρηνοί), qui 2 Mach. 13, 24 (cf. 1 Mach. 11, 39) terminum inter regna Seleucidarum et Aegyptiorum indicant; antiquior enim opinio, qua Gerreni comparabantur cum Gerrhon (*Ptolem.* IV. 5, 11; *ed. Müller-Fischer* 5, 5) seu Gerba (*Strabo* XVI. 2, 33) urbe inter Pelusium et Rhinocoluram, merito derelicta est, quoniam ipsa Rhinocolura (*el-'Arish* ad ostium torrentis Aegypti) eo tempore non Seleucidarum, sed Aegyptiorum regno comprehendebatur. In *Onom. (ed. Lag.* 240, 28; 124, 15) describitur: Gerara, ex cuius nomine nunc

Geraritica vocatur regio trans Daroma, procul ab Eleutheropoli 25 mil. pass. ad meridiem. Aegyptiace *Kruru* (cf. *A. Mariette, Maspero, W. M. Müller*). Hodie a plerisque agnoscitur in ruinis *Umm Djerar* 10 km a Gaza meridiem versus et iuxta torrentem *Wādi Ghazze*, qui ab hoc loco etiam *Wādi Djerar* audit (*Guérin, Riess, Survey of West. Pal., Zanechia, Legendre, Kampffmeyer*). Aliis vero Gerara videtur quaerenda esse in *Wādi Djerar* a Cadesbarne inter meridiem et occidentem (*Trumbull, Guthe*).

Cf. *Guérin*, Judée II. 257-262; *Riess*, Bibel-Atlas ed. 3 s. v.; *Survey of West. Pal. Mem.* III. 389; *D. Zanechia*, La Palestine d'aujourd'hui 1899 II. 296; *Legendre* apud *Vigouroux*, Dict. de la Bible III. 197-200; *Kampffmeyer* in Zeitschr. d. D. Pal.-Ver. XVI. 1892 p. 34; *Trumbull*, Kadesh Barnea 1884 p. 61-65; *H. Guthe* in Zeitschr. d. D. Pal.-Ver. VIII. 1885 p. 215; *A. Mariette*, Les listes géogr. des pylônes de Karnak 1875 p. 36; *G. Maspero*, Sur les noms géogr. de la liste de Thoutmos II., qu'on peut rapporter à la Judée 1888 p. 8; *W. M. Müller*, Asien u. Europa nach altaegypt. Denkm. 1893 p. 159.

GERASENI; ita habetur in Vulgata constanter Matth. 8,28, Marc. 5,1, Luc. 8,26. 37. In graeco legitur ex melioribus codicibus apud Matth. Γερασηνῶν, apud Marc. Γερασηνῶν, apud Luc. edidit *Tischendorf* Γεργασηνῶν. Uti Iosephus habet (Bell. iud. IV. 7,3), Gadara est metropolis Peraeae valida et distat a Tiberiade stadiis sexaginta; hodie eo loco *Umm Qeis* oppidum situm est. Unde lectione Gadareni regio illa describitur ac nominatur ex urbe maiore. Verum Gerasa (hodie *Djerash*) haud procul a Iaboc septentrionem versus sita nimis distat quam ut regio ad lacum posset appellari regio Gerasenorum. Locum quo discipuli appulerunt multi quaerunt ibi, ubi hodie exstant ruinae nomine *Kersa*, *Kursi* designatae prope lacum; eo quoque loco praecipitia sunt crebra (cf. *Schumacher*, Der Dscholan, Leipzig 1886 p. 177), quem locum Origenes quoque describere videtur eum vocans Gergesa (cf. *Knabenbauer*, Comm. in Matth. ed. 2 I. p. 345). Aliter tamen de quaestione hac censet investigatione ipsius

illius regionis accuratissime facta *Neumann* (Quin Dscheradi, Freiburg i. Br. 1894); secundum ipsum urbs illa, de qua evangelistae loquuntur est Hippos, a Iudaeis Susitha vocata, hodie *Sūsīye*; regio quae hodie Dscheradi vocatur est illa de qua narratio evangelica tradit et homines qui incolebant terrae tractum inter *Wādi Semak* et *Wādi Nqēb* vocatos esse opinatur *Gerudaeos*, ex quo nomine transpositione litterae unius explicatur lectio Gadareni et tenui aspiratione litterae d lectio Geraseni (cf. l. c. p. 21. 31. 44). Cum opere citato cf. *M.-J. Lagrange* in Revue bibl. IV. 1895 p. 512-522, ubi evincitur lectio *Geraseni* criticis rationibus probata, lectio *Gergeseni* errore Origenis orta et componitur illa urbs in regione Gerasenorum cum *Qal'at el-Ilōn* (= Gamala) inter *Sūsige* (Hippos) et lacum Genesareth.

GERGESAEUS (Γεργεσαῖος, Γεργεσαῖος),

gens chanaanitica a Chanaan filio Cham descendens (Gen. 16,16; 1 Par. 1,14). Gentis huius regio promittitur Abraham posteris possidenda (Gen. 15,21). Enumeratur proinde inter illas stirpes, quas Israelitae in Chanaan ingressi delere debent (Deut. 7,1; Ios. 3,10; 24,11; Neh. 9,8). Sedes huius stirpis accuratius determinari nequit; solum ex Ios. 24,11 patet eam gentem simul cum Amorhaeis, Pherezaeis, Chananaeis, Hethaeis, Hevaeis, Iebusaeis ad occidentem Iordanis incoluisse. Vestigium Gergesaeorum fortasse conservatur in fragmento quodam tabulae cuneiformis (K. 261 British Museum), in quo commemorantur *Kirkishāti* ac saepius designantur *rabbāti* i. e. numerosi (cf. *Pinches*). Eos tempore Iosue in Armeniam emigrasse fert traditio iudaica (cf. *Knobel*). Gergesacos apud Alexandrum M. in Palaestina commorantem conquestos esse, quod suis sedibus pulsi terrore Iosue in Africam se recepissent, et de prioribus sedibus repetundis cum Iudaeis disputasse infelici tamen successu narratur in Talmude (cf. *Otho*). Opinantur aliqui (*Wilson*), Gerasenos, qui etiam Gadareni, Gergesenī appellantur, fortasse reliquias quasdam stirpis Gergesaeorum fuisse.

Cf. *Pinches* apud *Hastings*, *Dict. of the Bible* II. 178; *Knobel*, *Völkertafel* 1850 p. 333; *Otho*, *Lexicon rabbinico-philologicum* p. 30. 31; *Wilson* apud *Smith-Fuller*, *Dict. of the Bible* I. 1099. 1196.

GERRENI 2 Mach. 13,24 vide s. v. GERARA et GERZI.

GERSAM (גֵּרְשָׁם, גֵּרְשִׁים; Γερσαμ, sed Iud. 18,30 Γερσών, apud *Sweet* B Γερσώμ, Α Γερσώμ), filius Moysis ex Sephora uxore (Ex. 2,22; 18,3); Moyses nomen filio imponens interpretatur: advena fui in terra aliena. « גֵּר advena, שָׂם ibi.

Explicatio certe non est etymologica, sed mnemoneutica. Si nomen a radice גֵּרשׁ derivetur, habebitur significatio *exsul*, quo nomine Moyses pulchre exprimebat suae gentis desiderium eiusque repetendae voluntatem » (*F. de Hummelauer* ad Ex. 2,22). Idem 1 Par. 23,15. 16; 26,24 in Vulgata scribitur Gersom, pater Subuel seu Subael. Eiusdem mentio fit Ex. 4,24-26 tacito nomine. Praeterea Iud. 18,30 dicitur levita Jonathan filius (i. e. ex posteris) Gersam filii Moysi (*Qeri* בִּרְשָׁה, *Kethib* בִּרְשָׁה).

GERSON. 1. Filius Levi (1 Par. 6, 20. 43. 62. 71; 13,7; 2 Par. 29,12), alias Gerson; v. GERSON.

2. Filius Moysis (1 Par. 23,15. 16; 26, 24; v. GERSAM.

3. Gersom (גֵּרְשָׁם, Γερσών), princeps familiae sacerdotalis ex posteris Phinees, cum Esdra Babylone reversus (Esdr. 8,2).

GERSON, GERSON (גֵּרְשֹׁן, גֵּרְשִׁים; Γερσών, Γερσών), filius primogenitus Levi (Gen. 46,44; Num. 3,17; 26, 37; 1 Par. 6,1. 16), pater Lobni et Semai, a quibus descendunt duae familiae Gersonitarum (Ex. 6,16. 17; Num. 3,48. 21; 1 Par. 6,17. 20; 26,37), quarum numeratus est populus sexus masculini ab uno mense et supra 7500 (Num. 3, 22). Eorum officium describitur Num. 4,22. 24-28; cf. 7,7; 10,17. Numerati sunt a Moyse filii Gerson a 30 annis et supra usque ad quinquagesimum annum 2630 (Num. 4,38-41). Filiis Gerson assignatae sunt civitates 13 in Issachar, Aser, Nephthali dimidiaque tribu Ma-

nasse in Basan (Ios. 21,6. 27-33; 1 Par. 6,62. 71-76). Tempore Davidis ex posteris Gerson constitutus est Asaph super cantores domus Domini (1 Par. 6,39. 43) et Ioel princeps cum 130 fratribus ad transportandam arcam de domo Obedom in Iernsalem (1 Par. 13,7). De Gersonitis cf. praeterea 1 Par. 23,6-11; 26, 21; 2 Par. 29,12.

GERSONNI in Vulgata 1 Par. 26,21 est nomen patronymicum: de familia Gerson. Textus corruptione laborat.

GERZI (גֵּרְזִי vel גֵּרְזִי, *Qeri* גֵּרְזִי) nomen gentis, de qua David profectus de Siceleg praedas egit sicut de Gessuri et de Amalecitis (1 Reg. 27,8; LXX Bomitt., Α δὲν Γεζαρῶν). Sedes gentis conterminae erant parti meridionali Iudaeae, ut ex responsione David ad Achis 27,10 colligitur. Unde relinquenda est opinio nonnullorum (*Grotius*, *Ewald*) incolas Gazer (Ios. 40,33) designari. Alii cum *Bonfrenio* coniiciunt esse eandem gentem, de qua postmodum 2 Mach. 13,24 nomine Gerrenorum mentio fiat, qui probabiliter ad urbem Gerara (v. s. v.) referuntur. Alii cum *Gesenio* (Thesaurus p. 301) opinantur Gerzilas ad radices montis Garizim consedissee montique nomen dedisse ac postmodum meridiem versus emigrasse.

GESAN (גֵּסָן, Γεσάν), vir ex posteris Caleb filii Hesron (1 Par. 2,47).

GESSEN (גֵּסֶן, Γεσέν) regio Aegypti, quae Iacob et filiis eius ad habitandum assignata est et in qua Israelitae sedes habebant usque ad exitum ex Aegypto. Regio erat una ex optimis Aegypti (cf. Gen. 43,10; 46,28. 34; 47,1 s. 27; 50,8; Ex. 8,22; 9,26). Sita erat sine dubio ad orientem Nili, cum Hebraei egressi flumen traiecisse nullo modo narrentur et urbes quae in s. litteris ei regioni attribuantur, Ramesses, Pitom (Gen. 47,11; Ex. 1,11; 12,37) ad orientem Nili sitae sunt. Insuper LXX Γεσέν Ἀχαλίας (Gen. 43,10) dicunt; unde indicant sitam esse in parte arabica i. e. orientali Aegypti inferioris. Comparari potest nomen vicesimi nomi (γομοῦ) Aegypti inferioris quod in monumentis repertum est esse

Kesem orientis, cui Γεσέμ LXX plane congruit. Regio haec occidentem versus contermina erat ei parti Nili quae taniatica vocatur, septemtrionem versus pertingebat usque ad eum locum quem hodie lacus *Menzaleh* occupat; in parte meridionali erat Heliopolis (cf. *Ebers*; *F. de Hummelauer* ad Gen. 43,10). — Eadem terra commemoratur Iudith 1,9: Iesse (Vulgata).

Cf. *G. Ebers*, *Durch Gosen zum Sinai* 1872 p. 21. 488 ss.; *G. Naville*, *The shrine of Saft el-Henneh and the land of Goshen*, London 1887; *idem*, *The store-city of Pithom* 1885; *Baedeker-Steindorff*, *Aegypten* 1897 p. 159; *M. Jullien*, *L'Egypte* 1891 p. 105-128; *Le Camus*, *Notre voyage aux pays bibliques* 1894 p. 131-150; *Vigouroux*, *La Bible et les déc. mod. ed.* 6 II. p. 215-234.

GESSUR (גֶּסְסוּר; Γεσσορ, Γεδσορ) terra seu **GESSURI**, quod proprie nomen est gentis (הַגִּשְׁסוּרִי; Γεργασοί, Γεργεσσί, Γεσσοί), etiam 2 Reg. 13,8 Gessur Syriae (hebr. Gessur in Aram). Gessuri et Machati erant termini septemtrionales regni Og regis Basan (Deut. 3,14; Ios. 12, 5); utraque regio a Iosue Manassitis in parte orientali Iordanis attributa (Ios. 13,11), sed ab Israelitis non subacta est (Deut. 3,14; Ios. 13,13); immo gens Gessur cum aliis Aramaeis foedere iuncta, ut 1 Par. 2,23 narratur, expugnavit oppida Iair, quae antea a Iair Manassita in Galaad occupata erant et postmodum sub iudice Iair Galaadite iterum ab Israelitis possidebantur (v. IAIR) et pagum Canath. Tempore Davidis Gessur erat regnum, cui praeerat Tholmai rex; huius regis filia, Maacha, uxor erat David regis et mater Absalom (2 Reg. 3,3; 1 Par. 3,2); unde intellegitur, cur Absalom occiso Amnone fratre fugerit ad Tholmai regem Gessur (2 Reg. 13,37. 38; 14, 23. 32; 15,8). Praeterea legimus 2 Reg. 2,9 initio regni davidici tsboseth filium Saul constitutum esse ab Abner regem super Galaad et super Gessuri (Vulgata, Peshitta; sed hebr. הַגִּשְׁסוּרִי quod certe corruptum est, cum neque de Assur neque de tribu arabica Assurim ex Gen. 25,3 textus apte explicari possit neque regio quaedam alias prorsus

ignota hic nominari censenda sit; LXX δ Θασορ); aliqui cum *Keil* negant nostram Gessuri designari, quippe quae eo tempore proprium regem (2 Reg. 3,3) habuerit; alii affirmant (*Thenius*, *Ewald*, *Wellhausen*), praesertim cum Gessuri ex locis supra citatis inter Galaad et Hermonem sita fuerit et nostro loco cum Galaad iungatur. Quodsi hoc alterum admittatur, coniecere licebit (cum *F. de Hummelauer* ad h. l.) regem Gessur a Saule vel Abner regno fuisse eiectum, a Davide exceptum et in regnum restitutum. — Ex textibus allatis colligitur regiones Gessuri et Machati et montem Hermon fuisse terminos aquilonares Palaestinae orientalis; Machati probabilis e regione tribus Nephthali ipsum Iordanem attingebat et a monte Hermon meridiem versus extendebatur, ut s. v. MAACHA 1 dicimus; Gessuri igitur magis orientem versus a Machati quaerenda est in ea fere regione, quae hodie *Djeidūr* audit.

GESSURI (הַגִּשְׁסוּרִי, δ Γεσσοί), regio ad meridiem Pentapoleos philisthaicae (Ios. 13,2); eadem gens 1 Reg. 27,8 nominatur una cum Gerzi et Amalecitis, de quibus David ex Siceleg contra meridiem excurrens praedas egit. Coniicit *F. de Hummelauer* (ad Ios. 13,4) hanc Gessuri eundem esse tractum, in quem Philisthaei reliquias Hevacorum (הַעֲוִיתִים Deut. 2,23) expulerunt; commemorantur enim iidem Hevaei Ios. 13,4 [3] inter Pentapolin philisthaicam et torrentem Aegypti.

GETH (גֶּת i. e. torcular; LXX Γεθ, Flavius Ios. Γεθη, Γεττα), una ex uribus Pentapoleos philisthaeae (Ios. 13,3). Iam tempore quo Ephraim patriarcha superstes erat, indigenae Geth duos filios eius Ezer et Elad occiderunt (1 Par. 7,21). A Iosue reliquiae Enacim in uribus Gaza, Geth, Azoto non deletae sunt (Ios. 11,22). Cuinam tempori adscribenda sit pugna, qua Benjaminitae Baria et Sama habitatores Geth fugaverint (1 Par. 8,13), dici nequit. Gethaicae arca Dei in Philisthaeam asportata, sicut etiam Azotiis et Accaronitis, causa plagarum erat (1 Reg. 3,8. 9; 6,17). Samuel urbes

a Philisthaeis captas Israelitis recuperavit ab Accaron usque Geth (1 Reg. 7,14), quibus verbis Geth et Accaron non dicuntur ipsae in potestatem Iudaeorum redactae, sed linea describitur, quae prius separaverat et nunc rursus separabat Philisthaeam et Iudaeam (cf. *F. de Hummelauer* ad h. l.). De Geth orimundus erat Goliath (1 Reg. 17,4. 23), quo a David percusso Israelitae Philisthaeos persecuti sunt usque ad ipsum ingressum portarum Geth et Accaron et parum abfuit, quin ipsae urbes caperentur (1 Reg. 17,32; de textu quoque vocem Geth cf. *Hummelauer* ad h. l.). Ad Achis regem Geth David exsul his confugit (1 Reg. 21,10. 12; 27,2. 3. 4. 11; cf. Ps. 35[36],1 et vide s. v. ACHIS) et in planctu suo de morte Saulis et Ionathae duas Pentapoleos urbes Geth et Ascalon speciatim effert, quibus nuntius iste Philisthaeis gratissimus celandus sit (2 Reg. 1,20). Geth a David rege, cum iugum Philisthaeorum exenteret, expugnata est (1 Par. 18,1; cf. 2 Reg. 5,17-25; 8,1); eiusdem urbis fit mentio in summario bellorum cum Philisthaeis gestorum (2 Reg. 21,19. 20. 22; 1 Par. 20,3. 6. 7; de fluctuatione lectionis *Geth* vide s. v. GOB et cf. *F. de Hummelauer* ad 2 Reg. 21,18).

De Obededom Gethaeo vide s. v. OBEDEDOM.

Gethaci duce Ethai Davidi fideliter adhaerebant contra Absalom rebellem (2 Reg. 15,18. 19. 22; 18,2). Primis regni salomonici annis iterum commemoratur Achis rex Geth (3 Reg. 2,39. 40. 41), qui forte idem est ac prior ille Achis, ad quem David his confugerat, sed certe tributarius Salomonis. Geth a Roboam munimentis firmata est (2 Par. 11,8), regnante Ioas ab Hazael rege Syriae capta (4 Reg. 12,17), ab Ozia rege Philisthaeis erepta (2 Par. 26,6; Am. 6,2); verum non diu sub Iudaeorum imperio videtur remansisse (Mich. 1,10. 14). A priore dignitate urbis regiae ac munitae celeriter decidisse merito dicitur, quoniam prophetae recensitis aliis quattuor urbibus Pentapoleos philisthaeae eam silentio premunt (Ier. 25,20; Am. 1,6-8; Soph. 2,4; Zach. 9,5. 6).

De situ Geth iam Eusebius et S. Hiero-

onymus nihil certi sciunt, immo erronea et repugnantia tradunt (Onom. ed. Lag. 244,20; 246,73; S. Hier. in Mich. 1,10) neque recentiores consentiunt. Aliis praecipue *Khirbet Dikrîn* 7 km ab Eleutheropoli Lyddam versus (*Guérin*, Judée II. 108-113), aliis *Tell el-Sâfiye* paulo remotius ab Eleutheropoli in eadem directione (*Survey of West. Pal. Mem. II. 415. 440; Riess, Bibel-Atlas ed. 3 s. v.; Zanecchia, La Palestine d'aujourd'hui 1899 II. 313 ss.*); priorem opinionem adoptat *Legendre*, etsi velut dubium tantum (Carte de la Palestine). De altero situ cf. *E. J. Bliss, Report on the Excavations at Tell el-Sâfi in Pal. Expl. Fund. Quart. Stat. 1899 p. 188 ss. 317 ss.: 1900 p. 16 ss. et R. A. Stewart Macalister, The rock-cuttings of Tell el-Sâfi, ibidem 1900 p. 29 ss.* Alii suspicantur Geth esse Eleutheropolin (*Beit Djibrîn, Belogabra i. e. domus seu urbs gigantum*), quae alias in S. Scriptura non memoratur; cf. *J. Döllner, Geogr. u. ethnogr. Studien z. III. u. IV. Buche d. Könige 1904 p. 27-31.*

GETH (Mich. 1,14 : hereditas Geth, Moresheh Gath) vide s. v. MORASTHITES.

GETH quae est in Opher v. GETH-HEPHER.

GETHAIM (גֶּתַיִם i. e. duo torcularia; Γεθάιμα, Γεθάιμα), oppidum in quo Berothitae propter persecutionem a Saule urbibus Gabaonitarum inflictam (cf. 2 Reg. 21,2) refugium quaesiverunt (2 Reg. 4,3). Idem videtur esse oppidum, quod post exilium a Beniaminitis habitabatur (Neh. 11,33). Ex hoc tamen inferri non potest hoc oppidum iam antiquitus ad tribum Beniamin pertinuisse. Poterat Gethaim vel Geth aliud nomen esse pro Gethremmon urbe levitica Danitis primitus attributa, quae a finibus Beniamin certe non longe distabat, etsi situs accuratior ignoratur; v. GETHREMMON.

GETHER (גֶּתֶר; Γαθήρ, Γατέρ), tertius ex quattuor filiis Aram filii Sem (Gen. 10,23); idem 1 Par. 1,17 cum fratribus suis inter filios Sem recensetur. Vestigium populi a Gether descendens

nondum repertum est. Coniecturas varias referunt *Bochartus* (Phaleg. 2,10), *Winer*, *Biblisches Realwb.* ed. 3 I. 423.

— *Flavius Iosephus* (Ant. I. 6,4) assignat Bactriam, sed perperam, ut ostendit *F. de Hummelauer* ad Gen. 10,23. 30 addens: « Si quaeras ubi tandem sedes Gether habuerit, eas illi libenter intra ipsam Mesopotamiam concederem, ea quippe regio Aramaeorum tribus pullulabat ».

GETHHEPHER (גֵּת הַחֶפֶר, גֵּת הַחֶפֶר)

i. e. toreular putei; Γεζερέ, Γεθγορέ), urbs in descriptione finium Zabulon commemorata (Ios. 19,43), patria Ioniae prophetae (4 Reg. 14,25; Vulgata: Geth quae est in Opher). Ex S. Hieronymo (Prolog. in Ionam) Geth in secundo Saphorim milliario, quae hodie appellatur Diocæsarea, euntibus Tiberiadem haud grandis est viculus, ubi et sepulcrum eius ostenditur ». His respondet vicus *el-Meshhed* prope Nazareth inter septemtrionem et orientem.

Cf. *I. Schwarz*, Das heilige Land 1852 p. 62; *Robinson*, Palaestina III. 419. 450; *A. Neubauer*, Géogr. du Talmud p. 200; *Carmoly*, Itinéraires de la Terre Sainte 1847 p. 256; *Survey of West. Pal. Mem.* I. 365; *Guérin*, Galilée I. 165-168; *Legendre*, Carte de la Palestine; *J. Döllner*, Geogr. u. ethnogr. Studien z. III. u. IV. Buche d. Könige 1904 p. 272. Sed varia dubia contra hunc situm movet *F. de Hummelauer*, Comm. in Ios. p. 416-419. 422. 423.

GETHREMMON (גֵּת רֵמוֹן i. e.

toreular mali granati vel forte torcular excelsum; Γεθρεμμών), urbs tribus Dan (Ios. 19,45), levitis de genere Caath concessa (Ios. 21,24; 1 Par. 6,69 [54]). Ab Eusebio et S. Hieronymo dicitur villa pergrandis 12 mil. pass. a Diospoli (Lydda) Eleutheropolim versus (Onom. ed. Lag. 246,58; 128,23). Verum hic situs admitti nequit, quia tribus Dan non eo usque meridiem versus protendebatur. Melius congrueret vicus Getham (Γεθάζμ), qui secundum Onom. (246,74; 129,7) inter Antipatridem (*Kefr Sābā* vel forte *Rās el-Ain*) et Iamniam erat; nullum autem vestigium eius repertum est. Aliqui insuper coniiciunt Gethremmon non differre a Gethaim.

GETHREMMON Ios. 21,25 mendose legitur pro feblaam q. v.

GETHSEMANI (Γεθσημανεί, Γεθσημανή), villa seu praedium (χωρτόν), quo Iesus post ultimam coenam se contulit opus redemptionis oratione inauguraturus (Matth. 26,36; Marc. 14,32). Nomen communiter explicatur גֵּת שֶׁמָן i. e.

toreular olei; aliter S. Hieronymus loco lectionem גֵּת שֶׁמָן supponens: vallis pinguedinum (Onom. ed. Lag. 61,22); recentius *Schegg* גֵּת contractum ex גֵּת שֶׁמָן assumens: locus editus pinguedinis.

Ex eo quod Iesus saepe illuc se conferre solitus erat (Luc. 22,39; Io. 18,2), merito infertur possessorem illius praedii vel fundi fuisse discipulum Christi; aliqui praeterea opinantur fuisse praedium Mariae matris Marci (cf. *Expositor*, ser. IV. vol. III. 1891 p. 222), sed hoc plane incertum est neque ex Marc. 14,51 suadetur, etsi adolescens ille amicus sindone, qui Iesum illuc secutus est, censeatur Marcus. Idem praedium describitur Io. 18,1: trans torrentem Cedron, ubi erat hortus (αἴμας) et ex Luc. 22,39 ad radices montis olivarum fuisse indicatur. Suburbana urbis Ierusalem fuisse pulcherrima, arboribus etiam mansuetis consita, hortis lucisue ornata refert *Flavius Iosephus* (Bell. iud. V. 3,2; VI. 1,1). Hodie ad ripam sinistram torrentis Cedron ostenditur hortus quadratus muro einctus, in quo octo olivae antiquissimae cernuntur, quas ex tempore Christi ibi esse multorum opinio fert. Istum hortum et singula monumenta, quibus memoria orationis et agoniae Christi adnexa reputatur, accurate describit *Ollivier*, La passion p. 64. Cf. etiam *Guérin*, Jérusalem 1869 p. 288 ss. qui omnino probabile habet illas octo olivas vel testes immediatos orationis Christi fuisse vel saltem ex seminibus testium immediatorum germinatas; hoc alterum addit propter verba Flavii Iosephi (si adeo premenda sunt), qui l. c. narrat omnes arbores prope Ierusalem in obsidione urbis caesas esse. Eundem locum haud dubie respicit Onom. (ed. Lag. 130,22 cf. 248,18 textum Eusebii paulo minus

distinctum): « Gethsemani... est autem ad radices montis oliveti nunc ecclesia desuper aedificata ».

GEZEM v. **GAZAM**.

GEZER, GEZERON v. **GAZARA**.

GEZEZ (גֶּזֶז, Γεζουζ). 1. Filius Caleb filii Hesron, ex Ephra concubina genitus (1 Par. 2,46).

2. Filius Haran filii Caleb et Ephae (1 Par. 2,46).

GEZONITES (גִּזְוֹנִיתִּים, ὁ Γεζωνιτης), nomen gentilicium 1 Par. 11,33[34]: Filii Assem Gezonites. Loco parallelo 2 Reg. 23,32 legitur: *Filii Iassen* et omittitur nomen gentilicium. Gezon aliunde non innotescit. Textus LXX tam misere corruptus est (cf. *Savete*, The Old Test. in Greek II. p. 27), ut potius legendum videatur ὁ Γεζων cum cod. Alexandrino, praesertim quia textus LXX Luciani praebet 1 Par. 11,34 ὁ Γεζων et 2 Reg. 23,32 ὁ Γεζων. Unde *Klostermann*, *Driver*, alii legere malunt גִּזְוֹנִיתִּים. Gunites et nomen referunt ad familiam Gunitarum de tribu Nephthali (cf. Num. 26,48). Cf. *Driver*, Notes on the Hebrew Text of the Books of Samuel 1890 p. 283. Quoad nomen Assem vel Iassen v. **LASSEN**.

GIBLII (גִּבְלִיִּים, οἱ Γίβλιοι vel Βίβλιοι) laudantur peritissimi fabri in extruptione templi salomonici (3 Reg. 5,18 hebr. 32); in descriptione opulentiae Tyri (Ez. 27,9) senes Giblii (גִּבְלִיִּים גִּבְלִיִּים) et prudentes eius (urbis) dicuntur *resarcientes rimam tuam* (hebr.) i. e. reficientes si quid rimosum esset in navi Tyrionum gubernatorum, principatum inter Phoenices gerentium. Giblii sunt incolae Gebal, quae urbs apud Graecos est *Byblos* inter Berytum et Tripolim non procul a mari in colle sita (*Strabo* XVI. 2,18); hodie *Djebeil*. — Praeterea in enumeratione regionum a Iosue subigendarum (Jos. 13,15) mentio fit eiusdem Gebal (גִּבְלִי, Vulgata: continia, LXX Γαλιζάθ Φαλισταθα); sed ostendit *F. de Hummelauer* ad h. l. textum esse corruptum neque de Gebal seu Byblos posse sermonem esse in descriptione limitum terrae promissae.

In inscriptionibus commemorantur urbs Gubli, Gubla et incolae eius Gublaai, Gubalai (cf. *Schrader*, Keilinschr. Biblioth. II. 148; *Schrader-Whitehouse*, Cuneif. Inscr. and Old Test. I. p. 174), in documentis *Tell el-Amarna* Gubla, Kunbli (cf. *Schrader*, Keilinschr. Biblioth. V. 124 ss.), in inscriptionibus aegyptiacis Kupn, Kupni, Kupuna i. e. Gubl seu Byblos (cf. *W. M. Müller*, Asien u. Europa p. 188-191).

GIDEROOTH v. **GADEROTH**.

GIEZI (גִּיזִי, Γεζι), servus Elisei prophetae. Dualibus vicibus ab Eliseo nuntius ad mulierem Sunamitidem missus est (4 Reg. 4). Idem avaritia captus mmera, quae Eliseus repudiaverat, a Naaman Syro mendacio extorsit, quam ob causam ab Eliseo dimissus abiit leprosus quasi nix audita poenali sententia: Lepra Naaman adhaerebit tibi et semini tuo usque in sempiternum (4 Reg. 5). Ab eodem Giezi Ioram rex Iuda exquisivit, quanam magnalia fecisset Eliseus; de quibus illi animo grato et veraci testimonium perhibens criminis antea commissi ignominiam expiavit (4 Reg. 8,4. 5).

GIGANTES appellantur homines proceriores et praesertim nullum supra mensuram communem statura eminentes. Homines priscos qui teste Scriptura per plura saecula vitam produxerunt, etiam corporis mole insignes fuisse Gen. 6,4 indicatur: « gigantes autem erant super terram in diebus illis » i. e. a mundo condito usque ad diluvium, « et etiam postmodum, quando ingressi sunt filii Dei ad filias hominum illaeque genuerunt, isti sunt heroes antiqui, viri famosi » i. e. etiam quando filii Dei i. e. filii Seth commixti sunt maledictae stirpi Cain, non ideo degeneres robore ac mole corporis proguati sunt filii, sed etiam ipsi extiterunt gigantes, qui quod robore ad violentiam abuterentur, magnum sibi nomen in mundo compararunt (cf. *F. de Hummelauer*, Comment. in Genes. p. 218; qui demonstrat filios Dei vocari Sethitas I. c. p. 195, 212 ss.). — Etiam temporibus posterioribus sermo est de gigantibus. Ita affirmant exploratores

Num. 13,34 : ibi vidimus monstra quaedam filiorum Enac de genere giganteo; quibus comparati quasi locustae videbamur, sed uti patet, loquuntur hyperbolice; cf. Deut. 2,11. 20; 3,11. 13; item 2 Reg. 21,18 nominatur Saph de genere gigantum i. e. ex filiis Rapha (vide s. v. RAPHAÏM). Ceterum vide s. v. EMIM, ENACIM, ZUZIM.

GIHON גִּיחֹן et גִּיחֹן; ἡ Γεώων B, ὁ Γεώων A). 1. *Textus S. Scripturae*. Gihon prope Ierusalem ter in S. Scriptura commemoratur. Imprimis in libris Regum Salomon in Gihon deductus et in regem unctus esse refertur, postquam Adonias prope fontem Rogel regiam dignitatem usurpavit (3 Reg. 1,33-43). Praeterea Ezechias in Chronicis dicitur obtulasse « superiorem fontem בְּרִצְיָא, exitum) aquarum Gihon » et eas averlisse « subter ad occidentem urbis David » (2 Par. 32,30) et Manasses narratur aedificasse « murum extra civitatem ad occidentem Gihon in convalle, ab introitu portae piscium per circuitum usque ad Ophel » (2 Par. 33,14). Ad eadem vel similia opera Ezechiae referuntur textus 4 Reg. 20,20; 2 Par. 32,3 s.; Eccli. 48,19 (hebr. 17).

2. *Situs Gihon inferioris*. Ex textibus citatis Gihon designat aquas sive ex fonte manantes sive in piscina ex aquaeductu vel ex pluviis collectas; neque ex etymologia vocis, quam ortum vel strepitum aquarum designare volunt, significatio veri fontis necessario deduci potest. Duplex autem Gihon distinguenda videtur, « superior » (הַעֲלִיּוֹן) et inferior « in convalle » (בְּנֶחֱלָה).

Pro situ inferioris Gihon determinando haec ex verbis S. Scripturae videntur constare : 1) Gihon inferior in una ex vallibus urbi adiacentibus sita erat; nam Salomon ex palatio regio ad eam deducitur (3 Reg. 1,33. 38) et magna multitudine comitante inde ascendit in urbem (ib. 40. 43), et appositio « in convalle » 2 Par. 33,14 probabiliter, quamvis non necessario, cum voce Gihon immediate praecedente est coniungenda. — 2) Vallis haec non potest esse nisi aut vallis Cedron aut vallis Hinnom; ne-

quaquam vero vi vocis גִּיחֹן sola vallis Cedron significatur. — 3). Ex historia unctionis Salomonis et Adoniae (3 Reg. 1,9-43) sequitur, Gihon et Rogel tanto intervallo ab invicem separata fuisse, ut quae in uno loco fiebant, in altero neque videri neque facile audiri potuerint; nam finito demum convivio, cum universa multitudo in comitatu Salomonis ex Gihon in urbem ascenderet et tibis ac tuba canerent et insonaret terra a clamore eorum, Adonias cum sequacibus suis prope Rogel sonitum et clamorem audivit neque tamen rem gestam nisi ex verbis Ionathae nuntii cognovit (l. c. 40-43). — 4) Situs autem fontis Rogel ex Jos. 13,7 s. et 18,16 s. necessario ita determinandus est, ut aut fons Dominae Mariae (*Ain Sitti Maryam*) aut puteus Iob (*Bir Eiyūb*) dicatur. Etiam si vero cum opinione satis communi, quae minime videtur probari (v. ROGEL), alter hic situs putei Iob eligeretur, Gihon nullatenus fons Dominae Mariae dici posset. Nam alter locus ab altero non nisi 650 metris distat atque aspectus hinc inde per vallem amplissimam recta via patet, ita ut quae illic fiebant, hic necessario videri et facillime audiri potuerint ac debuerint; praeterea pro maxima illa multitudine populi Salomonem comitantis (3 Reg. 1,40) locus congregationis non in angustissima vallis parte superiore, sed potius in ampla planitie infra fontem versus piscinam Siloe sita assignandus foret, id quod indoli narrationis vel maxime contrarium est. — 5) Quare opinio hodie satis communiter admissa relinquenda et situs fontis Rogel in fonte Dominae Mariae, situs vero Gihon inferioris in valle Hinnom, et quidem in parte vallis superioris, quae hodie *Wādī el-Mīṣ* audit, quaerendus videtur ac fortasse idem dicendus erit, qui nomine « fons draconis » a Nehemia (2,13) designatur (v. DRACONIS FONS, supra, col. 116). Quamvis autem fons proprie dictus ibi hodie non existat, tamen variae piscinae et plures aquaeductus antiquitus certe aderant, sicut et hodie ex parte ibi habentur, et verum fontem ibidem fuisse ipsis adversariis haud improbabile apparet (cf. *Gu-*

the ap. *Herzog-Hauck*, Realencyklopädie ed. 3 VIII. 671 s.).

3. *Situs Gihon superioris*. Pro situ alterius Gihon, quam ipsa S. Scriptura «superiorem» appellat, ex verbis textus sacri vix quidquam certi habetur. Id unum ex hac denominatione «superioris» et ex dictis videtur constare, eam non in fonte Dominae Mariae neque in Siloe neque in valle Cedron aut Hinnom quaerendam esse. Ex naturali autem conditione locorum superior ille exitus aquarum, unde canalís subterraneus in urbem ducebatur, probabilis aut in parte occidentali aut in septentrionali situs erat. Quodsi pressius canalem hunc «ad occidentem urbis David» (2 Par. 32,30) ductum esse consideramus, non ex occidente, sed potius ex aquilone eum ortum esse dicemus. In utraque vero parte, sive occidentali sive septentrionali, antiquitus plures existisse aqueductus et piscinas, ex ruinis superstitibus constat eaque opera saltem ex parte iam aetati regis Ezechiae adscribi posse doctis hand improbabile videtur (cf. *Furrer* ap. *Schenkel*, Bibel-Lexikon II. 464).

Ex scriptis veterum, itinerariis, commentariis nihil fere pro situ Gihon habetur. Ex versionibus Targum chaldaicum atque interpres Syrus et Arabs «Siloe» (שִׁילֹחַ) explicant (3 Reg. 1,33. 38). — Fl. Iosephus praeter nomen Γειών (Ant. VII. 14,5 n. 355; cf. 357) nihil commemorat; cum autem Adoniam explicite «παρὰ τὴν πηγὴν τὴν ἐν τῷ βασιλικῷ παραδείσῳ» convivium suum regale habuisse referat (ib. 14,4 n. 347), profecto vix in eodem horto regio prope alterum fontem nuspian alias commemoratum unctionem et proclamationem Salomonis collocasse dicendus erit. — In Onomastico Eusebii et S. Hieronymi praeter nomen Γεών et additum «ubi Salomon est unctus in regem» nihil de Gihon habetur (ed. E. Klostermann [1904] p. 72,22). Similiter in itinerariis usque ad finem saeculi XIII. ne vestigium quidem traditionis de situ Gihon invenitur; nam quod *Theodosius* (c. a. 530) dicit Geon inrigare terram Evilath et transire iuxta Hierusalem (De situ terrae sanctae c. 16, ed. *Geyer*, 145,1 s.), eandem absentiam omnis traditionis potius ostendit. Inde ab exeunte saeculo XIII. post *Burchardum* et *Marinum Sanutum* peregrini et auctores geographi frequenter de monte, valle, fonte

Gihon ad occidentem prope Hierosolyma sitis loquuntur (cf. *T. Tobler*, Die Siloahquelle und der Oelberg p. 50 s.; *K. Raumer*, Palästina ed. 4 p. 305 s.); unde praesertim piscina quae hodie *Birket Māmilla* audit, multis est ipsa Gihon superior, aut saltem cum ea intine connexa supponitur (*Tobler*, Topographie von Jerusalem II. 62 s.). — Denique opinio satis communiter recepta, quae Gihon dicit fontem Dominae Mariae aqueductu cum Siloe inferiore iunctum, post auctores antiquiores Iudaeos praesertim proposita est a *K. Furrer* ap. *Schenkel*, Bibel-Lexikon II (1869) p. 463-5 et post ipsum multos fautores obtinuit.


Cf. *Robinson*, Palästina II. 164-6; *id.* Neuere bibl. Forschungen p. 317-20 (male בִּיעֶרְבָה 2 Par. 33,14 ab occidente explicat); *Survey of Western Pal.*, Jerusalem p. 366; *W. M. Thomson*, The land and the book, Southern Palestine p. 447-50; *G. Grove* et *Ch. W. Wilson* ap. *Smith-Fuller*, Dict. of the Bible ed. 2 I. 2, 1186 s.; *Giesebrecht* ap. *Richm-Baethgen*, Handwörterbuch ed. 2 I. 529; *D. Zancchia*, La Palestina d'oggi I. 177-9; *F. Buhl*, Alt. Paläst. p. 93 s.; *Guthe* ap. *Herzog-Hauck*, Realencyklopädie ed. 3 VIII. 670 s.; *id.* Kurzes Bibelwörterbuch p. 217; *H. Lesèire* ap. *Vigouroux*, Dict. de la Bible III. 239-41; *J. Döllér*, Studien zum III. und IV. Buche der Könige p. 7-10.

L. FONCK.

GILO (גִּלּוֹ, Γιλώλ, Γωλζ), urbs tribus Iuda (Jos. 15,51); recensetur in prima provincia montis. Eadem erat patria Achitophel consiliarii Davidis et asseclae Absolomis rebellis (2 Reg. 15,12). Inter heroas davidicos enumeratur Eliam filius Achitophel Gelonites (2 Reg. 23,34), qui 1 Par. 11,36 mendose scribitur Ahia Phelonites. Gilo censetur esse *Khirbet Djālī* prope *Halhūl* inter septentrionem et occidentem (*Survey of West. Pal. Mem.* III. 313). Sed obstat, quod *Halhūl* pertinet ad quartam provinciam montis Iuda ab aquilone Hebronis sitam, dum Gilo in prima provincia maxime meridionali montis recensetur.

GINETH (גִּינֶת, Γωνζθ), pater Thebni usurpatoris (3 Reg. 16,21. 22).

GITH dicitur a S. Hieronymo גִּיִּת, quod Isaias 28,25 cum cumino et reliquis in agro serendis enumerat, et non tribula trititandum, sed virga excutien-



dum describit (ib. v. 27). LXX μελάνθιον vertunt, Targum קצהא retinet, Peshitta שבבונה (s. שבוונה) habet i. e. *nigella* (Brun). Hanc plantam, scilicet *Nigella sativa* Linné, ord. *Ranunculacearum*, Graecis μελάνθιον seu μελάνθερον, Latinis *gith* (s. *git*) dictam, nomine hebraico designari auctores communiter admittunt. Semina eius nigra condimentum cibi, ac maxime panis, remediumque gratum antiquis erat (*Columella* VI. 34, 1; *Dioscur.* Mat. med. 3, 83 al. 93; *Plin.* XIX. 8, 167; XX. 17, 182-4, al.). Etiam Aegyptiis notum extitit (*A. Braun* in *Ztschr.* f. Ethnol. IX. 1877, 290), et hodie quoque in Syria et praesertim in Aegypto ad condiendum panem adhibetur. A rabbinis insuper cum cumino atque anetho aliisque herbis inter olera decimanda (*Matth.* 23, 23; *Luc.* 11, 42) enumeratur.

Cf. *I. H. Ursinus*, Arboreti bibl. Cont. 118 s.; *O. Celsius*, Hierobot. II. 70-2; *E. Boissier*, Flora orient. I. 68; *I. Löw*, Aram. Pflanzennamen n. 314; *P. Schegg*, Bibl. Archaeologie 160; *V. Hehn*, Kulturpfl. u. Hausth. ed. 6, 205.

L. FONCK.

GNIDUS, GNYDUS (Κνίδος) nominatur 1 Mach. 13, 23 inter istas res publicas, quibus Romani Iudaeos sibi foedere iunctos commendarunt anno 139 a. Chr. et Act. 27, 7 in itinere romano S. Pauli, qui a Myra (Vulgata : Lystra) urbe Lyciae maritima tardo cursu inter Rhodum et Asiam minorem vectus est contra Gnidum, sed prohibente vento, qui a septentrione et occidente flabat, Cretae insulae adnavigavit. Cnidus est urbs maritima Cariae sita in peninsula Gnidia, quae inter Rhodum et Coum insulas in mare porrigitur et sinu Ceramico a septentrione, a meridie mari Rhodio aluitur. Cernuntur hodie ruinae Cnidi in promontorio, cui nomen *Crio*.

GOATHA (הַגְּתָא cum He parag. i. e. Goah versus; LXX ἐξ ἐκλεκτῶν λίθων) commemoratur una cum colle Gareb in descriptione urbis Ierusalem denuo aedificandae Ier. 31, 39. Quaeri debet ad latus urbis occidentale et quidem, ut videtur, meridiem versus a colle Gareb (vide s. v.). Apud Syrum Goah redditur

Ramtha i. e. locus editus, collis; in Targum Jonathan autem piscina rotunda vel forte piscina vitulae. Quid tandem Goah sit, ex ipso textu non liquet. Situs accuratior determinari nequit. Relinquenda autem est opinio (*Vitringa*, *Hengstenberg*) Goatha esse Golgotha; obstat enim tum etymon (cf. GOLGOTHA) tum ratio topographica, ut apparet ex dictis s. v. GAREB.

GOB (גֹּב et גִּב) assignatur locus duarum pugnarum inter milites Davidis et Philisthaeos (2 Reg. 21, 18. 19). In v. 18 textus hebraicus, Vulgata, Chaldaeus legunt Gob, LXX Γῶθ, Syrus Gath; loco parallelo 1 Par. 20, 4 textus hebr. Gezer, Vulgata Gazer, LXX Γαζέρ, Syrus Gaza; Flavius Iosephus (Ant. VII. 12, 2) Γάζαζ. In v. 19 textus hebraicus, Vulgata, Chaldaeus legunt Gob, LXX Γόμ, cod. A Γῶθ, Syrus nullum locum assignat; loco parallelo 1 Par. 20, 5 nomen loci tacetur ab omnibus. Praeterea nonnulli codices hebraici 2 Sam. 21, 18 s. pro Gob legunt Nob. Cum textus adeo dubius sit, de Gob nihil statui potest. Fortasse Gob non est nisi mendum pro Geth vel etiam pro Gazer.

GODOLIAS (הַגְּדֹלִיָּא, הַגְּדֹלִיָּא; Γοδολιας).

1. Levita, filius Idithun in cithara prophetans, praefectus secundae classis cantorum tempore David (1 Par. 25, 3. 9).

2. Filius Abicam filii Saphan, a Chaldaeis post expugnationem Ierusalem (588 a. Chr.) praepositus populo in Iudaea remanenti (Ier. 40, 3 ss.); sedem suam fugebat in Maspeth oppido Benjamin antiqua religione sacro; ad eum undique confluebant reliquiae populi dispersi, ii nempe qui tempore invasionis Chaldaeorum diffugientes periculo captivitatis se subdlexerant. Aliqui (v. g. *Cheyne*) contradictionem cernunt in eo quod 40, 1 Ieremias cum reliquis captivis Ramam abductus et Ramae a Nabuzardan magistro militiae catenis solutus ac liberatus esse dicitur, dum 39, 14 propheta de vestibulo carceris (in Ierusalem) a Nabuzardan liberatus et curae Godoliae commendatus esse legitur. Varias interpretum solutiones recen-

sel *Knabenbauer* ad 39,14, inter quas maxime obvia videtur sententia *Cornelii a Lap.* et *Tirini* 41,1 s. fuisse et enucleate describi, quae 39,14 breviter tantum indicata sint scil. Ieremiam carcere eductum cum aliis captivis Ramam deportatum et ibi tandem e medio aliorum catenis solutum esse. Godolias Ieremiae consilia secutus omnes adhortatur, ut ordinem rerum a Chaldaeis instituto acquiescant, simul spondens se eorum causam apud Chaldaeos acturum esse ac permittens, ut messem colligant et in uribus habitent ubicunque voluerint (40,9 s.). Sed mox Godoliae viro probo et candido insidiae parabantur ab Ismahel ex familia regia Iuda oriundo; de insidiis monitus Godolias bene quidem egit prohibens, ne Ismahel clam occideretur, at prudentiae et circumspectioni defuit totam rem pro mendacio habens neque salutis propriae populi que prospiciens (40,13 s.). Ab Ismahel eiusque sociis ad convivium in Maspith invitatis interficiuntur ipse satrapa et Iudaei qui cum eo erant et satellites babylonici tribus post urbem expugnatam mensibus; corpora autem eorum proiecta sunt in cisternam illam, quam Asa rex Iuda bellum gerens cum Baasa rege Israel in media civitate Maspha fodientiam curaverat (41,1 s.). Reliquiae autem Iudaeorum, cum furore et ultionem Chaldaeorum ob necem Godoliae satrapae timerent, una cum Ieremia eoque vetante in Aegypto refugium quaesierunt (43,5-7; cf. 4 Reg. 23,22-26).

3. Sacerdos qui uxorem alienigenam Esdra iubente dimisit (Esdr. 10,18; LXX Γαζαλα).

4. Avus Sophoniae prophetae (Soph. 1,1).

5. Vide GEDELLAS.

GOG (גֹּג, גֹּגִי), Rubenita ex maiori-
bus Beera (1 Par. 5,4).

GOG v. MAGOG.

GOLAN v. GAULON.

GOLGOTHA (Γολγοθᾶ Matth. 27,33; Marc. 15,22; Ioan. 19,17), nomen loci ubi Christus crucifixus est. Locus erat prope Ierusalem (Ioan. 19,20), extra urbem (Hebr. 13,12). Eius interpretationem optime tradit Lucas 23,33 ἡ θόρον ἐπὶ

τὸν τόπον τὸν καλούμενον Κρανίον, Calvaria, Cranium, hebr. קִרְיָא. Nomen loci veteres multi ex eo explicant quod fuerit ibi locus quo mortis rei plectebantur et quo decollatorum crania iacebant. Ita iam Hieronymus (in Comm. in Matth.) locum decollatorum vocem significare ait quam explicationem sequuntur Beda, Paschasius, Bruno astensis, Albertus Magnus, Caietanus, Maldonat, Salmeron, a Lapide, Calmet. Nomen veteres etiam referunt ad cranium Adam quem ibi sepultum esse opinabantur; ita iam Origenes, auctor carminum adversus Marcionem, Ambrosius, Epiphanius, alique (cf. *Knabenbauer*, Comm. in Matth. 27,33). Verum patet utramque explicationem esse relinquendam. Prior iam eo refutatur, quia veteres certum locum ad supplicia inferenda non habere solebant; insuper secundum Iudaeorum leges nullatenus fieri potuit, ut crania decollatorum eo in loco publico prope urbem congesta iacerent. Altera explicatio refutatione non indiget.

Recentiorum explicatio probanda erit locum acceperisse nomen cranii ex forma quae aspectui praebebatur; si locus erat aliquantulum elevatus, rotundus, facile populari loquendi modo id effici poterat, quod in collibus et montibus frequenter tactum esse scimus, scil. ut appellarentur ex figura quadam et similitudine quam cum aliis rebus habere videbantur, uti v. g. a Strabone (17,3) promontorium Κεφαλαί nomine commemoratur. De situ Calvariae vide Zeitschr. d. D. Pal.-Ver. VIII. 1885 p. 272. X. 1887 p. 118. XVII. 1894 p. 221; *Pal. Expl. Fund.* Quart. Stat. 1901 p. 273-299 (et cf. 1902 p. 93); 1902 p. 66 ss. 142 ss. 282 ss. 376 ss. 1903 p. 31 ss. 140 ss. 242 ss.

GOLIATH (גִּלְיָאֵת, גִּלְיָאֵת) notissimus ille gigas Philisthaeus de Geth, in qua urbe reliquiae Enacim cum Philisthaeis coaluerant (Ios. 11,22), a Davide in valle terebinthi occisus (1 Reg. 17,4 s.; Eccl. 47,4. 5); eius caput David attulit in Ierusalem (1 Reg. 17,54), utique postquam rex arce Sion potitus est, gladium vero

in tabernaculo foederis pallio involutum post ephod reposuit, donec Achimelech pontifex illum Davidi fugitivo restituit (21,9; 22,10). Frater Goliath Gethaei erat Lachmi, quem Adeodatus (vide s. v.) seu Elchanan (vide s. v.) occidit (2 Reg. 21,19; 1 Par. 20,5). Ps. 143 inscribitur: Psalmus David adversus Goliath. Eius altitudo erat 6 cubitorum et palmi (2,984 m), lorica squamata 5000 siclorum aeris (84,850 kg); hastile hastae eius erat quasi liciatorium texentium, ipsum ferrum hastae 600 siclos ferri habebat (9,822 kg). Cf. *F. de Hummelauer* ad 1 Reg. 17,4-7. Similia de gigantibus quibusdam narrat *Herodotus* 1,68; 7,117; 9,83; *Plinius* VII. 16,73 s.; *Flav. Iosephus*, Ant. XVIII. 4,5. Ceterum nostra aetate reliquiae humanorum corporum repertae sunt, quae altitudinem Goliath fere exaequant vel etiam superant (cf. *Ausland* 1839 Nr. 19,76; *Schliemann*, Mykenae, 1878, 339).

GOMER (גֹּמֶר, Γομέρ Γαμέρ). 1. Primus inter septem filios Iaphet recenseatur Gomer; eius filii nominantur Asce-naz, Riphath, Thogorma (Gen. 10,2. 3; 1 Par. 1,5. 6); in exercitu Gog regis Magog ex posteris Iaphet et Cham conflato enumerantur Gomer et universa agmina eius, domus Thogorma etc. (Ez. 38,6). Gomer esse Cimmericos iam *Tirinus* et *Calmetus* censuerunt et ex recentioribus plerique admittunt. Cimmerici, gens antiquis iam nota (*Homer*. *Odyss.* 11,14), sedes habebant septentrionem versus a Ponto Euxino et lacu Maeotide (*Herod.* 4,11 s.; *Strabo* III. 2,12); a Graecis autem posteriore tempore cum Cimbris confunde-bantur (cf. *Strabo* VII. 2,2). A Scythis pulsati in regiones Asiae minoris migrarunt (*Herod.* 1, 6. 15. 103; 4,1. 41 s. 100; *Strabo* XI. 2,5); immo veteres historiographi referunt Thraces asiaticos, Bithynios, Maryandynios, Paphla-gones, Phryges origine esse Thraces (Τρῳῆες), qui antiquissimis temporibus Bosporo traiecto in Asiam minorem immigraverint atque hos ipsos esse Cimmericos (*Strabo* I. 3,21; XII. 8,7; XIII. 1,8; XIV. 1,40; *Lenormant*, Les origines de l'histoire II. 332 s.). In inscriptionibus cuneiformibus inde a tempore Asarhad-

don (681-668) commemorantur *Gimirrai* i. e. Cimmerici qui saeculo 7. in Asiam minorem irruperant (*Schrader-Whitehouse*, *Cuneif. Inscr. and Old Test.* I. 62; *Schrader*, *Keilschriften und Geschichtsforschung* p. 157 s.). Aliqui Gomer etiam agnoscunt in Cappadocia, quam Armeni *Gamir* appellabant (cf. *Schrader-Whitehouse* II. p. 124). Ps. Jonathan et Targum hieros. Gomer Phrygiam dicunt, Flav. Iosephus Galatas (Ant. I. 6,1).

2. Gomer filia Debelaim, quam Osee propheta ex mandato Dei matrimonio sibi iunxit (Os. 1,3; cf. *Knabenbauer* ad. h. l.).

GOMOR v. MENSURAE.

GOMORRHA (גֹּמֶרָה, Γόμορρα), urbs Pentapoleos in termino terrae Chanaan (Gen. 10,19), in valle Siddim (13,10) sita, cuius rex Bersa cum quattuor regibus vicinis foedere iunctus a Chodorlahomor devictus est (14,2-11). In celeberrima illa catastrophe, qua quattuor urbes Pentapoleos scil. Sodoma, Gomorrha, Adama, Seboim deletae sunt, nomina Sodomae et Gomorrhae coniunguntur et prae reliquis efferuntur (18,20; 19,24. 28), sicuti alias quoque saepius. Ad eandem catastrophem vel ad malitiam Gomorrhaeorum referuntur Deut. 29,23; 32,32; Is. 1,9. 10; 13,19; Ier. 23,14; 49, 18; 50,40; Am. 4,11; Soph. 2,9; Matth. 10,17; Rom. 9,29; 2 Petr. 2,6; Iudas 7. De situ probabili vide s. v. ADAMA et SIDDIM.

GORGAS (Γοργίας), dux Syrorum tempore Antiochi IV. Epiphanis et Antiochi V. Eupatoris, vir in rebus bellicis peritissimus. Gorgias et Nicanor a Lysia, qui pro Antiocho IV. regnum cis Euphratem administrabant, in Iudaeam missi cum Iuda Machabaeo prope Emmaus (Nicomolim) conflixerunt a. 166/165 a. Chr.; Nicanor dux maioris partis exercitus fugatus est, Gorgias vero, qui nocturna expeditione Iudam Mach. circumvenire frustra tentaverat, ubi castra Syrorum combusta esse conspexit, proelium evitans in Philistaeam se recepit (1 Mach. 3,38-4,23; 2 Mach. 8,9-36). Post hanc cladem in Philistaea remansit, ut ex proelio prope Iamnam commissio manifestum erit. Etenim Ioseph filius

Zachariae et Azarias a Iuda Mach. Hierosolymis duces relictī erant, dum Iudas et Ionathas in Galaad, Simon in Galilaea bella gerebant (1 Mach. 5,18. 19); contra mandatum Iudae Ioseph et Azarias, ut et ipsi sibi nomen facerent, Iamnam aggressi sunt; sed Gorgias ex urbe prorumpens eos devicit (1 Mach. 5,55-62). Tempore Antiochi V. Eupatoris Gorgias Ptolemaeo defuncto sullectus est praefectus Coeles Syriae et Phoenices et una cum vicinis Idumaeis frequenter Iudaeos debellabat (2 Mach. 10,12-14). Immo etiam post pacem a Lysia et Iuda initam, cum Iudaei quiete frui vellent, Gorgias cum iis manus conservit, sed ipse in proelio fere captus est et exercitu suo fugato Maresam aufugit (2 Mach. 12,32-37).

GORTYNA (Γόρτυνα), urbs Cretae recensetur inter civitates, quibus senatus romanus (139/138 a. Chr.) Iudaeos fovere cum Romanis iunctos per epistulam commendavit (1 Mach. 15,23). Supponendum igitur est illo tempore magnum numerum Iudaeorum ibi fuisse. Sita erat in media fere insula versus litus australe iuxta Lethaeum fluvium, 50 fere stadia in circuitu habens; ad eam pertinebant duo portus Matalon et Lebena (*Strabo* X. 4,11). Eius ruinae cernuntur prope vicum *Hagia Dheka* a monte Ida meridientem versus.

GOSEM Neh. 2,49 alias in Vulgata scribitur Gossem (v. s. v.).

GOSEN (גֹּזֶן, Γοσόμ), oppidum in meridiana parte montis Iuda (Jos. 15,51); situs ignoratur. Praeterea terra Gosen Jos. 10,41; 11,16 enumeratur inter regiones a Iosue in Palaestina meridionali expugnatas. Haec regio sine dubio latius patebat quam fines alicuius urbis; nomen tortasse ducebat ab illo oppido; quatenam pars Palaestinae meridionalis designetur, dici nequit. Conficit *F. de Hummelauer* ad Jos. 10,40 tractum Gosen II. cc. suffici pro Asedoth (v. **ASEDOTH** 2).

GOSSEM (גֹּסֶם, Γησάμ), Arabs qui una cum Sanaballat Horonite et Tobia servo Ammanite aedificationem templi impedire frustra nitabatur (Neh. 2,49;

6,1. 2. 6; nomen 6,6 scribitur גֹּסֶם).

Gossem hand dubie accensendus est illis ducebus regionis trans flumen, qui magna cum consternatione audierunt Nehemiam advenisse, ut quaereret prosperitatem filiorum Israel (cf. Neh. 2, 9. 10); tribus enim illae ab orientem Palaestinae discursionibus praedatoris delectae instaurationem metuebant.

GOTHONIEL (Γοθωνίλ), pater Charbi, unus ex tribus principibus seu presbyteris Bethuliae (Iudith 6,45 LXX). In Vulgata 6,41 mendose legitur: Charmi qui et Gothoniell.

De alio Gothoniell 1 Par. 27,15 v. OTHONIEL.

GOZAM (Is. 37,12) v. **GOZAN**.

GOZAN (גֹּזָן, Γωζάν), regio in quam reges Assyriae Phul seu Theglathphalassar et Salmanassar (vel Sargon) partem Israelitarum captivorum abduxerunt (4 Reg. 17,6; 18,11; 1 Par. 5,26). Etiam Sennacherib in altera ad Ezechiam regem legatione potentiam Assyriorum iactans gloriatur Gozan ab Assyriis captam esse (4 Reg. 19,12; Is. 37,12 ubi Vulgata legit Gozam). Eadem communiter agnoscitur, quae apud *Ptolem.* V. 17 [18], 4 Gauzanitis Chaborae (*Khabūr*, flumini adiacens, in inscriptionibus cuneiformibus *Guzana* inter Euphratem et Tigridem (*Delitzsch, Schrader*), hodie *Kauschan* (*Ritter, Riess*).

Cf. *Delitzsch*, *Paradies* p. 184. 185; *Schrader-Whitehouse*, *Cuneif. Inscr. and Old Test.* I p. 267; *Ritter*, *Erdkunde* X. 248 ss.; *Riess*, *Bibel-Atlas ed.* 3 p. 14; *Vigourour*, *La Bible et les déc. mod. ed.* 6 III. p. 561-565; *E. Schrader*, *Keilinschriftl. Bibliothek* I. 208 ss.

GRABATUS (γράφτος, γραβάτος) lectus quidam vilior, qui facile portari, auferri potest sponda simplici constans, supra quam stragulum erat expansum (cf. *Marc.* 2,4 ss.; 6,55; *Ioan.* 5,8 s.; *Act.* 5,15; 9,33). Attamen in Vulgata Am. 3, 12 vox adhibetur de lecto maiore luxu instructo: in Damasci grabato; textum hebr. explicant: in panno damasceno lecti (strati).

GRADUS. Quindecim psalmi praefixa est inscriptio: canticum graduum

(שִׁיר הַמַּעֲלוֹת) ψῆδῃ τῶν ἀναστῆθαι scil. Ps. 119-133. Quae sit inscriptionis significatio, incertum est. Interpretes veteres iudaici quos sequuntur nonnulli antiquiores nomen inde explicant quod a levitis in festo tabernaculorum decantari solebant in quindecim gradibus scalae qua in templo ab atrio mulierum in atrium virorum ascendebatur. Videtur esse commentum rabbinicum, cui tamen ex recentioribus subscripsit *Hitzig*.

Alii explicant de carminibus quae cantaverint ascendentes in Ierusalem ad festa in templo celebranda, ita ut sint carmina ascensionum i. e. peregrinantium in urbem. Ter enim quotannis secundum legem se sistere debebant Israelitae Domino. Vetus opinio, quam Syrus in inscriptione complurium psalmorum indicat et quae fortasse etiam ab Aquila, Symmacho, Theodotione exprimitur (εἰς τὰς ἀναστᾶσεις) et a S. Chrysostomo, Theodoro indicato, cantica haec eorum esse statuit qui ex Babylone reduces in urbem et patriam redierint. Vario tempore turmae eiusmodi ascenderunt in urbem, uti ex libris Esdrae et Nehemiae patet. — Recentiores nonnulli vocem referre malunt ad peculiarem carminum formam; quae scil. gradatim quasi procedant, ita ut antecedentis sententiae pars ab initio subsequentis fere repeti, augeri et quasi ascendere videatur. Id quod tamen minime eodem modo in omnibus deprehenditur; neque quod in aliquibus deprehenditur, iis solis proprium est. Nam simile quid iam cernitur in cantico Debborae et in psalmis quoque aliis (exempla collegit *Riehm* ad Ps. 29, 1). Ceterum vide *Cornely*, Introd. II. 2 p. 23 s. 97.

GRAECI, GRAECIA (οἱ Ἕλληνες, ἡ Ἑλλάς). His vocibus redditur hebr. יָוָנִי; vide s. v. IAVAN.

Hoc loco de iisdem vocibus dicemus, prout in libris Mach. et in Novo Test. adhibentur.

Uti Dan. 8,21 rex Graecorum ille dicitur qui deiecit regno Persarum magnum quoddam regnum Graecorum in oriente condidit, ita 1 Mach. 1,1 et 6,2 dicitur: Alexander primus regnavit in Graecia i. e. imperium macedonico-

graecum fundavit. Simili modo vocatur regnum Graecorum regnum syro-macedonicum quod Seleucus Nicator fundavit (1 Mach. 1,11 anno 137 regni Graecorum i. e. secundum epochen vel aeram Seleucidarum; 8,18).

Quomodo Iason, summus sacerdos, Graecorum mores ludosque inducere studuerit refertur 2 Mach. 4,9 s.; 11,24; cf. 1 Mach. 1,12 s. In ipsa quippe Palaestina Iudaei habitabant permixti cum accolis qui lingua graeca et moribus graecis utebantur; eiusmodi accolae frequentes erant in regione maritima, in Galilaea (unde nomen: Galilaea gentium), in regione a Iordane orientali (in Decapoli) atque sat multae urbes maximam partem ab eiusmodi accolis habitabantur. Ita urbes Philisthaeorum et Phoenicum appellantur πεδῆεις Ἑλληνίδες 2 Mach. 6,8 (Vulgata: gentilium civitates), quae scil. a tempore Alexandri Magni mores graecos adoptaverint. Tales urbes praeprimis erant, ut plerumque iam ipsis nominibus panditur, Gaza, Iope, Anthedon, Apollonia, Caesarea, Ptolemais, Samaria, Scythopolis, Paneion (Paneas, Caesarea Philippi), Hippus, Gadara, Pella, Dium, Philadelphia, Areopolis etc. (cf. *Schürer*).

In Novo Testamento Graeci non una notione dicuntur. Quandoque videtur totum genus humanum designari in Iudaeis et Graecis; cf. Rom. 1,16; 2,9; 3,9; 10,12, 1 Cor. 12,13; Gal. 3,28; Col. 3,11. Alias dicuntur Graeci omnes gentiles qui graecis moribus imbuti Iudaeis opponuntur; ita Graeci, Ἕλληνες, appellantur non solum qui in Graecia habitant (Act. 17,4. 12; 18,4), sed etiam qui debebant Ieonii (Act. 14,1), Ephesi (Act. 19,10. 17 graece; 21,28 graece). Cum enim ex tempore Alexandri Magni lingua graeca moresque graeci et litterae graecae longe lateque per Asiam essent disseminata, facile nomen quoque Graecorum iis factum est commune qui natione non erant Graeci. Verum ab his omnino distinguere oportet eos qui dicuntur Ἕλληνας (Vulgata utique: Graeci) Act. 6,1; 9,29. Eo nomine designantur natione Iudaei qui apud exteras nationes nati graece loquebantur, et Act. 6,1 idem nomen etiam iis ex Hel-

lenistis inditur qui iam Christo nomen dederunt; sed 11,20 Ἑλληνιστάς corrige Ἑλλήνας.

De Hellenismo cf. *Droysen*, Geschichte des Hellenismus *ed.* 2, Gotha 1877-1878; *Willrich*, Juden und Griechen vor der makabaeischen Erhebung 1895; *E. Schürer*, Geschichte des jüdischen Volkes *ed.* 3. I. p. 187 ss. II. p. 21 ss. et de uribus hellenisticis in specie II. p. 72-175; *F. de Saulcy*, Histoire d'Hérode, roi des Juifs, 1867, p. 179 ss.

De Hellenistis cf. *Lightfoot*, Horae hebr. in Act. 6,1 s. *ed.* 1. *Leusden* II. p. 704 ss.; *Knaubauer*, Comm. in Act. p. 111. 116-203.

GRANATUM scil. malum granatum v. MALOGRANATUM.

GRATIA. In Vetere Testamento plerumque respondet voci hebr. תָּנָה. Frequens est dictio invenire gratiam in oculis, in conspectu alicuius, vel Dei vel hominis i. e. consequi favorem, potiri benevolentia, bene ac benigne suscipi. Qui submisce petunt, rogant ut inveniant gratiam, ut alii sibi faveant; cf. Gen. 30,27; 32,5; 33,8. 10; 34,11; 39,4. Inde gratiam dare idem est ac favorem alicuius cuiquam conciliare; ita Deus dicitur gratiam dedisse Iosepho in conspectu principis carceris (Gen. 39,21), eodemque modo: dabo gratiam populo huic coram Aegyptiis (Ex. 3,21; 11,3; 12,36); inde factum est ut Aegyptii vasa argentea et aurea libenter traderent Israelitis. Reddere gratiam idem est ac favorem alicui praestare, ei bonum retribuere cf. 2 Reg. 2,9. Porro gratia תָּנָה etiam ea dicuntur quibus favor facile conciliatur; vel ea quae placent, scil. suavitas, venustas: diffusa est gratia in labiis tuis (Ps. 44,3); ut addatur gratia capiti tuo (Prov. 4,9; cf. 3,22; 4,9; 22, 41); ita Prov. 11,16 mulier gratiosa (hebr. mulier gratiae i. e. venusta) et 31,30 fallax gratia.

Sed aliae quoque voces in Vulgata verbo gratiae redduntur; ita saepius תָּנָה; 2 Reg. 13,20 dicit David ad Ethai: Dominus faciet tecum misericordiam et veritatem, quia ostendit gratiam et fidem; in David ostendit amorem, pietatem, misericordiam. Item 2 Reg. 16,

47; 3 Reg. 2,7; 1 Par. 19,2; Esth. 2,9. Etiam תָּנָה ita redditur: qui bonus est hauriet gratiam a Domino i. e. habebit beneplacitum Domini (εὐδοκίαν) Prov. 12, 2; item 14,9: inter iustos morabitur gratia. Semel gratia ponitur pro תָּנָה (doctrina) Prov. 16,23: labiis eius addet gratiam. Praeterea ponitur gratia, ubi legitur δωρεά Sap. 16,23, χάρις Eccli. 18, 7, εὐχαριστία 2 Mach. 2,28, χαριστήριον 2 Mach. 12,45.

In Novo quoque Testamento gratia, χάρις dicitur de benevolentia, favore; praecipue de Dei et Iesu Christi benignitate et favore, cui omnia beneficia debemus, ita ut propensam Dei in nos voluntatem, liberalitatem, clementiam designet quam gratuito ex mera benignitate nobis impendit. Ita gratia induit notionem, ut aliquid libere ac gratuito praestetur iis qui id minime meruerint. Unde inter se opponuntur secundum gratiam, secundum debitum. Deinde dicitur saepe gratia id quod ex gratia i. e. ex benignissima Dei voluntate datur, auxilium divinum, quo animi hominum illustrantur, ad Deum convertuntur, roborantur, ad omne bonum confortantur. Huic dono maxime proprium est, ut gratuito detur secundum illud S. Pauli: si autem gratia, iam non ex operibus; alioquin gratia iam non est gratia (Rom. 11,6). Huic gratiae, opi divinitus praestitae, hominem oportet cooperari: exhortamur, ne in vacuum gratiam Dei recipialis (2 Cor. 6,1); gratia Dei sum id quod sum et gratia eius in me vacua non fuit (1 Cor. 15,10). Dicitur quoque gratia ipsa illa animi conditio qua Deo grati et accepti eius gratia effecti sunt iusti; ita stare in gratia (Rom. 5,2; 2 Petr. 3,18 crescite in gratia). Uti in Vetere Testamento, ita in Novo quoque dicitur praeterea de beneficio humano; ita de elemosynis 1 Cor. 16,3; 2 Cor. 8,6. 19; porro adhibetur notione gratiarum actionis 1 Cor. 10,30 et Luc. 17,9: numquid gratiam habet servo illi, quia fecit quae ei imperaverat? 1 Tim. 1,12 χάριν ἔγω gratias ago et 2 Tim. 1,3 et Luc. 6,32: et si diligitis eos qui vos diligunt, quae vobis est gratia, et sim. v. 33. 34, ubi aliqui propter Matth. 5,46

gratiam notione remunerationis accipiunt.

I. KNABENBAUER.

GROSSUS ponitur Cant. 2,13 notione ficus immaturae quae per hiemem succrescit; LXX ὄλυνθος; at Nah. 3,12 grossi exprimunt בכורים ficus primum maturescentes, praecoces, quae in deliciis haberi solebant (cf. Is. 28,4; Os. 9, 10; Mich. 7,1). Sensu priore legitur quoque Apoc. 6,13 (ὄλυνθος). Vide FICUS.

GRYPS, auctoribus profanis ales quadrupes fabulosa (*Herod.* 3,116; *Plin.* X. 49,136; *Greif*, *griffon*), S. Hieronymo est avis hebr. פֶּרֶס dicta, primum post aquilam tenens locum inter aves immundas (Lev. 11,13; Deut. 14,12). Eam LXX in Lev. iuxta codicem Alexandrinum γρύψ i. e. *vulturem* dicunt, codice Vaticano, Ambrosiano (F ap. *Sweete*) aliisque γρόψα legentibus, id quod etiam A in Deut. habet. Ex aliis versionibus Onkelos ער i. e. aquilae speciem, samaritana בואה i. e. *accipitrem*, Targ. hieros. ערוד i. e. probabiliter *aquilam nigram*, graeca veneta ἀλκίστεον interpretantur. — Cum praeter nomen nihil de פֶּרֶס in S. Scriptura memoretur, libera variis coniecturis via relicta est. Plerique etymologiam vocis a rad. פֶּרֶס *frangere*, *findere* secuti aquilam *ossifragam* intellegunt, eamque vel *Haliaetum albicillam* Gray dicunt, in Palaestina vix inventam, vel *Pandion haliaetum* Cuvier, piscibus tantum vietitantem, vel potiore aliqua ratione *Gypaetum barbatum* Cuvier (*Lämmergeier*) qui ex ossibus rostro suo robustissimo fractis medullam quaerit atque frequenter in Palaestina invenitur. Ex eadem etymologia etiam speciem *vulturis* alicuius, qui rapido volatu aera findat, peti posse monet F. *de Hummelauer* (in Lev. 11,13), vulturemque a LXX et Vulgata indicari non videtur improbabile, dummodo loco grypsis fabulosi γρόψα cum codice Alexandrino etiam a S. Hieronymo retentum supponas.

Cf. *Sam. Bochart*, Hieroz. II. 185-8, ed. *Rosenm.* II. 770-3; *E. F. K. Rosenmüller*, Bibl. Alterth. IV. 2,279-81; *L. Lewysohn*, Zool. d. Talm. 167; *H. B. Tristram*, Nat. Hist. of the Bible ed. 8,170-2; *J. G. Wood*,

Bible Animals 333-8; *P. Cultrera*, Fauna bibl. 292 s.; *Leunis-Ludwig*, Synopsis I. 1 ed. 3 p. 422. 431; *A. E. Brehm*, Tierleben ed. 3 VI. 415-37; cf. 437-62; *G. Lorela*, La zoologia nella Bibbia p. 115-7.

L. FONCK.

GUBERNACULUM ponitur in Vulgata Prov. 1,5 et 20,18 pro hebr. תְּהַבִּיחַ qua voce iis in locis ars gubernandi, consilium prudens designatur. Eadem vox hebr. alias redditur in Vulgata gubernator (Prov. 11,14; sim. Iob 37,12), consilium (Prov. 12,5), dispositio (Prov. 24, 6). De gubernaculo navis legitur Act. 27,40 et Iac. 3,4: ecce et naves, cum magnae sint et a ventis validis minentur, circumferuntur a modico gubernaculo, ubi impetus dirigentis voluerit.

GUBERNATOR legitur in Vulgata Ez. 27,8. 27-29 ubi hebr. solum de nautis sermo est; Prov. 23,34 quasi sopitus gubernator amisso clavo, hebr. sicuti iacens (dormiens) בִּרְאֵשׁ הַבֵּל quam vocem communiter de fune ancorario, alii de malo, de antenna interpretantur. De Prov. 11,14 vide s. voce antecedente. Gubernator i. e. dominus nautarum Ion. 1,6 accessit ad Ionam inter tempestatem dormientem eumque monet, ut invocet deum suum. Gubernator נַשְׁטָרְטִיף־תֵּף, qui clavum tenet cursumque navis dirigit, legitur Act. 27,14; Apoc. 18,17.

GUEL (גַּדִּיתָל, Γουδίτλη), Gadita, unus ex duodecim exploratoribus terrae promissae (Num. 13,16[15]).

GUNI (גֻּנִי; Γουνί, Γαυνί, 1 Par. 5,15 Γουνί). 1. Unus ex filiis Nephthali, progenitor familiae Gunitarum (Gen. 46,24; Num. 26,48; 1 Par. 7, 13).


2. Gadita quidam nobilis (1 Par. 5,15).

GURBAAL (גֻּרְבָּעַל i. e. hospitium Baal; ἡ πέτρα), sedes Arabum, quos Ozias rex Iuda Deo iuvante devicit (2 Par. 26, 7), ex contextu inter Palaestinam et peninsulam Arabiae quaerenda, ceteroquin ignota. LXX fortasse de Petra urbe praecipua Edomitarum cogitarunt. Targum pro Gur legit Gerar.

GUTTA in Vulgata ponitur pro hebr.

גִּתְרָה in Ps. 44 [43], 9, uti LXX (unde hic fluxit Vulgata) στακτήν habent; pariter in libro Ecclesiastici 24,21 pro στακτή *gutta* legitur, atque ea versio naturae huius resinæ odoriferæ satis convenit. Vide STACTE. De גִּתְרָה, quod Vulgata Cant. 4,14 bene aloe vertit, v. ALOE.

GYMNASIUM (γυμνάσιον), palæstra, locus publicus, ubi varii ludi et certamina et exercitia corporis obibantur. Iudæi qui mores Græcorum imitabantur, eiusmodi palæstram in Ierusalem aedificabant 1 Mach. 1,15[14]; cf. 4,9. 12.



H

HABA (*Kethib* יהבה, *Qeri* ירהבה i. e. et Haba; *זל* Ωζζε), filius Somer de stirpe Baria tribus Aser (1 Par. 7,34).

HABACUC. 1. Habacuc (הבכין, Ἀβακούμ), octavus in ordine prophetarum minorum. Quo tempore prophetaverit, aliis documentis deficientibus ex eius libello colligendum erit. Eo autem discimus babylonium exercitum nondum terram Israel invasisse; immo Chaldaeos suscitari a Domino ad scelera populi Iuda ulciscenda tamquam res fere incredibilis annuntiatur (1,3). Porro inter ea quae acri reprehensione vates prosequitur nulla fit mentio idololatriae. Ex hisce itaque magna probabilitate efficitur, prophetam vaticinatum esse ultimis annis regis Manasse, quo tempore scil. a captivitate redux Manasses et a viis suis prioribus pessimis conversus (2 Par. 33, 12 ss.) idololatriam publice ac palam fieri certe pro viribus prohibuit. Eo tempore pariter intellegitur, quomodo incursum Chaldaeorum ut rem plane novam et inauditam describere potuerit Habacuc (1,3). Quare merito illud tempus assignant et veteres multi et recentiores aliqui (ita iam *Seder Olam*, « neque pauci neque indocli » apud *Sanchez*; ita communior opinio apud *Cornelium a Lapide*; ita *Kaulen*, *Trochon*, *Cornely*). Alii eum tempore Ezechiae, Iosiae, Ioakim vixisse statuerunt (cf. *Cornely*, *Introd.* II. 2 p. 378; *Knabenbauer* in *Proph. min.* II. p. 32); ad quae tamen tempora duo illa, quae dicta sunt, minime congruere videntur. De eius vita nihil notum est. Refertur quidem apud *Ps. Epiphanius* eum fuisse ex agro Βηθζοχάρ ex tribu Simeon, urbe a Chaldaeis eversa fugisse in Ostraci-

nem, mox regressum esse in patriam (*M.* 43,417 s.); verum haec incerto auctore dicta ad fabulas iure amandantur. In libello Chaldaeos a Deo mitti ultores improbitatis populi Dei describit; verum virgam hanc qua Deus ad ultionem utatur mox a Domino iri contractum; in populo Dei iustum in fide sua fore salvum. Sublimi carmine (cap. 3) Deum iudicem describit, qui impios deliciet, piis salutem largietur eximiam.

2. Habacuc (Ἀβακούμ) propheta nominatur quoque *Dan.* 14,32, qui scil. dum messoribus cibos fert, iubetur ab angelo prandium ferre Danieli in lacu leonum apud Babylonem et ab angelo illuc transfertur. Hunc prophetam esse alium a priore, iam ratione temporis suadetur; nam, uti supra dictum est, argumento vaticinii prohibemur ne prophetam aequalem faciamus Danielis. Apud *LXX* titulus cap. 14 legitur: ex prophetia Ambacum filii Iesu ex tribu Levi. Fuerunt quidem qui hunc Habacuc eundem putarent cum priore (ita *S. Hieronymus*, *Mariana*, *Calmet*, *Vigouroux*); at nisi eum vixisse dixeris multo ultra consuetam hominum aetatem, id assumi nequit. Interpretes protestantes eam translationem rident tamquam rem portentosam, fabulosam. Rationalistas ita agere nemo mirabitur. Verum iure miraberis eos quoque ridere qui librorum sacrorum protocanonicorum Novique Testamenti auctoritatem sartam tectamque esse volunt. Sed hi monendi sunt, ut legant *3 Reg.* 18,12 et *4 Reg.* 2,11. 16 et *Matth.* 4,5. 8; *Luc.* 4,5. 9 et *Act.* 8,39. 40. Si haec non sunt monstrosa, cur illud ut absurdum traducunt?

I. KNABENBAUER.

HABER (הַבֵּר, Χαβέρ), gente Cinaeus, maritus Iahel, quae Sisaram, duce[m] exercitus regis Iabin, occidit (Iud. 4, 11. 17. 21; 5, 24). Gens Cinaeorum a Hobab cognato Moysis descendens in extremo meridie terrae Chanaan sedes fixerat (cf. Iud. 1, 16); Haber autem Cinaeus septentrionem versus profectus tabernacula tetenderat usque ad vallem Sen-nin iuxta Cedus Nephthali et foedus quoddam pepigerat cum Iabin rege Asor (v. IABIN 2 et IAHHEL). Conficit *F. de Hummelauer* (ad Ios. 19, 33) superstite Iosue et Danilas emigrasse in Dan-Lais pagum Nephthalitarum et Nephthalitis concessum esse pagum commutatorum ad austrum lacus Tiberiadis et Cinaeos secessisse alios in extremum Negeb, alios duce Haber in istum pagum commutatorum a Nephthalitis invitatos.

HABIA (הַבִּיָּה, Ἑβεία), sacerdos, cuius posteri duce Zorobabel ex captivitate redierunt, sed a sacerdotio exclusi sunt, cum genus suum sacerdotale ex tabulis genealogicis demonstrare non possent (Neh. 7, 63). Idem Esdr. 2, 61 scribitur Hobia (הַבִּיָּה, Ἀβεία).

HABITATIO PULCHRA (Mich. 1, 11) v. SAPHIR.

HABOR (הַבּוֹר, Ἀβόρ et 1 Par. 5, 26 Χαβόρ), fluvius Mesopotamiae superioris, quo Salmanassar (vel Sargon) partem Israelitarum captivorum abduxit (4 Reg. 17, 6; 18, 11; 1 Par. 5, 26). A plerisque agnoscitur idem, qui apud antiquos vocatur Aborrhaz (*Strabo* XVI. 1, 27), Aburas (*Isidor. Char.* 4), Abora (*Zosimus* 3, 12), Chaboras (*Ptolem.* V. 48, 3 [ed. *Müller-Fischer* 17, 3]), Chabura (*Plin.* XXXI. 3, 37), hodie autem *Khabūr*. Is originem ducit a monte Masio (*Kharadja Dagh*) et apud Circesium (*Karkesia*) in Euphratem influit; a parte sinistra (orientali) recipit Mygdonium fluvium (cf. *Riess*, Bibel-Atlas ed. 3 Tab. IV. et V.). Plura vide apud *Ritter*, Erdkunde X. p. 120. 139. 244. 246 s. 1148. — Aliis paucioribus praeplacet alter *Khabūr*, qui ab oriente in Tigridem superiorem influit; sed cf. *Schrader-Whitehouse*, Cuneif. Inscrip. and Old Test. I. p. 267. Praeterea v. GÖZAN. — Ab utroque fluvio *Khabūr* dis-

tinguendus est Chobar Ezechielis, qui fluvius in Babylonia quaerendus est.

Ex multorum opinione *Khabūr* tributarius Euphratis est etiam ille torrens in Mesopotamia, qui Iudith 2, 24 LXX appellatur Abronas, 2, 14 Vulg. Mambre (cf. s. v.).

HABSANIAS (הַבְּסַנְיָה, Ἀβασάνης) videtur fuisse caput alienius familiae de genere Rechabitarum; eius nepos Iezonias tempore Ieremiae prophetae praecipuus erat inter Rechabitas (Ier. 35, 3).

HACCUS v. ACCOS 1.

HACELDAMA (Ἀκeldამა) i. e. ager sanguinis (chald. הַקֵּל דָּמָא) a Iudaeis

hierosolymitanis appellatus est ager figuli, quem principes sacerdotum pro triginta argenteis a Iuda Iscariote in templum proiectis emerunt in sepulchrum peregrinorum (Matth. 27, 8; Act. 1, 19). Ager iste figuli (ὁ ἀγρὸς τοῦ κεραμέως) omnibus notus esse supponitur, fortasse quia etiam post venditionem externa vestigia indicabant in eo fundo argillam ad vasa conficienda a figulo, qui agrum possederat, fuisse effossam.

Aliqui recentiores in narratione Evangelistae cum verbis S. Petri Act. 1, 18 collata duplicem eiusdem rei traditionem deprehendere sibi videntur, sed immerito. Dicit quidem S. Petrus l. c. de Iuda: et hic quidem possedit (ἐκτίσαστο i. e. acquisivit) agrum de mercede iniquitatis. Verum apostolus de re loquens eunctis nota ita id unum effert, quod Iudas pro apostolatu, ad quem vocatus erat, sibi acquisierit idque effert modo oratorio: acquisivit agrum, quia de pecunia proditoris emptus est; dein addit alterum quod sibi acquisivit: suspensus scil. cecidit pronus in terram et crepuit medius. Alii modum loquendi explicant fictione quadam iuris, quia scil. pecunia Iudae emptus sit ager, Iudam censeri posse agrum acquisivisse. Cf. *Knabenbauer*, Comm. in Matth. ed. 2 II. p. 302 et Comm. in Act. p. 34.

Ostenditur hodie locus ille *Haqq el-Dīm* vocatus, a meridie urbis Iersalem in ascensu australi vallis Benennom (Hinnom); inveniuntur ibidem camerae sepulchrales et strata terrae argillosae.

Traditio hunc situm assignans usque ad S. Hieronymum ascendit, qui Haceldama ponit ad australem plagam montis Sion (Onom. *ed. Lag.* 99,21) corrigens textum Eusebii ἐν βορείοις τοῦ Σιών ὄρους (l. c. 229, 87). Eandem traditionem refert S. Antoninus Martyr vel potius Anonymus circa annum 370 : « Exeuntibus nobis de Siloa venimus in agrum, qui comparatus est de pretio Domini, qui vocatur Acheldemach, hoc est ager sanguinis in quo sepeliuntur omnes peregrini. Inter ipsas sepulchras cellulas servorum Dei; viri multi virtutum. Poma et vineas inter ipsa monumenta per loca ». Circa a. 670 Adamnanus (Arculfus) « hunc parvum agellulum ad australem montis Sion partem situm saepe frequentans visitabat » et saeculo 8. ineunte Beda refert : « Porro Acheldemach ad australem plagam montis Sion peregrinos et ignobiles mortuos hodie quoque alios terra legit, alios inhumatos putrefacit ».

Cf. *Antonini* [Anonymi] *Placentini Itinerarium* 26; *Adamnani* De locis sanctis libri tres, l. I. 19; *Beda* Liber de locis sanctis 3; apud *P. Geyer*, *Itinera hieros.* p. 177. 243. 307. Praeterea v. *Robinson*, *Palaestina* II. 178 s.; *T. Tobler*, *Topographie von Jerusalem* II. 260 ss.; *Schegg*, *Pilgerreise*, 1867 l. p. 392; *Schick* in *Pal. Expl. Fund.* Quart. Stat. 1892 p. 283-289.

HACHAMONI בְּחֶחֱמוֹנִי i. e. filius Hachamonitae, Vulg. filius Hachamoni; ὁ υἱὸς Ἀχαμόν 1 Par. 11,11; ὁ τοῦ Ἀχαμί 1 Par. 27,32). Hachamon vel Hachamoni haud dubie erat caput alicuius familiae, ad quam pertinebant Iesbaam (1 Par. 11,11) et Iahiel (27,32). Ex 1 Par. 11,11 etiam emendandus est textus corruptus 2 Sam. 23,8 : יוֹשֵׁב בְּשֵׁבֶת הַחֶחֱמוֹנִי Vulg. sedens in cathedra sapientissimus (princeps); vertendum erat : Iesbaam filius Hachamoni (*F. de Hummelauer* ad h. l.).

HACHELAI הַחֶלַי (Ἀγελιά), pater Nehemiae (Neh. 10,1); idem Neh. 1,1 scribitur Helchias (Ἑλκεζιά).

HACHILA גִּבְעַת הַחִילָה; Vulg. collis Hachila et Gabaa Hachila; ὁ βουνὸς ὁ Ἐχλάδ ἐν τοῦ Ἐχελᾶ, collis in deserto, ubi David cum 600 viris delitescbat, quando Ziphæi eius latebras Sauli dua-

bus vicibus indicarunt. Priore occasione (1 Reg. 23,19) David de colle descendens meridiem versus in desertum Maon se recepit (23,24. 25). Altera occasione (26,1 ss.) Saul in colle Hachila castrametatus est, David autem colle relicto penitus in desertum (Ziph) se abdidit et noctu in castra Saulis penetrans hastam et scyphum abstulit; deinde ex adversa rupe, quae sine dubio valle interiecta a colle Hachila seiungebatur, somno sopitos compellans iram divinam iis, qui regem in se incitaverant, imprecatus est et in terram Geth ad Philisthaeos abiit. Situs erat collis ad dexteram deserti (23,19) seu ex adverso (hebr. a facie) solitudinis (26,1). Ex contextu intelligendum est desertum Ziph, quod est inter urbem Ziph (*Tell Zif*) et mare Mortuum; is igitur, qui ex colle Ziph facie ad orientem versa prospiciebat, coram se cernebat desertum Ziph et ad dexteram seu meridiem deserti collis Hachila (*F. de Hummelauer* ad 1 Reg. 23, 19). A vero sine dubio aberrant Eusebius et S. Hieronymus, quibus Echela est vicus 7 mil. pass. ab Eleutheropoli distans (Onom. *ed. Lag.* 256,3; 120,15); is vicus nimium abest a Ziph et Maon nec respondet contextui biblico, quare *Relandus* (Palaestina p. 745) suspicatur Echelam confundi cum Ceila (cf. Onom. *ed. Lag.* 109,19). Ad orientem *Zif* invenitur collis *Palr el-Kōla*, quem nonnulli (*Conder*, *Buhl*) cum Hachila componunt. Recentius vero *Khirbet Khoreisā* ad meridiem *Zif* censetur esse illa arx הָרֵשׁ (הָרֵשָׁה), quam David in vicinia Ziph occupavit (1 Reg. 23,15. 16. 18. 19) et cuius mentio etiam fit apud Flav. Iosephum (Ant. XIV. 13,9; Bell. iud. I. 13,8; 15,4), ut A. Schlatter existimat; attamen non constat הָרֵשׁ locis citatis esse nomen proprium arcis cuiusdam, cui possit etiam significare *silvā*, *dumentum*; nomen proprium in ea voce latere suadent utique LXX et Flav. Iosephus (Ant. VI. 13,2) interpretantes ἡ Κενυή (= חדשה).

Cf. *Conder* in *Survey of West. Pal. Mem.* III. 313 et apud *Hastings*, *Dict. of the Bible* II. 273; *Buhl*, *Alt. Pal.* 1886 p. 87; A. Schlatter, *Einige Ergebnisse aus Niese's*

Ausgabe des Iosephus in Zeitschr. d. D. Pal.-Ver. XIX. 1896 p. 229.

HACUPHA (חֲכֻפָּה; Ἀχουφά Esdr. 2, 34; Ἀχουφά Neh. 7, 53), Nathinaeus, cuius posterius duce Zorobabel ex captivitate redierunt (Esdr. 2, 54; Neh. 7, 53).

HADAD (הַדָּד, Χωδάν) recensetur octavus inter filios Ismaelis (1 Par. 4, 30). Eius nomen legitur Hadar (הַדָּר vel melius הַדָּד, Χωδάν) Gen. 25, 45. Lectionem הַדָּד confirmant Samaritanus et Flav. Iosephus (Ant. I. 12, 4 Χόδαμος, Χόδωξ; et Χόδαδος *ed. Niese*). De Hadad vel posteris eius nihil notum est.

HADAIA (הַדַּיָּא, Ἐδαιά, Α Ήδιδά), pater Ididae matris Iosiae regis, oriundus de Besecath (4 Reg. 22, 1); v. BAS-CATH.

HADAR v. HADAD.

HADASSA (הַדַּסָּה, nova scil. urbs, Ἀδασάν), urbs tribus Iuda in secunda provincia Sephelae (Ios. 45, 37). Eusebius confundit Hadassa cum Adarsa seu Adazer (vide s. v.). Teste Mishna (Erubin 3, 6 cum notis Bartenorae et Maimonidis apud Surenhusium II. p. 105) Hadassa 50 habitationes numerabat eratque urbs minima in Iudaea seu tota terra Iuda. Hodie fortasse vicus 'Abdis prope Ascalon orientem versus (*Survey of West. Pal. Mem.* II. 409) nec procul a Magdalgad (*el-Medjdel*), quae Ios. 45, 37 simul cum Hadassa nominatur. Alii (*Dillmann* ad h. l.) situm ignotum esse dicunt.

HADID urbs v. ADLADA, ADDUS.

HADRACH (הַדְּרַחַךְ, Σεδράχ, Α Σεδράχ) legitur Zach. 9, 1: Onus verbi Domini in terra Hadrach; — quo nomine designantur regio et oppida, quae ad maiorem urbem seu metropolim Hadrach pertinent. Praetermissis significationibus symbolicis et coniecturis innumeris tum veterum tum recentiorum (quarum praecipuas recenset *Knabenbauer* ad h. l.) iuvat notare id, quod assyriologi ad vocem explicandam afferunt. Hadrach, quae Zach. 9, 1. 2 una cum Damasco et Emath (Hamath) nominatur, videtur ea-

dem esse urbs et regio, quae in inscriptionibus cuneiformibus *Hatarika*, *Hatarikka*, *Hatarakka* appellatur et cuius mentio fit simul cum Damasco, Hamath (Emath), Zoba (Soba), Zemar (Samaraci), Arka (Aracaci); expeditiones Assyriorum in terram *Hatarika* commemorantur ex annis 772, 765, 755 a. Chr.; ex contextu inscriptionum quaerenda est haud procul a monte Libano septentrionem versus. — Aliqua dubia contra hanc opinionem assyriologorum, quae reliquis coniecturis de Hadrach finem imponere videbatur, movit *Wolf Baudissin* et pro comparatione cum Hadrach affert alium quendam locum in Assyria, quem Ptolemaeus (VI. 1, 6) Χατράχαρτα appellat.

Cf. *Schrader-Whitehouse*, Cuneif. Inscrip. and Old Test. II. p. 153. 190. 192; *Delitzsch*, Paradies p. 279; *H. Winkler*, Alttestam. Untersuchungen 1892 p. 126-134; *Wolf Baudissin* in Real-Encycl. für protest. Theol. ed. 2 et etiam ed. 3, VII. p. 300. 301, ubi opiniones variae de Hadrach enumerantur et maxima probabilitas pro Hadrach = *Hatarika* conceditur.

HADRIEL (הַדְּרִיֵּאל, Ἀδριήλ, Ἐσδριήλ), filius Berzellai Molathites seu de Molathi (vide s. v.), maritus Merob filiae Saul (1 Reg. 18, 19; 2 Reg. 21, 8 ubi pro Michol legendum est Merob); quinque filii quos Merob Hadrieli genuerat, a Gabaonitis in patibulo suspensi sunt (v. GABAON et GABAA 4).

HAERESIS, HAERETICUS. Vox graeca αἵρεσις et a verbo activo αἵρεῖν *deemptionis, expugnationis*, et a verbo medio αἵρεῖσθαι *electionis, optionis* significationem habet apud scriptores profanos. Per metonymiam etiam sententia aliqua vel opinio philosophica, quam aliqui sibi tuendam ac profitendam optant, et porro ipsa quoque schola sive secta eorum qui talem sententiam reiectis aliis amplectuntur, vocabulo αἵρέσεως appellantur a Polybio, Diodoro Siculo, Cicero, Diogene Laërtiade, aliis. Ut ex Flavio Iosepho constat, illae factiones seu sectae Iudaeorum, quae in rebus religiosis et politicis sua quaeque placita sequebantur, αἵρέσεις nuncupabantur (Ant. XIII. 5, 9; Bell. iud. II. 8, 1. 2). Pharisaei, Sadducei, Esseni, et si qui exsi-

stebant alii. Idem in Novo Test. pharisaicae (Act. 15,5; 26,5) et sadducaicae (ib. 5,17) αἱρέσεως mentio fit, nec ulla ipso αἱρέσεως vocabulo nota vituperii inuri sectae alicuius asseclis videtur, ut maxime ex verbis Pauli (Act. 26,5) patet. Ab Iudaeis etiam christiana religio, cum orebatur, pro tali secta seu haeresi habebatur (28,22) et utpote a falso Messia fundata contemnebatur (ib. 24,5); sed S. Paulus palam eam esse dumtaxat haeresin i. e. scholam aliquam religionis novae alicui doctrinae inhaerentem negabat, esse eam potius τὴν ὁδὸν affirmabat, eam nempe viam ac rationem Deum colendi, quae et esset unice vera et omnibus ad salutem necessaria (ib. 24,14).

In regno messiano, in Christi ecclesia doctrinaque christiana tales haereses existere, nisi contemptis Christo et Spiritu veritatis ecclesiae promisso et infallibili magisterio apostolico, non possunt. Unde in Novo Test. pro re nefaria atque abominanda, pro opere carnis (Gal. 5,20), pro re perniciose (2 Pet. 2,1) habentur, ab ita solum quadamtenus prosunt, ut qui Christiani probati sint, manifestent (1 Cor. 11,19). Earum perversitas in eo potissimum sita est, quod ecclesiae ac fidei unitati essentiali (Eph. 4,5) adversantur; quo fit ut αἱρέσεις evadat synonymum vocabulorum διχαιοσύνη et σχίσμα, a quorum priore eo differre videtur, quod in re religiosa versatur, ab altero eo quod est dissidium magis diuturnum ac perlinax quo haeretici a reliquis fidelibus se separant (1 Cor. 11,18; Gal. 5,20; cf. Ioan. 7,43; 10,19). « Haereticum hominem » (αἱρετικὸν ἄνθρωπον, Tit. 3,10) S. Paulus eum nuncupat, qui doctrinam veritati contrariam propagat. Videmus igitur ab ipsa iam aetate apostolica haec vocabula *haereseos* et *haeretici* eum sensum habere coepisse, quo traditio catholica ea accipit. In versione Vulgata Act. 24,5. 14; 26,5; 28,22; Gal. 5,20; 2 Petr. 2,1 interpres graecam vocem in *sectam* vertit, reliquis locis ipsam retinuit.

F. ZORELL.

HAGAB (חגב, Ἀγάζ), Nathinaeus, cuius posterius ducem Zorobabel ex captivi-

tate redierunt (Esdr. 2,46); loco paralelo Neh. 7,48 hoc nomen omissum est.

HAGABA (חגבה, Ἀγάζ), Esdr. 2,45; Neh. 7,48; Ἀγάζ), Nathinaeus, cuius posterius ducem Zorobabel ex captivitate redierunt.

HAGGI (חגי, Ἀγγεῖς, Ἀγγεῖ), secundus filius Gad (Gen. 46,16); idem in Vulgata Num. 26,15 scribitur Aggi et Aggilarum progenitor.

HAGGIA (חגיה, Ἀγιά), levita de stirpe Merari (1 Par. 6,30[13]).

HAGGITH (חגית, Ἀγγεῖθ et 2 Reg. 3,4 Φεγγεῖθ), una ex uxoribus David, mater filii eius quarti, Adoniae, qui Davidi natus est in Hebron (2 Reg. 3,4; 3 Reg. 1,5. 11; 2,13); eadem in Vulgata 1 Par. 3,2 scribitur Aggith.

HAI. 1. Hai חַי semper cum articulo חַיִּי i. e. acervus rudium; Ἀγγαί, Χαί, sed etiam Ἀζά, Ἀί), urbs regia Chanaanorum, quae iam tempore Abraham existebat (Gen. 12,8; 13,3), quam Iosue expugnavit et anathema fecit (Ios. 7,2. 5; 8,1 ss.; 9,3; 10,1. 12,9); eadem haud dubie est Aiath (עֵיִת Ἀγγαί), quae in descriptione itineris Sennacherib nominatur ante Magron et Machmas (Is. 10,28). Ex captivitate redierunt viri Bethel et Hai 223 (Esdr. 2,28) vel solum 123 (Neh. 7,32). Inter urbes a Beniaminitis post exilium denuo inhabitatas recensentur Mechmas, Hai (חַי, Ἀζώ) et Bethel (Neh. 11,34). Locis citatis describitur esse ex latere Bethel (Ios. 12,9), iuxta Bethaven ad orientalem plagam oppidi Bethel (Ios. 7,2; cf. Gen. 12,8), a Bethel separata per vallem, in qua quinque millia virorum in insidiis positi erant (Ios. 8,9. 12), alteram vallem adjacentem habens septemtrionem versus (8,11), urbem Machmas autem meridiem versus (Is. 10,28). S. Hieronymus (Onom. ed. Lag. 84,1 cf. Eusebium 209,59) scribit: « Agai vix parvae ruinae resident et locus tantummodo demonstratur ». — Nunc probabilius *el-Tell* (cf. Ios. 8,28: fecit eam תֵּל-עוֹלָיִם acervum aeternitatis) prope *Beitin* (Bethel) inter

meridiem et orientem seu pleniore nomine *Tell el-Hatjar* i. e. collis lapidum (*Van de Velde*, *Wilson*, *D. Zanechia* et v. infra). Aliis praecipue *Khîrbet Haiyân* haud procul a priore situ inter meridiem et orientem (*Conder*, *Buhl*, *D. Zanechia*), aliis *Khîrbet el-Kudeire* in eadem vicinia meridiem versus (*Guérin*), aliis denique minus feliciter *Khîrbet el-Haiye* inter meridiem et orientem a *Makhmās* (*Krafft*, *H. Kitchener*).

Cf. *Van de Velde*, *Memoir* 1858 p. 282; *Ch. Wilson* in *Survey of West. Pal.* Mem. II. 372; *idem* apud *Smith-Fuller*, *Dict. of the Bible* I. p. 78; *Conder*, *Tent Work in Palestine* 1889 p. 253; *idem* in *Pal. Explor. Fund*, Quart. Stat. 1881 p. 254; *F. Buhl*, *Alt. Pal.* 1896 p. 177; *D. Zanechia*, *La Palestine d'aujourd'hui* 1899 II. 469 s. 496 ss., qui in *el-Tell* agnoscit urbem antiquam Hai, in *Khîrbet Haiyân* urbem Esdr. 2,28 reaedificatam, iuxta quam magnifica necropolis bene conservata cernitur; *V. Guérin*, *Judée* III. 59 ss. 66 provocans ad *Robinson*; sed qualem situm ex tribus vicinis *el-Tell*, *Kh. Haiyân*, *Kh. el-Kudeire* *Robinson* (*Palaestina* II. 331. 340. 368. 557. 562 ss.) urbi Hai assignaverit, non satis liquet; *Krafft*, *Die Topographie Jerusalems* 1846 p. 9; *H. Kitchener* in *Pal. Explor. Fund*, Quart. Stat. 1878 p. 10. 75. 132 et *Survey of West. Pal.* Mem. III. 33.

2. Hai (הַי, חַי, Kzî, codex B omittit), urbs Ammonitarum (Jer. 49,3); ex contextu patet fuisse urbem quandam praecipuam, quae ab hoste invadente prima deiciatur et reliquis urbibus ruina sua luctum et ululatum indicet. Est plane ignota.

HALA (חַלָּה, חֶלְלָה), regio, in quam rex Assyriae partem Israelitarum captivorum abduxit (4 Reg. 17,6; 18,11 et 1 Par. 5,26, quo loco Vulgata scribit Lahela, LXX Ἀζά, Ἀζάζ), omnino distinguenda a Chale (Gen. 10,11. 12). A multis (cf. *Schrader*, *Vigouroux*, *Pannier*) censetur esse Chalceitis (Χαλκεΐτις) Mesopotamiae iuxta Gauzanitum (v. GOZAN) in finibus fluviorum Chaboras (Habor) et Saokoras (Mygdonii) sita, de qua Ptolemaeus (V. 18,4): « Oblinet autem eius terrae partes prope Armeniam Anthemusia, infra quam est Chalceitis et infra hanc Gauzanitis atque ad Tigri-

dem fluvium Adiabene ». Ex inscriptionibus cuneiformibus in comparationem adducitur *Ha-lah-hu* urbs Mesopotamiae cum Reseph, Gozan, Nisibe enumerata; vestigium antiqui nominis prae se ferre videntur ruinae *Gla* seu *Kalah* iuxta superiorem *Khabâr* (Habor). Attamen recentissimus editor Geographiae Ptolemaei, *Curtius Theod. Fischer* (Parisiis, *Firmin-Didot*, vol. I. p. 1002) ad V. 17 [18], 4 adnotat: « Chalceitis alius nemo commemorat. Nomen corruptum esse pro certo habeo cum *Müllero*, qui Χαλκεΐτις coniecit ratione parum probabili. Scribas velim Βαλχέτις. Regio denominata a Βαλχέτις fluvio, hodie *Belikh* (cf. *Ritter*, *Sachau*) ». Iamvero etiam LXX 4 Reg. 17,6 ἐν Ἀζά καὶ ἐν Ἀδωρ ποταμοῖς fluvium, non regionem innuunt. Quibus perpensis commendatur emendatio a nonnullis (*H. Winckler*, *Maspero*) proposita בִּלְחָה pro חֶלְלָה, ut sensus sit: collocavit eos in בִּלְחָה (*Belikh*) et Habor fluvii Gozan, quem sensum etiam Vulgata 4 Reg. 18,11 exprimit.

Cf. *Schrader* apud *Riehm-Baethgen*, *Handwb. des bibl. Altert.* I. 569 et Keilinschriften und Geschichtsforschung p. 167; *Schrader-Whitehouse*, *Cuneif. Inscript. and Old Test.* I. p. 268; *F. Vigouroux*, *La Bible et les découv.* mod. ed. 6 III. 561. 562; *Pannier* apud *Vigouroux*, *Dict. de la Bible* III. 401; *H. Winckler*, *Alttest. Untersuchungen* 1892 p. 408. 109 (sed opinionem suam ipse *Winckler* dereliquit in *Altorientalische Forschungen* p. 292); *Maspero*, *Histoire ancienne de l'Orient*, 1899 III. p. 216. De fluvio *Belikh* v. *Ritter*, *Erdkunde* XI. 250 ss.; *E. Sachau*, *Reise in Syrien und Mesopotamien* 1883 p. 230 s.

HALAA (חֶלְלָה, חֶלְלָה), una ex uxoribus Assur patris (possessoris) Thecuac (1 Par. 4,5); eius tres filii recensentur (4,7; LXX nomina uxorum confundunt).

HALCATH, HELCATH (חֶלְקָת; Ἐξελεζό, Ἀελζάτ), urbs (tribus Aser (Ios. 19,23), civitas levitica filiorum Gerson (Ios. 21,34); eadem 1 Par. 6,73 [60] scribitur Huac (חֶלְקָת, Ἀζάτ). Coniicitur esse hodiernus vicus *Yerkō* inter septentrionem et orientem ab Aecho.

Cf. *Guérin*, Galilée II. 16, 17; *J. Schwarz*, Das heilige Land 1852 p. 152.

HALHUL (הַלְחֻל, Ἀλλούζ), urbs tribus Iuda, in quarta provincia montis (Ios. 15, 58). S. Hieronymus: est et hodie in regione ad Aeliam pertinente villa nomine Alula iuxta Chebron (Onom. ed. Lag. 119, 7). Hodie *Halhul* a Hebron septentrionem versus et prope Bethsur.

Cf. *Guérin*, Judée III. 284-287, qui etiam documenta adducit de opinione rabbinica Gad Videmem ibi esse sepultum; *Robinson*, Palestina I. 359; *Carmoly*, Itinéraires de la Terre Sainte 1847 p. 242. 388. 435; *D. Zancichia*, La Palestine d'aujourd'hui 1899 II. 216. 217.

HALIAEETUS tertium inter aves immundas locum tenet (Lev. 11, 13; Deut. 14, 12), nomine hebraico עֲנַיִיָּה et graeco ἀλιαιέτος i. e. aquila maris dictus; neque alia de hac ave mentio in S. Scriptura occurrit. Onkelos עֲנַיִיָּה explicat, quod Targ. hieros. pro עֲנַיִיָּה habet (v. GRVPS);

idem Targum hic בְּרֵבֵזָה exponit, versio samaritana עֲנַיִיָּה, Græccus venetus γράζ. De aliis testibus antiquis non satis videtur constare. — Nomine hebraico aquilae vel vulturis speciem significari ex contextu apparet. Quænam vero in particulari designetur, ex solo nomine haud facile quis dixerit. Nominis etymologiam iuxta interpretationem Hebræorum secutus *Bochartus* עֲנַיִיָּה (cum ם epenthético formatum) et עֲנַיִיָּה (עֲנַיִיָּה) Chaldaeorum ad radicem עֲנַי revocat atque aquilam *validam* seu *valeriam*, nigram scilicet graeco nomine μελαναιέτος dictam, exponit. Quam cum *Aristoteles*, *Plinius*, al. inter aquilas « minimam magnitudine, viribus præcipuam, colore nigricantem » describant (*Aristot.* Hist. an. IX. 22 al. 32, 2; *Plin.* X. 3, 6; cf. *Homer.* II. 21, 252 s.), haud improbabilius quis eam *Pandion haliaetus* Cuvier esse dixerit, non quidem omnino minimam aquilarum, sed plerisque minorem atque in Palaestina satis frequentem. Hoc igitur sensu Hebræorum explicatio cum LXX interpretum et S. Hieronymi auctoritate consentiens עֲנַיִיָּה esse haliaetum probabile ostendit. Falso autem alterum haliaetum, a *Gray albicillam* dictum quis

intellexeret, quæ in Palaestina vix invenitur. Similem vero Pandioni speciem, omnium aquilarum palaestinsensium communissimam, *Circæum gallizum* Boie (= *C. brachydactylus* Temminck), etiam eodem nomine significari haud improbabile videtur. Aliæ aquilarum species, quas *Tristram* simul comprehensas supponit, eodem vel potiore iure sub nomine עֲנַיִיָּה intelleguntur.

Cf. *Sam. Bochart*, Hieroz. II. 188-90, ed. *Rosenm.* II. 774-6; *I. D. Michaelis*, Supplem. ad lex. hebr. p. 1879 s.; *E. F. K. Rosemüller*, Handb. d. bibl. Alterth. IV. 2, 281; *L. Lewysohn*, Zool. d. Talmuds 167; *H. B. Tristram*, Nat. Hist. of the Bible ed. 8, 184-6; *id.* Fauna and Flora of Palest. 101. 107; *J. G. Wood*, Bible Animals 354 s.; *P. Cultrera*, Fauna bibl. 293 s.; *Leunis-Ludwig*, Synopsis I. 1 ed. 3 p. 431; *Ph. L. Martin*, Naturgesch. d. Thiere I. 2, 516-9. 522 s.; *A. E. Brehm*, Tierleben ed. 3, VI. 307-11. 315-28. 332-6; *G. Loreta*, La zoologia nella Bibbia p. 117.

L. FONCK.

HALICARNASSUS v. ALICARNASSUS.

HAM, urbs præcipua Zuzim (vide s. v.).

HAMATHÆUS v. AMATHÆUS et EMATH.

HAMDAN (הַמְדָן, Ἀμαδάν), primus filius Dison filii Seir Horraci (Gen. 36, 26); idem 1 Par. 1, 41 scribitur Hamram (הַמְרָן, Ἑμερών). Aliis nomen Hamran videtur esse mendosum (*Gesenius-Buhl*, Handwb. ed. 13), aliis autem nomen genuinum (*Dillmann* ad Gen. 36, 26).

HAMMATH (הַמַּת, Ἀμαθ, Vulgata: Calor), pater domus Rechab (1 Par. 2, 55), de gente Cinacorum secundum Vulgatam: Hi sunt Cinacii, qui venerunt de Calore patris domus Rechab. Sed *F. de Hummelauer* (Comm. in Num. p. 196. 197) hunc textum emendat: « Hi sunt hastati, quorum pater est Machmath pater Bethrechab ».

HAMMOTH DOR (הַמּוֹת דּוֹר i. e. thermae Dor; Ἀμαθ, Ἀ Ἑμαθδώρα), civitas levitica filiorum Gerson in tribu Nephthali (Ios. 21, 32). Eadem videtur

quae Ios. 19,35 appellatur Emath (הַמַּת); Ἐμαθᾶδων ex fusione nominum Emath et Reccath; A Ἀμαθ), eadem quoque quae 1 Par. 6,76[61] Hamon (הַמּוֹן, Ἀμαθών). Additum Dor quomodo explicandum sit, difficile dictu est. — Elymon, ut diximus, thermas indicat. Iamvero apud Flavius Ios. (Ant. XVIII. 2,3; Bell. ind. IV. 4,3) commemoratur vius Ἀμαθοῖς (*edit. Niese*; quod nomen ipse Iosephus interpretatur aquas calidas) prope Tiberiadem situs. Idem vius apud Talmudistas audit Hamatha (הַמַּתָּה); cf. *Neubauer*, Géographie du Talmud p. 207. Hodie inveniuntur eadem thermæ *el-Hammām* iuxta lacum Tiberiadis dimidiæ fere horæ spatio infra Tiberiadem (*Lightfoot, Furrer, Guérin, Buhl, Legendre*).

Verum ex iis, quae *F. de Hummelauer* de finibus Nephthali exponit, Hammoth Dor multo magis aquilonem versus quaerenda est in extremis finibus terrae promissae: « Angustiae erant prope illam inter Libanum et Hermonem, appellatae Aditus Hamath. הַמַּת לְבִיזָה ».

Cf. *Lightfoot*, Centuria chorographica Matthaeo praemissa ep. 74, *Opp. ed. Leusden* 1699 II. p. 224-225; *Furrer in Zeitschr. d. D. Pal.-Ver.* II. 1879 p. 55; *F. Guérin*, Gahlée I. 270-273; *F. Buhl*, Alt. Pal. 1896, p. 114. 115; *Legendre* apud *Vigouroux*, Dict. de la Bible III. 408; *F. de Hummelauer*, *Comm. in Ios.* p. 441.

HAMON 1 Par. 6,76[61] v. HAMMOTH DOR.

HAMON (הַמּוֹן, Ἐμαθών), urbs tribus Aser (Ios. 19,28). Censetur esse *Khārbet Umm el-'Awāmūd* ad septentrionem Scalae Tyriorum (*Rās el-Nāqūra*) et prope litus maris Mediterranei (*Guérin, Buhl*); meridiem versus ab istis ruinis *Wādī el-Hāmūl* et *'Ain el-Hāmūl* vestigium nominis antiqui Hamon prae se ferre putantur (*Van de Velde, Robinson*, qui vicum *Hāmūl* ceteroquin ignotum in *Wādī el-Hāmūl* memorant; *Buhl, Legendre*).

Sed *F. de Hummelauer* ad Ios. 19,28 Hamon interpretatur fauces Emath = Hammoth Dor inter Libanum et Hermonem, praesertim cum in descriptione

finium Aser punctum maxime septentrionale terrae promissae ignorari vix poluerit; ad oblietionem Hammoth Dor esse urbem Nephthali, non Aser, idem interpres respondet Hamon h. l. non dici pertinuisse ad Aser, sed terminum Aser pertigisse usque Hamon.

Cf. *Guérin*, Galilée II. p. 141-148. 173; *Buhl*, Alt. Pal. 1896 p. 229; *Van de Velde*, *Memoir* 1858 p. 318; *Robinson*, *Neuere bibl. Forschungen* p. 84; *Legendre* apud *Vigouroux*, Dict. de la Bible III. 408-411.

HAMRAM v. **HAMDAN**.

HAMUEL (הַמּוֹאֵל, Ἀμουήλ, B omitt.), filius Masma Simeonitae (1 Par. 4,26).

HAMUL (הַמּוּל, Ἰεμουήλ), filius minor natu Phares filii Iuda ex Thamar geniti (Gen. 46,12; 1 Par. 2,5) et progenitor Hamulitarum (Num. 26,21). Eius posterii 1 Par. nullibi recensentur.

HANAMEEL (הַנְּמֵאֵל, Ἀναμεήλ), filius Sellum et patruelis Ieremiae prophetae (Ier. 32,7. 8. 9. 12); ex locis citatis apparet Sellum et patrem Ieremiae fuisse fratres; unde S. Hieronymus 32,7 ad sensum rite vertit: filius Sellum patruelis tuus; hebr. autem legitur: filius Sellum patris tui. Iubente Domino ager Hanameel a Ieremia propheta emitur eo tempore, quo iam exsilium instat, sed emitur in signum terram palaestinensem Iudaeis a Domino non auferri, sed servari. De qua emptione agri cf. *Knabenbauer* ad Ier. 32,7 s.

HANAN (הָנָן, Ἀνάν). 1. In Vulgata 1 Par. 4,20 inter filios Simon recensetur Rinna filius Hanan, sed ex hebr. intelligendus est Benhanan filius Simon ex genere Iuda.

2. Unus ex principibus cognationum Benjamin, qui Hierosolymis habitabant (1 Par. 8,23).

3. Ultimus inter sex filios Asel ex posteris Saul (1 Par. 8,38; 9,44).

4. Hanan filius Maacha, fortasse Maachathites i. e. vel ex regno Maacha (cf. 2 Reg. 10,6) vel ex urbe Abel Bethmaacha, unus ex fortissimis viris in exercitu David (1 Par. 11,43).

5. Filius Hanan recensentur inter Nathi-

naeos, qui duce Zorobabel ex captivitate redierunt (Esdr. 2, 46; Neh. 7, 49).

6. Levita qui Esdrae assistebat in publica legis lectione (Neh. 8, 7); idem forte est, qui inter signatores foederis enumeratur (Neh. 10, 10[11]).

7. Unus ex principibus populi, qui foedus cum Domino renovatum signarunt (Neh. 10, 22[23]).

8. Alius Hanan (sed LXX Ἀνάη) ex iisdem principibus populi et signatoribus (Neh. 10, 26[27]).

9. Filius Zachur filii Mathaniae a Nehemia constitutus super horrea, in quibus decimae frumenti, vini, olei congestae erant, ut iuvaret Seleniam sacerdotem, Sadoc scribam, Phadaïam levitam praefectos horreorum (Neh. 13, 13).

10. Filius Iegedeliae hominis Dei (Vulg.), rectius homo Dei i. e. propheta, qui filios (probabilissime discipulos) suos erudiebat in gazophylacio (Ier. 33, 4); additur i. e. hoc conclave fuisse prope conclave principum et super conclave Maasiae, quae descriptio aequalibus Ieremiae rem clare exhibebat, nobis autem non multum lucis affert.

HANANEEL (חַנַּנְאֵל, ἡνᾱνᾱῖλ, πῆργος Ἰερουσαλὴμ, Vulg. turris Hananeel), turris in muro Ierusalem septentrionali iuxta turrim Emath seu Hammea posita (Neh. 3, 1; 12, 39), ita quidem ut a porta piscium seu a termino occidentali per turrim Hananeel et turrim Emath ad portam ovium seu terminum orientalem perveniatur (cf. *Riess*, Bibel-Atlas, Tab. VIII). Praeterea turris Hananeel designatur ut terminus urbis instaurandae (Ier. 31, 38) et nova terrae complanatione evallandae (Zach. 14, 10).

HANANI (חַנַּנִּי, Ἀναη, rarius Ἀναηζαξ). 1. Unus ex filiis Heman cantoris et Videntis David regis, praefectus duodevicesimae classis cantorum Domini (1 Par. 23, 4. 23).

2. Propheta qui Asa regem Iuda reprehendit, quod fiduciae in Deum immemor amicitiam Benadad I. regis Damasci auro et argento sibi coemerit (2 Par. 16, 7); ob hoc vituperium propheta ab Asa in nervum missus est (16, 10). Idem fortasse est :

3. Hanani pater illius Iehu Videntis, qui contra Baasa regem Israel prophetauit (3 Reg. 16, 1. 7) et Iosaphat regem Iuda reprehendit (2 Par. 19, 2; 20, 34).

4. Sacerdos qui tempore Esdrae duxerat uxorem alienigenam (Esdr. 10, 20).

5. Frater Nehemiae, qui anno vigesimo Artaxerxis Longimani Hierosolymis Susa ad Nehemiam profectus est eumque de afflictione Iudaeorum, qui ex captivitate redierant, certiore fecit (Neh. 1, 2; idem postea a Nehemia constitutus est praefectus custodum, qui portis Ierusalem invigilabant (Neh. 7, 2).

6. Levita quidam tempore Nehemiae (Neh. 12, 35[36]).

HANANIA, HANANIAS (חַנַּנְיָה, Ἀναηζαξ, Ἀναηζαξ).

1. Unus ex principibus cognationum Benjamin, qui Hierosolymis habitabant (1 Par. 8, 24).

2. Unus ex filiis Heman cantoris et Videntis David regis, praefectus decimae sextae classis cantorum Domini (1 Par. 23, 4. 23).

3. Unus ex praecipuis ducibus militum Ozia regis Iuda (2 Par. 26, 11).

4. Pater Sedeciae principis cuiusdam sub Ioakim (Eliacim) rege Iuda (Ier. 36, 12).

5. Filius Azur, Beniaminita, oriundus de Gabaon urbe sacerdotali ac proinde ipse forsitan sacerdos, pseudopropheta tempore Sedeciae regis Iuda (Ier. 28, 1-17). Is anno quarto Sedeciae in templo vaticinatur post duos annos contritum iri iugum babilonicum. Ieremias ad criterium de prophetis Deut. 18, 22 datum provocans eius oraculum suspectum reddit. Ille vero suum vaticinium confirmat actione symbolica scil. tollens catenam seu iugum (symbolum iugi babilonici Ier. 27, 2) de collo Ieremiae illudque confringens. Sed Ieremias sermone Domini accepto denuo praedicat iugum babilonicum esse subeundum et Hananiae mortem eodem anno futuram annuntiat. Mortuus est pseudopropheta eodem anno mense septimo i. e. altero post fictum illud oraculum (cf. Ier. 28, 1. 17).

6. Ierias filius Seleniae filii Hananiae erat custos portae Benjamin, quae

in muro antiquo (secundo) respondebat hodiernae portae damascenae in septemtrionali urbis parte; iste Ieremiam apprehendit dicens: ad Chaldaeos profugis [Ier. 37,12[13]]. Aliqui putant istum custodem portae fuisse nepotem Hananiae pseudoprophetae (28,1 ss.) ac proin ex spiritu vindictae egisse contra Ieremiam; res forsitan ita se habet, sed est incerta.

7. Filius Zorobabel (1 Par. 3,19. 21). Suspiciatur *Hervey* (*Smith-Fuller*, Dict. of the Bible I. 1273) eundem esse Ioanna (Ἰωαννᾶν seu Ἰωαννᾶς) filium Resa filii Zorobabel in genealogia Christi (Luc. 3, 27), Resa autem (chald. ܠܚܫܐ princeps) esse glossam ex margine in textum translata et nomini Zorobabel praefixam.

8. Unus de filiis Bebai, qui uxores alienigenas duxerant tempore Esdrae (Esd. 10,28).

9. Filius Selemiae in aedificando muro Ierusalem occupatus (Neh. 3,30).

10. Princeps domus seu arcis hierosolymitanae, quae erat a septemtrione templi; is una cum Hanani (v. HANANI 3) a Nehemia constitutus est praefectus custodum, qui portis Ierusalem invigilabant, quoniam quasi vir verax et timens Deum plus ceteris videbatur (Neh. 7,2).

11. Unus ex principibus populi, qui foedus cum Deo renovatum signarunt (Neh. 10,23[24]).

12. Princeps familiae sacerdotalis Ieremiae in diebus Ioachim pontificis (Neh. 12,12).

13. Sacerdos tuba canens in dedicatione muri Ierusalem (Neh. 12,40[41]).

HANATHON (חַנְתָּוֹן, Ἀνάθων, Ἀνῶν), urbs in termino septemtrionali tribus Zabulon (Ios. 19,14); hodie viens *Kefr Anan* ad orientem *el-Rāme* seu *Ramae Galilaeae* et in finibus utriusque Galilaeae, superioris et inferioris.

Cf. *Survey of West. Pal.* Mem. I. 205; *Riess*, Bibel-Atlas ed. 3 p. 15; *Legendre*, Carte de la Palestine. Praeterea v. *J. Schwarz*, Das heilige Land 1852 p. 148; *Carmoly*, Itinéraires de la Terre Sainte 1847 p. 260. 382. 453; *A. Neubauer*, Géogr. du Talmud p. 178. 189. 226; *V. Guérin*, Galilée II. 457; *F. de Himmelfaer* ad Ios. 19,14.

HANES (חַנַּיִם) legitur Is. 30,4: principes eius fuerunt in Zoan (Tanis) et nuntii eius perveniunt ad Hanes (hebr.); aliter LXX οἱ εἰσὶν ἐν Τζάνει ἀρχηγοὶ ἄγγελοὶ πονηροί. His verbis Isaias reprehendit primores illos Iudaeorum, qui tempore Ezechiae a partibus Aegyptiorum stabant et spreto Dei consilio opem flagitaturi Aegyptios adierant. Tanis (hebr. Zoan, hieroglyphice *Tan* vel *Ta*) est urbs terrae Gosen. Textus hebraicus videtur indicare aliquos nuntios (principes) iam Tanim pervenisse, alios autem adhuc in itinere Hanes versus occupari. Unde Hanes a plerisque censetur urbs in media Aegypto inter Nilum et canalem *Bahr Yussuf* sita, apud antiquos Aegyptios appellata *Khinensu*, assyriace *Khinīnshī*, coptice *Hnes*, apud Graecos Heracleopolis magna, apud Arabes *Ahnās* (*Schrader*, *Brugsch*); eadem creditur quae Ἀνωσις apud Herodotum (2,137). Duabis istis urbibus Tanis et Hanes nominatis a propheta indicatur Iudaeos auxilium efflagitasse apud reges Aegypti tum inferioris tum mediae.

Cf. *Schrader-Whitehouse*, Cuneif. Inschrift. and Old Test. II. 103; *Brugsch*, Geogr. Inschriften altaegypt. Denkmäler I. p. 233; *idem*, Dict. géogr. de l'ancienne Egypte p. 691.

HANIEL (חַנַּיָּאל, Ἀναΐλ), princeps et dux bellicus in tribu Aser (1 Par. 7, 39). Idem nomen hebr. gerit, qui in Vulgata scribitur HANNIEL.

HANNI (*Kethib* חַנִּי, *Qeri* חַנִּי; LXX omittunt, cod. α. Ἰωνᾶ), levita tempore Zorobabel (Neh. 12,9). Idem nomen hebr. gerit, qui in Vulgata scribitur ANI.

HANNIEL (חַנַּיָּאל, Ἀναΐλ), filius Ephod de tribu Manasse, unus ex viris ad dividendam terram cisjordanicam electis (Num. 34,23).

HANON (חַנּוֹן, Ἀννών, Ἀνών), filius Naas, rex Ammon, qui legatos David ipsum de morte Naas patris consolaturus ignominiose tractavit atque tali ignominia gravissimum illud bellum ammoniticum concitavit filiis Ammon maxime exitiosum 2 Reg. 10,1-4; 1 Par. 19, 2-6).

HANUN (הַנּוּן). 1. Vir qui cum habitatoribus Zanoë portam vallis et murum Ierusalem usque ad portam sterquilini instauravit (Neh. 3,13; LXX Ἀνοῦν).

2. Filius sextus Seleph in muro Ierusalem instaurando occupatus (Neh. 3, 30; LXX Ἀνοῦα).

HAPHAM (הַפָּחַם, Ἀφασέμ), filius Hir, Beniaminita (1 Par. 7,12); v. HAPPHIM.

HAPHARAM (הַפָּרָחִים, Ἀφάριμα, Ἀφασείμ), urbs tribus Issachar (Jos. 19,19). Onom. (ed. Lag. 94,28 et 223, 61) assignat vicum Apharea (Ἀφραία) 6 mil. pass. a Legione (Ledjdjūn) septemtrionem versus. Unde agnoscitur esse *Khîrbet el-Farrîye* inter Legionem et montem Carmel (Conder, Riess, Buhl). Sed Wilson et Legendre dubia movent contra hunc situm, qui nimium occidentem versus absit a reliquis urbibus una cum Hapharaim nominatis.

Cf. Conder in *Survey of West. Pal. Mem.* II. 48. 58; Riess, *Bibel-Atlas* ed. 3 p. 15; F. Buhl, *Alt. Pal.* 1896 p. 210; Wilson apud *Smith-Fuller*, *Dict. of the Bible* I. 1283; Legendre apud *Vigouroux*, *Dict. de la Bible* III. 420.

HAPHSIBA (הַפְּצִיבָּה i. e. beneplacitum meum in ea; Ἀψέβη), uxor Ezechiae et mater Manassis regum Iuda (4 Reg. 21,1); loco parallelo 2 Par. 33,1 eius mentio non fit. De eius indole nihil traditum est. Ex eo quod uxor Ezechiae regis piissimi erat, aliqui arguunt ipsam quoque eiusdem fuisse indolis et ad eam fortasse alludi verbis quibus Isaias Sion alloquitur : tibi dicetur beneplacitum meum in ea (Is. 62,4); rectius forte dicitur prophetam allusisse ad Ps. 135[16],3.

HAPPHIM (הַפְּחִים, Ἀφασέμ) 1 Par. 7, 15 idem est ac Hapham Beniaminita 1 Par. 7,12. Nam textus 1 Par. 7,15 corrigendus est, ut legatur : Et Machir duxit uxorem sororem Hapham etc. Cf. F. de Hummelauer, *Comm. in Num.* p. 178.

HARAD (הָרָד, עֵין הָרָד, Ἀράδ, Vulg. fons qui vocatur Harad), fons iuxta quem Gedeon castrametatus est ante proelium, quo Madianitas confecit (Jud. 7,1). A plerisque censetur esse *Ain Djâlūd* ad

orientem urbis Iezrael (*Guérin, Riess, Fahrngruber, Liévin de Hamme, Zanecchia, Buhl*).

Idem probabilius est ille fons 1 Reg. 29,1 in Iezrahel; v. APHEC 4. Praeterea v. HARODI.

Idem fons apud equites christianos medii aevi audiebat Tubania (*Guilelm. Tyr.* 22,26), apud milites Saladini (v. *Bohaeddin*, *Vita Saladini* p. 53) *Ain Djalūt* i. e. fons Goliath. Traditio erronea, quae fert Goliath ibidem a Davide esse occisum, usque ad saeculum 4. ascendit (Itiner. Burdig.).

Cf. F. *Guérin*, *Samarie* I. 308-310; *Riess*, *Bibel-Atlas* ed. 3 p. 15; J. *Fahrngruber*, *Nach Jerusalem* ed. 2 II. 163. 164; *Liévin de Hamme*, *Terre Sainte* ed. 4 III. 79. 80; D. *Zanecchia*, *La Palestine d'aujourd'hui* 1899 II. 608; *Buhl*, *Alt. Pal.* 1896 p. 106; *Itiner. Burdig.* : Civitas Stradela... ibi est campus, ubi David Goliath occidit (P. *Geyer*, *Itiner. hieros.* p. 19).

HARAM Neh. 12,15 v. HARIM 1.

HARAM Is. 37,12. Vide s. v: HARAN 1.

HARAN (הָרָן). 1. Urbs antiquissima Mesopotamiae septemtrionalis ad occidentem vergentis (Gen. 11,31. 32; 12, 4. 5; 27,43; 28,10; 29,4); ad hanc urbem Abraham primo profectus est, cum de Ur Chaldaeorum in terram Chanaan migraret; in eadem posteri Nachor fratris Abraham sedes suas fixerunt, unde etiam vocatur urbs Nachor (Gen. 24,10; cf. 27, 43). Sennacherib in altera ad Ezechiam regem legatione potentiam Assyriorum iactans gloriatur Gozan et Haran et Reseph etc. ab Assyriis fuisse subactas (4 Reg. 19,12; Is. 37,12 ubi Vulgata legit Haram). In praeclara descriptione commercii Tyriorum etiam Haran recensetur inter emporia Mesopotamiae (Ez. 27,23). — Nomen urbis est apud LXX Ἰσπάρν (Ἰσπάρ Ez. 27,23), apud Assyrios *Harran*, apud Graecos *Káppai* (Ptolem. V. 18,12 [ed. Müller-Fischer 17,7] et alii), apud Latinos *Carrae*, *Carrhae*, *Charra* (Plin. V. 24,86 Carrhas oppidum Carra clade nobile vocat; Dio Cassius 40,25 et alii); erat sedes deae Lunae Sin; ab Edessa (Orfa) distabat 26 mil. pass. (Tab. Peutling. XI d); sita erat iuxta fluvium

Bilecham (*Batilihi*, hodie *Belikh*), qui in Euphratem influat; regio urbis describitur frumento abundans et antiquitus bene culla praesertim ope canalium ex fluvio deductorum (*Guilelm. Tyr.* 10, 29; cf. *Ammian. Marc.* XVIII. 7, 3 s.; commercio erat aptissima, cum illuc viae stratae ex Babylonia et a sinu Persico, altera Euphratis, altera Tigridis ripam sequens convergerent et inde iter in Palaestinam pateret; quare frequentissimus ibidem erat mercatus. Eadem urbs commemoratur Iudith 5, 9 (Vulg.) et Act. 7, 2. 4; sed his locis Vulgata scribit Charan.

Cf. *Ritter*, *Erdkunde* XI. 291 ss.; *W. Ainsworth*, *Researches in Assyria, Babylonia and Chaldaea* 1838 p. 153; *D. Chwolson*, *Die Ssabier und der Ssabismus* 1856 I. p. 301-471; *R. A. Chesney*, *Expedition for the Survey of the rivers Euphrates and Tigris*, 1850 I. p. 48. 106 s. II. p. 401. 426. 433. 460; *Movers*, *Phoenizier* II. 3, 247; *Schrader-Whitehouse*, *Cuneif. Inscript. and Old Test.* I. 119; *Proc. Soc. Bibl. Arch.* XIII. 1891 p. 385-391; *F. Vigouroux*, *La Bible et les découv. mod. ed.* 6 I. p. 447 ss.; *E. Sachau*, *Reise in Syrien und Mesopotamien*, 1883 p. 217 ss. cum tabulis ruinarum; *J. Dölter*, *Geogr. u. ethnogr. Studien* z. III. u. IV. Buche d. Könige 1904 p. 308-310.

2. Haran (Ἀράν), filius Caleb filii Herson, ex Ephra concubina genitus (1 Par. 2, 46).

3. Haran (Neh. 10, 27 [28]) v. HARIM 2.

HARBONA (Esth. 4, 10 הַרְבוֹנָה, Θαρξά et 7, 9 הַרְבוֹנָה, Βουρξαθάν), tertius ex septem cunuchis Assueri i. e. Xerxis, qui regi suggestit, ut Aman in eodem patibulo suspenderetur, quod Mordochaeo paraverat.

HAREM v. HARIM 2.

HAREPH (הָרֶפֶח, Ἀρεφ), princeps populi, cuius posterius dux Zorobabel ex captivitate redierunt (Neh. 7, 24; loco parallelo Esdr. 2, 18 scribitur Iora (יֹרָה, Ἰωρά). Idem nomen Hareph legitur inter principes populi, qui una cum Nehemia foedus renovatum signarunt (Neh. 10, 19 [20]).

HARES ascensus (בִּירְבִּיעִיָּה הָהָרִים, ἀπὸ ἐπάνωθεν τῆς παρατάξεως Ἀρές, ἅ ἀπὸ

ἀναβάζσεως Ἀρές, sed Vulg. ante ortum solis) videtur esse nomen loci prope Socoth ab oriente Iordanis (Iud. 8, 13 et v. SOCCOTH 2). Peshitta quoque praebet: ab ascensu הָרִים, Theodotion ἀπὸ ἀναβάζσεως Ἀρές (vel ὄρους), Symmachus ἀπὸ ἀναβάζσεως τῶν ὄρων, Aquila ἀπὸ ἀναβάζσεως τοῦ ὄρους. Nomen hebr. est הָרִים, propter pausam הָרִים. Transscriptio Hares sequitur LXX et analogiam cum monte Hares in Vulgata Iud. 4, 35.

HARES mons v. BETHSAMES 1.

HARET (יַעַר הָרֵת, propter pausam הָרֵת; Vulg. saltus Haret; LXX ἐν πλάτει Σαζῆν legentes יַעַר pro יַעַר; Flav. Ios. Ant. VI. 12, 4 εἰς Σάριν πλῆν), saltus in quo David ex consilio Gad prophetae spelunca Odollam relicta se abscondit (1 Reg. 22, 3; F. de Hummelauer ad 22, 3); erat hic saltus in terra i. e. tribu Iuda (cf. Flav. Ios. I. c.). Opinantur aliqui hunc saltum non differre ab ista silva ad orientem Hebron (1 Reg. 23, 16. 19), de qua diximus s. v. HACHILA; sed Onom. (ed. Lag. 96, 27; 226, 21) dicit Arith ubi sedit David esse vicum Arathi ad occidentem Aeliae (Ierusalem). Nomen fortasse conservatur in vico *Kharas* inter Odollam (*Id el-Mā*) et *Halhūl* seu a Hebrone inter septentrionem et occidentem (*Survey of West. Pal.* Mem. III. 303).

HARHUR (הַרְחֹרִי, Ἀροῦρ, Ἀρούμ. Nathinaeus, cuius posterius dux Zorobabel ex captivitate redierunt (Esdr. 2, 31; Neh. 7, 53).

HARIM (הָרִים). 1. Nomen familiae sacerdotalis. Harim (Χαρῖς) erat princeps classis sacerdotalis tertiae inter 24 a Davide designatas (1 Par. 24, 8). Filii Harim Babylone redierunt 1017 sacerdotes (Esdr. 2, 39 codex A Ἡρέμ, B omittit; Neh. 7, 42 Vulg. Arem, LXX Ἡράμ). Eiusdem nomine duobus aliis locis tota familia designari videtur: Esdr. 10, 21 quinque filii Harim (Ἡράμ) sacerdotes uxores alienigenas dimittere iubentur et Neh. 10, 3 inter sacerdotes, qui una cum Nehemia foedus renovatum signarunt, nominatur Harim (Ἡράμ). Idem

nomen iam legitur in numero sacerdotum tempore Zorobabel et Iosue pontificis (Neh. 12,3 : **הַרִים**, Rheum, B omittit, **ῥεῖμα**, quod nomen mendo librarii pro Harim positum est) et iterum tempore Ioachim filii Iosue (Neh. 12,15 Vulg. Haram, **ῥοζέμα**, B omittit).

2. Nomen familiae, cuius filii 320 duce Zorobabel ex captivitate redierunt (Esdr. 2,32 Vulg. Harim; Neh. 7,35 Vulg. Harem; LXX utroque loco **Ἡρῆμα**); nomen Harim videtur esse loci, sicut etiam nomina, quae praecedunt et sequuntur. Octo eiusdem familiae Herem (**Ἡρᾶμα**) uxores alienigenas dimittere iussi sunt (Esdr. 10,31). Idem nomen (Vulg. Haran, LXX **Ἡρᾶμα**) legitur inter signatores foederis (Neh. 10,27[28]). Inter eos qui Nehemiam iuverunt in muris Ierusalem aedificandis, erat Melchias filius Herem (Neh. 3,11).

HARIPH (**הָרִיף**, **Ἀρετῆ**), filius Hur, filii Caleb et Ephratha, pater (possessor) Bethgader urbis Iuda (1 Par. 2,51).

HARMA urbs v. **HORMA** 1.

HARNAPHER (**הַרְנַפֶּה**, **Ἀναρράφης**), unus ex filiis Supha de tribu Aser (1 Par. 7,36).

HARODI (**הַרְדִּי**, **ὁ Ῥοδάιος**) cognomen Semma et Elica heroum ex triginta septem Gibborim David (2 Reg. 23,25); vide **ARORITES** 2. Indicari videtur urbs Harod, ex qua oriundi erant. Aliqui suspicantur talem urbem fuisse prope fontem Harad (hebr. Harod), iuxta quem Gedeon castrametatus est ante proelium, quo Madianitas confecit (Jud. 7,1); v. **HARAD**. Sed nulla urbs eius nominis innotescit.

HAROMAPH (**הַרְוֹמֶה**, **Ῥωμάφης**), pater Iedaia tempore Nehemiae (Neh. 3,10).

HAROSETH (**הַרְשֶׁת**, **Ἀρσῆθ**) seu plenius Haroseth gentium erat arx munita, in qua Sisara dux militaris a Iabin rege Asor constitutus est, ut Israelitis opprimeret (Jud. 4,2); Sisara cum exercitu valido et 900 curribus in planitiem torrentis Cison profectus est (4,13); illuc eius exercitus a Barac fusus fugam arri-

puit (4,16). A plerisque Haroseth agnoscitur vicus *el-Hāritiye* ad ripam dexteram torrentis Cison (*el-Muqatta'*) situs in angustis, quibus planities Esdrelon a planitie Ptolemaidis (Accho) seiungitur. Contextui biblico certe multo minus satisfacit opinio aliorum, qui *Tell Harra* inter lacum *Ilūle* et Cedus Nephthali praeferunt. — Vide **SISARA** et **BARAC**.

Cf. *Survey of West. Pal.* Mem. I. 270; *Thomson, The Land and the Book* II. p. 143; *D. Zaneccchia, La Palestine d'aujourd'hui* 1899 II. 678.

HARSA (**הַרְשָׁא**, **Ἀρσά**, **Ἀρσάν**), Nathinaeus cuius posteri duce Zorobabel de captivitate redierunt (Esdr. 2,52; Neh. 7,54).

HARUPHITES (**הַהַרְוִפִּי**, **Qeri** **הַהַרְוִפִּי**; **ὁ Χαραυφίτης**) cognominatur Saphatia Beniaminita, qui Davidi in Siceleg fugitivo se adiunxit (1 Par. 12,5). Indicari videtur eius urbs patria Haruph vel Hariph. De urbe quoque intellegi potest Neh. 7,24 : filii Hareph, sicut 7,25 filii Gabaon etc. *Conder* (*Survey of West. Pal.* Mem. III. 313) urbi Haruph correspondere putat *Kkirbet Kharuf* ad meridiem *Id el-Mā* (Odollam) in montanis Iuda; hoc supposito ille Beniaminita oriundus erat ex oppido tribus Iuda.

HARUS (**הַרוּץ**, **Ἀρούς**), pater Messalemeth matris Amon regis Iuda, oriundus de Ieteba (4 Reg. 21,19).

HASABA (**הַשָּׁבָה**, **Ἀσάβη**), unus de filiis Zorobabel (1 Par. 3,20).

HASABIA, HASABIAS (**הַשָּׁבִיָּה**, **הַשָּׁבִיָּה**; **Ἀσάβη**, **Ἀσάβιας**, **Ἀσάβια**, **Ἀσάβιας**); Vulgata etiam Hasebia, Hasebias 1 Par. 9,14; Neh. 3,17; 10,11; 12,21. 24).

1. Levita de stirpe Merari ex genere Ethan cantoris (1 Par. 6,45[30]).

2. Levita de stirpe Merari (1 Par. 9,14).

3. Levita, filius Idithun, praefectus duodecimae classis cantorum tempore Davidis (1 Par. 25,3. 19).

4. Hebronita i. e. ex posteris Hebron filii Caath, dux 1700 virorum cognationis suae, qui iussu Davidis procurabant

ministeria tum sacra tum civilia trans Jordanem i. e. hoc loco in Palaestina occidentali (1 Par. 26,30). Ab hoc fortasse non differt

5. Filius Cammel princeps tribus Levi tempore Davidis (1 Par. 27,17).

6. Princeps quidam levitarum, officio fungens in sollemni paschate a Iosia rege celebrato (2 Par. 35,9).

7. Levita ex stirpe Merari, qui Esdra duce a Chasphia Hierosolyma ascendit (Esd. 8,19) et in ipso itinere custodiam donorum pro templo oblatorum gerebat una cum Sarabia seu Serebia (8,24); idem est cum Hasebia principe levitarum Neh. 10,11[12] et 12,24.

8. Princeps dimidiae partis vici Ceilae, qui partem muri Ierusalem aedificavit (Neh. 3,17).

9. Filius Boni, levita post instaurationem (Neh. 11,15).

10. Avus Azzi episcopi levitarum, qui post instaurationem in templo ministrabant (Neh. 11,22).

11. Sacerdos ex familia Helciae in diebus Ioachim pontificis i. e. in generatione post reditum ex captivitate (Neh. 12,21).

HASADIA (הַסַּדִּיָּה, Ἀσαδιָ), unus de filiis Zorobabel (1 Par. 3,20).

HASARSUHAL, HASERSUAL (הַצֵּר שִׁיְיָ i. e. pagus vulpis; Χολασσεωλά, Ἀρσωλά, Ἑσερσουάλ, Ἑσερσουάλ), urbs in meridiana plaga tribus Iuda sita (Ios. 15,28), tribui Simeon attributa (Ios. 19,3; 1 Par. 4,28), post exsilium a filiis Iuda habitata (Neh. 11,27). Situs est dubius. Aliqui coniciunt *Khirket Tha'li* (ruinae vulpis), quem locum commemorat *Robinson*, Palaestina III. 862.

HASARSUSIM, HASERSUSA (הַצֵּר סִיסִים, הַצֵּר סִיסִיָּה i. e. pagus equorum; Σαρσουσίμ, Παισουςσεωσίμ), urbs tribus Simeon in plaga meridiana tribus Iuda sita (Ios. 19,5; 1 Par. 4,31). *Guérin*, Judée III. 172 suggerit ruinas *Khirket Sūsige* a meridie Hebron nec procul ab Esthemo et Maon sitas. Sed advertit inter urbes meridionales tribus Iuda Ios. 15,31 loco Hasersusa enumerari Sensenna. Unde concludere primum est nomen urbis primitivum fuisse Sen-

senna, pro hoc autem postmodum nomen alterum *pagus equorum* substitutum esse; aetate enim salomonica mentio sit civitatum currum, equi et quadrigae ex Aegypto coehebantur; unde mutatio nominis antiqui in *pagum equorum* facile explicatur; cf. s. v. BETH-MARCHABOTH et vide SENSENNA.

HASBADANA (הַשְּׁבַדָּנָה, B omittit. A Ἀσβαδανιά), unus e viris, qui Esdrae verba legis recitanti a latere steterunt (Neh. 8,4).

HASEBIA, HASEBIAS v. HASABIA, HASABIAS 2. 7. 8. 11.

HASEBNA (הַשְּׁבַנָּה, Ἑσβανιά), princeps populi, qui una cum Nehemia foedus renovatum signavit (Neh. 10,23[26]).

HASEBNIA (הַשְּׁבַנִּיָּה, LXX omittunt), levita tempore Esdrae (Neh. 9,5).

HASEBONIAS (הַשְּׁבַנִּיָּה, Ἀσβανιάμ), pater Hattus tempore Nehemiae (Neh. 3,10).

HASEM v. HASUM.

HASERIM (הַצֵּרִים, Ἀσηρώθ, A Ἀσηρώθ, Hala : Asaroth) legitur Deut. 2,23 : Hevaeos qui habitabant in Haserim usque Gazam, Cappadoces (Caphtorim) expulerunt. Verum הַצֵּרִים sunt septa i. e. pagi, viculi. Unde Hevaei incolae primigenii orae Philisthaeae designantur agricolae, qui non in urbibus et oppidis, sed in septis habitabant: v. HEVAEI 2.

HASEROTH (הַצֵּרֹת, Ἀσηρώθ et Deut. 1,1 Ἀλλῶν), secunda statio Israelitarum, postquam de monte Sinai profecti sunt (Num. 11,34[35]; 13,1 [12,16]; 33,17. 18); prima statio erant Sepulera concupiscentiae, tertia Bethma. Haseroth communiter censetur esse *Ain Khadra* a monte Sinai 18 horis distans inter septentrionem et orientem nec procul a sinu Aelanitico in via, quae versus *Aqaba* (Aclath) ducit (*Burckhardt, Robinson, Stanley, Palmer, Riess, Ewald, Lagrange, Vigouroux*); huic opinioni favet tum similitudo nominis tum copia aquae, quae ibi habetur.

Praeterea Haseroth legitur Deut. 1,1

in textu illo satis vexato, quo Moyses integram regionem peregrinationis delineat: quattuor prioribus dictionibus (trans Iordanem, in deserto, in Araba, e regione maris Rubri) totam peregrinationem in memoriam revocat; deinde aliis nominibus (Pharan, Thophel, [Laban], Haseroth, Dizahab) eadem peregrinationis regio accuratius definitur.

Cf. *Burchhardt*, *Reisen in Syrien, Palaestina etc. ed. Gesenius* II. p. 808; *Robinson*, *Palaestina* I. 248 s. III. 160. 170; *Stanley*, *Sinai and Palestine*, 1866 p. 81-83; *Palmer*, *The desert of the Exodus* 1871 II. 312. 321. 322; *Riess*, *Bibel-Atlas* ed. 3 p. 15; *Ewald*, *Geschichte des Volkes Israel* ed. 3 II. p. 270. 271; *Lagrange* in *Revue bibl.* IX. 1900 p. 276; *F. Vigouroux*, *La Bible et les découv. mod. ed. 6* II. p. 564, 565. Sunt qui hunc situm pro Haseroth non admittant: *Dillmann* ad Num. 11,35; *H. G. Trumbull*, *Kadesh-Barnea* 1884 p. 314.

HASERSUAL v. HASARSUHAL.

HASERSUSA v. HASARSUSIM.

HASIM (הַשִּׁימ, B omitt., A Ἀσόμε), cognatio beniaminitica, cuius pater erat Aher (1 Par. 7,12).

HASMONAEI v. MACHABAEI.

HASOM v. HASUM.

HASOR (1 Reg. 12,9) v. ASOR 1.

HASRA 2 Par. 34,22 v. ARAAS.

HASSEMOM (הַשִּׁמּוֹן, LXX omitt.), urbs in meridiana plaga tribus Iuda (Jos. 15,27); enumeratur inter Molada et Bersabee. Est ignota. A quibusdam putatur eadem quae Asemona; differt autem a Hesmona (vide s. vv.)

HASSUB v. HASUB.

HASUB (הַשִּׁיב, Ἀσούβ). 1. Filius Phahat Moab in aedificando muro Ierusalem occupatus (Neh. 3,11).

2. Alter eiusdem temporis in alia parte muri aedificandi occupatus (Neh. 3,23).

3. Signator foederis ex principibus populi (Neh. 10,23; B Ἀσούβ); fortasse alteruter ex prioribus.

4. Levita de filiis Merari (Neh. 11,15); idem scribitur 1 Par. 9,14 in Vulgata Hassub, LXX Ἀσούβ.

HASUM (הַשֻּׁם, Ἀσέμ, Ἡσάμ). 1. Filii Hasum 223 duce Zorobabel de captivitate redierunt (Esdr. 2,19; sed Neh. 7,22 : Filii Hasem 328). Septem de filiis Hasom uxores alienigenas dimittere iussi sunt Esdr. 10,33). Princeps eisdem familiae inter signatores foederis recensetur (Neh. 10,18[19]).

2. Unus e viris, qui Esdrae verba legis recitanti a latere steterunt (Neh. 8,4; B omitt.).

HASUPHA (הַשֻּׁפָּה, Ἀσούφ, Ἀσούφ), Nathinaeus, cuius posteri duce Zorobabel de captivitate redierunt (Esdr. 2,43; Neh. 7,47[46]).

HATHATH (הַתָּת, Ἀθάθ), filius Olthoniel filii Cenez in genealogia Iuda (1 Par. 4,13).

HATIL (הַתִּיל, Ἀτειά, Ἐγγίλ), unus de servis Salomonis, cuius posteri duce Zorobabel de captivitate redierunt (Esdr. 2,57; Neh. 7,59).

HATIPHA (הַתִּיפָּה, Ἀτούφ, Ἀτεύφ), Nathinaeus, cuius posteri de captivitate redierunt (Esdr. 2,54; Neh. 7,56).

HATITA (הַתִּיטָה, Ἀτητά, Ἀτείτά). Inter ianitores, qui duce Zorobabel de captivitate redierunt, recensentur filii Hatita (Esdr. 2,42; Neh. 7,46[45]).

HATTUS (הַתִּיט, Ἀττούς, Ἀττούς, Ἀττούθ). 1. Sacerdos, qui cum Zorobabel et Iosue ex captivitate rediit (Neh. 12,2); ab eo nomen videtur habere familia sacerdotalis, quoniam Hattus recensetur inter signatores foederis (Neh. 10,4[5]).

2. Hattus de filiis David cum Esdra ex captivitate redux (Esdr. 8,2). Idem fortasse est

3. Hattus qui 1 Par. 3,22 inter posteros Zorobabel (Vulgata, LXX) vel saltem inter posteros David (hebr.) recensetur. Textus Vulgatae et LXX 1 Par. 3,19 s. erroneam lectionem praebent, textus hebraicus ab aliis aliter explicatur et fortasse corruptus est; sed hoc saltem constat in toto contextu 1 Par. 3,19-24 nihil legi, quo liber 1 Par. aetate Esdrae et Nehemiae recentior esse demonstratur. Cf. *Cornely*, *Introd.* II. num. 410.

4. Hattus filius Haseboniae in aedificando muro Ierusalem occupatus (Neh. 3,10); utrum fuerit ex familia sacerdotali Hattus an levita (eius pater Hasebonia fortasse est Hasebna levita Neh. 9,5) an alius vir eiusdem nominis, dirimi nequit.

HAVOTH IAIR v. IAIR 1 et 2.

HAZAEI (הַזַּאֵי, הַזַּאֵי; Ἀζαί), rex Syriae. Cum Elias versaretur in deserto prope Horeb, dixit ei Dominus : vade et revertere in viam tuam per desertum in Damascum, cumque perveneris illuc, unges Hazael regem super Syriam (3 Reg. 19,15). Uti ex 4 Reg. 8,13 colligitur, Eliseus istud Domini mandatum exsequitur annuntians Hazael : « ostendit mihi Dominus te regem Syriae fore », postquam Hazael missus erat a Benadad rege ad Eliseum, ut de aegrotatione prophetam consuleret. Hazael sequenti die stragulo madefacto Benadad regem spiritu intercluso exstinxit (4 Reg. 8,15) et se regem constituit. Quod Eliseus viso Hazael fens praedixit fore ut ille plurima mala inferret filii Israel (l. c. v. 12), abunde impletum est. Devicit Ioram filium Achab in pugna apud Ramoth Galaad et ipse Ioram vulneratus est; Iehu quoque ab Hazael victus est; nam Dominus coepit taedere super Israel et percussit eos Hazael in universis finibus Israel a Iordane contra orientalem plagam, omnem terram Galaad et Gad et Ruben et Manasse, ab Aroer quae est super torrentem Arnon, et Galaad et Basan (4 Reg. 10,32. 33). Has igitur regiones Hazael regno Israel eripuit. Etiam Ioachaz, filio Iehu, regnante iratus est furor Domini contra Israel et tradidit eos in manu Hazael regis Syriae et in manu Benadad filii Hazael (4 Reg. 13,3) et quantopere regnum Israel a rege Syriae oppressum sit, docemur l. c. v. 7 : « et non sunt derelicti Ioachaz de populo nisi quinquaginta equites et decem currus et decem millia peditum; interfecerat enim eos rex Syriae et redegerat quasi pulverem in tritura areae ». Iis in bellis facta sunt quae Eliseus praevidens delievit dicens ad Hazael : civitates munias igne succendes, iuvenes interficies gladio et parvulos elides

et praegnantem divides (l. c. 8,12). Pugnavit Hazael quoque contra regnum Iuda; cepit enim Geth urbem, quam Roboam muniverat et quae eo tempore quoque Iudaeorum fuisse videtur; insuper direxit faciem suam ut ascenderet in Ierusalem. Qua in expeditione interfecit cunctos principes populi et ingentem egit praedam. Ut ipsam urbem Ierusalem ab expugnatione servaret, Ioa rex thesauris templi et domus regiae ad Hazael missis obtinuit ut Hazael recederet a Ierusalem (cf. 4 Reg. 12,17. 18; 2 Par. 24,23. 24). Nomine ipsius et filii eius Amos dynastiam regum Syriae designat : et mittam ignem in domum Azael et devorabit domos Benadad (Am. 1,4). Etiam in inscriptionibus cuneiformibus eius sit mentio; narrat quippe Salmanassar II. : anno 18. regni mei transivi vice decima sexta Euphraten; *Haza-ilu* de regno Damasci ad pugnam mihi obviam venit; mille centum viginti currus eius et 470 equites eius et comaeum eius cepi. Pariter narrat anno 21. regni sui se urbes Hazael regis Damasci expugnasse.

Cf. *Schrader-Whitehouse*, *Cuneif. Inscrip. and Old Test.* I. 197 s.; *Vigouroux*, *La Bible et les decouv. mod.* ed. 6 III. 479 s.

HAZAIA, HAZIA (הַזַּיָּא, Ὁζαία), vir de stirpe Phares in genealogia Iuda (Neh. 11,3).

HAZIR (הַזִּיר, Ἡζίρ), princeps populi inter signatores foederis (Neh. 10,20 [21]). Idem nomen hebr. gerit, qui in Vulgata scribitur Hezir (1 Par. 24,15).

HEBAL mons v. GARIZIM.

HEBAL (1 Par. 1,22) v. EBAL 1.

HEBDOMAS. Omnes fere nationes praeter menses et dies aliud quiddam fixum statuere cogebantur. Apud Babylonios hebdomas, apud Aegyptios Graecosque decas, apud Romanos octas in usu erat.

Tempore Patriarcharum iam vestigia inveniuntur hebdomadis. Si Noe non observasset hebdomadem, eum passus esset septem dies transire inter emissionem primae et secundae columbae et iterum septem dies inter emissionem

secundae et tertiae columbae? (Gen. 8,10. 12). Clariora hebdomadis indicia sunt in historia Iacob patriarchae. Ad quem Laban dixit Gen. 29,27 : Imple hebdomadam dierum huius copulae i. e. nuptiarum septiduum (שָׁבַע) quae vox idem valet ac graeca ἑβδομάς. Post eius mortem Ioseph et fratres eius celebrantes exsequias patris in area Atad impleverunt septem dies (Gen. 50,10). Ceterum quaestio de origine hebdomadis intime cohaeret cum quaestione de origine sabbati, quare vide plura s. v. SABBATUM.

Inde ab aetate Moysis in dubium vocari nequit quin Iudaei semper hebdomadem habuerint, tum ob tertium mandatum in monte Sinai promulgatum (Ex. 20,8), cuius observantiae postea iterato monebantur (Is. 56,2; 58,3; Ier. 17,24; Lament. 2,6; Ez. 20,16; 22,8) tum ob ea quae in Novi Test. libris legimus.

In omnibus Veteris ac Novi Test. libris uni tantum eique septimo sive ultimo hebdomadis diei proprium nomen inditum est sabbatum. Ceteros hebdomadis dies verisimile est distingui solitos esse numeris eo modo quo fit et in creationis descriptione et in Novi Test. libris; cf. Ex. 5,22 : die sexto; Marc. 16,2 : הָיָה בַּיּוֹם הַשְּׁבִיעִי שֶׁבַע שָׁבָטִים et Io. 20,19 : הָיָה בַּיּוֹם הַשְּׁבִיעִי שֶׁבַע שָׁבָטִים, insuper Marc. 15,42 : קָרָא שַׁבָּתֹן. Sabbatum et in Vetere et in Novo Test. saepius totam hebdomadam designat.

Cf. Giovanni Schiaparelli, L'Astronomia nell' Antico Testamento, Milano 1903; ed. germ. Die Astronomie im Alten Testament, übersetzt von W. Lüdtkke, Giessen 1901, p. 114-121.

I. G. HAGEN.

HEBENINUS (minus bene ebeninus).

1. Hebeninus semel tantum in Vulgata occurrit Ez. 27,15, ubi Tyrii a filiis Dedan (Ποδῶν LXX cod. B Q, Ἀφῶν cod. A ap. Swete) atque ab insulis vel oris multis dentes eburneos et hebeninos (קִרְנֹת יָהֲבָנִים, Kethib הִיבָנִים) leguntur mercatu accepisse. Dentes S. Hieronymus etiam cum הִיבָנִים haud male coniungit, quia frusta ligni hebenini duritie ac splendore, licet non colore, aliquam cum

dentibus similitudinem retinent; alii קִרְנֹת solummodo ad יָהֲבָנִים referunt et הִיבָנִים « ligna seu frusta hebenina » vertunt. Nomen aliqui cum *Gesenio* (Thes. s. v.) ad אֶבֶן (= אֶבֶן) revocant et *ligna lapidea* significari volunt; at potius exoticum videtur, in linguam hebraeam, sicut postea in graecam et latinam translatum. — Versiones antiquae praeter Symmachum et Vulgatam expressionem hebraicam aut non intellexerunt, aut corruptam legerunt : LXX τὰς εἰσαγομένους (= הִיבָנִים), Peshitta לבנתא thus (= לבנה), Chaldaeus ביכין *pavones* etc.; Symmachus vero et S. Hieronymus ἔβενος, lignum hebeninum interpretati sunt, id quod post Bochartum et Nic. Fullerum auctores recentiores communiter admittunt.

Cf. Sam. Bochart, Hieroz. II. 140-5, ed. Rosenm. II. 714-20; Nic. Fuller, Miscell. Sac. 6,14; I. H. Ursinus, Arboret. bibl. 572-5; M. Miller, Hierophyt. I. 437-9; O. Celsius, Hierobot. I. 327.

2. Lignum hebeninum verum est os variarum arborum in India orientali et insula Ceylon, atque etiam in Africa orientali crescentium, ex ordine *Ebenacearum*, ex quibus praesertim *Diospyros ebenum* Retzium, *D. melanoxylon* Roxburgh, *D. ebenaster* Retzium aliaeque lignum istud pretiosissimum praebent, quod materiam operis torno facti atque intestini, nigrore, firmitate, levore, gravitate maxime insignem suppeditat. Simile, sed minoris pretii est lignum arboris *Dalbergia melanoxylum* Perottet, ex ordine *Leguminosarum*, quod ex Africa occidentali in Europam affertur. Praeterea arbor americana in insulis Antillis crescens, *Brya ebenus* De Candolle, eiusdem ordinis, lignum hebeninum viride seu falsum praestat, rubrum vero seu fuscum frutex in insula Creta indigena, *Ebenus cretica* Linné, ex eodem ordine.

Cf. C. Sprengel, Comment. in Dioscur. 1,129; E. Boissier, Flora orientalis II. 554; Leunis-Frank, Synopsis II. 2 ed. 3 p. 120. 134 s. 567.

3. Scriptores antiqui frequenter de ligno hebenino loquuntur, quod ex India

(*Theophr.* Hist. plant. IV. 4,6; cf. I. 3,4 s.; 6,1; V. 3,1 etc.; *Dioscor.* Mat. med. 1,129, al.) atque etiam praestantius ex Aethiopia provenire praedicant (*Herod.* 3,97. 114; *Diosc.* l. c.). *Vergilius* (Georg. 2,117) solam Indiam nigrum hebenum ferre canit, fortasse Aethiopiam intellegens (cf. Georg. 4,292; *Plin.* XII. 4, 17-20). Aegyptiis pariter lignum hoc gralum erat itemque Assyriis notum fuisse ac nomine *ushū*, quo et lignum pretiosissimum et lapis niger (doleriles) appellatur, designatum esse haud improbabiliiter supponitur.

Cf. A. H. Layard, Monuments of Nineveh I. 55. 56 (ebur et ligna in tributum afferuntur); *Wilkinson-Birch*, Manners and customs t. 413; V. Lorel in Recueil de travaux VI. 1885, 125-30; id. Flore pharaonique ed. 2 p. 60 s.; A. Erman, Aegypten 659; P. Jensen in E. Schrader, Keilinschr. Biblioth. III. 1,36 s.; *Frd. Delitzsch*, Assy. Hdwb. 144 a.

4. Quenam ligni hebenini species ab Ezechiele intellegatur, haud facile dixeris. Plerique indicum supponunt, eo quod filii Dedan, tribus scilicet Arabiam meridionalem Indiam versus habitantes, Tyrum illud dicantur attulisse. Sed eodem iure aethiopicum fuisse diceretur. Dubium etiam movet, quod loco Dedan LXX Rhodios habent eaque lectio pluribus (*Stade*, *Cornill* al.) videtur praefrenda, cum propheta in textu citato a septentrionalibus exorsus ad meridionales progrediatur et v. 20 inter alias Arabum tribus denuo Dedanitas commemoret; Rhodios autem (דדן pro דדן) cf. Syr. דדן) facilius quis supponeret ex vicina insula Creta lignum hebeninum fuscum, quam nigrum ex remota Aethiopia aut remotiore India Tyrum attulisse. At cum in verbis propheticis hebeninum lignum ebori addatur, sicut etiam ab Herodoto (l. c.) et alibi (cf. inscript. cuneif. *Gudea*, Inser. B col. 6,26-40; *Nabuchodonosor*, col. 9,11. — Tribut. aethiop. in sepulcro *Rehmaria* ap. *Wilkinson-Birch* op. cit. I. pl. II A et B etc.) utrumque coniungitur, nihil obstat quominus cum ebone etiam lignum hebeninum verum ex India vel Aethiopia per mercatores arabicos Tyrum allatum dicamus.

Cf. E. F. K. Rosenmüller, Handb. d. bibl. Alterth. IV. 1,254 s.; H. O. Lenz, Bot. d. alt. Griech. u. Römer 550 s.; P. *Cultreya*, Flora bibl. 261; F. *Hamilton*, La botanique de la Bible 136 s.; H. B. *Tristram*, Nat. Hist. of the Bible ed. 8,349; J. H. *Balfour*, The plants of the Bible, ed. nova 117-9.

L. FONCK.

HEBER (הֶבֶר; Ἡβερ, Ἡβερ, Ἡβερ).

1. Filius Baria (Beria, Brie) quarti filii Aser, progenitor familiae Heberitarum (Gen. 46,17; Num. 26,43; 1 Par. 7,31); eius posteri enumerantur 1 Par. 7,32 s.

2. Filius Mered ex tribu Iuda, genitus ex uxore Iudaia vel potius iudaea, pater Socho urbis montis Iuda (1 Par. 4,18; Ἀεισά, Ἀ Ἡβερ; de hoc textu vide s. v. BETHIA).

3. Princeps cuiusdam cognationis Gad in Basan (1 Par. 5,13; Ὠβερ).

4. Unus ex posteris Elphaal de tribu Benjamin (1 Par. 8,17).

5. Unus ex posteris Sesac de tribu Benjamin (1 Par. 8,22; Ὠβερ, Ἀ Ὠβερ).

HEBER (הֶבֶר; Ἡβερ). 1. Filius Sale filii Arphaxad, pater Phaleg et lectan (Gen. 10,24. 25; 11,14 s.; 1 Par. 1,18. 19. 25; Luc. 3,35). Etiam Gen. 10,21 Vulgata et LXX nomen proprium intellegunt. Attamen *Iarchi* nomen accipit tamquam appellativum: transitus; filii autem transitus interpretandi sunt Trans-euphratensis (cf. F. *Hummelauer* ad h. l.).

2. Filius Elphaal in genealogia Benjamin (1 Par. 8,12; LXX Ὠβερ).

3. Princeps familiae sacerdotalis Amoc tempore Ioachim pontificis (Neh. 12,20; B et A omit.).

HEBRAEUS (Ἑβραῖος). Eo nomine iam appellatur Abram Gen. 14,13: Abram Hebraeus, עִבְרִי, LXX ὁ Ἑβραῖος.

quam vocem plerique explicant: advena transeuphratensis. Quae explicatio si assumitur, posterius Abraham denominantur e regione, ex qua in terram Chanaan Abraham immigravit. Altera explicatione nomen derivatur ab Heber, filio Sale, ita ut Abraham eiusque posterius nominentur descendentes ab Heber. Usus nominis Hebraei, Hebraeorum in Vetere Testamento hic est: usurpatur nomen

ab alienigenis, Gen. 39,14; 41,12; Ex. 1,16; 2,6; 1 Reg. 4,6. 9 etc.; vel etiam si Israelita cum extraneis loquitur Gen. 40,13; Ex. 1,19; 2,7; 3,18 etc. vel comparatione et oppositione instituta cum alia natione extranea Gen. 43,32; Ex. 1,13; 2,11; 21,2 etc.

In libris Novi Testamenti nomen adhibetur de homine iudaicae gentis; cf. 2 Cor. 11,22 Hebraei sunt, et ego; Phil. 3,5 Hebraeus ex Hebraeis. Sed strictiore sensu usurpatur de Iudaeis Palaestinam inhabitantibus Act. 6,1, qui ita distinguuntur ab Hellenistis. Vocabula Bethesda, Gabbatha, Golgotha quae hebraica dicuntur Ioan. 5,2; 19,13. 17 ad dialectum aramaicam, quae Christi tempore lingua erat vulgaris, referenda sunt; itemque lingua hebraea Act. 21,40; 22,2; 26,14 aramaica erit intelligenda. De antiqua lingua sacra hebraica vox adhibetur in Prologo in Eccli.; alias haec lingua vocatur lingua Chanaan (Is. 19,18) et iudaica (4 Reg. 18,26; Is. 36,11; Neh. 13,24).

Quinam sint illi Hebraei, quibus epistula ad Hebraeos missa sit, recenti tempore multum est disceptatum et vix est ulla e celebrioribus ecclesiis sive in oriente sive in occidente, quae non ab uno alterove interprete illam epistolam missam accepisse dicatur. Verum si ea ipsa quae in epistula leguntur serio examinantur, dubium esse nequit quin palma danda sit ei sententiae, quae constanti quoque totius antiquitatis suffragio commendatur, epistolam esse missam ad Iudaeochristianos palaestinoses, praeprimis hierosolymitanos. Nam vix alibi totus coetus e Iudaeochristianis constabat, nullis admixtis neophytis ethniceis; coetus iste iam ex longo tempore exsistebat (cf. 5,12); primi eius magistri et praepositi fidem martyrio testati erant (13,7); olim ipsi, ad quos scribitur, magnas experti erant persecutiones (10,32); imminet periculum, ne aliqui splendore cultus levitici in templo affecti coetus christianorum deserant. Quae omnia apprime, immo unice ad ecclesiam hierosolymitanam congruunt. Cur stante templo et vigente cultu antiquo exponi debuerit quantopere dignitate novum foedus emineat prae vetere,

facile intellegitur, praesertim si consideratur aliquem teporem irrepsisse in illum coetum (cf. 2,1 s.; 6,4-4; 10,26; 12,25) et christianis persecutionibus esse obnoxios (12,4-13; 13,13).

I. KNABENBAUER.

HEBRI (עִבְרִי, Ἑβραῖ), levita de stirpe Merari tempore Davidis (1 Par. 24,27).

HEBRON (הֶבְרֹן; Ἡβρών, Ἡβρώμα).

1. Tertius filius Caath filii Levi (Ex. 6,18; Num. 3,19; 1 Par. 6,2. 18; 23,12). Quattuor filii Hebron : Ieriau, Amarias, Iahaziel, Iecmaan recensentur 1 Par. 23,19. Eadem quattuor nomina leguntur 1 Par. 24,23 in enumeratione classium leviticarum, quas David variis ministeriis designavit, sed vox עִבְרִי illis quattuor nominibus praemittitur; itaque aut supplendum erit nomen patris Hebron post עִבְרִי aut interpretandum erit : et filii istorum quattuor filiorum Hebron secundum familias suas sorte designati sunt ad ministeria sua; verum nomina singularum familiarum, quae ab istis quattuor filiis Hebron descendebant, in textu desiderantur neque in versionibus leguntur. — Tota familia, quae a Hebron descendit, saepius vocatur familia Hebroni seu Hebronitarum (Num. 3,27; 26,38; 1 Par. 26,23). Eius familiae princeps tempore Davidis erat Eliel (1 Par. 15,9). Ex iussu Davidis 1700 Hebronitae duce Hasabia in Palaestina occidentali et 2700 Hebronitae duce Ieriau in Palaestina orientali ministeria tum sacra tum civilia procurabant, quae praeter ministeria templi levitis subeunda erant (1 Par. 26,30-32); scil. ministeria seriarum et iudicum.

2. In genealogia Iuda 1 Par. 2,42. 43 Hebron dicitur filius Maresa de genere Caleb filii Hesron et pater Core, Taphua, Recem, Samma. Ex his nominibus Maresa et Taphua alias leguntur ut nomina urbium, Core et Samma personarum, Recem personarum et urbis beniaminiticae. Hinc aliqui putarunt Hebron et alia esse forte nomina urbium. Sed cum in v. 44 addatur : Samma genuit..., Recem genuit... dubitandum non est, quin nomina sint personarum. Ceterum tex-

tus 2,42 : « et filii Maresa patris Hebron » videtur corruptione laborare; cf. *Keil* ad h. l.

3. Hebron urbs in monte Iuda (Ios. 15,34; 20,7; 24,11), aedificata septem annis ante Tanim (Zoan) urbem Aegypti (Num. 13,23[22]) et secundum Flavianum Iosephum, qui annos eius ad 2300 computari dicit, ipsa Memphi in Aegypto antiquior (Bell. Iud. IV. 9,7). Ab Enacitis, qui urbem Hethitis eripuerunt, vocabatur Cariatharbe (קְרִיַת-אַרְבֵּעַ; πῶλις Ἀρβόζ, Κριαθαρθόζ, Κριαθαρθοκσεφός) seu civitas Arbee (v. ARBE). Etiam appellatur Mambre (Gen. 23,19; 33,27), quo nomine audebat convalles prope Hebron et princeps Amorrhaeorum amicus Abraham patriarchae ibidem habitans (v. MAMBRE). Celeberrima est Hebron ex historia patriarcharum. Ibi Abram commoratus est, postquam Bethel reliquit (Gen. 13,18); ibi eius nomen Abram mutatum est in Abraham (17,3); ibi tres angeli a patriarcha hospitio suscepti sunt (18,1 s.). Isaac natus (21,3), Sara mortua et sepulta est (23,2-20). Erat etiam ad tempus domicilium Isaac (35,27) et Iacob (37,14). Inde Iacob cum filiis suis in Aegyptum descendit (37,14; cf. 46,1); ibi tres patriarchae eorumque uxores Sara, Rebecca, Lia (non vero Rachel) sepulti sunt (49, 30. 31; 50,13). Illuc duodecim exploratores a Moyse missi pervenerunt (Num. 13,23[22]). Iosue Oham regem Hebron interfecit, urbem in ore gladii percussit ac vastavit (Ios. 10,3-39; 11,21; 12,10) eamque tradidit in possessionem Caleb, qui Enacim incolas exterminavit (Ios. 14, 13; 15,13. 14; Iud. 1,20) et urbi nomen antiquum Hebron restituisse censetur. Erat urbs refugii (Ios. 20,7) et sacerdotum (Ios. 21,41. 43; 1 Par. 6,35. 37). Eius mentio fit in historia Samsonis (Iud. 16,3). David in Philisthaea degens senioribus Hebron amicis utebatur (1 Reg. 30,31). Novum vero splendorem adeptam est urbs, quando David per septem annos et dimidium rex Iuda in ea residebat (2 Reg. 2,4. 3. 11. 32; cf. 3 Reg. 2,41; 1 Par. 29,27) ibique rex universi Israel agnitus et unctus est (2 Reg. 3,1. 3; 4 Par. 11, 1. 3; 42,23. 38); sex filii ei nati sunt in Hebron (2 Reg. 3,3; 1 Par. 3,4. 4). Ibi-

dem Abner a Ioab occisus et sepultus est (2 Reg. 3,27. 32), Baana et Rechab super piscinam suspensi pro caede Isbo-seth poenas dederunt (4,12). Hebrone Absalom in apertam rebellionem prorupit (15,7-10). Roboam rex urbem munitis firmavit (2 Par. 11,10). Post exilium a filiis Iuda habitabatur (Neh. 11, 25); deinde in ditionem Edomitaram cessit, donec a Iuda Mach. recuperata est (1 Mach. 5,65; Vulg. Chebron; *Flav. Ios.* Ant. XII. 8,6). Postquam Romani Galilaeam subegerunt, Simon Bar Gioras genere Gerasenus, famosus iste latro et dux bellicus, urbem cepit; mox autem Cerealis unus ex ducebus Vespasiani eam expugnavit et combussit (*Flav. Ios.* Bell. Iud. IV. 9,7. 9).

Distabat Hebron a Ierusalem 22 mil. pass. (*Onom. ed. Lag.* 209,69), a Bersabee 20 mil. pass. (l. c. 234,1). Hodiernum nomen est *el-Khalil* i. e. amicus scil. Dei, quo nomine Abraham a Muhamedanis appellatur (cf. Is. 41,8; Iac. 2, 23); equites quoque christiani medii aevi urbem vocant castellum seu praesidium ad sanctum Abraham. Adnumeratur quattuor sacris urbibus Iudaeorum (Ierusalem, Hebron, Tiberias, Safed). Incolarum numerus ab aliis aliter indicatur : 18-19 000 inter quos 1 500 Iudaei (*Baedeker-Benzinger*), vel 8020 inter quos 1 020 Iudaei (*Liévin de Hamme*); reliqui fere omnes sunt Muhamedani. Sita est ad radices et partim in ascensu montis *Djebel Dja'ābre*. Utrum antiqua urbs fuerit in monte et quo in monte posita an ad radices montis, geographi non conveniunt.

Hodierna urbs quattuor vel etiam septem partibus seu *Hāret* constat. Opinantur aliqui etymon Cariatharbe explicandum esse *urbs quattuor* scil. partium; sed num antiqua urbs, de cuius situ disputant, quattuor partes distinctas haberit, plane ignoratur. Paulo aliter *Lagrange* (Le livre des Juges p. 6) : civitas quattuor scil. urbium foederatarum. S. Hieronymus etymon interpretatus est de quattuor scil. Abraham, Isaac, Iacob, Adam ibi sepullis (*Onom. ed. Lag.* 84,10); traditiones iudaicae quantum vel Adam vel Esau vel Ioseph esse dietabant; in Vulgata Gen. 23,2; 35,27

etymon explicatur *civitas Arbe* (cf. Jos. 13,13; 21,11).

Maxima attentione dignum sine dubio est *Harām* seu sacrum aedificium super sepulera patriarcharum exstructum, quod adire licet solis Muhamedanis; ibi est antiqua traditio erat spelunca duplex (הַבְּכֹרֶת, τὸ σπήλαιον τὸ διπλοῦν),

quam Abraham ab Ephrone Hethaeo sibi acquisivit (Gen. 23,9 s.). Prope *Harām* in eadem principali urbis parte (*Hāret el-Harām*) duo stagna inveniuntur: *Birket el-Qazzāzin* et *Birket el-Sultān* (40 m²); hoc alterum maius stagnum traditio componit cum illa piscina de qua 2 Reg. 4,12. Praeterea ostenduntur puteus Abraham, sepulcra Abner et Isai patris David et circiter 4 km aquilonem versus ab urbe sanctuarium Abraham *Harām Rāmet el-Khalīl*. Dimidia fere horae spatio ab urbe inter septentrionem et occidentem ostenditur querens (seu ut quidam minus recte loquuntur: terebinthus) Abraham (vide s. v. MAMBRE). Ager Hebron (Jos. 21,12) seu possessio Caleb sine dubio totum complexum convallium circa urbem comprehendebat; una autem est vallis praecipua et perlonga, quae *Wādī el-Khalīl* audit et in utroque ascensu (bīnas) urbis partes sibi adiacentes habet; in directione austro-orientali per urbem decurrens paulo infra urbem austrum versus deflectit. Praeterea v. Nehelescol s. v. ESCOL 2.

De difficultate, quae ex nomine Hebron contra antiquitatem Pentateuchi petebatur, vide *Cornely*, *Introduct.* 2 II. 1 p. 90.

Cf. *Robinson*, *Palaestina* II. 701 s.; *Guérin*, *Judée* III. 214-275; *Rosen* in *Zeitschr. d. D. Morgenl. Gesellsch.* XII. 1858 p. 477 ss.; *Survey of West. Pal.* Mem. III. 305-309; *J. Fahrngruber*, *Nach Jerusalem* ed. 2 II. 99-106; *Buhl*, *Alt. Pal.* 1896 p. 160-162; *D. Zanechchia*, *La Palestine d'aujourd'hui* 1899 II. 227-242; *Liévin de Hamme*, *Terre Sainte* ed. 4 II. 99-127; *W. M. Thomson*, *The Land and the Book* I. (Southern Pal.) p. 268 ss.; *C. Schick*, *Hebron and its neighbourhood* in *Pal. Expl. Fund. Quart. Stat.* 1898 p. 232-238; *Dallon*, *Note on the Hebron Haram* in *Quart. Stat.* 1897 p. 53-61; *J. Dölfler*, *Geogr. u. ethnogr. Studien* z. III. u. IV Buche d. Könige 1904 p. 14-17; *Baedeker-Benzinger*, *Pal. u. Syrien* ed. 5 p. 133 ss.

HEBRONA (עֵבְרוֹנָה, Ἐβρωνά), statio Israelitarum inter Ietebatha et Asiongaber (Num. 33,34. 35); ex enumeratione hoc unum constat Hebrona fuisse septemtrionem versus ab Asiongaber (seu *Agaba*, quae est iuxta terminum septemtrionalem sinus Aelanitici).

HEBRONI, HEBRONITAE v. **HEBRON** 1.

HEDDAI (הֲדַי, A Ἀθθαί, B omitt.), unus ex Gibborim David (2 Reg. 23,30), de torrente Gaas (vide s. v.). Idem 1 Par. 11,32 scribitur Hurai (הֲרַי, Οὐρέτ).

HEDER (עֵדֶר, in pausa עֵדֶר, Ὠδεδ), filius Baria, Beniaminita (1 Par. 8,13).

HEDERA. 1. Hedera dicitur a S. Hieronymo planta celebris קִיקְיֹן in historia Iona (4,5-10), quam Symmachus, Aquila, Theodotus similiter κισσός (al. κυκεών) appellarunt; LXX eandem κολοκύνθη et vetus Latina *cucurbitam* nominant, ac pariter Peshitta קראא, eandemque explicationem Mahometus pseudo-propheta in Corano sequitur (Sur. 37,146); Chaldaeus vero paraphrasta vocem hebraeam retinet. In commentario textus citati S. Hieronymus neque hederam neque cucurbitam proprie intellegendam esse declarat, sed eam « quae lingua syra et punica *elkeroa* dicitur »; ubi codices secundum *Hitzig* habent *ciceia* loco *elkeroa*, atque ita citatur ab *I. D. Michaelis* (Supplem. p. 2183); *ciceia* autem vel *elkeroa* est *Ricinus communis* Linné, ex ordine *Euphorbiacearum*.

2. Ex verbis textus sacri habetur imprimis, prophetam sibi met umbraeculum fecisse (סִכָּה), procul dubio haud dissimile tuguriolo, quod custodes in vineis et in cucumerario sibi construebant (Is. 1,8; cf. Iob 27,18) hodieque construnt; atque cum Iona « sederet subter illud in umbra » (v. 3), antequam planta ascendit, necessario supponendum est, tectum aliquod in tuguriolo a propheta factum neque ad hoc קִיקְיֹן a Deo praeparatum esse, ut desuper, sustentibus forte palis a Iona erectis, tectum formaret. At more orientali tugurium parietibus certe carebat, saltem

ex parte; unde vates, per aliquam diei partem, protectus tecto desuper, in umbra sedens, aliis horis sole percussus est (v. 8). Contra hoc autem satis protegebatur, si planta inter palos tugurioli vel iuxta eos ascenderet ac foliis sat largis solem arceret. — Deinde קִיקִיִּי dicitur praeparatus a Deo, ut ascenderet super caput Iovae et protegeret eum, atque tam celeriter crevit, ut « filius unius noctis » appelletur (v. 10); sed a verme vel vermicibus (תולעים collective, cf. Deut. 28,39; Is. 44,14), volente Deo, ante ortum solis percussus exaruit, ita ut etiam « filius unius noctis » periret (v. 7. 10). Absque omni miraculo verbis textus non videtur satisfieri. At convenienter talis intellegitur planta, quae velociter crescens, etiam velociter exarescit; admissio enim tunc aliquo miraculo in eo quod Deus, auctis naturae viribus, incrementum unius noctis sufficiens reddiderit ad obumbrandum caput Iovae, alia omnia absque miraculo, quamvis non absque speciali Dei providentia, explicantur.

3. S. Hieronymus locum *cucurbitae*, quae in vetere Vulgata ubique legebatur, quaeque etiam in hypogaeis primorum christianorum innumeris vicibus picta apparet (cf. Stimmen aus Maria-Laach XLIX. 1895 II. 133 s.), in nova versione, auctoritatem veterum translatorum secutus, *hederae* prudenter concessit, timens grammaticos, ne nomine hebraico latinis ignoto retento « quaedam portenta contingerent » (Comment. in Ion. 4,6. M. 23,1202-1204). At fugiens grammaticos, plebis admirationem magnam movit atque hedera sua celebrem illam litem cucurbitariam excitavit tantumque in ecclesiis praesertim africanis tumultum adduxit, ut « propter unius verbi dissonantiam episcopus paene sacerdotium perdidisset » (S. Hieron. ep. 112 al. 89 ad Augustin. n. 21 s.; cf. S. Augustin. ep. ad Hieron. inter epist. S. Hier. 104 al. 88 n. 5. M. 21,929-31; 833 s.). — Nostra vero aetate ex tribus illis candidatis *hedera* vix ac ne vix quidem patronum invenit; nam ut bene notant candidati figurini in thesibus de phytographia

sacra speciali praeside Iohanne Gesnero defendendis (a. 1773, pars III. p. 27) « repugnare videtur lentum huius plantae incrementum et perennitas ac persistentia maior, quam ut a radice verme laesa postridie exaruerit ». De cucurbita vero et ricino, licet periculum perdendi sacerdotium cessaverit, dissonantia tamen et controversia inter auctores remansit. *Cucurbitae* enim favent praeter alios *Tristram*, *Duns*, *J. Smith*, *Riehm-Baethgen* etc.; multo plures autem *ricino* suffragantur post veteres illos rei naturalis sacrae scriptores *Bochartum*, *Ursinum*, *Caryophilum*, *Hillebrandum*, *Celsium*; quibus assentiuntur *Michaelis*, *Rosenmüller*, *Gesenius*, *Cultrera*, ac reliqui auctores recentiores satis communiter, ita ut pluribus res omnino definita videatur (*Fillion*); immo iam *Bochartus* hunc in sensum scripsit: « Et iam nemo est paulo humanior, qui non habeat compertissimum, kikajon esse κικίωνν seu ricinum ». Ac re vera potissima quae pro cucurbita et contra ricinum affertur ratio falso supponit, kikajon debuisse tectum tugurioli formare, ut caput prophetae sedentis a sole protegeret, quod verbis sacris contrariari supra notavimus.

Cf. *Sam. Bochart*, Hierozoic. II. 293 s. 623, ed. *Rosenm.* III. 41 s. 523; *I. H. Ursinus*, Arboreti bibl. cont. 111 s.; *Blas. Caryophilus* (*Garofalo*), Dissert. miscell. pars I., Romae 1718, 257-74; *M. Hiller*, Hierophyt. I. 453-6; *O. Celsius*, Hierobot. II. 273-82; *I. D. Michaelis*, Supplem. p. 2185-90; *E. F. K. Rosenmüller*, Bibl. Alterth. IV. 1, 123-5; *W. Gesenius*, Thes. 1214; *P. Cultrera*, Flora bibl. 381-6; *H. B. Tristram*, Nat. Hist. of the Bible ed. 8, 448-50; *J. Duns*, Bibl. Nat. Science II. 540 s.; *J. Smith*, Bible plants 56 s.; *L. Cl. Fillion*, Atlas d'hist. nat. de la Bible 16,47; *Riehm-Baethgen*, Handwbch. ed. 2, I. 894.

4. Rationes autem pro ricino hae fere merito afferuntur. Imprimis *Ricinus communis* Linné est arbuscula in variis Orientis regionibus satis communis, celerime crescens atque altitudinem quatuor metrorum attingens, quae largis foliis suis iucundam umbram praebet. A vermicibus percussa celerime arescit, ita ut intra paucas horas omnia folia

concident, sicut intra horae spatium folia decerpta marcescere experientia propria et aliena testatur. Ipsa igitur planta historiae sacrae omnino convenit. Accedit nominis hebraici cum aegyptiaco *kiki* affinitas, quo ricinus ex auctoritate veterum scriptorum ab antiquis Aegyptiis appellabatur (cf. *Herod.* 2,94; *Dioscur.* Mat. med. 4,161 al. 164; cf. 1,38; *Plin.* XV. 7,23; XVI. 22,83, al.), sicut oleum ricini in Talmude סֵם רִיכִי appellatur (*Löw*). Affinis etiam videtur denominatio plantae cuiusdam assyriaca *kukkānūtum* (cf. *iūqanū*. *Fr. Delitzsch*, *Hilzb.* 327 b. 50 a). Certe antiquis Aegyptiis planta haec optime nota erat ac propter oleum ad varia remedia utile in hortis et agris frequenter colebatur.

Cf. *P. Forskal*, *Flora aeg.-arab.* 164; *E. Boissier*, *Flora orientalis* IV. 1143; *A. Braun* in *Ztschr. f. Ethnol.* IX. 1877, 300; *Wilkinson-Birch*, *Manners and Customs* II. 400; *I. Löw*, *Aram. Pflanzennamen* n. 298; *Fr. Woenig*, *Pflanzen im alt. Aeg.* 337-40; *Ch. E. Moldenke*, *Die in altaeg. Texten erw. Bäume* 120-3; *V. Lorel*, *Flore pharaonique* ed. 2, p. 49. — Cf. praeterea *H. O. Lenz*, *Bot. d. alt. Griech. u. Römer* 657 s.; *E. Hamillon*, *Botanique de la Bible* 168 s.; *J. H. Balfour*, *The Plants of the Bible*, ed. nova, 215-8; *A. de Candolle*, *Origine des Plantes cult.* 339-42; *G. E. Post*, *Flora of Syria* 727.

5. Ipsa *hedera*, gr. *κισσός*, commemoratur in historia Machabaeorum, cum Iudaei per ducem a rege Antiocho Hierosolymam missum cogerentur, in sacris dionysiis «hedera coronati Libero circuire» (2 Mach. 6,7; cf. 3 Mach. 2,29). Libero enim, qui et Bacchus et Dionysius vocatur, praeter vitem praesertim hedera sacra erat (*Homer.* *Hymn.* in *Dionys.* v. 40; *Plin.* XVI. 34,144; 35,153; *Tacit.* *Hist.* 5,3 etc.), unde et thyrsum hedera redimitum gestans in veterum monumentis atque in ipsis etiam nummis civitatis hierosolymitanae in coloniam romanam redactae figuratur (*Mad-den*). Planta autem *κισσός* a Graecis dicta est *Hedera helix* Linné ex ordine *Araliacearum*, quae in Libano aliisque montibus Syriae et Palaestinae atque in planitie litorali, sicut in nostris regionibus communis est.

Cf. *O. Rudbeck* fil., *De Hedera*, Upsaliae 1707; *M. Hiller*, *Hierophyt.* I. 460-2; *P. Culltrera*, *Flora Bibl.* 263 s.; *F. W. Madden*, *History of Jewish Coinage*, London 1864; p. 215. 224. 230; *id.* *Coins of the Jews*, in *Numismata orient.* ed. nova II. London 1881, p. 252. 265. 274; *E. Boissier*, *Flora orient.* II. 1090 s.; *I. Löw*, *Aram. Pflanzennamen* n. 100; *G. E. Post*, *Flora of Syria* 377.

L. FONCK.

HEGEMONIDES (Ἡγεμονίδης), dux quidam Syrorum, quem Lysias in Palaestina reliquit, cum ad debellandum Philippum usurpatorem anno 162 a. Chr. Antiochiam rediret (2 Mach. 13,24). Vulgata quidem vertit: fecit eum (scil. Iudam Mach.) a Ptolemaide usque ad Gerrenos ducem et principem; sed textus graecus habet: κατέλιπε στρατηγὸν ἀπὸ Πτολεμαίδος ἕως τῶν Γερρηνῶν ἡγεμονίδην. Videtur itaque Hegemonides nomen proprium esse et in versione syriaca velut nomen proprium exhibetur.

HEGLA (הֶגְלָא, Ἑγλά) tertia ex quinque filiabus Salphaad (Num. 26,33; 27,1; 36,11; Ios. 17,3).

HELAM (הֶלָם, Ἀλάμ), urbs inter Iordanem et fluvium i. e. Euphratem, apud quam Adarezer rex Soba a David devictus est (2 Reg. 10,16. 17). Vulgata solum 10,17 nomen Helam expressit. De varietate textuum lege *F. de Hummelauer* ad 2 Reg. 10,16. — Situs urbis ignoratur; fortasse eadem est quae Almatha prope Nicephorium (*Ptolem.* V. 15,25 [*ed. Müller-Fischer* 14,19]).

HELBA (הֶלְבָּא, Χελβὰ), urbs tribus Aser, ex qua Chananaei non sunt expulsi (Iud. 1,31). Est ignota. Eiusdem urbis nomen videtur latere in textu hebr. Ios. 19,29 כְּהַבֵּל, Ἀπολλέ, Vulgata de funiculo; cf. *F. de Hummelauer* ad h. l.

HELBON (הֶלְבֹן, Χελβών), urbs Syriae, de qua in descriptione commercii et opum Tyri legitur Ez. 27,18: Damascenus negotiator tuus... in vino Helbon (hebr., LXX, Aquila, Theodot.); Vulgata et Symmachus: in vino pingui.

Designatur regio prope hodiernum vicum *Halbūn* circa 20 km a Damasco inter septentrionem et occidentem in ascensu Antilibani. Vinum regionis *Hilbānu* in textibus cuneiformibus laudatur (cf. *Schrader, Delitzsch*) et regibus Persarum iucundi saporis erat, ut veteres tradunt (*Strabo* XV. 3,22; *Athenaeus*, *Deipnosoph.* I. 51[28] ed. *Teubner* 1887 l. p. 64; *Plutarch.* De Alexandri M. fortuna aut virtute II. 11, ed. *Firmin-Didot*, *Plutarch.* Moral. I. p. 419; *Posidonii* *Apamensis Fragmenta* 58 apud *Müller*, *Fragm. hist. graec.* III. p. 276). Eadem regio hodie quoque vini generosi ferax est.

Cf. *Ritter*, *Erdkunde* XVII. 2, 1319-1322; *Robinson* in *Zeitschr. d. D. Morgenl. Gesellsch.* VII. 1853 p. 69. 70; *idem*, *Neuere bibl. Forsch.* p. 613. 614; *Gesenius*, *Thesaurus ling. hebr.* p. 464; *Movers*, *Phoenizier* II. 3 p. 268. 269; *L. Porter*, *Five years in Damascus*, 1855 II. 333 s.; *Schrader-Whitehouse*, *Cuneif. Inscript. and Old Test.* II. 121. 122; *Delitzsch*, *Paradies* p. 281.

HELKATH v. HALCATH.

HELKATH HA-SURIM (הֶלְקָתְהָאֲסֻרִים) nominatur 2 Sam. 2,16 campus iuxta piscinam Gabaon. Vulgata interpretatur: Ager robustorum, LXX Μερίς πόντος ἐπισκοπῶν seu portio insidiosorum (הַנְּדִיבִים).

HELCHIAS v. HACHELAI.

HELCHI (הֶלְכִי, B et A omitt.), sacerdos de familia Maraioth, tempore Ioachim pontificis filii Iosue (Neh. 12,15).

HELCIAS (הֶלְכִיָּהוּ et הֶלְכִיָּהוּ; *Helziz*). 1. Pater Eliacim praepositi domus Ezechiae regis (4 Reg. 18,18. 26. 37; Is. 22,20; 36,3. 22).

2. Pontifex, qui anno 18. Iosiae regis, cum pecuniam ad instaurandum templum ex aerario desumere vellet, librum Legis invenit et per Saphan scribam regi tradidit (4 Reg. 22,4 s.; 23,4. 24; 2 Par. 34,9 s.; 35,8; de his cf. s. v. IOSIAS 1); idem erat filius Sellum (Mosollam, Salom) de genere Sadoc et inter maiores Esdrae recensetur (1 Par. 6,13 [3,39]; 9,11; Esdr. 7,1; Neh. 11,11; Bar. 1,7).

3. Levita de stirpe Merari, unus ex maioribus Elhan (1 Par. 6,45 [30]).

4. Levita de stirpe Merari, filius Hosa, ianitor domus Domini tempore Davidis (1 Par. 26,11).

5. Pater Ieremiae prophetae, sacerdos in Anathoth (Ier. 1,1).

6. Pater Gamariae legati a Sedecia rege Babylonem missi (Ier. 29,3).

7. Unus ex maioribus Baruch (Bar. 1,1).

8. Pater Susannae (Dan. 13,2. 29. 63).

9. Aequalis Esdrae, stans ad dexteram Esdrae Legem populo explicantis, probabiliter sacerdos (Esdr. 8,4).

10. Princeps classis sacerdotalis, qui ducit Zorobabel ex captivitate rediit (Neh. 12,7. 21).

HELEC (הֶלֶק, Ἠλέκ, Κέλεξ), unus ex filiis Galaad et progenitor familiae Heleclitarum (Num. 26,30; Ios. 17,2).

HELED (2 Reg. 23,29 הֶלֶד, B omitt., A Ἠλᾶδ; sed 1 Par. 14,30 הֶלֶד, Ἀθᾶδ, A Ἠλᾶδ), filius Baana, Netophathites, unus ex Gihborim Davidis.

HELEM (הֶלֶם). 1. Unus ex posteris Aser (1 Par. 7,35; Βαλαζμ; videtur idem esse ac HOTHAM 1).

2. Unus ex tribus legatis, qui Babylone a Iudaeis exsulis donaria in urbem Ierusalem attulerunt (Zach. 6,14; LXX appellative explicant τοῖς ὑπομείνουσιν). Idem Zach. 6,10 scribitur Holdai (הֶלְדִּי, LXX παρὰ τῶν ἀρχόντων). Videtur fuisse binominis; alia ratio mutati nominis ignoratur.

HELEPH (הֶלֶף; Μοολᾶμ, A Μελέφ inclusa praepositione בֶּן), urbs a qua terminus tribus Nephthali initium sumit (Ios. 11,33). *Van de Velde* (Mémoire p. 320) proponit vicum *Beit Lif*; cf. *Survey of West. Pal. Mem.* I. 204. Eundem solum indicant alii. Sed *F. de Hummelauer* ad Ios. 19,33 animadvertit הֶלֶף induere sensum substitutionis, hinc בהֶלֶף significare locum substitutionis, pagum commutatorium ad austrum lacus Tiberiadis Nephthalitis concessum, quia Danitae pagum circa Dan-Lais in finibus Nephthalitarum occupaverant.

HELES v. **HELLES** 1.

HELI. 1. Heli (הֵלִי, Ἡλὶ), pontifex et iudex Israelitarum (1 Reg. 1,3 ss.; 2, 11 ss.; 3,1 ss.; 4,4 ss.; 14,3). Erat de genere Ithamar, ut colligitur ex 1 Reg. 14,3; 22,20; 1 Par. 24,3 inter se collatis; cum ante ipsum alius pontifex de domo Ithamar non innotescat, summum sacerdotium per Heli a domo Eleazar in domum Ithamar transiisse censetur. Mortuus est senex 98 annorum (1 Reg. 4,15) et iudicaverat Israel 40 annis (4,18); legunt quidem LXX: 20 annis, sed aliae versiones et Flav. Iosephus retinent 40 et vix credibile esset Heli senem 78 annorum ad iudicis officium esse assumptum. Indoles pontificis in sacro textu paucis bene delineatur. Efferuntur eius fidelitas in officio, dignitas, affabilitas, sapientia sermonis (cf. 1 Reg. 1,12-17; 2,20). Sed etiam describitur nimia eius lenitas et indulgentia in filios praevaricatores (2,22-23), quam vir Dei ad pontificem divinitus missus acriter reprehendit simul praeveniens ruinam domus Ithamar (2,27-36); huius vaticinii confirmationem praebet visio Samuelis pueri (3,11-14). Verba autem, quibus Heli intimationem poenae recipit: Dominus est; quod bonum est in oculis suis faciat (3, 18), pietatem et resignationem spirant, qua culpam agnoscit, condemnationi se submittit, ab ipso Deo puniente misericordiam expectat. Eiusdem pietatis documentum edidit moriens; tulit nuntium cladis et mortis filiorum suorum de arca Domini unice sollicitus, sed iacturam arcae comperiens subita morte opprimitur (4,17. 18). Virtutes igitur merito laudandae in Heli cernuntur, sed maiores in pontifice exigebantur, in quibus ex propria culpa deficiebat. Apposite *F. de Hummelauer* ad h. l. notat eius mortem a Samuele cum sensu pietatis, non horroris describi. De ruina domus Ithamar cf. 1 Reg. 22,16-18; 3 Reg. 2,27. 35 et v. **ACHIMELECH** 1 et **ABLIATHAR**.

2. Heli (Ἡλὴ, Ἡλῶ), pater Ioseph sponsi B. V. Mariae in genealogia Christi Luc. 3,23. In altera genealogia Matth. 1,16 legimus: Iacob autem genuit Ioseph virum Mariae. Ex antiqua traditione Pa-

trum Heli et Iacob erant fratres uterini; Heli mortuus est uxore sine liberis relicta, quare secundum legem leviratus Deut. 25,5. 6 Iacob viduam assumpsit, ut fratri suo semen suscitarret et ex ea genuit Ioseph virum Mariae; erat igitur Ioseph filius naturalis Iacobi (ex posteris Salomonis), filius legalis Heli (ex posteris Nathan). — Plura v. apud *Cornely*, Introd. III. num. 34 et *Knabenbauer* ad Luc. 3,23 et s. v. **GENEALOGIA**.

HELIODORUS (Ἡλιόδωρος), qui erat super negotia (ὁ ἐπὶ τῶν πραγμάτων) Seleuci IV. Philopatoris, a rege in Ierusalem missus est, ut thesauros templi raperet et Antiochiam (Syriae) afferret; sed apparitione equitis caelestis perterrefactus et a duobus iuvenibus fulgentibus, qui cum equite apparebant, flagellatus corruit; hostia autem salutari per Oniam pontificem oblata vitam servavit et Antiochiam reversus regem admonuit: Si quem habes hostem aut regni tui insidiatorem, mitte illum et flagellatum eum recipies, si tamen evaserit (2 Mach. 3,1 ss.; 4,1; 5,18). Heliodorus censetur esse idem, qui teste Appiano (Syr. 45) brevi postea regem interfecit et regnum sibi arripere frustra conatus est.

HELIOPOLIS (Ἡλιόπολις), urbs celeberrima et perantiqua, metropolis nomi tertiū decimi in Aegypto inferiore, praecipua sedes sacerdotum, qui ibidem templum solis celeberrimum habebant, bibliothecarum divitiis ac studio litterarum maxime florentes, quorum discipuli erant permulti philosophi graeci (cf. *Herodot.* 2,3; *Strabo* XVII. 1,29). In libris copticis appellatur *Un, On*, quod *lucem* et improprie *solem* significasse vix dubium est. In documentis hieroglyphicis appellatur *An, Anu* et accuratius *Anu-mhāt* i. e. Anu septemtrionis, ut distinguatur ab *An-res* i. e. Anu meridiei (Hermionthis in Aegypto superiore). Inter deos, quos ibi colebant, imprimis *Atum* seu *Tum* (sol occidens) frequentissime dominus Helio-poleos nominatur, item *Ra* (sol) etsi rarius quam *Atum* (*Brugsch*). Putiphare sacerdos Helio-poleos (Gen. 41,45. 50; 46,20) iam ipso nomine sacerdos dei *Ra*

fuisse designatur (Pelipara i. e. devotus Ita). Depopulatio Aegypti exhibetur Ez. 30,17 : « Iuvenes Heliopoleos (יְזִיִּי) et Bubasti gladio cadent et ipsae captivae ducentur ». Ex. 1,11 : « Ων ἡ ἐστὶν Ἡλιούπολις est additamentum LXX. De Jer. 43,13 vide BETHSAMES 4. Alia est Heliopolis in Coelesyria, de qua diximus s. v. BA'ALBEK et AVEN 4 (Am. 1,5).

Cf. *Brugsch*, *Geograph. Inschriften alt-ägypt. Denkmäler* I. p. 251 s. et *Dict. géogr. de l'ancienne Égypte* p. 41; *Gesenius*, *The-saurus ling. hebr.* p. 52; *Baedeker-Stein-dorff*, *Aegypten* ed. 4 p. 100-102.

HELISUR v. ELISUR.

HELLAS (Ἑλλάς) legitur 1 Mach. 8,9, quo loco rumores referuntur, qui de bellis inter Graecos et Romanos gestis ad Iudaeos allati fuerant. Qua occasione οἱ ἐκ τῆς Ἑλλάδος (Vulgata : qui erant apud Helladam) Romanos tollere decreverint, non liquet; coniecturas de aliquo fundamento illius rumoris v. apud *Keil* et *Grimm* ad h. l. Ceterum nota agi de rumoribus allatis, non de historica narratione.

HELLÉNISMUS, HELLENISTAE vide s. v. GRAECI, GRAECIA.

HELLES (ἑλλή, 1 Chron. 11,27 ἑλλή. in pausa ἑλλή; Ἑλλάγης, Ἑλλάγης et 2 Reg.

23,26 Σελλάγης). 1. Unus ex Gibborim Davidis, Phalonites seu de Phalti (2 Reg. 23,36 Vulg. Heles; 1 Par. 11,27; 27,10).

2. Unus ex posteris Hesron de stirpe Iuda, filius Azariae et pater Elasa; enumeratur octavus inter illos tredecim, qui ab Oholai filia Sesan descendunt, quae Ieraa Aegyptio, servo Sesan, nupserat (1 Par. 2,39).

HELMONDEBLATHAIM v. DEBLATHAIM.

HELON, nomen viri et trium urbium.

1. Helon (יְלֹן, Χελών), pater Eliab principis tribus Zabulon (Num. 1,9; 2,7; 7,24 29; 10,16).

2. Helon urbs 1 Par. 6,38[43] v. HOLON.

3. Helon urbs 1 Par. 6,69[34] v. AIALON 1.

4. Helon (יְלֹן, Χελών), oppidum Moab inter oppida ex regione septentrionali ab Arnon fluvio sita (Jer. 48,21). Onom. (ed. Lag. 114,3; 303, 74) : « Chelon, quae et Elon, oppidum Moab, ut in Jeremia scribitur ». Situs ignoratur.

HEM (הֵם) secundum Vulgatam Zach. 6,14 est filius Sophoniae cuiusdam hierosolymitani. Sed est appellativum, ut iam LXX indicant : εἰς γὰρ εἰς. Sensus illius loci est : coronas in templo reponi in memoriam favoris a filio Sophoniae peregrinis et hospitibus praestiti (cf. *Knabenbauer* ad h. l.).

HEMAN, nomen virorum.

1. Heman (הֵמָן, Αἰμάν), filius Lotan filii Seir Horraei (Gen. 36,22). Idem 1 Par. 1,39 scribitur Homam (הֵמָן).

2. Heman (הֵמָן, Αἰμάν) enumeratur inter sapientes, quibus Salomon sapientior praedicatur (3 Reg. 4,31; hebr. 5,11); idem erat ex posteris Zare filii Iuda (1 Par. 2,6; Vulg. Eman; Αἰμουάν, Α Αἰμάν).

3. Heman (הֵמָן, Αἰμάν), filius Ioel ex posteris Caath, cantor qui tempore Davidis coram tabernaculo ministrabat (1 Par. 6,33[18]; 15,17; 16,41; 25,6); enumeratur inter eos, qui in cymbalis aeneis concrepabant (1 Par. 15,19); sed 1 Par. 16,42 nomina Heman et Idithum cum LXX erunt delenda; nam levitae non caneant tuba, sed solum sacerdotes. Erat Heman princeps cantorum, a quorum dextris stabant Asaph eiusque filii cantores et a quorum sinistris Ethan cum cantoribus suis (cf. 1 Par. 6,39. 44; hebr. 24. 29); cantum autem comitabantur instrumentis : prophetabant (i. e. Deo laudes caneant) in cytharis et psalteriis et cymbalis (1 Par. 25,1). Appellatur quoque Heman videns regis (David) in sermonibus Dei i. e. qui vere propheta erat et saepius mandata Dei ad Davidem perfererat. Ei quoque Deus dignitatem auxilii donans ei quattuordecim filios et tres filias (1 Par. 25,4. 5). Cantores nomine ac duce Heman etiam in dedicatione templi Salomonis suo fungebantur ministerio (2 Par. 5,12); ordo cantorum sub nomine filiorum Heman etiam commemoratur tempore Ezechiae regis et Iosiae regis (2 Par. 29,14; 35,15).

HEMATH v. EMATH 1.

HEMOR (הֶמֶר, Ἑμώρ), Hevaeus, princeps urbis Sichem et regionis eius. A filiis eius emit Iacob partem agri, in quo redux e Mesopotamia tabernacula fixerat. Postquam Sichem filius Hemor violavit Dinam filiam Iacob, Hemor rogatus a filio adiit Iacob et filios eius iis proponens, ut Dina filio suo daretur in coniugem et ut connubia iungerentur inter eos et Sichimitas. Verum filii Iacob irati propter iniuriam sororis fraudulentum postularunt, ut ad ineundum foedus assumerent circumcisionem. Consensit Hemor; ipse et filius eius idem aliis quoque persuaserunt; sed tertio die quando gravissimus vulnere dolor est, Simeon et Levi occiderunt Hemor et Sichem (Gen. 33, 19; 34, 1-26). In isto agro ossa Ioseph patriarchae sepulta sunt (Jos. 24, 32). Viri Hemor memoriam diu esse conservatam elucet ex Iud. 9, 28, ubi viri Sichem urbis designantur tamquam viri Hemor (Vulg. Emor) patris Sichem. In oratione Stephani Act. 7, 16 dicitur Abraham emisit agrum a filiis Hemor; de quo textu cf. Knabenbauer ad h. l. et vide s. v. SICHEM 2.

HENADAD (הֶנָּדָד, Ἡναδάδ), caput alicuius familiae levitarum; filii eius simul cum aliis aedificationi templi praefecti erant et operam dabant (Esdr. 3, 9; filius eius Bennui ad moenia extruenda operam contulit (Neh. 3, 24) et enumeratur quoque inter eos qui signatores foederis nominantur (Neh. 10, 9). Alter eius (Vulg. Enadad) filius Bavaï, princeps dimidia partis Ceilae vaci, pariter in aedificandis moenibus occupatus erat (Neh. 3, 18).

HENOCH (הֶנֶךְ, Ἠνώχ). Eo nomine complures viri vocantur, ex quibus celeberrimus est

1. Henoch, filius Jared et pater Mathusalae quem genuit annos 65 natus. Post eius nativatem vixit annos trecentos (Gen. 5, 18 s.; 1 Par. 1, 3; Luc. 3, 37). Insigni encomio eius laudatur pietas: ambulavit cum Deo et non apparuit quia tulit cum Deo (Gen. 5, 24). Cum ad reliquos omnes addatur clausula: et mortuus est, quae deest apud Henoch,

satis indicatur eum non esse mortuum. Id insuper apparet, cum dicatur: quia tulit cum Deus, quae dictio pariter adhibetur 4 Reg. 2, 3. 9. 10 de Elia. Et confirmatur Eccli. 44, 16: Henoch placuit Deo et translatus est (in paradysum, additur in Vulg.) et 49, 16: nemo natus est in terra qualis Henoch; nam et ipse receptus est a terra (ἀνελήθη ἀπὸ τῆς γῆς, dum 44, 16 dicitur sensu eodem καὶ μετετίθη). Clarissime quoque loquitur apostolus: fide Henoch translatus est ne videret mortem et non inveniebatur, quia transtulit eum Deus; ante translationem enim testimonium habuit placuisse Deo (Hebr. 11, 5). Eius traditionis vestigium deprehenditur quoque apud Berosum, qui de Xisuthro scribit eum iam non esse visum, vocem autem ex aëre factam esse dicentem eum propter pietatem ivisse et cum diis habitare, eiusdemque honoris et uxorem eius et filiam et navis gubernatorem participes esse (cf. Richter, Berosi quae supersunt p. 57; F. de Hummelauer in Gen. 5, 24). S. Iudas nos docet quomodo Henoch prophetaverit annuntians iudicium Dei in impios (Iud. v. 14. 15), quae verba ex apocrypho libro Henoch deprompta esse veteres quidem aliqui, uti Tertullianus, Priscillianus, Augustinus, Hieronymus, et recentiores non pauci affirmant; al merito id negatur. Nam verba illa in librum apocryphum potius ex epistula Iudae inserta sunt; carent enim in textu aethiopico apto nexu; illud: iudicium exercet de iis, non habet ad quid ex antecedentibus referatur; insuper non constat librum illum apostolica aetate iam exstitisse (cf. Cornely, Introd. I. n. 76, ed. 2 p. 222). Quare dicendum erit Iudam verba illa ex traditione Iudaeorum orali hausisse (cf. Cornely, Introd. III. p. 637).

2. Filius Cain; Cain aedificavit civitatem quam in honorem filii appellavit Henoch (Gen. 4, 17. 18). Quandam Cain urbem aedificaverit, cur non suum, sed filii nomen ei imposuerit, ubinam Babylonii urbem Henoch exstitisse reputaverint, vide apud F. de Hummelauer, Comm. in Gen. p. 187-9.

3. Nepos quidam Abrahami, filius Madian (Gen. 25, 4; 1 Par. 1, 33).

4. Filius Ruben primogenitus, uti videtur, cum ubique primo inter filios loco recenseatur (Gen. 46,9; Ex. 6,14; 1 Par. 5,3), a quo familia descendit Henochitarum (Num. 26,5).

HENOS v. ENOS.

HEPHER (הֶפֶר, Ὁζέρ). 1. Unus ex posteris Manasse, filius Galaad et pater Salphaad, progenitor Hephheritarum (Num. 26,32. 33; 27,1; Jos. 17,2. 3).

2. Unus ex filiis Assur et Naarae in genealogia Iuda 1 Par. 4,6 (LXX Ἡζάλ).

3. Unus ex heroibus davidicis, qui cognominatur Mecherathites (1 Par. 11,36; LXX Θερσαζάρ per fusionem duorum nominum) et cuius nomen loco parallelo 2 Reg. 23,34 excidit (v. AASBAI).

HER (הֵר, Ἡρ). 1. Filius primogenitus Iuda patriarchae ex filia hominis Chananaei Sue, matrimonio iunctus cum Thamar, sed nequam in conspectu Domini, quapropter a Domino occisus est (Gen. 38,3-7; 1 Par. 2,3); mortem obiit in terra Chanaan, antequam Israel in Aegyptum descenderet (Gen. 46,12; Num. 26,19). Quae eius nequitia fuerit, non indicatur, sed fortasse colligi potest ex eo, quod matrem chananaeam habuit; Chananaei enim abominationibus idololatriae dediti erant.

2. Heri vel Her (הֵרִי, Ἀγδής, Ἀδδής), filius Gad, progenitor Heritarum (Gen. 46,16; Num. 26,16).

3. Filius Sela filii Iuda (1 Par. 4,21).

4. Her, qui fuit Iesu in genealogia Christi (Luc. 3,28).

HERACLITUS (Ἡρακλεῖτος), philosophus graecus, Epheso oriundus, circa annum 500 a. Chr. ad quem refertur locutio proverbialis 2 Petr. 2,22 ὁ λουσαμένης εἰς κύλισμα βορβόρου.

Cf. P. Wendland, Ein Wort des Heraclit im Neuen Testament [Sitzungsber. d. Akad. der Wissenschaften zu Berlin 1898 p. 788-796]; G. A. Mullach, Philosophorum Graecorum Fragmenta, ed. Firmin-Didot I. 310 ss.

HERAN (הֵרָן, Ἡράν), filius Suthala filii Ephraim, progenitor familiae Heranitarum (Num. 26,36). Eius nomen in genealogiis Ephraim 1 Par. 7,20 s. desideratur.

HERBAE. 1. Herba vel herbae in Vulgata variis nominibus hebraicis et graecis respondent: אֵרֶב, בּוֹל, דָּשָׁא, עֵשֶׂב, גִּוָּה, בּוֹרְעָה, יֶרֶק, וְבוֹל, הָעֵיִר, chald. עֵשֶׂב; βοτάνη, γόρτος; quae sensu

generaliore varias herbas agrestes et proventus terrae designant neque hic pluribus exponenda sunt.

2. Secundum extrinsecam inter arbores herbasque distinctionem, in S. Scriptura saepius indicatam (Gen. 1,11 s. 29; Ex. 9,25; 10,15 etc.), brevem herbarum biblicarum conspectum addimus iuxta modum, quo arbores fruticesque supra recensuimus (v. ARBORES).

Allium שֵׁשִׁים.

Anethum ἀνηθον.

Arundo קָנָה; ἀλάμος.

Borith בּוֹרִית.

Caepe בַּעַל.

Calamus קָנָה; ἀλάμος.

Carectum אָחִי; סוֹר.

Cicer קֶלִי.

Circulus אֶגְבוֹן Is. 58,5; v. ARUNDO.

Colocynthides כִּקְלֵת.

Coriandrum גַּד.

Crocus כְּרוֹס.

Cucumeres קִשְׁאִים.

Cyminum כַּמְוִן; κύμινον.

Faba פֹּאֵל.

Far פֶּרֶשׁ כֶּרֶסֶל; פֶּרֶשׁ Lev. 2,14. 16;

כַּפְמֹת.

Fervens אֶגְבוֹן Job 41,20; v. ARUNDO.

Fistula קָנָה.

Foenum הָעֵיִר; בִּקְפֹּא; עֵשֶׂב.

chald. עֵשֶׂב; μᾶτιον Eccl. 14,18 gr. 17; γόρτος.

Fruentum אֶבֶל (בֵּר); דָּגָן; הָעֵיִר.

שֶׁבֶר; כֶּרֶסֶל; הַנְּטוּן. chald. הַנְּטוּן; εἰσιτισμός; σιτία; σῖτος.

Fucus φῦκος.

Galbanus הָלְבָנָה; γαλβάνη.

Gramen עֵשֶׂב; וְרֶק.

Herba fullonum מְבַבְּסִים בְּרִית Mal.

3,2; v. BORITH.

Herbae מְלִיחַה Iob 30,4.

Hordeum שְׁעֵרָה; שְׁעֵרִים; ζεῖθος.

Iuncus סִיף; גִּמְא.

Lactuae מְלֹרִים.

Legumina זֶלְעִים, זֶלְעִנִים.

Lens עֵדֶשִׁים.

Lilium שִׁשְׁשׁ, שִׁשְׁשׁ; פֶּרֶחַ; חֲבַצְלֵת, שִׁשְׁשָׁה; λελύον.

Linum מְשִׁתָּה, מְשִׁתָּה; מְשִׁתָּה; מְשִׁתָּה; λίνον; ὠμόλινον; lineus מְשִׁתָּה; תְּשִׁבֵּץ.

Ex. 28,4.

Mandragorae דּוֹדָאִים.

Mentha ῥέσσημον.

Migma מְלִיל.

Milium מְסִיחָה; דִּחָן.

Mundissimae מְרִיבָה Iob 9,30; v. BORITH.

Nardus מְרִיבָה; מְרִיבָה; νάρδος.

Olus מְרִיבָה; מְרִיבָה; λάχανον.

Papyrio סִיף.

Papyrus גִּמְא.

Pelagus סִיף.

Pepones אֲבִטְחִים.

Porrus מְרִיבָה.

Purum מְרִיבָה Is. 1,25; v. BORITH.

Refrenans מְרִיבָה Is. 9,13; 19,15; v.

ARUNDO.

Rula מְרִיבָה.

Scirpus גִּמְא.

Triticum מְרִיבָה; מְרִיבָה; (בר) גִּדִּישׁ (acervus tritici); מְרִיבָה; מְרִיבָה; מְרִיבָה; σῖτος.

Vicia מְרִיבָה; מְרִיבָה.

Zizania ζιζάνια.

Auctores de herbis biblicis tractantes v. in art. PLANTAE.

3. Herbae sensu magis particulari explicantur in Vulgata hebr. מְלִיחַה, quae in libro Iob cibus hominum miserrimorum dicuntur (Iob 30,4); pro eo quod

Vulgata habet « mandebant herbas et arborum cortices », ex textu primigenio proprie vertendum foret « carpentes in frutetis » (עֲלִירִשִׁית). Cum LXX interpretes plerique ἀλιμα exponunt, herbas scil. salsas (מְלִיחַה, ἀλς); ex ordine *Salsolacearum* seu *Chenopodiacearum*, quarum caules teneriores ac folia a pauperibus in salatae modum manducantur (cf. *Theophr.* Hist. pl. IV. 16,5; Caus. pl. V. 13,4; VI. 10,5; *Dioscur.* Mat. med. 1,120; *Antiphones* ap. *Athen.* 4 p. 161, al.). Ex variis speciebus, quae ita in cibum adhibentur, in Oriente praesertim inveniuntur *Chenopodium album* Linné et *Atriplex halimus* L., illa quidem ubique, sicut in nostris regionibus, communissima, haec vero in litore maris Mediterranei et circa mare Mortuum haud rara, atque etiam in Coele-syria reperta (*Boissier, Post.*). Praeter caules et folia autem nostra aetate maxime etiam semina variarum specierum *Chenopodii*, et praesertim tempore famis, in Russia cibum pauperum suppeditant, atque in America meridionali (Chile, Bolivia, Peru etc.) propter hunc seminum usum *Chenopodium Quinoa* Linné, *Chenopodio* albo simillimum, ubique colitur et vel tritico aequiparatur. Eundem vero usum *Chenopodii* albi etiam antiquis notissimum fuisse, ex maxima copia seminum huius speciei concludere licet, quae in constructionibus sublimiciis helveticis inventa est atque ad panes conficiendos inserviebat. Quare verba Iob vel de caulibus ac foliis, vel de seminibus *Chenopodii* albi vel similis speciei satis probabiliter explicantur.

Cf. *E. Boissier*, Flora orient. IV. 901 916; *Leunis-Frank*, Synopsis II. 2 ed. 3 p. 300. 307; *A. de Candolle*, Origine des Plantes cult. 282; *Rud. Virchow* in Verhandl. d. Ges. f. Anthropol. 1892, 56-8; *Buschan* ib. 1893, 228, qui citat *R. Forrer* et *H. Messikommer*, Praehistorische Varia (1889) p. 9; *R. A. Philippi* ib. 552 s.; *K. Halpern*, Die Bestandtheile d. Samens d. Ackermelde, *Chenopodium album*, etc., Halle 1893; *G. E. Post*, Flora of Syria 678. 683.

Explicatio data ceteris videtur probabilior, quae *malvam* (μαλάχη) vel *Corchorum*

olitorum L. vel « *sapida* » vel « *ex rupibus* » (בִּלְרִית) vel alia exponunt; de quibus v. plura ap. *Sam. Bochart*, *Hieroz.* I. 872-7, *ed. Rosenm.* II. 223-9; *I. H. Ursinus*, *Arboret. bibl.* 336 s.; *M. Hiller*, *Hierophyt.* I. 457-9; *O. Celsius*, *Hierobotan.* II. 96 s.; *I. D. Michaelis*, *Supplem. ad lex. hebr.* p. 1422 s. 1509-12; *Sam. Oedmann*, *Verw. Samml.* 3,91-4; *E. F. K. Rosenmüller*, *Comment. in Iob* 30,4; *id.* *Handb. d. bibl. Alterth.* IV. 1,114 s.; *H. B. Tristram*, *Nat. Hist. of the Bible ed.* 8. 465 s.; *F. Hamilton*, *Botanique de la Bible* 172; *J. Smith*, *Hist. of Bible Plants* 73-6; *I. Knabenbauer*, *Comment. in Iob* 30,4.

L. FONCK.

HERCULES (Ἡρακλῆς), deus praecipuus Tyrionum, a Tyriis vocatus *Melgart* i. e. rex urbis (בִּלְךְ קֶרֶת) vel Baal Tyri i. e. dominus (conditor) Tyri, in cuius honorem quinto quoque anno agones Tyri celebrabantur. Cum Antiochus IV. Epiphanes quinquennali agoni ipse adesset, Iason impius Iudaeorum pontifex (circa 174-171 a. Chr.) Tyrum misit spectatores a Ierusalem, qui Antiochenses erant (Θεωροὶ ἀπὸ Ἱερουσαλὴμ πρὸς Ἀντιοχεῖς ὄντας i. e. incolas Ierusalem civitate Antiochensium donatos), qui agonibus interesset et trecentis argenti didrachmas in sacrificium Herculis offerrent; sed ipsis legatis, quos tanti sceleris puduit, precantibus haec pecunia non in sacrificium Herculis, sed in fabricam navium triremium erogata est (2 Mach. 4,18-20; Vulgata non legit *spectatores*, sed peccatores et omittit Ἀντιοχεῖς ὄντας). Ex scriptoribus profanis discimus a coloniis Tyrionum v. g. a Carthaginiensibus legatos Tyrum mitti solitos esse, qui magnis festivitibus spectatores interessent et in honorem Herculis dona offerrent.

Cf. *P. Scholz*, *Goetzendienst und Zauberberwesen* 1877 p. 197 ss. (§ 19); *Movers*, *Die Phoenizier* I. 385 ss.; *V. Bernard*, *De l'origine des cultes accadiens*, Paris 1894 p. 253 ss.

HERED (Num. 26,40) idem atque Addar (vide s. v.).

HERED urbs v. ARAD.

HEREDITAS, HERES. Solum filii ex uxoribus liberis nati heredes bonorum

paternorum esse poterant. Id iam ex historia Abraham colligitur; Sara enim dicit de Ismael: non erit heres filius ancillae cum filio meo (Gen. 21,10); Isaac est heres (Gen. 24,36; 25,5); filius autem concubinarum largitus est Abraham munera (Gen. 25,6). Similiter filii legitimi Galaad dicunt ad Iephthe: heres in domo patris nostri esse non poteris, quia de altera matre natus es (Iud. 11,2; erat quippe Iephthe filius mulieris meretricis). Filii quidem Iacob omnes videntur habili esse pares; nam tribus secundum eorum nomina designatae non inter se gradu quodam dignitatis distinguebantur. Sed ratio esse potest quod uxores eius liberae, Rachel et Lia, ipsae marito suo famulas suas tradiderunt uxores (Gen. 30,3. 9), ut filii famularum censerentur quasi filii uxorum, sicut Rachel dicit: ut habeam ex illa filios. Inter filios heredes primogenitus ampliore accipiebat partem, scil. duplicem eius quae aliis contingebat; atque lege provisum erat, ne filius primogenitus uxoris minus dilectae sua duplici parte privaretur in utilitatem filii uxoris dilectae (Deut. 21,15-17). Sed primogenitus propter crimen patratum suo iure excidere potuit; ita v. g. Ruben amisit primogenitum (1 Par. 5,1); Esau illa vendidit, quae utique postea recuperare desideravit: at frustra; qua in re tamen peculiaris Dei ordinatio intervenit (cf. Gen. 25,23. 31; 27,34; Rom. 9,10-15). Quo ordine hereditas, si filii non adessent, ad propinquos devolvenda sit, exponitur Num. 27,8-11; et primo quidem heres est filia; ea deficiente succedunt fratres patris, qui si non adsunt, succedunt patri. Filiae itaque tum solum heredes scribuntur, si pater non filios reliquerit; quae filiae heredes iubentur nubere viris suae tribus et cognationis, ne commisceatur possessio filiorum Israel de tribu in tribum (Num. 27,1 ss.; 36,6-12; Ios. 17,3). Verum poterant accipere munera a patre, cum darentur in matrimonium (cf. Ios. 15,18 s.); immo filiabus Iob data est a patre hereditas inter fratres suos (Iob 42,15). Quare videtur patribus relicta esse libertas quaedam de bonis ac possessione disponendi; id quod etiam innui videtur

dictione illa : dispone domui tuae (Is. 38,4; cf. 2 Reg. 17,23). In libris Veteris Testamenti non fit mentio testamenti scripti; verum quae quis post mortem suam fieri vult, filio mandat (cf. 3 Reg. 2,1 s.); in novo foedere testamenta scripta nota esse indicatur (Hebr. 9,17; cf. Gal. 3,15). Si quis absque liberis mortuus fuit, tamen non statim fratres eius in hereditatem succedebant; sed quando spes erat fore ut uxor mortui posset parere, frater mortui eam debuit ducere, ut suscitaret mortui semen et heredem, quae est lex leviratus (Deut. 25,5; cf. Matth. 22,24; Marc. 12,19; Luc. 20,8).

Porro terra quam Deus populo suo tradid appellatur quoque hereditas; item pars illa regionis quae alicui tribui contigit; cf. Lev. 20,24; Num. 32,18; 33,54; Deut. 3,18 etc., quibus in locis hereditas, uti re ipsa patet et ex hebr. consequitur, notione possessionis usurpatur. Eadem notione populus quoque Israel et terra Chanaan dicitur hereditas i. e. possessio, proprietates Domini Deut. 4,20; 9,26. 29; 1 Reg. 26,19; 2 Reg. 20,19 etc. Atque ipse quoque Dominus, utpote bonorum omnium largitor, dicitur pars et hereditas suorum. Ita imprimis ratione habita sacerdotum et levitarum : dixit Dominus ad Aaron : in terra eorum (filiorum Israel) nihil possidebitis nec habebitis partem inter eos; ego pars et hereditas tua in medio filiorum Israel (Num. 18,20) et : Dominus ipse est hereditas eorum (Deut. 18,2); similiter : sacerdotium Domini est eorum hereditas (Is. 18,7). Dein etiam eodem nomine vocatur a piis Israelitis : Dominus pars hereditatis meae (Ps. 13,5). Inde consequitur quod filii Dei etiam appellantur heredes Dei : si autem filii et heredes, heredes quidem Dei, coheredes autem Christi (Rom. 8,17; Gal. 4,7) et Christus ideo mortem dicitur deglutivisse, ut vitae aeternae heredes efficeremur (1 Petr. 3,22). Eodem modo bona caelestia, gloria aeterna dicitur hereditas; ita hereditas salutis, aeterna hereditas, divitiae gloriae hereditatis, hereditas incorruptibilis (Eph. 1,18; Hebr. 1,14; 9,15; 1 Petr. 1,4). Et quod in Vulgata dicitur Matth. 5,4 : beati mites,

quoniam ipsi possidebunt terram, graece aptius *ἀλλήλωνομήσουσιν*, hereditabunt (regnum scil. messianum, cuius pignus erat terra Chanaan; cf. Ps. 36,9. 11. 22. 29; Is. 57,13; 65,9).

I. KNABENBAUER.

HEREDITAS GETH vide s. v. MORASTHITES.

HEREM (Esdr. 10,31; Neh. 3,11) v. HARIM 2.

HERES ascensus (מַעְלָה הָהָרִים) ad orientem Iordanis haud procul a Soccoth (Iud. 8,13). Vulgata vertit מַלְכֵי־עֵלָה ante solis ortum, LXX ἀπὸ ἐπάνωθεν [τῆς παρατάξεως] Ἀρές, A ἀπὸ ἀναδάσεως Ἀρές, Aquila ἀπὸ ἀναδάσεως τοῦ ὄρους, Symmachus ἀπὸ ἀναδάσεως τῶν ὄρων, Theodotion ἀπὸ ἀναδάσεως Ἀρές (? ὄρους).

HERI (Gen. 46,16) v. HER 2.

HERINACEUS (melius erinaceus, al. irenaceus) dicitur in Ps. 103[104], 18 hebr. חֶרְשֵׁן, quod alibi choerogryllus (v. s. v.) explicatur.

HERMA urbs v. HORMA 1.

HERMAS (Ἑρμᾶς) christianus Romae degens, quem S. Paulus salutatur Rom. 16,14; eius nomen originem graecam innuit. Hunc aliqui Patres (S. Irenaeus, Tertull., Origenes) putaverunt esse auctorem libri *Pastor Hermae*, de cuius canonicitate gravis quaestio agebatur exeunte saeculo secundo, sed teste Fragmento Muratoriano (lin. 73-77) *Pastor* conscriptus est Romae ab Herma fratre Pii I. Summi Pontificis, qui circa a. 150 p. Chr. cathedram romanam occupabat et hanc sententiam multi recentiores amplectuntur aliis contradicentibus. Sed haec quaestio historiae ecclesiasticae relinquenda est. Hermas a S. Paulo salutatus in Martyrologio romano Sanctis accensetur die 9. Maii.

HERMES (Ἑρμῆς) christianus in eodem versu cum Herma a S. Paulo salutatus (Rom. 16,14). Addit *Calmetus*, Diction. : « e 72 discipulorum numero et Dalmatiae episcopus, si Graecis credamus ».

HERMOGENES (Ἑρμογένης), christianus ex Asia minore, de quo S. Paulus

ex captivitate romana scribit : Aversi sunt a me omnes, qui in Asia sunt, ex quibus est Phigelus et Hermogenes (2 Tim. 1,15).

HERMON (הַרְמוֹן, Ἀρμὼν). Etymon a *Gesenio* explicatur prominens montis vertex ex arab. *khurmuu*. Aliud etymon a devovendo legitur apud S. Hilarium in Ps. 133 : « Hermon mons... cuius interpretatio Anathema est... Fertur autem id, de quo etiam nescio cuius liber exstat (scil. liber Henoch 6), quod Angeli concupiscentes filias hominum, cum de caelo descenderent, in hunc montem maxime excelsum convenerint ». — In Vet. Testamento Hermon mons constituitur terminus septentrionalis Palaestinae transiordanicae longe lateque conspicuus (Deut. 3,8; 4,48; Ios. 11,17; 12,1; 13,5; 1 Par. 5,23), ita quidem ut ipse Hermon comprehendatur intra fines Og regis Basan (Ios. 12,4) et etiam intra fines Israelitarum seu dimidia tribus Manasse (Ios. 13,11). Ad radices montis Hermon Ilevaeos habitasse docemur Ios. 11,3. De quibusdam locis modo citatis v. BAALGAD et BAAL HERMON. — Aliis nominibus Hermon vocatur Deut. 3,9 apud Sidonios Sarion (שָׂרִיִן, Σαρῖον), apud Amorrhaeos Sanir (שָׁנִיר, Σανίρ); utrumque etymon explicandum videtur *thorax*, *lorica* a montis similitudine cum thorace vel lorica (*Gesenius*). Tertium nomen adiicitur Deut. 4,48 : Sion (צִיּוֹן i. e. elatus, Σιών), quod cum Sion (צִיּוֹן) hierosolymitano nihil commune habet. Nomen שָׁרִיִן etiam legitur Ps. 29,6 hebr. : Et saltare fecit eos sicut vitulum Libanum et Shirion sicut filium unicornium (aliter Vulgate et LXX). Utrum assyriacum *Sirara* (cf. *Schrader*) sit mons Hermon necne, dubitari potest. Aliud nomen Sanir legitur Ez. 27,5 et praeterea etiam iuxta nomen Hermon ab eoque distinctum 1 Par. 5,23 et Cant. 4,8; est igitur Sanir pars Antilibani eaque septentrionalis, quam Arabes (*Abulfeda*, Tab. Syriac ed. Köhler p. 164) *Sanir* appellant, a septentrione Damasci sita inter Heliopolim (*Ba'albek*) et Emesam (*Höms*). Apud Assyrios *Sanir* legitur *Saniru* et designatur vertex

in introitu Libani (*Delitzsch, Schrader*).

Hermon hodie vocatur *Djebel el-Sheikh* i. e. mons aetate proveci seu albis capillis ornati, alio nomine *Djebel el-Teldj* i. e. mons nivis. Ab Antilibano per profundam vallem *Wādi el-Qarn* separatur et inde per septem fere horas meridiem et nonnihil occidentem versus protenditur. Culmen tres vertices distinctos habet quorum septentrionalis et meridionalis circa 500 passibus inter se distant et fere 2800 m supra mare ascendant; occidentalis vertex aliis duobus circa 30 m inferior est. Hieme Hermon multa nive tegitur, quae aestate quoque in faucibus reconditis conservatur; teste S. Hieronymo (*Onom. ed. Lag. 90,14*) aestivae nives de monte Hermon Tyrum ob delicias deferri solebant et Israelitas iisdem refrigeriis fruitos esse innuitur Prov. 23,13 : sicut frigus nivis in die messis, ita legatus fidelis etc. A monte Hermon descendunt aquae Iordanis et Pharphar (*Nahr el-A'wadj*). Celebratur quoque Ps. 132[133],3 ros Hermon, cuius iucunditate illustrat Psalmista, quam iucundum sit habitare fratres in unum. Ex multis et variis arboribus, quae hodie Hermonem contegunt (ut quercus, amygdalus, prunus, cerasus, pirus, iuniperus excelsa et quae rarior est, iuniperus drupacea praeter virgulta plurima), in S. Scriptura nominatur sola cypressus de Sanir, quae a Tyriis navium tabulatis adhibebatur (Ez. 27,5); Sapientia quoque Eccli. 24,17[13] describitur exaltata quasi cypressus in monte Sion (ἐν ὄρει τῷ Ἀρμὼν). Leones et pardi cubilia habebant in Sanir et Hermon (Cant. 4,8); leones quidem disparuerunt, sed inveniuntur pardus, ursus syriacus, lupus, vulpes aliaeque ferae. In Ps. 88 [89],13 Thabor (in terra cisiordanica) et Hermon (in terra transiordanica) cum aquilone et meridie associantur, ut enarrent gloriam Creatoris.

Ruinæ, quae in vertice meridionali cernuntur, vestigia sunt templorum Baal, quibus mons et tota circum regio abundabant. Huc spectat quod Eusebius (*Onom. ed. Lag. 217,49*) auditu comperitum refert Hermonem ab ethnicis sacrum haberi; hunc Eusebii locum reddit S. Hieronymus (l. c. 90,21) : « Dicitur

esse in vertice eius insigne templum, quod ab ethnicis cultui habetur, e regione Paneadis et Libani ». Ad hunc cultum falsorum numinum respicere videtur S. Hilarius in Ps. 133 : « Certe hodie gentes montem hunc profana religione venerantur et interpretationem nominis sui, quod est Anathema, ipsa illa impiae superstitionis sede testantur ».

Prospectus a vertice Hermon latissime patet; orientem versus complectitur planitiem Damasci et magnam partem Syriae, meridiem versus extenditur usque ad *Djebel Haurān* et montana Moab, magnifico circuitu fertur super lacum Tiberiadis, Samāriam, Galilaeam usque ad Carmelum, attingit oram maritimam a Carmelo Tyrum usque, conquiescit in Libano, Coele Syria, Antilibano.

A monte Hermon, cuius mentio est in S. Scriptura, distinguendus est Hermon minor, hodie *Djebel Dahi* (c. 560 m) inter montes Gelboe et Thabor. Nomen *Hermon minor* ex multorum opinione originem debet falsae interpretationi Ps. 88[89], 13, quo loco Thabor et Hermon una nominantur et mons alter in vicinia Thaboris quaerendus videbatur.

Cf. *Gesenius*, Thesaurus ling. hebr. s. v.; *Reland*, Palaestina I. p. 322-326; *Schrader-Whitehouse*, Cuneif. Inscript. and Old Test. I. p. 146. 173; *Delitzsch*, Paradies p. 104; *V. Guérin*, Galilée II. 290-295; *D. Zanecchia*, La Palestine d'aujourd'hui 1899, II. 740. 741; *F. Buhl*, Alt. Pal. 1896 p. 110 s.; *Merrill*, East of Jordan p. 431; *Neubauer*, Géogr. du Talmud p. 39; *Baedeker-Benzinger*, Pal. u. Syrien ed. 5 p. 323 ss.; *J. Döllner*, Geogr. u. ethnogr. Studien z. III. u. IV. Buche d. Könige 1904 p. 117.

HERMONIIM (הַרְמוֹנִים, Ἡρμονίαι)

Ps. 41[42], 7 est forma pluralis vocis הַרְמוֹן significans montana Hermon.

HERODES (Ἡρώδης; in inscriptionibus reperitur Ἡρώδης et Etymologicum magnum habet sub eo nomine Ἡρῶδης, quam scribendi rationem adoptarunt *Lobeck*, *Westcott* et *Hort* : Ἡρώδης; cf. *Schürer* Geschichte des jüdischen Volkes ed. 3 I. p. 375; *Gregory*, Prolegomena p. 109; nomen quippe contractum est ex Ἡρώδης. Verum iota

subscriptum in codicibus uncialibus non habetur, sicuti etiam in inscriptionibus iunioribus et in nummis non reperitur, in quibus itaque constanter scribitur Ἡρώδης). In Novo Testamento quattuor viri eius nominis commemorantur : Herodes qui dicitur Magnus, Herodes Antipas, Herodes Agrippa I., Herodes Agrippa II., de quibus itaque ea tractanda sunt, quae ad res in sacris libris narratas spectant. De Herode Philippo v. PHILIPPUS 7.

I. **Herodes Magnus**, filius Antipatri Idumaei, postulantibus Antonio et Octaviano a senatu romano rex Palaestinae nominatus est circa finem anni 40 a. Chr. Adiutus a Romanis anno 37 expugnavit Ierusalem et occiso Antigono adversario regnum capessivit. Exorto inter Antonium et Octavianum bello stetit a partibus Antonii. Antonio in pugna ad Actium devicto Herodes Rhodum navigavit et Octavianum Caesarem adiit sine diademate veste et cultu privato; verum qua erat prudentia ita sibi Octavianum conciliavit, ut Octavianus ei diadema imponeret et postea etiam regno eius adderet regionem fertilem circa Iericho (quam scil. antea debuerat Cleopatrae cedere) et Gadara et Hippon et Samariam et Gazam et Anthedona et Ioppen et Stratonis turrim (cf. *Flav. Ios. Bell. iud.* I. 20, 1-3; *Ant.* XV. 6, 7). Ex eo tempore Herodes iam non potest censi rex socius, sed rex restitutus, qui regnum suum debuit gratiae et amicitiae Caesaris. Omnes enim reges qui Antonium adinverant, si iis regna reddebantur, ab Augusto in ordinem regum restitutorum redigebantur (cf. *Suetonius*, Octav. 48). Erat igitur rex titulo amici Caesaris et quidquid possidebat ex sola gratia Caesaris possidebat. Eiusmodi reges amici, vel, uti quoque appellabantur, socii non aequo foedere, generatim censebantur procuratores Caesaris, vocantur apud Strabonem ὑπάρχοντες, inservientes apud Tacitum, in fide et clientela apud Sallustium (cf. *Aberle*, Theolog. Quartalschrift 1874 p. 668). Quae res attendenda est; inde enim patet omnino falsum esse quod aliqui contendunt descriptionem ab Augusto imperatam (Luc. 2, 1) non potuisse extendi ad Palaestinam quippe

quae Herodi regi socio esset attributa (*Schürer* l. c. p. 523, 526). Verum in quantum Herodes subiectus fuerit nutui et arbitrio Caesaris, ex aliis quoque salis elucet: debebant Iudaei iurare se Caesaris rebus fautores esse (*Ant.* XVII. 2,4); non inveniuntur nummi ab Herode cusi nisi aerei, uti *Schürer* l. c. p. 403 concedit; iam vero si ei non concedebatur ius cudendi nummos aureos et argenteos, documento est eum fuisse Caesaris subiectum; porro sine venia Caesaris ei non licuit bellum gerere, neque in filios rebelles animadvertere; debuit tributum solvere; testamentum eius debuit auctoritate Caesaris confirmari; insuper si teste Philone (legat. ad Cai. 36. 40) sacrificium quotidianum pro Augusto in templo offerebatur, eo ipso profitebantur Iudaei se esse Augusto subiectos (cf. *Esdr.* 6,10; *Bell. iud.* II. 17,2; *Wieseler*, *Beiträge* p. 92; *Knabenbauer*, *Comment.* in *Lucam* p. 108 ss.).

Cum ad eum venissent magi ab oriente dicentes: ubi est qui natus est rex Iudaeorum? turbatus est et omnis Ierosolyma cum ipso (*Matth.* 2,2. 3). Quae narratio plane congruit eius moribus. Neque enim erat inscius suam dominandi rationem multis esse exosam. Quare ab initio regni cadibus in adversarios saevire non cessabat. Ita urbe politus quadraginta quinque viros nobiles ex iis qui a partibus Antigoni steterant interfecit; mox Aristobulum, fratrem Mariammes uxoris suae, in balneo extinguendum curavit, dein Hyrcanum II., immo etiam uxorem Mariammem interemit et Alexandram, Hyrcani filiam, et filios Babae et Costobarum; ultimis quoque vitae annis saeviebat in eos quos sibi insidias sternere suspicabatur; ita filios suos Alexandrum, Aristobulum, Antipatrum perimi iussit (*Flav. Ios. Ant.* XV. 1,2; 3,3; 6,3; 7,4-6. 8; 7,10; XVI. 11,2-7; XVII. 7); pariter occidit multos pharisaeos qui fore praedixerunt ut ipse et eius progenies decreto Dei imperium amitterent aliosque ex sua familia qui cum iis consenserant (l. c. XVII. 2,4). Qui igitur tot caedes commisit, suspicione inductus ne quis sibi thronum eriperet, is profecto etiam eo modo egisse censendus est quo apud

Matthaeum narratur. Simulatione usus a magis postulat, ut sibi puerum regem quem reperissent indicarent. Tum quo certius eum perimeret, omnes pueros a bimatu et infra (secundum tempus stellae a magis visae) in Bethlehem et regione circumiacente occidi iussit (*Matth.* 2,8-16). De hac puerorum caede Iosephus quidem nihil refert; verum eius silentium facile explicatur. Nam ea quae ad Christum spectant generatim silentio premit; dein inter ceteras regis crudelitates haec caedes paucorum infantium non tanti aestimari potest, ut eius memoria debuerit ceteris rebus gestis inseri; insuper ultimo Herodis tempore tot saevitiae eius et furoris insani documenta edita sunt, ut eius rei memoria maioribus illis facinoribus deleta esse videatur (cf. *Knabenbauer*, *Comment.* in *Matth.* ed. 2 t. p. 113).

II. **Herodes Antipas**, filius Herodis Magni et Malthace, cum regnum Herodis patris divideretur, titulo tetrarchae accepit Galilaeam et Peraeam. Duxerat uxorem filiam Aretae regis Arabum; verum captus amore Herodias, uxoris fratris sui Philippi, filii Herodis ex Mariammis filia Simonis pontificis, filiam Aretae eiecit et Herodiam incestis nuptiis sibi copulavit. De quo scelere a Ioanne Baptista reprehensus Herodes eum leniit et posuit in carcere in arce Machaerunte (cf. *Flav. Ios. Ant.* XVIII. 5,1. 2). Mortem Baptistae Herodias postulabat; diutius resistebat Herodes, partim timens populum, qui Ioanni ut prophetae adhaerebat, partim sciens eum virum sanctum quadam eius reverentia et timore retinebatur, ne mulieris odio eadem concederet, immo libenter Ioannem audiebat eiusque monitis de multis quae fecerat reddebatur anxius (ἡρόρει, *Marc.* 6,20; cf. *Matth.* 14,3). Sed odium et astutia muliebris exploravit opportunitatem qua induceretur licet reluctans, ut censorem molestum interimeret; de qua occasione narrat *Matth.* 14,6 et *Marc.* 6,21. Herodes vino et voluptate temulentus insanam dedit puellae saltatrici promissionem: quicquid petieris, licet dimidium regni mei etc., eamque iuramento firmavit et falso pudore ductus ne verbum retractare videretur,

impiae postulationi mulieris acquievit.

Quomodo de eo facinore conscientiae stimulis ageretur, plane apparuit cum audiens de Iesu miraculis existimaret Ioannem a mortuis resurrexisse (Matth. 14, 2; Marc. 6, 14; Luc. 9, 7); aulicis autem varia de illo miraculorum patratore indicantibus querebat Iesum videre (Luc. 9, 9), neque tamen vidit; immo mox Iesum quoque interimere voluisse videtur; Iesus enim pharisaeis id affirmantibus respondit: dicite vulpi illi etc. (Luc. 13, 32). Iesum tandem vidit, cum Pilatus Iesum captivum ad eum mitteret, ut de Galilaeo princeps Galilaeae sententiam ferret; at quia Iesus multis eius interrogationibus ne unum quidem verbum reposuit, eum sprexit cum aulicis et illis indutum veste alba et remisit ad Pilatum (Luc. 23, 11). Ut cedens postulationi Herodiadis sanguine Ioannis fuso crimine se maculavit, ita eiusdem mulieris importunitate exitium ei paratum est. Nam illius ambitione inductus ab Imperatore Caligula titulum sibi regium expetiit; sed accusatus apud Imperatorem damnatus est perpetuo exsilio, Lugduno Galliae oppido ei ad habitandum assignato (cf. *Flav. Ios. Ant.* XVIII 7, 2). Vide s. v. HERODIAS.

III. **Herodes Agrippa** I. filius Aristobuli et Berenices (filiae Costobari et Salomes, *Ant.* XVIII. 5, 4) et nepos Herodis Magni, Romae educatus convictore quotidiano et familiari usus est Druso, Tiberii Imperatoris filio. Mortua matre Berenice facultates suas partim luxuriose vivendo prodegit partim immodica largitione profudit; ad inopiam redactus Roma decessit. Ope Herodiadis sororis suae ab Herode Antipa aliquid nactus est subsidii; inimicitias autem cum eo exortis se contulit Antiochiam ad Flaccum, qui tunc Syriam administrabat. Mox repetit iter romanum, propter plurimum aes alienum a creditoribus vexatus. Ab Imperatore Tiberio in secessu Capreaeum benigne susceptus familiaritatem iniit cum Caio Caligula et apud eum plurimum in gratia profecit; quare sperans fore ut a Caligula divitiis et beneficiis invareretur dixit se Deum precari ut Tiberius Caio omnino digniori quam primum imperio cederet. Id quod Tibe-

rio nuntiatum est, qui Agrippam vinciri et in carcerem detrudi iussit. Verum post sex menses Tiberius obiit et Caligula Agrippam non solum vinculis solvit, sed etiam tetrarchiam Philippi et Lysaniae et titulum regium ei contulit et pro catena ferrea ei auream eiusdem ponderis donavit. Et cum Antipas a Caligula esset exsilio multatus, Agrippa tetrarchiam eius pariter accepit circa annum 40 p. Chr. (cf. *Ant.* XVIII. 6, 1 s.).

Agrippa qui eousque vitam satis dissolutam degerat, cum rex Hierosolyma pervenisset, victimas pro gratiarum actione immolavit, ita ut nihil lege praescriptum omiserit, unde et multos nasiracos tonderi praecepit et illamcatenam auream intra conseptum templi supra gazophylacium suspendit, ut documento esset Deum solere ea quae ceciderant erigere (*Ant.* XIX. 6, 1) et se legis observantem exhibuit; « libenter et assidue Hierosolymis degebat et patriorum institutorum custos erat religiosus adeoque se ipsum in omnibus mundum servabat neque diem unquam unum intermittebat quin sacrificium ex lege offerret » (l. c. 7, 3). Hac ostentatione pietatis Iudaeorum animos qui Idumaei imperium aegre ferebant sibi conciliare ac devincire studuit. Eadem ratione Christianos persequi et vexare coepit; nam Act. 12, 1 misit Herodes rex manus, ut affligeret quosdam de ecclesia; occidit autem Iacobum fratrem Ioannis gladio; videns autem quia placeret Iudaeis, apposuit ut apprehenderet et Petrum etc., qui eius potestati miraculo estereptus. Quam mortem obierit narratur Act. 12, 20-23, atque simili modo refert *Iosephus* (*Ant.* XIX. 8, 2): in urbe Caesarea spectacula edidit in honorem Caesaris; secundo spectaculorum die veste indutus tota ex argento admirabili opere contexta processit in theatrum primo diluculo. Ibi argentum solarium radiorum ictibus illustratum mirum in modum resplendebat; moxque adulescentes alii aliunde acclamabant Deum appellantes dicentesque: propitius nobis esto et licet hactenus te veluti hominem reveriti sumus, in posterum te mortali sorte maiorem habebimus. At rex neque illos obiurgavit neque impiam eorum adulationem

reiecit... moxque cordicibus dolebat; accesserunt ventris cruciatus a principio vehementissimi... continuus per quinque dies ventris doloribus confectus vitam finivit annum agens 54. Post eius mortem a Caesare missus est Cuspius Fadus qui Iudaeae totiusque regni praeses esset (Ant. XIX. 9,2); Palaestina a procuratore romano deinceps administrabatur attributa provinciae Syriae.

IV. **Herodes Agrippa II.**, filius Agrippae I., cum pater diem obiret, annos natus erat septemdecim. Claudius Caesar quidem in animo habuit ei regnum tradere paternum; at liberti et amici dissuaserunt momentes periculosum esse adolescentulo committere tantum regnum (Ant. XIX. 9,2). Claudius postea c. an. 50 ei dedit parvum regnum ad montem Libanum, regnum scil. Chalcidis, quod Herodes, eius patruus, tenuerat. Verum mox, anno 53, pro hoc regno accepit tetrarchiam Philippi (i. e. Batanaeam, Trachonitidem, Gaulanitidem) et tetrarchiam Lysaniae (Abilam) et eparchiam Vari (Bell. iud. II. 12,8; Ant. XX. 7,1), quae quaedam ad montem Libanum regio fuisse videtur. Praeterea a Nerone Imperatore accepit partem quandam Galilaeae, Tiberiadem et Taricheas, Iuliada Peraeae urbem et vicos quatuordecim in vicinia eius positos (Ant. XX. 8,4) et Abilam in Peraea (Bell. iud. II. 13,2). De eo eiusque sorore Bernice mentio fit Act. 23,13. Cum enim Agrippa venisset Caesaream ad salutandum Festum, procuratorem Iudaeae, Festus, ignorans quid de Paulo Romam scriberet, Agrippam consuluit. Agrippa ipse Paulum videre cupiebat et coram Agrippa et Festo Paulus de vita sua et doctrina Christi reddidit rationem (Act. 23,13-26,32). Paulus argumentatione sua id effecit, ut Agrippa diceret: in modico suades me christianum fieri. Festo autem dicebat; dimitti poterat homo hic, si non appellasset Caesarem. Ceterum vide s. v. BERNICE.

I. KNABENBAUER.

V. Schema chronologicum dynastiae herodianae.

1. *Initia dynastiae.* Cf. *Flav. Jos.* Ant. XIV. 1,3-16,4; Bell. iud. I. 6,2-18,3.

Annis 67-63 a. Chr. (687-691 ab U. c.) Aristobulo II. regnante Antipater, filius Antipae (Antipatri) praefecti Idumaeae tempore Alexandri Iannaei et pater Herodis Magni, favet partibus Hyrcani II., qui erat frater Aristobuli II.

Anno 63 (691) Pompeius Hierosolyma occupat.

Annis 63-40 (691-714) Hyrcano II. regnante ad honores ascendunt Antipater eiusque filii Phasaël et Herodes. Post pugnam ad Pharsalam (die 9. Aug. anni 48) et mortem Pompeii (die 28. Sept. anni 48) Hyrcanus II. et eius amicus Antipater statim partibus Caesaris favent.

Anno 47 vel 46 (707 vel 708) Phasaël Hierosolymis, Herodes in Galilaea duces (στρατηγοί) constituuntur. Herodes Coele-syriae praeficitur a Sexto Caesare Syriae praeside et iterum a Cassio (post necem Caii Iulii Caesaris die 15. Martii anni 44).

Anno 43 (711) Antipater veneno interficitur.

Post pugnam ad Philippus (autumno anni 42) Phasaël et Herodes coram Antonio a Iudaeis accusantur, sed ab eodem Antonio tetrarchae Iudaeae nominantur autumno anni 41.

Anno 40 (714) magna invasio Parthorum. Hyrcanus II. mutilatur et captivus abducitur; Phasaël morte violenta abripitur; Antigonus filius Aristobuli II. rex et pontifex declaratur. Herodes fugiens ad Antonium et Octavianum Romam contendit et a senatu romano rex Iudaeae creatur.

Annis 40-37 (714-717) Antigono regnante Herodes bellum gerit, in quo ipsius frater Ioseph ab Antigono victus occiditur; anno 37 dum Hierosolyma obsidet, Herodes Samaritanorum profectus nuptias celebrat cum Mariamne nepti Hyrcani II.; Hierosolyma expugnat (circiter mense Iulio). Antigonus Antiochia securi percussus ex mandato Antonii (cf. Ant. XV. 1,2).

2. *Regnum Herodis Magni.* Cf. *Flav. Jos.* Ant. XV. 1,1-XVII. 8,1; Bell. iud. I. 18,4-33,8.

Anno 37 (717) Herodes primos amicorum Antigoni interficit.

Anno 36 (718) Hyrcanus II. a Parthis dimissus ad Herodem rediit et honorificentissime excipitur.

Anno 33 (719) ineunte Herodes Aristobulum III., Mariammes uxoris suae fratrem, pontificem constituit et exeunte eodem anno mox post festum tabernaculorum Ierichunte in piscinam immersum occidit.

Anno 34 (720) Ioseph, maritus Salomes sororis Herodis, necari iubetur. Cleopatra, cum ab Antonio oram phoeniciam Tyro ac Sidone exceptis et partes Arabiae ac Iudaeae impetrasset, Herodem invisit.

Anno 31 (723) post victoriam Octaviani Augusti ad Actium (die 2. Sept.) illius partes tuetur Herodes contra gladiatores Antonii.

Anno 30 (724) Herodes Hyrcanum II. occidit, Rhodum contendit ad Augustum ab eoque rex confirmatur, Augustum in Aegyptum proficiscentem apud Ptolemaida honorifice excipit; autumnus eius anni in Aegyptum iter facit et ut amicus colloquitur cum Augusto, qui ei Iericho restituit eiusque regno addit Gadaram, Hippon, Samariam, Gazam, Anthedona, Ioppen, turrim Stratonis (Caesaream Palaestinae).

Anno 29 (725) exeunte Mariamme uxor Herodis supplicio capitis afficitur.

Anno 28 (?) Alexandra filia Hyrcani II. et mater Mariammes supplicio punitur.

Anno 25 (729) morte mutantur Costobarus, secundus maritus Salomes sororis Herodis, et filii Babae, qui cum familia Hasmonaeorum videntur coniuncti fuisse.

Anno circiter 24 (730) Herodes uxorem ducit Mariamnen filiam sacerdotis, quem eodem tempore pontificem nominat.

Anno 23 (731) Alexander et Aristobulus filii Mariammes prioris Romam mituntur.

Anno 20 (734) Pheroras, frater Herodis, tetrarcha Peraeae nominatur.

Anno 18 vel 17 Herodes primum iter romanum instituit et filios reducit.

Anno 14 (740) incipiunt discordiae inter Herodem et filios Mariammes, Alexandrum et Aristobulum. Antipater, filius Doris, primae uxoris Herodis, patri reconciliatus ad aulam regiam iterum admittitur.

Anno 13 (741) Antipater Romam mittitur.

Anno 12 (742) Herodes secundum iter romanum instituit cum filiis suis Alexandro et Aristobulo, quos coram Augusto accusat. Aquileiae Augustus litigantes reconciliat. Antipater cum illis in Iudaeam revertitur.

Anno 10 vel 9 Herodes tertium iter romanum instituit.

Anno 8 (?) Herodes Alexandrum et Aristobulum in vincula coniecit, litteris eos laesae maiestatis apud Caesarem accusat eoque annuente, ut de filiis pro arbitrio statueret, illos Samariae (Sebaste) strangulari iubet.

Anno 6 (?) Antipater Romam proficiscitur. Herodes primo testamento successorem sibi constituit Antipatrum vel, si hic ante ipsum moriatur, Herodem (Philippum) filium Mariammes alterius.

Anno 5 (749) Pheroras frater Herodis moritur; Antipater in Iudaeam revertitur, accusatur, in vincula coniecitur. Herodes morbo correptus secundo testamento successorem sibi constituit Antipam filium natu minimum ex Malthace Samaritana genitum.

Anno 4 (750) Herodes, potestate ab Augusto accepta de filio supplicium sumendi, Antipatrum interfici iubet; tertio testamento Archelaum, filium natu maiorem Malthaces Samaritanae, regem constituit, eius fratrem Antipam tetrarcham Galilaeae et Peraeae, Philippum filium Cleopatrae Hierosolymitidis tetrarcham Gaulanitidis, Trachonitidis, Batanaeae, Paniaidis; quinto post occisum Antipatrum die Herodes Ierichunte moritur.


3. Successores Herodis Magni. Cf. *Flav. Ios. Ant.* XVII. 9,1-XX. 9,7; *Bell. iud.* II. 1,1 ss.

Annis 4 a. Chr. — 6 p. Chr. Archelaus ethnarcha administrat Iudaeam, Samariam, Idumaeam; Romam vocatus ab Augusto in exilium mittitur Viennam Galliarum urbem.

Annis 6 p. Chr. — 41 p. Chr. Iudaea a procuratoribus romanis administratur.

Annis 4 a. Chr. — 34 p. Chr. Philippus, filius Cleopatrae, tetrarcha administrat Batanaeam, Trachonitidem, Auranitidem, Gaulanitidem. Paniaadem et Ituraeam (*Luc.* 3,4). Philippo mortuo tetrarchia haec provinciae Syriae attributa est annis 34-37 p. Chr.

HERODES MAGNUS



Annis 4 a. Chr.—39 p. Chr. Herodes Antipas tetrarcha Galilaeam et Peraeam administrat.

Anno 39 p. Chr. Antipas a Caligula in exilium perpetuum mittitur Lugdunum Galliae oppidum.

Anno 37 p. Chr. Herodes Agrippa I. filius Aristobuli filii Herodis Magni a Caligula tetrarchiam Philippi (et Lysaniae) cum titulo regio impetrat.

Anno 39 vel probabilius 40 p. Chr. Agrippa I. etiam tetrarchiam Herodis Antipae a Caligula accipit.

Anno 41 p. Chr. Agrippa I. a Claudio imperatore rex confirmatur et insuper Iudaeam ac Samariam accipit.

Anno 44 p. Chr. Herodes Agrippa I. moritur.

Annis 44-66 p. Chr. Palaestina a procuratoribus romanis administratur.

Anno 48 p. Chr. Herodes rex Chalcidis, frater Agrippae I., moritur.

Anno 50 p. Chr. Herodes Agrippa II. filius Agrippae I. a Claudio accipit Chalcidem in Libano, regnum patris sui Herodis.

Anno 53 p. Chr. Agrippa II. Chalcidi renuntians a Claudio accipit tetrarchiam Philippi (Batanaceam, Trachonitidem, Gaulanitidem) et tetrarchiam Lysaniae (Abilam), quibus postea Nero imperator aliquas partes Galilaeae et Peraeae addidit.

Annis 66-73 in magno bello Iudaico Agrippa II. est fidelis socius Romanorum.

Anno 100 p. Chr. Agrippa II. moritur eiusque regnum provinciae Syriae attribuitur.

HERODIANI (Ἡρῳδιανοί) ex ipso nomine sunt ii qui a partibus dynastiae herodianae stabant, asseclae et fautores familiae herodianae, qui itaque hanc dynastiam Iudaicam et proin alienigenam et moribus gentilium deditam populo Iudaico dominari volebant. Quae-runt, fuerintne amici vel inimici Romanorum. Opus erit distinctione. Cum totam regionem Iudaicam vellent subesse Herodi, certe Romanorum dominationem abolere cupiebant; sed cum penes Romanos esset, quantum de regno Herodis Magni vellent eius poste-

ris concedere, certe parati quoque erant Romanis adulari, si adulatione et simulata subiectione ad id quod volebant pertingere possent. Cum alienigenae familiae faverent, a pharisaeis, aemulatoribus legis, odio habebantur. Verum quo isti erant inflammati odio in Iesum, minime dubitabant cum Herodianis consilium inire adversus Iesum, ut eum perderent (Marc. 3,6). Uti Herodes Antipas Iohannem Baptistam carcere incluserat, ita sperant pharisaei fieri posse ut per Herodianos, amicos Herodis, ipse Herodes induceretur ad manus in Iesum iniiciendas, qui in eius ditione versabatur. Pariter pharisaei mittunt discipulos suos cum Herodianis in urbe ad Iesum, ut interrogent: licetne dari tributum Caesari (Matth. 22,16; Marc. 12,13). Si enim Iesus sua responsione accusationem apud procuratorem evaderet, in odium incideret et invidiam apud Herodem, quippe qui subiectionem Romanis esse praestandam profiteretur.

I. KNABENBAUER.

HERODIAS (Ἡρῳδιάς), filia Aristobuli et Berenices, soror Agrippae I., neptis Herodis Magni, matrimonio iuncta erat Herodi Philippo, viro privato, filio Herodis Magni et Mariamnes filiae Simonis pontificis. Mulier ambitiosa conditione humili mariti minime contenta facile aures praebebat Herodi Antipae, qui iter Roman facturus apud fratrem Philippum diverterat. Antipas amore mulieris captus ei proposuit, ut statim atque ipse Roma redisset ad se veniret; illa consensit et ita nuptiae illae incestae initae sunt, de quibus Iohannes Baptista Herodem Antipam reprehendit. Reprehensione ea Herodias in furorem acta est simulque timuit ne tandem Antipas monitis Baptistae quem reverebatur obsequens se dimitteret. Quare omni conatu Iohannem interimere studuit. Diu Antipas mulieris importunitati se opposuit et Iohannem tuebatur ne ab ea interficeretur (Marc. 6,20), donec tandem astutia muliebri Herodias opportunitatem nacta est qua odium letale expleret et per filiam saltatricem peteret caput Iohannis Baptistae (cf. Matth. 14,8; Marc. 6,24). Demum Herodias sua ambitione

Antipam perdidit; eum enim instigavit, ut Romam proficisceretur regium titulum ab Imperatore efflagitaturus. Superba enim mulier ferre non poterat Agrippam fratrem nomine regio esse honoratum, dum suus maritus solum tetrarcha appellaretur.

Verum Agrippa nuntium misit ad Imperatorem Caligulam et Antipam rebellionis accusavit, ad quam iam plurima sibi arma comparasset. Cum is se copiam armorum sibi parasse negare non posset, tetrarchia spoliatus et Lugdunum in exilium missus est. Herodias sua sponte eum in exilium secuta est animum eo in infortunio ostendens generosum, cum nollet eum deserere quem sua ambitione perdididerat.

I. KNABENBAUER.

HERODIO. 1. Herodio seu herodius appellatur in Vulgata avis, quae inter immundas atque vitandas a lege recensetur et hebr. הַסִּידָה nominatur (Lev. 11, 19). In Deuteronomio idem nomen hebr. a S. Hieronymo *onocrotalus* redditur (Deut. 14, 18), herodius vero ibidem pro hebr. כֹּחַ ponitur, quod noctuae speciem designat (v. NOCTUA). Pennis eiusdem avis in libro Iob pennae struthionis comparantur, ita ut in significatione vocis הַסִּידָה i. e. *pia* lusum verborum habeatur (Iob 39, 13). Praeterea in Ps. 103 (104), 17 abietes (בְּרוֹשִׁים, Vulgata *dux est eorum*; cf. S. Hieron. ep. 106 ad Sun. et Fret., M. 22, 861) dicuntur domus herodii, cum avis haec nidum suum in arboribus altis collocet. Denique in prophetia Ieremiae הַסִּידָה primum inter aves migratorias locum tenet, a S. Hieronymo hic *milvus* dicta (Ier. 8, 7), et in visione Zachariae alae duarum mulierum, quas vidit propheta, quasi alae הַסִּידָה describuntur, ubi S. Hieronymus iterum *milvum* interpretatur. — Similis confusio in versione huius nominis apud seniores apparet; quippe in Lev. et Ps. ξρωςδόν (Lev. cod. B* αρωδισος, item A in Ps.), in Deut. πελεξαῖνα, in Iob et Isaia ἑσπιδά, in Zach. ἑσπορος exponunt. Pariter reliquae versiones aliae ab aliis dissentiunt, quamvis

quaedam in eadem interpretatione secum ipsis sint constantiores: Peshitta ubique הורבא i. e. *ciconia* (Brun otis) reddit, excepto textu Iob, ubi *veniens* habet; Aquila item ubique ξρωςδόν vertit, eundemque nominant Theodotion in Lev., Deut., Zach. et Symmachus in Zach.; idem Symmachus in Ps. et Ier. ἰξρωςδόν i. e. *milvum*, in Iob ζύζωνος interpretatur (pro quo Bochartus ἰξρωςδόν legendum censet); Onkelos vero in Pentateuco et Targum ibidem et in Iob atque Ier. דִּיתָא הוריתא vel simpliciter הוריתא exponunt, quod alii *milvum album*, alii *ciconium* explicant; iidem vel alii Chaldaei in Zach. נשרא i. e. *aquilam*, in Ps. יתא vel יתא i. e. fortasse *milvum*, et Samaritanus in Pentateuco סנוניתא i. e. *hirundinem* habent. Denique versio graeca veneta in Lev. et Deut. ξρωςδόν proponit, quem saltem in Lev. ex LXX pariter retinent versio coptica aliaeque.

2. In tanto veterum dissensu sane mirum non est, recentiores quoque in diversas partes abiisse. At aliis avibus reiectis, plerique de duabus tantum in dubio versantur, utrum scilicet הַסִּידָה sit potius *herodius* i. e. ardea (germ. *Reiher*, gall. *héron*), an vero *ciconia*. Hanc quidem praesertim Bochartus tuetur, eumque multi nostra aetate sequuntur; ardeam praefert *Michaelis* pluribusque defendit *Oedmann*. Argumentum praecipuum pro *ciconia* ex etymo vocis הַסִּידָה habetur, quae *pia* avem designat: fama vero antiquissima, iam *Aristophani* (Aves 1333) et *Staggyritae* (Hist. Anim. IX. 14 al. 13, 1) nota atque a *Plinio* (X. 23, 63) aliisque confirmata, pietatem *ciconiae* prae ceteris avibus laudat eique nomen *avis piae* prae ceteris tribuit (S. Ambros. in Hexaem. 3, 16). At similiter ardeae pietatem laudat *Aelianus* (Hist. anim. 3, 23). — Omnia autem in S. Scriptura memorata aequè bene de *ciconia* atque de ardea praedicari poterunt. Nam utraque avis inter migratorias (Ier. 8, 7) magnitudine reliquis praestat atque in Palaestina variis speciebus invenitur (*Ciconia alba* Linné et *C. nigra* L.; *Ardea cinerea* L., *A. purpurea* L., *A. alba* L. etc.), utraque magnas alas habet (Zach. 5, 9) et pennas varii coloris, qui-

bus pennae struthionis comparari possint (Job 39,13), atque nidum suum etiam in arboribus collocat (Ps. 103 [104], 17), quamvis ciconia turrim ac domorum ruinas, ubi adsint, ardea vero in Palaestina loca paludosa praeferrat (*Tristram*). Utraque avis praesertim parvis reptilibus, piscibus aliisque bestiolis, etiam venenosis, vescitur, inde ratio impuritatis legalis facile apparet. Cum praeterea ciconia et ardea ad eundem ordinem *Ciconiarum* pertineant atque eandem fere habeant magnitudinem similemque vivendi morem, satis difficile erit determinare, utra potissimum nomine hebraeo designetur, nec improbabiler utraque eodem comprehenditur.

Cf. *Sam. Bochart*, Hieroz. II. 327-34, ed. *Rosenm.* III. 85-96; *I. D. Michaelis*, Suppl. ad lex. hebr. p. 857-64; *Sam. Oedmann*, Verh. Samml. 5,58-66; *E. F. K. Rosenmüller*, Bibl. Alterth. IV. 2,319-21; *H. O. Leuz*, Zool. d. alt. Griech. u. Römer 373-6; *L. Lewysohn*, Zool. d. Talm. 169-72; *H. B. Tristram*, Nat. Hist. ed. 8,241-9; *id.* Fauna and Flora of Pal. 109-12; *J. G. Wood*, Bible Animals 468-74. 478-84; *P. Cuillera*, Fauna bibl. 321-3; *Lennis-Ludwig*, Synopsis I. 1 ed. 3, p. 479. 486 s.; *J. E. Brehm*, Tierleben ed. 3 VI. 480-93. 506-17; *Ph. L. Martin*, Naturgesch. d. Thiere I. 2, 548-50. 556-8; *G. Lyret*, La zoologia nella Bibbia 125 s. — Etiam Assyriis et Aegyptiis ciconia et ardea bene notae erant; cf. *W. Houghton* in Trans. Soc. Bibl. Arch. VIII. 1884, 88-91; *J. Dümichen*, Hist. Inscr. II. tab. 29; *id.* Resultate I. tab. 3; *Wilkinson-Birch*, Manners and Customs II. 114; III. 325 s.

L. FONCK.

HERODION (Ἡρώδιον), vir christianus Romae, quem S. Paulus Rom. 16, 11 salutat ut cognatum suum (συνγενὴ μου) i. e. contribulem. Cf. Acta Sanct., April. I. p. 471.

HESEBON (הֶסְבֹּן; Ἑσέβων, Ἑσέβων), urbs principalis Schon regis Amorrhaeorum, qui Moabitis anstrum versus repulsis usque ad ripam Arnonis dexteram regnum suum extendit (Num. 21,25-34; Deut. 4,46; Jos. 12,5; 13,27); utrum ipsa Hesebon urbs Moabitarum fuerit necne, ex locis citatis dirimi nequit. In potestatem Israelitarum transit post pugnam

apud Iasa (Num. 21,23; Deut. 2,32), qua Schon a Moyse devictus mortem oppellit (Num. 21,25; Deut. 4,4; 2,24. 26. 30; 3,2. 6; 29,7; Jos. 9,10; Iud. 11,19. 26; Neh. 9,22; Iudith 3,20 LXX 13). Sita erat in regione uberrima ad paslum animalium, quam Gaditae et Rubenitae pecoribus abundantes a Moyse sibi efflagitarunt (Num. 32,3). Tradita est Rubenitis (Jos. 13,10. 47. 21), qui eam reaedificaverunt (Num. 32,37); sed cum in confinibus Ruben et Gad sita esset (Jos. 13,26), postea Gaditis attributa est, qui eam levitis de stirpe Merari concesserunt (Jos. 21,37; 1 Par. 6,81[66]). Tempore Isaiae a Moabitibus recuperata erat et saepius in prophetis oraculis contra Moab editis commemoratur (Is. 15,4; 16,8. 9; Ier. 48,2. 34. 45; 49,3). De illustri Sponsae laudatione Cant. 7,4: oculi tui sicut piscinae in Hesebon cf. *Gietmann* ad h. l. — Putant aliqui Hesebon esse eandem quae 1 Mach. 3,26 Casphor et 5,36 Casbon appellatur (v. CASPHOR); sed dubitari debet, num Iudas Machabaeus, qui in regione transiordanica aquilonari potissimum dimicabat, eo usque anstrum versus abierit. Flavius Iosephus ulteriora fata Hesebon enarrat (Ant. XIII. 15,4; XV. 8,5; Bell. Iud. II. 18,1). Tempore Eusebii vocabatur Esbus (Ἑσβός); et describitur urbs insignis Arabiae in montibus contra Iericho 20 mil. pass. a Iordane distans (Onom. ed. Lag. 253,27: 117,32). Cernuntur hodie ruinae *Hesbān* in colle positae infra *Wādī Hesbān* et ab oriente huius loci piscina arae facta et magnam partem diruta, cuius aspectu piscina in Hesebon Cant. 7,4 in memoriam revocatur.

Cf. *Reland*, Palaestina p. 719 s.; *Seetzen*, Reisen ed. Kruse I. 407. IV. 220 s.; *Burchard*, Reisen ed. Gesenius II. 623 s. 1063; *Ritter*, Erdkunde XV. 1176-1181; *Raumer*, Palaestina ed. 4 p. 262; *De Sauley*, Voyage en Terre Sainte I. 279 s.; *Duc de Luyne*, Voyage autour de la Mer Morte I. 147; *Kuhn*, Die städtische u. bürgerl. Verfassung des röm. Reichs II. 337. 386 s.; *Haldesheimer*, Beiträge zur Geographie Pal. (1886) p. 65 s.; *Survey of East. Pal. Mem.* I. 104-109; *E. Schäfer*, Geschichte des jüd. Volkes ed. 3 II. 155. 156; *Badcker-Benzin*

ger. Palaestina u. Syrien ed. 5 p. 173; F. Buhl, Alt. Pal. 266; D. Zaneccchia, La Palaestine d'aujourd'hui 1899 II. 90. 91.

HESER urbs (3 Reg. 9,15) v. ASOR 1.

HESLI (Ἑσλί) in genealogia Christi (Luc. 3,23).

HESMONA (הֶשְׁמוֹנָה, Σελμωνά), statio Israelitarum inter Methca et Moseroth (Num. 33,29. 30). Situs determinari nequit, nisi in quantum Moseroth statio proxime sequens prope montem Hor fuisse iure asseritur.

HESRAI (Kethib הֶצְרִי, Qeri הֶצְרִי; Ἀσραϊ), vir fortissimus in exercitu Davidis de oppido et monte Carmel in montanis Iuda (2 Reg. 23,35). Idem 1 Par. 11,37 scribitur Hesro (הֶצְרִי, Ἑσρεϊ).

HESRO v. HESRAI.

HESRON, ESRON (הֶצְרֹן, הֶצְרֹן; Ἀσρών, Ἀσρώμ, Ἀσρωών, Ἀσερών, Ἑσερών), nomen virorum et urbium. 1. Filius Ruben, progenitor familiae Hesronitarum (Gen. 46,9; Ex. 6,14; Num. 26,6; 1 Par. 5,3).

2. Filius Phares filii Iuda patriarchae (Gen. 46,12; 1 Par. 2,5. 9. 18. 21. 24. 25; 4,1), progenitor alterius familiae Hesronitarum (Num. 26,21), recensitus in genealogia David (Ruth 4,18. 19) et Christi (Matth. 1,3; Luc. 3,33).

3. Oppidum in termino meridionali tribus Iuda inter Cadesbarne et Addar (Jos. 15,3). Putant aliqui oppidum Hesron latere in villa Addar (הֶצְרִי-אֶדָר), quae Num. 34,4 inter Cadesbarne et Asemona legitur et duo oppida vicina uno nomine comprehendendi (Dillmann ad h. l.). Situs nonnisi generali aliquo modo determinari potest; vide s. v. ADAR 1.

4. De Jos. 15,25: Carioth Hesron haec est Asor v. CARIOTH 1.

HETH, HETHAEUS (חֶת vel חֶתִי, Χῆτ vel Χετταῖος), gens a Chanaane prognata (Gen. 10,15; 1 Par. 1,13). Tempore Abrahae Hethaei erant in Hebron Gen. 23 (cf. 25,9 s.; 49,29 s.; 50,13). Esau duxit Hethacas uxores (Gen. 26,34; 36,2; 27,46). Hethaei Num. 13,30 dicuntur, uti Iebusaei et Amorrhaei, montana incoluisse (cf. Jos. 11,3). Aevo mosaico

videntur utique Hethaei e potioribus fuisse terrae sanctae populis. Ubi enim recensentur populi, quorum fines Hebraeis sint cessuri, Gen. 15,19 quidem populi vel temere vel ordine geographico recensentur; in Exodo autem Hethaei nonnisi 33,2 et 34,11 (item Jos. 11,3; 24,11) tertium post Chanaanacos et Amorrhacos, secus secundum inter illos locum obtinent (Ex. 3,8. 17; 13,5; 23,23. 28; cf. Jos. 3,10; 11,2; Iud. 3,5; Esdr. 9,1; Neh. 9,8; cum 3 Reg. 9,20 cf. 2 Par. 8,7; nonnihil aliter Iudith 5,20). Primum locum obtinent Deut. 7,1; 20,17; Jos. 9,1; 12,8. Tamen nullus eorum rex nominatim effertur, nulla gentis pars exterminata narratur; ut credideris Hethaeos illos nativas sedes habuisse extra terrae sanctae limites, nonnisi aliquos in ipsam ramos protendisse, qui ab Hebraeis pressi ad suos se receperint (cf. Iud. 1,26). Qui superfuerunt, cum aliarum gentium reliquiis a Salomone facti sunt tributarii (3 Reg. 9,20; 2 Par. 8,7). Hethaeos Davidis heredes habes 1 Reg. 26,6; 2 Reg. 11,3 s.; 23,39; 3 Reg. 15,5; 1 Par. 11,41.

Quod de Hethaeorum extra terram sanctam nativis sedibus dicebamus, egregie confirmatur Jos. 4,4 (cf. tamen LXX), ubi tota regio a mari Mediterraneo ad Euphraten « terra Hethaeorum » audit. Item 2 Reg. 24,6 secundum probabilem textus emendationem regio ad aquilonem terrae sanctae (v. HODSI) « terra Hethaeorum » appellabatur. Reges Hethaeorum et Syriae 3 Reg. 10,29 et 2 Par. 1,17 Salomoni equos divendebant. Inter gentes finitimas, e quibus sibi Salomon uxores selegit, 3 Reg. 11,1 fuerunt etiam Hethaei. Syri 4 Reg. 7,6 ab obsidenda Samaria desistunt, veriti ne reges Hethaeorum et Aegyptiorum Israelitis opem lataturi prope adsint.

Confirmantur eadem monumentis Aegyptiorum. Tholmes III., 18^{ae} dynastiae pharao, anno regni 33. dona accepit a principe gentis Cheta, quae tum prope Amanum montem videtur incoluisse. Verum iam sub Tholmes IV. prope Orontem flumen incolebat ad septemtrionem Emath. Ramses I., cum Sapaelem regem Cheta subigere non posset, foedere illum sibi copulavit. Ramsis filius Seti I., qui

primus 19^{ae} dynastiae pharao scribitur, secundo regni anno cum eodem Sapalele dimicavit, sed postea cum eius nepote Mauleure pacem composuit. Cuius successor Ramses II. anno regni quinto obvium habuit eundem Mauleure, cui se sociaverant Aradii, Gergesaei, Aramaei alique plures. Duorum dierum proelio illum devicit prope Cades ad Orontem. Sed anno regni 21. eius fratri Chetasar honestissimam pacem concessit, perpetuum mutuae defensionis foedus constituit, filiam accepit uxorem, quam postmodum Chetasar in Aegypto invisens honorifice est receptus. Sexaginta fere annis post gentes plures terra marique advectae Syriam et Phoeniciam subegerunt, Hethaeorum plures ut sibi sociarentur adegerunt, sed a Ramse III., 20^{ae} dynastiae pharaone, anno regni 8. in ipsis Aegypti confinibus contritae sunt. Haec est suprema gentis Hethaeorum in documentis Aegyptiorum mentio. Fuit ea gens praepotens, quam ne valentissimi quidem pharaones frangere potuerant. De cuius moribus cf. *Fr. Lenormant*, Les origines de l'histoire II. 267 ss., Parisiis 1884; et *W. M. Müller*, Asien u. Europa p. 319 ss., Leipzig 1893.

Est praeterea perquam probabile fuisse Hethaeos socios vel etiam duces infinitae illius bellatorum multitudinis, qui Hyskos appelluntur et extrema 14^a dynastia in Aegyptum irruerunt eique diu imperaverunt. Praeter alia momenta, quae apud *C. A. de Cara* Gli Hysôs o re pastori di Egitto, in Civiltà Cattolica ser. XIII. vol. VI. ss., Romae 1887 ss.) collecta et discussa reperies, illud est potissimum, numen supremum gentis Cheta fuisse Set vel Sutekh, eundem nomine deum qui in Aegypto inferiore coleretur tamquam advenarum ex Asia advectorum numen. Ubi aliqui suggerunt Aegyptios scribas, a quibus solis hanc numinis appellationem accepimus, numinis nativo apud Hethaeos nomini substituisse eius numinis nomen, quod etiam in Aegypto inferiore ab Asianis potissimum coleretur. Verum, donec hi auctores aliquod suae opinionis argumentum proferant, intus tacebimus, ideo idem utrobique nomen haberi, quod idem cum Asiani in Aegypto tum in Syria Hethaei numen

coluerint. Porro, uti singulae fere Chanaanitidis et Phoeniciae civitates suum habebant Baal, ita singulae Hethaeorum civitates suum habebant Set vel Sutekh.

Novum cum Hethaeorum tum Hebraeorum rebus lumen affuderunt recentior in Aegypto apud *Tell-el-Amarna* repertae epistolae characteribus cuneiformibus exaratae, aequales Amenhotep III. et IV., qui pharaoni Thotmes IV. immediate successerunt, quae pandunt, quibus artibus pharaones Hethaeos, ne rursus Aegyptum adorirentur, praevenirent, immo forsasse iam antea eorum ex Aegypto eiectionem machinati fuerint. Hethaeos et a sociis et etiam inter se diviserunt, foedera cum quibusdam civilitalibus stabilientes, civitatum discordias foventes, reges Babyloniae aliosque sibi foederibus et coniugiis devincientes, qui Hethaeos, si opus esset, a tergo adorirentur. His artibus hi, magis forsasse quam pharaonum armis, ut Aegypto primum, Chanaanitide postmodum excederent, compulsi sunt. His factum est, ut Hethaei illi etiam, qui in Chanaanitide aliquas retinuerant civitates, ad suos in Syriam se recipere, quam Hebraeis obstinatius resistere maluerint. Hinc tandem effectum est, ut Hebraeis tractus montanos Chanaanitidis primum occupantibus, aditum vero Phoeniciae et Syriae secus mare Mediterraneum minime occultantibus nequaquam se obiecissent Aegyptiis; Chanaanaci quippe tanto minus contra Aegyptios quidquam erant molituri, quod sibi ab Hebraeis timerent. Mox interiectis Philisthaeis Aegyptiis ab Asia penitus excluderentur. Ita providebat Deus, ut firmas radices agere posset Hebraeorum res publica.

Fidem Hethaei vel Cheta in Assyriorum monumentis vocantur *Chatti*. Pluribus ante 18^{am} Aegyptiorum dynastiam saeculis, Sargon I. rex Accad bellum habuit cum Hethaeis. Tempore Theglathphalasar I. c. 1100 imperabant ab Euphrate ad Libanum, pluresque Asiae Minoris populos habebant tributarios. Caput imperii erat Gargamis seu Characamis (Jer. 46, 2), postea Enropus (*Djerabis*) dicta, ad Euphraten sita, ab Assyriis necessario occupanda, quod clavis esset Syriae, Phoeniciae, Palaestinae. Quare

cuius regem Sangar subegerunt reges Assyriae Assurnasirpal (884-859) et Salmanassar II. (859-825). Anno 738 Theglathphalasar (III.) II. regnum Emath in provinciae assyriacae ordinem redegit; item Sargon 717 regnum Gargamis et 708 regnum *Kummucha* seu Commagenem.

Linguam Hethaeorum quae fuerit ignoramus. Inscriptiones nondum sunt explicatae, sola praesto sunt nomina propria. Causatur *F. Lenormant* l. c. p. 270 ss. nomina quae S. Scriptura habeat Hethaeorum esse prorsus semitica, nomina a monumentis tradita neque semitica esse neque arica. Nomina hethaea recenset Scriptura novem (Gen. 23,8; 26,34; 36,2. 4; 1 Reg. 26,6; 2 Reg. 11,3), non omnia certae lectionis: potuerunt Hethaei Chanaanais permixti nominibus vocari hebraeis aut sono hebraea imitantibus; Urias = « lumen lahwe » certe non erat nomen hethaecum. Ita vero transcriptionibus assyriacis et imprimis aegyptiis transformantur et deformantur nomina, ut de eorum nativa indole vix certi quidquam statui possit. Neque necesse est, omnes tribus vasta Hethaeorum foederatione socialas origine fuisse chamitas aut eadem lingua usas esse.

Cf. praeter ea, quae supra allegata sunt, praesertim *F. Vigouroux*, *Mélanges bibl. ed.* 2 p. 329 ss.; *C. de Cara*, *Gli Hetheipelasgi*, Roma 1894; *A. H. Sayce*, *The monuments of the Hittites in Trans. Soc. Bibl. Arch.* 1881 (July); *idem*, *The Hittites* 1888; *idem*, *The races of the Old Test.* 1891; *W. Wright*, *The empire of the Hittites* 1884; *L. de Lantsheere*, *Hittites et Omorites*, Bruxelles 1887; *idem*, *De la race et de la langue des Hittites in Compte rendu du congrès scientifique international des catholiques* 1891 p. 171 ss.; *Ed. Meyer*, *Gesch. des Altert.* 1. p. 213 s.; *P. Jensen*, *Grundlagen für eine Entzifferung der (hatischen oder) cilicischen (?) Inschriften in Zeitschr. d. D. Morg. Gesellsch.* XLVIII. 1894 p. 235-352. 429-485; *idem*, *Hittiter u. Armenier* 1898.

HETHALON (הֶתֶלֶן, Vulgata :

via Hethalon, LXX nomen proprium non exprimit, sed vertit) Ez. 47,13; 48,1. Terminus septemtrionalis terrae sanctae describitur a mari magno i. e. Mediterraneo per viam Hethalon, qua venit

in Sedada, Emath, Berotha etc. Unde via Hethalon ea censeri consuevit, quae ad septemtrionem Libani a mari Mediterraneo versus planitiem Emath ducit et quodammodo est introitus Emath (cf. Num. 13,22; Jos. 13,5; Iud. 3,3; 4 Reg. 14,23). *Furrer* proponit *Heitela* inter *Nahr el-Kebir* et *Nahr 'Akkar*. Verum ex opinione, quam *I. P. van Kasteren* defendit, terminus septemtrionalis ab Ezechiele descriptus quaerendus est infra Libanum et Hermonem maiorem ab ostio Leontis fluvii (*Nahr el-Qāsimiye*) orientem versus et nomen Hethalon conservatum videtur in *'Adlūn* a Leonte aquilonem versus inter Tyrum et Sidonem.

Cf. *Furrer* in *Zeitschr. d. D. Pal.-Ver.* VIII. 1885 p. 27; *I. P. van Kasteren* in *Revue bibl.* IV. 1895 p. 27.

HETTHIM (Iud. 1,26) terra i. e. Hethaeorum; v. HETH.

HEVA (הֵוָה, *Ez, Eva*), prima mulier et parens generis humani: et vocavit Adam nomen uxoris suae Heva, eo quod mater esset cunctorum viventium (Gen. 3,20; הוּהָ הִיָּה vivere). Postquam Adam creatus est, Dominus Deus ei providit adiutorium simile Adamo, « non est bonum esse hominem solum » (Gen. 2,18). Ex Dei creatoris consilio genus humanum debuit propagari, homo socialis est; quare duplici ratione opus creationis hominis nondum erat absolutum antequam existeret mulier. Quare dicitur: non est bonum. Ipso autem modo, quo producta exhibetur Heva, conditio designatur mulieris, quam apostolus declarat: caput mulieris est vir; mulier gloria est viri, at cum esse scribatur ex viro et simul cum eo integrum constituat principium propagationis generis, est socia viri, non serva; « nam sicut mulier de viro, ita vir per mulierem » (1 Cor. 11,3. 7-12). « Immisit Dominus Deus soporem in Adam; cumque obdormisset tulit unam de costis eius et replevit carnem pro ea et aedificavit Dominus Deus costam quam fulerat de Adam in mulierem et adduxit eam ad Adam » (Gen. 2,21. 22). Nota quae ad ea verba scribit S. Augustinus (de Gen. c. Manich. 12): « Sive ergo ista figurate

dicta sint, sive etiam figurate facta sint, non frustra hoc modo dicta vel facta sunt; sed sunt plane mysteria et sacramenta, sive hoc modo quo tenuitas nostra conatur, sive aliquo alio meliore, secundum sanam tamen fidem, sunt interpretanda et intellegenda ». Cf. *F. de Hummelauer* et *Hoberg* ad Gen. 2,21. Sopor ille a LXX dicitur ἕλπαις atque probabile est Adam in illa conditione vidisse istud symbolum formationis Hevae; statim enim rei conscius exclamat: hoc nunc os ex ossibus meis et caro de carne mea; haec vocabitur virago quoniam de viro sumpta est (Gen. 2,23). Et quid hae Hevae ad Adam adductione Deus instituerit, sacer auctor declarat: quoniam relinquet homo patrem suum et matrem et adhaerebit uxori suae et erunt duo in carne una (cf. Matth. 19,5). Instituitur matrimonium a Deo ipso quasi nymphagogo, sed tamquam monogamia. Quod aliqui recentiores opinantur Adam fuisse creatum androgynum, utraque narratione Geneseos excluditur: 1,27 masculum et feminam creavit eos (אָדָם) et 2,21. Esse mulierem sociam viri, etiam indicatur eo quod utrique aequè benedixit Deus: benedixitque illis Deus et ait: crescite et multiplicamini et replete terram et subicite eam et dominamini etc. (Gen. 1,28).

Verum a muliere initium factum est peccati (Eccli. 25,33); serpens Hevam seduxit ἐξηπάτησεν valde decepit astutia sua (2 Cor. 11,3). Et serpens ille, homicida ab initio, diabolus (Sap. 2,24) mulierem aggreditur tamquam quae facilius expugnetur: cur praecepit vobis Deus ut non comederetis de omni ligno paradisi? i. e. (ut iam Suarez explicat) ut ex nullo ligno comederetis. Hamum quem tentator proiecit Heva iam eo ipso fere arripit quia respondet explicans Deum solum prohibuisse eum fructus unius arboris in medio paradisi « ne moriamur » (illud forte quod habet Vulgata neque in hebraeo neque in graeco habetur; quare non iam hic cum aliquibus Heva est accusanda quasi comminationem Dei in dubium vocasset). Diabolus, pater mendacii, pro sua natura im-

pudenter mentitur: nequaquam morte moriemini. Dein praeceptum datum esse affirmat, quo ab aliqua scientia arceantur, atque eo modo loquitur quo insinuet ac si Deus illis eam invideret scientiam: scilicet enim Deus quod in quocumque die comederitis ex eo aperientur oculi vestri et eritis sicut Elohim scientes bonum et malum (Gen. 3,4,5). Atque initium omnis peccati est superbia (Eccli. 10,15) et in superbia initium sumpsit omnis perditio (Iob 4,14). Nam hisce tentatoris verbis Heva concepit appetitum similitudinis cum Deo et superbe id suo conatu acquirere voluit quod promittebatur ipso nomine arboris scientiae boni et mali (Gen. 2,17). Vidit itaque mulier quod bonum esset lignum ad vescendum et pulchrum oculis aspectuque delectabile — hebr. verti omnino potest: et desiderabile ad scientiam scilicet dandum; cf. הִשְׁכִּיל Prov. 1,3; 21,16; Ier. 3,15 — proin ipsa arboris forma et fructus pulchritudine egregia bonum illud quod nomine contineri videbatur posse acquiri snadebatur. Suggestione itaque daemones in talem superbiam excitata tulit de fructu illius et comedit, deditque viro suo qui comedit. Verum statim deprehendit quam insinuat decepta sit suggestione diaboli et sua ipsius superbia: pudore et confusione suffunduntur ambo; rebellionem in Deum facta etiam in se ipsis ordinem illum et plenam appetitus subiectionem a gratia iustitiae originalis procedentem turbant et amiserunt. Consuerunt folia ficus et fecerunt sibi perizomata et sese absconderunt a facie Dei. In qua absconzione proditur quoque lumen intellectus esse obfuscatum. Interrogata a Deo mulier vere fatetur: serpens me decepit; sed plenius dicendum erat ex sua ipsius superbia factum esse ut serpens potuerit decipere. Peccatum sequitur alia quoque poena: multiplicabo acuminas tuas et conceptus tuos; in dolore paries filios et ad virum erit desiderium tuum (secundum hebr. cf. 4,7 appetitus, Cant. 7,10 conversio, ita redditur תְּשִׁיקָה LXX ἀποστροφή, ἐπιστροφή) et ipse dominabitur tui (Gen. 3,16). Iustam itaque incurrit superbiae poenam

ipso pudore, illo ad virum desiderio quo suam fatetur infirmitatem, et dominatione viri cui subditur; commodi vero sensuum poenam luit doloribus partus. Sed dum deus iuste punit misericorditer quoque remedium apponit: semen mulieris conteret caput serpentis. Promittitur fore ut tandem per natum de muliere plena de diabolo victore victoria reportetur et proinde damnum per eum illatum reparetur. Qua promissione accepta Adam vocat nomen uxoris suae: Heva, eo quod mater esset cunctorum viventium. Ea enim promissione etiam continebatur poenam mortis non statim exactum iri, verum manere benedictionem datam pro generis humani propagatione.

Ex narratione Gen. 3,4 s. et verbis Hevae v. 13 etiam intellegitur quod scribitur 1 Tim. 2,14: Adam non est deceptus οὐκ ἡπατήθη, mulier autem decepta in praevicatione facta est ἡπαταμένη γέγονε. Nam, ut *Estius* explicat, proprie nemo decipitur nisi a decipiente i. e. ab eo qui proprie et formaliter decipit, quod non facit nisi qui fallendi animo falsum ei persuadet; hoc modo serpens mulierem decepit; mulier autem etsi falsum viro persuasit hoc fecit decepta, non decipiens, quia non faciebat animo fallendi; putabat enim verum esse quod suadebat.

Heva cum pareret primum filium laetabunda exclamat: possedi (nacta sum, vel produxi) hominem per Dominum, vel cum Domino, ope Domini; ex קַיִן nomen Cain explicatur. Rursumque peperit fratrem eius Abel אֶבֶל quam vocem saepe exponunt halitum, quasi Heva iam vitam mortalem esse fluxam exprimere voluisset. Verum recentiores vocem interpretantur potius *filium* derivatione ex lingua assyriaca deprompta. Dubium non est quin uti Adam, ita Heva quoque poenitentia acta veniam et salutem sit consecuta (cf. Sap. 10,2).

I. KNABENBAUER.

HEVAEI, nomen gentilicium.

1. Hevaei (הֵוָאִי, ὁ Εὐαῖος), gens Gen. 10,17; 1 Par. 1,15 Chanaan orta, e sola hucusque S. Scriptura nobis nota.

Videntur pars aliqua fuisse eius gentis, quae generaliore nomine Amorrhaei i. e. montium incolae appellabatur, cum Gabaonitae et Sichemitae Hevaei (Ios. 11, 19; Gen. 34,2) iidem 2 Reg. 21,2 et Gen. 48,22 dicantur Amorrhaei. Ubi terrae sanctae gentes enumerantur, vix non semper Hevaei paenultimum locum obtinent, agmen claudentibus Iebusaeis: Ex. 3,8. 17; 13,5; 23,23; 33,2; 34,11; Deut. 7,1; Ios. 9,1; 12,8; 20,17; 24,11; Iud. 3,5; 3 Reg. 9,20; 2 Par. 8,7. Alio loco leguntur Gen. 10,17; 1 Par. 1,15; Ex. 23,28; Ios. 3,10; Iudith 5,20. Omituntur Gen. 15,19 ss. (nisi ibi fortasse sub alio nomine lateant) et Neh. 9,8. Hemor Hevaeus tempore Iacob Gen. 33, 18 ss. erat princeps Satelem, urbis Sichemorum, cuius filius Sichem Dinae stuprum intulit. Lectio « Hevaei » Gen. 36,2 incerta (cf. v. 20). Hevaei Ios. 11,3 habitantes ad radices montis Hermon in valle (v. 8) Maspha foedere iuncti sunt Iabin, regi Asor, et cum eo a Iosue devicti. Quod factum attingitur Ios. 9,1; 24,11. Gabaonitae Hevaei Ios. 9 dolo apud Iosue effecerunt, ut incolentes servarentur; perpetuis tamen angariis fuerunt addicti. Quos contra promissa interimere aggressus est Saul (2 Reg. 21); in cuius rei poenam fames sub Davide saevii, donec divino oraculo monitus rex septem viros domus Saul illis tradidit extremo supplicio perimendos. Post Iosuen supererant Hevaei Iud. 3,3 in Libano, a monte Hermon usque ad urbem Emath seu Hamath. Tempore David 2 Reg. 24,7, qui Tyro pergebant in Bersabee, transibant per terram primum Hevaeorum, dein Chananaeorum. Quorum reliquias 3 Reg. 9,20; 2 Par. 8,7 Salomon fecit tributarios.

2. Hevaei in Vulgata et Εὐαῖοι in versione graeca etiam scribuntur ii, qui Deut. 2,23 et Ios. 13,4[3] scribuntur עֵיִי. Quos eandem esse gentem atque Hevaeos הֵוָאִי, nullo argumento demonstratur. Habitaverunt illi in tuguriis, non in urbibus munitis, in ea quae postmodum fuit Philisthaea. Quos expulerunt Philisthaei e Creta insula advecti, non tamen deleverunt, cum tempore Iosue tradantur incoluisse ad

meridiem pentapoleos usque ad torrentem Aegypti.

3. Hevaei (1 Reg. 17,31) incolae urbis Ava; v. AVA.

4. Hevaeus redditur in Vulgata Ios. 13,21 nomen proprium Evi (vide s. v.).

HEVILA, HEVILATH הֵוִילָתְךָ;

הֵוִילָא, הֵוֵילָא, הֵוִילָאֵת. 1. Terra Hevilath quam circuit Phison fluvius paradisi et in qua invenitur aurum optimum, bdellium, lapis onychinus (Gen. 2,11. 12); v. PARADISUS.

2. Secundus inter quinque filios Chus filii Cham (Gen. 10,7; 1 Par. 1,9). Vestigium gentis cushiticae Havila prae se ferre videntur sinus Avalites (κόλπος Αβαλίτης seu Αβαλίτης) et gens Avalitarum (Αβαλίται) a meridie freti *Babel-Mandeb* in litore Africae (*Ptol.* IV. 7,10. 27. 39 [*ed. Müller-Fischer* 7,3. 10. 11]; cf. *Plin.* VI. 29,174); sinus Avalites hodie *Zeila* appellatur ab urbe eiusdem nominis.

Cf. *Gesenius*, Thesaur. p. 452; *F. de Hummelauer* ad Gen. 10,7; *Knobel*, Völkertafel 1850 p. 261. 262; *Lenormant*, Histoire ancienne de l'Orient 1881 I. p. 267.

3. Unus ex tredecim filiis Iectan filii Heber (Gen. 10,29; 1 Par. 1,23).

Iectanidae Arabiam meridionalem incolabant (v. IECTAN). Nihilominus Hevila Iectanidarum eadem gens esse potest, quae Hevila cushitica Gen. 10,7 et ipsa existentia Hevilae africanae et arabicae innuit Cushitas cum Iectanidis in unam gentem coaluisse, quam aequae Cush et Iectano progenitam scribere fas fuit, ut notat *F. de Hummelauer*, Comm. in Gen. p. 333. Huic genti tum nomine tum situ correspondet regio *Khaulān* in *Yemen* (*Bochart*, *Rosenmüller*, *Knobel*). Eiusdem gentis ut videtur, mentio fit Gen. 25,18; Habitavit (Ismael) ab Hevila usque Sur, quae respicit Aegyptum introeuntibus Assyrios, hebr. verbe : usque ad murum, qui est ad introitum Aegypti, si pergās Assyriam versus; et 1 Reg. 15,7 : Percussit Saul Amalec ab Hevila donec venias ad Sur, quae est e regione Aegypti. Complures interpretes arguunt his saltem locis designari aliquam Hevilam non in austro, sed inter septentrionem

et orientem Arabiae, unde *Gesenius* intellegit *Χαλοταλούς* Strabonis (XVI. 4,2) Nabathaeis et Hagrensibus vicinos, ad sinum Persicum habitantes, in cuius litore *Niebuhr*ius Chawilae oppidum regionemve recenset. Neque profecto mirum videri potest, quod eadem gens variis in locis vestigia sua reliquit. Attamen alii interpretes (ut *Rosenmüller*, *Knobel*) putant etiam Gen. 25,18 Hevilam in austro Arabiae seu *Khaulān* in *Yemen* intellegendam esse.

Cf. *Gesenius*, Thesaurus ling. hebr. p. 452; *Niebuhr*, Beschreibung von Arabien 1772 p. 342; *Bochart*, Phaleg 2,28; *Rosenmüller*, Scholia in Gen. 10,29 et 25,18 et *Bibl. Altert.* III. p. 157. 158; *Knobel*, Völkertafel 1850 p. 186.

HEZECHIEL יְחֶזְקִיָּאל, ὁ Ἐζεχὴλ,

sacerdos, cui vicesima sors in ministerio Domini a David designata est (1 Par. 24,16).

HEZECI יְחֶזְקִי, Ἀζαζ), unus ex po-

steris Elphaal de tribu Benjamin (1 Par. 8,17).

HEZECIA v. EZECHIAS 4 et 5.

HEZION יְחֶזְקִי, Ἀζών), rex Syriae

(Aram), pater Tabremon et avus Benadad I. (3 Reg. 15,18).

HEZIR יְחֶזְקִי, ὁ Ἀζήρι), sacerdos cui

decima septima sors in ministerio Domini a Davide designata est (1 Par. 24,15). Idem nomen hebr. geril Hazir (vide s. v.).

HIEL יְחֶזְקִי, Ἀχιζ), orinudus de

Bethel, qui in diebus Achab urbem Iericho munimentis firmare aggressus est, sed iuxta imprecationem Iosue (cf. Ios. 6,26) graves huius facinoris poenas luit; etenim cum fundamenta iaceret, eius primogenitus Abiram morte sublatus est et cum portas poneret, Segub filius novissimus eandem sortem primogeniti subiit (3 Reg. 16,34). Appellatur בֵּית יְחֶזְקִי, quod nomen gentilicium Arabs et Syrus perperam reddiderunt domum idolorum, maledictionis, sed recte LXX ὁ Βασιθαλίτης.

HIERAPOLIS (Ἱερὰπολις), urbs

Phrygiae maioris (*Ptol.* V. 2, 26 [*ed. Müller-Fischer* 2, 17]; *Plin.* V. 29, 103), Colossis et Laodiceae vicina (*Col.* 4, 13 et v. EPAPHRAS). Sita erat ad septemtrionem Lyci fluvii, qui in Maeandrum incidit, in regione terrae motibus facile concussa (*Strabo* XII. 8, 17; *ed. Cas.* 579). Iuxta urbem erant aquae calidae et Plutonium scil. sub parvo supercilio montis supra incumbentis foramen modicum, oppletum nebuloso et crasso vapore (*Strabo* XIII. 4, 14; *ed. Cas.* 629), Matris tantum Magnae sacerdoti innoxium (*Plin.* II. 93, 208). Ruinae urbis cernuntur apud vicum *Pambūk Kalessi*.

Cf. *Chandler*, Trav. in Asia Minor, 1817 I. 264 s.; *Hamilton*, Researches in Asia Minor, 1842 I. 507 s.; *W. M. Ramsay*, Cities and Bishoprics of Phrygia I. 1 p. 84 s.; *C. Humann*, *C. Cichorius* *W. Judeich*, *Frz. Winter*, *Altertümer von Hierapolis*, Berlin 1898.

HIEREMIAS scribitur in Vulgata Ps. 64, 1; 136, 1 pro Ieremias.

HIERONYMUS (Ἱερώνυμος), unus ex praefectis regionum, qui in Iudaeos saevire pergebant (2 Mach. 12, 2), postquam Lysias tutor Antiochi V. Eupatoris pace cum Iuda Mach. composita in Syriam rediit (12, 1; cf. 11, 1-13).

HIN v. MENSURAE.

HINNULUS dicitur imprimis de capulis cervi et capreae (*Cant.* 2, 9. 17; 4, 5; 7, 4; 8, 14); v. CAPREA, CERVUS. — Semel S. Hieronymus hebr. יַעֲלֵת־הֶן vertit *gratissimus hinnulus* (*Prov.* 3, 19); יַעֲלֵת־הֶן est feminina forma nominis יַעֲלֵת, quod probabiliter ibicem designat; v. IBEX.

HIR (חִיר, Ἥρ), primus ex filiis Caleb filii Iephone (1 Par. 4, 13). Nomen hebr. probabilius est חִיר et Waw additum potius ad nomen proprium sequens trahendum est ut Waw copulativum.

HIR (חִיר, Ἥρ, B Ἥρα), Beniaminita, pater Sepham et Hapham et Maachae, quam Machir uxorem duxit (1 Par. 7, 12). Cf. *F. de Hummelauer*, *Comm. in Num.* p. 178. 183.

HIRA v. IRA 3.

HIRAM, nomen proprium, quo in Vulgata nomina diversa hebraica reduntur.

1. Hiram (חִירָם, Ζαρφάθ) enumeratur ultimus inter undecim duces Edomitaram, qui Horraeis exstirpatis totam regionem Edom occupaverant (*Gen.* 36, 43; 1 Par. 4, 34). In lectione LXX Ζαρφάθ *Ewald* putat nomen ducis duodecimi צַפְרָיָה ex *Gen.* 36, 11. 15 latere, unde concludit in textu primigenio duodecim nomina adfuisse (*Geschichte des Volkes Israel ed.* 3 I. p. 530); sed haec ratio vix sufficiet ad numerum duodenarium tribuum Edom stabiliendum. Inter reges, qui Sennacherib tributum solvebant, commemoratur *Hiramum mat Uduum-maai* (*Taylor Cylinder* 2, 54); eundem esse nostrum Hiram regionis Edom censet *C. I. Ball* in *Smith-Fuller*, *Dict. of the Bible* I. 1441.

2. Hiram (חִירָם, הִירֹם, הִירָם; Ζαρφάθ, Ἥραμ), rex Tyri, qui ligna cedrina et artifices Hierosolyma misit ad aedificandam domum regis David amici sui et iterum ad aedificandam domum Domini et domum regis Salomonis, quocum foedus pepigerat. Classis Salomonis cum classe Hiram coniuncta commercium agebat. Nautae Salomonis a nautis Tyriorum adiuti de Asiongaber in sinu Aelanitico usque in Ophir navigabant indeque aurum, ligna thyia, gemmas pretiosas afferebant. Neque vinculum foederis remissum est, cum Hiram illas viginti civitates Chabul a Salomone sibi donatas illi redderet, quod minus sibi placuissent. Cf. 2 Reg. 5, 11; 3 Reg. 3, 1 ss.; 9, 11 ss.; 10, 11. 12; 1 Par. 14, 1; 2 Par. 2, 1 ss.; 8, 2. 18; 9, 10. 21; de civitatibus Chabul vide s. v.

Ex testimonio *Dii* Phoenicum historiographi et *Menandri* Ephesini (apud *Flav. Iosephum*, *Ant.* VIII. 5, 3; cont. Ap. 1, 17. 18) Hiram (Ἐῤῥάμ) erat filius Abibali regis et annos 34 regnavit vita ad annum quinquagesimum tertium producta, plurima templa extruxit ac donariis ornavit. Tyrum urbem ampliorum redditu aggeribusque munivit, in bello prospera fortuna usus est, cum Salomone certamen solvendi aenigmata subtili, quo in certamine Hiram primum

victus magnam pecuniae vim pro muleta Salomoni pependit, postea vero per Abdomonem Tyrium quendam non solum aenigmata proposita solvit, sed alia proposuit, quae ipse Salomon solvere non valens multum pecuniae regi Hiram pependit. Epistulas quoque Salomonis ad Hiram et Hiram ad Salomonem exhibet Flav. Iosephus (Ant. VIII. 2,6-8) asserens harum epistularum exemplaria apud Tyrios quoque in publicis tabulariis conservari. Quod *Tatianus* (adv. Graecos 37, M. 6,880) ex historiis Phoenicium refert Hiram regem filiam suam Salomoni in matrimonium dedisse, aliunde non confirmatur; inter mulieres alienigenas, quas Salomon adamavit, recensentur 3 Reg. 11,4 Sidoniae, non vero Tyriae.

Ex testimonio Menandri de 34 annis regni Hiram (Ant. VIII. 5,3) difficultas chronologica oritur, quae illud Menandri assertum dubium reddit. Discimus enim ex 3 Reg. 6,1 et 9,10 templum Salomonis aedificari coeptum esse anno quarto regni Salomonis, et opere viginti annis post completo regem Hiram adhuc superstitem fuisse. Regnavit igitur Hiram una cum Davide ad summum per decem annos, immo si Flav. Iosephus (Ant. VIII. 3,1; cont. Ap. 4,18) recte asserit templum aedificari coeptum esse anno duodecimo regni Hiram, esse modo per octo annos. Immo vero David domum cedrinam aedificavit regnante Hiram, illa aedificata cogitavit de templo exstruendo, adulterium cum Bethsabe commisit, Salomonem genuit. Ergo Salomon adhuc infans regnum adeptus esset; hoc autem admitti nequit, etsi ignoramus quot praecise annos natus Salomon regnare coeperit. Unde patet longius tempus requiri pro regno Hiram quam Menander assignat.

Fuerunt qui duos reges Hiram distinguerent, amicum Davidis et amicum Salomonis. Contra quos iam *F. C. Movers* (Phönizier II. 1 p. 147 ss.) urget 2 Par. 2,3 Hiram amicum Salomonis exhiberi eundem, qui fuerit amicus Davidis. Ipse *Movers* existimat in libris Samuelis non servari ab auctore sacro ordinem chronologicum et eo tempore, quo David domo cedrina aedificata de

templo exstruendo cogitaverit, Salomonem iam natum fuisse; eandem opinionem approbat *J. F. Stenning* apud *Hastings*, Dict. of the Bible II. 389 b. Verum obstat, quod Nathan propheta, qui templum a Salomone exstructum iri Davidem docet, loqui videatur de Salomone nondum nato, sed nascituro; neque haec difficultas a *Movers*, qui eam ipse sensit, sufficienter soluta dici potest (l. c. p. 149).

Nomen Hiram regis hodie quoque connectitur cum sepulcro Hiram, *Qabr Hīrām* (vel *Hārīrān*, ut alii se audivisse affirmant) una hora et 45 minutis a Tyro inter meridiem et orientem; monumentum est phoenicium, sed inscriptionibus carens, quare antiquitas certo determinari nequit. Cf. *Baedeker-Benzinger*, Pal. u. Syrien ed. 3 p. 288.

A nostro Hiram distinguendus est alter Hiram rex Tyri, qui per viginti annos regnavit et cuius anno decimo quarto Cyrus rex Persarum imperium accepit (*Flav. Ios. cont. Ap. 4,21*).


3. Hiram (הִירָם vel הוּרָם, Ἡράμ), artifex a rege Hiram Salomoni missus ad perficiendam variam templi suppellectilem (3 Reg. 7,13-43; 2 Par. 2,13. 14; 4, 11-16); habebat patrem Tyrium, matrem autem Danitam, quae etiam vidua de tribu Nephthali vocatur et hinc priorem maritum Nephthalitam habuisse censenda est. Singularis titulus אֶבֶן (in contextu אֶבְנֵי et אֶבְרֵי) ei tribuitur 2 Par. 2, 13 et 4,16 i. c. pater, magister, consiliarius.

HIRAS (הִירָה, Ἡράς) Odollamites, amicus Iuda patriarchae (Gen. 38,1. 12. 20). Pro amico eius (יָרֵה) Vulgata et LXX reddunt pastorem eius (רִעָה).

HIRCANUS (Ἱρκανός), filius Tobiae cuiusdam, vir valde eminens, qui magnos thesauros in aerario templi depositos habebat eo tempore, quo Heliodorus templum direpturus ex Syria advenit (2 Mach. 3,11). Apud Flav. Iosephum (Ant. XII. 4,2 s.; 5,1) commemorantur filii Tobiae, qui ex sorore Oniae II. pontificis nati erant et postmodum Menelao impio pontifici adhaerebant et

inter illos unus Iosephus nomine, qui ex fratris sui filia genuit Hyrcanum, virum in perturbationibus publicis illius temporis satis celebrem. Noster igitur Hircanus 2 Mach. 3, 11 a nonnullis censetur unus ex illis filiis Tobiae, ab aliis (Grotius, Calmet, Riehm-Baethgen, Handwörterbuch des Bibl. Altert. s. v.) Hyrcanus filius Iosephi filii Tobiae; in hac altera interpretatione ellipsis : Hircanus Tobiae (τω Τωβίω) suppleri

debet addendo : *nepos*, cum tamen ex communi usu loquendi supplendum sit *filius* scil. Tobiae vel ut Ewald (Gesch. des Volkes Israel ed. 3 IV. p. 353) opinatur, filii illius Iosephi etiam vocabantur filii Tobiae scil. ab avo suo. E. Schürer (Gesch. des jüd. Volkes ed. 3 I. p. 193. 196) coniiciens inter filios Iosephi unum nomine Tobiae fuisse genealogiam familiae Tobiae hoc modo construit :



HIRCUS v. CAPER.

HIRSEMES urbs v. BETHSAMES 1.

HIRUNDO. 1. Vox *hirundo* in Vulgata tribus nominibus textus primigenii respondet. In libro Tobiae dicuntur « ex nido hirundinum dormienti calida stercora super oculos » incidisse (Tob. 2, 11), ubi textus graecus nomine generaliore στρουθία utitur, quod varias aves minores, velut passeret et hirundines aliasque significat. Deinde in epistula Ieremiae ad ostendendam idolorum vanitatem inter alia exempla additur « supra corpus eorum et supra caput eorum volant noctuae et hirundines », ubi in graeco habetur χελιδόνες (Baruch 6, 21). Denique bis hebr. כַּיִם כַּיִם vcl כַּיִם כַּיִם (Qeri Ier. 8, 7) a S. Hieronymo hirundo exponitur, scilicet in prophetia Ieremiae, ubi cum ciconia, turture, grue inter aves migratorias nominatur (Ier. 8, 7), et in cantico Ezechiae, ubi gemitus aegrotantis voci hirundinis pipientis comparatur (כַּיִם כַּיִם Is. 38, 14, Vulgata sicut pulvis hirundinis; de כַּיִם cf. CICONIA). — Ex versionibus antiquis LXX et Theodotus vocem hebraicam in utroque loco similiter ut Vulgata χελιδόν i. e.

hirundinem explicant; Symmacho כַּיִם in Ier. est *cicada* (S. Hieron. in Ier.), in Is. autem pariter χελιδόν, eandemque avem Arabs designat; Targum chaldaicum, si ordinem vocum consideras, כַּיִם *gruem* (כורכיא) et כַּיִם *hirundinem* (כורכיתא) appellat; at haud improbabili videtur explicatio Bocharti, ordinem vocabulorum a paraphrasta esse inversum, ita ut ipse quoque cum reliquis כַּיִם *hirundinem* interpretetur, quamquam Hebraei ex verbis Ionathae occasionem sumpserint *gruem* exponendi. Idem de versione syriaca simpliciter dicendum esse, quae in verbis Ezechiae simpliciter *hirundinem* (כורכיתא) exponit, item in epistula Ieremiae pro gr. χελιδόν, in altero vero Ieremiae loco (8, 7) inverso ordine *gruem* et *hirundinem* habet (כורכיא וכורכיתא).

2. Satis igitur magnus interpretum antiquorum consensus quoad hirundinem habetur. Ac certe imprimis χελιδόν sine dubio est vera hirundo, cuius variae species regionem orientalem frequentant (*Hirundo Savignii* Stephens, *H. rustica* Linné, *H. rufula* L., *Chelidon urbica* L., *Cotyle riparia* L., *C. rupestris* L., al.,

omnes ex ordine *Passerum*). Haud inepte vero etiam σποσθία libri Tobiae, quae Syro item sunt aves sensu generali (ܣܦܫܝܐ), quaeque in muro fuisse textus graecus et syriacus dicit, a S. Hieronymo hirundines vocantur, quamvis aliae aves minores a significatione vocis graecae non debeant excludi. Praeterea etiam כִּיט, quae ipso nomine vocem hirundinum per aerem volantium videtur imitari, aliquo modo hirundinibus certe adnumeranda est. At duo videntur ob stare, quominus ipsae verae hirundinis species eo nomine intellegamus: nam hirundines in Palaestina ex parte tantum migrare solent, multis in calidioribus terrae partibus remanentibus; unde minus apte a Ieremia inter aves migratorias tamquam exemplum adducerentur. Deinde nomen *sis* ab hodiernis quoque terrae incolis usurpatur non ad ipsam hirundinem (arab. *sunānā*), sed speciem affinem designandam, quae nomine scientifico nunc *Cypselus* audit (germ. *Mauerschwalbe*, gall. *martinet*, angl. *swift*), olim a Linneo *Hirundo* dicta. Huius quoque generis variae species vere migratoriae in Palaestina inveniuntur (*Cypselus apus* Illiger, *C. melba* Ill., *C. affinis* Gray), hirundinibus in habitu exteriori, volatu, vocibus satis similes, quamvis ad alium ordinem *Cypselomorpha* pertineant. Probabiliter in S. Scriptura variae aves similes eodem nomine appellantur. — Alio denique nomine hebraico plerisque vera hirundo videtur designari, scil. דָּוִדָּר, quod bis tantum occurrit et in Vulgata semel *passer* Prov. 26,2), alia vice *turtur* dicitur (Ps. 83[84],4); de quo v. PASSER.

Cf. Sam. Bochart, Hieroz. II. 59-68, ed. Rosenm. II. 602-14; E. F. K. Rosenmüller, Bibl. Alterth. IV. 2,340 s.; H. O. Lenz, Zool. d. alt. Griech. u. Röm. 298-302; L. Lewysohn, Zool. d. Talmuds 206-9; H. B. Tristram, Nat. Hist. ed. 8,204-8; id. Fauna and Flora of Pal. 60-3. 82-4; J. G. Wood, Bible Animals 381-91; P. Cultreva, Fauna bibl. 267 s.; Lennius-Ludwig, Synopsis I. 1 ed. 3, p. 360. 386; A. E. Bruchm, Tierleben ed. 3, IV. 518-33; G. Loreta, La zoologia nella Bibbia 224-6. — Etiam in monumentis assyriacis et aegyptiis hirundo

haud raro occurrit; cf. Frd. Delitzsch, Assyri. Thiernamen 101 s.; W. Houghton in Trans. Soc. Bibl. Arch. VIII. 1884, 72-4; Wilkinson-Birch, Manners and Customs II. 114; III. 319.

L. FONCK.

HISPANIA (Ἰσπανία, Σπανία). Aliqua regio meridionalis Hispaniae in Vetere Testamento commemoratur nomine Tharsis (vide s. v.), Hispania scil. baetica, cui flumen Baetis nomen dedit. Iudas Machabaeus inter alia de rebus gestis Romanorum etiam fama accepit: quanta fecerunt in regione Hispaniae et quod in potestatem redegerunt metalla argenti et auri quae illic sunt et possederunt omnem locum consilio suo et patientia (1 Mach. 8,3); atque Romani post bellum secundum punicum diuturnis et aeribus pugnis Hispaniam sibi subicere adnitebantur. Apostolus Paulus in Hispaniam proficisci statuit, postquam in Asia et Macedonia et Graecia coetus Christianorum fundaverat. Proficisci voluit per Romam et a Romanis sperabat se iri illuc deductum (Rom. 15,24. 28). Eum iter illud post priorem suam captivitatem revera suscepisse, documento est quod habet Clemens romanus (epist. I ad Cor. cap. 5) Paulum venisse usque ad occidentis terminum (ἐπὶ τὸ τέμαχος τῆς ὀρέσεως); accedit Fragmentum Muratorianum (lin. 37. 38), quo efficitur de « profectioe Pauli ab urbe ad Hispaniam proficiscentis » medio saeculo secundo in ecclesia romana nullum dubium fuisse.

Multitudinem et praestantiam metallorum in Hispania (1 Mach. 8,3) celebrat Posidonius rhetor (apud Strabonem III. 2,9; ed. Cas. 147) quasi instinctu quodam poetico raptus: non enim dives modo, inquit, terra illa est, sed et infra se opes habet conditas; et revera apud istos homines infra terram non Hades, sed Pluto (sive Dis quasi dives habitat. Quae Posidonius de Hispania meridionali (Turdetania), eadem Plinius III. 3,30 de universa Hispania testatur: Metallis plumbi, ferri, aeris, argenti, auri tota ferme Hispania scatet, citior et specularis lapidis, Baetica et minio: sunt et marmorum lapidinae. Cf. Diod. Sic. 3,35; Flav. Ios. Bell. iud. II. 16,4.

HOBA הֹבָה, Ὁβᾶ), quae est ad laevam i. e. ad septemtrionem Damasci, urbs ad quam usque Abraham persecutus est Chodorlahomor eiusque socios (Gen. 14,15). *Eusebius* (Onom. ed. Lag. 301,32) asserit locum Ὁβᾶ in illis regionibus suo tempore exstilis, quem Ebionitae incoluerint. Censetur esse vicus hodiernus *Qābān* ad radices Antilibani dimidia fere hora a Damasco septemtrionem versus (*Furrer*) vel minus probabiliter vicus *Hoba* 20 horis a Damasco septemtrionem versus (*Wetzstein*). — Hoba nostra a nonnullis supponitur esse Choba (Iudith 15,5 graece), quare v. **CHIBA** 2.

Cf. *Furrer* in Zeitschr. d. D. Pal.-Ver. VIII. 1885 p. 40; *Wetzstein* apud *Franz Delitzsch*, Genesis 1887 p. 561.

HOBAB הֹבָב, Ὁβᾶς, Ὁβᾶς), filius Raguel Madianitae et frater Sephorae, uxoris Moysis, cognatus Moysis (הֹתֵן), a Moyse inductus est, ut Israelitis se adiungeret ductor viarum per desertum: « noli nos relinquere; tu enim nosti in quibus locis per desertum castra ponere debeamus et eris ductor noster; cumque nobiscum veneris, quidquid optimum fuerit ex opibus quas nobis traditurus est Dominus, dabimus tibi » (Num. 10,31. 32). Filii eius et posterius habitabant cum filiis Iuda (Iud. 1,16) sub nomine Cinacorum (cf. Iud. 4,11). Sacerdos Madian, cuius filiam Moyses duxit uxorem, appellatur modo Raguel, modo Iethro (cf. Ex. 2,16. 18-21; 3,1; 4,18; 18,1), quare probabilissimum est sacerdotem illum duo habuisse nomina et Iethro nomen esse dignitatis. Alii nodum ita solvere maluit, ut Raguel faciant patrem Iethro et avum Hobab et Sephorae; sed prior sententia facilius accommodatur ad Ex. 2,16. Ex. 21; Num. 10,29. Post egressum ex Aegypto Iethro adduxit ad Moysen uxorem et duos filios eique sapiens dedit consilium ad gubernationem populi (Ex. 18,1-25). Iethro abiit in regionem suam; Hobab autem Israelitis comitatus est (cf. Ex. 18,27; Num. 10,31. 32; Iud. 1,16); quare nullo modo audiendi sunt qui Iethro eundem esse velint atque Hobab; neque obstat quod uterque

dicitur הֹתֵן Moysis; nam vox latiore significato de cognato adhibetur (cf. הֹתֵן).

HOBA v. **HABIA**.

HOD (הֹד, Ὠδ), unus ex filiis Supha de tribu Aser (1 Par. 7,37).

HODES (הֹדֶשׁ, Ὠδς), uxor Sabaraim Beniaminitae, quae in regione Moab septem filios genuit, principes in familiis suis (1 Par. 8,9).

HODSI הֹדְשִׁי, Ὠδς), Vulgata: terra inferior Hodsi, LXX γῆ Ὁδσῶν ἢ ἔστιν Ἀδασσι (in censu populi per Ioab facto recensetur inter terram Iazer in Galaad et Dan silvestria seu Lais-Dan (2 Reg. 24,6). Textus sine dubio corruptus est. Legendum videtur אֶרֶץ הַהָתִים אֶרֶץ קִדְשָׁה terra Hethaeorum usque Cades; cf. *F. de Hummelauer* ad h. l. qui defendit intellegendam esse Cades seu Cedus tribus Nephthali, dum alii (*Vigouroux*, *Driver*) praeferunt Cades urbem principalem Hethaeorum ad Orontem fluvium sitam haud longe ab Emesa (*Höms*) meridiem versus. Emendationem textus supra propositam confirmat recensio Lucianea: εἰς γῆν Χετταίου Καδής.

De urbe Cades Hethaeorum seu *Qodshu* in hieroglyphis aegyptiacis vide *Lepsius*, Denkmäler, Abth. III. 158. 159. 164; *W. Max Müller*, Asien und Europa nach alt-ägypt. Denkmälern 1893 p. 213 s. — Cf. *Vigouroux*, Dict. de la Bible II. 367-369 et eiusdem *Mélanges bibl. ed. 2 p. 340 ss. 351 s.*

HOLDA, OLDA (הֹלְדָה, Ὀλδς Ὀλδς), prophetis, uxor Sellum custodis vestium (sive sacerdotalium sive regiarum), quam Iosias rex per legatos consuluit de libro Legis ab Helcia sacerdote reperto (4 Reg. 22,14; 2 Par. 34,22); habitabat in Ierusalem in Secunda i. e. in parte quadam urbis secunda seu urbe inferiore in colle Acra sita (cf. Soph. 1,40; *Flav. Ios. Ant. XV. 11,5*: ἡ ἄλλη πόλις). Eo igitur tempore i. e. anno 18. Iosiae regis haec prophetis maxima fruebatur auctoritate, immo maiore, ut videtur, quam Ieremias qui anno 13. Iosiae ad munus propheticum vocatus est admodum iuvenis. Aliqui interpretes censent eo tempore Ieremiam ab urbe Ierusalem abfuisse.

HOLDAI הֹלְדָי. 1. Princeps turmae 24000 virorum, quae mense duodecimo regi ministrabat, Netophathites, de stirpe Gethoniel vel potius Othoniel (1 Par. 27, 15).

2. Vide HELEM 2.

HOLOCAUSTUM, HOLOCAUTOMA. Actus praeclarissimus religionis i. e. cultus et adorationis Dei est sacrificium, quo Deus tamquam supremus rerum omnium dominus agnoscitur et colitur eiusque gratia efflagitur. In holocausto, uti nomen dicit, victima tota igne sacrificali consumebatur, quo ritu integra hominis ad Deum subiectio perfecte significatur. Prima holocausti mentio fit post diluvium (Gen. 8, 20), sed iam sacrificium Abel ita describitur, ut holocaustum fuisse videatur (Gen. 4, 4), Abraham iussus est holocaustum offerre et obtulit holocaustum arietem pro filio (Gen. 22, 2. 13), Iob quoque offerebat holocausta (Iob 1, 3; 42, 8).

De quibus, quo ritu, quando holocausta sint offerenda, lege mosaica accurate determinatur. Offerri poterant animalia immaculata masculina de armento, de pecoribus (ovibus, capris; in turturibus et columbis genus masculinum non exposcitur (Lev. 1, 3. 10. 14). Ritus is est: ponet manum (offerens) super caput hostiae et acceptabilis erit atque in expiationem eius proficiens; immolabitque coram Domino et filii Aaron sacerdotes offerent sanguinem eius fundentes per altaris circuitum, detractaque pelle hostiae artus in frusta concident et intestinis pedibusque aqua lotis frusta cum capite et adipe adolebit sacerdos super altare (Lev. 1, 4 ss.); sacerdos qui offert habebit pellem victimae (Lev. 7, 8). Ritus in offerendis columbis describitur Lev. 1, 14-17. Simul cum holocausto fertum quoque offerendum erat.

Lege praescribebantur haec holocausta: singulis diebus, mane et vespere agnus anniculus erat offerendus cum ferto ex similia oleo conspersa et vino (Ex. 29, 38-42; Num. 28, 3-8); die vero sabbato duo agni cum ferto pariter duplicato (Num. 28, 9. 10). Praeterea calendis, diebus septem sollemnitatis azyrnorum et die pentecostes offerri de-

bebant diebus singulis vituli duo, aries unus, agni anniculi septem, similiter cum ferto Num. 28, 41-31. Porro primo die et decimo die mensis septimi et ultimo die festi tabernaculorum offerri debebant vitulus unus, aries unus, agni anniculi septem cum ferto (Num. 29, 1-11. 35-38; singulis septem diebus festi tabernaculorum suis quoque assignatur numerus holocaustorum: duo arietes, agni duo et vituli tredecim die primo, duodecim die altero, undecim die tertio et ita porro (Num. 29, 13-34) cum fertis. Insuper eiusmodi sacrificia praescribebantur puerperis Lev. 19, 6-8, leprosis mundatis Lev. 14, 4 s., iis qui variis laborant immundities Lev. 15, 14. 15. 29. 30, Nasiraeis Num. 6, 10-21.

Offerebantur quoque holocausta ad arbitrium piorum in dedicatione tabernaculi Num. 7, 2 s., in translatione arcae 1 Reg. 6, 14; 2 Reg. 6, 17; 3 Reg. 8, 5; 1 Par. 16, 1 etc., in dedicatione templi 3 Reg. 8, 64; 2 Par. 7, 5, et generatim relinquebatur pietati singulorum, ut in quovis eventu vel lacto vel tristi Dei favorem sibi sacrificio conciliarent; id quod factum esse plurima demonstrant exempla (cf. Ios. 8, 31; Iud. 6, 26; 11, 31; 20, 26; 1 Reg. 7, 9; 13, 9; 15, 12; 3 Reg. 3, 4; 1 Par. 29, 21; 2 Par. 29, 27; Esdr. 6, 17; 8, 35; Iudith 16, 22 etc. etc.). Verum prophetae sedulo monebant non haec sacrificia per se Domino placere, sed Deum requirere obedientiam animorum, pietatem, devotionem; ita Samuel: numquid vult Deus holocausta et victimas et non potius ut obediatur voci Domini? melior est enim obedientia quam victimae et auscultare (obedire) magis quam offerre adipem arietum (1 Reg. 15, 22); cf. Ps. 39, 7 s.; 49, 8 s.; 50, 18. 19; Is. 1, 11 s.; Ier. 6, 20; et 7, 22 docet bona foederis esse obedientibus promissa et in liberatione ab Aegypto foedus esse initum promissione obedientiae a populo data Ex. 19, 5. 6. Quae admonitiones eo magis necessariae erant, quo proniores erant Iudaei ritibus et caerimoniis externis acquiescere et praestationibus illis legalibus confidere quasi in iis solis cardo rerum verteretur (cf. Luc. 18, 11. 12).

I. KNABENBAUER.

HOLOFERNES (Ὁλοφέρνης), dux regis Assyriorum et princeps militiae eius, qui, uti in libro Iudith 2,4 etc. narratur, cum ingenti exercitu egreditur ad terras regi Assyriorum subiiciendas, qui demum contra Iudaeos belligerans Bethuliam (vide s. v.) obsidet, sed a Iudith interimitur, cum ebrietate oppressus dormiret. Nomen Holofernes multis videtur originem prodere persicam (cf. Dataphernes, Artaphernes, Tisaphernes etc.). Neque id mirum videri potest; cum enim Persae diu Assyriis (postea Medis) essent subditi, nobiles Persarum variis functos esse muneribus in regno assyriaco per se liquet (cf. *De Moor*, Le livre de Iudith p. 37). Nomen hoc Holofernes vel Orophernes in historia quoque profana reperitur; cf. *Polyb.* III. 5,2; XXXII. 20,4, 9; XXXIII. 12,2. 3. 9; *Appian.* Syr. 47; *Diodor. Sic.* 31,19. 32. 34.

HOLON, OLON, HELON (חֶלֶן, חִילָן; Χαλόν, ἢ Γελλά, Σελνά), urbs sacerdotalis (Ios. 21,13; 1 Par. 6,58 hebr. 43, LXX 37), quae in prima seu meridiana provincia montis Iuda recensetur (Ios. 13,31). Situs est ignotus.

HOMAM v. HEMAN 1.

HOMICIDIUM. Cura singulari providetur vitae hominis; nam ut quivis deterreatur a caede, iam in primordio statuitur lex: quicumque effuderit humanum sanguinem, fundetur sanguis illius (Gen. 9,6); proinde sanctione gravissima cavetur ne quis vitam alterius impetaret; simulque ratio affertur sublimis, cur homini non competat ius in alterius vitam: ad imaginem quippe Dei factus est homo. Porro eadem lex ac sanctio repetito inculcatur; ita in decalogo: non occides (Ex. 20,13; Deut. 5,17); dein: qui percusserit hominem volens occidere morte moriatur (Ex. 21,12; Lev. 24,17, et qui percusserit mulierem praegnantem ita ut mors sit subsequuta, reddet animam pro anima (Ex. 21,23) et: ne polluat is terram habitationis vestrae quae insontium cruore maculatur, nec aliter expiari potest nisi per eius sanguinem qui alterius sanguinem fuderit (Num. 35,33). Immo quo magis decla-

raretur horror homicidii, ipsum quoque animal quod hominem occidit iubetur occidi (Gen. 9,5) et bos qui cornu percusserit virum aut mulierem si mortui fuerint, lapidibus obruetur et non comedentur carnes eius; immo si herus cognoverit bovem esse cornupetam neque tamen eum recluserit isque occiderit aliquem, et bos lapidibus obruetur et dominum eius occident (Ex. 21,28. 29). Iterum poena mortis proponitur: si quis ferro percusserit et mortuus fuerit percussus, si lapidem iccerit et ictus occubuerit, si ligno percussus interierit, percussoris sanguine vindicabitur; propinquus occisi homicidam interficiet, statim ut apprehenderit eum interficiet. Atque ei qui ex odio alteri insidias struxerit eumque occiderit nihil profuerunt civitates refugii; verum arripient eum de loco effugii tradentque in manu proximi, cuius sanguis effusus est et morietur (Num. 35,16-21; Deut. 19,11-13); immo ab altari meo avelles eum ut moriatur (Ex. 21,14; cf. 3 Reg. 1,50; 2,28). Sed si quis fortuito, sine insidiis et absque odio, alium occidisset, ille defendebatur a vindicta; nam pro eo constituebantur urbes refugii; ibi a senioribus causa eius diiudicabatur, et innocentia eius statuta securus ibi debebat. Mortuo demum sacerdotemagno licuit ei in terram suam regredi. Quodsi autem ante mortem pontificis extra fines urbis refugii fuerit inventus, potuit ultor sanguinis absque noxa eum interficere (Ex. 21,13; Num. 35,11-28; Deut. 19,1-13). Civitates refugii decernuntur Ios. 20,1-9. Si quis autem servum suum vel ancillam percusserit virga et mortui fuerint in manibus eius, « vindicta vindicabitur » (hebr. Ex. 21,20) i. e. conveniente poena a magistratu illius severitas reprimenda erit; si autem servus uno alterove die supervixerit, non subiacebit herus poenae; nam ipso damno punitur (Ex. 21,21).

I. KNABENBAUER.

HOMO. Constare hominem corpore ex rebus iam exstantibus formato et anima a Deo immediate producta quae vitam det, in narratione de creatione Adam (vide s. v.) clare docetur. Digni-

tas hominis ipsa illa narratione iam satis effertur; imprimis vero verbis Dei: faciamus hominem ad imaginem et similitudinem nostram (Gen. 1,26), quae similitudo uti in anima rationali et immortalis reuelet, ita quoque cernitur in dominatione: et praesit universae terrae (Gen. 1,26. 29; cf. 1 Cor. 11,7 vir imago et gloria Dei est, mulier gloria viri, cui scil. vir dominatur). Hominem fuisse creatum ad immortalitatem, satis declaratur Gen. 2,17 et Sap. 2,23. 24; item fuisse creatum ea animi conditione, ut appetitus inferiores plane subiecti essent rationi, eluceat ex Gen. 2,23 et Eccli. 7,30: hoc inveni quod fecerit Deus hominem rectum. Culpa autem sua ex felici illa conditione excidit, quam psalmista celebrat: minuísti eum paulo minus ab angelis; gloria et honore coronasti eum etc. Ps. 8,6-9. Merito itaque pergit Sapiens: ipse se infinitis miscuit quaestionibus (Eccli. 7, 30; hebr. 7,29: ipsi quaesierunt multa commenta). Ut autem homo malas reffrenet concupiscentias, Deus leges statuit et scelera variis poenis et iudiciis prosequitur, cuius rei exempla iam habentur in Cain, in diluvio, in lege de homicidio (Gen. 9,6), in decalogo etc. Hominem libero arbitrio esse praeditum et ei opem praestari a Deo, ut possit bene agere, iam consequitur ex eo quod Deus homini praecepta et adhortationes dat vel lege scripta et per legatos missos vel ipsa natura rationali magistra (Rom. 2,14): si volueris mandata servare, servabunt te; apposui tibi aquam et ignem; ad quod vulneris, porrige manum tuam; ante hominem vita et mors, bonum et malum; quod plaecerit ei, dabitur illi (Eccli. 15,16-18).

Perperam aliqui asserunt à S. Paulo doceri trichotomiam, cum corpus, animam, spiritum commemoret (cf. 1 Thess. 5,23). Sed attendi oportet in enumeratione oratoria ea posse distincte offerri quae aliquo modo varie sese manifestant; unde spiritus et anima referri possunt ad varias vias animae vires et facultates et appetitus; alias spiritus etiam dicitur mens hominis gratia Spiritus sancti illustrata et imbuta.

Quae sit Dei in genus humanum pro-

videntia et cura, brevissime Sapiens declarat: misereris omnium, quia omnia potes et dissimulas peccata hominum propter poenitentiam; diligis enim omnia quae sunt et nihil odisti eorum quae fecisti; nec enim odiens aliquid constituisti et fecisti (Sap. 11,24. 25) et sublimi modo explicatur: sic Deus dilexit mundum, ut Filium suum unigenitum daret (Ioan. 3,10), quomodo non etiam cum illo omnia nobis donavit (Rom. 8, 32) et: vult Deus omnes homines salvos fieri et ad agnitionem veritatis venire (1 Tim. 2,4); pariter eo quod Iesus docuit Patrem esse Deum et tanquam Patrem invocandum.

1. KNABENBAUER.

HON (פִּינ, "Avv), filius Pheleth de filiis Ruben erat cum Core, Dathan, Abiron inter eos qui surrexerunt contra Moysen et conquesti sunt, quod Moyses et Aaron sibi arrogarent auctoritatem (Num. 16,1 ss.). Eius mentio in subsequenti narratione et in interitu Core, Dathan, Abiron et ducentorum quinquaginta virorum iam non fit; unde forte concludere licet eum mox a rebellionem recessisse et cum Deo esse reconciliatum, antequam alii iusto Dei iudicio absumerentur. Probabilius vero textus hebr. ita emendandus est, ut tres tantum archirebelles habeantur et tertius Abiron dicatur filius Eliab filii Pheleth (vel potius Phallu) filii Ruben; cf. *F. de Hummelauer*, Comment. in Num. ad h. l.

HONOR. In commercio hominum inter se ratio communissima honoris exhibendi consistit in salutatione. Consuetus salutandi modus erat: pax tecum (Iud. 19,20; 1 Par. 12,18); David iussit saluari Nabal modo sollempniori: sit fratribus meis et tibi pax et domui tuae pax et omnibus quaecumque habes sit pax (1 Reg. 25,6). Alias utebantur quoque verbis: Dominus tecum, Dominus vobiscum (cf. Iud. 6,12; Ruth 2,4) et cum Booz ita messorum salutasset, isti respondent: benedicat tibi Dominus. Quod in Vulgata legitur: salutaverunt se verbis pacificis, ex hebr. est interrogare de salute (pace, scil. quomodo valeat; cf. Gen. 43,27; Ex. 18,7; Iud. 18,

15). Sensu altiore Christus suos salutavit : pax vobis eosque iubet pacem aliis apprecari, illam videlicet pacem quam ipse dat et quam mundus nequit dare (cf. Ioan. 14,27). Cum autem salutatio-nes et variae interrogationes fieri sole- rent prolixius, si erat festinandum, iniun- gebatur : neminem per viam salutaveritis i. e. non brevis illa formula consueta interdicebatur, sed solum ne maius temporis spatium collocutionibus insu- meretur (cf. 4 Reg. 4,29; Luc. 10,4). Hanc honoris et caritatis significationem omnibus exhiberi vult Christus : si salu- taveritis fratres vestros tantum, quid amplius facitis? nonne et ethnici hoc faciunt (Matth. 5,47)?

Ad maiorem honoris significationem salutatio addebatur profunda corporis inclinatio, immo prostratio; ita Abra- ham se prosternit in terram (Gen. 18, 2; 23,7), item Lot (Gen. 19,4); immo Iacob coram Esau quem timet sibi- que vult reconciliare, « adoravit pronus in terram septies » (Gen. 33,3) i. e. se pro- stravit; Abigail cum vidisset David de- scendit de asino et procidit coram Da- vid super faciem suam et adoravit super terram et cecidit ad pedes eius (1 Reg. 23,23). Ad honoris significationem Re-becca conspecto Isaac descendit de ca- melo (Gen. 24,64); item si quis sedebat, ad honorem alteri exhibendum surgen- dum erat; ita senes honorandi erant : coram cano capite consurge et honora personam senis (Lev. 19,32) et cum Bethsabée mater Salomonis intraret ad Salomonem, rex Salomon surrexit in oc- cursum eius adoravitque eam positus- que est thronus matri regis quae sedit ad dexteram eius (3 Reg. 2,19); etiam Iob se honoratum dicit, quia cum pro- cederet ad portam civitatis, senes as- surgentes stabant (Iob 29,8). In ratione loquendi honor alteri exhibebatur, cum loquens se diceret servum alterius : domine, ne transeas servum tuum (Gen. 18,3; cf. 19,2); ita Iacob quoque loqui- tur ad Esau : parvuli sunt quos donavit mihi Deus servo tuo (Gen. 33,5) et Mi- phiboseth loquitur ad David : quis ego sum servus tuus, quoniam respexisti super canem mortuum similem mei (2 Reg. 9,8; cf. 4 Reg. 8,13). Quomodo

honorari debeat quem rex voluerit ho- norari, exponit Aman (Esth. 6,8 ss.).

Rex qui victor redibat a pugna can- tificis et choreis honorabatur (cf. 1 Reg. 18,6. 7). Cum rex novus proclamaretur, buccina cecinerunt et clamaverunt : vi- vat rex (3 Reg. 1,40); etiam unusquis- que tollens pallium suum posuit sub pedibus regis incedentis (4 Reg. 9,13), qui honor Christo quoque exhibitus est; in tali pompa festiva flores quoque ra- mique spargebantur et facularum lumi- nibus et cantibus celebritas habebatur (2 Mach. 4,22; Matth. 21,8). Baltassar rex, filius Nabonidi, honoravit Danie- lem : indutus est Daniel purpura et cir- cumdata est torques aurea collo eius et praedicatum est de eo quod haberet po- testatem tertius in regno (Dan. 5,16. 29). Uti iam apparet ex 3 Reg. 2,19, qui ho- norandus erat, collocabatur ad dexteram (cf. Ps. 44,10; 109,1). Genua curvare, quae est saepius exhibitio adorationis Deo factae (3 Reg. 8,54; Esdr. 9,5; Is. 43,24), princeps ille quinquagenarius etiam timore percussus coram Elia non dubitavit (4 Reg. 1,13).

I. KNABENBAUER.

HOPPHA (הַפְּחָה, Ὁρροφφά, Ὁρροφά), sacerdos, cui tertiadecima sors in mini- sterio Domini a Davide designata est (1 Par. 24,13).

HOR (הֹר הָהָר). 1. Mons Hor ("ὄρος τὸ ὄρος) in quo Aaron mortuus est, castrame- tatio Israelitarum, qui de Cades ad mon- tem Hor in extremis finibus terrae Edom situm profecti sunt et inde in stationem Salmona per viam, quae ducit ad mare Rubrum, ut terram Edom circumirent (Num. 20,22. 23. 27; 24,4; 33,37. 38. 41; Deut. 32,50). Flavii Iosephus ex antiqua traditione collocat montem ex- celsum, in quo Aaron mortuus est, prope « locum quem Arabes metropolim suam putarunt, qui prius quidem Arce ("Ἀρρη) nominatus est, nunc vero Petra appellatur » (Ant. IV. 4,7). Idem tradunt Eusebius et S. Hieronymus (Onom. ed. Lag. 303, 88; 144,14) : « Or mons... iuxta civitatem Petram, ubi usque ad praesentem diem ostenditur rupes, qua percussa Moyses aquas populo dedit ».

Ibi hodie quoque *Djebel Nabī Harān*, mons prophetae Aaron, ostenditur.

Verum hanc traditionem erroneam esse contendunt et ex ipsis textibus alatis erunt recentiores (*Knobel, F. de Hummelauer, Trumbull, Guthe, Lagrange*), qui montem Ilor potius prope Cadesbarne quaerendum recte censent vel ut *Lagrange* accuratius definit: occidentem versus a valle *Araba*, meridiem versus a Negeb, septentrionem versus a Cades, in extremitate occidentali vel septentrionali terrae Edom.

Cf. *Knobel* ad Num. 20, 22 s.; *F. de Hummelauer*, *Comm.* in Num. p. 238; *H. Clay Trumbull*, *Kadesh Barnea* 1884 p. 127 s.; *Guthe* in *Zeitschr. d. D. Pal.-Ver.* VIII. 1885, p. 213. 214; *Lagrange* in *Revue bibl.* VIII. 1899 p. 376-378 et IX. 1900 p. 280-282.

2. Ilor (τὸ ὄρος τὸ ὄρος, Vulg. mons altissimus), mons in termino septentrionali terrae Chanaan inter mare Mediterraneum et introitum Emath (Num. 34, 7). A plerisque introitus Emath aqilonem versus a Libano quaerebatur et mons Ilor in extremo Libano septentrionali (cf. *Zeitschr. d. D. Pal.-Ver.* VIII. 1883 p. 27). Sed *I. P. van Kasteren* terminum septentrionalem terrae promissae infra Libanum et Hermonem maiorem legit atque montem Ilor censet esse extremum Libanum meridionalem seu *Djebel el-Shawif*, introitum vero Emath planitiem inter *Nahr Līṭānī* et *Nahr Hās-bānī*, quae hodie *Merdj 'Aytūn* audit. Atque huic monti, qui fere directe 570 m supra *Nahr el-Qāsimiye* assurgit, optime convenit interpretatio etymologica *Relandi*, qui Ilor non nomen proprium, sed appellativum esse suspiciens explicat דָּר דָּר דָּר דָּר assurgere montis. Quodsi eadem voces non Ilor mons, sed forsitan Ilor montis vertendae essent, corresponderent in eadem regione vel *Khīrbet Ilur* ad meridiem fluvii *Qāsimiye* vel *Khīrbet Harū* ad orientem anguli recti, quo fluvius versus mare Mediterraneum fluitur.

Cf. *Reland*, *Palaestina* 1714 p. 119; *I. P. van Kasteren* in *Revue bibl.* IV. 1895 p. 27-29 et tabulam geogr. p. 24.

HORA. Horae ut partis diei in nullo libro ante exilium scripto mentio fit.

Postea vocabulo שָׁעָה, quod proprie significare oculorum oblitum plerique lexicographi censent, hora designabatur. Saepius illa vox in libro Danielis occurrit, ut in illo Nabuchodonosoris decreto Dan. 3, 6: « Si quis autem non prostratus adoraverit, eadem hora (i. e. statim) mittetur in fornacem ignis ardentis ». Eadem significatione vox legitur 4, 30 et 5, 5. Daniel ipse, ut explanaret somnium regis Nabuchodonosor, coepit intra semetipsum tacitus cogitare quasi una hora (Dan. 4, 16) vel potius: tunc Daniel obstupuit שָׁעָה, quam vocem aliqui etiam recentiores cum LXX. Theodotione, S. Hieronymo vertunt: circiter per unam horam (*Trochon, Hitzig, Zöckler, Meinhold*), alii: quasi per unum momentum (*Rohling, Keil*); sed cum ex una parte Daniel vix per horae spatium coram rege constituisse censendus sit, ex altera parte longior momento mora requiratur, ut rex Daniele m conturbatum adverterit et monendum esse duxerit ne timeat, contextui maxime consonum est ea voce notionem alicuius morae vel generaliter alicuius partis temporis ingeri (cf. *Knabenbauer* ad Dan. 4, 16).

Centum circiter et viginti annis ante exilium Hierosolymis horologium solarium exstitisse notum est, quod Ezechias piissimus rex a patre suo Achaz hereditarium acceperat et in quo plus viginti gradus erant. Regi enim cum esset mortui proximus, Isaia propheta iussu Domini dixit: « Praeceptum domui tuae: morieris enim tu et non vives ». Sed propheta antequam « egredieretur mediam partem atri », a Deo remissus est, ut declararet regem sanatum iri dieque tertio templum Domini ascensurum esse. « Cui » signum petenti, quo praedictionem veram esse intellegeret, « ait Isaia: Hoc erit signum a Domino, quod facturus sit Dominus sermonem, quem locutus est: Vis ut ascendat הַלֵּל umbra decem lineis (בְּעֶשְׂרֵת) an ut revertatur (יָשִׁיב) totidem gradibus? Et ait Ezechias: Facile est umbram crescere (לְרַבּוֹת) decem lineis: nec hoc volo ut fiat, sed ut revertatur retrorsum de-

cem gradibus. Invocavit itaque Isaias propheta Dominum et reduxit umbram per lineas, quibus iam descenderat (פָּרָטָה) in horologio Achaz retrorsum decem gradibus » (4 Reg. 20,4-11; cf. Is. 38,8; Eccli. 48,26, graece 48,23). Quo portento etiam Merodach Baladan, rex Babyloniorum, aliquam causam praelendit, ut ad regem mitteret legationem principum Babylonis, qui interrogarent de portento, quod acciderat super terram (2 Par. 32,31; cf. 4 Reg. 20,12 s.). Cur eiusmodi causam praelendere potuerit, quasi vellent Babylonii certiores fieri de solarii miraculo, facile intelligitur ex Herodoti verbis (2,109): « Nam polum quidem et gnomonem et duodecim diei partes a Babyloniis Graeci acceperunt » (πόλον μὲν γὰρ καὶ γινώμονα καὶ τὰ δωδέκα μέρη τῆς ἡμέρας παρὰ Βαβυλωνίων ἔμαθον οἱ Ἕλληνες).

Ex iis quae in sacris libris narrantur, non constat quale fuerit illud solarium regis Achaz. Apud Herodotum l. c. potius videtur fuisse clavulus axi caelesti parallelus, gnomon vero virga aliqua erecta.

Vitruvius, qui in castris Iulii Caesaris militans machinis bellicis praefectus erat, in suo opere : De Architectura, ed. Hermann Müller-Strubing, Lipsiae 1867, lib. IX. cap. vi. (ix.) multa et varia enumerat solaria, ut : « Hemicyclium excavatum ex quadrato ad enclinaque succisum Berosus Chaldaeus dicitur invenisse; scaphen sive hemisphaerium Aristarchus Samius, idem etiam discum in planitia; arachnen Eudoxus astrologus, nonnulli dicunt Apollonium ». Praeterea commemorat : « plinthium... πρὸς τὰ ἱστορούμενα... πρὸς πᾶν κλίμα... pellecium... conum... pharetram... conarachnen... conicum plinthium... antiochium... viatoria pensilia... ».

Apud Graevium, Thesaurus Graec. Ant. (vol. IX. p. 1278) concha hemicyclia memoratur.

Magnum gnomonem eumque in publico positum describit Plinius (XXXVI. 10,72) : « Ei (obelisco), qui est in campo (Martio), divus Augustus addidit mirabilem usum ad deprendendas solis umbras dierumque ac noctium ita ma-

gnitudines, strato lapide ad longitudinem obelisci, cui par fieret umbra brumae confectae die, sexta hora paulatimque per regulas, quae sunt ex aere inclusae, singulis diebus decresceret ac rursus angesceret, digna cognitores ».

Neque plus certi affirmari potest de graduum vi ac potestate quam de forma solarii regis Achaz. Omnia enim quae diximus solaria non partes modo diei indicant, verum anni etiam tempora. Nam ut gnomonis umbra meridie brevior est quam sole vel oriente vel occidente, ita etiam longior est hiemis tempore quam aestatis. Quare non necesse est gradus quos diximus intellegantur partes diei. Sed si sunt partes diei, inter solis ortum et occasum, modo Ezechias solarium bene intellexerit, plus viginti gradus erant.

Quibus praemissis addere iuvat, quae Knabenbauer ad Is. 38,8 adnotat : « Voce ipsa *graduum*, dein quod umbra dicitur descendere, sese extendere, quod LXX habent ἀναβαίνουσιν οὗς κατέβη ἡ σκιά, eorum commendari videtur sententia, qui censent in fastigio collis rotundi columnam vel obeliscum fuisse positum, ita ut eius umbra in gradus (per quos quaquaversus ascendeatur ad summitatem) proiceretur et variae diei partes ex longitudine et loco umbrae indicarentur... Nostro autem loco Chaldaeus praelat *umbram lapidis horarum*, qua expressione potius horologium alio modo constructum innuitur, quod ad horologia solaria accedat. Atque revera voces aeque bene ad gnomonem eiusque caesuras, quibus horae indicantur, adaptari possunt. Nam caesurae illae et lineae, per quas umbra gnomonis transit, possunt *gradus* vocari; totum autem horologium facile ex parte hac idem nomen per synecdochen sortiri poterat. Neque obstat, quod de descensu umbrae sermo fit; cum enim *descendere* dicatur de diei tempore ad finem vergente, eadem vox ad umbrae motum, qualiscumque demum in horologio apparebat, facile applicabatur (cf. Ind. 19,11)... Cum autem viginti gradus commemorarentur, gradus vel lineae non horis, sed minoribus temporis spatiis correspondebant ». — Prae-

terea vide *Adolf Muller*, Bibel u. Gnomonik [Eine apologetische Studie über die Sonnenuhr des Königs Achaz] in periodico Natur u. Offenbarung XLVIII. 1902 p. 257-273. 340-353. 405-419, ubi egregie refutantur, quae *Camillus Flammarion* astronomus contra miraculum in S. Scriptura narratum protulerat (in Revue d'Astronomie populaire de Météorologie et de Physique du globe 1883 p. 321 ss.); etiam *J. Muller* animadvertit (l. c. p. 440) verbis S. Scripturae omnino satisfieri, etsi horologium Achaz non solarium proprie dictum fuisse supponatur, sed chronometrum quoddam valde simplex et imperfectum.

Certi aliquid scimus de horis tempore Christi. In parabola patrifamilias ultimi operarii circa horam undecimam conducti esse et unam horam laborasse dicuntur (Matth. 20, 1-12). Ioannes (1, 39) decimam diei horam commemorat et Iesus, antequam Lazarum a morte ad vitam revocaret, discipulos suos interrogabat: « Nonne duodecim sunt horae diei? » (Io. 11, 9). Ex quibus intelligitur finito labore diurno fuisse horam duodecimam.

Quae dicta sunt, mutabiles inconstantesque horas videntur indicare. Idem ex aliis auctoribus colligitur. *Vitruvius*, De Architectura lib. IX. cap. v. (viii.) ea, quae de horologiorum rationibus et umbris gnomonum aequinoctiali tempore exponit, his verbis absolvit: « Omnium autem figurarum descriptionumque earum effectus mus, uti dies aequinoctialis brumalisque itemque solstitialis in duodecim partes aequaliter sit divisus ». Etiam ex Vergilii Georg. lib. I. apparet horas diei certis tantum anni temporibus, puta tempore autumnii et veris, inter se aequales esse:

« Libra die somnique pares ubi fecerit horas » (v. 208).

Erant igitur pro latitudine geographica urbis Ierusalem horae tempore aestatis decem fere minutis longiores nostris horis, hiemis autem tempore totidem minutis breviores.

Præter hanc diei in duodecim horas partitionem etiam altera in quatuor partes nonnullis videtur in usu fuisse,

cum horarum tertiae, sextae, nonae saepe, reliquarum ut decimae, undecimae rarissime mentio fiat. In parabola de denario diurno (Matth. 20, 1. 3. 5) paterfamilias, ut conduceret operarios, exiisse dicitur primo mane, deinde circa horam tertiam, iterum autem circa sextam et nonam horam; quodsi hora undecima additur hoc factum est propter id, quod praecipue hac parabola intenditur. In narratione Passionis Christi hora tertia (Marc. 15, 25) et hora quasi sexta (Io. 19, 14) commemorantur. S. Petrus in ea, quam die pentecostes habuit, oratione, dicit horam esse diei tertiam (Act. 2, 15). Petrus et Ioannes ascendebant in templum ad horam orationis nonam (Act. 3, 1). Petrus cum hospitaretur apud Simonem coriarium in toppe, ascendit in superiora, ut oraret circa horam sextam (Act. 10, 9) et Cornelio centurioni apparuit angelus hora nona (Act. 10, 30). His tribus locis horae sexta et nona manifeste dicuntur esse horae precationis. Trium autem precandi temporum iam in veteribus libris mentio fit, at ibi nondum hora tertia, sexta, nona dicuntur. Psalmista Deum precabatur vespere et mane et meridie (Ps. 54, 18). Daniel « fenestris apertis in coenaculo suo contra Ierusalem tribus temporibus in die flectebat genua sua et adorabat » (Dan. 6, 10). Iudaei qui ex captivitate redierant, legerunt in volumine legis Domini Dei sui quater in die et quater confitebantur et adorabant Dominum Deum suum (Neh. 9, 3) vel ut textus hebraicus habet רְבִיעִית הַיּוֹם i. e. quartam diei partem. Haec autem tribus precandi temporibus facta diei divisio, quae iam in Veteris Test. libris nititur, hodie quoque in officio ecclesiastico adhibetur. Sed utrum hae tres horae tertia, sexta, nona designent accuratas temporis particulas an etiam tempora interiecta, ex paucis sacrarum litterarum locis vix ac ne vix quidem diiudicari potest.

Ut ipse dies, ita nox etiam in complures partes dividebatur. In vigilia matutina (Ex. 14, 24: אֶשְׁבִּירַת הַבֶּקֶר factum est, ut Dominus interficeret exercitum Aegyptiorum. Gedeon et trecenti viri, qui erant cum eo, ingressi sunt in par-

tem castrorum Madian incipientibus vigiliis noctis mediae (Iud. 7,19: רָאשׁ הָאַשְׁכּוּרֹת הַתִּיכּוֹנָה i. e. initio custodiae mediae, ex quibus verbis complures interpretes inferunt ab antiquioribus Hebraeis tres vigilias noctis esse numeratas). Saul ingressus est media castra Ammon in vigilia matutina (1 Reg. 11, 11). Psalmista ad Dominum precatur Ps. 118,148: Praevenerunt oculi mei ad te diluculo, sed hebr. 119,148: Praevenerunt oculi mei vigilias (אַשְׁכּוּרֹת). Et Ieremias hortatur: Consurge, lauda in nocte in principio vigiliarum (Lament. 2,19).

Quot fuerint vigiliae, ex Veteris Test. libris certo cognosci nequit, quamquam constat eas saltem tres fuisse. Sub Romanorum imperio quattuor vigilias in usu fuisse ex libris Novi Test. colligitur. Iesus quarta vigilia noctis (τετάρτη δὲ φάλαγγ ἦν; νυκτός) venit ad discipulos ambulans super mare (Matth. 14,25). Herodes rex Petrum apprehensum in carcerem misit tradens quattuor quaternionibus militum custodiendum (Act. 12,4); singuli quaterniones singulas videntur egisse vigilias. Nomina autem quattuor vigiliarum continentur verbis Christi apud Marc. 13,35. 36 monentis: «Vigilate ergo, nescitis enim, quando dominus domus veniat: sero an media nocte an galli cantu an mane (ὥς ἢ μεσονυχτιον ἢ ἀλεκτοροφωνίας ἢ πρωῒ), ne cum venerit repente, inveniat vos dormientes». Quibus verbis quattuor vigilias significari intellegitur ex simili apud Luc. 12, 38 loco: «Et si venerit (dominus) in secunda vigilia et si in tertia vigilia venerit et ita invenerit: beati sunt servi illi». Quodsi hoc loco secunda vigilia mediae nocti confertur, id ostendere videtur tres priores vigilias dictas esse vigilias noctis, quartam autem vigiliam matutinam.

I. G. HAGEN.

HORAM (הֹרָם, Ἑλᾶμ) rex Gazer, qui cum omni populo suo a Iosue percussus est, cum opem ferret urbi Lachis, quam Israelitae oppugnabant (Ios. 10,33; cf. 12,12). Utrum ante an post expugnatam Lachis Horam advenit, ex

textu non efficitur; fortasse Iosue, qui altero iam die post coeptam obsidione Lachis expugnavit, celeritate sua consilium Horam irritum fecit et post devictos reliquos reges Horam sero advenientem facile superavit.

HORDEUM. 1. Hordeum (שְׂעוּרָה, ζαῖα) ab horridis spicis dictum, inter species frumenti in S. Scriptura frequenter commemoratur. Quaequam vero ex variis hordei culti speciebus potissimum designetur, ex sacro textu non elucet. Quodsi ex iis quae hodie in Palaestina et Syria coluntur speciebus antiquas determinare liceret, *Hordeum distichum* Linné et *H. vulgare* L. (tetra-stichum) et *H. hexastichum* L. nominandae forent; ultimum licet rarius cultum commemoratur a C. Ritter, Erdkunde XVII. 1,681. Tres istae species etiam antiquis cognitae erant (*Theophr.* Hist. pl. VIII. 4,2; *Plin.* XVIII. 7,78). Hordeum tetrastichum et hexastichum frequenter in monumentis aegyptiis inveniuntur, atque in antiquissimis constructionibus subiectis *H. hexastichum* communiter, interdum etiam *H. distichum* occurrit. Hordeum distichum in Arabia petraea ac circa montem Sinai et in aliis Asiae anterioris partibus spontaneum crescere dicunt (*A. de Candolle*, *Woenig*); alii (*C. Koch* apud *Boissier*; *Post*) potius *H. ithaburense* Boissier in Arabia petraea et in monte Thabor ac prope Damascus, atque alibi haud raro inventum, typum spontaneum *H. distichi* suspicantur. Satis certo autem hordeum in Asia anteriore censetur indigenum.

Cf. O. Heer, Pflanzen der Pfahlbauten, Zürich 1865, ed. sep. p. 4-6. 11-13; *A. de Candolle*, Origine des plantes cult. 294-7, qui immerito negat, Hordeum vulgare in monumentis aegyptiis inventum esse: *E. Boissier*, Flora orient. V. 686; *G. Schweinfurth* in Berichte d. d. botan. Ges. zu Berlin 1884, 362. 370; *id.* in Bull. de l'Institut. Égypt. 1886, ed. sep. p. 2; *Fr. Körnicke*, Die Arten u. Varietäten d. Getreides (in *Körnicke-Werner*, Handb. d. Getreidebaues I.), Bonn 1885, 19. 129-91; *Leunis-Frank*, Synopsis II. 2 ed. 3, p. 859-61; *Fr. Woenig*, Pflanzen im alt. Aeg. 168-70; *V. Loret*, Flore pharaon. ed. 2, 23 s.; *O. Schrader* in *V. Hehn*, Kulturpfl. u. Hausth. ed. 6,539 s.; *Engler-Prantl*, Na-

türl. Pflanzenfam. II. 2,86-8; *L. Wittmack* in Sitz.-Ber. d. Ges. naturf. Freunde 1896, 70-5.

2. In S. Scriptura hordeum in Aegypti (Ex. 9,31) ac Palaestinae agris frequenter cultum exhibetur (Deut. 8,8; Ruth 3,2. 15. 17; Job 34,40; Is. 28,25; Joel 1,11 etc.); adeo commune erat, ut in lege de consecratione agri solum hordeum in exemplum adducatur (Lev. 27, 16). Eliam postea magna abundantia praesertim in Palaestina et in regione transiordanica crescebat: unde Salomo Iiramo, Tyrionum regi, cum tritico eliam hordei coros viginti millia misil (2 Par. 2,10. 15) et Ammonitae Iothamo regi decem millia coros hordei in tributum annuum solvebant (ib. 27,3); Davidi quoque trans Iordanem fugienti « frumentum et hordeum » cum reliquis cibariis oblata sunt (2 Reg. 17,28; cf. 14,30; 4 Reg. 7,1. 16. 18; 1 Par. 11,13; Jer. 41,8). Frequenter etiam messis hordeacea commemoratur, quae statuto tempore omnibus noto quotannis habenda in describendis temporibus et eventibus adhibebatur Ruth 1,22; 2 Reg. 21,9; Iudith 8,2; nostra aetate fere mense Aprili vel primis Maii diebus habetur et tribus fere hebdomadis ante messem triticam finita est; in planitie vero hierichuntina iam mense Martio fieri solet.

Cf. *E. Robinson*, Palaestina II. 597. 649 s. 668; *H. B. Tristram*, Nat. Hist. ed. 8, 420 s., etc. Cf. *Plin.* XVIII. 7,80.

3. Inter primitiās frugum, quae in Lege generaliter tantum praecipiuntur, Ezechiel expressius etiam hordeum commemorat (Ez. 43,13). Farina autem hordeacea in panificium utilissima erat (Jud. 7,13; 4 Reg. 4,42; Ez. 4,9. 12; cf. 13,19; Io. 6,9. 13. — Cf. *Plin.* XVIII. 7,74; 11, 103; XXII. 25,135), ac pariter hodie est (*Tristram* l. c. 421 s.); quare a pauperibus hordei spicae in agro post messores colliguntur (Ruth 2,3 ss. 17. 23). Licet autem « antiquissimum in cibis hordeum » censeatur (*Plin.* XVIII. 7,72), tritico tamen vilius aestimatur cibusque pauperibus cum brutis communis habetur (3 Reg. 4,28 hebr. 3,8. — Cf. *Hom.* II. 3,496; *Plin.* XVIII. 7,74; XXVIII. 20,

264; *Flav. Jos.* Bell. iud. V. 10,2; *Athen.* 7 p. 304, al.). Inde cibus iste contemptibilis evasit, ideoque fortasse farina hordeacea in sacrificio zelotypiae offerenda erat (Num. 15,15; cf. Os. 3,2), eodemque sensu plerisque panis hordeaceus in somno Madianitae imago est populi hebraici reliquis nationibus contemptibilis (Jud. 7,13); quod alii potius tanquam symbolum populi agriculturae dediti intellegunt (*P. Schegg*, Bibl. Archaeol. 133). — Pretium hordei duplo vel triplo minus habebatur quam tritici: ita 4 Reg. 7,1. 16. 18 « modius similae (triticeae) uno statere, et duo modii hordei statere uno » fuisse in porta Samariae referuntur, pretio sane minimo propter abundantem ex castris Syrorum praedam. In Apocalypsi 6,6 vero auditur vates vocem dicentium « Bilibris (շֵׁנִיִּי tritici denario, et tres bilibres hordei denario », ita ut pretium tritici triplo maius sit. Quodsi ex appretiatione in lege statuta (Lev. 27,16) valorem hordei determinare liceret, unum chomer i. e. circa 360 litra (Vulg. *triginta modii*) tempore Moysis fere uno siclo (argenteo = c. 2,50 Mark) stetisse diceremus, quod pretium esse agni iuxta appretiationem sacram in Mishna asseritur (Menach. 13,8; cf. *P. Schegg* l. c. 137 s. Aliter *Fr. de Hummelauer*, Comm. in Levit. p. 345).

4. Praeter panem aliosque cibos ex hordeo, sicut ex tritico praesertim etiam polenta parabatur (v. POLENTA). Praeterea Aegyptii alique populi antiqui ex hordeo cervisiam coquebant, monumentis antiquitatis usuque nostrae aetatis celeberrimam. Qui potus a rabbinis aliisque etiam antiquis Iudaeis haud ignotus fuisse atque in S. Scriptura nomine שֵׂכָר *sicea* inter alia intellegi censetur (cf. Is. 19,10 LXX ζῖνον, massoreth. שֵׂכָר. Vulg. *lucernas*); at de hoc ex sacris libris nihil certi videtur constare.

Cf. *V. Hehn*, Kulturpfl. u. Hausth. ed. 6,141-53; *O. Schrader* ib. 157 s.; *Death*, The beer of the Bible, London 1887 (cit. ib.). — De hordeo praeter auctores superiores et in art. FRUMENTUM citatos cf. *I. H. Frisius*, Arboreti bibl. Contin. 101 s.; *M. Hilfer*, Hierophyt. II. 121-3; *O. Celsius*, Hier.

robot. II. 239-47; *E. F. K. Rosenmüller*, *Bibl. Alterth.* IV. 1,85-8; *P. Cultrera*, *Flora bibl.* 96-102; *L. Löw*, *Aram. Pflanzennamen* n. 222; *J. Smith*, *Hist. of Bible Plants* 23 s.; *J. H. Balfour*, *The plants of the Bible*, ed. nova, 211-3.

L. FONCK.

HOREB (הֹרֵב וְהָרֵב, Ὠωρή), mons

Dei, ubi Dominus Moysi oves Iethro pascenti in rubo ardente apparuit (Ex. 3,1); sed eadem apparitio Act. 7,30 facta esse legitur in deserto montis Sinai. Idem designatur desertum iuxta montem Dei, quo Iethro se contulit ad Moysen (Ex. 18,5). Ibidem in monte Horeb Deus apparens iubet Moysen aliquando sacrificare « in monte hoc » (Ex. 3,12), quo mandato sacrificia in Sinai offerenda indicari videntur. Vitulus aureus Ps. 105[106],19 in monte Horeb confectus esse dicitur, Ex. 32,1 ss. in monte Sinai, sed etiam Ex. 33,6 pro Sinai legitur Horeb. Accedit quod mons legislatione mosaica celeberrime designatur Sinai in libris Ex. Lev. Num., sed Horeb in Deut. (4,2. 6. 19; 4,10. 15; 5,2; 9,8; 18,16; 29,1; uno loco 33,2 legitur Sinai) et compluribus libris iunioribus (3 Reg. 8,9; 2 Par. 3,10; Mal. 4,4 [3,22]). Nomina Sinai et Horeb esse synonyma indubie vincit parallelismus Eccli. 48,7: in Sina — in Horeb, quo theophania Eliae 3 Reg. 19,8 in monte Horeb concessa celebratur. Relinquenda igitur est opinio Sinai esse nomen unius montis, Horeb nomen totius tractus montani. — Attamen uno loco Ex. 17,6 Horeb a Sinai distinguitur; etenim Israelitae, antequam in desertum Sinai venirent, castrametati sunt in Raphidim prope petram Horeb. Unde inferendum videtur ab altiore tractu montano Sinai distinguendum esse tractum minus altum septemtrionem versus profensum, cui speciale nomen Horeb sensu artiore tribuebatur. Alias Horeb et Sinai convertuntur. V. SINAI.

HOREM (הֹרֵם; LXX nomina Magdalei

et Horem in unum confundunt Μεγαλαχία), urbs munita (Ios. 19,38) inter illas, quae Ios. 19,35-38 post descriptionem finium Nephthali inseruntur et arces Tyriorum esse censentur (*E. de*

Hummelauer ad 19,35). Coniicitur esse *Harra* inter lacum *Hüle* et Tyrum (*Van de Velde*, *Legendre*, *Buhl*, *Conder*) vel *Harra* inter lacum *Hüle* et Cedem Nephthali (*Zanechia*).

Cf. *Van de Velde*, *Memoir* 1858 p. 322; *Legendre* apud *Vigouroux*, *Dict. de la Bible* III. 1753. 1754; *Buhl*, *Alt. Pal.* 1896 p. 233; *Conder* apud *Hastings*, *Dict. of the Bible* II. 415; *Zanechia*, *La Palestine d'aujourd'hui* 1899 II. 714.

HORI (הֹרִי, Ὠροῖ, Ὠροῖ), filius Lotan

filii Seir Horraei (Gen. 36,22; 1 Par. 1,39); uli nomen et genealogia indicant, pertinebat ad Horraeos, Troglodytas, quibus nomen fuit, ut videtur, a הֹרִי specu.

HORMA. 1. Ilormaseu Harma, Herma, Arama (הֹרְמָה) i. e. anathema, devotio a הֹרֵם *devovere*; Ἐρμά, Ἐρμάθ, Ἐρμά, Ἐρμάσθ) eadem est urbs, quae primitus vocabatur Sephaath (צֶפֶת, צֶפֶת). Erat urbs regia Chananaeorum, prope quam Israelitae Palaestinam contra Dei voluntatem ingressuri ab Amalecitis et Chananaeis caesi sunt (Num. 14,43; Deut. 1,44; priore loco cum articulo הֹרְמָה unde Targum Jonathan: usque ad inter necionem); ibidem postea cum a Cades per exploratorum viam i. e. per desertum Sin ad montem Ilor progredierentur, regem (urbis) Arad devoverunt eiusque urbes anathemati devoverunt (Num. 21,3). A Iosue expugnata (Ios. 12,14), deinde a Iuda et Simeon denuo percussa et anathemati devota est (Iud. 1,17). Recensetur inter urbes maxime meridianas tribus Iuda immediate ante Siceleg (Ios. 15,30), postea Simeonitis attributa est (Ios. 19,4; 1 Par. 4,30); ad eandem David in Siceleg moratus dona misit de praeda Amalecitis crepta (1 Reg. 30,30).

Ex textibus citatis colligitur Horma fuisse inter Cadesbarne et Arad. Nominis Horma hucusque nullum vestigium repertum est. Verum nominis antiquioris Sephaath Iud. 1,17 indicium aliquale cernitur in *Sebata*, *Esbata*, *Sebaita*, quae ruinae inveniuntur circa 40 km ab *Ain Qadis* aquilonem versus et circa 26 km a *Khalasa* (Elusa) meridiem versus. Atque

hic situs locis biblicis melius congruere videtur, quam saltus montanus *el-Sufe* in via Hebrone Petram versus, quem *Robinson* (Palæstina III. p. 1071) cum Sephaath-Horma componit.

Cf. *Rowlands* apud *Williams*, *The Holy City* 1849 I. 464; *Palmer*, *Desert of the Exodus* 1871 II. p. 373-380 et germanice *Wüstenwanderung* p. 286-292; *Ritter*, *Erdkunde* XIV. 1085; *Riess*, *Bibel-Atlas* ed. 3 p. 16; *Lagrange* in *Revue bibl.* IX. 1900 p. 282.

2. **Horma** (הֶרְמָה cum articulo i. e. excelsa, Ἠράμα), urbs tribus Aser (Is. 49,29). Censetur esse vicus *Rāme* 16 km a Tyro inter meridiem et orientem (*Guérin*, *Zaneecchia*) vel alius vicus *Rāme* 5 km a Tyro inter meridiem et orientem (*Van de Velde*, *Robinson*, *Dittmann* ad h. l.). Verum *F. de Hummelauer* ad h. l. pro הרמה corrigit הִרְמָה i. e. occidentem versus et rationem addit: quia verbum שׁוּב (revertitur) in descriptionibus finium semper adscriptam habet determinationem directionis. Terminus Aser describitur ab extremo aquilone revertens occidentem versus, mox rediturus ad austrum.

Cf. *Guérin*, *Galilée* II. 125; *D. Zaneecchia*, *La Palestine d'aujourd'hui* 1899 II. 708; *Van de Velde*, *Memoir* p. 342; *Robinson*, *Neuere bibl. Forsch.* p. 81. 82.

HOROLOGIUM Achaz (בֵּיצֶלֶת אָחָז) i. e. gradus Achaz: LXX ἀνασταθμοί, βᾶθμοι) vide s. v. HORA.

HORONITES vide s. v. SANABAL-LAT.

HORRAEI, HERRHAEI (הֶרְרַי, Χορραῖοι), prisci habitatores regionis Seir. Nomen accepisse videntur ex more habitandi in specubus (הֶרַר, הַר), quibus regio illa abundat; erant igitur Troglodytae. Iam nominantur Gen. 14,6 (in Vulgata Chorraei); tempore igitur Abraham in montanis Seir a mari Mortuo usque ad El Pharan seu Aclath portum sinus Aelanitici habitabant. De origine Horraeorum certi nihil scimus. Videntur ramus aliquis magnae Hethaeorum (v. HETH) familiae fuisse. Recensentur Gen. 36,20-28 et 1 Par. 1,38-42 filii et nepotes Seir principis cuiusdam Horraeorum,

Gen. 36,29. 30 septem tribus Horraeorum, quarum duces erant septem filii Seir. Familia Esau cum familia Seir Horraei matrimonii coniuncta erat (Gen. 36,2 ss. et v. SEIR 1; adverte Gen. 36,2 pro Sebeon Hevaeo probabilius legendum esse *Horraeum*). Postmodum vero Edomitae Horraeos exstirparunt (Deut. 2,12. 22; hebr. 2,12 scribuntur הַרְרִים); recensentur Edomitaram post subactos Horraeos reges et duces Gen. 36,31-43 et 1 Par. 1,43-54.

HORTUS. Hortorum cultura apud Hebraeos minime erat ignota. Mentio fit hortorum olerum (Deut. 11,10; 3 Reg. 21,2), multitudinis hortorum (Am. 4,9) et fructuum eorum (Am. 9,14) et Ieremias exsules quoque in Babylonia adhortatur: plantate hortos et comedite fructum eorum. Ecclesiastes quoque dicit: feci hortos et pomaria et consexi ea cuncti generis arboribus (2,5). Talis horti amoenitas describitur Cant. 4, 12 s., hortus scil. malis punicis ornatus, in quo florent cyprus, nardus, crocus, calamus, myrrha, aloe, cinnamomum cum lignis luthris et qui fonte aquarum ubertim irriguus est; cf. Cant. 5,1; 6, 10. Hortus bene irriguus imago est fecunditatis et prosperitatis (Is. 58,11; Jer. 31,12); hortus absque aqua vastitatem et miseriam delineat (Is. 4,30). Uti Israelitae quandoque accusantur sub omni ligno viridi idololatriae dedisse operam (Jer. 2,20), ita in hortis quoque cultui eiusmodi vacabant; cf. Is. 4,29; 65,3; 66,17 et insuper cf. 3 Reg. 14,23; 4 Reg. 16,4; 17,10. In hortis etiam quandoque mortui sepeliebantur; ita Manasses sepultus est in horto domus suae, in horto Oza; item Amon (4 Reg. 21,18. 26). Ioseph ab Arimathaea in horto suo sibi e petra exciderat monumentum, ubi Christus sepultus est (cf. Matth. 27, 60; Ioan. 19,41). Iesus saepius se contulit in hortum Gethsemani trans torrentem Cedron, ibique oravit, in quo horto etiam ante passionem oravit et ex quo captivus abductus est (Ioan. 18,1.20). Hortulani quoque mentio habetur Ioan. 20,15.

HOSA. nomen locorum (?) et personarum.

1. Hosa (הֹסָה, Ὡσα), urbs tribus Aser (Ios. 19,29), in descriptione terminorum Aseriuxta Tyrum enumerata. *Conder* eam agnoscit in *Khirbet Ezziya* a Tyro meridiem versus (*Survey of West. Pal. Mem.* I. 31); *Wilson* (in *Smith-Fuller*, *Diel. of the Bible* I. 1393) hunc situm valde dubium esse censet. Alii alia coniiciunt. Sed *F. de Hummelauer* ad h. l. emendat הַפָּה vel הַיָּפָה i. e. ad litus maris; terminus Aser iam litori adhaeret, secus litus decurrit.

2. Hosa (הֹסָה, Ὡσα) legitur in genealogia Iuda I Par. 4,4 : Ezer pater Hosa. Utrum Hosa sit nomen personae an loci, ex textu erui nequit; fortasse utrumque est. Vide etiam HUSATHITES.

3. Hosa (הֹסָה, Ὡσα), levita ex posteris Merari, ianitor templi tempore Davidis (I Par. 16,38; 26,10. 11,16).

HOSANNA. Vox deprompta est ex Ps. 118,25 הוֹשִׁיעָה נָא, LXX ὁσωσον δὴ; proin : opitulare quaeso. Cum Iesus sollemni modo in urbem Ierusalem intraret, turbae clamabant : hosanna filio David i. e. opem divinam adprecantur, ut scil. ei a Deo salus ac felicitas obtingat, ut Deus in altissimis, caelitus, de throno suo salutem det. Psalmus ille cum ad magnum Hallel pertineat in coena paschali recitari solebat; praeterea in neomeniis quoque et in festo encαινiorum, si rabbinis est fides adhibenda. Pariter cani solebat hosanna in festiva pompa habita diebus septem festi tabernaculorum, uti asseritur in tractatu mishnico de tabernaculis (cf. *Surenhusius* II. p. 274); et verbis illis Ps. 118,26 (hebr.) sacerdotes Israelitas ad templum adeuntes salutare consueverunt, uti refertur (cf. *Knabenbauer*, *Comm. in Matth. ed.* 2 II. p. 213 s.). Quare explicatur, cur turbae eo modo Iesum salutarint; cf. *Matth.* 21,9 s.; *Marc.* 11, 9. 10; *Ioan.* 12,13. Modus scribendi antiquus ὁσωννσ fuit, uti *Tischendorf* edidit et confirmatur codicibus latinis : ozanna, ossana, ossanna; *Wordsworth* pro *Matth.* et *Marc.* nullum affert codicem latinum qui praebeat hosanna; pro *Ioan.* duo codices Vulgatae (foro-iuliensis et toletanus) habent hosanna. Cum tempore

Christi certe forma aramaica in usu esset אוֹשַׁנְנָה, scriptio ὁσωννσ, osanna utique videtur esse genuina.

HOSIEL (הוֹסִיָּא, Ὡσιλ, Α Ἀζιήλ), unus ex filiis Semei, levita de stirpe Gerson tempore Davidis (I Par. 23,9).

HOSPES. HOSPITALITAS. Iam ex tempore patriarcharum nobis praeclara exempla hospitalitatis modique recipiendi peregrinos offeruntur. Ita Abraham cernens tres viros ab ostio tabernaculi iis occurrit, salutat, invitat ut sibi praestent gratiam inbrandi ad se servum ipsorum; aquam ad pedes lavandos affert et panes carnesque uxorem parare iubet (*Gen.* 18,2 ss.). Similiter Lot invitat et recipit viros quos putat; immo cum illi vellent in platea manere, « compulit eos ut diverterent ad eum » (*Gen.* 19,3) et hospites suos tuctur ab aggressoribus; immo potius filias duas vult tradere opprobrio, « dummodo viris istis nihil mali faciatis quia ingressi sunt sub umbra culminis mei » (*Gen.* 19,8). Adeo sacrosancta habetur incolumitas et vita hospitum. Etiam Rebecca ei quem hominem habet peregrinum offert hospitium : « palearum et foeni plurimum est apud nos et locus spatiosus ad manendum » (*Gen.* 24,25). Raguel autem reprehendit filias, quia Moysen non invitassent : « quare dimisistis hominem? vocate eum ut comedat panem » (*Ex.* 2,20). Lege quoque Israelitae iubentur advenis et peregrinis sese exhibere benevolos : « sit inter vos advena quasi indigena et diligetis eum quasi vosmetipsos » (*Lev.* 19, 34; cf. *Deut.* 10,19; 26,11). A quo officio hospitalitatis utique longe recesserunt Gabaa incolae Beniaminitae, ita ut levita dicat : nullus sub tectum suum nos vult recipere (*Iud.* 19,18). Verum homo senex, qui ut peregrinus ibi habitavit, praeclare praestat quod illi neglexerant : « ego praebebo omnia quae necessaria sunt, tantum quaeso ne in platea maneat; introduxite eum in domum suam et pabulum asinis prae-buit, ac postquam laverunt pedes suos recepit eos in convivium » (*Iud.* 19,20. 21) et pariter, uti Lot, hospitem suum ab iniuria tuctur quam pessimi illi cives

inferre ei volunt. Peccatum quoque Aegyptiorum ex eo auctum esse Sapiens indicat, quia bonos hospites quos antea cum laetitia receperant, postmodum in servitutem redigebant (Sap. 19,13. 15). Eximium hospitalitatis exemplum praebet Iob (31,32).

Hospitalitas repetito praecipitur in libris novi foederis. Ipse Iesus tamquam unam ex causis cur aeterna vita obtinatur benedictis offert: hospes eram (ξένος) et collegistis me, dum maledicti etiam eo inveniuntur discedere ab ipso in ignem aeternum: quia hospes eram et non collegistis me (Matth. 23,35. 43). Unde doctrinae Christi insistens Paulus Romanos monet, ut hospitalitatem (φιλoxενίαν) sectentur (Rom. 12,13) et Hebraeis scribit: hospitalitatem nolite oblivisci (Hebr. 13,2) monens aliquos in eius virtutis exercitio meruisse angelos hospitio recipere; et ecclesiae praepositos, episcopos, inter alia iubet esse hospitales (φιλoxένους, 1 Tim. 3,2; Tit. 1, 8). Quae hospitalitas cum Christifideles persecutionibus et honorum spoliationibus essent expositi plane erat necessaria, quare Petrus quoque scribit, ut sint hospitales invicem sine inurmuratione (1 Petr. 4,9). Quid hospes haud immerito expectare possit, Iesus pharisaeo exponit (Luc. 7,44 s.).

Hospes. ξένος, peregrinus abest a domo, a patria. Cum patria nostra, ubi est Pater noster, sit caelum, hospites sumus ac viatores hinc in terris. Eo modo iam de se sensisse patriarchas scribit apostolus « confitentes quia peregrini et hospites sunt super terram; qui enim haec dicunt significant se patriam inquirere » (Hebr. 11,13. 14). — Si vero gentes dicuntur hospites testamentorum ξένοι, tamquam alieni a foedere Dei et expertes promissionum foederis designantur. — Demum ξένος, hospes is quoque dicitur, qui aliquem hospitio excipit: ita Paulus scribit: salutem vos Caius hospes meus (Rom. 16,23).

I. KNABENBAUER.

HOSPITALIS cognominatur 2 Mach. 6,2 Iupiter (vide s. v.).

HOSTIA. In Vulgata hac voce expli-

catur קָרְבֵּן Lev. 1,2; 4,23; 9,7; saepius quoque עֹלָה Lev. 1,4. 6; 4,33; 9,13; Deut. 12,14; 2 Par. 1,6 (vide s. v. HOLOCAUSTUM); etiam בִּזְחָה domum, sacrificium ferti 2 Par. 32,23; Ps. 95,8; item אֲשֵׁי יְהוָה hostias Domino (offerre) Lev. 21,21 et קִדְשִׁים 2 Par. 35,13. Sed frequentissime declaratur זֶבַח sacrificium cruentum, quatenus ab holocausto distinguitur. Eiusmodi sacrificia sunt hostiae pacificae (שְׁלָמִים), gratiarum actionis vel laudis (תּוֹדָה), hostia pro peccato (הַקְּבִיאָה), hostia pro delicto (אַשָׁם).

Hostiae pacificae et gratiarum actionis laudisque et quas pro sua quisque pietate vel voto offerre volebat, describuntur Lev. 3,1 ss.; 7,12 ss.; 9,4; 22,18 ss. Victimam sumere licebat de bobus marem sive feminam, item de pecoribus; pro oblatione voluntaria etiam bovem et ovem aure et cauda amputatis (Lev. 22, 23). Modus oblationis usque ad aspersionem sanguinis idem est qui in holocausto observabatur (Lev. 3,2); partes pingues in altari holocaustorum adolebantur Lev. 3,3-5. 9-11. 14-16; 9,18 s.; pectusculum et armus dabantur sacerdoti Lev. 7,31. 32; 10,14; reliqua caro ad epulas sacrificiales adhibebatur Lev. 7,15 s.; 22,30. Epulis sacrificialibus, ad quas homo quasi a Deo iuvatur, significatur Dei in hominem benevolentia et quaedam bonorum divinarum cum homine communicatio (cf. 1 Cor. 10, 18. 20).

In hostia pro peccato inveniens erat immolandus in consecratione sacerdotum et levitarum Ex. 29,10. 36; Num. 8,8; in die expiationis Lev. 16,3; si sacerdos peccaverit delinquere faciens populum Lev. 4,3 et si totus populus ex ignorantia peccaverit Lev. 4,13. Hircus autem debuit offerri in noviluniis et diebus festis pro populo Num. 28,15. 22. 30; 29,5. 11. 16 ss.; item hircus pro peccato offerebatur in dedicatione tabernaculi Num. 7,16. 22. 28 et templi tempore Esdrae (Esdr. 6,17); item si peccaverit princeps Lev. 4,22 ss. Si vero quis de

populo terrae per ignorantiam peccaverit, capram vel ovem, agnam, debuit offerre Lev. 4,28. 32; 5,6; ovem autem anniculam nasiracus, agnum leprosus pro peccato iubentur offerre (Num. 6, 14; Lev. 14,13). Demum victima praescribebatur pro peccato turtur vel pullus columbae pro muliere post partum Lev. 12,6, pro semini fluo Lev. 13,14 et haemorrhoea Lev. 13,29, pro nasiraco qui propter mortuum immundus factus est Num. 6,10. 11; item turtur vel pullus columbae tamquam hostia pro peccato dari potuit a pauperibus pro peccato ignorantiae et a leproso paupere, qui scilicet ob pauperiem capram vel ovem offerre non poterant Lev. 5,7. 8; 14,22; immo si pauper ad expiationem non poterit offerre duos turtures aut duos pullos columbarum, offeret pro peccato similiae partem ephi decimam Lev. 5, 11. 12.

Modus offerendi pro peccato iuvenum is est, ut de sanguine septies aspergatur contra velum sanctuarii et de eodem sanguine ponatur super cornua altaris thymiamatis et reliquus sanguis effundatur ad basin altaris holocausti; de sanguine aliarum victimarum ponebatur solummodo ad cornua altaris holocausti et reliquus sanguis pariter ad eius basin effundebatur. Dein partes pingues in altari cremabantur. Caro autem earum hostiarum quarum sanguis in sanctum (vel die expiationis in sanctum sanctorum) inferebatur, simul cum pelle, capite, intestinis extra castra (civitatem) igne absumebatur; caro vero aliarum hostiarum a sacerdotibus in loco sacro comedebatur (cf. Lev. 4,5-6,23; 16,27). Ritus offerendi columbam describitur 5,8 ss.

In hostia pro delicto victima erat aries (Lev. 5,15. 18. 23; hebr. 19,21) vel agnus (Lev. 14,12; Num. 6,12 hebr.). Ritus oblationis describitur Lev. 7,1-7; sanguis funditur per gyrum altaris; partes pingues adolentur super altare; caro a sacerdotibus in loco sancto comeditur. Sacrificium pro delicto erat offerendum, si quis in iis quae Domino sancta sunt peccaverit, ergo in primitiis, decimis (Lev. 5,15); dein in variis peccatis contra rem et proprietatem proximi (Lev.

6,1 ss.; 3,20 hebr.; Num. 5,8 hebr.) item si quis servam alterius vi opprimeret (Lev. 19,20. 21). Praeterea leprosus mundatus et nasiraeus qui in mortuo erat pollutus, eiusmodi sacrificium offerre iubentur (Lev. 14,12; Num. 6,12 hebr.).

Sacrificium autem acceptissimum Deo Patri obtulit Christus, qui « tradidit semetipsum pro nobis oblationem et hostiam Deo in odorem suavitatis » (Eph. 5,2); ipse enim ad destitutionem peccati per hostiam suam apparuit et unam pro peccatis offerens hostiam (προσενεγκας) sedet in dextera Dei (Hebr. 9,26; 10,12).

Cum hostiam seu sacrificium offerre sit cultum Deo exhibere excellentissimum, per facilem vocis translationem etiam alii modi Deum honorandi, quibus homo Deo sese devovet eique quasi aliquid de se offert, hostiae nomine designantur quandoque; ita monemur: per ipsum (Christum) offeramus hostiam laudis semper Deo Hebr. 13,15 et S. Petrus spirituales hostias offerre nos iubet (1 Petr. 2,5). Huic cognatum est, ut obsequium Deo exhibitum eodem nomine appelletur; quare monet apostolus, ut exhibeatis corpora vestra hostiam viventem, sanctam, Deo placentem (Rom. 12,1). Pariter obsequium aliis per eleemosynam praestitum idem sortitur nomen; ita apostolus ea quae ipsi Philippenses miserant vocat hostiam acceptam, placentem Deo (Phil. 4,18) et Hebr. 13,16 scribit: beneficentiae nolite oblivisci; talibus enim hostiis promeretur Deus.

I. KNABENBAUER.

HOTHAM (הוֹתָם). 1. Filius Heber de familia Baria in tribu Aser (1 Par. 7, 32; LXX Ηοθάν); videtur idem esse qui 7,33 scribitur Helem; v. HELEM 1.

2. Pater Samma et Iediel heroum in exercitu Davidis, Arorites (1 Par. 11,44; LXX Αροριται); v. ARORITES 3.

HOZAI (הוֹזַי, in pausa הוֹזִי), propheta quidam ignotus, in cuius sermonibus scripta erant oratio et exauditio et peccata Manasse regis, antequam poenitentiam ageret (2 Par. 33,19). LXX vertunt οὐκ ἐξομῶν legentes הוֹזַי.

HUCAC urbs 1 Par. 6,73[60] v. HALCATH.

HUCUCA (חֻכּוּכָא; Ἰζουκιά, A Ἰζούκ), urbs in confinibus Zabulon et Nephthali (Ios. 19,34). Onom. (ed. Lag. 235,82; 134,7) eam collocat in tribu Nephthali ac simul in confinio trium tribuum, id est in tribu Zabulon ad australem plagam, in tribu Aser ad occidentem, porro in tribu Iuda ad solis ortum (?); sed de Iuda ad Iordanem contra ortum solis Ios. 19,34 et de emendatione huius textus v. IUDA 3. — A plerisque Hucua agnoscitur hodiernus vicus Yāqūq 10 km a Capharnaum occidentem versus.

Cf. Robinson, Palaestina III. 883; Neuere bibl. Forschungen 104; I. Schwarz, Das heilige Land p. 144; Guérin, Galilée I. 354 ss.; G. A. Smith, Hist. Geogr. of the Holy Land, Plate I et VI; Legendre, Carte de la Palestine; Riess, Bibel-Atlas ed. 3 p. 16; D. Zaneccchi, La Palestine d'aujourd'hui 1899 II. 712; F. de Hummelauer ad h. l.

HUL (חֻלִּי, חֻלִּי et 1 Par. 1,17 codex A 036), secundus filius Aram filii Sem (Gen. 10,23; 1 Par. 1,17). Eius posteris Flav. Iosephus (Ant. I. 6,4) Armeniam assignat i. e. ut F. de Hummelauer (Comm. in Gen. p. 331) censet, circa montem Massim tractum ab Aramaeis occupatum.

HUMANITAS. Ea voce exprimitur εὐανθροπία, amor, benevolentia, benignitas in homines; cf. Esth. 16,11 (graece 8,13); 2 Mach. 4,11; 6,22; 14,9; Act. 28,1. Dicitur quoque de benevolentia ac clementia Salvatoris Tit. 3,4.

HUMERALE (Lev. 8,7; Eccli. 43,10) vide s. v. EPHOD (col. 188).

HUMERUS. Cum humero onera gestantur, humerus quoque dicitur ad servitutem exprimendam vel subiectionem, ita de Issachar: suppositi humerum suum ad portandum (Gen. 49,13); cf. virga humeri et onus (Is. 9,4; 10,27). Atque ut necessitas servitutis declararetur, dicitur: inclinate humerum vestrum (Bar. 2,21), dum e contra rebellio et contumacia exprimitur: ipsi dederunt humerum recedentem i. e. (hebr.) rebellem Neh. 9,29 et Zach. 7,11: avertunt scapulam (humerum) recedentem i. e. motum gerere recusabant. E contra uno

humero servire Soph. 3,9 ii dicuntur qui virtute concordii, uno consensu Deo serviunt. Insignia dignitatis, uti purpura, pallium, aliquo modo sceptrum quoque, humero geruntur; quare principatus super humerum factus esse dicitur; vel consideratur principatus tamquam onus quoddam regiminis quod quasi humero sustentatur (Is. 9,6) et eodem sensu Is. 22,22 dabo clavem David super humerum eius; clavis enim est symbolum potestatis traditae.

Denum uti humerus dicitur de latere aediticii, de latere montis (hebr. Ios. 13, 8. 10; 18,12 etc.), ita quoque de regione; v. g. Is. 11,14 humerus Philisthim versus mare explicatur a multis de regione mare versus descendente; similiter Ez. 23,9 aperiam humerum Moab i. e. latus vel aditum ad Moab, fines Moab.

Quia humero onera sustentantur, etiam humerulus dicitur de parte vasis qua vas fulciri et portari videtur (3 Reg. 7,30. 34); humerali vestibuli Ez. 41,26 dici videntur parietes laterales vestibuli.

HUMILIS, HUMILITAS. In Vulgata ponitur humilis pro חַשְׁבִּי i. e. depressus, exiguus, ignobilis; ita 2 Reg. 6,22 ero humilis in oculis meis; Iob 3,11 ponit humiles in sublime; Prov. 29,23 humilem spiritu suscipiet; Ps. 137,6; Is. 37,13; Ez. 17,14; 21,26; 29,14 etc. Dein ponitur pro חַשְׁבִּי, חַשְׁבִּי i. e. contritus, afflictus, miser; ita Ps. 10,18 indicare pupillo et humili; Ps. 33,19 humiles spiritum salvabit et Ps. 73,21; pro חַשְׁבִּי miser, pauper, mitis; Ps. 17,28 populum humilem salvum facies; Ps. 81,3; Is. 10, 2; pro חַשְׁבִּי afflictus Am. 2,7; pro חַשְׁבִּי inops, pauper Ps. 101,8 et 4 Reg. 19,26 humiles manu חַשְׁבִּי impotentes, debiles. In Eccli. et in Novo Testamento humilis ταπεινός plerumque habetur.

Iude iam varia vocis notio colligitur. Dicitur scil. de locis depressis, de conditione misera et afflicta, sed etiam de animo demisso, qui de se modeste sentit et indicat omnemque fastum et superbiam a se longe amandat; cf. Eccli. 3,21; 10,18; 12,6; 13,10. 23. 27; 23,31;

29,11; 1 Mach. 14,14; Matth. 11,29; Luc 1,32; Rom. 12,16; 2 Cor. 7,6; 10,1; Iac. 1,9; 4,6; 1 Petr. 5,5 : superbis Deus resistit, humilibus dat gratiam.

Humilitas plerumque עָנָוָה explicat; inde potissimum significat afflictionem, miseri-
 am, oppressionem; cf. Deut. 26,7; Ps. 9,14 vide humilitatem meam de inimicis meis; Ps. 24,18; 30,8; 118,50. 92 etc.; etiam עָנָוָה i. e. modestia, animi demissio Prov. 13,33 et Prov. 11,2 עָנָוָה depressus, modestus. Graece ἀλάζωνος, ἀπειθεσ; plerumque ponitur, quibus vocibus pariter exprimitur conditio afflicta, ignobilis, sed etiam mentis habitudo ab elatione aliena. — Eadem notione usurpatur *humiliari* (hebr. הִתְעַנֵּת, נִכְנַע, נִדָּל), praesertim de oppensione hostili; cf. Iud. 3,30; 4,23; 8,28; 11,33; 1 Reg. 7,13; 2 Reg. 8,1; 1 Par. 17,10; 18,1; 20,4; 2 Par. 13,18; dein etiam de subiectione quae hero debeatur; ita dicitur ad Agar : revertere ad dominam tuam et humiliare sub manu illius. Praeterea adhibetur vox de oppensione virginis vel mulieris; ita Deut. 21,14; 22,24. 29; Iud. 19,24. Sed etiam usurpatur de animi demissione et contritione; ita Achab qui propter Domini minas « seidit vestimenta sua et operuit cilicio carnem suam ieiunavitque et dormivit in sacco et ambulavit demisso capite » dicitur humiliatus coram Domino (3 Reg. 21,27-29) et principes Israel et rex agnoscen-
 tes culpam suam et iustam Domini poenam sibi esse inflictam dicuntur humiliati (2 Par. 12,7; cf. 32,26; 34,27). Atque generatim qui se Deo subdit suae sibi conscius infirmitatis et afflictiones patienter fert, humiliare se dicitur; humiliavit quoque Christus semetipsum factus obediens i. e. animo et voluntate humana se plane Deo subiecit (Phil. 2,8). Dicitur denique humiliari, qui ex dignitate et conditione seu statu nobili deiicitur, secundum illud : qui se exaltat humiliabitur (Luc. 14,14).

HUPHAM (הֻפָּח, LXX omitt.), unus ex filiis Benjamin, progenitor familiae Huphamitarum (Num. 26,39). Idem Gen. 46,21 scribitur Ophim.

HUR (חֹר, חֹרָה). 1. Vir insignis, qui

cum Aarone sustentabat manus Moysis orantis, dum Israelitae pugnarent contra Amalec (Ex. 17,10. 12) et quem Moyses in montem Dei ascensurus senioribus proposuit, ut ad eum et Aaronem quaestiones exortas referrent (Ex. 24,14).

2. Filius Caleb filii Hesron, ex Ephra-
 tha genitus (1 Par. 2,19) et avus Beseleel artificis (Ex. 31,2; 35,30; 38,22; 1 Par. 2,20; 2 Par. 1,5). Eius posteri enumerantur 1 Par. 2,30 s.; 4,1-4. Flav. Iosephus (Ant. III. 6,1) illum Hur, qui cum Moyse et Aaron commemoratur (v. HUR 1), eundem esse pronuntiat atque filium Caleb et avum Beseleelis idque cum aliqua probabilitate; quo iure autem eundem Hur fecerit maritum Mariae, sororis Moysis (Ant. III. 2,4), non apparet. De loco 1 Par. 2,20 : « Porro Hur genuit Uri et Uri genuit Beseleel » vide s. v. BESELEEL et CALEB 2.

3. Unus ex quinque regibus Madianitarum, qui a Moyse devicti sunt (Num. 31,8) et cum Sehon rege Amorraeorum foedere innecti erant (Ios. 13,21); LXX Ὀφ.

4. Pater Raphaia tempore Nehemiae (Neh. 3,9).

5. Nomen Hur etiam latet in Benhur (3 Reg. 4,8); v. BENHUR.

HURAI v. HEDDAI.

HURAM (חֹרָם, חֹרָמָה), nonus filius Bale primogeniti Benjamin (1 Par. 8,5).

HURI. 1. Huri (חֹרִי, חֹרִיָּה), Simeonita, pater Saphat exploratoris (Num. 13,6[5]).

2. Huri (חֹרִי, חֹרִיָּה), Gadita, pater Abihail principis (1 Par. 3,14).

HUS (חֹס, חֹסָה, חֹסָה).

1. Filius Aram (Gen. 10,23; 1 Par. 1,17; Vulg. Us Gen. 10,23), progenitor tribus alicuius aramaeae, cui Flav. Iosephus (Ant. I. 6,4) Trachonitidem et Damascum assignat.

2. Filius primogenitus Nachor ex Melcha (Gen. 22,21). Utrum fuerit progenitor alicuius tribus, non constat; cf. *F. de Hummelauer* ad h. 1.

3. Filius Disan ex posteris Scir Horraei (Gen. 36,28; 1 Par. 1,42).

4. Terra Hus (Iob 1,1 LXX Ἀβελ; Ier.

23,20 Vulg. Ausitis, hebr. אֲוִיטִי; Lament. 4,21). Ubinam terra Hus, patria Iob, sita fuerit, non constat inter omnes. Ex Ier. 23,20 et Lam. 4,21 aliqui coniungunt terram Hus prope fines aegyptiacos et Edom sitam fuisse, sed immerito. Imprimis ex Iob 4,3 certum est lobum filium orientis accenseyi, quo nomine polissimum Arabes designantur. Deinde regio Hus ita collocatur, ut facile et Sabaei ex parte septentrionali Arabiae et Chaldaei latrones irruere potuerint Iob 4,13. 17. Apud LXX in additamento ad calcem libri addito eadem regio in finibus Idumaeae et Arabiae esse dicitur. Simili modo Alexander Polyhistor ex Aristaeo refert lobum sedem sibi in Ausitide regione apud ipsum Idumaeae et Arabiae confinium delegisse. Apud Ptolemaeum (V. 19[18],2) commemorantur Aisitae (ed. Müller-Fischer Ausitae) in orientalibus deserti Arabiae finibus versus Euphratem. Onom. Eusebii et S. Hieronymi (ed. Lag. 268,100; 108,19) domum Iob in Astaroth Carnaim fuisse ex traditione refert. In Peregrinatione S. Silviae Aquitanae (n. 13; apud P. Geyer, Hlin. hier. p. 36 et cf. p. 33. 39) legitur: « Carneas autem dicitur nunc civitas Iob, quae antea dicta est Dennaba (?) in terra Ausitidi, in finibus Idumaeae et Arabiae ». Secundum S. Ephraem Syrum « Iobi patria urbs fuit in finibus Idumaeae et Arabiae in terra Mathanin, quam postmodum Moyses interfecto rege Og dimidiae tribus Manassis dilationi adiecit positaque erat e regione Iordanis orientem versus ». Barhebraeus autem in suis Scholiis nomine Ausitidis omnem terram ab introitu Aegypti usque ad Damascum comprehendere censet.

Recentiores cum Wetzstein Iobi patriam ibi fuisse contendunt, ubi usque ad nostra tempora monasterium, quod Iobi vocatur, exstat i. e. prope *Nuwā* in regione *Nayru* in *Haurān*. Aliqui terram Hus aliquantum magis orientem versus quaerunt in regione *el-Tellul* ad orientalem plagam montium *Haurān* (W. Fries), alii vero inter septentrionem et orientem ab *Haurān* scil. prope Tadmor-Palmyram (Friedr. Delitzsch).

Cf. Alexander Polyh. fragm. 12 ex Ari-

staeo de Iobo apud C. Müller. Fragm. Hist. Graec. III. 220; Müller-Fischer, Ptolemaei Geogr. Vol. 1., Parisiis, Firmin-Didot 1883-1900, p. 1013; S. Ephraem Syr. Prol. in Iob, Opp. omnia, Romae 1740, II. p. 1. 2; Barhebraeus, Scholia in Iobum ex eius Horreo mysteriorum apud Kirschium, Chrestom. syr. ed. Bernstein, p. 187; Wetzstein apud Delitzsch, Commentar zu Ijob ed. 2 p. 551-604: Das Ijobskloster im Hauran und das Land Uz; W. Fries in Studien und Kritiken XXVII. 1854 p. 299 ss.; Friedr. Delitzsch in Zeitschr. für Keilschriftforschung II. 1885 p. 87-98; Knabenbauer, Comm. in Iob p. 34.

HUSAM (הוֹשָׁם, הוֹשָׁם, Ἀσάμ), rex

Edom de terra Themanorum, qui post Iobab regnavit, antequam filii Israel regem haberent (Gen. 36,34; 1 Par. 1,45. 46).

HUSATHITES seu de Husati (הוֹשָׁתִי, הוֹשָׁתִי, Ἀσάτωθι, Ἀθῶι, Ὡσάτωθι, Ὡζάτωθι) cognominatur Sobochai, unus ex heroibus Davidis (2 Reg. 21,18; 23,27; 1 Par. 11,29; 20,4; 27,11; pro Sobochai 2 Reg. 23,27 mendose legitur Mobonnai). Fortasse hoc nomen patronymicum referendum est ad Hosa in genealogia Iuda 1 Par. 4,4; v. HOSA 2.

HUSI (הוֹשִׁי, Χουσι), pater Baana, praefecti salomonici (3 Reg. 4,16). Probabilius est idem, qui alias in Vulgata scribitur Chusai (vide s. v.).

HUSIM. 1. Husim (הוֹשִׁים, Ἀσάμ), filius Dan (Gen. 46,23). Idem Num. 26,42 scribitur Suham (שׁוּחַם, Σουμ), a quo familia Suhamitarum.

2. Husim (הוֹשִׁים, הוֹשִׁים, Σουσίν, Ὡσιν), altera ex uxoribus, quas Saharaim Beniaminita dimisit, mater Abitob et Elphaal (1 Par. 8,8. 11). Vulgata 1 Par. 8,11 scribit Mehusin, confundens praepositionem σου seu בן cum nomine proprio. Sed F. de Hummelauer (Comm. in Num. p. 186. 187) vertendum esse putat 1 Par. 8,8: Saharaim genuit in regione Moab de concubina sua (anonyma) Mehusin et Baria, duos hos.

HUZAL (1 Par. 1,21) v. UZAL.

HYACINTHUS. 1. Hyacinthus dici-

tur imprimis color hebraice הַכֶּנֶף dictus, i. e. purpureae species caerulea seu potius violacea, quae ad cortinas, vela, ephod, vestes pontificias et regias aliaque adhibebatur (Ex. 25,4; 26,1 ss.; 2 Par. 2,7. 14; 3,14; 1er. 10,9; Ez. 23,6; 27,7. 24 etc.). V. PURPURA.

2. Praeterea hyacinthus vocatur gemma graece ὕακινθος appellata, quae undecimum fundamentum civitatis caelestis in Apocalypsi constituit (Apoc. 21, 20). In S. Scriptura eo nomine hoc uno loco commemoratur; nam quae in Vulgata Cant. 3,14 dicitur hyacinthus, in textu primigenio est הַיָּסִים, quam S. Hieronymus alibi melius *chrysolithum* exposuit (v. CHRYSOLITHUS). At haud improbabilius alio nomine in Vetere Testamento eadem gemma appellari censetur, scil. הַיָּסִים, a senioribus et S. Hieronymo λυγύριον, *ligurius* vocata, quae in rationali pontificio primum tertii ordinis locum occupavit (Ex. 28,19; 39,12). Nomen ligurii seu potius *lyncurii* (λυγούριον et λυγκούριον) ex fabula antiqua huic gemmae inditum est, quasi ex lyncis urina terra cooperta oreretur (Theophr. De lapid. (Fragm. II.) 3,28; Plin. VIII. 38,137; XXXVII. 3,52 s.); de quo *Plinius*: « ego falsum id totum arbitror nec visam in aevo nostro gemmam ullam ea appellatione » (XXXVII. 3,53). Merito igitur loco huius nominis fabulosi in Apocalypsi *hyacinthus* commemoratur, quae gemma et antiquis notissima et nostra etiam aetate in honore est. Colore quidem amethysto vicina a *Plinio* describitur, ea tamen differentia notata. « quod ille emicans in amethysto fulgor violaceus diluitur hyacintho, primoque aspectu gratus evanescit antequam satiet » (XXXVII. 9,123); Aethiopiam praecipue et Indiam hyacinthos mittere idem auctor testatur (ib. 126). Probabiliter hyacinthus ille antiquorum eiusdem mineralis species est, quae etiam nunc hyacinthus seu *zircon* nobile vocatur, quae licet non ad primum gemmarum ordinem pertineat, satis magni tamen aestimatur et potissimum ex India orientali, insula Ceylon et provincia Cambodja, in nostras regiones affertur. Color variat, plerumque in fulvum vel subru-

brum transiens, vel etiam gemma translucida est et coloris expers, quales prope S. Mariam ad lacum inveniuntur; reliquae quoque huius generis gemmae, intenso calori et luminis expositae, colorem amittunt et haud raro loco pretiosi adamantis falso supponuntur. Hanc vero gemmam nomine הַיָּסִים designari, post S. Epiphanium aliosque recentiores communiter admittunt; nomen hebraicum *Fr. Hommel* idem esse censet cum aegyptiaco *neshem* (Altisr. Ueberlief. 283).

Cf. S. *Epiphanius*. De 12 gemmis n. 7; *Fr. Rueus*, De gemmis 2,12; *J. Braun*, De vestitu sacerdot. Hebr. II. 14 n. 544-56; *J. J. Beltermann*, Die Uriu u. Thummim, Berlin 1824, 49-52; *E. F. K. Rosenmüller*, Handb. d. bibl. Alterth. IV. 1,37 s.; *K. E. Kluge*, Handb. d. Edelsteinkunde, Leipzig 1860. 292-9; *Leunis-Senft*, Synopsis III. 1 p. 668-71; *Naumann-Zirkel*, Elem. d. Mineralogie ed. 13, p. 480 s.; *M. Bauer*, Lehrb. d. Mineral., Berlin u. Leipzig 1886, p. 345 s. — Gemmarum haud raro etiam granatum coloris hyacinthini pro hyacintho vendunt.

L. FONCK.

HYADES v. STELLAE.

HYAENA. 1. Eccli. 13,18 textus graecus cum hebraeo legit πῆλ ἐλκῆν ηὐκὴν πρὸς σῶνα (hebr. צֶבֶרֶט; in Vulgata (v. 22) eius loco habetur: « quae communicatio sancto homini ad canem? », confusione exorta vel ex ἐλκῆν in versu praecedenti, vel ex lectione corrupta ἑγὼ pro ηὐκὴν; Peshitta cum textu graeco concordat (ܢܬܢܐ)). Sensus est, quod sicut nulla est pax neque communicatio, sed inimicitiae perpetuae inter hyaenam et canem, ita dives impius pauperem vexat et opprimit (cf. versum s.). Quae hyaenae et canibus in Oriente optime conveniunt; nam hyaenae in agris locisque desertis morantes noctu etiam ad domos et pagos procedunt et morticinis ossibusque cadaverum vescuntur, canes vero orientales in statu semisilvestri in vicis et circa urbes vicitantes ex iisdem morticinis cibum sibi conquirunt; unde naturaliter inimicitiae perpetuae nascuntur, in quibus hyaena, cane maior ac fortior, tamquam dives pauperis oppressor victor existit. Praeterea hyaena

etiam canibus insidiatur, ut carnibus ossibusque occisorum vescatur, multaque de inimicitiiis hyaenae ad canem narrant scriptores profani (*Aristot.* Hist. an. VIII. 7 al. 3,2; *Plin.* VIII. 30,106 etc.). Magno autem numero hyaenae (*Hyaena striata* Linné, ord. *Carnivora*) in Palaestina et Aegypto inveniuntur atque etiam antiquitus inveniiebantur multisque fabulis et superstitionibus tum penes antiquos tum apud hodiernos incolae famosae sunt, simul omnibus ob figuram, odorem, victum odiosae ac detestabiles.

2. Multi auctores cum LXX interpretibus etiam Ier. 12,9 nomine צִבְיָהּ hyaenam intellegunt, quippe quae in textu hebr. Eccl. sicut in lingua hebraica posteriore צִבְיָהּ et in arabica (*dab* sive *dabu*) eodem vel simili nomine appellatur. Licet nomen fortasse satis conveniens appareat, obstat tamen contextus, qui de avibus loquitur atque צִבְיָהּ יֵיטֵ potius cum S. Hieronymo avem variis coloribus pictam intellegendam esse innuit (v. Avis discolor s. v. AVES n. 4). — Nomen vero צִבְיָהּ pro hyaena occurrere videtur in nomine proprio vallis הַצִּבְיִים (1 Reg. 13,18 Vulg. *Seboim*) et loci צִבְיִים in tribu Benjamin (Neh. 11,34, Vulg. *Seboim*); v. SEBOIM.

Cf. *Sam. Bochart*, Hieroz. I. 830-41, ed. *Rosenm.* II. 163-79; *I. D. Michaelis*, Supplem. ad lex. hebr. p. 2064 s.; *Fr. I. Schoder*, Hierozoici Specimen I. 123-8; *E. F. K. Rosenmüller*, Handb. d. bibl. Alterth. IV. 2, 147-50; *H. O. Lenz*, Zool. d. alt. Griech. u. Röm. 123-6; *L. Leurysohn*, Zool. d. Talmuds 76 s.; *H. B. Tristram*, Nat. Hist. ed. 8, 107-9; *id.* Fauna and Flora of Pal. 19 s.; *J. G. Wood*, Bible Animals 62-4; *Leunis-Ludwig*, Synopsis I. 1 ed. 3. p. 186 s.; *Fr. Hommel*, Namen d. Säugeth. 307-10. 327. 381; *A. E. Brehm*, Tierleben ed. 3. II. 1-16. — Etiam in monumentis Assyriorum et Aegyptiorum haud raro hyaena occurrit; cf. *W. Houghton* in Trans. Soc. Bibl. Arch. V. 1877, 328; *Wilkinson-Birch*, Manners and Customs II. 78 fig. 346; 90 fig. 356 n. 15; 92 fig. 357 n. 3 et 6; III. 284 s.; *A. Erman*, Aegypten 510-2 (ex Papyro Anastasi I).

L. FONCK.

HYDASPES (Judith 1,6 graece) v. IADASON.

HYMENAEUS (Ἑμέναιος), vir haereticus quem Paulus iis accenset, qui bonam conscientiam repellentes circa fidem naufragaverunt. Eum simul cum quodam Alexandro tradidit satanae, ut discat non blasphemare 1 Tim. 1,19. 20. Poena ab apostolo inflictā eum non ad resipiscentiam adduxit; immo eius errore alii quoque seducti sunt; nam 2 Tim. 2,17. 18 scribit: « sermo eorum ut cancer serpit, ex quibus est Hymenaeus et Philetus, qui a veritate exciderunt dicentes resurrectionem esse iam factam et subverterunt quorundam fidem ». Ille itaque doctrinam de resurrectione carnis reiecit, eam de sola animi regeneratione quae fiat in baptismo explicans, fortasse abusus verbis Pauli Rom. 6,4: ut quomodo Christus resurrexit a mortuis, ita et nos in novitate vitae ambulemus vel Col. 3,1: si consurrexistis cum Christo, quae sursum sunt sapite.

HYPOCRITA. In Vulgata haec vox legitur Iob 8,13; 13,16; 15,34; 17,8; 20,3; 27,8; 34,30 et Is. 9,17 et 33,14; quibus locis exprimitur hebr. הָיָקֵף, quae voce generatim designatur homo impius et improbus; LXX ἄσεβής, ἄνομος, πικρόνομος, sed etiam ὑποκριτής, quam notionem vox in dialecto aramaica induit. Etsi itaque hypocrita in libris Iob et Isaiae sensu latiore de viro iniquo explicari debet, tamen in libris novi foederis significatione simulatoris retineri debet. Eiusmodi simulatores pietatis, cum sint scelerum pleni, describit Christus scribas et pharisaeos (Matth. 6,2 ss.; 15,7; 22,18; 23,14 ss.; cf. 24,51). Iure quoque simulator appellatur, qui cum ipse graves habeat defectus, studium prae se fert minimum alterius naevum corripiendi (Matth. 7,5; Luc. 6,42). Praeterea vide Marc. 7,6; Luc. 12,56; 13,15. — Sapiens quoque monet Eccl. 1,37: Ne fueris hypocrita in conspectu hominum, μή υποκριθῇς ἐν στόμασιν (serviliter secundum hebr. צִבְיָהּ אֲנֹכִי).

HYSSOPUS 1. Hyssopus in textu hebraico ubique est הִסּוֹפִס; item apud LXX interpretes et in textu graeco Novi

Testamenti semper ὕσσωπος legitur, quod etiam Graecus Venetus in locis Pentateuchi exhibet. Similiter Chaldaeus omnibus in locis חֲסִיפֹה interpretatur, sicut Peshitta חֲסִיפֹה, pro quo in hodierno textu syriaco 3 Reg. 4,33 חֲסִיפֹה i. e. sempervivum, herba scil. parietaria, legitur, sed fortasse cum Bocharto חֲסִיפֹה legendum erit (Hieroz. I. 588 ed. Rosenm. I. 672). In versione arabica similiter ḡāḡ in Ps. 50[51],9 et Hebr. 9,19, ac pariter in aethiopica ḡāḡ; in Pentateucho autem Arabs in Polyglottis vulgatus (Saadias) ḡāḡ i. e. thymum vel origanum interpretatur.

2. Usus hyssopi praesertim in immolatione Agni paschalis (Ex. 13,22) atque in lustrationibus sacris a Lege praecipitur (Lev. 14,4. 6. 49. 51. 52; Num. 19, 6. 18. Cf. Ps. 50[51],9; Hebr. 9,19), in quibus fasciculo hyssopi sanguine tincto leprosus vel domus infecta vel aliae res lustrandae aspergebantur. Praeterea bis tantum hyssopus in S. Scriptura occurrit, ubi in laudibus sapientiae Salomonis « hyssopus quae egreditur de pariete » tamquam lignorum (הֲעֵצִים) minimum « cedro quae est in Libano » opponitur (3 Reg. 4,33 hebr. 5,13), et cum in Evangelio Ioannis spongia aceto plena ori crucifixi Domini oblata narratur « hyssopo circumposita » (ἡ ὑσσωπὸς περιθέντες Io. 19,29), cuius caulis ab aliis Evangelistis arundo sive calamus dicitur (περιθέντες ἡ ἀρούρα Matth. 27,48; Marc. 15,36).

3. Quenam planta nomine hyssopi in S. Scriptura intellegatur, celebris est inter auctores veteres et recentiores quaestio. Octodecim candidatos ex regno vegetabili cl. O. Celsius in Hierobotanico enumerat, de quibus qui plura scire cupit, eius doctissimam commentationem adeat (Hierobot. I. 407-48), vel etiam alios auctores infra citandos. Similis inter recentiores invenitur dissensus, cum alii eandem in omnibus textibus plantam supponant, alii diversam velint hyssopum Legis, Salomonis, Evangelii. Favent alii *Hyssopo officinali* Linné (Kinzler, Riehm-Baethgen) vel *H. orientali* Adams (Cultrera); ex eodem ordine *Labiatarum* alii assumunt genus *Origanum*, quoad species in varias partes abeuntes, alii *Satureiam*

tureiam thymbra Linné praeferunt, vel *Salviae* vel *Marrubii* vel *Thymi* vel *Thymbrae* vel *Micromeriae* speciem vel aliam labiatifloram. Ad alium omnino ordinem transeunt, qui cum Royle, Tristram, Balfour hyssopum dicunt *Capparin spinosam* Linné vel qui *Sorghum vulgare* Persoon eligunt (J. Smith) vel *Parietariam officinalem* Linné vel *Musci* speciem (Hamilton) vel cum Kitto et Knight *Phytolaccam decandram* L. designant, ex America orientali oriundam atque ultimis saeculis in varias regiones introductam (E. Boissier, Flora orient. IV. 895).

Cf. Lev. Lemnius, Herb. bibl. explicatio c. 26; Sam. Bochart, Hieroz. I. 587-94, ed. Rosenm. I. 670-8; I. H. Ursinus, Arboreti bibl. Contin. 126-8; M. Hiller, Hierophyt. II. 41-6; W. Gesenius, Thesaurus 57 s.; E. F. K. Rosenmüller, Handb. d. bibl. Alterth. IV. 1,108-11; C. Sprengel, Comment. in Diosc. 3,27; P. Cultrera, Flora bibl. 173-7; H. B. Tristram, Nat. Hist. ed. 8, 455-8; A. Kinzler, Bibl. Naturgesch. ed. 9, 215 s.; F. Hamilton, Botanique de la Bible 161 s.; J. Smith, Bible Plants 214-20; I. H. Balfour, Plants of the Bible, ed. nova, 44-7; A. E. Knight, Bible Plants and animals 33-5; G. Henslow, The Plants of the Bible 34-6; Riehm-Baethgen, Handwbch. ed. 2, II. 1799-1801.

4. In tanto scriptorum veterum ac recentiorum dissensu probabilius tenendum videtur imprimis חֲסִיפֹה certe plantam significare, cui nomen ὕσσωπος et *hyssopus* conveniat; id ex auctoritate S. Pauli Apostoli (Hebr. 9,19) et ex consensu veterum interpretum indubie constat. Neque ulla apparet ratio, cur in aliquibus textibus hanc, in aliis omnino aliam alterius ordinis plantam eodem nomine indicatam intellegamus. Deinde satis certe etiam constat, nomine *hyssopi* a veteribus (*Columella* VII. 3,22; XI. 35 s.; *Dioscur.* 3,27 al. 30; 5,50; *Plin.* XXV. 11,136; XXVI. 4,23, al.) designari plantam ex ordine *Labiatarum* et ex tribu *Satureinearum*, ac probabilius species eius generis, quod a Linneo *Origanum* dictum est. Eam quam idem auctor *Hyssopum officinalem* vocavit plantam hyssopum biblicam dicere vetat quod in dilione orientali non invenitur

nisi in regionibus Tauriae et Caucasi ac Transcaesiae Persiaeque borealis (*E. Boissier*, Flora orient. IV. 584 s.); eam autem antiquitus in Palaestina aut Aegypto existisse nulla ratione probatur. Etiam auctores rabbinici *Maïmonides*, *Abulwalides*, *Tanchum*, al. (cf. *I. Löw*, *Aram.* Pl. n. 93 et 193) *Origani* speciem interpretantur, eandemque *Saadias* nomine *ša'tar* intellegit. Variæ autem *Origani* species hodie in Syria, Palaestina, Aegypto inveniuntur (octo apud *G. E. Post*, Flora of Syria 615-8; 23 species orientales ap. *Boissier* l. c. 546-54); antiquitus etiam *Origanum maioranum* Linné frequenter in Aegypto colebatur (*Fr. Woenig*, Pflanzen im alt. Aeg. 227; *V. Loret*, Flore pharaon. ed. 2 p. 35). Ex his *Origanum maru* L. potiore iure hyssopi biblici nomen et locum videtur obtinere; nam et in muris rupibusque Palaestinae communiter crescit et maiorem praeteritis altitudinem trium vel quattuor pedum attingit et in basi fruticosum ad *ligna* licet minima pertinet ac firmitatem arundinis habet; praeterea ab Arabibus nomine *ša'tar* specialiter appellatur et in Talmude (tract. Shabb. 409 b) expresse pro hyssopo commemoratur (*Boissier* l. c. 553; *Post* l. c. 517; *Löw* l. c. n. 193). Quare dictis S. Scripturae optime videtur convenire,

cum non modo sicut reliqui candidati usui in Lege praescripto aptetur, sed et lignis propter basem fruticosam recte adnumeretur (3 Reg. 4,33) et calamus sat longum ac firmum ad porrigendam Crucifixo spongiam aceto plenam habeat. Neque opus est, in narratione S. Ioannis, qui eodem verbo (περιθεῖς) atque alii Evangelistae utitur, ad aliam explanationem longius petitam et verbis ipsis contrariam confugere, quasi milites in supremo calamo arundineo herbam hyssopi atque in hac herba tanquam sustentaculo spongiam posuerint: ubi certe non spongia hyssopo sed hyssopus potius spongiae circumposita haberetur; multo autem minus contradictionem aliquam inter Ioannem et synopticos adstruere oportet.

Cf. praeter auctores citatos *Cl. Saumaise*, De hyssopo in cruce Christi epistolae tres ad Thomam Bartholinum, Lugduni Bat. 1646; *id.* Responsio in quaestionem Reverocicii de Hyssopo Evangelii, Roterodami 1654; *Ov. Montalbanus*, Dell' Issopo di Salomone, Bologna 1671; *G. W. Wedel*, De Hyssopo I-III, Ienae 1692; *Blas. Caryophilus (Garofato)*, Dissertat. miscell. pars I., Romae 1718, 167-256 (origanum esse); *G. S. Volla*, Lettera sull' Isopo, in Opusc. scelti 5,397-408.

L. FONCK.

IAASIA (יֵאָסִיָּא, Αἰζαία), filius The-
cuc, aequalis Esdrae (Esdr. 10,15).

IABEL (יֶאֱבֶל, יֶאֱבֶלֶךְ), filius Lamech, pater habitantium in tentoriis atque pastorum, ex Ada matre genitus (Gen. 4, 20); eius frater ex eadem matre natus erat Iubal pater cantantium cithara et organo (4, 21). Ut notat *Bochartus* (*Hieroz.* I. lib. 2. cp. 44 *ed. Rosenmüller* I. 317), Iabal non fuit primus auctor cogendi pecoris; nam Abel fuerat pastor ovium et haud dubie patrum plurimi idem vitae institutum secuti fuerant; at vitae pastoriciae Iabal aliquid insigne ex opinione *Bocharti* addidit, nempe ut greges e loco in locum migrarent pro ratione pascuorum et sub tentoriis tamquam in caulis ab inclementia caeli se protegerent. Sed haec artificiosius excogitata sunt a *Bocharto*. Iabal enim non dicitur pater *omnium* habitantium in tentoriis, sed describitur artem pastorum exercens, quam a parentibus didicerat.

IABES. 1. iabes seu Iabes Galaad (יַבֵּשׁ, eliam יַבֵּשׁ, plerumque cum addito גִּלְעָד; Ἰαβεθ, Γαλαὰδ, Ἰαβός), urbs in terra Galaad. Prima urbis mentio fit Iud. 21,8-14; cum eius incolae Israelitis cum tribu Benjamin bellum exitiale gentilibus opem ferre neglexissent, anathemate puniti sunt exceptis 400 virginibus, quae viri thorum nescierant et Beniaminitis superstitiis ad servandam tribum traditae sunt. Postmodum autem Saul Beniaminita cum universo Israel urbem Iabes Galaad, quam Naas Ammonites oppugnabat, ab interitu servavit (1 Reg. 11,1-11). Neque beneficii accepti immemores erant Iabesitae; post func-

stam pugnam ad montem Gelboe cada-
vera Saulis eiusque filiorum, quae Phi-
listhaei in muro Bethsan affixerant, viri
fortissimi labes Galaad nocturno itinere
ablata combusserunt et ossa sepelierunt
sub terebintho (Vulgata in nemore)
prope labes (1 Reg. 31,11-13; cf. 4 Par.
10,11-12). Quod facinus insignis grati-
tudinis David legatis in labes missis col-
laudavit (2 Reg. 2,4. 5) et postea ad
finem perduxit asportatis ossibus Saul
eiusque filiorum de labes in Sela urbem
Beniamin, ubi in sepulcro Cis patris
Saul ea condidit (2 Reg. 21,12).

Situs in S. Scriptura indirecte tantum determinatur, quatenus 1 Reg. 11,8. 9 a Bezech Issachar itinere fere unius diei (ut videtur) et 31,12 a Bethsan itinere unius noctis abesse dicitur. Flavius Iosephus (Ant. VI. 3,1; 14,8) dicit *Βεζέ* esse urbem primariam Galaaditarum, quae viros corpore robustos animoque feroces alat. Tempore Eusebii ostendebatur vicus trans Iordanem 6 mil. pass. a Pella super montem euntibus Gerasam (Onom. ed. Lag. 268,81; 134,17). Nomen conservari creditur in *Wādī Yābis*, qui torrens ab oriente in Iordanem desinit haud longe infra *Beisān* (Bethsan). Utrum urbs antiqua quaerenda sit in ruinis *el-Deir* a meridie torrentis *Yabīs* (*Robinson*) an prope *Keḫr ʿAbīl* a septentrione eiusdem torrentis, dubium est.

Cf. *Robinson*, Neuere bibl. Forsch. p. 418 s.; *Guérin*, Samarie I. 290; Zeitschr. d. D. Pal.-Ver. XIII. 1890 p. 211; *Schumacher*, Across the Jordan p. 278 s.; *Oliphant*, Land of Gilead p. 174 (Iabes = *Miryamin*); *D. Zaneccchia*, La Palestine, d'aujourd'hui 1899 II. 602. 603; *Buhl*, Alt. Pal. 1896 p. 259.

2. Iabes (יָבֵס, יָבֵס), oppidum in quo habitabant cognationes scribarum (1 Par. 2,55), qui inter filios Salma tribus Iuda ullum recensentur et in tres ramos distinguuntur scil. canentes atque resonantes (Vulgata) seu in Thirathaeos, Shimeathaeos, Suelathaeos (hebr.); iidem referuntur ad Cinaeos (cf. Iud. 1, 16) et cum Rechabitis eundem progenitorem Chammath (חַמַּת, Vulgata Calor) habuisse dicuntur. Totus textus satis obscurus est. Vide s. vv. CINAEL et RECHABITAE.

3. Iabes (יָבֵס, יָבֵס) nominatur in genealogia Iuda 1 Par. 4,9 : Fuit Iabes inelytus prae fratribus suis et mater eius vocavit nomen illius Iabes dicens : Quia peperit eum in dolore (יָבֵס). Ad nomen iterum alluditur in voto, quo Iabes immunitatem a dolore pro se a Deo Israel impetrat (4,10). Ex textu non liquet, utrum nexum habeat cum Cos (4, 8), cuius vel filius vel frater fuisse a nonnullis putatur neque certo affirmari potest eum esse patrem seu dominum oppidi Iabes (n. 2). Quomodo Talmudici nomen Iabes explicaverint, refert *Buxtorf* (Lex. chald. talmud. rabb. 965. 966).

4. Iabes (יָבֵס, יָבֵס), pater Sellum regis Israel (4 Reg. 15,10, 13,14).

IABIN (יָבִין, יָבִין), duo reges Asor.

1. Prior Iabin erat rex praepotens et caput foederis, quo reges chananai in Palaestina septentrionali et media coniuncti Israelitis terram promissam occupantibus resisterunt. Iosue illos ad aquas Merom devicit, deinde civitatem Asor captam incendio delevit ac regem gladio percussit (Ios. 11,1-11). Sed Asoritae urbem eversam mox reaedificaverunt, ut ex sequentibus (n. 2) elucet.

2. Tempore Debhorae alter erat Iabin, rex Asor, qui totis viribus id agebat, ut regiones progenitori suo per Ioseph ereptas recuperaret et potestatem priorem restitueret. Is per Sisaram ducentem militarem, qui in arce Haroseth gentium residebat, Israelitas polissimum septentrionales in servitutem viginti

annorum redegit; habebat enim in exercitu suo nongentos currus falcatos (hebr. ferreos), quibus Hebraei pedites resistere non valebant. Etiam hic Iabin alios reges chananaeos foedere iunctos habuit. Cum eodem amicitiam vel, si mavis, aliquod veri nominis foedus iniecit parva gens Iaber Cinai, qui eo tempore haud procul a Cedese Nephthali tentoria fixerat. Sed post insignem cladem Sisara a Debhora et Barac inflictam filii Israel in dies fortiores facti sunt et potestatem Iabin paulatim ad nihilum redegerunt (Iud. 4,2-24; 5,19; Ps. 82[83],10).

IABNIA (יָבְנָה, יָבְנָה), urbs (2 Par. 26,6) v. IAMNIA.

IABOC, IEBOC (יָבֹק, יָבֹק), fluvius qui ab oriente in Iordanem influit et terram Galaad, si latiore sensu accipitur (v. GALAAD 4), mediam fere intersecat. Iuxta ripam eius Iacob patriarcha cum angelo luctans benedictionem ac nominis mutationem adeptus est (Gen. 32,22). Idem fluvius erat terminus septentrionalis Ammonitarum, quorum fines antiquitus inter Iordanem, Arnonem, desertum orientale fluviumque Iaboc continebantur (Iud. 11,13). Postea vero Schon Amorrhaeus totum hoc territorium occupans Ammonitas orientem versus in desertum Iaboc superioris, Moabitis genere et amicitia cum Ammonitis coniunctos meridiem versus in ripam Arnonis sinistram reiecit; unde illo tempore Iaboc erat terminus inter regna Schon regis Hesebon et Og regis Basan (Ios. 12,2; Iud. 11,22). Haec Amorrhaeorum regna Moyses destruxit; quodsi igitur terminus orientalis, a quo Deus arma Israelitarum prohibuit, indicantur terra Ammon et Iaboc torrens (Num. 21,24; Deut. 2,37), intellegendus est Iaboc superior (*Nahr 'Ammān*), qui prope urbem Rabbath Ammon (*'Ammān*) originem ducens vallem desertam percurrit, quam Ammonitiae a Schon Amorrhaeo antiquis sedibus pulsati incolabant. Unde etiam terminus orientalis tribus Gad dicitur esse Iaboc (Deut. 3, 16) i. e. Iaboc superior. Ex his intelligitur quo sensu Iaboc Deut. 3,16 et Ios.

12,2 terminus filiorum Ammon vocetur. Nomen illi est *Nahr 'Ammān* usque ad castellum *Qal'at el-Zerqā*; ibi vero cursum suum, qui hucusque inter septemtrionem et orientem spectabat, magis magisque ad occidentem inflectit et novum quoque nomen *Nahr el-Zerqā* (fluvius seu torrens caeruleus) assumit. Brevi post a parte dextera recipit tributarium *Wādi Djerash* (Gerasa) et occidentem petit, donec montibus relictis ad meridiem vergens Iordani coniungitur prope pontem *Damiye* et e regione montis *Qarn Šarṭabe*. *Nahr el-Zerqā* hodie separat provinciam meridici *Belqā* a provincia septemtrionis *Adjlān*.

Medio aevo Iaboc magis aquilonem versus quaerebatur. Sed secundum Onom. Eusebii (*ed. Lag.* 263,80) Iaboc fluit inter Amman i. e. Philadelphiam et Gerasam (addit S. Hieronymus *ed. Lag.* 130,31 : in quarto eius miliario) et ultra procedens Iordani fluvio commiscetur.

Cf. *Chr. Cellarius*, Notitiae orbis antiqui l. 3. c. 13, Leipzig 1806, II. p. 650; *F. de Saulcy*, Dict. des antiquités bibl. 1859, col. 365; *Riess*, Bibl. Geogr. p. 30 et Bibel-Atlas *ed.* 3 p. 16; *V. Annessi*, Atlas bibl. 1877 p. 15; *J. Fahrngruber*, Nach Jerusalem *ed.* 2 II. p. 126. 127; *D. Zaneckhiā*, La Palestine d'aujourd'hui 1899 II. 596. 597; *Buhl*, Alt. Pal. 1896 p. 121. 122; — Opiniones erroneas medio aevo praevalentes enumerat *L. Heidet* apud *Vigouroux*, Dict. de la Bible III. 1056-1058.

IACAN (1 Par. 4,42) v. ACAN et BENEIAACAN.

IACAN (Deut. 10,6 Beroth filiorum Iacan) v. BENEIAACAN.

IACHAN (יַחֲזָן, Ἰαχζάν, A Ιαχζν), princeps cuiusdam cognationis Gad in Basan (1 Par. 5,13).

IACHANAN v. IECNAM.

IACHIN (יָכִין; Ἀχελν, Ἰαχελν, Ἰαχιν).

1. Quartus inter sex filios Simeonis (Gen. 46,10; Ex. 6,15), progenitor Iachinitarum (Num. 26,12). Eius loco legitur 1 Par. 4,24 Iarib (יָרִיב, Ἰαριβ), quod haud dubie corruptum est ex Iachin. In enumeratione Num. 26,12 et 1 Par. 4,24 Iachin (Iarib) est tertius in-

ter quinque filios Simeonis; omissus enim est Ahod tertius filius, fortasse quia eius posteritas iam fere extincta erat.

2. Princeps vigesimae primae classis sacerdotalis tempore Davidis (1 Par. 24, 17).

3. Sacerdos post exsilium Hierosolymis habitans (1 Par. 9,10; Neh. 11,10) vel probabilius familia sacerdotalis.

IACHIN columna v. COLUMNAE.

IACIM (יָכִים, Ἰαξιμ). 1. Beniaminita de filiis Semei (1 Par. 8,19).

2. Princeps duodecimae classis sacerdotalis tempore Davidis (1 Par. 24,12).

IACOB. 1. Iacob (יַעֲקֹב, Ἰακώβ), filius Isaac et Rebeccae, quasi « plantae prehensor » dictus, quod fratris Esau plantam manu tenens ex utero prodierit. Porro Esau factus est venator, Iacob pastor; hic matri, ille patri carior. Huic prae fratre primatus Gen. 25,23 fuerat promissus. Quod ipsi indubie igitur erat obventurum, id fraude praeripere studuit Iacob, et ita infinitis se implicuit quaestionibus. Revertentem de venatione atque exhaustum, ut sibi primogeniturae iura pro lentis edulio divideret, induxit. Postea fratris nomen, vocem pellemque hirsutam ementitus, hoedulum ferens a Rebecca venationis instar conditum, patris caecutientis benedictionem, quam primogeniturae iura consequabantur, furatus est. Iacobo, quo fratris iram evaderet simulque uxorem suae stirpis nancisceretur, suasit Rebecca, ut ad fratrem Laban in Haran Mesopotamiae proficisceretur. Iacob igitur in Bethel visione scalae renovatisque divinis promissionibus recreatus venit in Haran. Cui Laban pactus est, ut pro septennii servitio Rachelem filiam acciperet uxorem. Verum nuptiarum nocte Racheli Lia supponitur minus venusta. Alterius igitur septennii suscepto servitio optatis Rachelis nuptiis potitur Iacob. Vult porro Deus, ut qui fratrem decipisset patrisque amore esset frustratus, ipse et a patruo deciperetur et uxorem constantem experiretur zelotypiam. Igitur Lia peperit Ruben, Simeon, Levi, Iuda. Rachel infecunda sororisque in-

vida Iacobo Balam concessit ancillam, quae ei genuit filios Dan et Nephthali. Lia novis partibus se imparem experta, concessit ancillam Zelpham, e qua nati sunt Gad et Aser. Præterea Rachel pro mandragoris Ruben Liae permisit unius noctis concubitum, quo haec concepit Issachar, et aliquanto post Zabulonem. Rachel tandem genuit Ioseph, qui matris imprimis dilectae intuitu Iacobo semper exstitit ceteris filiis carior. Ab angelo monitus, ut (post viginti annos) in terram suam reverteretur, Iacob cum Laban de mercede sex annorum agit, deceptus primum deceptorem decipit atque cum plurimis gregibus, uxoribus et liberis clam se subducit. Rachel patris idola furatur. Laban fugientes in monte Galaad consecutus ad res amice componendas a Deo monetur; idolis frustra quaesitis perpetuam cum Iacobo pacem constituit, tumulo in memoriam erecto. Chanaanitidis finibus appropinquanti Iacob duo angelorum agmina se conspicienda offerunt, trajecto vado Iacob cum angelo luctatur et ab eo benedictionem nanciscitur novumque nomen Israel (v. ISRAEL), fratri Esau reconciliatur, altaria extruit in Sichem et in Bethel. Prope Bethlehem Rachel, edito primum in lucem Beniamino, moritur et sepelitur. Patrem Isaac prope Hebron revisit ac postmodum cum Esau sepulturae dat. Propter Ioseph, quem a fera discriptum existimat, in summam devenit tristitiam, allato nuntio eum in Aegypto honestissimo loco vivere reviviscit. Divina in Bersabee confortatus visione in Aegyptum proficiscitur, Iosephum amplectitur, Pharaonem salutat. Valicinio, quod Iacobaeum dicitur, singulorum filiorum aliqua fata praenuntiat nec tamen facere potest, quin praetermisso Ioseph primatum futuri temporis Iudae attribuat. Tamen principatum et iura primogeniturae Iosepho in Aegypto exercenda paterna auctoritate attribuit. Moritur senex 147 annorum, et sollemnibus in spelunca Machpela honestatur exsequiis. V. JOSEPH 1. Eius acta habes Gen. 25,15-50,13. Cf. Ios. 24,4,32; 1 Reg. 12,8; 1 Par. 16,17; Iudith 8,13; Mal. 4,2; Matth. 1,2; Luc. 3,34; Act. 7; Rom. 9,13; Hebr. 11,20 s. Uti porro Deus no-

men assumit « Deus Abraham, Isaac et Iacob », ita etiam nomen « Deus Iacob »: 2 Reg. 23,1 et in psalmis et prophetis passim. Populus electus dicitur « Iacob » Num. 23; Deut. 33,4. 10. 28; Iudith 13,31 et in psalmis et prophetis passim; frequentius tamen « filii Iacob » vel « semen Iacob ». Veritas historiae Iacob confirmatur veritate actorum hinc Abrahæ, illinc narrationis Exodi et, ubi Aegyptiorum res attingit, eorum monumentis egregie illustratur.

De puteo Iacob v. SICHAR.

2. Iacob (Ἰακώβ), pater Ioannis et avus Eupolemi legali a Iuda Mach. Roman missi (1 Mach. 8,17).

3. Iacob (Ἰακώβ), qui genuit Ioseph virum Mariae (Matth. 1,15. 16); vide s. v. HELI.

IACOBA (יַעֲקֹבָה, Ἰωζάβη), unus ex tredecim principibus cognationum Simeon, qui tempore Ezechiae regis pastores chanaanæos ex terra Gador expulerunt (1 Par. 4,36).

IACOBUS (Ἰάκωβος), nomen duorum apostolorum.

1. Iacobus, filius Zebedæi, frater Ioannis, apostolus. Cum pater eius in opere piscatorio adhiberet mercenarios (Marc. 1,20) et mater eius, Salome (cf. Matth. 27,56 et Marc. 15,40) esset inter mulieres « quæ secutae erant Iesum a Galilæa ministrantes ei » (Matth. 27,55), Iacobus ex familia erat satis opulenta, saltem non paupere. Vocatur a Iesu ad eius sequelam simul cum fratre, quando ambo simul cum Simone in stagno Genesareth opere piscatorio occupati erant (Luc. 5,10). Cum enim post miraculosam piscationem retia reficerent, etiam ipsi. ut antea Simon, vocati sunt a Domino: « Et relicto patre suo Zebedæo in navi cum mercenariis secuti sunt eum » (Marc. 1,20; Matth. 4,21). In albis apostolorum recensetur secundo loco (Marc. 3,17), tertio (Matth. 10,3; Luc. 6,14; Act. 1,13); in evangelis ante fratrem, in Act. post eum (saltem secundum testes plerosque). Ipse et frater eius cum Petro erant discipuli maxime Domino familiares; hi tres adiunguntur ad resurrectionem filiae Iairi (Marc. 5,37), testes sunt transfigurationis (Marc.

9,2; Matth. 17,1; Luc. 9,28), testes quoque agoniae Iesu in horto: assumpto Petro et duobus filiis Zebedaei coepit contristari et moestus esse (Matth. 26, 37). Ipse et frater eius appellati sunt a Domino: boanerges, filii tonitru (Marc. 3,17); ingenii quippe erant fervidioris; nam cum Samaritani Iesum, quia facies eius erat euntis in Ierusalem, non recipere hospitio, dixerunt ad Dominum: Domine, vis ut ignis descendat de caelo et consumat illos (Luc. 9,54)? Ab iis incitata mater petit a Domino: dic ut sedcant hi duo filii mei unus ad dexteram, alter ad sinistram in regno tuo (cf. Marc. 10,35 et Matth. 20,20). Ibi praedixit eis Dominus fore, ut calicem passionis biberent. Atque Iacobus primus est apostolorum qui mortem Christi causa obiit; Herodes enim Agrippa occidit Iacobum fratrem Ioannis gladio (Act. 12, 2). Vocari quoque solet Iacobus maior, ut distinguatur ab altero Iacobo qui minor dicitur (Marc. 15,40).

S. Iacobus maiorem praedicasse in Hispania excludi videtur tum sententiis illis quas scribit Paulus Rom. 15,20-24 tum ratione chronologica, quoniam Hierosolymis iam anno circiter 44 p. Chr. martyrium passus est. Ceterum vide Acta Sanctorum, Iulii t. VI. (1729) p. 73-114; *Gams*, Kirchengesch. von Spanien, Regensburg 1862; sed cf. etiam *Fidel Fila* in Revista mensual: Razón y Fe, Madrid 1901 I. p. 70 ss. 200 ss. 306 ss.; 1902 II. p. 35 ss. 178 ss.; 1902 III. p. 49 ss. 314 ss. 475 ss.

2. Iacobus, filius Alphaei et Mariae, sororis (seu cognatae) matris Iesu, cognominatus minor, ὁ μικρός, apostolus, frater Domini. Praeprimis, cum agitur quaestio, sintne duo vel tres Iacobi distinguendi, bene oportet attendere, a Paulo clarissime Iacobum fratrem Domini adnumerari apostolis sensu stricto. Nam, ut se verum esse apostolum probet, scribit inter alia, ne videatur ab hominibus edoctus esse: neque veni Ierosolymam ad antecessores meos apostolos (πρὸς τοὺς πρὸ ἐμοῦ ἀποστόλους), sed abii in Arabiam... deinde post annos tres veni Ierosolymam videre Petrum; alium autem Apostolorum non vidi nisi Iacobum fratrem Domini (Gal. 1,17-19). Si

apostolus latiore sensu intellegeretur, assertio apostoli esset falsa; nam vidit in urbe etiam Barnabam, a quo ad apostolos est ductus, et Barnabas erat sensu latiore apostolus (Act. 14,4. 13) et ante Paulum ad apostolatam vocatus. Pariter elucet ex modo narrandi et Pauli et Lucae, eos nullo modo tres, sed solum duos Iacobos agnoscere. Postquam enim Iacobus frater Ioannis ab Herode occisus est, iidem qui ante eius mortem sedulo addiderunt epitheton ad certum Iacobum designandum, iam scribunt de Iacobo sine ulla ulteriore designatione. Ita Paulus Gal. 1,19 nominat Iacobum fratrem Domini, quia eo tempore etiam alter Iacobus frater Ioannis superstes erat; sed Gal. 2,9. 12 Iacobum solum scribit, quia eo tempore alter iam erat ab Herode occisus. Eodem modo scribit Lucas; postquam enim narravit, Iacobum fratrem Ioannis esse occisum gladio (Act. 12,2), in subsequentibus refert de Iacobo sine ulteriore designatione 12,17; 15,13; 21,18; id quod non fecissent, si duo Iacobi fidelibus noti fuissent.

Pater igitur eius est Alphaeus (Matth. 10,3; Marc. 3,18; Luc. 6,15); mater eius Maria (Marc. 15,40) quae Ioan. 19,25 vocatur: soror matris Iesu, Maria Cleophae vel potius ἡ τοῦ Κλωπᾶ, vel ut alii codices habent Κλωπα. Iam Alphaeus et Klopas facile ad unum nomen Ἰσὴν reducuntur, quia littera η ab aliis durius, lenius ab aliis pronuntiabatur; vide s. v. ALPHAEUS 2. Iosephum fratrem Cleophae fuisse referunt *Hegesippus* (apud *Eus.* H. e. 3,11) et *Epiphanius* (Haer. 78, 7). Iste Iacobus, frater Domini, cognominabatur ὁ μικρός, minor (Marc. 15,40) eratque frater Iudae vel Thaddaei (Iudas 1), quocum in albis apostolorum in ultimo quaternione recensetur (Matth. 10,3; Marc. 3,18; Luc. 6,16; Act. 1,13 Iudas Iacobi, scil. frater). Dominus eum peculiari apparitione post resurrectionem dignatus est (1 Cor. 15,7). Eum vidit Paulus (Gal. 1,19); in concilio Apostolorum proposuit modum quo facilius Iudaeochristiani cum ethnochristianis vitae communis consuetudinem inire possent (Act. 15,13-21). Ipse et Cephas

et Ioannes erant etiam apud Iudaizantes οἱ δοξοῦντες, et οἱ δοξοῦντες; στυλοὶ εἰναι (Gal. 2,2. 9); immo Iudaizantes ad eius auctoritatem provocasse videntur (cf. Gal. 2,12), nam propter eos qui a Iacobo (ἀπὸ Ἰακώβου) erant, Petrus timens eos se subtraxit a mensa ethnicochristianorum. Erat episcopus hierosolymitanus per annos triginta; Ananus pontifex post Festi procuratoris mortem et ante Albini successoris adventum « opportunum sibi tempus adesse ratus synedrio coacto Iacobum fratrem illius Iesu qui dicebatur Christus, cum nonnullis aliis velut legis violatae reos accusavit statimque lapidandos tradidit » (*Flav. Jos. Ant. XX. 9,1*). Aliquantum aliter eius martyrium refert *Hegesippus* (apud *Euseb. Hist. eccl. 2,23*).

Idem apostolus Iacobus scripsit epistolam « duodecim tribubus quae sunt in dispersione ». Epistolam itaque dirigi ad Christianos extra Palaestinam degentes, ipsa voce ἐν τῇ διασπορᾷ indicatur. Dirigi autem ad Christifideles, non ad Iudaeos infideles (ut aliqui putabant) elucet ex eo, quod adhortatio fit non ad fidem suscipiendam, sed ad fidem iam susceptam operibus et vita sancta demonstrandam et exhibendam; admonentur ad *verbum* audiendum; iubentur presbyteros ecclesiae advocare (4,23; 5,14). At contravertitur, sitne epistula directa ad Iudaeochristianos i. e. ad ecclesias quarum longe maxima pars ex Iudaeis constabat, vel ad omnes Christianos qui soli verum populum Dei constituunt, sed ita, ut pro auctoritate qua Iacobus apud Iudaeochristianos pollebat proxime hos ob oculos habuerit. Pro priore sententia cf. *Al. Schaefer*, Einleitung p. 304; pro altera *Cornely*, Introd. III. p. 631. Ubi vero illae ecclesiae quaerendae sunt? Cum in epistula certi quidam defectus reprehendantur, pauperes certo modo contemni, munus docendi avidius appeti etc., non possunt omnes ecclesiae intellegi. Cogitatum est de ecclesiis Syriae, Phoeniciae, Asiae minoris. Quando epistula scripta sit, cum alia desint, ex eius argumento coniciendum est. Cum graves defectus reprehendantur, ad primum tempus suscepti evangelii epistula certe non erit referenda. Ex altera parte nihil

occurrit in epistula quo necesse esset eam dici scriptam post annum 60-61.

IADA (יָדָא, Ἰαδᾱε, Ἰδουδᾱ), filius Onam et frater Semei in genealogia Ierameel primogeniti Hesron de stirpe Iuda (1 Par. 2,28. 32).

IADAIA v. **IDAIA** 1.

IADASON (Ἰδασσος) est nomen fluvii, cuius accolae una cum accolis Euphratis et Tigridis a rege Assyriorum Nabuchodonosor (Asurbanipal) ad arma vocabantur, ut contra Arphaxad regem Medorum (v. **ARPHAXAD** 2) pugnarent (*Judith* 4,6). Qualis fluvius Iadason sit, incertum est. Haud dubie Hydaspes in India, notissimus ille tributarius Indi, nimum abest, quam ut in quaestionem venire possit. Syrus verit Ulai (יְלַי); quodsi in textu primigenio legebatur Ulai, intellegendus erit fluvius Eulacus auctororum classicorum, de quo s. v. **ULAI**.

IADDO (יָדָד, Ἰαδδᾱλ), filius Zachariae, princeps tribus Manasse ad orientem Iordanis tempore Davidis (1 Par. 27, 21).

IADIAS (יָדִיָּא, Ἰαδ(α)s), cognominatus Meronathites i. e. de oppido Meronoth (v. **MERONATHITES**), a Davide super asinos constitutus (1 Par. 27,30).

IADIEL, IADIHEL (יָדִיֶּל, Ἰαδ(α)λ, Ἰαδ(α)λ, Ἰαδ(α)λ). 1. Princeps cognationum beniaminiticarum, ex quibus tempore Davidis numerabantur 47200 viri fortissimi (1 Par. 7,6. 40. 41). Recensetur in v. 6 tertius inter tres filios Benjamin, unde interpretes multi probabile habent eundem esse, qui Gen. 46,21 et Num. 26, 38 Asbel vocatur (v. **ASBEL**); sed fortasse propter numerosam stirpem nostro loco filius Benjamin vocatur, etsi solum ex eius posteris fuit.

2. Levita de filiis Core, ianitor tempore Davidis (1 Par. 26,2).

Alios viros eiusdem nominis hebr. vide s. v. **IEDIHEL**.

IADON (יָדָן, LXX omitt.), cognominatus Meronathites (vide s. v.), vir qui

cum viris de Gabaon et Maspha Nehemiam adiuvit in muris Ierusalem extruendis (Neh. 3,7).

IAGUR (יגור, אסור, A 'Izγούρ), urbs in meridiana plaga tribus Iuda (Ios. 15, 21). Est ignota.

IAHADDAI (יהדי, in pausa ידדי; Ἀδδαί, B 'Iησοῦ, A 'Iαδαί), vir in genealogia Caleb filii Hesron (1 Par. 2,47; cf. *Sel. Baer* ad h. l.). Quo vinculo cum hac genealogia connectatur, non apparet.

IAHALA (יעלה, 'Iεληλ), unus de servis Salomonis, cuius posteri duce Zorobabel ex captivitate redierunt (Neh. 7,38). Idem Esdr. 2,56 scribitur Iala (יעלא, 'Iεληλ).

IAHATH (יהת). 1. Filius Lobni filii Gersom filii Levi (1 Par. 6,20[3]; LXX 'Iεθ), unus ex maioribus Asaph (6,43 [28]; Vulg. Ieth, LXX 'Hγα).

2. Filius Raia filii Sobal in genealogia Iuda (1 Par. 4,2; LXX 'Iεθ).

3. Levita, filius Salemoth de stirpe Caath, tempore Davidis (1 Par. 24,22; LXX 'Iνδθ).

4. Levita ex familia Merari, unus ex praepositis operantium, cum Iosias rex templum instauraret (2 Par. 34,12; LXX 'Iε).

Idem nomen hebr. gerit, qui in Vulgata 1 Par. 23,10. 11 scribitur Lebeth.

IAHAZIEL (יהיזאל). 1. Levita filius Hebron filii Caath (1 Par. 23,19; LXX 'Oζαλ). Eiusdem nomen iterum legitur 1 Par. 24,23 (LXX 'Iαζα), quo loco de classibus levitarum tempore Davidis sermo est; de corruptione huius textus vide s. v. **HEBRON** 1.

2. Filius Zachariae et levita de genere Asaph, propheta qui spiritu Domini repletus regem Iosaphat adhortatus est ad proelium contra Ammonitas, Moabitas, Edomitas confidenter subeundum (2 Par. 20,14; LXX 'Oζαλ). De isto proelio vide s. v. **BENEDICTIONIS VALLIS** in vol. I. col. 606-7. Genealogia Iahaziel l. c. reducitur usque ad Mathaniam de filiis Asaph: filius Zachariae filii Banaiae, filii Iehiel filii Mathaniae levitae de filiis Asaph; hic Mathanias distinguendus est

a Mathania levita actatis davidicae (1 Par. 23,4. 16), quippe qui fuerit filius Heman; sed fortasse idem est ac Nathanas de filiis Asaph levita davidicus (1 Par. 23, 2. 12), siquidem יח et יז facile commutari poterant.

Idem nomen hebr. gerunt IEHEZIEL, IAZIEL, EZECHIEL (Esdr. 8,5; vide s. vv.

IAHEL (יעל, 'Iελ), uxor Haber Cinaei. Haec Sisaram ducem militarem Iabin regis Asor a Debhora et Barac devictum, cum fugiens ad tabernacula Haber Cinaei pervenisset, hospitio excepit; erat enim Haber foedere iunctus cum Iabin. Ubi primum autem Sisara nihil adversi suspicans somno se dedit, Iahel clavum tabernaculi, quo vela extensa firmabantur, assumpsit malleoque per tempora in cerebrum dormientis defixit (Iud. 4,17-22). — Eadem est Iahel in cantico Debhorae 5,6 nominata, non ignotus quidam iudex Iahel, ut aliqui volunt. Eius facinus celebratur in cantico Debhorae 5,24-27: « Benedicta inter mulieres Iahel uxor Haber Cinaei et benedicatur in tabernaculo suo... » Quaestioni, iustene interemerit Iahel Sisaram, respondet *F. de Hummelauer*, ad 4,17: « celebrari Iahel primū, quod fuerit instrumentum divinae providentiae et implendi vaticinii 4,9; secundo quod suo facinore insigne Hebraeis beneficium contulerit, quo abunde fuerat promerita, ut bona quaeque illi Hebraei apprecarentur; utrum vero in eo facinore peccaverit, Scriptura non dirimit. Potuit sane peccato carere, vel quod foedus cum Iabin fuerit coactum, non voluntarium, vel quod ipsa instinctu egerit divino, vel quod innocenter putaverit sibi licere, quod re nefas erat ».

IAHELEL (יהלאל), tertius filius Zabulon (Gen. 46,14; LXX 'Αζαλ); idem Num. 26,26 scribitur in Vulgata Ialel (LXX 'Αλλαλ), progenitor familiae Ialelitarum.

IAHIEL (יהיאל, 'Iεαλ). 1. Unus ex levitis, qui in nablis arcana cantabant, cum arca de domo Obededom in montem Sion transferretur (1 Par. 15,18. 20);

idem coram arca Domini constitutus est in ministerium (16,3).

2. Levita de stirpe Gerson, princeps filiorum Leedan tempore Davidis (1 Par. 23,8), thesauris domus Domini praepositus (29,8); eius familia 26, 21. 22 vocatur Iehieli i. e. Iehielitarum.

3. Iahiel filius Hachamoni (vide s. v.) erat cum filiis regis David (1 Par. 27,32, quod interpretatur : erat magister, praeceptor filiorum regis).

4. Unus ex filiis Iosaphat regis Iuda, quos Ioram primogenitus Iosaphat huiusque successor occidit (2 Par. 21,2).

5. et 6. Duo levitae tempore Ezechiae regis (2 Par. 29,14; 31,13).

7. Unus ex principibus domus Domini tempore Iosiae regis (2 Par. 35,8).

8. Pater Obedia Babylone reversi cum 218 viris (Esdr. 8,9).

De aliis viris eiusdem nominis hebr. v. IEMEL 11; de alio quodam Iahiel (Vulg.) v. IEMEL 7.

IAIR (יֵאִיר, יֵאִירָ). 1. Bellator praclarus, filius Segub; Segub autem patrem habebat Hesron filium Phares filii Iuda, matrem autem filiam Machir filii Manasse; unde etiam filius Manasse appellatur (Num. 32,41; Deut. 3,14; Ios. 13,30; 1 Par. 2,21-23; 3 Reg. 4,13). Maximam gloriam Iair sibi acquisivit in occupatione terrae promissae; etenim ut ex textibus allatis colligitur, viginti tres civitates in Galaad cepit eisque nomen Havoth Iair (חֲוֹת יֵאִיר) viculos) imposuit, quae nomen hoc etiam aetate Iudicum (Iud. 10,3-5) et Regum retinuerunt; praeterea in Argob tractu regionis Basan alias sexaginta urbes expugnavit muris, portis, vectibus munitas, quibus nomen idem Havoth Iair vel Basan Havoth Iair impositum est, sed mox disparuit; his enim civitatibus Argob vel Basan nomen Havoth Iair non nisi Deut. 3,14 et Ios. 13,30 tribuitur, aliis vero locis supra citatis idem nomen ad urbes Galaad refertur. Plura de Iud. 10,3-5 vide infra sub 2. — Nomen *Havoth Iair* i. e. pagi seu viculi Iair per iocum istis urbibus munitis impositum esse censetur, quo Iair bellator fortissimus hostibus devictis il-luderet. Inter posteros huius Iair for-

lasse recensendus est Ira Iairites sacerdos David (2 Reg. 20,26), si *sacerdos* (כֹּהֵן = minister, administrator) latiore illo sensu sumitur, quo 2 Reg. 8,18 etiam filii David sacerdotes vocantur.

2. Iair Galaadites, qui Israel per 22 annos indicavit et sepultus est in Canon (Iud. 10,3-5); is habebat triginta filios, qui super triginta pullos asinarum equitare solebant i. e. nobiliorum ritu in publicum procedebant et principes erant triginta civitatum in terra Galaad, quae (Vulgata addit : ex nomine eius) sunt appellatae Havoth Iair i. e. oppida Iair. Notandum est in textu hebr. non asseri eas urbes nomen a Iudice Iair traxisse; si vero assereretur (cf. textum Vulgatae), dicendum est ex 1 Par. 2,23 oppida illa non semper in Israelitarum potestate mansisse, recuperatis autem a Iudice Iair pristinum nomen restitutum esse. Nihil sane impedit quominus nomen Havoth Iair fuerit monumentum duorum Iair longo interiecto tempore ibidem imperantium, praesertim si turbatis illis temporibus pristinum nomen pro aliquo tempore oblivioni datum fuerit. — Altera difficultas in numero 30 urbium deprehenditur, dum antiquior iste Iair Manassita solummodo viginti tres urbes in Galaad cepisse (1 Par. 2,22) et Havoth Iair appellasse legitur. Sed nihil obstat, quominus numerus viginti trium urbium decurrente tempore usque ad triginta excreverit, praesertim si etiam Iudex Iair aliquas ipse cepit et addidit; praeterea Galaad interdum latissimo sensu totam transiordanicam designat, unde Iair Iudex, cum pro 30 filiis triginta urbes eligeret, istis 23 « Havoth Iair in Galaad » oppida aliqua de Havoth Iair in Basan (Argob) addidisse supponi potest, ut numerum 30 compleret. — Ceterum de Havoth Iair cf. *Cornely*, Introd. II n. 24 et 26; *F. de Hummelauer* ad Iud. 10,4.

3. Iair (יֵאִיר) pater Elehanan herois; pro : Elehanan filius Iair Vulgata legit : Adeodatus filius Saltus. V. ADEODATUS et ELCHANAN 1.

4. Beniaminita de stirpe Cis, pater Mardochei (Esther 2,3; 11,2; LXX 2,3 יֵאִירָου).

IAIRITES v. IRA 1.

IAIRUS (Ἰαίριος, forma graeca nominis hebr. יֵאִיר), cuius filiam Iesus a mortuis resuscitavit, vocatur Matth. 9,18 princeps unus, Marc. 5,22 quidam de archisynagogis, Luc. 8,41 princeps synagogae scil. in Capharnaum, ut ex contextu elucet. Archisynagogus appellatur tum is qui toti synagogae praestitit tum etiam is qui inter primores totius coetus ad consilium praesidis pertinet. Cum igitur Iairus fuerit unus de archisynagogis, admittendum erit aut plures in Capharnaum synagogas fuisse aut Iairum fuisse unum de primoribus et consiliariis. Cf. *Knabenbauer* ad Marc. 5,22.

IALA v. IALALA.

IALALEEL (יֵאֵלֶעֱלָל; Ἰαλελῆλ, A Ἰαλλῆλ), pater Azariae levitae de stirpe Merari tempore Ezechiae regis (2 Par. 29,12). Idem nomen hebr. gerit IALELEEL.

IALEL, IALELITAE v. IAHELEL.

IALELEEL (יֵאֵלֶעֱלָל; Ἰαλελῆλ), vir in genealogia Iuda, cuius quattuor filii enumerantur (1 Par. 4,16); quo vinculo cum genealogia Iuda connectatur, ex textu non liquet.

IALON (יֵאֵלֶוֹן; Ἰαμών, A Ἰαλών), filius Ezra ex posteris Iuda (1 Par. 4,17).

IAMBRI (Ἰαμβρί). Brevi post mortem Iudae Machabaei exierunt filii Iambri ex Madaba (ad orientem maris Mortui superioris sita) et comprehenderunt Ioanem Mach., qui in terram transiordanicam properabat, ut senes, mulieres, pucros omnesque res Iudaeorum apud Nabataeos in tuto collocaret; sanguinem Ioannis ultimi sunt eius fratres Ionathas et Simon, qui ex insidiis in filios Iambri, dum nuptiali comitatu sponsam ducunt, irruerunt, multos occiderunt, alios fugarunt, spolia acceperunt (1 Mach. 9,36-41). Nominis lectiones sunt variae in codicibus: Ἰαμβρεῖν, Ἀμβρί, Ἀμβροί, apud Syrum: Ambri, apud Flav. Iosephum (Ant. XIII. 1,2): οἱ Ἀμαρταίου παῖδες. Ex his lectio Ἀμβρί ut genuina probatur. Verum eius nominis gens nobis non innotescit. Aliqui (*Drusius, Michaelis, Grimm*

ad h. l.) coniiciunt in textu hebr. adfuisse יַמְנִי אֶמְרִי et posteros Amorrhaeorum designari, qui antiquitus in Madaba seu Medaba habitaverant (cf. Num. 21, 30); alii hanc coniecturam reiiciunt (*Keil, Kautzsch*).

IAMIN (יָמִין; Ἰαμείν, Ἰαμείμ, Ἰαμίν).

1. Filius secundus Simeon et progenitor familiae Iaminitarum (Gen. 46,10; Ex. 6,15; Num. 26,12; 1 Par. 4,24).

2. Vir de tribu Iuda et de genere Hesron, secundus filius Ram filii Iera-meel (1 Par. 2,27).

3. Unus ex levitis, qui Esdrae et Nehemiae assistebant et silentium faciebant in populo ad audiendam legem (Neh. 8,7; LXX omitt. eius nomen).

IAMNE v. IEMNA 1.

IAMNIA (Ἰάμνια, Ἰάμνια) in libris Machabaeorum est eadem urbs, quae Ios. 15,11 Iebneel (יֵבְנֵעַל, Ἀβνῆα), 2 Par. 26,6 Iabnia (יַבְנִיָּא, Ἰαβνῆρα), Iudith 2,28 Ἰεμναά appellatur. Recensetur in termino septentrionali tribus Iuda inter montem Baala et mare Mediterraneum (Ios. 15,11). Merito dubitatur, num unquam a tribu Iuda occupata fuerit; Flavius Iosephus (Ant. V. 1,22) eam Danitis attribuit et idem implicite indicat Ios. 19,43, quia Accaron Iamniae vicina, sed a mari remotior Danitis a Iuda concessa est, ergo etiam Iamnia. In historia tribus Dan diximus planitiem maritimam Danitarum primum ab Amorrhaeis, deinde a Philisthaeis occupatam esse; cum his congruit quod 2 Par. 26,6 legimus urbem ab Ozia rege Iuda Philisthaeis ereptam eiusque muros destructos esse. Eadem enumeratur inter urbes, quae appropinquante Holoferne terrore percussae sunt (Iudith 2,28 LXX). Aetate machabaica erat urbs munita. Iudas Mach. post victoriam apud Emmaus reportatam Syros Iamnam usque persecutus est (1 Mach. 4,15) et brevi tempore post purificationem templi impetu nocturno Iamnam cepit eiusque portum cum navibus succendit, ita ut lumen ignis Hierosolymis a stadiis 240 appareret (2 Mach. 12,8. 9. 40). Neque tamen urbs in possessionem Iu-

daeorum transit (1 Mach. 5,58; 10,69; 15,40); corrigendus ilaque videtur Flavius Iosephus asserens eam a Simone Mach. captam esse (Ant. XIII. 6,7; Bell. iud. I. 2,2). Sed regnante Alexandro Iannaeo (104-78) Iudaeis parebat (Ant. XIII. 15,4). Uteriora eius fata narrantur Ant. XIV. 4,4; XVII. 8,1; 11,5; XVIII. 2,2; 6,3; Bell. iud. I. 7,7; 8,4; II. 6,3; 9,1.

Describitur modo ut urbs maritima (Ant. XIII. 15,4), modo ut mediterranea (Ant. XIV. 4,4; Bell. iud. I. 7,7). Longiore intervallo a litore distabat, sed bonum portum habebat (Ptolem. V. 16, 2. 6 [ed. Müller-Fischer 15,2. 5]; Plin. V. 13,69 : Iannaeae duae, altera intus). Portus ille apud Latinos vocabatur Majumias Ianniae (cf. Majumas Ascalonis, Gazae), hodie *Mīnet Rūbīn* paulo infra ostium *Nahr Rūbīn*. Urbi mediterraneae respondet vicus *Yebna* tum quoad nomen, tum quoad situm; distabat enim Iamnia 12 mil. pass. a Diospoli seu Lydda et 20 mil. pass. ab Ascalone (Itiner. Antonini), 12 mil. pass. a Ioppe, 10 mil. pass. ab Azoto, 22 mil. pass. ab Ascalone (Tabul. Peutling.). Notandum denique est distantiam 240 stadiorum inter portum Ianniae et urbem Ierusalem (2 Mach. 12,9) esse iusto minorem; *Relandus* (Palaestina p. 430) legi vult 340 stadia, sed *Guérin* hunc numerum reducit ad 280 stadia.

Cf. generatim *Reland*, Palaestina 823 s.; *Raumer*, Palaestina p. 203 s.; *Ritter*, Erdkunde XVI. 125 ss.; *Tobler*, Dritte Wanderung p. 20-25; *Guérin*, Judée II. 53-65; *Survey of West. Pal. Mem.* II. 414. 441-443; *Guy le Strange*, Palestine under the Moslems p. 553; *Clermont-Ganneau*, Archæol. Researches in Palestine II. (1896) p. 167-184; *Schürer*, Geschichte des jüdischen Volkes ed. 3 II. p. 98-99; *Neubauer*, Géogr. du Talmud p. 73-76; *Buhl*, Alt. Pal. 1896 p. 188; *Fahrngruber*, Nach Jerusalem ed. 2 II. 121; *D. Zancchia*, La Palestine d'aujourd'hui 1899 II. 310-312; *Liévin de Hamme*, Terre Sainte ed. 4 II. p. 237 ss.; Itinerarium Antonini Augusti et Hieros. ed. *Parthey et Pinder* 1848 p. 69.

IAMNOR (Judith 8,1; LXX omitt.), unus ex maioribus Iudith.

IAMRA (יִמְרָה, יִמְרָה), quintus filius Supha de tribu Aser (1 Par. 7,36).

IAMUEL (יִמְעֻל, Ἰεμουήλ), filius primogenitus Simeonis filii Iacob (Gen. 46,10; Ex. 6,15). Idem Num. 26,12 et 1 Par. 4,24 vocatur Namuel (נַמְעֻל, Νεμουήλ); ab eo descendit familia Namuelitarum.

IANAI (יָנַי, Ἰανεύ), princeps cuiusdam cognationis Gad in Basan (1 Par. 5,12).

IANITOR. ianitores, custodes introitus, portarum sanctuariorum. Ex 1 Chron. 9,19 (textu hebr.) discimus, maiores Sellum ex domo Abiasaph Coritae fuisse custodes introitus tabernaculi Domini. Ex quo loco (sicut etiam ex v. 17) compertimus etiam antiquo tempore constitutos fuisse eiusmodi custodes, quamquam mentio eorum non habeatur. David, uti splendorem ordinemque cultus divini multum promovit, ita quoque officium ianitorum levitis accurate assignavit. Ianitores erant ex filiis Core et Merari (1 Par. 26,19). David regem in ea quoque re exsecutum esse consilium olim a Samuele propheta acceptum, declaratur 1 Par. 9,23, cum ianitores dicantur constituti a Davide et Samuele. A Davide autem quattuor millia ianitorum numerata accepimus 1 Par. 23,5; eorum divisiones recensentur 1 Par. 26,1 ss., ex qua recensione colliguntur nonaginta tres principes ianitorum, seu totidem divisiones ianitorum. Sorte autem singulis singula officia assignabantur. Ita custodia portae orientalis contigit Selemiae, Zachariae portae septentrionalis, Obededom portae australis, Sephim portae occidentalis. In porta orientali seni custodes, in septentrionali quaterni, in meridionali quaterni et insuper in aedificio adiecto bini et bini, in parte occidentali seni constituendi erant (I. c. v. 12-18). Unde continuo viginti quattuor custodes agebant vigilias. Quando arca transferebatur, constituti erant ianitores arcae 1 Par. 15,23. 24 i. e. custodes arcae qui ne quis ad arcam accederet caverent. Etiam Salomon iuxta dispositionem patris sui David constituit ianitores in divisionibus suis per portam et portam 2 Par. 8,14. Numerum ianitorum alium fuisse alio tempore

liquet; ita 1 Par. 9,22 solum ducenti duodecim numerantur, qui habitabant in villis et veniebant ad templum officii peragendi causa. Ex exilio cum Zorobabele redierunt ianitores centum triginta novem Esdr. 2,42; Neh. 7,45; numerantur autem Neh. 11,19 centum septuaginta duo. Etiam anno septimo Artaxerxis regis cum aliis filiis Israel ianitores quoque ascenderunt Ierusalem Esdr. 7,7.

IANNE (Ἰαννᾶ) in genealogia Christi (Luc. 3,24).

IANNES et MAMBRES (Ἰαννῆς καὶ Ἰμμερῆς, al. Μμερῆς), magi aegyptiaci, qui incantationibus suis coram Pharaone Moysi et Aaron restiterunt; his nominibus appellantur a S. Paulo (2 Tim. 3,8), in Vet. Testamento autem neque numerus neque nomina eorum traduntur (Ex. 7,11). Eadem nomina orthographice plus minus diversa leguntur apud auctores iudaicos, ethnicos, christianos. Targum Ionathan ad Ex. 1,15; 7,11; Num. 22,22 scribit יוֹנָה וּמְבָרִים, Talmudici scribunt *Iochane* et *Mumre* vel *Ionos* et *Iombros* (cf. *Buxtorf*, *Schoettgen*, *Levy*). Inter ethnicos auctores *Plinius* (XXX. 1,11) et medio fere saeculo secundo p. Chr. *Apuleius* (Apolog. vel De Magia c. 90 ed. *Hildebrand*) inter magos post Zoroastren illustres recensent priorem ex illis, cui nomen Ianne vel Iannes; utrumque autem (Ἰαννῆς καὶ Ἰμμερῆς) Moysi coram Pharaone restitisse narrat *Numenius* Neoplatonicus apud *Euseb.* Praep. evang. 9,8; cf. *Orig.* contra Cels. 4,51. Ex scriptoribus christianis imprimis *Origenes* ad Matth. 27,9 (*M.* 13,1769) de nostro loco 2 Tim. 3,8 notat : quod ait « sicut Iannes et Mambres restiterunt Moysi », non invenitur in publicis scripturis, sed in libro secreto qui suppradicitur : Iannes et Mambres liber; — et ad Matth. 23,37 (*M.* 13,1637) ex eodem Apostoli textu concludit allegari in Novo Test. quaedam ex scripturis non canonicis : Nec enim scimus in libris canonizatis historiam de Ianne et Mambre resistebus Moysi. — Accedit decretum *Gelasii* : Liber, qui appellatur Poenitentia Iannae et Mambrae, apocryphus (*M.* 59,163). Apte *Theodoretus* ad 2

Tim. 3,8 : Horum autem nomina didicit divinus apostolus non ex divina scriptura, sed e non scripta Iudaeorum doctrina (*M.* 82,847).

Originem nominum quod attinet, difficile dictu est, quatenus fuerint formae primigeniae. cum tanta sit orthographiae fluctuatio supra indicata. Recentiores plerique originem semiticam agnoscent (*Steiner*, *Richm*, *Orelli*, *Schürer*); originem nominum aegyptiacam defendunt *C. Hole*, *Ewald*, *Freudenthal*, *Vigouroux*.

Cf. *Buxtorf*, Lex. chald. talm. rabb. 945 s.; *Suicerus*, Thesaur. eccl. s. v. Ἰαννῆς; *Schoettgen*, Horae Hebr. ad 2 Tim. 3,8; *Wetstein*, Nov. Test. ad 2 Tim. 3,8; *Levy*, Chald. Wörterbuch 1881 I. 337 et Neuhebr. Wörterbuch 1883 II. 226; Zeitschr. für wissenschaftliche Theologie 1894 p. 321-326; *Steiner* apud *Schenkel*, Bibel-Lexicon s. v.; *Richm-Baethgen*, Handwb. des bibl. Altert. I. 679-680; *Orelli* apud *Herzog-Plitt*, Real-Encycl. für protest. Theol. ed. 3 s. v.; *Schürer*, Geschichte des jüdischen Volkes ed. 3. III. 292; *C. Hole* apud *Smith-Fuller*, Dict. of the Bible s. v.; *Ewald*, Geschichte des Volkes Israel ed. 3 II. 128; *Freudenthal*, Alexander Polyhistor p. 173; *Vigouroux*, Dict. de la Bible III. 1119-1121.

IANOE. 1. Ianoe (יְנֹהֶה, Ἰαννοῦζά), oppidum in termino septemtrionali tribus Ephraim orientem versus (Ios. 16, 6. 7). Apud Eusebium et S. Hieronymum (*Onom. ed. Lag.* 267,59; 133,20) dicitur vicus Ἰανώ, Ianon in Aerabittena regione 12 mil. pass. a Neapoli (Sichem) contra orientem. Hodie invenitur *Khîrbet Yânûn* inter orientem et meridiem a *Nâblus* (Sichem) nec procul ab *Agrabe*; distantia quidem inter *Yânûn* et *Nâblus* 2 $\frac{1}{2}$ horas non excedit, sed Eusebium saepius in describendo situ liberioorem esse multis eiusmodi discrepantiis comprobatur. Insuper notandum est nostram Ianoc ab Eusebio et S. Hieronymo l. c. confundi cum Ianoe 4 Reg. 15,29.

Cf. *Guérin*, Samarie II. 6. 7; *Survey of West. Pal. Mem.* II. 387; *D. Zaneckia*, La Palestine d'aujourd'hui 1899 II. 514; *Buhl*, Alt. Pal. 1896 p. 178; Zeitschr. d. D. Pal.-Ver. XVI. 1893 p. 43.

2. Ianoe (יְנֹהֶה, Ἰανώχ) recensetur in-

ter urbes, quas Theglathphalasar in Galilaea superiore et in terra Nephthali cepit tempore Phacee regis Israel (4 Reg. 15,29). Correspondere videtur vicus Yōnāh ad orientem Tyri.

Cf. *Survey of West. Pal.* Mem. I. 51, 96; *D. Zauvechia*, La Palestine d'aujourd'hui 1899 II. 718; *Legendre*, Carte de la Palestine; *Riess*, Bibel-Atlas ed. 3 p. 17; *G. A. Smith*, Hist. Geogr. of the Holy Land, Plate I; *J. Döllner*, Geogr. u. ethnogr. Studien zum III. u. IV. B. d. Könige 1904 p. 282-4; sed aliter sentiunt *Guérin*, Galilée II. 372; *Buhl*, Alt. Pal. p. 229. 237.

IANTHINUS i. e. coloris violacei (ῥοι, viola) explicatur in Vulgata vocabulum obscurum תַּחֲשִׁי, quod fere semper cum עֹר pellis coniunctum occurrit ad designanda tegumenta exteriora tabernaculi, arcae foederis, ceterae suppellectilis sacrae (לֶרֶת תַּחֲשִׁי Ex. 25,5; 26,14; 35,7. 23; 36,19. לֶרֶת הַתַּחֲשִׁי Ex. 39,33. עֹר תַּחֲשִׁי Num. 4,6. 8. 10. 11. 12. 14. תַּחֲשִׁי ib. v. 25); praeterea ex eadem pelle calceamenta muliebria pretiosa confecta ab Ezechiele describuntur (Ez. 16,10 תַּחֲשִׁי). Magna autem circa significationem huius vocabuli controversia habetur. Veteres interpretes plerique *colorem* exposuerunt, alii hyacinthinum (ῥαζαίνων LXX; in Ez. ῥαζαίνων), alii affluem ianthinum (ῥαζαίνων Aquila, Symmachus, quos secutus est S. Hieronymus), alii pariter affinem hyssinum seu coccinum (סַסְגִּינָא Chald. et Syr.; v. *Bochart*), alii nigrum (Samarit., *Saadias* et al. arab. apud *Bochart*). Opinionem hanc veterum auctoritate commendabilem amplectuntur *Bochartus*, *Oedmann*, *Rosenmüller*, *Cultrera* al. E contra recentiores plerique *animal* nomine תַּחֲשִׁי intellegendum censent, de specie in diversas partes abeuntes. Multi enim delphino patrocinantur (*Delphinus delphis* Linné), eo quod arabice *tuchas* vel *duchas* appelletur; alii phocas seu vitulos marinos praeferunt (*Phoca vitulina* Linné) vel virginem marinam (*Halicore dugong* Quoy et Gaim = *H. cetacea* Illiger), quae eodem nomine arabico simul comprehendi censentur; alii melibus seu

taxis favent (*Meles taxus* Pallas), fortasse nominis *tachi*, veteribus ignoti, cum *tachash* affinitate seducti. Alii cum *Frd. Delitzsch* potius affinitatem in lingua assyriaca sequuntur, in qua *tachshū* pellem vervecinam et vervecem videtur designare, vel cum *I. H. Bondi* aegyptiacum *ḥš* i. e. corium comparant, quamquam de *pellibus* e *corio* factis S. Scriptura vix loqueretur.

Cf. *Sam. Bochart*, Hieroz. I. 986-92 ed. *Roseum*. II. 387-97; *I. D. Michaelis*, Fragen an eine Ges. gel. Männer etc., Frankfurt a M. 1762, 16 s. 112-8; *Sam. Oedmann*, Verm. Samml. 3,26-35; *E. F. K. Rosenmüller*, Bibl. Alterth. IV. 2,238-43; *W. Gesenius-Aem. Roediger*, Thesaurus 1500 s.; *L. Lewysohn*, Zool. d. Tamulds 95-8; *H. B. Tristram*, Nat. Hist. ed. 8, 43-5; *A. Kinzler*, Bibl. Naturgesch. ed. 9, 59 s.; *J. G. Wood*, Bible Animals 70-5; *P. Cultrera*, Fauna bibl. 141 s.; *Frd. Delitzsch*, Prolegomena p. 77 s.; *id.* Assyr. Handwbch. 705 a; *J. H. Bondi*, Aegyptiaca p. 1 ss. — De animalibus memoratis cf. *Leunis-Ludwig*, Synopsis I. 1 ed. 3, p. 198. 205. 276 s. 279.

Argumenta, quibus controversia dirimatur, vix videntur suppetere. Contra *colorem* veterum praesertim arguunt ex forma plurali in textibus sacris saepius adhibita atque cum statu constructo לֶרֶת coniuncta. Ex *animalibus* autem certe reicienda videntur meles, quia difficile in paeninsula sinaitica satis magno numero pelles taxoninae praesto fuisse supponuntur, et delphinus, cuius pellis tini in S. Scriptura indicato vix convenit. Etiam contra phocam difficultas exurgit, quia in mari Mediterraneo iam rarior, in mari Rubro vix invenitur. Halicore autem, licet ad tegumenta tabernaculi et suppellectilis sacrae pellem optimam praebet, calceamentis delicatis muliebribus vix aptam materiam suppeditaret. Quodsi igitur animal intellegendum est, potius de vervece videtur exponendum, cuius pellis cum arietum pellibus (Ex. 25,5) bene componitur et calceis pulchris satis apta est.

L. FONCK.

IANUM (יָנִים *Queri*, יָנִים *Kethib*; יָנִים), urbs tribus Iuda in secunda provincia montis (Ios. 15,53), hanc pro-

scitur vicus *Yāfā* prope Nazareth inter meridiem et occidentem. Idem putatur esse Iapha (Ἰαφά) vicus Galilaeae inferioris maximus, moenibus munitissimus, plenus incolarum, quem Flavius Iosephus (Bell. iud. II. 20,6; Vita 43 cf. 37. 52) dux Iudaeorum occupavit et Titus expugnavit (Bell. iud. III. 7,31). *Quaresmius* refert patriam Zebedaei eiusque filiorum Iacobi et Ioannis fuisse viculum *Saffa* 3 mil. pass. a Nazareth inter meridiem et occidentem. Verum haec opinio *Quaresmi*, secundum quam *Saffa* ponitur ibi, ubi hodie est vicus *Yāfā*, videtur esse erronea et patria Zebedaei scil. *Saffa* vel *Saffra* (cf. *Adrichomius*, Theatrum Terrae Sanctae, Zabulon 83) potius componenda cum vico *Shefā* 'Amr inter Nazareth et Accho. De qua quaestione vide J. P. van Kasteren, De Geboorteplaats der Boanerges in periodico: De Wetenschappelijke Nederlander, Amsterdam 1890 (complures dissertationes.)

Cf. *Quaresmius*, Terrae Sanctae Elucidatio ed. Cypr. de Tarvisio 1881 II. p. 634; *Robinson*, Palaestina III. 439. 582; *I. Schwarz*, Das heilige Land 1852 p. 135; *Guérin*, Galilée I. 103-106; *Surrey of West. Pal. Mem.* I. 353. 354; *D. Zanczechia*, La Palestine d'aujourd'hui 1899 II. 675. 676; *Legendre* apud *Vigouroux*, Dict. de la Bible III. 1126. 1127. — Sed contra hunc situm Iaphie = *Yāfā* obiectiones movent *Dillmann* ad Ios. 19,12; *Buhl*, Alt. Pal. 1896 p. 215.

IAQE (Prov. 30,1 hebr.), pater Agur (v. AGUR).

IARA. 1. Iara (יָרָה, יִרְיָה), unus ex maioribus Abihail principis tribus Gad (1 Par. 5,14).

2. Iara (יָרָה, יִרְיָה), filius Ahaz ex posteris Merihbaal seu Miphiboseth (1 Par. 9,12). Idem 1 Par. 8,36 scribitur Ioadā (יִרְיָה, יִרְיָה).

IARAMOTH (יָרָמֹת, Ἰερμωθ), urbs Issachar leuitis de stirpe Gerson concessa (Ios. 21,29. Eadem Ios. 49,21 appellatur Rameth (רָמֹת, Ῥαμωθ) et 1 Par. 6,73[58] Ramoth (רָמֹת, Ῥαμωθ). Proponitur vicus *el-Rāme* 10 km a *Sebastīye* (Samaria) aquilonem ver-

sus (*Riess*, Bibel-Atlas ed. 3 p. 47 et 27; *Survey of West. Pal. Mem.* II. 155). Sed recte animadvertit *Guérin* (Samarie II. 215-216) tribum Issachar vix eo usque protensam fuisse et Rameth (Remeth, Iaramoth) quaerendam esse magis in vicinia Engannim, quocum simul nominatur; item *F. de Hummelauer* ad Ios. 19,21: « an eo pertinebant fines Issachar »?

IARE (יָרֵה, Ἰαρέ), quartus inter tredecim filios Iectan (Gen. 10,26; 1 Par. 1,20; LXX omittunt 1 Par. 1,20, qui peninsulam arabicam occuparunt. Populus a Iare descendens nondum certo repertus est. *Bochartus* (Phaleg 2,19) Alilaeos intellegit ad mare Rubrum in regione aurifera habitantes eorumque verum nomen fuisse coniecit *filiorum lunae* propter cultum lunae (יָרֵה luna). Sed cum Iare Gen. 10,26 iungatur cum Asarmoth (*Hadramaut*), *Michaelis* (Spicil. 2,60) praefereendum duxit *litus lunae* et *montem lunae* in orientali parte regionis *Hadramaut*; cf. *Gesenius*, Thesaur. p. 630. Verum haec dubia sunt, praesertim cum cultus lunae apud Arabes australes late propagatus fuerit. *D. S. Margoliouth* (apud *Hastings*, Dict. of the Bible II. 568) in comparisonem adducit *Yurākh* in *Yemen*, *Yarah* in *Hedjas* et *Warākh* in *Yemen*, quae loca apud geographos arabicos *Yāqūt* et *Hamdāni* memorantur.

IAREB (יָרֵב, Ἰαρεβ), in Vulgata ultor (Os. 5,13; 10,6) designatur rex Assyriorum, ut indoles eius describatur. Israelitae in calamitatibus ab Assur auxilium stulte implorabant; sed rex Assur in ultionem et vindictam propensus poenas ab iis extremas exegit. *W. M. Muller* pro יָרֵב בִּלְיָה legendum censet יָרֵב בִּלְיָה scil. titulum in inscriptionibus assyriacis usitatum *regis magni*. Alii (*M. H. Sayce*, *A. Neubauer*) conieciunt Iareb fuisse nomen Sargon regis, antequam thronum ascenderet. Sed explicatio de rege *ultore* textui satisfacere videtur. Eodem fere sensu *H. Guthe* germanice verlit « Kampfahm ».

Cf. *W. M. Müller* in *Zeitschr. für altte-*

stam. Wissenschaft XVII. 1897 p. 334 ss.; *M. H. Sayce* in *Babylonian and oriental Record*, 1887-1888, II. p. 18 s. 127. 145 et *Higher Criticism*, 1894 p. 147; *A. Neubauer* in *Zeitschr. für Assyriologie* III. 1888 p. 103; *H. Guthe* apud *E. Kautzsch*, *Die H. Schrift d. Alten Test.*

IARED (יָרֵד, in pausa יֵרֵד; LXX ut plurimum Ἰαρεδ). 1. Setbita, filius Malaleel, pater Henoch, annos vitae 962 adeptus (Gen. 5,15-20; 1 Par. 1,2; Luc. 3,37); cf. s. v. IRAD.

2. In genealogia Iuda 1 Par. 4,18 nominatur Iared pater (possessor) Gedor; v. GEDOR 1. Eius mater l. c. dicitur Iudaia, quam non uxorem Ezra, sed uxorem Mered filii Ezra esse ostendimus s. v. BETHIA, ubi emendatio textus indicata est.

IAREPHEL (יִרְפְּהֵל; Καρφάν, Α Ἰαρ-φάγλ), urbs Benjamin inter 14 (LXX 13) urbes occidentales huius tribus enumerata (Ios. 18,27). Hodie fortasse vicus *Rafāt* prope Gabaon aquilonem versus (*Survey of West. Pal. Mem.* III. 13. 154).

IARIB (יָרִיב, Ἰαρίβ). 1. Vide IACHIN 1.

2. Princeps, qui cum Esdra ex captivitate rediit et ab Esdra missus est ad Eddo (vide s. v.), ut levitae quoque redeuntibus se adiungerent (Esdr. 8,16); utrum Iarib fuerit sacerdos an laicus, ex contextu non liquet.

3. Sacerdos de familia Iosue filii Iosedece recensetur inter eos, qui uxores alienigenas Esdra iubente dimiserunt (Esdr. 10,18).

4. Mathathias pater quinque heroum Machabaeorum dicitur 1 Mach. 14,29 esse ex filiis Iarib, sed rectius 1 Mach. 2,4 ex filiis Ioarib, qui sine dubio est Ioarib princeps familiae sacerdotalis (v. IOIARIB 1).

IARIM (יָרִימ, Ἰαρίμ, Vulgata: mons Iarim), mons in termino septentrionali tribus Iuda occidentem versus (Ios. 15,10). Est ille mons, in cuius latere seu humero vicus Cheslon (*Keslā*) situs est; v. CHESLON. Sed *F. de Hummelauer* interpretatur Iarim ipsum montem silvarum, in quo erat Cariathiarim et emendat 15,10 : Circuit ter-

minus de Baal (Cariathbaal, Cariathiarim) transiitque secus verticem montis silvarum Masphonam, haec est Cheslon.

IASA, IASSA (יָסָא Is. 15,4; Ier. 48, 34; alias יִדְעָה quae forma Num. 21,23 et Deut. 2,32 locativus prioris explicatur; Ἰασά, Ἰασά), urbs transiordanica, apud quam Sehon Amorrhaeus rex Hesebon a filiis Israel percussus est (Num. 21,23; Deut. 2,32; Iud. 11,20), tribui Ruben attributa (Ios. 13,18), postea levitis de stirpe Merari concessa (1 Par. 6,78 [63]; Ios. 21,36 qui versus in textu hebraico recepto deficit; v. IASER 1). A Mesa rege Moabitarum recuperata (Inscriptio Mesa lin. 19. 20) saepius in prophetis oraculis contra Moab editis commemoratur (Is. 15,4; Ier. 48,21. 34). Tempore Eusebii urbs ostendebatur inter Medaba et Debus (Onom. ed. Lag. 264,97); pro Debus (Δεβούς) legendum esse Hesebon (Ἰεσβούς) suspicabatur *Relandus* (Palaeatina p. 823), probabilius autem intelligitur Dibon. Situs nondum reperlus est; coniecturae sunt variae. Aliqui urbem magis orientem versus quaerunt in deserto, quoniam Num. 21,23 Sehon Israelitis obviam egressus esse legitur in desertum; altamen ex Ier. 48,21 sita erat in ipsa planitie montana Moab. Restat igitur, ut inter Dibon et Medaba, sed magis versus orientalem partem planitiei quaeratur. Nulla denique ratio est duas urbes Iahaz et Iahza propter diversitatem scriptionis hebraicae distinguendi, ut voluerunt *Hitzig* (Isaia p. 187 s.), *Kneucker* (apud *Schenkel*, *Bibellex.* s. v.).

IASER. 1. Iaser (יָסָר, Ἰασάρ) legitur Ios. 21,36 in Vulgata, LXX et in plerisque hebraicis mss. et editionibus anno 1525 antiquioribus, deest autem in multis hodiernis editionibus, postquam R. Jacob Ben Chajim propter auctoritatem R. Kimchi et Massorae magnae in Biblia rabb. anni 1528 versus 36. et 37. ut spurios expunxit. Cf. *de Rossi*, Var. Lect. Vet. Test. II. 96-106. Est autem haec Iaser eadem urbs quae Iasa, Iassa (vide s. v.).

2. Iaser (Ios. 13,25; 21,37) v. IAZER.

3. Iaser (יָסָר, Ἰασάρ), unus ex filiis

Caleb, filii Hesron, ex Azuba genitus (1 Par. 2,18).

IASI (יָשִׁי, *Qeri* יִשְׁשִׁי), mus de filiis Bani, qui uxores alienigenas in exilio duxerant (Esd. 10,37). LXX aliis punitis legerunt καὶ ἐποτρσαν — יִשְׁשִׁי.

IASIEL. 1. Iasiel (יָסִיִּאל, Ἰασυήλ), primus inter quattuor filios Nephthali (Gen. 46,24), progenitor familiae iesielitarum (Num. 26,48; Vulgata: iesiel). Idem 1 Par. 7,13 scribitur Iaziel et Iasiel (יָסִיִּאל, Ἰασυήλ).

2. Iasiel (יָסִיִּאל, Ἰασυήλ), ultimus inter heroas davidicos enumeratus (1 Par. 11,46[47]). Describitur Iasiel de Masobia (מַסֹּבִיָּה, δ Μασωβία); cum haec forma hebraica non sit nominis gentilitii, *Relandus* (Palaestina p. 899) putavit eam esse compendium vocis Migdal Zebaia, quo nomine rabbini locum quendam circa Hebron vel circa Bersabee designabant; *Bertheau* (in b. l.) articulo delecto formam כִּנְעָנָה (2 Sam. 23,36; Vulgata: de Soba) deprehendi posse innuit, quam ipsam valde dubiam esse *F. de Hummelauer* (in 2 Sam. 23,26) ostendit. Alii alia faciunt.

3. Iasiel (יָסִיִּאל, Ἰασυήλ), filius Abner, princeps tribus Benjamin tempore David regis (1 Par. 27,21).

IASON (Ἰάσων), nomen inter Graecos usitatum, quod frequenter etiam usurpabant Iudaei hellenizantes pro nomine Iesus tum propter soni similitudinem tum forte propter similem significationem (ἰάσθαι, mederi).

1. Filius Eleazari, a Iuda Machabaeo legatus una cum Eupolemo Romam missus a. 161 a. Chr. (1 Mach. 8,17). Videtur idem esse Iason, cuius filius Antipater una cum Numenio a Iontha legatus ad Laedaeamonios et Romanos missus est (1 Mach. 12,46; 14,22).

2. Iason Cyrenaeus, auctor operis historici quinque libris comprehensi. Opus hoc deperditum est, sed liber 2 Mach. teste auctore sacro (2 Mach. 2,24-29 Vulgata; 23-28 gr.) epitomen operis a Iasone compositi continet. Epitome haec completitur spatium 15 annorum (176-161 a.

Chr.); narrat irritum conatum templi spoliandi factum Seleuco IV. Philopatore (187-175 a. Chr.) adhuc superstite, persecutionem ab Antiocho IV. Epiphane excitatam, historiam Machabaeorum usque ad proelium prope Bethoron commissum, quo Nicanor a Iuda Machabaeo victus interit anno 161 a. Chr. — Haec sunt, quae 2 Mach. 3,4-15,38 (gr. 37) ex opere Iasonis excerpta habentur. Locum paralleli sunt 2 Mach. 4,7-15,38[37] et 1 Mach. 4,11[10]-7,30.

De Iasone nihil aliud traditum est. Probabilitate non caret opinio auctorem operis deperditi fuisse Iasonem Eleazari filium, quem Iudas Machabaeus post Nicanoris interitum (ut contextus 1 Mach. 8,17 suadet) legatum Romam misit. Etenim legatum hunc litterarum graecarum peritum fuisse satis innuit eius legatio romana et nomen graecum; neque causam Iudaeorum Romanis aptius commendare poterat, quam documento historico, quo persecutio ab Antiocho Epiphane excitata et Iudae gesta praeclara Romanis ob oculos ponerentur. Huic hypothese non obstat pietas, quam liber 2 Mach. passim spirat; non enim agitur de epitomatis libro canonico, sed de opere Iasonis primitivo, quod utique, si Romanis destinatum erat, indolem a libro nostro canonico prorsus alienam prae se ferre poterat. — Id vero satis certo affirmare licet, opus Iasonis Cyrenaei completum fuisse ante mortem Iudae Machabaei, quae eodem anno 161 a. Chr. brevi post Nicanoris interitum accidit. Etenim 2 Mach. 15,38 [37] affirmatur civitatem sanctam post Nicanoris obitum in potestate Iudaeorum mansisse; id Iason, cuius opus auctor sacer in epitomen redactum nobis tradit, iure merito affirmare potuit ante, nullo modo post Iudae interitum; cf. 1 Mach. 9,27. 33. Praeterea descriptio operis Iasonis 2 Mach. 2,20-24 [19-23] data effert nomina Antiochi IV. Epiphanis, Antiochi V. Eupatoris et liberationem civitatis (quae anno primo Demetrii I. Soteris per Iudam facta est); ergo primum est concludere his plura in opere Iasonis non inuisse. Denique Iason tot tantisque de Iuda narratis eius mortem gloriosam brevi post secutam non

tacuisset, nisi antea librum suum finivisset; cum vero mortem Iudae tacuisse iure inferimus ex silentio auctoris sacri, de quo eadem valet argumentatio.

Cf. *Cornely*, *Introd.* in *S. Script.* II. n. 155. Quoad notas bibliographicas consule *E. Schürer*, *Geschichte des jüdischen Volkes im Zeitalter Jesu Christi ed.* 3 III. p. 359-364, sed adverte hunc auctorem in rebus 2 Mach. narratis haud pauca detegere, quae sint indiligenter dicta, erronea, fabulosa.

3. Iason (Ἰάσων), filius Simonis II. et frafer Oniae III. pontificum (2 Mach. 1,7; 4,7-27; 5,5-10). Iesus ei nomen patrum fuerat; sed Graecorum moribus favens nomen graecum ipse sibi imposuit (*Flav. Jos. Ant.* XII. 5,1). Ab Antiocho IV. Epiphanē multis pecuniis promissis sibi emit summum sacerdotium cum potestate instituendi gymnasium et ephēbias civibusque hierosolymitanis vendendi honores et iura Antiochensium. Onia III. remoto ipse pontifex erat per tres annos (circa 174-171 a. Chr.). Sub ipsa arce Hierosolymorum gymnasium erexit, optimos quosque iuvenes in ephēbiis Graecorum more instruendos curavit atque hoc modo effecit, ut ipsi sacerdotes altaris officia negligentes exercitiis palaestrae et disci delectati sint. Immo cum Tyri quinquennalis agon rege praesente celebraretur, Iason per legatos trecentas argenti didrachmas in sacrificium Herculis misit; sed ipsis legatis, quos tanti sceleris puduit, precantibus haec pecunia non in sacrificium Herculis, sed in fabricam navium triremium erogata est. Antiochus IV. cum ipse Hierosolyma veniret (ante primam, ut videtur, in Aegyptum expeditionem), a Iasone et civitate cum facularum luminibus summisque laudibus exceptus est. Iasoni summum sacerdotium eripuit Menelaus eo modo, quo Iason Oniae III. eripuerat scil. maioribus tributis regi promissis. Iason ad Ammonitas aufugit. Rediit quidem cum mille viris et capta urbe immanem civium cladem fecit anno 170 a. Chr., cum falsus rumor exisset Antiochum IV. in secunda adversus Aegyptum expeditione vita excessisse; sed ubi primum regem victorem ex Aegypto reverti comperit, iterum ad Ammonitas

aufugit. Ab Areta Arabum principe finibus expulsus primum in Aegyptum, dein Lacedaemona se contulit et ibidem diem supremum obiit « illamentatus et inse-pultus » (2 Mach. 3,10).

4. Christianus Thessalonicensis, ad quem S. Paulus in secundo itinere apostolico divertit (*Act.* 17,5-9).

5. Christianus a quo S. Paulus Corinthi scribens salutem Romanis misit (*Rom.* 16,21). Fortasse idem ac IASON 4.

IASPIS in textu Vulgatae locum hebraici יהלם occupat, quae gemma sexta nominatur inter lapides pectoralis pontificii (*Ex.* 28, 18; 39, 11) atque in descriptione magnificentiae regis Tyrionum tertio loco occurrit (*Ez.* 28,13). Praeterea pro hebr. כדכד ponitur *Is.* 54,12, quod alibi (*Ez.* 27,16) retinetur (v. CHOD-CHOD). Denique in Apocalypsi sedens in throno dicitur « similis aspectui lapidis iaspidis » (ἰάσπιδος *Apoc.* 4,3) et civitas sancta Ierusalem describitur « habens claritatem Dei : et lumen eius simile lapidi pretioso tamquam lapidi iaspidis, sicut crystallum » (ὁ φωστὴρ αὐτῆς ὁμοίος λίθῳ τιμωτάτῳ, ὡς λίθῳ ἰάσπιδι κρυστάλλινῳ *Apoc.* 21, 11); etiam structura muri eius ex lapide iaspide (*ib.* v. 18) et primum fundamentum iaspis fuisse exhibetur (*ib.* 19). — Cum inter nomina hebraica gemmarum alterum, graeco atque latino iaspidis nomini simillimum, ישפה occurrat, quod in textu Exodi (28, 20; 39,13) ultimo loco ponitur, fuerunt qui hoc potius nomine iaspidem designari atque in textu Vulgatae, sicut in versione LXX interpretum, ordinem gemmarum mutatum esse censuerint; unde יהלם potius lapillum onychinum significare putarunt, cui LXX locum ישפה tribuunt, vel beryllum, qui in Vulgata ultimo loco enumeratur. At quamvis haec opinio nominis affinitate satis probabilis appareat, difficultatem tamen facit, quod etiam in textu Ezechielis, ubi alius omnino ordo in textu massorethico servatur, S. Hieronymus eodem modo ישפה beryllum et יהלם iaspidem vertit, seniores vero similiter sextum locum iaspidi, ultimum onychi tribuunt. Unde

etiam hoc loco ordinem mutatum esse dicendum erit. Iosephus Flavius autem iterum alium ordinem exhibet, iaspidem quinto loco nominans (Ant. III. 7,6; Bell. iud. V. 5,7), ultimo vero illic beryllum (Ant. I. c.), hic chrysolithum, praecedente beryllo (Bell. iud. I. c.). S. *Epiphanius* in tractatu De duodecim gemmis, seniores secutus, sexto loco de iaspide, ultimo de onyche disserit.

Iam vero de iaspide satis certum videtur, neque in S. Scriptura, neque ab auctoribus antiquis profanis eam gemmam intellegi, quae a recentioribus iaspis vocatur. Nam iaspis in Apocalypsi vocatur *χρυστάλλινος*, i. e. translucidus uti crystallum, et propter hanc qualitatem praesertim in descriptione caelestis Ierusalem « habentis claritatem Dei » in comparationem adducitur (Apoc. 21,11). Pariter a Plinio iaspis dicitur saepe translucere et species nobiliores refulgentes describuntur, et in colore virens vocatur, optima autem quae purpurae aliquid habet, secunda quae rosae, « tertia quae smaragdi », alia etiam species caerulea, alia acrizusa etc. (XXVII. 8, 115 s.; cf. *Theophr.* De lapid. 4,23; 6,35). Atqui iaspis recentiorum est quarzi species, non translucida, coloris flavi, rubri, fuscii. Quae sane neque verbis Apostoli neque descriptioni Plinii videtur satisfacere. Etiam medio aevo v. gr. in cantu a *Nibelungis* dicto iaspis tanquam gemma translucida viridisque describitur. Speciem autem huius gemmae antiquae determinare difficile erit; probabiliter ad lapillos pertinebat, qui hodie *corundus* vel *spinellus* appellantur, translucidi variiisque coloribus, etiam viridi, fulgentes.

Cf. S. *Epiph.* De 12 gemmis n. 6; *Fr. Rucus*, De gemmis 2,1; *J. Braun*, Vestit. sacerdot. Hebr. II. 13 n. 533-43; 19 n. 604-10; *F. C. Lesser*, Lithothologie p. 354; *J. J. Bellermann*, Die Urim u. Thumim, Berlin 1824, 47-9. 69-73; *E. F. K. Rosenmüller*, Bibl. Alterth. IV. 1,36 s. 43 s.; *K. E. Kluge*, Handb. d. Edelsteinkunde, Leipzig 1860, 259 ss. 284 ss. 384-6; *Leunis-Senft.* Synopsis III. 1 p. 395-9. 562; *Neumann-Zirkel*, Elem. d. Mineralogie ed. 13. p. 464-6. 477. 511 s. — Cf. LAPIDES PRETIOSI.

L. FONCK.

IASA v. IASSA.

IASSEN (יֶסֶן, Vulg. Filii Iassen, LXX υἱοὶ Ἀσάν) legitur in catalogo heroum Davidis (2 Reg. 23,32). Loco parallelo 1 Par. 41,33[34] habetur: Filii Assem (בְּנֵי הָאֶסֶם) Gezonites. De nomine gentilicio v. GEZONITES. LXX 1 Par. 41,34 nomen proprium exhibent Βεννυζίας, & Βεννέας, Α υἱοὶ Ἀσάν (cf. *Swete*, The Old Test. in Greek). Praeterea textus LXX Luciani legit 2 Reg. 23, 32 Ἰεσσαί et 1 Par. 41,34 Εἰρησαί. Unde concludendum videtur nomen herois fuisse יֶסֶן et illud בְּנֵי filii in utroque textu ortum esse ex dittographia ob nomen praecedens Salaboni (שַׁלְבֹנִי). — Cf. *Driver*, Notes on the Hebrew Text of the Books of Samuel 1890 p. 283.

IASUB (יִשָּׁב, Ἰαζούβ). 1. Tertius filius Issachar, progenitor familiae Iasubitarum (Num. 26,34; 1 Par. 7,1 *Qeri*). Idem Gen. 46,13 vitiose, ut videtur, scribitur Iob (יֹב, sed LXX Ἀζούμ).

2. Unus de filiis Bani, qui tempore Esdrae uxores alienigenas dimittere iussi sunt (Esdr. 10,29).

3. Filius Isaiae prophetae (Is. 7,3). Nomen filii symbolicum est יִשָּׁבֶרֶךְ i. e. *reliquiae convertentur*, LXX ὁ καταλειφθεὶς Ἰαζούβ, Vulg. qui derelictus est Iasub. De prophetica nominis significatione vide *Knabenbauer* in h. l.

IATHANAEI (יִתְנָאֵל, Ἰενοσῆλ), levita de stirpe Core, quartus filius Meseloniae, ianitor domus Domini (1 Par. 26,2).

IAUS (יֵאֻשׁ, Ἰᾱς), levita de stirpe Gerson, tertius filius Semei (1 Par. 23, 10. 11); ipse et Baria frater eius in unam familiam computati sunt.

IAVAN (יָוָן, Ἰᾱῶν; sed apud Is. Ez. Dan. Zach. Graecia, Graeci, Ἑλλάς, Ἑλληνες).

1. Unus ex filiis Iapheth, pater Elisa, Tharsis, Cellhim, Dodanin (Gen. 10,2. 4; 1 Par. 1,5. 7). Idem nomen Is. 66,19 una cum Tharsis, Phul, Lud, Thubal et insulis remotis ad designandas nationes gentium longinquas legitur. Ex Iavan (Graecia) Tyrii servos et vasa aerea ac-

quirebant (Ez. 27,13). Eodem nomine designantur Dan. 8,21 et 10,20 Macedones, 11,2 Graeci a regibus Persarum impugnati, Zach. 9,13 regnum Alexandri Magni et varia illa regna ex eius imperio exorta. Item Ioel 3,6 hebr. 4,6 filii Graecorum (בְּנֵי הַיָּוֹנִים, על שם יוֹן 'Ελληνων) de Ioniis vel Graecis explicantur. Dubium non est quin Iavan sint Iones (Ἰᾶνες) vel Graeci (Flav. Ios. Ant. I. 6,1), in inscriptionibus cuneiformibus vocantur *Iaavnaai*, *Iaavanu*. Sargon rex Assyriorum gloriatur, quod incolas terrae Iavan, qui habitent in medio mari, velut pisces extraxerit. Sennacherib navibus suis nautas de Tyro, Sidone, Iavan imponit; conferre licet quod ex *Abydeno* refert *Eusebius* (Chron. I. 9; M. 19,123 vel ed. Schoene I. p. 35) classem Graecorum a Sennacherib profligatam esse prope oram Ciliciae. Pluries in inscriptionibus Darii Hystaspis commemoratur terra *Iavanu* vel *Iaavanu*; notare tamen inuat, in istis inscriptionibus agi de Graecis (Ioniis) Asiae minoris et insularum Asiae, non de Graecia propria.

Cf. *F. de Hummelauer* ad Gen. 10,2; *Schrader-Witthehouse*, Cuneif. Inscript. and Old. Test. I. 63. 64; *Delitzsch*, Paradies 248. 249; *Fr. Lenormant*, Histoire ancienne de l'Orient 1881 I. p. 296 et Les origines de l'histoire 1884 II. 2, p. 1-29; *W. Max Müller*, Asien und Europa nach altaegyptischen Denkmälern 1893 p. 370.

2. Iavan (Vulg. Graecia) legitur Ez. 27,10 in descriptione commercii Tyriorum cum Arabia. LXX pro Iavan videntur legisse יַיִן *vinum*. Locus est admodum obscurus, cum de genuina lectione non constet. Iavan hoc loco utique non est Graecia; ab aliis putatur regio Arabiae felicitis (*Kamus* p. 1817 apud *Gesen.*, Thesaur. p. 588 : Iavan oppidum Iemanae, Iavan oppidum in porta Ispahanensi), ab aliis colonia mercatorum Ioniae in Arabia meridionali (?). De emendatione huius textus a *Cornill* inducta v. DAN 4.

IAZER, in Vulgata etiam Iaser, Iezer (יַעֲזַר, יַעֲזִיר, יַעֲזִיר; יַעֲזִיר plerumque), urbs transiordanica in Galaad (1 Par. 26,31 : Iazer Galaad), a qua regio

circumiacens vocabatur terra Iazer (Num. 32,1. 3; cf. 2 Reg. 24,5), haud dubie pars aliqua praecipua Galaad inferioris, cum locis citatis terra Iazer a Galaad distingui videatur. Ab Israelitis expugnata est, postquam devicto Schon rege Hesebon terram Amorrhaeorum occuparunt (Num. 21,32); ex hoc autem non efficitur Iazer extra fines regni Schon fuisse, sed contextu potius innuitur Iazer utpote regionem magis dissitam eisdem regni nova aliqua expeditione subigendam fuisse. Sunt tamen interpretes, qui putent a maiore regno Schon distinguendum esse aliud regnum amorrhaeum minoris extensionis in terra Iazer, praesertim cum iam Num. 21,24 LXX legant : *Iazer erat terminus Ammonitarum* i. e. terminus inter regnum Schon et desertum Ammon, quam lectionem contra textum massorethicum : *firmus erat terminus Ammonitarum* praeferunt *Dillmann* ad h. l., *F. de Hummelauer* ad h. l., *Ewald*, Geschichte des Volkes Israel ed. 3 II. p. 289 et alii.

Iazer a filiis Gad reaedificata (Num. 32,35), tribui Gad attributa (Ios. 13,25), postea levitis de stirpe Merari concessa est 21,37; 1 Par. 6,81[66]; tempore autem Davidis Hebronitae, qui erant levitae de genere Caath, ibidem ministerium Dei et regis procurabant (1 Par. 26,31). Eius mentio fit in oraculis prophetis contra Moab editis (Is. 16,8. 9; Ier. 48,22). Ex potestate Moabitarum postea in manus Ammonitarum transiit; nam Iudas Machabaeus urbem 'Iaz'q' (Vulg. Gazer; Flav. Ios. Ant. XII. 8,1 : τὴν 'Ιαζωρῶν πόλιν ed. Niese) ab Ammonitis occupatam cepit (1 Mach. 5,8).

Teste Eusebio (Onom. ed. Lag. 264, 98 s.) Iazer distabat 10 mil. pass. a Philadelphia ('*Ammān*) occidentem versus et 15 mil. pass. a Hesebon (*Hesbān*) eratque ibidem fons magni fluvii ad Iordanem tendentis; teste S. Hieronymo (Onom. ed. Lag. 86,23 s. v. Azor) vicus Iazer solum 8 mil. pass. a Philadelphia occidentem versus aberat. His distantis satisfaciunt vel *Khîrbet Šār* vel *Khîrbet Šîr*, ruina prior a sinistris, altera a dextris *Wādî el-Šîr*, qui ex ea regione in *Wādî el-Kefrîn* decurrens magnus ille fluvius Eusebii agnoscitur potest.

Cf. *Seetzen*, Reisen durch Syrien, Palaestina etc. ed. *Kruse* I. p. 397 s.; *Survey of East. Pal. Mem.* I. p. 153; *Zeitschr. d. D. Pal.-Ver.* XV. 1892 p. 24; *Legendre* apud *Vigouroux*, Dict. de la Bible III. 1850-1852. — Alias coniecturas de situ proposuerunt *I. L. Burckhardt*, Reisen in Syrien, Palaestina ed. *Gesenius* II. p. 609, sed cf. 1061. 1062; *Oliphant*, The Land of Gilead 1880 p. 231.

IAZIEL. 1. Iaziel (יִזְעִיאל, *Qeri* יִזְעִיאל; יִזְעִיאל, A יִזְעִיאל), Beniaminita, qui Davidi in Siceleg se adiunxit (1 Par. 12, 3), filius Azmoth (viri vel urbis); v. AZMAVETH 3.

2. Iaziel (יִזְעִיאל, יִזְעִיאל), levita tempore Davidis (1 Par. 15, 18). Idem videtur esse, qui 1 Par. 15, 20 scribitur Oziel (יִזְעִיאל, יִזְעִיאל).

3. Iaziel (יִזְעִיאל, יִזְעִיאל), sacerdos tempore Davidis (1 Par. 16, 6).

IAZIZ (יִזְעִי, יִזְעִי), Agareus, qui tempore Davidis super oves praepositus erat (1 Par. 27, 31).

IBEX recte exponitur in Vulgata animal hebr. יָעֵל (tantum in plur. יָעִילִים) dictum, quod saepius tamquam incola petrarum abruptarum describitur (1 Reg. 24, 3; Ps. 103[104], 18 Vulg. *cervis*; lob 39, 1), ubi in locis inaccessibilibus degens hominibus satis ignotum manet (lob 1. c.); cum sit animal pulchrum atque elegans, in Proverbiis ad describendam uxorem bonam in comparationem adducitur una cum cerva (יָעֵל-הַחֵדָּה, Vulg. *gratissimus hinnulus*). Illae petrae autem, « quae solis ibicibus perviae sunt » (1 Reg. 24, 3 יָעֵלִים הַחֵדָּה), prope desertum Engaddi iuxta mare Mortuum sitae erant. — Significatio vocis, quam seniores varie interpretati sunt ('Εδδαίεμ vel sim. 1 Reg. I. c.; ἑλδαίος Ps., τραχελάφων lob; πῶλος Prov.), satis constat tum ex voce arabica *wa'al*, quae ibicem arabicum designat, tum ex nota in sacro textu addita quod sit altissimarum petrarum incola elegantia insignis, tum ex etymo vocis יָעֵל *ascendit*, quod ibici prae ceteris convenit. Significatur autem ea ibicum species quae in Palaestina et regionibus vicinis satis communis est ac nomine scientifico *Capra bedou* Wagner audit (ord. *Artiodactyla*); praesertim in altissimis rupi-

bus circa mare Mortuum et Arabiae petraeae frequens invenitur, et forma eleganti insignis etiam ab Arabibus in describendo homine nobili ac pulchro in comparationem adducitur.

Praeterea etiam nomine יִבְסָ, quod semel tantum in S. Scriptura occurrit (Deut. 14, 5) et a LXXae Vulgata *tragelaphus* explicatur, probabiliter ibex intelligendus est (v. TRAGELAPHUS). At immerito etiam יִבְסָ, quem veteres recte cer-vum explicarunt, de ibice exponitur.

Cf. *Sam. Bochart*, Hieroz. I. 915-20, ed. *Rosenm.* II. 289-97; *Fr. I. Schoder*, Hierozoici Specimen 3, 41-7; *I. D. Michaelis*, Supplem. p. 1121-4; *Sam. Oedmann*, Verm. Samml. 5, 46-54; *E. F. K. Rosenmüller*, Bibl. Alterth. IV. 2, 205-7; *L. Lewysohn*, Zool. d. Talm. 115; *H. B. Tristram*, Nat. Hist. ed. 8, 95-7; *id.* Fauna and Flora of Pal. 6 s. (cum pulchra effigie colorata); *A. Kinzler*, Bibl. Naturgesch. ed. 9, 33-5; *J. G. Wood*, Bible Animals 203-7; *Fr. Hommel*, Namen d. Säugeth. 279-87. 391-3. 438 s.; *Cl. R. Conder*, Tent Work in Palest., London 1879, 2, 139 s.; *P. Cultrera*, Fauna bibl. 252 s.; *Leunis-Ludwig*, Synopsis I. 1 ed. 3, p. 250 s.; *A. E. Brehm*, Tierleben ed. 3, III. 172-90; *O. Keller*, Thiere d. klass. Alterth. 36-52. 333-42. — Etiam in monumentis assyriis et aegyptiacis figura ibicis frequenter occurrit: cf. *A. H. Layard*, Monuments of Nineveh I. 30; 35; 43, 2-7; 47, 1. 2; *W. Houghton* in Trans. Soc. Bibl. Arch. V. 1877, 310-2; *G. Rawlinson*, Five great monarchies ed. 4, 1, 221 s. 521 s.; *G. A. Hoskins*, Travels in Ethiopia, London 1835, p. 327 ss. tab. I. 1 (ex sepulcro *Rehmar*); *J. Duemichen*, Resultate I. tab. 9. 12; *R. Hartmann* ib. p. 29; *Wilkinson-Birch*, Manners and Customs II. 88 fig. 354, 5. 6; 90 fig. 356, 1; 92 fig. 357, 7 etc.; *W. M. Fl. Petrie*, Medum, London 1892, tab. 9. 14. 24 (ex 4. dynastia).

L. FONCK.

IBIS appellatur avis immunda hebr. יִבְשִׁיחַ dicta (Lev. 11, 17; Deut. 14, 16), quae etiam in ruinis Idumaeae dicitur habitatura (Is. 34, 11 יִבְשִׁיחַ); si ordinem hodiernum consideres, in textu Deut. potius *cygnum* pro יִבְשִׁיחַ verti dices; at comparatis Lev. 11, 17 et Is. 34, 11, etiam in Deut. *ibin* pro יִבְשִׁיחַ et *cygnum* pro הַיִּבְשִׁיחַ poni concedendum est. Vulgatae

explicatio cum versione LXX interpretum (ἰβίς) plane consentit; alia versio graeca posterior veneta ὁ ἐριζλτης exponit. Peshitta vero et paraphrasis chaldaica קפושא vertunt (Is., atque inde etiam Lev. et Deut., ubi ordo in Peshitta mutatur), quam avem veteres varie explicant, recentiores plerique noctuam dicunt (cf. *Payne Smith*, Thes. 3683). — Significatio nominis hebraici controversitur. Etymologiam vocis יִבְשִׁיף *crepusculum* secutus *Bochart* avem nocturnam ac specialiter *bubonem* intellegit, quae maxime ruinas et loca deserta incolit; atque hanc opinionem multi recentiores amplexi sunt (*Lewysohn*, *Tristram*, *Kinzler*, *Wood*, *Frd. Delitzsch*, *Riehm-Baethgen* etc.). E contra interpretationem seniorum et Vulgatae alii tucuntur (*Oedmann*, *Cultrera*), eo quod avis haec cum aliis palustribus enumeretur, et quod nomine ibidis non sola avis religiosa antiquorum Aegyptiorum, verum etiam aliae affines designentur. Atque haec altera sententia, auctoritate interpretis graeci in Pentateucho et alterius in prophetia Isaiae ac S. Hieronymi commendata, praeferenda videtur, cum etymologia vocis pariter in alteram partem trahi possit (cf. *Gesenius*, Thes. 923) et rationes contra ibin aegyptiacam praesertim in textu Isaiae adductae in aliis avibus affinibus non valeant. Itaque non sola ibis illa sacra (*Threskiornis religiosa* Gray = *Ibis aethiopica* Latham = *Ibis religiosa* Savigny), sed praeterea vel *Ibis falcinellus* Linné (= *Falcinellus igneus* Gray), vel *Ardea bulbus* Savigny (= *Ardea ibis* L.) vel similis avis ex ordine *Ciconiiformium* nomine יִבְשִׁיף probabilius videtur intellegenda, quae etiam in Palaestina frequens invenitur atque etiam ab Isaia inter incolas solitudinum Idumaeae cum pelecano (קָאָר) et corvo atque ericio haud inepte enumeratur, si tamen verba prophetae non de solis rupibus et montibus saxosis, sed etiam de vallibus et paludibus prope mare Mortuum explices; neque enim ipse *Tristram*, qui haec saxa deserta cum noctuis praefert, pelicanum aut botaurum stellare (quem pro ericio supponit) in rupibus illis umquam inveniet.

Cf. *Sam. Bochart*, Hieroz. II. 281-5, ed. *Rosenm.* III. 24-30; *Sam. Oedmann*, Verm. Samml. 6, 27-38; *E. F. K. Rosenmüller*, Handb. d. bibl. Alterth. IV. 2, 310-3; *L. Lewysohn*, Zool. d. Talin. 163; *H. B. Tristram*, Nat. Hist. ed. 8, 192 s. 249-51; *id.* Fauna and Flora of Palest. 110. 112 s.; *A. Kinzler*, Bibl. Naturgesch. ed. 9, 72. 84; *J. G. Wood*, Bible Animals 373-5. 485-90; *P. Cultrera*, Fauna bibl. 316-8; *Leunis-Ludwig*, Synopsis I. 1 ed. 3, p. 484; *A. E. Brehm*, Tierleben ed. 3, VI. 491 s. 534-8; *Ph. L. Martin*, Naturgesch. d. Thiere I. 2, 551 s. 558. — De ibide sacra Aegyptiorum, monumentis antiquis celebri, cf. *G. L. Cuvier*, Mémoire sur l'ibis des anciens Égyptiens, in Annales du Muséum d'hist. nat. T. IV. p. 116 ss.; *J. C. de Savigny*, Histoire naturelle et mythologique de l'ibis, Paris 1805; *id.* in Description de l'Égypte, ed. *C. L. F. Pauckoucke*, t. XXIII., Paris 1828, 431-42; *H. O. Lenz*, Zool. d. alt. Griech. u. Römer 377-81; *Wilkinson-Birch*, Manners and Customs III. 321-5; *W. Houghton* in Trans. Soc. Bibl. Arch. VIII. 1884, 90 s.

L. FONCK.

ICAMIA (יִקְרִיָּה, Ἰκαμία), unus ex posteris Hesron de stirpe Iuda, filius Sellum et pater Elisama, descendens ab Oholai filia Sesan, quae teraa Aegyptio, servo Sesan, nupserat (1 Par. 2, 41).

ICHABOD (יִחָבֹד i. e. inglorius, decurtatum ex יָחִיד; Ὀλιγαρχαβώδ, Ὀλιγαρχῆς), filius Phinees filii Heli pontificis; mater parturiens cum nuntium acciperet de captura arcae, de morte Phinees mariti et Heli soceri sui, filium peperit et moribunda isto nomine vocavit dicens: Translata est gloria de Israel (1 Reg. 4, 21); cur hoc nomen ei indiderit, explicat sacer auctor addens: ob capturam arcae Dei et ob socerum eius et maritum eius (ita verte ex hebr.). Notat *F. de Hummelauer* ad h. l. essentialem gloriae ablationem in arcae iactura constituisse, eius autem accidentale quoddam complementum reperiri in trium virorum (Heli, Ophni, Phinees), qui in ordine sacerdotali essent primi, simultaneo interitu; idem interpres monet non necessarium esse, ut ipsa mulier praeter iacturam arcae etiam iacturam mariti et soceri nomine Ichabod exprimere voluerit, sed sufficere ad textum explicandum, ut alii posthac eam significationem adiunxerint. His perpensis nulla erit ra-

lio e textu eliminandi illa verba: « et pro socio suo et pro viro suo », ut *Habigantius* voluit. Derivationem nominis ulterius discutit *F. de Hummelmaier* ad h. l. Ex 1 Reg. 14,3 discimus fratrem Ichabod fuisse Achitob (v. ACHITOB 4).

ICONIUM (Ἰκόνιον), urbs praecipua Lycaoniae. S. Paulus in primo suo itinere cum Barnaba, postquam a Iudaeis Antiochia Pisidia pulsus est, Iconium venit ibique multos Iudaeorum et Graecorum convertit, sed impetu Iudaeorum et gentilium coactus Lystram abiit (Act. 13,51; 14,1); Lystrae autem instigantibus Iudaeis, qui ab Antiochia et Iconio supervenerant, lapidatus et velut mortuus extra civitatem tractus est (14,18). Nihilominus a Derbe termino primi itineris Lystram, Iconium, Antiochiam redire non dubitavit ad discipulos in fide confirmandos (14,20). Persecutionum, quas Antiochiae, Iconii et Lystris sustinuit, Apostolus meminit 2 Tim. 3,11. In secundo itinere apostolico S. Paulus et Silas per Ciliciam profecti Derben et Lystram ac sine dubio etiam Iconium venerunt (Act. 16,2; cf. 4). Probabilis in tertio quoque itinere Apostolus Iconium attigit (cf. 18,23).

Iconium apud *Xenoph.* Anab. I. 2,19 dicitur urbs Phrygiae maxime orientem versus sita, apud *Ammian. Marc.* 14,2 urbs Pisidiae, qui error ex vicinitate Pisidiae et Lycaoniae explicari potest, apud reliquos (*Strabo* XII. 6,1; *Cic.* ad Div. 15,4) urbs praecipua Lycaoniae: apud *Plin.* V. 27,93 a Lycaonia praese sumpta distingui videtur ut urbs celeberrima et caput tetrarchiae quattuordecim civitatum. Hodie *Konia* in regione frugifera ad radices Tauri.

Apocrypha Acta Pauli et Theclae referunt S. Theclam virginem iconiensem a S. Paulo Iconii conversam esse.

Cf. *Rosenmüller*, *Bibl. Altert.* I. 2, p. 201; *Ramsay*, *Hist. Geogr. of Asia Minor* 1890 p. 332. 377 s. 393 s.

ICUTHIEL (יְקִיחִיאל, ὁ Θεοῦ ἰλά), filius Mered et Iudaeae (cf. s. v. BETHIA) in genealogia Iuda et pater (possessor, dominus) Zanoë urbis in monte Iuda (1 Par. 4,18); v. ZANOË 2.

IDAIA nomen proprium, quod in Vulgata interdum etiam scribitur Iadaia, Iedaia, Iedei, Iodaia.

1. Idaia (יְדֵיָא, Ἰεδία, Ἰεδουά, Ἰωδαί, Ἰδαία; et aliter sine ulla scriptionis conformitate), nomen complurium sacerdotum. Secunda classis sacerdotalis ex 24 classibus a Davide distributis nomine Idaia a primo capite suo vocabatur (1 Par. 24,7; Vulg. Iedei). Duce Zorobabel ex captivitate redierunt sacerdotes filii Idaia in domo Iosue 973 numero (Esdr. 2,36 Vulg. Iadaia; Neh. 7,39); his locis vel intellegenda erit eadem classis sacerdotalis secunda, cuius pars aliqua a Iosue ceteroquin ignoto nomen habuerit vel illa familia sacerdotalis, ad quam Iosue pontifex et aequalis Zorobabelis pertinebat. Duae familiae sacerdotales Idaia commemorantur in diebus Iosue pontificis (Neh. 12,6. 7) et iterum in diebus Ioachim filii Iosue (Neh. 12,19. 21; Vulg. 12,19 Iodaia). Hierosolymis habitabat familia sacerdotalis Iedaia (1 Par. 9,10) seu Idaia (Neh. 11,10; pro *Idaia filius Ioarib* lege *Idaia, Ioarib*).

2. Idaia (יְדֵיָא, Ἰδαία), LXX appellative explicant οἱ ἐπεργονόταες, unus ex tribus legatis, qui Babylone a Iudaeis etiamnum exsilibus donaria in urbem attulerunt pro templi aedificatione vel generatim pro re divina (Zach. 6,10. 14).

3. Idaia (יְדֵיָא, Ἰδαία), Simeonita quidam ex maioribus Ziza principis regnante Ezechia pascua Gador occupantis (1 Par. 4,37).

4. Iedaia (יְדֵיָא, Ἰεδάϊα), filius Haromaph in muro Ierusalem aedificando operam praestans (Neh. 3,10).

IDIDA (יְדִידָה, Ἰδία), mater Iosiae regis Iuda, filia Iadaia de Besecath (4 Reg. 22,1) seu Bascath. Apud Flavium Iosephum (*Ant.* X. 4,1) nomen est Ἰδίδς.

IDITHUN (יְדִיתֻן et interdum *Kethib* יְדִיתִין; Ἰδითούν, Ἰδითόμ, Ἰδითόων, Ἰδითόων, Ἰδითώμ etc.), levita et cantor celeberrimus tempore Davidis, in eodem ordine cum Asaph et Heman collocatus (1 Par. 9,16; 16,38. 41. 42; 25,1. 3. 6; 2 Par. 5,12; 29,14; 35,15; Neh. 11,17; Ps.

38,1; 61,1; 76,1). Probabilius idem est atque Ethan princeps levitarum et eatorum de stirpe Merari (v. ETHAN 3). Adverte denique 1 Par. 16,42 nomina Heman et Idithun in priore parte versus cum LXX esse delenda.

IDOLOLATRIA. Vox *idolum* (εἰδωλον) proprie significat imaginem, statuum, symbolum falsi numinis et in S. Scriptura saepe etiam ipsos deos falsos.

1. Idola vel simulaera, quae in s. litteris commemorantur, sunt Adonis (Tammuz), Adramelech, Amon, Anamelech, Asima, Astarthe, Atargatis, Baal, Bel, Castores (Dioscuri Castor et Pollux velut insigne navis), Chamos, Dagon, Diana (Ἀρτεμις), Fortuna (Gad), Iupiter (Ὀλύμπιος et hospitalis), Liber (Διόνυσος, Bacchus), Luna, Melchom, Mercurius (Ἑρμῆς), Merodach, Militia caeli, Moloch, Nanea, Nebabaz, Nergel, Nesroch, Phogor (Beelphegor), Priapus (sed hebr. Ashera i. e. Astarthe), Regina caeli (i. e. Astarthe vel tamquam praeses stellae Veneris vel tamquam dea Luna), Remmon, Saturnus (Kaiwan Am. 5,26), Sochothbenoth, Sol, Tharthac, Zodiacus (duodecim signa vel proprie deversoria, hospitia scil. solis). — Accedunt quaedam idola, quorum nomina in compositis nominibus propriis deprehenduntur: Adad (Hadad) in nomine urbis Adadremmon et in nominibus regum Adazezer (Adazezer) et Benadad, Assur in nomine regis Asarhaddon, Nabo in nomine regis Nabuchodonosor et principum babylicorum Nabusezban et Nabuzardan.

2. In Vulgata Veteris Testamenti vox *idolum* (vel interdum *simulacrum*) pro variis vocabulis hebr. adhibetur, quorum praecipua recensere non erit inutile, quia ex vocibus hebr. simul quaedam discuntur de opinione, in qua gentium dii habebantur.

Contemptus deorum declaratur voce אִתָּן inane, vanum Num. 23,21; 1 Reg. 15,23; Is. 66,3; Ier. 4,15; Os. 4,15 (Bethel contemptim nominatur Bethaven i. e. domus iniquitatis; item 5,8; 10,5; 6,8; 10,8; 12,11 [hebr. 12]).

Deos gentium esse plane aliquid inane, esse nihil declaratur appellatione אֱלִיל

Is. 10,10 et forma plurali אֱלִילִים Lev. 19,4; 26,1; 1 Par. 16,26; Ps. 93[96],5; 96[97],7 (Vulg. simulaera); Is. 2,8. 18. 20; 10,11; 19,1. 3 (simulaera); 31,7; Ez. 30,13; Hab. 2,18 (simulaera).

Semel אֵילִים terebinthi (quereus), sub quibus scilicet sicut sub omni ligno frondoso fornicabantur i. e. Astarthen colebant, in Vulgata redduntur idola Is. 1,29 : confunduntur ab idolis.

Valde frequenter, praesertim apud Ezechielem, contemptum de diis inanibus adhibetur vox אֱלִילִים i. e. stipites, trunci, caudices vel, ut alii exposuerunt, stercora, stercorea. LXX vertunt εἰδωλα, ἐνθymήματα, ἐπιθυμήματα, ἐπιτηδεύματα, διανοήματα, βδελύγματα. Vulgata interdum vertit : immunditiae 4 Reg. 17,12; 21,11. 21; 23,24; Ez. 14,4; 33,25; simulaera Ez. 6,3; 30,13; plerumque autem : idola Lev. 26,30; Deut. 29,17 (sordes i. e. idola; hebr. 16); 3 Reg. 15,12 (sordes idolorum); 21,26; Ier. 50,2; Ez. 6,4. 6. 9. 13; 8,10; 14, 5. 6. 7; 16,36; 18,6. 12 et passim.

Vanitatem idolorum et idololatriae ad vivum depingit vox הָבֵל halitus 4 Reg. 17,15; Ier. 2,3 et in forma plurali הָבֵלִים Deut. 32,21; 3 Reg. 16,13. 26; Ps. 30[31],7; Ier. 8,19; 14,22; Ion. 2,9. Vulgata vertit Ier. 14,22 *sculptilia*, alias *vanitates*; LXX plerumque μάταια, etiam εἰδωλα, ματαιότητες.

Idola in existentia et in potentia nihil esse nisi *mendacia* indicatur voce כְּזָבִים Am. 2,4 (Vulg. idola, LXX τὰ ψεύματα) et Ps. 39[40],3 (Vulg. insanias falsas, LXX παντὸς ψευδῆς).

Deos falsos cultoribus suis esse plane inutiles declaratur per locutionem לֹא יוֹעִיל i. e. non prosunt Ier. 2, 8 (Vulg. idola, LXX ἀνωφελοῦς; cf. 2,11).

Idolis quam maxime congruit designatio תּוֹעֵבָה abominatio, res abominabilis Deut. 27,15; 4 Reg. 23,13; Is. 44, 19; Ier. 16,18; Ez. 7,20; 11,21; 16,36 (Vulg. abominatio, Is. 44,19 idolum; LXX βδελύγματα, ἀνομία) et שְׂקִיץ abominandum, res abominanda, horrenda, foedissima (frequenter in forma plurali)

Deut. 29,47[16]; 3 Reg. 11,3. 7; 4 Reg. 23,13. 24; 2 Par. 15,8; Is. 66,3; Ier. 4, 1; 7,30; 13,27; 16,18; 32,34; Ez. 5,11; 7,20; 11,18. 21; 20, 7. 8. 30; 37,23; Dan. 9,27; 11,31; 12,11; Nah. 3,6; Zach. 9,7 (Vulg. abominaciones, offensiones, offendicula, simulacra, idola: LXX βδελύγματα, προσοχθίσματα, μίσματα, εἰδωλον).

Vocem תרפים, qua dii domestici, quasi penates designantur, Vulgata interdum retinet (v. THERAPHIM), interdum vertit *idola* Gen. 31,19. 32,34; Iud. 17,5; 18,18. 20; 4 Reg. 43,24 (figuras idolorum); Ez. 21,21[26].

Alia nomina statuas, sculptilia, simulacra significant; sed in Vulg. saepius eorum loco idola leguntur; ita pro כפלים, כפלים Dent. 12,3; Iud. 3,19. 26; 18,31; 4 Reg. 17,41; 21,7; 2 Par. 33,22; Is. 44,9; et pro עצב 1 Reg. 31,9; 1 Par. 10,9; Is. 48,3; Os. 4,17; 8,4; 13,2; 14, 9; Mich. 1,7; et pro כפלים Ez. 8,3; et pro צלם Am. 5,26. Praeterea in Vulgata saepius deprehendimus *idola*, ubi vox in hebr. non legitur, at sensu facile habetur; ita Lev. 20,2 si quis dederit de semine suo (idolo) Moloch, morte moriatur; Num. 25,18; Iud. 10,6. 16; 2 Par. 30,14; 34,5; Is. 65,4; Ier. 44,23.

3. De modo quo idola conficiebantur vide quae de vitulo aureo narrantur Ex. 32,2 s. (cf. s. v. VITULUS); itemque quae leguntur Is. 44,10-20; Ier. 10,3-5; Bar. 6,7 s.; Sap. 13,10-19; 14,15-22. Quibus locis simul edicunt gentes adorasse aurum, argentum, lignum i. e. idola aurea, argentea, nli idololatrias v. g. Ieremias quoque describit: dicentes ligno: pater meus es tu, et lapidi: tu me genuisti (2,27). Erantne itaque idololatrae adeo stupidi, ut aurum et lignum adorarent? Notare oportet apologetas primorum saeculorum eodem modo loqui, quorum locos vide apud *Knabenbauer*, Comm. in Is. II. p. 163. Unde accusatio non potest non esse vera. Verum quidem est oppositum esse quandoque illud: deos per simulacra veneramus (cf. *Arnobius*, Adv. gentes 6,9; *M.* 5,1480); verum quae Arnobius de se et sua sentiendi ratione narrat, rem explanant atque illam accusationem merito fieri

ostendunt; censebantur enim dii habitare in simulacris et simulacris ipsis consecratione facta vim quandam seu numen inesse. Prorsus similia quoque referuntur in epistula ad Diognetum, apud Tertullianum aliosque quos vide l. c. p. 164, quibus adde, quomodo Lucianus (in Iove Iragoedo) deorum statuas intine cum ipsis diis coniungat.

4. Historia idololatriae inter Israelitas grassantis. Idololatria proprie est cultus supremus alii cuidam ac vero Deo exhibitus. Dicitur tamen etiam cultus illegitimo symbolo numinis praestitutus v. g. cultus simulacrorum.

Inter maiores Abraham idololatriam serpsisse, indubie affirmatur Ios. 24,2: trans fluvium habitaverunt patres vestri ab initio servieruntque diis alienis; tuli ergo (hebr. et tuli) patrem vestrum Abraham etc. Unde satis clare indicatur, cur Abraham iussus sit egredi de terra sua et de cognatione sua et de domo patris sui (Gen. 12,1); nam Thare, pater Abraham, servisse diis aliis explicite dicitur (Ios. 24,2); atque id de vera idololatria esse intellegendum (et non de servitute sub gente idololatra, cf. Ier. 16,13) etiam ex eo patet, quod Laban teraphim habuit et coluit et hanc superstitionem cultui Dei veri adiunxit (cf. Gen. 31,24. 29. 30. 49; 24,50). Insuper Iacob redux a Laban iubet suos abicere deos alienos, et « dederunt ei omnes deos alienos quos habebant et in aures quae erant in auribus eorum, at ille infodit ea subter terebinthum » (Gen. 35,2-4). Verum posteros Iacob in Aegypto quoque idololatriae aegyptiacae indulsisse constat ex reprehensione Ez. 20,7-10; eandem in deserto esse exercitam Ez. 20,13 et Am. 5,26 affirmatur et insuper constat ex narratione de vitulo aureo (Ex. 32,1; vide s. v. VITULUS) et Num. 25,2. 3: initiatusque est Israel Beelphegor. Gravissima quidem iis data sunt praecepta, ut destruerent omnia idololatriae documenta et incitamenta in terra Chanaan, ne ingererent foedera cum gentibus, additaeque minae transgressoribus et poena lapidationis proposita, si quis ad idololatriam alios invitasset (cf. Deut. 12,1-13,17; 28,15; Ex. 20,3. 4; 22,20 qui immolat diis oc-

cedetur); at quam parum funesta illa ad idololatriam propensio sit extincta, tota populi historia usque ad exilium testatur. Incitamento erant et exemplum gentium vicinarum et cumprimis voluptates illae quae cum cultu Baal et Astarthes erant coniunctae. Quantopere dii gentium iis facti sint in ruinam (Iud. 2,3), iam satis superque ex iis apparet, quae ex tempore Iudicum narrantur; iterumque ad cultum Baal et Astarthes declinabant neque ab eo revocabantur nisi durissima servitute et afflictione (Iud. 2,11 ss.; 3,5 ss.; 4,1 ss.; 6,1 ss. etc.). Cultum Domini simul cum idololatrio cultu esse exercitum etiam elucet ex narratione 1 Reg. 4,1-7,6; nam adducunt arcam Domini in castra et admonentur a Samuele, ut ablatis diis alienis revertantur ad Dominum in toto corde. Idem monitum Samuel populo dedit valedicens 1 Reg. 12,12 et Saul varia divinationis genera, quae cum idololatria coniungi solebant, poena mortis statuta abolere studuit (cf. 1 Reg. 27,9).

Salomon nuptiis cum alienigenis contractis exemplo pessimo praeivit et in ipsa urbe in qua templum Domini erexerat et ipse coluit idola et fana idolis aedificavit (3 Reg. 11,3-8). Ieroboam vero, ne populus ad adorandum Dominum pergeret in Ierusalem, cultum Domini edixit esse exhibendum in Bethel et Dan, utrobique vitulo aureo constituto. Ita in regno utroque simul cum Dei cultu qui modo superstitioso etiam in « excelsis » (vide s. v. EXCELSA) exercebatur, idololatria et scelera ei cognata grassabantur, quemadmodum libris historicis continuo memoriae proditum est (3 Reg. 14, 22-24; 15,3; 16,25-33); at tempore quoque maxime calamitosi non defuisse multos in populo veri Dei cultores, ipse Elias, cum putaret se solum esse relictum, a Domino est edoctus (3 Reg. 19, 14-18). Quantopere invaluerit idololatria in Israel instigante Iezabel colligitur ex numero prophetarum Baal et Astarthes scil. 850 (3 Reg. 18,19). Prophetas Baal Elias poena in idololatrias constituta affecit, et populus Iahwe Deum suum alta voce agnovit, sed mox idololatria iterum serpebat; Ochozias quippe filius Achab servivit Baal et adoravit eum (3 Reg. 22,

54). In Iuda quoque Ioram, filius Iosaphat regis, ambulavit in viis regum Israel, sicut domus Achab; filia enim Achab erat uxor eius; item filius eius Ochozias (4 Reg. 8,18. 27). Uti igitur Salomon per mulieres ad cultum idolorum est seductus, ita duae mulieres Iezabel in Israel, Athalia in Iuda, quam maxime idololatriam propagabant. Athalia autem interfecta foedus cum Deo instauratur et arae Baal et simulacra destruantur (4 Reg. 11,17. 18). In Israel Iehu pariter interfectis Ioram, Iezabel, filiis Achab sacerdotes Baal occidit, aedem et simulacrum Baal destruxit; sed cultum vitulorum aureorum retinuit (4 Reg. 10,18-30), sicut reges quoque post eum, qui non recesserunt a peccatis domus Ieroboam; insuper Ashera permansit in Samaria (4 Reg. 13,6. 14; 14,24; 15,9. 18. 24. 28; 17,2); de cunctis quippe regibus dicitur: fecit malum coram Domino, non recessit a peccatis Ieroboam. Ad quam regni israelitici conditionem etiam aptantur reprehensiones Osce prophetae 1,2. 9; 2,2. 5. 13; 4,12. 13; 6,10; 9,1 etc. et Amos prophetae 3,14; 4,4; 5,5; 7,9. Meliore loco erant res regni iudaici a rege Iosias usque ad Iotham; de quibus singulis scil. dicitur: fecit rectum coram Domino; at simul additur, excelsa non esse abolita, verum populum immolasse et incensum adolevisse in excelsis (cf. 4 Reg. 12,2. 3; 14,3. 4; 15,3. 4. 34. 35). Verum Achaz, filius Iotham, ambulavit in viis regum Israel et statuas fudit Baalim; inde idololatria longe lateque serpsit, id quod ex Isaia quoque satis colligitur; cf. 2,6. 8 repleta est terra idolis; 2,18. 20. Magna quidem fortitudine Ezechias rex contra eam impietatem dimicavit: dissipavit excelsa, statuas contrivit, simulacra vel arbores Asherae succidit (4 Reg. 18,4); at filius eius Manasse iterum totam idololatriam, Baal, Astarthes, spurcitiam reduxit et in ipso templo Domini aras idolorum et simulacrum Asherae collocavit (4 Reg. 21,3-7; 2 Par. 33,3 ss.); atque per eum adeo altas egit impietas haec radices in Iuda, ut propter scelera Manasse tandem regnum Iuda et thronus David concideret (4 Reg. 21,10 ss.; Ier. 15,4). Instauracionem quidem morum serio urgebat Io-

sias; at conatus regis et Jeremiae, Sophoniae aliorumque prophetarum parum valuerunt ad animos sincera pietate inbuendos, uti luculenter ex Jeremiae libro apparet, cum tot ac tantas contra idololatrias comminationes et reprehensiones Jeremias proferat et populus urbe iam destructa perfracte cultui idolorum inhaereat (cf. 2, 10 ss.; 3, 2 ss.; 17, 2; 44, 15-25); idemque testatur Sophonias 1, 3. Quare, quod prophetae comminabantur continuo, populus tandem in signum foederis violati e terra Domini est eiectus.

Uti ex libris historicis colligitur, cultus idolorum simul cum cultu Domini exercebatur. Colebantur autem dii gentium vicinarum; frequentissime commemorantur Baal et Astarthe (Ashera; vide s. v. BAAL); dein etiam Melchom, deus Ammonitarum, Chamos deus Moab (cf. 3 Reg. 11, 5. 7; 4 Reg. 23, 13), item militia caeli, et Astarthe sub nomine reginae caeli (Ier. 7, 18; 44, 17) quo nomine Istar apud Assyrios appellabatur (cf. Zeitschr. für Assyriologie 1885 p. 333 et 1889 p. 74). Adorabant militiam caeli super tecta, adorabant et iurabant in Domino et iurabant in Melchom, uti habetur Soph. 1, 5. Varios idololatriae modos nobis exhibet Ezechiel 8, 5 ss., cultum scil. aegyptiacum, cultum Adonidis (Tammuz), cultum solis (Baal); placentas reginae caeli oblatas esse a mulieribus Ier. 7, 18 docemur.

5. Idololatria a prophetis semper exhibetur tamquam apostasia a Deo qui eduxit populum ex Aegypto, tamquam fornicatio, quatenus scil. foedere sinaitico plebs quasi sponsa Domini est constituta. Unde modo quo prophetae loquuntur aperte refellitur opinio quorundam recentiorum veteres Israelitas nihil novisse de Iahwe Deo uno, neque Moysen unum Deum docuisse, verum a prophetis tandem monotheismum esse propositum.

Idololatrias inexcusabiles esse atque verum Deum potuisse cognoscere ex opere creationis docet et auctor libri Sapientiae 13, 1-19 et Paulus apostolus Rom. 1, 19. Quomodo ad idololatriam perventum sit, idem apostolus l. c. docet; veritatem quippe cognitam homines ini-

quitate suffocabant, Deo cultum debitum non exhibebant; inde in vitia prolapsi cultui turpissimo se tradebant. Similiter statuit Sapiens: adinventio idolorum corruptio vitae est, et exemplis demonstrat originem variam cultus perversi; v. g. pater lugens de morte filii eius imagine proposita sacra et sacrificia constituit etc. Sap. 14, 12 ss. Quod apologetae primorum saeculorum saepius efferunt, daemones coli in idolis, daemones suas agere in idololatria partes, Paulus quoque indicat scribens: quae immolant gentes daemoniis immolant, non Deo (1 Cor. 10, 20). Idem enuntiat apud LXX et in Vulg. Ps. 95, 5: quoniam omnes dii gentium daemonia, et Ps. 105, 37: et immolaverunt filios suos et filias suas daemoniis: in hebr. vero priore loco אֱלִילִים (nihil, inania), altero נִשְׁדִּים, uti Dent. 32, 17 immolaverunt daemoniis; similiter 2 Par. 41, 15; Bar. 4, 7.

6. Sensu translato Paulus avaritiam appellat simulacrorum servitutem (Col. 3, 5; Eph. 5, 5 πλεονέκτης, ὅ ἐστιν εἰδωλολατρεία), quatenus avarus aurum et pecuniam quasi deum colit serviens scil. mammonae ita, ut Deo debite nequeat servire (cf. Matth. 6, 24), uti pari ratione de aliis dicit: quorum deus venter est (Phil. 3, 19). Eodem modo iam 4 Reg. 15, 23 הַפֶּצֶר obtundere animum, esse obtusum, contumacem, nolle obedire (Vulg. nolle acquiescere) appellatur seculus idololatriae, hebr. אֵלֶּן וְתַרְפִּים. At vero quodam sensu accumbere epulis sacrificialibus gentilium vocatur idolorum cultura 1 Cor. 10, 14 εἰδωλολατρεία.

IDOLOTHYTUM, εἰδωλόθυτον i. e. id quod est idolis immolatum. Eo nomine designantur carnes ex sacrificiis gentilium relictæ, quæ vel in epulis sacrificialibus comedebantur vel in macello vendebantur. Decreto apostolorum fratres ex gentibus qui erant Antiochiæ, Syriæ, Ciliciæ, inbebantur abstinere ab immolatis simulacrorum (Act. 15, 29 εἰδωλοθύτων; Act. 21, 25). De iis Paulus Corinthiis scribit eos utique peccare qui ea comedant cum conscientia usque nunc idoli; prohibet ne quis epulis sa-

crificalibus accumbat; mandat ut quae in macello vaeneunt manducant nihil interrogantes propter conscientiam; si quis vero mensae accumbens alterum monet offerri immolatum idolis, « nolite manducare propter illum qui indicavit et propter conscientiam alterius » (cf. 1 Cor. 8,1. 7; 10,25-29). Reprehenditur ecclesia Thyatirae constituta, quod ibi sint qui idolothyta manducare non ve-reantur Apoc. 2,20.

IDOX (Ἰδωξ), unus ex maioribus Iudith (Iudith 8,6).

IDUMAEA v. **EDOM**.

IEABARIM v. **IEABARIM**.

IEBAAR, IEBAHAR (יֵבְאָר, Ἰεβάρ, Ἰεβάρ, Βάρ) unus ex filiis David, qui nati sunt ei in Ierusalem (2 Reg. 3,15; 1 Par. 3,6; 14,5).

IEBANIAS (יֵבְנִיָּא, Ἰεβνιά, Βενιζιά, Α Ἰεβωνιά), Beniaminita (1 Par. 9,8).

IEBLAAM (יֵבְלָאָם, Ἰεβλαάμ), urbs tribus Manasse cisiordanicae in territorio tribus Issachar sita, ex qua Manasse Chananaeos non delevit (Ios. 17,11; Iud. 1,27). Iuxta Ieblaam erat ascensus Gaver, ubi Ochozias rex Iuda a militibus Iehu vulnus lethale accepit, ex quo in fuga Mageddo usque continuata mortuus est (4 Reg. 9,27). Nomen Ieblaam conservatum esse putatur in *Bir Bel'ame* ad meridiem *Djenin* (Keil ad Ios. 17,11; Riess, *Legendre, Zaneccchia, Buhl, Döller*). In inscriptionibus aegyptiacis transcribitur *Ibra'amu* (W. M. Müller) vel *Yablu'amu* (Maspero). — Haud dubie Ieb-laam eadem est ac urbs levitica Balaam 1 Par. 6,70; eius loco Ios. 21,25 Gethremmon legitur; sed hic lapsus librorum facile explicatur aberratione oculi in Gethremmon versus praecedentis Ios. 21, 24. Probabiliter Ieb-laam eadem quoque est ac Belamon (in textu graeco Iudith 8,3) prope Dothain (Dothan) in montibus Ephraim et Belma Iudith 7,3 (v. BELMA et BAAL HAMON).

Cf. Riess, *Bibel-Atlas ed.* 3 p. 17; *Legendre*, *Carte de la Palestine*; *D. Zaneccchia*, *La Palestine d'aujourd'hui* 1899 II. 582; *Buhl*, *Alt. Pal.* 1896 p. 201. 202; *V. Guérin*,

Samarie I. 339-341, qui Belamon et Belma cum *Bel'ame* componit, non Ieb-laam; *J. Döller*, *Geogr. u. ethnogr. Studien zum III. u. IV. B. d. Könige* 1904 p. 255-6; *W. Max Müller*, *Asien und Europa nach altaegypt.* Denkmälern 1898 p. 195; *G. Maspero*, *Sur les noms géogr. de la liste de Thout-mos III.*, qu'on peut rapporter à la Galilée 1886 p. 9.

IEBNAEL (יֵבְנָאֵל, Ἰεβναήλ, Α Ἰεβνῆλ), urbs Nephthali (Ios. 19,33), enumerata post Adami Neceb et ante Lecum; inde egressus termini Nephthali usque ad Iordanem pertransire dicuntur. Agnoscitur in ruinis *Yemmā* inter montem Thabor et lacum Genesareth inferiorem (*Legendre, G. A. Smith, Riess, Zaneccchia*). Idem vicus in Talm. hieros. (Megilla 70 a) vocatur *Kefr Yama* (cf. *Neubauer, Schwarz*). Eundem situm approbat *F. de Himmelaue*r, qui urbes Ios. 19,33 adscribit pago commutatorio Nephthalitis ad austrum lacus Genesareth concessio. Derelinquenda videtur opinio aliorum (*Furrer, Wilson, Buhl*) Iabneel Ios. 19,33 esse urbem in Galilaea superiore prope lacum *Hule* sitam, quae apud Flavium Iosephum vocatur Ἰάμνις (Vita 37) seu Ἰαμνιῖθ (Bell. iud. II. 10,6; cf. 6,3 Ἰάμνις).

Cf. *Legendre* apud *Vigouroux*, *Dict. de la Bible* III. 1208; *G. A. Smith*, *Hist. Geogr. of the Holy Land*, Plate 1 et VI; *Riess*, *Bibel-Atlas ed.* 3 p. 17; *D. Zaneccchia*, *La Palestine d'aujourd'hui* 1899 II. 635; *A. Neubauer*, *Géogr. du Talmud* p. 225; *I. Schwarz*, *Das heilige Land* 1852 p. 144; *F. de Himmelaue*r, *Comm. in Ios.* p. 435-438; *Furrer* apud *Riehm*, *Handwb. des bibl. Altert.* I. p. 665; *Wilson* apud *Smith-Fuller*, *Dict. of the Bible* I. 1497; *Buhl*, *Alt. Pal.* 1896 p. 218.

IEBNEEL (יֵבְנֵאֵל, Ἀεβνῆλ), urbs in termino aquilonari tribus Iuda (Ios. 15,11) v. IAMNIA.

IEBOC v. **IABOC**.

IEBSEM (יֵבְסֵם, Ἰεβσεμ), quintus inter filios Thola filii Issachar, qui erant principes per domos cognationum suarum (1 Par. 7,2).

IEBUS (יְבוּס, Ἰεβούς) v. **IERUSALEM** I. 2.

IEBUSAEUS (יְבוּסִי, יְבוּסִי plerumque cum articulo הַיְבוּסִי; ὁ Ἰεθουσαῖος, οἱ Ἰεθουσαῖοι, Ios. 18,16 Ἰεθουσαῖ, Iud. 19, 11 et Esdr. 9,1 ὁ Ἰεθουσαῖ), nomen gentilicium quo ramus familiae Chanaan ab uno ex filiis Chanaan nominatus designatur (Gen. 10,16; 1 Par. 1,14). Semini Abraham promittuntur fines etiam Iebusaeorum sicut aliorum Chanaanitarum (Gen. 15,21; Neh. 9,8) eademque promissio frequenter repetitur (Ex. 3,8. 17; 13,5; 23,23; 33,2; 34,14; Dent. 7,1; 20, 17; Ios. 3,20). Ex relatione duodecim exploratorum terrae promissae habitabant Iethaeus et Iebusaeus et Amor-rhaeus in montanis (Num. 13,20). Iebusaeorum praecipua sedes erat arx Iebus, postea civitas David in Ierusalem, tribui Benjamin attributa, in confiniibus Iuda et Benjamin (Ios. 18,16. 28). Adonisedec, regem Ierusalem, Iosue cepit et occidit (Ios. 10,1. 27), altera expeditione filii Iuda urbem Ierusalem percusserunt (Iud. 1,8), multis pugnis Iosue Iebusaeos sicut alios Chananaeos subegit (Ios. 9,1; 11,3; 12,8; 24,11; Iudith 3,20). Attamen arcem Iebusaeorum filii Benjamin non occuparunt (Iud. 1,21), quia Iebusaeis inferiores erant robore, neque filii Iuda delere poterant (Ios. 15,63), quia extra fines tribus Iuda sita erat. Aetate indicum Iebus in potestate Iebusaeorum permanebat (Iudith 19,10-14) et Iebusaeorum quoque sceleribus Israelitae contaminati sunt (3,5). Tandem David arce Iebusaeorum expugnata ibidem sedem regni sui fixit (2 Reg. 5,6-8; 1 Par. 11,4-6) neque tamen Iebusaeos exstirpavit (2 Reg. 24,16. 18; 1 Par. 21,15. 18. 28; 2 Par. 3,1 et v. AREUNA). Reliquias Iebusaeorum Salomon tributarios fecit (3 Reg. 9,20; 2 Par. 8,7). Iidem etiam post exsilium recensentur inter alienigenas, quibusum Israelitae matrimonia mixta contra legem inierant (Esdr. 9,1). Divinam circa Iebusaeos providentiam celebrat Zacharias propheta (9,7); etenim Iebus a Davide expugnata facta est caput regni et theocratiae atque ipsi Iebusaei inter populum electum commorantes beneficiorum foederis participes effecti sunt.

IECEMIA (יְקֵמְיָה, Ἰεκηνιά), filius Iechoniae filii Ioakim (1 Par. 3,18).

IECHELIA (יְכֵלְיָהוּ, Ἰεχελιά, Χαλειά, Αχαϊά), uxor Amasiae regis Iuda et mater Azariae seu Oziae regis, hierosolymitana (4 Reg. 15,2; 2 Par. 26,3).

IECHONIAS, IECONIAS v. IOACHIN.

IECMAAM, IECMAAN. 1. Iecmaam, Iecmaan (יְקֵמָאם; 3 Reg. 4,12 Λουζάμ, 1 Par. 6,68 ἡ Ἰεκμαάν), urbs tribus Ephraim, levitis de genere Caath concessa 1 Par. 6,68[33]. Eius loco legitur 21,22 Gilsaim (גִּלְסַיִם, Α Γκιλσαιμ), quae probabilius eadem est cum Iecmaam. Situs quaerendus videtur Iordanem versus in orientali parte Ephraim, ut ex obscura indicatione 3 Reg. 4,12 aliqui inferunt.

2. Iecmaam, Iecmaan (יְקֵמָאם; Ἰεκμαίμας Ἰεκμοάμ), levita, filius Hebron filii Caath (1 Par. 23,19; 24,23); de textu mendoso 24,23 vide s. v. HEBRON 1.

IECNAM (יְקֵנָם, ἡ Μανάν), urbs tribus Zabulon, levitis de stirpe Merari concessa (Ios. 21,34); omittitur in catalogo 1 Par. 6,77[62]. Eadem sine dubio est Ios. 12,22 Iachanan Carmeli (יְקֵנָם לְבִרְכָּי, Ἰεκδμ τοῦ Χερμελ) urbs reguli chananaci et Ios. 19,11 Ieconam (יְקֵנָם, Ἰεκμάν) prope torrentem ad quem terminus Zabulon pervenit. His locis biblicis satisfacit *Tell Qaimūn* ab oriente Carmeli inter Cisonem et *Wādī el-Milh*; torrens ille in termino Zabulon erit aut Cison aut fortasse *Wādī el-Milh* ab occidente urbis Iecnā (quod *Dillmann* ad h. l. praeferit, ne Iecnā ex finibus Zabulon excludatur). *Tell Qaimūn* autem est vicus Καμμωνά Eusebii seu Cimona S. Hieronymi 6 mil. pass. a Legionē (*Ledjdjān*) septentrionem versus pergentibus Ptolemaida in campo magno (Esdrelon) situs (Onom. ed. Lag. 272, 66; 110,20). Praeterea v. CHELMON.

Cf. *Van de Velde*, Memoir 1858 p. 326; *Robinson*, Neuere bibl. Forsch. p. 149; *G. A. Smith*, Hist. Geogr. of the Holy Land, Plate I. VI; *Guerin*, Samarie II. 241-244 (cum dubitatione); *D. Zancchia*, La Palestine d'au-

jourd'hui 1899 II. 679; *Sepp*, Jerusalem und das hl. Land ed. 2 II. 551; *Buhl*, Alt. Pal. 1896 p. 210 et cf. 102. 103; *Legendre* apud *Vigouroux*, Dict. de la Bible III. 1213-1214 (cum dubitatione). De textu difficili Ios. 19, 11 v. *F. de Hummelauer*, Comm. in Ios. p. 414. 415.

IECONAM v. IECNAM.

IECSAN (יֶעֶזָאן; יֶעֶזָאן, יֶעֶזָאן), filius Abrahæ ex Cetura genitus, pater Saba et Dadan (Gen. 25, 2. 3; 1 Par. 1, 32). Genealogi arabici connectunt Iecsan cum tribu *Yāqish* in *Yemen* (Zeitschr. d. D. Morgenl. Ges. X. 1856 p. 31).

IECTAN (יֶקְטָן; יֶקְטָן), filius Heber et pater tredecim filiorum seu tribuum (Gen. 10, 25. 26. 29; 1 Par. 1, 19. 20. 23). Eius nomen apud Arabes traditur *Qachtan* isque habetur pro parente Arabum proprie dictorum, qui tum ab indigenis prioribus (*Ad*, *Thamud*, *Hjadis* etc.) tum ab Ismaelitis supervenientibus distinguuntur; hoc nomen idem esse putatur quod Katanitarum apud Ptol. VI. 7, 20. 23 et pagi cuiusdam *Qachtan* prope *Nedjran* in aquilonari parte regionis *Yemen* (*Knobel*, Völkertafel p. 184. 185). Ex nominibus istorum tredecim filiorum aliqua haud explicari possunt; ex reliquis tamen clare perspicitur tribus has Iectanidarum Arabiam meridionalem incoluisse et reapse fines obtinuisse, qui Gen. 10, 30 describuntur: Et facta est habitatio eorum de Mesa pergentibus usque Sephar (סְפָרָה) montem orientalem.

F. de Hummelauer, ad h. l. fines Iectanidarum his verbis determinat: «Messa est eadem quæ v. 23 Mes audiebat, Mesene ad ora Euphratis et Tigris; ibi Iectanidae Aramaeos contingebant. Inde protendebantur usque Sephar. Suggestunt urbem regiam Homeritarum et Sabæorum Σάπυρα (Ptol. VI. 7, 25. 41; Plin. VI. 26 [VI. 23, 104]); erat et alia urbs Saphar haud procul litore, ad orientem pagi Hadramaut. Verum adverte nihil in textu urbem demonstrare neque Messa urbs erat sed pagus; agitur de monte. Iamvero est etiamnum mons Zabura in ipso pago Hadramaut. Quem si h. l. intellegi defendas, sequetur v. 26-30 scriptos primum esse, quo tempore

Iectanidae de Babylonia descendentes in medio pago, qui nunc Hadramaut audit, substitissent necdum in extremum Arabiae occidentalem angulum penetrassent, quem tum profecto Cushitæ v. 7 dicendi sunt obtinuisse. Potuit tamen et alius esse mons Saphar. Cf. *Knobel*. Quamdiu vero, quis mons intellegatur, non accurate scimus, neque ubi singulae tum tribus incoluerint accurate definire possumus, licet pagos, quibus nunc tandem earum nomina adhaerent, demonstrare valeamus. Porro vocatur ille mons *mons orientis* סְדֵר, quo nomine universim designari consuevit regio, quam obtinent nomades aramaei et arabes». — De singulis tribubus Iectanidarum: Elmodad, Saleph, Asarmoth, Iare, Adoram, Uzal, Decla, Ebal, Abimael, Saba, Ophir, Hevila, Iobab, vide s. vv.

IECTEHEL (יֶקְתָּהֵל; י. e. a Deo subactum vel forte bravium Dei vel protectio Dei; יֶקְתָּהֵל) est nomen, quod Amasias rex Iuda imposuit urbi Edomitum Petra seu Sela vi armorum captæ (4 Reg. 14, 7), ut dominationem suam symbolice significaret. Loco parallelo 2 Par. 25, 12 insuper discimus decem millia Idumaeorum præcipitatos fuisse de summo aliquius petrae praeruptæ, quæ in vicinia urbis Petra quaerenda esse putatur. Plura de isto bello edomitico vide s. v. AMASIAS 1 et de urbe s. v. PETRA.

IECTHEL (יֶקְתָּהֵל; יֶקְתָּהֵל, apud *Swete* B. יֶקְתָּהֵל, A. יֶקְתָּהֵל), urbs tribus Iuda in secunda provincia Sephelæ (Ios. 15, 38). Situs ignoratur.

IEDAIA v. IDAIA 1 et 4.

IEDALA (יֶדְאָלָה; in aliquibus mss. יֶדְאָלָה; יֶדְאָלָה, A. יֶדְאָלָה, Peshitta: Arala, Vulg. etiam Ierala), urbs Zabulon (Ios. 19, 15). Apud Talmudicos vocatur *Hiriye* (cf. *Neubauer*). Situs ab aliis aliter determinatur: vel *Khirbet Kire* ad meridiem collis *Tell Qaimūn* seu Iecnam (*Schwarz*, *Neubauer*) vel multo probabilius *Djeida* circa 5 km a *Beit Lahm* seu Bethlehem zabulonitica meridiem versus (*Van de Velde*, *Guérin*, *Zanechia* qui scribit *Djelda*), vel ruina *el-Huwara*

inter *Beit Lahm* et *Djeida* (*Survey of West. Pal.*, G. A. Smith, Buhl).

Cf. *Kennikott*, *Vel. Test.* I. p. 470; *I. B. de Rossi*, *Var. Lect. Vel. Test.* II. p. 94; *Ver-cellone*, *Var. Lect. Vulg. lat.* II. p. 59; *Neubauer*, *Géogr. du Talmud* p. 189; *I. Schwarz*, *Das heilige Land 1852* p. 137; *Van de Velde*, *Memoir 1858* p. 322; *Guérin*, *Galilée* I. 392; *D. Zancchia*, *La Palestine d'aujourd'hui 1899* II. 677; *Survey of West. Pal. Mem.* I. 288; *G. A. Smith*, *Hist. Geogr. of the Holy Land*, *Plate* I. VI; *Buhl*, *Alt. Pal.* 1896 p. 215.

IEDDEL v. **GEDDEL** 2.

IEDDO (יֵדְדוֹ, 'Iēḏḏō) Gadita filius Buz (1 Par. 3,44).

IEDDOA (יֵדְדוֹא, 'Iēḏḏōa, 'Iōḏḏōa), filius Ionathan seu Iohanan pontificis eiusque in pontificatu successor (*Neh.* 12,11. 22), ad quem usque series pontificum Veteris Test. apud *Neh.* 12,10. 41 perducitur incipiendo a Ioseph aequali Zorobabelis. Erat Ieddoa aequalis Alexandri Magni, cui Ierusalem ingressuro obviam ivisse fertur (v. **ALEXANDER** 1); mortuus est eodem fere tempore quo Alexander; eius filius erat Onias I. pontifex, eius frater autem ille sacerdos Manasses, qui ob connubium cum filia Sanaballetis satrapae ab Hierosolymitanis fugatus ad Samaritanos transiit et templum in monte Garizim iuvante Sanaballeta extruxit (*Flav. Ios. Ant.* XI. 7,2; 8,2. 5. 7). — Difficultas movetur, quomodo Nehemias auctor libri sacri pontificem tempore Alexandri M. florentem novisse potuerit. Iam respondit *Corn. a Lapide* (in h. l.) aut vv. 41 et 22 non esse scriptos a Nehemia, sed post eius mortem libro insertos a synagoga vel ab aliquo hagiographo ad ostendendam continuam pontificum successionem usque ad Alexandrum M., a cuius gestis incipiant libri Machabaeorum aut Nehemiam vidisse Ieddoa puerum, sed non pontificem. Utrumque responsum probabilitate non caret; prius tamen a plerisque modernis catholicis interpretibus merito praefertur; cf. *Cornely*, *Introd.* II. num. 421.

IEDDU (יֵדְדִי, *Qeri* יֵדְדִי, 'Iēḏḏi), unus de filiis Nebo, qui uxores alienigenas

dimittere ab Esdra iussi sunt (*Esd.* 10, 43).

IEDDUA (יֵדְדוּא, 'Iēḏḏōa, A 'Iēḏḏōa), unus ex principibus populi, qui simul cum Nehemia foedus renovatum signarunt (*Neh.* 10,21[22]). Idem nomen hebr. gerit IEDDOA.

IEDEBOS (יֵדְבֹשׁ, 'Iēḏḏōs), unus de stirpe Etam in genealogia Iuda (1 Par. 4,3); v. **ETAM** 3.

IEDEI v. **IDAIA** 1.

IEDIEL (יֵדְיָאֵל, 'Iēḏiā), vir fortissimus et potens ex principibus cognationum Manasse trans Iordanem (1 Par. 3,24).

IEDIHEL (יֵדְיָהֵל, 'Iēḏiāhel). 1. Filius Samiri in catalogo heroum davidicorum 1 Par. 11,45 (*LXX* 'Iēḏiā), fortasse idem est ac 2. Iedihel (*LXX* 'Pōḏiā), unus ex principibus millium in Manasse, qui ante pugnam ad montem Gelboe Davidi se iunxerunt, cum ab Aphee in Siceleg rediret (1 Par. 12,20). — Alios viros eiusdem nominis hebr. vide s. v. **IADIEL**, **IADIEL**.

IEDLAPH (יֵדְלָפִי, 'Iēḏlāphi), filius septimus Nachor ex Melcha (*Gen.* 22,22).

IEGAAL (יֵגָאָל, 'Iēgā), filius Semeia ex regia domo Iuda (1 Par. 3,22). Idem nomen hebr. gerunt **IGAL** et **IGAAL**.

IEGBAA (יֵגְבָאָא, 'Iēgēa), *Iud.* 8,11: 'Iēgēa), urbs transiordanica a filiis Gad reaedificata (*Num.* 32,35; *LXX* καὶ ὕψωσαν αὐτὰς); eiusdem urbis mentio fit in actis Gedeonis contra Zebec et Salmāna Madianitarum reges (*Iud.* 8,11). His satisfaciit *Khirbet Djubehut* 12 km a Rabbath Ammon inter septentrionem et occidentem (*Riess*); nomen *Djubehut* in forma plurali est collectivum pro tribus ruinis urbi antiquae correspondentibus.

Cf. *Riess*, *Bibel-Atlas ed.* 3 p. 17; *Survey of East. Pal. Mem.* I. 111; *Oliphant*, *The land of Gilead 1880* p. 232; *G. A. Smith*, *Hist. Geogr. of the Holy Land* p. 585 et *Plate* I; *D. Zancchia*, *La Palestine d'aujourd'hui 1899* II. 87.

IEGEDELIAS (יֶגְדִּיָּאֵל, Ἰεγεδελιάς, pater Hanan prophetae tempore Ieremiae (Jer. 33,4); v. HANAN 10.

IEHEDEIA (יְהֵדֵיָא, Ἰεδεΐα), levita de filiis Subael tempore Davidis, Gersonita (1 Par. 24,20). Idem nomen hebr. gerit IADIAS.

IEHEZIEL (יְהֵזִיָּאֵל, Ἰεζεζήλ, Ἰεζεχλ), Benjaminita, qui Davidi in Siceleg se adiunxit (1 Par. 12,4). Idem nomen hebr. gerunt IAZIEL et IAHAZIEL et EZECHIEL (Esdr. 8,5).

IEHIAS (יְהִיָּאֵל, Ἰεΐα), ianitor arcae in Ierusalem una cum Obedom (1 Par. 15,24).

IEHIEL (יְהִיָּאֵל; Ἰωήλ, Ἰεήλ, Ἰεεήλ, Ἰελεήλ, Ἰεχλ). 1. Princeps in tribu Ruben de filiis loel (1 Par. 5,7).

2. Possessor Gabaon et princeps in tribu Benjamin (1 Par. 9,35; *Kethib* יְהִיָּאֵל); v. ABIEL 1 et ABIGABAON.

3. Filius Hotham Arorites (1 Par. 11,44; *Kethib* יְהִיָּאֵל i. e. de Aroer tribus Iuda, ut videtur.

4. Levita, ianitor et cantor tempore Davidis (1 Par. 15,18. 21; 16,5).

5. Levita ex genere Asaph inter maiores Iahaziel tempore Iosaphat prophetantis (2 Par. 20,14).

6. Scriba qui cum Maasia doctore numerabat exercitum Oziae regis Iuda (2 Par. 26,11; *Kethib* יְהִיָּאֵל).

7. Levita tempore Ezechiae regis (2 Par. 29,13; *Kethib* יְהִיָּאֵל; Vulgata Iahiel).

8. Unus ex principibus levitarum tempore Iosiae regis (2 Par. 35,9).

9. Unus de principibus familiarum, qui cum Esdra Babylone redierunt; erat de filiis Adoniram (Esdr. 8,13; *Kethib* יְהִיָּאֵל).

10. Unus de filiis Nebo, qui Esdra iubente uxores alienigenas dimiserunt (Esdr. 10,43).

11. Idem nomen duorum vel trium virorum legitur Esdr. 10,2. 21. 26 in Vulgata, sed hebr. יְהִיָּאֵל.

IEHIELI v. IAHIEL 2.

IEHOVA v. DEUS.

IEHU (יְהוּ, Ἰεὺ Ἰηού).

1. Decimus rex Israel, conditor dynastiae quintae eiusdem regni, filius Iosaphat filii Namsi (4 Reg. 9,2. 14). Eius gesta narrata erant in deperdito libro verborum dierum regum Israel (4 Reg. 10,34). Iam regnante Achab inter comites regios eminebat (4 Reg. 9,25; cf. 9,20) et in sermone Domini, qui Eliae in monte Horeb factus est, rex Israel futurus praenuntiatur (3 Reg. 19,16. 17). Ioram, filius Achab et rex Israel post Ochoziam fratrem suum, cum in bello contra Syros apud Ramoth Galaad vulneratus esset, constituit Iehu ducem exercitus sui, dum ipse in Iezrahel revertit, ut curaretur. Tum Eliseus vaticinii Eliae memor per unum de filiis prophetarum Iehu in castris commorantem regem unxit eique mandavit, ut domum Achab deleteret. Mandato obtemperans Iehu Ioram regem Israel una cum Ochozia rege Iuda in Iezrahel interfecit, corpus Iezabel in agro Iezrahel canibus proiecit et universam domum Achab delevit. Insuper omnes sacerdotes Baal insidiosae ad holocausta facienda convocatos occidi et statum Baal comburi iussit, aedem Baal destruxit eiusque situm latrinis et cloacis destinavit. Samariam urbem regiam elegit et 28 annos regnavit. Verumtamen a peccatis Ieroboam non recessit et vitulos aureos in Bethel et Dan non dereliquit. Laudatur quidem a Domino ob fidelitatem, qua divina consilia contra domum Achab exsecutus est et filiis eius usque ad quartam generationem thronus Israel promittitur. Sed in poenam idololatriae Dominus Israelitis Hazaeli regi Syriae tradidit percutiendos, qui regno Israel totam regionem Galaad usque ad Arnonem eripuit. Cf. 4 Reg. 9,1 ss.; 10,1 ss.; 12,1; 13,1; 14,8; 15,12; 2 Par. 22,7. 8; 23,47.

In inscriptionibus cuneiformibus Iehu bis commemoratur nomine Iaua filius Amri, tributum auri et argenti solvens Salmanassar II. regi Assyriae (cf. *Schrader, Vigourour*).

Ut ex narratione S. Scripturae colligitur, erat Iehu electus a Domino, inopinato ac subito ad regiam dignitatem evectus, magno impetu incedens (4 Reg. 9,20), in agendo praeceps, tacens, dis-

simulans, importunus. Ex eius regno 28 annorum nihil mentione dignum effertur, praeterquam quod domum Achab et cultum Baal exterminaverit, idololatram autem non aboleverit. Quod Osce 1,4 legitur : « visitabo sanguinera Iezrahel super domum Iehu », non est interpretandum de strage illa in domum Achab edita, sed de caedibus, iustorum oppressionibus, iniustitiis, quas cum idololatria plerumque sociari libri sacri passim probant.

Cf. *Knabenbauer* ad Os. 1,4; *Schrader-Whitehouse*, *Cuneif. Inscript. and Old Test.* 1 p. 199 s.; *Vigouroux*, *La Bible et les découvert. mod. ed.* 6 III. 481-485.

2. Filius Hanani, propheta, qui contra Baasa regem Israel prophetavit (3 Reg. 16,1. 7) et triginta fere annis postea Iosaphat regem Iuda reprehendit propter foedus cum Achab initum (2 Par. 19,2. 3). Idem regi Iosaphat superstes eius regni historiam conscripsit (2 Par. 20, 34). Eum non a Baasa occisum esse, ut Vulgata 3 Reg. 16,7 habet, diximus s. v. BAASA.

3. Unus ex posteris Hesron de stirpe Iuda; enumeratur sextus inter illos tredecim, qui ab Oholai filia Sesan descendunt, quae teraa Aegyptio, servo Sesan, nupserrat (1 Par. 2,38).

4. Unus ex tredecim principibus cognationum Simeon, qui in diebus Ezechiae regis Iuda pascua terrae Gador occuparunt (1 Par. 4,33); erat filius Iosabiae filii Saraiae filii Asiel.

5. Beniaminita de Anathoth urbe orinudus, qui David in Siceleg fugitivo se adiunxit (1 Par. 12,3; Ιηούλ).

IEHUEL (יְהוֹאֵל, Ἰεουέλ), princeps filiorum Zara ex posteris Iuda post captivitatem (1 Par. 9,6).

IEHUS (יְהוֹשָׁף, Ἰεούφ, Ἰαούφ, Ἰάς).

1. Filius Esau ex Oolibama genitus in terra Chanaan (Gen. 36,3. 14. 48; 1 Par. 1,35; *Kethib* saepius יְהוֹשָׁף).

2. Filius Balan ex tribu Benjamin, bellator fortissimus et numerosae cognationis princeps (1 Par. 7,10).

3. Filius Esce ex posteris Saul (1 Par. 8,39).

4. Filius Roboam regis Iuda ex Abihail (2 Par. 41,19 et vide ABIHAIL. 4).

5. Iehus (יְהוֹשָׁף, Ἰεούφ), Beniaminita filius Saharaim de Hodas uxore genitus in terra Moab (1 Par. 8,10).

Idem nomen hebr. gerit laus (vides. v.).

IEIUNIUM. In lege mosaica unus ieiunii dies per annum erat praescriptus : decimo die mensis septimi, dies expiationum erit celeberrimus et vocabitur sanctus; *affligetisque animas vestras* in eo (affligere animam hebr. i. e. ieiunare; Lev. 23,27; cf. 16,29; Num. 29,7). Eius diei et ieiunii quoque mentio habetur Act. 27,9 : iam non erat tuta navigatio, eo quod et ieiunium iam praeterisset. Ad illud ieiunium (a vespere usque ad vesperam, uti consuetudinis erat) etiam advenae qui peregrinabantur i. e. habitabant in terra obligabantur (Lev. 16,29). Praeterea in lege dictum est posse fieri votum quo quis se ad ieiunium adstringat; uxor tamen id solum vovere potest marito consentiente (cf. Num. 30,14-16). Insuper ieiunium saepe celebrabatur et propter calamitates publicas et propter luctum et infortunia privata. Ita iam Iud. 20,26 legimus : (clade accepta) filii Israel venerunt in domum Dei et sedentes flebant coram Domino ieiunaveruntque die illo usque ad vesperam. Et Saul adiunxit populum : maledictus vir qui comederit panem ad vesperam, donec ulciscar de inimicis meis (1 Reg. 14,24); Iosaphat quoque, cum Moabitae et Ammonitae et Syri contra eum bellum moverent, « totum se contulit ad rogandum Dominum et praedicavit ieiunium universo Iuda » (2 Par. 20,3); in anno quinto Ioachim mense nono praedicaverunt ieiunium (Jer. 36,9). Esdras praedicavit ieiunium, ut iter tutum in patriam consequerentur (Esdr. 8,21); in bellis quoque machabaicis ieiunabatur ad opem divinam implorandam (cf. 1 Mach. 3,47; 2 Mach. 13,12). Praeter publica populi ieiunia reperimus ieiunia singulis urbibus imposita; habitatores Iabes Galaad propter mortem Saul ieiunaverunt septem diebus (1 Reg. 31,13); propter blasphemiam in Deum et regem, cuius Naboth falso accusabatur, seniores praedicaverunt ieiunium (3 Reg. 21,12).

ieiunabant ad communem calamitatem avertendam Iudith, Esther.

Frequenter mentio fit ieiunii ob luctum privatum vel ad opem divinam implorandam, ut calamitas avertatur; nam « bona est oratio cum ieiunio » (Tob. 12,8); ita David ieiunavit ieiunio ad vitam parvuli a Deo obtinendam (2 Reg. 12,16); Achab auditis comminationibus ieiunavit et dormivit in sacco (3 Reg. 21,27); ieiunatur in luctu; cf. 1 Reg. 4,7; 20,34; 2 Reg. 4,12; Ps. 34,13; 108,24; Bar. 4,3; Dan. 9,3; Ioc. 1,14; Ion. 3,3. Post exilium statuta erant ieiunia ad quosdam dies nefastos et calamitosos recolendos, mense quarto die 9. ad recolendam urbis expugnationem (Ier. 32,6), mense quinto die 10. ob urbis templique destructionem (Ier. 32,12); mense septimo ob occisionem Godoliae (Ier. 41,2); mense decimo die 10., quo obsidio Ierusalem coepta est (Ier. 32,4); de hisce diebus sermo est Zach. 7,3. 5 et 8,19. — Qua autem mente ieiunandum sit, ut ieiunium sit Deo acceptum, docetur apud Isaiam 58,3 ss.; qui ieiunant animis in malo obfirmatis neque a peccato recedere volunt, de iis valet illud: cum ieiunaveritis, non exaudiam (Ier. 14,12).

Pharisaeos ieiunasse eorumque discipulos, uti etiam discipulos Baptistae, discimus ex evangelis (Matth. 9,14; Marc. 2,18; Luc. 5,33; 18,12 : ieiuno bis in hebdomada, dicit pharisaeus); verum quale fuerit pharisaicum ieiunium, scil. ad laudem pietatis captandam, docet Christus : exterminant facies suas, ut appareant hominibus ieiunantes (Matth. 6,16). Uti Moyses per 40 dies ieiunavit (Ex. 34,28; Deut. 9,9), ita Christus quoque (Matth. 4,2). Suos quidem discipulos, dum apud ipsum erant, non coegit ieiunare; at simul praedixit (et consequenter id voluit) : venient autem dies, cum auferetur ab eis sponsus et tunc ieiunabunt (Matth. 9,13). Proin rationem ieiunii suorum unam hanc assignat luctum et tristitiam de absentia Sponsi, desiderium ad eum perveniendi. Et quomodo suos velit ieiunare, indicat dicens : tu autem cum ieiunas, unge caput tuum et faciem lava, ne videaris hominibus ieiunans, sed Patri tuo qui videt in

abscondito et Pater tuus reddet tibi (Matth. 6,17. 18). Immo Christus loquitur de genere daemoniorum, quod « non efficitur nisi per orationem et ieiunium » (Matth. 17,20). Unde satis constat Iesum voluisse ut ieiunium et magni aestiment et revera hoc quoque abnegationis genus exerceant. Quare videmus ab incunabilis rei christianae ieiunium esse adhibitum; ita legitur Act. 13,2. 3 : ministrantibus autem illis Domino et ieiunantibus dixit illis Spiritus sanctus : segregate mihi Saulum et Barnabam in opus ad quod assumpsi eos; tunc ieiunantes et orantes imponentesque eis manus dimiserunt illos. Eodem modo Act. 14,22 constituuntur presbyteri cum oratione et ieiunationibus. Et Paulus apostolus commendat ieiunium : exhibeamus nosmetipsos ut Dei ministros in multa patientia... in ieiuniis (2 Cor. 6,5) et quod commendavit, ipse opere adimplevit; nam « in ieiuniis multis » munus suum apostolicum exercuit (2 Cor. 11,27).

I. KNABENBAUER.

IEMAI (יֵמַאי, Εἰμαί), quartus inter filios Thola filii Issachar, qui erant principes per domos cognationum suarum (1 Par. 7,2).

IEMINEUS, IEMINI v. BENIAMINITA.

IEMINI terra (1 Reg. 9,4) est territorium tribus Benjamin vel aliqua eius pars.

IEMLA (יֵמְלָה, יֵמְלָה; Ἰεμλάς, Ἰεμλάς, Ἰεμαζός, Ἰεμαζός), pater Michaeae prophetae cuiusdam in diebus Achab et Iosaphat (3 Reg. 22,8. 9; 2 Par. 18,7. 8).

IEMLECH (יֵמְלֵךְ, Ἰεμλεχ), unus ex tredecim principibus cognationum Simeon, qui tempore Ezechiae regis pascua terrae Gador occuparunt (1 Par. 4,34).

IEMNA (יֵמְנָה, Ἰεμνάς, Ἰαμνῶ). 1. Filius primogenitus Aser, progenitor Iemnaitarum (Gen. 46,17 Vulgata Iamne; Num. 26,44; 1 Par. 7,30).

2. Pater Core levitae et ianitoris tempore Ezechiae regis (2 Par. 31,14).

3. Filius Helem de stirpe Aser, unus ex principibus cognationum (1 Par. 7, 33; sed hebr. יִפְתָּח, LXX Ἰφθαχ).

IEMNAA (Ἰεμνᾶζ ludith 2, 28 graeco) v. IAMNA.

IEPHDAIA יֶפְתָּח, Ἰεφερταῖ), filius Seseec, unus ex principibus cognationum Benjamin, qui Hierosolymis habitabant (1 Par. 8, 25).

IEPHLAT (יֶפְתָּח, Ἰεφλάτ), filius Heber ex posteris Aser (1 Par. 7, 32, 33).

IEPHLETI (יֶפְתָּח i. e. Iaphletita; Ἀπταλίμ, Α τοῦ Ἰεφλάτ). Terminus Iephteti seu rectius Iephletita erat in confinibus Ephraim et Benjamin prope Bethoron inferiorem (Ios. 16, 3). Quisnam ille Iephletita fuerit, dici nequit. Duo commemorantur viri, quorum nomina similitudinem cum patronymico Iephteti prae se ferunt: Iephtat filius Heber ex posteris Aser (1 Par. 7, 32, 33 et Phalti filius Raphu de tribu Benjamin, unus ex duodecim exploratoribus terrae promissae Num. 13, 10[9]). De priore vix cogitari potest, cum Aser longe distet a confinibus Ephraim et Benjamin. Utrum alter nomen suum indiderit stirpi cuidam regionem prope Bethoron incolenti, dubium relinquatur.

IEPHONE (יֶפְתָּח, 1. Pater Caleb exploratoris de stirpe Cenez (v. CALEB 1); LXX Ἰεφοννή).

2. Filius Iether principis cognationis aseriticae (1 Par. 7, 38; LXX Ἰεφινᾶ); cf. IETHER 3.

IEPHTAHEL, IEPHTHAEL vallis (יֶפְתָּח i. e. vallis quam Deus aperit; Ios. 49, 14 Ἐφθαχά, 19, 27 Ἐφθαχά; A Παλ Ἰεφθαχά) in confinibus Zabulon et Aser (Ios. 19, 14, 27). Ad hanc vallem cum aliqua probabilitate refertur Iolapata urbs a Flavio Iosepho munita et a Vespasiano expugnata (Bell. ind. II. 20, 6; III. 6, 1; 7, 3 s.; Vita 37), quae apud rabbinos vocatur Gophatata, Gopapha, Papha 3 mil. pass. a Tzipori distans (Rehdanus, Pal. p. 816 et 923), hodie autem ruina Khirbet Djefat 2½ horas a Sepphori aquilonem versus in colle posita; Iephtahel igitur erit vel

vallis a Djefat in planitiem Zabulon (Asochis, el-Battauf) desinens vel forte Wādi Abellin ad occidentem eiusdem planitiei.

Magis aquilonem versus eandem vallem quaerendam esse censet F. de Hummelmaier (ad Ios. 19, 14, 27) scil. inter Galilaeam inferiorem, quae collibus impletur, et superiorem, quae altior est. Dividit enim Galilaeam inferiorem a superiore continua illa ab oriente ad occidentem vallis, cuius clavis veluti est Rama Galilaeae. Ubi natura ipsa definiuit limitem Galilaeae inferioris et superioris, ibi erat terminus septentrionalis Zabulon; Galilaea superior pertinebat ad Aser et Nephthali.

De Khirbet Djefat cf. Ritter, Erdkunde XVI. 767, 768; Zeitschr. der Deutschen Morgenl. Gesellschaft III. 1849, 51, 52; Robinson, Neuere bibl. Forsch. p. 136 ss.; Guérin, Galilée I. 476 ss.; Survey of West. Pal. Mem. I. 341 s.; Neubauer, Géogr. du Talmud p. 203; Buhl, Alt. Pal. 1896 p. 223.

IEPHTE, IEPHTHE (יֶפְתָּח, Ἰεφθαθᾶ) Galaadites, patre Galaad (v. GALAAD 2), matre meretrice natus, a patris filii legitimo loco natis spretus ideoque e domo paternae profugus, collecta vagorum hominum manu brevi fortitudinis fama inclarus (Iud. 11). Contra Ammonitas Hebraeos opprimentes princeps electus, exercitu e transiordanicis collecto, antequam ad proelium egrediretur, volum vovit Deo se eam personam, quae post partam victoriam reverenti e domo obviam prima esset occursura, holocausto esse immolaturum. Victori prima occurrit filia, unica proles, quam ipse infando sacrificio post tres menses immolavit. Hoc planis verbis textus narrat; ita eundem intellexerunt versiones. Patres, interpretes catholici vix non omnes. Tamen, praeter protestantes nonnullos, catholici etiam interpretes aliqui, miserati innocentis virginis sortem et horrore acti sacrificii humani, sensum obvium deseruerunt: Lyranus, Arias Mont., Vatabl., Mariana, Estius, L. Reinke (Beiträge zur Erklärung des A. T. I. 470 ss., Münster 1851), G. Schoenen (Theol. Quartalschrift, Tübingen II. 1869 p. 534 ss.), F. Kaulen (Commenta-

tio de rebus Iephthae, Bonnae 1893). « Holocaustum » hi auctores latiore aliquo sensu accipiunt, virginem aut sanctuarii pontificis famulatui adscribunt, aut in aliquam virginum societatem et quasi coenobium relegant. Porro Ephraimitae, uti in Gedeonem quondam Manassaeum, ita in Iephthen conquesti sunt se ad pugnam non esse vocatos, sibi, qui principatum domus Ioseph vindicarent, primas victoriae et praedae partes esse praereptas. Ephraimitae proelio fusi et, qui vado Iordanis tralicere conarentur, dialecto agniti interempti sunt (Iud. 12, 1-6). Iudicis officio Iephthe trans Iordanem functus est sexennio (Iud. 12, 7). Cf. 1 Reg. 12, 11; Hebr. 11, 32.

IEPHTHA (יֵפְתָה, B omitt., A יֵפְתָה), urbs tribus Iuda, in tertia provincia Sephelae (Ios. 15, 43). Est ignota.

IERAA (יִרְחָע, Ἰρραή), servus aegyptiacus Sesan Ierameelitae, maritus Oholai filiae Sesan, pater Ethei, progenitor numerosas stirpis (1 Par. 2, 34); inter eius posteros aliqui illustriores viri recensentur, ut Zabad heros davidicus (cf. 1 Par. 11, 41) et Azarias centurio tempore Athaliae reginae, qui 2 Par. 23, 1 filius Obed vocatur.

IERALA v. IEDALA.

IERAMEEL (יִרְמְיָאֵל, e. Deus amat; Ἰερμαίελ). 1. Primogenitus Hesron filii Phares filii Iuda (1 Par. 2, 9). Eius posterii recensentur 2, 25-33; incolebant meridianam partem tribus Iuda (1 Reg. 27, 10); eorum urbibus David in Siceleg reversus dona misit de praeda ab Amalecitis reportata (1 Reg. 30, 29).

2. Levita tempore David, filius Cis filii Moholi de stirpe Merari (1 Par. 24, 29; cf. 23, 21).

IERCAAM (יִרְקָאָם, Ἰερκαάμ) vel est nomen viri ex posteris Caleb filii Hesron vel, ut *Jarchi* statuit, nomen oppidi, cuius pater (possessor, dominus) erat Raham (1 Par. 2, 44); si hoc alterum obtinet, quaerendum erit prope Hebron (cf. 2, 43).

IEREMIAS (יֵרֵמְיָהּ, i. e. Iahwe deiicit vel excelsus est Iahwe vel

Iahwe constituit, elevat; cf. *Knabenbauer*, Comment. in Ier. p. 3; LXX Ἰερμίας, Ἰερμίας). 1. Ieremias de Lobna tribus Iuda, pater Amital uxoris Iosiae regis Iuda (4 Reg. 23, 31; 24, 18; Ier. 32, 1).

2. 3. 4. Tres bellatores, qui David in Siceleg fugitivo se iunxerunt, quorum primus erat Beniaminita (1 Par. 12, 4), duo alii Gaditae (1 Par. 12, 10-13).

5. Princeps in dimidia tribu Manasse transiordanica (1 Par. 5, 24).

6. Princeps familiae sacerdotalis, a quo tota familia nomen accepit (Neh. 10, 2; 12, 1. 12).

7. Unus ex principibus Iuda tempore Nehemiae (Neh. 12, 33[34]).

8. Pater Iezoniae principis Rechabitarum tempore Ieremiae prophetae (Ier. 35, 3).

9. Ieremias propheta, filius Helciae de sacerdotibus qui fuerunt in Anathoth in terra Benjamin (Ier. 1, 1); pater eius Helcias alius censi debet ac Helcias pontifex (4 Reg. 22, 8); pontifices enim in urbe Ierusalem habitabant. Ieremias admodum iuvenis anno tertio decimo Iosiae regis Iuda ad munus propheticum a Deo vocatus est. Ad Dei vocantis vocem haesitavit et munus declinare tentavit. Neque id mirum est; nam idololatria et vitia ei coniuncta sub Manasse et Amon altissimas egerant radices, Iosias rex quidem anno duodecimo regni sui mundavit Iudam et Ierusalem ab excelsis et simulacris (2 Par. 34, 3); at haec externa idolorum destructio nequaquam animos hominum moresque mutavit. Quare iuvenem trepidasse, cum bellum inferre inberetur vitiis longe lateque grassantibus, facile intellegitur. Verum divina promissione auxilii superni accepta statim obsecutus est Deo vocanti. Uti temporum conditione requirebatur, constituitur « ut evellas et destruas et disperdas et dissipes et aedifices et plantes » (1, 10); vitia erant impugnanda, urbis templique ruina annuntianda, regni casus praedicendus simul cum servitute populi sub imperio Chaldaeorum; sed ex ipsis ruinis Deum pro sua fidelitate novum longeque meliorem rerum statum, regnum scil. messianum, demum esse susciaturum, uti prophetae ante Iere-

miam iam praedixerant, illa ipse quoque eximiiis oraculis est prosecutus (cap. 30 ss.).

Munere prophetico functus est regibus Iosia, Iezechaz, Ioakim, Ioachin (Iechonia), Sedecia et aliquo tempore post urbem destructam etiam in Aegypto. Intrepide ac fortiter vitia omnium ordinum reprehendit, uti ei dictum erat a Domino: ego dedi te in civitatem munitam et in columnam ferream et in murum aereum super omnem terram regibus Iuda, principibus eius et sacerdotibus et populo terrae (1,18; cf. 6,27). Regem Iezechaz iam non esse reversurum ex Aegypto quo eum Necho rex Aegypti abduxerat praedixit (22,11. 12; cf. 4 Reg. 23,34); in Ioakim regem reprehendit avaritiam, pompam, iniustitiam, oppressionem eique mortem ignominiosam praedixit (22,14-19); in initio eius regni, cum destructionem templi urbisque praedixisset, sacerdotes et pseudoprophetae eum ad principes adduxerunt mortem eius postulantes (26,6 ss.). Affirmat propheta se missum a Deo; monet ne sanguinem fundant innocentem; docet si mores emendati fuerint Dominum non executorum esse malum quod minatus sit: unde principes cum a furore sacerdotum et pseudoprophetarum tuerentur. Anno quarto regni Ioakim vaticinatur annos septuaginta dominationis Chaldaeorum, cui Iudaei se debeant subicere Deo iubente quia non reversi sunt a sua via mala. Qua annuntiatione cui firmiter deinceps insistebat varias gravesque sibi creavit molestias, cum in aula regia essent multi qui fortiter contra Chaldaeos pugnandum esse existimabant, ideoque prophetam ut hominem reipublicae maxime noxium et proditorum odio habebant et prosequabantur. Eodem anno Ieremias clausus in carcere iussus est a Domino scribere in volumine omnia oracula consueque sibi communicata; vocavit Baruch eique sermones Domini dictavit quos Baruch in templo publice legit. Anno sequenti, quinto anno Ioakim, mense nono die ieiunii iterum legit Baruch ex illo libro in templo. Quod cum regi esset nuntiatum, ipse iussit librum afferri et sibi legi; sed pagellas lectas rex scalpello scidit et

combussit et praecepit, ut Ieremias et Baruch comprehenderentur. Eos tamen Dominus protegit ne reperirentur. Ieremias autem iussu Domini sermones iterum dictavit additis minis contra Ioakim (36,1-32).

Uti cives hierosolymitanos et populum ad sollemnitates confluentem verbis et lectione sermonum quos antea iam habuerat emendare studebat, ita exsilibus quoque consuluit. Nam postquam Iechonias abductus est Babylonem, misit epistolam ad exsules quos monet ne falsis pseudoprophetarum promissis fidem adhibeant (29,1 ss.). Contra vanam eiusmodi spem fore ut dominatione Chaldaeorum mox extincta iugum eorum non sit subeundum, prophetiae domi quoque acriter erat dimicandum. Cum enim Sedecias initio regni foedus concludere tentaret cum Edom, Moab, Ammon, Tyriis, Sidoniis, ut essent socii belli contra Babylonios, Ieremias legatis eorum qui venerant in urbem vincula et catenas tradere iubetur, symbola scilicet servitutis quam iam non liceat effugere (27,2 ss.). Idem pariter assernit contra Hananiam, qui ausus est vaticinari post duos annos vasa templi iri relatum ex Babylone et Iechoniam quoque et exsules reversuros et qui simul catenam tulit de collo Ieremiae (symbolum servitutis certae) eamque confregit. Quod tamen male cessit pseudoprophetae: hoc anno morieris, adversum enim Dominum locutus es, ei Ieremias denuntiare iubetur.

Sedeciae quoque regi repetito Dei nomine declarat fieri non posse, ut se et urbem liberet a Chaldaeis (34,1 ss.), praedixit frustra sperari auxilium ab Aegyptiis (37,1 ss.). Quibus oraculis principes qui Chaldaeis esse resistendum putabant irati Ieremiam caesum in carcerem miserunt, in quo multis diebus detinebatur. Durante obsidione Sedecias clam eum consuluit, qua occasione Ieremias iterum ei aperte tamquam Dei sermonem indicat: in manus regis Babylonis traderis, eique denuo fraudem pseudoprophetarum in memoriam revocat: ubi sunt prophetae vestri qui prophetabant vobis et dicebant: non veniet rex Babylonis super

vos et super terram hanc? Quam durum carcerem sustinuerit, patet eo quod simul regem obsecrat, ne remittatur in carcerem, cum ibi moriendum sibi esset. Permittit ei rex manere in atrio custodiae, ubi scil. milites in palatio regio custodias agebant. Verum cum non desisteret mortem praedicere iis qui resisterent Chaldaeis, principes a rege postularunt ut occideretur. Sedecias respondet: ecce in manibus vestris est; Ieremias proicitur in cisternam, ibique coeno immersus periisset, nisi Abde-melech Aethiops annuente rege eum eruisset (38,1 ss.).

Quod Ieremias toties regi et populo praedixerat et quod eodem teste avertere potuissent si verbis Domini obsequentes emendassent mores (21,1 ss.; 22,1 ss.), tandem undecimo anno regni Sedeciae evenit; urbs a Chaldaeis capta et combusta est. Ieremias cum ceteris captivis vinctus catenis adducitur in Rama; sed statim a Nabuzardan duce libertati redditur eique permittitur ut eligat quod sibi placuerit. Praeceperat enim Nabuchodonosor, ut Nabuzardan poneret oculos suos super eum eique faceret quod voluisset. A transfugis enim et ab ipso Sedecia certe audierat rex, dum in culpam principum et Sedeciae inquireret, quale consilium Ieremias constanter dedisset; unde eum tamquam amicum Chaldaeorum haberi voluit. Ieremias eligit manere in Iudaea et se confert ad Godoliam qui a Chaldaeis praepositus erat regioni. Quo occiso Iudaei metu Chaldaeorum in Aegyptum fugere statuunt invito Ieremia qui iis in sermone Domini mala annuntiat fugientibus in Aegyptum. Illi autem contumaces se conferunt in Aegyptum secumque duxerunt quoque Ieremiam et Baruch. Ibi quoque propheta testis est idololatriae popularium quam frustra cohibere conatur (42-44). Ubi et quomodo mortem obierit non constat. Eum lapidatum esse a Iudaeis, quia illis et terrae Aegypti novam cladem praedixisset *Tertullianus* et *S. Hieronymus* tradunt (cf. *Scorp.* 8; *adv. Iovin.* 2,37; *M.* 2,137; 23,350; id factum esse apud Taphnas in Aegypto dicunt *Ps. Epiphanius* et *S. Isidorus hisp.* (De vitis proph. 8; De obitu et vita

Patr. 38; *M.* 43,400; 83,142; haec et alia v. apud *Cornely*, *Introd.* II 2 p. 361 s.).

Quid Ieremias egerit, senserit, sustinuerit, ipse clare exponit in libro suo. Acriter in vitia invehitur; magna vi quam ingratus populus sit erga Dei beneficia prosequitur; in una morum emendatione reponi salutem constanter inculcat. Sed cum magno animi dolore advertit animos esse obduratos adeoque ruinae iam non posse averti. Luctum et sortem populi fatalem in se ipso et in modo vivendi exprimere debet: « non accipies uxorem; ne ingredientis domum convivii ut sedeas cum eis et comedas et bibas » (16,2 ss.). Quam graviter munere suo functus sit et praedicaverit in templo, in portis urbis, in domo regia, in atrio custodiae, symbolicis actionibus, epistulis missis, lectione sermonum per Baruch, luculenter ex ipso eius libro elucet. At eum quoque haud semel difficultatem muneris esse expertum et tristitia deiectum pariter proditur (20,7 s. 14 s.); ab ipsis eius civibus insidiae struuntur vitae eius (11,18 ss.), omnibus odio et execrationi esse videtur: vac mihi, mater mea quare me genuisti, virum rixae, virum discordiae in universa terra; omnes maledicunt mihi (13,10); quare factus est dolor meus perpetuus (13,18 etc.)? factus sum in derisum tota die, omnes subsannant me; factus est mihi sermo Domini in opprobrium (20,8); neque solum verbis, sed verberibus quoque impetitus est: percussit Phasur Ieremiam prophetam et misit eum in nervum (20,2). Cum itaque nihil efficeretur emendationis et praedicandi munus tot obseptum esset molestiis, quandoque ab eo desistere voluit: « et dixi: non recordabor sermonis Domini neque loquar ultra in nomine illius » (20,9); at Deus moerentem consolatus est et confortavit (12,5 s.; 13,19 s.) neque sermonem Domini cohibere potuit: factus est in corde meo quasi ignis exaestuans claususque in ossibus meis et defeci ferre non sustinens (20,9). Quanta sustinuerit, etiam ab auctore *Ecclesi.* memoriae proditur: male tractaverunt illum qui a ventre matris consecratus est propheta (49,9). Uti vivus maximam curam habuit salutis civium,

ita mortuus quoque exhibetur summo-
pere sollicitus pro populo Dei eique
opem ferens; apparuit enim in visu Iu-
dae qui proelia Domini tempore Macha-
baeorum proeliabatur, Ieremias gloria
mirabilis : hic est fratrum amator et
populi Israel qui multum orat pro po-
pulo et universa sancta civitate; et ipse
extendit dexteram deditque Iudae gla-
dium aureum dicens : accipe sanctum
gladium munus a Deo, in quo deiciēs
adversarios populi mei Israel (2 Mach.
13,13, 14). Et quanto in honore habitus
sit temporibus posterioribus etiam col-
ligitur ex epistula Iudaeorum hiero-
solymitanorum data ad Iudaeos in Aegy-
pto (2 Mach. 2,1-9) et ex opinione
multorum tempore Christi qui Iesum
tot miracula patrantem existimabant
esse Ieremiam ex mortuis reducem
(Matth. 16,14). Ad eius quoque gloriam
pertinet quod inter alia praeclara ora-
cula messiana, quibus et Messiam et
bona messiana describit, tempus hoc
messianum iam eo designat nomine
quod ei maxime proprium est et sol-
lemne, appellatione scil. foederis novi
(31,34; cf. Hebr. 8,8).

IEREMIEL (יֵרֵמְיָהוּ, Ἰερემίας), fi-
lius Amelech (sed vide s. v.), a Ioakim
rege Iuda iussus Ieremiam prophetam
et Baruch scribam, comprehendere (Jer.
36,26).

IERIA (יִרְיָה, Ὀβὲδ-βαλ), princeps He-
bronitarum tempore Davidis (1 Par. 26,
31); v. HEBRON 1.

IERIAS v. HANANIAS 6.

IERIAU (יִרְיָהוּ, Ὀβὲδ-βαλ), levita,
filius Hebron filii Caath, unus ex prin-
cipibus Hebronitarum (1 Par. 23,19; 24,
23); de textu mendoso 24,23 vide s. v.
HEBRON 1.

IERIBAI (יִרְבָּי, Ἰαρβαι), filius El-
naem, heros in exercitu Davidis (1 Par.
11,46).

IERICHO (יְרִיחוֹ, יְרִיחָה, יְרִיחָה i. e.
regio fragrans a radice inusitata יִרְיָה
spirare, יִרְיָה *olfacere*, vel ex opinione
veterum : urbs lunae a יָרֵחַ *luna*; LXX

Ἰεριχώ, *Flav. Ios.* Ἰεριχώ), urbs nobilis
Palaestinae in tribu Benjamin sita haud
procul a mari Mortuo et Iordanis infe-
riore. Frequenter commemoratur ad de-
scribenda campestris Moab, quae dicun-
tur supra Iordanem contra Iericho sita
(Num. 22,1; 26,3. 63; 31,12; 33,48; 35,1;
36,13; Ios. 13,32 cf. 20,8; 21,36; 1 Par.
6,78[63]). Describitur opposita sorti dua-
rum semis tribuum transiordanicarum
(Num. 34,15) et monti Nebo (Deut. 32,
49; 34,1), ex quo Moyses terram pro-
missam contemplans vidit latitudinem
campi Iericho civitatis palmarum usque
Segor (Deut. 34,3). Erat urbs munita re-
guli Chanaanici; a Iosue expugnata et
combusta est omnesque incolae occisi
sunt excepta Rahab meretrice eiusque
familia; cf. Ios. 2,1-12,9 passim et v.
IOSUE 1. Maledictio autem, quae Ios. 6,
26 fertur in virum qui aedificaverit Ieri-
cho, merito intellegitur de urbis muni-
tione, non de mera reaedificatione;
urbs enim ipsa tribui Benjamin attributa
est (Ios. 18,12,21; cf. etiam descriptio-
nem terminorum tribus Ephraim Ios. 16,
1. 7). Civitas palmarum Iud. 1,16 et 3,13
haud dubie est Iericho, etsi fortasse non
eodem loco exstructa quo prior fuerat.
Eiusdem mentio fit in historia Davidis
2 Reg. 10,5 et 1 Par. 19,5. Cum autem
Hiel de Bethel urbem munitionis firmare
aggrederetur, Abiram primogenitus eius
iuxta imprecationem Iosue morte subla-
tus est (3 Reg. 16,34). Prope Iericho fi-
lii prophetarum degebant; inde Elias
trans Iordanem profectus igneo curru
in caelum raptus est; ibi Eliseus aquas
Iericho pessimas et sterilitatem terrae
sale immisso sanavit (4 Reg. 2,1-22).
Commemoratur in historia Achaz (2 Par.
28,15) et Sedeciae, qui in planitie Ieri-
cho a Chaldaeis captus est (4 Reg. 25,5;
Jer. 39,5; 52,8). Duce Zorobabel ex ca-
ptivitate redierunt 345 filii Iericho (Esdr.
2,34; Neh. 7,36) et sine dubio in Iericho
habitarunt, siquidem viri Iericho Nehe-
miam adiuverunt in aedificandis muris
Ierusalem (Neh. 3,2). Iericho a Iudaeis
contra Holofernem munitionibus firmata
est (Judith 4,3; graece 4,4). Aetate ma-
chabaica Bacchides dux Syrorum castel-
lum prope Iericho munivit (1 Mach. 9,
50) et ibidem in castello Doeh Simon Ma-



deno iudaico iudaet Cestro devoto Iose-
phum filium Simonis administratorem

regio. Quin et tert opobalsamum, qui
pretiosissimus est omnium qui illic sunt



chabaeus cum duobus filiis Mathathia et Iuda dolo interfectus est (1 Mach. 16, 11. 14). Sapientia describitur Eccli. 24, 18 [14] : quasi plantatio rosae in Iericho. Ex Evangeliiis huc referuntur sanationes caecorum (Matth. 20, 29 ss.; Marc. 10, 29 ss.; Luc. 18, 35 ss.), narratio parabolae de Samaritano (Luc. 10, 30), commoratio Domini in domo Zachaei (Luc. 19, 1 ss.). Ad expugnationem urbis per Iosue alludunt 2 Mach. 12, 15 et Hebr. 11, 30.

Romani Ierichuntem primum pervenerunt duce Pompeio, qui una nocte ibi castrametatus duo urbis castella destruxit, quibus nomina Threx et Taurus (*Strabo* XVI. 2, 40). Gabinus res publicas Iudaeae instaurans Ierichuntem fecit unum ex quinque conventibus iuridicis, a quibus Iudaei tota gente in quinque partes aequales divisa ius peterent (*Flav. Ios. Ant.* XIV. 5, 4; *Bell. iud. I.* 8, 5). Maiorem splendorem urbi addidit Herodes Magnus, qui ope Romanorum eam occupavit (*Bell. iud. I.* 13, 6) eiusque proventum ab Antonio Cleopatrae concessum pretio redemit (*Ant.* XV. 4, 2); Antonio apud Actium devicto Herodes ipsam urbem ab Augusto dono accepit (*Ant.* XV. 7, 3; *Bell. iud. I.* 20, 3). Brevi post supra Ierichuntem castellum securitate et amoenitate conspicium erexit, matris suae nomine *Cypros* appellatum (*Ant.* XVI. 5, 2; *Bell. iud. I.* 21, 9) et multa alia in urbe palatia de amicorum nominibus appellata (*Bell. iud. I.* 21, 4). Magnae quoque piscinae aulam Herodis Ierichuntinam circumfluebant, in quarum una atrox tyrannus Aristobulum adolescentem mergendum curavit (*Ant.* XV. 3, 3). Ibidem etsi non semper residebat, mortem tristissimam obiit (*Bell. iud. I.* 33, 6-8). Domus regia Herodis a Simone homine seditioso, qui Herodis servus fuerat, cremata et tota regio Ierichuntina direpta est (*Ant.* XVII. 10, 6); Archelaus vero palatium magnifice refecit, vicum Archelaidem nuncupatum construxit et dimidiam aquam, qua Neara vicus irrigabatur, in campum Ierichuntinum divertit, quem palmetis totum conseravit (*Ant.* XVII. 13, 1). In bello iudaico Iudaei Cestio devicto Iosephum filium Simonis administratorem

Ierichuntis constituerunt (*Bell. iud. II.* 20, 4); recensetur inter undecim toparchias Iudaeae (III. 3, 5); Vespasianus cum exercitu appropinquans eam ab incolis desertam invenit (IV. 8, 2) et Ierusalem cincturus praesidium apud Iericho collocavit (IV. 9, 1). Narrant Eusebius et S. Hieronymus (*Onom. ed. Lag.* 263, 13; 132, 1) Iericho eo tempore quo Ierusalem oppugnabatur, a Romanis propter perfidiam civium captam atque destructam esse, postea vero reaedificatam. Aetate christiana erat sedes episcopalis (*Le Quien*, *Oriens christianus* III. p. 634).

Iericho hodie est vicus exiguus *el-Rihā*. Attamen situs urbis antiquae magis occidentem versus quaerendus est neque cum omnimoda certitudine definiri potest. Ex Flavio Iosepho (*Bell. iud. IV.* 8, 3) discimus urbem antiquam sitam fuisse prope fontem copiosum rigan-disque arvis uberrimum, postea fontem Elisei nuncupatum; hic autem fons agnoscitur *ʿAin el-Sulfān* ad radices montis Quarantania (*Qarantal*) et a vico *el-Rihā* inter septentrionem et occidentem situs. Iericho autem Herodiana seu romana describitur a Flavio Iosepho l. c. 8, 2 in planitie sita, cui imminet mons longissimus inter regiones Scythopolis (Bethsan) et Sodomorum protensus, nudus, asper, inaequalis, ob sterilitatem incultus et a Strabone XVI. 2, 41 campus montibus veluti theatrum ex parte cinctus, palmis imprimis aliisque arboribus frugiferis consitus, hortis, rivulis, habitationibus abundans. Erat igitur Iericho Herodiana complexus domorum et villarum, quae inter palmeta et hortos huc illuc spargebantur.

Fertilitatem campi Ierichuntini egregie describit Flav. Iosephus (*Bell. iud. IV.* 8, 3) : « Amplius quam fontes ceteri omnes, spatium irrigat (scil. ille fons Elisei) et per campum quidem labitur 70 stadiis longum, 20 vero latum atque in eo alit hortos amoenissimos et frequentissimos, palmarum item varia sapore et appellatione genera. Ex istis pinguiores pressae etiam mel emittunt copiosum, quod suavitate alteri vix cedit : quamquam et mellis altrix est illa regio. Quin et fert opobalsamum, qui pretiosissimus est omnium qui illic sunt

fructuum, cyprum item et myrobalanum, ita ut, qui divinum dixerit illum terrae fructum, non valde aberraverit, utpote quae alibi sunt pretiosissima et rarissima, copiose istae nascentur. Sed neque aliorum fructuum respectu tellus ulla per orbem universum ei fuerit facile comparanda; adeo quod satum est, multiplicatum reddit. Causa autem huius mihi videtur esse aëris calor et aquarum fecunditas, cum ille, quae nata fuerint, proliat atque diffundat, liquor autem faciat, ut singula firmiter radices agant viresque aestivo tempore suppeditet. Adeo autem perusta est illa regio, ut viv quidquam quotannis pullulet crescatque. Aqua autem ante solis ortum hausta et aëri exposita frigescit naturamque aëri ambienti contrariam sumit; hieme vero tepescit et milissima fit illis, qui in eam merguntur. Quin et tanta est aëris circumfusi temperies, ut, cum in aliis Iudaeae partibus ningit, hic linea veste utantur indigenae. Distat autem Hierosolymis 150 stadiis, a Iordane vero 60 totumque inde usque ad Hierosolyma spatium desertum est et saxosum; ad Iordanem vero et lacum Asphaltitum humilior quidem est solum, aequae tamen desertum atque infrugiferum. Similiter *Iustinus* 36,3: « Est vallis, quae continuis montibus velut muro quodam ad instar castrorum clauditur. Spatium loci ducenta iugera nomine Hierichus dicitur. In ea valle silva est et ubertate et amoenitate insignis: siquidem palmeto et opobalsameto distinguitur... Sed non minor loci eius apricitatis quam ubertatis admiratio est: quippe cum toto orbe regionis eius ardentissimus sol sit, ibi tepidi aëris naturalis quaedam ac perpetua apricitas inest ». Et *Plinius* V. 14. 70 describit Hiericentem palmetis consitam, fontibus riguan.

Hodie tamen illa regio palmis omnino fere caret et nonnisi myrobalanum (arab. *zakkām*) profert; naturalis quidem conditio soli mutata non est; verum plurimorum bellorum vastationes, rapinae Beduinorum continuas, indolentia et pigritia incolarum urbem et campum in sterilitatem egestatemque coniecerunt. Etiam flos ille humilis, qui peregrinantibus audit rosa Iericho, Ara-

libus *kaff Maryan*, botanicis anastatica hierochuntica (Linné), nonnisi valde exiguum specimen rosarum Iericho, quae Eccli. 24,18[14] celebrantur, haberi potest.

Cf. *Robinson*, Palaestina II. 516-555; *Tobler*, Topographie von Jerusalem II. 642 ss.; *Mislin*, Les Saints Lieux 1858 III. p. 128-163; *Güérin*, Samarie I. 46-52; 132-149; *Survey of West. Pal. Mem.* III. 173. 175. 222 s.; *F. de Sauley*, Voyage en Terre Sainte I. 326-342; *Sepp*, Jerusalem und das heilige Land ed. 2 II. 720-734; *Fahrngruber*, Nach Jerusalem ed. 2 II. 64 ss.; *Liévin de Hamme*, Terre Sainte ed. 4 II. 294 ss.; *D. Zaneccchia*, La Palestine d'aujourd'hui 1899 II. 17 ss. 37. 39 s.; *L. Heidel* apud *Vigouroux*, Diet. de la Bible III. 1282-1298.

IERIEL (יִרְיָאֵל, Ἰεριέλ), tertius inter filios Thola filii Issachar, princeps cognationis (1 Par. 7,2).

IERIMOTH (יִרְמִיָּוֶת, יִרְמִיָּוֶת; Ἰερμιούθ, Ἰερμιούθ, Ἰερμιούθ, sed etiam Ἀριμώθ, Ἀριμώθ, Ἀριμώθ, Ἰερμιούθ). 1. Filius (vel unus ex posteris) Bela, princeps familiae beniaminiticae (1 Par. 7,7); fortasse idem est ac

2. Ierimoth qui Davidi in Siceleg fugitivo se iunxit (1 Par. 12,5).

3. Filius Becher et princeps familiae beniaminiticae (1 Par. 7,8).

4. Beniaminita ex posteris Baria filii Elphaal, in Ierusalem degens (1 Par. 8,14).

5. Filius Musi, princeps familiae leviticae de stirpe Merari tempore Davidis (1 Par. 23,23; 24,30).

6. Filius Heman et princeps quintae decimae classis musicorum davidicorum (1 Par. 25,4. 22).

7. Filius Ozriel, princeps tribus Nephthali tempore Davidis (1 Par. 27,19).

8. Filius David regis, pater Mahalath uxoris Roboam (2 Par. 11,18); pro *Kethib*: Mahalath filius (בֶּן) Ierimoth legendum est: filia (בַּת) cum *Qeri*, multis mss., LXX, Vulgata. Inter filios David 1 Par. 3 et 14,4-7 Ierimoth non legitur, unde filius ex aliqua concubina Davidis esse censetur (*Ps.-Hieron.*, Quaest. hebr. ad h. l.).

9. Unus ex levitis, qui ab Ezechia rege primitiis et decimis templo volis prae-

positi sunt, quorum praefecti erant Chonenias levita et Semei frater eius (2 Par. 31,13).

10. Unus ex filiis Aelam, qui uxores alienigenas iubente Esdra dimiserunt (Esdr. 10,26).

11. Unus ex filiis Zethua, qui uxores alienigenas iubente Esdra dimiserunt (Esdr. 10,27; Vulgata Ierimuth).

12. Ierimoth (יִרְמֹת, Ἰερμιούθ), Ἰερ-μωθ), urbs tribus Iuda, in prima provincia Sephelae enumerata (Ios. 15,33), cuius rex Pharam, cum aliis quattuor regibus Gabaon oppugnavit et a Iosue interfectus est (Ios. 10,3. 5. 23; 12,11). a filiis Iuda ex captivitate reducibus denuo habitata (Neh. 11,29; Vulgata Ierimuth). Apud Eusebium et S. Hieronymum (Onom. ed. Lag. 266,38; 132,31) vocatur Iermus et agnoscitur villa Ἰερ-μωτός, Iermucha 10 mil. pass. ab Eleutheropoli Ierusalem versus sita. Hodie *Khîrbet el-Yarmûq*. Quodsi apud Eusebium et S. Hieronymum s. v. Ἰερμωθ, Iarimuth (l. c. 266,24; 132,16) de nostra urbe sermo est, error admittendus erit in distantia his locis notata, siquidem dicunt Ἰερμωθ, Iarimuth 4 mil. pass. ab Eleutheropoli distare et esse iuxta villam Esthaol, quam villam tamen alibi 10 mil. pass. ab Eleutheropoli abesse dicunt.

Cf. *Robinson*, Palaestina II. 599; *Guérin*, Judée II. 371-374; *Survey of West. Pal. Mem.* III. 128; *D. Zancucchia*, La Palestine d'aujourd'hui 1899 II. 270; *Buhl*, Alt. Pal. 1896 p. 194; *G. A. Smith*, Hist. Geogr. of the Holy Land, Plate I. IV.

IERIMUTH v. IERIMOTH 2 et 11 et 12.

IERIOTH (יִרְיֹת; Ἰεριώθ, apud *Swete* B Ἰερῖωθ, A Ἰερῖωθ), filius Caleb filii Hesron, ex Azuba genitus secundum Vulgatam 1 Par. 2,18. Sed textus hebraicus ita emendandus videtur, ut legatur: Caleb filius Herson accepit uxorem Azubam filiam Ierioth. Cf. *F. de Hummelauer*, Comm. in Num. p. 189.

IERMAI (יִרְמַי; Ἰερμαΐα), unus de filiis Hasom, qui uxores alienigenas dimittere ab Esdra iussi sunt (Esdr. 10,33).

IEROBAAL v. GEDEON.

IEROBOAM (יִרְבֵּעַם, Ἰεροβοάμ), nomen duorum regum Israel.

1. Ieroboam I. erat filius Nabal, Ephraimita de urbe Sareda, vir fortis et potens, quem Salomon rex videns esse bonae indolis et industrium constituerat praefectum super tributa universae domus Ioseph (3 Reg. 11,26. 28) i. e. super servitia quae ab Ephraimitis praestanda erant (hebr. super omne onus domus Ioseph). Cum Salomon aedificaret Mello et occluderet rupturam (vallem) civitatis David, videtur iam aliquam movisse rebellionem contra Salomonem; Ephraimitae enim aegre ferebant quod onera et servitia sibi a rege tribus Iuda imponerentur; conquerebantur enim de iugo durissimo (3 Reg. 11,27; 12,4). Cum Salomon sese idololatriae dedisset, Ahias propheta in nomine Domini annuntiavit Ieroboam ipsum fore regem super decem tribus, quia Dominus scisurus esset regnum de manu Salomonis, ita ut eius filius solum futurus esset rex tribuum duarum; simul promisit Ieroboam, si fidelem cultorem Domini se praestaret fore ut domus eius regiam retineret dignitatem (3 Reg. 11,29 ss.). Cum Ahias diceret: regnabis super omnia quae desiderat anima tua, dubium non est quin eo iam tempore Ieroboam animo volverit quomodo contribules suos a servitio regis Iuda liberaret. Eiusmodi quoque conatus non defuisse videntur, sicut de uno mentio fit: levavit manum contra regem (3 Reg. 11,26). Quare facile intellegitur, cur Salomon eum voluerit occidere. Ieroboam autem fugit in Aegyptum ad Sesac regem ibique mansit usque ad mortem Salomonis. Secundum enim Domini verbum per Ahiam prophetam non futurum erat ut regnum ei contingeret nisi mortuo Salomone. In codice Vaticano LXX legitur Sesac dedisse illi uxorem Ano sororem seniore uxoris suae (ad 3 Reg. 12,24). Ephraimitas mortuo Salomone spem suam posuisse in Ieroboam, ut eius ope a servitiis liberarentur, indicatur eo quod ad eum miserunt et eum vocarunt in Sichem, ubi Roboam ab iis consalutari rex voluit. Verum antequam ei obsequium sponderent, postularunt ut imminueret

de iugo gravissimo quod Salomon impositisset. Quod cum ille duris et asperis verbis negaret minis additis, tribus decem recesserunt a domo David et Ieroboam constitutus est rex Israel. Voluit quidem Roboam bellica expeditione statim omnes sibi subicere; at cum Semeias propheta nomine Dei bellum prohiberet significans Deum partem regni abstulisse domui David, Iudaei Deo obsequentes in suam quisque domum reversi sunt.

Ieroboam autem Sichem munivit, urbem sitam inter montes Hebal et Garizim, ibique habitavit; pariter munivit Phanniel trans Iordanem prope Iaboc fluvium. Ut regnum suum stabiliret, cohibendos esse putavit Israelitas, ne ascenderent in Ierusalem ad adorandum Dominum, ne converterentur corda eorum ad regem Iuda, et plane oblitus, sibi mandata Dei dum servaret promissam esse dominationem stabilem, humana uti voluit prudentia instituens cultum Domini sub symbolo vituli aurei in Bethel et Dan, i. e. in regni parte meridionali et septentrionali; praeterea fecit fana in excelsis et abiectis sacerdotibus Domini et levitis ex stirpe a Domino electa qui in Iudam et Ierusalem migrabant sacerdotes constituit ex plebe (cf. 3 Reg. 12,31; 13,33; 2 Par. 11,13-16) et diem sollemnem celebrari iussit quintadecima die mensis octavi. Verum cultu hoc contra legem instituto qui in ipsa vitulorum imagine iam ad idololatriam vergebat Ieroboam ruinam domus suae invexit, quae ei statim praedicta est a viro Dei, cum in Bethel die illo sollemni adoleret incensum (cf. 3 Reg. 13,1-6). Frustra admonitus a propheta Ieroboam in inceptis perstitit et peccare fecit Israel et eius exemplum pessimum quasi iure quodam hereditario in regno Israel ita invaluit, ut reges Israel in via Ieroboam ambulare et a peccatis Ieroboam non recedere saepe dicantur (cf. 3 Reg. 16,2. 19. 26. 31; 22, 33; 4 Reg. 3,3; 10,29. 31; 13,2. 6,11 etc.).

Cum filius eius Abia aegrotaret, misit uxorem suam ad prophetam Ahiam, quae eum habitu commutato ne cognosceretur consuleret de morbo filii. At propheta admonitus a Domino ei annun-

tiavit ruinam domus Ieroboam et mortem filii (3 Reg. 14,1 ss.); eo tempore Ieroboam habitavit in Thersa (v. 17). Regnavit per annos viginti duos; sed postquam a Domino recessit et idololatriam fovit, regnum eius bellis turbatum est (2 Par. 12,15); uti a Roboam, ita quoque ab eius filio Abia impugnatus est. Abia magnam ei cladem intulit; corruerunt vulnerati ex Israel quingenta millia virorum fortium et Abia persecutus est fugientem Ieroboam et cepit Bethel, Iesana, Ephron cum oppidis vicinis (2 Par. 13,16 s.). Qua clade accepta non valuit ultra resistere Ieroboam in diebus Abia. Quo mortis genere obierit non indicatur, sed dicitur: quem percussit Dominus et mortuus est (2 Par. 13, 20); unde morte praematura in poenam scelerum abreptus est. Nadab filius eius regnavit pro eo (3 Reg. 14,20).

2. Ieroboam II. filius Ioas regis Israel regnavit in Samaria annis quadraginta et mo. Feliciter pugnavit; nam regnum Israel usque ad eos extendit terminos quos regnum Iuda sub Davide et Salomone habuerat; ipse restituit terminos Israel ab introitu Emath usque ad mare solitudinis, iuxta sermonem Domini per Ionam prophetam (4 Reg. 14,25; cf. Am. 6,13). Prosperam hanc regni conditionem ad Dei misericordiam referri debere s. auctor monet: vidit enim Dominus afflictionem Israel amaram nimis... salvavit eos in manu Ieroboam filii Ioas (4 Reg. 14,26. 27). Verum regem et populum se praestitisse postea valde ingratos et idololatriae et variis sceleribus se maculasse, luculenter patet ex prophetia Osee et Amos, qui propter ea flagitia ruinam regni futuram annuntiant. Et de Ieroboam fertur iudicium: fecit quod malum est coram Domino; non recessit ab omnibus peccatis Ieroboam filii Nabal qui peccare fecit Israel (I. e. v. 24). Quod Amos praedixerat nomine Dei: consurgam super domum Ieroboam in gladio (7,9), impletum est in filio eius Zacharia (4 Reg. 13,10).

I. KNABENBAUER.

IEROHOAM יֵרוֹחָם, IXX Ἰερουχάμ, Ἰεροχόμ, Ἰροάμ, Ἰραάμ, Ἰρωάδ, Ἰωράμ,

Ἰεροάμ). 1. Pater Elcana patris Samuelis de genere Caath (1 Reg. 1,1; 1 Par. 6,27. 34).

2. Princeps familiae beniaminiticae in Ierusalem (1 Par. 8,27); idem videtur esse ac

3. Ieroham pater Iobaniae principis cognationis beniaminiticae in Ierusalem (1 Par. 9,8).

4. Sacerdos de domo Melchiae, pater Adajae Babylone reversi cum 242 patribus familias (1 Par. 9,12; Neh. 11,12).

5. Ieroham Beniaminita de Gedor (v. GEDOR 2), cuius filii Davidi in Siceleg se immixerunt (1 Par. 12,7).

6. Danita, cuius filius Ezrihel erat princeps tribus Dan, quando David populum numerabat (1 Par. 27,22).

7. Pater Azariae centurionis a Ioiada pontifice edocti de ratione, qua Athalia esset regno privanda et Ioas rex constituendus (2 Par. 23,1).

IERON (יְרוּשָׁלַיִם, Κερωά, Α Ἰερών), urbs munita (Ios. 19,38) inter illas, quae Ios. 19,35-38 post descriptionem finium Nephthali inseruntur et arces Tyrionum esse censentur (*P. de Hummelauer* ad h. l.). Coniiciunt esse *Yārūn* medio fere intervallo inter lacum *Hūle* et Scalam Tyrionum. Utrum *Yārūn* in finibus Aser an Nephthali contineatur, non satis liquet.

Cf. *Guérin*, Galilée II. 105-107; *Survey of West. Pal.* Mem. I. 204. 258 s.; *D. Zancchia*, La Palestine d'aujourd'hui 1899 II. 709; *Buhl*, Alt. Pal. 1896 p. 233.

IEROSOLYMA v. IERUSALEM.

IERZIA (יִרְצִיָּה, Ἰερζαριά) Beniaminita, unus ex filiis Ieroham (1 Par. 8,27).

IERUEL solitudo (יְרוּעַל, הַ בְּדִבְרֵי יְרוּעַל, ἡ ἔρημος Ἰερυελ), pars quaedam deserti Iuda inter Engaddi et desertum Thecue (2 Par. 20,16). Reliqua vide s. v. BENEDICTIONIS VALLIS.

IERUSA (יְרוּשָׁה, Ἰερουσα), filia Sadoc, uxor Oziae regis Iuda decimi, mater Ioatham regis Iuda undecimi post scissionem regnorum (4 Reg. 15,33; 2 Par. 27,1).

IERUSALEM. I. **Nomina**. 1. Hierosolyma, civitas et Iudaeis, et Christianis et Mahometanis prae ceteris sancta, atque ipsis paganis « longe clarissima urbium Orientis, non Iudaeae modo » (*Plin.* V. 14,70) et « famosa urbs » (*Tacit.* Hist. 5,2), in libris sacris hebraicis יְרוּשָׁלַיִם (pro יְרוּשָׁלַם) et rarius יְרוּשָׁלַם (1 Par. 3,5; 2 Par. 23,1; Ier. 26,18; Esth. 2,6) et יְרוּשָׁלַם (Ps. 79,3 et in pausa) appellatur. Idem nomen in cognatis linguis semiticis sub eadem fere forma occurrit (chald. יְרוּשָׁלַם et יְרוּשָׁלַם, syr. אֲרֻשְׁלַם, assyr. *Urusalīm* in tab. Tell-el-ʿAmarna n. 180. 181. 183. 185 *ed. Winckler*, al. *Ursalimmu*; arab. *Urīshalam*) et similiter in versionem graecam V. T. textumque N. T. atque in versionem latinam transiit sub duplici forma Ἰερουσαλήμ (in LXX et in N. T.; al. Ἰερουσαλήμ), *Ierusalem* (communior forma in Vulgata, maxime in V. T.; in multis codicibus *Hierusalem*), et Ἰεροσόλυμα (1 Mach. 1,14; 10,43; 11,34; 2 Mach. et N. T.; al. Ἰεροσόλυμα), *Ierოსolyma* (Vulgata ib.; plerique codices *Hierosolyma*). Utraque forma, communius tamen Ἰερουσαλήμ et *Ierusalem*, etiam in Onomasticis (cf. *P. de Lagarde*, *Onomastica sacra*) et in Itinerariis frequenter occurrit; Iosephus vero alique scriptores Ἰεροσόλυμα, *Hierosolyma* praeferunt.

In exponendo hoc nomine auctores magnopere dissentiunt. Certe audiendi non sunt, qui vestigia Iosephi prementes (Ant. I. 10,2, *ed. Niese* 180; Bell. iud. VI. 10,1, *Niese* 438) graecam statuunt vocis Hierosolymorum originem (quasi ἱερὸν Σολυμα), cum manifeste eadem sit atque antiquior forma hebraica Ierusalem. At neque indubium ex hebraica lingua proponitur etymon. Quod antiquis maxime placuit « visio pacis » יְרוּ = יָרָא « vident » (*S. Hieronymus*, Liber interpref. hebr. nom., *ed. Lagarde* p. 50,9 s. etc.), a recentioribus communiter reicitur post *Hadr. Relandum*, qui nomen « possessionem hereditariam pacis » (יְרוּשָׁתָם) interpretatur. Alii potius « foundationem pacis s. salutis et

incolumitatis » *Gesenius* vel « fundationem Salem » i. e. dei pacis (*Grill*) explicandum censent (scil. יְרִית שָׁלֵם). Pluribus ex comparatione cum assyr. Urusalm expositio « urbs (dei) Salem » (*Sayce, Jastrow*) sen potius « civitas pacis » vel « urbs firma » placuit.

2. Praeter nomen hoc, quod plus quam octingenties in sacris libris invenitur, aliud occurrit *Iebus* (יְבוּס, יְבוּסָי), quo urbs, iam ante occupationem israeliticam Ierusalem dicta, ab incolis Iebusaeis (יְבוּסִי Gen. 10,16; 15,21 etc.; idem Ios. 18,28 pro Ierusalem, sicut עִיר הַיְבוּסִי Iud. 19,41) videtur appellata esse (Iud. 19,10 s.; 1 Par. 11,4 s. In Vulgata etiam Ios. 18,28 et Iud. 19,14).

Sunt qui etiam *Salem* (Gen. 14,18), regiam Melchisedech, eandem dicant atque Ierusalem, auctoritate Iosephi nixi (II. cc.). At quamquam in Ps. 75,3 (hebr. 76,3) fortasse illud בְּשָׁלֵם, quod Vulgata cum LXX in pace vertit, in *Salem* exponendum et de Ierusalem intelligendum est, priorem illam Salem probabilius ab hac distinguendam esse existimamus. Ceterum vide SALEM 1.

In libris poeticis et prophetis insuper nomen *Sion* (צִיּוֹן, צִיּוֹן וְצִיּוֹן), quod proprie arcem Iebusaeorum significabat, ad designandam totam urbem adhibetur (Ps. 30,20; Is. 10,24 etc. V. infra VI.). In iisdem libris varia appellativa Hierosolymis speciatim attribuuntur: dicitur *civitas* עִיר Is. 66,6 et הָעִיר Ez. 7,23; pro עִיר הַיְדֵּה 2 Par. 25,28 legendum עִיר הָיָד cum LXX, Syr., Vulgata et 4 Reg. 14,20), *civitas sancta* et c. sancti (עִיר הַקִּדְשׁ Neh. 11,1; Is. 52,1. Cf. עִיר קְדִישָׁה urbs sancta tua Dan. 9,24; הָעִיר מַלְאִי Matth. 27,53), *civitas Dei* (עִיר הָאֱלֹהִים Ps. 86[87], 3; cf. 45[46], 5), *civitas Domini* (עִיר יְהוָה Is. 60,14). Vocatur etiam *Ariel* אֲרִיאֵל Is. 29,1 s. 7; אֲרִיאֵל, quod communiter cum Aquila et Symmacho « leo Dei », ab aliis cum paraphraste chaldaeo « altare Dei » exponitur.

3. Variis aliis nominibus a scriptoribus profanis designatur. Aelius Hadrianus Imperator urbem post novam sub Bar Kochba rebellionem a. 135 p. Chr. captam et in coloniam romanam convertam Coloniam Aeliam Capitolinam appellavit, quo nomine in nummis romanis secundi et tertii saeculi frequenter designatur. Inde nomen *Aelia* (Αἰλία; item arab. ἰλῑā) per plura saecula fere unice in usu erat, ita ut antiquum nomen Ierusalem a paganis fere ignoraretur (cf. *Euseb.*, De mart. Pal. c. 11. *Migne*, P. G. 20,1504 s.); quamquam in Onomasticis sacris et Itinerariis scriptoribusque ecclesiasticis etiam nomina biblica adhibebantur, uti in carta geographica madabena saec. 6. ἡ ἀγία πόλις Ἱερουσαλὴμ legimus. Scriptores arabes medii aevi urbem *el-beit el-muqaddas* (al. *beit el-maqdis*) « domum sanctam » appellare solent; incolae vero hodierni *el-Quds* « sanctam » vel *el-Quds el-Sherif* « sanctam, nobilem », licet Christiani atque Iudaei etiam *Yerūsālīm* adhibeant.

Similem appellationem iam antiquitus viginis praeter textus citatos Scripturae iuxta aliquos etiam nomen urbis *Cadytis* (Κάδυτις, quasi = aram. קְדִיתָא = hebr. קְדוּשָׁה) penes Herodotum (2, 159; 3,5) indicat, quam eandem esse atque Hierosolyma existimant. Alii e contra eo nomine potius Gath vel Gazam significari censent.

Cf. *Hadr. Relandi* Palaestina, Trajecti Bat. 1714, p. 207 (Aelia). 668-70 (Cadytis). 832-5 (Jerusalem); *E. F. K. Rosenmüller*, Bibl. Alterth. II. 2 p. 202; *T. Tobler*, Topogr. von Jerusalem I. p. 1 s.; *Jul. Grill*, Ueber Entstehung und Bedeutung des Namens Jerusalem in Zeitschr. f. alttest. Wiss. IV. 1884, p. 134-48; *V. Guérin*, Jérusalem ch. 1, p. 1-6; *A. H. Sayce*, The higher Criticism and the verdict of the Monuments ed. 5, p. 176; *H. Zimmern* in Zeitschr. f. Ass. VI. 1891, p. 262 s.; *M. Jastrow* in Journ. of Bibl. Lit. XI. 1892, p. 105; *J. Döllner*, Studien zum III. u. IV. Buche d. Kön. p. 18-20. — Praeterea v. *Gesenius*, Thes., *Fr. Brown* et al. lex. hebr. s. v.

Discrimen formae יְרוּשָׁלַם et יְרוּשָׁלַם potius pronuntiationi tribuendum censet Relandus (l. c. 835), quavis vulgo dicatur priorem esse dualem, eo quod Ierusalem in superio-

rem et inferiorem divisa sit; recentiores vero eam potius formationem localem agnoscunt. Forma ירושלים etiam in nummis machabaeis invenitur; cf. *Levy*, *Gesch. d. jüd. Münz.* p. 42 s. — Hierosolyma plerumque, sicut Ἱεροσόλυμα, est neutrum plur.; interdum in Vulgata (1 Mach. 1,22; 2 Mach. 3,9; Matth. 2,1 etc.) est fem. sing., sicut graecum Matth. 2,3. Eius loco etiam *Solyma* a poetis (*Martial.* XI. 94,5) et scriptoribus ecclesiasticis adhibetur (cf. etiam *Ioseph.* II. cc. et Ant. VII. 3,2, *ed.* Niese 67; *Tacit.* Hist. 5,2). — Ἱεροσολήμ in N. T. est communior forma in scriptis S. Lucae et S. Pauli et in Apocalypsi S. Ioannis, qui in Evangelio, uti S. Matthaeus (exc. 23,37) et S. Marcus, Ἱεροσόλυμα scribit.

II. Situs. Valles et Colles.

1. Urbs Hierosolymorum hodie, sicut olim, fere in centro antiquae provinciae Iudaeae sita est, « umbilicus terrae » a quibusdam haud incongrue appellata (*Flav. Jos. Bell.* II. 3,5 N. 52. Cf. Ez. 5,5). A mari Mediterraneo 32 kilometris, a Iordane 30 km distat, situmque occupat geographice pro ecclesia S. Sepulcri determinatum 31° 46' 43" lat. bor. et 33° 13' 25" long. orient. Greenwich. (sec. *C. R. Conder*). Altitudo urbis, si ambitum eius hodiernum consideramus, minima est 720 metr. (prope *Bāb el-Moghāribē*), maxima 790 m (prope angulum inter septentrionem et occiduum solis).

Colles hierosolymitani ad eam regionis montanae Palaestinae meridionalis partem pertinent, quae a vertice montium (818 m) orientem versus gradatim in depressionem profundam maris Mortui (— 393,8 m) descendit. Urbs ad ipsum aquarum inter mare Mediterraneum vallemque Iordanis divortium quam proxime accedit, quippe quod iuxta piscinam quam dicunt Mamillae collemque vicinum septentrionalem *Rūs el-Meshārīf* (817 m) seu Scopum transit. Omnis regio admodum arida atque saxosa est variisque torrentium faucibus discinditur, ex quibus hodie vix unus aut alter tempore pluviarum aquae rivulum exhibet. Geologice considerata ad formationem quam vocant cretosam pertinet, et in vicina urbis, immo intra ipsa eius moenia, optimos lapides calcarios atque marmoreos suppeditat,

aedificiis exstruendis aptissimos, ex quibus strata inferiora ab incolis hodiernis *meleke* (v. gr. in lapidinis regis prope portam damascenam), media vero *mizzi* (v. gr. in monumentis Absalom et Iosaphat), superiora *ka'kūle* (v. gr. in monte Oliveti) appellantur; praeterea species *nārī* praecipue pro focis construendis inservit. Etiam pyritae (*Feuersteine*) in regione abundant, praesertim in latere septentrionali et occidentali montis Oliveti, ubi clivus et putens et vallis a pyritis (*el-šūwān*) nomen acceperunt.

2. Ut accuratius collum quibus urbs superstruitur formam atque naturam cognoscāmus, varias regionis valles bene distinguamus oportet. Itaque duae valles profundae urbem extrinsecus ita cingunt, ut in uno latere septentrionali quasi isthmo quodam cum regione circumiacente cohaereat. Altera eaque praecipua, antiquitus torrens *Cedron* dicta, in parte boreali urbis occidentem versus ex pluribus minoribus valliculis (*Wādī Lūqā*, *Wādī el-djōz*) ortum ducit, quae in unam coniunctae (hodie *Wādī 'aqabet el-šūwān*) in orientem diriguntur; dein vero ad radices montis Olivarum eursum prorsus australem nomenque novum *Wādī Sitti Maryam* (i. e. vallis Dominae Mariae) et in parte inferiore etiam *Wādī Silwān* a pago vicino assumens, orientalem urbis partem ab eodem monte Olivarum et a monte Scandali seiungit, atque mox cum altera valle occidentali coniuncta et nomine communi *Wādī el-nār* i. e. vallis ignis appellata, inter meridiem et ortum solis ad mare Mortuum descendit. Altera autem haec vallis ab occidente, haud longe a priore, orta et per piscinam Mamillae transiens, in orientem directā ad murum occidentalem urbis accedit; prope portam eius principalem a Ioppe dictam in austrum conversa, sed mox iterum ad orientem vertens partem occidentalem et australem urbis attingit, in parte superiore *Wādī el-mēs* (ab arbore *Celtis australis* L., arab. *mēs*), mox *Wādī el-rabābi* dicta, donec priori valli unita unum cum illa nomen *Wādī el-nār* assumit.

Prior vallis in libris sacris, sicut in scriptis Fl. Iosephi, *torrens* s. *convallis*

Cedron, in parte inferiore etiam *campi Cedron* audit (v. CEDRON). Praeterea traditione Iudaeorum, Christianorum, Mahometanorum est *vallis Iosaphat*, ipso nomine locum iudicii generalis designans (v. IOSAPHAT 7). Altera autem vallis communiter *Gecnom* i. e. *vallis Eunom* (Vulgata Ios. 18,16 esse dicitur (v. ENNOM vallis), in qua olim abominationes cultus Molech celebrabantur in loco Topheth (v. TOPHETH). Iosephus hanc alteram vallem quam in descriptione urbis commemorat (Ant. XV. 41, 3, N. 410; Bell. iud. V. 4,1, N. 136. 141, nomine « vallis fontis » videtur designare (τῇν τῆς πηγῆς φάραγγα Bell. iud. V. 12,2, N. 303).

Haec procul a loco, ubi vallis australis et orientalis in unum conflunt, 450 fere metris superius, alia tertia vallis cum hac orientali coniungitur, quae in eadem regione septentrionali inter *Wādī Lūqā* et *W. el-mūs* orta, colles a duabus prioribus vallibus extrinsecus circumdatos medios a septentrione in austrum fere porrecta pertransiens in duas partes distinguit, occidentalem et orientalem. Ubi haec vallis, quae ab incolis nomine communi *el-Wād* « vallis » appellatur, fere cursum suum medium attingit, alia vallis lateralis ab occasu veniens se illi adiungit, quae collem occidentalem iterum in duas dividit partes, australem et septentrionalem. Similiter collis orientalis parva quadam valle laterali, quae ab occasu in torrentem *Cedron* descendit et a nonnullis *Caphetetha* (1 Mach. 12,37) vocatur, in partem meridionalem et borealem seiungitur.

3. Itaque urbs hierosolymitana super duos colles principales aedificata est, id quod Fl. Iosephus (Bell. iud. V. 4,1, N. 136 αὐτὴ μὲν [ἡ πόλις] ὑπὲρ δύο λόφων ἀντιπρόσωπος ἔκτιστο μέσῃ φάραγγι διαιρεμένη) et C. Tacitus (Hist. 5,11 « duos colles immensum editos claudabant muri » de antiqua urbe pariter testantur. Cum loci situs ab occasu ad orientem versus et ab aquilone in austrum gradatim descendat, collis occidentalis et partes boreales orientalem clivum partesque australes altitudine superant. Si spatium antiquae civitatis tempore Christi consi-

deramus, altissima urbis pars in colle occidentali (777 metra) super templum in medio colli orientali (744 m) situm 33 metris eminebat, super vallem vero interiori in parte eius media (c. 700 m) 77 m, in parte infima (623 m) prope fontem Siloe 132 m, atque super valles exteriores in media earum parte 100 fere metris.

In S. Scriptura Ierusalem dicitur fundata « in montibus sanctis » (Ps. 86 [87],1; cf. Ps. 47[48], 2, et « a collibus » urbis (יְרוּשָׁלַיִם) contritionem magnam futuram in poemam incolarum propheta praedicat (Soph. 1,10). Ex his collibus celeberrimus erat *mons Sion*, de quo mox specialius inquirendum erit, cum de partibus urbis agemus (n. VI). Collis orientalis, in quo templum a Salomone aedificatum est, a Chronista *mons Moria* appellatur (הַר הַמְּוֵרָה) 2 Par. 3,1; v. MORIA); pars eius meridionalis dicebatur *Ophel* (הַר הָעֶפְרַיִם 2 Par. 27,3 etc.; v. OPHEL). Extra ambitum antiquae urbis tempore Christi, ab Agrippa autem in eum inclusus, erat monticulus prae ceteris venerabilis *Calvaria* s. *Golgotha* (v. CALVARIA, GOLGOTHA), quem immerito nonnulli cum loco *Goath* a Ieremia commemorato componunt (Ier. 31,39; v. GOATHA).

4. Quamvis colles urbis respectu vallium circumiacentium satis emineant, undique tamen altioribus montibus circumdati sunt: « Ierusalem, montes in circuitu eius » (Ps. 124 [123],2; cf. « habitatrix vallis » Ier. 21,13 et I. *Knaubauer* in h. l.: ts. 22,1. 3; Soph. 1,11). Ab oriente *mons olivarum* s. *oliveti*, hodie *Djebel el-Tūr* vel etiam *Dj. zeitūn* nominatus, ad altitudinem 818 m exurgit, vallem Cedron fere 130 collemque orientalem urbis 74 metris excedens; pars australis ipsius ab incolis *Djebel batū el-hawa*, a peregrinis communiter *mons scandalī* appellatur nec improbabili-ter dicitur esse ille *mons offensionis*, ad cuius dexteram partem Salomon excelsa idolorum Astaroth, Chamos, Melchom erexerat (4 Reg. 23,13; v. OFFENSIO-NIS MONS, OLIVARUM MONS).

Ab occasu solis mons ille eminet,

« qui est contra Geennom ad occidentem in summitate vallis Raphaim contra aquilonem » (Ios. 15,8; 18,16), altitudinem 796 m attingens, qui haud immerito censetur esse collis *Gareb* a Ieremia commemoratus (Ier. 31,39; v. GAREB); pars eius australis (777 m), in cuius ascensu declivi ager *Haceldama* ostenditur (v. HACELDAMA), Arabibus *Djebel abu tūr* vocatur, peregrinis vero est *mons mali consilii*, eo quod ibi villa Caiphae pontificis putatur fuisse, in qua « consilium dederat Iudaeis : quia expedit unum hominem mori pro populo » (Io. 11,49 s.; 18,14).

Inter aquilonem et occasum colles prope moenia 800 metra superant et haud procul ad 818 m assurgunt (*Karm Ahmed* et *Rūs el-nādīr*), eandemque altitudinem montes septentrionales antiquitus *Scopus* vocati attingunt (Σκοπός *Flav. Ios. Ant.* XI. 8,3, N. 329 [a Iudaeis Σαφειν dictus]; *Bell. iud.* II. 19,4. 7, N. 328. 342; V. 3,2, N. 106. 108).

Urbs sancta, cum hisce montibus undique circumdata sit, nonnisi ex locis propinquis ipsisque collibus vicinis videri potest, ex quibus peregrinis medii aevi celeber erat « *mons gaudii* » iuxta viam inter aquilonem et occasum situs, « e quo diu desiderata conspicitur Ierosolyma » (*S. Theotoni* peregrinatio a. 1112, Acta SS. Febr. III. p. 114).

5. De celeberrima controversia quoad colles a *Fl. Iosepho* in descriptione patriae urbis memoratos verbum addere iuvabit. Textus praecipue considerandus est initium illud notissimum descriptionis *Bell. iud.* V. 4,1 et 2 (*ed. Niese* n. 136-141 et 149).

Iam vero, ut a notioribus incipiamus, quattuor intra moenia urbis colles auctor iudaeus distinguit : primus « ille cui superior civitas insidet, longe erat excelsior et in longitudinem directior, adeoque propter munitionem castellum (s. specula, φρούριον) quidem a rege David appellabatur, a nobis autem forum superius (ἡ ἄνω ἀγορά) » (N. 137). Satis constat primum hunc collem esse australem partem collis occidentalis, quam super clivum orientalem 33 metris eminere diximus. Alter pariter satis notus est collis Bezetha (Βεζεθὰ = בית הדתא,

λαινópolis vel = בית דתא, « domus olivae »), quarto loco a Iosepho commemoratus, borealis scil. collis orientalis pars, e regione templi et arcis Antoniae (v. infra) sita et parva valle naturali ac profunda fossa ab ea disiuncta, quae post Christi aetatem a rege Agrippa urbi addita est (N. 148 s.).

Dissentiant vero auctores praecipue in duobus aliis collibus definiendis, qui a Iosepho secundo et tertio loco enumerantur, Aera scil. « qui inferiorem sustinebat civitatem » et huic ex adverso situs tertius collis. Iam consideranti auctorem nostrum in describenda urbe specialiter ad varia ipsius moenia attendere, templum autem altissimis muris undique circumdatum ab eodem semper tamquam urbi oppositum et in proprio clivo collocatum designari, satis probabile videbitur, montem templi alterutrum istorum collium necessario censendum esse; at non Acram : ergo tertium illum collem huic ex adverso situm.

Porro Aera sive collis secundus, qui inferiorem sustinebat civitatem, a templo olim lata valle separabatur (πλατεία φάραγγι διεσπόμενος), quae ab Hasmonaeis aggeribus ingestis completa est, eo animo, ut civitas cum templo coniungeretur : itaque eo tempore quod in descriptione nostra consideratur, vallis illa iam non apparebat. Praeterea collis ille secundus natura altior erat, quam tertius, templumque supereminerebat; sed ab iisdem Hasmonaeis, scil. a Simone Machabaeo († 135 a. Chr.), ingentium annorum labore in planum deductus est, ita ut templum iam altitudinem illius superaret (N. 139. Cf. *Ant.* XIII. 6,7, N. 215-217; *Bell. iud.* I. 1,4 2,2, N. 39. 50). Facto huius demolitionis fidem negare idem videtur atque omnem Iosephi auctoritatem historicam evertere. A primo autem colle fori superioris secundus ille inferiorem sustinens civitatem media valle seiunctus erat, quae usque ad fontem Siloe descendens *Tyropoeon* (ἡ τῶν τυροποιῶν προσαγορευμένη φάραγγις « vallis caseos conficiendum ») appellabatur (N. 136. 140); forma denique huius collis secundi ἀμφικυρτος dicitur (N. 137) i. e. probabilis utraque extremitate curvatus ad

modum lunae crescentis (cf. *H. Reland Palaest.* p. 852).

Iam vero hisce indicibus omnibus atque reliquis textibus, ubi Iosephus de Aera seu urbe inferiore loquitur (cf. Ant. XII. 5,4; 9,3, N. 252. 362 ss.; Bell. iud. IV. 9,12, N. 581; V. 6,4, N. 253; VI. 6,3, N. 354 s. etc.), maiore cum probabilitate videtur satisfieri dicendo, urbem inferiorem seu Acram sensu latiore a Iosepho vocari illam urbis partem, quae clivo meridionali collis orientalis et septentrionali iugo collis occidentalis insidebat: quae quidem collium partes, naturaliter quidem separatae, impleta tamen superiore parte vallis *el-wād* inter templum et oppositum clivum collis occidentalis interiacentis, et ipso templo alto muro a reliquo monte disiuncto, tamquam unus collis utraque extremitate ad modum lunae crescentis curvatus (*ἀμφικύρτος*) considerari potuerunt. Sensu autem strictiore Aera videtur intellegendum de arce seu acropoli in parte illa septentrionali collis occidentalis olim sita (v. infra VII. 4). Vallis vero Tyropoeon, quae Acram sensu latiore a foro superiore dividebat, et ipsa *ἀμφικύρτος*, probabilius secundum hanc opinionem erit inferior pars vallis interioris *el-wād* ad fontem Siloe descendens et vallis illa lateralis ab occasu veniens, quam collem occidentalem in partem australem et septentrionalem discernere et mediae valli *el-wād* se adiungere superius diximus.

In magna huius controversiae obscuritate tantaque opinionum varietate sententiae expositae, quae fere cum opinione comitis *de Vogüé* et cl. *Ch. Warren* et *A. Schultz*, atque ex parte etiam cum *E. Robinson*, *C. Schick* aliisque concordat, tamquam probabiliori adhaerendum censemus, quamquam neque hanc omni difficultate carere libenter concedimus.

Praeter auctores inferius citandos cf. *C. Zimmermann*, Karten und Pläne zur Topographie des alten Jerusalem, Basel 1876, cum « Begleitschrift »; *C. Schick-I. Benzing*, Karte der näheren Umgebung von Jerusalem, in *Ztschr. d. D. Pal.-Ver.* XVIII. 1895, Tab. 4. — De conditionibus geologicis cf. *O. Fraas*, Aus dem Orient (I), Stuttgart

1867, p. 49-59; *M. Blanckenhorn* in *Ztschr. d. D. Pal.-Ver.* XV. 1892, p. 56 s.; XIX. 1896, p. 19-23 et tab. 3, Profil I et II. — De re climatica v. *V. Guérin*, Jérusalem p. 188-90; *Th. Chaplin* et *O. Kersten*, Das Klima von Jerusalem, *Ztschr. d. D. Pal.-Ver.* XIV. 1891, p. 93-112; *J. Glaisher* in *Quart. Stat.* 1896 et ss. — De collibus generatim cf. *H. Reland* Palaest. p. 850-5; *Ed. Robinson*, Palaestina II. p. 12-17. 31-45; *K. Ritter*, Erdkunde XVI. p. 315-27; *T. Tobler*, Topogr. von Jerus. I. p. 14-52; *V. Guérin*, Jérusalem p. 181-92; *F. Buhl*, Geogr. d. alt. Palaest. p. 93-6. 132 s. — De topographia *Fl. Iosephi* cf. *E. Robinson* l. c. p. 45-53; *W. Krafft*, Die Topographie Jerusalems, Bonn 1846, p. 1-13. 49-52; *T. Tobler* l. c. p. 29-39; *Chr. Ed. Caspari* in *Theol. Stud. u. Krit.* 1864, p. 309-28; *F. Spiess*, Das Jerusalem des Iosephus, Berlin 1881; v. *Klaiber* in *Ztschr. d. D. Pal.-Ver.* III. 1880, p. 189-213; IV. 1881, p. 18-56; XI. 1888, p. 1-37; *G. Galt* ib. X. 1887, p. 182-7; *id.* in *Theol. Quartalschr.* LXVI. 1884, p. 34-84; LXXI. 1889, p. 77-125; *id.*, Die Hügel von Jerusalem, Freiburg i. B., 1897; *M.-J. Lagrange* in *Rev. bibl.* I. 1892, p. 18-25; *Alf. Schultz* in *Theol. Quartalschr.* LXXXII. 1900, p. 356-89.

III. Aquae. 1. *Aquarum copia.* *Strabo* urbem Hierosolymorum « intus aquis abundantem, exterius omnino siccam » scribit (ἐντὸς μὲν εὐυδρον, ἐκτὸς δὲ παντελῶς διψηρόν XVI. 2,40, ed. *Casaub.* p. 762; item n. 36, ib. p. 761). Similiter *Timochares* penes *Eusebium* (Praep. evang. 9,35, *Migne* 21,756 B) civitatem ipsam aquis fluere, ita ut etiam ad hortos irrigandos sufficerent, regionem vero circumiacentem usque ad 40 stadia inaquosam esse asserit. Unde et *Fl. Iosephus* Syros sub Antiocho urbem obsidentes et *Dio Cassius* Romanos sub Tito et *Guilelmus Tyrius* Francos sub Godofredo magna aquarum penuria laborasse narrant (*Ios. Ant.* XIII. 8,2, N. 237; *Dio Cass.* 66,4; *Guil. Tyr.* 8,4. 7. 24. *Migne* 201, 410 D. 414 s. 432 B), incolas vero neque in Scriptura neque in historiarum libris unquam vel ipso gravissimae obsidionis tempore aquarum inopiam passos esse legimus; immo, urbe capta crucigero « aquae ingentes copias » in domibus invenerunt (*Guil. Tyr.* 8,24. *M.* 201, 432 B).

Porro quinque potissimum modis an-

tiquitus, sicut ex parte etiam hodie, incolis aquae suppeditabantur : fontibus scilicet, puteis, cisternis, piscinis, aquae ductibus.

2. *Fontes* intra ambitum ipsius urbis haberi non satis videtur constare. In sermone prophetico describitur quidem fons aquae abundantis subter limen templi ad orientem egredientis (Ez. 47,1-12. Cf. Joel 4,18; Zach. 13,1; 14,8); sed inde verus fons in monte templi existens probari nequit. Ea vero quae in epistula Aristaeae (n. 88-91) et in Talmude de aquis templi referuntur, potius de cisternis et aqueductibus videntur intelligenda. At *Tacitus*, « templum in modum arcis » porticusque eius « egregium propugnaculum » describens addit : « Fons perennis aquae, cavali sub terra montes, et piscinae cisternaeque servandis imbribus » (Hist. 5,12) : ubi « fons perennis aquae » fortasse de iisdem aqueductibus interpretandum erit, quamvis ab ipso scriptore pro vero fonte sumatur (v. infra).

Nomen tamen fontis ab aliquibus tribuitur aquis quae hodie *ʿAin el-shefā* i. e. « fons salutis » audiunt quaeque balneis salutaribus *Hammām el-shefā* iuxta latus occidentale templi prope *Sūq el-qaltānīn* inserviunt (cf. *Robinson; Tobler*); at neque ibi fons proprie talis, sed potius puteus (*Bīr Hammām-el shefā*) aquis paulatim percolantibus excipiendis accommodatus videtur inveniri (cf. *Schick*). Fuerunt autem qui ibidem aquas intermittentes piscinae Bethesdae supposuerint (v. infra).

Etiam aquae Siloe a nonnullis auctoribus « fons Siloe » appellantur (*Flav. Ios. Bell. iud. V. 4,1 et 2; 9,4. N. 140. 143. 409 s.*) atque hodie quoque *ʿAin Silwān* dicuntur, quamquam potius eo canalīs aquam a fonte extra moenia sito eo perducentis ibidem inveniat (v. *SILOE*).

Extra urbem idem hic fons, *ʿAin Sitti Maryam* « Fons Dominae Mariae » vel *ʿAin umm el-daradj* « Fons graduum » dictus, hodie unicus fere est cui appellatio fontis merito competat. Ad austrum templi in latere dextro seu occidentali vallis Cedron situs est sub clivo Ophel, et aquam suppeditat a Iosepho aliisque « dulcem et abundantem » dictam (Bell.

iud. V, 4,1, N. 140), sed quae hodie salsum potius et iniucundum saporem habeat et vario atque intermittente fluxu neque adeo abundante ex interiore rupe profluat.

Cum in libris sacris fons Rogel (*Ios. 15,7 etc.; v. ROGEL*) et fons draconis (*Neh. 2,13; v. DRACONIS FONTS*) et aquae Gihon (2 Par. 32,30 etc.; v. *GIHON*) in vicinia urbis commemorantur (cf. 2 Par. 32,3 s.), fons ille Dominae Mariae ab aliis Rogel, ab aliis Gihon, nec non etiam fons draconis existimatur; probabilius Rogel dicitur.

Praeter dictum fontem Virginis tres temporanei fontes aquis pluvialibus per aliquam anni partem nutriti in vicinia urbis inveniuntur : *ʿAin el-lōze* infra *Bīr Eiyūb* in valle Cedron inferiore, *ʿAin el-mudawwara* et *ʿAin el-šūwān* in latere septentrionali montis Oliveti.

Etiam antiquitus prope urbem plures exstistisse fontes patet ex historia Ezechiae, qui « inito cum principibus consilio virisque fortissimis, ut obturarent capita fontium (פְּתֵי הַמַּיִם הַחַיִּיִּתִּים), qui erant extra urbem,... congregavit plurimam multitudinem et obturaverunt cunctos fontes, et rivum qui fluebat in medio terrae » (LXX τὸν ποταμὸν τὸν διαρρέοντα διὰ τῆς πόλεως 2 Par. 32,3 s.). Ubi nam fuerit ille rivus (הַנָּחַל), non constat (cf. *E. Robinson, Neue Untersuch. über die Topogr. Jerus. p. 111; R. v. Riess, Atlas S. Script., 1896, p. 11*). Similiter *Fl. Iosephus* plures fontes in regione suburbicaria commemorat (*Bell. iud. V. 9,4, N. 410 τὴν τε Σιλωὴν... καὶ τὰς πρὸ τοῦ ἁγίου ἁπλάσας [πηγὰς]*), et vallem hodie *Wādī el-Rabābi* dictam (vallis Hinnom) vallem fontis (τῇ τῆς πηγῆς φάραγγα) appellat (*Bell. iud. V, 12,2, N. 505*).

3. *Putei* (arab. *bīr*, hebr. בְּיָר), medium locum inter fontem et cisternam tenentes, etiam in antiqua urbe probabiliter haud rari inveniebantur. Amplitudine haud adeo magna ex ipsa rupe excisa, aquis per varia strata percolantibus excipiendis inserviebant; quas tamen ubi neglegenter constructae erant, propter fissuras rupis non valebant continere (*Ier. 2,13*). Os talis putei lapide

magno, plerumque rotundo, claudebatur (Gen. 29,2 s.; Lam. 3,53).

In ipsa urbe notissimus est puteus ille salutis quem modo commemoravimus (*Bir hammūm el-shefī*). Etiam in nonnullis domibus privatis antiquitus, sicut hodie, puteos fuisse exemplo viri illius in Bahurim, qui habebat puteum in vestibulo suo (2 Reg. 17,18 s.), docemur. Etiam in area templi (*Harām el-shefī*) plures putei inveniuntur.

Extra moenia vero celeberrimus est puteus Iob (*Bir Eiyūb*; Iudaeis puteus Iob) infra Siloe situs, a peregrinis (inde a saec. 16.) saepe « puteus Nehemiae » vel « puteus ignis » (cf. vallis ignis, *Wādī el-nār*) dictus, eo quod puteus ille altus et siccus credebatur, in quo Nehemias ignem tempore exilii a sacerdotibus ibidem absconditum reperit (2 Mach. 1,49 ss.). Altitudinem 38 m attingit, et per totum annum aquam optimam praebet, quam aestivo tempore etiam Hierosolymis vendunt. Post pluvias abundantes aqua haud raro redundat rivulantes in valle torrentis format, id quod incolae tamquam futurae fertilitatis omen laeti excipiunt.

Interpreti arabi textus Ios. 15,7 in Polyglottis vulgato multisque auctoribus recentioribus est fons Rogel, sed potius ille puteus profundus videtur dicendus esse, quem Iohannes III, patriarcha hierosolymitanus, anno 518 p. Chr. exstruxisse a Cyrillo Scythopolitano, coaevo scriptore, narratur (Vita S. Sabae c. 67). Quare alteram opinionem praefereendam et fontem Rogel eundem cum fonte Dominae Mariae dicendum esse arbitramur (v. ROGEL).

4. *Cisternae* in urbe plurimae habentur servandis imbris vel etiam aquis aliunde adductis accommodatae; nam cum fontes intra urbem non inveniantur, neque putei sufficerent, imbres vero mensibus hibernis tantum ab Octobri vel Novembri ad Aprilem vel Maium cadant, quavis aetate incolae praecipue cisternis magnis et multis construendis sibi aquae copiam pro tempore aestivo procurare debuerunt. Quare iam Moyses Israelitis inter alia bona terrae promissae cum domibus plenis cunctarum opum, quas non exstruxerint, etiam ci-

sternas quas non foderint promittit (Deut. 6,11). Atque re vera vix ulla in urbe invenietur domus quae cisterna careat (cf. Prov. 5,15; Is. 36,16, etc.), et in maioribus aedificiis permultae et magnae ingentem optimae atque frigidae (cf. Ier. 6,7) aquae copiam praebent.

Antiquiores communiter in ipsa rupe excisae sunt, parietibus bene laevigatis et caemento coopertis; recentiores vero plerumque muris et concameratione arte factis construuntur. Forma et magnitudine diversissimae sunt, modo oblongae, modo quadratae, modo rotundae, maiores vel minores, prout loci conditio permiserit atque necessitas postulaverit. Ut plurimum duo vel etiam plura ora habent, lapidibus clausa, quorum alterum excipiendis, hauriendis alterum aquis inservit. Imbres vero ex tecto et vestibulo atque impluvio in unum collecti in cisternas ducuntur.

Praecipue area templi pernullis ingentibusque cisternis instructa erat (cf. *Aristeas*, *Tacitus* l. cit.); ibi probabiliter maxima cisterna in diebus Simonis, sacerdotis magni, constructa est (Eccli. 51, 3 hebr.), atque hodie in eadem 34 cisternae variae capacitatis puteique inveniuntur (*C. Schick*, Tempel in Jerusalem, p. 292-305 et Tab. IV et IX).

Cisternae siccuae, versus finem aetatis non iam aquam sed lutum continentes, etiam in carcerem adhibebantur, uti in historia Ieremiae legimus (Ier. 38,6-13. Cf. Lam. 3,53; Ps. 68,3; Zach. 9,11; Vulg. *lacus*). Quae cisterna Ieremiae erat in domo Melchiae filii regis (Vulg. *filii Amelech*) in vestibulo carceris (cf. Neh. 3,25); peregrinis olim ostendebatur prope piscinam Siloe et portam civitatis (*Theodosius* c. 8; *Anonymus* [*Antoninus*] c. 24, ed. P. Geyer, p. 142,4 s.; 175,20 s.) vel etiam iuxta aream templi in loco putei salutaris (*Hammām el-shefā*). Cf. *D. Zancchia*, La Palestina d'oggi I. p. 244), hodie vero extra urbem ante portam damascenam iuxta cavernam, quae ab eodem propheta nomen accepit (*Fr. Liévin de Hamme*, Guide indicateur de la Terre Sainte, ed. 4, I. p. 481).

5. *Piscinae* eodem fere modo ac cisternae constructae sunt, sed plerumque maiorem amplitudinem habent et tecto

vel concameratione carent. Communiter ex rupe excisae, sed in vallibus etiam muris aggeribusque formatae, imbribus colligendis vel aquis aliunde adductis excipiendis inserviebant.

Hodie in urbe quattuor piscinae maiores visuntur : *Birket Hammām el-Baṭraq*, *B. el-Burak*, *B. Isrā'īm*, aliaeque recen-ter prope ecclesiam S. Annae detecta; extra moenia in vicinia urbis quinque aliae inveniuntur : duae prope Siloe, ex quibus inferior *Birket el-Hamrā* appellatur; praeterea *Birket el-Sulṭān*, *B. Mā-milla*, *B. Sitti Maryam* seu *B. el-Asbūt*. Praeterea etiam in regione septemtrionali extra urbem reliquiae veterum piscinarum apparent.

In libris sacris commemorantur imprimis piscina Siloe et Bethesda sive Bethesda (v. SILOE, BETHSAIDA piscina). Eadem cum piscina Siloe videtur esse piscina regis (הַבֵּרֶכֶת הַמְּלִיכִיָּה) *αὐαγωγὴ τοῦ βασιλέως*; Vulg. *aquaeductus regis* Neh. 2, 14), ad quam Nehemias a porta vallis egressus post fontem draconis et portam stercoris ac portam fontis pervenit. Minus vero probabiliter etiam lacus (בְּרִיקָה) inter duos muros, ad quem aquae piscinae veteris (הַבֵּרֶכֶת הַיְשָׁנָה) colligebantur (Is. 22,11), et piscina inferior (הַבֵּרֶכֶת הַתַּתְּיוֹנָה) LXX ἡ ἀρχαία ἀποχύημα. Is. 22,9) cum piscina Siloe identificantur; quae ubinam fuerint, non satis videtur constare. Idem valet de « piscina quae grandi opere constructa est » (הַבֵּרֶכֶת הַגְּדוֹלָה, ἡ ἀποχύημα ἡ μεγάλη), quae in aedificatione murorum prope sepulcrum David et domum fortium commemoratur (Neh. 3,16).

Neque etiam de piscina superiore (הַבֵּרֶכֶת הַגְּבֹהָה, ἡ ἀποχύημα ἡ ὕψους) operibusque Ezechiae regis quidquam certi videtur affirmari posse. Laudatur imprimis Ezechias quod « fecerit piscinam et aquaeductum et introduxerit aquas in civitatem » (4 Reg. 20,20), et quod appropinquantibus Assyriis obturaverit cunctos fontes qui erant extra urbem et rivum qui fluebat in medio terrae (2 Par. 32,3 s.); eadem laus repetitur in eodem capite cum speciali mentione aquarum

Gihon : « Ipse est Ezechias, qui obturavit superiorem fontem aquarum Gihon, et avertit eas subter ad occidentem urbis David » (2 Par. 32,30; v. GIHON) atque iterum in libro Ecclesiastici : « Ezechias munivit civitatem suam et introduxit (hebr. introducendo) in medium ipsius aquam, et fodit ferro rupem et aedificavit ad aquam puteum » (hebr. et obstruxit montes [ad] lacum, וַיַּחְסֹם הַרִים מוֹקֶה) (Eccli. 48,69 gr. 17). Quamquam nomen piscinae Ezechiae hodie communiter piscinae *Birket Hammām el-Baṭraq* tribuitur, quae per aquaeductum antiquum imbres in piscina Mamillae collectos excipit, minime tamen extra dubium versatur, opera illa Ezechiae tribuenda esse, licet tunc etiam piscina superior facile reperta videatur. At neque id satis probatur, quod pluribus recentioribus placuit, piscinam et aquaeductum Ezechiae in piscina et canali Siloe haberi, neque certum est ea ex parte septemtrionali quaerenda esse (v. GIHON).

Piscina vero superior solummodo tamquam terminus aquaeductus nominatur in via agri fullonis (4 Reg. 18,17; Is. 7, 3; 36,2); sed ex verbis Scripturae haud certe apparet, utrum terminus a quo an terminus ad quem illius aquaeductus intellegendus sit, neque utrum ipsa piscina (Vulg. quae est in via; LXX ἡ ἐστὶν; sed hebr. אֲשֶׁר) an vero aquaeductus in via agri fullonis indicetur, nec denique ex qua parte ille ager reperiatur. Quare minime mirum videbitur quod alii piscinam extra urbem, alii cum *R. Riess* intra eam quaerant, aut quod ager fullonis et aquaeductus ex parte occidentali (communius) et septemtrionali (*Riess*) et orientali vel australi (*M.-J. Lagrange* in Rev. bibl. I. 1892, p. 33 s.) locentur. Attamen ex textibus citatis illud saltem cum aliqua probabilitate concludere possumus latus occidentale et septemtrionale urbis potius quam australe et orientale in hac quaestione considerandum esse : nam nuntii a rege Assyriorum ex Lachis cum exercitu magno Hierosolimam missi et cum legatis Ezechiae atque populo super murum sedente colloquentes, probabiliter in angulo occi-

dentali vel in latere septentrionali constiterunt, ubi et facultas propius ad muros accedendi et opportunitas castra metandi militibus dabatur (4 Reg. 18, 17 ss.; Is. 36,2 ss.); similiter tertio textui (Is. 7,3) eadem regio conformior apparet. Atque sub hoc saltem respectu antiqua sententia, quae piscinam superiorem esse *Birket Māmilla*, aquaeductum vero eius canalem imbres inde ad *Birket Hammām el-Baṣraq* adducentem supponebat, textibus satis conformis invenitur.

Piscinam autem illam superiorem et aquaeductum iam tempore Achaz ab Isaia commemorata (Is. 7,3) nihilominus opus esse Ezechiae, successoris Achaz, aliqui censent, cum propheta postea coaevus Ezechiae nuntium suum ad regem Achaz describens facile illam determinationem regionis addere potuerit.

In scriptis Fl. Iosephi praeterea commemorantur *piscina Salomonis* prope Siloe (Bell. iud. V. 4,2, N. 145), *Struthion* prope arcem Antoniam (Bell. iud. V. 11,4, N. 467; = *Birket Isrā'īn* vel alia piscina prope aream templi, nunc domibus occupata; cf. *Schick*), *Amygdalon* i. e. piscina turrim (בגדלן) (Bell. iud. I. c., N. 468; = *Birket Hammām el-Baṣraq*), *piscina serpentum* (ἡ τῶν ὄφειων ἐπιταλαιμένη κολυμβήθρα) iuxta monumentum Herodis in superiore parte vallis Hinnom (Bell. iud. V. 3,2, N. 108; forsasse = *Birket el-Sūltān*; alii = *B. Māmilla*. Cf. DRACONIS FONDS).

6. *Aquaeductus* plures urbi maiorem aquarum copiam adduxerunt, cum praesertim pluviis deficientibus neque piscinae neque cisternae neque fontes putei sufficerent. In libris sacris commemorantur aquaeductus piscinae superioris et aquaeductus Ezechiae, de quibus diximus (cf. etiam GHON). Finis utriusque erat, ut aquae fontium in vicina extra urbem manantium hostibus subtraherentur et civibus prodessent. Canalis Ezechiae subterraneus erat (2 Par. 32,30) et fodiendo ferro rupem (Ecli. 48,19) constructus; simili ratione aquaeductum piscinae superioris factum esse ex aliis canalibus antiquis probabiliter supponimus, neque opus est, ut cum *R. Riess* cum apertum illum

rivum fuisse dicamus, qui fluebat in medio terrae (2 Par. 32,4; LXX δὲ τῆς πόλεως).

At praeter illos duos iam in antiqua urbe plures alios aquaeductus existisse constat. Imprimis in templum aquae variis canalibus adducebantur; septentrionalem intellegere videtur Aristeas (n. 91 apud *E. Kautzsch*, *Apokryphen und Pseudepigraphen* II. 13), australem vero indicant Talmudistae, qui de fonte Etam in templum adducto saepe loquuntur (cf. *Lightfoot*, *Schwarz*, *Neubauer*). Etam vero inter Bethlehem et Thecue sita erat (2 Par. 11,6), probabiliter ubi hodie *Khirket el-Khōkh* invenitur (*T. Tobler*, *Dritte Wanderung* p. 89; *C. Schick*, *Ztschr. d. D. Pal.-Ver.* I. 1878, p. 132 s.) atque etiam nunc duplici aquaeductu cum urbe coniungitur (v. infra).

Fl. Iosephus vero Salomonem eundem locum Etam (Ἐτάμ) hortis fontiumque rivis amoenum frequentasse narrat (Ant. VIII. 7,3, N. 186), Pilatum autem expensis thesauri sacri (χορθωνῆς) aquaeductum ducentorum (Ant. XVIII. 3,2, N. 60) vel quadringentorum stadiorum (Bell. iud. II. 9,4, N. 175, ubi antiqua versio latina et textus Eusebii 300 exhibent) Hierosolymam usque exstruxisse. Idem regem Herodem maximis sumptibus aquam e longinquo ad castellum suum Herodium adduxisse refert (Ant. XV. 9,4, N. 325; Bell. iud. I. 21,10, N. 420), atque etiam turrim Hippicam aquaeductum proprium habuisse (Bell. iud. V. 7,3, N. 304).

Iam si reliquias veterum aquaeductuum consideramus, septem vel octo hucusque noti sunt. Duo vel tres canales ad aquas fontis *ʿAin Sitti Maryam* intra ambitum antiquae urbis adducendas olim inserviebant (v. *SILOE*); alius, quem magnificentissimum describunt, ex parte septentrionali ad urbem et templum accedebat (cf. *C. Schick*); duo ab occasu solis inventi sunt, quorum alter etiam nunc imbres ex *Birket Māmilla* ad piscinam Ezechiae adducit. Praeterea aquaeductus duplex ex *Wādī ʿArrūb* et *W. el-Biyār* inter Bethlehem et Hebron, per Etam et piscinas a Salomone dictas transiens, urbem attingit, et usque hodie alter, ubi non nimis neglegitur, aquam sitientibus praebet;

canalis vero lateralis ex iisdem piscinis in *Wādī Urfās* sitis ad *Djebel Fureidis* descendit, ubi ruinae castelli Herodii repertae sunt. Denique in excavationibus nuper in colle occidentali factis aquaeductus vetustissimus ibidem repertus est, qui fortasse cum dicto canali ex *Wādī el-Biyār* olim coniunctus erat (cf. *F. J. Bliss*).

De aetate auctoribusque horum operum controversitur. Satis communiter aquaeductus inferior longiorque ex *Wādī Arrūb* Herodi adscribitur, cum eiusdem sit formae et constructionis atque canal is lateralis ad Herodium descendens. Pilato autem multi reparationem tantum huius longioris et alterius brevioris aquaeductus ex *Wādī Biyār* attribuunt, ex quibus ille inferior 400 fere, superior 200 stadiorum longitudinem attingit; auctorem vero brevioris canal is et piscinarum esse Salomonem haud pauci affirmant (cf. *Ecl. 2,5 s.*), aliis e contrario contendentibus hunc Romanorum esse opus, sub Septimio Severo, duodecim fere saeculis post magnum illum regem Israelis exstructum (*Germer-Durand*; cf. *Rev. bibl. X. 1901, 106-9*).

Cf. *Joh. Lightfoot*, Disquisitio chorogr. Joanni praemissa 5,5, ed. *Leusden* II. p. 589 s.; *Fr. Quaresmius*, *Eluc. Terrae S.*, I. VI. peregr. 7., c. 1., ed. *Venet.* II. p. 575 s.; *H. Relandi* *Palaest.* p. 299-301. 303 s.; *E. Robinson*, *Palaest.* II. p. 124-69; *id.* *Neuere bibl. Forsch. in Pal.* p. 317-27; *Ios. Schwarz*, *Das h. Land*, p. 220-9; *W. Krafft*, *Die Topographie Jerusalems*, p. 120-38; *K. Ritter*, *Erdkunde XVI.* p. 272-81. 441-56; *T. Tobler*, *Denkblätter aus Jerusalem* p. 35-87; *id.* *Dritte Wanderung nach Palaest.* p. 212-26; *K. v. Raumer*, *Palaest.*, ed. 4. p. 332-7. *Ad. Neubauer*, *Géogr. du Talmud* p. 146 s.; *V. Guérin*, *Judée III.* p. 110-9. 303-9; *J. Sepp*, *Jerusalem und d. h. Land*, ed. 2, I. p. 321-47; *Rich. v. Riess*, *Bibl. Geographie* p. 75-8; *id.* *Bibel-Atlas* ed. 3 p. 25-7; *id.* *Atlas S. Script.* p. 11; *C. Schick*, *Die Wasserversorgung der Stadt Jerusalem* in *Ztschr. d. D. Pal.-Ver.* I. 1878, p. 132-76 et tab.; *id.* *ib.* VIII. 1885, 41-5; XIII. 1890, 229; *F. J. Bliss*, *Excavations at Jerusalem* p. 11. 53-6. 332-41.

IV. Moenia. 1. Urbem hierosolymitanam et situ naturali et moenibus turribusque superstructis firmissimum fuisse

munimentum auctores sacri pariter et profani testantur (cf. *Strabo* XVI. 2,40 ed. *Casaub.* p. 763; *Tacitus*, *Hist.* 5,14 s.; *Fl. Iosephus*, *Bell. iud. V. 4,1 s.* etc.; *Dio Cass.* 66,4; *Fragm. Hist. Graec.*, ed. *Didot* III. p. 228, etc.). Communiter post *Fl. Iosephum* triplicem murum distinguunt, non quasi urbs undique triplice muro cincta fuerit, sed quod primitivo muro a Davide et Salomone constructo postea ex parte septentrionali alter et tertius murus superadditus sit. Praeterea vero area templi propriis moenibus circumdata aliisque aula regia munita erat (*Tacitus* l. c.; *Fl. Ioseph.*, *Bell. iud. V. 4, 4, N. 177*).

In S. Scriptura varii circa moenia urbis labores commemorantur; quibus illustrandis iuvabit ambitum urbis, qualis variis saeculis fuerit, singillatim considerare, comparatis inter se auctorum sacrorum et profanorum relationibus atque iis quae ex situ naturali et ex reliquiis in ruinis repertis apparent conditionibus.

2. Urbs Iebusaeorum quousque se extenderit, ignoramus. Tempore Iosue sub rege Adonisedec erat, qui quattuor Amorrhaeorum reges urbium Hebron, Ierimoth, Lachis, Eglon ad foedus contra Gabaonitas et contra Israelē secum incundum invitavit (*Ios. 10,3*); ceteris vero urbibus in circuitu expugnatis, Ierusalem diutius aggressoribus resistebat (cf. *Iud. 19,11 s.*), et quamvis filii Iuda urbem postea ceperint (*Iud. 1,8*), tamen superior civitatis pars cum arce in potestate Iebusaeorum remansit (2 *Reg. 5,6 s.*; 1 *Par. 11,4 s.*), ita ut Iebusaei et filii Iuda in Ierusalem simul habitarent (*Ios. 15,63*). Unde id saltem apparet, urbem iam tunc satis amplam fuisse atque firmissimam, duasque habuisse partes distinctas, arcem et inferiorem civitatem. *Fl. Iosephus* duplicem hanc Iebusaeorum urbem (τὴν πόλιν — ἣν καὶ παρεθὲν) expresse distinguit et superiorem « murorum firmitate et natura loci difficulter expugnabilem fuisse » refert (*Ant. V. 2,2, N. 124*). Ex iis vero quae tabulae in *Tell el-Amarna* inventae de Abd-Khiba, rege urbis *Urusalim*, exhibent, id unum iure concludimus, Ierusalem ea aetate (c. 1400 a. Chr.) satis

conspiciam inter urbes palaestinas regis Aegypti fuisse.

Ex naturali loci conditione atque ex iis quae de arce Sion et civitate David referuntur (v. infra), urbem Iebusaeorum in parte australi collis occidentalis possitum sitam fuisse probabiliter supponimus, cui deinde paulatim inferior urbis pars in valle adiacente et clivo orientali adiuncta fuerit. Saltem urbem superiorem moenibus cinctam fuisse, ex eius firmitate et ex verbis Moysis concludimus, qui Israelcem traiecit Iordanem possessurum dicit « nationes maximas et fortiores te, civitates ingentes et ad caelum usque muratas » (Deut. 9,1). Excavationes nuper (1894-1897) ab Anglis in parte australi illorum collium peractae in utroque vetustissimas habitationes in ipsa rupe cavatas murorumque reliquias ex variis saeculis detexerunt; habitationes illas partim ad Iebusaeorum aetatem pertinere, cf. *F. J. Bliss*, excavationum praefecto, haud improbable videtur (cf. *Excavations at Jerusalem* p. 334); muros vero Iebusaeorum ex parte in eadem linea exstitisse, quam postea moenia Davidis occuparunt, ex coniectura supponere liceat.

3. Rex David, arce Iebusaeorum capta, regiam suam ex urbe Hebron Hierosolimam transtulit « aedificavitque urbem in circuitu a Mello usque ad gymnasium; Ioab autem reliqua urbis extruxit » (1 Par. 11,8; 2 Reg. 5,9 « a Mello et intrinsecus ». Cf. *Flav. Ios. Ant.* VII. 3,2, N. 66). Salomon, crescente in dies ambitu urbis, et colle templi ad eam adiuncto, ampliores etiam muros construxit (cf. 3 Reg. 3,1; 9,15; *Ios. Ant.* VIII. 2,1; 6,1; 7,7, N. 21. 150. 205). Moenia haec Davidis et Salomonis Fl. Iosephus nomine « muri antiqui » (τῶ ἀρχαίων τεύχεος) primo loco describit, simul ratione operum posteriorum habita (Bell. V. 4,2; cf. 6,1, N. 142-3. 152). Ex reliquiis murorum in australi latere nuper inventis aliquas ad prima illa moenia pertinere haud improbable videtur.

Secundum Iosephum primus hic murus in latere suo boreali initium habuit a turri Hippica, ab Herode prope hodiernam portam a Iaffa dictam constructa, atque inde iuxta vallem interio-

rem lateralem superius memoratam (II. 2) fere linea recta ad Xystum aulamque consilii descendens muro templi occidentali coniungebatur; qui murus templi, totam aream sanctuarii cingens, antiquitus etiam urbem inter aquilonem et ortum solis clauderat, nisi forte quis murum urbis iam prinitus paulum extra ambitum templi circumvisse cum recentioribus statuere mallet (cf. *Schick*).

Ab angulo templi inter orientem et austrum primus ille murus probabiliter superiorem partem clivi Ophel ambiens traiecit valle Tyropoeon ad collem occidentalem adscendit cumque in latere australi et occidentali cingens ad turrem Hippicam rediit.

4. Sub regibus posterioribus iteratis vicibus murireparandi et ampliandi erant. In libris sacris imprimis Ozias, postquam Ioas, rex Israel, patre eius Amasia capto « destruxit murum Ierusalem a porta Ephraim usque ad portam anguli quadringentis cubitis » (i. e. circiter 190 metris) (4 Reg. 14,13; 2 Par. 25,23. Cf. *Flav. Ios. Ant.* IX. 9,3; N. 201), refertur « turres in Ierusalem super portam anguli et portam vallis et reliquias in eodem muri latere » aedificasse (2 Par. 26,9. Cf. *Ios. Ant.* IX. 10,3, N. 218). Filius vero eius Ioatham « in muro Ophel multa construxit » (2 Par. 27,3. Cf. *Ios. Ant.* IX. 11,2, N. 237).

Prae ceteris autem Ezechias et Manasses, instante periculo ex parte Assyriorum, moenia urbis firmaverunt et extenderunt. Ezechias « aedificavit omnem murum, qui fuerat dissipatus, et extruxit turres desuper, et forinsecus alterum murum, instauravitque Mello in civitate David » (2 Par. 32,5. Cf. Is. 22, 9-11). Manasses vero « aedificavit murum extra civitatem David ad occidentem Gihon in convalle, ab introitu portae piscium per circuitum usque ad Ophel et exaltavit illum vehementer » (2 Par. 33,14). Murus ille Ezechiae, cuius pars erat « murus latissimus » (Neh. 12, 37 [38]; 3,8), idem fere videtur esse atque is quem Iosephus nomine muri secundi describit a porta Genath (Γενάθ) ortum suburbium boreale circumdantem et ad arcem Antoniam transeuntem (Bell. iud. V. 4,2, N. 146). Praesertim

opera cl. C. Schick satis videtur probatum esse, hunc murum, qui tempore Domini Nostri fines urbis in latere septentrionali designabat, ita fuisse directum ut loca sacra Calvariae et S. Sepulcri, quae hodie coluntur, vere extra portam civitatis fuerint (cf. Hebr. 13, 12), quamquam hodie intra murorum ambitum continentur.

Moenia autem a rege Manasse « extra civitatem David ad occidentem Gihon in convalle » constructa videntur fere lineam illam esse secuta, quae in parte australi urbis per recentes excavationes anglicas iterum reperta est; altera vero pars ad portam piscium in latere septentrionali et usque ad Ophel dirigebatur. Etiam Iosephus muri primi seu antiqui latus meridionale secundum eundem fere tractum describit (l. c. N. 143), quem Nehemias quoque in restituendis moenibus videtur secutus esse. Urbe enim a Babyloniis capta murus omnis in circuitu destructus fuerat (4 Reg. 25, 10; 2 Par. 36, 19; Ier. 39, 8; 52, 14; Neh. 1, 3; 2, 13-15; 4, 2. Cf. *Flav. Ios. Ant.* X. 8, 3, N. 146. 149; XI. 5, 6, N. 161); quem Nehemias, postquam nocte ruinas inspexit (Neh. 2, 13-15), assiduo quinquaginta duorum dierum labore cum tribulibus suis instauravit (Neh. 3, 1-6, 13. Cf. *Ios. Ant.* XI. 5, 7 s., N. 168-179 : duobus annis et quattuor mensibus) et sollemniter dedicavit (Neh. 12, 31-39; cf. infra).

Dubium videtur, utrum piscina Siloe intra an extra moenium illorum ambitum fuerit. Sed cum posteriore aetate sub Tito extra muros fuerit (*Flav. Ios. Bell. iud.* V. 9, 4, N. 410), neque appareat, cur post Nehemiae tempora ex ambitu urbis exclusa sit, probabilius videtur assumendum, Nehemiam eam intra muros suos non comprehendisse (cf. etiam *Ios. Bell. iud.* V. 4, 2, N. 143).

5. Ambitus urbis post Nehemiam idem fere mansit usque ad Herodem Agrippam, quamquam muri identidem et a Simone, summo pontifice, Oniae filio (Eccli. 50, 1-4 hebr.) et tempore Machabaeorum (1 Mach. 4, 60; 13, 10) et post destructionem a Pompeio factam (*Strabo XVI.* 2, 40, ed. Casaub. p. 763), ex facultate C. Caesaris (*Ios. Ant.* XIV 10, 3, N. 200) restaurati sunt. Agrippa vero,

cum in parte septentrionali urbis in dies magis augetur, novis ibi moenibus exstructis et collem Bezetham atque adiacentem partem collis occidentalis civitati adiunxit (*Ios. Ant.* XIX. 7, 2, N. 326 s.; Bell. II. 11, 6, N. 218. Cf. *Tacit., Hist.* 5, 12). Qui quidem Agrippae murus, quem nomine tertii Iosephus describit (Bell. V. 4, 2, N. 147-153), eandem fere directionem videtur habuisse, quam moenia hodierna sequuntur, quamquam nonnulli auctores (*Robinson, Williams, Schultz, Fergusson, Trupp, Tobler, Gatt, al.*) eum ad septentrionem versus usque ad ea quae regum dicuntur sepulcra (*Qubūr el-Salāṭīn*) extendunt.

In latere vero australi, urbe cum moenibus a Titi militibus anno 70. p. Chr. penitus destructa, Hadrianus imperator, Iudaeis iterum a. 133 devictis atque expulsis, muros eo tantum ambitu restituit, ut partes meridionales utriusque collis extra portam relinquerentur. Post varias dein sequentium saeculorum mutationes urbs anno 1517 in potestatem Turcarum redacta, ab eorum principe Soliman annis 1536-39 (cf. *Tobler, Schick*) eundem fere, quem sub Hadriano, moenium ambitum accepit atque ad nostram usque aetatem retinuit, plurimis tamen extra muros novis coloniis atque suburbiiis hodie ad urbem adiunctis.

De variis circa ambitum urbis opinionibus cf. C. Zimmermann, Karten und Pläne zur Topographie des alten Jerusalem, Tab. IV, in qua 16 auctorum recentiorum sententiae delineantur. — Praeterea cf. E. Robinson, Palaest. II. p. 99-115; id. Topogr. Jerus. p. 52-68. 131-5; id. Nener bibl. Forsch. p. 283-7; W. Krafft, Topogr. Ierus. p. 13-52; J. Schwarz, Das h. Land p. 197-209; T. Tobler, Topogr. Jerus. I. p. 52-144; Dritte Wanderung p. 265; J. N. Sepp, Jerusalem u. d. h. Land, ed. 2, I. p. 220-48; C. Schick in Pravoslavnyj Palestinskij Sbornik III. 1884, fasc. 1; id. et H. Guthe in Ztschr. d. D. Pal.-Ver. VIII. 1885 p. 245-87 et tab. VI-XIII, praesertim tab. VIII; C. Schick ib. I. 1878 p. 15-23; XIII. 1890, p. 31-6 et tab. I; XIV. 1891 p. 41-62 et tab. II; XVI. 1893 p. 237-46; XVII 1894 p. 1-24 et tab. I. 75-88. 165-79. 251-76; F. Spiess ib. XI. 1888 p. 46-59; H. Guthe ib. XVII. 1894 p. 128; V. Guérin, Jérusalem, p. 258-67; P. M. Séjourné in Revue bibl. IV. 1895 p.

37-47; *F. J. Bliss, Excavations at Jerusalem*, praesertim p. 286-336 et tab. XXIX.

V. Portae. Turres. 1. « Coniecturis fere nituntur, inquebat cl. *Hadrianus Relandus* (Palaestina p. 833), quaecumque de portis Hierosolymae earumque nominibus tradi solent ». Quae quamquam etiam nunc saltem ex parte vera sunt, breviter tamen ea quae in S. Scriptura de variis portis commemorantur referemus, simul indicando ea quae de nonnullis cum aliqua probabilitate statui possunt.

Generalim distinguamus oportet portas civitatis a portis templi et aulae regiae. Ad hanc videntur pertinere porta Sur (שַׁעַר סוּר 4 Reg. 14,6), porta fundamenti (הַיְסוּדָה 2 Par. 23,5), porta scutariorum (הַרְרָנִים 4 Reg. 14,19; cf. v. 6); in atrio templi autem tum interiore, tum exteriori variae portae in singulis lateribus erant (1 Par. 26,13-18; Ez. 46,1 ss.), ex quibus praesertim commemorantur porta superior seu excelsa seu sublimissima (הַעֲלִיּוֹן 2 Par. 23, 20; 27,3; 4 Reg. 15,33), porta regis (1 Par. 9,18; cf. 4 Reg. 16,18), porta orientalis (Ez. 40,19; 44,1), porta speciosa (Act. 3,10), aliae.

Portae vero civitatis aliae erant in muro exteriori, aliae in interiori seu primo, per quas ex urbe antiqua in suburbium septemtrionale per murum secundum civitati adiunctum transitus patebat. Prope portas saepe plateae maiores conventibus populi aptum locum praebebant (cf. Neh. 8,1. 16 etc.).

2. In libris Veteris Foederis sexdecim nomina portarum occurrunt, ex quibus plura fortasse eandem portam designant. In Novo autem Testamento praeter portam ferream quae ex carcere ducebat ad civitatem (Act. 12,10) secundum opinionem communiorum solius portae probaticae mentio occurrit (Io. 5,2 ἐπὶ τῇ προβάτιζῃ, suppl. πύλῃ; cf. porta gregis Neh. 3,1. 31; 12,38), quamquam alii non portam, sed piscinam (suppl. ζολυμελῆθρα) ab altera piscina Bethesda distinctam intellegunt (v. Bethesda piscina).

Pleraque portae a Nehemia in descri-

benda murorum aedificatione et dedicatione nominantur (Neh. 3,1-31; 12,30-38). Ordinem capitis tertii Nehemiae sequendo prima occurrit porta gregis (שַׁעַר הַצֹּאן Neh. 3,1. 31; 12,38), quae probabiliter in latere septemtrionali arcae templi erat, prope eam quae hodie a S. Stephano appellatur. Inde ad occasum transeundo secunda nominatur porta piscium (שַׁעַר הַדָּגִים Neh. 3,3; 12, 38; 2 Par. 33,14; Soph. 4,10), in eodem tractu septemtrionali muri secundi, in quo deinde tertio loco commemoratur porta vetus s. antiqua (הַיְשָׁנָה Neh. 3,6; 12,38).

Ad idem latus septemtrionale videntur pertinere, quamquam in hac enumeratione non commemorantur, porta Ephraim (שַׁעַר אֶפְרַיִם), quae iam in primo muro (4 Reg. 14,13; 2 Par. 23,23) et postea probabiliter etiam in secundo inveniebatur (Neh. 8,16; 12,38); praeterea porta Benjamin (שַׁעַר בְּנֵימִין Ier. 37,12; 38,7; Zach. 14,10), quam aliqui eandem volunt esse cum porta gregis vel etiam cum porta Ephraim, atque porta prior (שַׁעַר הָרִאשִׁון Zach. 14,10), quae nonnullis eadem est ac porta vetus (cf. *I. Knabenbauer*, Comm. in Zach. 14,10), et porta anguli (שַׁעַר הַכֶּנֶף 4 Reg. 14,13; 2 Par. 23,23 [mendose הַכֶּנֶף pro הַכֶּנֶף]; 26,9; Ier. 31,38) vel porta angulorum (שַׁעַר הַכֶּנֶף Zach. 14,10), quae quadringentis cubitis a porta Ephraim in muro primo distabat (4 Reg. 14,13; 2 Par. 23, 23) et communiter in angulo inter aqilonem et occasum supponitur fuisse, quamquam alii potius angulum, quem murus ille antiquus cum moenibus templi formabat, intellegunt (*P. M. Séjourné* in Rev. bibl. IV. 1895 p. 39. 43).

3. In latere occidentali praecipuus exitus erat porta vallis (שַׁעַר הַגִּיא 2 Par. 26,9; Neh. 2,13. 15; 3,13), quae a descensu in vallem Hinnom nomen accepit. Ab ipsa usque ad portam stercoris seu sterquilini (שַׁעַר הָאִשָּׁפָה Neh. 2,13; 3,14; 12,31 et הַשִּׁשְׁתָּה ib. 3,13) mille cubiti, i. e. circiter 475 metra numerabantur (Neh. 3,13). Quodsi portam hanc ster-

quilinii eandem dicimus ac portam Essenororum (תֵּן עֶסְנָנוּן בְּלָקֶן), quam Iosephus prope partem urbis *Bethso* (בֶּתְשֹׁ, al. בֶּתְשֹׁסֵ) seu « domum stercoris » dictam commemorat (Bell. iud. V. 4,2, N. 145), eamque fere in eo loco sitam fuisse supponimus, quo Angli nuper reliquias portae vetustissimae prope angulum austro-occidentalem muri antiqui invenerunt (*F. J. Bliss*, Excav. at Jerus. p. 16-20. 322-24 et tab.), prior porta vallis paulo infra hodiernam portam a Iaffa dictam supponenda erit, quamquam satis communiter fere in loco huius portae censeatur fuisse (cf. praesertim *C. Schick* in *Ztschr. d. D. Pal.-Ver.* XIII. 1890 p. 31-6 et tab. I).

Post portam sterquilinii in latere australi occurrit porta fontis (שׁ"ה הַעֵין Neh. 2,14; 3,15; 12,35), quae ex sententia communi a fonte Siloe nomen sortita est atque in angulo austro-orientali probabiliter in eo loco inveniebatur, ubi reliquiae portae cum triplice limine variis temporibus usitato repertae sunt (*F. J. Bliss*, Excav. at Jerus. p. 88-93. 327-9. 349 s. et tab.). Haud procul inde erat porta inter duos muros (שׁ"ה בֵּין הַחֻמּוֹת 4 Reg. 25,4; Ier. 39,4; 52,7), per quam exitus ad hortos regio infra Siloe patebat.

Etiam porta fictilis (שׁ"ה הַהֶרְסִית [*Qeri*; דִּית *Kethib*] Ier. 19,2) in latere australi vel occidentali in exitu ad vallem Hinnom videtur fuisse; quae a nonnullis eadem cum porta vallis vel cum porta stercoris dicitur.

4. Orientem versus Nehemias imprimis portam aquarum (שׁ"ה הַמַּיִם Neh. 3,26; 8,1. 3. 16; 12,36) nominat, quae probabiliter supra fontem Virginis (Rogel) aditum ad aquas hauriendas dabat. Altera porta equorum (שׁ"ה הַסּוּסִים) ante ruinam urbis cum domo regia Salomonis coniuncta erat (4 Reg. 11,16; 2 Par. 23,15); post exilium autem a Nehemia et Ieremia in angulo austro-orientali areae templi commemoratur (Neh. 3,28; Ier. 31,40).

Aditus praecipuus in eandem aream sacram videtur fuisse per portam iudicalem (שׁ"ה הַמִּשְׁפָּט Neh. 3,30); porta

enim orientalis in versu praecedenti nominata (v. 29) potius ad atrium interiorius pertinebat, cui a nonnullis etiam illa porta iudicialis tribuitur. Ex hae vero per coenaculum anguli ad portam gregis Nehemias redit (v. 31); prope quam in cap. 12,38 aliam portam euslodiae (שׁ"ה הַמִּסְוִיָּה omittit. LXX) commemorat, quam alii in atrio templi exteriori inter ortum solis et septentrionem, alii in latere australi aulae regiae Salomonis ponendam censent.

Praeterea porta media (שׁ"ה הַתְּנִיָּה Ier. 39,3) et porta filiorum populi (שׁ"ה בְּנֵי יִם [*Qeri*] fort. בְּנֵימִין Ier. 17,19) nominantur, quae aliunde notae non sunt. In visione autem Ezechielis (48,31-34) sicut in Apocalypsi S. Ioannis (21,12) civitati sanctae duodecim portae tribuuntur.

5. Fl. Iosephus praeter dictam Essenorum portam imprimis portam Genath commemorat, a qua initium habuit murus secundus (Bell. iud. V. 4,2, N. 146), quaeque probabiliter haud procul ab hodierna porta occidentali aditum ad hortos in suburbio septentrionali sito praebebat, unde et nomen videtur habuisse (cf. *F. Spiess*, *Jerusalem des Jos* p. 18; *id.* in *Ztschr. d. D. Pal.-Ver.* XI. 1888 p. 46-59). Praeterea bis iuxta turrim Hippicam portam commemorat absconditam (Bell. iud. V. 6,5, N. 284) et sub qua aquaeductus ad turrim accedebat (ib. 7,3, N. 304). Septentrionalem insuper portam ex adverso monumenti reginae Helenae (probabiliter = *Qubūr el-Salāṭīn*) sitam (ib. V. 2,2, N. 53) et portas superiores (ib. 8,1, N. 336) commemorat.

In libris talmudicis una tantum porta stercoris commemoratur (*A. Neubauer*, *Géogr. du Talmud* p. 139 s.). A peregrinis aevi antiquioribus communiter sex portae urbis hierosolymitanae enumerantur: porta David, villae fullonis, sancti Stephani, Benjamin, portula ad vallem Iosaphat, Tecuitis (*Adamnanus* 1,1 et *S. Beda*, ed. *P. Geyer* p. 224,9 ss. 303,2 ss. Cf. *Theodosius* c. 1, *Eucherius* ib. p. 137,1; 126,5); porta S. Stephani vocatur etiam porta Galilaeae, porta nea-

politana (Hn. Burdig. ib. p. 22,20); probabiliter etiam porta maior (*Antoninus* [Anonymus] Placentinus 27, ib. p. 177, 20); *Theodosius* etiam portam purgu s. turris commemorat (c. 3, ib. p. 138,13). De aliis v. auctores citandos.

Urbis hodiernae septem portae sunt : porta occidentalis a iaffa dicta (*Bāb el-Khalil*), porta nova in angulo septentrionali versus occidentem (*B. Abdu'l Hamūd*), porta damascena (*B. el-'Amūd*), p. Herodis (*B. el-Sāhire*), p. S. Stephani (*B. Sitti Maryam*), p. stercoris (*B. el-Mughārībe*), p. Sion (*B. el-Nebi Dāūd*). Praeterea porta murata in moenibus orientalibus arcae templi celebris est nomine portae aureae (*Bāb el-Dhīrīye*).

6. Portis ad maiorem firmitatem plerumque addebantur turres, quarum altitudinem et pulchritudinem etiam Romani inter laudes urbis sanctae celebrant (*Tacitus*, Hist. 5,14). In S. Scriptura tres tantum turres specialibus nominibus designantur ad portas et muros Hierosolymorum pertinentes : turris furnorum (*בִּגְדֵּל הַתְּנִיכִים* Neh. 3, 41; 12, 38) prope portam vallis, quam postea Herodes rex fortassis in turre Hippica instauravit; turris Mea (*הַמֵּיָאָה* Neh. 3,4 Vulgata « turris centum cubitorum »; 12,39 Vulgata « turris Emath »; v. EMATH 4) et Hananeel (*הַנְּזֵאֵל* Neh. 3,1; 12,39; Ier. 31,38; Zach. 14, 10), quae inter portam piscium et portam gregis inter aquilonem et ortum solis videntur constructae fuisse, fortasse ad « turrim domus » i. e. arcem templi pertinentes (Neh. 2,8).

Praeterea vero turris magna « quae eminet de domo regis excelsa, id est in atrio carceris », in muro Ophel commemoratur (Neh. 3,25-27). Ozias rex « turres in Ierusalem super portam anguli et super portam vallis et reliquas in eodem muri latere » aedificasse et firmasse legitur (2 Par. 26,9, 15), et similiter Ezechias turres super murum construxit (2 Par. 32,5), quas Chaldaei postea combusserunt (ib. 36,19); etiam Iudas Machabaeus civitatem David et dein montem Sion (i. e. arcem templi) muro turribusque munivisse narratur (1 Mach.

1,35; 4,60), ac saepius generalim turres hierosolymitanae commemorantur (Ps. 47,13; 121,7; Lam. 2,7). In Evangelio autem « turris in Siloe » (*ὁ πύργος ἐν τῷ Σιλωάμ*) super decem et octo homines cecidisse eosque occidisse legitur (Luc. 13,4).

Fl. Iosephus, qui in tertio muro ab Agrippa constructo nonaginta turres fuisse refert (Bell. V. 4,3, N. 158), praesertim sex nominibus propriis describit : turres mulierum (*οἱ γυναῖκες οὗ πύργου*) prope portam septentrionalem (Bell. V. 2,2; 3,3, N. 55. 110); turrem Stratonis in arce Antonia (*ὁ Στρατόνωνος λεγόμενος πύργος* Ant. XIII. 11,2, N. 309. 313; Bell. I. 3,4. 5, N. 77. 80); Psephimum (*ὁ Ψεφίμωνος πύργος*) in angulo muri tertii inter aquilonem et occasum solis, ubi hodie ruinae arcis Goliath (*Qasr Djālūd*) in domo fratrum scholarum christianarum visuntur (Bell. V. 2,2; 3,5; 4,2. 3, N. 55. 133. 147. 159 s.); tres denique in aula regia ab Herode magnificentissime constructae et in memoriam amicorum uxorisque ab ipso occisae Hippicus (*Ἰππικός*), Mariamme (*Μαριάμη*), Phasaelus (*Φασάηλος*) vocatae (Bell. V. 4,3, N. 161-170 et saepius), quas Titus urbe capta posteris integras relinqui iussit (Bell. VII. 1,1, N. 1), quaeque partim etiam hodie superstites sunt (in arce *el-Qal'a* iuxta portam occidentalem).

Ex his tribus turris media, quae videtur esse Phasaelus, communiter *turris David* appellatur (cf. Cant. 4,4), atque in ea re vera antiquissimae constructionis reliquiae inventae sunt, quae a nonnullis auctoribus aetati Davidis tribuuntur.

Plerique auctores sub n. IV. de moenibus citati, etiam de portis et turribus agunt locis citatis. Praeterea cf. *Ed. Robinson*, Palaest. II. p. 92-9. 115-21; Topogr. Jeras. p. 41-51. 115-25; Neuere bibl. Forsch. p. 277-83; *T. Tobler*, Topogr. Jeras. I. p. 144-96; *R. v. Riess*, Bibl. Geogr., p. 89 s.; *C. Schick* in Ztschr. d. D. Pal.-Ver. I. 1878, p. 226-37 et tab.; *F. Spiess*, Jeras. d. Jos. p. 24-8.

VI. **Arx Sion.** 1. Intra moenia et portas ad interiores urbis partes accedentibus in ipso limine controversia fundamentalis nec non admodum spinosa se offert, scilicet de situ antiquissimae

partis seu urbis Iebusaeorum arcisque illius Sion, quae a rege David capta et « civitas David » appellata est. Usque ad ultima fere decennia saeculi elapsi communissime admittebatur, arcem illam in parte australi collis occidentalis positam fuisse; immerito *Ch. Ed. Caspari* aliique traditionem hanc omnium praeteritorum saeculorum negantes S. Hieronymum aliosque scriptores antiquos in favorem collis orientalis invocant. Sed postquam *J. Fergusson* 1847 (saltem ex parte) et *J. Fr. Thrupp* 1853 Sion et civitatem David colli orientali attribuerunt, primus *Ch. Ed. Caspari* 1864 arcem Sion et acropolim Syrorum (*Acra*) in parte australi huius collis (Ophel) collocandam censuit. Atque hanc opinionem *R. v. Riess*, *C. Schick*, *W. F. Birch*, *v. Allen*, *v. Kläiber*, *H. Guthe* recentioresque communiter secuti sunt, exceptis *G. Gatt*, *Fr. Liévin de Hamme*, *C. R. Conder*, *J. Fahrngruber*, *K. Rückert*, *A. Schulz* (qui cum *Ch. Warren* probabilius arcem Sion in parte septemtrionali collis occidentalis collocandam censet) paucisque aliis.

Breviter argumenta, quae in favorem utriusque sententiae afferuntur, innuisse atque ea, quae maiorem videntur habere probabilitatem, indicasse sufficiat.

2. Pro situ orientali in clivo australi Ophel recentiores tum ex naturali conditione loci, tum ex textibus nonnullis sacrorum librorum argumentantur. Clivus ille dicitur magis idoneus arci fortissimae eo quod undique abruptis praecipitiis cinctus sit atque a paucis militibus facile defendi possit; etiam in latere septemtrionali inter Ophel et arcem templi olim vallem latam et profundam fuisse plures contendunt, sed minime probant. Tempore belli ea praesertim ratione hunc clivum maximi fuisse dicunt emolumenti quod aditum ad unicum regionis fontem dominaretur.

Ex S. Scriptura vero praecipue afferuntur textus, qui ex arce et ex regia davidica *ascendi* dicunt in templum et in palatium Salomonis, in latere australi templi situm (2 Reg. 24, 18 s.; 3 Reg. 9, 24; 1 Par. 21, 18 s., etc.); praeterea verba Ezechielis 43, 7-9, quibus Dominus improperat regibus Iuda quod « fabricati

sunt limen suum iuxta limen meum, et postes suos iuxta postes meos: et murus erat inter me et eos, et polluerunt nomen sanctum meum in abominationibus, quas fecerunt » et cadaveribus regum defunctorum; insuper historiam Ezechiae, qui « obturavit superiorem fontem aquarum Gihon et avertit eas subter ad occidentem urbis David » (2 Par. 32, 30), quae tantum de Siloe in latere occidentali clivi Ophel intellegenda forent. Maxime autem narrationem Nehemiae urgent (Neh. 2, 13-15; 3, 13-16; 12, 31-36), qui portam sterquilini in latere occidentali vallis Tyropoeon, portam vero fontis in opposito latere orientali i. e. in clivo Ophel indicet (ואֶפְהַי et transivi 2, 14) et post hanc portam civitatem et sepulcrum David commemoret.

3. At defensores sententiae oppositae imprimis animadvertunt, haec argumenta rem minime evincere. Etenim naturalis loci conditio clivum Ophel multo minus idoneum reddit arci fortissimae sustinendae, quippe cum tum ex parte septemtrionali a monte templi et a rupe posterioris arcis Antoniae 60-80 metris superetur, tum in latere occidentali a colle opposito 80-100 metris. Neque fons Virginis in latere eius orientali situs tanti erat emolumenti, cum antiquitus plures fontes prope urbem exstiterint (v. supra), et ipse fons Virginis numquam admodum copiosus videatur fuisse (*M.-J. Lagrange* in Rev. bibl. 1. 1892 p. 37), et incolae urbis tum antiquae tum hodiernae fere unice ex imbribus undique in puteos et cisternas ac piscinas collectis aquae copiam sufficientem et abundantem acquirant (v. supra). Praeterea clivus iste, omnibus urbis collibus humilior, profecto nimis angustus maiori arci et superiori urbis parti sustinendae apparet, praesertim si quis in eodem clivo praeter varias domos David et locum tabernaculi pro arca foederis et palatium Salomonis domumque reginae etiam domum fortium et piscinam regis aliamque arte factam et sepulcrum David regumque Iuda et extra illud sepulcrum regis Asae (2 Par. 16, 14) et Ioas (2 Par. 24, 25) et Oziae (2 Par.

26,23) et Achaz (4 Reg. 16,20 coll. 2 Par. 28,27) et Amon (4 Reg. 21,26) et Manassis (2 Par. 33,20) et Josiae (4 Reg. 23,30; 2 Par. 35,24), ac praelerea omnes muros Neh. 3,16-27 commemoratos et habitationes sacerdotum et levitarum servorumque templi atque alia quaedam collocare voluerit. Neque extra angustum illud elivi australis spatium ad septemtrionem urbem lebusacorum se extendere potuisse apparet ex area Areuna s. Ornan lebusaci, quae ex more orientali iuxta agros ipsius aetate Davidis ibidem in loco templi inveniēbatur (2 Reg. 24,16 ss.; 1 Par. 21,15 ss.).

Textus vero S. Scripturae etiam in sententia opposita convenienter exponuntur. Nam *ascendere* dici potest etiam ille qui ex altiore loco veniens prius in vallem profundam descendere debet, unde ad terminum viae iterum ascendat; ac praelerea עלה « ascendit » sensu quodam generaliore adhiberi consuevit de itinere ad locum sanctuarii (Ex. 34,24; 1 Reg. 1,3; 10,3 etc.) atque ad aulam principum (Gen. 46,31; Num. 16,12. 14; Deut. 17,8; Iud. 4,5; 20,3; Ruth 4,1 etc.) atque de transitu quocumque (cf. K. Rückert, Sion p. 32 s.). Verba autem Ezechielis (43,7-9) satis verificantur de palatio Salomonis et domo reginae et de cadaveribus regum in Ierusalem sed extra civitatem David sepulchorum. Opera Ezechiae ubinam facta fuerint minime constare iam diximus, fontemque Gihon probabilis nequaquam in fonte Virginis quaerendum esse alibi ostendimus v. GIHON, ROGEL).

Denique in verbis Nehemiae ad trans-eundum de loco in locum minime requiritur vallis interiacens, et porta fontis satis probabiliter in eo loco erat, ubi el. F. J. Bliss reliquias vetustissimae portae invenit (v. supra): quae in latere occidentali vallis Tyropoeon repertae sunt. Ex hac vero porta descriptio Nehemiae sequi videtur moenia antiqua in eodem latere occidentali huius vallis exstructa, ubi probabiliter tum in ipsa valle, tum ex utroque colle adiacente « gradus » descendebant, quibus a civitate David in quo latere nomen impositum erat, in quo haec civitas inveniēbatur, quin situm ex ipsis verbis aut ex

gradibus ab eodem el. Bliss inventis determinare possimus. In hoc « torrente » ruinae ex utroque colle decedentes probabiliter vallem ita impleverant, ut non fieret « locus iumento, cui sedebar, ut transiret » (Neh. 2,14). Chorus vero primus in dedicatione moenium (Neh. 12,36) ex illis gradibus ad orientem conversus per partem elivi Ophel ad portam aquarum videtur pervenisse (cf. K. Rückert, Sion p. 64-87, et quae de moenibus in hac parte australi supra notavimus).

4. Praeter ista argumenta negativa in favorem situs antiqui in meridionali parte collis occidentalis plures rationes positivae adducuntur. Atque imprimis situm ipsum naturaliter multo firmiorem urgent, neque immerito, cum ceteris collibus altior atque ex tribus lateribus profundis praecipitiis circumdatus sit. Collem autem hunc iam ante tempora Davidis habitatum fuisse etiam recentes excavationes anglicae satis probabiliter ostenderunt, inventis ibidem, sicut in colle opposito, reliquiis domorum primitivarum ex ipsa rupe effossarum.

Deinde in favorem huius situs stat antiquissima traditio, quam saltem inde a saeculo quarto usque ad nostram fere aetatem unanimem fuisse in comperto est et a plerisque adversariis ultro conceditur. Sed etiam ultra saeculum quartum ad primum ascendere possumus, cum Fl. Iosephus satis aperte hanc sententiam tueatur; quem immerito quidam in suas partes trahere volunt. Etenim iam in antiqua lebusacorum civitate duas partes diversas saepius distinguit, quarum alteram inferiorem (τὴν κάτω) vel etiam, ex usu loquendi postea recepto, Acrain (τὴν ἄκραν, nisi textus sit corruptus) appellat, alteram superiorem (τὴν ἄνω πόλιν) vel desuper sitam (ἡ καὶ ἀνω πόλις), quam et murorum firmitate et natura loci difficile expugnabilem describit (Ant. V. 2,2, N. 124; VII. 3,2, N. 65 s.); gratis autem in his textibus sensus eorundem verborum et expressionum prorsus diversus ab eo supponitur, quem idem auctor alibi intendit, ubi τὴν ἄνω πόλιν manifestissime de parte australi collis occidentalis adhibet (Ant. XIV. 16, 2, N. 477; XV. 9,3, N. 318; Bell. V. 4,1, N. 137 etc.). Neque partem

qualemcumque urbis antiquae hanc superiorem fuisse, sed praecise eam, in qua arx antiqua a David capta reperiebatur, idem Iosephus clare videtur indicare, cum dicat collem qui superiorem civitatis partem sustinebat « propter firmitatem *εφωβριον* (i. e. speculam s. castellum) a Davide rege esse appellatum », qui Iosephi aetate forum superius (*ἡ ἄνω ἀγορά*) audiebat (Bell. V. 4, 1, N. 137). Considerata veterum Onomasticorum explicandi ratione, *εφωβριον* (a *εφωβριον*), uti bene notat J. K. Zenger (Die Chorgesänge im Buche der Psalmen 1, p. 34), hoc loco est litteralis expositio nominis Sion, quippe quod *σχοπευτήριον* et speculam illa Onomastica saepissime interpretantur (Onomastica sacra, ed. P. de Lagarde, p. 39,23; 43,12; 50,23; 73,2; 78,15; 81,17; 174,90; 198,63 s.).

Unde vix videtur in dubium vocari posse, Iosephum antiquam arcem Sion in australi parte collis occidentalis sitam supposuisse. Neque ad infringendam huius testimonii auctoritatem valet quod dicunt Iosephum in iis tantum quae de sua aetate tamquam testis de visu referat fide dignum esse. Nam primum quidem praecipua huius testimonii vis in eo est quod sententiam traditionalem iam in primo saeculo viginis ostendat. Dein vero Iosephus etiam pro situ civitatis David arcisque Sion vero quodam sensu est testis de visu, tum quia de naturali loci conditione optime iudicare potuit, tum maxime quia monumentum aliquod insigne et situs illius fidissimum indicium quotidie prae oculis habuit: sepulcrum enim David, certissime in antiqua civitate David exstructum, in urbe supererat (Act. 2,29) et non modo veneranda antiquitate, verum etiam rapina Hyrcani (Flav. Ios. Ant. VII. 13,3, N. 393; XIII. 8,4, N. 249; XVI. 7,1, N. 279) multoque magis Herodis facinoroso conatu cunctis notissimum erat, quippe qui ad expiandam scelestam sepulcri violationem magnificentissimum in eius ostio erexit monumentum ex lapide albo, cuius etiam Nicolaus Damascenus historiographus meminit (Ant. VII. 13,3, N. 394; XVI. 7,1, N. 179-183).

5. In libris sacris ipsa prima mentio urbis Iebus haud spernendum praebe-

argumentum pro colle austro-occidentali. Nam in libro Iosue terminus inter tribus Iudam et Benjamin dicitur a fonte Rogel ascendere per convallium filii Ennom in latere meridionali humeri seu montis Iebusaeorum (*אֶרֶץ־יְבוּסִי כְנָבֵב*) et inde se erigere ad verticem montis qui est contra Geennom ad occidentem in summitate vallis Raphaim contra aquilonem (Ios. 15,8; 18,16). Iam vero consideranti naturalem collium valliumque configurationem (cf. v. gr. tab. I « Terrainkarte » a cl. C. Zimmermann editam) impossibile videtur, verba illa textus clarissima de altera valle quam de *Wādi el-Rabābi* et de altero colle quam de austro-occidentali interpretari: hic igitur est ille humerus Iebusaeorum, a quo tunc arcem ipsorum omnino gratis in angustum humilemque clivum orientalem deici dicendum erit. Sane mirum videbitur effugium eorum, qui in gratiam huius collis orientalis, propter illa ipsa verba textus sacri, vallem Hinnom dicunt inferiorem partem vallis Tyropoeon: quomodo terminum per istas ambages ad verticem montis qui est contra Geennom in summitate vallis Raphaim contra aquilonem perducant, ipsi videant.

Itaque probabilius antiquae traditioni standum esse censemus. Neque obstat quod nomen arcis antiquae Sion postea, sanctuario in colle Moria erecto arcaeque foederis illuc translata, praecipue ad designandum hunc montem templi ac deinde etiam pro tota urbe sancta adhibitum fuerit, uti maxime in libris propheticeis et poeticis et in primo libro Machabaeorum apparet. Quaestio enim tota circa situm antiquae arcis versatur (v. SION).

Cf. J. Fergusson, *An Essay on the ancient Topography of Jerusalem*, London 1847; J. Fr. Thrupp, *Ancient Jerusalem*, Cambridge 1855; Ch. Ed. Caspari in Theol. Stud. und Krit. 1864 p. 309-28; R. v. Riess, *Bibl. Geogr.* p. 93-9; *Bibel-Atlas*, ed. 3, p. 34; W. F. Birch in *Quart. Stat.* 1878 p. 129-32. 178-89; 1880, 167-70; 1882, 55-9; 1883, 150-4 et saepe in sequentibus annis; immerito G. A. Smith et W. R. Smith ap. Cheyne-Black, *Encyclop. bibl.* II. p. 218 huic cl. Birch primitias opinionis, quae colli orientali

patrocinatur, attribuunt; v. *A. Allen* in *Ztschr. d. D. Pal.-Ver.* II. 1879 p. 18-47; III. 1880 p. 116-76; v. *Klaiber* ib. III. p. 189-213; IV. 1881 p. 18-56; XI. 1888 p. 1-37; *H. Guthe* ib. V. 1882 p. 313-32 (= Ausgrab. bei Jerns. p. 241-60); *C. Schick* ap. *C. Zimmermann*, *Karten u. Pläne*, Tab. IV. p. 16; *id.* in *Ztschr. d. D. Pal.-Ver.* XIV. 1891 p. 54 s. et tab. 2: XVII. 1894 p. 1-24 et tab. 1; *G. Gott*, *Beschreibung über Jerusalem u. s. Umgebung* p. 176-88; *id.* in *Theol. Quartalschr.* LXVI. 1884 p. 34-84; *id.*, *Die Hügel von Jerusalem* p. 42 s.; *id.* *Sion in Jerusalem*, was es war, und wo es lag, Brixen 1900; *Fr. Liévin de Hamme*, *Guide indicateur*, ed. 4, I. p. 179; *C. R. Conder* in *Quart. Stat.* 1883 p. 194; *id.* in *J. Hastings*, *Dict. of the Bible* II. 591; *J. Fahrngruber*, *Jerusalem* ed. 2, I. p. 104; *M.-J. Lagrange* in *Rev. bibl.* I. 1892 p. 25-35; *P. M. Séjourné* ib. IV. 1895 p. 45 s.; *D. Zaneccchia*, *La Palestina d'oggi* I. p. 173-81; *K. Rückert*, *Die Lage des Berges Sion* (Bibl. Studien III. 1), Freiburg i. B., 1898; *Ch. Clermont-Ganneau*, *Recueil d'archéol. orient.* II, p. 254-94; *A. Schulz*, *Zur Sion-Frage*, in *Theol. Quartalschr.* LXXXII. 1900 p. 356-89.

VII. **Reliquae partes urbis.** 1. Arcem Sion captam David in habitationem regiam sibi elegit et « civitatem David » (צִיּוֹן הַדָּוִד, ἡ πόλις Δαυιδ) appellavit (2 Reg. 5,9; 1 Par. 11,7), quo nomine etiam postea tamquam pars urbis Ierusalem saepius commemoratur (cf. 3 Reg. 2,10; 3,1; 8,1; 9,24; 11,27; 1 Par. 15,1. 29; 16,1; 2 Par. 5,2; 8,11; 32, 5 etc.). Sed non de sola arce, verum etiam de parte urbis adiacente nomen hoc civitatis David intellegendum videtur, cum praeter varias domos, quas David ibidem sibi construxit, et domum fortium (Neh. 3,16) etiam locum separatum atque tabernaculum arcae foderis (1 Par. 15,1) et sepulcrum David (3 Reg. 2,10) regumque Iuda comprehenderit, ex quibus plures sepulcra separata habuerunt (cf. supra n. VI. 3).

In civitate David vel prope eam erat munitio vel turris *Mello* (בֵּילֹא), quam fortasse iam David aut certe Salomon aedificavit (2 Reg. 5,9; 3 Reg. 9,15. 24; 11,27; 1 Par. 11,8) et Ezechias instauravit (2 Par. 32,5); iuxta ipsam probabiliter erat « domus Mello » (בֵּית מֶלֶךְ), quae secundum Vulgatam et aliquos co-

dioces LXX dicitur fuisse « in descensu Sella », ἐν τῇ καταβάσει Σελᾶ (4 Reg. 12, 20, cf. *Field*; hebr. מֵרֶדְד סֶלָא). Sed ultra coniecturas circa haec vix quidquam statui poterit. LXX interpretes pro Mello semel τὸ ἀνάλημμα (2 Par. 32,5), alias ἀραx vertunt.

2. A Salomone praecipue in colle orientali magnificentissima urbis pars erecta est, scil. templum tota antiquitate celeberrimum, de quo in articulo speciali tractandum erit (v. **TEMPLUM**).

Praeterea vero in eodem colle, in latere australi sanctuarii splendida aula regia ab eodem rege aedificabatur (3 Reg. 7,1; 9,1. 10. 15) et cum illa domus salutus Libani cedrina (3 Reg. 7,2-6) et porticus solii (3 Reg. 7,7). Etiam pro filia Pharaonis, quam uxorem duxerat, domum propriam iuxta palatium suum construxit (3 Reg. 3,1; 2 Par. 8,11).

Qua vero aetate « turris domus » seu *Bira* (Neh. 2,8; cf. 7,2) et « coenaculum anguli » (עֲלִיּוֹת הַכֵּנָפָה, Neh. 3,30 s., hebr. 31 s.), quae videntur ad arcem templi pertinere, et « turris quae eminet de domo regis excelsa » (Neh. 3,25 s.), primitus exstructa sint, non satis constat (v. infra n. 4).

Infra domum regiam autem in eodem clivo pars Ophel erat, ubi praecipue sacerdotes et levitae ac Nathinaei seu servitio templi addicti habitabant (Neh. 3,26. V. **OPHEL**).

3. Pars illa, quae inter collem orientalem et occidentalem urbis in valle intermedia sita erat, nomine מִכְתֵּשׁ, Vulg. *pila* in prophetia Sophoniae videtur designari, ubi vates clamorem et ululatum, Chaldaeis irruentibus, undique per totam urbem oriri describit (Soph. 1,11). Praeter colles, quibus maior urbis pars insidebat, ibidem etiam « secunda », הַבִּישְׁבָּנָה, nominatur, quae etiam alibi tamquam pars urbis occurrit (Soph. 1,10; 4 Reg. 22,14; Neh. 11,9); probabiliter ea pars erat, quae inter murum primum et secundum in latere septentrionali comprehendebatur, quaeque civitati primae quasi altera quaedam pars addita erat. Quam si ab aliis partibus in eodem vaticinio

commemoratis prorsus distinctam volumus, pilam inferiorem tantum vallis Tyropoeon partem intra ambitum primi muri comprehensam dicemus. Ceterum incertum esse bene notat *I. Knabenbauer* (in *Soph.* 1,11), utrum hoc nomen pilae in usu fuerit, an a propheta e loci regione et incolarum sorte sit formatum (cf. *S. Hieronymus* in eundem locum).

In hac autem parte forum rerum venalium domosque mercatorum fuisse, ex iisdem prophetae verbis haud improbabili-ter concluditur (*Soph.* 1,11. Cf. *Neh.* 13,16).

Etiā Thecua et Bethacarem in vaticinio Ieremiae (6,1; cf. *Neh.* 3,3. 14), quae communiter de vicis tribus Iuda explicantur, a cl. *C. Schick* de partibus urbis intelleguntur, quarum altera prope murum secundum in latere septemtrionali, altera in australi versus vallem Hinnom sita fuerit (*C. Schick* in *Ztschr.* d. D. Pal.-Ver. XIV. 1891 p. 47. 53 et tab. 2).

Ad occidentem vero templi erat pars quaedam adstructa, quae nomine *Par-bar* appellabatur (פַּרְבַּר 1 Par. 26,18, Vulg. *cellulae*; הַפְּרָרִים 4 Reg. 23,14, Vulg. *Pharurim*); quam aliqui etiam tamquam partem urbis considerant (cf. *C. Schick*, l. c. XVII. 1894 p. 13 et tab. 1).

4. Ex eodem latere occidentali templi, sed in parte septemtrionali collis oppositi ex opinione multorum erat Acra seu Acropolis c. a. 167 a. Chr. a Syris sub Antiocho Epiphane prope templum aedificata (1 Mach. 1,35; *Flav. Ios.* Ant. XII. 5,4, N. 232; *Bell. iud.* I. 1,4, N. 39). Attamen etiam circa situm huius Acræ acerrima et difficillima habetur controversia, de qua breviter, praeter ea, quae supra (n. II. 3) de Acra Iosephi tetigimus, pauca notemus.

Ex magna opinionum varietate quinque potissimum sententiae videntur commemorandae. Prima est eorum qui hanc Acram eandem dicunt cum antiqua arce Sion (praesertim ex 1 Mach. 1,35; 2,31; 7,32; 14,36) eamque in clivo australi collis orientalis collocant; quod ex dictis minus videtur probabile. Altera, eandem identitatem retinendo, Acram in parte meridionali oppositi collis occi-

dentalis reponit; contra quam merito observari poterit, etiam ex textu sacro arcem illam Syrorum potius iuxta templum vel in eius vicinia sitam fuisse (1 Mach. 1,37-39; 4,41; 6,18; 14,36; cf. 12,53), Fl. Iosephum vero adeo ab hac opinione discrepare, ut aperte Scripturae contradicere nullamque in hac quaestione fidem mereri supponendus foret. Tertia, adhuc identitatem illam servando, arcem parti septemtrionali collis occidentalis insedis- se censet; sed antiquam civitatem David arcemque Sion non in hac parte septemtrionali, verum in australi parte fuisse cum tanta probabilitate ex Scriptura et traditione videtur constare, ut huic tertiae opinioni vix aliqua probabilitas relinquantur.

Quare distinctione inter antiquam arcem Sion et Acram Syrorum admissa, quarta opinio hanc Acram in ipso monte templi in latere septemtrionali fuisse dicit; verum huic quoque Iosephus aperte contradicit, neque ex Scriptura magnopere commendatur. Itaque sententia quinta, pariter distinguens, arcem Syrorum in parte septemtrionali collis occidentalis, iuxta templum, sed valle interiacente ab eo separatam, arcem vero Sion in australi parte eiusdem collis supponit fuisse.

Difficultas praecipua contra hanc ultimam sententiam ex eo habetur, quod auctor libri primi Machabaeorum illam arcem in loco civitatis David collocat (1 Mach. 1,35; 2,31; 7,32; 14,36). At certe auctor ille sacer usum loquendi antiquitas receptum non iam sequitur, cum aperte arcem Sion a civitate David distinguat (1 Mach. 7,32 s.), quae olim prorsus confundebantur (2 Reg. 5,7; 3 Reg. 8,1; 1 Par. 11,5; 2 Par. 5,2); sicut autem « montem Sion » sensu novo determinate de monte templi intellegit, ita fortasse etiam « civitatem David » latiore aliqua ratione ab antiqua diversa accepisse supponi poterit, quamvis contextus (praesertim 1 Mach. 1,32-40) difficultatibus non careat. At saltem id videtur affirmari posse, sententias oppositas circa positionem huius Acræ multo maioribus difficultatibus laborare.

Ut civitatem ab oppressoribus Syris, qui ex arce sua insidias introcuntibus

in templum parabant multosque occidebant, liberaret, Ionathas Machabaeus altissimis muris inter medium arcis et civitatis aedificatis eam a civitate separavit (1 Mach. 12,36; *Flav. Ios. Ant.* XIII. 3,11, N. 181 s.). Cum ita prohiberentur « egredi et ingredi regionem et emere ac vendere », orta est fames valida in arce, qua coacti a Simone, Ionathae fratre ac successore, eiecti sunt (1 Mach. 13,49 s.; 14,36). Arce mundata, Simon « viros Iudaeos ad tutamentum regionis » in ea collocavit (1 Mach. 14,37); postea vero, ex relatione Iosephi (cf. 1 Mach. 16,20), arcem ipsam et collem, in quo exstructa fuerat, penitus delendum vallemque inter collem et templum explendam curavit (*Flav. Ios. Ant.* XIII. 6,7, N. 215-217. Cf. Bell. I. 1,4; 2,2, N. 39. 50; V. 4,1, N. 139).

Etiam in secundo libro Machabaeorum iam pro tempore arcis Syrorum aedificationem praecedente acropolis Hierosolymorum commemoratur (ἡ ἀκρόπολις 2 Mach. 4,12. 27; 5,3; ἡ ἀκρὰ 13, 31.33), quae in loco arcis antiquae in superiore parte civitatis et non in vicina templi videtur sita fuisse, cum Iason « sub ipsa arce » (ἐπὶ ἀπὸ τοῦ ἀκρόπολιν) gymnasium constituisse legatur (2 Mach. 4,12).

Rursus alia erat arx illa quae hebraice *Bira* appellatur (הַבֵּיָרָה אֲשֶׁר לְבֵית), Vulgata « turris domus » Neh. 2,8; הַבֵּיָרָה עַל־יְרוּשָׁלַם, תִּשְׁבֵּי בֵּירָא עֵן יְרוּסָלַיִם, Vulgata « domus de Ierusalem » ib. 7,2), probabiliter in angulo areae templi inter septentrionem et occasum sita, ad quam fortasse turres Hananeel et Mea pertinebant. Haud improbabilius censetur intellegi in textu 1 Mach. 12,33 : « et munivit (Simon) montem templi, qui erat secus arcem (καὶ προσωγύρωσεν τὸ ὄρος τοῦ ἱεροῦ τὸ παρὰ τὴν ἀκρὰν) et habitavit ibi ipse et qui cum eo erant »; nam altissimam collis templi partem occupabat et ad templum pertinere aestimabatur (cf. Megillath ta'anith 9,1), et iuxta illam arcem Syrorum, de qua diximus, sita erat. Eandem arcem templi, quae etiam in epistula Aristaeae videtur commemorari (n. 100-104. P.

Wendland ap. E. Kautzsch, Apokryphen p. 3. 14), Fl. Iosephus Barim (βάρις) appellat, quam prius ab Hasmonaeis, et praesertim ab Hircano primo munitam, postea vero ab Herode magnificenter exstructam et in honorem Marci Antonii Antoniam (Ἀντωνία) appellatam esse refert (*Ant.* XIII. 11,2, N. 307; XV. 11,4, N. 403. 409; XVIII. 4,3, N. 91 s.; Bell. iud. I. 3,3; 5,4, N. 75. 118; V. 5,8, N. 238-246 etc.).

5. Secundum multos auctores pars huius arcis Antoniae erat praetorium Pilati, ubi Christus Dominus a iudice romano auditus et post flagellationem et derisionem crudelissimam capitis damnatus est. Quaestionem de hoc aliisque locis passione dominica sacralis pluribus tractare non huius loci est. Circa praetorium id unum notemus, traditionem a primis peregrinis expressam haud adeo, uti aliqui recentiores (*Tobler, Sepp, Zanechia*) voluerunt, a traditione hodierna inde a saeculo fere decemotertio vigente discrepare (cf. *Fahrngruber, Lagrange*).

Pariter quoad Coenaculum in monte Sion, sicut etiam pro loco Calvariae, traditio antiqua et hodierna conformes inveniuntur. Prope Coenaculum iam saeculo quarto ostendebatur locus domus Caiphae pontificis, et inde a saeculo septimo domus B. Mariae Virginis, ubi locus dormitionis eius colebatur.

Aula vero Herodis, ad quam Salvator a praetorio adductus est (Luc. 23,6 ss.), secundum alios antiquitus erat palatium Hasmonaeorum (*Flav. Ios. Ant.* XIV. 1,2; 4,2; 13,4, N. 4. 59. 338; XX. 8,11, N. 189 s.; Bell. II. 16,3, N. 344 etc.) in australi parte collis occidentalis contra templum situm, secundum alios vero in colle septentrionali Bezetha reperiebatur.

Flav. Iosephus praeterea varia aedificia urbis commemorat, magna ex parte ab Herode erecta, ex quibus aula consilii (ἡ βουλή Bell. V. 4,2, N. 144; τὸ βουλευτήριον Bell. VI. 6,3, N. 354), archivum (τὰ ἀρχεῖα Bell. II. 17,6, N. 427; VI. 6,3, N. 354), Xystos (*Ant.* XX. 8,11, N. 189; Bell. II. 16,3, N. 344; VI. 3,2; 6,2; 8,1, N. 191. 323. 377. Cf. gymnasium 1 Mach. 1,14; 2 Mach. 4,12) ad oc-

cidentem templi in media fere urbe exstructa erant, prope pontem, qui transitum ex templo in urbem praebebat (Ant. XIV. 4,2, N. 58 etc.).

Praeter auctores sub n. II. et VI. citatos cf. de arce Antonia v. *Allen*, Die Antonia und ihre Umgebungen, in Ztschr. d. D. Pal.-Ver. I. 1878 p. 61-100 et tab. — De praetorio cf. *Itin. burdigal.*, Theodos. c. 7, *Anonymus (Antoninus)* c. 9. 23, ed. *P. Geyer*, Itin. hieros. p. 22,22 ss. 141,10 ss. 165,13. 175,3 ss.; *Sophron.*, Anacreont. 20, v. 73-83, *Migne* P. G. 87,3, 3821. — *Fr. Quaresmius*, Elucid. Terrae S., I. IV, peregr. 6. c. 3, ed. Venet. II. p. 140 s.; *T. Tobler*, Jerusalem I. p. 220-31; *J. N. Sepp*, Jerusalem, ed. 2, I. p. 184-93; *D. Zancchia*, La Palestina d'oggi I. p. 249-57; *J. Fahrngruber*, Jerusalem ed. 2, I. p. 154-6; *M.-J. Lagrange* in Rev. bibl. VI. 1897 p. 455 s.

VIII. Brevis historiae conspectus.

1. De historia urbis Hierosolymorum cum in rebus populi iudaici regumque Israel et Iuda accuratus tractandum sit, summa tantum capita hic delineasse sufficial.

De prima urbis origine variae fabulae penes scriptores profanos vulgatae erant (cf. *Strabo* XVI. 2,34-36, ed. *Casaub.* p. 760 s.; *Tacit.* Hist. 5,3; *Flav. Ios.* c. Apion. 1,14 ss. N. 73 ss.; *Plutarch.*, Is. et Osir. 31, etc.); ex historia vero nihil de illis primordiis constat. Pariter incertum est, ntrum Melchisedech aetate Abrahae Hierosolymorum an potius, id quod probabilis aestimamus, alterius urbis Salem rex fuerit (v. SALEM 1).

Israelitae, cum duce Iosue terram promissam occupabant, urbem Ierusalem tamquam caput regni Iebusaeorum sub rege Adonisedec invenerunt (Ios. 10,1), qui foedere cum quattuor aliis regibus Amorphaeorum inito hostibus se opponens a Iosue devictus est (Ios. 10). Monumenta vero profana, scil. tabulae cuneiformes in Tell el-Amarna inventae, ostendunt urbem ante ingressum Israelitarum sub potestate regis Aegypti fuisse. Princeps tributarius *Abd-Khiba* a Pharaone Hierosolymis praepositus, iteratis epistulis instantissime auxilium a rege petit contra *Habiri* invasores, quos iam totam fere regionem occupasse

describit (*H. Winckler*, Die Thontafeln von Tell el-Amarna, n. 179-183, in *E. Schrader*, Keilinschr. Bibl. V. p. 302-15).

Rege Adonisedec cum sociis devicto, urbs ipsa diu aggressoribus resistebat; postea vero sub Adonibezec « oppugnantes filii Iuda Ierusalem ceperunt eam et percusserunt in ore gladii, tradentes cunctam incendio civitalem » (Iud. 1,8). Nihilominus tamen « Iebusaeum, habitatorem Ierusalem, non potuerunt filii Iuda delere », ita ut Iebusaei et Israelitae simul in urbe habitarent (Ios. 15,63; Iud. 19,41 s.), quoniam pars superior civitatis sive arx Sion usque ad aetatem David a Iebusaeis tenebatur.

Quamquam autem filii Iuda contra Iebusaeos pugnasse et Ierusalem cepisse leguntur, in distributione terrae urbs tribui Benjamin attributa est, uti ex descriptione terminorum clare apparet (Ios. 15,7 s.; 18,16 s.); neque controversiae ex variis Scripturae textibus de hac attributione olim acriter agitatae hic diutius immorandum est (cf. *H. Relandi* Palaest. p. 839-46).

2. David postquam in Hebron rex super totum Israel unctus est, abiit cum exercitu suo in Ierusalem et cepit arcem Sion eamque civitatem David appellavit (2 Reg. 5,6-9; 1 Par. 11,4-8), et caput totius regni constituit. Splendorem urbis regiae auxil moenibus, palatio variisque domibus aedificatis et tabernaculo cum altari pro arca Dei erecto (2 Reg. 5,9-11; 6,17; 3 Reg. 2,28 s.; 1 Par. 11,8; 14,4; 15,1), quam magna cum sollemnitate in locum praeparatum adduxit (2 Reg. 6; 1 Par. 13). Iebusaei autem etiam nunc simul cum filiis Iuda in civitate habitarunt, agrosque suos retinuerunt, uti ex arca Areuna s. Ornan apparet (2 Reg. 24,16-24; 1 Par. 21,15-25).

Sub Salomone urbs cum toto regno ad culmen prosperitatis pervenit. Rex sapientissimus atque potentissimus tum firmitati urbis moenibus ac munitionibus (3 Reg. 3,1; 9,15. 24; 11,27), tum pulchritudini ac dignitati eius splendido templo domibusque regis in colle orientali erectis (3 Reg. 5-7; 2 Par. 2-5) magnificentissime providit.

Quanta vero tunc fuerit civitatis opulentia, cum ex aliis relationibus, tum ex historia de regina Saba concludere licet (3 Reg. 10,4-13; 2 Par. 9,1-12); et cum quotannis afferrentur ad regem Salomonem sexcenta sexaginta sex talenta auri, et tributa alia muneraque innumera, «vasa argentea et aurea, vestes et arma bellica, aromata quoque» et equi et muli, tanta erat abundantia argenti in Ierusalem, quanta et lapidum et cedrorum multitudo quasi sycomorum, quae nascuntur in campestribus (3 Reg. 10,14. 23. 27; 2 Par. 9,13. 24. 27).

3. Sed mortuo Salomone regnoque diviso, urbs brevi ab hac prosperitate defecta est. Iam quinto anno regni Roboam ascendit Sesac rex Aegypti in Ierusalem et tulit thesauros domus Domini et thesauros regios et universa diripuit (3 Reg. 14,23 s.; 2 Par. 12,2-9). Post quietiora regna Abiae et Asae ac Iosaphat sub impio rege Ioram civitas a Philisthinis et Arabibus iterum vastatur (2 Par. 21,16 s.), nec ita multo post, Amasia in Bethsames a Ioas, rege Israel, devicto et capto, denuo vi capitur et diripitur, destructa magna parte moenium a porta Ephraim ad portam anguli (4 Reg. 14,11-14; 2 Par. 23,21-24).

Ozias s. Azarias, filius Amasiae, murum destructum restauravit turreaque et munitiones in eo erexit (2 Par. 26,9; Ios. Ant. IX. 40,3, N. 218). Sed in diebus eius terribilis terrae motus accidit, ita ut incolae prae timore civitatem fugientes reliquerint (Zach. 14,5; Am. 1,1; Flav. Ios. Ant. IX. 40,4, N. 223). Reparato sub Ioatham praesertim muro partis Ophel (2 Par. 27,3), regnante Achaz Ierusalem iterum obsidebatur a Rasin, rege Syriae, et Phacee, rege Israel; sed nuntiis ad Theglathphalasar, regem Assyriorum, cum muneribus missis, Achaz auxilium obtinuit urbemque ab obsidione liberavit (4 Reg. 16,3-9).

4. Assyrii ab Achaz in auxilium vocati iam sub filio eius Ezechia gravissimum urbi periculum pararunt, cum Sennacherib anno quartodecimo regis Ezechiae (a. 701 a. Chr.) ascenderit et universas civitates Iuda munitas cepit. Hierosolymis quoque excidium minatus

(4 Reg. 18,13; 2 Par. 32,1; Eccli. 48,20; Is. 36,1). Periculum primo quidem numeribus ab Ezechia missis, mox clade maxima exercitui Assyriorum per Angelum Domini illata aversum est (4 Reg. 18,14 ss.; 19; 2 Par. 32,2-22; Is. 36,37; cf. Tob. 1,21; Eccli. 48,21-24; 1 Mach. 7,41; 2 Mach. 8,19).

Manasses vero, impius filius Ezechiae, captus ab exercitu regis Assyriorum et vinctus catenis atque compedibus in Babylonem ductus est, probabiliter sub Asarhaddon vel sub Assurbanipal (2 Par. 33,11; Flav. Ios. Ant. X. 3,2, N. 40). Postquam autem «egit poenitentiam valde coram Deo patrum suorum... reduxit eum Ierusalem in regnum suum» (2 Par. 33,12 s.), ubi mox moenia urbis diligenter auxit atque munivit (ib. v. 14).

Post tranquillum pii Iosiae regnum sub ultimis regibus Ioachaz, Ioakim, Ioachin, Sedecia praeparabatur urbis ruina, quae completa est anno undecimo regni Sedeciae (587 a. Chr.) per Nabuchodonosor (Nebukadnezar II.), regem Babylonis; qui post biennem obsidionem urbem cepit regemque et populum in Babylonem exsules abduxit, templo et aula regia domibusque civitatis combustis atque moenibus in circuitu penitus destructis (4 Reg. 23,1-21; 2 Par. 36,17-21; Ier. 39,1-9; 52,4-15).

5. Anno primo Cyri regis Persarum (536 a. Chr.) Indaeis edicto regio reditus in patriam permittebatur, simulque praeceptum est, ut templum Domini in Iersalem instaurarent (Esdr. 1,1-4). Praecepto oboedientes Iosue et Zorobabel mox super ruinas templi altare erexerunt (Esdr. 3,2 s.) domumque ipsam anno sequenti (535 a. Chr.) aedificare coeperunt, quae post varias difficultates, Aggaei et Zachariae prophetarum exhortatione et Darii regis decreto superatas anno sexto regni Darii (515 a. Chr.) feliciter perfecta est (Esdr. 3-6).

Muri vero urbis et domus per Nehemiam restituta sunt, qui et numerum incolarum eius auxit, accersitis undique ex aliis civitatibus familiis (Neh. 2-12; Eccli. 49,15), quamquam numerus eorum ultra 20,000 illa aetate vix ascenderit. Sequentibus vero saeculis sub

tranquilla] Persarum dominatione urbs prosperabat atque adeo aucta est, ut aetate Alexandri Macedonis ex testimonio Hecataei Abderitae iam ad 120,000 incolarum pervenerit (*Flav. Ios. c. Apion. 1,22, N. 197*).

Mortuo autem Alexandro Hierosolyma et Syria universa Ptolemaeo Lago Aegyptio attributa est (*Ios. Ant. XII. 1,1, N. 3 s.*). Post diuturna deinde inter Ptolemaeos et Seleucidas bella, hi Syriae principes rerum in Iudaea et Ierusalem potiti sunt sub Antiocho Illustri (Epiphane), qui civitatem sanctam invasit, et facta caede magna vasisque sacris ablatis urbem incendit, insuper legem idololatriae Iudaeis imposuit multosque impios a patria religione abduxit (1 Mach. 1; 2 Mach. 4-7; *Flav. Ios. Ant. XII. 5,1 ss., N. 237 ss.*).

Crudelissima Antiochi persecutione accensi miseramque patriae sortem dolentes Mathathias ex familia Asamonaci seu Hasmonaei ac quinque filii eius, inter quos Iudas Machabaeus ceteris praestabat, fortiter pro religione patrum et urbe dimicantes, mortem pro fide et patria obierunt (1 Mach. 2 ss.; 2 Mach. 8 ss.). Illorum aetate urbs ipsa novis munitionibus, praesertim in monte templi, instructa est, Syris per multos annos novam arcem iuxta templum occupantibus (v. supra VII. 4); varia autem belli fortuna et iteratis obsidionibus cives cum civitate multis malis erant obnoxii.

Maiora post mortem filiorum Mathathiae sub ultimis Hasmonaeis passi sunt, cum continuae dissensiones internae urbem vexarent. Quae Romanis deinde occasione interveniendi praebuerunt, qui duce Pompeio a. 63 a. Chr. prima vice urbem et templum occuparunt et moenia destruxerunt (*Flav. Ios. Ant. XIV. 4,1 ss., N. 54 ss.; Tacit. Hist. 5,9*). Muris auctoritate I. Caesaris a. 47 restitutis, novisque discordiis ortis, Herodes Idumaeus, a Romanis rex Iudaeae et Hierosolymorum constitutus, a. 37 a. Chr. urbem post diuturnam obsidionem expugnavit (*Flav. Ios. Ant. XIV. 16,1 ss., N. 468 ss.; Bell. iud. I. 18,1 ss., N. 347 ss.*).

6. Herodes rex (37-4 a. Chr.) urbem suam regiam templumque magnificenter restituit et exornavit eamque illi

formam dedit, quam tempore Christi Domini habebat. Defuncto Herode, Archelaus Iudaeam et Ierusalem obtinuit. Sed iam a. 7 p. Chr. a Romanis depositus est, qui Iudaeam provinciae Syriae sub procuratore speciali administrandam attribuerunt; qui reliquo anni tempore Caesareae residents (cf. Act. 23,23; 25,1), circa festum paschae Hierosolymis commorabatur; Herodis autem successoribus species quaedam regni tantum relicta est.

Incolae urbis aetate Christi numerum 200,000-250,000 attigisse censentur (cf. C. Schick in Ztschr. d. D. Pal.-Ver. IV. 1881 p. 211-21); in sollemnitate vero paschali decemplex fere numerus in urbem confluisse refertur (*Ios. Bell. VI. 9,3, N. 420 ss.*).

Post mortem Christi Domini sub Agrippa (41-44 p. Chr.) nova pars septemtrionalis urbi addebatur, constructo tertio muro, qui post viginti fere annos, incipiente iam rebellionem contra Romanos, finitus est.

Vexationibus continuis irritati, Iudaei hac rebellionem patriam liberare conati sunt; sed interitum urbis et templi et patriae adduxerunt, a Christo civitati ingratae praedictum, qui ab exercitu Romanorum duce Tito a. 70 p. Chr. consummatus est. Tota urbs funditus deleta est, ita ut « accedentes vix crederent eam umquam habitatam fuisse » (*Flav. Ios. Bell. VII. 1,1, N. 3*), tribus tantum turribus aulae regiae conservatis.

Post 65 annos ab Aelio Hadriano iterum aedificata et Aelia Capitolina dicta, sub Constantino Magno novum splendorem adeptae est. Sed a Persis a. 614 et ab Arabibus a. 638 capta, in potestate Mahometanorum deinceps, brevi intervallo regni crucigerorum (1099-1187) excepto, usque ad nostra tempora remansit.

Generatim de urbe Ierusalem cf. *Chr. Adrichomius*, Theatrum Terrae S. p. 148-81; *Fr. Quaresmius*, Elucidatio Terrae S. I. IV et V, ed. *Venetis* 1881, II. p. 22-416; *Hadr. Relandi*, Palaestina p. 832-61; *E. F. K. Rosenmüller*, Handbuch der bibl. Alterthumskunde II. 2, p. 202-73; *Ed. Robinson*, Palaestina II. p. 1-313; *id.* Neue Untersuchungen über die Topographie Ieruselems,

Halle 1847; *id.* Neuere bibl. Forschungen in Palaestina, p. 211-344; G. Williams, The holy City, London 1845; E. G. Schultz, Jerusalem, Berlin 1845; W. Krafft, Die Topographie Jerusalems, Bonn 1846; J. Schwarz, Das h. Land p. 189-239; T. Tobler, Die Siloahquelle und d. Oelberg, St.-Gallen 1852; *id.* Denkblätter aus Jerusalem, ib. 1853; *id.* Zwei Bücher Topographie von Jerusalem, 2 voll., Berlin 1853 s.; *id.* Dritte Wanderung nach Palaest. p. 206-361; Ph. Wolff, Jerusalem, Leipzig 1857 (ed. 3, 1872); K. Raumer, Palaestina ed. 4, p. 285-360; F. de Sauley, Voyage en Terre S., Paris 1865, I. p. 341-410; II. p. 1-217; J. N. Sepp, Jerusalem und d. h. Land, ed. 2, I. p. 81-696. 856-919; G. Gall, Beschreibung über Jerusalem und seine Umgebung, Waldsee 1877; W. M. Thomson, The Land and the Book, London 1881, I (Southern Palestine) p. 415-567; V. Guérin, Jérusalem, son histoire, sa description, ses établissements religieux, Paris 1889; F. Buhl, Geogr. d. alten Palaestina p. 132-55; C. Mommer, Topographie des alten Jerusalem 1900-05, I.-III.

De excavationibus recentioribus cf. Ch. Warren and C. R. Conder, Jerusalem, in Survey of Western Palestine (London 1884), et variae relationes in Quarterly Statements of the Palestine Exploration Fund (1869 ss.); H. Guthe, Ausgrabungen bei Jerusalem, in Ztschr. d. D. Pal.-Ver. V. 1882, p. 7-204. 271-378 (et separatim, Leipzig 1883); F. J. Bliss, Excavations at Jerusalem 1894-1897, London 1898.

De urbe hodierna cf. Fr. Liévin de Hamme, Guide indicateur des sanctuaires et lieux historiques de la Terre Sainte, ed. 4, Jérusalem 1887, I. p. 162-500; J. Fahrngruber, Nach Jerusalem, ed. 2, I. 96-275; D. Zanecchia, La Palaestina d'oggi I. p. 82-373; Budeker-Benzinger, Palaestina und Syrien, ed. 5, p. 21-108; La Palestine, Guide historique et pratique, Paris [1904], p. 52-214.

Alia scripta v. ap. R. Röhrich, Bibliotheca geographica Palaestinae, Berlin 1890, et in notis bibliographicis ephemeridis « Zeitschrift des Deutschen Palaestina-Vereins » et « Orientalische Bibliographie ».

L. FONCK.

IESAAR v. ISAAR.

IESAIA (יְשַׁעְיָה), unus de filiis Idithun, princeps octavae classis cantorum (I Par. 25,3 Vulgata Iesaias, יֵשַׁעְיָה; 25,45 Vulgata Iesaia, יֵשַׁעְיָה).

IESAMARI (יְשַׁמְרִי, יֵשַׁמְרִי), unus

de filiis Elphaal, princeps cognationis beniaminiticae (I Par. 8,18).

IESANA (יֵשָׁנָה, ἡ Ἰεσσανά) urbs, quam Abia rex Iuda Ieroboam regi Israel eripuit una cum Bethel et Ephron (2 Par. 13,19). Coniungunt aliqui de eadem Iesana agi I Reg. 7,12 (Vulgata Sen; v. SEN). Apud Flavium Iosephum scribitur Ἰεσσανά (Ant. VIII. 11,3) et est eadem, apud quam Herodes Magnus Pappum ducem in exercitu Antigoni devicit (Ant. XIV. 15,12; sed Bell. iud. I. 17,5 mendose scribitur Κεσνῶ). Iesana agnoscitur Ain Sinia circa 5 km a Bethel aquilonem versus (Clermont-Ganneau).

Cf. Clermont-Ganneau in Journal asiat. IX. 1877 p. 490-501; *idem*, Archaeological Researches in Palestine II. 1896 p. 287-294; Pal. Expl. Fund, Quart. Stat. 1877 p. 206. 207; Survey of West. Pal. Mem. II. 291. 302; E. Schürer, Geschichte des jüdischen Volkes ed. 3. I. p. 357. 358; Guérin, Samarie II. 38 (situm vici indicat).

IESBA (יֵשְׁבָה, Ἰεσβά), pater seu possessor Esthamo urbis, filius Mered et Bethiae (I Par. 4,17); v. ESTHAMO et BETHIA.

IESBAAM (יֵשְׁבָאָם, Ἰεσβεαμ), filius Hachamoni, princeps inter fringita, qui levavit haslam suam super trecentos vulneratos (confossos) una vice (I Par. 11,11); eiusdem nomen etiam latet in textu corrupto 2 Sam. 23,8 (v. HACHAMONI). Idem fortasse est Iesbaam (LXX Σοβαάμ), qui Davidi in Siceleg fugitivo se iunxit et de posteris Core erat (I Par. 12,6). Idem quoque nomen hebr. habet Iesboam (LXX Ἰεσβάζ), qui in aula Davidis praeerat turmae primae 24000 bellatorum mense primo (I Par. 27,2).

IESBACASSA (יֵשְׁבַקָסָה, Ἰεσβακασά, Βακκασά), unus de filiis Heman, princeps decimae septimae classis cantorum (I Par. 25,4. 24).

IESIBIBENOB (יֵשִׁבִי בִּנְבִי, Qeri יֵשִׁבִי בִּי i. e. habitatio mea in Nob; LXX Ἰεσβί et cod. A addit ἐν Νόβ, gigas de genere Arapha seu Rapha, haslam gerens 300 siclorum ponderis aeris, qui cum Davidem percutere niteretur, ab

Abisai occisus est (2 Reg. 21,16. 17). Recentiores nomen proprium non agnoscunt, sed legere malunt וַיִּשְׁבִּי בִנְיָמִן *et morabantur in Gob* et haec verba inscunt post וַיִּבְרַח *cum eo* in versu 15 (*Wellhausen; Driver, Notes on the Hebrew Text of the Books of Samuel ad h. l.*). Sed animadvertit *F. de Hummelauer* ad h. l. : « Certe eae textus mutationes, quas proponit *Wellhausen*, fundamento critico destituuntur ».

IESBOAM v. IESBAAM.

IESBOC (יֶשְׁבֹּעַ; יֶשְׁבֹּעַ, Σοδάκ), filius Abrahæ ex Cetura genitus (Gen. 23,2; 1 Par. 1,32). Putant tribum Iesboc in inscriptionibus cuneiformibus designari nomine *Iasbuq*; anno primo regni sui (859 a. Chr.) Salmanassar II. Orontem in Syria septemtrionali traiecit, ut bellum gereret contra Sopalulme regem Patinai eiusque socios Sagara (Sangara) regem Karkemish, Pikhirim regem Cilicæ, Buranate regem terræ *Iasbuq*.

Cf. *Friedr. Delitzsch* in Zeitschrift für Keilschriftforschung II. 1885 p. 92; *E. Schrader, Keilschriftl. Bibliothek* 1889 I. 158; *E. Glaser, Skizze der Geschichte und Geogr. Arabiens* 1890 II. p. 446.

IESCHA (יֶשְׁכָּה, יֶשְׁכָּה), filia Aran fratris Abraham et soror Mechæ et Lot (Gen. 11,29). In traditione iudaica (Ps.-Jonathan, Targ. hieros., *Flav. Ios. Ant.* I. 6,5, *S. Hier.* Quaest. in Genesim etc.) Iescha eadem est ac Sarai idque sentiunt plerique interpretes. Aliqui eam binominem fuisse aiunt. Probabilius vero nomen Iescha ex corruptione nominis Sarai, quæ in antiqua scriptura facile fieri poterat, originem duxit. Cf. *F. de Hummelauer* ad h. l.

IESEIAS in Vulgata est nomen (v. ISAIAS) duorum virorum.

1. Ieseias (יֶשְׁעִיָּה, יֶשְׁעִיָּה, apud *Swete* B יֶשְׁעִיָּה, A יֶשְׁעִיָּה), vir ex posteris Zorobabel, secundum Vulgatam et LXX filius Phaltiae, secundum textum hebr. frater Phaltiae filii Hananiae (1 Par. 3,21).

2. Ieseias (1 Par. 23,3) v. IESAIAS.

IESEMA (יֶשְׁמָעֵאל; יֶשְׁמָעֵאל, B Παγαμ, A Ιεσμα), unus de stirpe Etam in ge-

nealogia Iuda (1 Par. 4,3); v. ETAM 3.

IESER (יֶזֶר; Ἰεσσαρ, Ἰεσέρ, Ἀσέρ), filius tertius Nephthali, progenitor Ieseritarum, qui in campestribus Moab inter cognationes Nephthali recensentur (Gen. 46,24; Num. 26,49; 1 Par. 7,13).

IESESI (יֶזְשִׁי, Ἰεσι), unus ex maioribus Abihail principis tribus Gad (1 Par. 5,14).

IESHURUN (יֶשְׁחֲרֹן) quod nomen LXX

interpretantur ἡγαπημένον, Vulgata Deut. 32,15 dilectum, Deut. 33,5. 26; Ps. 44,1 rectissimum, est appellatio Israelis blanda et honorifica. Formam plerique volunt esse diminutivam vocis יֶשֶׁר, ita ut populus significetur bonus et frugi. Cf. *Knabenbauer, Comment.* in Is. 44,2 et *F. de Hummelauer, Comment.* in Deut. 32,15.

IESI (יֶשֶׁר). 1. Vir de familia Hesron, filius Apphaim, pater Sesan (1 Par. 2, 31; LXX Ἰεμελ).

2. Pater Zoheth in genealogia Iuda (1 Par. 4,20; LXX Σεθ).

3. Quattuor filii Iesi cuiusdam: Phaltiam, Naariam, Raphaïam, Oziel cum viris quingentis de tribu Simeon expeditionem fecerunt in montem Seir, Amalecitas expulerunt et ibidem sedes suas fixerunt (1 Par. 4,42; LXX Ἰεσ).

4. Unus ex principibus cognationum Manasse ad orientem Iordanis (1 Par. 3,24; LXX Σε).

IESIA, IESIAS (יֶשִׁיָּה, יֶשִׁיָּה; Ἰεσι, Ἰησουστ, Ἰεσι, Ἰεσις). 1. Princeps quidam in Issachar tempore Davidis (1 Par. 7,3).

2. Vir de posteris Core et socius David in Siceleg fugitivi (1 Par. 12,6).

3. Levita de genere Caath et familia Oziel tempore Davidis (1 Par. 23,20; 24,25).

4. Princeps familiae Rohobiae filii Eliezer filii Moysis (1 Par. 24,21); idem 1 Par. 26,25 in Vulgata vocatur Isaias (יֶשְׁעִיָּה, Ἰεσις).

5. Iesia (Esdr. 10,25) v. IEZIA.

IESIEL v. IASIEL 1.

IESIMON (יֶזְשִׁימוֹן, Ἰεσιμων) 1

Reg. 23,24 non est nomen proprium loci vel deserti cuiusdam, ut Vulgata et LXX supponunt, sed appellativum (vide s. v. DESERTUM).

IESMACHIAS (יִסְמַחְיָהוּ, Σαμαχ(α)ς), unus ex levitis, qui ab Ezechia rege primitiis et decimis templo volis praepositi sunt, quorum praefecti erant Chonenias et Semei fratres (2 Par. 31,13).

IESMAIAS (יִשְׁמָאֵל, Σαμα(α)ς), filius Abdiae, princeps tribus Zabulon tempore Davidis (1 Par. 27,19).

IESPHA (יִשְׁפָּה, Σαφάν), filius Baria, Benjaminita (1 Par. 8,16).

IESPHAM (יִשְׁפָּן, 'Ισφάν), unus ex posteris Sesac de tribu Benjamin (1 Par. 8,22).

IESSE (Ἰεσσεύ) terra (Iudith 4,9) v. GESSEN.

IESSE, alia forma nominis Isai (vide s. v.) patris David.

IESSUI (יִשְׂשׁוּי, 'Ιεσού, 'Ιεσού, 'Ισου et 1 Reg. 14,49 'Ιεσσαούλ). 1. Tertius filius Aser, progenitor Iessuitarum (Gen. 46,17; Num. 26,44; 1 Par. 7,30).

2. Secundus filius Saul ex Achinoam (1 Reg. 14,49).

IESUA. 1. Iesua (יִשׁוּא, 'Ιεσσα, 'Ιεσσαύ, 'Ιεσσαύ), secundus filius Aser (Gen. 46,17; 1 Par. 7,30).

2. Iesua (יִשְׁשׁוּר, 'Ιεσσαύς), sacerdos tempore Davidis, cui nona sors in ministerio Domini designata est (1 Par. 24,11).

3. Iesua (יִשְׁשׁוּר, 'Ιεσσαύ), levita, qui cum Zorobabel ex captivitate rediit (Neh. 12,8); videtur ad illam familiam pertinere, de qua s. v. IOSUE 7.

IESUE (יִשׁוּעַ). 1. Levita tempore Ezechiae regis (2 Par. 31,15; LXX 'Ιησοῦς).

2. Una ex urbibus, quae a filiis Iuda ex captivitate reducibus denuo incolebantur (Neh. 11,26; LXX 'Ιησοῦ). Est ignota; sed quoniam una cum Molada, Hasersual, Bersabee enumeratur, quaerenda erit in meridiana plaga tribus Iuda. Conder suggerit *Khirbet S'awe* orientem versus a Bersabee (*Survey of West. Pal. Mem.* III. 404. 409).

IESUS (Ἰησοῦς). 1. Eo nomine appellatur imprimis Iosue Eccli. 46,1; 1 Mach. 2,55; 2 Mach. 12,15 (Vulg. h. l. Iosue); Act. 7,45; Hebr. 4,8 : « nam si eis Iesus requiem praestitisset, nunquam de alia loqueretur posthac die »; vide s. v. IOSUE 1.

2. Iesus sacerdos magnus, filius Iosedec, qui Zorobabel quam maxime allaboravit, ut rediret ex exilio templum Domini extruerent. Nomen eius effertur Iesus apud Aggaeum et Zachariam prophetas in Vulgata, Iosne autem vocatur in libris Esdrae et Nehemiae (Esdr. 2,2; 3,2. 8; 4,3; 5,2; Neh. 7,7; 12,1). Vide IOSUE 2.

3. Eodem nomine vocatur quoque in textu graeco auctor libri Ecclesiastici : doctrinam sapientiae et disciplinae scripsit (ἡγάραξα, scripsi) in codice isto Iesus filius Sirach Ierosolymita (Eccli. 50,29), quod idem in prologo ab eius nepote assertitur. Studio sapientiae deditus multa instituit itinera. Quando vixerit, ex prologo colligi debet, quae tamen indicia non sunt adeo certa, ut non plures opinionones sint propositae et quae 50,1-21 de Simone Oniae filio dicuntur, ab aliis referuntur ad priorem eius nominis sacerdotem magnum (310-291 a. Chr.), ab aliis ad alterum (219-199) : unde librum esse compositum alii circa an. 290 vel 280, alii c. 190 statuunt, quae ultima opinio praeferenda erit (cf. *Cornely*, *Introd. ed.* 2 II. 2 p. 251 s.), uti generatim a recentioribus praefertur; cf. *Knabenbauer*, *Comm. in Eccli.* p. 2 ss.

4. In genealogia Iesu Luc. 3,29 commemoratur Iesus quidam (ubi tamen longe plerique codices graeci Ἰωση praebent).

5. Inter Pauli socios recensetur Iesus cognomine Iustus, Iudaeus, quem Paulus dicit adiutorem suum in regno Dei i. e. in praedicatione evangelii et sibi fuisse solatio in priore captivitate romana (Col. 4,11).

IESUS CHRISTUS. 1. *Iesus, nomen proprium Christi*. Vox hebr. יִשְׁעִי est forma apocopata, tempore posteriore usitata pro pristina pleniore יְהוֹשֻׁעַ vel יְהוֹשֻׁעַ i. e. Iahwe est salus. Hoc nomen gerebat Iosue filius Num, apud LXX 'Ιησοῦς; et in Vulgata quoque

interdum Iesus appellatus, de quo Eccli. 46,1. 2 : qui fuit magnus secundum nomen suum, maximus in salutem electorum Dei (graece 46,1 : ὁς ἐγένετο κατὰ τὸ ὄνομα αὐτοῦ μέγας ἐπὶ σωτηρίᾳ ἐκλεκτῶν αὐτοῦ). Idem Iosue filius Nun Neh. 8,47 forma brevior *יְהוֹשֻׁעַ* vocatur; simili modo Iosue (Iesus) pontifex, aequalis Zorobabelis, modo forma plenior *יְהוֹשֻׁעַ* (Agg. 1,1. 12; Zach. 3,1; 6,11) modo brevior *יְשׁוּעַ* (Esd. 2,2; 3,2; Neh. 7,7. 39; 12,1. 10. 26) vocatur; quae nominis forma brevior posteriore tempore crebro viris indebatur. Est igitur nomen compositum ex appellatione apocypata *יה* = lahwe et *שׁוּעַ* (*יְשׁוּעַ* et *יְשׁוּעַ*) = salus, liberatio, auxilium. Unde Philo rite exponit nomen Ἰησοῦς (Iosue) σωτηρία κυρίου (De nominum mutatione, § 24; Opera Philonis ed. Pfeiffer IV. 374) et Eusebius nomen Ἰωσούε explicat Ἰαὼ σωτηρία i. e. Θεοῦ σωτήριον eandemque significationem nomini Iesu attribuit (Demonstr. ev. IV. in fine, apud Migne 22,333). Ex Graecis aliqui nomen explicarunt a voce ἰάομαι = sanare; ita Clemens Alex. (Paedag. 3,12 apud Migne 8,677) et S. Cyrillus Hieros. qui tamen addit significationem nominis ex hebraico esse σωτήρ (Catech. 10,13 apud Migne 33,677). Etiam S. Chrysostomus monet nomen non esse graecum sed hebraicum et significare σωτήρ (Hom. 2,2). Eadem nominis significatio declaratur ab angelo : ipse enim salvum faciet (σώσει, hebr. *יְשׁוּעַ* in Hiph'il) populum suum a peccatis eorum (Matth. 1,21), qua explicatione munus Messiae Salvatoris nostri designatur. Nomen hoc ab ipso Deo electum et per angelum manifestatum est matri virgini (Luc. 1,31) eiusque sponso S. Iosepho (Matth. 1,21). Cf. Knabenbauer ad Matth. 1,21.

2. Filius hominis, quodammodo nomen proprium Christi.

Ipse Iesus plerumque se nominat filium hominis (septuagies octies in Evangelii vel omissis locis parallelis quinquagies). A nullo autem ita vocatur, si Act. 7,55 exceperis, quo loco S. Stephanus alludens ad ipsa Christi verba Matth. 26,64 exclamat morti proximus : Ecce

video caelos apertos et Filium hominis stantem a dextris Dei.

Quod nomen ex Dan. 7,13. 14 petittum Messiam designat : « aspicebam ergo in visione noctis et ecce cum nubibus caeli quasi filius hominis veniebat et usque ad antiquum dierum pervenit et in conspectu eius obtulerunt eum et dedit ei potestatem et honorem et regnum et omnes populi, tribus et linguae ipsi servient; potestas eius potestas aeterna quae non auferetur et regnum eius quod non corrumpetur ». Ad quem locum notat Knabenbauer : « Hic Messiam induci ex iis quae alii prophetae iam ante Danielem tradiderunt dubium esse nequit. Ei enim soli praeter lahwe gentes dantur in hereditatem; ei soli regnum et potestas in orbem universum adscribitur (cf. Gen. 49,10; Ps. 2,6; 44,5 s.; 71,1 s.; Is. 41,10; 49,6; 53,11. 12; Ier. 23,5; 30,21; Ez. 34,23; Mich. 5,4 s. etc.). Illic vero nobis proponitur quasi *filius hominis*, cernitur in natura humana, quam postmodum assumpturus erat... Venit cum nubibus caeli i. e. eo modo quo Deus ipse in s. litteris apparere dicitur, quo Israelitas ab Aegyptiis defendit, in montem Sinai descendit, in tabernaculo suam ostendit praesentiam, in templo se manifestavit, in psalmis tamquam orbis terrarum dominus ac iudex describitur... ex quibus locis apparet venire cum nubibus caeli attribui divinitati, cum in sacris litteris toties apparitio Dei in nube fieri dicatur. Unde is, qui quasi filius hominis venire dicitur, simul uti in natura humana nobis ostenditur, ita in natura quoque divina clare exhibetur... Hoc nostro loco non describitur eius ad iudicium adventus, sed quomodo angelorum comitatu magifico cum pompa adducatur ad Deum Patrem, qui inimicis devictis ei tradit regnum plane gloriosum ».

Ad hoc vaticinium danielicum Christus verbis explicitis nos remittit Ioan. 3,27 : et (Pater) potestatem dedit ei iudicium facere, quia Filius hominis est.

Ad idem vaticinium danielicum clare alludit Christus respondens Caiphae : amodo videbitis Filium hominis sedentem a dextris virtutis Dei et venientem in nubibus caeli (Matth. 26,64); eodem

modo se ad iudicium ultimum venturum esse praedicit (Matth. 24,30; Marc. 13, 26; cf. Apoc. 1,7). Quo nomine satis declaravit scribis et Pharisaeis, quis esset; abstinebat autem se vocare Messiam propter falsas illas populi opiniones et expectationes de Messia; nude etiam prohibuit apostolis, ne dicerent plebi se esse Messiam. Christus igitur, sicuti ex una parte ea agit et dicit, quae non poterant convenire nisi in Messiam, ex altera parte tamen non aperte se proclitetur Messiam, ita nomen Filii hominis sibi quodammodo proprium attribuit, quod, quamvis dignitatem Messiae significaret iis, qui vaticinium danielicum perspectum habent, tamen eam enuntiabat modo non omnibus aperto.

De Filio hominis cf. Zeitschr. f. kath. Theol. XVI. 1892 p. 369; Revue bibl. IX. 1900 p. 172 s.

3. Divinitas Christi. Iesum Christum esse verum Filium Dei et verum Deum iam indicatur in Vetere Testamento, clare proponitur a scriptoribus Novi Testamenti, maxime a S. Paulo, consilio propugnatur a S. Ioanne. Plenior igitur huius doctrinae evolutio in sacris libris admittenda est.

In psalmis dicitur Messias (vide s. v.) ab aeterno a Deo genitus (Ps. 2,7; cf. Hebr. 1,3), sedens a dextris Dei ipse Deus (Ps. 44,7. 8 et cf. Hebr. 1,8; Ps. 109,1. 3 et cf. Matth. 22,41 ss.).

In libris sapientialibus describitur Sapientia increata ut persona divina ab alia persona divina orta et distincta Prov. 8,22 ss.; Sap. 7,21 ss.; Eccli. 24. Sapientiam, de qua locis citatis sermo est, esse Christum patet ex Ioan. 1,1 ss. et Hebr. 1,3.

In libris prophetis Messias promissus saepe vocatur Deus: Is. 7,14 et 9,6 (cf. Matth. 1,23); Is. 33,4; 40,3. 10 (cf. Marc. 1,3); Mich. 5,2 (cf. Matth. 2,6); Zach. 12,10; 13,7; Mal. 3,1 (cf. Matth. 11,10).

In evangelis synopticis divinitas Iesu Christi clare enuntiatur. Evangelistae synoptici ad Christum applicant textus Veteris Testamenti, quibus Messias dicitur Deus (cf. Matth. 1,23; 2,6; Marc. 1, 2; Luc. 7,27); loquuntur de divinitate Christi ut de re nota; exhibent Chri-

stum opponentem se omnibus creatoris tamquam perfectionibus excellentioribus instructum et intime cum Deo coniunctum, cui soli intima Patris cognitio est naturalis, sicut soli Patri naturalis est intima Filii cognitio (Matth. 11,27; Luc. 10,22). Ex narratione Matth. 16, 13 ss. colligitur Christum esse altiorem omnibus prophetis, esse Filium Dei vivi, posse dare claves regni caelorum atque ex divina tantum revelatione sciri posse, quis sit. Nullus prophetarum talem cultum sibi postulavit, qualem Christus (Matth. 10,37; Luc. 14,26). Christus mittit apostolos ad baptizandum in nomine Patris et Filii et Spiritus Sancti, proclitetur sibi dariam esse omnem potestatem in caelo et in terra, se futurum esse cum ecclesia sua usque ad consummationem saeculi (Matth. 28,18 ss.; cf. Marc. 16,15 ss.), se missurum esse angelos et venturum in nubibus caeli ad iudicium universale (Matth. 24,30 ss.). Christus est Filius Dei altiore sensu quam reliqui prophetarum, ut ex parabola de infidelibus agricolis elucet (Matth. 21,23; Marc. 12,6; Luc. 10,9); est Filius Dei eo sensu, quo nullus homo ex Iudaeorum iudicio sine blasphemia se Filium Dei profiteri poterat (Matth. 26,64; Marc. 14, 61; Luc. 22,70); est Filius Dei naturalis, cui Pater caelestis testimonium exhibet: Hic est Filius meus dilectus, in quo mihi complacui (Matth. 3,17; 17,3; Marc. 1,11; 9,6; Luc. 3,22; 9,35).

In Actibus apostolorum Christus praedicatur Filius Dei (8,37), in cuius virtute patrantur miracula (3,6), in cuius nomine baptisma confertur (2,38; 8,16; 10,48), in quem credere debet, qui vult salvus fieri (16,31), cui omnes prophetae testimonium perhibent, remissionem peccatorum accipere per nomen eius omnes, qui credunt in eum (10,43), qui sua auctoritate apostolos constituit (26,16 s.) eisque praecepit praedicare populo et testificari, quia ipse est qui constitutus est a Deo iudex vivorum et mortuorum (10,42).

In epistulis S. Pauli divinitas Iesu Christi passim nota supponitur et speciatim in epistula ad Hebraeos de industria docetur. Christus ut Dei Filius iam exsistebat, antequam in hunc mundum

venisset (Rom. 8,3); semper erat et est « super omnia Deus benedictus in saecula » (Rom. 9,5 et cf. *Cornely* ad h. l.). Christo utpote Deo tota vita dedicanda et ratio actionum nostrarum reddenda est (Rom. 14,6 ss.). In nomine Iesu flectitur omne genu caelestium, terrestrium et infernorum et omnis lingua confitetur, quia Dominus Iesus Christus in gloria est Dei Patris (Phil. 2,10. 11). Christus est Iahwe, qui Israelitas duxit per desertum, eis aquam et petra largitus eorumque diffidentia tentatus est. Christus quasi nomine proprio vocatur ὁ υἱός, quod nomen est usitata versio graeca tetragrammati, quo appellabatur Deus foederis; Christus Dominus est Deus novi foederis. « Unus Dominus Iesus Christus, per quem omnia » (1 Cor. 8,6). « Qui cum in forma Dei esset [i. e. eiusdem naturae ac Deus] non rapinam arbitratus est esse se aequalem Deo » (Phil. 2,6). Eidem Christo eliam summus angelos esse subiectos inculcat apostolus in epistula ad Colossenses (1,15. 16. 17; 2,8. 9. 10. 18). In epistula denique ad Hebraeos S. Paulus praeclare demonstrat Iesu Christi excellentiam prae Moyse ac prae ipsis angelis eiusque cum Deo consubstantialitatem et coaeternitatem (Hebr. 1,1 ss.; 3,2 ss.; 5,3; 13,8). — Haec igitur est magna dignitas religionis christianae, quod ipsum Deum incarnatum habet fundatorem (Tit. 2,11-13; cf. 3,4).

S. Ioannes in conscribendis evangelio, apocalypsi, epistulis divinitatem Iesu Christi docet contra eos, qui « ex nobis prodierunt, sed non erant ex nobis; nam si fuissent ex nobis, permansissent utique nobiscum ... quoniam omne mendacium ex veritate non est. Quis est mendax nisi is, qui negat, quoniam Iesus est Christus [i. e. Messias et Deus]? Hic est antichristus, qui negat Patrem et Filium... Et omnis spiritus, qui solvit Iesum [i. e. non confitetur eum esse Deum], ex Deo non est... Quisquis confessus fuerit, quoniam Iesus est Filius Dei, Deus in eo manet et ipse in Deo » (1 Io. 2,19. 21. 22; 4,3. 15). Christus enim est ipsa « vita aeterna, quae erat apud Patrem et apparuit nobis » (1 Io. 1,2). Integrum evangelium S. Ioannis in eum

finem dirigitur, ut praeprimis Iesu messianitas ac divinitas demonstraretur ac fides in Iesum tamquam in Christum et Dei Filium necessaria praedicetur (cf. *Cornely*, Introd. ed. 2 III. n. 63). In apocalypsi denique « vix unam pericopen invenimus, quae divinitatem Domini N. Iesu Christi nobis non magnifice revelet... Apocalypsis Filium Dei nobis ostendit exaltatum, cui datum est nomen, quod est supra omne nomen... Evangeliorum est complementum... est canticum triumphale atque nuptiale Christi post victoriam de omnibus hostibus nuptias cum sponsa sua Ecclesia celebrantis » (*Cornely* l. c. n. 250).

De divinitate Christi cf. *Chr. Pesch*, Praelectiones dogmaticae T. IV. ed. 2, num. 8-23 : Argumentum ex S. Scriptura.

4. *Vita Iesu Christi* chronologice disposita secundum quattuor evangelia.

Christi nativitas et infantia.

Inscriptio evangelii Marc. 1,1.

Praefatio Lucae evangelistae Luc. 1, 1-4.

Prooemium de Verbo aeterno et mysterio incarnationis Io. 1,1-18.

Genealogia Iesu Christi Matth. 1,1-17; Luc. 2,23-38.

Annunciatio et conceptio S. Ioannis Baptistae (anno 747 u. c. = 7 ante aer. Dion.) Luc. 1,3-25.

Annunciatio et incarnatio Verbi aeterni (anno 748 u. c. = 6 ante aer. Dion.) Luc. 1,26-38; Matth. 1,18.

B. Virgo Maria invisit Elisabeth Luc. 1,39-56.

Nativitas S. Ioannis Baptistae (anno 748 u. c. = 6 ante aer. Dion.) Luc. 1, 57-80.

Haesitatio S. Ioseph de accipienda Maria coniuge sua Matth. 1,19-24

Iter S. Ioseph et B. Virginis Mariae in Bethlehem Luc. 2,1-5.

Nativitas Iesu Christi (anno 748 u. c. = 6 ante aer. Dion.) Luc. 2,6. 7; Matth. 1,23.

Pastores ad Christi praesepe vocantur Luc. 2,8-20.

Christus circumciditur et Iesus vocatur Luc. 2,21; Matth. 1,25.

Praesentatio Iesu in templo et purificatio B. Virginis Mariae Luc. 2,22-38.

S. Familia proficiscitur Nazareth (indeque rebus compositis revertitur Bethlehém, ut ibi sedem figat) Luc. 2,39.

Magi Iesum adorant (anno 749 u. c. = 3 ante aer. Dion.) Matth. 2,1-12.

Fuga Iesu in Aegyptum et caedes puerorum Matth. 2,13-18.

Mors Herodis Magni et reditus ex Aegypto (anno 750 u. c. = 4 ante aer. Dion.) Matth. 2,19-22.

S. Familia sedem suam ligat in Nazareth Matth. 2,23. Iesus in Nazareth occultam vitam agit; duodecim annos natus cum parentibus suis Hierosolyma ascendit ad pascha celebrandum Luc. 2,40-52.

Praeparatio ad vitam publicam.

Anno 778 u. c. S. Ioannes Baptista poenitentiam praedicare et Christum mox venturum annuntiare coepit Luc. 3,1-18; Marc. 1,2-8; Matth. 3,1-12.

Iesus baptizatur Luc. 3,21. 22; Marc. 1,9-11; Matth. 3,13-17.

Iesus in deserto ieiunat et a diabolo tentatur Luc. 4,1-13; Marc. 1,12. 13; Matth. 4,1-11.

Iudaei legationem ad Ioannem Baptistam mittunt Io. 1,19-28.

Vita publica usque ad primum pascha.

Iesus a S. Ioanne Baptista demonstratur Agnus Dei, primos discipulos vocat, in Galilaeam revertitur Io. 1,29-31.

Iesus in Cana Galilaeae primum miraculum facit Io. 2,1-11.

Descendit Capharnaum ibique paucis diebus manet Io. 2,12.

A primo paschate usque ad secundum.

Iesus Hierosolyma ascendit ad pascha Io. 2,13.

Negotiatores e templo eiicit Io. 2,14-25.

Nicodemum nocte ad se venientem docet Io. 3,1-21.

Hierosolymis egressus in Iudaea per discipulos baptizat; qua de re conquerentibus Ioannis Baptistae discipulis ille

iterum de Christo testimonium reddit. Ioannes B. ab Herode (Antipa) in vineula conicitur, Iesus relicta Iudaea in Galilaeam proficiscitur Io. 3,22-36; 4,1-3; Luc. 3,19. 20; 4,14; Marc. 1,14; Matth. 4,12.

Transiens per Samariam convertit mulierem, praedicat discipulis divitem segetem inter ethnicos, in Galilaea secundum miraculum patrat sanans filium reguli capharnaumitae Io. 4,4-54.

Incipit ministerium galilaicum Luc. 4,14. 15; Marc. 1,14. 15. Docet in synagoga nazarethana Luc. 4,16-30.

Eligit sibi Capharnaum domicilium Luc. 4,31. 32; Marc. 1,21; Matth. 4,13-17.

Simonem et Andream, Iacobum et Ioannem ad continuam suam sequelam vocat Marc. 1,16-20; Matth. 4,18-22.

Sabbato in synagoga Capharnaum eiicit spiritum immundum Luc. 4,33-37; Marc. 1,21-28. Eodem die socrum Simonis Petri sanat Luc. 4,38. 39; Marc. 1,29-31; Matth. 8,14. 15. Vespere eiusdem diei multos infirmos curat Luc. 4,40. 41; Marc. 1,32-34; Matth. 8,16. 17.

Postero die totam Galilaeam peragrare incipit docens et signa faciens Luc. 4,42-44; Marc. 1,35-39; Matth. 4,23. 24.

De navi Simonis turbas docet Luc. 5,1-3. Discipuli post miraculosam in lacu Genesareth piscationem Iesum constanter sequuntur Luc. 5,4-11.

Sanat leprosum quendam Luc. 5,12-16; Marc. 1,40-45; Matth. 8,2-4.

Capharnaum reversus sanat paralyticum per tectum demissum Luc. 5,17-26; Marc. 2,1-12; Matth. 9,1-8.

Vocat Matthaeum (Levi Alphaei) et in eius domo convivii interest Luc. 5,27-39; Marc. 2,13-22; Matth. 9,9-13.

A secundo paschate usque ad tertium.

Iesus Hierosolyma ascendit ad pascha, sabbato hebdomadis festivae sanatur aegrotum ad probaticam piscinam iacentem, se Filium Dei profitebatur, provocat ad testimonia S. Ioannis Baptistae, miraculorum suorum, Patris sui Io. 5,1-47.

Reversus in Galilaeam discipulos sabbato spicas vellentes contra Phariseos

defendit Luc. 6,1-5; Marc. 2,23-28; Matth. 12,1-8.

Curat manum aridam sabbato, quo miraculo odium Pharisaeorum et Herodianorum auget, quare comitantibus turbis ad mare Tiberiadis secedit Luc. 6, 6-11; Marc. 3,1-12; Matth. 12,9-21 et cf. 4,23.

Eligit duodecim apostolos Luc. 6,12-16; Marc. 3,13-19; Matth. 10,2-4.

Sermonem in planitie montana ad apostolos et ad turbas habet Luc. 6,17-49; Matth. 5,1-7,29.

Capharnaum reversus servum centurionis sanat Luc. 7,1-10; Matth. 8,1-13.

Civitatem Naim ingrediens iuvenem mortuum excitat Luc. 7,11-17.

Quibus de rebus Ioannes Baptista in carcere certior factus legationem ad Christum mittit Luc. 7,18-23; Matth. 11,2-6.

Iesus Ioannis Baptistae laudes praedicat, eius testimonium respuentes vituperat Luc. 7,24-35; Matth. 11,7-19.

Mulieri peccatrici in domo Simonis Pharisei peccata remittit Luc. 7,36-50.

Galilaeam peragrans cum discipulis et ministrantibus mulieribus proponit parabolas de seminante, de semine germinante, de zizaniis, de grano sinapis, de fermento, de thesauro abscondito, de pretiosa margarita, de sagena missa in mare aliasque multas Luc. 8,1-18; Marc. 4,1-34; Matth. 13,1-52.

Cum turbas doceret, veniunt mater et fratres eius quaerentes loqui ei Luc. 8, 19-21; Marc. 3,31-35; Matth. 12,46-50.

Transfretans Iesus procellam sedat Luc. 8,22-25; Marc. 4,35-40; Matth. 8,18. 23-27.

In regione Gerasenorum duos homines a daemonibus liberat Luc. 8,26-39; Marc. 5,1-20; Matth. 8,28-34.

Capharnaum reversus discipulos Ioannis Baptistae de ieiunio interrogantes edocet, a lairo vocatus mulierem haemorrhoeisam sanat et filiam lairi a mortuis excitat, duobus caecis visum reslituit, daemoniacum mutum sanat Luc. 8,40-56; Marc. 5,21-43; Matth. 9,1-14-34.

Iesus iterum venit in patriam suam Marc. 6,1-6; Matth. 13,53-58.

Peragrat castella Galilaeae Marc. 6,6; Matth. 9,35-38.

Apostolos ad praedicandum mittit Luc. 9,1-6; Marc. 6,7-13; Matth. 10,1-5-14.

Herodes Antipas, qui paulo ante occiderat Ioannem Baptistam, audiens de miraculis Christi timet, ne Ioannes a mortuis resurrexerit Luc. 7,7-9; Marc. 6,14-29; Matth. 14,1-12.

Apostoli a prima missione redeunt, Iesus cum eis transfretavit Bethsaida in Io. 6,1; Luc. 9,10; Marc. 6,30-32; Matth. 14,13.

Iesus magnam turbam, quae eum trans lacum Genesareth secuta erat, quinque panibus saturat, discipulos navim conscendere iubet, parte noctis in oratione peracta supra mare ambulans ad eos venit et cum eis Capharnaum redit Io. 6,2-21; Luc. 9,11-17; Marc. 6, 32-33; Matth. 14,13-34.

Turbis ipsum secutis sequenti die in synagoga capharnaumitana sermonem habet de pane vitae et panem eucharisticum promittit Io. 6,22-72.

A tertio paschate usque ad sce-nopegiam.

Iesus in Galilaea manens et terram Genesareth perambulans multos sanat Io. 7,1; Marc. 6,54-56; Matth. 14,35. 36.

Phariseos hierosolymitanos, qui discipulos Iesu ob non observatas traditiones vituperarunt, increpat et discipulos de iisdem edocet Marc. 7,1-23; Matth. 15,1-20.

In Phoeniciam profectus sanat filiam daemoniacam mulieris syrophoenissae Marc. 7,24-30; Matth. 15,21-28.

Inde in Decapolim iuxta lacum Tiberiadis regressus sanat surdo-mutum Marc. 7,31-37.

Prope lacum Genesareth, postquam multos aegrotos sanavit, altera vice panes multiplicat Marc. 8,1-9; Matth. 15,29-38.

Inde navi in fines Magedan prope Dalmanutham abiens Phariseis signum petentibus signum Ionae datum iri praenuntiat et discipulos monet, ut sibi a Phariseis et Sadduceis caveant Marc. 8,10-21; Matth. 15,39; 16,1-12.

Bethsaidam appulsus caeco visum restituit Marc. 8,22-26.

Exinde Caesaream Philippi veniens Petro Christum Dei Filium profitenti primatum Ecclesiae promittit, passionem suam prima vice praedicat, necessitatem abnegationis inculcat Luc. 9,18-27; Marc. 8,27-39; Matth. 16,13-28; 10,38. 39.

Post sex dies Iesus in monte transfiguratur Luc. 9,28-36; Marc. 9,2-12; Matth. 17,1-13.

De monte descendens sanat puerum daemoniacum et passionem suam iterum praedicat Luc. 9,37-43; Marc. 9,13-31; Matth. 17,14-22.

Capharnaum reversus solvit didrachma Matth. 17,23-26.

Discipulos, qui in via inter se contenderant, quis eorum esset maior, domi corripit et Ioannis zelotypiam reprimit, monet vitandum scandalum Luc. 9,46-50; Marc. 9,32-49; Matth. 18,1-14.

A scenopegia tertiæ anni usque ad encaenia.

Iesus cum cognatis ad festum scenopegiae Hierosolyma ascendere recusat, sed mox relicta Galilaea in Iudaeam proficiscitur, a Samaritanis hospitio non excipitur Io. 7,2-10; Luc. 9,51-56; Marc. 10,1; Matth. 19,1.

Exponit conditiones suae sequelae quibusdam ipsum sequi volentibus Luc. 9,57-62; Matth. 8,19-22.

Eligit septuaginta duos discipulos, qui ipsi viam parent, obstinatis civitatibus comminatur, reversis discipulis Patrem glorificat Luc. 10,1-24; Matth. 10,15. 16. 40-42; 11,20-30.

Legisperitum tentantem docet mandatum magnum dilectionis eique parabolam boni Samaritani proponit Luc. 10, 23-37.

Bethaniae a Martha et Maria hospitio excipitur Luc. 10,38-42.

Mediante festo Iesus in templum ascendit et publice docet Io. 7,11-36; ultimo die festo scenopegiae se populo manifestat Io. 7,37-53.

Postero die mulierem adulteram absolvit Io. 8,1-11.

Post festum scenopegiae in templo divinam suam originem dignitatemque profitetur Io. 8,12-59; caeterum a nativitate

sabbato sanat Io. 9,1-41; verum pastorem se esse declarat Io. 10,1-21.

Iesus discipulos suos orare docet Luc. 11,1-13; Matth. 6,9-13; 7,7-11.

Eiecto daemonio muto confutat Phariseos calumniantes et signum postulantes Luc. 11,14-36; Matth. 12,22-45.

Invitatus a Phariseo vituperat hypocrisin Phariseorum et scribarum Luc. 11,37-54.

Iudaeam peragrans varia praecepta monitaque discipulis tradit Luc. 12,1-53; Matth. 10,26-33; 6,23-34; 6,19-21; 24, 43-51; 10,34-36; turbas exhortatur ut poenitentiam agant Luc. 12,54-59; 13, 1-9.

Sabbato in synagoga sanat mulierem incurvatam Luc. 13,10-17.

Parabolis de grano sinapis et fermento illustrat naturam regni Dei Luc. 13,18-21; Marc. 4,30-32; Matth. 13,31-33.

Revertitur Hierosolyma Luc. 13,22.

Ab encaeniis usque ad hebdomadem passionis.

Tempore encaeniorum in templo aperte Filium Dei se dicit Io. 10,22-39.

Scedens in Peraeam Io. 10,40-42 Israelitas reiiciendos, gentes vocandas esse praedicat et Phariseis perditis suam quidem mortem, at simul urbis Ierusalem eversionem praedicat Luc. 13,23-35.

Sabbato sanat hydropicum in domo cuiusdam principis Phariseorum, invitatos docet humilitatem, iisdem parabolam coenae magnae proponit Luc. 14, 1-24.

Discedens docet eos, qui ipsum sequuntur, omnia esse relinquenda, proponit parabolas de aedificatu turrum et de rege bellum paraturo Luc. 14,23-35; murmurantibus Phariseis de peccatoribus bene receptis proponit parabolas de ove perditâ, de drachma amissa, de filio prodigo Luc. 15,1-32.

Discipulis proponit parabolam de villico iniusto, Phariseis illudentibus parabolam de paupere Lazaro et divite in gehennam eiecto Luc. 16,1-31.

Docet discipulos quomodo scandala vitanda et proximus corrigendus iisdemque tradit potestatem solvendi et ligandi Luc. 17,1-4; Matth. 18,15-22.

Quomodo aliis ignoscendum sit, ostendit parabola de rege cum servis suis rationem ineunte Matth. 18,23-33.

Apostolos docet fidei efficaciam eisque parabolam servi arantis proponit Luc. 17,5-10.

Relicta Peraea Iudaeam petit, Lazarum a mortuis excitat, in oppidum Ephrem se recipit Io. 11,1-54.

Inde per Samariam, Galilaeam (et Peraeam) longo circuitu proficiscitur Hierosolyma Luc. 17,11; in itinere sanat decem leprosos, ex quibus unus Samaritanus Luc. 17,12-19; docet inopinatum fore adventum regni Dei Luc. 17,20-37; commendat orationem perseverantem parabola de indice iniusto, orationem humilem parabola de pharisaeo et publicano Luc. 18,1-14.

Trans Iordanem in fines Iudaeae veniens docet indissolubilitatem matrimonii et commendat virginitatem Marc. 10,1-12; Matth. 19,1-12; 5,31. 32; benedicit infantibus sibi oblati Luc. 18, 15-17; Marc. 10,13-16; Matth. 19,13-15; iuveni diviti paupertatem commendat Luc. 18,18-23; Marc. 10,17-22; Matth. 19,16-22; exponit pericula divitiarum, bona voluntariae paupertatis Luc. 18, 24-30; Marc. 10,23-31; Matth. 19,23-30; proponit parabolam operariorum in vinea laborantium Matth. 20,1-16.

Tertia vice praedicit passionem proximae futuram Luc. 18,31-34; Marc. 10, 32-34; Matth. 20,17-19; respondet petitioni matris filiorum Zebedaei Marc. 10, 35-43; Matth. 20,20-28.

Urbem Iericho ingrediens sanat caecum Luc. 18,35-43; Zachaeum publicanum invisit et parabolam de domino servis suis decem mnas distribuyente narrat Luc. 19,1-28; egrediens e Iericho duos cecos sanat Marc. 10,46-52; Matth. 20,29-34.

Hebdomas passionis.

Sexto die ante pascha (i. e. feria sexta) Iesus Bethaniam venit et (sabbato) in domo Simonis leprosi inter coenam a Maria ungitur Io. 11,55. 56; 12,1-11; Marc. 14,3-9; Matth. 26,6-13.

Bethania profectus Iesus die Dominica sollemni pompa urbem et templum ingreditur, miracula patrat, sacerdotes

iratos increpat, Bethaniam revertitur Io. 12,12-19; Luc. 19,29-44; Marc. 11,1-11; Matth. 21,1-11. 14-17.

Mane (feria secunda) ad templum revertens in via maledixit ficui sterili, in templo vendentes et ementes eiicit ibique docet, vespere e civitate egreditur (revertitur Bethaniam) Luc. 19,45-48; Marc. 11,12-19; Matth. 12,18. 19. 12. 13.

Revertens (feria tertia) ad templum discipulos efficaciam fidei docet a ficu arefacta Marc. 11,20-26; Matth. 21,19-22. Templum ingressus et interrogatus, qua potestate (heri) egerit, respondet alia interrogatione de missione Ioannis Baptistae ac narrat parabolas de filio obediente et inobediente, de vinitoribus filium domini sui occidentibus, de coena nuptiali Luc. 20,1-19; Marc. 11,27-30; 12,1-12; Matth. 21,23-46; 22, 1-14. Confundit Phariseos et Herodianos interrogantes liceatne Caesari tributum solvere, Sadducaeos de resurrectione interrogantes, respondet scribae tentanti eum de primo mandato legis, opponit quaestionem de Messia Davidis filio et Domino, Phariseos et scribas carpit, laudat munus a paupere vidua oblatum Luc. 20,20-47; 21,1-4; Marc. 12,13-44; Matth. 22,15-46; 23,1-39. Gentilibus eum videre cupientibus clarificatur voce de caelo delapsa et mortem suam brevi futuram praedicit Io. 12,20-36. Iudaeis incredulis Io. 12, 37-50 relictis egressus e civitate praedicit eversionem urbis et finem mundi, proponit parabolas de decem virginibus et de talentis, praenuntiat sententiam iudicis aeterni Luc. 21,5-36; Marc. 13,1-37; Matth. 24,1-51; 25,1-46. Eadem die principes sacerdotum et magistratus consilium inierunt, ut Iesum dolo tenerent et Iudas cum ipsis paciscitur Luc. 22,1-6; Marc. 14,1. 2. 10. 11; Matth. 26, 1-5. 14-16. Iesus vero abiit et abscondit se ab eis Io. 12,36.

Mane (feria quinta) Iesus mittit Petrum et Ioannem, ut coenam paschalem praeparent Luc. 22,7-13; Marc. 14,12-16; Matth. 26,15-29. Vespere cum discipulis coenae accumbit Io. 13,1-38; 14,1-31; Luc. 22,14-18. 21-34; Marc. 14,17-21; Matth. 26,20-25. Post discessum Iudae finita coena Iesus instituit SS.

Eucharistiam Luc. 22,19. 20; Marc. 14, 22-25; Matth. 26,26-29, adiungit longiorem exhortationem et sublimem illam orationem pro discipulis omnibusque fidelibus Io. 15,1-17,26. Exit cum discipulis ad hortum Gethsemani, orat in agonia, osculo Iudae proditur, captus ducitur ad Annam et Caiphā, negatur a Petro, a satellitibus illuditur Io. 18,1-27; Luc. 22,35-65; Marc. 14,26-34. 63-72; Matth. 26,30-58. 67-73.

Mane (feria sexta) Iesus a Caipha et synedrio condemnatur Luc. 22,66-71; Marc. 14,53-64; Matth. 26,59-66. Adducitur ad Pilatum Io. 18,28; Luc. 23,1; Marc. 15,1; Matth. 27,1. 2. Iudas desperat Matth. 27,3-10. Iesus coram Pilato accusatur Io. 18,29-38; Luc. 23,2. 3; Marc. 15,2-8; Matth. 27,11-14; ad Herodem mittitur Luc. 23,4-12; reversus ad Pilatum Barabbae postponitur Io. 18,39. 40; Luc. 23,13-23; Marc. 15,6-15; Matth. 27,15-26; flagellatur, spinis coronatur, tumultuantibus Iudaeis crucifigendus traditur Io. 19,4-16; Luc. 23,24. 25; Marc. 15,16-19; Matth. 27,26-30. Educitur in montem Calvariae et medius inter duos latrones crucifigitur titulo cruci infixo Io. 19,16-22; Luc. 23,26-33. 38; Marc. 15,20-23. 25-28; Matth. 27,31-34. 37. 38. In cruce blasphematur, septem verba proloquitur, expirat Io. 19,23-30; Luc. 23,34-37. 39-46; Marc. 15,24. 29-37; Matth. 27,35. 39-50. Fiunt signa, latronum crura franguntur, Iesu Christi latus lancea aperitur, corpus sepelitur Io. 19,31-42; Luc. 23,45. 47-56; Marc. 15,38-47; Matth. 27,51-61.

Sabbato inchoato pharisaei sepulcrum Christi obsignant et militibus custodiunt Matth. 27,62-66. Mulieres, quae paraverant aromata (ante inchoatum sabbatum), sabbato siluerunt secundum mandatum Luc. 23,56. Post solis occasum Maria Magdalene aliaeque mulieres emunt aromata Marc. 16,1.

Iesu Christi resurrectio et ascensio.

Die Dominica valde diluculo exeunt mulieres ad sepulcrum Io. 20,1; Luc. 24,1; Marc. 16,1; Matth. 28,1. Interim terrae motus factus est et angelus revolvit lapidem a monumento Matth. 28,2-

4. Maria Magdalene videns lapidem revolutum et sepulcrum vacuum properat ad Petrum et Ioannem Io. 20,2. Mulieres ab angelis docentur factam resurrectionem, regressae ob timorem silent per aliquod tempus, postea referunt discipulis, qui non credunt. Luc. 24,2-11; Marc. 16,3-8; Matth. 28,5-8. Interea Petrus et Ioannes a Maria Magdalene accersiti accurrunt et rem inveniunt, sicut mulieres dixerant Io. 20,3-10; Luc. 24,12. Revertentibus illis Maria Magdalene remanet et Iesus ei apparet Io. 20, 11-18; Marc. 16,9-11; reliquis quoque mulieribus sese ostendit in via Matth. 28,9-10. Custodibus pecunia datur, ut mentiantur Matth. 28,11-15. Apparet Iesus duobus discipulis in Emmaus euntibus Luc. 24,13-34; Marc. 16,12. 13; Petro soli Luc. 24,35; vespere congregatis discipulis excepto Thoma Io. 20,19-25; Luc. 24,36-43; die Dominica sequente congregatis discipulis cum Thoma Io. 20,26-29.


In Galilaeam profectis apparet in monte et confert missionem in universam terram Matth. 28,16-20; Petro, Ioanni et Iacobo filiis Zebedaei, Thomae Didymo, Nathanaeli et duobus aliis apparet ad lacum Genesareth et Petro primum confert Io. 21,1-24. Etiam visus est plus quam quingentis fratribus simul, deinde Iacobo minori 1 Cor. 15,6. 7. Reversis Hierosolyma promittit dona Spiritus Sancti Marc. 16,14-18; commendat ut Hierosolymis maneant usque ad adventum Spiritus Sancti Luc. 24,41-49; Act. 1,4. 5. Educit discipulos in montem Oliveti iisque benedicens ascendit in caelum Luc. 24,50. 51; Marc. 16,19; Act. 1,3. 6-12.


Discipuli Ierosolymis se praeparant ad adventum Spiritus Sancti Luc. 24,52. 53; Matthias apostolus eligitur Act. 1,13-26. Accepto Spiritu Sancto Act. 2,1 ss. profecti praedicaverunt ubique Marc. 16,20.

Multa alia fecit Iesus, quae scripta non sunt Io. 20,30; 21,25.

IETA v. IOTA.

IETEBΑ (יהתב, 'Istēḅα), patria Messalemeth uxoris Manasse et matris Amon regum Iuda (4 Reg. 21,19). Apud





Flavium Iosephum (Ant. X. 3,2) Ἰαζαβάρη *ed. Niese*; apud S. Hieronymum : urbs antiqua Iudaeae (Onom. *ed. Lag.* 134,30). *Riess*, Bibel-Atlas *ed.* 3 s. v. suggerit *Yetma* 7 km a *Seilān* (Silo) aquilonem versus. Non est confundenda cum Ietebatha statione Israelitarum, ut vult *Guthe* (Bibelwb. p. 336). Cf. *J. Döller*, Geogr. u. ethnogr. Studien zum III. u. IV. B. d. Könige 1904 p. 324.

IETEBATHA (יֵתֶבְתָּה, Ἰετῆβαθα),

statio Israelitarum inter Gadgad et Hebrona (Num. 33,33. 34), in terra aquarum atque torrentium (Deut. 10,7). Ex enumeratione quaeri debet septemtrionem versus ab Asiongaber. Situs ignoratur; descriptio illa Deut. 10,7 : « in terra fluviorum aquarum » pluribus convenit locis in occidentali parte *Wādi 'Araba*, ubicunque aliae valles laterales cum *Wādi 'Araba* iunguntur. Apud *Reilandum* (Palaestina p. 533) Ἰωρδάνη recensetur sedes episcopalis una cum Elusa, Gaza, Petra.

IETH v. IAHATH 1.

IETHELA (יֵתֶלָה, Ἰεθελά, Onom. *ed.*

Lag. Ἰεθλάν), urbs tribus Dan (Ios. 19,42). Fortasse *Beit Tūl* prope *Yālō* (Aialon) Ierusalem versus (*Survey of West. Pal.* Mem. III. 43). Alii (*Knobel, Keil*) nomen antiquum conservari putarunt in *Wādi 'Atalla* occidentem versus a *Yālō*.

IETHER (יֵתֶר, Ἰεθέρ). 1. Primogenitus filius Gedeonis (Iud. 8,20); postquam Gedeon Madianitas devicit et urbes transiordanicas Soccoth et Phanael ob iniuriam sibi illatam punivit, Iether a patre suo iussus est gladio percutere Zebee et Salmana captivos reges Madianitarum; sed exhortationi patris obsecundare non ausus est prae timore, quia adhuc puer erat i. e. adolescens non omnino impar, qui reges illos ad maiorem ipsorum ignominiam sua manu occideret simulque gladium stringere disceret in hostes Israel sibi quae partem laudis in victoria vindicaret. Gedeone mortuo occisus est ab Abimelech una cum fratribus suis in Ephra (v. ABIMELECH 2).

2. Maritus Abigail sororis David et

pater Amasa ducis militaris (3 Reg. 2,5. 32); idem 2 Reg. 17,25 hebr., chald., syr. dicitur Israelita, in Vulgata Ietra de Iezraheli, apud LXX δ Ἰεζραηλίτης; quae tamen lectio non est sufficientis auctoritatis, cum aliqui codices Ismaelitam scribant. Genuina lectio haberi videtur 1 Par. 2,17 Ismaelita (hebr. Vulg. LXX Ἰεθόρ δ Ἰσμαηλῆτης); id enim reapse notatu dignum erat alienigenam uxorem duxisse cognationis David (*F. de Hummelauer* ad 2 Reg. 17,25). Vide ABI-GAIL 2.

3. Filius Iada ex posteris Hesron, mortuus absque liberis (1 Par. 2,32), quam ob rem successio genealogica in familiam Ionathan fratris minoris transit.

4. Filius Ezra ex posteris Iuda (1 Par. 4,17; de hoc textu vide s. v. BETHA).

5. Princeps cognationis aseriticae fortitudine praeclarus (1 Par. 7,38; Ἰεθέρ); idem 1 Par. 7,37 vocatur Iethran (יֵתְרָן, Ἰεθρά, apud *Swete* B Θερρά, A Ἰεθέρ).

6. Iether (יֵתֶר, יֵתָר, Ἰεθέρ, Ἰεθάρ, Ἰεθόρ), urbs tribus Iuda, ad primam seu meridianam provinciam montis Iuda pertinens (Ios. 15,48), sacerdotibus concessa (Ios. 21,14; 1 Par. 6,58 [42]); recensetur inter urbes, ad quas David post cladem Amalecitarum redux in Siceleg dona de praeda misit (1 Reg. 30,27). Tempore Eusebii et S. Hieronymi erat villa pergrandis Iethira a Christianis habitata 20 mil. pass. ab Eleutheropoli in interiore Daroma iuxta Malatham (Onom. *ed. Lag.* 266,42; 133,3 et etiam s. v. Ether 255, 78; 119,27). Agnoscitur hodie *Khīrbet 'Attir* fere inter Hebron et Bersabee; sed notandum est distantiam ab Eleutheropoli in Onom. indicatam esse iusto minorem et 4 mil. pass. augendam (*Guérin*).

Sunt qui putent de Iether oriundos esse heroas davidicos Ira et Gareb; sed v. IETHRAEUS. Alius quidam Ira sacerdos David 2 Reg. 20,26 vocatur Iairites seu de familia Iair, Peshitta : de Iathir; verum lectio Syri aliunde positive confirmari nequit et Ira sacerdos gratuito idem supponitur cum Ira heroe; cf. *Driever* ad h. l.

Cf. *Robinson*, Palaestina II. 422 *Guérin*, Judée III. 197-199; *Survey of West. Pal.*

Mem. III. 404. 408; *D. Zaneccchia*, La Palestine d'aujourd'hui 1899 II. p. 256; *Buhl*, Alt. Pal. 1896 p. 164.

IETHETH (יֶתֶת, יֶתֶת) enumeratur

tertius inter undecim duces Edomitarum, qui Horraeis exstirpatis totam regionem Edom occupaverant (Gen. 36,40; 1 Par. 1,51). Elymon a *Gesenio* (Thesaur. p. 644 secundum *Simonis*) explicatur יֶתֶת i. e. clavus, paxillus tentorii, metaphorice princeps, ex quo omnis civilis cura quasi pendet. Vestigium tribus Ietheth hucusque non repertum est.

IETHMA (יֶתְמָא, Ἰεθμα) Moabites, heros in exercitu Davidis (1 Par. 11,46).

IETHNAM (יֶתְנָם, Ἰεθωνάμ) quo nomine Asor et Iethnam in unum confunduntur, urbs in meridiana plaga tribus Iuda (Ios. 15,23). Est ignota.

IETHRAAM, **IETHRAHAM** (יֶתְרָאָם, Ἰεθραάμ, Ἰεθραάμ), ultimus inter sex filios David Hebrone natos (2 Reg. 3,5; 1 Par. 3,3); eius mater erat Eglā.

IETHRAEUS, Iethreus, Iethrites (יֶתְרִי). Hoc nomen refertur ad aliquam cognationem tribus Iuda a Sobal patre (domino) Cariathiarim descendentem (1 Par. 2,53; LXX Αἰθλαίμ). Ad eandem cognationem pertinent Ira et Gareb duo heroes davidici (2 Reg. 23,38 LXX ὁ Ἰεθραῖος, ὁ Ἰεθραῖος et 1 Par. 11,40 LXX ὁ Ἰεθρῖ), quos aliqui de Iether urbe montis Iuda oriundos esse supponunt; sed de nexu inter urbem Iether et cognationem Iethraeorum nihil innotescit. Neque Ira Iairites (Syrus: de Iathir) quidquam cum Iethraeis commune habet; vide s. v. IETHER 6.

IETHRAI (יֶתְרָי, Ἰεθραῖ), levita de stirpe Gerson (1 Par. 6,21[6]).

IETHRAM scribitur in Vulgata Gen. 36,26 pro Iethran 1.

IETHRAN (יֶתְרָן). 1. Filius tertius Dison filii Seir Horraei (Gen. 36,26; 1 Par. 1,41; LXX Ἰεθραάμ, Ἰεθράν).

2. Iethran (1 Par. 7,37) v. IETHER 3.

IETHREUS, **IETHRITES** v. IETHRAEUS.

IETHRO (יֶתְרוֹ, Ἰεθρ), sacerdos Madian, pater Hobab et Sephorae uxoris Moysis (Ex. 3,1; 4,18; 18,1. 3. 6. 9. 12). Idem Ex. 2,18; Num. 10,29 appellatur Raguel (רַעֲוִיָּה, Ραγουίλη). Videtur Iethro esse nomen dignitatis. Sunt qui putent Raguel esse patrem Iethro et avum Hobab et Sephorae; immo nonnulli volunt Iethro eundem esse atque Hobab; sed v. s. v. HOBAB.

IETHSON legitur in Vulgata Ios. 24,36 mendose pro Cademōth (vide s. v.).

IETHUR v. ITURAEA.

IETRA v. IETHER 2.

IETUR v. ITURAEA.

IEZABAD (יֶזָבָד, Ἰωαζαβάθ, Α' Ἰωαζαδά), Beniaminita, qui Davidi in Siceleg se adiunxit, Gaderothites (1 Par. 12,4). Idem nomen hebr. gerunt, qui in Vulgata scribuntur Iozabad.

IEZABEL (יֶזָבֶל, Ἰεζάβελ). 1. Filia Ethbaal, regis Sidoniorum, quam uxorem duxit Achab rex Israel (vide s. v. ACHAB 1) 3 Reg. 16,31. Haec regem potissimum impellebat et incitabat ad cultum idololatrium in Israel fovendum et ad varia crimina committenda. Et quanta licentia Iezabel grassata sit rege connivente vel saltem permittente, elucet satis ex eo quod impune prophetas Iahwe interfecit; ex caede communi Abdias servavit centum eosque abscondit quinquagenos et quinquagenos in speluncis et pavit (3 Reg. 18,4. 13). Dum itaque Iezabel adeo fureret in prophetas Iahwe eorumque discipulos, cultum Baal et Aslarthes quam maxime promovit: alebat enim Iezabel suis sumptibus prophetas Baal quadringentos quinquaginta et prophetas Aslarthes quadringentos (v. 19). Cum Elias propheta indicium divinum in hos idololatrias exercuisset (cf. Deut. 13,5 ss.; 3 Reg. 18,40), Iezabel per deos iuravit postero die occisum iri Eliam; verum Elias abiit in Bersabee, inde in desertum et ad montem Horeb (3 Reg. 19,2-9). Mulieris impudentia et perversitas eiusque in Achab regem dominatio illustratur, cum Achab aegre ferret quod Naboth

nollet ipsi cedere vineam. Nam irridet Achab regem eo quod noluit vi eripere vineam : grandis auctoritatis es et bene regis regnum Israel (3 Reg. 21,7); dein iubet eum esse bono animo : ego dabo tibi vineam Naboth. Id quod insigni crimine perfecit. Scripsit enim litteras nomine Achab et signavit eas annulo eius et iussit seniores civitatis Naboth i. e. urbis Iezrahel (hodie *Zer'in*) subornare falsos testes qui testarentur contra Naboth : maledixit Deo et regi; tum « educate eum et lapidate sicque moriatur » (v. 8-10). Quantopere perversitate mulieris corrupti sint mores optimatum apparet quia scelestam iussionem sine mora executi sunt : miseruntque ad Iezabel dicentes : lapidatus est Naboth et mortuus est. Neque Achab rex crimini obstitit, verum descendit in vineam, ut eius caperet possessionem. Elias autem mittitur a Domino ad regem, ut ipsi poenam annuntiet, et de Iezabel quoque locutus est Dominus : canes comedent Iezabel in agro Iezrahel (v. 11-23). Sententiam hanc in Iezabel latam executus est Iehu, filius Iosaphat filii Namsi. Occiso enim Ioram rege, filio Achab, ingressus est Iezrahel urbem. Iezabel autem depinxit oculos stibio et ornavit caput suum et respexit per fenestram, cum Iehu ad palatium regis appropinquaret. At Iehu iussit eam praecipitari deorsum, « aspersusque est sanguine paries et equorum ungulae conculcaverunt eam » (4 Reg. 9,33). Et convivio celebrato misit Iehu servos dicens : ite et videte maledictam illam et sepelite eam, quia filia regis est. At canes cada-ver eius iam devoraverant, ita ut solum invenirent servi calvariam eius et pedes et summas manus. Agnovit Iehu completum esse sermonem Domini factum per Eliam de Iezabel (v. 34-37).

Cur Iezabel se ornaverit, cum Iehu appropinquaret, aliqui explicant ex eo quod voluerit arte meretricia capere Iehu; at merito advertit *Estius* obstare quod sequitur; excipit enim Iehu cum exprobratione eum vocans Zambri eiusque qui dominum suum occidit sortem ei in memoriam revocans et quasi eandem ei imitans (v. 31). Quare dicendum erit eam depinxisse faciem seseque

ornasse ex superbia et procaci quadam animositate ut quia videret sibi esse moriendum dignitatem regiam et cultum usque ad mortem tueretur (ita iam *Estius*, *Sanctius*, *Tirinus* aliique). Eam potissimum fuisse in culpa, ut Achab evaderet adeo impius, sacer auctor aperte declarat : igitur non fuit alter talis sicut Achab qui venundatus est ut faceret malum in conspectu Domini; concitavit enim eum Iezabel uxor eius (3 Reg. 21,25).

2. Quia Iezabel cultu Baal et Astartes quem adeo promovit Israelitis seduxit et ad impuritatem cultui illi connexas induxit, nomen ipsius transfertur Apoc. 2,20 ad mulierem quandam Thyatirae degentem quae se dicebat propheten et quae sua doctrina seducebat servos Dei ad fornicationem et esum idolo thytorum. Cum adeo explicite dicatur τῇ γυναικί, ἡ λέγουσα etc. non videtur probabile intellegendam esse personificationem quandam synagogae vel haereseos Nicolaitarum, sed potius sensu proprio aliquam mulierem perversam, illius erroris faultricem.

IEZATHA (יֵזָתָה, Ζαθουθῆς), decimus inter filios Aman, quos Iudaei occiderunt (Esth. 9,9).

IEZER, IEZERITES. 1. Vide s. v. ABIEZER 1.

2. Samaoth princeps quintus ex duodecim illis davidicis praefectis duodecim turmarum 1 Par. 27,8 vocatur Iezerites (יֵזֶרִית, ὁ Ἰεζαῖ) i. e. יֵזֶרִי cf. 27,11. 13 seu de stirpe Zara filii Iuda patriarchae.

3. Iezer urbs v. IAZER.

IEZIA (יֵזִיָּה, Ἰεζιά), unus de filiis Pharos, qui uxores alienigenas dimittere ab Esdra iussi sunt (Esdr. 10,25).

IEZLIA (יֵזְלִיָּה, Ἰεζιλίας, Β Ζαρζιά, Α Ἐζιλιά), unus de filiis Elphaal, princeps cognationis beniaminiticae (1 Par. 8,18).

IEZONIAS (יֵזַנְיָה, יֵזַנְיָה, contractum יֵזַנְיָה 1er. 40,8, יֵזַנְיָה 1er. 42,1; Ἰεζωνίας, Ἐζωνίας, Ἰεζωνίας et 1er. 42,1 Ἀζαρίας).

1. Filius Maachati seu Maachathitae i. e. viri ex Maacha oriundi, unus ex

principibus exercitus, qui post expugnationem Ierusalem ad Godoliam reliquiis Israel praepositum in Maspha Benjamin se contulerunt (4 Reg. 23,23; Ier. 40,8); idem haud dubie partes egit in praeda ab Ismahel, perfido occisore Godoliae, recuperanda (Ier. 41,11). Postea inter principes bellatorum, qui Ieremiam rogabant, ut Dominum consuleret de itinere aegyptiaco instituendo, nominatur Iezonias (LXX Ἰεζωνίας) filius Osiac (Ier. 42,1) et inter principes, qui responso accepto Ieremiam mendacii arguunt et contra Dei mandatum fugam in Aegyptum esse suscipiendam populo persuadent, imprimis eminet Azarias filius Osaiae (Ier. 43,2). Sine dubio idem princeps intellegitur 42,1 et 43,2. Unde aliqui auctores his duobus locis legunt: *Azarias filius Osaiae* et hunc Azariam utique a Iezonia distinguunt. Alii vero v. g. *Keil* iisdem duobus locis legunt *Iezonias filius Osaiae*, qui idem sit ac Iezonias filius Maachathitae.

2. Rechabita, filius Ieremiae filii Habaniae et praecepuus inter Rechabitas tempore Ieremiae prophetae (Ier. 35,3).

3. Filius Saphan, dux septuaginta seniorum Israel, quos Ezechiel in imagine symbolica cernebat idololatriae aegyptiacae operam dare (Ez. 8,11); septuaginta seniores totum populum repraesentant; de Iezonia nihil notum est neque dici potest, cuiusnam Saphan filius fuerit.

4. Filius Azur, princeps populi, contra quem Ezechiel vaticinari iubetur (Ez. 11,4); erat igitur praecepuus fautor et suator eorum consiliorum, quae in contextu improbantur scil. caedium iniustarum et idololatriae; eiusdem socius in consiliis improbis promovendis erat Pheltias filius Banaiae.

IEZRA (יְהֵזְרָא, Ἰεζρά, Ἀ Ἰεζρίας), sacerdos ex posteris Emmer, unus ex maioribus Maasai seu Amassai (1 Par. 9,12). Idem scribitur Neh. 11,13 Ahazi.

IEZRAEL, IEZRAHEL (יִזְרְאֵל, יִזְרְהֵל; Ἰεζραήλ, Ἰεζραήλ et saepe aliter) nomen proprium virorum et locorum.

1. Iezrahel de stirpe Etam in genealogia Iuda 1 Par. 4,3; ibidem recensentur

eius fratres Iesema, Iedebos eorumque soror Asalephumi; vide ETAM 3.

2. Iezrahel filius Osee prophetae et Gomer filiae Debelaim (Os. 1,4); ei hoc nomen a Iezrahel urbe Issachar derivandum impositum est ipso Domino iubente: « quoniam adhuc modicum et visitabo sanguinem Iezrahel super domum Iehu ». Sanguis Iezrahel caedem refert iniustissimam Naboth Iezrahelitae ab Achab et Iezabel illatam et similes caedes a regibus domus Iehu perpetratas indicat. Nomen nativa sua significatione Deum commemorat seminantem, res et eventus praeparantem, dirigentem et addita rerum in Iezrahel gestarum notione scelera damnat, ultionem indicat (*Knabenbauer* ad h. l.).

3. Iezrael montis Iuda, in tertia provincia montis Iuda (Ios. 15,56); eadem erat patria Achinoam Iezrahelitis, uxoris David (1 Reg. 25,43 et v. ACHINOAM).

4. Iezrael (Ios. 19,18), alias Iezrahel seu nomine recentiore Esdreton (Iudith 4,5; 7,3; Ἐσδρηλῶν, Ἐσδρηλῶν 3,9; 4,6; 7,3), urbs tribus Issachar (Ios. 19,18), haud facili negotio Chananacis, qui curribus ferreis multum valebant, ab Israelitis erepta (Ios. 17,16). Celebrior facta est, cum Achab eam eligeret sedem regiam pro se ac domo sua (3 Reg. 18,45 s.; 21,4 ss.; 4 Reg. 8,29; 9,10 ss.) praeter Samariam, quae ex tempore Amri fuerat sedes regum Israel. Prope vel probabilius intra Iezrahel ab Achab exstructum erat templum Baal cum idolo Astarthes (3 Reg. 16,33); verum domus eburnea ab eodem aedificata (3 Reg. 22,39) probabilius Samariae quaerenda est (cf. Am. 3,15). Ex narrationibus de vinea Naboth Iezrahelitae (3 Reg. 21,4 ss.), de morte Achab (22,31-38), de morte Ioram et Iezabel (4 Reg. 9,10 ss.; cf. 2 Par. 22,7-8) aliqua colliguntur pro descriptione urbis Iezrahel. Ad orientem urbis sita erat vinea Naboth Iezrahelitae ab Achab in hortum olerum mutata; ibidem Iehu ab oriente scil. a Ramoth Galaad urbi appropinquans obviam habuit Ochoziam regem Iuda et Ioram regem Israel atque hunc alterum sagitta transossam in agro Naboth proficiendum curavit. Hic ager seu hortus palatio Achab et Iezabel

vicinus erat. Palatium muro urbem cingenti contiguum erat, siquidem Iezabel per fenestram palatii respexit Iehu per portam orientalem vix ingressum et deorsum praecipitata ungulis equorum ingredientium conculcata est. In eadem urbis parte erat turris Iezrahel seu specula, ex qua prospectus Iordanem versus late patebat; eandem ipsi palatio fuisse coniunctam supponit Flavius Iosephus (Ant. IX. 6,4) narrans Iezabel ex ipsa turri fuisse praecipitam. Praeterea Guérin, Samarie I. 315. 316 defendit currum sanguine Achab tinctum lotum esse non in piscina Samariae, ut 3 Reg. 22,38 legitur, sed in fonte Izara, ut Flavius Iosephus (Ant. VIII. 15,6) refert, seu fonte Iezrahel, ita ut canes sanguinem Achab prope Iezrahel lingerent, ubi etiam sanguinem Naboth lixerant; verum notare oportet poenam Achab regi 3 Reg. 21,19 intimatam non plenum effectum habuisse, sed propter regis spontaneam demissionem ab ipso Deo dilatam fuisse in dies Ioram filii Achab (3 Reg. 21,29) et horrendum in modum completam esse, cum Iehu in Iezrahel capita septuaginta filiorum domus Achab iuxta introitum portae duobus acervis collocaret omnesque notos et optimates illius domus deleret (4 Reg. 10,6-11). Deleta domo Achab gloria urbis Iezrahel mox decrescebat. Etiam reges de stirpe Iehu caedes et iustorum oppressiones commiserunt, unde Osee propheta minatur instare interitum regiae domus Iehu et regni israelitici dissolutionem adhibito nomine Iezrahel (Os. 1,4. 3 et vide supra n. 2), simul tamen instaurationem promittit eamque illustrat eodem nomine Iezrahel usurpato tamquam augurio salutis (Os. 1,11; 2,22). — Praeterea Iezrahel commemoratur 1 Reg. 29,11; 3 Reg. 4,12.

Apud Eusebium et S. Hieronymum (Onom. ed. Lag. 267,52; 133,14) describitur ut pergrandis vicus in campo maximo inter Scythopolim et Legionem; Eusebius l. c. vicum vocat Ἐσδραήλ et a Ἰεζραήλ distinguit, S. Hieronymus autem eundem locum vertens distinctionem ab Eusebio inductam expunxit. In Itinerario Burdigalensi appellatur civitas Stradela 10 mil. pass. a Maximianopoli, 12

mil. pass. a Scythopoli distans. Medio aevo vulgari appellatione dicebatur Parvum Gerinum (Gulielmus Tyr. 22,26). Hodie vicus Zer'in in descensu occidentali montis Gelboe situs et amplissimum prospectum praebens occidentem versus super planitiem Iezrahel et orientem versus per campum Bethsan usque in terram Galaad.

Cf. Robinson, Pal. III. 391 ss.; Guérin, Samarie I. 311 ss.; Survey of West. Pal. Mem. II. 88. 131; Thomson, The land and the book II. 177-191; G. A. Smith, Hist. Geogr. of the Holy Land 1894 p. 356. 381; Zanechchia, La Palestine d'aujourd'hui 1899 II. 609 s.; J. Fahrngruber, Nach Jerusalem II. 163; Liévin de Hamme, Terre Sainte ed. 4 III. 78 s.; Baedeker-Benzinger, Pal. u. Syr. ed. 5 p. 270; F. Buhl, Alt. Pal. 1896 p. 204-5; Kampffmeyer in Zeitschr. d. D. Pal.-Ver. XVI. 1893 p. 42; J. Döllner, Geogr. u. ethnogr. Studien zum III. u. IV. B. d. Könige 1904 p. 66-7.

5. Planities Iezrahel in Vet. Test. variis nominibus commemoratur: vallis Iezrael (Ios. 17,16 hebr.; Iud. 6,33), vallis Iezrahel (Os. 1,5), etiam Iezrahel sine addito (2 Reg. 2,9), campus Mageddo (2 Par. 35,22; Zach. 12,11), campus magnus Esdreton (Iudith 1,8), campus magnus iuxta Dothain (Iudith 4,5, graece 4,6), campus magnus scil. Galilaeae (1 Mach. 12,49); apud Flavium Iosephum τὸ μέγα πεδῖον, campus magnus (Ant. XII. 8,3; Bell. iud. III. 3,1 etc.); apud Eusebium et S. Hieronymum grandis campus Legionis seu *Ledjdjün* (Onom. ed. Lag. 246,54; 128,18) et maximus campus alibi passim; hodie vocatur *Merdj Ibn Amir* i. e. planities filii Amir.

Circumscribitur inter septemtrionem et orientem montanis Galilaeae, inter meridiem et occidentem collibus monti Ephraim praeiacentibus; ab oriente planitiem tangunt montes Gelboe et Hermon minor, ab occidente Carmelus inferior. Orientem versus iungitur per *Nahr Djälūd* cum campo Bethsan et depressione Iordanis, occidentem versus per Cisionem torrentem angustius montium compressum cum planitie maritima Ptolemaidis seu Accho. Irrigatur tempore hiemali multis rivulis, qui in

Cisonem torrentem confluent, cuius fontes praecipui vel in monte Thabor vel prope *Djenin* (Engannim) et *Ledjdjān* (Legionem, Mageddo) esse putantur. De fonte celebri prope Iezrahel, qui agnoscitur *'Ain Djālūd* 25 minutis ad orientem urbis *Zer'in* vel ab aliis *'Ain Maite* urbi paulo propinquior, vide dicta s. v. APHEC 4 et HARAD. — Urbes praecipuae in ascensu collium planitiem cingentium sitae erant: Iecnam seu Iachanan Carmeli, Mageddo, Thanach, Engannim, Iezrahel, Sunem, Naim, Endor, Dabereh, Ceseleththabor, Haroseth gentium, Gaba urbs equitum (v. GABAA 13).

Memorabilis est haec planities tum duabus victoriis, quas reportarunt Barac de Sisara duce labin regis Asor apud torrentem Cison (Jud. 4 et 5) et Gedeon de Madianitis prope Iezrahel (Jud. 7, 1 ss.), tum etiam duabus cladibus scil. Saulis ad montem Gelboe a Philisthaeis caesi (1 Reg. 31, 1 ss.) et Iosiae regis apud Mageddo a Pharaone Nechao devicti ac lethaliter vulnerati (4 Reg. 23, 29; 2 Par. 35, 22). Aliqui interpretes etiam cum campo Esdrelon componunt victorias ab Achab de Benadad II. et a Ios de Benadad III. reportatas; sed vide APHEC 3. De fuga Ochozia regis Iuda per inferiorem partem planitie Esdrelon vide s. v. GAVER. Holofernes Bethuliam oppugnaturus castra sua usque ad Chelmon (*Yamān*), qui locus est contra Esdrelon (Iudith 7, 3), extendebat. In campo Esdrelon Tryphon dux Syrorum aciem instruxit contra 2000 sociorum Ionathae Machabaei captivi, sed a proelio committendo destitit (1 Mach. 12, 49). Ibidem frequentes pugnae erant in bello iudaico et ad radices montis Thabor Iudaei a Placido duce equitum Romanorum devicti sunt (*Flav. Ios. Bell. iud.* IV. 1, 8). Accedunt proelia inter Saracenos et equites christianos medii aevi ibidem commissa et victoria a Napoleone I. de Turcis reportata prope montem Thabor anno 1799.

IEZRAHELI (2 Reg. 17, 25) v. IE-THER 2.

IEZRAIA (יִזְרְיָה, LXX omit.), levita, praefectus cantorum in dedicatione

muri Ierusalem tempore Nehemiae (Neh. 12, 41[42]).

IGAAL (יְגָאֵל, Ψάλλ), filius Nathan de Soba, heros in exercitu Davidis (2 Reg. 23, 36). Idem appellatur 1 Par. 11, 38 Ioel (יֹאֵל, Ίωλ) frater (LXX ὁἰός) Nathan. De textu emendando cf. *F. de Hummelauer* ad 2 Reg. 23, 36.

IGAL (יְגָל, Ίλαλ, A Ίγλ), filius Ioseph de tribu Issachar, unus ex duodecim exploratoribus (Num. 13, 8[7]).

IGNIS. Inter ea quae teste Sapiente necessaria sunt ad hominis vitam secundo loco recensetur ignis (Eccli. 39, 31); inservit enim ad cibos parandos, ad carnes panesque coquendos (cf. Ex. 12, 8) et ad frigus depellendum, uti v. g. Ioakim rex in domo hiemali in arula ignem habebat (Ier. 36, 23) et servi et ministri stabant ad prunas, quia frigus erat (Ioan. 18, 18). Die sabbati autem ignem accendere (ad cibos coquendos) prohibitum erat (Ex. 35, 3); quae coquenda erant, ante sabbatum praeparare oportebat eo scil. modo; sicut iam in deserto Moyses praeceperat (Ex. 16, 23). Ignem caute esse adhibendum, iam prisca lege monentur: si egressus ignis invenerit spinas et comprehenderit acervos frugum sive stantes segetes in agris, reddit damnum qui ignem succenderit (Ex. 22, 6). Ad usum sacrum requirebatur ignis continuo ardens in altari holocaustorum: ignis in altari semper ardebat quem nutriet sacerdos subiciens ligna mane per singulos dies; ignis est iste perpetuus qui nunquam deficiet in altari (Lev. 6, 12. 13). Inde dicitur: Domini ignis est in Sion et caminus eius in Ierusalem (Is. 31, 9). Ignem hunc sacrum de altari occulte esse absconditum in valle, quando sacerdotes abducti sunt in Babyloniam, narratur in epistula Iudaeorum (2 Mach. 1, 19). Cum cultus sacrificialis instauraretur, ignem adhibuerunt non aliunde acceptum, sed noviter ex lapidibus elicitum (2 Mach. 10, 3). In crematione et oblatione sacri thymianatis minime licuit ignem assumere profanum, sed solum ignem de altari; ob ignem *alienum* assumptum Nadab et Abiu, filii Aaron,

a Deo puniti sunt, egressusque ignis a Domino devoravit eos et mortui sunt coram Domino (Lev. 10,2; Num. 3,4; 26. 61). Gentes quandoque ignem ut deum colebant (Sap. 13,2); in sacris litteris apparet ignis tamquam indicium maiestatis divinae. Ita Deus apparuit Moysi in flamma ignis (Ex. 3,2, et similiter iam sese manifestavit Abraham, Gen. 15,17); item in igne descendit in montem Sinai (Ex. 19,18 — et species gloriae Domini erat quasi ignis ardens super verticem montis 24,17); de medio ignis loquebatur ad populum (Deut. 4,12. 13. 36); in columna ignis Deus populum suum per noctem duxit atque protexit (Ex. 13,21. 22; 14,24). Etiam in tempestate fulgurum ignis dicitur a facie eius exardescere (Ps. 17,9) et igne de caelo misso Deus punit civitates scelestas (Gen. 19,24), grando et ignis mista ferebantur ad Aegyptios puniendos (Ex. 9, 24); ignis Domini devoravit extremam castrorum partem murmurantium (Num. 11,1); ignis egressus a Domino interfecit rebelles (Num. 16,35). Zelus quoque Domini accenditur velut ignis (Ps. 78,3), ut ignis est eius indignatio (Ier. 4,4; Ps. 88,47; Nah. 1,6), in igne furoris sui sufflavit in adversarios (Ez. 21,31); ignis succensus est in furore Domini, et ipsa Domini verba sunt quasi ignis (Ier. 17, 4; 23,29). Immo Deus ipse dicitur ignis consumens (Deut. 4,24).

Cum igni insit maxima vis ad destruendum et ignis nunquam dicat: sufficit (Prov. 30,16), ignis metaphorice adhibetur ad summum discrimen describendum (Ps. 63, 12; Is. 43,2) et summa supplicia dicuntur poena ignis infligi (Ps. 10,7; 20,10; 139,11; Is. 26, 11) et Christus ipse loquitur de igne inextinguibili, de igne gehennae, de igne aeterno (Matth. 3,22; 18,8; 23,41; Marc. 9,42 etc.). Quia vero igne metalla purgantur et sordes ac scoriae removen- tur, etiam probatio ignis quasi examinatione fieri exhibetur (cf. Ps. 16,3; Prov. 17,3) et eodem modo vis et efficacia virtutis Dei declaratur, ita baptizare in spiritu sancto et igni (Matth. 3,11); talem ignem purgationis, separationis, destructionis vitiorum Iesus venit mittere in terram (Luc. 12,49). Nam lege

praeceptum erat: omne quod potest transire per flammam igne purgabitur (Num. 31,23), qua purgatione vasa et utensilia et metalla idololatrarum in usum populi electi consecrabantur. Quae purgatio cum iam effici nequeat symbolum est summae atque inveteratae impietatis (Ez. 24,11 s.). Quae purgandi et consecrandi ratio quoque exprimitur in ritu superstitioso, quo per ignem transitu vel ipsa quoque concrematione filii et filiae idolo Moloch dedicabantur (Ier. 7,31; 19,5; 4 Reg. 16,3; 17,17. 31; 21, 6; 23,10; 2 Par. 28,3 etc.).

Ob quamdam cum vi ac virtute ignis similitudinem legimus de dilectione et de zelo aemulationis: lampades eius lampades ignis atque flammaram (Cant. 8,6), et similiter de iniquitate scortationis et adulterii: ignis est usque ad perditionem devorans et omnia eradicans genimina (Iob 31,12), et de sermone fornicariae: colloquium illius quasi ignis exardescit (Eccli. 9,11) et de mala cupiditate: anima calida quasi ignis ardens. Item: succensa est quasi ignis impietas (Is. 9,18), cuius vehementia ac longe lateque propagatio incendio comparatur. Tali incendio etiam lingua calumniatrix confertur: in labiis impii ignis ardescit (Prov. 16,27); lingua ignis est (Iac. 3,6).

Non quidem apud Iudaeos, verum apud alias gentes facinorosi addicebantur morti per poenam ignis (cf. Ier. 29, 22: Sedeciam et Achab frixit rex Babylonis in igne); ita decrevit Nabuchodonosor: si quis non prostratus adoraverit, eadem hora mitteretur in fornacem ignis ardentis (Dan. 3,6); poena ignis torquebantur fideles legis cultores (2 Mach. 7,5). Iure belli urbes et turres simul cum incolis vel bellatoribus igne comburebantur (Deut. 12,3; Iud. 20,38; 1 Reg. 30,4; 4 Reg. 8,12; Neh. 1,3; 1 Mach. 1,33; 5,5. 28. 35. 63; 6,31; 40, 84 etc.).

I. KNABENBAUER.

IHELOM, IHELON (יְהֶלֶם, Ἰεζλόμε), filius Esau ex Oolibama genitus in terra Chanaan (Gen. 36,5. 14. 18; 1 Par. 1,33).

IIEABARIM, IEABARIM (יְיַעְבָּרִים, i. e. Iim terrae transiordanicae,

ut distinguatur ab Iim seu Iim tribus Iuda Ios. 13,29), castrametatio Israelitarum in termino Moab sen accuratius in solitudine, quae respicit Moab contra orientalem plagam (Num. 21,11; 33,44. 45; in v. 45 יַעֲבָרִים). LXX Ἀχλαγὰ ἐκ τοῦ πέραν 21,11 et Παῖ ἐν τῷ πέραν 33,44, Παῖ 33,45; et explicant Eusebius et S. Hieronymus: « Gai castra in solitudine tiliorum Israel; et usque hodie Gaia urbs dicitur Palaestinae iuxta civitatem Petram » (Onom. ed. Lag. 241,57; 123,11). Cum Gaia Eusebii et etiam cum אֵיז in tabula geographica Medabae M.-J. Lagrange componit *Khirbet 'Ai* inter *Kerak* et *Wādi el-Ahsā* (Revue bibl. IX. 1900 p. 286. 287. 443). Fueritne ibidem statio Ieabarim, dubium est.

IIM (יֵיִם) i. e. rudera, ruinae; Βαζώζ, Α Ἀδεία, urbs in extrema parte meridiana tribus Iuda (Ios. 13,29). Est ignota. Eodem nomine appellatur Ieabarim in textu hebraeo Num. 33,45; cf. supra.

ILAI (יְלֵי, 'Ilai), heros in exercitu Davidis (1 Par. 11,29), cognominatus Abohites (vide s. v.). Idem scribitur 2 Reg. 23,28 Selmon (יְלֵי, 'Elai), Α Σελώμ.

ILEX semel occurrit in prophetia Isaiae 44,14, ubi cum cedro, quereu, pino enumeratur inter ligna, quibus artifex ad idola facienda utitur. Vocem hebraicam יָדָה LXX interpretes non explicant, Aquila et Theodotion ἀγριοξάλανος; exponunt. Ex recentioribus *Ursinus* cum *Kimchio* et *Saudia* pinum vel cum *Tremellio* cupressum intellegit, *Hiller* potius tiliam esse censet, alii abietem vel fagum vel esculum vel etiam Ceratonia siliquam (*Sehegg*) praeferunt. At abies nomine *berōsh* designatur, esculus, fagus, tilia inter arbores palaestinae non inveniuntur, pro ceratonia, cupresso, pino argumenta nimis infirma afferuntur. Quare praestat cum S. Hieronymo multisque recentioribus (*Celsius*, *Rosenmüller*, *Cultrera*, *Groser*, al.) vocem de ilice interpretari, quae etiam ab Aquila et Theodotione videtur designari, et contextui satis convenit, cum lignum durum statusque idoneum praebeat et

inter cedrum ac quercum bene locum inveniatur; etiam elymon vocis, quod quibusdam placuit, a radice יָדָה *durus fuit* huic arbori bene congrueret. Intellegenda autem est non Ilex illa aquifolium, quam Linné nomine ilicis appellavit, sed ilex antiquorum seu species generis quercus, foliis non deciduis semperque virentibus. Quaeenam vero ex variis huius generis speciebus palaestinae in S. Scriptura quercus, et quaeenam ilex appelletur, difficile quis determinaverit. V. QUERCUS.

Eadem vero arbor etiam graeco nomine πέρνος designatur, quam alter ille senior iniquus testem sceleris contra Susannam invocavit (Dan. 13,58); ubi in Vulgata nomen graecum retinetur. V. PRINUS.

Cf. de *tirza biblica* I. H. *Ursinus*, Arb. bibl. 122-35; M. *Hiller*, Hierophyt. I. 431-4; O. *Celsius*, Hierobot. II. 269-71; E. F. K. *Rosenmüller*, Handb. d. bibl. Alterth. IV. 1,312 s.; P. *Cultrera*, Flora bibl. 407 s.; H. B. *Tristram*, Nat. Hist. ed. 8,348 s.; A. *Kinzler*, Bibl. Naturgesch. ed. 9,232; J. *Smith*, Bible Plants 129-31; W. H. *Groser*. The trees and plants mentioned in the Bible 53 s.

L. FONCK.

ILLEL (יְלֵל, 'Elai), pater Abdon iudicis ex urbe Pharathon (Iud. 12,13; hebr. et LXX etiam 12,15).

ILLYRICUM (Ἰλλυρικόν), regio maritima ad litus orientale maris Adriatici. Eam assignat Paulus ut terminum extremum, ad quem ab Ierusalem per circuitum praedicatio evangelii ipsius pervenerit usque ad annum, quo epistulam Romanis scripsit (15,19). Illyricum apud Romanos antiquitus ab anno 229 a. Chr. regio vocabatur inter Epirum et Dalmatiam, quae Macedoniae provinciae est attributa. Postea vero Illyricum sensu ethnographico et geographico ampliore tractum terrae comprehendebat. « Illyrios Graeci vocant, quicunque supra Macedoniam ac Thraciam a Chaonia atque Thesprotia ad Istrum usque Iumen incolunt. Ili regionis in longitudinem fines. Latitudo a Macedonia et montanis Thracibus ad Pannonios et Adriaticum mare et radices Alpium pro-

tenditur » (*Appian*. Illyr. 1). Cf. *Tacit*. Hist. 1,76. Ab anno 167 a. Chr. Illyricum erat provincia romana (cf. *Livius* 45,26; *Appian*. Maced. 16,1; Illyr. 9). C. I. Caesar Illyricum Galliamque administrabat (cf. *Dio Cass.* 38,8; *Sueton*. Caesar 22; *Caesar*, De bello gall. 2,33; 5,1). Anno 27 a. Chr. Illyricum provincia senatui tradita est (cf. *Dio Cass.* 53,12), anno 11 a. Chr. imperatori (cf. *Dio Cass.* 54,34). Quaecunque regiones orientem versus a mari Adriatico a Romanis occupabantur, ad Illyricum accedebant. Anno autem 10 p. Chr. cum Augustus Pannoniam subigeret, provincias duas constituit Pannoniam et Illyricum, cuius pars australis erat Dalmatia; sed post Augustum nomen Dalmatiae pro Illyrico paulatim substitutum est (cf. *Plin.* III. 21,139; 23,147; *Strabo* VII. 5,1 ss. : ora illyrica). *Ptolemaeus*, Geogr. II. 16,1 ss. Illyricum descripturus titulum capiti 16 praefigit : Illyrici sive Liburniae et Dalmatiae situs; ad quem titulum adnotat *C. Müller* (*Ptolem*. Geographia, Parisiis 1883, Vol. I. pars 1, p. 302 b) : « Quam Ptolemaeus non sui aevi, sed antiquiorem usum secutus Illyridem provinciam dicit, ea in ... titulo (n. 1741) Dolabellae (14 p. Chr.) vocatur superior provincia Illyricum, ut distinguatur sc. a Pannonia tamquam Illyrici provincia inferiore. Ptolemaei tempore Dalmatia seu Delmatia de populo regionis praecipuo appellari solebat ».

IMMARCESCIBILIS. Cum S. Petrus fidelibus promittat « immarcescibilem gloriae coronam » (τὸν ἀμάρταννον τῆς δόξης στέφανον 1 Petr. 5,4; cf. 1,4), expressio proprie desumitur a coronis ex floribus immarcescibilibus factis, qui nomine florum *immortalium* (*immortelles*) appellantur et praesertim ad genera *Gnaphalium*, *Helichrysum*, *Xeranthemum* pertinent in Europa praesertim meridionali atque in Oriente diffusa.

Cf. *Leunis-Frank*, Synopsis ed. 3 II. 2 p. 702-4. 724; *G. E. Post*, Flora of Syria 418-20. 447 s. — *G. Henslow* in Expository Times IX. 1897-98, 381.

L. FONCK.

IMMORTALITAS animae v. s. v. ANIMA, vol. I. col. 263-6.

IMMUNDITIA, IMMUNDUS. Ut varia illa de immunditia quadam legali rite concipiantur, haec considerata sunt : mundities corporalis symbolum quoddam est et quasi admonitio munditiei animi puritatisque morum; ita Deut. 21,6 in signum et documentum se esse immunes a scelere iubentur seniores et iudices lavare manus, et Isaias quoque monet 1,16 : lavamini, mundi estote, auferte malum cogitationum vestrarum. Dein cum Israelitae sint populus Dei electus et qua talis sint singulari quadam dignitate praediti, omnino convenit, ut huius dignitatis quaedam relucetia et assertio etiam in consuetudine externa appareat. Ita enim pro hominum more fieri assolet. Qui dignitate quadam prae aliis eminet, etiam veste elegantiore, nobiliore habitu utitur atque a ministeriis abiectioribus abstinet. Praeceptis illis haec quasi dignitas asseritur; id quod aperte quoque affirmatur Deo dicente Lev. 11,43 s. : « Nolite contaminare animas vestras (i. e. vos), nec tangatis quidquam eorum (animalium immundorum), ne immundi sitis; ego enim sum Dominus Deus vester; sancti estote quia ego sanctus sum; ne polluat is animas vestras in omni reptili quod movetur super terram; ego enim sum Dominus qui eduxi vos de terra Aegypti, ut essem vobis in Deum; sancti eritis quia ego sanctus sum ». Quibus verbis immunitas ab illa contaminatione externa, legali, quae attactu animalium immundorum contrahitur, aperte connectitur cum populi electione et cum illo favore quo Deus vult esse Deus eorum. Eadem ratione mandatur, ut sordes arceantur a castris : Dominus enim Deus tuus ambulat in medio castrorum et sint castra tua sancta et nihil in eis appareat foeditatis, ne derelinquat te (Deut. 23,14). Quare haec quoque lex suo modo erat paedagogus in Christum; insuper multis illis praeceptis et lustrationibus necessariis continuo admonebantur se esse parvulos servientes subelementis mundi (Gal. 4,3), iugo legis subditos.

Tria potissimum genera immunditiarum quibus quis lege redditur immundus distinguuntur.

Primum genus spectat cadaver et hominis et animalis. Quicumque enim morticina animalium tangit vel portat, immundus erit usque ad vesperam et lavabil vestimenta sua. Etiam in ipsas res transfertur immunditia ex tactu morticinorum quorundam animalium (Lev. 11,24-40). Hominis autem cadavere tacto vel osse vel sepulcro tacto efficitur quis immundus per septem dies; insuper omnes qui ingrediuntur tentorium (domum) in quo mortuus iacet efficiuntur immundi, etiam vasa, quae ibi sunt, per septem dies. Ad quam immunditiam auferendam et homines et res die tertio et septimo aqua lustrationis aspergi iubentur; et homines se et vestimenta die septimo lavare debebant (Num. 19,11-19; 31,19). Ab eiusmodi immunditia sibi cavere debebat sacerdos excepta morte consanguineorum (Lev. 21,1-4); pontifex vero ne ad parentes quidem mortuos accedere poterat (Lev. 21,11), sicut nec nasiraeus (Num. 6,6. 7: si quis coram eo subito mortuus fuerit, polluitur; cf. Num. 6,9-12). Immo qui a mortuo erat immundus, reddebat immundum quidquid tetigisset et quicumque horum quidpiam tetigisset, immundus erat usque ad vesperam (Num. 19,22).

Alterum genus constituitur iis quae e genitalibus profluunt. Ita effusione seminis et involuntaria et in coitu maritali facta vir et uxor immundi fiebant usque ad vesperam et debebant lavare corpus (Lev. 15,16-18; Dent. 23,10. 11). Unde pariter immundus erat qui patiebatur fluxum seminis, gonorrhoea; isto omnia quae tetigit reddidit immunda; qui eum tetigisset, immundus fiebat usque ad vesperam et debebat se et vestimenta lavare (Lev. 15,2-12; de eius post sanationem expiatione vide Lev. 15,13-15). Mulier quae menstrua patitur immunda est per septem dies; qui eam tetigisset et quae ipsa tetigerit et qui res ab ea tactas tetigerit, immunditiam contrahunt usque ad vesperam; lotione corporis et vestium immunditia est auferenda (Lev. 15,19-23); si vero inter coitum menstrua inciperent, vir immundus fiebat septem diebus (Lev. 15,24). Mulier demum quae patitur sanguinis

fluxum seu haemorrhoea pariter immunda est aliaque tactu reddit immunda (Lev. 15,25 ss.). De immunditie puerperae eiusque emundatione agitur Lev. 12,2-8.

Tertium genus consistit in lepra, quae inveniri poterat in homine, in domo, in vestimentis; vide s. v. LEPROSA.

Oriuntur itaque immunditiae ex morte, ex profluviis sexualibus, ex lepra. Cur autem haec tria homines reddant immundos, aptae explicandi rationes non desunt. Hisce enim memoria peccati continetur. Mors hominis per peccatum inducta poena est peccati; et quamvis in animalibus non sit mors ex peccato orta, nihilominus morticina foeda quae iam naturalem incutiunt horrorem in se quasi exhibere videntur partem maledictionis quae in rerum quoque naturam propter hominem enuntiata est; vel saltem omnino convenit, ut populus Deo sacer ab iis recedat; cf. Dent. 14,21: quidquid morticinum est, ne vescamini ex eo, quia tu populus sanctus Domini Dei tui es. — Primum quod peccato commisso parentes experti sunt, erat pudor et erubescencia; insuper ut poena peccati proponitur: in dolore paries (Gen. 3,16); unde alterum genus apposite esse statutum elucet. — Lepra vero est corruptio quaedam et dissolutio membrorum quae cum corruptione mortis similitudinem praese fert, ita ut leprosus iam fere ut mortuus vel sub dominio mortis consistens reputetur; Num. 12,12 dicitur de sorore Moysis lepra percussa: ne fiat haec quasi mortua et ut abortivum quod proicitur de vulva matris.

Ceterum illud quoque efficiebatur quod Tertullianus (adv. Marc. 2,19) effert, ut istis legalibus disciplinis occurrentibus ubique ne nullo momento vacarent a Dei respectu. Et bene de iis disputat S. Thomas (1,2 qu. 102 a. 3 ad 4): istarum immunditiarum erat ratio et litteralis et figuralis. Litteralis quidem propter reverentiam eorum quae ad divinum cultum pertinent, tum quia homines pretiosas res contingere non solent, cum fuerint immundi; tum etiam ut ex raro accessu ad sacra ea magis venerarentur. Cum enim omnes huius-

modi immunditias raro aliquis cavere possit, contingebat quod raro poterant homines accedere ad attingendum ea quae ad cultum divinum pertinebant et sic quando accedebant, cum maiore reverentia accedebant... Ratio figuralis fuit quia figurabantur diversa peccata.

I. KNABENBAUER.

INCENDENS. Ita I Par. 4,22 nomen alicuius principis in Moab ex posteris Sela filii Iuda secundum aliquam eius nominis explicationem etymologicam effertur; vocatur quippe שָׂרָר; verbum שָׂרָר notionem habet comburendi; eo quoque vocabulo notantur qui in Vulgata serpentes igniti, flatu adurentes dicuntur (Num. 21,6; Deut. 8,15); pariter Seraphim (Is. 6,2). Apud LXX nomen Σαρρα retentum est. Enumeratur inter eos, qui olim aliquid domini exercebant in regione Moab, LXX οἱ Σαρραδαιονες ἔν Μωαβ.

INCENSIO (תְּבַעֲרָה, Ἐνσπικισμός) appellatur locus ille inter montem Sinai et Sepulcra concupiscentiae, in quo murmur populi subortum est ob resumptum peregrinationis laborem. Erat iste locus non statio proprie dicta, sed brevis tantum commoratio in itinere trium dierum a monte Sinai ad primam stationem scil. Sepulcra concupiscentiae. Deus murmurantes punivit extremo agmini incendium infligens igne ab arca vel e nube instar fulguris prorumpente, quod incendium Moyse orante extinctum est. Unde vocabatur nomen loci illius Incensio (Num. 11,3).

INCENSUM. 1. Ad incensum sacrum (hebr. קְבִירֶת), quod in Vulgata etiam graeco nomine *thymiama* (θυμιαμα) appellatur, ex praecepto Domini (Ex. 30, 34-38) quattuor aromata sumenda erant, quae a S. Hieronymo *stacte, onyx, galbanum* boni odoris, *thus* lucidissimum dicuntur (v. singulos articulos). Ex traditione Iudaeorum hisce quattuor septem alia admiscebantur: myrrha, cassia, spica nardi, crocus, cinnamomum, costus, calamus odoratus; praeterea duae aliae species minus notae adhibebantur, quare Flavius Iosephus de tredecim aro-

matibus incensi sacri loquitur (Bell. iud. V. 5,5). Similis quaedam suffitus sacri compositio apud Aegyptios in usu erat, penes quos celeberrimum illud *kypbi* ex sexdecim variis elementis mixtum incensum offerebatur. Quattuor autem illa aromata in lege praescripta aequali pondere sumenda ac diligenter mixta opere unguentarii in unum thymiama componenda erant; eandem vero compositionem etiam in usu profano adhibere nefas erat mortis poena luen-dum (Ex. 1. c.). In compositione huius thymiamatis sacri ex traditione talmudica praesertim domus Abtinae (אבטינס) excellebat.

2. Usus incensi tum profanus tum sacer frequenter in S. Scriptura commemoratur. Ac profanum quidem usum apud Israelitas, quemadmodum apud finitimas gentes, iam tempore Moysis viguisse ex ipsis verbis legis citatae atque etiam ex mentione » thymiamatis alterius compositionis » (Ex. 30,9) apparet. Postea in Psalmis (Ps. 44,9), Proverbiis (Prov. 7,17) et in Cantico (Cant. 3,6) idem usus saltem ditioribus communis supponitur (cf. AROMATA). In cultu religioso autem imprimis quotidiana incensi sacri oblatio mane et vespere peragenda in lege praecepta erat (Ex. 30,7 s.), ac praeterea in variis sacrificiis simul cum holocausto incensum in altari comburendum erat (Lev. 2,1 s. 16; 6,15). Munus offerendi incensum, sacerdotibus proprium (cf. 1 Reg. 2,28; 2 Par. 26,18), sorte inter ministros sacros distribuebatur (Luc. 1,9); populus autem hora incensi in atriis sanctuarii orans expectabat, donec a sacerdote, oblatione peracta, benedictus dimitteretur (Luc. 1,10. 21 s.). Sola oblatio in loco a Deo electo, atque inde ab aetate Salomonis in templo hierosolymitano facta legitima censebatur; unde saepe reges ac populus reprehenduntur quod in excelsis incensa adolebant (3 Reg. 3, 3; 22,44; 4 Reg. 12,3; 15,4; 16,4 etc.). Sed etiam in cultu idololatrico tum gentium externarum tum populi israelitici praecipua fere sacrificiorum pars in oblatione incensi constabat (3 Reg. 11, 8; 4 Reg. 23,3; 2 Par. 25,14; 28,3 etc.), quemadmodum etiam ex monumentis

profanis tum apud alias nationes, tum maxime apud Aegyptios manifestum est.

Cf. *I. Meier et Dan. Weimar*, De suffitu, in *Ugolini*, Thes. ant. XI.; *R. Abraham ben David*, Comment. de suffitu etc. ib.; *Schlichter*, De suffitu sacro Hebraeorum, Italiae 1754; *G. B. Winer*, Realwörterbuch, ed. 3 II. 303-5. — De Aegyptiis cf. *Wilkinson-Birch*, Manners and Customs III. 397-9. 414-6; *F. Woenig*, Die Pflanzen im alten Aeg. 355-62; *A. Erman*, Aegypten 667-79; *V. Loret*, Le Kyphi, parfum sacré des anciens Egyptiens, in *Journal Asiat.* VIII. Sér., T. X. 1887, 76-132; *G. Maspero* in *Revue de l'hist. des religions* XXXV. 1897. I. 281 s., cf. 294-6. Alia v. in art. AROMATA, THUS.

L. FONCK.

INCESTUS legitur in Vulgata Lev. 18,17 pro hebr. זָנָה eoque vocabulo designatur hoc loco flagitium, quod quis committeret, si copulam haberet cum filia uxoris suae aut cum filia filii eius vel filiae eius. Alibi vertitur זָנָה piaculum Lev. 19,29, nefas Iud. 20,6, iniquitas Ps. 25,10, scelus Ier. 13,27; Ez. 16, 27; 22,9; nefarie Ez. 22,11 etc. — Leges contra incestuosos statutas vide s. v. MATRIMONIUM.

INCIRCUMCISUS v. s. v. CIRCUMCISIO, vol. I. col. 941.

INCREDULITAS, INCREDULUS. In Vulgata Vet. Test. increduli appellantur non tam ii qui fidem Deo denegant, quam recalcitrantes, contumaces, rebelles in Deum (ita hebr. כִּירָה Num. 20,24; Deut. 1,26; סִירָר Is. 65,2; Ier. 5,23; כִּירָב Ez. 2,6) et hostes qui dolose agunt בגֵּד Is. 21,2 et Iiab. 2,4 is dicitur in Vulgata incredulus, cuius anima ex hebr. designatur tumida (superba, arrogans). In Novo Testamento ea voce exprimuntur ἀπιστία (cf. Matth. 13,38; Marc. 6,6; 9,23; 16,14; Rom. 3,3; 11,20. 23; 1 Tim. 1,13; Hebr. 3,12. 19) quibus locis vera notio incredulitatis exprimitur, v. g. Marc. 16,14: exprobravit incredulitatem eorum, quia iis qui viderant eum resurrexisse non crediderunt i. e. iis qui testimonium omni fide dignum exhibebant fidem non adhibuerunt; et eadem notione dicitur incredulus ἀπιστος (Matth. 17,16; Marc. 9,18; Ioan. 20,27; Apoc. 21,8). Porro incredu-

litas etiam habetur in Vulgata ubi graece legitur ἀπειθεία i. e. inobedientia. Describitur enim is qui Deo credere non vult merito tamquam is qui Deo obedientiam et obsequium denegat et sese divinae auctoritati et voluntati opponit. Ita Paulus eos quos de ἀπιστία reprehenderat, eosdem reprehendit de ἀπειθεία Hebr. 3, 18. 19; 4,6. 11) eosque ἀπειθήσαντας appellat, uti alias quoque loquitur de obedientia fidei (Rom. 1,5; 2 Cor. 10,5). Eodemque modo incredulitas tamquam inobedientia, contumacia appellatur Rom. 11,30. 32; Col. 3,6 et increduli ἀπειθεῖς vocantur non obtemperantes (sibi persuaderi non patientes) Luc. 1,17; Ioan. 3,36; Act. 14,2; Tit. 3,3; Hebr. 3, 18; 11,31; 1 Petr. 3,20. Et recte quidem; nam si Deus loquitur, etiam vult ut sibi fides adhibeatur. Unde qui fidem denegat, inobediens est et contumax.

INDAI (יִדְּי, ἡ Ἰνδική) nominatur proprie regio ad Indum fluvium. Nomen hebraicum originem ducit ab Hindu, Hndu, Hidhu (apud Persas), quo prisco nomine Sindhu fluvius Indus designabatur. Assuerus i. e. Xerxes regnasse dicitur ab India usque Aethiopia Esth. 1,1; 8,9; 13,1; 16,1. Iam Darius I. Hystaspis Indiam i. e. regionem ad partem inferiorem Indi fluminis regno Persarum adiunxit, uti inscriptione prima persepolitana traditur. Et Herodotus quoque Indos fuisse Xervi subiectos, ei tributa solvisse, in eius exercitu stipendia meruisse narrat (7,9. 97-98; 8,65. 69). In textu hebr. Iob 28,16 legitur Ophir, quam regionem S. Hieronymus ibi de India explicavit; ceterum vide s. v. OPHIR, quae vox in aliis Vulg. locis retenta est (cf. 3 Reg. 9,28; 10,11; 1 Par. 29,4 etc.). Legimus in Vulgata Ez. 27,6 ex ebore indico, hebr. solum ex ebore. Sed cum elephantes in India reperirentur et ex India elephantes et ebur in alias transportarentur regiones, recte vocatur ebur indicum. Eadem ratione rectores elephantorum appellabantur Indi, cuius nominis exemplum habes 1 Mach. 6,37: Indus, magister bestiae (δ Ἰνδός ἀνθρώπου). De regione Indorum 1 Mach. 8,8 vide s. vv. EUMENES et IONIA.

INERNUS, INERUS, INERI

(שְׂאֵל, שְׂאֵל) in Vet. Test. omnium mortuorum, in Novo Test. damnatorum domicilium est.

1. Veteris Testamenti de inferis doctrina, initio exilis, quo propius appetebat aetas Messiae, eo planior facta est.

Pentateuchus infernum designat locum subterraneum (Num. 16,30), quo omnes mortui descendunt (Gen. 37,35; Num. 16,30. 33) et a sepulchro diversum (Gen. 25,8; 37,35; Deut. 32,22). Hic locus, cum mors sit peccati poena (Gen. 3,3. 19), et ipse poenalis habetur; quare eo descendere omnes horrent (Num. 16,30. 33; 32,22). Nihilominus bonorum condicio minus dura videtur; congregari enim ad populum suum (Gen. 25,8; 35,29; 49,29. 33; Num. 20,24; 27,13), dormire cum patribus suis (Deut. 31,16), ire ad patres suos in pace (Gen. 15,15) dicuntur. Quin etiam appeti mors iustorum potest (Num. 23,10); salutare enim Domini expectant (Gen. 49,18).

Ceteris libris historicis (protocanonis) vix quicquam continetur, quod iis quae ex Pentateucho hausimus, lucem afferre possit, nisi ex Samuele suscitato (1 Reg. 28) mortuos suae mentis compotes esse colligas.

Libri poetici et ea quae diximus, illustrent et nova quaedam adiciunt. Infernum depingunt in ima terra situm, quo mortui delabuntur (Ps. 48,18; 54,16; 62,10; 138,8; 85,13; 87,7; Iob 17,16; Prov. 9,18), amplam cavernam et tenebrosam (Iob 10,21. 22; 17,13; Ps. 48,20; 87,13), domicilium omnium mortalium (Eccl. 12,5; Iob 30,23), quod nemo effugere potest (Ps. 88,49) — quare infernus personificatione quadam « insatiabilis » vocatur (Prov. 27,30) — et quo qui descenderit, redire non potest (Iob 7,9 s.; 16,23; 38,17). Appelatur אֲדֹמָי perditio (Iob 26,6; 28,22; 31,12; Ps. 87,12; Prov. 15,11; 27,20), אֶרֶץ נִשְׁכָּה terra oblivionis (Ps. 87,13), דּוּמָה, silentium (Ps. 93,17; 113,17) הַשֶּׁךְ, tenebrae (Ps. 142,3). Qui ibi com-

morantur, רַחֲמֵי i. e. debiles nominari solent (Ps. 87,11; Prov. 2,18; 9,18; 21,16; Iob 26,5); quae in terris agantur, ignorant (Iob 14,21; Eccl. 9,3. 6. 10), imprimis Deum non laudant (Ps. 6,6; 29,10; 87,11; 113,7). Sortem malorum a bonorum differre non clare enuntiantur.

Librorum prophetorum proprium est efferre poenas malorum; pessimus enim quisque in inis vel mediis inferis collocatur (Is. 14,13; Ez. 32,21). A Daniele (12,2 s.) poenam et mercedem aeternam fore significatur.

Libri deuterocanonici praeterquam quod supplicia iniquorum (Eccl. 7,19) et praemia iustorum (Eccl. 1,43; Sap. 4,7 ss.) clarius enuntiant, duo potissimum adiciunt: unum bonos precationes ad Deum pro vivis facere (2 Mach. 15,12), alterum iustos quosdam purgationis causa poenas dare precationibusque uti, ut a peccatis solvantur, laude dignum esse (2. Mach. 12,42 ss.). Illa igitur aetate tria genera mortuorum distinguuntur: damnatorum, qui cruciatibus afficiuntur, beatorum, qui conditione satis tolerabili utuntur in ea parte inferni, quae a Luc. 16,23 sinus Abrahae vocatur, iustorum, qui peccatorum quorundam poenas luunt, quibus tamen liberari possunt.

2. In Novo Testamento infernus praeter paucos locos, quibus vel de inferis Veteris Testamenti agitur vel ad opiniones vulgares et usque ad ascensionem Christi veras oratio accommodatur (Luc. 16,19 ss.; Act. 2,24; Eph. 4,9; 1 Petr. 2,19), est sedes spirituum et hominum damnatorum. Plerumque gehenna (vide s. v. ENNOM) appellatur, rarius שְׂהַדָּה (Luc. 16,23), tartarus (2 Petr. 2,4), abyssus (Luc. 8,31; Apoc. 9,11; 20,1. 3), caminus ignis (Matth. 13,42. 50), stagnum ignis ardentis sulphure (Apoc. 19,20; 20,9; 21,8). Ibi igitur damnati aeterna peccatorum supplicia perpetiuntur. Haec poena delictis singulorum par (Matth. 10,15; 14,22; Luc. 12,47; Rom. 2,6; Apoc. 18,7) est duplex: negativa (poena damni) et positiva (poena sensus).

Privationem beatitudinis esse poenam

damnatorum in parabola decem virginum indicatur (Matth. 23,10). Ii, qui intrare per angustam portam neglexerint, audient illud « Nescio vos » et se expelli foras cum fletu videbunt (Luc. 13,24 ss.). Magnam coenam, qui vocatus accedere recusaverit, nemo gustabil (Luc. 14,16 ss.). Iniqui regnum Dei non possidebunt, sed audient illud iudicis « Discedite a me » (Matth. 7,23; 23,41). Haec poena privativa vocatur interitus, perditio, corruptio (Matth. 7,13; Phil. 3,49; 1 Tim. 6,9; Gal. 6,8), secunda mors, cuius nulla est redemptio (Apoc. 2,11; 20,6. 14; 21,8).

Ad positivam poenam pertinet ipse locus damnatorum proprius (Act. 1,25) et tenebris obductus (Matth. 8,12; 22,13; 25,30; 2 Petr. 2,17; Iud. 13.). Omnium autem summa sunt tormenta ignis (Matth. 5,22; 13,42.50; 18,9; Luc. 16,24; Ioan. 13,6; Apoc. 19,20; 20,15; 21,8), inextinguibilis (Marc. 9,43 ss.; Luc. 3,17), aeterni (Matth. 18,8; 24,41; vide s. v. AETERNITAS). Ibi est fletus et stridor dentium (Matth. 8,12; 13,42. 50; 22,13; 24,51; 50,30; Luc. 13,28) et vermis eorum (i. e. damnatorum angores conscientiae) non moritur (Marc. 9,43. 45. 47). Bibent damnati de vino irae Dei (Apoc. 14,9) nec habent requiem die ac nocte (Apoc. 14,11) neque ullam dolorum levationem (Luc. 16,24-28). Quare Christus hanc miserrimorum sortem intuitus non potest quin horrendum illud vae exclamet (Matth. 11,21; 18,7; 23,13-16; 26,24).

Cf. *L. Atzberger*, Die christliche Eschatologie in den Stadien ihrer Offenbarung im Alten und Neuen Testamente, Freiburg, 1890.

II. WIESMANN.

INIMICITIAE Gen. 26,21 est nomen putei prope Geraram, quem pastores Isaac foderunt, postquam cum pastoribus regis Abimelech de puteo Calunnia (v. s. v., vol. I. col. 722) rixati sunt. Sed etiam de novo puteo iurgium existit, quare Isaac eum vocavit Inimicitias (יְהוּדָה i. e. accusatio, adversatio; LXX Ήχθισ). Apud Flav. Iosephum (Ant. I. 18,2) puteus appellatur Στενωά

(ed. Dindorf) vel Σάβα (ed. Niese) et additur : ἔχθραν ἀποσφαλναι τὸ ὄνομα.

INIMICITIAE, INIMICUS. Gerere inimicitias, alterum odio habere, ultionem capere variis s. litterarum sententiis interdicitur; immo praecipitur, ut inimici quoque diligantur, qui nobis iniuriam intulerunt. Eius rei exemplum iam exhibetur in historia Ioseph qui non modo nullam capit ultionem, sed laesus quam maxime a fratribus beneficia iis rependit (cf. Gen. 45,4 ss.; 50,19-21). Praescribitur Ex. 23,4 : si occurreris bovi inimici tui, aut asino erranti, reduce ad eum; si videris asinum odientis te iacere sub onere, non pertransibis, sed sublevabis eum eo (cf. Deut. 22,4) et Lev. 19,17 : non oderis fratrem tuum in corde tuo; non quaeras ultionem nec memor eris iniuriae civium tuorum. Id diligenter a se observatum esse testatur Iob : si gavisus sum (i. e. iuro me non gavisum esse) ad ruinam eius qui me oderat et exsultavi quod invenisset eum malum; non enim dedi ad peccandum guttur meum ut expeterem maledicens animam eius (Iob 31,29. 30). Similiter Prov. 20,22 : ne dicas : reddam malum; expecta Dominum et liberabit te; quam doctrinam repetit Paulus : nulli malum pro malo reddentes (Rom. 12,17) et : videte ne quis malum pro malo alicui reddat (1 Thess. 5,15) idemque 1 Petr. 3,9. Item Prov. 24,17 : cum ceciderit inimicus tuus, ne gaudeas et in ruina eius ne exsultet cor tuum, et 25, 21 : si esurierit inimicus tuus, ciba illum; si sitierit, da ei aquam bibere (cf. Rom. 12,20) et Eccli. 8,8 : noli de mortuo inimico gaudere.

Verum hisce praeceptis contradicere videntur maledicta illa in nonnullis psalmis contra inimicos prolata; cf. Ps. 34. 51. 54. 57. 58. 68. 108. 136. Ad quae explicanda alia ab aliis proferuntur (cf. *Cornely*, Introd. II. 2 p. 120 ss.). Saepe illa diriguntur contra inimicos Dei et peccatores; unde explicanda sunt eodem modo quo hodie quoque Ecclesia precatur : ut inimicos sanctae Ecclesiae humiliare digneris, te rogamus, audi nos! Alia potius ut vaticinia et minae peccatoribus proposita accipi possunt; in aliis

cernere licet zelum iustitiae divinae et honoris Dei, quo exigitur ne scelesti mancant impuniti, et Deus imploratur, ut inimicis repressis adiuvet pios.

Caritas in inimicos quam maxime commendatur et praescribitur a Christo : ego autem dico vobis : diligite inimicos vestros, benefacite his qui oderunt vos et orate pro persecutibus et calumniantibus vos (Matth. 5,44; Luc. 6,27) atque haec opponit sententiae : diliges proximum tuum et odio habebis inimicum tuum. Et ipse Patrem rogans pro carnificibus : Pater, dimitte illis etc. optimum praebet exemplum eius amoris (Luc. 23,34). Idem amor praeclare manifestatur, cum pro impiis et inimicis mortem subiit (Rom. 2,6-10), qua morte etiam solvit et abstulit inimicitias inter Iudaeos et gentes, utrosque reddens civis sanctorum et domesticos Dei (Eph. 2,14. 19). Uti Siracides dicit : homo iracundus incendit litem et vir peccator turbabit amicos et in medio pacem habentium immittet inimicitiam (Eccli. 28,11), ita apostolus quoque inimicitias inter opera carnis recenset (Gal. 5,20). Cavendum esse ab inimicis Sapiens monet : non credas inimico tuo in aeternum... custodi te ab illo... amico et inimico noli narrare sensum tuum (Eccli. 12,10-12; 19,8). Ceterum Christus iubet nos eos adire qui habeant aliquid adversum nos et reconciliationem efficere (Matth. 5,23. 24); nam ut apostolus quoque docet, quantum ex nobis est, cum omnibus pacem habere debemus (Rom. 12,18; Hebr. 12,14).

Saepe inimicus dicitur notione hostis; ita si Deus populo legem servanti promittit : persequimini inimicos vestros et corrueant coram vobis (Lev. 26,7; Deut. 28,7) etc.

INSANUS vide s. v. MORBI.

INSCRIPTIO. Legitur *tituli inscriptio* praefixa Psalmis 13. 53-59; hebr. מִכְתָּב, LXX στήλογραφα. Sed de notione parum constat (cf. Cornely, Introd. II. 2 p. 24 ss.). Veteres saepe explicarunt ex כתב *aurum*, carmen aureum, pretiosum; alii ex Ier. 2,22 *insculpendi* notionem derivantes exponunt επιγραμματα,

carmen quod in perpetuam rei memoriam monumento sit insculpendum, menti alte imprimendum. Quae acceptio a LXX commendatur. Alii ex arabico inferunt notionem carminis *occulti*, quod scilicet ignotum fuerit, donec in psalterium insereretur, vel quod sensum includat *occultum*, typicum, mysticum. Uti aliae inscriptiones Psalmorum, ita haec quoque plane incerta est.

INSULA, INSULAE. In Vulgata ita exprimitur hebr. אִי, אִיִּים, qua voce designantur insulae, sed etiam ora maritima, regio ad mare sita (cf. Is. 20,6; 23,2. 6). Saepius eo nomine terrae vel regiones longinquae in mari sitae, vel ultra mare Hebraeis notum sitae indicantur; cf. Ps. 71,10; Is. 24,15; 42,4; 60,9 etc.

IOAB (יֹאבִי, יואב). 1. Filius Sarviae, sororis David (1 Par. 2,16), dux exercitus David. Prima eius mentio fit 2 Reg. 2,13, cum contra Abner et servos Isboseth filii Saul pugnaret ad thronum David stabiliendum. Quando vero ad partes David accesserit, certo dici nequit. Eius quidem frater Abisai comes erat David commorantis in deserto et fugientis a Saul; verum in s. litteris nihil eo tempore de Ioab comite David indicatur. Contra Abner et milites Isboseth feliciter pugnavit (2 Reg. 2,13-32); eo in proelio Abner occiderat Asael fratrem Ioab; unde postea Ioab dolose interfecit Abner (2 Reg. 3,27), quamobrem David, ad quem Abner se adiunxerat, tristis de eius caede diras in Ioab imprecatus est (2 Reg. 3,28-30), conquestus quoque : isti filii Sarviae (Ioab et Abisai) duri sunt mihi (v. 39). Egregium autem pugnatorem se exhibuit Ioab, cum David Iebusaeos oppugnaret. Nam cum David dixisset : omnis qui percusserit Iebusaeum in primis, erit princeps et dux, Ioab ascendit primus et factus est princeps (1 Par. 11,6). Ea itaque re fortiter gesta novam et maiorem dignitatem nactus est; nam dux belli iam exstitisse censendus est, cum contra Abner et Isboseth turmam militum duceret (2 Reg. 2,13); verum inde minime sequitur — quod aliqui obiiiciunt — id quod 1 Par. 11,6 narretur

non posse consistere. Insuper nota loco priore nullum honoris titulum ei indigere; sed post expugnatam arcem Sion legimus: Ioab erat super exercitum (2 Reg. 8,16; 20,23). Summus belli dux Ioab quoque cernitur in bello contra Syros, quos Ammonitae in auxilium vocaverant contra David iratum de iniuria legatis illata (2 Reg. 10,7 ss.). Quo in certamine ipse Ioab partem exercitus duxit contra Syros; alteram partem tradidit Abisai fratri suo contra Ammonitas. Utrique, et Syri et Ammonitae fusi fugatique sunt (2 Reg. 10,9-14). Mox Ioab regionem Ammonitarum vastavit et urbem eorum primariam obsedit Rabba; dum urbem oppugnaret, David ei per epistolam mandavit: « ponite Uriam ex adverso belli, ubi fortissimum est proelium et derelinquite eum, ut percussus intereat », id quod Ioab executus est (1. c. 11,14 ss.). Ita autem Ioab Davidi regi addictus erat, ut gloriam urbis expugnatæ non sibi, sed regi adscribi vellet. Cum itaque res iam eo processisset ut urbs caperetur, misit nuntios ad regem, ut ipse veniret et urbem caperet, « ne cum a me vastata fuerit urbs, nomini meo adscribatur victoria » (12,27 s.).

Per Ioab quoque factum est, ut David induceretur ad Absalom filium ex exilio revocandum — quem Ioab ex Gessur in Ierusalem adduxit — et cum Absalom non admitteretur ad regem, usus est Ioab intercessore qui Davidi persuasit, ut filium in gratiam reciperet (14,19 ss.). Cum autem Absalom rebellasset, Ioab causam Davidis contra ipsum Davidem tueri desiderans, Absalom filium rebellem interfici iussit quamvis rex omnibus praecepisset: servate mihi puerum Absalom (18,5. 10 ss.). Eandem curam utilitatis regis ostendit eum reprehendens quod propter luctum de Absalom suos neglegeret (19,5 ss.). David ea in re monitis eius acquievit: surrexit ergo rex et sedit in porta et omni populo nuntiatum est quod rex sederet in porta (v. 8); at offensus eo quod Ioab non pepercisset Absalomi, Ioab e dignitate deicere statuit, promittens Amasæ: haec faciat mihi Deus et haec addat, si non magister militiae fueris coram me omni tempore pro Ioab (19,13). Quare cum Seba,

filius Boethri, rebellasset, Amasa iussus est convocare Iudam. Verum Amasa officio suo segniter functus est; quare David inussit Abisai fratrem Ioab milites educere contra rebellem. Cum usque ad Gabaon pervenissent, etiam Amasa veniens occurrit eis. Ioab autem simulans blandam salutationem eum gladio percussit. Cur eum occiderit, explicari poterit et ex invidia quod David in eum transtulerit summam belli et ex indignatione quod adeo neglegenter bellum gereret. Eo enim occiso omnes secuti sunt Ioab persequentes rebellem et res ad prosperum exitum perducta est. Ioab autem iterum fuit super omnem exercitum Israel (20,1-23). Quando contra Idumaeos usque ad internecionem pugnavit (3 Reg. 11,16) non clare indicatur; ex 2 Reg. 8,14 fortasse colligi potest eam stragem Idumaeis esse illatam Ammonitis Syrisque devictis. Ioab prudenter se opposuit Davidi, cum numerari vellet Israel et Iudam; at rex ei minime acquievit et Ioab per novem menses et viginti dies in numerando populo cum aliis principibus militum occupatus erat.

Ioab a partibus stetit Adoniae, dum is Davide superstite regnum affectaret quod David iam Salomoni destinaverat (3 Reg. 1,7. 19). Demum David moriturus iniunxit Salomoni, ne caedes impunitas relinqueret quas Ioab commisisset dolose interficiens Abner et Amasam (3 Reg. 2,5). Cum Salomon occidisset Adoniam et Abiathar qui eum adjuverat sacerdotio eiecisset, Ioab quoque sibi timuit et, ut vitam servaret, fugit in tabernaculum Domini et apprehendit cornu altaris. At frustra. Iussu Salomonis ibi a Banaia occisus est (3 Reg. 23-33). Laudanda in Ioab est fidelitas et sedulitas qua causam Davidis iuvit et promovit; vituperanda eius ferocitas. Cf. 1 Par. 19,8 ss.; 20,1; 21,2; 26,28; 27,24. 34.

2. Ioab, filius Saraiae ex posteris Cekez, pater vallis artificum (1 Par. 4,14), quae vallis erat in regione prope Lod et Ono (Neh. 13,35). Cum pater nominetur, posteri eius ibi incolebant.

3. Princeps familiae, cuius posteri duce Zorobabel ex captivitate redierunt (Esdr. 2,6; 8,9; Neh. 7,11).

4. Corona domus Ioab (1 Par. 2,34 v. ATAROTH 6).

IOACHAZ (יֹאחָז, 'Iowáz). 1. Filius Iehu, rex Israel, qui anno 23. Ioas regis Iuda regnare incepit et decem et septem annis super Israel in Samaria regnavit (4 Reg. 10,35; 13,1). Fecit malum coram Domino secutus peccata Ieroboam i. e. idololatriam fovit et eo scelere etiam populum peccare fecit. In cuius poenam vehementer afflicto est per reges Syriæ Hazael eiusque filium Benadad; cladibus variis inflicto ei relictus solum quinquaginta equites et decem currus et decem millia peditum. In afflictione sua confugit ad Dominum, qui eum audivit in tantum, ut regnum Israel ab ulteriore ruina servaretur (4 Reg. 13,2-9). Sepultus est in Samaria.

2. Filius Iosiae, quem Iosia rege in proelio ad Mageddo occiso populus regem sibi constituit natum annos viginti tres. Verum brevi regnavit fecitque malum coram Domino i. e. uti complures ex regibus antecedentibus idololatriæ operam dedit. Iam post tres menses regni a Necho rege Aegypti, victore in pugna ad Mageddo, regno est privatus et in Rebla quæ est in terra Emath cætenus victus est (4 Reg. 23,30-33; 2 Par. 36,1-3). Abduetus est captivus in Aegyptum ibique mortuus est, uti clare id enuntiat Ier. 22,10-12; cf. Ez. 19,2-4. Ieremias i. e. eum vocat Sellum, quod nomen ei proprium fuisse videtur, cum etiam 1 Par. 3,15 eo nomine recenseatur. Unde nomen alterum Ioachaz sibi attribuisse videtur, cum regnum capesseret, sicut Eliacim rex factus Ioakim nominatur et Matthianus in regnum provectus Sedecias appellatur (cf. 4 Reg. 23,34; 24,17).

3. Eo nomine appellatur quoque 2 Par. 21,17; 25,23 filius minimus natum Ioram regis (hebr. et Vulg.) qui alias nominatur Ochozias, uti 2 Par. 22,1 et 4 Reg. 8,24 etc.; vide s. v. OCHOZIAS 2.

4. Pater Ioha scribæ regis Iosiae 2 Par. 34,8 (יֹאחָז, 'Iowáz).

IOACHIN (יֹאכִינ, יוֹכִינ, יֹאכִינ, etiam כְּנִיָּה Ier. 22,24. 28; 37,1; 'Iowáz, 'Iewáz, 'Iowáz), filius Ioakim,

qui octodecim annos natus coepit regnare in Ierusalem; verum regnavit solum per tres menses (4 Reg. 24,8; et decem dies, uti additur 2 Par. 36,9) et fecit malum coram Domino. Cum Nabuchodonosor octavo anno regni sui ascenderet in Ierusalem et urbem oppugnaret, Ioachin ad eum egressus est, sed ipse et mater eius et uxores et principes et decem millia militum et artifices abducti sunt in captivitatem in Babylonem. De qua ruina regiae familiae loquitur Ieremias 13,18 et 22,24-30 neque de eius semine fore qui sedeat super solium David. Mansit in captivitate babylo-nica — neque tamen semper carcere erat inclusus; cf. Par. 1,3 —; anno tandem transmigrationis trigesimo septimo, die 25. mensis duodecimi elevavit Evilmerodach rex Babylonis caput Ioachin regis Iuda et eduxit eum de domo carceris et locutus est cum eo bona et posuit thronum eius super thronos regum » etc.; prae aliis regibus subiectis qui aderant in aula honorabatur; prae-terea ad mensam regiam conviva adhibebatur quotidie et eius familiae vel comitibus quoque comatus a rege assignabatur (Ier. 52,31-34; 4 Reg. 25,27-30). Omnino licet supponere Ioachin longa illa captivitate (597-560) ab iniquitate sese toto corde convertisse ad Deum; quare tandem levamen nactus sit. Honor autem eius simul potuit esse pro Iudæis exulibus praesagium quoddam quod Deus promissionum memor misericordiam suam a suo populo non auferat. — Nominatur in Vulgata quoque Iechonias 1 Par. 3,16; Ier. 22,24. 28; 24,1; 27,20; 28,4; 37,1; Bar. 1,3; Esth. 2,6; 11,4; Matth. 1,11. 12.

IOACIM v. IOAKIM 3 et 4.

IOADA v. IARA 2.

IOADAN (יְהוֹדָן, 'Iowádā, 'Iowádā), uxor Ioas et mater Amasiae regum Iuda, hierosolymitana (4 Reg. 14,2; 2 Par. 25,1).

IOAH (יֹאחַ, 'Iowā). 1. Levita de stirpe Gerson (1 Par. 6,21; LXX 'Iowáz).

2. Levita de stirpe Gerson tempore Ezechiae regis (2 Par. 29,12; A 'Iowáz). Nomen Ioah i. e. bis legitur: Ioah filius

Zemra et Eden filius Ioah (יֹאחָזֶדֶן); sed quamquam LXX nomina diverso modo reddunt, idem levita designari videtur filius Zemra et pater Eden.

IOAHA (יֹחָאָה, יֹאחָזֶדֶן, A יֹאחָזֶדֶן), levita de stirpe Core, tertius filius Obedom, ianitor domus Domini (1 Par. 26, 4).

IOAHE (יֹאחֵי, יֹאחָזֶדֶן, יֹאחָזֶדֶן), filius Asaph et regi « Ezechiae a commentariis » (vide s. v. COMMENTARIUS), legatus simul cum Eliacim et Sobna ad duces Sennacherib, regis Assyriorum, missus, cum isti iuxta aquaeductum piscinae superioris stetissent et postulerant, ut Ierusalem traderetur (4 Reg. 18, 18. 26. 37; Is. 36, 3. 11. 22).

IOAKIM (יְהוֹאֲכִים, יֹאחָזֶדֶן). 1. Filius Iosiae regis Iuda et frater Ioachaz regis. Necho rex Aegypti ioachaz regem regno privavit et in eius locum constituit Eliacim, cuius nomen in documentum suae dominationis vertit ioakim simulque imposuit mactam terrae, centum talentis argenti et talento auri. Hoc itaque tributum colligere et regi Aegyptiorum solvere ioakim rex tamquam regni initium sortitus est. Viginti quinque annorum erat cum regnare coepisset et undecim annis regnavit in Ierusalem et fecit malum coram Domino (4 Reg. 23, 33-37). Cum populus Iosia rege in proelio ad Mageddo occiso fratrem ioakim iuniorem constituisset regem, vid. ioachaz natum viginti tres annos, concludi potest ioakim mores iam tum eos fuisse quibus regno bene administrando ineptus esse merito indicaretur. Neque eventus hanc populi opinionem fefellit. Nam qualis fuerit rex, satis declaratur querelis Ieremiae: « vae qui aedificat domum suam in iniustitia et coenacula sua non in iudicio » etc. 22, 13 ss.; palatium sibi aedificat splendidum, ad cuius sumptus opprimit subditos neque opificibus mercedem solvit; « tui oculi ad avaritiam et ad sanguinem innocentem fundendum et ad calumniam (i. e. oppressionem et vexationem) et ad cursum mali operis » (Ier. 22, 17). Quanta esset impietatis, documenta edidit, dum Uriam prophetam gladio perceret et occisum quoque ignominia afficeret (Ier. 26, 20-

23), dum Ieremiam et Baruch prophetas persequeretur et librum oraculorum Domini scinderet et combureret (Ier. 36, 22 ss.). Quarto anno regni eius Nabuchodonosor in pugna ad Chareanis devicit Necho regem Aegypti (Ier. 46, 2); qua victoria dominatio in Syriam quoque ac Palaestinam ad Babylonios translata est. Eodem anno Ieremias Iudaeis aliisque gentibus denuntiat servitutem quam per annos septuaginta Babylonis praestare debebunt (23, 1 ss.) eodemque anno sermones suos iussu Domini volumine comprehendit, quod sequenti anno Baruch publice legit et rex impius combussit. Uti Ieremias praedixerat, Nabuchodonosor venit ad urbem et obsedit eam et tradidit Dominus ioakim regem in manu eius et vinxit eum rex catenis, ut duceret eum captivum Babylonem, id quod tamen exsecutus non est; at partem vasorum templi asportavit et posuit ea in templo dei sui. Ioakim autem ut regem sibi subiectum in urbe Ierusalem manere permisit (cf. 4 Reg. 24, 1; 2 Par. 36, 6. 7 hebr.; Ier. 35, 11; 36, 29; Dan. 1, 2). Per tres annos ioakim imperio Babyloniorum obediit, verum postea rebellavit. Unde regnum iudaicum magnis periculis obiecit; nam ut rebellem puniret, Nabuchodonosor milites Chaldaeos in Syria relictos et Moabitis Ammonitasque ad praedam ex Iudaea agenda semper promptos contra ioakim immisit; in iis certaminibus ipse ioakim modo ignominioso interit, ut Ieremias praedixerat (22, 18. 19; 36, 30). Mox ipse Nabuchodonosor Iudaeam petiit ad rebelles puniendos et filius ioakim regis ioachim luit patris perfidiam, ductus in captivitatem babylonicam (4 Reg. 24, 11 ss.).

2. Sacerdos, filius Helciae filii Salom, ex familia pontificia (cf. 1 Par. 5, 39; hebr. 9, 11), ad quem quinto anno post urbem a Chaldaeis incensam exsules ex Babylonia pecuniam miserunt (Bar. 1, 7), ut sacrificia offerrentur ad aram Domini in ruinis urbis. Cum i. e. ioakim sacerdos prae aliis nomine offeratur, aliorum princeps censendus erit, qui scil. vices gesserit pontificis exsulis; fortasse constitutus erat in dignitate sacerdotis secundum (vide ad Ier. 22, 24) vel ducis in

domo Domini (cf. Ier. 29,26; 1 Par. 9,11 hebr.; 2 Par. 31,13; Neh. 4,11).

3. Ioachim vocatus est pontifex, filius Iosue et pater Eliasib (Neh. 12,10. 12. 26).

4. Ioachim pontifex, qui de Ierusalem venit in Bethuliam, cum universis presbyteris suis, ut videret Iudith (15,9). Hic 4,5. 11 appellatur Eliachim (in Vulgata; graece 4,6. 8 retinetur Ἰωαχίμ), quem aliqui eundem esse atque Eliacin putant de quo 4 Reg. 18,18 et Is. 22,20 (cf. *Cornely*, Introd. II. 1 p. 405).

5. Ioakim etiam appellatur maritus Susannae, vir valde dives, habitans in Babylone, qui inter Iudaeos exsules magna auctoritate pollebat et in cuius domo iudicia habebantur (Dan. 13,1. 2. 4. 6). Innocentia Susannae manifestata Ioakim maritus cum aliis cognatis Deum laudavit quia non esset inventa in eo res turpis (Dan. 13,63).

IOANNA. 1. Ioanna (Ἰωάννα) in genealogia Christi Luc. 3,27; v. HANANIAS 7.

2. Ioanna (Ἰωάννα. Ἰωάννα), uxor Chusae procuratoris (ἐπιτρόπου) Herodis Antipae; una ex piis mulieribus, quae curatae erant per Iesum a malignis spiritibus et infirmitatibus et quae ei et discipulis ministrabant de facultatibus suis (Luc. 8,3). Ioanna Iesum quoque ex Galilaea in Iudaeam secuta est et erat cum iis quae summo mane ad sepulcrum venerunt, ut ungerent corpus Iesu et quibus angeli Iesum iam resurrexisse nuntiabant (Luc. 24,10).

IOANNES (Ἰωάννης, Ἰωάνης), quod nomen idem est ac hebr. יְהוֹנָתָן et יְהוֹנָתָן i. e. Iahwe dedit gratiam. Nomen est satis frequens. Verum hoc loco ii solum enumerandi sunt qui in Vulgata nomine Ioannes efferuntur (alios vide s. v. IOHANAN).

1. Pater Mathathiae (1 Mach. 2,1).

2. Unus e filiis Mathathiae, qui primo loco recensetur, cognominatus Gaddis (1 Mach. 2,2). Hic captus et occisus est a filiis Iambri (vide s. v.); eius sanguinem ulti sunt Ionathas et Simon fratres eius (1 Mach. 9,33 ss.).

3. Ioannes, pater Eupolemi (1 Mach.

8,17; 2 Mach. 4,11) legati a Iuda Machabaeo Romam missi.

4. Ioannes Hyrcanus, filius Simonis, fortis proclii vir, quem pater posuit ducem exercitus in Gazaris (1 Mach. 13,34). Ei et fratri eius Iudae Simon pater senex commisit bellum gerendum contra Cendebaeum, ducem Antiochi VII.; quo bello Ioannes se prudentem et fortem praebuit. Cum enim eius exercitus trepidaret ad transfretandum torrentem, qui medius erat inter castra, ipse transfretavit primus suoque exemplo aliis omnibus animum addidit. Pugna exorta fugatus est Cendebaeus, fugientes Ioannes insecutus est usque Cedronem et usque ad turres quae erant in agris Azoti, quam urbem igni succendit. Parta victoria reversus est in Iudaeam in pace (1 Mach. 13,38-16,10). Ptolemaeus filius Abobi et gener Simonis, qui Simonem et eius filios, Mathathiam et Iudam, convivio exceptos in Doeh trucidavit, etiam misit qui Ioannem Gazaris interficerent. Sed Ioannes ea de re certior factus viros illos comprehendit et occidit (l. c. v. 11-22). Pro celeris rebus ab eo gestis remittitur v. 23. 24 ad librum dierum sacerdotii eius. Qui liber cum iam non exstet, reliqua de Ioanne ex Flavio Iosepho (Ant. XIII. 8-10; Bell. iud. I. 2,2 ss.) petenda sunt. Sunt autem breviter haec: Ioannes pontificatum gessit per annos 31 (135-104 a. Chr.); Ptolemaeum fugere coegit; oppugnatus ab Antiocho VII. tributum solvere coactus est et urbem Ierusalem a praesidio alienigenarum immunem servavit datis obsidibus et solutis argenti talentis quingentis. Aperto sepulcro Davidis tria millia talentorum argenti inde extulit et primus Iudaeorum coepit externum militem pecunia conducere. Initia amicitia cum Antiocho, cum is in Parthos expeditionem susceperet, eum comitatus est. Eo mortuo Ioannes expeditionem fecit in urbes Syriae, destruxit templum in Garizim et Idumaeos ad circumcisionem assumendam coegit et cum Romanis amicitiam renovavit. Tum Samaritanis bellum intulit urbemque destruxit Samaritiam. Cum diu a partibus Pharisaeorum stetisset, tandem ab iis offensus ad Sadducaeos transiit. Asserit Flavius

Iosephus (l. c. 10,7) eum optime (τὸν ἀρίστον τρέπον) per annos triginta et unum imperio praefuisse tria maxima consecutum a Deo principatum gentis, pontificalem honorem et vaticinationem (?).

Cf. de Ioanne Hyrcano *Ewald*, *Gesch. d. Volkes Israel* ed. 3 IV. 446-502; *Grätz*, *Gesch. d. Juden* ed. 4 III. 64-117; *Werner*, *Iohann Hyrcan, ein Beitrag zur Geschichte Iudaeas im zweiten vorchristl. Jahrhundert* 1877; *J. Wellhausen*, *Die Pharisäer u. die Sadducäer* 1874 p. 89-95; *E. Schürer*, *Gesch. d. jüd. Volkes* ed. 3 I. 256-273. — Quoad nummos vide *Madden*, *Coins of the Jews* 1881 p. 74-81.

5. Unus e legatis quos Iudaei ad Lysiam ducem Syrorum miserunt (2 Mach. 14,17).

6. Ioannes Baptista, praecursor Domini. Eius natiuitas per Gabriel angelum annuntiatur patri Zachariae offerenti incensum ad altare aureum in sacro : uxor tua Elisabeth pariet tibi filium et vocabis nomen eius Ioannem... erit magnus coram Domino et vinum et siceram non bibit et Spiritu sancto replebitur adhuc ex utero matris suae et multos filiorum Israel convertet ad Dominum Deum ipsorum et ipse praecedet ante illum in spiritu et virtute Eliae (Luc. 1, 13-17). Quibus verbis quantus qualisque futurus sit Zachariae filius adumbratur. Quod angelus promisit fore ut Spiritu Sancto repletur adhuc ex utero matris suae, intervntu Mariae Virginis matris Messiae completum est testante Elisabeth : ecce enim ut facta est vox salutationis tuae in auribus meis exsultavit in gaudio infans in utero meo (Luc. 1,44). Cum Luc. 1,80 clare statuatur : puer erat in desertis usque in diem ostensionis suae ad Israel, facile explicatur, quomodo Ioannes Iesum non cognoverit facie; « ego nesciebam eum » (Ioan. 1,33) neque quidquam valet quod recentiorum aliqui obiciunt : si ex synopticorum narratione tam arcta intercessit cognatio inter Elisabeth et Mariam, cogitari nequit pueros non inter se nosse atque proinde existere contradictionem inter synopticos et quartum evangelium. Verum separati erant loco habitationis : Iesus adolesebat in Naza-

reth, Ioannes a puero in desertis Iudaeae.

Anno demum quintodecimo imperii Tiberii Caesaris factum est verbum Domini ad Ioannem (Luc. 3,4. 2, qua dictione iam declaratur eum a Deo mitti prophetam. Habitu quoque et more prophetae se turbis exhibuit. Vestitus erat, ut olim Elias; vitae austeritatem quam turbae semper magna cum reverentia suspiciunt eximiam prae se tulit; more prophetarum intrepide ac severe in vitia omnium ordinum invehebatur et emendationem veram et sinceram expostulabat. Edidit quoque vaticinium de fortiore qui venturus sit; quod eventu comprobatum est. Ergo ea etiam ratione se probavit prophetam a Deo missum (cf. Deut. 18,21. 22). Per plura iam saecula non surrexerat in Israel propheta quamvis talis expectaretur et desideraretur (cf. 1 Mach. 4,46; 9,27; 14,41). Unde quoque intellegitur cur tanta omnium ordinum facta sit commotio, cum subito propheta more antiquo a Deo populo excitaretur : exibat ad eum Ierosolyma et omnis Iudaea et omnis regio circa Iordanem (Matth. 3, 5). Sentiebant omnes in eo peculiare Dei consilium apparere et revelari; et quale illud esset, eius concione pandebatur : appropinquavit regnum caelorum; parate viam Domini (Matth. 3,2; Marc. 1,2); qua regnum instare messianum, novam illam theocratiam a prophetis annuntiatam, omnibus palam fiebat. Quare synedrium misit sacerdotes et levitas, ut interrogarent eum essetne ipse Christus; respondit : ego vox clamantis in deserto : dirigite viam Domini; i. e. se profitetur nuntium Domini venturi. Quem ut ipse videret certe magno desiderio expectabat. Scivit revelatione divina Christum ad se venturum esse (Ioan. 1,19-34). Quare Christum, qui sane toto habitu et vultu summam quandam prae se ferebat modestiam dignitati coniunctam, simul ac ad baptismum accessit, statim cognovit proficiens : ego a te debeo baptizari et tu venis ad me (Matth. 3,14); neque ulla est contradictio inter eam narrationem et Ioan. 1,33. Dein signo caelitus dato, de quo revelationem acceperat, divini-

tus comprobatus est Iesus ut Christus et Filius Dei : « super quem videris Spiritum descendantem et manentem super eum, hic est qui baptizat in Spiritu sancto; et ego vidi et testimonium perhibui quia hic est Filius Dei » (Ioan. 1, 33. 34). Quod testimonium audientibus discipulis saepius Iesu reddidit; videns enim Iesum ait : ecce agnus Dei, ecce qui tollit peccatum mundi; hic est de quo dixi : post me venit vir etc. (Ioan. 1, 29. 30. 36). Ab eo Iesus etiam primos suos accepit discipulos. Et cum aliqui ex discipulis Ioannis aegre ferrent, quod maior populi concursus ad Iesum fieret, iterum praeclarum edidit testimonium de Christo sponso Ecclesiae Ioan. 3, 26 ss.

Sortitus est Baptistae nomen, qui novum quendam baptismi ritum divinitus edoctus (qui misit me baptizare in aqua, Ioan. 1, 33) populum subire docuit. Iste enim erat baptismus poenitentiae; suscipiebatur in signum poenitentiae et emendationis vitae cum spe remissionis peccatorum a Deo obtinendae; ut documentum ederetur detestationis peccatorum, singuli qui ritum illum subibant confitebantur peccata sua (Matth. 3, 6. 11; Marc. 1, 5). Unde apparet hunc baptismum longissime differre a lotionem quam Iudaei faciebant ad immunditiam leviticam amovendam. Differebat quoque, quia a *Ioanne* baptizabantur. Quare interrogarunt qui missi erant a synedrio, cur novum induceret ritum (Ioan. 1, 25). Ab omnibus postulabat, ut dignos poenitentiae facerent fructus; singulis ordinibus congrua tradebat documenta et monita. Phariseos monebat ne fiduciam suam ponerent in carnali ab Abraham descensu; milites et publicanos hortabatur, ut ab omni abstinerent iniustitia. Uti a prophetis iam erat annuntiatum, declarat simul cum ortu regni messiani fore iudicium in contumaces : iam securis ad radicem arborum posita est...; in manu Messiae esse ventilabrum : permundabit arcem suam, paleas comburet igni inextinguibili (Matth. 3, 7-12; Luc. 3, 7-18). Neque pepercit Herodi Antipae, peccatori nobilissimo, qui Herodiadem uxorem fratris sui adulterio sibi copulaverat. Audacter sec-

lus castigavit : non licet tibi habere uxorem fratris tui (Matth. 14, 4; Marc. 6, 18). Quare ab Herode instigante adultera Ioannes missus est in carcerem, in castello Machaerunte. Timore populi Herodes impendebatur quominus cederet Herodiadi mortem importuni morum censoris postulanti; praeterea Herodes sciens Ioannem esse virum sanctum et iustum cum religioso quodam timore prosequeretur, eum ab insidiis Herodiadis tuebatur et cum saepe audiret, ex eius colloquiis de multis quae fecerat reddebatur dubius et anxius (Marc. 6, 19. 20 graece ἡρόρει; vide *Knaubenbauer*, Comm. in Marc. p. 169). Cum itaque Herodes ita erga eum esset affectus, non est mirum habuisse discipulos Ioannis liberum ad eum accessum. Ioannes autem certe praesagens mortem sibi instare, etiam e carcere voluit testimonium reddere Christo et suis discipulis et populum monere, ut Christo fide integra adhaerent. Quare ex carcere misit duos ex discipulis ad Iesum, qui eum interrogarent : tu es qui venturus es an alium expectamus? Qua interrogatione omnibus exemplo praeiit declarans affirmationi Iesu de se plenam adhibendam esse fidem simulque iterum munere suo parandi Domino plebem perfectam fungi vult quantum potest (Matth. 11, 2 ss.; Luc. 7, 18. 19).

Ex eo eventu aliqui concluderunt ipsum Ioannem dubitasse essetne Iesus Christus. Verum hi ad tria quae omnino considerare oportet non attenderunt. Primo enim Ioannes divinitus erat edoctus eum super quem videret Spiritum descendantem esse Christum, esse eum ad quem annuntiandum et demonstrandum ipse esset missus (Ioan. 1, 33). Jam nonne maxima inferitur Ioanni iniuria, si dicitur dubitasse, nam Deus sibi verum revelasset? quomodo sine scelere posset in dubium vocare quod Deus affirmavit? Dein explicite narrat Matthaeus : Ioannes cum audisset in vinculis opera *Christi*, mittens duos de discipulis etc. (11, 2); ergo audit et agnoscit *opera Christi*, et ut omnes ad illa reddat attentos, eam palam fieri vult quaestionem. Tertio perpendenda est laus eximia constantiae et magna illa di-

gnitas quam Christus publice ei attribuit ea ipsa occasione, neque minus advertendum, quam acriter Iudaeos reprehendat eo quod Ioanni non credidissent (Matth. 11,7-18). Quibus omnibus plane excluditur ullum Ioannis de Christo dubium; praeterea tali dubitatione totam suam missionem et praedicationem et ministerium ad deceptionem et fraudem reieccisset et repudiasset. Declaratur a Christo maximus inter omnes Veteris Test. sanctos et prophetas, cui illud quoque singulare et eximium contigit, ut eius adventus oraculo prophetico annuntiaretur (Mal. 3,1; Matth. 11,10; Marc. 1,27) et nativitas et praeclara virtus et officium ministerio angelico patri indicaretur.

Herodias assidue ei insidiabatur. Deum nacta est opportunitatem quam diu iam expebat. Herodes vino temulentus et voluptate incensus filiae Herodiadis saltatrici iureiurando coram insigni convivarum corona promiserat: quidquid petieris dabo tibi licet dimidium regni mei. Puella tanta promissione attonita consulit matrem. Quae sane gaudio tripudiavit! Herodes suis verbis captus est! Et puella a matre edocta redit cum festinatione ad regem: volo ut prolinus des mihi hic in disco caput Ioannis Baptistae (Marc. 6,21 ss.; Matth. 14,6 ss.). Rex quidem ea petitione contristatus est; at propter iusiurandum et propter simul discumbentes noluit puellam contristare. Ioannes decollatus est in carcere; caput eius in disco allatum est puellae, quae illud dedit matri. Discipuli autem Ioannis tulerunt corpus eius et posuerunt in monumento (l. c.). Ioannem ab Herode iussum esse necari Flavius Iosephus quoque refert; vocat Ioannem cognomento Baptistam « virum bonum, qui Iudaeos ad virtutis studium excitavit praecipiens, ut iuste quidem inter se, erga Deum autem pie agentes ad lavacrum accederent. Cumque multi ad eum undique confluerent, Herodes veritus ne tanta hominis auctoritas subditos ad defectionem impelleret (videbantur enim omnia de consilio eius facturi esse) satius esse duxit, priusquam novi aliquid ex illo oriretur, illum e medio tollere, quam ut ipse mutatione

rerum facta in discrimen adductus poenitentiam ageret. Atque ille quidem ob hanc Herodis suspicionem in vincula coniectus missusque ad castellum Machaeruntum ibidem caesus est; Iudaei vero persuasum habebant in ultionem necis eius deletum esse exercitum (ab Arela) Deo propterea Herodi infenso » (Ant. XVIII. 5,2). Quae Flavius Iosephus dicit, facile ex iis consequuntur, quae evangelistae narrant. Cum enim Baptista adulterium Herodis reprehenderet, Herodes pro eius apud populum auctoritate haud immerito sibi timere poterat ne subditi illa denuntiatione sceleris a se averterentur.

Initio quidem Ioannis praedicatione magna populi commotio est effecta; ipsi quoque nobiliores ad horam voluerunt exultare in luce eius, qui erat lucerna ardens et lucens (Ioan. 5,35). At scribae et Pharisei non crediderunt ei neque poenitentiam agebant; immo austeram eius vitae rationem traducebant dicentes: daemonium habet (Matth. 11,18) et interrogati a Christo, unde baptismus Ioannis fuisset, e caelo an ex hominibus, nolunt dicere eum e caelo fuisse, neque audent propter populum asserere ex hominibus fuisse. Apud nobiliores itaque Ioannes parum effecit, verum Christo teste: publicani et meretrices crediderunt ei et isti praecedent illos in regnum Dei (Matth. 21,31. 32).

7. Ioannes, discipulus ille quem Iesus diligebat, apostolus. Filius erat Zebedaei et Salomes (cf. Marc. 13,40 cum Matth. 27,56). Zebedaeus erat piscator qui habebat mercenarios (Marc. 1,20), Salome inter eas enumeratur pias mulieres, quae Dominum secutae erant a Galilaea ei ministrantes de facultatibus suis (Matth. 27,55; Marc. 15,41); quare Ioannes a familia fortunata vel satis divite ortus est. Aliqui putabant Ioan. 19,25 « soror matris eius » comparisonem facta cum Matth. et Marc. l. c. intellegi posse de Salome; unde arcta existeret inter Iesum et Ioannem propinquitas; quae tamen loci illius acceptio nullatenus est probabilis; nam grammaticae « Maria Cleophae » est appositio ad « soror matris eius » quia et ante et post singulae enumerationes nominum καὶ inter se

iunctae sunt; insuper *haec* acceptio suffragio antiquitatis et plurimorum interpretum commendatur. Dicitur Ioannes «notus pontifici» (γινωσκός, Ioan. 18,15) i. e. cognitus ei; unde pariter colligunt eius familiam non fuisse ignobilem. Ipse Ioannes discipulum se addixerat Baptistae; cum audisset Baptistam testimonium perhibentem Iesu: ecce agnus Dei, simul cum Andrea secutus est Iesum et invitatus benigne a Iesu cum eo mansit illo die (Ioan. 1,33 ss.). Ad continuam sequelam Iesu invitatus est simul cum fratre Iacobo post miraculosam piscationem (Luc. 5,1 ss.; cf. Matth. 4,21; Marc. 1,19); postea electus est apostolus (Luc. 6,14). In albis apostolorum semper enumeratur in primo quaternione et quidem loco secundo (Act. 1,13), tertio (Marc. 3,7), quarto (Matth. 10,3; Luc. 6,14). Est ille discipulus, quem Iesus prae ceteris diligebat, qui in coena ultima paschali «in sinu» Iesu recubuit, unde ὁ ἐπιστρώθης; a Patribus appellatus, qui unus ex apostolis ad crucem adstipit et cui Iesus moriens matrem suam commendavit (Ioan. 13,23; 19,26. 27). Simul cum fratre Iacobo nactus est a Domino cognomen filii tonitru, Boanerges (vide s. v.). Quae sit eius nominis ratio, plerumque explicant vel ab indole ferventiore vel ab eloquentia quasi tonante. Illa utique cernitur Marc. 9,37; 10,33 et Luc. 9,54 et in epistulis Ioannis (1 Ioan. 2,22; 3,8 et 2 Ioan. 7-11) et in variis locis Apoc.; ex qua indole etiam consequitur praedicatio ardens.

Ioannes quoque erat inter tres illos qui Christo maxime erant familiares, qui soli a Christo assumebantur, ut interessent resuscitationi filiae Iairi, transfigurationi, agoniae Christi in horto (Marc. 3,37; 9,1; 14,33). Simul cum Petro missus est ad parandam coenam paschalem, in qua recubens in sinu Iesu ab eo exquiri et signo dato intellegit quis sit proditor (Ioan. 13,23-28). Sequitur Christum in atrium pontificis, testis est mortis eius et transfixionis lateris. Die resurrectionis nuntio de vacuo sepulcro accepto cum Petro currit ad monumentum et primus apostolorum credit Iesum resurrexisse; ad lacum

Tiberiadis primus Dominum agnoscit (Ioan. 18,15; 19,35; 20,2. 8; 21,7).

Post pentecosten comes Petri erat cum is sanaret claudum; simul cum eo loquebatur ad turbam et cum eo a magistratu templi positus est in carcere; postero die testimonium magna constantia reddiderunt coram synedrio; iussi autem non amplius loqui in nomine Iesu ulli hominum responderunt Deo esse obediendum: non enim possumus quae vidimus et audivimus non loqui. Simul cum Petro Samariae neophytis manuum impositione sacramentum contulit confirmationis (Act. 3,1 ss.; 4,3 ss.; 8,14). In concilio quod dicunt apostolorum simul cum Petro et Iacobo «Ecclesiae columnis» accensetur et Pauli ad gentes apostolatum approbat (Gal. 2,6 ss.).

Ex eo tempore in sacris libris de eo rebusque ab eo gestis iam non fit mentio; solum Apoc. 1,9 legimus: ego Ioannes frater vester et particeps in tribulatione et regno et patientia in Christo Iesu, fui in insula quae appellatur Patmos, propter verbum Dei et testimonium Iesu.

De Joanne tamquam auctore Apoc. et evangelii et epistularum atque de reliqua vitae eius historia vide *Cornely*, *Introd.* III. p. 207 ss. 637 ss. 689 ss.; *Belser*, *Einleitung* in d. Neue Test. 1901 § 21-32.

Ultimis hisce decenniis multum agitur quaestio de Ioanne presbytero, cui critici moderni evangelium, epistulas, Apocalypsin Ioannis adscribunt. Obiiciunt enim Ioannem apostolum nunquam in Asia minore fuisse et alterum quendam Ioannem presbyterum erronee ab illis testibus, qui scripta ioannea S. Ioanni apostolo adscribunt, habitum et nominatum esse Ioannem apostolum. Sed illum presbyterum, quem Eusebius (*Hist. eccl.* 3,29) ab apostolo Ioanne distinguere voluit, antiquitas christiana ignoravit. De qua quaestione cf. *Knaubenbauer*, *Comm.* in Ioan. p. 3-7; *Poggel*, *Der 2. und 3. Brief des Apostels Johannes* p. 7-31; *F. S. Gutjahr*, *Die Glaubwürdigkeit des Irenäischen Zeugnisses über die Abfassung des vierten kanonischen Evangeliums*, Graz 1904 (cum plurimis notis bibliographicis);

J. Labourt, De la valeur du témoignage de S. Irénée dans la question Johannine in *Revue bibl.* VII. 1898 p. 59-73; *A. Camerlynck*, De quarti Evangelii auctore dissertatio, Lovanii 1899; *id.* La question Johannine in *Revue d'Histoire ecclésiastique* t. 1900 p. 201-41. 419-29. 633-44.

8. Ioannes Marcus, vide s. v. MARCUS.

9. Pater Petri apostoli, qui vocatur Simon Ioannis (Ioan. 21,15. 16. 17); v. PETRUS.

10. Ioannes, unus ex synedristis, sacerdos, coram quo Petrus et Ioannes die post sanationem claudi testimonium de Iesu reddiderunt (Act. 4,6).

IOARIB (Neh. 11,40; 4 Mach. 2,1) v. IOIARIB.

IOAS (צִמְזִי, Ἰωάς). 1. Filius Ochoziae, rex Iuda. Cum Athalia omne semen regium interficeret, unus Ioas parvulus cura et industria Iosabae, sororis Ochoziae, et uxoris Ioiadae sacerdotis, servatus est et per sex annos clam educatus (4 Reg. 11,2 ss.; 2 Par. 22, 11 ss.). Deum cum esset septem annorum, per Ioiadam regina impia est occisa et ipse rex constitutus et per 40 annos regnavit. Praeclare edoctus per Ioiadam sacerdotem, quamdiu eius utebatur superstitis consiliis, fecit rectum coram Domino. Excelsa quidem, in quibus populus immolabat et adolebat incensum, non abstulit, at pro instauratione templi, quod Athalia pessime tractarat (2 Par. 24,7), sedulam adhibuit curam et pecuniam collectam iussit sacerdotes impendere ad domum Domini in statum pristinum cum debito ornatu restituendam (4 Reg. 12,1 ss.; 2 Par. 24, 1 ss.), immo negligentiam vel tarditatem sacerdotum sua reprehensione et fervore castigavit et excussit. Ita studio ac pietate regis cultus Dei restituit. Verum mortuo Ioiada, optimo regis consiliario, principes Iuda impetrarunt a rege, ut idololatriam toleraret, « et dereliquerunt templum Domini Dei patrum suorum servieruntque lucis et sculptilibus; et facta est ira contra Iuda et Ierusalem propter hoc peccatum; mittebatque eis prophetas, ut reverterentur ad Dominum, quos protestantes illi audire nole-

bant » (2 Par. 24,18. 19). Sed scelus hoc Zacharias pius Ioiadae filius, propheta, vehementer reprehendit. Verum censorem molestum imperio regis in atrio domus Domini lapidaverunt; « et non est recordatus Ioas rex misericordiae quam fecerat Ioiada pater illius secum, sed interfecit filium eius; qui cum moreretur ait: videat Dominus et requirat » (2 Par. 24,21. 22). Atque mox ultio divina ingruit. Post annum enim Hazael rex Syriae expugnata urbe Gelb ascendit contra Ierusalem et proelio facto occisi sunt multi ex principibus Iuda; Ioas autem pretio ingenti soluto ex thesauris templi et palatii sui, ut rex Syriae recederet, impetravit. Postea facinoris poenam aliam quoque rex luit; coniuratione facta Ioas in domo Mello in lectulo suo occisus est et sepultus in civitate David, sed non in sepulcris regum (4 Reg. 12, 18 ss.; 2 Par. 24,23 ss.). Praeterea eius nomen legitur 4 Reg. 13,1. 10; 14, 1. 13.17. 23; 1 Par. 3,11; 2 Par. 25,23. 25.

2. Filius Ioachaz, rex Israel; sedecim annis regnavit in Samaria, rex tertius ex familia Iehu, ambulavit in omnibus peccatis Ieroboam filii Nabat, qui Israel ad idololatriam perduxerat (4 Reg. 13,9 ss.). Nihilominus pietate quadam persecutus Elisum prophetam, cum is ad mortem aegrotaret, ad eum descendit et flectens inclamavit: pater mi, pater mi, curus Israel et auriga eius. Et Elisens ei praedixit victoriam de Syris reportandam. Hazael enim afflixerat populum Israel cunctis diebus Ioachaz; sed Ioas ter devicit Benadad, filium Hazael, regem Syriae et recuperavit urbes quas Hazael tulerat de manu Ioachaz iure proclii. Moabitae quoque regionem infestabant (4 Reg. 13,14-25). Cum cum Amasias ad certamen provocaret, Ioas quidem non sine insolenti iactantia ei bellum dissuasit, et cum Amasias nuntiquam acquiesceret, bello inito magnam cladem Iudaeis intulit, ipsum Amasiam captivum duxit in Ierusalem, cuius murum spatio quadringentorum cubitorum interrupit. Cum ingenti praeda auri et argenti et vasorum templi et palatii regii reversus est Samariam (4 Reg. 14,1. 8-16; 2 Par. 25,17-24). Post eum

regnavit Ieroboam filius eius (4 Reg. 13,13; 14,17. 23. 27; Os. 1,1; Am. 1,1).

3. Pater Gedeonis, vir potens ex familia Abiezritarum, cuius urbs patria erat Ephra in sorte cisiordanica seu occidentali tribus Manasse (Iud. 6,11-32; 7,14; 8,13. 29. 32).

4. Princeps in Samaria tempore Achab regis (3 Reg. 22,26; 2 Par. 18,23). In Vulgata legitur: Ioas filius Amelech, sed LXX ὁ υἱὸς τοῦ βασιλέως, hebr. בֶּן־הַמֶּלֶךְ; unde vel filius iunior ipsius Achab vel princeps ex consanguineis regis fuisse censetur.

5. Filius Samaa, Gabaathites, qui cum fratre suo Abiezer Davidi in Siceleg fugitivo se adiunxit (1 Par. 12,3).

6. Unus ex praefectis Davidis, super apothecas olei constitutus (1 Par. 27, 28).

7. Ioas (1 Par. 4,22), Vulgata: Securus (vide s. v.).

8. Filius Bechor, princeps cognationis beniaminiticae, quae Davide regnante florebat (1 Par. 7,8); sed nomen hebr. est יוֹשֶׁבֶן.

IOATHAM, IOATHAN (יֹאחָז, Ἰωά-

θας, Ἰωᾶθαν). 1. Ioatham filius Gedeonis natu minimus, qui solus ex intereccione fratrum suorum ab Abimelech facta servatus est et parabola in monte Garizim contra Abimelech pronuntiata in urbem Bera (vide s. v.) aufugit (Iud. 9,5. 7. 37).

2. Filius Oziae seu Azariae regis Iuda et Ierusae filiae Sadoc; is Ozia lepra percusso gubernabat palatium et populum iudicabat, patre autem mortuo thronum adscendit 25 annos natus et sedecim annos regnavit. Fecit quod rectum erat coram Domino; verumtamen excelsa non abstulit et adhuc populus delinquebat. Ipse portam templi excelsam aedificavit, muro Ierusalem munitiones quasdam addidit, in variis regni partibus urbes, castella, turres exstruxit; Ammonitas devicit et coegit, ut sibi tributum solverent, sicut iam Oziae solverant. Versus finem regni eius iam Rasin rex Damasci et Phacee rex Israel expeditionem bellicam contra Iuda aggrediebantur, quam regnante Achaz, filio Ioathan, continuarunt (4 Reg. 15,5.

7. 30 s.; 16,1; 1 Par. 3,12; 5,17; 2 Par. 26,21. 23; 27,1-9; Is. 4,1; 7,1; Os. 1,1; Mich. 1,1; Matth. 4,9; in Vulgata saepius Ioathan).

3. Filius Iahaddai in genealogia Iuda (1 Par. 2,47; Vulgata: Ioathan).

IOB (Gen. 46,13) v. IASUB 1.

IOB (יֹב, Ἰώβ), vir ditissimus in terra Ilus (vide s. v.), cuius in Deum pietas acerbissimo morbo exploratur. Cum laude commemoratur Ez. 14,14; Tob. 2,12; Iac. 5,11. Totum quod de eo scimus, libro Iob continetur. In eius prologo (cp. 1. 2) res ita disponitur, ut statim pateat Deum permisisse calamitates Iobi sinceræ eius pietatis probandæ et exercendæ causa. Huius consilii ignari sunt et Iobus et amici eius. Cum enim Iobus totus ulceribus plenus humi sederet, tres amici ad eum accedunt; verum tanta miseria conspecta præ stupore tacent, donec Iobus acerbissimis querelis doloris magnitudinem declaret. Inde oritur disceptatio de origine et causa calamitatis Iobi. Tribus disputantium quasi congressibus hæc quæstio discutitur eo ordine, ut singuli Iobo respondeant. Et in primo quidem congressu Eliphaz contendit non affligi nisi improbos; quare Iobum monet, ut ab impietate ad Deum revertatur. Cum indignatione eam accusationem Iobus repellit; doloris magnitudinem testatus cum Deo expostulat, cur tantas a se exigit poenas. Hisce oggerit Baldad, filios Iobi iuste esse punitos, sapientia maiorum constare solos impios prosterni, pios non affligi. Opponit hic, experientia constare pios quoque affligi, immo impios sæpe agere prospere; se vero ultra omnem normam a Deo cruciari. Id Sophar ægerime ferens affirmat eum poenas dare minores quam pro impietate meritis sit. Iobus autem pluribus suam sententiam defendit et suam innocentiam coram Deo iudice affirmat. In altero congressu Eliphaz duas has assertiones impugnat: Iobum affligi innocentem et impios prospere agere; insuper acriter in Iobum invehitur. Quibus expostulationibus Iobus ad impatientiam provocatur et eo magis suam iactat integritatem. Contra quam Baldad

disputans Iobum impietatis arguit. Frustra Iobus amicorum miserationem imploret; spem tamen firmam enuntiatur fore ut Deus causam suam tueatur. At tamen Sophiar maiore vehementia Iobum scelerum accusat et ruinam impiorum necessariam exaggerat. Contra quod Iobus asserit impios multiplici frui prosperitate et raro contingere eversionem impii, immo eos servari immunes in aliorum calamitate et post mortem quoque nancisci honores. Verum interlocutores a sua sententia impios semper ac solum affligi non recedunt, quod in tertio congressu patet, Iobus vero cursu vitae suae commemorato se purum et innocentem probat; cur affligatur, nescit; falsa amicos proferre contendit. Sed cur boni quoque affligantur, nequit explicare.

In hac conditione quartus exurgit interlocutor Eliu, qui Iobi cum Deo expostulationem audacior, qua a Deo sibi dari rationem voluerit, acerbe reprehendit et declarat calamitates esse bonis salutare, quibus scilicet erudiantur, ne in peccata ruant et ut in bono proficiant. Humili animi submissione omnia esse a Deo accipienda; quem in finem maiestatem Dei sublimi modo praedicat. Tacet Iobus, Deus vero disceplationi ab Eliu propositae calculum adiecit et Iobum magnitudine sapientiae ac potentiae divinae edocet modeste sentire. — Prologo itaque et sermonibus Eliu aliquae panduntur rationes, cur pii quoque affligantur. Qua ratione simul patet haec minime abesse posse, nisi quis totam disputationem plane inanem ac sine ullo exitu esse voluerit.

Iobus quamvis quandoque vehementius loquatur atque nimium suam iactet integritatem, Deo pietatem ac fidelitatem servat; edocetur tamen non esse hominis rationem a Deo exigere, verum abiecta omni superbia de sua innocentia opinione oculis Dei consiliis maxima animi demissione esse acquiescendum. Ita Iobus se occulta superbia laborasse edidicit.

Merito tamen commendatur eius patientia, quam SS. Patres et scriptores ecclesiastici laudibus celebrant (cf. *Knabenbauer*, Comm. in Iob p. 12 s.). Nam iacturam bonorum, mortem filiorum,

morbum foedissimum ac molestissimum summa in Deum pietate ac patientia accepit, quamvis condiciones calamitatum quasi data opera tales essent, quibus facillime quis ad iracundiam provocaretur; uno enim quasi ictu omnia ceciderunt, plagam immediate sequitur et excipit plaga, nuntium subsequitur nuntius, semper unus solum evadit incolumis, ut perferat nuntium priore vix audito. At Iobus dolore utique percussus signa moeroris summa edidit; verum animi sensus pandit praeclaros: Dominus dedit, Dominus abstulit; sicut Domino placuit, ita factum est; sit nomen Domini benedictum (1,21). Immo cum ipse elephantiasi foedissima aequae ac acerbissima cruciaretur et ab ipsa uxore de pietate impeteretur conviciis, animum ostendit plane generosum et heroicum: si bona suscepimus de manu Dei, mala quare non suscipiamus (2,10)? Si postea vehementius loquitur, ipsi amici in culpa sunt; primo enim taciturni loquent per septem dies quasi mortuum; ipse ille taciturnus eorum consessus ac diuturnus molestiam Iobi auxilium; dein constanter ac perfracte contendunt solos impios affligi, neque contraria experientia quam Iobus repetito urget, a sententia recedunt, immo Iobum criminum gravissimorum reum ac plane impium esse vehementer affirmant. Ita Iobum provocant isque in postulanda ratione a Deo, in asserenda sua integritate iustos modestiae limites excedit quidem conquestus de acerbo Dei secum agendi modo, at simul aperte removel omnem iniustitiam a Deo (cf. 10,3 ss.) et eius consilia inscrutabilia veneratur opponens divinae maiestati hominis fragilitatem et miseriam et efflagitans levamen. Denum ad spem praeclaram assurgit (19,23) et inde multo pacatius loquitur spe illa suffultus.

Librum Iob arte poetica excellere omnes concedunt. Eum strophis, antistrophis, alternis strophis distinctum exhibet J. Honthelm in periodico *Zeitschrift für Kath. Theologie*, Innsbruck 1900 et 1901 et in libro: *Das Buch Iob als strophisches Kunstwerk nachgewiesen, übersetzt u. erklärt* [Bibl. Studien IX. 1904, Heft 1-3].

I. KNABENBAUER.

IOBAB (יובב, יואב). 1. Ultimus ex tredecim filiis Iectan filii Heber (Gen. 10,29; 1 Par. 1,23 quo loco LXX Ὠζάμ). Ex opinione *Bocharti* (Phaleg 2,29) Iobabites iidem sunt, qui apud Ptolem. VI. 7,24 scribuntur Ἰωβαβῖται ad mare Indicum iuxta Sachalitas incolentes. Ceterum nullum eius gentis vestigium hucusque repertum est.

2. Filius Zarae de Bosra, secundus in enumeratione regum Edom, antequam filii Israel regem haberent (Gen. 36,33. 34; 1 Par. 1,44. 43). LXX Iob 42,48 (ad-ditamentum) cum faciunt eundem ac Iob.

3. Rex Madon cum Iabin rege Asor contra Iosue foedere iunctus (Jos. 11,4).

4. Beniaminita, filius Saharaim, de Hodas uxore genitus in terra Moab (1 Par. 8,9).

5. Beniaminita de filiis Elphaal (1 Par. 8,18).

IOBANIA (יבניה, Ἰσβανία, apud *Swete* B Βαννία, Ἀ Ἰσβανία), filius Ieroham, Beniaminita in Ierusalem habitans (1 Par. 9,8).

IOCHABED (יוכבד, Ἰωχβεδ), uxor Amram et mater Aaron et Moysis (Ex. 6,20; Num. 26,59). Erat filia Levi in Aegypto nata neque famen immediate a Levi procreata dici debet.

IODAIA (Neh. 12,19) v. IDAIA 1.

IOED (יודד, Ἰωδδ), Beniaminita, unus ex maioribus Sellum, incolae Ierusalem post instaurationem (Neh. 11,7).

IOEL (יואל, Ἰωήλ), Vulgata 1 Par. 6, 33. 36 et 7,3 Iohel.

1. Filius primogenitus Samuel prophetae et pater Heman cantoris (1 Reg. 8,2; 1 Par. 6,33[18]; 13,17). Praeterea 1 Par. 6,28[13] legitur: Filii Samuel, primogenitus Vasseni et Abia; quo loco nomen Ioel excidit et Vasseni (יבשני) i. e. et secundus, LXX Σαυι velut nomen proprium habebatur; potius lege: Filii Samuel, primogenitus Ioel et secundus Abia.

2. Princeps cognationis in tribu Simeon, unus ex illis tredecim, qui ad introitum Gador (fortasse Gerara) profecti

Chamitas inde expulerunt (1 Par. 4,35).

3. Rubenita, cuius prosapia per septem generationes usque ad tempus captivitatis assyriacae recensetur (1 Par. 5,4); sed a quonam ex quattuor filiis Ruben ipse Ioel descendat, incertum est. Idem nominari videtur 5,8.

4. Princeps quidam Gaditarum in Basan (1 Par. 5,12).

5. Unus ex posteris Caath filii Levi et ex maioribus Heman cantoris (1 Par. 6,36[21]), distinguendus a Ioel patre Heman cantoris.

6. Filius Izrahia de tribu Issachar (1 Par. 7,3).

7. Unus ex heroibus davidicis, frater Nathan de Soba (1 Par. 11,38; sed v. IGAL).

8. Princeps filiorum Gersom tempore Davidis, qui se sanctificarunt, ut arcam Domini de domo Obedom in Ierusalem afferrent (1 Par. 15,7. 41).

9. Levita de filiis Gersom, filius Iehieli (v. IAHEL 2) ex posteris Leedan super thesauros templi a Davide positus (1 Par. 23,8; 26,22); fortasse idem est ac praecedens.

10. Filius Phadaia, princeps tribus Manasse cisiordanicae seu occidentalis tempore Davidis (1 Par. 27,20).

11. Filius Azariae de filiis Caath tempore Ezechiae regis (2 Par. 29,12).

12. Unus de filiis Nebo, qui uxores alienigenas mandante Esdra dimiserunt (Esdr. 10,43).

13. Filius Zechri, Beniaminita, praepositus Beniaminitarum in Ierusalem post captivitatem (Neh. 11,9).

14. Ioel propheta, filius Phatuel, qui secundus est in ordine duodecim prophetarum. De eius origine, patria, vita, tempore nihil nobis traditum est, nisi id solum quod ex eius libro colligi potest. In eo autem prius maximam quandam calamitatem per locustarum turbas inductam describit, quae maior sit omni alia cuius exstat memoria et posteris quae sit enarranda; ingenti quippe vastitate ac desolatione cuncta iacere prostrata, ita ut ne sacrificium quidem et libatio offerri possit. Quare ad planctum et poenitentiam agendam admonet; admonitionemque ulteriore calamitatis descriptione fulcit et precatione

in exemplum aliis praestit (1,2-20). Nam nisi conversi fuerint, haec calamitas multo maiore excipietur: Deus quippe hostes plane horrendos, iustitiae suae vindices, iis immittet. Quod ut avertatur, iis delineat modum agendi poenitentiam, quae sit interna cum spe in Deum misericordem et quae externis etiam actibus exhibeatur (2,1-17).

Deus populo qui resipuit benigne pepercit ei quae bona promittit et quidem bona temporalia pro tempore praesenti abundantissima, quibus large restituantur quae calamitate amiserant (2, 19-27); promittit pro futuro dona spiritualia et salutem invocantibus nomen Domini; promittit se captivum vindictam de hostibus qui opprimerant populum suum; praepimis de Tyro, Sidone, Philisthaea et generatim sanctum bellum motum iri contra omnes adversarios, quibus protigatis Deus erit bonorum largitor pro Iuda et Ierusalem (2,28-3,21).

Eum in Iuda, in Ierusalem praedicasse, ex vocibus Sion, montis sancti, vestibuli et altaris et ex adhortatione et descriptione vocibus illis adiuncta patet. Quando vero praedicaverit, incertum est. Sententiae maxime oppositae sunt: tempore Iosae regis, immo ante regni divisionem, et tempore aliquo post Nechoem! Verum aliquid traditionis vestigium habetur eo ipso ordine quo in libro duodecim prophetarum collocatur. Cum enim apud ceteros ordo temporis observatus videatur, cur non in Ioel? Ergo vel aequalis Osee erat vel forte paulo ante Osee; ante Amos certe, quippe qui saepius ad plagam locustarum verbis Ioelis alludit (1,2; 4,9; 9,11-15). Ad Oziae regis initia itaque Ioelis praedicatio referenda erit. — Ad vaticinium eius de effusione Spiritus S. provocat Petrus (Act. 2,12); Paulus (Rom. 10,13) verbis Ioel ostendit in regno messiano non esse distinctionem Iudaeos inter et gentes.

IOELA (יֵשַׁעִיָּה, 'Iesai), filius Ierobam de Gedor, vir fortissimus, qui David in Siceleg se adiunxit (1 Par. 12,7).

IOEZER (יִזְעָר, 'Iozar, s et A 'Iozar, vir de posteris Core et socius David in Siceleg fugitivi (1 Par. 12,6).

IOGLI (יִגְלִי, 'Eglé), pater Bocci principis tribus Dan (Num. 34,22).

IOHA (יֹחָנָן, 'Iohán, 1 Par. 8,16; 'Iohán, 1 Par. 11,45).

1. Unus ex filiis Baria Beniaminitae (1 Par. 8,16).

2. Heros davidicus, filius Samri, cognominatus Thosaites (1 Par. 11,45); quacumque urbs vel cognatio hoc cognomine designetur, non liquet.

3. Ioha (יֹחָזָךְ, 'Iozáz), filius Ioachaz a commentariis, a Iosia rege constitutus, ut cum Saphan scriba et Maasia principe templum Domini instauraret (2 Par. 34,8). Erat a Commentariis, de qua dignitate diximus s. v. COMMENTARIUS.

IOHANAN (יֹהָנָן, 'Iohán, 'Iohán, 'Iohán, 'Iohán, 'Iohán, 'Iohán).

1. Filius Carae, unus ex principibus militiae iudaicae, qui strenue tuebantur partes Godoliae, quem Nabuchodonosor reliquiis populi praefecerat; cum Godolias in Masphath ab Ismahel occisus esset, Iohanen occisorem persecutus est et omnem populum, quem Ismahel captum abduxerat, in Masphath reduxit; deinde vero contra praeceptum Ieremiae ipse et reliquiae Iudaeorum in Aegypto refugium quaesierunt, ubi Ieremias iis iterum funesta vaticinatur (4 Reg. 25,23; Ier. 40,8. 13. 15. 16; 41. 41. 43. 44. 45. 46; 42,1. 8; 43,2. 4. 5); abhinc nulla eius mentio fit.

2. Primogenitus Iosiae regis (1 Par. 3,15), praematura morte abreptus, ut ex eo colligere licet, quod non ipse, sed fratres eius Ioakim, Sedecias, Sellum thronum patris aliquo tempore obtinebant.

3. Quintus filius Elioenai de regia domo David descendens per Zorobabel (1 Par. 3,24).

4. Pontifex inter duos Azarias enumeratus (1 Par. 6,9. 10[35. 36]), quorum prior Salomone regnante pontifex erat, alter tempore Asa regis Iuda (v. AZARIAS 1 et 2).

5. Beniaminita, qui Davidi in Siceleg se adiunxit (1 Par. 12,4).

6. Princeps ex tribu Gad, qui Davidi in Siceleg se adiunxit (1 Par. 12,12).

7. Sextus inter filios Meselemiae seu

Mosollamiae (vide s. v.) Coritae de filiis Abiasaph, ianitor domus Domini (1 Par. 26,3; LXX Ἰωνάθων).

8. Dux bellicus in exercitu Iosaphat, qui 280 000 virorum praecerat (2 Par. 17, 15).

9. Pater Ismahel centurionis cum Ioiada contra Athaliam conspirantis (2 Par. 23,1).

10. Pater Azariae principis Ephraim tempore Achaz (2 Par. 28,12; LXX αὐτῷ Ἰωαζαῖ).

11. Filius Eccetan de filiis Azgad, e captivitate redux cum 110 viris (Esdr. 8,12).

12. Filius Eliasib, ceteroquin ignotus, qui ex nomine suo appellaverat quoddam novi templi cubiculum, in quo Esdras matrimonia cum uxoribus alienigenis facta lugebat (Esdr. 10,6); fortasse erat ex posteris Eliasib (1 Par. 24,12).

13. Unus ex filiis Bebai, qui uxores alienigenas iubente Esdra dimiserunt (Esdr. 10,28).

14. Filius Tobiae Ammonitae, matrimonio iunctus cum filia Mosollam filii Barachiae (Neh. 6,18).

15. Sacerdos tempore Ioacim pontificis post captivitatem, princeps familiae sacerdotalis Amariae (Neh. 12,13).

16. Unus ex pontificibus post captivitatem, quorum hic est ordo tum generationis tum successionis in pontificatu: Iosue, Ioacim, Eliasib, Ioiada, Iohanan (Jonathan), Ieddoa (Neh. 12,11. 22. 23); adverte 12,11 legendum esse Iohanan pro Jonathan et 12,23 in Vulgata mendose haberi Ionalhan, dum textus hebr. et LXX ibi legunt: Iohanan.

17. Levita tempore Nehemiae (Neh. 12,41[42]).

IOHEL (1 Par. 6,33. 36; 7,3) v. IOEL 1 et 5 et 6.

IOIADA (יְהוֹיָדָע, יְהוֹיָדָה; Ἰωαδά).

1. Pater Banaiae, sacerdos (v. BANAIAS 1).

2. Princeps domus Aaron (non summus sacerdos), qui Davidi in Hebron 3 700 viros bellatores adduxit (1 Par. 12,27; LXX Ἰωαδάς); fortasse idem est ac pater Banaiae.

3. Filius Banaiae, consiliarius Davidis

post mortem Achitophel (1 Par. 27,34); suspicantur aliqui pro Ioiada filio Banaiae in textu adfuisse Banaiam filium Ioiadae scil. notissimum illum, sed sufficiens ratio coniecturae deficit.

4. Summus sacerdos tempore Athaliae et Ioas regis Iuda; eius uxor erat Iosabeth filia regis Ioram et soror Ochozia, quae Ioas filium Ochoziae de medio filiorum regis furata est et abscondit, ne ab Athalia interficeretur; Ioiada vero Ioas septennem regem Iuda fecit, Athalam occidi iussit, cultum Dei restituit, regi Ioas consiliarius erat et in regno administrando adiutor (2 Par. 24, 6 : princeps), donec 130 annos natus diem supremum obiit et in civitate David cum regibus Iuda sepultus est. Cf. 4 Reg. 11,4 ss.; 12,2 ss.; 2 Par. 23,11; 23, 1 ss. Eius filius Zacharias, qui idololatram post mortem Ioiadae reviviscentem fortiter arguebat, in atrio domus Domini lapidatus est iuxta Ioas regis imperium (2 Par. 24,20-25); hunc esse illum Zachariam filium Barachiae, de quo Matth. 23,35 (cf. Luc. 11,50) agitur, est sententia apud veteres satis pervulgata et communis recentiorum, de qua vide plura apud *Knabenbauer* ad Matth. 23,35 et s. v. ZACHARIAS 34.

5. Sacerdos, praefectus templo tempore vel saltem initio regni Sedeciae (Jer. 29,26; Vulgata : pro Ioiade).

6. Filius Phasea in aedificanda porta vetere Ierusalem occupatus (Neh. 3,6; Ἰωιδά).

7. Pontifex post captivitatem, filius Eliasib et pater Iohanan (v. IOHANAN 16) pontificum (Neh. 12,10. 11. 22; 13, 28; LXX 12,22 et 13,28 Ἰωαδά).

IOIADE v. IOIADA 3.

IOIARIB (יְהוֹיָרִיב, plenius 1 Par. 9,10 et 24,7; יְהוֹיָרִיב; Ἰωάριβ, Ἰωάρβ).

1. Princeps primae classis sacerdotalis ex 24 a Davide constitutis (1 Par. 24,7). Eius posteri Hierosolymis habitabant post exilium (1 Par. 9,10; Neh. 11,10, quibus locis nomina Idaia, Ioiarib, Iachin probabiliter familiam sacerdotalem significant). In diebus Ioacim filii Iosue pontificis princeps familiae Ioiarib erat Mathanai (Neh. 12,6. 19). Ex

filii Ioiarib erant Mathathias et quinque heroes Machabaei (1 Mach. 2,1; 14,29). Etiam Flavius Iosephus gloriatur se non solum ex sacerdotum genere, sed ex classe prima inter illas 24 oriundum (Vita I.). — Vulgata Neh. 11,10 et 1 Mach. 2,1 scribit Ioiarib et 1 Mach. 14,29 Iarib (Iapli).

2. Unus ex illis, quos Esdras misit ad Eddo in pago Chasphia, ut levitas et Nathinacos ad iter hierosolymitanum induceret (Esdr. 8,16); duo ex illis, Ioiarib et Elnathan, designantur sapientes, reliqui principes.

3. Unus ex posteris Phares et maioribus Maasiae (Neh. 11,5).

IONA. 1. Iona (Ἰωνά), filius Eliakim in geneologia Christi (Luc. 3,30).

2. Iona (Matth. 16,17; Io. 1,42) v. BAR IONA.

IONADAB (יִזְבֵּד, יִזְבֵּדָה, Ἰωνάδᾰβ).

1. Filius Semmaa fratris David, amicus Amnon, vir prudens valde, qui pessimum consilium Amnon dedit, ut Thamar sororem opprimeret (2 Reg. 13,3. 5. 32. 35).

2. Filius Rechab, comes ac socius Iehu regis, cum hic sacerdos Baal insidiosae trucidaret (4 Reg. 10,15. 23); ab eodem Ionadab originem et nomen ducunt Rechabitae (Jer. 35,2 ss. et v. RECHABITAE).

IONAS (יֹנָתַן, Ἰωνᾰς, filius Amathi, propheta, oriundus ex Gethhepher in regione tribus Zabulon (cf. Jos. 19,13). Est scil. ille propheta qui Ieroboam II. praedixerat in sermone Domini fore ut ipse restitueret terminos Israel (cf. 4 Reg. 14,25). Propheta, qui in ordine duodecim prophetarum quintus est, pariter est Ionas filius Amathi; quin hic de cuius missione ninivitea libellus narrat idem ille propheta apud Ieroboam sit nemini est dubium (cf. Cornely, Introd. II. 2, ed. 2, p. 557). De hoc autem propheta eiusque historia et missione ninivitea imprimis attendenda sunt verba Christi: sicut enim fuit Ionas in ventre ceti tribus diebus et tribus noctibus, sic erit Filius hominis in corde terrae tribus diebus et tribus noctibus; viri Ninivitae surgent in iudicio cum ge-

neratione ista et condemnabunt eam, quia poenitentiam egerunt in praedicatione Ionae; et ecce plus quam Ionas hic (Matth. 12,39. 40; cf. 16,4; Luc. 11, 29. 30). Quibus verbis aperte res vere gesta indicatur eodem modo, quo Christus continuo adiungit aliud exemplum vere historicum: regina austri surget in iudicio etc. (Matth. 12,42; Luc. 11,31; cf. 3 Reg. 10,1; 2 Par. 9,1). Quare libellum Ionae ad mythum vel allegoriam reicere nefas est.

Deus Dominus etiam in Vetere Testamento se Deum aliarum quoque gentium exhibuit, dum et prophetas ad illas mitteret et varia vaticinia de iis a prophetis edenda curaret. Ut Elias, Eliseus, et postea Daniel cum externa gente conversati sunt, ita Ionas mittitur, ut Ninivitis praediceret. Frustra mandatum Domini declinare vult; punitione respiscit, obedit, Ninivitae agunt poenitentiam, iis parcitur; ipse vero propheta de immiti sua indole a Domino reprehenditur. Miraculum sane est Ionom per longius tempus (rabbi dicunt per horas 36) — confer tempus quo Christi corpus in sepulcro erat — servari vivum in ventre magni alicuius piscis. At miracula multa quoque de Elia et Eliseo narrantur; unde quod miraculum de Iona refertur, non potest esse ratio, cur narratio in meram redigatur parabolam. Neque quod de Ninivitis refertur, per se est improbabile. Nam prophetam multi ad exteram gentem, alias quoque habetur. Missio autem Ionae incidit in tempus, quo imperium assyriacum ab antiquo splendore recedere, peste, seditionibus, impetu hostili graviter concuti coeptum est; continuae fere erant Armeniorum rebelliones contra Salmanassar III. (782-773), frequentiores aliorum populorum rebelliones contra Asur-Dan III. (772-755); eius tandem successori Asur-Nirari II. (754-745) imperium ereptum est a Chaldaeo Phul (Theglathphalasar); tempore Asur-Dan III. praeter perturbationes internas bis quoque gravi pestilentia regionem esse afflictam incolae solis eclipsi perterritos esse ex catalogo eponymorum discimus (cf. Cornely I. c. 359). Hisce itaque Ninivitae

in angustias acti facile imperii ruinam numinisque supremi in se iram suspicari poterant; quare satis facile explicatur, cur prophetae voces ac minae tantum iis ineussissent timorem; adde ipsum Deum cum praedicatione prophetae suam coniunxisse gratiam ad animos commovendos. Praeterea inscriptionibus quoque constat homines valde pronos fuisse ad fidem adhibendam verbis ac praedictionibus magorum et vatum.

Assyrii iam ante Ieroboam II. regno Israel mala intulerunt. Unde explicatur prophetam aegre tulisse quod mitteretur ad praedicandum hostibus populi sui; vel etiam timuit molestias et labores. Quare se mandato Domini subducere conabatur. In eo quod irascitur de venia poenitentibus concessa manifestatur indoles illa alienigenis inimica, Iudaeis satis familiaris, et insuper rigida illa animi dispositio, quae summo opere postea in Pharisaeis apparuit, peccatores non ad conversionem invitandi sed abiiciendi et despiciendi et interitui devovendi. Docetur a Deo. Nam propheta dolet de planta solis ardore adusta, gemit plantae interitum; unde merito audit: tu doles de planta in qua non laborasti, quam crescere non fecisti, et ego non parcam Ninive civitati magnae, in qua sunt plus quam centum viginti millia hominum qui nesciunt quid sit inter dexteram et sinistram suam et iumenta multa? (4,11). — Collis quidam ruinarum Ninive appellatur *Nebi Yunus* in memoriam Ioniae prophetae; v. NINIVE.

I. KNABENBAUER.

IONATHAN, IONATHAS (יִזְחָן).

יִזְחָן i. e. Iahwe dedit cf. Theodorus; Ἰωνᾶθαν).

1. Filius Gersam filii Moysis, levita de Bethlehem Iuda, qui domicilium quaerens primum a Michä in monte Ephraim velut sacerdos pro idolis suis exceptus est, deinde cum Danitis in Lais-Dan (v. DAN 3) profectus et ibidem officio sacerdotis functus est (Iud. 18,30; cf. 17, 7 ss.), quod utique a sacerdotio aaronitico distinctum et legi Moysis contrarium erat.

2. Ionathas filius Saul natu maximus.

Imprimis in bello philisthaico audacissimum ac fortissimum sese praestitit. Mille viris in Gabaa Benjamin praefectus contra Geba (*Djeba*) progreditur ibique stationem (monumentum) Philisthaeorum destruit; paulo post ipse solus cum armigero apud Geba in saltum (*Wādi Suveinī*) descendit et contra Machmas ascendens stationem Philisthaeorum ibidem positam adortus percussit; praclarum facinus secuta est magna confusio et insignis clades Philisthaeorum; temerarium votum, quo Saul ex occasione populum adstrinxerat, Ionathas insecius transgressus morti addicitur et sola populi deprecatione servatur; eiusdem iuramenti discussione effectum est, ut post victoriam partam tempus tereretur et hostium persecutio cessaret (1 Reg. 13,2 ss.; 14,1 ss.). Praeterea celeberrimus est vera illa et maxime generosa erga Davidem amicitia, cuius praeclara documenta narrantur 1 Reg. 18,1 ss.; 19,1 ss.; 20,1 ss.; 23,16-18. Indolem eius bene depingit *F. de Hummelauer* (Comment. in II. Samuelis p. 153-154): « Vir fuit robustus corpore et mente. Spirabat fidem et fiduciam in Deum salvatorem Israel: hae tessera Machmis dimicavit. Ipse apud patrem unius factionis princeps, quam theocraticam vel prophetarum appellabis: nam factiones ibi erant omnino; dum altera factio, commodis domus Saul unice intentä, ipso rege utebatur et capite et instrumento. Ipse in aula primus eorum consiliorum patronus, quae Samuel constanter inculcaverat, quae post continuum prophetarum seriem difficillimis temporibus novissimi Isaias et Ieremias apud reges propugnauerunt quaeque hae una formula consignantur: Dominus salvator Israel. Ipse, primogenitus regis, divinum transferendi a domo Saul regni decretum aequo et generoso suscepit animo; Davidem quanto magis in eo caelestia charismata et divina praeordinatio elucerent, tanto sincerius adamavit et fovit. Ipse prae ceteris utique suggestit consilium sororis Davidi nuptui dandae, velut planissimam viam qua, domo Saul quam minime obscurata, imperium in virum a Deo designatum transferretur ».

Obiit Ionathas cum Saule et fratribus suis in pugna ad montem Gelboe (de quorum cadaveribus et sepultura vide s. v. BETHISAN, IABES 1, SELA); David autem amicum praeclaro encomio celebravit eiusque filio Miphiboseth (Meribbaal) misericordiam et benevolentiam exhibuit propter Ionathan (1 Reg. 31,2; 2 Reg. 1,4 ss.; 4,4; 9,1 ss.; 21,7. 12. 13. 14). Praeterea cf. 1 Par. 8,33. 33; 9,39. 40; 10,2; 1 Mach. 4,30.

3. Ionathas, filius Abiathar summi sacerdotis, Davidi ab Absalom fugienti nuntians, quae in Ierusalem agebantur (2 Reg. 15,27. 36; 17,17. 20) et altera occasione Adoniae usurpatori nuntians Salomonem unctum esse regem (3 Reg. 1,42. 43); ex verbis Adoniae: « Ingredere quia vir fortis es et bona nuntians » forsasse inferre licet Ionatham exemplo patris sui Abiathar partes Adoniae usurpatoris tulitum esse.

4. Filius Samaa fratris David, celebrer quod gigantem de origine Arapha in Geth, qui senos in manibus pedibusque habebat digitos, percussit (2 Reg. 21,21; 1 Par. 20,7). Coniunctum nonnulli eundem 1 Par. 27,32 nominari.

5. Filius Sage Ararites, heros davidicus (2 Reg. 23,32; 1 Par. 11,33[34]).

6. Filius natu minor Iada ex posteris Ilesron, pater Phaleth et Ziza (1 Par. 2, 33).

7. Filius Oziae a Davide thesauris quibusdam in urbibus, vicis, turribusque praefectus (1 Par. 27,23).

8. Patruus (יָיִי) Davidis, consiliarius, vir prudens et litteratus (1 Par. 27,32). Vox יָיִי significat fratrem patris; putant nonnulli eam latiore sensu accipi posse et nostro loco designari illum filium fratris David, de quo sub n. 4 diximus.

9. Levita tempore Iosaphat regis (2 Par. 17,8).

10. Scriba, praepositus carceris, in quem Ieremias a principibus populi regnante Sedecia coniectus est (Ier. 37,14. 19 hebr. 13. 20; 38,26).

11. Filius Caree (Ier. 40,8); sed vide s. v. CAREE.

12. Ionathan Neh. 12,11 et in Vulgata etiam 12,23 v. IOHANAN 16.

13. Pater Abed de filiis Adan (Esdr. 8,6).

14. Filius Azahel, aequalis Esdrae (Esdr. 10,13).

15. Sacerdos in diebus Ioachim pontificis, filii Iosue pontificis, princeps familiae Milicho (Neh. 12,14).

16. Sacerdos in diebus Ioachim pontificis, filii Iosue pontificis, princeps familiae Semaia (Neh. 12,18).

17. Pater Zachariae tempore Nehemiae (Neh. 12,34[35]).

18. Filius Absalom, qui a Simone Mach. missus Ioppen occupavit (1 Mach. 13,11); erat frater Mathathiae (1 Mach. 11,70).

19. Sacerdos orationem faciens apud sacrificium, quod Nehemias reperto sacro igne obtulisse legitur in epistula Iudaeorum hierosolymitanorum ad alexandrinus (2 Mach. 4,23).

20. Ionathas (Ἰωνᾶθ), filius Mathathiae sacerdotis, ultimo loco enumeratus inter fratres machabaeos (1 Mach. 2,3; cf. 2 Mach. 8,22), cuius res gestae (161-143 a. Chr.) narrantur 1 Mach. 9, 23-13,30. Cognominatur 1 Mach. 2,5 Apphus, Ἀπφῶς; (vide s. v.).

Mortuo Iuda Machabaeo *impii* et *iniqui* in Iudaea dominabantur, Bacchides dux Syrorum et Alcimus pontifex *pios* opprimebant (1 Mach. 9,23-27). Hi autem Ionathan principem et ducem elegerunt (9,28-31). Dum Ionathas trans Iordanem in desertum Thecuae se recipit et minoribus proeliis cum hostibus contendit (9,32-49), Bacchides varias urbes munivit et obsides Iudaeorum in arce hierosolymitana inclusit (9,50-53). Mortuo interim Alcimo (v. s. v.) Bacchides in Syriam rediit anno 160 vel 159 a. Chr. (9,54-57). Per septem fere annos insequentes (160-153 a. Chr.) Ionathas paulatim vires factionis machabaeae restituit; infra hoc tempus etiam Bacchides cum exercitu in Iudaeam a. 158 a. Chr. rediit, sed cum nihil contra Ionathan valeret, pace composita Iudaeam reliquit nunquam reversurus (9, 57-73).

Verum multo plus Ionathas invaluit, cum Alexander Balas a. 153 a. Chr. Demetrio I. throni aemulus se opponeret; uterque enim amicitiam et societatem Ionathae amiciebat. Demetrio I. consentiente Ionathas Hierosolyma occupavit

atque urbem et montem templi munitibus instruxit (10,1-14). Sed brevi post ab Alexandro Bala pontifex constitutus ad eius partes transiit et anno 133 a. Chr. die festo tabernaculorum stola pontificali se induit (10,13-21). Novis Demetrii I. promissis Ionathas a re Alexandri dimoveri non potuit (10,22-47). Neque spes eum fefellit. Alexander Balas regno potitus (10,48-50) cum Cleopatram filiam Philometoris regis Aegypti Ptolemaide uxorem duceret, Ionathan pontificem illuc invitavit et purpura indutum ducem et participem principatus (στρατηγὸν καὶ μεριδάρχην) constituit (10,51-66). Neque tunc finis bellorum erat. Cum Demetrius II. a. 147 a. Chr. Alexandro se opponeret, Ionathas Alexandri Balae partes tuebatur et Apollonium, praefectum Coeles Syriae, qui ab Alexandro defecerat, apud Azotum devicit (10,67-89). Nihilominus a Demetrio II. qui ope et auxilio Ptolemaei Philometoris regnum Syriae arripuit (11,4-19), Ionathas de novo pontifex et princeps, sicut antea fuerat, agnitus est et litteras immunitatis a tributis accepit (11,20-37).

Etiam Demetrio II. regnante Ionathas perturbationibus syriacis implicatus est. Rex cum Antiochenses sibi infensos videret, Iudaeis arcem hierosolymitanam et praesidia reliqua se traditurum promisit, si ipsum iuvarent; quare Ionathas tria millia virorum Antiochiam misit, qui seditionem civium armis oppresserunt (11,38. 41-52). Demetrius II. promissis non stetit (11,53). Interim Tryphon Antiochum VI., filiolum Alexandri Balae, regem constituere (11,39. 40. 54-56) et cum Ionatha foedus pangere (11,57-59) conabatur. Demetrii perfidiam perspiciebat Ionathas cum Antiocho VI. foedus iniit, urbes Ascalon et Gaza ut Antiocho VI. obsequerentur coegit, Demetrii ducem in campo Asor Galilaeae septemtrionalis devicit; Simon, frater Ionathae pontificis, Bethsuram in parte Iudaeae meridionali Demetrio eripuit (11,60-74); variis expeditionibus bellicis feliciter gestis urbibusque munitis Ionathas arcem hierosolymitanam a reliqua urbe muro exstructo separavit et munita roboravit (12,24-38). — Neque gladio tantum, sed etiam legatis Romam,

Spartam et ad alia loca missis Ionathas se firmavit, ut foedus cum Romanis a Iuda Machabaeo initum renovaret, cum Spartiatis aliisque nova foedera iniret (12,1-23).

Tandem ipse per fraudes et ambitionem Tryphonis occubuit. Timebat enim Tryphon, qui Antiochi VI. diadema sibi impositurus erat, ne Ionathas ipsi adversarius esset; cum exercitu in Palaestina profectus, sed amicitiam fingens Tryphon Ionathae persuasit, ut exercitu suo dimisso cum mille tantum electis viris secum Ptolemaida veniret; urbem ingressus Ionathas dolo captus est et omnes, qui cum eo erant, interfecti sunt (12,39-54). Loco Ionathae Simon frater eius a populo dux electus est. Ut fratrem redimeret, Simon pecuniam a Tryphone petitam et filios Ionathae obsequens misit; Tryphon vero patrem et filios apud Bascamam in terra transiordanica perfide interfecit. Simon Ionathan in Modin civitate patrum suorum iuxta Mathathiam patrem et fratres suos sepelivit ac postea patri et fratribus monumentum magnificentissimum ibidem extruxit (13,1-30).

IONIA (Ἰωνία) in sacro textu non legitur, sed ab aliquibus censetur substituenda esse 1 Mach. 8,8 pro regione Indorum (ἡ Ἰνδική), quam Antiochus III. a Romanis devictus Eumeni II. regi Pergami cessisse fertur; vide s. v. EUMENES.

IOPPE (Ἰῶππη, Ἰόππη et apud auctores profanos etiam Ἰόβπη), celeberrimus portus Iudaeae, hodie Jaffa, Jafa et apud Arabes *Yāfa*. Erat urbs perantiqua (*Plin.* V. 13,69: Iope Phoenicum, antiquior terrarum inundatione, ut ferunt).

Iuxta terminum aquilonarem tribus Dan sita (*Ios.* 19,46) a Danitis non videatur esse occupata, etsi in cantico Deborahae *Iud.* 5,17 innuitur Danitas mercaturam in portibus exercuisse. Ad portum Ioppe ligna cedrina de Libano ratibus applicabantur, ut inde Hierosolyma transferrentur pro exstruendo templo Salomonis (2 Par. 2,16; cf. 3 Reg. 5,9) et iterum pro secundo templo (*Esdr.* 3,7). Ioppen descendit Ionas mandatum Dei effugiens ibique navim euntem in

Tharsis (Tartessus Hispaniae) invenit (Ion. 1,3). Aetate Persarum Ioppe regi Sidoniorum Eshmunazar donata est (Inscriptio Eshmunazar lin. 18. 19 in Corpus Inscript. Semit. I. p. 9-20). Aetate diadochorum Antigonus urbem Ptolemaeo Lagi anno 315 eripuit, Ptolemaeus Lagi recuperatam solo aequavit anno 312 a. Chr. (Diodor. 19,39. 93). Aetate machabaica multum de ea dimicatum est. Antiochus IV. Epiphanes Hierosolyma profecturus Ioppen visitavit (2 Mach. 4,21). Inter ethnicos Iudaei quoque ibi sedem fixerant; etenim propter ducentos Iudaeos a Ioppitis dolo in altum mare submersos Iudas Mach. impetu nocturno portum et classem urbis incendio delevit (2 Mach. 12,3-7). Anno 147 vel 146 a. Chr. Ionathas Mach. Ioppen aggressus a civibus sponte exceptus est (1 Mach. 10,73. 76). Ibi Ionathas et Ptolemaeus Philometor amice congressi invicem se salutarunt (1 Mach. 11,6). Ab hoc tempore usque ad Pompeii adventum urbs Iudaeis parebat et Iudaeis quoque moribus imbuebatur. Cum aliquot annis post occupationem a Ionatha factam Ioppitae iterum partibus Syrorum faverent, Simon frater Ionathae praesidium in urbe posuit (12,33. 34) et associatores Syrorum eiecit (13,11); postea portum quoque et urbem munivit (14,3. 34); et cum Antiochus VII. Sidetes praeter alias urbes etiam Ioppen Syris reddendam esse clamaret, Simon centum talenta pro Ioppe et Gazara solvere paratus alia postulata reiecit (15,28-30. 33). A Pompeio Iudaeis erepta (Flav. Ios. Ant. XIV. 4,4; Bell. ind. I. 7,7), a Caesare restituta est (Ant. XIV. 10,6). Intra annos 34-30 urbem possidebat Cleopatra, postea Herodes eoque mortuo Archelaus, donec regnum Archelai a Romanis provinciae Syriae annexum et per procuratores Romanos administratum est.

Christianis autem Ioppen celeberrimam reddiderunt commemoratio S. Petri, qui ibidem Tabitham discipulam resuscitavit, multos dies in domo Simonis coriarii debebat, visionem de gentilibus ad evangelium admittendis habuit et a Cornelio centurione invitatus inde Caesarem profectus est (Act. 9,36-43; 10,3. 8. 23. 32; 11,3. 13). Notat *Quaresmius*

(Elucidatio Terrae Sanctae ed. *Cypri de Taprisio*, Venetiis 1881 II. p. 7): « Non longe a ruinis Ioppes versus Ierusalem cundo monstrantur fundamentum et residuum domus Tabithae ». Altera traditio pro domo Simonis coriarii, quae erat iuxta mare (Act. 10,6) assignat sanctuarium muhamedanum, cui nomen: aedes sacra propugnaculi (*mosquée du Bastion*).

Præterea nota Ioppen a Plinio perperam inter undecim Ioparchias Iudaeae recenseri (v. IUDAEA). Magni denique momenti sunt vestigia Hellenismi tum antiquitus tum etiam aetate Iudaica cum hac urbe connexa. Mythus de Andromeda vinculis in saxo Ioppensi ligata et a Perseo liberata apud Ioppenses dulcissime vicebat, ut testantur *Scylax*, *Strabo*, *Mela*, *Plinius*, *Flav. Iosephus*, *Pausanias*, *S. Hieronymus* (ad Ion. 1,3). Ipse Cepheus pater Andromedae urbem condidisse et a Iope uxore sua ei nomen dedisse a Graecis traditur (*Stephanus Byz.* s. v. Ἰόπη). Addit *Plinius V.* 43,69: « colitur illic fabulosa Ceto », quae alias vocatur Derceto et Atargatis (vide s. v.). De his mythis cf. *Schürer*, Geschichte des jüd. Volkes etc. ed. 3, II. p. 25. 26.

Cf. generatim *Reland*, Palaestina p. 864-867; *Ritter*, Erdkunde XVI. p. 574-580; *Raumer*, Palaestina ed. 4 p. 201 s.; *Tobler*, Topographie von Jerusalem II. p. 576-637; *Sepp*, Jerusalem ed. 2. I. 1-22; *Mislin*, Les Saints Lieux 1858 II. p. 127 ss.; *Guérin*, Judée I. 1-22; *Survey of West. Pal.* Mem. II. 254-255. 275-278; *Baedeker-Benzinger*, Pal. und Syrien ed. 5 p. 9 ss.; *Guy le Strange*, Palestine under the Moslems p. 550 ss.; *Schlatter*, Zur Topographie und Geschichte Palaestinas 1893 p. 1-28. 321-324; *Schürer*, Geschichte des jüdischen Volkes ed. 3 II. 99-103; *Buhl*, Alt. Pal. p. 187; *Zeitschr. d. D. Pal.-Ver.* III. 1880 p. 44 ss.; *Lièvre de Hamme*, Terre Sainte 1897 I. 90 ss.; *L. Heidet* apud *Vigouroux*, Dict. de la Bible III. 1631-40.

IORA v. HAREPH.

IORAI יוֹרַי, Ἰωραῖ, Ἰωραῖς, princeps cuiusdam cognationis Gad in Basan (1 Par. 5,43).

IORAM יוֹרָם, Ἰωράμ, 1. Filius Thon regis Hemath (2 Reg. 8,10), idem ac Adoram 2.

2. Levita ex maioribus Selemith a Davide super thesauros sacros praepositi (1 Par. 26,23; hebr. לֵוִי).

3. Sacerdos, qui regnante Iosaphat cunctas urbes Iuda circumiens populum legem Domini docebat una cum Elisama sacerdote aliisque (2 Par. 17,8).

4. Filius Iosaphat, rex Iuda; triginta duos annos natus, tamquam primogenitus filius Iosaphat regnum accepit ex patris dispositione (2 Par. 21,3) et octo annis regnavit in Ierusalem. Uxor eius erat Athalia, filia Achab; ipse quoque ambulavit in viis domus Achab et fecit malum coram Domino. Iosaphat pater aliis filiis suis sex dederat multum auri et argenti eosque duces urbium muniturum constituerat. Verum Ioram quam primum se vidit satis confirmatum in regno, fratres suos aliosque principes occidit. Cum fratres eius dicantur a propheta Domini « meliores te », hos removisse videtur et ob avaritiam et quia ipsi obsistebant. Ioram enim innovavit scelera idololatriae et populum ad idololatriam seduxit (4 Reg. 8, 18; 2 Par. 21,6. 11 ss.). Ullo divina mox manifestata est. Edomitae sese subtraxerunt dominationi eius et sibi regem constituerunt; neque bello inito valuit Ioram eos in suam ditionem redigere; praeter Edom Lobna quoque recessit, Philisthaei etiam et Arabes invaserunt Iudaeam et « vastaverunt eam diriperuntque cunctam substantiam quae inventa est in domo regis, insuper et filios eius et uxores; nec remansit ei filius, nisi Ioachaz qui minimus natus erat » (2 Par. 21,16. 17). Demum per duos ultimos regni annos morbo viscerum gravissimo laborabat et longa consumptus tunc ita ut egereret etiam viscera, mortuus est in infirmitate pessima. Neque ei secundum morem parentatum est, ita scil. ut pretiosa aromata et ligna odorifera in eius honorem comburerentur (de quo more cf. 2 Par. 19,14). Cf. generatim 3 Reg. 22,51; 4 Reg. 1,17; 8,16 ss.; 11,2; 12,18; 1 Par. 3,11; 2 Par. 24,1 ss.; 22,1; Matth. 4,8.

5. Filius Achab, rex Israel, qui post mortem fratris sui, Ochoziae, regnavit in Samaria (4 Reg. 1,17) per annos duo-

decim (4 Reg. 3,1); melior erat parentibus suis; nam statuas Baal quas fecerat pater eius removit; ceterum tamen non recessit a peccatis Ieroboam. Cum Mesa, rex Moab, rebellis existeret nec tributum solveret, Ioram opem rogavit a Iosaphat rege Iuda, qui prompte exercitum suum cum rege Israel et rege Edom coniunxit. Cum exercitus penuria aquae laboraret, Iosaphat suasit, ut deprecarentur Dominum per prophetam. Atque Eliseus in verbo Domini feliciter exitum praedixit; Moabitae devicti sunt et regio eorum devastata est (4 Reg. 3,4-27). Cum rex Syriae pugnaret contra Israel, Eliseus, qui divinitus consilia hostium cognita habebat, regi indicandum curavit quomodo insidias Syrorum evitaret (4 Reg. 6,8 ss.). Benadad autem rex Syriae obsidebat Samariam et fames maxima exorta est, ita ut duae mulieres inter se pactum fecerint de filiis comedendis; cum altera mulier suum filium nolle immolare, prior mulier regem adiit, qui audito scelere scidit vestimenta viditque omnis populus cilicium quo vestitus erat, simulque minatus est Eliseo mortem, a quo antea auxilium acceperat et a quo se iam derelictum putabat. Verum insequente nocte terror Domini irruit in Syros qui praecipite fuga abierunt castris cum amplissimo commeatu relictis (4 Reg. 6,24-7,20), sicut praedixerat Eliseus. Contra Ioram iubente Eliseo unctus est Iehu in regem, qui iudicium Domini in domum Achab exsequeretur; Ioram a Iehu sagitta percussus interiit (4 Reg. 8,28. 29; 9,1 ss.; 2 Par. 22,3-7).

IORDANIS (יַרְדֵּן cum articulo, in poesi sine articulo Ps. 42[41],7 et Iob 4,23[Vulgata 18]; ὁ Ἰορδάνης), fluvius nobilissimus et proprie loquendo unicus Palaestinae, quae Ps. 41[42],7 terra Iordanis audit. Nomen hodiernum est *el-Sherī'a* i. e. aquatio vel *Sherī'at el-Kebīre* i. e. aquatio magna. Apud scriptores arabicos vocatur *el-Urdunn*. In papyro Anastasi I legitur *Y-ira-du-na* (cf. W. M. Müller, *Asien u. Europa* p. 97 s. 196). Nomen plerumque explicatur *fluvius* a ירד = descendere, defluere, ut germanice *Rhyn, Rhein* a verbo *rinnen*.

Alii vero nomen comparant cum voce syriaca *yarda* i. e. lacus et cum verbo arabico *warada* i. e. adequari (*wirdun* i. e. aequatio); unde nomini antiquo Iordanis eadem subesse significatio videtur ac nomini hodierno *el-Sherī'a* scil. aequatio (*Cheyne* in *Encyclopaedia biblica* II. 2573; *J. Döller*, Geogr. u. ethnogr. Studien z. III. u. IV. Buche d. Könige 1904 p. 125-7).

Iordanis ex tribus fontibus coalescit. Primus est *Nahr Bāniyās*, qui prope vicum *Bāniyās* (Paneas, Caesarea Philippi) oritur infra specum admodum pulchram deo Pan olim consecratam (cf. *Flav. Jos.* Ant. XV. 10,3) et aqua limpidissima prae aliis duobus fontibus Iordanis distinguitur. Secundus, *Nahr Leddān*, oritur ex *Tell el-Qūdi* (Lais-Dan; v. DAN 3) ad occidentem Paneadis; apud Flav. Iosephum vocatur minor (ὁ μικρὸς Ἰορδάνης Ant. VIII. 8,4) vel fons Dan (Δάνος; I. 10,1). His duobus hora et dimidia infra Paneadem confluentibus mox adiungitur tertius, *Nahr Hāsbānī*, qui in descensu occidentali Hermon maioris prope vicum *Hāsbeyā*, oritur et per *Wādī el-Teim* decurrens eandem directionem meridiionalem tenet, quam ipse Iordanis ex hisce tribus fluviis coalescens. *Nahr Hāsbānī*, quem scriptores veteres ignorant, longitudine alios duos superat, medius autem *Nahr Leddān* est brevissimus, sed copia aquae largissimus. Assertit quidem Flavius Iosephus (Bell. iud. III. 10,7): « Et Iordanis quidem fons Panium esse videtur: sub terram vero huc occulto deferitur ex Phiala quae appellatur »; lacum autem Phiala a rotunditate dictum 120 stadia a Caesarea Philippi abesse dicit (hodie *Birket el-Rūm* inter meridiem et orientem a *Bāniyās*). Sed lacus ille exitu aquae caret et insuper in regione depressa situs aquas ad Panium mittere nequaquam posset. Apud Flav. Iosephum cf. praeterea de Iordane Ant. V. 3,1; XIII. 1,3; Bell. iud. I. 21,3; IV. 1,1.

Iordanis primum Semehonitidis paludes i. e. lacum *Hāle* medius secat, deinde per fauces rupium tribus fere horis planitiem *el-Baṭīha* attingit et lacum Tiberiadis intrat. In hoc cursu superiore commemorandus est pons Iacob,

Djīr Benūt Ya'qūb i. e. pons filiarum Iacob, non multum infra lacum *Hāle* Iordanis impositus; illae enim ducebat via maris a Ptolemaide Damascus versus, quae iam antiquissimis temporibus Aegyptum et terras euphratenses coniungebat.

A lacu Tiberiadis usque ad mare Mortuum perficitur Iordanis cursus medius et inferior, qui in linea recta circa 110 km habet, sed ob innumeros sinus ac tortus saltem in triplicem longitudinem protrahitur. Distinguere oportet alveum Iordanis et vallem Iordanis. Ipse alveus fere quadrantem horae latus est et directionem meridiionalem satis constanter retinet, ita ut intra ipsum fluvius multiplices istos tortus perficiat. Consistit est arundinibus, cannis, virgultis salicis, populorum, platanorum, tamaricum, a subibus feris aliisque bestiis habitatus, olim etiam a leonibus (Ier. 49,19; 50,44; Zach. 11,3): in Vetere Test. vocatur superbia Iordanis (Ioc. cit. et Ier. 12,5), hodie *el-Zōr*. Huius alvei ripas Iordanis tempore messis implere consueverat (Ios. 3,15; cf. 1 Par. 12,15; Eccli. 22,24[36]). — Sed vallis Iordanis, *el-Ghōr*, altior est; generatim 12 m, nonnullis locis 46 m supra alveum assurgit, duarum vel trium horarum latitudinem habet, est desertum sterile, calore candens, ex utraque parte praeruptis montibus conclusum; nonnullae tamen oases aquosae solitudinibus interiectae sunt et imprimis frugiferae sunt regiones circa Bethsan, Soccoth, Iericho et regio lacui Genesareth adiacens.

Ab oriente in Iordanem influunt fluvius *Yarmūk*, Hieromax veterum, hodie *Sherī'at el-Menādīre* et Iaboc (vide s. v.), ab occidente *Wādī Djālūd* prope Bethsan, *Wādī Fār'a* et *Wādī Qelt* prope Iericho, qui torrens Carith (vide s. v.) a nonnullis esse putatur.

Totus cursus Iordanis a fonte *Nahr Hāsbānī* usque ad mare Mortuum in linea recta et inclusis etiam lacubus *Hāle* ac Genesareth complectitur c. 200 km, ex quibus fere tres quartae partes scil. c. 146 km infra maris aequor deprimuntur. Qua ratione velocitatis aquae Iordanis deferantur, ex tabella subiecta perspicitur:

In parenthesi indicatur elevatio (+) vel depressio (—) relate ad maris Mediterranei aequor.	Distantia :	Libramen- tum aquae pro 1 km :
A fonte <i>Nahr Ilāšbānī</i> (+ 520 m) usque ad confluentes (+ 43 m)..	c. 35 km	13, 6 m
A fonte <i>Nahr Bāniyās</i> (+ 369 m) usque ad confluentes (+ 43 m)..	7-8 km	45 m
A fonte <i>Nahr Leddān</i> (+ 154 m) usque ad confluentes (+ 43 m)..	c. 8 km	14 m
A confluentibus (+ 43 m) usque ad austrum lacus <i>Hūle</i> (+ 2 m)..	c. 18 km	2,3 m
A lacu <i>Hūle</i> (+ 2 m) usque ad lacum Genesareth (— 208 m).....	c. 16 km	13 m
A lacu Genesareth (— 208 m) usque ad mare Mortuum (— 394 m)..	c. 110 km	1,7 m

Velocitas igitur Iordanis satis magna est. Quodsi addimus permulta esse vada, vortices, impetus aquarum, syrtes, scopulos, facile intellegimus eundem navium vix patientem esse. Dum igitur alii fluvii commercio hominum inserviunt, Iordanis potius erat limes ac terminus terrae promissae (Gen. 32,10; Num. 34,12; Ios. 1,2; Ez. 47,18); regio ad orientem Iordanis terrae Chanaan opponitur et nominatur terra trans Iordanem (Gen. 50,10. 11; Num. 33,14; Ios. 14,1. 3 et saepius).

Tota vallis a lacu Tiberiadis usque ad sinum Aelaniticum hebraice vocabatur *ʿAraba* (עֲרָבָה, LXX Ἀραβία) i. e. desertum, solitudo (cf. Ios. 12,1; 2 Reg. 2,29; 4,7; 4 Reg. 23,4). Hodie sola vallis a mari Mortuo usque ad sinum Aelaniticum *el-ʿAraba* audit. Vallis autem Iordanis a lacu Tiberiadis usque ad mare Mortuum, quae hodie *el-Ghōr* i. e. depressio audit, vocabatur circulus Iordanis (כְּכַר הַיַּרְדֵּן vel brevis כְּכַר); cf. Gen. 13,10. 12; 19,17. 23. 28. 29; 2 Sam. 18,23; 1[3] Reg. 7,46; in Novo Test. eadem vallis designatur ἡ περὶ Ἰωρδάνου, regio circa Iordanem (Matth. 3,5, regio Iordanis (Luc. 3,3).

Traiectus Iordanis. Quattuor vel quinque sunt traiectiones praecipui, qui nonnullos eventus ex historia sacra in memoriam revocant. Immediatē infra lacum Tiberiadis cernuntur ruinae pontis *Djisir el-Samakh* a vico *Samakh* dicti; inde via romana Damascus ducebat. Paulo infra ostium fluvii *Yarmūk* alius pons, *Djisir el-Mudjāmiʿ*, traiectionem antiquam indicat; ea via Naaman Syrus (cf. 4 Reg. 5,14) et Syri a Samaria fugientes (4 Reg. 7,15) Iordanem traiecisce censentur;

ibi Iudas Mach. et Ionathas frater eius ex Galaad Hierosolyma redituri Iordanem traiecerunt contra faciem Bethsan (1 Mach. 5,52; 2 Mach. 12,29). Iterum paulo infra ostium fluvii Iaboc est traiectionis *el-Dāmiye*, quo via a Sichem versus Ramoth Galaad ducebat; ibi fere erant vada, quae Galaaditae occuparunt, ut fugientes Ephraimitas interciperent (Iud. 12,5 ss.). A Iericho denique duae viae antiquae in terram transiordanicam ducebant, altera superior per vadum hodiernum *Makhūlet Hadjle* versus Ramoth Galaad, altera inferior per vadum hodiernum *el-Henu* versus Hesbon; in ea regione populus Israel Iordanem miraculo siccatum traiecit (Ios. 3,1 ss.); praeterea cf. 1 Reg. 13,7; 2 Reg. 19,18; 4 Reg. 2,8; 6,6; 1 Mach. 9,48; Marc. 10,1. 46 et Io. 10,40. Intra ista duo vada traditio locum figit, in quo Ioannes Baptista baptizabat (Matth. 3,6; Marc. 1,5) et Iesus ab eo baptizatus est (Matth. 3,13; Marc. 1,9; Luc. 3,21).

IORIM (Ἰωρεμ), qui fuit Mathat, in genealogia Christi (Luc. 3,29).

IOSA (יוֹשָׁא, Ἰωσᾶ), filius Amasiae, unus ex tredecim principibus cognationum Simeon, qui tempore Ezechiae pascua Gador occuparunt (1 Par. 4,34).

IOSABA, IOSABETH (יוֹשָׁבֶֿבֶֿת, Ἰωσᾶβὲθ, Ἰωσᾶβήθ), filia Ioram regis Iuda, soror Ochoziae et uxor Ioiadae pontificis, quae Ios filium Ochoziae a facie Athaliae abscondit, ne interficeretur (4 Reg. 11,2; 2 Par. 22,11). Flav. Iosephus (Ant. IX. 7,1) eam dicit Ochoziae sororem eodem patre genitam neque textus sacer eam asserit filiam

Athaliae, sed solummodo filiam Ioram; unde conciere licet eam a Ioram ex alia quadam concubina fuisse genitam.

IOSABHESED (יִישָׁבֶהֶסֶד, Ἀροβᾶ-σσας), unus de filiis Zorobabel (1 Par. 3,20).

IOSABIA (יִושָׁבִי, Ἰωσαβ(α)), pater Iehu principis in tribu Simeon tempore Ezechiae regis (1 Par. 4,33).

IOSACHAR (יִזְחָר, Ἰεζαχαρ), filius Semmaath Ammanitidis, servus Iosae regis Iuda (4 Reg. 12,21[22]); loco parallelo 2 Par. 24,26 scribitur Zabad (זָבָד, Ζαβδ); is cum alio servo Iozabad regem in lecto interfecit: v. IOSA 1.

IOSAIA (יִושִׁיָּה, Ἰωσαῖα), filius I-naem, heros in exercitu Davidis (1 Par. 11,46).

IOSAPHAT (יְהוֹשָׁפָט, Ἰωσαφάτ).

1. Filius Ahilud, primum Davidi (2 Reg. 8,16; 20,24; 1 Par. 18,13), deinde Salomoni (3 Reg. 4,3) a commentariis; de qua dignitate vide s. v. COMMENTARIUS.

2. Vir fortissimus in exercitu Davidis (1 Par. 11,43); hebr. scribitur יְהוֹשָׁפָט.

3. Sacerdos tempore Davidis (1 Par. 13,24).

4. Filius Pharie, praefectus in Issachar tempore Salomonis (3 Reg. 4,17).

5. Filius Namsi, pater Iehu regis (4 Reg. 9,2,14).

6. Iosaphat rex Iuda, filius Asa, thronum ascendit triginta quinque annos natus et viginti quinque annis regnavit; ambulavit in omni via Asa patris sui et fecit quod erat rectum coram Domino. Excelsa quidem non abstulit, at reliquias quasdam cultus impuri ex tempore Asa exterminavit (cf. 3 Reg. 22,44-47; 2 Par. 17,6; 19,3; 20,33). Et tertio anno regni sui misit viros nobiles quinque et levitas novem cum sacerdotibus duobus, qui habentes librum legis Domini docerent cunctas in circuitu urbes Iuda et populum erudirent, et de Bersabee usque ad montem Ephraim revocabat populum ad Dominum (2 Par. 17, 7-9; 19, 4). Cultum sacrum ab eo

promotum esse templumque donis positis exornatum innuitur 4 Reg. 12,18 et 2 Par. 20,19. Huic pietati non deerat merces divinitus concessa: « itaque factus est pavor Domini super omnia regna terrarum quae erant per gyrum Iuda nec audebant bellare contra Iosaphat. Sed et Philisthaei Iosaphat munera deferrebant et vectigal argenti, Arabes quoque adducebant pecora arietum septem millia septingenta et hircorum totidem » (2 Par. 17,10, 11). Sed multum quoque rei militari prospiciebat. Praesidia militum constituit in urbibus Iuda, urbes munivit turribus aedificatis et constructis moenibus, in civitatibus quoque Ephraim collocavit praesidia. Maximum quoque exercitum paratum habebat sub quinque ducibus numero sane stupendo 4 160 000 militum secundum numeros 2 Par. 17, 14-18.

Verumtamen non in omnibus se praestitit regem vere theocraticum. Nam affinitate coniunctus est domui Achab, impii regis Israel (2 Par. 18,1). Filio enim Ioram uxorem dedit filiam Achab (4 Reg. 8,18; 2 Par. 21,6). Familiariter quoque ipse cum Achab conversatus ei opem tulit in bello animoparatissimo loquens ad Achab: « ut ego et tu, populus meus et populus tuus unum sunt, et equites mei equites tui » (3 Reg. 22,4; 2 Par. 18,3). Ita cum eo bellum movit contra Syriam, ut recuperaret Achab Ramoth Galaad quadringentis pseudopphetis fausta nuntiantibus et propheta Michaea frustra regem de infelici eventu monente. Proelio commisso Iosaphat quem regem Israel Syri putabant in magno versatus discrimine « clamavit ad Dominum et auxiliatus est ei atque avertit eos ab illo » (2 Par. 18,31), Achab vero sagitta percussus obiit. Iosaphat autem revertenti in regnum suum occurrit Iehu propheta acri reprehensione, quod impio praebuisset auxilium et cum inimico Dei inisset amicitiam (3 Reg. 22,5-37; 2 Par. 18,4-19,2). Curam dein impendit, ut iudices constituerentur et recte munere suo fungerentur (2 Par. 19,5-11). Praesentem Dei opem expertus est quando cum Ioram, rege Israel, contra Mesam regem Moab bellum iniit (4 Reg. 3,4-27) et cum Moabitae, Ammonitae,

Maonitae bellum contra eum moverent. Contra quod periculum ieiunio et oratione ad Dominum confugit, qui eum exaudivit et per Iahaziel prophetam faustum rei exitum promisit. Hostes enim inter se discordes facti mutuis caedibus sese interemerunt, et Iudaei amplis spoliis collectis Domino laudes cecinerunt de felici belli exitu (2 Par. 20, 1-29). Hisce peractis « quievit regnum Iosaphat et praebuit ei Deus pacem per circuitum ». Uti antea cum Achab, ita quoque cum impio eius filio, Ochozia, iniit amicitias ad construendas naves, quae de Asiongaber irent in Ophir propter aurum. Sed, uti Eliezer vaticinatus est, propter foedus cum Ochozia Dominus percussit opera Iosaphat; et naves contractae sunt in Asiongaber (3 Reg. 22, 49; 2 Par. 20, 33-37).

Cf. generatim 3 Reg. 15, 24; 22, 2 ss.; 4 Reg. 1, 17; 3, 1 ss.; 8, 16; 12, 18; 1 Par. 3, 10; 2 Par. 17, 1 ss.; 18, 1 ss.; 19, 1 ss.; 20, 1 ss.; 21, 1 s.; 22, 9; Matth. 1, 8.

I. KNABENBAUER.

7. Iosaphat vallis. In prophetia Ioe-
lis Dominus ultionem de hostibus Sio-
nis capiendam indicens « congregabo,
inquit, omnes gentes et deducam eas in
vallem Iosaphat » (עֵבֶק יְהוֹשָׁפָט, ἡ κοιλάς
Ἰωσαφάτ Joel 3 [hebr. 4], 2. 12); alio
nomine mox eadem vallis *conclusionis*
(s. decisionis) (vocatur עֵבֶק הַחֵרֶץ "ע, z. תֵּץ
δίζης, ib. v. 14). Nomen huius vallis Io-
saphat i. e. *Dominus iudicat* a multis
interpretibus allegorice exponitur, idque
satis probabiliter, cum verba prophetae
iudicium Dei in omnes gentes vario
tempore et variis modis exercendum
describant (cf. I. Knabenbauer in h. l.);
occasionem vero huius denominationis
propheta fortasse desumpsit ex victo-
ria a rege Iosaphat in valle benedi-
ctionis de hostibus reportata (2 Par.
20, 16-26; עֵבֶק בְּרָכָה, ὁ ἀλλόων τῆς εὐλογίας
v. 26), quam vallem nonnulli recentio-
res ideo supponunt eandem esse cum
valle Iosaphat, sed immerito (v. BENE-
DICTIONIS VALLIS).

At multis tum Iudaeis, tum Christianis, tum Mahometanis placuit opinio an-

liquissima, quamvis ex hoc non magis
vera, secundum quam vallis Iosaphat
eadem dicitur cum torrente Cedron in
ea potissimum parte, quae urbem Hierosolymorum a monte Oliveti seingit.
Quam opinionem iam auctor libri He-
noch videtur indicare (c. 27), Eusebius
eiusque interpretes S. Hieronymus ex-
pressis verbis sequuntur; et iam eorum
aetate, atque sequentibus saeculis usque
ad nostra tempora vallis Iosaphat com-
munis appellatio illius torrentis evasit
(cf. *Itinera hierosolymitana*, passim)
cuius « fluvium parvum » *Breviarius de*
Hierosolyma refert (c. a. 590: « ignem
in consummationem saeculi vomitu-
rum » (cf. nomen hodiernum *Wādi et-
nār*, vallis ignis). Sed verba Ioe-
li nullo opinione de iudicio universali in
hac valle futuro fundamentum praebent,
eamque S. *Cyrrillus* Alexandrinus tam-
quam frivolum atque anile et ridicu-
lum Iudaeorum commentum reiiciendum
censet (in Joel 3, 2; *Migne* 71, 389 D),
quamquam appellationem iam tunc usi-
talam admittit.

De valle ipsa v. CEDRON (vol. I. col.
798. 799) et JERUSALEM II. 2. — Cf. *Euse-
bius* — S. *Hieronymus*, *Onomastica sacra*,
ed. P. de Lagarde 273, 89 s. 111, 13 s.; *Bre-
viarius de Hierosolyma* in *Itinera hiero-
solymitana*, *ed. P. Geyer*, p. 155, 17 s.; *Itin.*
Burdig. ib. 23, 7; *Petrus* *diac.* ib. 109, 13;
Eucherius ib. 127, 10; *Theodosius* ib. 142, 15;
Antoninus [Anonymus] *Plac.* ib. 170, 18; 173,
15. 17; 176, 9; *Adamnanus* ib. 240, 7. 10; 241,
19; 242, 1; 246, 6; 248, 15; *Ven. Beda* ib. 308,
23; 309, 10. — *Fr. Quaresmius*, *Elucid. Ter-
rae S. IV.* peregr. 5, c. 2 s., *ed. Venet.* II.
p. 117-20; *Ad. Neubauer*, *La géographie*
du Talmud p. 51 s.

L. FONCK.

IOSEDEC (יְהוֹשֻׁעַ, Ἰωσεδέκ), filius
Saraiae pontificis, in captivitate baby-
lonicam abductus (1 Par. 6, 14. 15),
postquam Saraia in Reblatha occisus
est (cf. 4 Reg. 25, 18. 21). Procul dubio
in exilio babylonico mortuus est; eius
filius Iosue (Iesus) pontificatum gessit
tempore Zorobabel (Esdr. 3, 2. 8; 3, 2;
10, 18; Eccli. 49, 14; Agg. 1, 1. 12. 14;
2, 3. 5; Zach. 6, 11).

IOSEPH (יְהוֹשֻׁעַ, Ἰωσήφ). 1. Filius Ia-

col ex uxore praedilecta Rachel, quae eum post longiorem sterilitatem peperit dicens: abstulit Deus opprobrium meum; et vocavit nomen eius Ioseph dicens: addat יסף mihi Dominus filium alterum (Gen. 30,23). Genitus a patre sene ex uxore praedilecta patri maxime carus erat; unde invidiam fratrum Ioseph non effugit, quam narratis somniis, quibus praecellentia eius portendi videbatur, etiam magis auxit. Praeterea patrem de quorundam fratrum crimine certior reddiderat; quare molestum censorem et somniiorem Madianitis mercatoribus aromata in Aegyptum portantibus servum tradiderunt pretio viginti argenteorum accepto. In Aegypto Ioseph venditus est Putiphari (Peti-para, deditus deo solis, Phra; cf. *Ebers*, Aegypten und die Bücher Mose's 1868 p. 296), eunucho Pharaonis, magistro militum (Gen. 37,36); erat Putiphar dux vel princeps satellitum (*Ebers* l. c.), dux praetorianorum, qui simul erant lictores: ei suberant carceres (*F. de Hummelauer* in Gen. p. 331). Cum Ioseph optime rem administraret, mox ab hero constitutus est oeconomus et gubernator omnium bonorum domus (Gen. 39,4-6). Vocatur quidem Putiphar eunuchus, quod nomen est vel solius dignitatis et officii aulici, vel rei ipsius; minime insuetum erat etiam eunuchos habere uxores (cf. *Ebers* l. c.) et cum insuper in Aegypto mulieres magna uterentur libertate, narratio de pessimo mulieris tentamine minime a vero aliena est. Odio mulieris eiusque calumnia Ioseph mittitur in carcerem (Gen. 39,7-23), in quo tamen non tam captivus quam captivorum praepositus a principe carceris habebatur. Appellatur carcer בית סהר (LXX ἡ φυλακή) domus arcis; quod nomen solar aegyptiacum est (*Ebers* l. c. 319). Quae porro narrantur de somniis duorum aulicorum, plane expressa sunt ad mores Aegyptiorum in iis quae spectant ad officia aulica; somniis apud Aegyptios summam esse attributam vim ac significationem divinationis pariter certum est. Quod olim ex Herodoto 2,77 opponebatur nvas et vinum fuisse Aegyptiis ignota, monumentis aegyptiacis luculentissime re-

lutatur, in quibus vites cernuntur, viri portantes nvas, eas exprimentes etc. (*Ebers* p. 323 ss.).

Deo benigne disponente Ioseph explanatione somniorum Pharaonis ad summam evehitur dignitatem. Notandum est quanta accuratione singula ad morem aegyptiacum exhibeantur; ita v. g. quod Ioseph antequam coram rege appareat, tondeatur et vestes mutet. Consilium quod regi dederat ipse constitutus gubernator exsecutus est. Per septem fertilitatis annos ingens frumenti copia collecta est, qua per septem annos sterilitatis populus acri poterat. Fame in Palaestina quoque praevalente fratres Ioseph descendunt in Aegyptum frumentum empturi. Ioseph eorum indolem et animos explorat, sintne etiam tum invidia et aemulatione pleni, ideoque filium Benjamin a patre praedilectum quasi criminis reum coram illis sistendum curat eumque sibi in servum postulat aliis libere abire iussis. Fratres moribus esse emendatos agnoscens magna eos caritate fovet atque ut patrem ad se adducant et ut tota familia domicilium in terra Gessen capiat Ioseph efficit. Ipse fratribus crimini minime vertit quod olim in se peccaverant, sed in omnibus cernit suavem Dei providentiam; « pro salute enim vestra misit me Deus ante vos in Aegyptum; non vestro consilio sed Dei voluntate huc missus sum, qui fecit me quasi patrem Pharaonis et dominum universae domus eius et principem in omni terra Aegypti » (Gen. 45,5-9). Ioseph uxorem duxerat Aseneth (nomen derivatum a nomine deae Neith), filiam sacerdotis Heliopoleos, quae ei duos peperit filios, Manasse et Ephraim (Gen. 41,50-52). Tempore famis suppeditavit Ioseph Aegyptiis frumenta; sed cum illi iam non haberent quo emerent, suas possessiones vendebant et terra Aegypti cessit in possessionem regis; acceptis seminibus quantam partem messis regi dare debebant; « ex eo tempore usque in praesentem diem in universa terra Aegypti regibus quinta pars solvitur et factum est quasi in legem, absque terra sacerdotali quae libera ab hac conditione fuit » (Gen. 47,26).

Patri morituro promisit Ioseph fore,

ut cum sepeliret in sepulcro maiorum suorum; ad eum adduxit quoque filios suos duos, quibus Iacob benedixit et quos tamquam suos adoptavit (Gen. 48,5). Ipsi Ioseph quoque dixit: do tibi partem unam extra fratres tuos quam tuli de manu Amorrhæi [in gladio et arcu meo] (Gen. 48,22); cf. Gen. 33,19 et vide *F. de Hummelauer* p. 584. Quam carus Ioseph patri fuerit, maxime quoque ex benedictione Gen. 49,22-26 elucet. Mortuo patre cum fratres Ioseph timerent ne iniuriam olim acceptam ulcisceretur, cum patris nomine et auctoritate obsecrarunt, ut oblivisceretur sceleris; quibus animo commoto respondit eos consolans et divinam in rebus gestis providentiam prædicans (Gen. 50,15-21). Usque ad provectam aetatem centum et decem annorum vixit et vidit Ephraim filios usque ad tertiam generationem et filios Machir, filii Manasse, adoptavit. Demum, sicut patrem mortuum et aromatibus conditum magna pompa sepeliverat in terra Chanaan in spelunca duplici quam emerat Abraham, ita ipse postulavit a contribulibus suis, ut, si Deus eos adducturus sit ad terram quam iuravit patribus, ossa sua asportarent; id quod in exitu ex Aegypto factum esse legimus (Gen. 50,24; Ex. 13,19; Ios. 24,32); ossa enim eius sepelierunt in Sichem in parte agri quem emerat Iacob a filiis Hemor. Laudes Ioseph etiam Sapiens celebrat (Eccli. 49,17).

Præterea nomen Ioseph saepe usurpatur pro duabus tribubus Ephraim et Manasse, quae vocantur domus Ioseph (Ios. 17,17; 18,5; Iud. 1,22, 35; 3 Reg. 11,28), tribus Ioseph (Num. 13,11), filii Ioseph (Num. 1,10. 32; Ios. 14,4) vel etiam simpliciter *Ioseph* (Ez. 47,13). Et quia tribus Ephraim praesertim in regno decem tribuum potentissima erat et quasi dux, etiam populus Israel i. e. populus decem tribuum vocatur Ioseph (Ez. 37,16. 19; Am. 5,15; Zach. 10, 6 etc.); immo nomen Ioseph quandoque de toto populo electo dicitur, sicut domus Iacob, ita domus Ioseph (Abd. 18); ita filii Iacob et Ioseph, Israel et Ioseph (Ps. 76,16; 79,2).

I. KNABENBAUER.

2. Pater Igal, principis Issachar, exploratoris (Num. 13,8[7]).

3. Cantor ex filiis (seu posteris) Asaph (1 Par. 25,2).

4. Unus de filiis Bani, qui uxores alienigenas duxerant (Esdr. 10,42).

5. Princeps familiae sacerdotalis Sebeniae tempore Ioachim pontificis (Neh. 12,14).

6. Unus ex maioribus Iudith (Iudith 8,1).

7. Iosephus (Ἰώσηφος et Ἰωσήφ), filius Zachariae, belli dux, qui una cum Azaria duce apud Iamnia devictus est a Gorgia duce Syrorum (1 Mach. 5,18. 56. 60).

8. Iosephus (Ἰώσηφος) vocatur 2 Mach. 8,22; 10,19 nominis quadam mutatione frater ille Iudae Machabaei, qui alias Ioannes appellatur (cf. 1 Mach. 2,2; 9. 36. 38).

9. Unus ex maioribus Ioseph sponsi b. Virginis (Luc. 3,24).

10. Alius in eadem genealogia (Luc. 3,26).

11. Tertius in eadem genealogia (Luc. 3,30).

12. Unus ex « fratribus » Iesu vocatur Ioseph vel, ut alii habent, Ioses (Ἰωσήφ); mater eius est Maria uxor Cleophae (Matth. 13,55; 27,56; Marc. 6,3; 15,40. 47; cf. Ioan. 19,25).

13. Ioseph (Ἰωσήφ), sponsus b. V. Mariae, ex domo David, pater nutritius Iesu. Eius a David origo affirmatur Luc. 2,4 et duplici genealogia (Math. 1,1 ss.; Luc. 3,23 ss.), qua et pater Ioseph naturalis et pater legalis recensetur. Ita enim duplex illa genealogia commode explicatur etiam secundum documentum antiquum Iulii Africani qui illud ab ipsis Iesu cognatis traditum esse affirmat (vide s. v. GENEALOGIA et cf. *Mai*, Nova bibl. IV p. 231; *Migne* 10,53; apud *Eus.* Hist. eccl. 1,7; *M.* 20, 89; Quaest. ad Stephanum 4,2; *M.* 22, 901). Merito potest vocari et vocatur ab evangelista pater Iesu (Luc. 2,41. 48); nam Iesus erat genitus ex eius sponsa; insuper ut Iesus posset nasci ex virgine matre, ad id suavi providentia divina debuit Ioseph sua continentia contribuere; unde aliquo sensu exstitit causa originis Iesu, non causa physica, sed

quae moralis dici solet. De mysterio in sponsa facto ab angelo edoctus est. Dum de conditione sponsae dubius haereret, se praestitit virum iustum atque benignum. Sponsa de mysterio tacet; sponsus crimen sponsae subesse profecto non suspicatur; nam certe mores eius integerrimos habuit perspectos. Sed si vin passa est, cur tacet? quomodo res sit explicanda nescit. Quare id elegit, quo sibi et illi melius se consulere existimat. Nam si vin passa esset ante desponsationem, iam qui intulit tenebatur eam dotare et uxorem habere (Ex. 22, 16; Deut. 22, 28); si postea, etiam maxime consultum erat, ut ei plenam restitueret libertatem. Stricto iure poterat eam accusare, ut de sua conditione rationem redderet; at advertens sponsam ne sibi quidem velle rem pandere, abhorruit rem deferre; unde voluit occulte eam dimittere. Omnem dubitationem removit nuntius caelestis. Quo accepto sponsam in domum suam recepit. Quod aliqui putant Iosephum iam antea mysterium cognovisse, nequit admitti; pugnat enim cum narratione: noluit eam traducere, *δειγματίζει*; pugnat cum verbis angeli quibus edocetur de mysterio; et si nosset mysterium, summae imprudentiae fuisset eam occulte dimittere, neque cum ea scientia dici potuisset: noluit eam diffamare, in publicum sermonem efferre; vide de ea re plura apud *Knabenbauer* ad Matth. 1, 18 ss.

Ioseph habitavit in Nazareth artem exercens fabrillem; ut profiteretur in descriptione ascendit in Bethlehém. Nato Iesu et in templo praesentato videtur domicilium stabile fixisse in Bethlehém; nam rediit ex Aegypto, quo statim post magorum discessum angeli monitu perrexit cum matre et prole, voluit commorari in Iudaea; verum audiens quod Archelaus regnaret ibi, timuit illo ire et admonitus in somnis secessit in partes Galilaeae (Matth. 2, 22). Ultima eius mentio in evangelio fit, quando Iesus duodecim annos natus remansit in templo parentibus eius redeuntibus; inventus tandem in templo compellatur a matre: fili quid fecisti nobis sic? ecce pater tuus et ego dolentes quaerebamus te (Luc. 2, 48). Postea, dum Iesus post annum

trigesimum praedicaret, turbae quae-runt: nonne hic est fabri filius? Nonne mater eius dicitur Maria? et fratres eius et sorores eius, nonne omnes apud nos sunt? (Matth. 13, 55; Marc. 6, 3). Ita loquuntur, ut patrem iam obisse colligendum sit; neque obstat Ioan. 6, 42: nonne hic est Iesus filius Ioseph, cuius nos novimus patrem ac matrem (cf. 1, 43); immo cum Iesus moriens matrem commendet Iohanni, planum est neque Ioseph fuisse superstitem, neque alios matris filios unquam existisse.

14. Ioseph ab Arimathaea (Matth. 27, 57-60; Marc. 15, 43-46; Luc. 23, 50-53; Ioan. 19, 38-42), discipulus Iesu, at occultus propter metum Iudaeorum (Ioan. 19, 38), nobilis decurio, synedrii membrum, qui vir bonus et iustus non consenserat consilio et actibus reliquorum (Marc. 15, 43; Luc. 23, 50). Post mortem Iesu in cruce omnem excussit timorem; palam se proficitur discipulum Iesu; adiit Pilatum, petit corpus Iesu et simul cum Nicodemo corpus e cruce deponit illudque sindone involvit additis aromatibus et posuit illud in monumento suo novo quod exiderat in petra in horto suo prope locum crucifixionis, et advolvit saxum magnum ad ostium monumenti. Virum fuisse divitem, explicite Matthaeus commemorat (27, 57) et Messias sepulcrum fore apud divitem Isaias praedixerat (54, 9 hebr.). — Ceterum lege romana statutum erat, ut corpora damnatorum ad sepulturam concederentur cognatis vel amicis id petentibus (*Quintil.* declam. 6, 9; *Ulpianus*, digest. 48, 24, 1. De loco originis v. ARIMATHAEA.

15. Ioseph qui vocabatur Barsabas v. BARSABAS 1.

16. Ioseph vel Ioses (ut alia lectio habet) vocabatur quoque qui alias Barnabas cognominatus est ab apostolis (Act. 4, 36); vide s. v. BARNABAS.

IOSIAS (Ἰωσάκις, Ἰωσάαζ). 1. Filius Amon, rex Iuda; octo annos natus coepit regnare et annos triginta et unum regnavit. Erat rex vere pius, ita ut a Sapiente David et Ezechiae aequiparetur: « praeter David et Ezechiam et Iosiam omnes peccatum commiserunt » (Eccli. 49, 5). Contra idololatriam, quam

Manasses, avus eius, et Amon, pater eius, foverant, Iosias mox bellum movit : « octavo anno regni sui cum adhuc puer esset, coepit quaerere Deum patris sui et duodecimo anno mundavit Iudam et Ierusalem ab excelsis et lucis simulacrisque et sculptilibus » (2 Par. 34,3). Cultum Baal et Astarthes et aras et statuas destruere coepit et eliam cultum illum illegitimum Domini in excelsis exercitum abolevit. Neque solum in Iudaea scelera idololatriae extirpare studuit, « sed et in urbibus Manasse et Ephraim et Simeon usque Nephthali cuncta subvertit » (2 Par. 34,6). Ad quam morum instaurationem Deus ei suscitavit adiutores, Ieremiam prophetam, qui anno 13. regni eius ad munus propheticum vocatus fuerat (Ier. 1,2) et Sophoniam prophetam (Soph. 1,1). Sed simul ex orationibus prophetarum satis superque constat, maximam populi partem minime ex animo piis regis conatibus et studiis respondisse. Anno decimo octavo regni iussit pecunia collecta templum instaurare. Cum intimi templi recessus perlustrarentur, reperit Helcias sacerdos librum legis Domini per manus Moysi (4 Reg. 22,8; 2 Par. 34,14). Uti ex subsequentibus elucet, iste liber erat Deuteronomium, in quo scil. et praecepta de ritibus sacris et maledictiones et comminationes in violatores legis continebantur. Quae maledictiones cum rege audiente lectae essent, misit rex ad Holmam prophetissam, quae in verbo Domini edixit mala illa omnia esse ventura, verum propter regis pietatem non in diebus regni eius.

Uti rex lectione libri maxime commotus erat, ita quae ibi praecipiebantur in opus deducere ei cordi erat. Verba foederis coram populo legenda curavit et foedus cum Deo sollemni modo renovavit et vestigia omnia idololatriae contrivit et loca cultui impio sacra contaminavit (4 Reg. 23,1-20; 2 Par. 34,19-33). Dein celebratum est phase cultu Dei pristino splendore restituto (4 Reg. 23, 21-23), quod describitur 2 Par. 35,1-19. De foederis instauratione etiam loquitur Ieremias (11,1 ss.). Verum ne hunc quidem regis pii conatum potuisse inolitam multorum impietatem superare, pro-

phetarum querelis satis demonstratur.

Ipse Iosias in proelio contra Nechao, regem Aegypti, qui frustra eum ne iniret pugnam adhortatus erat, vulneratus est in campo Mageddo et reversus in Ierusalem obiit « et universus Iuda luxurunt eum et Ieremias maxime, cuius omnes cantores atque cantatrices usque in praesentem diem lamentationes super Iosiam replicant » (2 Par. 35,25; cf. 4 Reg. 23,29 ss.) et quantopere sors luctuosa pii regis celebrata fuerit per multas generationes, testimonio quoque est comparatio illa apud Zachariam 12, 11. Memoriam Iosiae suavem esse ac prorsus amabilem affirmat Sapiens : nomen Iosiae sicut incensum odoriferum, conditum, opus pigmentarii; memoria eius dulcis est sicut mel in palato et sicut cantus in convivio vini; quia doluit de aversionibus nostris et removit abominationes vanitatis (Eccli. 49,1-2 hebr.). Recensetur quoque in genealogia Christi (Matth. 1,10-11).

2. Vir Iudaeus, filius Sophoniae, cuius domum intrare iubetur Zacharias propheta (Zach. 6,10).

IOSPHIA (יֹסֶפִּיָּה, Ἰωσάφια) legitur Esdr. 8,10 : « De filiis Selomith filius Iosphiae et cum eo 160 viri » scil. cum Esdra de captivitate redierunt. Sed nomen proprium videtur omissum esse et cum LXX (cod. Alex.) et Syro legendum : De filiis Bani (Βανί) Selomith filius Iosphiae.

IOSUE. 1. Iosue (יְהוֹשֻׁעַ et Deut. 3, 21; Iud. 2,7 יהוֹשֻׁעַ; antea Osee, הוֹשֵׁעַ; Ἰησοῦς, antea Ἀδσῆ), filius Nun. Eius genealogia habetur 1 Par. 7,22-27. Nominis mutationem fecit Moyses, cum eum mitteret cum aliis ad explorandam terram (Num. 13,17), qua mutatione eum docuit omnem opis et salutis spem collocare in Iahwe.

Iam mox post egressum ex Aegypto Iosue virum fortem se praestitit iussus a Moyse pugnare contra Amalec (Ex. 17,19), vocatur minister Moysis (Ex. 24,13) et apud eum versabatur (Ex. 32, 17; 33,14; Num. 11,28). Simul cum Caleb restitit calumniis reliquorum exploratorum et admonuit populum, ut Do-

mino contisi terram occuparent (Num. 14,6-9). A Deo electus est successor Moysis : tolle Iosue filium Nun virum in quo est spiritus, et pone manum tuam super eum (Num. 27,18); coram universa multitudine et coram Eleazaro sacerdote a Moyse impositione manuum dux populi consecratus est (cf. Dent. 3,28). Iosue populum introducturum esse ipse Moyses declaravit populo (Dent. 31,3. 7) et ipse Dominus eum ea de re certiorum fecit (Dent. 31,23). Et post mortem Moysis Iosue, repletus spiritu sapientiae (Dent. 34,9), iussus est a Domino transire Iordanem (Ios. 1,2). Iosue castra movit de Setim (Ios. 2,1; 3,1) et transito modo miraculoso Iordane in Galgalis populus circumciscus est, ut signaculo foederis Deo consecrati iam inciperent occupare terram quam Dominus iis promiserat. Primo paschate in terra sancta celebrato (5,10) et urbe Iericho capta (6,1-27), misit Iosue partem exercitus contra Hai. Verum ob praevaricationem Achan prior haec expeditio male cessit; sed crimine expiato Hai expugnatur et in monte Hebal pronuntiantur benedictiones et maledictiones, ubi praeceperat Moyses (8,33). Illice denno edocetur populus, quibus conditionibus victoria certo contingat. Exinde satis celeriter variae urbes in parte meridionali captae sunt, Maceda, Lebna, Lachis, Gazer, Eglon, Hebron, Dabir; « percussit itaque Iosue omnem terram montanam et meridiamam atque campestem cum regibus suis, et percussit eos a Cadesbarne usque Gazam, omnem terram Gosen usque Gabaon » (10,10). Pari felicitate pugnavit Iosue contra plures reges ad aquas Merom (11,1 ss.) et bello per multum temporis protracto in variis terrae partibus Iosue percussit reges triginta unum (12,7-24).

Postquam istis victoriis firmam quandam in terra sedem populo collocavit, reliquum erat, ut regiones singulis tribubus sorte assignarentur. Id quoque negotii Iosue exsequendum curavit (13, 1 ss.). Assignatur Hebron in possessionem Caleb; tribubus Iuda, Ephraim, Manasse suae cuique partes dantur; de aliis eliguntur viri terni ad terram describendam et dividendam in partes

septem. Iosue autem coram Domino in Silo misit sortem divisitque terram filiis Israel excepta tribu Levi, cui nulla pars concedebatur, sed solum civitates 48 cum pascuis in variis regionibus et possessionibus aliarum tribuum; eodem modo civitates refugii separavit (14,1-21, 43). Rebus ita dispositis permisit ut milites tribuum Gad, Ruben et dimidia tribus Manasse, qui opem tulerant in expugnatione regionis cisjordanicae, revertentur ad suas possessiones transiordanicas, commendans illis accuratam legis Dei observationem (22,1 ss.).

Itaque complevit Iosue opus, ad quod electus erat a Domino. Introduxit populum in terram eamque tribubus divisit. Quae possessio ut firma redderetur ac stabilis, id unum praeprimis requirebatur, ut populus fidem Deo servaret. Quare Iosue nihil antiquius habuit quam ut ante mortem suam sollemni modo foederis cum Deo initum renovaret et praecepta Domini iterato populo inculcaret. Quare omnes tribus, i. e. principes et seniores et iudices congregavit in Sichem et commemoratis beneficiis a Deo acceptis omnes spoponderunt : Domino serviemus et obedientes erimus praeceptis eius (24,24). « Scripsit quoque omnia verba haec in volumine legis Domini » (24,26). Mortuus est Iosue anno vitae centesimo decimo et sepultus est in possessione sua in Thamnathsare in monte Ephraim a septentrionali parte montis Gaas. Praeclarum quoque testimonium redditur eius gubernandi rationi, cum dicatur : servivitque Israel Domino cunctis diebus Iosue et seniorum qui longo vixerunt tempore post Iosue (24,31).

2. Iosue (יוֹשֻׁעַ, יוֹשֻׁעַ), vir Bethsamites, in cuius agro constitit arca, quando a terra Philistinorum reducebatur in terram Iuda; ibi Bethsamitae conciderunt ligna plaustrum vaccaeque imposuerunt super ea holocaustum Domino (1 Reg. 6, 14. 18).

3. Iosue (יוֹשֻׁעַ, יוֹשֻׁעַ), princeps civitatis tempore Iosiae regis. Iste ad introitum domus suae habuit aram idololatricam, quae iubente rege destructa est (1 Reg. 23,8).

4. Iosue (יְהוֹשֻׁעַ Agg. 1,1 ss.; 2,2 ss.; Zach. 3,1 ss.; 6,11; sed יְהוֹשֻׁעַ in libris Esdr. et Neh.; LXX Ἰησοῦς), filius Iosedec, sacerdos magnus qui cum Zorobabel rediit in Iudaeam (Esdr. 2,2; Neh. 7,7; 12,1); in Vulgata vocatur Iesus in libris Aggaei et Zachariae prophetarum. Ex Esdr. 2,63 patet, eo tempore pontifici iam non concessum fuisse Dominum interrogare et accipere responsum per Urim et Thummim. Sed Dominus ei et Zorobabeli addidit prophetas, Aggaeum et Zachariam, a quibus in verbo Domini admonebantur, ut strenue opus Domini promoverent et templum aedificarent. Praeclara visione (Zach. 3,1) in Iosue munus sacerdotale ad pristinam revocatur dignitatem et sanctitatem actione symbolica, sordidis scil. vestibus depositis et suppeditalis splendidis. Ipse sacerdos summus declaratur vir portenti, figura scil. et typus illius, de quo promittitur: adducam servum meum German, i. e. Messiam. Instaurari itaque theocratiam eo fine indicatur, ut demum adducatur Messias, sacerdos summus in aeternum. Quomodo Iosue operam dederit ad cultum restituendum, scribitur Esdr. 3,28 ss.; 4,3; 5,2; strenue laboravit cum Zorobabel ad aedificandum templum. In eius quoque posteris remansit dignitas sacerdotii magni (Neh. 12,10. 11).

5. Iosue (יְהוֹשֻׁעַ, Ἰησοῦς, Ἰησοῦς), princeps familiae de cognatione Phahat Moab (Esdr. 2,6; Neh. 7,11).

6. Iosue (יְהוֹשֻׁעַ, Ἰησοῦς, Ἰησοῦς), princeps familiae sacerdotalis (Esdr. 2,36; Neh. 7,39), fortasse idem ac Iosue pontifex (v. IDAIA 1).

7. Iosue (יְהוֹשֻׁעַ, Ἰησοῦς, Ἰησοῦς), nomen familiae leviticae vel quorundam principum familiae, quae ex captivitate rediit (Esdr. 2,40; 3,9; 8,33; Neh. 3,19; 7,43; 8,7; 9,4.5; 12,8 Vulg. Iesua; 12,24). Descendebant filii Iosue, sicut etiam filii Cedmiel, quibuscum consociari solent, ab Odovia seu Oduia (v. ODUIA 3 et CEDMIEL).

8. Iosue (יְהוֹשֻׁעַ, Ἰησοῦς), unus de filiis Herem qui uxores alienigenas dimittere iussi sunt (Esdr. 10,31).

IOTA (יוֹתָא, Ἰωτά), urbs tribus Iuda, in tertia provincia montis (Ios. 15,35), sacerdotibus concessa (Ios. 21,16; hoc loco scribitur Ieta, יֶתָא, Τετα), sed 1 Par. 6,59[44] omitta. Tempore Eusebii et S. Hieronymi erat vicus pergrandis 18 mil. pass. ab Eleutheropoli ad australem plagam in Daroma (Onom. ed. Lag. 266,49; 133,10); cf. Notitia Dignit. ed. Böcking I. 79 et 353. Est hodiernus vicus Yuttā 10 km a Hebron meridiem versus (Riess, Bibel-Atlas ed. 3 p. 18; Survey of West. Pal. Mem. III. 310).

Relandus (Palaestina p. 870) suspicatur eandem commemorari Luc. 1,39 urbem Iuda (= Iuta) patriam Zachariae sacerdotis et S. Ioannis Baptistae; idem complures admittunt. Verum Guérin (Judée I. 87 ss. et cf. III. 206) dubia non spernenda contra hanc opinionem proponit et patriam S. Ioannis Baptistae agnoscere mavult in 'Ain Kārīn (Iosue 15,59 LXX Καρέμ) 6 km a Ierusalem occidentem versus, cuius nomen Christianis usitatum S. Ioannes in montanis traditionem adhuc vigentem exprimit. Plura de hac quaestione v. in Revue bibl. I. 1892 p. 107-109; III. 1894 p. 444; IV. 1895 p. 260-261.

IOZABAD, IEZABAD. 1. Iozabad (יְהוֹזָבָד, Ἰεζαβὰδ, Ἰωζαβὰδ), filius Somer seu Semarith mulieris Moabitidis, servus Iosae regis Iuda (4 Reg. 12,21[22]; 2 Par. 24,26); is cum alio servo Iosachar seu Zabad conspirans regem in lecto interfecit; v. IOAS 1.

2. Iezabad (יְהוֹזָבָד, Ἰωζαζαβὰδ) Gadarethites (vide s. v.), pugnator Beniaminita, qui David in Siceleg fugitivo se iunxit (1 Par. 12,4).

3. 4. Iozabad (יְהוֹזָבָד, Ἰωζαζαβὰδ, Ἰωζαζαβὰδ), duo ex principibus millium in Manasse, qui ante pugnam ad montem Gelboe Davidi se iunxerunt, cum ab Aphec tribus Issachar in Siceleg rediret (1 Par. 12,20).

5. Iozabad (יְהוֹזָבָד, Ἰωζαζαβὰδ), levita de filiis Core, filius secundus Obedom, unus ex ianitoribus ad australem portam templi (1 Par. 26,4. 15).

6. Iozabad (יְהוֹזָבָד, Ἰωζαζαβὰδ), dux

180 000 expeditorum millium in exercitu Iosaphat regis (2 Par. 17,18).

7. Iozabad (יִזְבָּד, 'Iwζαβᾶδ), levita tempore Ezechiae regis (2 Par. 31,13).

8. Iozabad (יִזְבָּד, 'Iwζαβᾶδ), unus ex principibus levitarum tempore Iosiae regis, cum sollemne pascha celebraretur (2 Par. 35,9).

IOZABED (יִזְבֶּד, 'Iwζαβᾶδ). 1. Levita, filius Iosue, adiuvans duos sacerdotes in appendendis argento, auro, vasibus templi ex Babylone allatis (Esd. 8,33).

2. Sacerdos de filiis Pheshur, uxorem alienigenam dimittere iussus (Esd. 10, 22).

3. Levita uxorem alienigenam dimittere iussus (Esd. 10,23). Probabiliter idem est qui nominatur Neh. 8,7 (LXX omitt.) inter levitas, qui silentium faciebant in populo ad audiendam legem, quam Esdras recitabat et Neh. 11,16 : unus ex principibus levitarum super opera, quae erant forinsecus in domo Dei, constitutus.

IRA (עִירָא). 1. Ira lairites sacerdos David (2 Reg. 20,26; LXX Ἰράς ὁ Ἰαρίν). Sacerdos latiore illo sensu dici videtur, quo 2 Reg. 8,18 etiam filii David sacerdotes vocantur. Forlasse recensendus est inter posteros Iair Manassitae (v. IAIR 1^a). De lectione Peshitta : Ira de Iathir diximus s. v. IETHER 6.

2. Ira Iethrites seu Iethraeus (2 Reg. 23,38; 1 Par. 11,40; LXX Ἰράς, Ἰρά; v. IETHRAEUS).

3. Ira, filius Acces de Thecua, inter Gibborim davidicos (1 Par. 11,28; LXX Ὠρά; idem 2 Reg. 23,26 et 1 Par. 27,9 scribitur in Vulgata Hira, LXX Ἰράς, Ὠδουράς).

IRAD (עִירָד, Ἰραδᾶδ), filius Henoch et pater Maviael (Malaleel) in genealogia Cainitarum (Gen. 4,18). Distinguendus est a Iared Sethita filio Malaleel et patre Henoch; de genealogia Cainitarum cum Sethitarum comparata cf. F. de Hummelauer, Comm. in Gen. p. 181-187.

IR HA-HERES appellatur in principio Is. 49,18 una de quinque civitatibus Aegypti, quae erunt loquentes lin-

gua Chanaan i. e. fidem terrae Chanaan amplectentes. Vulgata : civitas solis vocabitur una. Textus massorethicus legit **עִיר הַהָרָם** quam lectionem ex hebr. explicant urbem destructionis, alii ex arab. urbem leonis (Leontopolim), alii ex syr. urbem salutis; LXX πόλις ἀσθεῖα i. e. **הַצֶּדֶק**, urbs iustitiae. Sed vix dubium est, quin lectio genuina sit **עִיר הָהָרָם** eaque ex hebr. explicanda : urbs solis. Haec autem urbs solis non intellegitur urbs aliqua determinata, ut Heliopolis, sed sensus prophetae est : in coetu illo aegyptiaco quantumvis parvo paucarum urbium non deerit eximius religionis ac pietatis splendor. Cf. *Knabenbauer*, Comm. in Isai. I. p. 388-391; *L. Reinke* in Theol. Quartalschrift, Tübingen LII. 1870 p. 3-31.

IRIS. Post diluvium benedixit Deus Noe et filiis eius et statuit pactum suum cum iis, quod etiam valere debebat pro posteris, ut scil. nequaquam ultra interficiatur omnis caro aquis diluvii neque sit deinceps diluvium dissipans terram. Atque signum huius foederis pacis declaravit esse arcum in nubibus : Arcum meum ponam in nubibus et erit signum foederis inter me et inter terram; cumque obduxero nubibus caelum, apparebit arcus meus in nubibus et recordabor foederis mei vobiscum etc. (Gen. 9,8-16). Illo itaque arcu, iride, foedus et promissio misericordiae et gratiae declaratur. Unde in illa apparitione, qua Ezechiel prophetae Deus se foederis assertorem fidelem manifestat (Ez. 1,28), thronus et qui in eo sedet, iride eiusmodi circumdatur et pariter Apoc. 4,3 thronus circumdatur iride, quae similis est visioni smaragdinae. Angelus quoque Apoc. 10,1 descendit de caelo amictus nube et iridem habens quasi capitis ornamentum. — Pulchritudo eius laudatur Eccli. 43,12 : vide arcum et benedic eum qui fecit illum; valde speciosus est in splendore suo; gravit caelum in circuitu gloriae suae; manus Excelsi aperuerunt illum (hebr. manus Dei extendit eum; cum alia lectione in margine : manus non extendit). — Ceterum ex Gen. 9,13 ss. inferri nequit arcum,

iridem non potuisse antea existere; nam quae naturalia sunt, possunt in signum assumi et in symbolum irae vel gratiae Dei, sicut Gen. 3,14 in serpente habetur: super pectus tuum gradieris.

ISAAC (יִצְחָק, Ἰσαάκ), filius Abraham

et Sarae, pater Iacob et Esau. Nomen est a *risu* petitum, quod, ubi Isaac nasciturus praedicebatur, riserint tam Abraham (Gen. 17,17) quam Sara (18,12; 21,6). Acta Isaac traduntur Gen. 21 ss.; 24,1-28,9; 35,27 ss. Cf. 1 Par. 1,28. 34; Iudith 8,23; Eccli. 44,24-27; Matth. 1,2; Luc. 3,34; Act. 7,8; Rom. 9,7. 10; Gal. 4,28; Hebr. 11,9. 17 ss.; Iac. 2,21. Natus est hic Abrahae centenario e Sara nonagenaria pridemque sterili. In ipso benedicendae praenuntiabantur omnes gentes. Petente postmodum Sara, dimisit Abraham Agar ancillam cum filio Ismaele, ne hic demortuo Abraham primogeniti iura sibi vindicaret. Iubente posthaec Deo, ut Abraham filium Isaac tamdiu expetiturum tamque ardentem amatum immolaret, neque Abraham neque Isaac divino mandato repugnabant. Et Isaac quidem factus est typus Christi sponte pro peccatis mundi altare crucis subeuntis; angelus vero Abrahamum, ne filium districto gladio interimeret, cohibuit prioresque promissiones rursum confirmavit. Quadraginta annos natus Isaac uxorem duxit non Chananacam, sed Rebeccam filiam Bathuelis filii Nachor. Rebecca primum sterilis elapsis viginti annis peperit geminos, quorum prior egressus est Esau, posterior Iacob. Ille patri carior factus est venator, hic matris deliciae vitam egit pastoris. Isaac interim, quod pater eius fecerat, per varios Chanaanitidis tractus greges circumducebat, vitam agebat comparatione iam Abrahae quam Iacob quietam et aequalem. Praeter aliquas pastorum rixas pactumque cum Abimelech rege Gerarae initum vix quidquam ea habet narratu dignum. Uxorem inter Geraritae, uti Abraham Saram apud Aegyptios, sororem esse praetendit. Neque tamen ex his concludere fas est aut totam narrationem esse fictam, aut mutato nomine bis eadem narrari. Pastorum

quippe vitas esse uniformes, et iisdem angustiis easdem adhiberi excusationes, quis miretur? Isaac senescentis caligaverunt oculi. Vixit tamen usque ad aetatem 180 annorum, sepultusque est in sepulcro Abraham, in specu Machpela prope Hebron (Gen. 49,31).

Erat Isaac insignis patientia ac pietate. Typica ratio aetorum Isaac a S. Paulo indicatur. Agar serva, mater Ismaelis, et Sara libera, mater Isaac, sunt duo testamenta vel foedera i. e. eorum typi. Synagoga per Agar praefigurata serva est cum filiis suis, Ecclesia vero mater nostra per Saram praefigurata libera est cum filiis suis. Nos igitur liberae filii sumus, quia sicut Isaac non secundum carnem, sed secundum spiritum vi promissionis ab Ecclesia generamur et quia hac ratione generati iterum sicut Isaac, liberae filius, a servae filiis persecutionem sustinemus et cum eo ius ad hereditatem possidemus. Cf. Gal. 4,22-31 et *Cornely* ad h. l. — Typicam rationem sacrificii Isaac indicat S. Paulus Hebr. 11,19 celebrans fidem Abraham, qui filium suum Isaac et in parabolam (ἐν παραβολῇ) accepit.

ISAAR. 1. Isaar (יִצְחָר, Ἰσαάρε), levita, filius Caath filii Levi et pater Core (Ex. 6,18. 21; Num. 3,19; 16,1; 1 Par. 6,2. 18. 38; hebr. 5,28; 6,3. 23; quoad 6,23[7] v. AMINADAB 2; 1 Par. 23,12). Ab eo descendit familia Isaaritarum (Num. 3,27; 1 Par. 26, 23. 29), quorum princeps tempore Davidis erat Salemoth (1 Par. 24,22; Vulg. Isaari). Vulgata scribit Num. 3,19 Iesaar et 3,27 Iesaaritae.

2. Isaar (יִצְחָר, *Qeri* יִצְחָר cum Waw copulativo; *Sazar*), filius Assur patris Thecuac ex Halaa uxore (1 Par. 4,7).


ISAARI v. ISAAR 1.

ISAI (יִשָּׁי, Ἰσσαι; unde in Vulgata quoque Iesse Ps. 71,20; Eccli. 43,31; Is. 11,1. 10; Matth. 1,3; Luc. 3,32; Act. 13,12; Rom. 15,12), pater Davidis ex Bethlehem. Genus eius recensetur Ruth 4,18 et refertur ad Phares filium Iuda; prosapia erat nobilis, cum in ea enumerentur Nahasson, qui tempore Moysis

erat princeps tribus Iuda (Num. 1,7; 7,12) et Booz. Eius filii recensentur 1 Reg. 16,6 ss.: 1 Par. 2,43. Tempore Saulis familia Isai tamen non inter primarias reputabatur; nam David se vocat virum pauperem et tenuem 1 Reg. 18,23 et ipse David non sine contemptu quodam appellatur ab invidis et inimicis

filii Isai (1 Reg. 23,7; 2 Reg. 20,1; 3 Reg. 12,16; 2 Par. 10,16); quare etiam radix Iesse (Is. 11,1; truncus Iesse) declarat, Messiam oriundum esse ex conditione humili. — In tabella adiecta uncinis v. g. [Rahab] vel [Roboam] indicatur nomen coniugis.

TABELLA GENEALOGICA FAMILIAE IESSE.



ISAIAS (ישעיה, ישעיה, LXX ple-
rumque Ἰσαΐας). 1. Filius Amos, prae-
clarissimus prophetarum in diebus Oziae
(Azariae), Ioathan, Achaz, Ezechiae re-
gum Iuda (quos vide). Ad munus pro-
pheticum vocatus esse videtur ultimo
Oziae regis anno, insigni illa theophania
quam 6,1 describit et cuius mentionem
quoque facit Ioannes evangelista 12,41.
Cum in illa angelos audiret clamantes:
Sanctus, sanctus..., sollemne est apud
eum Iahwe appellari Sanctum Israel,
quod nomen ei in libro Isaiae 27 vicibus
inditur (13 in parte priore, 14 in altera).
Regibus Ozia et Ioathan regi conditio
quidem prospera erat (cf. 4 Reg. 14,22;

15,3. 34; 2 Par. 26,2 ss.; 27,2 ss.)
corruptionem morum longe lateque ser-
pisse iam reprehensionibus Osee et
Amos prophetarum panditur (Os. 4,15;
Am. 2,4 etc.) et Isaías in visione illa
anno ultimo Oziae habita omnem regni
gloriam cernit ruinae traditam: arbore
florente succisa non remanet nisi trunc-
cus, ex quo quasi semine sancto instau-
ratio oriatur (6,10-13), atque ex tempore
Ioathan propheta apparatus bellicum,
magnificentiam aedificiorum, luxum,
corruptionem principum, impietatem
multis exagitat (2-5). Poenae impietatis
et idololatriae quas annuntiaverat de-
volvi coepitae sunt versus finem regni

Ioathan (4 Reg. 15,37) et praesertim tempore Achaz regis impii, quo bello syro-ephraimitico magnae clades allatae sunt in regnum iudaicum. Achaz enim opem divinam oblatam sprexit et ad Theglathphalasar regem Assyriorum auxilium petiturus confugit, qui quidem hostes regni iudaici compescuit, at regnum quoque iudaicum tributis impositis afflixit (2 Par. 28,20; cf. Is. 7,17 etc.). Frustra conabatur propheta eum insigni auxilio divino promisso a foedere illo fatali prohibere, in poenam ei annuntiat et regiae domus ruinam (— Messias enim, praeclarissima stirpis davidicae soboles, in terra Israel, in paupertate adolescit Is. 7,14-16) et summam populi miseriam et terrae vastationem (Is. 7,17 ss.). Meliore successu propheta utebatur apud Ezechiam regem pium, qui populi mores ad veram pietatem et integritatem reducere studebat (4 Reg. 18,4; 2 Par. 29, 4 etc.). Ipse rex, monitis vatis obsecutus, in difficillima regni conditione, cum propter imminensem Sennacherib regis Assyriorum invasionem primores plerique ac principes foedus aegyptiacum et suaderent et appeterent, horum suasiones reiecit, minas Assyriorum sprexit et divinis fretus promissis urbem regionemque vidit e maxima calamitate ereptam (Is. 28-33; 36-37).

Liber Isaiae in duas partes maiores solet dividi. Priore continentur oracula quae res gestas tempore Ioathan, Achaz, Ezechiae spectant (1-37); altera parte, quae de exilio babilonico, de liberatione ex exilio et de liberatione et instauratione messiana agunt (40-66); praemittitur narratio de occasione qua vates exsilium babilonicum praedixit (38. 39). Quod in visione inaugurali ei ostensum est, id in oraculis accuratius per singula prosequitur; ex ea quippe visione derivatur norma illa in prologo statuta: Sion in iudicio redimetur, quae norma, uti ad Israel, ita demum ad orbem universum applicatur. Ostendit enim, quomodo iudicio divino omnis pompa et fastus et superbia deiiciatur oporteat, ut salus exsurgat messiana; idque exsequitur pro Israel (2-12) et pro reliquis quoque gentibus (13-27), et cum a cap. 28 et deinceps regem po-

pulumque doceat de invasione Assyriorum fide et spe divina superanda, iterum iudicio et cladi illi particulari subiungit promissionem salutis messianae (34. 35). Dein quod in priore parte saepius innuerat facta abductione populi theocratiaeque destructione (1,30. 31; 5,5; 6, 11-13 etc.) fore instaurationem messianam (2,2; 4,2; 6,13; 9,6; 11,1 etc.), id in altera libri parte videmus copiose explicatum. Descripta enim liberatione ex exilio et reditu in Palaestinam indicato se convertit ad liberationem alteram spiritualem (42,1-12) eiusque opus (49, 50. 53 ss.) et gloriam ac bona instaurationis messianae (60 ss.).

Nostro tempore multum discutitur quaestio de auctore partis alterius. Hic unum solum adnotasse sufficiat contra sententiam adeo hodie pervulgatam, partem eam tandem in fine exsilii babilonici esse conscriptam. Oracula enim de Cyro, eius victoriis, de liberatione ab ipso concedenda ita proponuntur, ut conceptis verbis asseratur annuntiationem factam esse diu antequam rei praedictae germina vel indicia adfuerint vel adfore cognosci potuerit; ad eam praedictionem diu ante eventum factam provocatur tamquam ad argumentum quo probetur Iahwe esse verum Deum, dum idola nihil tale unquam praestare potuerint. Atque talis pro Iahwe argumentatio septies cum emphasi repetitur (41,21-29; 43,9. 12; 45,21; 46,9; 48,5. 16). Iam talis loquendi et arguendi modus eo tempore, quo Cyrus iam partis victoriis imperio babilonico immineret, esset plane absurdus et blasphemus. Vates maxima indignatione invehitur in fraudes praestigatorum; iam quomodo fingi potest eum eadem fraude velle divinitatem Iahwe aliis persuadere? Immo neque concipi potest eum potuisse, etsi voluisset, eiusmodi fraudem committere. Nam qua fronte potuisset in fine exsilii oracula haec aliis proponere tamquam ab antiquo tempore praedicta? nonne et se et Deum tamquam deceptorem et mendacem aperte professus esset? nonne aequales eum risui et contemptui habuissent quippe qui vaticinia nemini antea cognita, a se recenter

edita tamquam iam dudum a Deo data vendere vellet?

Docendi genus Isaiae eximium esse cumque etiam eo principem esse inter prophetas omnes fatentur. Inter alia hoc iudicium fert *Lowth* (De sacra poesi Hebr. praelect. 21): « idem elegans et sublimis, ornatus et gravis, cum uberitate et copia, tum vi et pondere mirabilis ». Quam laudem ei, uti recentiores, ita veteres quoque abunde tribuebant (cf. *Cornely*, Introd. II. 2 p. 306; *Knabenbauer*, Comm. in Is. I. p. 40). Praeter librum quem habemus res gestas Oziae conscripsit, uti 2 Par. 26,22 explicito narratur. Eum quoque historiam Ezechiae regis litteris consignasse aliqui ex 2 Par. 32,32 collegerunt; at ibi dicitur res Ezechiae et beneficia accepta scripta esse in *visione* Isaiae, qui est titulus libri eius prophetici; quare nullus alius liber ea lectione indicari videtur.

Eum vixisse usque ad tempora Manasse regis et ab eo crudeli mortis genere esse interemptum i. e. serratum, teste S. Hieronymo est apud Iudaeos certissima traditio, « unde et nostrorum plurimi illud quod de passione sanctorum in epistula ad Hebraeos legitur *serrati sunt* (11,37) ad Isaiae referunt passionem » quos locos vide apud *Cornely* l. c. p. 310 et apud *Knabenbauer* l. c. p. 9.

Laudes eius ipsis s. litteris celebrantur: Isaías propheta magnus et fidelis in conspectu Dei... spiritu magno vidit ultima et consolatus est lugentes in Sion; usque in sempiternum ostendit futura et abscondita antequam evenirent (Eccli. 48,25-28). Et inter eius laudes haud ultimo loco referendum est, quod adeo frequenter ab ipso Christo et in scriptis apostolorum ad eius librum alluditur; nam, uti recte notat *a Lapide*, in Novo Testamento saepius citatur et auditur quam ceteri prophetae omnes simul iuncti; atque fere centies in libris Novi Testamenti vel aperte vel tacite ad eum remittitur.

1. KNABENBAUER.

2. Isaías, filius Rahabiae (1 Par. 26, 25) v. IESIAS 4.

3. Filius Athaliae de filiis Alam vel

potius Aelam (v. AELAM 4), princeps, qui cum 70 viris Esdra duce ex captivitate rediit (Esdr. 8,7; cod. B Ἰοσειά).

4. Levita de stirpe Merari, qui Esdra duce ex captivitate rediit (Esdr. 8,19; B Ὠσαλς).

5. Beniaminita, incolae Ierusalem post instaurationem (Neh. 11,7; Ἰεσσα, Ἰεσσα).

Idem nomen hebr. gerunt, qui in Vulgata scribuntur IESEIAS et IESIAI.

ISARI (יִשָּׂרִי, Ἰσαρη), princeps quartae classis cantorum tempore Davidis (1 Par. 25,11). Idem appellatur 1 Par. 25,3 Sori (סָרִי, Σορι), unus de filiis Idithun.

ISBAAL (יִשְׁבָּאֵל, Ἰσβαάλ, apud *Swete* B Ἰεζά, A Ἰσβαάλ), sacerdos, cui decima quarta sors in ministerio Domini a Davide designata est (1 Par. 24,13).

ISBOSETH (אִישֶׁת-בִּשֵׁת, Ἰσβοσέθ) 2 Reg. 2.8-4,12 idem est, qui 1 Par. 8, 33; 9,39 nominatur Esbaal (אִשְׁבָּעַל, Ἀσβαάλ) i. e. vir-Baal, filius quartus regis Saul, uti videtur (cf. 1 Reg. 14,49) natu minimus, qui non interfuit exitiali in monte Gelboe proelio (1 Reg. 31,2; 1 Par. 10,2) aut certe fuga ex illo se proripuit. Nomini idoli בִּשֵׁת pie substituta est vox בִּשֵׁת « ignominia », itaque

Esbaal factus est Isboseth, similiter atque Meribbaal (1 Par. 8,34; 9,40) factus est Miphiboseth (2 Reg. 4,4). Esbaal igitur quadragenarius post mortem Saul ab Abner, principe exercitus, renuntiatus est rex in Mahanaim trans Iordanem super Benjamin omnesque tribus septentrionales et orientales. De bello, quod tum actum est inter Abner et David v. ABNER. Aegre tulit Esbaal, quod Abner rem habuerit cum Respha, quae fuerat concubina Saul: Abner vero, reprehensionem indigne ferens, pacem cum David quaerebat. Hic tamquam primam pacis conditionem ab Esbaal repetiit uxorem suam Michol, quam per iniuriam Saul alteri viro concesserat. Ceterum actionem de pace abruperunt nex cum Abner a Ioab patrata, tum ipsius Isboseth per duos suarum par-

tium homines effecta. Fuerat is rex bien-
nis, vir imbecillae indolis, quo mortuo
breui David ab omnibus rex agnitus est.

ISCARIOTES (Ἰσκαριώτης, Ἰσκαριώθ),
cognomen Iudae (v. IUDAS 8) proditoris
(Matth. 10,4; 26,14; Marc. 3,19; 14,10.
43; Luc. 6,16; 22,3; Ioan. 6,72; 12,4;
13,2. 26; 14,22) i. e. אִישׁ קְרִיּוֹת = vir
Carioth, oriundus ex Carioth urbe in
meridie (Negeb) Iuda (Ios. 13,25 et v.
CARIOTH 1). Confirmatur haec explica-
tio eo, quod Ioan. 6,71 in cod. A* et in
aliquibus minusculis codicibus scribitur
απο καρωτου, quae eadem forma reperit-
ur in codice Bezae (cantabrigiensi D
saeculi 6.) ad Ioan. 12,4; 13,2. 26; 14,
22. Sicut igitur apud LXX 2 Reg. 10,6. 8
ex dictione אִישׁ מִדֵּבַר i. e. viri (ex) Tob
ortum est Ἰστοβ (v. ISTOB), ita apud
Graecos dicitur Iscariotes pro Cariothes.
Etiam in codicibus versionis Italiae legi-
tur quandoque: carioth, scarioth,
scariothes; cf. *Knabenbauer* ad Matth.
10,4, qui alias quoque explicationes
commemorat ac refutat.

ISHHOD (אִישֶׁהוֹד, Ἰσοδός), filius Ma-
chir ex Molecheth (Vulgata: regina) ge-
nitus (1 Par. 7,18); sed Vulgata eius
nomen reddit: Virum decorum.

ISH SECHEL (אִישׁ שֶׁכֶּל i. e. vir in-
tellegentiae, LXX ἀνὴρ σακέων), unus ex le-
vitis, quos Esdras ab Ahava fluvio secum
in Ierusalem adduxit (Esdr. 8,18); in
Vulgata eius nomen redditur: vir do-
ctissimus.

ISMAEL, ISMAHEL (יִשְׁמָעֵאל i. e.
Deus exauditi; Ἰσμαήλ).

1. Filius Abrahae, quem 89 annos nato
peperit Agar, ancilla Sarae, Aegyptia.
Ita quippe Sara fide infirmior et natura
sterilis putavit semen promissum esse
procurandum. Tredecim annorum puer
cum universa domo Abrahae circumci-
ditur. Et Ismaeli quidem numerosa
posteritas promittitur, pactum vero et
promissiones messianicae filio a Sara
generando reservantur. Ablactato Isaac
eiicitur Agar cum Ismaele. Quos ange-
lus in deserto confortat. Habitavit Ismael
in deserto Pharan duxitque uxorem
aegyptiam. Eius posteritas Gen. 23,12-

18 enarratur. Vixit ad aetatem 137 an-
norum. Cf. Gen. 16; 17,18. 20. 23. 26;
21,9-21; 25,9; 1 Par. 1,28 ss.

2. Filius Nathaniae, filii Elisama, de
stirpe regia Iudaeorum, unus eorum qui
contra Nabuchodonosor dimicaverant,
sed postea Godoliae, eius in Iudaea prae-
fecto, se iunxerant. Incitatus a Baalis,
rege Ammonitarum, tres menses post
destructam Ierusalem Godoliam Masphae
dolo interemit cum Iudaeis et Chaldaeis,
qui cum ipso erant; secundo die post
octoginta viros de Sichem, Silo et Sa-
maria, qui religionis causa adventabant,
trucidavit. Persequentibus iis, qui Go-
doliae adhaeserant, fugit ad Ammonitas.
Cf. 4 Reg. 25,23. 25; Ier. 40 ss.

3. Filius Asel de stirpe Ionathae filii
Saul (1 Par. 8,38; 9,44).

4. Pater Zabadiac ducis in domo Iuda
tempore Iosaphat regis (2 Par. 49,11).

5. Filius Iohanan, unus e centurioni-
bus, quos adscivit Ioiada pontifex, ut
Athaliae tyrannidem convelleret (2 Par.
23,1).

6. Sacerdos e familia Pheshur (Phas-
sur); duxerat is uxorem alienigenam
(Esdr. 10,22).

ISMAELITAE, ISMAHELITAE
(יִשְׁמְעֵלִי, Ἰσμαηλίται), Gen. 25,13-15

recensentur duodecim tribus ab Ismaele
derivatae: Nabaioth, Cedar, Adbeel,
Mabsam, Masma, Duma, Massa, Hadar,
Thema, Iethur, Naphis, Cedma (v. s. vv.),
qui scribuntur incoluisse ab Hevila
usque ad murum, qui Delta aegyptiacum
defendit Asiam versus. Ismaelis posteri
credendi sunt aliis tribubus, quae per
desertum negotiationem et rapinas
exercebant, plurimum esse permixti;
unde iidem Madianitae audiunt, qui et
Ismaelitae Gen. 37,25. 28. 36; 39,1; Iud.
8,3. 24. Cf. Iudith 2,13. Componuntur
cum Idumaeis Ps. 82 [83],7. Cf. etiam
Gen. 28,9; 36,3; 1 Par. 2,17; 27,30. Is-
maelitas se esse gloriantur Arabes, at
certe non omnes ab eo derivantur.

ISMIEL (יִשְׁמִיֵּאל, Ἰσμαήλ), unus ex
tredecim principibus cognationum Si-
meon, qui tempore Ezechiae regis
pascua Gador occuparunt (1 Par. 4,36).

ISRAEL (יִשְׂרָאֵל, Ἰσραήλ). 1. No-

men Israel, quod Iacob inditum est ab angelo (Os. 12,3. 4), qui ad vadium Iacob cum eo luctabatur. Cum Iacob superari non posset et angelo dicenti : « dimitte me » respondisset : « non dimittam te nisi benedixeris mihi », angelus nomen eius in posterum fore Israel ait, quia pugnasti cum Deo (כִּי שָׁרִיתָ עִם אֱלֹהִים); quo nomine indicatur Iacob maximo desiderio benedictionem Dei efflagitasse eamque quasi ab invito impetrasse nec difficultatibus molestiisque obiectis animum despondisse. Talis itaque animus qui fortis est cum Deo (Vulg. Gen. 38,28 contra Deum) et vehementi studio bona Dei sibi acquirere adnititur neque obstaculis frangitur, eo nomine declaratur. Quare ab ea significatione non abest bellator Dei, neque quod alii interpretari malunt : Deus regnat; nam ut Deus vere regnet et dominetur in homine, homo forti animo Deo adhaerere debet; vel potius : tum demum Deus revera in terris regnare dicitur, si totum hominis studium ad Deum dirigitur. Nomen vero hoc patriarchae inditum est, ut sit in monumentum et exemplum posteris, qui scil. exemplo patris discant forti conatu beneficia Dei sibi acquirere, et ipsa nominis memoria edoceantur quanta constantia et fortitudine et patriarcha egerit et sibi agendum sit, ut bona regni Dei percipere mereantur. Quae nominis Israel ad posteros habitudo innuitur Gen. 35,10. 11. Ilac nominis impositione facta et Iacob eo appellatur 35,21 (hebr.); 37,3. 13; 43,6. 8 (hebr.). 14; 45,28 (hebr.) etc. et posteri eius vel filii Israel vel Israel vocantur. Ex nominis occasione et significatione consequitur nomen hoc referri ad honorem, et eo designatur populus a Deo electus, in quo Deus regnum suum constituit; quare iure merito apostolus Christifideles nuncupat Israel Dei (Gal. 6,6).

2. Regnum Israel. Artiore significatione Israel dicitur tempore regum de regno septentrionali decem tribuum, quae post mortem Salomonis se separarunt a domo David et duce Ieroboam regnum distinctum a regno Iuda constituerunt, quod regnum Israel vocari

solet (cf. 3 Reg. 12, 1 ss.). Quae separatio quo redderetur firmior, Ieroboam duo erexit sanctuaria in Bethel et Dan, in quibus imagine vitulorum, uti olim in deserto, numen colebatur; praeterea sacerdotes constituit de plebe, fecit fana in excelsis, instituit sollemnitatem mense octavo (3 Reg. 12,26 ss.). Sacerdotes aaronitici et levitae ditione novi regni relicta in regnum Iuda migrarunt et etiam de populo non deerant qui in Ierusalem ascenderent Dominum adoraturi (2 Par. 11,13-16). Quae tamen separatio regno Israel non erat saluti. Deus enim elegerat David eiusque domum (2 Reg. 7,14), elegerat Ierusalem, ut ibi sanctuarium existeret (cf. 3 Reg. 9,3); quare qui recedebant a domo David, etiam a foedere et regno Dei recedebant. Atque regnum Israel fere continuo in peiore erat conditione quam regnum Iuda. In eo enim multo magis idololatria et vitia ei coniuncta grassabantur, contra quae prophetae, uti Elias, Eliseus, Osee, Amos pugnabant quidem, verum haud multum proficiebant. Praeterea regnum hoc crebris agitabatur seditionibus; ita iam Baasa insidias struxit Nadab filio Ieroboam eumque interfecit et omnem domum Ieroboam percussit et delevit (3 Reg. 15,27) et contra filium Baasa Ela rebellavit Zambri eumque occidit et omnem eius domum delevit; verum Zambri bello oppressus mox succendit se cum domo regia et regnum divisum est per aliquod tempus in partes duas (3 Reg. 16,16-23). Domus Achab, idololatria et iniustitiis facinorosa deleta est a Iehu (4 Reg. 9, 23 ss.); domus Iehu quoque in quarta generatione, in Zacharia rege percussa est a Sellum (4 Reg. 15,10), Sellum interfectus a Manahem; contra filium Manahem, Phaceiam, coniuravit Phacee, contra Phacee coniuravit Osee (4 Reg. 15,14. 25. 30).

Praeter bella haec interna ab externis quoque hostibus regnum Israel impetebatur. Ab initio regni pugna erat inter Iuda et Israel : fuit bellum inter Roboam et Ieroboam cunctis diebus; bellum erat inter Asa et Baasa regem Israel (3 Reg. 14,30; 15,6. 16. 32). Dein Israel oppugnabatur a Syris, contra quos

Baasa, Achab, Ioram, Iehu, Ioachaz, Ioas, Ieroboam II. dimicabant (3 Reg. 15,20; 20,21 ss.; 4 Reg. 6,8 ss.; 10,32; 13,3. 23; 14,28). Uti ex monumentis assyriacis didicimus, Achab devictus est a Salmanassar II. in pugna apud Kar-kar; eidem regi Iehu solvit tributum. Etiam cum Philisthaeis et Moabitis bella gerebantur (cf. 3 Reg. 15,27; 16, 15; 4 Reg. 3,7 ss.). Demum regnum Israel multum afflictum est ab Assyriis (4 Reg. 15,20), oppida capta, incolae abducti (15,29), donec regnum ab iis est destructum (4 Reg. 17,4 ss.); « iratus est Dominus vehementer Israeli et abstulit eos a conspectu suo » (17,18). Cur autem abiecti sint, sacer auctor pluribus prosequitur 4 Reg. 17,7-22; scelera regni huius Ezechiel graviter perstringit sub nomine Oolla 23,5-10 et varia quoque reprehendunt Osee et Amos.

Urbs regia primo erat Sichem, in qua Ieroboam habitavit (3 Reg. 12,25), deinde Thersa a Ieroboam I. usque ad Amri (3 Reg. 14,17; 15,21. 23; 16,6. 8. 9. 15. 17); Amri ibi regnavit sex annis (3 Reg. 16,23), dein extruxit Samariam; Achab saepius versabatur in Iezrahel (3 Reg. 18,45; 21,1 ss.), ubi Iezabel quoque periit (4 Reg. 9,30). Conditio regni labilis, uti crebris regum caedibus significatur, ita ipsa quoque mutatione urbis regiae innuitur. Corruit tandem anno 722 a Chr.; abductis Israelitis in terram Assyriorum homines de Babylone, Cutha, Avah, Emath, Sepharvaim in civitatibus Samariae collocati sunt (4 Reg. 17,24; cf. Esdr. 4,10). Ceterum singula vide sub nominibus regum: Ieroboam, Nadab, Baasa, Ela, Zambri, Amri, Achab, Ochozias, Ioram, Iehu, Ioachaz, Ioas, Ieroboam II., Zacharias, Sallum, Manahem, Phaceia, Phacee, Osee, et vide de ratione temporis s. v. CHRONOLOGIA II. 1 in vol. I. col. 900-909. Regnum Israel quandoque nominatur a tribu potentissima Ephraim (vide s. v.).

ISREELA v. ASARELA.

ISSACHAR (יִשָּׂשכָר, *Qeri* perpetuum יִשָּׂכָר; Ἰσασάαρ, Flav. Iosephus: Ἰσασάαρης, Ἰσαάαρης, et (tribus) Ἰσασάρις.

1. Issachar filius nonus Iacob patriarchae et quintus ex Lia genitus (Gen. 30,17.18). Tempore descensus in Aegyptum quattuor filii ei adscribuntur Thola, Phua, Iasub, Semran, a quibus descendunt familiae Tholaitarum, Phuaitarum, Iasubitarum, Semranitarum (Gen. 46, 13; Num. 26,23. 24; 1 Par. 7,1).

Interpretatio nominis Issachar continetur verbis Liae Gen. 30,18: Dedit Deus mercedem mihi (יִשָּׂכָר mercedem meam), quia dedi ancillam meam (Zelpham) viro meo appellavitque nomen eius Issachar (*Kethib* secundum pronuntiationem Eliae Levitae יִשָּׂכָר ortum ex יִשָּׁ = est merces). Aliam interpretationem innuit *Qeri* perpetuum quod effferri iubent יִשָּׂכָר i. e. qui data mercede emptus seu acquisitus est, quo alluditur ad priora verba Liae 30,16: Ad me intrabis (Iacob), quia mercede conduxi te pro mandragoris filii mei. Cf. *Gesenius*, Thesaur. p. 1331. — Inter locos Genesis a Ben-Asher et Ben-Naftali diverse punctis signatos affert *Seligm. Baer* (Liber Genesis, 1869 p. 84) etiam 30,18 Ben-Naftali: יִשָּׂכָר et adnotat: « Ex utriusque sententia pronuntiandum יִשָּׂכָר, sed inter se dissident eo, quod haec lectio secundum Ben-Asher *Qeri* quod dicitur perpetuum est. Sunt vero qui Ben-Naftali יִשָּׂכָר (*affert praemium*) sicut Mosen ben-Mocha יִשָּׂכָר legisse putent. At certe de Ben-Naftali falluntur ».

2. Issachar tribus Israel. Sors tribus Issachar describitur Ios. 19,17-23, quam finium descriptionem *F. de Hummelauer* (Comm. in Ios. p. 424) his verbis exponit: « De Issachar nonnisi fragmenta supersunt. Annuntiatur v. 17. 18^a descriptio termini. Sequitur vero v. 18^b-21 non descriptio termini, sed elenchus aliquis urbium cuiusdam provinciae, sua carens summa. Quem excipiunt fragmenta duo descriptionis termini. Sequitur summa urbium provinciae cuiusdam atque v. 23 consueta clausula » scil. « Haec est possessio filiorum Issachar per cognationes suas, urbes et viculi

earum ». Possunt tamen termini Issachar aliquatenus delineari partim ex ipso textu 19,17-23 partim ex descriptionibus aliarum tribuum contiguarum. Occidentem tribus Issachar attingunt Aser et Manasse, meridiem Manasse, orientem Iordanis, septentrionem Zabulon et Nephthali (i. e. pagus commutatorius Nephthalitis concessus inter montem Thabor, Iordanem et lacum Tiberiadis, v. NEPHTHALI 2 et cf. tabulam geogr. Chanaan tributim descripta, vol. I. col. 828-9). Ex Deut. 33,18. 19 autem inferri nequit Issacharitas ipsum mare (Mediterraneum vel Tiberiadis) attigisse; dicuntur enim affluentiam marium sugere, qui in litore vel etiam haud procul a litore incolentes mercibus mari advectis ditantur (cf. *F. de Hummelauer*, *Comm. in Deut.* p. 534).

Flavius Iosephus (*Ant.* V. 1,22) longitudinis terminum indicat Carmelum montem et Iordanem, latitudinis autem Itabyrium montem (Thabor); terminum Issachar meridionalem ex Iosepho vix discere poterimus, quoniam i. e. statuit Ephraim usque ad campum magnum (planitiem Esdrelon?) extendi (v. EPHRAIM 2). Comprehendebat igitur Issachar magnam partem planitiei Esdrelon, descensum meridionalem montis Thabor, Hermon minorem, montes Gelboe. Urbes Issachar recensentur sedecim cum viculis suis (Ios. 19,22), quibus addenda est Dabereh ex catalogo quattuor urbium leviticarum Issachar (Ios. 24,28. 29; 1 Par. 6,72). Praeterea intra fines Issachar erant aliquae urbes manassaeae: Bethsan, Ieblaam, Endor (sed v. ENDOR), Thenac, Mageddo (Ios. 17,11; Iud. 1,27; 1 Par. 7,29).

Fertilitas territorii Issachar erat hodieque est maxima. Occidentem versus ab urbe Iezrael extenditur planities Esdrelon, cuius ipsum nomen Iezrael (i. e. Deus sevit) sementem Dei benedictionibus affluentem indicat; ab eadem urbe orientem versus allera vallis patescebat in campum magnum Scythopolis (Bethsan), qui ob fertilitatem suam rabbinis audiebat ostium paradisi (v. BETHSAN). Ad hanc territorii fertilitatem alludunt Iacob in benedictione sua: Issachar asinus fortis (hebr. asinus

ossis) accubans inter terminos; vidit requiem quod esset bona et terram quod optima (Gen. 49,14. 15) et iterum Moyses: Lactare Issachar in tabernaculis tuis (Deut. 33,18). Hisce iam indoles agrestis Issacharitarum satis innuitur; erant ruricolae. Divitiis etiam ad mercaturam adducebantur (Deut. 33,19). Ex ea aulem indole simul vituperium intellegitur, quod Iacob moriturus de Issachar addit: Et supposuit humerum suum ad portandum factusque est tributis serviens (Gen. 49,15) i. e. luxuria terrae contenti iugum Chananaeorum non excutiant. Verum aliam interpretationem Gen. 49,15 proponit *E. Seydl* (*Katholik LXXX.* 1900 II. p. 347) Issacharitas fuisse conductores mercium in *via maris* vehendarum.

Historia tribus Issachar paucis absolvitur. Princeps tribus anno secundo egressionis ex Aegypto erat Nathanael filius Suar (Num. 1,8). Apud montem Sinai de Issachar numerabantur 54 400 viri bello apti (1,28. 29), postea in castris Moab 64 300, qui numerus a solis tribubus Iuda et Dan superabatur (26,25; cf. 26,22. 43). In castris Issachar cum Iuda et Zabulon ad orientem tabernaculi erat (2,5); eadem tribus in ordine itineris primo loco proficiscebantur (10,13-16). Oblationes Nathanael principis Issachar in dedicationem altaris factae sunt die secundo statim post oblationes Iuda primo die factas (7,18-23). Inter duodecim exploratores a Moyse in terram Chanaan missos de tribu Issachar erat Igal filius Ioseph (13,8), inter viros ad terram promissam sorte dividendam electos Phaltiel filius Ozan (34,26). Post ingressum in terram promissam Issachar cum Simeon, Levi, Iuda, Ioseph (Ephraim et Manasse), Benjamin benedictionem in monte Garizim pronuntiavit (Ios. 8,33. 34), ut Moyses mandaverat (Deut. 27,12). Ab hoc tempore coniunctio Issachar cum Iuda cessat (exemplis duobus occasionibus infra notandis), cum tribu vicina Zabulon perdurat.

Sine dubio Issacharitis certamina subeunda erant cum Chananaeo. Mirum quidem videri potest, quod inter tribus, quae Chananaeum non deleverunt, Is-

sachar non recenseatur (Iud. 1,19-36); attamen urbes manassaeae Bethsan, Ieblaam, Thenac, Mageddo, ex quibus Chananaeus non est expulsus (Iud. 1,27), sitae erant intra fines Issachar coepitque Chananaeus habitare in terra illa (hebr., LXX, Syr., Chald.). Huius regionis subigendae specialis erat difficultas; per eam enim viae mercatorum ab Aegypto Damascum versus et a Iordane ad sinum Ptolemaidis (Accho) ducebant, unde Chananaeorum intererat, ne hac regione exclusi mercaturae lucris privarentur. In Issachar iuxta aquas Mageddo i. e. iuxta torrentem Cison Debbora et Barac insignem victoriam de Asoritis reportarunt (Iud. 3,19) nec defuerunt in certamine principes Issachar (3,13). Unus ex iudicibus minoribus in Israel erat Thola filius Phua vir de Issachar, qui 23 annis iudicavit in Samir montis Ephraim ac proinde extra tribum suam in finibus Ephraim ibique sepultus est (10,1. 2); duo nomina Thola et Phua fuerant nomina duorum filiorum Issachar patriarchae (Gen. 46,13; 1 Par. 7,4); a quibus malis vel hostibus hic index Israel salvaverit, nescimus; a Flavio Iosepho (cf. Ant. V. 7,6) omittitur. Post interitum Isboseth filii Saul, cum David in Hebron ab universis tribubus rex agnosceretur, aderant de filiis Issachar viri eruditi, qui noverant singula tempora ad praecipiendum, quid facere deberet Israel, principes ducenti, quorum prudenti iudicio ac consilio tota tribus permota est, ut Davidi adhaereret (1 Par. 12,32. 40; cf. 2 Reg. 3,1 ss.); illam eruditionem fuisse astronomicam et astrologicam (ut volunt Chaldaeus, rabbini, *Clericus*) in textu non innuitur neque illud quod Flav. Iosephus contendit: adfuisse ducentes futurorum praescios et armatorum 20000 (Ant. VII. 2,2). Versus finem regni davidici numerabantur de Issachar 87000 viri bellatores (1 Par. 7,1-3). Circa hoc tempus princeps tribus erat Amri filius Michael (1 Par. 27,18; cf. 7,3); suspicantur aliqui hunc Amri fuisse progenitorem domus Amri regis Israel, cuius opinionis indicium utique nullum adest. Secundum traditionem antiquam Iudaeorum viris sapientibus Issachar accensendus est Amasias filius

Zechri, tempore Iosaphat regis Domino consecratus cum 200 000 virorum fortium (2 Par. 17,16; cf. Ps. - *Hieron.* Qu aest. hebr. in h. l.). Issacharitae erant Baasa eiusque filius Ela reges Israel (3 Reg. 15,27; 16,8). Eiusdem tribus fuisse creditur Eliseus propheta, cuius patria erat Abelmehula (vide s. v.). Unionis pristinae inter Issachar et Iuda redintegratio facta est, quando Ezechiae regi omnem Israel et Iuda Hierosolyma convocanti Issachar quoque aures praebuit ac sollemnitatem paschalem cum universo populo celebravit (2 Par. 30,18). Accedit mentio Issachar in descriptione symbolica terrae sanctae et Ierusalem novae Ez. 48,23. 26. 33 et in Apoc. 7,7.

3. Issachar levita, septimus filius Obdedom, ianitor templi (1 Par. 26,3).

ISTEMO urbs v. ESTHAMO.

ISTOB (אִישׁ בִּרְבִּי, Ἰστωβ; *Flav. Ios.*

Ant. VII. 6,1 Ἰστωβος scil. βραχελός), regnum aramaicum, quod cum aliis regnis aramaicis Soba, Rohob, Maacha et cum Ammonitis foedus inierat contra Davidem (2 Reg. 10,6. 8); sed Aram et Ammon a Ioab et Abisai devicti sunt prope Medabam in tribu Ruben (cf. 1 Par. 19, 6. 7; in hoc textu omissa sunt nomina Rohob et Istob). Omnes quidem versiones et Flavius Iosephus l. c. Istob unam vocem exprimunt; attamen textus hebraeus verti potest: viri Tob. Unde permulti censent intellegi regionem Tob (Iud. 11,3. 5), quae eadem esse creditur ac Tubin (1 Mach. 5,13) seu regio Tubianaeorum (2 Mach. 12,17) in Galaad. Ex locis citatis Istob quaerenda est inter Ammonitidem et Syriam. De situ Tob vide s. v.

ISUHAIA (יִשְׁחַיָּה, Ἰσσοῦα), unus ex tredecim principibus cognationum Simeon, qui tempore Ezechiae regis pascua Gador occuparunt (1 Par. 4,36).

ITALIA (Ἰταλία). In Vulgata Num. 24,24 et Ez. 27,6 legitur Italia pro Cethim (vide s. v.), praeterea Is. 66,19 pro Thubal (vide s. v.). In N. T. vox usurpatur sensu nostro geographico pro peninsula inter Alpes et fretum Siculum (Act. 18,2; 27, 1. 6; Hebr. 13,24).

ITALICA cohors (ἡ σπεῖρα ἡ καλουμένη

Ἰταλική) Caesareae constituta, cuius centurio erat Cornelius (Act. 10,1). Designari videtur cohors ex civibus romanis Italiae formata saltem quoad magnam partem. Talem cohortem circa a. 40 p. Chr. Caesareae fuisse *E. Schürer* (Gesch. d. jüd. Volkes etc. ed. 3. t. 462. 463) asserit non esse probabile, cum aliunde probabiliter constet ante magnum bellum iudaicum seu ante a. 66 Caesareae nonnisi copias auxiliares fuisse, quae maiorem partem ex provincia Syriae delectae erant (*Flav. Ios. Ant.* XIX. 9,2; XX. 8,7; *Bell. iud.* II. 13, 7; III. 4,2). Ex locis citatis apparet quinque cohortes ibidem fuisse; dividebantur copiae auxiliares non in legiones, sed in cohortes. Iamvero nihil impedit, quominus una ex illis teste S. Luca Act. 10,1 fuerit Italica sensu supra indicato. Nam primum quidem nobis desunt notitiae directae de copiis intra annos 6-66 p. Chr. in Iudaea constitutis. Deinde ex Flavio Iosepho solum discimus maiorem partem (τὸ πλεόν, τοὺς πλείστους) ex Syria delectos fuisse. Accedit denique quod in inscriptionibus commemorantur: cohors I. Italica civium Romanorum voluntariorum (Corp. Inscr. Lat. I. XIV. n. 174), cohors II. Italica civium Romanorum..... exercitus Syriaci (Corp. Inscr. Lat. III. Suppl. n. 13483 a) circa a. 69 p. Chr., de qua cf. Archaeologisch-epigr. Mittheilungen aus Oesterreich-Ungarn XVIII. 1895 p. 218 et *Pauly-Wissowa*, Real-Encycl. der klass. Altert. IV. 304. Eadem cohors II. censetur esse, quae commemoratur cohors miliaria Italica voluntariorum, quae est in Syria (Corp. Inscr. Lat. XI. n. 6117), cohors II. Italica (Corp. Inscr. Lat. I. VI. n. 3528), cohors II. Italica civium Romanorum inter cohortes « quae sunt in Syria sub Alfidio Corneliano legato » 157 p. Chr. (cf. Jahreshefte des oesterr. archäol. Institutes III. 1900 p. 21 ss. et p. 29). Apud *Arrianum* (Acies contra Alanos) ἡ σπεῖρα ἡ Ἰταλική brevius quoque designatur οἱ Ἰταλοί (*Arriani Scripta minora ed. Hercher 1854; ed. Blancard p. 102 et 99*). Ex *Arriano* igitur ad nomen sufficere videtur, si milites erant Itali (*Knabenbauer* ad Act. 10,1). — Notandum est, etsi vox cohortis etiam de

legione interdum adhibeatur, cohortem italicam non confundendam esse cum legione italica (*Tacit. Hist.* 4,59. 64; 2,100; 3,22), quae postea Nerone imperante efformata est.

ITHAI v. ETHAI 2.

ITHAMAR (יִתְחָר, Ἰθαμάρ), filius natu minimus Aaronis (Ex. 6,23; Num. 26,60; 1 Par. 6,3), una cum patre et tribus fratribus Nadab, Abiu, Eleazar sacerdotio initiatus (Ex. 28,1 ss.). Nadab et Abiu igne caelesti consumptis (Lev. 10,1. 2) Eleazar et Ithamar erant socii Aaronis in sacerdotio (Lev. 10,6. 12. 16; Num. 3,2. 4; 1 Par. 24,1. 2). In distributione officiorum leviticorum Ithamar constitutus est praefectus Gersonitarum et Meraritarum (Num. 4,28: 33; 7,8), sicut iam antea praefuerat levitis, qui in constructione tabernaculi singuli metalla oblata et expensa aestimabant (Ex. 38,21). Sacerdotium aaroniticum permanebat apud posteros Eleazar et Ithamar; magis numerosi erant priores; ex 24 classibus seu vicibus sacerdotalibus a Davide in ministerium Domini designatis solum octo erant filiorum Ithamar (1 Par. 24,3-6). Summum sacerdotium in familiam Ithamar transiit cum Heli et ad lineam Eleazar rediit per Sadoc (cf. 3 Reg. 2,35; *Flav. Ios. Ant.* VIII. 1,3). Vide s. v. PONTIFEX et SACERDOTIUM. Ex exilio cum Esdra rediit Daniel sacerdos de filiis Ithamar (Esdr. 8,2).

ITURAEA (Ἰτουραία) commemoratur Luc. 3,1 tamquam pars tetrarchiae Philippi, filii Herodis Magni et Cleopatrae. Ituraei haud dubie descendunt a Iethur, Ietur (יֶתוּר, Ἰετούρ), qui Gen. 25,15 et 1 Par. 1,31 enumeratur decimus inter duodecim filios Ismael, principes tribuum suarum. Iidem 1 Par. 5,9 leguntur foedere iuncti fuisse cum Agareis (vide s. v.), quos Rubenitae, Gaditae, Manassitae transiordanici insigni clade affecerunt. Inter gentes a Davide debellatas etiam Ituraeos nominat *Eupolemus*, hellenista iudaicus medio saeculo secundo a. Chr. (apud *Euseb. Praepar. Evang.* 9,30). *Flav. Iosephus* attestante *Strabone* ex auctoritate Timagenis narrat magnam

Ituraeae partem ab Aristobulo I. rege Iudaeorum (105-104 a. Chr.) expugnatam et Iudaeae additam, incolae autem, si in sua regione manere vellent, circumcidi coactos esse (Ant. XIII. 11. 3). Inde ab hoc tempore frequentius commemorantur modo ut Syri (Appian. Civ. 5,7; Plin. V. 23,81), modo ut Arabes (Dio Cassius 59,12). Tempore quo Romani Palaestinam occuparunt, Ituraei erant « omnium gentium maxime barbari » (Cicero) et praestantes sagittarii in exercitibus Romanorum (Cicero, Philipp. 2,19. 112; 13,18; Caesar, Bell. African. 20; cf. Vergil. Georg. 2,448).

Regio Ituraeorum alium alio tempore habebat ambitum. Strabo XVI. 2,10. 18 Ituraeam describit regionem montanam eamque collocat iuxta planitiem Mas-syam seu Marsyam, quae inter Libanum et Antilibanum a Laodicea Libani meridiem versus patet et urbem principalem habet Chalcidem ad Libanum (probabilissime 'Andjar, mediam fere inter Damascum et Berytum; distingue hanc Chalcidem ab altera ad Belum, Chalcide Syriae seu Qinnesrîm ad meridiem Aleppo). Cum igitur Ituraei etiam dicantur Arabes, ut supra diximus, intellegenda erunt imprimis montana Antilibani. Ante Pompeii adventum Ituraeam (montana et planitiem) regebat Ptolemaeus filius Mennaei (circa 85-40 a. Chr.), qui totam regionem a Byblos et Beryto Damascum usque vi armorum impetebat (Strabo l. c.; Flav. Ios. Ant. XIII. 15,2; 16,3; Bell. iud. I. 4,8; 5,3). Idem a Pompeio mille talentis peccatorum veniam redemit (Ant. XIV. 3,2). Attamen Pompeius loca munita Libani delevit (Strabo l. c.) et procul dubio fines Ptolemaei coarctavit sicut et Iudaeorum. De Ituraeis a Pompeio subactis etiam referunt Appianus, Mithrid. 106, Eutrop. 6,14 et Orosius 6,6. Reliqua de Ptolemaeo vide apud Flav. Ios. Ant. XIV. 7,4; 12,1; 13,3; Bell. iud. I. 9,2; 13,1; nunquam rex appellatur, sed Ant. XIV. 7,4 δουραστήρων. Ptolemaeo successit filius Lysanias (Ant. XIV. 13,3; Bell. iud. I. 13,1), quem Dio Cassius appellat regem Ituraeorum; Antonius Ituraeis gravia vectigalia imposuit (Appian. Civ. 5,7) et instigante Cleopatra ipsum Lysaniam morte puni-

vit, quod cum Parthis conspirasset magnamque Ituraeae partem Cleopatrae donavit (Flav. Ios. Ant. XV. 4,1; Bell. iud. I. 22,3; Dio Cassius 49,32).

Ab hoc tempore regnum illud Ituraeorum in minora territoria (saltem quatuor) discissum est, quorum distinctio lucem affundet difficultatibus quibusdam contra Luc. 3,1 prolatis.

Prima pars est tetrarchia Zenodori, qui in aliqua inscriptione heliopolitana (Ba'albek) appellatur Lysaniae tetrarchae filius (Corp. Inscript. Graec. n. 4523; F. de Sauley, Voyage autour de la mer Morte, Atlas [1853] pl. LIII. n. 5); haec tetrarchia, Ulaṭha seu regio prope lacum Hule et Panias (postea Caesarea Philippi), quam Zenodorus pretio conduxerat (sine dubio a Cleopatra), eo mortuo ab Augusto Herodi Magno tributa est (Ant. XV. 10,1. 2. 3; Bell. iud. I. 20,4; Dio Cassius 54,9); pars autem eiusdem tetrarchiae Zenodori post mortem Herodis Magni Philippo filio Herodis data est (Ant. XVII. 11,4; Bell. iud. II. 6,3). Verba igitur Luc. 3,1 : « Philippo tetrarcha Ituraeae » vera esse probantur saltem quoad hanc partem magni Ituraeorum regni; num quoad hanc partem solam, infra discutietur.

Secunda pars est tetrarchia Abilae seu Abilina (v. ABILINA et LYSANIAS).

Tertia pars erat Ituraea montana in Libano; ad hanc referuntur, quae tempore Quirini procuratoris romani Aemilii Secundus dux militaris de se testatur in quadam inscriptione : missu Quirini adversus Ituraeos in Libano monte castellum eorum cepi (Ephemeris epigraphica vol. IV. 1881 p. 538); anno 38 p. Chr. Caligula Soemo cuidam regionem Ituraeorum donavit (Dio Cassius 59,12), quo mortuo Ituraea provinciae Syriae addita est (Tacit. Annal. 12,23).

Quarta pars erat Chalcis ad Libanum, urbs quondam principalis Ituraeae Ptolemaei et Lysaniae, eiusque territorium in Coele Syria inferiore. Nihil quidem de hoc regno nobis innotescit a morte Cleopatrae usque ad Claudium imperatorem. Claudius statim ab initio regni sui Chalcidis regnum donavit Herodi, qui erat frater Agrippae I., filius Aristobuli filii Herodis Magni (Ant. XIX. 5,1;

Bell. ind. II. 11,5); postea Agrippa II. Chalcidem pro aliquo tempore obtinebat (Ant. XX. 5,2; 7,1; Bell. ind. II. 11,6; 12,1. 8); nihil praeterea de ea innotescit.

De his partibus regni Ituraeorum cf. *Schürer*, *Gesch. d. jüd. Volkes ed.* 3 I. p. 707 ss. Quibus expositis vix concipitur, quomodo idem *Schürer* l. c. p. 427 asserere potuerit verba Luc. 3,1 partim tantum vera (« nicht ganz unrichtig ») probari. Ipse enim ostendit primam Ituraeae partem, tetrarchiam Zenodori, ad tetrarchiam Philippi pertinuisse et insuper profanos auctores prorsus tacere de fatis Ituraeae montanae et Chalcidis quoad illud praeceise tempus, de quo Luc. 3,1 agitur. Quid igitur impedit, quominus verbis S. Lucae plena fides habeatur? Id unum obicit *Schürer* p. 427: Ituraea (montana) annis 38-49 p. Chr. regebatur a quodam Soemo; iamvero eodem tempore Agrippa I. totam tetrarchiam Philippi possidebat (Ant. XVIII. 6,10; XIX. 8,2); ergo Ituraea ad tetrarchiam Philippi pertinere non poterat. Verum haec argumentatio non consistit; neutro enim loco Flavius Iosephus dicit totam tetrarchiam Philippi Agrippae I. esse datam: praeterea Soemo subiecta erat sola Ituraea montana, ut ipse *Schürer* rem exponit. Denique perperam supponitur ambitum tetrarchiae Philippi a tempore nativitatis Christi semper eundem fuisse usque ad Agrippam I.; conclusio igitur ex annis 39-41 p. Chr. ad tempus nativitatis Christi nullo modo valet, praesertim cum Ituraea continuas mutationes subierit. Ceterum Iosephus regiones ad tetrarchiam Philippi pertinentes vario modo enumerat modo hac modo illa omitta.

Praeter Ituracae S. Lucas (3,1) Philippi tetrarchiae etiam adscribit Trachonitidem, quae tum apud Flavium Iosephum Philippo attribuitur (Bell. ind. II. 6,3) tum integram Philippi tetrarchiam designat in epistula Agrippae apud Philonem (Legat. ad Caium 41, ed. *Maujez* II. 593). Unde non defuerunt, qui Ituracae eandem esse dicerent ac Trachonitidem, ut Eusebius (Onom. ed. *Lag.* 268,93 et 298,53). Verum S. Lucas

recte utramque regionem distinguit, ut ex supra dictis patet.

Alii nomen Ietur agnoscunt in *Djeidūr* regione inter meridiem et occidentem Damasci; concedi potest hanc regionem etiam ab Ituraeis infestatam esse, sed ipsa nominis similitudo, quae huic opinioni faveat, desideratur. Multo minus Ituraea in Auranitide quaerenda est, ut putaverat *Wetzstein* (Reisebericht über Hauran und die Trachonen 1860 p. 90-92).

IUBAL (יובל, Ἰουβάλ), filius Lamech, pater canentium cithara et organo, ex Ada matre genitus (Gen. 4,21); eius frater ex eadem matre genitus erat label pater habitantium in tentoriis atque pastorum.

IUBILAEUS ANNUS dicitur quinquagesimus quisque annus, qui 49 annis ab ultimo anno iubilaeo elapsis i. e. post septenas hebdomadas annorum celebrandus erat: initium ducebat a die 10. Tishri mensis septimi seu die propitiationis (Lev. 25,8-10; *Flav. Ios. Ant.* III. 12,3).

1. Nomen. Vocatur שְׁנַת הַיּוֹבֵל vel simpliciter יוֹבֵל (Lev. 25,28) a strepitante sono buccinae (שׁוֹפָר תְּרוּעָה) buccina vociferationis), quo per nuntios in universum Israel missos annuntiandus erat. Etiam vocatur שְׁנַת הַדְּרֹר annus remissionis (Ezech. 46,17), LXX ἔτος τῆς ἀφ᾽ ἑσῆως, ἀφ᾽ ἑσῆως. In Vulgata dicitur annus iubilaei, annus iubilaeus scil. annus iubili, ita apte vocatus quoad rem, et probabilissime etiam quoad etymon; nam derivatio, qua יוֹבֵל interpretantur iubilum laetumve clamorem, philologice melius probari videtur, quam plurimae aliae explicationes maxime diversae, de quibus vide *Kranold*, De anno iub. Hebr. I. 2 p. 44 ss.; *Carpzov*, De anno iobelaec p. 3 ss.; *P. Schmalzl*, Das Jubel-Jahr bei d. alten Hebräern 1889 p. 3 ss.

2. Tria sunt praecepta ac privilegia anni iubilaei.

Praecipitur primo quies terrae sicuti anno sabbatico: Non seretis neque metetis. Quae humus sponte gignebat, non colligebantur, sed omnibus in usum

quotidianum communia erant (Lev. 25, 11,12). Per duos igitur annos terra cultu vacabat scil. anno undequingagesimo, quia sabbaticus et anno quinquagesimo, quia iubilaeus erat. Promiserat autem Deus (Lev. 25,20-22) se fructus anni sexti multiplicaturum esse, ut pro tribus annis scil. sabbatico, iubilaeo et etiam pro anno nono usque ad initium messis sufficerent.

Praecipitur secundo possessionis venditae reditus ad primum dominum. Possessio intellegitur immobilis i. e. agri in singulas familias a Iosue distributi et iure hereditario ad posteros transmissi. Agri igitur, qui vel donatione vel venditione ad alios transierant, anno iubilaeo ad primum dominum vel eius heredes legitimos nullo pretio solvo redibant, nisi forte iam ante annum iubilaeum a venditore vel cognatis eius redempti erant. Unde manifestum est, cur pretium agri decresceret, quo propius annus iubilaeus instaret; venditio agrorum apud Hebraeos erat nonnisi locatio usque ad annum iubilaeum (Lev. 25,13-16. 23-28). Idem ius, quod agrorum, erat etiam domorum in villis et pagis muro non cinctis (25,31). Alia autem erat conditio domorum in urbe muro cincta; qui talem domum vendiderat, eam intra anni spatium redimere potuit, quam primum vellet, non vero postea; quodsi ergo illa domus anno primo redempta non erat, ipso iubilaeo non ad pristinum dominum redibat. sed emptori manebat propria (25, 29. 30).

Domus levitarum perpetuo redimi poterant et anno iubilaeo ad dominos redibant (25,32. 33); agros autem suos ne vendere quidem poterant (25,34). — Accedunt leges de agris sanctuario votis. Si quis agrum hereditarium sanctuario voverat et ante iubilaeum non redemerat, iste ager, si a sanctuario venditus erat, anno iubilaeo ab emptore non ad pristinum dominum, sed ad sanctuarium i. e. ad sacerdotes rediit (27,17-21). Si quis vero agrum ab alio domino emptum sanctuario voverat, annuos proventus agri usque ad annum iubilaeum sacerdotibus solvere et agrum ipsum anno iubilaeo domino reddere debebat (27,22-24).

Praecipitur tertio dimissio servorum. Generatim servus Hebraeus libertati reddendus erat anno septimo servitutis suae (Ex. 21,2; Deut. 15,12). Sed iam ante septem annos elapsos, si annus iubilaeus incidebat, eodem privilegio fruebantur servi Hebraei in servitute Israelitarum vel advenarum degentes, nisi forte iam antea se redemerant vel per cognatos suos redempti erant; ministerium igitur servi Hebraei non erat servitus perpetua, sed opera mercenaria, quae ultra sex annos ipso invito extendi non poterat (Lev. 25,39-43. 47-55). Servi autem de advenis vel de aliis nationibus oriundi anno iubilaeo non erant dimittendi, sed in familia dominorum suorum iure hereditario ad posteros transmitti poterant (25,44-46), quamquam et ipsi circumcisi erant (cf. Gen. 17,23. 27).

Quod Flavius Iosephus (Ant. III. 12,3) dicit scil. anno iubilaeo omnia debita remissa vel extincta esse, neque in Sacra Scriptura neque in traditione rabbinica fundamentum habet; id unum veri subest, debita etiam anno iubilaeo, sicuti anno sabbatico exigi non potuisse ex paritate rationis; si enim anno sabbatico solvendo impares censendi erant, multo magis anno iubilaeo, qui sabbaticum excipiebat.

3. Finis anni iubilaei proxime quidem erat politico-oeconomicus, ut haec restitutio in integrum rempublicam iudaicam conservaret, prout a Deo instituta erat. Altior autem est finis religiosus. Innumera enim sunt beneficia anni iubilaei: Deus populum suum a lege laboris et sudoris dispensat, benedictione sua victui necessario providet, Israelitas omnes a paupertate et necessitate liberat, ad possessionem patrum reducit, a servitute solvit, omnibus redemptorem se exhibet. His beneficiis toti populo in memoriam revocatur Israelitas in regno theocratico vera libertate gaudere et ipsius Domini proprietatem esse. Huic fini religioso accedit ratio typica. Anno iubilaei annuntiatur et praefiguratur periodus messianica, qua, quodcumque per peccatum perditum erat, reparatur, servitus peccati tollitur, libertas filiorum Dei ad culmen perducitur; cf. Is. 61,1-3

et Luc. 4,21. Hoc ipso annus iubilaeus est etiam typus istius iubilaei, quod in consummatione temporum per angelos tubis canentes annuntiabitur. — Haec Veteris Testamenti institutionem esse praefigurationem iubilaeorum, quibus Ecclesia Novi Testamenti gratiarum thesauros in fideles solito abundantius effundit, facile intellegitur.

4. Qua fidelitate annus iubilaeus servatus sit, sacrae litterae explicite non tradunt. Attamen ex silentio S. Scripturae inferri nequit cum non fuisse servatum, sed contrarium potius praesumendum est. Neque contra observationem anni iubilaei argumenta valent ex querelis prophetarum de legibus mosaicis quandoque (cf. Is. 5,8; Mich. 2,2. 4; 3 Reg. 21,2) non observatis neque ex bellicis perturbationibus tempore iudicium et regum. Cf. *P. Schmalzl* o. e. p. 102-110. — Asserunt autem doctores talmudici post exilium usque ad destructionem templi secundi annum quinquagesimum non celebratum, attamen numeratum esse ad annos sabbaticos recte computandos (cf. *Otho*, *Lexicon rabb. philol.* p. 337. 338).

IUCADAM (יְקָדָם, Αἰκιάδα), urbs tribus Iuda in tertia provincia montis (Ios. 15,56). Situs ignoratur.

IUCHAL (יְהוֹכָל, Ἰωάχαλ), filius Selemiae, legatus a Sedecia rege Iuda ad Ieremiam missus, ut propheta apud Dominum intercederet (Ier. 37,3); idem recensetur inter illos principes, qui Sedeciae auctores fuerunt, ut Ieremias in lacum (cisternam vel foveam) coniceretur (38,1).

IUD (יֵדָא, Ἰζώρ, Α Ἰούδα), urbs tribus Dan (Ios. 19,45). Censetur esse vicus *el-Yehūdīye* duabus horis a Lydda septemtrionem versus in planitie frugifera situs (*Guérin*, *Judée* I. 321. 322; *Survey of West. Pal. Mem.* II. 258).

IUDA (יְהוּדָה, Ἰουδαῖα). 1. Iuda sive Iudas, filius quartus Iacob patriarchae ex Lia genitus. Nomen explicatur exclamatione matris de dono Dei gaudentis Gen. 29,35 : « et ait : Modo confitebor (אֲדַבֵּר) Domino et ob hoc vocavit eum Iudam

cessavitque parere ». Eodem Iusu verborum Iuda dicitur obiectum laudis in benedictione Iacob Gen. 49,8 : « Iuda, te laudabunt (יִרְדְּךָ) fratres tui ». Ante ipsum Lia pepererat Ruben primogenitum, Simeon, Levi, post ipsum interiecto tempore sterilitatis Issachar et Zabulon (35,23). Inter fratres suos Iuda saepius partes principales agit. Ipse reliquis auctor fuit, ne Ioseph fratrem occiderent, sed potius Ismaelitis venderent (37,26 ss.); postea apud Iacob patrem praevaluit, ut Benjamin curae suae commissus in Aegyptum dimitteretur (43,3 ss.); reliquorum nomine coram Ioseph praefecto Aegypti verba facit tennerrimi amoris erga patrem senem et fratrem natu minimum plena, quibus auditis Ioseph fratribus se manifestat (44,14 ss.); a Iacob in Aegyptum profecturo praemittitur, ut eius adventum nuntiet Ioseph proregi quasi viam parans in terra Gessen (46,28).

Iuda ante descensum in Aegyptum degabat in eadem Palaestinae parte, quam postea eius tribus occupatura erat scilicet in monte Iuda prope Odollam et Thamnath. Ex filia Chananaei Sue tres filios genuit, quorum duo priores Her cum Thamar matrimonio iunctus et Onan morte praematura a Deo puniti sunt, tertius Sela nunquam principales partes egit. Postea ex Thamar nunt sua, quam in scius pro meretrice cognovit, habuit duos filios geminos Phares et Zara, quorum prior factus est progenitor stirpis regiae aliarumque illustrium familiarum Iuda (Gen. 38,4 ss.). Sela, Phares et Zara una cum patriarcha Iacob in Aegyptum descenderunt (46,12; Ex. 1,2). Iuda inter fratres suos eo maxime eminet, quod in ipsum translata est dignitas primogeniti, quam Ruben violato thoro patris sui amiserat, ius principatus (1 Par. 5,2). Haec dignitas regia effertur in benedictione Iacob Gen. 49,8-10 : « Iuda, te laudabunt fratres tui, manus tua in cervicibus inimicorum tuorum, adorabunt te filii patris tui. Catulus leonis Iuda etc. Non auferetur sceptrum de Iuda et dux de femore eius, donec veniat qui mittendus est »; cf. *F. de Hummelauer* ad h. l. — In genealogia Christi prae aliis filiis Iacob solus Iuda expri-

mitur (Matth. 1,2. 3; Luc. 3,33), ex cuius tribu Christus descendit (Hebr. 7,14), unde : vicit leo de tribu Iuda (Apoc. 5,5).

2. Iuda tribus Israel. Territorium Iuda accuratissime describitur Ios. 15,1-12. 20-63. Terminus meridionalis, qui cum termino meridionali Palaestinae coincidit (cf. Num. 34,3-5), incipit a lingua maris Mortui, quae respicit meridiem, pertransit ascensum Scorpionis, Sina seu Senna, Cadesbarne, Esron (Hesron), Addar, Carcaa, Asemona et perveniens usque ad torrentem Aegypti (*Wādi el-Arish*) litore maris Mediterranei finitur. Terminus orientalis est mare Mortuum usque ad ostium Iordanis. Terminus septentrionalis coincidit cum termino meridionali tribuum Benjamin (cf. Ios. 18,15-19) et Dan; eius cursum designant ostium Iordanis, ascensus Adommim, Debera, Fons Solis (Ensemes), Fons Rogel, vallis Ennom, Nephtoa, Cariathiarim, Cheslon, Bethsames, Thamna, Accaron, Iebneel prope litus maris Mediterranei. Ab occidente sortem Iuda terminat litus maris inter Iebneel et torrentem Aegypti. Sed notandum est etiam sortem Simeon intra fines Iuda fuisse conclusam (Ios. 19,1-9).

Tribus Iuda in quattuor territoria dividitur : Negeb seu meridies, Sephela seu planities occidentalis, mons Iuda, desertum Iuda.

Negeb (נֶגֶב, νότος) est tractus australis Palaestinae pascuis abundans, quem cingunt mons Iuda ab aquilone, mons Seir ab oriente, desertum Exodi a meridie, planities maritima ab occidente; est igitur regio media inter terram cultam et desertam tum situ tum indole. Enumerantur Ios. 15,21-32 urbes Negeb 36 (37?), ex quibus 16 (15) postea tribui Simeon assignatae sunt (cf. Ios. 19,1-9); sed adverte numeros in textu hodierno indicatos saepius non congruere cum summa urbium enumeratarum. Praeterea secundum varias gentes, quae in Negeb habitabant, distinguuntur Negeb Iuda, Negeb Ierameel, Negeb Ceni seu Cinaeorum cum Iudaeis foederatorum, Negeb Cerethi seu tribus cuiusdam Philisthaeorum, Negeb Caleb (1 Reg. 27, 10;

30,14 et cf. *F. de Hummelauer* ad h. l.). Posteriore tempore (Euseb. et S. Hieron. in Onom.) Negeb vocabatur Daroma, ita tamen ut Daroma aquilonem versus latius pateret quam Negeb (cf. *Relandus*, Pal. p. 185 ss.; *Buhl*, Alt. Pal. 1896 p. 88).

Sephela (סֶפְּלָא, ἡ πεδινή, τὸ πεδῖον) est regio depressior ad mare Mediterraneum a Ioppe usque ad torrentem Aegypti patens et etiam iuga collium comprehendens, quae orientem versus ad montana Iuda ascendunt. In Mishna (Shebiith 9,2) distinguitur Sephela circa Lyddam a Sephela australi, item a S. Hieronymo in Abd. 19 Sephela circa Lyddam (Diospolim) et Emmaus (Nicolopolim) distinguitur a Sephela circa Eleutheropolim. De sola Sephela circa Eleutheropolim loquuntur Eusebius et S. Hieronymus s. v. Sephela (Onom. ed. Lag. 296,9; 154,11). Sed ex modo dictis colligitur Sephelam Ioppen usque patuisse et campestria Dan complexam esse. Urbes Sephelae, quatenus haec ad tribum Iuda spectat, dividuntur in tres provincias; prima provincia mediterranea aquilonaris continebat 15(14) urbes, secunda provincia maritima 16, tertia provincia mediterranea australis 9 (LXX 10) urbes ex quibus duae scil. Asam et Ether postea Simeonitis tribulae sunt; his adduntur Accaron, Azotus, Gaza. Cf. Ios. 15,33-47. Si excipimus arenas litoris exaggeratas, solum est hordei et tritici feracissimum, vineis et olivetis consitum, arboribus puniceis et medicis abundans, gregibus numerosis prata praebens (*Stanley*, Sinai and Palestine p. 237 ss. et cf. Iud. 13, 14; 14,5; 15,1. 5). Sephela igitur erat hortus et horreum tribus Iuda. Hinc intellegitur, cur Philisthaei tam constanter pentapolim philisthaeam (Gazam, Azotum, Ascalon, Geth, Accaron) sibi vindicaverint.

Mons Iuda (הַר־יְהוּדָה, ἡ ὄρετινὴ) occidentem versus transit in colles Sephelae, meridiem versus descendit ad Negeb, orientem versus deserto Iuda adiacet, aquilonem versus monti Ephraim coniungitur, ita ut mons Iuda etiam partem tribuum Benjamin et Dan comprehendere dicendus sit (cf. s. v. EPHRAIM 3).

Urbes montis Iuda in sex provincias distribuuntur. Prima provincia 11 urbium meridiem spectat (Ios. 15,48-51). Ad septentrionem primae habentur secunda 9 urbium occidentem versus (15,52-54) et tertia decem urbium orientem versus (15,55-57). Ad septentrionem secundae et tertiae provinciae extenditur quarta sex urbium (15,58, 59). At notandum est tertiam provinciam fortasse non fuisse continuam, cum duae eius urbes, Gabaa et Thamma, in territorio quartae provinciae reperiri videantur. Quinta provincia 11 urbium ad septentrionem quartae Ierusalem usque protensa deest in textu massorethico et in Vulgata, sed conservatur in LXX inter vv. 59 et 60 inserta; complectitur Bethlehem et oppida prope Bethlehem et Ierusalem (de hoc additamento LXX cf. *F. de Hummelauer*, Comm. in Ios. p. 362-3). In sexta demum provincia 15,60 duae tantum urbes recensentur: Cariathiarim ad occidentem Ierusalem in confinibus Iuda et Benjamin et Arebba, cuius situs non certo innotescit.

Mons Iuda est divortium aquarum inter mare Mortuum et Mediterraneum, maximam altitudinem attingit prope Hebron (c. 1000 m), de qua paulatim deprimitur tum Bethlehem (c. 800 m) tum meridiem versus; terra est calcaria et ut plurimum inaequalis ac saxosa; cacumina nuda eminent, pascua inculta extenduntur. Attamen passim etiam inveniuntur arbores, virgulta, herbae, pomaria quoque, oliveta ac vineta v. g. prope Hebron; valles et planities quaedam ampliores ab agricolis sedulo coluntur et bonas segetes praebent (cf. *Ritter*, Erdkunde XV. p. 618. 637).

Desertum Iuda (בְּדֵבֶר) est tractus sterilis, qui a termino aquilonari tribus Iuda inter mare Mortuum et montem Iuda decurrit usque ad *Wādi Fikre* et partem Negeb; cf. *Riess*, Bibel-Atlas III. FE d. Partes huius deserti in S. Scriptura commemorantur desertum Thecue (2 Par. 20,20; 1 Mach. 9,33), desertum Ziph (1 Reg. 23,14 ss.; 26,2) desertum Maon (1 Reg. 23,24 ss.), desertum Engaddi (1 Reg. 24,2). Descensus orientalis a montanis Iuda ad mare Mortuum est

multo magis praeceps et abruptus, quam descensus occidentalis ad Sephelam et quasi per tres gradus perticitur, ita ut ternus descensus fiat a triplici planitie montana superposita. Terra calcaria pyrite intermixta passim nuda cernitur. Flora abundantior nonnisi prope fontes progerminat. Valles saxosae et fauces horrendae eo magis sunt praeruptae, quo mari Mortuo propiores. Regio haec deserta antiquitus non multum incolebatur; Ios. 15,61. 62 sex civitates deserti Iuda enumerantur, ex quibus notissima est Engaddi; aetate christiana eremitae et monachi in hanc regionem a mundi strepitu remotam se receperunt, ut ruinae etiam superstitales testantur; hodie aliqui vici exigui et stationes Arabum tabernaculis tendendis aptae ibidem reperiuntur. Cf. *Zeitschr. d. D. Pal.-Ver.* III. 1880 p. 2 ss.; *Ritter*, Erdkunde XV. p. 643 ss.; *J. Döllner*, Geogr. u. ethnogr. Studien z. III. u. IV. Buche d. Könige 1904 p. 167-8.

Historia tribus Iuda. In historia Israelitarum tribus Iuda potestate et auctoritate reliquis tribus superabat. Anno secundo egressionis ex Aegypto princeps tribus erat Nahasson filius Aminadab (Num. 1,7). Apud montem Sinai de Iuda numerabantur 74 600 viri bellatores (1,26. 27), postea in campibus Moab 76 500 (26,22), qui numeri in utroque censu ne a Danitis quidem ceteroquin numerosissimis attingebantur. In castris erat Iuda cum Issachar et Zabulon ad orientalem plagam tabernaculi (2,3-9); caedem tribus in ordine itineris primo loco proficiscebantur (10,14-16). Oblationes Nahasson principis Iuda in dedicationem altaris die primo ex duodecim diebus oblationum factae sunt (7, 12-17). Caleb filius Iephone tribum Iuda repraesentat inter duodecim exploratores terrae Chanaan (13,7 hebr. 6) et inter viros ad sortes terrae promissae dividendas electos (34,19). Post ingressum in terram promissam Iuda cum Simeon, Levi, Issachar, Ioseph (Ephraim et Manasse), Benjamin benedictionem in monte Garizim pronuntiavit (Ios. 8,33. 34), ut Moyses mandaverat (Deut. 27,12); de crimine Achan ex tribu Iuda, quod brevi

ante commissum fuerat apud Iericho v. ACHAN et ACHOR.

In distributione terrae promissae sors prima tribui Iuda egressa est (Ios. 13, 1); sacerdotibus ex territorio Iuda et Simeon novem urbes concessae sunt, octo ex Iuda, quarum praecipua erat Hebron urbs confugii et una scil. Asan (Ain) ex Simeon (24, 13-16; vide ASAN et AIN 2); aliquae urbes Iuda scil. Saras (Sarea), Esthaol, Hirsemes (Bethsames 1), Themna (Thamna), Acron (Accaron) postea Danilis attribuantur (19, 41-43), quod aliquam fluctuationem terminorum inter singulas tribus innuere videtur. Territorium Iuda (Simeon) prima Iosue expeditione (10, 28 ss.) in ore gladii percussus, sed non in plenam potestatem Israelitarum redactum erat; quare Iuda et Simeon variis pugnis primum montana, deinde maiore cum difficultate campestris, in quibus Chanaanici curribus ferreis ad proeliandum utebantur, subegerunt; speciali mentione dignae sunt expugnationes urbium Hebron per Caleb filium Iephone et Dabir (Cariath Sepher) per Othoniel (Iud. 1, 3-20; cf. Ios. 14, 6 ss.; 13, 13 ss.). Urbes Philisthaeorum nonnisi pro brevi tempore in ditioe Israelitarum erant (Iud. 1, 18; 3, 3). Reliquam partem territorii filii Iuda quietam possederunt. Debhora et Barac pro liberatione tribuum septemtrionalium procliantibus Iuda et Simeon opem non tulerunt neque ab illis Debhora opem expectaverat; cuius rei aliqua ratio in eo cerni potest, quod fortasse pugnis cum Philisthaeis nimium distinebantur, potissima autem ratio in eo, quod hae duae tribus iam aetate iudicum magis in se conclusae atque ab aliis distinctae suas res publicas administraverunt (Iud. 4 et 5). Inter iudices solus Othoniel erat de tribu Iuda (v. OTHONIEL); Abesan iudex septem annorum, qui ex opinione veterum interpretum de Bethlehem Iuda oriundus erat, probabilius alteram Bethlehem Zabulon patriam habuit (v. ABESAN). In communi tamen tribuum contra Benjamin certamine Iuda non defuit, immo reliquarum dux a Domino constituta est (Iud. 20, 18). Aetate Samuelis et Saulis non montana Iuda, sed

potius territoria Benjamin et Dan a Philisthaeis campestris Iuda occupantibus infestabantur (cf. 1 Reg. c. 4. 3. 7. 13. 14), immo etiam regiones magis disitae, planities Iezrahel, Bethsan (1 Reg. 31); cum autem in ipsa montana Iuda progredi conarentur per vallem terebinthi (*Wādi el-Sant* prope *Shuweike* seu *Socho*), efficaciter repulsi sunt (1 Reg. 17, 2. 19) neque feliciores fuerunt contra Ceilam urbem Sephelac, sed monti Iuda haud dubie vicinam (1 Reg. 23, 1). Indicium distinctionis et oppositionis inter tribus septemtrionales et meridionales seu inter Iuda et Israel deprehenditur 1 Reg. 11, 8 et 13, 4: cf. *F. de Hummelauer* ad 1 Reg. 8, 4. De David fugitivo in variis partibus Iuda v. DAVID, HACHILA, MAON, SICELEG, ZIPH. Saule mortuo Iuda David regem suum agnovit (2 Reg. 2, 4) et in eo quoque vigorem internum patefaciebat, quod magis constanti sui confirmatione, quam felici belli eventu reliquis tribus ad unitatem regni adduceret (2 Reg. 3, 4 ss.). Unitate stabilita (2 Reg. 5, 1) Iuda culmen gloriae ascendebat regnantibus Davide et Salomone (vide s. vocibus); attamen antiqua illa tribuum oppositio nunquam exstincta et scissione regnorum Iuda et Israel consignata est (vide s. v. EPHRAIM 2 in fine). Abhinc historia tribus est historia regni Iuda (v. infra n. 9).

3. Iuda ad Iordanem (יְהוּדָה הַיְיָדָן; LXX δ Ἰουδαίας omisso Iuda) in termino orientali tribus Nephthali (Ios. 19, 34) est nodus, qui plurimos interpretes torisit. Probabilissimum est textum esse corruptum; unde *Ewald* (*Geschichte des Volkes Israel* ed. 3 II. p. 411) et *Dillmann* ad Ios. 19, 34 coniciunt pro יְהוּדָה reslituendum esse בְּנֵי־יִרְדֵּן provocantes ad 3 Reg. 23, 20 (universam Ceneroth), Ios. 11, 2 (meridies Ceneroth), Deut. 3, 17 (terminos Cenereth); quomodo autem forma nostri textus massorethici exorta sit, nondum liquet. Coniecturas obsoletas de Iuda Iordanis Nephthalitarum vide, si lubet, apud interpretes. *F. de Hummelauer* ad Ios. 19, 34 Iuda simpliciter delendum censet

cum LXX, ut textus primitus fuerit : Et Iordanis (est) orientem versus.

4. Iuda, levita, cuius filii magno zelo instaurationem templi post exilium promoverunt (Esdr. 3,9), fortasse idem est ac Odovia (v. ODUIA 3).

5. Unus ex levitis, qui uxores alienigenas dimittere ab Esdra iussi sunt (Esdr. 10,23). Idem probabilius est, qui Neh. 12,8. 35[36] nominatur.

6. Unus ex principibus Iuda tempore Nehemiae (Neh. 12,33[34]).

7. Filius Senua, Beniaminita, incolae Ierusalem post instaurationem (Neh. 11,9).

8. De civitate Iuda (Luc. 1,39), patria Zachariae et S. Ioannis Baptistae in tribu Iuda vide s. v. IOTA.

9. Regnum Iuda. Quod Iacob patriarcha iamiam moriturus filio Iuda vaticinatus erat, in Davide coeptum est impleri (cf. Gen. 49,10; 1 Par. 5,2); de Iuda enim elegit principes, porro de domo Iuda domum patris mei, inquit David, et de filiis patris mei placuit ei ut me eligeret regem super cunctum Israel (1 Par. 28,4). Saule mortuo primum sola domus Iuda sequebatur David, qui per septem annos et sex menses in Hebron regnavit (2 Reg. 2,10. 11). Postquam Isboseth filius Saul interfectus est, universae tribus Israel Davidem regem agnoverunt et David expugnata arce Sion Ierusalem elegit regiam urbem ibique 33 annis regnavit super omnem Israel et Iudam (2 Reg. 5,1 ss.). Item post eum Salomon. Cum autem Roboam onera populo imposita nollet imminuere, decem tribus recesserunt a domo David et regnum Iuda a tribu potentiore Iuda nomen sortitum est. Ei adhaerebant tribus Beniamin, sacerdotes et levitae, qui a regno Israel recesserunt (2 Par. 11,13. 14), Israelitae qui habitabant in civitatibus Iuda et pars meridionalis Palaestinae. Regnum Iuda continuo reges habebat ex domo David neque tot internis seditionibus ac perturbationibus erat obnoxium quot regnum Israel. Athalia, uxor Ioram, filia Achab et Iezabel, post mortem filii sui Ochozia regis interfecit omne semen regium; solum Ioas parvulus Ochozia filius furori eius subreptus est (4 Reg.

11,1). Ioas post regnum annorum 41 a coniuratis occisus est (12,20. 21), itemque Amon (21,23), neque tamen successio regum ex domo David interrupta est. Uti Salomon iam contaminaverat regnum idololatria, ita etiam postmodum eo vitio regnum haud semel laborabat; ita sub Roboam et Abia (3 Reg. 14,22 ss.; 15,3); at Asa purgavit universas sordes idolorum (15,11 s.). Res in peius iterum cesserunt sub Ioram; gener enim domus Achab fuit (4 Reg. 8,18. 27; 2 Par. 24,7); sed Ioas fecit rectum coram Domino, quamdiu eum docuit Ioiada sacerdos (4 Reg. 12,2); postea a principibus seductus ipse quoque est ad idololatriam, cui pariter indulgebant Amasias, Achaz, Manasse, Amon (cf. 2 Par. 24,17; 25,14; 4 Reg. 16,2; 21,2. 20), dum Ezechias et Iosias, reges pii, omni studio conarentur idolorum cultu deleto veram restituere pietatem (4 Reg. 18,4 ss.; 22,2 ss.). In regno Iuda plures quoque prophetae quam in regno Israel causam cultumque Domini tuiti sunt et vitii bellum indixerunt. Templum in Ierusalem, quamvis etiam saepius cultu idololatrico contaminaretur, tamen multum contulit, ut religio in regno Iuda melius conservaretur; veruntamen neque reges pii neque prophetae ruinam regni templique avertere poterant.

Regnum Iuda, ab internis dissidiis fere immune, ab hostibus externis multum impetebatur. Iam in quinto anno regni Roboam Sesac rex Aegypti tulit thesauros domus Domini et thesauros regios et universa diripuit (3 Reg. 14,26; 2 Par. 12,2); post eum sub rege Asa regnum Iuda ita a Baasa rege Israel infestabatur, ut Asa omne argentum et aurum ex thesauris templi et regis colligeret et ad regem Syriae mitteret opem efflagitaturus (3 Reg. 15,17 ss.; 2 Par. 16,2). Per aliquod tempus regnum Iuda et Israel amico foedere coniungebantur; Iosaphat et Achab bellum Syris intulerunt (3 Reg. 22,2 ss.); immo Ioram filius Iosaphat in matrimonium duxit filiam Achab, Athalias; at mox denuo inimicitiae exardescabant. Amasia rege regnum Iuda, quod antea sub Ioas rege a Syris erat graviter afflictum (4 Reg. 12,17), iterum a rege

Israel Ioas magno damno est affectum, murus Ierusalem magnam partem interruptus, thesauri omnes ablati (4 Reg. 14,12 ss.). Cum Edomitis quoque pugnandum erat saepius (4 Reg. 8,21; 14,7; 2 Par. 21,8; 25,11; 28,17) et contra Ioram impium regem, qui omnes fratres suos occiderat et idola colebat, suscitavit Dominus Philisthaeos et Arabes, qui terram Iuda vastaverunt et thesauros regis eiusque filios et uxores abduxerunt (2 Par. 21,16); Azarias autem feliciter contra utrosque pugnavit (2 Par. 26,6. 7). Achaz vero rex impius tempora adduxit calamitatibus plena, quia monitis Isaiae prophetae non obsequabatur; gravi clade regnum Iuda percussum est a Syris et Israelitis, ab Edomitis et Philisthaeis (2 Par. 28,8. 17.18); imploravit Achaz opem Theglathphalasar regis Assyriorum, qui quidem Syros devicit, at regnum quoque Iuda afflixit (4 Reg. 16,7 ss.; 2 Par. 28,2). Ezechias rex pius percussit Philisthaeos et ope divina in periculo extremo ab invasione Assyriorum liberatus est (4 Reg. 18,8. 14 ss.; 2 Par. 32,1 ss.). Nihilominus regnum quoque Iuda vergebat ad interitum. Sceleribus enim Manasse et Amon regum Dominus poenam indici iussit: ecce ego inducam mala super Ierusalem et Iuda et delebo Ierusalem (4 Reg. 21,12; Ier. 13,4). Iosias quidem omni conatu mores populi emendare studuit; verum nimis altas radices egerat idololatria et quamvis per prophetas Ieremiam et Sophoniam valide iuvaretur, tamen parum effectum est. Ipse in pugna contra Nechao regem Aegypti occisus est. Exinde regnum Iuda praedae erat prius Aegypto, dein Chaldaeis. Et demum Sedecias rex, cum Ieremiae oraculis et monitis contemptis nollet se subiicere Nabuchodonosor regi, regnum Iuda interitui obiecit; maior populi pars in exilium babilonicum abducta est urbe et templo incensis (4 Reg. 25,1 ss.). De ratione temporis vide s. v. CHRONOLOGIA II. 1. in vol. I. col. 900-909.

Stetit regnum usque ad annum 588. Singula vide sub nominibus regum: Roboam, Abiam, Asa, Iosaphat, Ioram, Ochozias, Athalia, Ioas, Amasias, Aza-

rias, Ioatham, Achaz, Ezechias, Manasses, Amon, Iosias, Ioachaz, Ioakim, Ioachin, Sedecias. De regni conditione moribusque populi et principum multa referuntur apud prophetas quoque (Is. 1-10; 28-39; apud Ier. Ez. Abd. Mich. Soph. Hab.).

IUDAEA (יהודה, ἡ Ἰουδαία), provincia meridiana Palaestinae cisiordanicae, eo nomine post exilium appellata, quia potissimum filii Iuda reduces eam incolebant; latius tamen patebat quam antiqua tribus Iuda; terminos habebat ab aquilone Samariam, ab oriente Iordanem et mare Mortuum, a meridie Idumaeam, ab occidente Philisthaeam et mare Mediterraneum, ita ut etiam Benjamin, Dan et partem Ephraim meridianam comprehenderet neque fines regni Iuda multum excederet. Illi vero termini variis temporibus mutationes et fluctuationes subierunt. Iam tempore exsilii Edomitae meridianam Iudaeae partem sibi arripuerant (Ez. 35,10-13; 36,6) et fines Hebron, quae post exilium denuo a Iudaeis incolebatur (Neh. 11,25), in ditione retinebant, donec a Iuda Machabaeo inde expulsi sunt (1 Mach. 5,63). Aetate machabaica a Iudaea sine dubio exclusae erant urbes maritimae, quae maximam partem ab ethnicis incolebantur et suas res publicas legibus propriis administrabant; cf. *Schürer*, *Gesch. des jüd. Volkes etc. ed. 3* II. p. 73 ss. Illis autem urbibus ethnicorum seu hellenisticis etiam accensendas esse aliquas a litore maris remotiores ex eo colligitur, quod Accaron nonnisi tempore Ionathae (1 Mach. 10,88. 89), Gazara nonnisi tempore Simonis (1 Mach. 13,43-48; v. GAZARA) Iudaeae adiunctae sunt. Neque terra transiordanica Iudaeae accensebatur; ibi quoque erant urbes hellenisticae (*Schürer* l. c.) et praeterea gentes indigenae Iudaeis infensae (1 Mach. 5,6 ss.; 2 Mach. 5,8). Eadem aetate machabaica iam clare distinguebatur Iudaea a Samaria et Galilaea (*Flav. Ios. Ant.* XII. 4,1. 4; 1 Mach. 10,30. 38; 11,28. 34) et cum 1 Mach. 10,30. 38 solum tres civitates (πόλεις) ex Samaria Iudaeae legantur additae fuisse,

omnino probabile est Samariam et Galilaeam cum re publica Iudaeorum nonnisi a Ioanne Hyrcano (135-105) eiusque successoribus coniunctas esse.

Apud Flav. Iosephum, in Novo Testamento et in Mishna constanti usu loquendi distinguuntur Iudaea, Samaria, Galilaea, Peraea. Flav. Iosephus (Bell. iud. III. 3,5) Iudaeam circumscribens terminum orientalem assignat Iordanem, occidentalem Ioppen (μέγρις Ἰόππη), ita ut Ioppe non ad Iudaeam accenseatur; meridionalem assignat vicum Arabibus conterminum Iordan a Iudaeis appellatum (Arad?), septentrionalem vero vicum Anuath alias Borecaios dictum (ἡ Ἀνουάθου Βόρκαιος προσαγορευομένη κώμη), qui idem videtur ac Anuabor Eusebii 15 mil. pass. a Sichem Ierusalem versus distans seu Anua S. Hieronymi 10 mil. pass. a Sichem Ierusalem versus distans (Onom. ed. Lag. 223,54; 94,21), hodie fortasse *Berūkīn* orientem versus a Ioppe; urbem Ierusalem ipsissimo in medio ponit Iosephus; addit marinis deliciis non carere Iudaeam utpote locis maritimis Ptolemaidem usque extensam (τοῖς παραλίοις κατατείνουσα).

Maximi momenti sunt undecim toparchiae (κληρονομαχίαι) a Iosepho l. c. recensitae : 1. Ierusalem 2. Gophna 3. Akra-bela 4. Thamna 5. Lydda 6. Ammaus 7. Pella 8. Idumaea 9. Engaddi 10. Herodeion 11. Iericho. Solummodo decem toparchias enumerat Plinius (V. 14,70) : Hiericentem..., Emmaum, Lyddam, Iopicam, Acrebitemam, Gophaniticam, Thamniticam, Betholeptephenen, Orinen in qua fuere Hierosolyma..., Herodimm. Perperam a Iosepho nominatur Pella, a Plinio Ioppe; utraque enim erat res publica suis legibus utens neque in Iudaea sita; alibi autem etiam Iosephus (Bell. iud. IV. 8,1) Bethleptenpha caput toparchiae nominat. Ilac igitur loco Pellae substituta et ordine geographico servato undecim toparchiae erunt : Ierusalem (Orine), aquilonem versus Gophna (*Djifnā*) et Akra-bela (*ʿAqrabe*), occidentem versus Thamna (*Tibne*), Lydda (*Lud*), Emmaus (Nicopolis, *ʿAmwās*), Bethleptenpha (inter Emmaus et Idumaeam; Flav. Ios. 1. c.), meridiem versus Idumaea (in qua Ioannes Hyrcanus

religionem legesque iudaicas restituerat Ant. XIII. 9,1; XV. 7,9; Bell. iud. I. 2,6), orientem versus Engaddi (*ʿAin Djidī*), Herodeion (*Djebel el-Furcidis*, Mons Francorum), Iericho (*Rihū*). Tota autem haec divisio probabilius actale romana ortum habuit, cum antea nullum eius vestigium deprehendatur.

Cf. *Reland*, Pal. p. 31 ss. 176 ss. 185 ss.; *Neubauer*, Géogr. du Talmud p. 59 ss.; *G. A. Smith*, Hist. Geogr. of the Holy Land 1894 p. 201 ss.; *Buhl*, Alt. Pal. 1896 p. 81. 82. 131 ss.; *E. Schürer*, Gesch. d. jüd. Volkes ed. 3 I. 183. 184. 185. 232. 233; II. 1-5. 11.

IUDAEI (יהודים). Nomen hoc pro incolis regni Iuda in libris antiquioribus raro adhibetur; legitur 4 Reg. 16,6: Rasin eiecit Iudaeos de Aila, et 25,25; saepius legitur apud Ieremiam 32,12; 34,9; 38,19; 40,11. 12; 41,3 etc. et apud Danielelem 3,8. 12. Post exsilium, cum fere soli ex regno iudaico exsules redirent, nomen omnino evadit commune ad eos designandos qui sint originis israelitici. Ita frequenter in libris Esdr. Neh. Esther, Mach. et in libris novi foederis, praesertim apud Ioannem.

Lingua in terra Iuda iam rege Ezechia appellatur Iudaica, ut distinguatur ab aramaica; cf. 4 Reg. 18,26. 28; 2 Par. 32,18; Is. 36,11. 12, ubi scil. legati regis petunt a Rabsace, ut loquatur אַרְבֵּי־יְהוּדִית (syriace, non iudaice), ne populus sermonem intellegat.

Iudaismus vocatur conditio atque institutio Iudaeorum, quae eorum religione, cultu, legibus continetur; cf. 2 Mach. 2,21 (graece); 8,1 dicuntur Iudaei qui legibus suis ac religioni fideles erant permansisse in iudaismo; 14,38. Et apostolus quoque scribit Galatis : audistis conversationem meam aliquando in iudaismo;... et proficiebam in iudaismo i. e. in studio, cognitione, zelo pro institutis, moribus, traditionibus pharisaicis. Eodem modo dicit apostolus Iudaeizare de observantia iudaica in cibis, in commercio cum alienigenis; cf. Gal. 1,13. 14; 2,14.

IUDAIA (יהודה, ʾAḏā), secunda uxor Mered viri ex tribu Iuda, quae ei

peperit Iared patrem Gedor et Heber patrem Socho et Icthithi patrem Zanoë (1 Par. 4,18); de emendatione textus vide s. v. BETHIA.

IUDAS (Ἰούδας). 1. Iudas Machabaeus, filius Mathathiae sacerdotis, heros maxime conspicuus in bellis machabaicis. Cognominatur Machabaeus i. e. malleator vel forte exstinctor (v. MACHABAEI). Mathathia mortuo Iudas, tertius natu ex quinque filiis eius, exercitui machabaico praeesse coepit a. 146 aer. Seleuc. (1 Mach. 2,70) seu a. 167/166 a. Chr. « Similis factus est leoni in operibus suis et sicut catulus leonis rugiens in venatione » (1 Mach. 3,4). Res ab eo gestae narrantur 1 Mach. 3,1-9,22; 2 Mach. 8-15. Dux fuit per sex fere annos (166-161 a. Chr.).

Iudae prima gesta usque ad purificationem templi (166-163 a. Chr.). Primo Apollonium ducem syriacum devicit ac ducis occisi gladio potitus est, quo in posterum utebatur (1 Mach. 3, 10-12; videtur idem Apollonius esse ac princeps tributorum 2 Mach. 5,24 et 1 Mach. 1,30[29] commemoratus). Dein Seron « princeps exercitus Syriae » apud Bethoron a Iuda fugatus est (1 Mach. 3,13-26). Quapropter Antiochus IV. Epiphanes consilia acerrima contra Iudaeos initurus, dum ipse in Parthys proficiscitur, Lysiam procuratorem regni ac tutorem filii sui constituit, qui virtutem Israel et reliquias Ierusalem extirparet. Lysias tres duces in Iudaeam misit, Ptolemaeum, Nicanorem, Gorgiam ac tanta erat spes victoriae Syrorum, ut mercatores e civitatibus maritimis a Nicanore invitati in castra venirent ad coemendos captivos Iudaeos; promiserat enim Nicanor se nonaginta mancipia iudaica venditurum pretio unius talenti, ut Romanis duo millia talentorum tributi retro debiti a Syris exsolverentur (1 Mach. 3,27-41; 2 Mach. 8,8-11 ubi Ptolemaeus accuratius dicitur dux seu praefectus Coelestriae et Phoenicis, qui res militares Nicanori et Gorgiae exsequendas reliquit). Iudas vero exercitum suum congregavit « in Maspha contra Ierusalem, quia locus orationis erat in Maspha ante in Israel » (1 Mach. 3,46;

cf. Iudic. 20-21; 1 Reg. 7,5 ss.; 10,17 ss.). Proelium commissum est prope Emmaus (hodie 'Amwās) seu Nicopolim, quo consilia Gorgiae a Iuda delusa, Syri fugati, castra eorum combusta sunt a. 166/165 a. Chr. (1 Mach. 3,42-4,25 ubi solus Gorgias, dux nocturnae expeditionis, nominatur et 2 Mach. 8,12 ss. ubi solus Nicanor, dux maioris partis exercitus, nominatur). Eodem fere tempore aller hostium exercitus, quem Timotheus et Bacchides ducebant missi a Ptolemaeo praefecto (cf. 2 Mach. 8,8), a Iudaeis deletus est (2 Mach. 8,30-33). Autumno anni 163 a. Chr. Lysias maioribus cum copiis rediit et alia via scil. a meridie per Idumaeam progressus castra posuit Bethsuris (vigesimo ab Hierosolymis milliario prope Hebron) ibique devictus est a Iudaeis numero perquam inferioribus (1 Mach. 4,28-35; pro Idumaeam et Bethsuris, quae in graeco leguntur, latina exemplaria habent Iudaeam et Bethoron). Ducibus Antiochi devictis templum hierosolymitanum a Iuda expiatum est; dedicatio templi sollemniter celebrata est die 25. mensis Casleu a. 148 aer. Seleuc. = mense Decembri anni 163 a. Chr., id est: ipso die anniversario, quo ante tres annos altare holocausti ab Antiocho IV. Epiphanē (v. ANTIOCHUS 3) profanatum fuerat. Per octo dies festum celebrarunt in modum tabernaculorum ac decreverunt Iudas et fratres eius et universa Ecclesia Israel, ut in posterum quotannis per dies octo a 25. die mensis Casleu encaenia (τὰ ἐνκαenia Io. 10,22) celebrarentur. Atque haec est institutio festi dedicationis templi, quod 2 Mach. 1,9 etiam vocatur scenopegia mensis Casleu (1 Mach. 4,36-39; 2 Mach. 10,1-8).

Iudas libertatem populi armis vetricibus munit (163-163). Primum quidem mons Sion muris turribusque firmatus est, etsi arx ipsa in potestate Syrorum permansit; Bethsur, quae est Iudaeae ianua in confinibus Iuda et Beniamin, communita est contra faciem Idumaeae (1 Mach. 4,60. 61). Dein contra finitimas gentes bella gerens Idumacos et Ammonitas devicit, Galilaeis oppressis Simonem fratrem auxilio misit, fratres in Galaad angustiis pressos

ipse cum Ionathan fratre contra Timotheum aliosque vexatores defendit, Iudaeos ex Galaad et Galilaea in Iudaeam transtulit, ubi securius degerent; interea vero Ioseph et Azarias a Iuda Hierosolymis relict, quia proprio Marte Iamnam aggressi erant, a Gorgia devicti sunt (1 Mach. 5; 2 Mach. 10 et 12). Sed etiam Lysias, Antiochi IV. absentis procurator, novo exercitu in Iudaeam irruens a Iuda prope Bethsuram iterum victus fugatusque est; comperta autem morte Antiochi IV. cum Iudaeis pacem composuit (2 Mach. 11; cf. 1 Mach 6,17).

Iudae bella contra Antiochum V. Eupatorem et Demetrium I. Soterem gesta (163-161 a. Chr.). Postquam Lysias Epiphanis filium Eupatorem regem constituit, Iudas praesidium regium in arce hierosolymitana inclusum oppugnavit; hinc novi belli occasio. Syri magno cum exercitu in Palaestinam irruerunt, prope Modin a Iuda impetu nocturno turbati sunt, Bethsuram obsederunt, apud Bethzacharam Iudaeis haud infeliciter restiterunt, montem Sion oppugnarunt. Sed quia Philippus, quem Epiphanes procuratorem regni tutoremque filii nominaverat, thronum occupare conabatur, Eupator (vel potius Lysias) Iudaeis pacem concedere coactus est et duces Palaestinae constituit Hegemonidem (vide s. v.) quendam; Philippus vero qui Antiochiam occupaverat, facili negotio a Lysia superatus est (1 Mach. 6,17-63; 2 Mach. 13). — Anno 162 a. Chr. Demetrius I. Soter, filius Seleuci IV., Lysia et Eupatore occisis thronum Syriae occupavit. Ab Alcimo, quem Iudaei propter ethnicos mores summo sacerdotio privaverant, incitatus Demetrius Bacchidem misit, ut Palaestinam expugnaret; is vero Iudam vincere non potuit. Eius loco missus est Nicanor, qui duobus proeliis apud Capharsalama et Bethoron devictus est. In memoriam victoriae apud Bethoron reportatae, ubi Nicanor ipse occisus est, institutum est festum pridie Mardochei diei i. e. die 13. mensis Adar celebrandum. Iudas igitur principatum in Iudaea sibi suisque confirmasse videbatur. Verum ut contra Syros se in tuto collocaret, per legatos foedus cum Romanis

iniit, quo et Iudaei et Romani ad mutua auxilia tempore belli praestanda se obstrinxerunt. Simul Romani Demetrio praeceperunt, ne quid contra Iudaeos socios Romanorum moliretur. At Demetrius Nicanoris clade ac morte nuntiata tanta egit celeritate, ut ruina Iudaeis immineret, antequam Romani intervenire possent. Ingens exercitus Syrorum Bacchide duce in Iudaeam irrupit primo mense anni 152 aer. Seleuc. = mense Aprili a. 161 a. Chr. i. e. uno vel duobus mensibus post cladem Nicanori apud Bethoron inflicta. Bacchides castra posuit apud Beream cum viginti millibus peditum et duobus millibus equitum, Iudas apud Laisam cum tribus millibus virorum electorum. Quia vero multi timore percussus Iudam reliquerunt, non remanserunt ei nisi octingenti; nihilominus fugere noluit, at in proelio devictus et occisus est. Ionathan et Simon fratres eius cum in sepulcro patrum suorum in civitate Modin sepelierunt (1 Mach. 7,1-9,22).

2. Iudas qui 2 Mach. 1,10 una cum synedrio epistolam scripsisse legitur Aristobulo magistro Ptolemaei regis, est Iudas Machabaeus (vide s. v. ARISTOBOLUS 1), ut iam *Lyranus*, *Bellarminus* aliique censuerunt, non vero Iudas quidam Essenus, quem Flavius Iosephus (Ant. XIII. 11,2; Bell. iud. I. 3,5) dono prophetiae insignem fuisse tradit.

3. Iudas, filius Calphi, praefectus militiae in exercitu Ionathae Machabaei (1 Mach. 11,70).

4. Iudas, filius Simonis Machabaei et frater Ioannis Hyrcani, in felici pugna cum Cendebaeo prope Modin commissa vulneratus et postmodum dolo occisus in castello Doch una cum altero fratre Mathathia et patre Simone (1 Mach. 16, 2. 9. 14); vide s. v. SIMON 3.

5. Iudas, qui fuit Ioseph, in genealogia Christi Luc. 3,30 recensetur octavus a Davide, hinc circa tempus Ioas regis fuisse dicendus est.

6. Iudas, qui fuit Ioanna, in genealogia Christi Luc. 3,26 recensetur tertius a Zorobabel. De Ioanna cf. HANANIAS 7. Putant aliqui (*Hervey*, *Genealogies* p. 118 ss.) hunc Iudam esse eundem qui Abiud Matth. 1,13 et Oduia 1 Par. 3,24.

7. Iudas Thaddaeus seu Iudas Iacobi, frater Domini. In catalogis apostolorum apud Matthaeum et Marcum enumeratur simul cum Iacobo Alphaei (Matth. 10,3; Marc. 3,18) solo nomine Thaddaei; a S. Luca vero nominatur Iudas Iacobi post Simonem zeloten (Luc. 6,6; Act. 1,13). Ipse se vocat: Iudas Iesu Christi servus, frater autem Iacobi (Iud. 1,1). Quare illud quoque « Iudas Iacobi » explicandum est: Iudas frater Iacobi; neque id a lingua graeca alienum est (cf. *Winer*, Grammatik des neutestam. Sprachidioms § 30, 3). Unde Iudas quoque inter fratres Domini recensetur (Matth. 13,55; Marc. 6, 1). Nomen Thaddaei תדאיי etiam apud talmudicos reperitur. Pro Thaddaeo Matth. 10,3 fertur etiam, uti S. Augustinus de nonnullis codicibus testatur, Lebbaeus (ita quoque codex Beza, cantabrigiensis D saeculi sexti; 122) et codices sat multi habent: Αεββ ο επικληθεις Θαδδαιος. Nomen explicant a לבב corde praeditus i. e. fortitudine insignis; qua ratione etiam Thaddaeus (תד i. e. תדמא) quandoque exponitur. Alii nomen Lebbaei a Lebba oppido Galilaeae maritimo derivare malunt, ut inde oriundus designetur (*Lightfoot* ad Matth. 10,3). Praeter ea quae de omnibus apostolis in evangeliiis et Actibus narrantur, nihil certi de Iuda constat. De iis quae a variis traduntur atque de eius epistula, quae est una ex catholicis, vide *Cornely*, Introd. III. p. 650 ss. Immerito distinguunt haud pauci moderni scriptorem epistulae ab apostolo Iuda; eorum rationes vide apud *Cornely* l. c.

8. Iudas Iscariotes. De cognomine Iscariotes vide s. v. In catalogis apostolorum Iudas ultimo loco recensetur et additur: qui et tradidit eum (Matth. 10, 4; Marc. 3,19), qui fuit proditor (Luc. 6, 16). Dubitandum non est quin Iudas cum eligeretur bonus fuerit et quin cum reliquis apostolis fuerit missus ad praedicandum potestate patrandi miracula instructus (Matth. 10,5 ss.; Luc. 9,6). Verum iam uno anno ante passionem Christi fidem veram in Christum abiecerat. Cum enim Petrus nomine aliorum respondisset Christo: verba vitae aeternae habes et nos credimus et cognovimus

quia tu es Christus filius Dei, Iesus reponit, unum ex duodecim esse diabolum, eum esse adversarium et insidiatorem impulsu diaboli agitalum (Ioan. 6,68-72). Iam fide in Christum amissa nihil aliud ex eius consorcio spectabāt, nisi commodum et utilitatem temporalem; ei inserviebat furtis ex pecunia communi commissis — fur erat et loculos habebat et ea quae mittebantur portabat Ioan. 12,6. — Crescente mala concupiscentia crevit quoque fastidium de Iesu doctrina et societate. Neque eum latuit odium letale quo synedristae Iesum prosequerentur. Amore pecuniae obcaecatus de Christo iam nihil sperari posse ob continuum doctrinam de abnegatione, humilitate sibi persuasit. Quare vitam suam in tuto collocare studens et pecuniam corrogare voluit antequam a Christo recederet et cum principibus in gratiam redire. Cum itaque lucrum illud trecentorum denariorum quod, iunctione in Bethania perditum vidit (Ioan. 12,5) fur arripere non posset, inspiravit ei Salan offerri iam eximiam opportunitatem et pecuniae acquirendae et favorem synedristarum sibi conciliandi, cum illi quaererent quomodo Iesum caperent. Unde mox post coenam illam in Bethania abiit ad principes sacerdotum et suum consilium enuntians: quid, inquit, vultis mihi dare et ego vobis eum tradam (Matth. 26,15) i. e. si tradam, vel ut tradam. Illi constituerunt ei triginta argenteos. Nam cum iam a synedrio decretum esset, ut si quis nosset ubi Iesus esset indicaret (Ioan. 11,56), ex opinione sacerdotum Iudas, ut quisvis alius, tenebatur ad Iesum prodendum; quare ei pecuniam statuunt non pro auctoritate eius quem capere volebant, sed solum pro labore et incommodo Iudae. Evenit Iudae quod solet peccatoribus accidere. Ante scelus minime recogitant, concupiscentia obcaecati, quid ex scelere consequi possit; post scelus autem facile in desperationem propelluntur. Ita Iudas a diabolo instigatus surdus est ad omnes Christi in coena paschali admonitiones, surdus ad gravissima Christi verba: bonum erat ei, si natus non fuisset homo ille, amice ad quid venisti (Matth. 26,24. 50) et prae vehementissimis animi commo-

lionibus ne cogitasse quidem videtur neque ei curae fuit quid ex proditiōe sequeretur. Sed postea cum cerneret quid tandem effecisset, i. e. cum Iesus traderetur Pilato et ad mortem inferendam procuratori romano sisteretur, desperavit et desperatione obrutus et a sacerdotibus dure et cum opprobrio repulsus laqueo se suspendit (Matth. 27, 3-5). Et praecepto factus *πρηνής γένόμενος*, crepuit medius et diffusa sunt omnia viscera eius (Act. 1, 18); cecidit itaque postquam se suspenderat, in terram et crepuit medius. Narrationes de morte eius fabulosae feruntur apud Papiam, quas referunt quoque Apollinarius (in Catena graeca, *ed. Cramer*, ad Matth. 27, 5), Euthymius, Theophylactus etc..

Movetur quaestio interfuerint Iudas institutioni S. Eucharistiae. Qui affirmant potissimum nituntur narratione Luc. 22, 21, ubi scil. statim post verba consecrationis calicis additur: verumtamen ecce manus tradentis me mecum est in mensa. Attamen hisce res definiri nequit. Nam secundum alios evangelistas verba ea dicta sunt ante institutionem (cf. Matth. 26, 21; Marc. 14, 20; Ioan. 13, 18 post lotionem pedum). Neque narratio Lucae repugnat. Nam ibi Lucas cum sequitur ordinem, ut referat coenam paschalem, dein institutionem, dein aliqua quae vel ante coenam paschalem vel inter eam et coenaculo relicto dicta et facta sunt. Ita disceptationem discipulorum quis eorum esset maior v. 23 ss. non esse factam post institutionem Eucharistiae, verum vel ante coenam vel ante lotionem pedum plerique sentiunt. Proinde merito etiam v. 21. 22 eodem loco collocari dixeris, praesertim cum id ex aliis synopticis manifestum sit. Accedit quod Ioan. 13, 30 Iudas accepta buccella *exivit continuo* i. e. lotionem pedum peracta cum Iesus recubisset iterum quaestione de proditore facta Iesus ei intinctum panem porrexit more patrisfamilias qui aliquem ex convivis honorare vult. Proinde porrexit buccellam coena paschali seu manducatione nondum finita. Sed accepta buccella Iudas exivit continuo, ergo ante institutionem Eucharistiae quae non fiebat nisi postquam coenavit (1 Cor. 11, 23); ad quam Eucha-

ristiae institutionem quasi inaugurandam mirifice faciunt verba, quae Iesus dixit Iuda egresso: nunc clarificatus est Filius hominis etc. Ioan. 13, 31 ss.

Iis quae ex evangelica narratione colliguntur addenda sunt testimonia antiquitatis. Iam enim a Tatiano ita textus sacer est dispositus, ut Iudas ante institutionem abiisse dicatur; S. Ephraem id explicite asserit; idem traditur in Constitutionibus apostolorum (3, 14; *M.* 1, 873) et a S. Aphraate et a S. Hilario in Matth. et a S. Cyrillo (cf. *Cortuy*, Comment. in evang. S. Ioan. *ed.* 2 p. 322; *Cornely*, *Introd.* II. p. 298; *Knabenbauer*, *Comm. in Matth. ed.* 2 II. p. 447). Praeterea ei sententiae accedunt *Rupertus*, abbas tuitiensis, *Petrus Comestor*, *Innocentius III.*, *Turrianus*, *Salmeron*, *Baradius*, *Lamy* et recentiorum plurimi, uti II. cc. exponitur.

Cum narratio evangelica adeo plana sit de moribus Iudae, iure miraberis quod non defuerunt qui Iudam non amore pecuniae Christum tradidisse affirmarent, verum ut eum cogeret tandem aliquando regnum suum fundare; firmiter enim Iudam regnum prospexisse temporale; unde impatienti eius regni expectatione et desiderio esse impulsus, ut id arriperet quod sibi videretur conducere ad huius regni conditionem: proinde cum evasisse proditorem Iesu non odio instigatum, sed amore Iesu ductum, quem regnum suum quantocius capessere vellet. Unde tristem eius exitum quasi herois tragici esse lamentandum, quippe qui errore veluti fato suo deceptus, cum praecleara moliri vellet, periisset. Verum non opus erit pluribus demonstrari haec fingi non solum gratis, sed frivole et impie.

Iudam interitui aeterno sese addixisse, ex verbis Christi concludendum erit: bonum erat ei, si natus non fuisset. Et enim si quando ad beatitudinem caelestem esset perventurus, quam maxime bonum ei esset quia natus esset. Insuper gravia sunt Christi verba: quos dedisti mihi custodivi et nemo ex eis periit, nisi filius perditionis (Ioan. 17, 12); nam: qui manducavit mecum panem, levabit contra me calcaneum suum (Ioan. 13, 18 Ps. 40, 10).

Quaerunt quoque cur Iesus eum elegerit ad apostolatam quem proditorem fore praesciebat. Respondet *Toletus* : posses eadem ratione quaerere, cur Deus creaverit angelos quos sciebat fore daemones, cur fecerit Adam quem sciebat peccaturum etc. Varias porro afferuntur rationes, cur is quoque inter apostolos assumptus sit. Multa utique excogitari possunt et prolata sunt a S. Ambrosio, Augustino, Thoma, Toletio, Sylveira etc. (cf. *Knabenbauer*, Comm. in Matth. ed. 2 I. 394-2). Sufficiat dicere rem satis explicari parabolis illis de regno Dei, quibus declaratur partem seminis perire, zizania simul cum tritico crescere, in sagena capi pisces bonos et malos. Iam coetu apostolorum et discipulorum prima nobis exhibetur forma regni Dei, quare haud mirum in ea quoque iam apparere quod malitia hominum et abusu liberi arbitrii a regno Dei hisce in terris constituto nunquam aberit.

9. Iudas Galilaeus (Ἰουδᾶς ὁ Γαλιλαῖος), dux rebellium Iudaeorum in diebus professionis (Vulg.) seu descriptionis, de quo Gamaliel coram synedrio mentionem fecit (Act. 5,37). Descriptio intelligitur non illa prior, de qua Luc. 2,4-5 agitur, sed altera, quam Sulpicius Quirinius legatus Syriae in Iudaea habuit anno 6 vel 7 p. Chr. (*Flav. Ios. Ant.* XVIII. 2,1 : anno 37 aerae Actiacae, quae incipit a Caesaris victoria Actiacae anno 31 a. Chr.). Iudaeorum qui hunc censum impedire conabantur, praecipuus concitator erat Iudas Gaulanites ortus ex oppido Gamala ad orientem lacus Tiberiadis (*Ant.* XVIII. 4,4), cognominatus Galilaeus (l. c. 4,6; XX. 5, 2; *Bell. iud.* II. 8,4; 47,8); ratio huius cognominis non ex eo repetenda est, quod Gamala Gaulanitidis ad Galilaeam pertinuerit (*Smith-Fuller*, Dict. of the Bible I. p. 1831^a), sed ex eo quod ille Iudas ex Galilaea in Iudaeam ad seditionem concitandam perrexit et iam antea in Galilaea seditiosus fuerat; est enim haud dubie idem ille Iudas, qui Herode Magno mortuo coacta profligatorum hominum caetera totam Galilaeam infestaverat, filius Ezechiae latronum praefecti (*Ant.* XVII. 40,5; *Bell. iud.* II. 4,1). Iudas

igitur et Sadducus quidam Pharisaeus plebem contra legatum Romanorum concitarunt simulatione libertatis ac religionis vindicandae. Seditio quidem reprimebatur et ex verbis Gamalielis Act. 5,37 ipse Iudas hac occasione periit. Verum ex asseclis Iudae orta est nova secta Iudaeorum praeter Essenos, Sadducaeos, Pharisaeos, scilicet Zelotarum, qui ceteroquin cum Pharisaeis sentientes non patienti expectatione messianicae salutis, sed vi armorum contra hostes agendum esse populo persuadebant. Eorum conatibus merito adscribuntur seditiones subsequentes et magnum bellum sexaginta annis post exardescens. Duo quoque filii Iudae, Iacobus et Simon, insignes zelotes erant et Tiberio Alexandro Iudaeam procurante cruci affixi sunt (*Ant.* XX. 5,2); alius filius Manahemus erat ex praecipuis ducibus seditionis a. 66 et criminum suorum poenas ipse quoque crudeli supplicio exsolvit (*Bell. iud.* II. 17,8. 9; Vita 5. 11).

10. Iudas qui Damasci Saulum conversum recepit in domum suam, quae erat in vico, qui vocatur Rectus (Act. 9,11). Designatur via recta (ἡ ἐϋμή ή καλουμένη εὐθεία) urbem intersecans ab oriente occidentem versus, quae hodie quoque appellatur via recta (*Derb el-Mustaqim*) et in qua haud procul a porta occidentali ostenditur domus Iudae; cf. *Felten* ad h. l. et vide s. v. DAMASCUS 2 (col. 17. 18).

11. Iudas Barsabas v. BARSABAS 2.

IUDEX, IUDICIUM. Tempore patriarcharum munus iudicandi, lites dirimendi, scelera puniendi penes principes vel capita familiarum erat. Ita Iudas nuntio accepto Thamar nurum suam esse fornicatam fert sententiam : producite eam ut comburatur (Gen. 38, 24). Sed cum Israelitae in Aegypto opprimerentur et a magistris operum regerentur et affligerentur (Ex. 4,11), eiusmodi potestas capitum familiarum plane extincta est vel in oblivionem abiit; nam primo tempore post egressum ex Aegypto solus Moyses munere iudicis fungitur (Ex. 18,13), ad quem populus de mane usque ad vesperam venit quaerens sententiam Dei. Verum suadente lethro cognato Moyses

e populo elegit chiliarchas, centuriones, quinquagenarios, decanos (qui praeesent viris mille, centum, quinquaginta, decem), qui iudicaret populum omni tempore et res solum graviore ad Moysen referrent (Ex. 18,17-26; Deut. 1,9-15). Hisce praecepit Moyses: audite illos et quod iustum est iudicate, sive cives sit ille, sive peregrinus; nulla erit distantia personarum; ita parvum audietis ut magnum; nec accipietis cuiusquam personam, quia Dei iudicium est (Deut. 1, 16. 17). Quibus verbis simul enuntiatur Deum, utpote regem populi quem peculiari foedere sibi coniunxerat, esse summum iudicem populi aliosque iudices fungi vice Dei, esse quasi instrumenta Dei per quae Deus ferat sententiam. Quare sententia iudicis dicitur sententia Dei, et iudices adire est venire ad Deum (Ex. 22,8 hebr.), et iudices etiam simpliciter Elohim dicuntur (cf. Ex. 21,6; 22,8; Ps. 81,1). Uti iudices hos iussit Moyses res difficiliore ad se referre, ita pariter statuit pro tempore futuro, ut causae graviore iudicarentur in loco quem elegeret Deus a sacerdotibus et a iudice qui esset illo tempore (Deut. 17,8). Atque quae Moyses ordinarat, sub Iosue etiam permansisse censenda sunt; nam praeter duces etiam iudices nominantur Ios. 8,33 et 23,2 (hebr.) et 24,1. Mortuo Iosue satis magna rerum perturbatio orta est, quae describitur Iud. 17,6 et 21,24: in diebus illis non erat rex in Israel, sed unusquisque quod sibi rectum videbatur hoc faciebat. At eo quoque tempore et seniores civitatis et viri illi qui singulari ratione iudices appellantur iudicia exercebant (cf. Iud. 4,4. 5; 1 Reg. 7,15 ss.); praeterea in singulis tribubus **בְּחֻקֵּיהֶם** commemorantur (cf. Iud. 5,9. 14). Tempore regum summus iudex censebatur rex (cf. 2 Reg. 14,4; 15,2 ss.); quare munus regium eo quoque nomine designatur: dabis ergo servo tuo cor docile, ut populum tuum iudicare possit (3 Reg. 3,9 ss.; 4 Reg. 15,5; 2 Par. 1,10) et in palatio Salomonis vestibulum ad iudicia habenda destinatum esse narratur (3 Reg. 7,7). Praeter regem munere ordinario iudicum funguntur

seniores et principes (cf. Ier. 26,10. 17); insuper David ex levitis elegit sex milia praepositorum et iudicum (1 Par. 23,4; cf. 26,29) et Iosaphat rex « constituit iudices terrae in cunctis civitatibus Iuda munitis per singula loca... in Ierusalem quoque constituit Iosaphat levitas et sacerdotes et principes familiarum ex Israel, ut iudicium et causam Domini iudicarent habitatoribus eius » (2 Par. 19,5. 8).

Hisce itaque ea videmus observari quae Moyses praescripserat: iudices et magistros (**שֹׁפְטִים** praepositos) constitues in omnibus portis tuis quas Dominus dederit tibi per singulas tribus tuas, ut iudicent populum iusto iudicio; non accipies personam nec munera (Deut. 16,18) et ad eiusmodi munus seniores esse eligendos clare quoque indicatur (Deut. 21,19; 22,15; 25,7); summum vero tribunal, ad quod causae graviore deferri debent, constituitur in loco quem elegerit Dominus (Deut. 17,8 ss.).

Tamquam forum ius dicendi assignatur porta urbis (Deut. 21,19; 22,15; Ps. 126,5; Ruth 4,1; Prov. 22,22; 31,23; Am. 5,15 etc.). Iudices iubentur attente audire causam (Deut. 1,16). « Quem iustum esse perspexerint, illi iustitiae palmam dabunt, quem impium condemnabunt impietatis; sin autem eum qui peccavit dignum viderint plagis, prosternent et coram se facient verberari; pro mensura peccati erit et plagarum modus, ita dumtaxat, ut quadragenarium numerum non excedant » (Deut. 25,1-3). Praeter verbera multa quoque pecuniaria poterat imponi; aliis sceleribus poena mortis, lapidationis erat proposita (cf. Ex. 22,1 ss.; Lev. 23,14; Num. 15, 36; Deut. 13,9; 17,7; 22,19. 21 ss.). Ad aliquem condemnandum saltem duo testes requirebantur; « nemo occidatur uno contra se dicente testimonium... sed in ore duorum aut trium testium stabit omne verbum » (Deut. 17,6; 19,15). Testes sollempni adiuratione obsecrabantur, ut verum dicerent et ut manifestarent quaecumque scirent (cf. Lev. 5,1; Prov. 29,24). Testis qui mendacii erat convictus ea poena erat affligendus

quam alteri suo falso testimonio irrogari voluit (Deut. 19,16-21). Qui innocens erat accusatus vel in quem suspicio criminis ceciderat, poterat se iuramento purgare; cf. Ex. 22,8. 11. Quandoque etiam sorte inquirebatur reus; vide Is. 7,14; 1 Reg. 14,41; nam sortes mittuntur in sinum, sed a Domino temperantur Prov. 16,33 cf. 18,18; talis modus adhibebatur, si mulier adulterii suspicionem incurrit, uti lege zelotypiae exponitur Num. 5, 12-31. Iudicibus quam maxime commendatur, ut viduarum et pupillorum iura tucantur; cf. Deut. 24,17; 27,19; Is. 1,17; Ier. 7,6; 22,3.

Verum praecepta iudicibus data saepe esse neglecta, multis illis prophetarum querelis et reprehensionibus abunde monstratur: principes tui infideles, socii furum; omnes diligunt munera, sequuntur retributiones; pupillo non iudicant et causa viduae non ingreditur ad illos (Is. 1,23); qui iustificatis impium pro muneribus et iustitiam iusti aufertis ab eo (Is. 5,23; cf. 10,1. 2); causam viduae non iudicaverunt, causam pupilli non direxerunt et iudicium pauperum non iudicaverunt (Ier. 5,28; cf. Ez. 22,7; Am. 5,12; 6,13); principes eius in muneribus iudicabant (Mich. 3,11; 7,3; Mal. 3,5 etc.).

Exsules quoque Iudaei in Babylonia suis utebantur iudicibus. Fortasse iudices isti a rege babylonico designabantur, uti Iudaeis in Palaestina relictis Godolias Iudaeus a rege erat praefectus. Generatim enim apud veteres non erat moris rerum omnium administrationem una eademque norma continere, sed plerumque gentibus subiectis propriae leges ac consuetudines relinquebantur. Quare plane immerito ab aliquibus in dubium revocatur quod Dan. 13,5 narratur: « et constituti sunt de populo duo senes iudices, et veniebant ad eos omnes qui habebant iudicia »; et in historia Susannae specimen quoddam iudicii nobis praebeatur.

Eodemque modo reduces ex exsilio iudices ex sua gente habebant. Nam Artaxerxes rex Esdrae inter alia concessit decreto scripto: tu autem Esdra secundum sapientiam Dei tui quae est in manu tua constitue iudices et prae-

sides, ut iudicent omni populo qui est trans flumen (scil. Euphraten; Esdr. 7,25; cf. 10,14). Tamquam legem a Moyse latam Flavius Iosephus refert: qualibet in urbe praesint septem viri et in virtute et in studio iusti exercitati; unicuique autem magistratui tribuantur duo ministri e tribu levitica (Ant. IV. 8,14); insuper narrat quomodo ipse per singulas civitates minorum litium iudices instituerit et graviora negotia causasque capitales ad se et septuaginta viros remitti iusserit (Bell. iud. II. 20,5). Unde colligendum videtur in more positum fuisse apud Iudaeos, ut in singulis civitatibus collegium iudicum haberetur, ad quod septem ex senioribus et probis viris eligebantur. Atque iudices in civitatibus esse constitutos, etiam in narrationibus evangelicis supponitur; cf. Matth. 5,22; 10,17; Marc. 13,9; Luc. 12,14; 18,2. In tractatu Sanhedrin dicitur iudicia pecuniaria, de rapinis et laesione, de restitutione, de vi et seductione fieri a tribus; pro oppidis incolarum 120 vel secundum alios 230 constituendum esse collegium iudicum viginti trium (cf. *Surenhusius* IV. p. 207. 214; *Ugolini*, Thes. XXV. p. 2. 4). Verum nemo ignorat minime fidem esse adhibendam omnibus iis quae in tractatibus talmudicis narrantur. Res autem graviores et ea de quibus iudices minores civitatum inter se non consentiebant referri debebant ad synedrium in Ierusalem constitutum, quod ex 71 assessoribus constabat, scribis scil. seu legis peritis, sacerdotibus e pontificum familiis et senioribus (cf. Marc. 14,53). Eius synedrii potestas etiam extra Iudaeam agnoscebatur, uti patet Act. 9,2 et 22,5 et 26,12, cum Saulus ab eo accipiebat epistulas, quibus Iudaei damasceni iubebantur Christianos victos ei tradere. Sed ius gladii synedrio a Romanis erat ablatum (cf. Ioan. 18,31).

Verbum iudicii praeter notionem usitatam alias quoque in Vulgata induit significationes, uti hebr. מִשְׁפָּט; ita dicit potestatem indicandi, regendi, dominandi; cf. Ez. 24,27; Apoc. 20,4; pariter decreta Dei, leges et praecepta appellantur iudicia; item ius, id quod

rectum et iustum est, quod proinde normae iuris et iustitiae, normae legis conforme est; unde facere iudicium, quaerere iudicium etc. ex contextu explicari oportet, utrum de actu iudiciali, an de observatione recti iustique sit accipiendum vel de norma rebus congrua et apta. Unde vox hebraea saepius morem, consuetudinem, ritum designat et in Vulgata etiam plerumque iis verbis vel similibus redditur (Lev. 5,10 alterum adolebit in holocaustum, ut fieri solet; cf. 3 Reg. 18,28; 4 Reg. 11,14; 17,33); retinetur vox iudicii Ps. 118, 132 : miserere mei secundum iudicium diligentium nomen tuum i. e. ex hebr. uti misereri soles diligentium nomen tuum. — Pectorale summi sacerdotis vocatur rationale iudicii, ubi iudicium refertur ad sententiam Dei exquirendam a pontifice per Urim et Thumim quae in illo pectorali recondebantur (cf. Ex. 28,30).

I. KNABENBAUER.

IUDI (יְהוֹדָה, 'Ioudah), filius Nathaniae, per quem principes Ierusalem Baruch ad se arcessiverunt, ut sibi afferret volumen sermonum Ieremiae, uti Ier. 36,14 narratur. Idem vir Iudi etiam legit volumen coram principibus et rege Ioakim Ier. 36,21. 23. Cum nomen viri hebraicum significet Iudaeum, putant aliqui nomen non esse proprium sed appellativum, eumque vocari Iudaeum quia ex progenitoribus cushitis descendens generatione tertia (filius erat Nathaniae filii Selemiae filii Chusi i. e. Cushitae?) Iudaeus sit effectus; cf. Deut. 23,9. Vide s. v. CHUSI 3.

IUDICIUM UNIVERSALE. Deum iustum iudicem non solum singulis redditurum esse secundum opera, sed etiam actione quadam de universo genere humano in unum collecto sententiam iudiciale m laturum esse, docemur explicite verbis Christi. Eius iudicii iudicium quoddam cernitur iam apud Daniele m : et multi de his qui dormiunt in terrae pulvere evigilabunt, alii in vitam aeternam et alii in opprobrium, ut videant semper (Dan. 12,2). Idque Christus explicat; sibi potestatem datam esse a Patre « iudicium facere; et venit

hora in qua omnes qui in monumentis sunt audient vocem Filii Dei et procedent qui bona fecerunt in resurrectionem vitae, qui vero mala egerunt, in resurrectionem iudicii » (Ioan. 5,27-29). Quod iudicium elarius describitur Matth. 25,31-46; veniet Iesus in maiestatem et angeli cum eo, et congregabuntur ante eum omnes et separabit eos ab invicem, oves a dextris suis, hoedos a sinistris; utrisque opera et quae inde meriti sint, sententia iudiciali annuntiat.

Idem praedicant apostoli : statuit Deus diem, in quo iudicaturus est orbem in aequitate in viro in quo statuit fidem praebens omnibus suscitans eum a mortuis (Act. 17,31). Christus iudicaturus est vivos et mortuos (2 Tim. 4,1); reddent rationem ei qui iudicaturus est vivos et mortuos (1 Petr. 4,5). Vocatur hoc iudicium dies Domini, qui in igne revelabitur quo opera cuiusvis probentur (1 Cor. 3,13); vocatur revelatio Domini Iesu de caelo cum angelis virtutis eius, in flamma ignis dantis vindictam iis qui non noverunt Deum et qui non obediunt evangelio (2 Thess. 1,7. 8). Signa quibus adventus eius ad iudicium indicatur, exponuntur Matth. 24,29. 30; Marc. 13, 24; Luc. 21,25 in maxima quadam mundi machinae perturbatione : sol obscurabitur et luna, virtutes caelorum commovebuntur, stellae cadent de caelo, signum Filii hominis parebit in caelo. Effectus eius iudicii est : ibunt iusti in vitam aeternam, peccatores in supplicium aeternum (Matth. 25,46), et caeli magno impetu transient, elementa calore solventur, terra autem et opera in ea exurentur; novos vero caelos et novam terram expectamus (2 Petr. 3,10. 13).

IUDICUM AEVUM. Iudicium (יִשְׁפֹּטִים, κρίσις) liber in canone V. T. librum Iosue consequitur, praecedit vero apud Hebraeos librum 1 Sam., in LXX et Vulgata librum Ruth. Nomen inde habet, quod fere totus, scil. cap. 1-16, eorum virorum acta enarret, qui indices vocantur. Quibus actis cap. 17-21 accedunt narrationes duae, de idolo Michae et de scelere Gabaitarum, quae locum habuerunt ante iudicium acta, circa tempus mortis Iosue. Iudicium autem acta oratio sunt e variis historia-

rum documentis consilio et arte confecta eamque demonstrans veritatem, ubi Israelitae a cultu Iahwe ad gentiliū idola deficerent, consuevisse Iahven eos gentilibus permittere opprimendos; ubi ad poenitentiam converterentur, eos per iudices liberasse.

Seniores apud Hebraeos vel ante Moysen erant Ex. 3,16. Demortuis Moysē et Iosue, quorum auctoritas inter Hebraeos suprema fuerat, summa rerum penes seniores fuisse videtur. Erant iidem etiam *iudices* et civium causas dirimebant in porta civitatis : cum Ruth 4,2 cf. Deut. 16,18; 17,8; item Dan. 13,5. Quae rerum administrandarum ratio tota et unice ex familiae ratione credenda est effloruisse. Seniores ipsa erant familiarum capita, quibus utique quandoque accensebantur aliqui sapientia vel fortitudine insignes. Nulla erant publica munera, non aerarium, non vectigalia, non exercitus. Si hostis ingrueret, quae arma prae manibus erant, prehendebat

quisque, ipsa familiarum capita duces erant, annonam quisque providebat, iudices iidem erant belli duces, ars bellica aut violentia constabat aut insidiis. Neque raro tamen ob aliquorum desidiam dilabebantur omnia, populusque pugnae incertae praeferebat tributum annuum hostibus ex conducto pendendum. Iudicum igitur institutum de se gravibus rei publicae periculis par nequaquam exstitit; tamen populo in extremum discrimen vocato Deoque specialius providente, insignes illos viros produxit, quorum acta liber Iudicum enarrat.

Tres ipse liber distinguit epochas, quae sollemni aliquo divino eloquio singulae ordiuntur : 2,1-5; 6,8-10; 10, 11-14. Aliquorum iudicum sola fere nomina recensentur, aliorum acta fusi⁹ narrantur et primum quidem Israelitae a gente aliqua ethnica in poenam peccatorum subacti, dein iidem a iudice liberati. Habetur igitur

Iud. 3,8 servitus Chusan.....	annis 8
— 3,11 requies per <i>Othonielem</i> obtenta.....	— 40
— 3,14 servitus moabitica.....	— 18
— 3,30 requies per <i>Aod</i> obtenta.....	— 80
— 4,3 servitus Chananaeorum.....	— 20
— 5,31 requies per <i>Debboram</i> obtenta.....	— 40
— 6,1 servitus madianitica.....	— 7
— 8,28 requies per <i>Gedeonem</i> obtenta.....	— 40
— 9,22 Abimelechi tyrannis.....	— 3
— 10,2 <i>Thola</i>	— 23
— 10,3 <i>Iair</i>	— 22
— 10,8 servitus ammonitica.....	— 18
— 12,7 <i>Iephthae</i> principatus.....	— 6
— 12,9 <i>Abesan</i>	— 7
— 12,11 <i>Ahialon</i>	— 10
— 12,14 <i>Abdon</i>	— 8
— 13,1 servitus philisthaica, includens etiam annos 20 <i>Samsonis</i>	— 40

Singuli iudices non sunt censendi toti Israeli praefuisse. Othoniel ubi pugnaverit quibusve sociis, non constat; fortasse solis tribubus Iuda et Simeon praeerat. Aod, quo tempore tribus Benjamin vix non erat extincta (Iud. 21), Ephraimitas ad bellum vocavit (3,27). Inter tribus 3,14 ss. a Debbora enume-

rantur expeditionis sociae, certe desiderantur Iuda et Simeon. Gedeon 6,35 vocat Manassen, Aser, Zabulon, Nephthali; Ephraimitis 8,1-3 non imperabat, regiam dignitatem 8,23 fortasse eorum imprimis reverentiae recusavit. Iephthen sequuntur Manassaei transiordanici 11, 29, forlasse etiam Ruben et Gad. Ephrai-

mitae 13,2 vocati non prae buerunt auxilium, postea proelio fusi sunt; sed nulla est ratio affirmandi aut Iephthen post illud proelium illos subegisse, aut illos sponte ei obsecutos esse. Videntur tempore Gedeonis et Iephthe Ephraimitae et Manassaei invicem fuisse infensi, sane quod illi post Iosuen sibi primum domus Ioseph vindicarent, dum hi origine gloriarentur e filio Ioseph primogenito. Samson ne ipsis quidem Danitis imperasse legitur, solus pugnabat.

Sed, si singuli iudices non toti Israeli imperabant, singulaeque illa bella non omnium erant tribuum, tum neque ex annis supra descriptis certa atque continua confingi potest chronologia. Potuerunt eorum bellorum aliqua a quibusdam tribubus eodem fere tempore geri, quo apud alias « requies » praecedente victoria comparata perdurabat. Certa chronologia ideo etiam confingi nequit, quod plures numeri tradantur « rotundi » (40, 80, 20, 40, 40, 20) i. e. plus minusve accurati. Unus in Iudicium libro numerus legitur, qui temporibus quidem Pentateuchi nectitur, sed et ipse « rotundus » est: 11,26 Iephthe a tempore occupatae a Moysse Hesebonis usque ad sua tempora 300 effluxisse annos affirmat.

Cultum divinum iudicum aevo fuisse substantialiter eundem, qualis a Moysse fuerat institutus, imprimis demonstrat narrationis pars antiquissima Iud. 17-21. Habes 20,27 ss. arcam et Phineen, Aaronis nepotem, pontificem (cf. 18,31), habes Moysen 18,30. Levitarum excellentiam confirmat narratio 17 ss. In actis Iud. 3-16 nulla erat occasio faciendae mentionis eorumdem sacrorum; sed narrationem libri Num. explicite appellat Iud. 11. Fuerunt utique aliqua iudicum aevo contra legem acta: sacerdotium a levita attentatum, idola Michae, idololatria Sichemitarum, sacrificium humanum Iephthe. Haec legem mosaicam tum non exstissem tam parum efficiunt, atque infanda quaedam inter christianos commissa scelera demonstrant religionem christianam esse figmentum.

Iudicum aevo erant utique Hebraeorum res tam religiosae quam civiles minus florentes. Erat illud tempus

transitionis, quod rerum meliorum suggerebat desiderium. Terra promissa gradatim subigebatur, ab hostibus invadebatur, ab Hebraeis rursum liberabatur. Ubique bella et tribuum invidiae, vix quidquam certum aut stabile. « Sermo Dei erat rarus in diebus illis » (1 Reg. 1,3), « et non surrexit ultra propheta in Israel sicut Moyses » (Deut. 34,10). Ex altera autem parte « in diebus illis non erat rex in Israel » (Iud. 17,6; 18,1. 31; 21,24). Volebat Deus, ut haec instituta eo ardentius primum expeterentur, quo religiosius postea observarentur. — Cf. 1 Reg. 12; 2 Reg. 7,11; 4 Reg. 23,22; 1 Par. 17,6. 10; Eccli. 46, 11 ss.; Hebr. 11,32 ss.

IUDITH. 1. Iudith (יְהֻדִית, Ἰουδίθ).

filia Beerī Bethaei (Gen. 26,34). Eadem vocatur Oolibama Gen. 36,2. 5. 14. 18. Vide s. v. ANA 2 in vol. I. col. 237. 238 et cf. *Cornely*, *Introductio*. ed. 2 II. 1 p. 123-4; *F. de Hummelauer*, *Comm.* in Gen. p. 518-9.

2. Iudith (Ἰουδίθ), celebris illa vidua, quae occiso Holoferne Bethuliam ab Assyriis obsessam liberavit, cuius res gestae ex solo libro eius nomine inscripto innotescunt. Erat (Iudith 8,1) filia Merari, filii Idox, filii Ioseph, filii Oziae, filii Elai, filii Iamnor, filii Gedeon, filii Raphaim, filii Achitob, filii Melchiae, filii Enan, filii Nathaniae, filii Salathiel (Σαλαμιήλ), filii Simeon, filii Ruben (Ἰσραήλ). Salamiel (ita pro Salathiel Vulgatae legendum) erat filius Surisadai et princeps tribus Simeon (Num. 1, 6; 2,12; 7,36. 41; 10,19). Dubium non est quin loco Ruben legendum sit Israel cum codd. S, B, versione syriaca (Itala habet: filii Symeon, filii Ruben, filii Israel). Erat igitur Iudith ex tribu Simeon (cf. Iudith 9,2), sicuti etiam eius vir Manasses secundum textum graecum 8,2: τῆς φυλῆς αὐτῆς καὶ τῆς πατριᾶς αὐτῆς.

De historia Iudith cf. *Montfaucon*, *La vérité de l'histoire de Judith*, Paris 1690; *Niches*, *De libro Iudithae* p. 16 ss.; *Robiou*, *Deux questions de chronologie et d'histoire éclaircies par les annales d'Assurbanipal in Revue archéol.*, nouv. sér. XXX. 1875 p. 23 ss. 80-82; *Delattre*, *Le peuple et l'empire des Mèdes*, in *Mémoires de l'Académie*

de Bruxelles XLV. 1883 p. 148 ss.; *id.* Le livre de Judith, Paris 1884; *Palmieri*, De veritate historia libri Judith, Gulpen 1886; *Neldeler*, Untersuch. d. gesch. u. d. kanon. Geltung des Buches Judith, Münster 1886; *Brunengo*, Il Nabucodonosor di Giuditta, Roma 1888; *Riessler*, Chronol. Fixirung der Heldenthat Judiths, in periodico Katholik 1894 II. p. 1 ss.; *Fl. de Moor*, Le livre de Judith 1895; *Vigouroux*, La Bible et les déc. mod. ed. 6 IV. 99-131.

Allegorice narrationem libri Iudith interpretatus est imprimis *H. Grotius* (Opp. ed. Basil. 1732 I. p. 578). Simili ratione eam concipiunt *J. Jahn* (Einleitung p. 919), *Movers* (Bonn. Zeitschr. f. Philos. u. Theol. XIII. p. 47 s.), *Fr. Lenormant* (Lettres assyriol. I. p. 72; La divination chez les Chaldeens p. 183 s.).

Allegorico-propheticam esse narrationem censet *Ant. Scholz* (D. B. Judith eine Prophetie 1885; Commentar z. B. Judith 1887 et 1896).

IUGALIS bis occurrit in Vulgata pro iugo equorum (יֶגֶל 2 Reg. 8,4) vel bouum aliorumve iumentorum (יֶגֶל Ier. 51,23).

IUGUM. Uti hodie, ita olim in Palaestina iugum animalibus impositum lignum vel tignum est transversarium, quod cervici iumenti imponitur et fune sub collo firmatur et temoni connectitur. Eius descriptionem et figuram vide v. g. in Zeitschrift d. D. Pal.-Ver. IX. p. 28; XII. p. 159. Vacca rufa quae non portaverit iugum requirebatur ad parandam aquam lustrationis Num. 19,2; cf. Deut. 21,3; vaccae quae non portaverant iugum seliguntur ad arcam vehendam 1 Reg. 6,7. Frequentissime iugum sensu translato dicitur de servitute, oppressione; ita iugum ferreum Deut. 28,48; durissimum, gravissimum 3 Reg. 21,4 ss.; iugum oneris Is. 9,4; unde iugum confringere idem est ac se dominio et obedientiae alicuius subtrahere Ier. 2, 20 et vide actionem symbolicam Ier. 28, 2 ss. Christus quoque ait : tollite iugum meum super vos; sed addit : iugum meum suave Matth. 11,29. 30.

IULIA (Iulias?) Rom. 16,15 : salutate Philologum et Ἰουλίαν. Quae sunt Iulias, nomen mulieris, vel Iulias, nomen viri. Sed cum l. c. sequatur : salutate Nereum et sororem eius, communiter

nomen feminae, fortasse uxoris Philologi explicant.

IULIUS (Ἰούλιος), centurio cohortis Augustae (παίρης Σεβαστῆς); est scil. Augusta appellatio honorifica quae copiis auxiliariis indebatur. Ita in inscriptionibus invenitur : ala augusta ob virtutem appellata. Huic centurioni Paulus, qui Caesareae captivus fuerat, traditus est, cum in Italiam esset navigandum Act. 27,1. Hic Paulum benigne habuit eique Sidone permisit ad amicos ire et curam sui agere 27,3. Et cum venisset Lystram quae est Lyciae, centurio captivos et Paulum in navem alexandrinam navigantem in Italiam transposuit 27,6. Cum centurio Paulo suadenti ne tolleretur a Creta non obsequeretur, evenit quod Paulus praedixerat; multis periculis obiiiciebantur; naufragio facto milites captivos volebant occidere ne quis cum enatasset effugeret; centurio autem volens servare Paulum prohibuit fieri Act. 27,7-42.

IUMENTUM explicantur in Vulgata varia nomina hebraica בְּהֵמָה, בָּעִיר, חֲבוֹר, בִּקְנָה, צֶאֱן, רָקֵשׁ et graecum ζῷον. De singulis v. ANIMALIA, ASINUS, BOS, EQUUS, MULUS, OVIS.

IUNCUS dicitur a S. Hieronymo imprimis hebr. סִיף Is. 19,6, quod alibi *correctum* (Ex. 2,3), *papyro* (ib. v. 5), *pelagus* (Ion. 2,6) explicat. Ex verbis S. Scripturae duae familiae plantarum nomine hebraico videntur designari : nam in oratione Ionae in profundum maris demersi « pelagus (*sūf*) operuit caput meum » manifeste plantae marinae, quas *algae* appellamus, intellegendae sunt; quarum genera plurima in mari Mediterraneo crescentia hic enumerare longum est, neque ipsum nomen magis uni quam alteri videtur convenire. In textu vero Exodi, ubi fiscella papyracea cum infantulo Moyse « in carecto (*sūf*) ripae fluminis » exposita legitur, et in prophetia Isaiae contra Aegyptum, cui vates minatur quod deficientibus aquis fluvii « calamus et iuncus (*sūf*) marcescet », de algis in mari tantum provenientibus sermo esse nequit, sed plantae variae in ripis fluminum, ac maxime

Nili, crescentes intellegendae sunt. Ad quas iuncus certe pertinet, sed praeter ipsum etiam alia varia plantarum genera, quibus pariter nomen *sūf* competit.

A plantis istis marinis etiam mare Rubrum nomen hebraicum ים־סוף (Ex. 10, 19; 13, 18 etc.) accepit. Ex variis autem algarum generibus in sinu arabico ingens copia observatur; quare *M. Jullien* aliique praesertim ex hoc genere nomen illud derivant atque inde simul appellationem « maris rubri » explicant, quia istae algae aquis et litori rubrum quandam colorem tribuunt (v. MARE RUBRUM).

Cf. *I. H. Ursinus*, Arboreti bibl. Cont. 169 s.; *M. Hiller*, Hierophyt. II. 215 s.; *O. Celsius*, Hierobot. II. 64-9; *E. F. K. Rosenmüller*, Bibl. Alterth. IV. 1, 187-9; *P. Cultrera*, Flora bibl. 160 s.; *H. B. Tristram*, Nat. Hist. ed. 8, 435 s.; *A. Kinzler*, Bibl. Naturgesch. ed. 9, 226; *J. Smith*, Bible Plants 41 s.; *I. Löw*, Aram. Pflanzennamen p. 54; *W. G. Groser*, Trees and plants ment. in the Bible 158 s. — Nomen *sūf* recentiores ab aegyptiaco *twfi* derivant; cf. auctores cit. ap. *Gesenius-Buhl*, Handwbch. ed. 14, 489 b.

Iuncus praeterea semel dicitur in Vulgata hebr. גִּבְיָא (Is. 35, 7), qui alibi (Is. 48, 2) melius papyrus explicatur. V. PAPHYRUS.

L. FONCK.

IUNIAS Rom. 16, 7: salutem Andronicum et Iuniam, cognatos et concaptivos meos, qui sunt nobiles in Apostolis (ἐπίστομοι i. e. optima fama noti apud Apostolos) qui et ante me fuerunt in Christo. Aliqui veterum (etiam *S. Chrysostomus*, *M.* 60, 670) Iuniam mulierem esse volunt, uxorem aut sororem Andronici; verum plerique nomen explicant de viro: Iunias i. e. Iunianus; et recte quidem propter ea quae l. c. de ambobus apostolis narrat. Cf. s. v. ANDRONICUS 3.

IUNIPERUS dicitur in Vulgata frutex hebraico nomine יָתֵם vocatus, sub quo Elias fugiens in deserto sedisse scribitur 3 Reg. 19, 4 s. Etiam in libro Iob de eodem frutice legimus: «radix iuniperorum erat cibus eorum», hominum

scil. miserrimorum (Iob 30, 4), et in Psalmis carbonem *rothem* commemorantur in descriptione linguae iniquae (Ps. 119 [120], 4. Vulg. *carbonem desolatorii*). Iuniperi licet etiam in deserto crescant, tamen potius nomine עֵרְרָה videntur designari, quo usque nunc ab Arabibus appellantur (v. MYRICA). Alia vero arbuscula in deserto australi inter Palaestinam et Aegyptum frequentissima ab iisdem incolis eodem prorsus nomine *retem* dicitur, unde et denominationem scientificam *Retama roetama* Forskal (fam. *Leguminosae*) accepit. Tria fere metra alta, quamquam paucis ac tenuibus foliis instructa sit, ramis tamen multis ac densis iucundam umbram viatoribus in deserto praebet. Quare historiae Eliae optime convenit. Ex radicibus vero et trunco huius fruticis Arabes optimos praeparant carbonem, quos in mercatu kahirico Aegyptiis vendunt; unde et textui Psalmi bene congruit. Denique radices eius, licet amarissimas, in extrema tamen penuria miseris cibum praebere, prout radices plurium plantarum eiusdem familiae Leguminosarum, haud improbable videtur, neque opus est, ut cum Ursino *rapum* seu *orobunchen* in radicibus crescentem intellegamus aut cum *Oedmanno* et *Gesenio* verba Iobi tantum de cibo ignis interpretemur.

Iuniperi species, praeterquam nomine עֵרְרָה, etiam voce אֶרֶז in aliquibus S. Scripturae textibus probabiliter intellegi monuimus s. v. CEDRUS.

Cf. *I. H. Ursinus*, Arb. bibl. 355-61; *M. Hiller*, Hierophyt. I. 253-7; *O. Celsius*, Hierobot. I. 246-50; *Chr. Clewberg*, De יָתֵם arbore, sub qua Elias profugus reconditus legitur, Upsaliae 1758; *Sam. Oedmann*, Verm. Samml. II. 161-72; *E. F. K. Rosenmüller*, Bibl. Alterth. IV. 1, 120-3; *W. Gesenius*, Thesaurus 1317; *J. H. Balfour*, Plants of the Bible, ed. nova, 119 s.; *P. Cultrera*, Flora Bibl. 412 s.; *H. B. Tristram*, Nat. Hist. ed. 8, 359 s.; *A. Kinzler*, Bibl. Naturgesch. ed. 9, 213 s.; *J. Smith*, Bible Plants 133-5; *E. Boissier*, Flora orient. II. 36 s.; *I. Löw*, Aram. Pflanzennamen n. 313; *M. Jullien*, L'Égypte, Lille 1891, 276 s.; *id.* Sinai et Syrie, ib. 1893, 83; *W. H. Groser*, Trees and plants ment. in the Bible 61-3; *G. E. Post*, Flora of Syria 215.

L. FONCK.

IUPITER (Ζεύς). Antiochus Epiphanes senem quandam Atheniensem (gr.; Vulgata : Antiochenum) in urbem Ierusalem misit qui Iudaeos ad defectionem a lege paterna compelleret et templum in urbe Iovi dedicaret Olympio, templum in Garizim Iovi hospitali i. e. protectori hospitem et peregrinorum 2 Mach. 6,2. Cum Paulus Lystris claudum sanasset, Lystrenses deos ad se descendisse putabant et Barnabam quidem fovem vocabant, Paulum vero, utpote ducem verbi, Mercurium Act. 14,11. Quod in Vulg. habetur Act. 19,35 : quis nesciat Ephesiorum civitatem cultricem esse magnae Dianae Iovisque prolis, explica ex graeco : νεωκόρον οὖσαν... καὶ τοῦ διοπετοῦς; cultricem esse Dianae et simulacri (Dianae) caelitus delapsi; τὸ διοπετές scil. ἄγαλμα.

IURAMENTI PUTEUS v. **BER-SABEE**.

IURARE, IURAMENTUM, IUS-IURANDUM. Iam tempore patriarcharum iuramentum adhibebatur ad rem aliquam sollemniori modo affirmandam vel ad promissionem confirmandam. Ita Abraham coram rege Sodomorum iurat : levo manum meam ad Dominum Deum excelsum, possessorem caeli et terrae, quod a filo subtegminis usque ad corrigiam caligae non accipiam ex omnibus quae tua sunt (Gen. 14,22. 23); unde discimus iuramentum quandoque factum esse manibus ad caelum elevatis. Item iurat Abraham rogatus ab Abimelech : iura per Deum ne noceas mihi et posteris meis (Gen. 21,23). Et a servo postulatur iuramentum : pone manum tuam subter femur meum, ut adiurem te per Dominum Deum caeli et terrae, ut non accipias uxorem filio meo de filiabus Chananaeorum (Gen. 24,3) et simili ritu Iacob postulatur iuramentum a Ioseph (Gen. 47,29) quo ritu adiuratio fit vel per sanctitatem circumcisionis i. e. signi foederis cum Deo initi vel ita ut posterius (qui ex femore egrediuntur) iuramenti testes et vindices quasi statuuntur. Iacob postulat iuramentum ab Esau, ut sibi vendat primogenita (Gen. 25,33); Isaac iurat regi Philisthiim et iuramento foedus inter se ineunt (Gen. 26,28 ss.); Iacob iurat coram Laban (Gen. 31,53), Ioseph sub

attestatione iuris iurandi denuntiavit fratribus : non videbitis faciem meam, nisi fratrem vestrum minimum adduxeritis et iuramentum ab eis exigit, ut ossa sua asportentur in terram Chanaan (Gen. 43, 3; 50,24).

Etiam lege mosaica iuramentum sanctum est : non assumes nomen Domini Dei tui in vanum (Ex. 20,7); non perirabis in nomine meo (Lev. 19,12), Dominum Deum tuum timebis... iurabisque in nomine illius (Deut. 10,20; 6,13). Iuramento praestito coram iudicibus poterat et debebat quis suspicionem furti a se depellere Ex. 22,8 ss. Iuramento per Deum cultus Dei exercetur; unde Iudaei quandoque designantur : iurantes in nomine Domini (Is. 48,1; Ier. 4,2; Soph. 1,5). Per deos alienos iurare gravissime reprehenditur Ier. 5,7; 12,16; Soph. 1,5; a qua idololatria ut caverent iam Iosue monuit 23,7, revocans in memoriam quod Moyses praeceperat : per nomen externorum deorum non iurabitis Ex. 23,13. Quam religiose viri pii iuramentum custodierint, exempla sunt quae Ios. 2, 12 ss.; 6,22; 9,19 narrantur. Iuramento sanciebantur foedera et eodem modo etiam instauratio foederis cum Deo confirmari solebat (cf. 2 Par. 15,14; Esdr. 10,5; Neh. 5,12; 13,23).

Modus iurandi varius erat : Deus testis inter me et te (Gen. 31,50 hebr.); vivit Dominus (Iud. 8,19; Ruth 3,13; 2 Reg. 2,27; Ier. 38,16 etc.); sit Dominus inter nos testis veritatis et fidei (Ier. 42, 5). Iuramentum etiam quasi confirmabatur addita execratione sui ipsius : haec mihi faciat Deus et haec addat, si non etc., ubi religione quadam ipsa maledictio non enuntiatur clarius; cf. Ruth 1,17; 1 Reg. 3,17; 14,44; 25,22; 2 Reg. 3,9; 19,13 etc.; quandoque ipsae maledictiones proferebantur Iob 31,8 ss. cf. Num. 3,21 vel aliorum adversitates quis imprecabatur sibi vel alteri; cf. Is. 65,15 dimittetis nomen vestrum in iuramentum; Ier. 42,18; 42,12; sicut de Petro quoque narratur : coepit detestari et iurare, anathematizare et iurare, quia non novisset hominem (Matth. 26,74; Marc. 14,71). Ritus iurandi usitatus consistebat in elevatione manus vel manuum ad caelum; cf. Gen. 14,22; Deut. 32,40;

Is. 62,8; Dan. 12,7; Apoc. 10,5. 6; quare levare manum saepius idem est ac iurare; cf. Ex. 6,8; Num. 14,30; Ez. 20,5 etc. Iuramentum quod fiebat coram Domino in sanctuario (2 Par. 6,22) vel voce magna in iubilo et in clangore tubae et in sonitu buccinae (2 Par. 15,14) vel oblatiis sacrificiis (Gen. 31,53) ea sollemnitate reddebatur magis sacrum et inviolabile.

Ceterum praecipitur : si quis virorum votum Domino voverit aut se constrinxerit iuramento, non faciet irritum verbum suum, sed omne quod promisit implebit Num. 30,3; laudatur is qui iurat proximo suo et non decipit Ps. 14,4 (vel ut alii hebr. explicant : qui iurat ad damnum suum et non mutat) et qui non iuravit in dolo proximo suo (Ps. 23,4). Sapiens autem sapienter monet : iurationi non assuescat os tuum, multi enim casus in illa... vir multum iurans implebitur iniquitate Eccli. 23,9. 12; cf. 27,15.

Haud raro Deus quoque iurasse dicitur : per memetipsum iuravi, quia fecisti hanc rem..., benedicam tibi (Gen. 22, 16); ita Deus iuravit patriarchis se illis daturum terram Chanaan (Gen. 24,7; 50,23; Ex. 13,5. 11; 32,13; Num. 11,12; 14,16; Deut. 1,8 etc.); ita Deus dicitur iurasse Davidi 2 Reg. 3,9; Ps. 88,4. 36. 50; cf. Ps. 109,4; Is. 45,23; Ier. 22,5; 51,14 : iuravit Dominus per animam suam, cf. Am. 6,8. Quid hic iurandi modus significet, docet apostolus : abundantius volens Deus ostendere pollicitationis heredibus immobilitatem consilii sui interposuit iusiurandum, ut per duas res immobiles quibus impossibile est mentiri Deum, fortissimum solatium habeamus (Hebr. 6,17. 18).

Sollemnis quaedam asseveratio etiam fieri solebat per vitam illius ad quem sermo dirigebatur. Ita Abner dicit ad Saul : vivit anima tua rex, si novi 1 Reg. 17,55; vel Urias ad David : per salutem tuam et per salutem animae tuae non faciam rem hanc 2 Reg. 11,11; cf. 14,19; similiter Ioseph dicit loquens ad fratres : per salutem Pharaonis non egrediemini hinc, donec veniat vester vester minimus Gen. 42,15. Quandoque huic modo adiungitur iuramentum per Deum; ita

David ad Jonathan : vivit Dominus et vivit anima tua, quia uno tantum gradu ego morsus dividimur 1 Reg. 20,3; cf. 25,26, et Eliseus ad Eliam : vivit Dominus et vivit anima tua, quia non derelinquam te 4 Reg. 2,2. 4. 6; cf. 4,30.

Praeceptum erat : iurabis : vivit Dominus, in veritate et in iudicio et iustitia (Ier. 4,2); at uti alia Dei mandata violabantur, ita hoc quoque; Ieremias inter reliqua aequalium vitia etiam recenset iurare mendaciter 7,9 et 5,20 quod si etiam vivit Dominus dixerint, et hoc falso iurabunt; cf. Eccl. 9,2; Zach. 5,3; Mal. 3,5. Poena quaedam peieranti non erat lege statuta; at is poenam divinam non effugiet : « neque enim habebit insontem Dominus eum qui assumpserit nomen Domini Dei sui frustra » (אֵלֹהֵי in vanum, in mendacium); cf. Deut. 5,11; periurio enim nomen Dei polluitur (Lev. 19,11) idque Deus odio habet (Zach. 8,17). Pro periurio in quibusdam conditionibus certa quaedam stabuebantur sacrificia (Lev. 5,1 ss.; 6, 2 ss.). Praescribebatur iusiurandum, si quod alicui commendatum fuerat periisset et testis nullus illius innocentiam testari posset (Ex. 22,10), si eo modo crimen alioquin occultum poterat reddi manifestum (Lev. 5,1).

Quantopere Pharisei et scribae acutis ineptiis nocuerint sanctitati iuramenti, abunde ex evangelis constat. Cum enim dicatur : reddes Domino iuramenta tua (cf. Matth. 5,33; Num. 30,3; Deut. 23,21), asserebant illa iuramenta quae non per Dominum, per nomen Iahwe fierent, fere nullam habere vim et quam astute interpretantes iuramenta alios deceperint, exemplis declaratur Matth. 23,16-22. Invaluerat enim consuetudo, ut iam non per nomen Domini iurarent, sed per templum, allare, caelum, per urbem Ierusalem, sanctuaria Israel, terram, per vitam vel caput suum, per solem, legem, per libros sacros (cf. Matth. 5,33; 23,16-22; *Buxtorf*, *Lexicon chald. talm. rabb.* 2315). Et quantis argutiis eiusmodi iuramenta nihil valere ostenderint, Christus reprehendit (Matth. 23,16 ss.). Et quod Christus reprehendit, etiam postea in more

positum fuisse tractatibus mishnaicis perhibetur. Ita si qui iuraverint per caelum et terram, eos esse liberos docetur in tract. Shebuoth 4,13 (cf. *Surenhusius*, Mishna IV. p. 306; vide praeterea *Lightfoot*, Horae hebr. ad Matth. 3,33; *Schoettgen*, Horae hebr. I. 40).

Quo sensu autem Christus dicat : ego autem dico vobis, non iurare omnino etc. partim explicatur ex abusu illo pharisaico, partim ex eo quod iuramentum non sit per se appellendum, verum defectum aliquem connotet; atque prohibitionem non esse in universum intelligendam, iam ex eo patet quod in novo quoque foedere reperiuntur iuramenta; ita apostolus Deum testem invocatur Rom. 1,9; 2 Cor. 1,23; Gal. 1,20; Phil. 1,8 et iuramenti utilitatem explicat Hebr. 6, 16: omnis controversiae finis ad confirmationem est iuramentum, et in Apoc. 10,6 angelus quoque iurat per viventem in saecula saeculorum. Unde merito dicit *Caietanus* esse intelligendum hoc praeceptum similiter sicut illud: non occides; « prohibetur occisio non vestita circumstantiis iustitiae, ita praeceptum prohibens iurare refertur ad iurare nudum, et non ad iurare vestitum circumstantiis iudicii, iustitiae et veritatis ». Atque eodem modo intelligenda sunt verba Iac. 5,12. Insuper nota esse qui ipsum Christum iurasse censeant probabile (cf. *Suarez*, De iuramento 1,14 in tractatu 3 De Religione).

I. KNABENBAUER.

IURGIUM (Ex. 17,7) v. RAPHMIDIM.

IUSTIFICARE, IUSTIFICATIO.

Voci generatim notio inest aliquem iustum, probum, insontem declarare, pronuntiare; ita de iudicibus: qui iustificat impium et qui condemnat iustum, abominabilis est uterque apud Deum Prov. 17,15; qui iustificatis impium promuneribus et iustitiam iusti auferitis ab eo Is. 5,23. Et significatione generali: nunquid homo comparatione Dei iustificabitur? i. e. probus et insons apparebit, exhibebitur (Iob 4,17); si iustificare me voluero i. e. me probum et integrum declarare, ab omni culpa immunem, condemnabit me os meum (Iob 9,20).

Religiositas iustificabit cor (Eccli. 1,18) i. e. animum exhibebit probum; qui sine timore est non poterit iustificari (Eccli. 1,28), non poterit haberi et declarari homo iustus et probus. Comparatione instituta dicitur: iustificavit animam suam aversatrix Israel comparatione praevaricatricis Iudae Ier. 3,11 i. e. se minus culpabilem exhibuit; cf. Ez. 16, 31. 52. Homines quoque dicuntur Deum iustificare i. e. declarare et agnoscere eum iustum, eum iuste egisse (cf. Eccli. 18,1; Luc. 7,29. 35).

Si Deus dicitur aliquem iustificare i. e. iustum declarare, pronuntiare, id sane ex ipsa veracitate et sanctitate Dei ita intellegi debet, ut is revera sit absolutus a crimine, immunis a reatu peccati et iustus coram Deo; unde hisce locis notio vocis saltem ex necessaria consequentia statui potest *iustum facere* i. e. talem eum constituere qualem Deus eum esse vult, ut scil. sit eo in statu quem Deus hominibus inesse vult (vide s. v. IUSTITIA). Atque iustificare in doctrina Pauli apostoli dicere internam sanctificationem, invicte constat inter alia ex eius ad Galatas arguendi modo: providens Scriptura quia ex fide *iustificat* gentes Deus, praenuntiavit Abrahae: quia *benedicentur* in te omnes gentes. Unde aperte iustificatio dicitur benedictio, et quanam sit haec benedictio, declarat apostolus: ut in gentibus benedictio Abrahae fieret in Christo Iesu, ut pollicitationem Spiritus accipiamus per fidem (Gal. 3,8. 14); proin benedictio illa est ἡ ἐπαγγελία τοῦ πνεύματος i. e. Spiritus promissus, ita ut Spiritus promissus accipiatur. Ita enim τὴν ἐν. τ. πν. esse accipiendum, ipse interpres protestans dicit esse sententiam communem et hic *unice* contextui congruam (cf. *Sieffert*, Brief an d. Gal. p. 183). Quare ex hac doctrina gentes iustificantur vel benedictionem accipiunt ita, ut Spiritus promissus illis detur; Spiritu autem Sancto inhabitante internam renovationem et sanctitatem effici manifestum est. Hanc autem iustificationem docet originem ducere ex fide, fieri per fidem, fide, concedi gratia Dei, nos iustificari in sanguine Christi i. e. causam meritoriam esse sacrificium Christi in cruce

(cf. Rom. 3,30; 5,1. 9; Gal. 2,16; 3,24). Propter hanc nostram iustificationem dicit apostolus Christum resurrexisse i. e. erat scil. ex consilio divino, ut Christus gloriose regnans fructum meriti mortis suae hominibus applicaret et ex peccatoribus iustos et Deo acceptos efficeret. Quae iustificatio dicitur iustificatio vitae, in oppositione ad condemnationem, quia sine ea vera vita non habetur (Rom. 5,18).

Ceterum iustificatio in Vulgata variam exhibet significationem. Ita Job 27,6: iustificationem meam quam coepi tenere non deseram, hebr. iustitiam meam teneo nec dimittam i. e. nunquam me fatebor impium, teneo et affirmo me esse iustum. Frequenter vox induit notionem statuti, praecepti i. e. in Vulgata ponitur pro hebr. כִּשְׁפָּט (cf. Num.

9,3. 14; 2 Par. 19,10; Ps. 118,20 etc.) et חָק 2 Par. 34,31; Ps. 118,5. 8. 12 doce me iustificationes tuas i. e. mandata, LXX τὰ δικαιώματά etc.); item pro צִדְקָה

Dan. 9,18 neque enim in iustificationibus nostris (i. e. propter nostra iuste bene facta) prosternimus preces i. e. quasi confisi nostra iustitia. Ea notione quoque Apoc. 19,8. Uti in Psalmis, ita quoque Bar. 2,17 et 1 Mach. 4,51 et 2,40 et Luc. 1,6 et Rom. 8,4 et Hebr. 9,1 ponitur pro graeca voce δικαιώμαξ lex, statutum, id quod iustum est.

I. KNABENBAUER.

IUSTITIA saepe dicitur notione generali id quod rectum est, quod legi vel normae statutae respondet; ita facere iudicium et iustitiam (Gen. 18,19), docere praecepta et iustitias (Deut. 4,5; cf. 27,10; 2 Reg. 8,15; 3 Reg. 10,9 etc.); inde oritur notio probitatis, pietatis, i. e. eius conditionis quae normae recti, normae legis virtutisque respondet; unde facile significationem sanctitatis, integritatis induit; ita ambulare coram Deo in veritate et iustitia et recto corde (3 Reg. 3,6), servare semitas iustitiae Prov. 2,8; 8,20; 10,2 etc. Significatu quoque generali eam notat hominis conditionem quae Deo probatur, quam Deus hominibus inesse vult, quam Deus venia peccatorum concessa homini largitur.

Eo sensu dicitur: iustitia Dei revelatur in evangelio Rom. 1,17; 3,21. 22 et ita saepe apud S. Paulum, qui iustitiam eam docet non esse ex lege, non ex operibus legis mosaicae, sed ex fide et per fidem, et dari credentibus. Eadem notione dicitur: credidit Abraham Deo et reputatum est illi ad iustitiam (cf. Rom. 4,3) i. e. quia Deo rem creditu difficillimam et viribus naturae impossibilem revelanti et affirmanti fidem adhibuit. Deus gratiose eum effecit et agnovit virum sibi probatum, qui in eo statu erat quem Deus hominibus inesse vult (cf. εὐλογισθῆναι), in statu gratiae et sanctitatis. Iustitia de Deo quoque dicitur et significat modum Dei agendi secundum normam sanctitatis, secundum consilium salutis quam hominibus largiri statuit; unde « narrentur iustitiae Domini » (Jud. 5,11) i. e. res a Deo gestae in salutem populi.

Strictiore sensu dicitur de ea virtute quae suum cuique tribuit, ergo de iustitia quae est una ex virtutibus cardinalibus. Ita vox accipienda erit, quando sermo est de indicandi actione: iudicare populum in iustitia Ps. 9,9; iudica me secundum iustitiam tuam (Ps. 34,14), cum iustitia iudicare Apoc. 19,11 etc. Immo quandoque notionem induere videtur iustae causae; ita explicare poteris: exaudivit me Deus iustitiae meae: Deus iustae meae causae, qui est Deus i. e. protector iustae meae causae exaudivit me Ps. 4,2.

Ex ampla notione iustitiae etiam colligitur significatio iusti, qui scil. legi convenienter vivit, qui in ea est conditione quae Deo probatur, vir probus, pius, sanctus — et sensu strictiore qui suum cuique tribuit, iuste iudicat.

I. KNABENBAUER.

IUSTUS (Ἰοῦστος) cognominantur in Novo Testamento: Act. 1,23 Ioseph Barsabas (v. BARSABAS 1), Act. 18,7 Titus proselytus (v. TITUS 1), Col. 4,11 socius Pauli (v. IESUS 5).

IUVENCULUS i. e. bos novellus semel legitur in Vulgata pro hebr. בֶּן־צֶמֶךְ ler. 31,18; vide BOS.

IXIOS dicitur a S. Hieronymo vul-

turis species, quae inter aves impuras in catalogo deuteronomico quartum locum occupat (Deut. 14,13). In textu hebraico hodierno haec species רָאָה vocatur; at consideranti quod in catalogo priore libri Levitici eius loco דָּאָה occurrit (Lev. 11,14) quodque idem verbum LXX, textus et versio samaritana, versio syriaca, Targum hierosolymitanum in Deuteronomio legendum supponunt, vix dubium videbitur quin forma רָאָה, ceteroquin ignota, librarii mendo tribuenda sit. Unde etiam in catalogo deuteronomico דָּאָה legendum et *milvum* explicandum, *ixion* vero, avem nec nomine nec specie Graecis Latinisve notam, expungendam censemus. V. MILVUS.

Nomen *ixion*, pro quo alii *ixon* scribendum volunt, ex graeco ἰξον ortum duxit, quod Aquila et cum eo aliqui codices holmesiani (IV cum * [al. ἰξιν], 15,54 [ἰξον], 58 [ἰξονα], 75 [ἰξον]) pro רָאָה habent (cf. *Field*, *Hexapla* in h. l.). Eius loco *Sam. Bochartus* potius ὄξυν, *oxyn* legendum avemque et visu et volatu pollentem designari censet (*Hieroz.* II. 6,3 ed. *Rosenmüller* III. 804).

L. FONCK.

IZRAHIA (יִזְרְחִיָּה; Ἰζραΐα, Ἰζραΐα, apud *Swete* B Ζαρραΐα, A Ἰζραΐα), filius Ozi de tribu Issachar, progenitor quinque principum familiarum (1 Par. 7,3); sed in textu solum quattuor nomina enumerantur: Michael, Obadia, Iohel, Iesia.

L

LAABIM (לָאָבִים, Λαβίμ), populus aegyptiacus secundo loco inter posteros Mesraim nominatus (Gen. 10,13; 1 Par. 1,11). Merito censentur iidem atque Libyes (לִיָּבִים), qui in exercitu Sesac (2 Par. 12, 3; 16,8) simul cum Mesraim et Chus recensentur, Nahum 3,9 cum Africa (פִּיֶּרִי) et Dan. 11,43 cum Aethiopia (כְּשִׁיִּם) iunguntur. Vide s. v. LIBYES 1.

LAAD (לָאָד, Λάαδ), filius Iahath in genealogia Iuda (1 Par. 4,2).

LAADA (לָאָדָה, Λααδά, Λααδά), filius Sela filii Iuda, pater (seu possessor) urbis Maresa (1 Par. 4,21).

LAADAN (לָאָדָן, Λααδάν), Ephraimita, unus ex maioribus Iosue filii Nun (1 Par. 7,26). Idem nomen hebr. gerit, qui in Vulgata scribitur Ledan seu Leedan.

LABAN. 1. Laban (לָבָן, Λάβαν) filius Bathuel, nepos Nachor, frater Rebeccae, pater Liae et Rachel, uxorum Iacob (cf. Gen. 11,26; 22,23; 28,5; 29,5), vir dives in Mesopotamia, ea in regione, ex qua Abraham egressus est. Cum Abraham misisset servum seniores domus suae

ad cognationem suam, ut inde filio Isaac quaereretur uxor, Laban visis donis pretiosis Rebeccae statim egressus est ad servum eumque magna comitate hospitio recepit (Gen. 24,1-33); Laban frater et Bathuel pater Rebeccae libenter accedunt petitioni servi, ut Rebecca fieret uxor Isaac (Gen. 24,50). Eodem modo Iacob iubetur a patre Isaac proficisci in Mesopotamiam Syriae ad domum Bathuel patris matris ipsius, ut de filiabus Laban avunculi sibi petat uxorem, et simul profectus est ad declinandam iram Esau (Gen. 27,41-28,3). Laban eum comiter in domum suam accepit; Iacob autem petiit ab eo Rachel uxorem, pro qua ei septem annorum servitium in gregibus pascendis ac custodiendis promisit. Laban vero, vir dolo et avaritia plenus, accepta conditione ei pro Rachel substituit Liam eumque, ut Rachel etiam ducere possit, ad aliud septem annorum servitium coegit. Tempore 14 annorum elapso voluit Iacob cum uxoriibus filiisque reverti; at Laban, experimento didici, inquit, quia benedixit mihi Deus propter te, constitue mercedem tuam quam dem tibi (Gen. 30,23 s.). Atque Iacob eam mercedis rationem sibi eligit quae longe maius lu-

cum Labano promittere videbatur, scil. pecora coloris non communis, ideoque numero tui aliud remedium affertur) pauciora; quare Laban libenter concedit (Gen. 30,34). Iacob sibi exposcit inter agnos omne pecus varium et nigrum, inter capras omne pecus maculatum et varium. In Syria oves plerumque albae sunt, pauciores variae aut nigrae; caprae fere omnes fulvae, raro varii coloris; Iacob vero et artificio adhibito et Dei benedictione ex iniquiore pacti conditione plurimum lucri refert, ita ut filii Laban et Laban ipse efficerentur animo alieno in Iacob. Iacob enim valde dives effectus est, quamvis Laban conditionem mercedis decem vicibus mutaret: « si quando dixit: variae erunt mercedes tuae, pariebant omnes oves varios foetus; quando vero e contrario ait: alba quaeque accipies pro mercede, omnes greges alba pepererunt » (Gen. 31,8). Etiam Rachel et Lia conqueruntur de avaritia Laban (Gen. 31,15). Iacob autem iussus a Domino revertitur in patriam. Die tertio postquam abiit, nuntiatur id Laban qui cum fratribus suis per dies septem eum persecutus in monte Galaad consequitur. Prohibetur a Domino, ne durius agat. In domo Laban cultum quoque superstitosum exerceri constat ex theraphim quae sibi furto ablata esse Laban conqueritur et quae Rachel absconderat. Iacob ei improbat durum servitium quod ei servierit per annos viginti; tandem victimis immolatis et foedere inito amice inter se separarunt. Ex nomine quod uterque titulo et monumento foederis erecti indidit, iam apparet linguam in Chanaan et in Haran paulo dialectice diversam fuisse (Gen. 31,47).

2. Laban (לָבָן, Λαβαν) legitur in exordio Deuteronomii (1,1). Ut textum illum satis obscurum explanandum censet Cornely Introd. II. 1 pag. 46. 47), Laban probabiliter est Lebna (Num. 33,20), quae quinta fuit statio Israelitarum a monte Sinai profectorum ac proin, cum iter a monte Sinai usque ad Cadesbarne undecim esset dierum, centrum quoddam totius regionis, per quam Israelitae migrationem fecerunt. Attamen

F. de Hummelauer ad h. l. pro לָבָן emendat לָבִין *inter*, ut sensus sit: inter Pharan et inter Thophel ex una parte et *inter* Haseroth et Dizahab ex altera parte.

LABANA v. LEBNA (Lobna).

LABANATH (לָבְנָת, LXX Λαβανθαι; Vulgata: Sihor et Labanath) legitur in descriptione termini meridiani tribus Aser (Ios. 19,26). Quaeritur utrum duo loca distincta Sihor et Labanath indicentur an unus Sihor-Labanath. Peshitta quoque duo distinguit, item Onomasticon (*ed. Lag.* 294. 275; 152. 136). Verum textus massorethicus duabus vocibus unum locum exprimi suadet, praesertim quia לָבְנָת alias semper *fluvium* designat (cf. Ios. 13,3); unde indicatur fluvius Labanath. Probabilissime intellegendus erit *Nahr el-Zerqā* seu Crocodilon flumen (*Plin.* V. 19,75) duabus fere horis infra Dorurbem, quae in tribu Aser sita erat, etsi tribui Manasse attributa est. Relinquenda igitur est opinio, quam proposuerant *Masius, I. D. Michaelis, Gesenius* (Thesaur. p. 1393), designari fluvium vitri h. e. Belui, qui paulo infra Ptolemaida in mare effunditur et hodie *Nahr Na'mein* audit.

De Crocodilon flumine cf. *G. Schumacher*, An excursion to the Crocodile River in *Pal. Expl. Fund.* Quart. Stat 1887 p. 78-85.

LABIUM induit in Vulgata significationes hebr. שִׁפְהָ. Unde habet notionem marginis, limbi alicuius vasis, calicis, mensae; ita Ex. 25,24 faciesque illi (mensae) labium aureum per circumtulit et ipsi labio coronam; 3 Reg. 7,23 fecit quoque mare fusile decem cubitorum a labio usque ad labium; labium eius quasi labium calicis. Labia dein ponuntur pro verbis, sermone, quippe quae labiis proferuntur vel ibi quasi sedem habent. Unde Moyses, impeditus sermone et fere balbutiens, se dicit esse incircumcisum labiis Ex. 6,12. 30 et Lev. 5,4 iuramentum dicitur proferri labiis, Iob 1,22 dicitur non peccasse labiis. Notanda locutio Gen. 41,1: erat

terra labii unius, 11,6 : unus est populus et unum labium omnibus; nam sunt qui contendant labium non significare linguam (*Sprache, language*), sed sermonem, mentem, consilium. Eorum argumenta vide apud *F. de Hummelauer*, Comm. in Gen. p. 305. 306. Plane singularis est locutio in Vulgata Os. 14,3 : reddemus vitulos laborum nostrorum i. e. laudes et actiones gratiarum. Verum LXX et Syrus efferunt, uti apostolus (Hebr. 13,15) *fructum* laborum; unde legerunt non פרים sed פרי. Quod hebr. habetur est pariter mirum : reddamus iuvenco labia nostra vel solvamus (tamquam) iuvenco labia nostra; alii פרים apertionem (laborum) explicant; cf. *Knabenbauer*, Comm. in Proph. min. I. p. 180.

LABRUM AENEUM erat magna quaedam pelvis inter tabernaculum testimonii et altare posita, in qua sacerdotes lavabant manus et pedes, quando ingressuri erant tabernaculum testimonii vel accessuri ad altare (Ex. 30,17 ss.; 31,9; 33,16; 39,39; 40,7. 28 [30] s.). Labrum hoc confectum est de speculis mulierum, quae excubabant in ostio tabernaculi (Ex. 38,8); specula veterum ex metallis, argento, cupro, stanno conficiebantur, quare ex iis labrum confici potuit; insuper metalla exercebantur in Sinai (cf. *Chabas*, Recherches sur la XIX^e dynastie p. 66; Zeitschr. für aegypt. Sprache und Altertumskunde 1870 p. 137 ss.).

Labrum aeneum oleo unctum et consecratum est (Ex. 30,28 hebr.; 40,11; Lev. 8,11). Apud LXX et Samaritanum Num. 4,14 (non in textu massorethico) inter vasa sacra sollempni agmine deportanda etiam recensetur labrum aeneum vestimento purpureo involvendum et operimento hyacinthino ianthinarum pellium tegendum.

Pro labro aeneo postea in templo salomonico substitutum est mare aeneum (vide s. v.).

LABRUSCA explicatur a S. Hieronymo hebr. באשים (Is. 5,2. 4), quod « Aquila interpretatus est αρακάς i. e. *fructus pessimos*; Symmachus ἀτελής i. e. *imperfectos*, LXX et Theodotio [ἄκαθαρτα

i. e.] spinas » (S. Hier. in Is. 5,2); Arabs pariter spinas vertit, Syrus autem הרובא, quod communiter *siliquas* denotat, sed etiam pro labruscis sumitur. Iam vero spinæ hic ex eo videntur ortæ, quod באשים male cum באשה confunditur, quam vocem LXX similiter βάρτος, Vulg. *spina* exponunt (Job 31,40); v. SPINA. Eandem confusionem immerito retinent cl. *Celsius*, *Tristram*, *Duns*, *Groser*, al. At certe cum *Rosenmüller*, *Cultrera* et recentioribus communiter præferenda est expositio S. Hieronymi, dummodo non cum citatis auctoribus de *Viti labrusca* Linnaei, planta scilicet ex America septentrionali oriunda, sed de uvis acerbis atque amaris intellegatur, quales sunt fructus vitis silvestris. Quæ vitis silvestris sub variis formis etiam nunc in partibus Syriæ septentrionalibus spontanea crescit atque etiam antiquitus totius regionis mediterraneæ incolæ erat, Israelitis haud ignota (cf. Ez. 15,2). V. VITIS.

Eandem labruscam S. Hieronymus iterum commemorat Is. 17,11, quam ductus ratione haud facile quis dixerit; textus enim massorethicus ibi legit תִּשְׁתַּיֵּי, quod communiter « *sepiebas* » (scil. vineam) interpretatur. Cf. *I. Knabenbauer* aliosque commentatores in h. l.

Similem sensum ac באשים videtur habere alia vox hebraica בֶּסֶר, quæ in Vulgata bene *uva acerba* explicatur Ier. 31,29 et Ez. 18,2; cf. Iob 15,33 (Vulg. *botrus*) et Is. 18,5 (בֶּסֶר זָבִיל) *uva maturescens*, Vulg. *immatura perfectio*).

Cf. *Herm. v. d. Hardt*, פקועת, αρακάς, Intybum sylvestre... nec non באשים ἀρακάς, Bryonia in Esaia vinea (Teufelskürbis, Es. V.), Helmstadii 1719; *O. Celsius*, Hierobot. II. 199-205; *F. Hasselquist*, Reise nach Palaest. p. 561 s.; *E. F. K. Rosenmüller*, Handb. d. bibl. Alterth. IV. 1, 111; *P. Cultrera*, Flora bibl. 265; *J. Duns*, Bibl. Nat. Science II. 465 s.; *H. B. Tristram*, Nat. hist. ed. 8, 439; *W. H. Groser*, Script. Nat. Hist. I. 130. 173 s.; *P. Schegg*, Bibl. Archaeol. 183. — De viti silvestri cf. *Theophrast.* Hist. pl. IV. 5,4; 7,8 etc.; *Dioscurid.* Mat. med. 4,183; *Colum.* VIII. 5,23; *Plin.* XII. 28,132 s. — *E. Boissier*, Flora orient. I. 955 s.; *L. Anderlind* in Zeitschr.

d. D. Pal.-Ver. XI. 1888, 160 s.; *E. Gülgin Engler-Prantl*, Natürl. Pflanzenfam. III. 5, 442-4; *Alph. de Candolle*, Origine des Plantes cult. 151-4; *V. Hehn*, Kulturpfl. u. Hausth. ed. 5, p. 65 ss.; *A. Engler* ap. *Hehn* l. c. 85-90.

L. FONCK.

LAC. 1. Lac (לָחֵץ, similiter in linguis phoenic., aram., arab., aethiop.; gr. γάλα) magnam ciborum apud Iudaeos partem constituebat. Elenim terra a Domino promissa multoties « lacte et melle manans » describitur (Ex. 3.8. 17; 13,5; 33,3; Lev. 20,24; Num. 13,27; 14, 8; 16,14 [cf. v. 13]; Deut. 6,3; 11,9; 26, 9. 15; 27,3; 31,20; Is. 5,6; Eccli. 46, 10; Jer. 11,5; 32,22; Baruch 1,20; Ez. 20,6. 13. Cf. Joel 3,18). Quae « locutio, ait *Bonfrerius* (in Ex. 3.8), etsi hyperbolica sit, indicat tamen summam copiam omnium non tantum necessariorum, sed etiam quae ad delicias et voluptatem faciunt, eamque tantam, ut more fontium et rivulorum quasi fluere viderentur; quod haud dubie dictum est propter pascua optima et uberrima, quae ab armentis depasta optimum lac exprimeant et frequentia apum examina, quae in summa copia mel praeberent ». Pastores autem gregum praesertim de lacte gregis manducant (1 Cor. 9,7), idemque etiam pro aliis hominibus inter vitae necessaria recensetur (Eccli. 39,31).

2. Lac caprarum particulariter laudatur (Prov. 27,27 לָחֵץ עֵיזִים; LXX aliter); quod pariter in inscriptionibus cuneiformibus specialiter commemoratur (*shi-iz-bi en-zi*, *F. Delitzsch*, Ass. Hwbch. 99^b. 649^a) atque etiam hodie praesertim apud Orientales magni aestimatur. De capris simul cum ovibus intellegendi sunt textus qui לָחֵץ "ח" commendant (Deut. 32,14; cf. Is. 7,21 s.; Ez. 34,3 cum LXX, Vulg. contra textum massorethicum לָחֵץ *adipem*), cum utriusque generis animalia commixtim in gregibus pascerentur atque hodieum pascantur. Etiam lac bubulum in usu erat (cf. Is. 7,21 s.), ac fortasse camelinum quoque, quod aliqui ex Gen. 32,43 s. vel Iud. 4, 19 et 5,23 (v. CAMELUS) concludere volunt. Similiter auctores profani varias

istas lactis species commemorant, e quibus Plinius « stomacho adcommodatissimum, ait, caprinum, quoniam fronde magis, quam herba vescuntur; bubulum medicinalius, ovillum dulcius et magis alit, stomacho minus utile, quoniam est pinguius » (Plin. XXVIII. 9,124. Cf. XI. 41,236-239; Varro, De re rust. II. 1. 11; Columella, De re rust. XII. 8 etc.).

3. Lactis praecipuus usus in Scriptura exhibetur, ut recens in potum adhibetur (Gen. 18,8; Iud. 4,19; 5,25; Ez. 23, 4); quare etiam cum vino coniungitur (Cant. 5,1; Is. 55,1) et propter colorem album in comparationibus adducitur 49,12; Thren. 4,7; cf. Cant. 5,12). Praeterea probabiliter etiam coagulatum et acidum sumebatur, atque ad butyrum et caseum conficiendum inserviebat (v. BUTYRUM, CASEUS). Atque cum infantuli lacte matris usque ad ab lactationem nutrianlur (Is. 28,9; 2 Mach. 7,27), lac etiam sensu spirituali pro primis doctrinae christianae veritatibus ponitur (1 Cor. 3,2; Hebr. 5,12 s.; 1 Petr. 2,2). De usu sacro ad sacrificia, qui apud Assyrios et Aegyptios commemoratur (*Nebukadnezar*, Cyl. Grotfend C. I. 20; *G. Maspero*, La table d'offrandes des tombeaux égyptiens in Rev. de l'hist. des religions XXXV. 1897, I. 288; XXXVI. 1897, II. 9), in libris sacris nihil occurrit.

Cf. *Sam. Bochart*, Hieroz. II. 32,6 et II. 45, ed. *Rosenmüller* I. 322 s. 525-7; *E. F. K. Rosenmüller*, Bibl. Alterth. IV. 2 p. 66 s.; *H. J. van Lennep*, Bible Lands (London 1875), p. 200. 204; *P. Schegg*, Bibl. Arch. p. 84 s.

Iob 6,6 aliqui לָחֵץ מִחֵם de lacte coagulato interpretantur; v. ANCHUSA.

L. FONCK.

LACEDAEMONII (2 Mach. 5,9 ἱερὸς Ἀλαεδαμονίωνος, Vulgata : Lacedaemonas profectus) v. SPARTIATAE.

LACERTA. 1. Multae lacerlarum species in Palaestina inveniuntur, ex quibus *H. B. Tristram* in ordine *Lacertium* 11 familias cum 29 generibus et 44 speciebus enumerat. Maxime communes sunt *Lacerta viridis* Linné, *L. agilis* L., *Zootoca muralis* Laurenti, *Ophiops elegans* Ménière, *Gongylus ocellatus* Forskal.

Ptyodactylus Hasselquisti Schneider, *Hemidactylus verruculatus* Cuvier, *Stellio cordylina* Laurenti, *Chamaeleo vulgaris* Daudin.

Cf. *F. Hasselquist*, *Reise in Pal.*, ed. *C. Linnaeus*, Rostock 1762, p. 348-63; *H. B. Tristram*, *Fauna and Flora of Palestine*, London 1884, p. 148-54. — Cf. *A. E. Brehm*, *Tierleben*, ed. 3; *Pechuel-Loesche*, VIII. Leipzig und Wien 1892, p. 31-167; *Ph. L. Martin*, *Naturgesch. der Thiere* II. 1, Leipzig 1882, p. 51-128; *J. Leunis*, *Synopsis* I. 1, ed. 3 *H. Ludwig*, Hannover 1883, p. 545-71. — *L. Lewysohn*, *Die Zoologie des Talmuds*, Frankfurt a. M. 1858, p. 221-30.

2. In libris sacris septem nomina hebraica varias lacertarum species videntur designare: מַגָּלָה, Vulg. *mygale*; חֲרִיט, Vulg. *lacerta*; כָּהָ, Vulg. *chamaeleo*; לָטְיָה, Vulg. *stellio*; צָב, Vulg. *crocodilus*; שְׂחִרְכִּית, Vulg. *stellio*; תַּנְשְׁכִּית, Vulg. *talpa*. Quae de singulis dicenda occurrunt, exponuntur sub voce qua nomina hebraica in Vulgata explicantur.

3. חֲרִיט Lev. 11,30 in Vulgata *lacerta*, sicut a LXX σαυρα, vocatur; ex aliis versionibus antiquis Peshitta (הַרְכִּיטָא) et Onkelos (חֲרִיטָא) vocem hebraicam retinent, Ps.-Ionathan קִינִינָא exponit, quod « probabiliter lacertae speciem aliquam » designare putant. Quenam vero haec species sit, non satis liquet, cum praeter nomen ἡραξ λεγόμενον, quo inter animalia impura recensetur, nihil de ea in Scriptura occurrat. Immo, ne lacertam quidem in genere designatam admittunt plures ex doctoribus hebraicis aliisque (*Kimchius*, *Pomarius*, *Arius*, *Munsterus* al. ap. *Bochart*), qui *chōmet limacem* interpretantur: at certe parum probabiliter, cum et veteres sallem in generali vocis acceptione consentiant et contextus huic maxime faveat.

4. Deficientibus aliis argumentis ad etymologiam auctores confugiunt. Ex opinione *Bocharti*, cui inter recentiores favent *Cultrera*, *Tristram*, *Hart*, *chōmet* a *chometon* originem duceret, quod rabbinis *arenam* dicitur significare, ideoque lacertae in arenosis degenti, ac specialim ei quae arabice *chulaca* audit conveni-

ret; pro qua *Cultrera* speciem *Agama galeata* a Daudin dictam supponit. At merito *Rosenmüller* ratiocinationem *Bocharti* reicit, cum et *chometon* Talmudistarum ex graeco ἄμβλον videatur desumptum (*Buxtorf*, *Lex. chald.* p. 782), et quid sit *chulaca* non satis constet.

Ex lingua assyriaca alii conferunt vocem *chulmittu*, quae serpentis speciem designat (*Frd. Delitzsch*, *Ass. Hwbch.* p. 277^b), sed etiam lacertilibus anguiformibus convenire posset (veluti *Anguis fragilis* L., *Seps monodactylus* Günther etc.). Alii maiore cum probabilitate ad ass. *chamtu* seu *chanu* recurrunt, quod *velocem* seu *festinantem* significat (*Delitzsch* 281^b) et non soli *Lacertae agili*, verum etiam aliis lacertae specibus satis bene attribui posset. Unde neque ex etymologia quid sit *chōmet* accuratius definiri potest.

Cf. *Sam. Bochart*, *Hierozoicon* IV. 5, ed. *Rosenmüller* II. 500-3; *E. F. K. Rosenmüller*, *Bibl. Alterth.* IV. 2 p. 263 s.; *P. Cultrera*, *Fauna biblica* 343; *H. B. Tristram*, *Nat. Hist. of the Bible*, ed. 8, 268 s.; *H. Ch. Hart*, *Animals of the Bible*, London 1888, 150 s.; *J. G. Wood*, *Bible Animals*, New ed. ib. 1892, 531-3.

L. FONCK.

LACHIS (לָחִישׁ, Λαχίς), urbs in campis pestribus Iuda, in secunda provincia Sephelae (Ios. 15,39), a Iosue post duos dies obsidionis expugnata (Ios. 10,3-35; 12,11), a Roboam rege Iuda munitionibus firmata (2 Par. 11,9). In hanc urbem munitam confugit Amasias, nonus rex Iuda, ut a coniuratione in Ierusalem facta sibi caveret; sed in ipsa urbe Lachis ab emissariis coniuratorum interfectus est (4 Reg. 14,19; 2 Par. 25,27). Ezechia rege Sennacherib in Aegyptum profecturus Lachis oppugnavit et ibidem legatos ab Ezechia missos excepit (4 Reg. 18,14. 17; 2 Par. 32,9; Is. 36,2); urbem demum ab Assyriis expugnatam esse textus sacer non directe enuntiat, sed innuere videtur (4 Reg. 19,8; Is. 37,8); idem autem confirmant monumenta assyriaca, in quibus cernitur imago sculpta Sennacherib regis in throno sedentis, cui spolia Lachis affe-

runtur, inscriptione addita, qua explicite refertur eum sedisse in throno sublimi et recepisse spolia urbis Lachis (*Vigouroux*, La Bible et les déc. mod. ed. 6 t. 1, 199; IV. 28). Sedecia rege Lachis denuo oppugnabatur a Nabuchodonosor (Ier. 34,7). Post exilium denique iterum a filiis Iuda incolebatur (Neh. 11,30). De mentione urbis Lachis Mich. 1,13 cf. *Knabenbauer* in h. l.

Tempore Eusebii et S. Hieronymi erat villa 7 mil. pass. meridiem versus ab Eleutheropoli (*Beit Djibrin*) euntibus Baromam (Onom. ed. Lag. 274,9; 135, 22). Nomen antiquum prae se ferunt ruinae *Umm Lāqis* inter meridiem et occidentem a *Beit Djibrin* et occidentem versus ab *Adjlān* seu Eglon, quae duae urbes in S. Scriptura saepius una commemorantur (cf. *Guérin*, Judée II. 299-303). Sed post excavationes a *Flinders Petrie* et *Bliss* susceptas Lachis probabilis agnoscitur in *Tell el-Hesi* iuxta *Wādi el-Hesi* a *Khirbet Adjlan* austrum versus. Attamen non desunt qui hunc situm addubitent et alium quaerant vel *Umm Lāqis* retinendum putent (cf. *J. Dölger*).

Cf. *Pal. Expl. Fund.*, Quart. Stat. 1890 p. 159 ss. 219 ss.; 1891 p. 282 ss.; 1892 p. 36-38. 95 ss. 192 ss.; 1893 p. 9 ss. 103 ss.; *W. M. Flinders Petrie*, Tell el-Hesi (Lachish), London 1891; *F. J. Bliss*, A Mound of many cities or Tell el-Hesi excavated, London 1893; *Zeitschr. d. D. Pal.-Ver.* XV. 1892 p. 172. 173; XVII. 1894 p. 149; *J. Dölger*, Geogr. u. ethnogr. Studien z. III. u. IV. Buche d. Könige 1904 p. 266 s.

LACHMI v. ADEODATUS.

LACTUCAE AGRESTES expouuntur in Vulgata herbae amarae (בִּרְרִים *birrim*, *πικρῶδες*), quae in coena paschali simul cum agno et azymo pane sumendae praecipiebantur (Ex. 12,8; Num. 9,14). Idem nomen hebraicum occurrit Thren. 3,15, ubi a Vulgata explicatur *amaritudines*. Quoniam herbae amarae nomine hebraico designentur, ex textu sacro non constat, cum praeter notas generales nihil ex eo deduci possit. Rabbinique varias species enumerant, inter quas *lactuca* primum locum obtinet. Ex 34 speciebus orientalibus generis *lactucae*

sola *Lactuca saligna* Linné videtur in Aegypti partibus frequentior inveniri (*Boissier*, Flora orient. III. 810). — Tamquam ratio praecepti assignatur a Rabban Gamaliel in Talmude, quod « Aegyptii vitam patrum nostrorum amaritudine affecerunt in Aegypto » (tract. Pesachim 10,5).

Cf. *Sam. Bochart*, Hierozoicon P. I. l. II. c. 50 n. 6 (ed. *Rosenmüller* l. p. 691-700); *I. Löw*, Aram. Pflanzennamen n. 130 p. 175 s.

L. FÖNCK.

LACUS. Notione receptaculi aquarum legitur Ex. 7,19; Is. 22,11 et significatione cognata cisternae 1 Mach. 9,33 lacus (λάζκος LXX pro hebr. לַחַשׁ, לִבְיָ). cisterna Asphar. Frequentissime ponitur pro hebr. לִבְיָ notione foveae; Ps. 7, 16 lacum aperuit et effodit eum et incidit in foveam quam fecit. Quae vox saepe adhibetur pro sepulcro praesertim in dictione descendere in lacum; cf. Ps. 27,1 assimilabor descendentibus in lacum; 29,4 salvasti me a descendentibus in lacum; 87,5; Prov. 1,12; Is. 14,15 etc. Dein cum fovea (cisterna exsiccata, Gen. 37,24) etiam loco carceris inserviret, lacus saepius ea notione legitur: Ier. 37,15 ingressus est Ieremias in domum laci, i. e. in carcerem tenebriosum, coenosum; 38,6 et proiecerunt eum in lacum (i. e. cisternam) in quo non erat aqua, sed lutum; 38,9 etc. Unde facile critur locutio translata; eduxit me de lacu miseriae Ps. 39,3; invocavi nomen tuum de lacu novissimo Lament. 3,53; unde Apoc. 14,19 et misit in lacum irae Dei magnum. Praeterea dicitur apud Danielem cavea illa in qua leones asserabantur lacus leonum 6,7. 12. 16 etc.; cf. Ez. 19,6-9 factus est leo ... et miserunt eum in caveam. Singulari notione legitur vox Marc. 12,1 vineam pastinavit ... et fodit lacum (graece *ὀπολῆγιον*) i. e. vas, in quod uvarum liquor expressus deflueret ex torculari superiore; torcularia excidebantur et excavabantur etiam in saxis.

De lacu Asan 3 Reg. 30,30 vide s. v. ASAN; de lacu ASPHAR s. v. ASPHAR.

LADANUM est resina fruticis in Palaestina satis communis, cui nomen *Ci-*

stus ex familia *Cistinearum*; duae praesertim eius species in flora palaestinesi occurrunt, *Cistus villosus* L. cum varietatibus *genuinus* Boissier et *creticus* Boiss., ac *C. salviaefolius* L., quibus in Amano monte tertia species accedit, *C. incanus* L. Resina hujus fruticis communiter censetur nomine hebraico לָדָן designari, quod in Vulgata *stacte* explicatur. Vide STACTE.

LAEL (לֵאֵל, Δαλ), pater Eliasaph levitae de stirpe Gerson tempore Moysis (Num. 3,24).

LAGENA, LAGUNCULA ponitur in Vulgata etiam pro utre (1 Reg. 16, 20; Job 32,19) et Is. 5,10 pro mensura bath, dein generatim pro vase fictili, urceo, hydria; cf. Iud. 7,16; Ier. 19,1. 10; Marc. 14,13. Immo Agg. 2,17 vertit S. Hieronymus פִּיֶּרֶה lagenam, quam vocem hebr. Is. 63,3 rite expresserat torcular, et Is. 10,33 pariter פִּצְרֶה reddidit lagunculam; sed eandem vocem melius exposuit Ez. 17,6; 31,5 6. 8. 12. 13 propagines, ramos, frondes, arbusta; qua notione etiam Is. 10,33 capienda est; exercitus enim Assyriorum saltui, silvae comparatus est; Deus autem dicitur ramos eius vel propagines cum potentia concidere.

LAHELA in Vulgata 1 Par. 5,26 mendum est pro Hala; v. HALA.

LAHEM (1 Par. 4,22). Inter posteros Sela filii Iuda enumerantur etiam לֵאֵהֶם; Vulgata: qui reversi sunt in Lahem, LXX ἀπέστρεψεν αὐτούς. Videtur nomen proprium viri esse: Iashubi Lechem, quod non interpretandum est « revertens ad panem » neque « revertens Bethlehem », sed « revertens a pugna » scil. onustus praeda. Cf. *F. de Hummelauer*, Comm. in Num. p. 204.

LAIS v. DAN 3.

LAIS (לַיִשׁ et 2 Sam. 3,13 לַיִשׁ, *Qeri* לַיִשׁ, Λαίς, Σελλής), pater Phalti (Phaltiel) mariti Michol, oriundus de Gallim (1 Reg. 25,44; 2 Reg. 3,13).

LAISA (לַיִשָּׁה, Λαῖσα, Λαίς), urbs quae in descriptione illa poetica

Is. 10,30 itineris exercitus Assyriorum ponitur inter Gallim et Anathoth (Ἀναθή) urbes beniaminiticas. Eadem est Laisa (cod. A Λαῖσα, cod. S et Venet. Ἐλαῖα), prope quam Iudas Mach. occubuit devictus a Bacchide, Syrorum duce, qui prope Berem castra posuerat (1 Mach. 9,5); apud Flav. Iosephum (Bell. iud. I. 1,6) hic locus scribitur Ἀδασά (ed. Dindorf) vel Ἀξέδασα (ed. Niese). Censetur esse Khirbet 'Ilasā inter Bethoron superiorem et inferiorem.

LAMECH (לִמְכָךְ, Λάμεχ). 1. Filius Mathusael, Cainita, cuius duae uxores recensentur Ada et Sella (Gen. 4,18. 19). Lamechi tripudium ob arma ferrea, quae Tubalcain filius ex Sella genitus ei praebuit (4,23. 24), regulam proclamavit, qua in posterum iniurias sibi illatas ulturus sit; blasphemiam continet, cum Lamech gladio suo se ipse melius defendere praetendat, quam a Deo defensum sit Cain; acta Cainitarum claudit, qui a fratricida descendentes caedibus perpetrandis delectantur.

2. Filius Methusala ex posteris Sethi et pater Noe (Gen. 5,25. 26. 28. 20. 31; 1 Par. 1,3; Luc. 3,36). Eius prophetia spem exprimit, per Noe maledictionem a Deo Gen. 3,17-19 pronuntiatam brevi fore removendam (Gen. 3,29) i. e. humanis artibus eludendam; eundem diluvio absorptum esse ex Pentateucho Samaritano adstruit *F. de Hummelauer*, Comm. in Gen. p. 203. 204 (cf. p. 210. 211 ad 5,29).

LAMENTATRICES, praeficae, mulieres erant mercede conductae, quae ad funus lessum i. e. lugubrem eiulationem instituerent et illis luctus signis et documentis, quae apud orientales in usu erant et sunt, de morte alicuius ederent lamentum, scil. tundentes pectora, vellentes capillos, flentes, eiulantes, cinere caput aspersum habentes. Exemplum aliquod eiusmodi carminis lugubris habetur Ier. 21,18, qui de morte Ioakim dicit: non plangent eum; vae frater; non concrepabunt ei: vae domine et vae inclyte (vae maiestas, hebr.) et 34,5 vae domine; cf. 3 Reg. 13,30; unde Eccli. 22,10: super mortuum plora et cf. 38,16. Et eiusmodi

lamentatrices filiam lairi ploratu suo et tumultu ingebant Matth. 9,23; Marc. 5, 38; Luc. 8,52. Atque ad significandum quanta ruina et calamitas mansura sit Iudaeos, iubet Deus per Ieremiam prophetam, ut convocet lamentatrices easque quae optime sciant lamentari, ut properent et festinent et assumant lamentum (9,17. 18).

LAMIA. 1. Spectrum nocturnum. Is. 34,14 dicitur regionem Edom in solitudinem esse redigendam: ibi cubavit lamia et invenit sibi requiem. Voce lamiae S. Hieronymus reddit h. l. hebr. לַמִּיָּה; edoctus enim erat a rabbinis esse Lilith spectrum nocturnum, daemonem muliebrem quae noctu infantibus insidietur et sub forma mulieris speciosae, alatae iuvenes ad se pellicere studeat. Unde secundum eam rabbinorum sententiam Lilith fere eodem modo se gerit, sicut lamia Romanorum et Empusa Graecorum. Recentiores vocem etiam ex sumerico explicant, esse ventum et ventum ea voce exhiberi tamquam personam (ita *Jensen*); alii Lilith apud Assyrios deam nocturnam habitam fuisse affirmant. Ad horrorem solitudinis et vastitatis describendum propheta I. c. dicit plurima ferarum genera et spectra quaedam ibi morari.

2. Eadem voce sed plane alia notione usus est S. Hieronymus Lament. 4,3: sed et lamiae nudaverunt mammam, lactaverunt catulos suos; hebr. לַמִּיָּה, *Qeri* לַמִּיָּה i. e. canes aurei (germ. *Schakale*); canes aureae depromunt mamillam. Vult scil. propheta efferre maxima calamitatis effectum esse, ut incolae Sion ipsius naturae obliti essent: matres cerni quasi bestiis ferociore, quia iam non alere possunt filios.

LAMPSACUS enumeratur 1 Mach. 15,23 inter regiones, quibus Romani anno 139 a. Chr. scripserunt, ne Iudaeis mala inferrentur. Erat Lampsacus urbs Mysiae ad Hellespontum. Sed in manuscriptis graecis plerisque legitur Λαμψάκη, in aliquibus Λαμψάκη, in Italia Lampsaco, apud Syrum Samsonos. Unde coniecit designari urbs apud geographos arabicos vocata *Samsun*, quae

apud Graecos audit Amisus, una ex praecipuis urbibus Ponti, orientem versus a Sinope ad Pontum Euxinum sita. Iudaeos usque ad remotissimos angulos Ponti dispersos fuisse testatur Philo (Legat. ad Caium § 36 *ed. Mangey* II. 587; τῶν τοῦ Πόντου μεγάλων). Obiicit quidem *Reinach* (*Revue des études grecques* I. 1888 p. 334 s.) Amisum ad regnum Ponticum pertinuisse nec sui iuris fuisse; sed id evincunt testimonia historica pro aetate Mithridatis Magni, non pro tempore priore.

Cf. *E. Schürer*, *Gesch. d. jüd. Volkes ed.* 3 III. p. 3. 4. De Amiso urbe cf. *Ritter*, *Erdkunde* XVIII. 796-806; *Forbiger*, *Handb. d. alten Geogr.* II. 421; *Marquardt*, *Röm. Staatsverwaltung* I. 1881 p. 357; *Henze*, *De civitatibus liberis* 1892 p. 64 s.; *Head*, *Historia Numorum* 1887 p. 424 s.

LAMUEL (לְמוּאֵל) legitur in inscriptione Prov. 31,1: verba Lamuelis regis, visio (לְמוּאֵל) qua eruditur eum mater sua. Ita quoque ex textu hebr. tradito aliqui explicant. Alii eum dicunt regem Massaensem (לְמוּאֵל) et revera textus hebr. ex indole linguae ita debet accipi, ut haec vox nomen sit vel gentis vel regionis; cf. Gen. 25,14 et 1 Par. 1,30, ubi Massa tribus quaedam ab Ismael orta recensetur, cum qua conferunt Mas nomen tribus in septentrionali parte Arabiae quod in inscriptionibus cuneiformibus legitur (cf. *Schrader*, *Keilinschriften u. Geschichtsforschung* p. 263). Etiam ab aliquibus Lamuel nomen symbolicum ipsius Salomonis habitum est et explicatum לְמוּאֵל Deo consecratus (cf. *Gietmann*, *Comment. in Eccl.* p. 66) vel לְמוּאֵל אֵל Deus est refugium; alia vide apud *Delitzsch*, *Das salom. Spruchbuch* p. 520. Textus graecus ita habet: οἱ ἐμοὶ λόγοι ἐζηγνται ὑπὸ Θεοῦ βασιλέως, χρηματισμός etc. Cf. dicta s. v. AGUR in vol. I. col. 171.

LANA v. LINUM.

LANCEARIUS; Act. 23,23 iubet tribui parari ducentos lancearios, qui cum aliis militibus et equitibus Paulum salvum perducerent Caesaream ad Felicem praesidem. Graece habetur δεσποτάριους, quam vocem explicant vel dex-

tera lanceam gestantes vel iaculatores.

LAODICIA (Λαοδικεα), urbs Phrygiae ad Lycum fluvium, qui in Maandrum influit, haud procul a Colossis. Quamvis Paulus bis Phrygiam peragraverit, Laodiciae non commoratus est (Col. 2,1; 4,13); sed Laodicenses salutari vult iisque epistulam scripsit (Col. 4,13. 16), quae tamen ad nos non pervenit. Nam quae eo nomine fertur, est relinenda ad libros apocryphos et est consarcinata ex sententiis decerptis ex epistulis ad Colossenses et Philippenses. Eius ecclesiae conditio satis perversa describitur Apoc. 1,11; 3,14 ss.

LAOMIM v. **LOOMIM**.

LAPICIDINAE. In instauratione templi sub Iosia rege iubentur afferri inter alia « lapides de lapicidinis » (4 Reg. 22,6; 2 Par. 34,11). Expressio hebraica אֲבָנֵי כִּיָּדָן pariter occurrit in historia regis Iosias (4 Reg. 12,13 [Vulgata 12,12]), ubi a latino interprete redditur « lapides qui excidebantur ». LXX in utroque textu libri Regum λθους λατομη- τοός in Paralipomenis vero λθους τετρα- πιδους exponunt. Sensus a Vulgata expressus vocis hebraicae satis videtur convenire, quamvis recentiores sal multam potius tamquam nomen verbale pro actione caedendi, alii vero tamquam nomen instrumenti explicant.

Lapicidinas plurimas in Palaestina etiam antiquitus fuisse constat. Hierosolymis celeberrimae sunt eae, quibus nomen cavernarum regiarum inditum est quaeque iam a Flavio Iosepho in descriptione ambitus septemtrionalis urbis commemorantur (Bell. Iud. V. 4,2 n. 147; cf. Tacitus, Hist. V. 12). Probabiliter ex hisce lapicidinibus ad varia aedificia civitatis antiquae lapides excidebantur.

Cf. *Liévin de Hamme*, Guide-Indicateur ed. 4, I. 482; *Vigouroux*, Dict. II. 318-323.

L. FONCK.

LAPIDARE, LAPIDATIO. Lege mosaica statuitur poena lapidationis pro crimine idololatriae (Deut. 13,10; 17,3), blasphemiae (Lev. 24,14; cf. 3 Reg. 21,10), necromantiae et divinationis (Lev. 20,27), violationis legis sab-

baticae (Num. 15,33), adulterii (Deut. 22,23. 24); item: si quis dederit de semine suo idolo Moloch, morte moriatur; populus terrae lapidabit eum (Lev. 20, 2); pari modo filius contumax, quem parentes coram senioribus variorum scelerum reum accusant, lapidibus obrui debebat a populo civitatis (Deut. 21,21); eadem poena intelligenda erat puellae fornicariae (Deut. 22,20. 21). Hoc genus mortis adeo commune erat, ut eo etiam bos corrupta esset aufereendus (Ex. 21,28); Achan quoque propter furtum de anathemate lapidatus est (Ios. 7,25).

De qua poena haec statuuntur: manus testium prima interficiet eum (Deut. 17, 7) i. e. testes primi lapidem in eum coniciant (cf. Deut. 13,9) et postea omnis populus mittat manum (Deut. 13,9; 17,7). Multo plura de modo executionis praescribuntur in tractatu mishnico de synedriis cap. 6 (cf. *Surénhusius* IV. p. 233 s.). Secundum rabbinos ubique poena haec lapidationis est intellegenda, ubi legitur: sanguis eius sit super eum, vel ubi aliud mortis genus v. g. per gladium non indicatur. Tamquam occisio quae eminus inferri debeat, significatur Ex. 19,12. 13; prohibetur enim ne quis montem tangat Sinai: qui tetigerit morte morietur; manus non tanget eum, sed lapidibus opprimetur aut confodiatur iaculis.

Furor popularis ab antiquo tempore iactis lapidibus odium et execrationem manifestabat. Ita de Aegyptiis: si mactaverimus ea quae colunt Aegyptii coram eis, lapidibus nos obruent (Ex. 8,26). Populus in deserto ita in Moysen furere cernitur, ut Moyses ad Dominum clamet: adhuc paululum et lapidabit me (Ex. 17,4); eodem modo rabiem exerit populus in Iosue et Caleb (Num. 14,10); pariter urbe Siceleg per Amalecitas succensa et mulieribus abductis et filiis populus volebat Davidem lapidare, quia amara erat anima uniuscuiusque (1 Reg. 30,6) et Aduram qui erat super tributa et quem Roboam miserat, lapidavit omnis Israel (3 Reg. 12,18); cf. 2 Par. 10,18; 24,21; 2 Mach. 4,16. Et Christus ipse, quod de Ierusalem conqueritur: lapidas eos qui ad te missi sunt (Matth.

23,37; cf. 21,35), in se expertus est : tulerunt ergo lapides, ut iacerent in eum (Ioan. 8,39) et : sustulerunt ergo lapides Iudaei, ut lapidarent eum (Ioan. 10,31; 11,8). Ita tumultuarie Stephanus morte est affectus Act. 7,58, qua occasione Saulus vestes testium i. e. pallia, amicula summa custodiebat. Paulus quoque periculo lapidationis erat expositus Iconii et lapidatus est Lystris Act. 14,5. 19; 2 Cor. 11,39.

LAPIDES PRETIOSI. 1. Notiones generales. Lapidēs pretiosi in S. Scriptura dicuntur tum gemmae proprie tales tum mineralia quaedam, quae hodie sensu tantum latiore lapidibus pretiosis adnumerantur. Generatim eae mineralium species hoc nomine comprehenduntur, quae vel raras sunt, vel translucentae, vel pulchro colore vel duritie vel alia insigni qualitate instructae. In ipsa Palaestina lapides pretiosi non inveniuntur, sed facile ex Syria, Arabia, Aegypto aliisque finitimis regionibus obtineri poterant. Praesertim in anulis signatorii et ad varia ornamenta adhibebantur. In sacris libris potissimum commemorantur in descriptione « rationalis iudicii » seu pectoralis summi sacerdotis (Ex. 28,17-20; 39,10-13), deinde in splendore regis Tyri enarrando (Ez. 28,13) et in prophetica imagine fundamentorum civitatis caelestis (Apoc. 21, 19 s.; cf. Tob. 13,24 s.).

Pro determinandis singulis speciebus lapidum, qui in S. Scriptura inter pretiosos enumerantur, praeter nomina hebraica et graeca atque expositiones veterum interpretum praecipue attendenda sunt ea quae *Fl. Iosephus* (Ant. III. 7,3 n. 166-169; Bell. Iud. V. 5,7 n. 234) et *Plinius* (Nat. hist. I. 37) referunt. Porro ii soli lapides nominibus biblicis designari possunt, qui antiquis cogniti erant; atque pro pectorali summi sacerdotis illi insuper excludendi sunt, quos sculptore antiqui nesciebant.

2. Variarum species in S. Scriptura commemoratarum. In sequenti catalogo iuxta ordinem Vulgatae varias species lapidum pretiosorum enumeramus, quae in sacris libris commemorantur, additis ubi fieri potuit nominibus hebraicis et

graecis. De singulis autem singuli articuli consulendi sunt.

- 1) Achates אַכַּתִּיז, ἀχάτης.
- 2) Adamas אֲדָמָס, ἀδάμας.
- 3) Amethystus אֶמֶתִּישְׁט, ἀμέθυστος.
- 4) Beryllus βήρυλλος (Apoc. 21,20).
- 5) Chalcedonius χαλκηδών (Apoc. 21, 19).
- 6) Carbunculus כַּרְבֻּכַּח, ἄνθραξ.
- 7) Chodchod כְּדָכָד, ἱάσπις.
- 8) Chrysolithus כִּרְשִׁיט, χρυσόλιθος.
- 9) Chrysoprasus χρυσόπρασος.
- 10) Crystallum קְרִיחַ, κρύσταλλος (etiam גְּבִישׁ, Vulg. eminentia Job 28,18).
- 11) Hyacinthus ὕακινθος.
- 12) Jaspis יָהֶלֶם, ἱάσπις (Is. 54,12 pro כְּדָכָד).
- 13) Ligurius לִיגֻרִי, λιγύριον.
- 14) Onyx אֹנִיכִים, βήρυλλος c. a.
- 15) Sapphirus סַפִּיר, σάπφειρος.
- 16) Sardius אֶדָם, σάρδιος.
- 17) Sardonyx סַרְדֹּנִיכִים, σαρδόνυξ.
- 18) Smaragdus סַמְרָקֶדֶס, σμάραγδος.
- 19) Topazius טֹפָזִיחַ, τοπάσιον.
- 20) Hebr. אֶקְדָּה, quod Vulgata explicat *lapides sculpti* (q. v.).

Praeterea aliquo modo ad lapides pretiosos etiam pertinent alabastrum, marmor, parius lapis.

Cf. *S. Epiphanius*, De duodecim gemmis *M.* 43,293-372; *J. Braun*, Vestitus sacerdotum II. c. 8-19 (Amstelodami 1680,) p. 627-745; *A. Hartmann*, Die Hebräerin am Putztisch, ib. 1810, I. 276-291; III. 87-100; *J. J. Bellermann*, Die Urim und Thummim, die ältesten Gemmen, Berlin 1824; *M. Bauer*, Edelsteinkunde, Leipzig 1896; *A. Kinzler*, Bibl. Naturgeschichte, ed. 10, Calw und Stuttgart 1902, 332-338; *J. Hastings*, Dict. IV. 619-624; *T. K. Cheyne*, Encycl. bibl. IV. 4799-4812.

L. FONCK.

LAPIDES SACCULI Prov. 16,14 dicuntur lapides qui pro ponderibus adhibebantur et qui a mercatoribus et negotiatoribus in sacculo vel marsupio portabantur. Dicuntur I. c. opera Dei, quia Deus vult, ut commercium inter

homines iusto pondere et mensura instituantur; cf. Lev. 19,36; Deut. 25,13-16.

LAPIDES SCULPTI exponitur in Vulgata hebr. אֲבָנִים (Is. 54,12), quod LXX vertunt ἀρστυλλος. Sed loco crystalli ex etymologia vocis (a radice קָדַח « arsit ») potius videtur designari *carbunculus* (q. v.).

L. FONCK.

LAPIDOTH (לִפְיֹדֶת, Λαπεδοθή), maritus Debborae prophetidis (Iud. 4,4).

LAPIS ADIUTORII (אֶבֶן הַעֲזָרָה, Ἀνεξέρη). Samuel victoria a Philistiim reportata « tulit lapidem unum et posuit eum inter Masphath et inter Sen et vocavit nomen loci illius *Lapis adiutorii* dixitque : hucusque auxiliatus est nobis Dominus » 1 Reg. 7,12. Per anticipationem nomen istud iam reperitur 1 Reg. 4,1, ubi Israelitae eo loco dicuntur castrametati et Philistiim venisse in Aphec, et 5,1 : Philistiim tulerunt arcam Dei et asportaverunt eam a Lapide adiutorii in Azotum. Ex iis quae s. v. APHEC 3 diximus, Lapis adiutorii ibi fere quaerendus erit, ubi nunc est *Beit Iksā* scil. inter Maspha Benjamin (nunc *Nebi Samuīl*?) et Sen (nunc *Deir Yāsīn*?). Sed si Maspha Benjamin componitur cum *Sha'fat* (v. MASPHA 6), etiam Lapis adiutorii magis orientem versus quaeri debet.

LAPIS ANGULARIS. Usitata est locutio : domus Iuda, domus Israel pro ipso populo usurpata. Inde eadem metaphora ii qui talem domum quasi sustentant eique firmitatem praebent i. e. principes dicuntur hebr. quandoque angulares lapides (Vulgata anguli; cf. Iud. 20,2; 1 Reg. 14,38; Is. 19,13; Zach. 10,4). Totus quoque populus Dei vocatur domus Dei Os. 8,1; consideratur enim tamquam una familia Dei in una domo habitans, cuius paterfamilias est Deus, quae acceptio frequens est in Novo Testamento (cf. 1 Cor. 3,9; Eph. 2,21; 1 Tim. 3,15; Iebr. 3,2-6). Quare Christus qui eius domus est fundator et qui Iudaeos et gentes in unam congregat familiam etiam vocatur angularis lapis, utpote qui duos parietes iungit et sus-

tentat; ita Eph. 2,20 et 2,14 ipse est pax nostra qui fecit utraque unum. Itaque autem designationi Messiae iam praeludebatur in Vetere Testamento. Ita Is. 28,16 : ecce ego mittam in fundamentis Sion lapidem probatum, angularem etc.; i. e. Sion, centrum regni Dei, non destruetur ab hostibus et fundamentum illud immotum quod a Deo ibi est collocatum et in quo ipsa urbs firma consistit est promissio messiana, quae in rege messiano consistit. Propter regnum Dei messianum quod ex Sion se diffundere debet in orbem universum urbs ipsa eripietur periculo. Id eo loco vaticinatur Isaias. Messias autem totius firmitatis regni messiani et ratio et fundamentum est. Eandem imaginem ipse Christus sibi applicat, dum quaerit ex Phariseis : nunquam legis in Scripturis : lapidem quem reprobaverunt aedificantes, hic factus est in caput anguli? cf. Matth. 21,42; Marc. 12,10; Luc. 20,17; Act. 4,11, ex Ps. 117,22. Ut in parabola de vinea principes synagogae ut coloni vineae describebantur, ita hic ut qui domum Dei aedificare deberent; Christum autem qui est totius aedificii fundamentum et coniunctio firma repudiabant.

LAPIS BOEN v. ABENBOEN.

LAPIS EZEL v. EZEL.

LAPIS ONERIS Zach. 12,3 : ponam Ierusalem lapidem oneris cunctis populis i. e. ut S. Hieronymus. bene explicat, ponam Ierusalem cunctis gentibus quasi gravissimum lapidem sublevandum. Certatim omnes theocratiam aggrediuntur; vires exercent ad lapidem istum sublevandum i. e. conabuntur tollere, vastare urbem; verum « omnes qui levabunt eum concisione lacerabuntur ». In dictione latere videtur allusio ad eos qui ponderosissimorum lapidum sublevatione vires suas certatim ostentare solent.

LAPPA exponitur hebr. הָיָה Os. 9,6 et עֵץ ib. 10,8. Lappa est herba mala satis nota (germ. *Klette*, gall. *bardane*), cuius una species, scil. *Lappa maior* Linné (fam. *Compositae*) in Oriente invenitur. At utraque vox hebraica non

hanc plantam, sed species spinarum designat; v. SPINAE.

Cf. de lappa *E. Boissier*, *Flora orient.* III. 457; *Leunis-Frank*, *Synopsis ed.* 3, II. 2 p. 722 s.; *G. E. Post*, *Flora of Syria* 451.

L. FONCK.

LAQUEARE. Ea voce utitur S. Hieronymus 3 Reg. 6,9 : textit quoque domum (templum) laquearibus cedrinis; hebr. explicabis; textit domum fratribus et tabulis cedrinis; et 3 Reg. 6,15 summitatem parietum videtur explicare additis verbis : et usque ad laquearia; hebr. usque ad parietes tecti. Etiam Ier. 22,14 laquearia cedrina explicabis : palatium esse contiguum tabulis cedrinis. Proprie designantur lacunaria Cant. 1,17 : laquearia nostra cypressina. Domus autem laqueatas (Agg. 1,4) intellege tabulatas, quarum muri tabulis tecti et ornati sunt; quare Deus eos reprehendit qui domus suas exornant, domum vero Dei vastam ac desertam relinquunt.

LARUS in catalogo avium immun-darum in libro Levitici novum (Lev. 11, 16) et in Deuteronomio (14,15) decimum locum occupat. Explicatio vocis hebraicae לָרוֹס de laro, quam versio graeca λάρος confirmat, etiam a recentioribus generatim admittitur, ita tamen, ut nomen potius totam familiam *laridarum* quam unam aliquam huius familiae speciem designare merito supponatur. — Ex hac familia sat multae species palaestinae enumerantur ad tria praesertim genera pertinentes, *Sterna*, *Hydrochelidon* et *Larus*. Forsitan cognatae quoque familiae, v. g. *Procellariidae*, eodem nomine comprehendi dicendae sunt.

Cf. *Sam. Bochart*, *Hieroicozon* P. II. l. II. c. 18 (ed. *Rosenmüller* III. p. 1-4); *P. Cultrera*, *Fauna biblica* p. 311 s.; *H. B. Tristram*, *Fauna and Flora of Palestine*, London 1884, p. 135-138; *id.* *The nat. hist. of the Bible ed.* 9, p. 210 s.

L. FONCK.

LASTHENES (Λαθηνεύς), vir Cre-tensis qui multos milites mercenarios Demetrio tradiderat (*Plac. Ios. Ant.* XIII. 4,3). Eum Demetrius vocat parentem

suum inscribens epistolam Λαθηνέει τοῦ πατρὸς γράψαι; erat igitur ei quam maxime familiaris et Lasthenes, qui ab eodem συγγενής appellatur, ei erat a consiliis. Similiter Gen. 45,8 Iosephi pater Pharaonis vocatur. Epistula Demetrii ad Lasthenem legitur I Mach. 11,32 ss. et eius exemplum missum est a Demetrio rege ad Ionathan I. c. 30.

LATER. De confectione laterum in planitie babylonica refertur Gen. 11,3 : « venite faciamus lateres et coquamus eos igne; habueruntque lateres pro saxis et bitumen pro caemento ». Atque revera antiquissima Babyloniae aedificia habent lateres coctos bitumine illitos (cf. *F. de Hummelauer*, *Comm.* in Gen. p. 334 s.). Nam ea in regione lapides ad aedificandum apti deficiunt, sicuti etiam in regione inferiore Nili deficiunt. Quare Israelitae quoque in Aegypto lateres conficere cogebantur (Ex. 1,14). Ut massa lutea, ex qua lateres conficiebantur, tenacius cohaereret, ei admiscebantur paleae, quae antea Israelitis dabantur, postea vero eas conquirere ipsi debebant et nihilominus eandem mensuram laterum conficere Ex. 5,7 ss. — Ut Assyrii et Babylonii in molli latere (antequam sole siccatus duresceret) scripturae formas cuneatas imprimebant, ita simili modo iubetur Ezechiel in latere describere urbem Ierusalem vel delineare 4,1. Etiam in Palaestina aedificia ex lateribus sole siccatis esse confecta, patet ex arroganti iactantia Israelitarum : lateres ceciderunt, sed quadris lapidibus aedificabimus Is. 9,10. Irrisorie adhortatur Nahum Ninivitas, ut subigant lutum, lateres conficiant, ut interrupta scil. murorum struant 3,4. Muros coeli lateris Is. 16,7. 11 intellege arcem ex lateribus extructam I. c. Qir Moab, hodie Kerak.

LATITUDO, nomen putei (Gen. 26, 22) vide s. v. RECHOBOTH.

LATRINA 4 Reg. 10,27 ; ut maximum contemptum in Baal exprimerent, fanum eius dirutum est et fecerunt pro eo latrinas, cloacam (χοιρῶνα LXX). Ita similiter legitur in decreto Darii : qui hanc mutaverit iussionem, domus eius reddatur acervus stercoris vel cloaca

Esdr. 6,41 (aramaice); item Dan. 2,5 minatur rex Chaldaeis, si nequiverint indicare somnium et eius interpretationem « peribitis vos et domus vestrae in sterquilinum (acervum stercoris) redigentur » Dan. 2,5 (aramaice).

LATRO. Ea voce saepius S. Hieronymus reddit hebr. לָדוֹד, quo vocabulo significatur turma militum, utique haud raro turma militum grassantium, praedam agentium. Ita qui 2 Reg. 4,2 principes latronum dicuntur, duces erant militum turmae qui partes tuebantur Ishoseth filii Saul. Razon quoque, adversarius Salomon, princeps latronum i. e. dux turmae militum factus est (3 Reg. 11,23). Ad notionem turmarum praedatolarum vox referenda erit 4 Reg. 6,23 : et ultra non venerunt latrones Syriae (Aram) in terram Israel. Sed de turma militum vox dicitur Ier. 18,22 et 2 Par. 22,1; immo Iob 19,12 : simul venerunt latrones eius i. e. milites Dei, quos dolore intellegit divinitus immissos sibi. Ceterum eam vocem S. Hieronymus etiam vertit cuneum (1 Reg. 30,5), exercitum (2 Par. 23,13).

Eodem modo etiam latrunculus saepius ponitur, ubi in hebr. לָדוֹד habetur. Et revera milites praedam agentes intelleguntur 1 Reg. 30,8, ubi David Dominum consulit : persequar latrunculos hos etc. ? et pariter v. 23 et 4 Reg. 5,2; 13,20. 21; 24,2; 1 Par. 12, 21. Eadem voce Os. 7,1 turma quaedam rapinis et lucro inhians designatur, quemadmodum Osee 4,2 furtum inter praecipua populi crimina enumerat, et ipsos quoque sacerdotes turmae praedantium similes esse conqueritur (6,9 hebr.). Eodem modo Isaias primores quasi latrones accusat : populum meum exactores sui spoliaverunt; vos depasti estis vineam et rapina pauperis in domo vestra (Is. 3,12. 14); neque aliter Michaeas 2,2. Et quod prophetae in principibus populi reprehenderunt, etiam Christus Pharisaeis exprobrat : quod intus est vestrum, plenum est rapina et iniquitate (Luc. 11,39); pleni estis rapina et immunditie (Matth. 23,25). Et apostolus quoque mandat, ut si quis frater i. e. homo christianus, sit rapax, omnes

ab eius consuetudine se plane retrahant, et serio monet : nolite errare : neque fures neque rapaces regnum Dei possidebunt (1 Cor. 5,11; 6,10). — Quo magis augetur opprobrium supplicii crucis pro Christo, duo latrones simul cum eo educli et in crucem acti sunt, quorum alter in Christum in cruce pendente convicia iecit, alter priorem reprehendit et a Christo audire meruit : hodie mecum eris in paradiso (23,33 ss.; Matth. 27,38; Marc. 15,27).

LATUSIM, LATUSSIM (לְרוֹחֵם, Λατοσσιμ), tribus arabica, quae ab Abraham et Cetura originem duxit per Ieetan eiusque filium Dadan (Gen. 25,3 et in Vulgata 1 Par. 1,32). Quaerenda est in Arabia septentrionali ad occidentem vergente. Aliquam coniecturam vide in Zeitschr. d. D. Morg. Ges. XX. 1866 p. 175; XXIII. 1869 p. 298 et cf. XIV. 1860 p. 503 s. 447. 477 s.

LAUS. Quandoque is qui laudatur et celebratur, de quo quis gloriatur, appellatur laus; ita de Deo dicitur : fortitudo et laus mea Dominus Ex. 15,2; item Deut. 10,21; Is. 12,2. Saepius dicitur in Vulgata sacrificium laudis pro hebr. sacrificium תְּרוּמָה, ita Ps. 49,14. 23; 106,12; 115,17; immo etiam laus, laudes quandoque eiusmodi sacrificium dicunt, uti 2 Par. 29,31; 33,16 et Ps. 55,13 laudationes. Inde quoque petitur Hebr. 13,15 : offeramus hostiam laudis i. e. fructum laborum confitentium nomini eius. Hoc sensu translato dicitur Tob. 8,19 sacrificium laudis Deo offerre. Aliis in locis haec vox hebr. redditur sacrificium pro gratiarum actione; cf. Lev. 7,12. 13; 22,29. Pertinent haec sacrificia laudis vel gratiarum actionis, sicut sacrificia ex volis vel sponte facta, ad sacrificia pacifica שְׁלֵמִים cf. Lev. 7,11-16. Vide s. v. HOSTIA. Apud LXX pro תְּרוּמָה poni solet ἀνάμνησις.

LAVARE. Ablutiones et profanae et religiosae sat frequenter commemorantur. Ita in more positum erat, peregrinis, hospitibus pedes lavare; cf. Gen. 18,4; 19,2; 24,32; Luc. 7,44; 1 Tim. 5,10; id quod etiam inter officia famulorum recensetur; unde Abigail dicit ad David :

ecce famula tua sit in ancillam, ut lavet pedes servorum domini mei (1 Reg. 23, 41; unde apparet, quanta humilitatis fuerit quod Christus pedes discipulorum lavit Ioan. 13,5. Lavabantur infantes recen-ter nati; quare eam abluionem esse omissam recensetur Ez. 16,4 inter opprobria originis. Lotiones ad munditiam corporis et ad ornatum quendam institu-ebantur; cf. Ex. 2,4 filia Pharaonis descendit, ut lavaretur in flumine; admonetur Ruth a socru: lavare et un-geri etc. Ruth 3,3; cf. 2 Reg. 11,2; David monet Uriam ex castris reversum: vade in domum tuam et lava pedes 2 Reg. 11,8; cf. Ez. 16,9; 23,40; Iudith 10,3; Dan. 13,15.

Multo frequentius sermo fit de ablu-tionibus religiosis. Ita in consecratione sacerdotum et levitarum. Nam Ex. 29,4 Moysi dicitur: cum laveris patrem (Aa-ron) cum filiis suis aqua, indues Aaron vestimentis suis (pontificalibus) et Num. 8,7 ei de levitis praecipitur: aspergantur aqua lustrationis. Porro labrum aeneum erat confectum et aqua impletum, quia sacerdotes manus et pedes lavare debe-bant ingressuri tabernaculum testimonii et accessuri ad altare Ex. 30,19; cf. Ex. 40,12. 29. Lotiones summo sacerdoti praescribebantur die expiationis Lev. 16,4. 24. Ad legem in Sinai accipiendam populus sese praeparabat lotis vestimen-tis Ex. 19,10. In ritu sacrificali quoque variae lotiones praecipiebantur; ita in-testina et pedes victimae lavabantur aqua Lev. 1,9. 13; 8,21; 9,14; Ex. 29, 17. Si de sanguine victimae vestis fuerit aspersa, lavabitur in loco sancto Lev. 6,27; item vas aeneum, in quo caro victimae cocta erat, aqua lavari debebat Lev. 6,28; cf. 2 Par. 4,6.

Ad tollendas varias immunditias ablu-tiones corporis vel lotiones vestium in-ter alia praescriptae erant. Qui portave-rit animal mortuum, lavabit vestimenta sua Lev. 11,25. 28; qui lepra infectus et a lepra sanatus est, lavabit vestimenta sua Lev. 13,6. 34; item vestis lepram quae habere videtur lavari debebat Lev. 13,54. 56. 58. Pariter sacrificio pro le-proso oblato, debuit leprosus et vesti-menta et se lavare Lev. 14,8. 9. Qui in domo de lepra suspecta comederit vel

dormierit, lavabit vestimenta sua Lev. 14,47. Multae lotiones vestium et ablu-tiones corporum praescribuntur iis qui virum semivivum vel aliquid ex eius rebus tetigerint, qui actum matrimo-nialem exercuerint Lev. 15,5 ss., qui morticinum comederit Lev. 17,15, et immundum tetigerit Lev. 22,6, qui cap-rum die expiationis emisit et qui pelles et carnes victimarum combusse-rit Lev. 16,26. 28, similiter qui in vic-tima vaccae rufae varia ministeria obierit Num. 19,7 ss. et qui aqua lustrationis expiatus fuerit Num. 19,19. Naaman iussus est lavari septies in Ior-dane, ut a lepra mundaretur 4 Reg. 5, 10. Demum lotio manuum in testimo-nium et significationem innocentiae vel immunitatis a crimine adhibebatur; cf. Deut. 21,6 venient maiores natu civita-tis illius ad interfectum lavabuntque manus suas et dicent: manus nostrae non effuderunt sanguinem hunc; cf. Matth. 27,14 Pilatus lavit manus etc. — Tempore Christi a Phariseis multae lotiones observabantur: manibus non lotis manducare iis videbatur a pietate alienum: nisi laverint manus non man-ducant et a foro (reduces) nisi bapti-zentur non comedunt et observant baptismata calicum et urceorum et ae-rametorum et lectorum Marc. 7,3. 4; cf. Matth. 15,2; Luc. 11,38. In signum luctus lotiones consuetae omittebantur: item tempore poenitentiae et afflictionis et ieiunii; quare David solvens ieiunium lotus unctusque est (2 Reg. 12,20) et Christus reprehendit eos qui exterminant facies suas ut appareant hominibus ieiunantes, et e contra monet: cum ieiunas, faciem tuam lava (Matth. 6,16. 17).

Cum sordes lotionibus eluantur et abs-tergantur, notio lavandi facile transfer-tur ad animi a sordibus peccatorum emundationem; unde: amplius lava me ab iniquitate mea Ps. 50,4; Is. 1,16 la-vamini, mundi estote, auferite malum cogitationum vestrarum; 4,4; Ier. 2,22 si laveris te nitro et multiplicaveris tibi herbam borith, maculata es in iniqui-tate tua; quibus verbis maximam quan-dam perversitatem notat propheta (si-mul autem docemur adhibitum esse ad vestes, lintea lavanda alcali fossile et

vegetabile, uti verbum לָבַשׁ indicat etiam calcando lotionem esse peractam); 4,14 lava a malitia cor tuum. Ad quam vocis translationem Christus quoque respicit in lotionem pedum apostolorum dicens: qui lotus est non indiget nisi ut pedes lavel et est mundus totus Ioan. 13,10. Eodem modo dicitur Christus nos lavisse a peccatis nostris in sanguine suo Apoc. 1,3 et sancti laverunt stolas suas et dealbaverunt eas in sanguine Agni Apoc. 7,14; 22,14. Quare baptismus vocatur lavacrum regenerationis (Tit. 3,5); eo enim mundamur lavacro aquae in verbo vitae (Eph. 5,26) et ad vitam gratiae nascimur (Ioan. 3,5).

LAZARUS. Nomen erat frequens apud Iudaeos; est enim idem quod אֱלֶעָזָר Eleazar. Sed sub forma Lazari solum reperitur de paupere illo mendico in parabola Luc. 16,20 ss. et de fratre Mariae et Marthae, qui a Christo e sepulcro suscitatus est.

1. Lazarus mendicus Luc. 16,20 ss. Significatio nominis: *Deus vivat* apta est ad sortem aeternam pauperis declarandam. Eius autem nomen aliquod opus erat efferre propter ipsam parabolam, in qua scil. dives in flamma cruciatus eum appellare nomine narratur: pater Abraham, mitte Lazarum etc. Quia itaque ex ipsa narrationis forma necessario nomen debuit indi, non licet concludere, rem non esse parabolam, sed vere gestam, cum habeatur nomen. Porro nomen Lazari consulto a Domino esse selectum, facile tibi persuaseris, si attenderis divitem rogare, ut Lazarus mittatur ad fratres convertendos, Christum vero respondere: si Moysen et prophetas non audiunt, neque si quis ex mortuis resurrexerit credent; quibus adde, mox postea revera Lazarum e mortuis resurrexisse neque tamen Iudaeos credidisse.

2. Lazarus, frater Mariae et Marthae, de castello (עֵזְרָא בֵּיתָנְיָא Bethania, hanc habet laudem, ut de eo Christo nuntietur: ecce quem amas infirmatur Ioan. 11,4 ss. et ut evangelista insuper addat: diligebat autem Iesus... Lazarum. Iesus nuntio de eius morbo accepto mansit in Peraea et non venit Bethaniam nisi

die quarto a morte Lazari. Hoc miraculo resurrectionis Lazari synedristae quam maxime exacerbati sunt: quid facimus quia hic homo multa signa facit (Ioan. 11,47); itaque mors Christi decreta est (11,49). Quod consilium scelestum et mortem suam crudelissimam ex miraculo fore praevidens Iesus antequam miraculum operaretur infremuit spiritu et turbavit seipsum (11,33). Synedristae, principes sacerdotum eo miraculo, quod plurimorum admirationem et fidem in Iesum excitabat (11,45; 12,9), in tantam rabiem simul et obcaecationem acti sunt, ut et Lazarum interficere deliberarent (12,10). En, adeo verum est, quod Christus in parabola Lazari affirmarat: si Moysen et prophetas non audiunt (Ioan. 5,46), neque si quis ex mortuis resurrexerit credent. — Quae de Lazaro traditione feruntur (eum episcopum in Galliam cum sororibus profectum esse etc.), vide Kirchenlexicon *ed.* 2 VIII. p. 738, et *Duchesne* in libro de Maria Magdalena, et *Analecta bolland.* XII. p. 296; traditionem de Maria Magd. defendit *Dom François Plaine* (*Correspondance catholique* n. 16-18); verum in *Analectis* l. c. merito dicitur neminem qui sit rerum gestarum narrator aliquid serius (il n'est plus d'écrivain tant soit peu sérieux) quidquam momenti attribuere istis traditionibus de Lazaro etc.

LEAENA v. LEO.

LEBANA (לְבָנָה, Λαβανώ), Nathi-naeus, cuius posteri duce Zorobabel ex captivitate redierunt (Esdr. 2,45); idem scribitur Neh. 7,48 לְבָנָה, Λαβανώ.

LEBAOTH v. BETHLEBAOTH.

LEBBAEUS (Λεββαῖος) cognominatur Iudas Thaddaeus (v. IUDAS 7).

LEBES ponitur in Vulgata pro hebr. כִּיּוֹר plerumque et etiam pro כִּיּוֹר.

Significatur Ex. 27,3 vas ad suscipiendos cineres et eadem notio erit quoque 3 Reg. 7,40. 45 et 2 Par. 4,11. 16 retinenda et Ier. 52,18. Vasa haec fuisse confecta ex aurichalco (ex aere polito) narratur 3 Reg. 7,45. Alias lebes vas est ad carnes coquendas 1 Reg. 2,14;

2 Par. 35,13; Ez. 11,3 ss.; Mich. 3,3 et generalim olla Zach. 14,21; vas ad lavandum intellegitur Ps. 107,10: Moab lebes spei meae i. e. explicata ex hebr. non spei meae, sed לֶבְשֵׁי לִלְיוֹנִים לotionis meae i. e. Moab quasi servus erit qui pelvim ad lavandum mihi praeberere debebit, uti Edom l. e. servus est cui calcamenta portanda et purganda proiciuntur.

LEBNA (לֶבְנָה, Αεβωνά), statio Israelitarum in deserto inter Remmonphares et Ressa (Num. 33,20. 21).

LEBNA, LOBNA et Ios. 15,42 Labana (לֶבְנָה, Αεβνά, Αοβνά, Αεμνά, Αομνά), urbs in campesribus Iuda, in tertia provincia Sephelae (Ios. 15,42), antiqua urbs reguli chananaci (12,15), a Iosue expugnata post excidium Macedoniae et ante excidium Lachis (10,29. 30. 31. 32. 39). Sacerdotibus attribuitur Ios. 21,13; loco parallelo 1 Par. 6,37 [42] una cum Hebron urbibus refugii accensetur, sed pro יְרֵי haud dubie יְרֵי urbs sicut Ios. 21,13 legendum est, ita ut sola Hebron urbs refugii esse dicatur; textum enim librorum Paral. multipliciter corruptum esse multis aliis discrepantiis constat. Urbem in extremis finibus regni Iuda sitam et ab alienigenis quoque habitata fuisse eo suadet, quod regnante Ioram una cum Idumaeis a Iuda defecit (4 Reg. 8,22; 2 Par. 24,10). Eandem fuisse urbem munitam et in via, quae Aegyptum ducit, pro re militari magni momenti ex eo elucet, quod Sennacherib de Lachis adversus Lobnam castra movit (4 Reg. 19,8; Is. 37,8). Postmodum regno Iuda denuo subiecta fuisse censetur; de Lobna enim oriunda erat Amital, uxor Iosiae regis, mater Ioachaz et Sedeciae regum Iuda (4 Reg. 23,31; 24,18; Ier. 52,1).

Tempore Eusebii eadem Αοβνά appellabatur, in regione eleutheropolitana sita (Onom. ed. Lag. 274,13; 135,26). Attamen situs nondum repertus est. Proponuntur Tell el-Sūfiye (Blanchegarde) plus tribus horis ab Eleutheropoli septentrionem versus (Thénius, Riess, Bibel-Atlas; Stanley, Sinai and Palestine 1886 p. 258), el-Menshiye dua-

bus horis ab Eleutheropoli occidentem versus (Vande Velde, Memoir 1858 p. 330; Survey of West. Pal. Mem. III, 259. 261), Khirbet el-Dawāime duabus horis ab Eleutheropoli meridiem versus (Kiepert).

LEBNI, LOBNI (לֶבְנִי, Αοβνί), filius primogenitus Gerson filii Levi, progenitor familiae leviticae Lebuitarum (Ex. 6,17; Num. 3,18. 21; 26,58; 1 Par. 6,17. 20 [6,2. 5]. Vulgata scribit Lebni Num. 3,18. 21, alias Lobni.

LEBONA (לֶבֹנָה, Αεβωνά) Iud. 21,19 obiter tantum commemoratur ad determinandum situm Siluntis, quae ad meridiem oppidi Lebona collocatur. Communiter agnoscitur in vico Lubban quattuor horis a Sichem meridiem versus iuxta viam, quae in Ierusalem ducit; Silo (Seilūn) ab eo vico horae itinere distat inter meridiem et orientem. Cf. Survey of West. Pal. Mem. II. 286; Guérin, Samarie II. 165. In Mishna (Menachoth 8,6) Beth Laban in monte recensetur inter regiones, ex quibus potissimum Iudaei vinum in Ierusalem adducebant; haec probabilius eadem est quae Lebona (cf. Neubauer, Géogr. du Talmud, p. 82).

LECHA (לֶכָּה, Αηγάδ) in genealogia Iuda 1 Par. 4,21 legitur; videtur urbs ceteroquin ignota designari, cuius pater seu possessor erat Iler ex posteris Sela filii Iuda.

LECHI v. RAMATH LECHI.

LECI (לֶכֶּה, Αλεξεία), filius Semida Manassitae (1 Par. 7,19).

LECTICA; ita merito explicavit S. Hieronymus Is. 66,20 צָבִים (quam vocem coniunctam cum עֲבֹתָ Num. 7,3 plaustra lecta exposuit); LXX ἐν λαμπήναις in plaustris lectis. Eiusmodi lecta etiam Antiochus morbo percussus gestabat 2 Mach. 9,8; nunc humiliatus ad terram in gestatorio (ἐν φορέτω) portabatur.

LECTUS dicitur quandoque pro sola sponda; ita si de lecto ferreo Og regis Basan sermo sit Deut. 3,11 vel de lectis eburneis Am. 6,4 i. e. de spondis eburne tessellatis, sed plerumque de sponda

simul cum stragulo, opertorio, cervicali intellegitur. Saul iratus Davidi, quem aegrotare audierat, iubet eum afferri ad se in lecto (1 Reg. 19,15). Lectus pauperis pallio constabat; nam Ex. 22,26 : si pignus a proximo acceperis vestimentum, ante solis occasum reddes ei; ipsum enim est solum, quo operitur, indumentum carnis eius nec habet aliud in quo dormiat; cf. Deut. 24,13. Lectus in quo paralyticus portabatur vix alius erat quam ferculum cum stragulo (Matth. 9, 2), cum iubeatur tollere lectum suum (9, 6; Luc. 5,24). Ceterum vide s. v. GRABATUS.

LECUM (לֶקֶם, LXX Λωδῦμ, sed Onomast. Αζωδῦμ) assignatur Ios. 19,33 tamquam terminus tribus Nephthali. Putarunt aliqui, ut *Knobel*, significari montes Lokham i. e. partem septentrionalem Libani quae ab Oronte fluvio occidentem versus inter Laodiceam et Antiochiam protendatur. Verum manifestum est terminum Nephthali non extendi in tantam a Palaestina distantiam. Ceterum ex ordine enumerationis Lecum probabilius quaeri debet, inter Iebnael (*Yemmā*) et Iordanem, ibi fere ubi hodie *Aulam*. Pertinebat igitur ad illum pagum commutatorium, qui Nephthalitis ad austrum lacus Tiberiadis concessus est pro finibus, quos Danitae in Nephthali sibi arripuerant (cf. *F. de Hummelauer*, Comm. in Ios. p. 138).

LEDAN, LEEDAN לֶדָן, 'Edān, Αδάν), unus ex posteris Gerson, princeps familiae Gersonitarum (1 Par. 23,7. 8. 9; 26,21).

LEGATUS. Ex versione 2 Par. 9,14 posset videri legatos diversarum gentium Salomoni quotannis attulisse certum auri pondus. At in loco parallelo 3 Reg. 10,15 S. Hieronymus vocem לֶגָרִים non legatos transtulit, sed viros qui super vectigalia erant. Neutra tamen explicatio admitti potest. Alias ipse vocem de exploratoribus explicat (cf. Num. 14,6); fortasse il. cc. textus emendatione indiget. Neque Ps. 67,32 de legatis ex hebr. est mentio, sed : venient pingues (i. e. nobiles, divites) ex Aegypto; cum LXX praebant πρέσβεις,

patet versio Vulgatae. Aliis in locis legatus idem est qui nuntius Prov. 13,17; 25,13; Is. 18,2 hebr. מַלְאָכִי, et 1 Mach. 9, 70; 10,51; 11,9 etc. πρέσβεις; 13,21 πρέσβευται, item 14,21. 22. 40; 15,17.

Princes et decem principes, singuli de singulis tribubus missi sunt ex Silo ad Rubenitas et Gaditas in terram Galaad (Ios. 22,13); quare hos vocat S. Hieronymus principes legationis Israel (Ios. 22,21. 30). Tamquam legatum qui auctoritate praeditus a Christo mittatur se profitetur apostolus : pro Christo legatione fungimur πρεσβεύομεν, munere legati fungimur 2 Cor. 5,20, quod munus etiam captivus sibi adscribit : legatione fungor in catena Eph. 6,20. — De legatione mittenda Gen. 32,5 non est sermo, sed solum : mittam ad annuntiandum (hebr.).

LEGIO. Vocem eam S. Hieronymus quandoque versioni inseruit. Ita 2 Reg. 15,18 legiones Cerethi et Phelethi, et 1 Par. 18,17 Banaias (erat constitutus) super legiones Cerethi et Phelethi; at 4 Reg. 11,19 videtur legiones dicere pro hebr. לְצִיִּים cursores, satellites, custodes corporis regis. In 1 Mach. 6,35. 45; 9, 12 ponitur, ubi graece φάλαγξ legitur i. e. generalim cohors instructa, acies (1 Mach. 6,38; 10,82 legitur apud aliquos testes φάλαγξ; Vulgata praebet legionem, uti apud alios testes habetur φάλαγξ et sensu requiritur). Nomen legionis ponitur pro magna multitudine; ita si daemon respondet interrogatus de nomine : legio (λεγεών) mihi nomen est, quia multi sumus (Marc. 5,9; Luc. 8,30. 36). Voce significatur turma militum; verum numerus militum alius erat alio tempore; et primo quidem tempore legionem constituebant tria millia peditum et trecenti equites; tempore Valerii publicolae 4000 peditum et 300 equitum; tum 4200 peditum et 300 equitum; mox 5000 peditum et 300 equitum; 5200 peditum et 300 equitum; sub Mario 6000 peditum; *Vegetius* (2,6) legionem constare dicit 6100 peditum et 726 equitum. Ceterum dici potest quod *Tacitus* (Ann. 4,5) scribit : sed persequi incertum foret, quum ex usu temporis huc illuc mearent, gliscerent numero et aliquando

minuerentur (cf. *Pauly*, Realencyclopädie der classischen Alterthumswissenschaft IV. p. 837 s.). Unde concludere poteris, maximum numerum angelorum designari, cum Christus dicat Petro : an putas quia non possum rogare Patrem meum et exhibebit mihi modo plus quam duodecim legiones angelorum (Matth. 26,33); proin si vellet se defendere a turba, non indigeret auxilio apostolorum, quia posset habere duodecim legiones exercitus angelici.

LEGISPERITUS (νομικός), legis mosaicae doctor, interpres. Ea voce potissimum utitur S. Lucas (cf. Matth. 22,33; Tit. 3,13). Idem ordo designatur nomine frequentiore scribarum. Vide s. v. SCRIBA.

LEGUMINA, quae Daniel sibi cum tribus sociis cibum expetebat (Dan. 1. 12. 46), hebr. dicuntur לְרֵעִים (v. 12) et לְרֵעִים (v. 46). Versio graeca Theodotionis σπέρματα, LXX autem et Fl. Iosephus (Ant. X. 10,2 n. 190) σάρκα exponunt. Eodem sensu quo Vulgata etiam recentiores interpretes vocem hebraicam generatim explicant de variis olerum et leguminum generibus, quae in cibum adhiberi solent. Haec autem genera ita declarat *Maimonides* (tract. De heterogeneis l. c. 8 ap. *Bochart*) : « Semina (זרעונים) dividuntur in tres species. Prima est eorum, quae vocantur proventus (seu fruges). Eorum sunt quinque species : triticum, spelta, hordeum, avena (spica vulpis), secale. Secunda eorum quae legumina vocant, id est omnia semina, quae ab homine comeduntur, ut fabae, pisa, panicum, oryza, sesamum, papaver, cicereula et similia. Tertia eorum quae vocantur hortensia semina, quae quidem ipsa non sunt apta ad esum, sed quod ab iis provenit, ab homine comeditur, ut caepe, allia, porri, nigella, rapa et similia ».

Cf. *Sam. Bochart*, Hierozoicon P. II. l. 1, c. 7 (ed. *Rosenmüller* II. 587 s.); *Chr. Clewberg*, De variis frumentorum et leguminum speciebus in S. Codice V. T. memoratis, Upsalae 1760; *K. Th. Menke*, De leguminibus veterum L. Goettingae 1814; *V. Hehn*, Kulturpflanzen und Haustiere, ed. 7, p. 210-220; *A. de Candolle*, L'ori-

gine des plantes cultivées, Paris 1883, passim.

L. FONCK.

LEHEMAN (לְהֶמָן, *Mazēs*, *A. Λαμάς*) urbs in campestribus Iuda, in secunda provincia Sephelae (Ios. 15,40). In codicibus hebraicis etiam scribitur לְהֶמָן, item in codicibus Vulgatae Lehemas, Leemas. Agnoscitur *Khirbet el-Lahm* ab Eleutheropoli (*Beit Djibrin*) meridiem versus (*Survey of West. Pal. Mem.* III. 261; *Legendre*, Carte de la Palestine).

LEHETH (לֶהֶת, *Ith*), filius Semei de stirpe Gerson (1 Par. 23,10. 11).

LENS hebraice לְעָשִׂים (tantum in plur. occurrens) vocatur. Inter legumina et frumenta in agris ab Israelitis communiter colebatur (2 Reg. 23,11; cf. 1 Par. 11,13) et in cibum (Gen. 25,34; 2 Reg. 17,28) atque in panem adhibebatur (Ez. 4,9). Pariter ab antiquis scriptoribus profanis frequenter commemoratur (*Theophr.* Hist. pl. 1. 4,2 etc.; *Vergil.* Georg. 1,228; *Columella* II. 10. 15; *Dioscur.* Nat. med. 2,129; *Plin.* XVIII. 12,123; *Athen.* 4,158 etc.), atque etiam Aegyptiis accepta erat, qui lentes *arshana* appellarunt, fortasse confundentes litteras hebraicas d et r. Coctio rufa dicitur lentis edulium ab Esau (Gen. 25, 30), quia fortasse iam tunc lentes folliculis et cortice detractis coquebantur, qui mos etiam hodie penes Aegyptios viget (*Regnier* ap. *A. de Candolle*); sed etiam color fuscus naturalis huius leguminis אֲדָם appellari potuit quod alii de nomine cibi seu obsonii explicant, colato arabico *idām*.

De cultura lentis (*Ervum lens* Linné = *Lens esculenta* Moench = *Cicer lens* Willdenow, fam. *Leguminosae*; arab. 'adis) cf. *O. Heer*, Pflanzen der Pfahlbauten, Zürich 1865, 23 (et fig. 49); *E. Boissier*, Flora orient. II. 598; *Leunis-Frank*, Synopsis ed. 3 II. 2, 125; *V. Hehn*, Kulturpfl. u. Haustiethiere ed. 7,210-20. *A. de Candolle*, Origine des plantes cultivées 257 s.; *Fr. Woenig*, Pflanzen im alt. Aeg. 214 s.; *V. Lorel*, Flore pharaonique ed. 2, n. 156; *G. Buschan* im Ausland 1891, 293; *G. F. Post*, Flora of Syria 290. — Praeferea cf. *L. H. Ursinus*, Arb. bibl. Coul. II. 95 s.;

M. Hiller, Hierophyt. II. 124-8; *O. Celsius*, Hierobot. II. 103-6; *E. F. K. Rosenmüller*, Handb. d. bibl. Alterth. IV. 1,88-90; *I. II. Balfour*, Plants of the Bible, ed. nova, 167-9; *P. Cultrera*, Flora bibl. 215-9; *H. B. Tristram*, Nat. Hist. ed. 8, 416 s.; *W. II. Groser*, Trees and Plants ment. in the Bible, ed. 2, 151-3.

L. FONCK.

LEO. 1. Nomina. Leonis mentio frequentissima in S. Scriptura occurrit; si textus, in quibus saepius de eis sermo est, pro una mentione computemus, manent supra centum varii loci librorum sacrorum principem inter bestias agri respicientes. In Vulgata praeter nomina communia *leonis*, *leae* et *leunculi* seu *catuli leonis* vix alia appellatio invenitur et similiter usus textus graeci V. et N. T. constans est in appellationibus consuetis λέων, λέαινα, σάβανος λέοντος. In textu hebraico autem imprimis nomen genericum invenimus אַרְיָא vel אַרְיָה, quod pariter in lingua assyriaca (*arū*), aramaica aliisque semiticis occurrit. Catulus generatim dicitur גִּיר, si adoleverit, כִּבְרִיר. Aliud nomen, item linguis assyriacae et arabicae atque etiam aegyptiacae et copticae commune, triplici forma occurrit: לֵבַי, לֵבַיָּא, לֵבַיָּא, quarum ultima in solo textu Ez. 19,2 (pro *leae*) adhibetur. Praeterea poetice leo appellatur לֵישׁ (cf. ass. *nēshu*), fortasse ab insigni robore, et שִׁחַל a rugitu.

Variae denominationes coniunctas habes v. g. Gen. 49,9 vel Iob 4,10 s. vel Ez. 19,2 s. — Multo maior est numerus nominum leonis in lingua arabica, in qua ex variis praesertim attributis quadringentis fere appellationibus designatur.

Cf. de nominibus leonis *Sam. Bochart*, Hierozoicon P. II. l. 3, c. 1 (ed. *Rosenmüller* II. p. 1-15); *C. Pauli*, Die Benennung des Löwen bei den Indogermanen, Münden 1873; *F. Hommel*, Die Namen der Säugethiere bei den südsem. Völkern, Leipzig 1879, 287-294. — De singulis nominibus v. *Gesenius* et alia lexica.

2. Frequentia leonum in regionibus biblicis. Leones in Palaestina aliisque terris biblicis olim abundasse, tum ex

numero nominum variorum, tum ex frequenti in sacris libris mentione facile colligitur. In Philisthaea, Iudaea, Samaria, in montibus Libani et Antilibani, in salubris et silvis et praesertim in dumeto Iordanis leonum habitacula fuisse, plurimi Scripturae textus nobis testantur; cf. Iud. 14,5; 1 Reg. 17,34; 2 Reg. 23,20; 3 Reg. 13,24; 4 Reg. 17,25; Cant. 4,8; Ier. 5,6; 12,8; 23,38; 49,19; Am. 3,4 etc.

Idem nobis testantur etiam pro aliis regionibus orientalibus monumenta et inscriptiones Aegyptiorum et Assyriorum. Pariter auctores profani graeci et latini aliique praesentiam leonum non modo in toto oriente anteriore, verum etiam in Graecia, Macedonia et Thracia tamquam factum notorium supponunt. Paulatim vero et pedetentim bestiae ex illis regionibus recessere, ita ut nunc tum ex Europa, tum ex Asia minore, Syria, Palaestina prorsus disparuerint et in Arabiae interioris ac Mesopotamiae et Indiae partes atque in Africam sese receperint. Ultimi scriptores, qui de praesentia leonum in Palaestina nobis testimonium reliquerunt, videntur esse ex saeculo duodecimo, scil. *Daniel*, hegumenus rossus c. a. 1107 (Itin. c. 75). Itinéraires russes trad. *B. de Khitrowo*, Genève 1889, p. 59) et *Joannes Phocas* c. a. 1177 (Descriptio terrae sanctae c. 23. *M. P. G.* 133,952 s.).

De Aegyptiis cf. *Wilkinson-Birch*, Manners and customs II. 87 s. 97; III. 292 s.; *Ed. Meyer*, Gesch. d. alten Aeg. p. 116 s. 242 s.; *Ad. Erman*, Aegypten p. 510. 612; *F. Chabas* in Aegypt. Zeitschrift VI. 1868, 106; *R. Hartmann*, ap. *J. Dümichen*, Resultate I. 28 s. (ad tab. VIII et IX); *J. Dümichen* ap. *A. E. Brehm*, Tierleben ed. 3, I. 459 s. — De Assyriis cf. *H. Layard*, Monuments of Nineveh I. 9. 10. 31. 45,2. 46. 1. 48,2. 49,1 et 3. 50,1. 52,2 et 4. 53. 96; II. 2. 60. 64. 65; *G. Rawlinson*, Five great monarchies I. 39 s. 220 s. 224 s. 355. 358. 359. 360. 505-512. 515; *W. Houghton* in Transact. Soc. Bibl. Arch. V. 1877, 322-326. — De Hethitis cf. *Humann-Puchstein*, Reisen in Kleinasien und Nordsyrien, Berlin 1890, Atlas tab. 46; *H. V. Hilprecht*, Recent research in Bible Lands, Philadelphia 1897, p. 160. — Textus plurimos scriptorum graecorum et latinorum collectos habes ap.

H. O. Lenz, Zoologie der alten Griechen und Römer, Gotha 1856, p. 126-140. Quam frequens fuerit imago leonum in antiquis nummis et gemmis, ostendunt exempla ap. *Inghoof-Blumer* et *O. Keller*, Tier- und Pflanzenbilder I. 1-19; II. 34; IX. 27. 36; XIV. 5-30. 32-58; XV. 1-4. 7; XVI. 26. 68; XVII. 22. 30. 42. 48; XVIII. 30. 59; XIX. 33. 34; XX. 39. 58; XXII. 35; XXV. 30 etc.; cf. p. 3-6.

De historia naturali leonum cf. *A. E. Brehm*, Tierleben ed. 3, I. 443-461; *Ph. L. Martin*, Naturgesch. der Thiere I. 1 p. 191-198; *Leunis-Ludwig*, Synopsis ed. 3, I. 1 p. 182 s.; *H. B. Tristram*, The Fauna and Flora of Palestine p. 17 s. — Ex recentiorum opinione eadem est in variis regionibus species leonis (*Felis leo* L.), cuius diversae varietates tantummodo agnoscuntur.

3. Varii textus sacri de natura et habitibus leonis. Imprimis robur leonis celebratur, « fortissimi bestiarum, ad nullius pavens occursum » (Prov. 30. 30). Eius rugitus valde terribilis describitur: « Leo rugiet: quis non timebit? » (Am. 3.8). Modum, quo praedam suam capiat, varii textus respiciunt. Insidiatur praedae suae in duneto, in specubus et antris (Ps. 9,9; 16,12; Job 38,40), insilit in eam (Is. 5,29; Mich. 5,8), rugit super eam nec a voce pastorum formidat nec a multitudine eorum pavet (Is. 31,4) et dentibus suis fortissimis eam conterit (Is. 38,13; cf. Job 4,10; Ps. 57,7; Job 1,6; Eccli. 21,3; Apoc. 9,8).

Leones foveis vel etiam retibus esse captos, colligitur ex Ez. 19,4 (hebr. 8); a regibus Babyloniorum et Assyriorum in caveis et lacubus esse servatos et humanis quoque carnibus pastos, tum ex monumentis assyriacis, tum ex Dan. 6,7 ss. et 14,31 ss.; vide s. v. LACUS.

4. Comparationes biblicae ex leonibus desumptae. Frequens imprimis laus heroibus tribuitur comparatione cum « fortissimo bestiarum ». Ita Dan dicitur catulus leonis (Deut. 33,22) et David laudat Saul et Jonathan aquilis velociores, leonibus fortiores (2 Reg. 1, 23); cor fortissimi cuiusque quasi cor leonis dicitur (2 Reg. 17,10) et duo bellatores duo leones Moab vocantur (2 Reg. 23,20; cf. 1 Par. 11,22) faciesque bellatorum describitur quasi facies leonum (1 Par. 12,8). Pariter iustus perhi-

betur quasi leo confidens sine timore (Prov. 28,1; cf. Nah. 2,11; 1 Mach. 3,4; 2 Mach. 11,11 etc.).

Quia leo cum fortitudine maiestatem quamdam coniungit, quaedam aliae comparationes ex eo desumuntur, quae regiam quamdam dignitatem produnt. Ita Gen. 49,9 de Iuda: « Catulus leonis Iuda; ad praedam, fili mi ascendisti; requiescens accubuisti ut leo, et quasi leaena: quis suscitabit eum? » Pariter Num. 23,24; 24,9; Mich. 5,8 et praesertim Apoc. 5,5: « Vicit leo de tribu Iuda ».

Etiam rugitus leonis in comparationem terroris adhibetur: « Sicut fremitus leonis, ita et regis ira » (Prov. 19, 12); « sicut rugitus leonis, ita et terror regis » (Prov. 20,2), ac praesertim leo fremens et rapiens ac discerpens imago est tyrannidis vel furoris: « Leo rugiens et ursus esuriens, princeps impius super populum pauperem » (Prov. 28,15); « noli esse sicut leo in domo tua evertens domesticos et opprimens subiectos tibi » (Eccli. 4,35); « venatio leonis onager in cremo: sic et pascua divitum sunt pauperes » (13,23); « commorari leoni et draconi placebit [magis] quam habitare cum muliere nequam » (Eccli. 25, 23; cf. Ier. 2,30 etc.). Sed Dominus quoque eadem comparatione se terribilem hostibus fore declarat: « Quomodo si rugiat leo et catulus leonis super praedam, et cum occurrerit ei multitudo pastorum, a voce eorum non formidabit et a multitudine eorum non pavebit: sic descendet Dominus exercituum, ut praelietur super montem Sion » (Is. 31, 4; cf. Os. 5,14).

5. Leones sculpti. Imagines et figurae leonum ornamenti loco exprimebantur in basibus, de quibus sermo est 3 Reg. 7,27-29 (sed 1 Par. 28,17 pro כפיר « leuenculus », quod S. Hieronymus videtur legisse, alii habetur lectio כפיר « scyphus »). Item in throno Salomonis duo leones stabant iuxta brachiola et duodecim leuenculi in sex gradibus, quibus ad thronum ascende-batur, hinc inde dispositi (3 Reg. 10,19; 2 Par. 9,18). Similes sculpturae leonum in mo-

numentis Aegyptiorum et Assyriorum frequentes occurrunt.

Cf. praeter auctores citatos *S. Bochart* l. c. cap. 1-6 p. 1-99; *E. F. K. Rosenmüller*, Bibl. Altert. IV. 2, 111-133; *id.*, Das alte und neue Morgenland IV. 379-381; *L. Lewysohn*, Die Zoologie des Talmuds p. 68-70; *H. B. Tristram*, Nat. hist. of the Bible, ed. 9, p. 115-120; *P. Cultrera*, Fauna biblica p. 165-190; *A. Kinzler*, Bibl. Naturgesch. ed. 10, p. 56-60; *J. G. Wood*, Bible animals, new edit. p. 18-28; *G. Lorela*, La zoologia nella Bibbia p. 354-358 et saepius; *F. Vigouroux*, Dict. IV. 267-280; *J. M. Casanowicz* et *S. Schechter* in The Jewish Encyclopaedia VIII. 94 s.

L. FONCK.

LEPRA. Distinguitur Lev. 13. 14 lepra hominum, lepra vestium, lepra domorum. Et quidem Lev. 13,1-43 traduntur regulae ad lepram humanam dignoscendam; dein 13, 44-46 praecipiuntur quae a leproso observanda sunt; 14,1-20 traditur modus cum qui leprosus fuerat ab immunditia legali liberandi; si de paupere agitur minora quaedam requiruntur (14,21-32). De lepra vestium agitur 13,47-59, et de lepra domorum 14, 33-53.

Leprae plagam, uti hodie in oriente, ita olim frequentem fuisse apud Iudaeos, libris utriusque testamenti constat (cf. Num. 5,2; 2 Reg. 3,29; 4 Reg. 7,3; 15,5; Matth. 8,2; 10,8; 11,5; Luc. 4,27; 17, 12 etc.). Continetur maculis albis niten- tibus quae per totum corpus extendun- tur. Distinguitur in lege lepra quae prorumpat in parte cutis capillata et lepra in parte cutis non capillata. Quae quidem lepra eadem est eiusque indicia indubia assignantur tria: plaga seu scabies in cute apparens, pili ea in cutis parte albescentes, scabies non in cute intumescens, sed in illam demissa. Si vero solus candor in cute apparet, nulla autem observatur cutis depressio vel pilorum mutatio, talis non est de- clarandus leprosus, sed recludendus per septem dies et si ille candor obscurior est factus neque creverit, ille est de- clarandus mundus; si contrarium contige- rit, est ut leprosus habendus (Lev. 13, 1-8). Habetur quoque lepra, quando praeter squamam albam et pilos albe-

scientes apparet cruda caro; sed ubi al- bedo super totum corpus extenditur, id sanitatis restituendae indicium est (13,9-17). Lepra quoque oriri potest in cute ulcere sanato, si nascitur squama alba vel subrufa, demissior et albescent pili; eo in casu forte dubio diutius ob- servari oportet (13,18-23); idem obser- vetur in adusta cute (13,24-28). In lepra carnis capillatae indicia sunt eadem; at crinium color mutatur in flavum (13, 29-37).

Si qui leprosi declarati sunt, iuben- tur seorsim habitare et alios externo habitu a se arcere (14,44-46). Si sanatio a lepra contigerit, debet praecedere sani- tati a sacerdote examinatio, lustratio et ablutio; dein post dies septem sanatus radet capillos et lavabit corpus et ve- stimenta et die octavo offeret sacrificia, quae pro paupere minoris pretii sunt (14,1-32).

Quando sermo fit de lepra vestium, clarum est non lepram intellegi, sed agi de maculis quibusdam ortis ex putrefa- ctione vel ex lana animalium aegrotan- tium. Indicium petitur, creveritne an non macula; si creverit, vestis est im- munda et debet comburi; quodsi non creverit quidem, attamen manserit ma- cula, etiam comburetur. Si autem post lotionem macula obscurior facta est, pars illa a veste est abscindenda (13, 47-59).

Lepra domorum tunc haberi videtur, quando nitron e muris efflorescit, hu- morem absorbet, specie a lepra humana haud absimili; est haec nitrificatio alba, sed etiam subviridis, subrufa; facile ob- tinet, ubi murus in putida humo exstru- ctus est. Domus ita infecta claudatur; si post septem dies lepra creverit, la- pides infecti removeantur, restituantur integri, reliquus murus radatur et li- niatur. Quodsi postea rursus apparue- rint infectiones illae et maculae, domus debet destrui et lapides ac ligna diru- tae domus abicienda sunt in locum im- mundum (14,33-53).

Cf. *F. de Hummelauer*, Comm. in Lev. 13. 14. De hodierna leprae in Palaestina conditione vide *Zeitschr. d. D. Pal.-Ver.* XVI. 1893 p. 247; XVIII. 1895 p. 34. 41; *F. Pruner*, Die Krankheiten des Orients,

1847 p. 163; *Trusen*, Die Sitten, Gebräuche u. Krankheiten der alten Hebräer 1833.

LEPUS. 1. *Lepus* in sacris libris in solo catalogo animalium immundorum commemoratur (Lev. 11,6; Deut. 14,7). De significatione nominis hebraici לֶפָס quod pariter in linguis cognatis arabica, aramaica, assyriaca (*annabu*) invenitur et in versione graeca δασύπους redditur, nullum dubium existit. Quatuor huius animalis species in Palaestina inveniuntur (*Lepus syriacus*, *L. sinaiticus*, *L. aegyptius*, *L. isabellinus*), quibus alii quintam addunt (*L. tulaeae*); in habitu externo pleraeque lepori nostrarum regionum (*Lepus timidus* L.) satis similes sunt. Etiam in monumentis veterum Aegyptiorum et Assyriorum atque in nummis et gemmis graecis et romanis imago leporis frequens occurrit.

Cf. *Wilkinson-Birch*, Manners and Customs II. 83. 86. 89. 90. 92; III. 294 s.; *H. Layard*, Monuments of Nineveh II. 9. 32. 62; *G. Rawlinson*, Five great Monarchies ed. 4, I. 222. 225 s. 522 s.; *W. Houghton* in Transact. Soc. Bibl. Arch. V. 1877, 379; *F. Hommel*, Namen der Säugethiere p. 321 s. 364. 384; *H. O. Lenz*, Zoologie der alten Griechen und Römer p. 36. 156-159; *Imhoof-Blumer* et *O. Keller*, Tier- und Pflanzenbilder I. 23. 40; II. 10. 11; IV. 29; VII. 36. 39; VIII. 35; XV. 40. 41. 43-45. 50; XVI. 22. 25-33; XX. 42. 45. 46. 50; XXIII. 31; cf. p. 11 s. 95. 99-101; *A. E. Brehm*, Tierleben ed. 3, II. 621-629; *Ph. L. Martin*, Naturgesch. der Thiere I. 1, 371-373.

2. *Esus carnis leporinae* a nonnullis incolis regionum orientalium respuitur, ab aliis vero adamatur. In lege prohibitus erat, quia lepus « ruminat, sed ungulam non dividit ». Unde notissima illa difficultas de lepore ruminante contra veracitatem scriptoris inspirati exsurgit, de qua iam in articulo de choerogryllo pauca adnotavimus (vol. I. col. 879). Constat utique, leporem non esse ruminantem, cum simplicem tantum stomachum habeat nec cibos ex stomacho in os reducat. Constat pariter, expressionem hebraicam eam classem animalium designare, quae proprie ac stricte ruminant. Sed quaerenti, undenam talis classificatio a legislatore populi Israel

desumenda fuerit, manifeste respondendum est, non ex signis scientificis ruminationem proprie dictam constituentibus, sed ex signis apparentibus populo notis eam necessario desumenda fuisse, ut ab hominibus, quos lex respiciebat, intellegi posset. Signa autem haec apparentia ruminationis populo notissima sunt motus illi characteristici labiorum et maxillarum, quos in bobus, ovibus, capris, camelis aliisque quotidie observare licet et semper licebat. Iam vero lepus motibus omnino similibus labiorum et maxillarum animalia ruminantia imitatur ideoque secundum externam speciem, quam Moyses populo legem statuens respiciebat, ab omnibus hominibus ad classem ruminantium pertinere diceretur. Unde ipse celeberrimus rerum naturalium investigator *Carolus Linné* eodem modo de lepore loquitur: *Victitat ruminans ramulis fruticum et cortice arborum* » (ap. *Rosenmüller*).

Cf. *Sam. Bochart*, Hierozoicon P. II. l. 3, c. 32 (ed. *Rosenmüller* H. p. 400-409); *Chr. Fr. Paullini*, Lagographia curiosa seu leporis descriptio, Augustae Vind. 1691; *E. F. K. Rosenmüller*, Bibl. Altert. IV. 2, 211-213; *L. Lewysohn*, Zoologie des Talmuds p. 109; *P. Cultrera*, Fauna bibl. p. 218 s.; *H. B. Tristram*, Nat. Hist. ed. 9, p. 98 s.; *id.*, Fauna and Flora of Pal. p. 8 s.; *A. Künzler*, Bibl. Naturgesch. ed. 10, p. 46 s.; *G. Lovett*, La zoologia nella Bibbia p. 101-107; *J. G. Wood*, Bible Animals, new edit. p. 96-100; *G. E. Post*, ap. *Hastings*, Dict. II. 303; *H. Lesêtre* ap. *Vigouroux*, Dict. IV. 250-252.

L. FONCK.

LEPUSCULUS v. CHOEROGRYLLUS.

LESA (לֶסָא, in pausa לֶסָא, Λασά), urbs quae Chanaan proprie dictam seu cisjordanicam inter meridiem et orientem terminat (Gen. 10,19); ducitur enim a Sidone linea prior usque Gazam, altera usque Lesa, ut Chanaanitis seu regio inter Sidonem et mare Mortuum describitur. Targum Hieros. et S. Hieronymus (Quaest. in Gen. 10,19) intellegunt Callirrhoen in Wādi Zerqā Ma'in ad orientem maris Mortui sitam, thermis celeberrimam (*Flav. Jos. Ant.* XVII.

6,5; Bell. ind. I. 33,5; *Plin.* V. 16,72; *Ptolem.* V. 16,9 [ed. Müller-Fischer 15,6]. Assentiunt recentiores (*Keil, Delitzsch*); *Dillmann* autem dubium movet ex eo, quod Callirhoe nimum aequilonem versus absit a termino Chanaan meridionali atque insuper ab oriente maris Mortui sit, dum contextus aliquem terminum ab occidente maris Mortui exigere videatur; simul tamen notat illam terminorum definitionem ad antiquissima tempora (cf. Gen. 19,29) esse referendam. — Urbis quidem vestigium apud Callirhoe nullum superest neque ruinae balnearum; attamen traditionis testimonium non reiiciendum videtur. Cf. *Ritter*, *Erdkunde* XV. p. 94 et 572 s. — E contra *Wellhausen* interpretatus est Lais-Dan et terminum Chanaan septentrionalem, quam coniecturam emendatione vocis לַשָּׁן in לַיִשָּׁן vel לַיִשָּׁם commendare conatur. In hac suppositione utique quattuor termini terrae Chanaan Gen. 10,19 indicantur: Sidon, Gaza, Penapolis, Lais-Dan.

LESEM v. DAN 3.

LEVI (לֵוִי, *Asael*). 1. Filius Iacob ex Lia, quem ei genuit tertium post Ruben et Simeon. Nomen explicatur a Lia: nunc quoque copulabitur mihi maritus... et ideo vocavit nomen eius Levi (cf. לֵוִי copulabitur). Postmodum cum fratres Aaron de tribu Levi sacerdotibus tamquam ministri adiungerentur, iterum eodem modo alluditur ad nomen (Num. 18,2. 4 לֵוִי). Cum eius soror Dina a filio principis Hevaci oppressa esset, Simeon et Levi pessimo dolo vindictam capientes contra pactum initum multas commiserunt caedes (Gen. 34,1-31), quod facinus Iacob pater detestatus iis in poenam praedixit: dividam eos in Jacob, dispergam eos in Israel (Gen. 19,3-7). Verum cum filii Levi in apostasia populi pro Domino zelantes gladiis rebelles interfecissent, a Moysse maledictio patris vertitur in benedictionem (Deut. 33,8. 9) et ipsa illa dispersio iam non est poena; sed cum eorum pars sit Dominus, non accipiunt in terra certam regionem, sed inter omnes tribus eis assignantur civitates 48 ad habitandum

(vide s. v. LEVITAE). Mortuus est Levi annos natus 137 (Ex. 6,16); filii eius erant Gerson, Caath, Merari, ex quibus variae familiae ortae sunt; cf. Ex. 6,17-19. Quale pactum Deus inierit cum tribu Levi, per Malachiam malis sacerdotibus in memoriam revocatur (Mal. 2,5-7), quo loco vera sacerdotis forma describitur.

2. Filius Alphaei, quem sedentem ad telonium Iesus vocavit (Marc. 2,14; Luc. 5,27. 29); vide s. v. MATTHAEUS.

3. Levi nomen occurrit bis in genealogia Ioseph (Luc. 3,24. 29).

LEVIATHAN. 1. *Nomen.* Vox hebraica לֵוִיָּתָן in tribus textibus a Vulgata retinetur (Iob 3,8; 40,20 [hebr. 25]; Is. 27,1); in Psalmis vero bis cum graeca versione, a qua immediate fluxit latina, *draco* explicatur, id quod LXX etiam Is. 27,1 habent (Ps. 73[74],14; 103 [104],26; gr. δράκων). Etymologice nomen videtur derivandum a radice לָרָה, cui etiam Arabes sensum *flectendi* vel *torquendi* tribuunt (*Bochart, Gunkel, Gesenius-Buhl* etc.); unde explicatio illa prophetae « super Leviathan, serpentem tortuosum » (Is. 27,1) etiam a recentissimis criticis tamquam vera etymologica explicatio comprobatur. Atque illa recte dicitur synonymum vocis תַּנִּינִי, de qua v. supra col. 114 s. v. DRACO.

Prima igitur significatio nominis est *belua immanis* atque hoc sensu videtur sumendum Is. 27,1 (v. I. *Knabenbauer* in h. l.) et Ps. 103 [104], 26. Potissimum vero adhibetur de *crocodilo*, maxime Iob 40,20 [25] et probabiliter etiam Iob 3,8 et Ps. 73 [74],14, ubi in ultimo textu est figura Pharaonis. Similiter תַּנִּינִי eodem sensu de crocodilo nilotico tamquam figura Aegypti occurrit Ps. 73 [74],13; Is. 51,9; Ez. 29,3; 32,2.

Cf. *Sam. Bochart*, *Hierozycon* P. II. l. 5, c. 16 (ed. *Rosenmüller* III. 737 s.; *Theod. Hasaeus*, *Disquisitio de Leviathane Iobi et ceto Ioniae*, *Bremae* 1723 (falso supponit esse *orcam* Plinii, scil. *Physeterem* vel *Delphinum*); *J. D. Michaelis*, *Supplem. ad lex. hebr.* p. 1427-1430; *H. Gunkel*, *Schöpfung und Chaos*, *Göttingen* 1895, p. 45 s.; mythologicas speculationes huius auctoris aliorum-

que criticorum de Leviathan hic neglegere possumus, cum in libris sacris praeter nomen beluae nullum mythologiae vestigium appareat.

2. *Crocodili descriptio in libro Iob.*

Ad ostendendam infirmitatem hominis et Dei potentiam auctor libri Iob in ultimo magno sermone, quem Domino attribuit, postquam de Behemoth locutus est, magnificam de Leviathan descriptionem addit, quae a recentioribus unanimiter et merito de crocodilo nilotico intellegitur (Iob 40,20 [23]-41,23 [26]).

Poeta inspiratus imprimis illustrat infirmitatem humanam et potentiam Creatoris describendo generatim robur beluae fortissimae, contra quam homo neque vi neque persuasionem quidquam potest efficere (40,20-41,2). Ad particularia deinde descendendo per singulas corporis partes robur membrorum et pulchritudinem animalis describere pergit (41,3-13) et terrorem eius virtutemque invictam celebrando sermonem concludit (41,16-23).

Omnia et singula in hac pulcherrima descriptione accuratissime crocodilo nilotico convenire in commentariis ostenditur. Cf. Bochart l. c. c. 16 s. p. 737-768; S. Oedmann, Vermischte Sammlungen III. 1-25; VI. 53-63; commentarios Corn. a Lapide, I. Kuabenbauer, A. Dillmann, K. Budde e. a.

3. *Crocodilus in Aegypto et Palaestina.* Animal in libro Iob descriptum antiquitus tum in Aegypto tum in Palaestina vivebat atque etiam hodie ibidem invenitur. Atque in Aegypto quidem tota usque ad recentiore aetate abundabat, sed paulatim in superiores provincias se recepit, ita ut hodie in sola Aegypto superiore usque ad urbem Thebas ac praeterea in reliquis Africae orientalis et australis partibus inveniat. Etiam in monumentis Aegyptiorum et in auctoribus antiquis saepe occurrit. Ab Aegyptiis praesertim in nomo arsinotico, ubi urbs Arsinoe (prope hodiernam Medinet el-Fayūm) etiam nomen *Crocodilopolis* habebat sicut alia urbs Aegypti superioris prope colles Gebelū, inter deos colebatur et post mortem

bene conditus honorifice sepeliebatur.

In Palaestina vero in sola ora maritima inter montem Carmelum et Caesaream in paludibus iuxta *Nahr el-Zeqā* parvo numero vivit. Factum hoc, quod iam scriptores antiqui *Strabo* (XVI, p. 758) et *Plinius* (V. 17,19 n. 75) memorata urbe et flumine Crocodilon in ora Phoenices testantur, a recentioribus extra dubium videtur positum esse.

De Aegyptiis cf. Description de l'Égypte ed. C. L. F. Panchoucke, XXIV. (Paris 1829) 401-571 (*Étienne et Isidore Geoffroy Saint-Hilaire*); *Wilkinson-Birch*, Manners and Customs II. 130-135; III. 152-154. 329-334; *F. Chabas* in Aegypt. Zeitschr. VI. 1868, 99-106; *id.*, Études sur l'antiquité historique, Paris 1873, p. 401 s. (immerito negat, Leviathan esse crocodilum); *A. Erman*, Aegypten I. 327 s.; *K. Baedeker*, Aegypten ed. 5 p. CXII s. 179 s. 215. 310. 327. — Textus auctorum antiquorum collegit *H. O. Lenz*, Zoologie der alten Griechen und Römer p. 418-427. De imaginibus crocodili in nummis et gemmis antiquis cf. *Imhoof-Blumer* et *O. Keller*, Thier- und Pflanzenbilder VI. 29-31; XIV. 1; XV. 4; XXII. 46-48.

De crocodilis palaestinsibus cf. *H. Reiland*, Palaestina III s. v. Caesarea p. 676 (Norimbergae 1716 p. 503), qui citat ex medio aevo Johannem [Iacobum] de Viotriaco, Hist. hierosol. c. 86 et, *Marinum Sanulium*, Secret. fidel. cruc. p. 152. Adde potuisset praeter alios itinerarium anonymum gallicum ex anno c. 1231 (Les Pelegrinaiges por aler en Jherusalem, in Itin. de Jérusalem franç. ed. *H. Michelant* et *G. Raynaud*, Genève 1882, p. 91. Ex recentioribus cf. *Rich. Pococke*, Beschreibung des Morgenlandes, ed. 2, Erlangen 1771, II. 84 s.; *Osk. Böttcher* in Berichte der Senckenbergischen naturforsch. Gesellschaft 1879-1880, p. 199-206; *H. B. Tristram*, Fauna and Flora of Palestine p. 155; *id.*, Nat. Hist. of the Bible ed. 9 p. 257-262; *C. R. Conder* in Pal. Expl. Fund. Quart. Stat. 1888, 166; *A. Künzler*, Bibl. Naturgesch. ed. 10 p. 127-136.

De historia naturali crocodili cf. *A. E. Brehm*, Tierleben ed. 3 VII. 502-521; *Ph. L. Martin*, Naturgesch. der Thiere II. 1, p. 37-42; *Leunis-Ludwig*, Synopsis ed. 3. I. 1, p. 543 s. — Praeterea cf. *E. F. K. Rosenmüller*, Bibl. Alterth. IV. 2, 244-254; *P. Cultrera*, Fauna bibl. p. 325-336; *J. G. Wood*, Bible Animals, new edit. p. 514-528; *G. Loreta*, La zoologia nella Bibbia p. 320-

336. — Fabulas talmudisticas rabbinorum de Leviathan collectas habes apud *J. A. Eisenmenger*, *Entdecktes Judenthum* II. 872-875; *L. Lewysohn*, *Zoologie des Talmuds* p. 155-158. 271; *Isaac Broydé et Kaufmann Kohler* in *The Jewish Encyclopaedia* VIII. 37-39.

L. FONCK.

LEVITAE, ii ex tribu Levi, qui sacerdotibus tamquam ministri adiuncti erant. Eorum munera generalim describuntur Num. 3,6 ss.; ubi Dominus ad Moysen loquitur : « applica tribum Levi et fac stare in conspectu Aaron sacerdotis, ut ministrent ei et excubent et observent quidquid ad cultum pertinet multitudinis coram tabernaculo testimonii et custodiant vasa tabernaculi, servientes in ministerio eius; dabisque dono levitas Aaron et filiis eius ». Praeterea levitae Domino consecrati erant pro primogenitis populi. Cum enim Dominus in Aegypto percussis primogenitis Aegyptiorum redemisset ex servitute Israelitas, sibi voluit sanctificari omne primogenitum; sed ne singulae familiae obligarentur tradere primogenitum ad ministerium sanctuarii, « ego tuli levitas a filiis Israel pro omni primogenito » (Num. 3,12). Quare numerum et levitarum (ab uno mense et supra) et primogenitorum populi computari iussit. Inventi sunt levitae 22000, et primogeniti populi 22 273; isti qui excedebant numerum levitarum, singuli 5 siclis erant redimendi (Num. 3,15. 39 ss.). Levitae autem sacris ritibus, impositione manuum, sacrificiis oblati ad munera sua initiabantur (Num. 8,6-15). Tribus cognationibus seu familiis distinguebantur : Gerson, Caath, Merari; singulis familiis assignabat Moyses et certum castrametandi locum prope tabernaculum et certa officia portandi vasa sacra et res sanctuarii, quando castra erant movenda. A trigesimo anno et supra usque ad annum quinquagesimum singuli levitae officia sua obibant (cf. Num. 3,17-38; 4,1-33). Cum numerus horum recensetur in deserto (ab anno 30. usque ad annum 50.), inventi sunt 8580 (Num. 4,48). Pro itinere accurate describuntur levitarum officia; alias solum generalim iubentur mi-

nistrare sacerdotibus, excubias agere, praesto esse ad cuncta opera tabernaculi; prohibentur accedere ad vasa sanctuarii et ad altare (Num. 8,3-5). Nullus eo tempore commemoratur vestitus eorum peculiaris. Alio in loco iam a viginti quinque annis iubentur ministrare in tabernaculo foederis (Num. 8,24) scil. obire officia illa leviora, dum ad portandum non assumebantur nisi annos nati 30 et supra (Num. 4,47). Levitis autem dantur in possessionem omnes decimae populi; ipsi vero decimas decimarum dabunt sacerdotibus (Num. 18,21-24; cf. Lev. 27, 30). Pars quaedam praedae ac spoliolorum etiam levitis separabatur (Num. 31,30), quamvis ipsi inter pugnatore non numerarentur (Num. 2,33). Ad habitandum assignantur iis urbes 48 cum pascuis (Num. 35,1-8; Jos. 21,2 ss.).

De officiis levitarum varia instituit et ordinavit David. Cum area transferretur de domo Obededom et cum collocaretur in tabernaculo quod tetenderat David, levitae alii portabant arcem, alii erant cantores in organis musicorum, nablis, lyris, cymbalis; et uti David, ita levitae quoque induti erant stolis byssinis (1 Par. 15,2-27). Cum David senex recenseret levitas a 30 annis et supra, inventa sunt triginta octo millia virorum; ex his viginti quattuor millia distributa sunt in ministerium domus Domini; praepositorum et iudicum sex millia; ianitorum quattuor millia et totidem psaltae canentes Domino in organis. Officia autem obire debebant ab annis viginti et « erant sub manu filiorum Aaron in cultum domus Domini, in vestibulis, et in exedris, et in loco purificationis et in sanctuario et in universis operibus ministerii templi Domini... et stent mane ad confitendum et canendum Domino, similiterque ad vespeream, tam in oblatione holocaustorum, quam in sabbatis et calendis et sollemnitatibus reliquis » (1 Par. 23,28. 30. 31). Porro ad musicam sacram destinavit David filios Asaph et Heman et Idithun, qui numero ducenti octoginta octo in viginti quattuor classes dividebantur et in citharis et psalteriis et cymbalis Domino canebant (1 Par. 25,1-31);

in universum quattuor millia musico-
rum et cantorum recensentur (1 Par.
23,5). In ministerium sacerdotum desi-
gnabantur aliae levitarum familiae
(1 Par. 24,20-31); ordines et familiae
ianitorum numerantur 1 Par. 26,1-19
(Vide s. v. IANITORES). Porro aliae fa-
miliae constituebantur super thesauros
domus Dei et vasa sacra (1 Par. 26,20-
28); aliis munus scribarum et iudicum
deputatum erat (1 Par. 26,29).

Praeter haec officia inveniuntur levi-
tae etiam occupati in docendo populo;
eos enim misit Iosaphat rex (2 Par. 17,
8); in instauratione templi sub Iosia levi-
tae constituebantur praepositi operan-
tium (2 Par. 34,12); eodem modo post
exilium levitae a viginti annis et supra
ad urgendum opus Domini adhibeban-
tur (Esd. 3,8); mittebantur quoque per
regiones ad colligendas pecunias pro
reparatione templi (cf. 2 Par. 24,3. 6).
Cum sub Ezechia rege plurima offerren-
tur, ita ut necesse esset praeparare hor-
rea in domo Domini, praefecti eorum
instituebantur levitae (2 Par. 31,12).

In lege deuteronomica populo valde
commendatur, ne neglegant levitis ne-
cessaria lubenter suppeditare (Deut. 12,
19; 14, 27 etc.). Cum Ieroboam in regno
Israel cultum idololatricum induceret,
eiecit sacerdotes et levitas, qui migra-
runt in Iudam et Ierusalem (2 Par. 11,
13. 14; 13,9; cf. 3 Reg. 12,31). Secun-
dum verba apud Ezechielem (44,10-14)
sacerdotes illi stirpis leviticae qui ad
idololatriam declinaverant, redigendi
erant in ordinem levitarum, ut essent
aditui, ianitores, ministri templi ad
maclanda holocausta et victimas, ad
ministerium offerentium parati.

Etiam post exilium commemorantur
tres ordines: levitae, cantores, ianito-
res (Esd. 3,70; Neh. 7,73; 12,46); qui
levitae simpliciter dicuntur, obibant
munera levitica in templo et in sacrifi-
ciis, « opera quae erant forinsecus in
domo Dei » (Neh. 11,16), quae 1 Par.
9,28-32 quoque describuntur: credita
habebant utensilia sanctuarii, praecerant
similae, vino, oleo, thuri, aromatibus,
his quae in sartagine frangebantur, et cu-
ram habebant panum propositionis. Ex
exilio cum Zorobabel redierunt in Iu-

daeam levitae 74, cantores 128, ianito-
res 139 (Esd. 2,41.42; Neh. 7,45.46 can-
tores 148, ianitores 138). Numerus sat
exiguus, si consideraveris rediisse eo
tempore sacerdotes numero 4.289 (Esd.
2,36-39).

Postea cum Esdras cum aliis iter in
Iudaeam instituens comites recenseret,
ne unus quidem levita inventus est (8,
13) et munio misso et adhortatione
facta solum levitae 38 ad reditum se ac-
cinxerunt (8,18. 19). Inter eos qui mu-
lieres alienigenas duxerant, erant et sa-
cerdotes et levitae (Esd. 9,1; 10,5. 23).
In reaedificanda urbe levitae quoque
suas agebant partes (Neh. 3,17).

LEX. Nomine legis in libris novi foe-
deris saepius Pentateuchus vel lex mo-
saica designatur v. g. Matth. 12,5; Luc.
2,22 ss.; 10,26; Ioan. 7,19; Act. 7,53;
23,15; Rom. 2,17 etc.; quare esse sub
lege conditionem dicit hominum vete-
ris foederis, vel esse in lege; cf. Rom.
3,19; 6,14. Dein omnes libri Veteris Te-
stamenti compendiosa quasi formula
dici solent lex et prophetae; cf. Matth.
5,12; 11,3; Luc. 16,16; immo nomine
legis etiam totum Velus Testamentum
nominari solet, cum loci afferantur
tamquam in lege scripti, qui in psalmis
vel apud prophetas leguntur; ita Ioan.
10,34: nonne scriptum est in lege ve-
stra: ego dixi: dii estis i. e. Ps. 81,6;
Ioan. 12,34 cf. Ps. 109,4 et Dan. 2,44;
Ioan. 13,25 cf. Ps. 24,19; 1 Cor. 14,21
cf. Is. 28,11. Quae sit habitudo Christi
ad legem, ipse declarat: nolite putare
quoniam veni solvere legem aut pro-
phetas; non veni solvere sed adimplere
Matth. 5,17. Lex autem adimpletur vario
modo secundum varia quae praescri-
buntur. Quatenus doctrina fidei morum-
que in ea continetur, adimpletur a Chri-
sto quia doctrina haec explicatur magis
et redditur perfectior (cf. Matth. 5,
20 ss.); lex vero caerimonialis qua talis
utique cessat; at quod ea lege continetur
et praecipitur i. e. cultus Dei modo
quodam longe sublimiore exhibetur in-
stitutione Christi; proin illa quoque lex
ratione habita eorum quae significantur
modo multo perfectiore impletur. Lex
quoque iudicialis qua respublica Iudaeo-

rum regebatur cessat quidem quatenus ad indolem veteris theocratiae erat adaptata; verum haec quoque lex in ordinem altioremevecta est, dum Christus regimen sacrum instituit. Quae enim lege caerimoniali et iudiciali proponuntur, considerentur oportet, sicut Velus Testamentum in universum, tamquam figurae et typi; iam figurae et typi implentur ipsa re praefigurata; quare figurae ac typi adimpletione ipsa abrogantur et cessant; at notiones quae illis subsunt in ipsa impletione manent, immo perfectius exprimuntur. Unde quoque patet, cur Christus dicat: amen quippe dico vobis, donec transeat caelum et terra, iota unum aut unus apex non praeteribit a lege, donec omnia fiant (Matth. 5,18); ad quod declarandum, exempla habentur 1 Cor. 9,9; Gal. 4,29. 30; Hebr. 11,2 ss. etc.

Legem veterem apostolus vocat litteram, ministrationem mortis, virtutem peccati, quatenus lex per se solum praecipit, docet peccata esse vitanda, et ipsis hisce praeceptis cognitionem peccati tribuit, concupiscentiam excitat ac stimulat, vim autem et virtutem ad peccata vitanda per se non largitur. Unde littera occidere dicitur (2 Cor. 3, 6), nam: cum venisset mandatum, peccatum revixit (Rom. 7,9); per legem quippe cognitio peccati (Rom. 3,20). Huic legi veteri, quam eadem ex causa appellat legem peccati et mortis (Rom. 8,2), opponit legem spiritus vitae in Christo Iesu; legem enim veterem quippe quae infirmaretur per carnem non potuisse hominem ad impletionem legis perducere; id autem fieri per Spiritum; si enim spiritu facta carnis mortificaveritis, vivetis (Rom. 8,13).

Mandata dein particularia frequenter legis nomine appellantur. Ita saepe hebr. הַקִּי redditur; cf. Lev. 10,15; 18,5; 19,19; 20,22; 26,15; Num. 27,11; 30, 17 etc.; ponitur quoque pro בִּשְׁבַט: locutus est Samuel ad populum legem regni i. e. iura vel iura quae regis erunt (1 Reg. 10,25) et 2 Par. 35,13; etiam pro דָּבָר, quia verbum Domini legem constituit; ita Num. 36,6; Ps. 118,57; pro תִּשְׁמִיעָה Prov. 3,21.

Cum lex dicat et praescribat normam agendi, facili translatione usurpatur sensu quodam latiore; ita si Paulus loquitur de lege mentis, de lege in membris nostris, qua dictione id indicat quod mente approbatur, praecipitur, quod membris vel concupiscentia appetitur et quasi praescribitur etc.

De legislatione mosaica vide commentarios huius Cursus S. Scripturae in Pentateuchum, praesertim Prolegomena in Ex. Lev. Deut., quibuscum confer alium concipiendi modum apud R. Cornely, Introd. II. num. 1 ss. — Praeterea vide I. H. Holtzinger, Iuris Hebr. leges; I. Selden, De iure nat. et gent. iuxta disciplinam Hebr.; Spencer, De legibus Hebr. ritualibus et eorum rationibus; H. Reland, Antiquitates sacrae vet. Hebr.; Iken, Antiquitates hebr.; J. D. Michaelis, Mosaisches Recht; Bähr, Symbolik des mosaischen Rechtes; I. L. Saalschütz, Das mosaische Recht; Haneberg, Gesch. d. bibl. Offenbarung; P. Scholz, Die hl. Altert. des Volkes Israel; P. Schegg, Bibl. Archäologie.

LIA (לֵיאָה, Λεία), soror maior Laban, quam is per fraudem prius Iacobo uxorem dedit. Erat Lia lippis oculis, Rachel vero decora facie et venusto aspectu (Gen. 29,16. 17). Unde Iacob multo magis diligebat Rachel. Verum cum Dominus videret Liam esse odio habitam (hebr. Gen. 28,31) « aperuit vulvam eius sorore sterili manente ». Peperit Lia filios: Ruben, Simeon, Levi, Iuda; dein putans se desiisse parere, dedit pro se marito ancillam suam, Zelpham, quae peperit Gad et Aser; dein denuo peperit Lia Issachar, Zabulon, et filiam Dinam. Ipsa filiis indidit nomina, quibus suam in Deum pietatem et animum gratum significat (Gen. 29,32-30,21). Liam postea quoque fuisse uxorem minus dilectam, etiam colligitur ex ordine quo Iacob timens furorem et vindictam Esau filios et uxores collocat: in initio agnominis quod maximo exponitur periculo posuit ancillam utramque earumque filios, loco secundo Liam eiusque filios; ultimo loco eoque tutiore Rachel et eius filium Ioseph (Gen. 33,2); idem elucet ex praedilectione quam habuit pro filiis Rachel, Ioseph et Benjamin. Deus autem filios Liae maiore dignitate orna-

vit : ex Iuda futuri erant reges et Messias (Gen. 49,8-12; ex tribu Levi sacerdotes Domini et Moyses et Aaron. Liam sepelivit Iacob in sepulchro Abraham et Sarae et Isaac et Rebeccae (Gen. 49,31). Mortua est itaque ante ingressum in Aegyptum. De sepulchris trium patriarcharum eorumque uxorum Sarae, Rebeccae et Liae vide s. v. HEBRON 3.

LIBAMEN, LIBATIO. In sacrificiis simul cum ferto saepius praescribitur libatio vini. Quae libatio dicitur consuminatio (συντέλεια) sacrificii et ornamentum oblationis (κοσμησαι Eccli. 30, 14, 15). De ritu libationis nihil aliud in libris sacris traditur nisi quod habetur Eccli. I. c. : effudit (sacerdos) in fundamento altaris (εἰς θεμελίαν) odorem divinum excelso principi (ὁσμὴν εὐωδίας ὑψίστῳ παμβασίλει). Praescribitur libatio vini in iugi sacrificio quod singulis diebus mane et vespere offerebatur, pariter in holocaustis calendarum, dierum paschali, diei expiationis, dierum festi tabernaculi (Num. 28, 29; cf. Ex. 29, 40), pariter in sacrificio pentecostes, de quo Lev. 23, 18 et in holocausto pro ignorantia multitudinis, de quo Num. 15, 24; pariter in sacrificiis quae quis sponte offert Num. 15, 4-14 et in hostia pacifica nasiraei Num. 6, 17. Quantum vini ad libationem requiratur accurate praescribitur : ad sacrificium agni quarta pars hin (Num. 28, 7); ad sacrificium arietis tertia pars hin; ad sacrificium vituli (iuvenci) media pars hin; cf. Num. 15, 7; 28, 14 (hin autem sexta pars est mensurae bath). Cum Lev. 23, 18 holocaustum et fenum et libatio dicatur sacrificium (זֶבֶח) in odorem suavissimum Domino (cf. Ex. 29, 41; Num. 15, 7-10; 28, 8), aliqui putabant de vino quoque aliquid igni altaris esse iniectum (cf. *Paul Scholz*, *Die heiligen Alterthümer* II. p. 207; *Schegg*, *Biblische Archäologie* p. 506-7), quod tamen ex ea appellatione colligi non posse videtur; et esset sane mirum, si in illa tam accurata caeremoniarum descriptione hoc unum esset silentio praetermissum. Vinum effundebatur totum; sacerdotes enim saceris fugientes a vino abstinere iubentur

(Lev. 10, 9). Phialae autem vel cyathi ad libandum vinum ex auro conficiebantur (Ex. 25, 29; 37, 16) et libatio solum ad allare holocaustatum, nequam ad allare thymiamatis fiebat (Ex. 30, 9).

In Vulgata legitur quandoque libamentum, ubi in hebr. non habetur; cf. Lev. 6, 14 (hebr. 6, 7); 7, 29; saepius ponitur notione generali oblationis pro בִּנְיָהָה Lev. 9, 17; 44, 20. 31; 23, 13; Num. 7, 87; 8, 8; 28, 31; 29, 14; Iud. 13, 19. 23; ponitur quoque קָבַר Ier. 18, 15; 19, 14; pro תְּרוּכָה Ez. 44, 30; Neh. 10, 37; 12, 43.

Libatio alterius generis habetur Gen. 33, 14; Iacob oleo infuso lapidem consecravit in memoriam apparitionis Domini; item Gen. 28, 18. Effusio aquae ad significandam poenitentiam refertur 1 Reg. 7, 6 et David dicitur libasse Domino aquam quam cum vitae periculo ei viri tres attulerant de cisterna Bethlehem 2 Reg. 23, 16. 17.

LIBANUS (לְבָנוֹן), in prosa semper cum articulo הַלְבָּנוֹן i. e. albus; Ἀλβανός; apud Phoenices לְבָנוֹן assyr. *labnānu* cf. *Delitzsch*, *Schrader-Whitehouse*; aegypt. fortasse *ramanan* cf. *W. M. Müller*), mons altissimus a septentrione Palaestinae iuxta Phoenicem protensus et in Vet. Test. frequenter laudatus (Deut. 1, 7; 3, 25; 14, 24; Ios. 1, 4; 9, 1; 13, 5. 6; Iud. 3, 3; 3 Reg. 9, 19; 2 Par. 8, 6; Iudith 1, 7; Ps. 28[29], 6; 71[72], 16; Cant. 4, 8. 15; 5, 13; 7, 4). De cedris Libani v. CEDRUS. Isaias propheta frequenter oracula sua montis Libani comparationibus illustrat : Libanus Assyriorum potentiam et pompam repraesentans ad nutum potentioris corruens depingitur (Is. 10, 34); ablato iugo babilonico arbores Libani inter se gratulantur : iam quiete degimus (14, 8); populi exaltatio ita describitur, ut Libanus in campum frugiferum vertatur i. e. ut fructum afferat, quod sterile videbatur (29, 17); confusus est Libanus ab Assyriis vastatus (33, 9); salus messianica in eo cernitur, quod desertum iam gloria Libani, decore Carmeli et Saron exornatum sit (33, 2); expeditio Assyriorum in Palaestina describitur velut ascensus in Li-

banum, deiectio principum velut sucisio cedrorum (37,24); Dei maiestas tanta esse dicitur, ut ad eam digne celebrandam Libanus nobilissimus lignis pretiosis ac feris omnibus ad holocaustum missis non sufficiat (40,16); nova Sion prae vetere ita praecellit, ut ei iam tota gloria et magnificentia Libani detur (60,13). Apud Ieremiam contumaces arguuntur ex similitudine insensibilium, quae ordinem a Deo statutum servant, sicut nix Libani non deficit de solo petroso Libani (Ier. 18,14); arx regia in monte Sion posita dicitur caput Libani (22,6); admonetur urbs Ierusalem, ut ascendat Libanum et lugubri clamore omnibus gentibus in circuitu annuntiet cladem suam ex prostratione sociorum (22,20); describitur Ierusalem cum maiestate et securitate sedens in Libano et nidificans in cedris (22,23). Eadem imagine praesupposita apud Ezechielem Nabuchonosor velut aquila rapax post suum per alias terras volatum ad Libanum i. e. Ierusalem accessit et cedri summitatem, ramum celsiorem abstulit (Ez. 17,3); Assur quoque est quasi cedrus in Libano (Ez. 31,3), ob cuius ruinam Libanus luctum induit (31,13) aliaeque arbores Libani aquam potantes i. e. alii reges devicti iam libentius clades suas ferunt visa ignominia Assur (31,16). Plantatio Dei describitur radices agens ut Libanus (Os. 14,6), odorifera ut Libanus (14,7), cuius memoriale ut vinum Libani (14,8). Coram Dei potentia flos Libani elanguit (Nah. 1,4). Violentia in Libano commissa Chaldaeis exprobratur (Hab. 2,17). Dispersorum reditu etiam regiones Libani implebuntur (Zach. 10,10); sin autem populus contumax est, iam iubetur Libanus apertis portis suis recipere hostes et ignem (11,4).

Libanus hodie vocatur *Djebel Libnān*. Extenditur a *Nahr el-Qāsimīye* (Lita) supra Tyrum usque ad *Nahr el-Qebūr* supra Tripolim. Eius altissima cacumina sunt in parte septentrionali *Dhahr el-Qoḍīb* (3063 m), *Djebel Makmal* (3052 m), *Djebel Tizmārūn* etc. Ad radices occidentales *Dhahr el-Qoḍīb* cernitur celeberrima silva cedrorum prope vicum

Bsherre, quae indicatur 4 Reg. 19,23: saltus Carmeli eius (Libani) i. e. silva eius horto similis.

Libanum a iugis montium oppositis seu Antilibano separat vallis frugifera *el-Beqā'a*, planities Massyas seu Massyas veterum (*Polyb.* V. 43. 46. 61; *Strabo* XVI. 2,10. 18), Coele Syria sensu artiore. Prope *Ba'albek* originem habent duo fluvii, quorum alter Orontes (*Nahr el-'Aṣī*) septemtrionem petit et prope Antiochiam tandem in mare effunditur, alter Lita (*Nahr el-Liḥānī*) meridiem versus fluit et infra Libanum cursu fere retriangule flexo ad mare tendit, novo nomine *Nahr el-Qāsimīye* vocatus.

Mons a Libano valle *el-Beqā'a* separatus apud Graecos vocabatur Antilibanus (*Ἀντιλίβανος*), apud Flavium Iosephum mons Coelen Syriae determinans (Ant. XIV. 3,2) vel etiam Libanus (V. 4,22; 3,1), hodie *Djebel el-Sherqī*. In S. Scriptura Antilibanus ipse non memoratur, sed eius pars extrema meridionalis vel potius continuatio, mons Hermon, et Antilibani pars septentrionalis, Sanir (v. s. v. HERMON). De capite Amara Cant. 4, 8 v. ABANA.

Cf. *Delitzsch*, *Paradies* p. 103 ss.; *Schrader-Whitehouse*, *Cuneif. Inscr. and Old Test.* I. 172 ss.; *W. M. Müller*, *Asien und Europa nach altaegypt. Denkmälern* 1893, p. 197 ss. — De Libano generatim v. *Retland*, *Palaestina* I. 311 ss.; *I. L. Burckhardt*, *Reisen in Syrien, Palaestina, ed. Gesenius* 1823 p. 37 ss.; 213 ss.; *O. Fraas*, *Drei Monate im Libanon*, Stuttgart 1876; *Baedeker-Benzinger*, *Palaestina und Syrien* ed. 5 p. XLIV. 320 ss. 366 ss.; *F. Buhl*, *Alt. Pal.* 1896 p. 110 ss.; *J. Dötter*, *Geogr. u. ethnogr. Studien zum III. u. IV. Buche d. Könige* 1904 p. 116-118.

LIBANUS (λίβανος; cf. hebr. לִבְנוֹן)

ponitur in Vulgata Eccli. 24,21 et 39,18 notione thuris, dum aliis in locis vox graeca λίβανος latino vocabulo thuris redditur; ita Eccli. 50,8. 9; Bar. 1,10. Libanus non incisus intellegitur resina, thus, id quod ex arbore ita effluit vel evaporatur, ut incisione non sit opus; eiusmodi censetur esse optimum; ei itaque Eccli. 24,21 sapientia comparatur; graece ὡς λίβανου ἀτμῆς. Ceterum v. THUS.

LIBATORIUM, graece *σπονδεῖον*, vas quo vinum in sacrificiis libabatur; quod vas ex auro erat conficiendum Ex. 25, 29; 37, 16. Vox solum legitur 1 Mach. 1, 23; nam Eccli. 50, 16 *σπονδεῖον* vertitur voce libationis: extendit manum suam in libatione (*ἐπὶ σπονδείου*).

LIBELLUS REPUDIII (*סֵפֶר כְּרִיתָה*, *βιβλίον ἀποστασίου*), cuius lex habetur Deut. 24, 1 ss. Si scil. vir uxorem voluit dimittere, debebat ei dare scriptum, quo scil. constaret eam esse legitime dimissam et proinde posse nubere licite alii viro. Ratio ob quam dimissio fieri poterat assignatur: si vir invenerit in ea aliquam foeditatem (*עֲרֻת דָּבָר*, LXX *ἀσχημὸν πράγμα*). Locutio haec adhibetur quoque Deut. 23, 15 ibique refertur ad pollutionem nocturnam et excrementa humana; unde significat generatim ea quae pudenda sunt et foeda. In scholis rabbinorum de causa dimissionis disceptabatur. In tractatu mishnico proponitur causa dimissionis mala uxoris fama, eius sterilitas, votum quod invito marito vel inscio fecit; demum affertur scholam Hillelis dicere uxorem repudiari posse, si combusserit decoctum viri, et rabbi Akibam, si aliam invenerit vir pulchriorem; scholam autem Schammai, non posse repudiari nisi invenerit in ea *עֲרֻת דָּבָר* aliquid inhonesti (cf. *Surenhusius* III. p. 336. 337. 338). Invaluisse modum laxiorem dimittendi colligitur iam ex Eccli. 7, 21 et Mal. 2, 14 et praesertim quia Pharisei interrogant tentantes Christum: si licet homini dimittere uxorem suam quacumque ex causa (Matth. 19, 3). Libellus repudiū Iudaeis permittebatur ob duritiam cordis eorum (Matth. 19, 8); verum ipsa confectione scripti eiusmodi et causa sola rei turpis assignata praecavebatur, ne impetu furoris statim neve ad libitum posset dimitti. Ulisque frenum hoc alterum, rem turpem neque aliam, doctores legis et mores corrupti mox removebant. Vir uxorem dimissam iam non poterat ducere. Christus libellum repudiū abolevit, matrimonium ad institutionem primaevam reduxit, ita ut sola morte matrimonium consummatum solvatur; cum tamen permittere ob forni-

cationem uxoris separationem ab ea i. e. eius dimissionem manente vinculo, et ex eius verbis Matth. 19, 9 (5, 32) et ex doctrina apostoli 1 Cor. 7, 10. 11 habetur. Cum foedus Dei cum populo consideretur quasi sacrum quoddam connubium, eiectio populi in exilium, qua a terra Domini eiusque foedere separabatur, designatur tamquam dimissio et traditio libelli repudiū; cf. Ier. 3, 8; at cum Deus foederi suo ac promissis omnino stet neque populum suum plane abiiciat neque eum a suo cultu dimittat, ex altera parte etiam negatur cum dedisset librum repudiū populo exsuli Is. 50, 1.

LIBER. Uti ex Ier. 36, 2. 23 colligi potest, materia librorum apud Iudaeos papyro constabat; non pellibus ad scribendum praeparatis, uti etiam putatum est. Nam incredibile est regem folia ex pellibus vel corio inicisse in ignem et coram se combussisse, quorum fumus esset satis molestus. Libros in formam voluminum esse effectos ipsa voce *כִּלְמָה* satis indicatur; plura scil. folia ita inter se consuebantur, ut continuatum quasi folium constituerent; ex altera tantum parte conscribebantur et uno terete baculo circumvolvebantur et complicabantur in formam cylindri. Qui modus hodieum adhuc in voluminibus pro usu synagogarum adhibitis servatur; membrana scil. illa ex pluribus inter se consutis continuata illigatur duobus teretibus baculis qui capulos habent quos manu tenens qui legit potest evolvere vel convolvere librum. Quare bene dicitur Luc. 4, 17: et traditus est illi liber Isaiae prophetae et ut *revoleit* librum (*ἀνακτύσας* in compluribus codd.).

Ceterum apud Hebraeos *סֵפֶר* dicitur scriptum quantumvis breve sit; ita 2 Sam. 11, 14; 3[1] Reg. 21, 8 (hebr.); 4[2] Reg. 5, 5 (hebr.), ubi in Vulgata epistula, litterae habentur; Is. 37, 44; 39, 1; Ier. 32, 12 liber emptionis; simili modo Matth. 1, 1 liber generationis i. e. liber originis, catalogus progenitorum; ea quippe dictione ipsa genealogia designatur; cf. Neh. 7, 5 liber census, i. e. tabulae quibus inscripti erant qui ascenderant primum in urbem Ierusalem.

Laudatur Num. 21,14 liber bellorum Domini, de quo praeter nomen et verba illuc laudata nihil constat; idem dicendum de libro Iustorum Ios. 10,13 et 2 Reg. 1,18 (סֵפֶר הַיִּשָּׁר); liber verborum dierum Salomonis et liber verborum dierum regum Iuda, regum Israel, qui saepe laudantur (2 Reg. 11,41; 3 Reg. 14,20 etc.), res gestas regum continebant; erant itaque annales regni, ex quibus ea quae in sacris litteris referuntur de regibus deprompta videntur. — Ceterum vide de libris deperditis utriusque Testamenti *Cornely*, Introd. ed. 2 I. n. 83 p. 246 ss. II. 1 p. 296 ss.

Apud Dominum repositus censetur liber vitae, quasi catalogus eorum qui vivunt, qui inter Dei amicos recensentur, qui vitae aeternae heredes erunt. Significatio non esse eadem in omnibus locis videtur. Si Moyses dicit ad Dominum Ex. 32,32 : si non facis, dele me de libro tuo quem scripsisti, videtur petere, ut ipse potius moriatur quam ut Deus populum idololatria commissam deleat; nam petitio eius ad minas Dei Ex. 32,10 referri debet. Qui sensus quoque cernitur Ps. 68,29 : deleantur de libro viventium et cum iustis non scribantur; et Ps. 138,16 videtur dici Dei scientia comprehendere omnes : in libro tuo omnes scribentur. — Post laudem sapientiae Eccli. 24,23 additur : τὰ πάντα βιβλος διαθήκης θεοῦ ὑψίστου; in Vulgata v. 32 : haec omnia liber vitae et testamentum Altissimi; i. e. qui sapientiae studet, habet doctrinam vitae. Si vero apostolus scribit : quorum nomina sunt in libro vitae Phil. 4,3, eos intellegit qui regno Dei adscripti sunt heredes bonorum caelestium; nam qui bestiam adorant, eorum nomina non sunt scripta in libro vitae Agni (Apoc. 13,8) et qui non inventus est in libro vitae scriptus, missus est in stagnum ignis (Apoc. 20,15); verum qui vicerit, sic vestiatur vestimentis albis et non delebo nomen eius de libro vitae (Apoc. 3,5). Apud Deum quasi in tabulas vel in album referri qui eius sint, iam Ps. 86,6 quoque indicatur. Quod in sacra liturgia habetur : liber scriptus profertur, in quo totum continetur, unde mundus iudicetur, efformatum est secundum

illud apud Danielelem 7,10 : iudicium sedit et libri aperti sunt.

LIBER, Διόνυσος, Bacchus, quem mythologi inventorem vini faciunt; festum in eius honorem celebratum, Bacchanalia, Διονύσια, commemorantur 2 Mach. 6,7, in quibus cogebantur hedera coronati Libero circuire (πομπεύειν). Nicenor minatus est se templum hierosolymitanum consecraturum esse Libero patri (ιερόν ἐνταῦθα τῷ Διονύσῳ ἐπιφανὲς ἀναστήσω, 2 Mach. 14,33)

LIBERI vide s. v. EDUCATIO.

LIBERTINUS Act. 6,9 : surrexerunt autem quidam de synagoga quae appellatur Libertinorum (τῶν λεγομένων Λιβερτινῶν, ita *Tischendorf*; τῆς λεγομένης *Westcott*, et codd. longe plerique). Libertinus is dicitur qui ex servo liber factus est. Libertini ideoque ii ex Iudaeis nominabantur qui cum bello capti essent a Romanis postea libertate donati sunt. Ex quo tempore enim Pompeius Palaestinam invaserat, multi Iudaeorum bello capti Romam adducebantur, ex quibus haud pauci postmodum libertate donati Romae habitabant (cf. *Philo*, Legat. ad Cai. 23); alios in urbem patriam rediisse probabile est. Iis eorumque posteris mansit nomen libertinorum, quo a Iudaeis ingenuis distinguerentur. Alii putabant eo nomine designari servos romanos manumissos, qui Iudaeorum sacris addicti synagogam in urbe habuissent (cf. *Tacitus*, Annal. 2,85, quattuor millia libertinorum superstitione iudaica infectorum missa esse in Sardiniam). Cum Act. 6,9 praeter hoc nomen reliqua urbes vel regiones significant (Cyrenenses, Alexandrini, Cilicia, Asia), etiam in eo urbem vel regionem esse quaerendam ab aliquibus existimatum est. Ita in armena versione synagoga Libyorum legitur, Suidas quoque ὄνομα ἔθνος esse vult; at urbs Libertum haud innotuit, neque ex eo quod in synodo carthaginensi anno 441 facta episcopus libertinensis nominatur, appellatio Λιβερτινοὶ explicari potest. Quare cum longe plerisque interpretationi quam iam habet S. Chrysostomus acquiescendum erit : οἱ Ῥωμαίων ἀπελεύθεροι.

LIBRA (λίτρα) pondus est unciarum duodecim (Ioan. 12,3; 19,39).

LIBRARIJ. Legitur in Vulgata Esth. 8,9: accitisque scribis et librariis regis... scriptae sunt epistolae. De solis scribis regis mentio fit in textu hebraico (LXX ἐκλήθησαν δὲ οἱ γραμματεῖς).

LIBUM. Ea voce Num. 28,30 redditur in Vulgata לִבְיָהּ. Vide LIBAMEN, LIBATIO.

LIBYA, LIBYES. 1. Populus Aegyptiis et Aethiopibus vicinus hebr. לִיבִי, LXX Λίβυες. In exercitu Sesac regis Aegypti contra Roboam proficiscentis erant Libyes et Troglodytae et Aethiopes (2 Par. 12,3); in exercitu Zara regis Aegypti et Aethiopiae contra Asa pugnabant Libyes (16,8). Nahum propheta (3,9) urbem No-Amon alloquitur: Africa (פִּינִי) et Libyes fuerunt in auxilio tuo. Secundum Danielis prophetiam (11,43) in exercitu Antiochi IV. Epiphanis militabant Libya et Aethiopia. Tempore pentecostes etiam ex Libyae partibus (τὰ μέρη τῆς Λιβύης), quae est circa Cyrenen, Iudaei aderant Hierosolymis (Acl. 2,10). — Libya Aegyptiis est desertum, quod iuxta latus occidentale Aegypti a mari Mediterraneo usque ad Aethiopiam extenditur.

Cf. Knobel, Voeltkertafl p. 282-5; Ebers, Aegypten u. d. Bücher Mose's 1868 p. 104-6.

2. Populus a tertio filio Cham descendens, qui Gen. 10,6; 1 Par. 1,8 Phuth audit, appellatur in Vulgata Ier. 46,9; Ez. 27,10; 38,5 Libyes et Ez. 30,5 Libya ponitur pro regione פִּינִי; LXX Λίβυες. Vide PHUTH.

3. Libya in Vulgata Iudith 3,1 ex opinione nonnullorum (O. Wolff, Das Buch Iudith 1861 p. 109; De Moor, Le livre de Judith 1895 p. 35) est mendosa lectio pro Libano (לִבְנֹן), chald. לִיבְנֹן seu pro regione Libani et Antilibani.

LICTORES. Ita vertit S. Hieronymus 1 Reg. 19,20 בִּלְעָזְכִּים: misil ergo Saul lictores (hebr. nuntios) ut raperent David; LXX ἀγγέλους. Lictores, ξαβδόμοι i. e. virgas, fascēs ferentes nominantur Acl. 16,33. 38. Erant scil.

lictōres ministri publici qui magistratibus fascēs et alia dignitatis insignia praeferebant; eligebantur vel ex intima plebe vel ex libertinis. Ministri eiusmodi addebantur dictaloribus, consulibus, praetoribus; eorum erat turbam summovere, ut magistratus sine ullo impedimento ingredi possent, animadvertere, ut omnes iis debitam exhiberent reverentiam, poenas in reos exsequi.

LIGNUM. Cum hebr. עֵץ et arborem et lignum significet, factum est ut in Vulgata quoque saepe lignum de arbore usurpetur, quae significatio alias Latinis est rarissima. Ita lignum pomiferum, lignum faciens fructum Gen. 1,11. 12 et ex omni ligno paradisi comede Gen. 2,16; lignum vitae, cuius fructibus id esset effectum, ut viribus corporis repetita comestione redintegralis homo evaderet mortis expertus, donec a Deo ad caelestem patriam transferretur (Gen. 2,9; 3,22). De Arbore scientiae boni et mali, vide s. v. Ad aedificia adhibebantur ligna arboris sycomori; in templo ligna cedrina et abiegni (cypressina); pariter ad palatium regum regis laquearia cedrina, uti Ieremias regi exprobrat 22,14; ex lignis olivarum cherubim in templo et ostiola et postes erant (3 Reg. 5,10; 6,23. 31. 33; 10,27; Is. 9,10). In deserto reperiebantur ligna setim; unde illa ad tabernaculum conficiendum adhibebantur. Gradus in templo et in palatio fecit Salomon de lignis thyinis (2 Par. 9,11 i. e. lignis santalinis), quae asportabantur de Ophir (3 Reg. 10,11. 12). Quibus lignis usi sint Phoenices ad naves instruendas, exponitur Ez. 27,5. 6. Quandoque poena mortis lapidatione vel gladio iniuncta ad maiorem ignominiam evehebatur, ita ut cadaver appenderetur in patibulo: maledictus a Deo est qui pendet in ligno (Deut. 21,23). In textu graeco, in versionibus inde derivatis, in Vulgata legitur Ier. 11,19 mittamus lignum in panem eius; lignum explicant de ligno venenoso; ita plerique; alii: loco panis pascamus eum ligno i. e. fuste, cruce. Sed textum hebr. verte: perdamus arborem cum fructu suo; id quod modo

proverbiali dicitur cum allusione ad Ier. 11, 16.

LIGNUM MOYSI OSTENSUM.

Circa naturam ligni quod Dominus Moysi ostendit quodque in aquas amaras in loco Mara iniectum eas in dulcedinem vertit (Ex. 15, 25; cf. Eccli. 38, 5), tum Rabbini, tum Rationalistae, tum alii homines docti multum, sed frustra laborarunt. Ex placito Rabbidorum lignum erat fruticis Rhododendron seu Oleandrum dicti (*Nerium Oleander* Linné), cuius lignum et folia alias pecoribus noxia, contrariam prorsus virtutem salutarem eximio Dei miraculo obtinuisse fingunt. Rationalistae e contra, ut omne miraculum tollant naturali ligni alicuius virtuti totam mutationem attribuunt; atque tale lignum beneficium plures cum *Burckhardt* sibi videntur invenisse stuentes, Moysen baccas fruticis *Nitraria tridentata* Desfontaines ac simul succum malogranatorum in aquas amaras immisisse; at undenam quantitas sufficiens huius ligni Moysi suppetierit, non satis explicant. Alii cum *C. Sprengel* fortasse *Ceratoniam siliquam* Linné tantam habuisse virtutem suspicantur, ut aquas in dulcedinem verteret, cum vel ipse *Avicenna* hanc vim charrubo tribuat. At re vera lignum hoc felicissimum tali virtute naturali praeditum inventum esse nemo sane concedet.

Cf. praeter commentatores in textum Exodi citatum *M. Hiller*, Hierophyton 1. 101; *P. Cultrera*, Flora biblica 437-40; *M. Jullien*, Sinai et Syrie, Lille 1893, 61 s.; *G. E. Post*, Flora of Syria 186.

L. FONCK.

LIGNUM PULCHERRIMUM semel vocatur a S. Hieronymo arbor שֶׁבֶן dicta (Neh. 8, 15), quam alibi (3 Reg. 6, 23. 31. 32; Is. 41, 19) *olivam* appellat. Probabiliter haec « arbor pinguedinis » sive « arbor olei », quae in citato textu libri Nehemiae una cum olea (זית) tamquam ab ea distincta recensetur, non est oliva neque etiam oleaster veri nominis, sed *Elaeagnus angustifolia* Linné (= *Elaeagnus hortensis* Marschall von Bieberstein, fam. *Elaeagnaceae*), ara-

bice *zarzufūn* nominata, quae in tota Palaestina et culta et spontanea crescit, quaeque et ramos pulchros aspectumque iucundum et lignum ad constructiones varias aptum praebet. V. OLEA.

De elaeagno cf. *E. Boissier*, Flora orient. IV. 1056; *Leunis-Frank*, Synopsis ed. 3 II. 2 p. 197; *G. E. Post*, Flora of Syria 710 s.

L. FONCK.

LIGURIUS in sola descriptione pectoralis summi sacerdotis commemoratur, in quo primum locum tertii ordinis gemmarum occupat (Ex. 28, 19; 39, 12). Hebraice לִיגִירִי et graece λιγύριον audit. Cum nomine hebraico conferunt aegyptiacum *nsm*, quod lapidem pretiosum flavi coloris videtur designare. Atque huic indicio explicatio de *sucino* (germ. *Bernstein*, gall. *ambre jaune*) satis est conformis. Alii potius *hyacinthum* intellegunt (cf. Apoc. 21, 20). Sed quae a variis auctoribus de significatione nominis proferuntur, maxima ex parte vim coniecturae non excedunt.

Cf. *Joh. Braunius*, Vestitus sacerdotum hebraeorum II. c. 14 (Amstelodami 1680, II. 692-703); *Joh. Joach. Bellermand*, Die Urin und Thumaim, Berlin 1824, p. 49-52; *E. F. K. Rosenmüller*, Bibl. Alt. IV. 1, 37 s.; *A. Kinzler*, Bibl. Naturgesch. ed. 10 p. 336; *Riehm-Baethgen*, Handwörterbuch d. bibl. Alt. ed. 2 I, 336 a.

L. FONCK.

LILIUM. 1. *Nomen.* Lilium in Vulgata redditur imprimis פֶּרֶה, quod generatim flores designat (Ex. 25, 31. 33 s.; 37, 17. 19 s.; 3 Reg. 7, 49; gr. ubique λῑλον). Praeterea in textu Is. 35, 1 latinus interpres vocem הַבִּצֵּל lilium explicat sicut graecus λῑλον; at potius de variis aliis floribus ac praesertim de *Colchico* et *Narcisso* nomen hoc videtur intellegendum. In libro autem Judith 10, 3 inter ornamenta mulierum etiam lilia in textu latino commemorantur, ubi primigenius textus graecus nihil simile habet.

His itaque textibus omissis nomen latinum in reliquis locis librorum sacrorum voci hebraicae שִׁישׁ (שִׁשְׁתָּה, שִׁשְׁתָּה) et graecae λῑλον respondet. Idem no-

men hebraicum in titulis quattuor psal-morum (hebr. 45,1; 60,1; 69,1; 80,1) occurrit, ubi a Vulgata *pro iis qui commutabuntur* (vel *immutabuntur* Ps. 59,1) explicatur nec facile sensus accuratius determinari poterit.

Nomen hebraicum, quod etiam in linguis aramaica et arabica adhibetur, videtur desumptum esse ex lingua aegyptiaca, in qua *s(sh)shn*, coptice *shōshēn* (i. e. lotus) audit.

2. Notae floris ex textibus S. Scripturae. Pro sensu huius nominis determinando haec fere ex variis textibus S. Scripturae deduci possunt: 1) Flos eo nomine designatus crescit in vallibus (Cant. 2,1) et collibus (ib. 4,3; cf. 4 Esdr. 2,19), in pascuis gregum (ib. 2,16) et iuxta fontes aquarum (Eccli. 50,8 gr.) ac generatim in agris et campis sub divo (Matth. 6,28; Luc. 12,27). Speciatim commemorantur spinae, inter quas flos ille quaerendus est (Cant. 2,2), qui tamen etiam honorabiliorem invenit locum in horto regio (ib. 6,1; cf. 5,13 et 4 Esdr. 5,24). Neque neglegendum videtur, tum in Osee (14,6-8) tum in variis locis Cantici (4,8. 14. 15; 5,15; 7,4) tum in Evangelio S. Matthaei (6,28; cf. 4,25) montes Libani et regiones vicinas saltem indirecte tamquam patriam liliorum cum aliqua probabilitate indicari. — 2) Quod qualitates floris significati attinet, in omnibus fere textibus supponitur esse planta pulchritudine et quadam ut ita dicam regia maiestate insignis et praecllens (cf. maxime verba Christi Matth. 6,28; Luc. 12,27), quae ad sufficientem magnitudinem exerceat (Os., Matth., Luc. II. cc.) et arefacta aptam ad comburendum materiam praebet (Matth., Luc. II. cc.). Praesertim deinde notandum, in plurimis textibus florem supponi odore excellentem, ita ut cum thuris odore comparetur et in horto regio in areolis aromatum locum insignem inveniat (Cant. 5,13; 6,1; Eccli. 39,19; 50,8; Os. 14,6 s.). — 3) Frequentia floris videtur indicari in verbis Cantici de acervo tritici vallato liliis Cant. 7,2). Forma vero talis innuitur, ut ornamenta in capitellis columnarum et labium maris

aenei in similitudinem calicis aperti cum ea apte comparari possit (3 Reg. 7,19. 22. 26; 2 Par. 4,3).

Immerito autem ex textu Cant. 5,13: « Genae illius sicut arcolae aromatum consitae a pigmentariis; labia eius lilia distillantia myrrham primam » aliqui auctores colorem rubrum floris deducere volunt. Nam non in colore, sed in odore suavi (distillantia myrrham primam) tertium comparationis quaerendum est.

3. Significatio nominis. Auctores, qui ad dictas notas floris in textibus sacris non satis attendebant, in determinanda significatione nominis in diversissimas et oppositas sententias abierunt. Ita rosa, nymphaea, lotus, anemone, viola, convallaria, tulipa, fritillaria, narcissus, gladiolus, iris, liliū chalconicum, variae species liliacearum in genere atque alii etiam candidati suos inveniunt auctores.

Quibus omissis honor lili biblici maxima cum probabilitate tribuendus videtur illi speciei liliacearum, cui nomen *Lilium candidum* a Linnaco tributum est. Ratio est, quia omnibus notis supra ex Scriptura indicatis omnino videtur satisfacere. Quod cum alibi data opera probatum fuerit, assentientibus auctoribus in rerum naturalium scientia gravissimis, ad illos libros mox citandos lectorem studiosum relegare liceat.

Cf. *L. Fonck*, Streifzüge durch die biblische Flora, Freiburg 1900, p. 53-76 (eadem fere in « Stimmen aus M.-Laach » LIV. 1898, I. 151-168). Maximam variorum auctorum copiam ibi citatam invenies, praesertim p. 75 s.

L. FONCK.

LINGUA. Dicitur lingua uti hebr. לשון primum de membro, ut instrumento sermonis; dein de ipso sermone seu modo loquendi, v. g. Iob 15,5: imitatoris linguam blasphemantium; pariter de genere sermonis alicui populo peculiari, v. g. Gen. 10, 5: unusquisque secundum linguam suam, Dan. 1, 4: ut doceret eos linguam Chaldaeorum, et etiam de populis Is. 66,18: ut congregem cum omnibus gentibus et linguis. Applicatur quoque ad res inanimatas, quae aliquam cum lingua similitudinem

prae se ferunt; lingua ignis i. e. flamma Is. 5,24; lingua maris i. e. sinus maris Ios. 15,2. 5; 18,19; Is. 11,15. Et cum Spiritus S. redderet apostolos disertos eosque et discipulos doceret variis linguis eloqui mysteria et magnalia Dei, ipse adventum gratiamque suam apparitione linguarum ingearum manifestavit die pentecostes Act. 2,3.

De confusione linguarum agitur Gen. 11,1-9. Divisio linguarum neque primum neque unice dicenda est illo eventu esse effecta; neque opus erit assumere homines usque ad illud tempus locutos esse lingua primitiva. Ipsam vero linguarum divisionem apud homines quae Babylone in turrim aedificandam conspirarunt effectam esse alii dicunt subito ac miraculose, alii paulatim et sine miraculo. Immo sententia proposita est, ibi si verba bene perpendantur non esse mentionem de confusione linguarum, verum de confusione sermonum seu consiliorum, ob quam opus sit intermissum. Et ratio eius interpretationis inde repetitur, quod Gen. 11,1-9 in textu hebr. et samaritano constanter adhibeatur vox שפה labium, dum 10,5. 20. 31 (quibus locis indubie de lingua sermo est) semper dicatur לשון; unde ostendere conantur שפה de sermone, consilio etiam aliis in locis explicari neque unquam accurate linguam designare. Ceterum cf. *Kaulen*, Die Sprachverwirrung zu Babel, Mainz 1864; *Schoepfer*, Geschichte des alten Testaments; *F. de Hummelauer*, Comm. in Gen. p. 302 ss.; *Brunengo*, L'impero di Babilonia e di Ninive I. p. 158 ss.

De dono linguarum v. CHARISMATA III. in vol. I. col. 848 ss.

LINUM, hebr. פֶּשֶׁת et פֶּשְׁתָּה et graece λινον, dicitur imprimis de planta in agris culta, dein de filamento huius plantae et de vestimentis aliisque rebus ex eo confectis. Planta, scilicet genus *Linum* ex familia *Linearum*, multis speciebus diversis in Oriente spontaneae crescens invenitur; *G. E. Post* in sua Flora palaestinaensi quattuordecim enumerat (p. 181-4). At in S. Scriptura non nisi de planta culta sermo est, eaque praesertim in agris Aegypti crevisse et cum tempore verno iam folliculos germinas-

set, grandine laesa esse refertur (Ex. 9, 31; cf. Is. 49,9). In Aegypto autem antiquitus atque etiam hodie species *Linum humile* Miller, non vero *L. angustifolium* Hudson neque etiam *L. usitatissimum* Linné, colebatur et colitur. Eadem probabiliter eodem tempore etiam in Palaestina colebatur, ubi Rahab illa hierichuntina *stipulas lini* (פֶּשְׁתֵי הַלֵּן, ἐν τῇ λινοναλάμῃ) in solario domus suae narratur habuisse, siccandas ardore solis (Ios. 2,6).

De lino eiusque cultura cf. *O. Heer*, Die Pflanzen der Pfahlbauten, Zürich 1865, 35; *id.* Ueber den Flachs u. die Flachskultur im Alterthum, *ib.* 1872; *V. Hehn*, Kulturpflanzen u. Haustiere, ed. 7, 162-88; *Leunis-Frank*, Synopsis ed. 3, II. 2 p. 431-6; *A. de Candolle*, L'origine des plantes cultivées, Paris 1883, 95-103. — De cultura lini apud Aegyptios cf. *I. Rosellini*, Monumenti, parte II. (Mon. civ.), tomo I., Pisa 1834, 333-41; *A. Braun* in Zeitschr. f. Ethn. IX. 1877, 289-81; *Wilkinson-Birch*, Manners and Customs II. 157-75; *Fr. Woenig*, Die Pflanzen im alten Aeg. 181-9; *V. Loret*, Flore pharaonique ed. 2, n. 177; *A. Erman*, Aegypten 594-7.

Ex lino praesertim muliebri artificio (Ios. 2,6; Prov. 31,13; Os. 2,5) vestimenta (Lev. 13,47. 59; 1 Reg. 2,18 etc.), cingula ac lumbaria (Ier. 13,1), funiculi (Iud. 15,13 s.; Ez. 40,3), ellychnia (Is. 42, 3; 43,17; Matth. 12,20), linteamina (Luc. 24,12; Io. 19,40) contextebantur. Vestimenta autem linea praesertim sacerdotibus et levitis (Ex. 28,42; 29,5. 8; 39, 27; Lev. 6,10; 8,13 etc.; 1 Reg. 2,18; 22, 18; 2 Reg. 6,14 etc.) atque angelis et sanctis tribuuntur (Ez. 9,2. 3. 11; 10,2. 6. 7; Dan. 10,5; 12,6. 7; Apoc. 15,6 etc.), atque idem usus sacer apud veteres Aegyptios vigeat, penes quos sacerdotes lineistantum vestimentis induti erant et mortuorum corpora lineis involucris ligabantur. Quamquam in uno vel altero sepulcro etiam villae gossypinae inventae sunt, plerumque tamen linum tantum in cura mortuorum adhibitum esse constat.

Contra oppositam opinionem, quam tuebatur v. gr. *Rosellini* op. c. 346-61, cf. *J. Thomson*, Memoir on the Mummy Cloth of Egypt, in Annals of Philosophy, London

1834 (June) et in Philosoph. Magazine, ib. 1834, ser. III., vol. V. p. 29 (Novembre) et saepius; *Yates*, *Textinum antiquorum*, London 1843, 254 ss.; *R. Hartmann* in *Zeitschr. f. Ethnol.* III. 1871, 107 s.; *P. Ascher-son* in *Verhandl. d. Ges. f. Anthropol.* 1875, 58; *Wilkinson-Birch* op. c. II. 158 etc.

Ex quo etiam confirmatur sententia eorum qui byssum antiquorum praesertim de lino exponunt (v. BYSSUS). In textu hebraico praeter פִּשְׁתָּהּ וּפְשֵׁתָהּ (Plur. פִּשְׁתִּים) etiam בֶּד pro lino saepe adhibetur; stupa vero, quae in operando lino a filamento bono separatur, hebraice נֶזֶרֶת audit (Jud. 16,9; Is. 1,31). Linum erudum, i. e. non tostum, graece ὀνόλινον dicitur et tamquam vestis pauperum describitur Eccl. 40,4. Semel etiam תְּשִׁבֵּץ in Vulgata (tunica) linea stricta redditur (Ex. 28,4), quam vocem (tunicam) tessellate textam explicant (*gewirktes Zeug*). Quandoque in Vulgata *linea* additur, ubi in hebraeo non habetur, v. gr. Ex. 28,40; 29,5. 8; Lev. 8,7. 13; 10,5.

Cf. *I. H. Ursinus*, *Arboreti bibl. Cont.* 172; *M. Hiller*, *Hierophyt.* II. 130-41; *O. Celsius*, *Hierobot.* II. 283-312; *E. F. K. Rosenmüller*, *Handb. d. bibl. Alterth.* IV. 1, 172-4; *J. H. Balfour*, *Plants of the Bible*, ed. nova, 149-53; *H. O. Lenz*, *Botanik d. alt. Griechen u. Römer* 672-6; *P. Cultrera*, *Flora bibl.* 206-15; *H. B. Tristram*, *Nat. Hist. ed.* 8, 445-7; *A. Künzler*, *Bibl. Naturgesch.* ed. 9, 183 s.; *F. Hamilton*, *Botanique de la Bible* 58-60; *J. Smith*, *Bible Plants* 241-5; *I. Löw*, *Aram. Pflanzennamen* n. 172 et p. 406 n. 44; *P. Schegg*, *Bibl. Archaeol.* 162-5; *W. H. Groser*, *Trees and plants ment. in the Bible* 176-9.

L. FOXCK.

LINUS (Λίνος, al. Λίνος) 2 Tim. 4,21 : salutant te Eubulus et Pudens et Linus et Claudia et fratres omnes. Ex traditione Linus postea erat primus post Petrum episcopus romanus (cf. *S. Iren.* Adv. haer. IV. 3,3; *Euseb.* Hist. eccl. 3,4).

LITHOSTROTOS vide s. v. GABATHA.

LITTERATURA Ps. 70,15 hebr. כִּפְּרֹת : os meum annuntiabit iustitiam tuam, tota die salutare tuum, quoniam

non novi litteraturam; explicant : quia non novi numeros i. e. modos quibus Deus instituit et salutare suum manifestet numerari non posse, excedere humanam cognitionem. Quod LXX (γραμματαις, al. παραγραμματαις) et Vulgata praebent, facile cernitur esse serviliter expressum ex hebr.

LOBNA v. LEBNA.

LOBNI (לֹבְנִי, Λοβενί). 1. Idem ac Lebni (v. s. v.).

2. Filius Moholi filii Merari (1 Par. 6, 29[14]).

LOCULUS. Ioseph mortuus repositus est in loculo בְּאֵרוֹן in arca (Gen. 50,25). Apud Aegyptios corpora mortuorum loculis, arcis, sarcophagis conditi solebant; Iosephum more aegyptiaco aromatibus conditum et in arca clausa esse repositum satis constat Gen. 50,25. Sat multi sarcophagi Aegyptiorum publice iam in musaeis spectantur. Apud Hebraeos vero corpora sepeliebantur in loculis minime inclusa. Efferebantur in feretro iacentia, uti 2 Reg. 3,31 feretrum bene habetur in Vulgata (hebr. בִּרְיָה, בִּרְיָה) et de eiusmodi feretro seu lectica, in qua mortuus iacebat linteo lectus, etiam intellege loculum Luc. 7,14; nam cum Iesus dixisset : adolescens, tibi dico, surge, resedit qui erat mortuus. Atque hodie quoque morem iis in regionibus obtinere dicunt, ut mortui efferantur feretro aperto, lorica ne delabantur circumdato. Cadavera olim non esse loculis inclusa elucet quoque ex 4 Reg. 13,21; nam cadaver in Elisei sepulchrum proiectum tetigit ossa prophetae.

Locus Iohan. 12,6 et 13,29 ponitur idem quod γλωσσόχομον i. e. marsupium, in quo pecunia reconditur.

LOCUSTA. 1. *Nomina*. Locustae in sacris libris sive secundum varias species, sive secundum varios modos nocendi novem nominibus hebraicis designantur, quibus septem latina et sex graeca nomina respondent. In Vulgata sequentia invenimus, quibus hebraicam et graecam expressionem addimus :

1) *Aerugo*, proprie morbus frumenti (v. FRUMENTUM n. 6 supra, col. 317 s.).

in Ps. 77 (78), 46 pro הָסִיל; graece ἐπιστῆς. 2) *Attacus*, solummodo Lev. 11, 22 pro כְּלָעִים, ὁ ἀττάκας. 3) *Bruchus* frequentius pro יִלֵּק, sed etiam pro אֲרֵבָה (Lev. 11, 22) et הָסִיל (2 Par. 6, 28; Is. 33, 4); graece βροχῆος. 4) *Eruca*, proprie aliud animal (germ. *Raupe*, gall. *chenille*), sed loel 1, 4; 2, 23; Am. 4, 9 pro גָּדֹם, ἡ ἀράκη. 5) *Locusta* frequentius pro אֲרֵבָה et gr. ἡ ἀράξ; saepe etiam pro הָנֶבֶז, raro pro גֹּבִי (solum Nah. 3, 17) et גֹּבִי (ib. et Am. 7, 1). 6) *Ophiomachus* in solo textu Lev. 11, 23 pro הָרָגֵל, ὁ ὀφιομάχος. 7) *Rubigo*, propriemorbis frumenti (uredo segetum; v. FRUMENTUM supra, col. 317 s.), designat locustam Deut. 28, 42 pro צָרְעָל et 3 Reg. 8, 37; loel 1, 4 et 2, 23 pro הָסִיל; gr. ἐπιστῆς. — Praeterea occurrit Is. 33, 4 גִּבִּים (a גֵּב = גֹּבִי), quod in Vulgata omittitur.

Quaenam species locustarum singulis nominibus designantur, vix ac ne vix quidem potest determinari; immo aliqua, uti ea quae loel 1, 4 praeter generalem appellationem אֲרֵבָה adhibet, haud improbabiliiter tamquam synonyma poetica pro illo nomine communi considerantur, quae ex vario modo nocendi desumpta sint; scil. videtur designare locustam *abscindentem*, יִלֵּק *lingentem*, הָסִיל *consumentem* (cf. I. Knabenbauer in h. l.).

De nominibus locustarum et aliis eruditissime more suo agit *Sam. Bochart, Hierozoicon* p. II, l. 4, c. 1-8 (ed. Rosenmüller III. 251-340). Cf. praeterea *Sam. Oedmann, Vermischte Sammlungen* II. 76-149; III. 84-90; VI. 74-78; E. F. K. Rosenmüller, *Bibl. Alterth.* IV. 2, 386-418.

2. *Textus Scripturae.* Tria potissimum de locustis in sacris libris commemorantur: 1) Devastant agros comedendo sementem et omnes herbas. Ita Deus propter contumaciam Pharaonis plagam locustarum in terram Aegyptiorum immisit (Ex. 10, 4-13) similemque poenam transgressoribus legis minatur (Deut. 28, 38; cf. 3 Reg. 8, 37; 2 Par. 7, 13; Am.

7, 1). Eiusmodi plagam praesertim describit loel 1, 4-12. Quantam vastitatem locustae efficiant, optima comparatione declaratur: « Quasi hortus voluptatis terra coram eo [antequam venerit] et post eum solitudo deserti » (loel 2, 3). Ideo etiam supplicia in apostatas singulari quodam locustarum symbolo proponuntur (Apoc. 9, 3-11).

2) Ad descriptionem locustae pertinet, quod sunt animalcula parva et despecta, et ita ad rem parvam et contemptibilem declarandam comparatione inserviunt (Num. 13, 34; Is. 40, 22). Ingenti multitudine migrare solent, ita ut quasi nube quadam densa sol obscuratur; unde ad turbam magnam designandam comparatione adhibentur (Iud. 6, 5; 7, 12; Iudith 2, 11; Ier. 46, 23; Nah. 3, 15). Ita vero migrat in turmis suis, ut in Proverbiis merito in exemplum sapientiae adducatur: « Quattuor sunt minima terrae et ipsa sunt sapientiores sapientibus ... Regem locusta non habet et egreditur universa per turmas suas » (Prov. 30, 24. 27). Quod autem Eccl. 12, 5 habetur in descriptione actus senilis « impinguabitur locusta », ex hebraico ita est intellegendum, ut similitudo in motu tardo et gravi inveniatur (locusta moleste se attollit vel ingravescit, scil. prorepens e terra et carens alis; cf. *Gietmann* in h. l.).

3) Etiam in cibum variae locustarum species aptae sunt atque in lege mosaica inter ea genera animalium recensentur, quibus Iudaeis vesci licebat (Lev. 11, 21 s.). Atque S. Ioannes Baptista tali cibo pauperum usus est (Matth. 3, 4; Marc. 1, 6) qui etiam hodie penes quasdam tribus orientales adhibetur. Necantur scilicet locustae et saliantur vel etiam siccatae et in fasciculos collectae servantur et igne leviter tostae vel butyro assatae comeduntur (cf. I. Knabenbauer in Matth. 3, 4).

3. *Variae species locustarum in Palaestina.* Supra quadraginta species palaestinae familiae *Orthoptera*, ad quam pertinent locustae notae sunt, ex quibus communiores et magis noxae sementi et herbis sunt *Acridium lineola*, *Acridium peregrinum* et *Oedipoda migratoria* (Tristram).

Cf. praeter auctores citatos *H. O. Lenz*, Zoologie der alten Griechen und Römer p. 542-546; *L. Lewysohn*, Zoologie des Talmuds p. 285-297; *H. B. Tristram*, Nat. Hist. of the Bible ed. 9 p. 306-318; *H. J. van Lennep*, Bible Lands I. 313-319; *A. Künzler*, Bibl. Naturgesch. ed. 10 p. 159-165; *J. G. Wood*, Bible animals, new ed. p. 596-604; *P. Cultrera*, Fauna bibl. p. 422-429; *G. Loreta*, La zoologia nella Bibbia p. 79-81. 484-496. — De historia naturali locustarum cf. *A. E. Brehm*, Tierleben ed. 3 IX. 586-597. *Ph. L. Martin*, Naturgesch. der Thiere II. 2, 228-230 c. a.

L. FONCK.

LOD (לֹד; ἡ Λῶδ, per fusionem cum nomine sequenti Hadid Ἀδωδῖτ, Ἀδωδῖδ, Neh. 11,34 Ἀδωδῖτ), urbs in Sephela superiore sita, a Samad de tribu Beniamin aedificata (1 Par. 8,12). Urbium Lod, Hadid, Ono viri 725(721) duce Zorobabel e captivitate redierunt (Esdr. 2,33; Neh. 7,37); post captivitatem Lod a Beniaminitis habitabatur (Neh. 11,34). Eadem 1 Mach. 11,34 vocatur Lyda (Λύδα); est una ex tribus toparchiis, quas reges Syriae Demetrius I. et Demetrius II. a Samaria seunctas Iudaeae adiecerunt et Ionathae Machabaeo tradiderunt. Ex Act. 9,32-38 discimus Lydæ fuisse ecclesiam christianorum; ibi S. Petrus Aneam paralyticum miraculo sanavit.

Reliqua urbis fata ex Flavio Iosepho breviter enarramus. A Cassio incolae Lydæ venundati sunt, cum tributa solvere non possent (Ant. XIV. 11,2; Bell. iud. I. 11,1-2), ab Antonio autem libertati redditu (Ant. XIV. 12,2 s.). A Cestio duce romano combusta (Bell. iud. II. 19,1), mox tamen restituta est et inter undecim toparchias Iudaeae recensetur (III. 3,5; IV. 8,1). Erat sedes praecipua scholarum rabbinicarum (*Otho*, Lex. rabb. p. 400; *Lightfoot*, Centur. chorogr. Matthaeo praemissa c. 16). Aetate romana appellabatur Diospolis (urbs Iovis) et hoc nomine frequenter commemoratur in Onom. Eusebii et S. Hieronymi ad situm aliarum urbium determinandum, etsi in ipso catalogo Onomastici locum non habeat. Erat sedes episcopalis; in Actis Conciliorum ambo urbis nomina sine discrimine leguntur et nominibus subscriptis modo

additur: Lyddensis episcopus, modo Diospolititanus. Praevaluit tamen antiquum nomen (sicut etiam Bethsan = Scythopolis = *Beisān* et Accho = Ptolemais = *Akkā*); hodie vocatur *el-Ludd*, vicus vel parva urbs 4000 incolarum, in via quae a Ioppe Ierusalem versus ducit, de qua hodie quoque valet illud Flavii Iosephi: Lydda vicus civitati magnitudine non cedens (Ant. XX. 6,2). Celebris est urbs propter ruinas basilicae S. Georgii, qui ibi natus ac sepultus esse traditur.

Cf. *Retand*, Palaestina p. 877 s.; *Robinson*, Palaestina III. 263 ss.; *id.* Neuere bibl. Forschungen 186; *Guérin*, Judée I. 322-334; *Neubauer*, Géogr. du Talmud p. 76 ss.; *Schürer*, Gesch. des jüd. Volkes ed. 3 II. p. 183. 366; *Survey of West. Pal. Mem.* II. 252. 267; *Buhl*, Alt. Pal. p. 197; *Zanekchia*, La Palestine d'aujourd'hui 1899 I. 94-7.

LODABAR (לֹדָבָר et לֹד דְּבָר; Λοδᾶβαρ, Λωδᾶβαρ), patria Machir filii Amiel, in cuius domo Miphiboseth filius Ionathae filii Saul morabatur, cum David rex eum ad se vocaret eique agros Saul redderet (2 Reg. 9,4-5; 17,27). Fortasse Lodabar est ille terminus Dabir in confinibus Gad et Manasse orientem versus a Mahanaim, de quo s. v. DABIR 3.

LOGOS, Λόγος. Ea voce utitur S. Ioannes ad designandum Filium Dei; ita Ioan. 1,1 ss., pariter in prima epistula: Verbum vitae (1,1) et Apoc. 19,13 vocatur nomen eius: Verbum Dei. Cum S. Ioannes sine ulla explicatione scribat initio libri: in principio erat Verbum ὁ Λόγος, vocem eiusque notionem iis quibus scribit iam notam esse supponit. Quare dubium non est quin S. Ioannes in praedicatione sua solitus sit ea uti voce. Cum autem solus ipse, quantum ex libris Novi Testamenti colligi potest, eam vocem adhibuerit ad Filium Dei designandum, quaeri solet, unde et cur ad eam notionem devenerit. Notio Verbi iam aliquo modo in Veteri Testamento proponitur. Ita creatio rerum refertur ad locutionem Dei (Gen. 1), ita in psalmis quoque: verbo Domini caeli firmati sunt; misit verbum suum et sanavit eos, velociter currit sermo eius (Ps. 32,6; 106,20; 147,15); similiter Is.

53,11. Quibus in locis utique non de verbo Dei tamquam de altera persona divina sermo est neque ex eis haec potest doctrina colligi. Attamen ipso hoc loquendi modo per personificationis figuram ansa praebere potuit, ut doctrina de Filio Dei per quem conditus sit mundus semel proposita ipse Filius Dei nomine Verbi Dei, Verbi, designaretur. Ad quam appellationem etiam eo facilius deveniri poterat, quia apud Iudaeos iam in usu erat plurima quae in sacris litteris Deus facere dicitur adscribere Verbo Domini (Memra, מִימְרָא) et Verbum haud obscure ut personam designare. Ita persaepe in Targum ad Pentateuchum et ad prophetas. Etsi hae paraphrases chaldaicae, uti ad nos perlatae sunt, saeculo tandem tertio vel quarto p. Chr. absolutae sunt, tamen inter omnes constat eas referre antiquiorum temporum sententias et opiniones atque in iis esse consignata quae ex pluribus saeculis a rabbinis docebantur (cf. *Schürer*, I. c. I. p. 130 ss.). Iam in Targum ad Pentateuchum legitur v. g. ad Gen. 3,8. 9 : audierunt vocem Verbi Iahwe Dei et Gen. 9,12 Iahwe loquitur : pactum meum erit inter Verbum meum et vos et Gen. 22,16 Iahwe dicit : iuravi per Verbum meum etc. Qui loquendi modus de Verbo (Memra) eo magis attentione dignus est, quia in Targum alias locutio, mandatum Dei vel verbum quod mittit per prophetas exprimitur non Memra, sed alia voce בְּתַנְכִּיחַ, uti v. g. ad Deut. 18,19 : et erit, vir qui non acceperit mandatum meum (verbum meum, "ב") quod loquitur (propheta) in nomine meo, Verbum meum exquiret ab eo. Quare in aperto est initia quaedam et quasi vestigia eius appellationis iam apud Iudaeos reperiri. Alia est quaestio, siintne haec explicanda tamquam orta ex solo loquendi modo sacrarum litterarum an tamquam ex parte saltem efformata etiam ex iis quae in philosophia alexandrina et praesertim a Philone de Λόγῳ disputantur. De qua quaestione in utramque partem disceptatur. Id unum hoc loco adnotare sufficiat Λόγῳ de quo Philo agit multis nominibus plane diversum

esse a Memra. Nam Philo Λόγῳ explicat virtutem Dei vel rationem divinam operatricem, notionem eam quae omnes notiones in se contineat, vim in qua vires omnes sint conclusae, summam totius mundi spiritualis; eum esse neque ingenitum ut Deum neque genitum ut nos; esse umbram Dei quo quasi instrumento usus Deus mundum effecerit; Λόγῳ porro appellat ipsam notionem spiritus, conscientiam, hominem ad Dei imaginem factum, gratiam caelitus animo infusam, rationem qua bonum ac verum cognoscatur etc. (cf. *Gfrörer*, Philo und die alexandr. Theosophie I. p. 298 ss.; *Zeller*, Philosophie der Griechen III. 2 p. 371; *Schürer* I. c. III. p. 333 ss.). Unde simul etiam magis patet Λόγῳ quem S. Ioannes nobis describit nihil habere commune cum illo Philonis nisi nomen.

Si autem quaeritur, cur eo nomine usus sit S. Ioannes, posset responderi eam appellationem deberi revelationi quae ei facta sit Apoc. 19,13; est enim Apocalypsis conscripta ante evangelium. Sed potest dubitari num eo loco revera revelatio contineatur. Unde dicendum erit eum usum esse eo nomine ut doceret quis tandem esset vere Memra, per quem Deus se manifestaret nobis et ut falsis haereticorum de Λόγῳ opinionibus obviam iret. Nam, ut iam Irenaeus diserte tradit, Ioannes voluit evangelio suo auferre errorem Cerinthi et Nicolaitarum, qui dicant alterum quidem fabricatorem, alterum autem Patrem Domini, et alterum quidem fabricatoris filium, alterum vero de superioribus Christum; et initium quidem esse Monogenem, Logon autem verum filium Unigeniti et creaturam non a Deo factam, sed a virtute quadam valde deorsum subiecta; « omnia igitur talia e medio tollere volens discipulus Domini et regulam veritatis constituere in Ecclesia, quia est unus Deus omnipotens qui per Verbum suum fecit omnia... inchoavit: in principio erat Verbum » (adv. haer. 3,11; *M.* 7,879 ss.).

Veteres Λόγῳ etiam sermonem, rationem transtulerunt (cf. *Tertull.* Prax. 5). Aptissime vero dici Verbum, iam ipsa voce Memra suadet. Intellegi verbum

mentis et oris Dei, ideoque et Sapientiae notionem includi et designari, de qua Prov. 8,22 ss.; Eccli. 1,4-10; 24,8; Sap. 7,22-30 multa praedicantur, simulque commolari notione Verbi mentis, qua ratione generatio Filii sit concipienda, haec aliaque apud theologos explicantur.

I. KNABENBAUER.

LOIS (Λωῖς) laudatur 2 Tim. 1,5 de fide non ficta, quae in ea constanter in fuerit. Erat matrona christiana et avia (μάμμη) Timothei. Atque μάμμην l. e. non adhiberi notione antiquiore matris, sed iuniore aviae patet, quia eo loco statim mentio fit matris Timothei, cui nomen erat Eunice.

LOOMIM, LAOMIM (לֹאִמִּים, Λωομεῖμ), tribus arabica, quae ab Abraham et Cetura originem duxit per Ieetan eiusque filium Dadan (Gen. 25,3 et in Vulgata 4 Par. 1,32). Nominantur una cum Assurim et Latusim (vide s. vv.). Aliquam coniecturam vide in Zeitschr. d. D. Morg. Ges. XX. 1866 p. 175; XXIII. 1869 p. 298.

LOT (לוֹט, Λότ), filius Aran fratris Abram (Gen. 11,27. 31) et, uti ex 11,29 colligunt, frater Sarai. Cf. Gen. 12-19. Simul cum Abram egressus est in Haran primum, inde in Chanaanitiden. Cum haberent utrique plurimos greges essentque frequentes pastorum rixae, Abram Lot optionem concessit, in quam regionis partem mallet ipse solus secedere. Lot, non fide actus sed amoenitate captus arvorum, tractum sibi elegit circa Iordanem moxque in finibus Sodomae sedem fixit. Quare Pentapolitarum etiam cladi implicabatur, abductus a Chodorlahomor cum omni substantia. Sed ab Abram est liberatus. Angelos humana forma adventantes excipiens animum pandit hospitalem. Exiguam vero fidem prodit tardo pede angelos seculi et civitatis parvae tantummodo pro favore a Deo sibi salutem postulans. Eripitur igitur angelis ducebatur de incendio Sodomae. Uxor oculum reflectens in isto portento e vivis tollitur. Filiae vero, quod ab omnibus circum hominibus habendae essent Deo exosae

tanquam Sodomae reliquiae, posteritatis tamen nanciscendae percupidae, patrem inebriant primum ac dein cum ipso coeunt. E quo incestu ortum duxerunt Ammonitae et Moabitae, qui filii Lot dicuntur Deut. 2,9. 19; Ps. 82[83],9. — Cf. etiam Eccli. 16,9; Luc. 17,28 s.; 2 Petr. 2,7.

LOTAN (לוֹטָן, Λοτάν) recensetur primus inter filios Seir Horraei et inter duces seu tribus Horraeorum (Gen. 36, 20. 22. 29; 1 Par. 1,38. 39).

LORICA. Lorica qua usus est Goliath dicitur lorica squamata (lorica קַשְׁשָׁרִים squamarum, LXX ἀλυσισθεῖος ὀδὸς lorica serla, conserta hamis) i. e. lorica cataphractes, squamis aereis vel ferreis conserta, quibus squamis loricae quoque e corio factae muniebantur. Quia lorica Goliath pondus habebat quinque millium siclorum aeris, tota ex aere confecta censi debet (1 Reg. 17,5; de lorica Saul regis qua David uti non poterat, nihil aliud commemoratur v. 38). Achab rex sagitta percussus est quae penetravit inter קַשְׁשָׁרִים et loricaem (hebr. 3 Reg. 22,34; 2 Par. 18,33; LXX ἀνὰ μέσον τοῦ πνεύματος; Vulgata: inter pulmonem et stomachum, inter cervicem et scapulas). Vocem hebr. recentiores plerumque explicant de iunctura, compactura, compagibus; legitur vox etiam Is. 41,7, ubi explicant: dicens de ferrumine (vel de ferruminatione): bonum est. Ibi ergo sagitta percussit regem Achab, ubi lorica vel partes loricae non erant satis bene conferrumatae. De loriceis Aegyptiorum mentio est Jer. 46,4: induite vos loriceis. Loricae Aegyptiorum confectae erant ex corio vel ita ut inter partes corii oblongas insererentur ligamina aenea. Eiusmodi loricas etiam supponere licet 2 Par. 26,14 et Neh. 4,16; Ez. 23,24; 38,4; 1 Mach. 3,3 etc.; de loriceis ferreis mentio fit Apoc. 9,9; de vario loricarum colore Apoc. 9,17. Cum lorica praebat munimentum et tutamen militemque ad hostes vincendos reddat aptum, facile declaratur usus vocis metaphoricus. Ita sensu translato iubemur induere loricae fidei (Eph. 6,14; 1 Thess. 5,8);

Deus quoque tamquam bellator indutus est iustitia ut lorica i. e. sanctitate quasi lorica indutus hostes suos debellabit (Is. 59,17). Glacies quoque quae propter frigus aquae constringuntur dicitur lorica aquarum (Eccli. 43,20 graece ὡς θώραξ ἐνδύσεται τὸ ὕδωρ).

LORUM. Ea voce 3 Reg. 7,29 reditum est in Vulgata hebr. לִרְיָה; verbum hoc hebr. legitur quoque in v. 30. 36; verum ibi interpretes Vulgatae aliter legit. Vocem hebr. explicant de coronis, de corollis pensilibus.

LUCAS (Λουκᾶς, nomen contractum pro *Lucanus*) medicus, neque tamen genere Iudaeus, quod utrumque ex Col. 4,11. 14 elucet. Erat Pauli comes, itinerum socius, adiutor. Prima mentio eius fit, cum Paulus in secundo itinere apostolico Troade versaretur; ibi enim, uti ex modo narrationis Act. 16,9 s. patet, Lucas se ei adiunxit et cum eo in Macedoniam profectus est et Philippis cum eo commorabatur. Ibi a Paulo relictus est. Verum postea, in tertio itinere apostolico Pauli, cum is a Macedonia in Ierusalem proficisceretur, Lucas a Philippis iterum eius erat socius itineris (Act. 20,6-21,18) et in urbe cum ipso erat. Caesareae quoque Paulo adstitit, uti ex Act. 24,23 et 27,2 consequitur et cum eo romanum illud iter instituit, quod adeo perspicue in Act. 27,2 s. describit; Romae quoque eum Paulo captivo non defuisse, patet ex epistulis quas apostolus in priore sua captivitate romana scripsit Col. 4,14 et Philem. v. 24 Lucas enumeratur inter adiutores apostoli. In altera quoque captivitate romana Paulum non reliquit: Lucas est necum solus, scribit apostolus 2 Tim. 4,11. Hisce adde quae ipse de se dicit in prooemio evangelii 1,1-4. Haec sunt quae certo de eo innescunt. Reliqua incerta, quae vide apud *Cornely*, Introd. III. p. 120 s. et *Knabenbauer*, Comm. in Lucam p. 3 s.; ibi quoque probatur Lucam scripsisse evangelium; de Actibus v. *Cornely* l. c. p. 320 s. et *Knabenbauer*, Comm. in Act. p. 1 ss. Eum Pauli socium fuisse satis etiam prodit indole libri evangelici; magna enim intercedit similitudo generis di-

cendi et doctrinae inter eius librum et epistulas paulinas; unde veteres etiam ea consideratione adhibita merito dixisse censendi sunt Lucam scripsisse evangelium quod Paulus praedicasset, Paulum fuisse illuminatorem Lucae (cf. *Iren.* Adv. haer. 3, 1. 14; *Tertull.* c. Marc. 4,2. 5), et recentiores evangelium Lucae « paulinum » nominare solent. Lucam fuisse virum satis eruditum, pariter ex ratione scribendi pura et saepius eleganti conficitur. Si enim scriptorem epistolae ad Hebraeos exceperis, dicere debebis Lucam prae reliquis Novi Testamenti scriptoribus maxime accedere ad modum optimorum scriptorum profanorum et in usu verborum et in constructione sententiarum quae ad syntaxin pertinet (cf. *Noesgen* in *Studien und Kritiken* 1877 p. 477; *Keil*, Commentar p. 172).

LUCERNA. In candelabro aureo septem erant lucernae, i. e. vascula pro oleo et lino, quae vascula ponebantur in summa parte scapi et sex calamorum candelabri (cf. Ex. 25,31. 32. 37). Lucernae istae quovis mane debebant purgari (Ex. 30,7) et quovis vespere oleo de arboribus olivarum purissimo impleri, ut usque mane luceant coram Domino (Ex. 27,20. 21; 30,7; Lev. 24,1-4) et 2 Par. 13,11 lucernas vespere accendi dicitur. Unde certum est lucernas fuisse accensas per noctem. Utrum per diem quoque necne, non clare dicitur. Potest fortasse inde concludi quod sacerdotes quovis mane debebant lucernas purgare (hebr. bonas facere); et cum sacerdotes etiam interdum in aliquibus sacrificiis ingredi deberent sanctum ibique sanguinem aspergere contra velum sanctuarii et ponere de eo super cornua altaris thymiamatis (Lev. 4,6. 7. 17. 18), certe sanctum luce carere non potuit. Unde per diem quoque lucernas fuisse accensas probabile est. Atque Iosephus quidem refert tres lucernas super sacrum candelabrum Deo lucere debuisse tota die, reliquas sub vesperam esse accensas (Ant. III. 8,3). Quomodo collocandae sint exponitur Num. 8,2; quomodo candelabrum cum lucernis debeat transpor-

tari, praecipitur Num. 4,9. Aureas lucernas pro candelabris decem Salomon quoque fecit (3 Reg. 7,49; 2 Par. 4,20) pro quibus David iam aurum paraverat (1 Par. 28,15). Inter peccata maiorum etiam enumeratur quod extinxerunt lucernas (2 Par. 29,7). In honorem quoque idolorum multas accendi lucernas dicitur in epistula quam Ieremias ad captivos misit (Bar. 6,18). Cum tempore Machabaeorum cultus Dei iterum instauraretur, lucernas esse accensas inter alia commemoratur (1 Mach. 4,50; 2 Mach. 1,8; 10,3).

Ex luce lucernae facile sequitur usus vocis translatus; ita lex Dei dicitur lucerna pedibus nostris (Ps. 118,105), cum lege Domini qua ratione vita sit instituenda doceatur i. e. ex modo loquendi S. Scripturae, qua ratione sit ambulandum coram Domino. Uti lux symbolum est felicitatis, ita lucerna quoque quatenus scil. luce sua eam felicitatem effundere ac significare concipitur; ita Iob 29,3 prosperitatem suam pristinam quam Deus largitus erat describit: splendebat lucerna eius (Dei) super caput meum et ad lumen eius ambulabam; et ad res adversas designandas: quoties lucerna impiorum exstinguetur (Iob 21,17; cf. 18,6); quare Deus compellatur largitor bonorum: tu illuminas lucernam meam (Ps. 17,29) et: tu lucerna mea Domine (2 Reg. 22,29). Etiam hominis vita et intellectus dicitur lucerna Domini i. e. donum Dei et magnum pro homine beneficium (Prov. 20,27); cum impii felicitatem quaerant in peccatis, dicitur: lucerna impiorum peccatum (Prov. 21,4). Cum itaque lux et lucerna lucens prosperitatem significet et vitam felicem, eadem metaphora etiam vita felix ac perdurans alicuius stirpis vel familiae exprimitur. Ita saepius dicitur: ut remaneat lucerna David, dedit ei Dominus lucernam in Ierusalem, ut daret illi (Davidi) lucernam etc. i. e. Deus posteros David non regno privavit, sed domum et familiam eius conservatam voluit; cf. 3 Reg. 11,36; 15,4; 4 Reg. 8,19 etc.; e contrario lucerna impiorum exstinguitur etiam ita, ut genus eorum et familia deleatur; cf. Prov. 13,9; 20,24,20.

Lucernae vel lampades usui domestico inservientes in S. Scriptura non describuntur. Herodotus lampades in Aegypto usitatas describit (Hist. 2,62): « Cum in Sain oppidum sollemnis sacrificii causa conveniunt, certa quadam nocte lucernas accendunt omnes sub dio circum domos suas. Sunt autem hae lucernae vascula sale repleta et oleo; superne est ellychnium, quod per totam noctem ardet; appellantque festum illud Accensionem lucernarum. Alii autem Aegyptii, qui conventui non intersunt, observantes noctem sacrificii lucernas et ipsi accendunt omnes; ita fit ut non solum in Sai oppido, sed per totam Aegyptum lucernae ardeant ». Ab ea autem forma, quam Herodotus his verbis describit, non multum differunt lampades antiquissimae Christianorum in Palaestina ac Syria repertae et ex terra colla confectae.

Cf. *Pal. Expl. Fund.* Quart. Stat. 1893 p. 14; *Bliss.* Mound of Many Cities p. 87; *Clermont-Ganneau* in *Revue bibl.* VII. 1898 p. 484-490; *idem*, *Recueil d'Archéologie orientale* I. p. 171; II. p. 89-91.

LUCIFER v. STELLAE.

LUCIUS. 1. Lucius consul Romanorum (Λεύκιος ἑπάρχος Ῥωμαίων), qui epistulam ex senatusconsulto regibus et regionibus in favorem Iudaeorum mittendam scripto exaravit illisque communicandam curavit (1 Mach. 15,16; cf. 14,24; 15,13-24). Circa tempus istius magni conventus sacerdotum populi que Iudaici, quo Simon declaratus est summus sacerdos, dux et princeps Iudaeorum (v. SIMON 3), is legatos duce Numenio Romam misit, qui foedus, quod iam Iudas Mach. cum Romanis pepigerat, renovarent. Senatus integritatem territorii Iudaici a Romanis protectum iri promisit et epistulam in favorem Iudaeorum transmisit Ptolemaeo VII. (Physcon) regi Aegypti, Demetrio II. regi Syriae, Attalo regi Pergami, Ariarathi regi Cappadociae, Arsaci regi Parthiae et praeterea multis minoribus civitatibus et insulis Graeciae et Asiae minoris. Quam accurate enumeratio harum civitatum cum historia istius temporis concordet, ex eo elucet quod historio-

graphi aliunde confirmant singulas illas civitates minores illo tempore neque Romanis neque regibus Aegypti, Syriae, Pergami, Cappadociae, Parthiae subiectas fuisse; cf. *Marquardt*, Römische Staatsverwaltung I. ed. 2, 1881, p. 333 ss. et alibi; *Brandis* apud *Pauly-Wissowa*, Real-Encycl. d. klass. Altert. II. 1340 s. (s. v. Asia). Legati Iudaeorum Roma redierunt anno 174 aer. Seleuc. seu 139/138 a. Chr. (1 Mach. 15,10. 15). Senatusconsultum igitur anno 139 a. Chr. adscribendum est. Iam vero illo anno alter consulum erat L. Calpurnius Piso, cui nomen praefixum erat *Lucius*, non vero *Cneius*, ut genuina lectio apud *Valerium Maximum* I. 3,2 evincit. Cf. *Schürer*, Gesch. des jüd. Volkes ed. 3, I. p. 250 ss., qui varia, quae a recentioribus de Lucio consule scripta sunt, recenset.

Praeter hanc explicationem *Schürer* I. c. aliam opinionem exponit idem esse senatusconsultum, quod Flavius Iosephus (Ant. XIV. 8,5) refert, sed tempori Hyrcani II. (63-40 a. Chr.) adscribit: « Lucius Valerius Lucii filius Praetor retulit ad senatum idibus Decembribus etc. »; multi recentiores putant, quae Iosephus narrat de tempore Hyrcani, referenda esse ad tempus Simonis Machabaei et Lucium consulem in textum irrepsisse pro Lucio Valerio praetore; quae corruptio tituli facile fieri poterat, quoniam epistula Lucii primum in textum hebraicum 1 Mach. ac deinde ex hebraico in nostrum textum graecum vertenda erat. Fundamentum autem huius opinionis in eo cernitur, quod eadem fere narrantur apud Iosephum I. c. quae 1 Mach. 14,24 et 15,15-24: legati Iudaeorum, quorum unus erat Numenius, Romam veniunt, clypeum aureum dono offerunt, foedus renovari petunt, litteras a senatu accipiunt ad reges et liberas civitates, ut Iudaeorum securitati provideatur.

Quidquid est de hac altera opinione, in utraque nomen Lucii (consulis vel praetoris) ex documentis historicis eruitur et ad interpretationem 1 Mach. 15,16 inservit. Facilius tamen et probabilior nobis videtur prior explicatio in textu nostro designari Lucium Cal-

purnium Pisonem consulem anni 139.

2. Lucius (Λούκιος) Cyrenensis recensetur inter prophetas et doctores ecclesiae antiochenae Act. 13,1. Idem fortasse est ac Lucius cognatus et socius S. Pauli (Rom. 16,21), sed hoc certo affirmari nequit. Fuerunt qui Lucium et S. Lucam eundem esse putarent (*Origenes*, *Wetzstein* et alii), sed perperam; etenim neque S. Lucas Act. 13,1 semetipsum inter prophetas et doctores nominasse censendus est neque S. Paulus eundem modo Lucium modo Lucam appellasset. In Constit. Apost. VII. 46,2 legimus Lucium a S. Paulo institutum esse episcopum Cenchreorum.

LUCTUS. Uti natura comparatum, ut gaudium signis externis, in facie, in habitu totius corporis, in tripudio, in vocibus exultationis, in ornatu, in convivii etc. prodatur et manifestetur, ita plurima quoque documenta luctus et dolor habet eaque praepimis apud orientales. Quemadmodum κόπτεσθαι, plangere apud Graecos et Latinos ipsa notione vocis luctum tunsione quadam exprimi et declarari ostendit, ita apud Hebraeos quoque לָעַד eandem prae se ferre notionem tunsionis videtur, uti colligi potest Is. 32,12: super ubera plangite. Maxima luctus signa edebantur, cum quis ex familia mortuus esset. Voces lamentationis et eiulationes audiebantur, lamentatrices advocabantur, naeniae canebantur (cf. 3 Reg. 13,30: heu, heu, mi frater; Ier. 22,18 vae domine, vae inclyte; 34,5), ad quas libicines acceperantur (Matth. 9,23); vestes scindebantur i. e. in superiore parte vestimenti scissura fiebat; ieiunia quoque ad luctum demonstrandum inserviebant (cf. 2 Reg. 1,11; 13,31; 12,16), quare dicitur lugenti panem esse frangendum ad consolationem (Ier. 16,7) et: date sicram moerentibus et vinum his qui amaro sunt animo (Prov. 31,6) et propheta monet: decalvare et tondere super filios deliciarum tuarum, dilata calvitium tuum (Mich. 1,16); pectus tundebatur, femora percutiebantur, manus super caput ponebantur, vultus obvelabatur; humi sedebant, cinere, pulvere capita spargebant, sacco, ciliciis se induebant

(cf. 2 Reg. 3,31; 13,19; 15,30; Is. 20,2; 61,3; Ier. 30,6; 31,19; Lam. 1,17; 2,10; Ez. 24,17. 22. 23; Am. 8,10; Ion. 3,7; 1 Mach. 2,14 etc.). Ita Thamar iniuriam passa quattuor signa luctus et doloris prodit, aspergens capiti suo cinerem, scissa talari tunica, impositisque manibus super caput suum ibat ingrediens et clamans (2 Reg. 13,19 et vide Gen. 37,38; 44,13; Lev. 10,6; Num. 14,6; Iud. 11,35; Is. 47,1; Ier. 2,37 etc.). Quemadmodum flelibus, lamentationibus, ululatu (cf. Num. 14,1; Ps. 6,7; Os. 7,14) aliquod quasi levamen doloris et luctus simul cum eius manifestatione vehementi externa capi solet, ita cetera quoque signa et documenta apta sunt ad animi affectionem demonstrandam, et ipsa demonstratione fit, ut facilis luctus et dolor ferri possit; exhalatur enim quasi luctus et ex afflicto pectore effunditur in illa exteriora. Et natura fere duce, qui se sentit tristem et deiectum, habitum quoque externum tristem et deiectionem seligit. Unde explicata : caput cinere conspergere, sordidis indui vestibus, humi sedere, in pulvere iacere etc. (cf. Ios. 7,6; 1 Reg. 4,12; Iob 2,12; Ier. 6,26; Ez. 27,30 etc.). Modi aliqui apud gentiles usitati Iudaeis interdicebantur; ita Lev. 19,28 : et super mortuo non incidetis carnem vestram neque figuras aliquas aut stigmata facietis vobis (hebr. scripturam inustam, LXX γράμματα στίγματα); quae tamen quandoque facta esse, indicari videtur Ier. 16,6 : et moriuntur grandes et parvi in terra ista; non sepelientur neque plangentur et non se incident neque calvitium fiet pro eis i. e. ad summam miseriam declarandam dicitur mortuis ne consueti quidem luctus documenta praeberi posse (cf. Ez. 24,22-24). Sacerdotibus quoque interdicitur : non radent caput nec barbam, neque in carnibus suis faciant incisuras; et pontifici praeterea praescribitur : caput suum non discooperiet, vestimenta non scindet (Lev. 21,5. 10; cf. 10,6; Ez. 44,20).

Tempus luctus pro mortuo erat dierum septem (Gen. 50,10; Eccli. 22,13; Judith 16,29); post mortem autem Aaronis et Moysis instituebatur per dies triginta (Num. 20,30; Deut. 34,8). Dici-

tur quidem Eccli. 22,10 super mortuum plora (cf. 38,16), sed simul praecipitur, ne luctus fiat nimius : modicum plora supra mortuum (22,11), multos enim occidit tristitia et non est utilitas in illa (30,25; 38,21); saeculi quippe tristitia mortem operatur (2 Cor. 7,10) et Thessalonicenses docet apostolus, « ut non contristemini (de mortuis) sicut et ceteri qui spem non habent » (1 Thess. 4,12).

Ceterum omnino commendatur ut vicem luctumque aliorum doleamus; ita Iob se dicit moerentium consolatorem (29,25) et Eccli. 7,38 : non desis plorantibus in consolatione et cum lugentibus ambula et apostolus vult nos flere cum flentibus (Rom. 12,15). Christus immo lugentes et fientes dicit beatos, quia consolationem et gaudium obtinebunt (Matth. 5,5; Luc. 6,21); lugentes scil. eos dicit, de quibus Is. 61,2 et Soph. 3,18 (hebr.), lugentes propter aerumnas populo Dei illatas et gementes super cunctis abominationibus quae fiunt, uti Ez. 9,4 dicitur, lugentes propter huius vitae pericula, tentationes, lugentes amore et desiderio caelestium, a quibus cum absint tristitia quadam sancta afficiuntur; hic scil. est gemitus sanctorum : cupio dissolvi et esse cum Christo; prae quo desiderio illis terra evadit tristis et gravis.

LUCUS. Uti iam apud LXX **אַשְׁרָה** etc. redditur **ἄσκη**, ita S. Hieronymus quoque vocem expressit. Ashera explicatur felix, fortunam afferens, ergo dea Fortuna, si scil. vocem ex hebraco derivare et interpretari licet. Dubium non est quin Ashera in aliquibus locis tamquam dea et socia Baal designetur. Ita si sermo est de quadringentis prophetis eius (lucorum, Vulg. 3 Reg. 18,19), de suppellectile sacra eius (vasa facta in luo, Vulg. 4 Reg. 23,4), si dicitur servire ei (servire lucis, 2 Par. 34,18). Item ubi sermo est de simulacro eius (idolum luci, 4 Reg. 21,3) et 3 Reg. 15,13 et 2 Par. 15,16, quibus locis Maacha fecisse dicitur in hebr. simulacrum abominabile pro Ashera (**אַשְׁרָה**). Si itaque iis in locis Ashera deam dicit, tamen in plerisque nomen adhibetur pro eius symbolo. Quale id fuerit, colligi potest

ex eo quod dicitur plantare asheram (lucum, Vulg.) Deut. 16,21; statuere העמיד 2 Par. 33,19; aedificare בנה 3 Reg. 14,23; erigere vel ponere נצב 4 Reg. 17,10; facere עשה 3 Reg. 14,15; 16,33; 21,3; 4 Reg. 17,16; 2 Par. 33,3. Deinde destructio asherae exprimitur verbis : succidere גזע Deut. 7,5; 2 Par. 31,1; excindere כרת Ex. 34,13; Iud. 6,28; 4 Reg. 18,4; 23,4; comburere שרף Deut. 12,3; 4 Reg. 13,13; similiter בער 2 Par. 19,3; conterere et comminuere, confringere כרת 2 Par. 34,7; שבר, שבר 2 Par. 34,4; extirpare נתש Mich. 5,13. Iam ex hisce facile colligitur veteres, cum ἀλγη, lucum, lucos interpretarentur, haud multum a vero recessisse. Utique non possumus ubique intellegere lucum, verum saepius solum arborem vel palum tamquam symbolum in eius honorem erectum. Atque ea notione quandoque videtur S. Hieronymus etiam *lucum* accepisse; nam 4 Reg. 23,6 legimus : et efferri fecit lucum de domo Domini foras Ierusalem. Ashera, assyriace Asrat, quae vox signum divinitatis prae se fert, etiam legitur in inscriptione assyriaca ex saeculo 15 a. Chr.; quare quod multi negabant Asheram esse deae nomen, iam ex ipsis monumentis refutatur; neque opus est dubitare quin Ashera et Astarle unum idemque numen dicant; de qua re cf. *Schrader* in *Zeitschrift für Assyriologie* 1888 p. 362-364. Simul cum Baal cultus Asherae exercebatur impudicitis satis refertus, id quod 3 Reg. 14,23; 15,12-14; 4 Reg. 23,7 (hebr.) indicatur; quare S. Hieronymus sensum rite reddidit loquens de sacris Priapi et de simulacro turpissimo et de luo eius et de simulacro Priapi (3 Reg. 15,13; 2 Par. 15,16; vide *Knabenbauer*, *Comm.* in *Proph. min.* I. p. 451).

LUD (לוד, Λούδα), gens semitica Gen. 10,22; 1 Par. 1,17; plerique Lydos intellegunt. Secundum Herodotum Lydi gloriabantur regibus ex Belo, deo Assyriorum, prognatis (1,7); Lydorum sacra semitica esse asserit *Lenormant* (Bérose, p. 146 ss.). Ceterum vide *F. de Hummelauer*, *Comm.* in *Genesis* p. 330.

LUDIM (לודים, Λουδιμ), 1 Par. 1,41 cod. A Λουδιμ), gens chamitica a Mes-

rain descendens (Gen. 10,13; 1 Par. 1,41). Ludim esse eodem atque in monumentis hieroglyphicis *Rutu* seu *Ludu* i. e. homines מצר' ἱερογλφ, ipsos Aegyptios defendit *G. Ebers*, *Aegypten* u. d. *Bücher* Mose's 1868 p. 93. 94.

LUITH (לוית, Λουιθ), ascensus quidam in Moab (Is. 15,5; Ier. 48,5). Secundum *Onomasticon* (*ed. Lag.* 276,43; 136,23) « est usque hodie vicus inter Areopolin et Zoaram » i. e. inter Ar Moab seu Rabbath Moab et Segor.

LUMBARE (לִמְבָר, λυμβαρε), Ier. 13,1 ss.; iubetur vates per aliquod tempus lumbare lineum portare; dein illud abscondere ad Euphraten in foramine petrae, ubi computrescit; sic quippe Deus putrescere faciet superbiam populi. Quid actione ea symbolica praefigetur, facile patet. In ipso lumbari exprimitur quam arte Deus populum sibi adiunxerit : sicut enim adhaeret lumbare ad lumbos viri, sic agglutinavi mihi omnem domum Israel et omnem domum Iuda, ut essent mihi in populum et in nomen et in laudem et in gloriam (13,11). Verum populus iniquitate et defectione quasi computruit; quare in exilium ad Euphraten i. e. in Babyloniam abducetur, uti Ieremias lumbare sordidum abscondere iubetur in foramine petrae ad Euphraten. Cum orientalibus cingulum sit inter praecipua ornamenta, symbolum hoc omnino aptum est, ut ostendatur quo loco Deus populum suum habere voluerit, dummodo dicto audiens fuisset.

LUMEN, LUX. Ut tenebrae notione translata dicuntur de rebus adversis, de ignorantia, de peccatis, ita lumen de felicitate, cognitione, sanctitate. Quare Deus qui summe est beatus, omniscius, sanctissimus, dicitur lucem inhabitare inaccessibilem (1 Tim. 6,16), et : Deus est lux et tenebrae in eo non sunt ullae (1 Ioan. 1,5); ita Iesus Christus, qui beatitudinem, cognitionem rerum divinarum, sanctitatem mundo affert, dicit : ego sum lux mundi (Ioan. 8,12) et haec lux in tenebris lucet et tenebrae eam non comprehenderunt (Ioan. 1,5; 3,19). Vel lux proponitur ad maiestatem Dei decla-

randam veluti vestimentum eius : amictus lumine sicut vestimento (Ps. 103,2); et cum Deus sit lux et lumine quasi vestiatur, etiam sapientia ab eo procedens describitur tamquam emanatio claritatis eius et candor lucis aeternae (Sap. 7,23. 26), quare Deus quoque pater luminum vocatur (Iac. 1,17), et uti Ps. 33,10 : in lumine tuo videbimus lumen i. e. in benigno Dei favore quo mentes nostras illuminat nobisque prosperitatem concedit nos fruemur felicitate; quare beati dicuntur qui in lumine vultus Dei ambulant i. e. eius favore et illustratione potiuntur. Si angelus lucis opponitur satanae (2 Cor. 11,14), lucis nomine sanctitas intellegitur, qua angelus lucis salutaria homines docet. Ad illuminationem intellectus refertur, si verbum Domini vocatur lumen semitis meis (Ps. 118, 103); item si monemur : diligite lumen sapientiae (Sap. 6,23); item si fides luci comparatur : Deus qui dixit de tenebris lucem splendescere, ipse illuxit in cordibus nostris ad illuminationem scientiae claritatis Dei (2 Cor. 4,6); et fideles dicuntur illuminati (Hebr. 6,4), dicuntur lux in Domino, filii lucis (Eph. 5,8; 1 Thess. 5,5), quatenus quae fide didicerint etiam moribus exprimere debent, proinde ut filii lucis, in cognitione et sanctitate, ambulare debent et uti armis lucis (Rom. 13,12), fide scil. et sanctitate vitae obsistendum est hostibus salutis; unde fructus lucis (fidei scil.) est in omni bonitate et iustitia et veritate (Eph. 5,9). Iudaei cum habeant veram Dei cognitionem se iactant « lumen eorum qui in tenebris sunt » (Rom. 2,19) et apostolus suam ad gentes missionem ita describit, ut convertantur a tenebris ad lucem, et de potestate satanae ad Deum, ut accipiant remissionem peccatorum (Act. 26,18) et S. Petrus eodem modo dicit fideles vocatos esse de tenebris in admirabile lumen Dei, in lumen scil. quod Deus auctor misit, largitur, quo suos beat; quare esse in luce idem est atque constitutum esse in vera fide, in Dei gratia et favore (cf. 1 Ioan. 2,9). — Alias lux solum prosperitatem designat, uti Iob 18,5 nonne lux impii exstinguetur; v. 18 expellet eum de luce in tenebras, 36,26 praestolabar

lucem et eruperunt tenebrae. Ceterum vide s. v. LUCERNA.

LUNA, luminare minus, quod praest nocti (Gen. 1,16); a luna signum diei festi (Eccli. 43,7), quia initium mensis determinatur novilunio, quare omnes dies festi paschatis, pentecostes, tabernaculorum ad lunam referri possunt; unde Ps. 103,19 : fecit lunam in tempora. Inter opera Dei quae hominis admirationem et laudem provocant luna quoque reputatur (Ps. 18,4; 135,9), a qua etiam comparatio pulchritudinis inferitur : pulchra ut luna (Cant. 6,9) est sponsa et Simon, sacerdos magnus, inter alia laudatur : quasi luna plena in diebus suis lucescit (Eccli. 50,6). Quod dicitur Ps. 120,6 : per diem sol non uret te neque luna per noctem, intellegi potest vel de frigore, quod noctu nubibus remotis acrius esse solet, vel ex opinione populari de noxio quodam lunae fulgentis in homines effectu. Ad prius vide Gen. 31,40 : diu noctuque aestu urebar et gelu. Simul cum sole et militia caeli luna quoque cultu idololatrico ne colatur praecipitur (cf. Deut. 4,19; 17,3), a quo cultu Iob proficitur sese servasse immunem 31,26; sed Iudaei eum saepe exercebant (4 Reg. 23,5; Ier. 8,2) et probabiliter quoties de cultu reginae caeli sermo est, luna tamquam symbolum deae (Astarthes) intellegi potest. In annuntiatione iudicii Dei universalis signa in luna quoque fieri exhibetur Is. 13,10; 24,23; Ez. 32,7; Ioa. 2,10. 31; Matth. 24,29; Marc. 13,24; Act. 2,20, quibus luna obscurari, non dare lumen, erubescere, in sanguinem converti dicitur. Verum si creatura liberabitur a servitute corruptionis tempore gloriae filiorum Dei (Rom. 8,21), tum luna quoque splendidior evadet : erit lux lunae sicut lux solis (Is. 30,26); cum enim natura nobis insitum sit, ut gloriam Dei et beatorum immensa quadam lucis et splendoris claritate nobis mente effingamus, aptior modus quo creaturae glorificatio oculis subiiciatur excogitari nequit quam quem hoc loco adhiberi videmus, ut scil. lumine multoties aucto tota creatura caelesti quodam splendore vestita ac sublimiore

gloria praedita repraesentetur (*Knabenbauer* ad Is. 1. c.). Neque cum eo Isaiae loco pugnat (quod aliqui opinantur) 60, 49: nec splendor lunae illuminabit te, sed erit tibi Dominus in lucem; nam hic solum comparatione effertur, quanta luminis ac gloriae abundantia Dominus oriturus sit super Ierusalem, tanta scil. ut sol et luna quasi evanescere neque iam splendere videantur, cum eorum splendor longissime superetur atque adeo absorbeatur splendore Domini gloriae (cf. Apoc. 21,3).

Quia luna varias vicissitudines obire epicientibus videatur, etiam inconstantiae quasi symbolum proponitur: homo sanctus in sapientia manet sicut sol, nam stultus sicut luna mutatur Eccli. 27,12.

LUNATICUS (σεληνιαζόμενος Matth. 4,24; 17,14), is qui morbo comitiali, epilepsi, laborat, qui morbus luna crescente augeri putatur, ita ut quadam etiam mentis abalienatione vel furore homo agitur. Puer ille (Matth. 17,14) non solum morbo illo erat affectus qui luna crescente maiore vi erumpere et ita quasi a luna regi videbatur, verum etiam a daemone muto erat possessus (cf. Marc. 9,16).

LUNULA. Inter ornamenta mulierum Is. 3,18 שֵׁהָרָגִים, ὀφειλίσκοι, lunulae recensentur. Erant genus ornamenti circa collum forma lunari, vel figura falcata ad formam lunae crescentis seu cornutae, uti aliqui volunt. Eadem vox hebr. etiam legitur Iud. 8,21 (*bullas* ibi vertit Vulgata, LXX autem ὀφειλίσκους), ubi ornamentum collo camelorum apensum nominatur.

LUPANAR; ita vertit S. Hieronymus Num. 25,8 קִבְּהָ, secundum sensum; eam vocem explicant de tabernaculo, cubili, vel quovis aedificio camerato, de fornice, tholo. Eodem modo vertit Ez. 16,24. 31. 39 גִּבְּהָ, LXX pariter οὐρανός, πορνείον; notio catenus e re est quia idololatria tamquam fornicatio et adulterium consideratur. Ceterum significatio vocis alias est gibbus, dorsum, et in membro parallelo habetur רִמְהָ; quare proprie dici videtur excelsum, vel

altare erectum ad idololatriam. Quod in Vulgata legitur 2 Mach. 4,12: ausus est (Iason) optimos quosque epheborum in lupanaribus ponere, graece habetur ὑποτάσσων ὑπὸ πέτασον ἦγεν; petasus pileus est latos habens margines, quo pileorum genere ephebi uti solebant; unde explicant Iasonem iuvenes ex disciplina et moribus Graecorum educandos et instituendos curasse.

LUPUS hebraice dicitur לֹבִי' et graece λύκος; neque de significatione nominis semiticis linguis communis ullum dubium haberi potest. Nomine scientifico *Canis lupus* L. audit et in tota Palaestina etiam hodie invenitur.

In sacris libris maxime in variis comparationibus memoratur, ex quibus eius indoles ad vivum depicta elucet. Ita imprimis ovibus prae ceteris inimicus exhibetur (Eccli. 43,24; Matth. 10,16; Luc. 10,3; Io. 10,12); quare in imaginem summae pacis dicitur habitare cum agno (Is. 11,6) et pasci simul cum agno (Is. 65,25). Cum natura sua sit rapax et violentus, viri audaces et turbulenti nomine lupi designantur (Gen. 49,27 Benjamin, lupus rapax). Interdiu latens in fruteto vel inter saxa, vespere fame rabidus ad praedam capiendam egreditur; unde lupus ad vesperam, lupi vespertini dicuntur comparatione de magno hostium impetu (Ier. 5,6; Hab. 1,8; Soph. 3,3). Etiam insidiatore et persecutore (Matth. 10,16) ac falsi prophetae (Matth. 7,15; Act. 20,29) lupis comparantur.

Cf. *Sam. Bochart*, Hierozoicon p. II. l. 3, c. 10 (ed. *Rosenmüller* II. 150-163); *Sam. Oedmann*, Vermischte Sammlungen V. 11-20; *H. O. Lenz*, Zoologie der alten Griechen und Römer p. 109-116; *L. Lewysohn*, Zoologie des Talmuds p. 81 s.; *H. B. Tristram*, Nat. Hist. of the Bible ed. 9 p. 152-155; *R. Hartmann* in Zeitschrift für Ethnol. III. 1871, 231-235; *W. Houghton* in Transact. Soc. Bibl. Arch. V. 1877, 328; *Wilkinson-Birch*, Manners and customs II. 96 s. III. 276-279; *P. Cullera*, Fauna bibl. p. 203-7; *J. G. Wood*, Bible animals, new ed. p. 50-55.

L. FONCK.

LUSTRATIONIS AQUA vocatur in Vulgata aqua peccati Num. 8,7 i. e. aqua ad auferendum peccatum et Num.

19,20 aqua immunditiei i. e. ad tollendam immunditiam. Quomodo prior aqua sit ad usum illum sacrata nescitur, quia eo solum loco reperitur nomen. Putant quandoque esse aquam ex labro aeneo (Ex. 30,18) haustam; alii esse aquam modo simili, uti Lev. 14,5, sacram. Altera aqua, quae in Vulgata etiam aqua aspersiois, expiationis dicitur (Num. 19,9. 13 כִּי נִדָּה) quomodo conficienda sit ad usum illum sacrum describitur Num. 19,1-9.

LUTER. Ea voce designatur in Vulgata 3 Reg. 7,26; 4 Reg. 16,17 mare aeneum (vide s. v.). Sed luterus 3 Reg. 7,38. 43 seu conchae 2 Par. 4,6. 16 erant lavaera aenea quina ad utrumque altaris latus posita, quorum quodvis 40 bath capiebat et quattuor cubita dimetiebatur; in iis lavabantur omnia quae in holocaustum oblaturi erant. Haec lavaera insidebant totidem basibus aeneis. Haec bases quadratae erant, longae lataeque quattuor cubita, tria altae, quarum latera figuris leonum, iumentorum, cherubim et serpentibus erant exornata. Basibus suppositae erant rotae quaternae altitudinis cubiti et semis, ut scil. lavaera moveri facile possent quo opus esset (3 Reg. 7,27 ss.).

LUZA. 1. Nomen primitivum urbis Bethel; v. BETHIEL in vol. 1. col. 638-641.

2. Luza (לִּזָּה, Λουζά), urbs in terra Iethim, quam aedificavit ille vir, qui Israelitis introitum in Bethel (Luza) ostenderat ab iisque incolumis dimissus est (Iud. 1,26).

LYCAONIA (Λυκαονία), regio Asiae minoris a Tauro monte septemtrionem versus inter Ciliciam, Pisidiam, Phrygiam, Galatiam, Cappadociam sita (Act. 14,6 s.). Urbes praecipuae erant Lystra, Derbe, Iconium (vide s. vv.). De dialecto lycaonica (Act. 14,10) nihil constat; Lassen (Zeitschr. d. D. Morg. Ges. X. 1856 p. 378 ss.) eam censet similem linguae Cappadocum, quam ad indogermanicam familiam, maxime ad partem iranicae pertinere opinatur.

Secundum Strabonem XII. 6,1 « Lycaonum planities montanae sunt frigidae et nudaе et asinis silvestribus com-

pascuae; aquarum ibi magna penuria atque ubi invenitur aqua, profundissimi omnium sunt putei.... et tamen ista regio, quantumvis aqua carens, mirum in modum oves nutrit lanæ asperae, e quibus quidam amplissimas sunt consenti opes; et Amyntas ultra trecentos greges iis in locis habuit »; et 6,2 « Lycaoniae etiam est Isaurica regio ad ipsum Taurum ». Anno 36 a. Chr. Lycaonia a Marco Antonio data est Amyntae ultimo regi Galatiae (Dio Cass. 49,32; 51,3), quo mortuo provinciae romanae Galatiae attributa est (Dio Cass. 53,26) anno 25 a. Chr.

LYCIA (Λυκία), regio Asiae minoris, peninsula montana, quae inter Pamphiliam et Cariam in mare Mediterraneum procurrit. Recensetur inter regiones, quibus ex senatusconsulto missa est epistula Lucii consulis in favorem Iudaeorum 1 Mach. 15,23; quo loco etiam Phaselis (v. s. v.) urbs Lyciae memoratur. S. Paulus ex tertio itinere apostolico rediens Pataram et fortasse etiam Myram, urbes Lyciae, attingit (cf. Act. 21, 1); in itinere romano Myrae ex navi adrumetina in navem alexandrinam conscendit (Act. 27,5; pro Lystra legi oportet Myra); v. MYRA et PATARA.

LYDA, LYDDA v. LOD.

LYDI, LYDII. 1. Lydii (לִּיִּי, Ἀδύοι) recensentur Ier. 46,9 in exercitu aegyptiaco ut milites arripientes et iacientes sagittas (hebr. arripientes [et] calcantes arenam). Cum eo loco agatur de copiis auxiliaribus e variis regionibus accessitis, Lydii non erunt gens chammica Ludim (Gen. 10,13; 1 Par. 1,11) seu ipsi Aegyptii (v. LUDIM), sed Lydi asiani; idque eo probabilius est, quia Nechao rex Aegypti multum adhibuit milites conducticios alienigenas (cf. A. Wiedemann, Aegypt. Gesch. p. 625). Idem dicendum erit de Lydiis Ez. 27,10, de Lydis Ez. 30,5, de Lydia Is. 66,19 (hebr. his locis לִיִּי, LXX Ἀδύοι, Is. 66,19 Ἀδύοι). Lydi autem asiani a plerisque censentur esse gens semitica Lud Gen. 10, 22; 1 Par. 1,17.

2. Lydi (Ἀδύα) 1 Mach. 8,8. Designatur Lydia, provincia Asiae minoris ad

mare Aegaeum inter Cariam, Phrygiam et Mysiam sita.

3. In versione graeca Iudith 2,23 nominatur Δωδ inter regiones ab Holoferne devictas, quam regionem interpretes censent esse Lydiam in Asia minore. Cf. *De Moor*, Le livre de Judith 1895 p. 40. 41; *Vigouroux*, La Bible et les déc. mod. ed. 6 IV. p. 114.

LYDIA in Vulgata Is. 66,19 v. LYDI 1.

LYDIA (Λυδία), mulier Thyatiris oriunda, πορφυρόπολις, quae purpuram, textilia purpureo colore tincta vendidit (Act. 16,14. 40). Erat cultrix Dei, proinde proselyta; audivit Paulum Philippis concionantem, fidem et baptismum suscepit ipsa et domus eius, Paulum, Silam, Timotheum et Lucam hospitio accipere deprecata est « et coegit nos » blanda quadam vi.

LYRA vide s. v. MUSICA.

LYSANIAS (Λυσανίας) tetrarcha Abilinae anno decimo quinto Tiberii Caesaris, quo tempore Ioannes Baptista in regionem Iordanis venit praedicans baptismum poenitentiae (Luc. 3,1). De Lysania I. rege Ituraeae, qui erat aequalis Antonii et Cleopatrae (40-36 a Chr.), diximus s. v. ITURAEA. Alter Lysanias usque ad nostrum saeculum ex fontibus profanis non innotescebat. Unde quia Flavii Iosephus saepius loquitur de Abilina tetrarchia Lysaniae, concludebant critici non pauci hanc tetrarchiam nomen traxisse ab isto Lysania I. et S. Lucam per errorem ex nomine *tetrarchia Lysaniae* aliquem Lysaniam tetrarcham effluxisse. Sed obstat quod iste Lysanias I. erat rex totius Ituraeae, quae Abilina includebat; ab eo igitur Abilina certe non poterat nuncupari tetrarchia Lysaniae. Ex hac sola consideratione iam probabilissimum efficitur, post illud tempus quo Ituraeae regnum in varia territoria discissum est, Abilina quoque ab aliis partibus separatam et a Lysania quodam iuniore administratam esse. Sed etiam directe comprobatur, iuniorem quendam Lysaniam tetrarcham Abilinae fuisse, scil. ex inscriptione prope Abilam inventa (Corp. Inscript. Graec. n. 4321; cf. t. III. p. 1174 Addenda ad n. 4321), quae saltem quinquaginta an-

nis post Lysaniam I. composita est et narrat Nymphaeum libertinum Lysaniae tetrarchae viam ac templum condidisse. Haec autem vix de libertino Lysaniae I. vera esse probantur; unde merito in hac inscriptione communiter agnoscitur iunior quidam Lysanias tetrarcha. Inania igitur sunt, quae de errore Luc. 3,1 proferebantur. Cf. *Schürer*, Gesch. des jüd. Volkes ed. 3 I. p. 718-720.

Iis addamus reliqua, quae de tetrarchia Lysaniae apud Flavium Iosephum traduntur. A Caligula imperatore (87 p. Chr.) Agrippa I. praeter tetrarchiam Philippi etiam tetrarchiam Lysaniae accepit (Ant. XVIII. 6,10). Claudius imperator factus (41 p. Chr.) hanc donationem confirmavit et auxit (Ant. XIX. 5,1 : Ἀεὶ-λαν τὴν Λυσανίου et cf. Bell. iud. II. 11,5 : βασιλεὺν τὴν Λυσανίου καλουμένην). Mortuo Agrippa I. (44 p. Chr.) romani procuratores eius regnum administrabant. Sed anno 53 p. Chr. seu anno decimo tertio Claudii imperatoris Agrippa II. tetrarchiam Philippi una cum Abila tetrarchia Lysaniae adeptus est (Ant. XX. 7,1; cf. Bell. iud. II. 12,8), quo mortuo (100 p. Chr.) eius regnum provinciae Syriae attributum esse censendum est. Nomen Lysaniae etiam diutius cum Abila coniunctum permansit; apud Ptolemaeum Abila vocatur Ἀβίλα ἐπικληθεῖσα Λυσανίου (ed. Nobbe V. 13,22; ed. Müller-Fischer V. 14,18 : Ἀβίλα ἐπικαλουμένη Λυσανίου).

LYSIAS (Λυσίας). 1. Dux Syrorum tempore Antiochi IV. Epiphanis et Antiochi V. Eupatoris, homo nobilis de genere regali. Vide quae de Antiocho IV., Antiocho V. et Iuda Machabaeo diximus s. vv. ANTIOCHUS 3 et 4, IUDAS 1. Brevis conspectus gestorum Lysiae hic sufficit. Antiochus IV. dum ipse in Persiden proficiscitur a. 165 a. Chr., Lysiam tutorem filii et procuratorem regni constituit eique mandavit, ut Iudaeos debellaret (1 Mach. 3,27-37). Duces a Lysia missi (Ptolemaeus, Nicanor, Gorgias, Bacchides, Thimotheus) a Iudaeis devicti sunt (1 Mach. 3,38-4,27; 2 Mach. 8,8-36). Autumno anni 165 a. Chr. Lysias ipse prope Bethsuram (Vulgata : Bethoron) a Iuda Machabaeo fugatus est (1 Mach. 4,28-35). Non multo post Ly-

sias novo exercitu in Iudaeam irruens prope Bethsuram iterum devictus est; sed comperta morte Antiochi IV. Epiphanis, qui moribundus Philippum totius regni procuratorem et Antiochi V. tutorem declaraverat, Lysias cum Iuda Machabaeo de pace componenda convenit, Antiochiam rediit, nomine Antiochi V. Eupatoris regnum administrandum in se suscepit et pacem, de qua convenerat, cum Iuda Mach. composuit (2 Mach. 11,1-38; 1 Mach. 6,14-17; cf. 2 Mach. 10,11). Nova belli occasione exorta (1 Mach. 6,18-27) Eupator et Lysias magno cum exercitu profecti Hierosolyma obsederunt, sed quia Philippus thronum occupare conabatur, Iudaeis pacem concedere coacti sunt (1 Mach. 6,28-63; 2 Mach. 13). Philippus, qui Antiochiam occupaverat, a Lysia devictus in Aegyptum aufugit (1 Mach. 6,63; 2 Mach. 9,29). Verum brevi post Lysias et Eupator a Demetrio I. Sotere superati et interfecti sunt (1 Mach. 7,1-4; 2 Mach. 14,1. 2).

2. Claudius Lysias, tribunus cohortis romanae, qui Hierosolymis S. Paulum e manibus Iudaeorum eripuit et Caesaream ad Felicem praesidem provinciae misit (Act. 21,30-23,35; 24,7. 22).

LYSIMACHUS (Λυσίμαχος). 1. Filius Ptolemaei, qui (Lysimachus) in Ierusalem epistolam plurim graece interpretatus est, quam interpretationem Dositheus eiusque filius Ptolemaeus in Aegyptum attulerunt (Esth. 11,1 Vulgata, LXX in fine cap. 10).

2. Frater Menelai pontificis. Secundum textum graecum 2 Mach. 4,29

Menelaus, cum ad regem Antiochum Epiphanem evocaretur ob pecuniam quam Iason promiserat non solutam (cf. 2 Mach. 4,8), reliquit fratrem suum Lysimachum, qui vices pontificis interea ageret (ἀπέλιπε τῆς ἀρχιερωσύνης διαδόχον Λυσίμαχον); secundum Vulgatam Menelaus amicus est a sacerdotio succedente Lysimacho. Suadente Menelao Lysimachus res sacras aurumque de templo surripuit multum; quo facinore indignatio populi est excitata et Lysimachus illa seditione est interfectus; cf. 2 Mach. 4,39-42.

LYSTRA (Λύστρα), urbs Lycaoniae, fere in confinibus Lycaoniae et Isauriae, ab Iconio meridiem versus sita. Eam in urbem Paulus apostolus primo suo itinere apostolico ab Iconio venit et ea in regione praedicavit. Cum ea in urbe virum a nativitate claudum sanasset, ipse et Barnabas ab imperita turba dii sunt habiti et vix prohibere poterant ne sibi fierent sacrificia. Verum mox plebs mobilis alios in Paulum animos induit. Supervenerunt enim Iudaei ab Antiochia et Iconio et adeo turbis imposuerunt, ut Paulus lapidaretur et veluti iam mortuus ex urbe traheretur (Act. 14,6-20). In altero itinere apostolico Lystris Paulus sibi adiunxit Timotheum (Act. 16,1). Quae autem Lystris passus est, apostolus etiam ultimo vitae suo tempore adhuc recordatur et Timotheo ad consolationem, qui similia sit expertus, in memoriam revocat 2 Tim. 3,11.

Pro Lystra, quae est Lyciae, Act. 27,5 legendum est: Myram, quae est Lyciae (v. MYRA).

CORRIGENDA ET ADDENDA

Col. 326 ad GABAA 1. Non solum Gabaa 1 Par. 2,49 sed etiam Gabaa Ios. 13,57 videtur componi posse cum *Djebā'a* haud procul a Bethlehem inter austrum et occidentem. Cf. quae de tertia provincia montis Iuda dicit *F. de Hummelauer* (Comm. in Ios. p. 361) : « Situs et ambitus huius provinciae obscurior. Habebat ea loca quaedam ad austrum Hebronis... alia loca habebat eadem provincia ad aquilonem... crediderim provinciam ab au-

stro Hebronis transiisse per urbis orientem ad eiusdem aquilonem. Ceterum neque illud mordicus defendendum esse censeo, singularum provinciarum omnium fines fuisse continuos ».

Col. 329 lin. 10 ab infra lege : Geba de qua diximus num. 2 (non num. 1).

Col. 332 lin. 7 lege : ut diximus sub GABAA 1 (non 2).

Col. 494 lin. 11 lege : **HERES** ascensus v. HARES.





PARIS (VI^e)
P. LETHIELLEUX, Libraire-Éditeur
10, RUE CASSETTE, 10

SCRIPTURAE SACRAE CURSUS

Auctoribus R. CORNELY, I. KNABENBAUER, FR. DE HUMMELAUER, aliisque e Soc. Iesu presbyteris

S. S. PIUS X, ut Sanctitati Suae opus hoc dedicaretur benigne concessit

Volumes grand in-8 raisin, imprimés avec le plus grand soin

TOTIUS OPERIS ADUMBRATIO

I. — TEXTUS SACRI (CIRCA 10 vol.)

II. — LIBRI INTRODUCTORII (CIRCA 9 vol.)

III. — COMMENTARII

a) — VETUS TESTAMENTUM

1^o LIBRI HISTORICI (8 vol.)

2^o LIBRI DIDACTICI (CIRCA 8 vol.)

3^o LIBRI PROPHETICI (5 vol.)

b) — NOVUM TESTAMENTUM

1^o LIBRI HISTORICI (4 vol.)

2^o LIBRI DIDACTICI (CIRCA 6 vol.)

3^o LIBER PROPHETICUS (1 vol.)

EX “CURSU SCRIPTURAE SACRAE” EXCERPTA

Auctore R. CORNELY, S. I.

Synopses omnium librorum sacrorum Utriusque Testamenti ex « Introductione speciali in Vetus et Novum Testamentum » excerptae, retractatae, completae. In-8 carré. **6 »**

Synopses Psalmorum separatim edit. In-18. **0.80**

Commentariolus de inspiratione (*Ex Compendio Introductionis*). In 8. **0.30**

Historicae et criticae introductionis in Utriusque Testamenti libros sacros Compendium Sacrae theologiae auditoribus accommodatum. In-8 carré. Edit 5a. **8 »**

Analyses librorum sacrorum Novi Testamenti quas ex sua « Introductione speciali in Novum Testamentum » excerpserit et complevit auctor. In-8 écu **2 »**

Envoi d'un Prospectus spécial donnant l'état exact de la Publication

PARIS (VI^e)
P. LETHIELLEUX, Libraire-Éditeur
10, RUE CASSETTE, 10

BIBLIA SACRA

VULGATAE EDITIONIS SIXTI V ET CLEMENTIS VIII, PONTT. MAXX. JUSSU

RECOGNITA ATQUE EDITA ET AB AUCTORITATE ORDINARIJ CANONICE PERMISSA

EDITIO CURA ET STUDIO **Caroli VERCELLONE**

AN. 1861 DATA, SCRUPULOSIUS INTENTA

2 vol. in-8 raisin 8.00

PRIX DES RELIURES EN PLUS :

1^o L'ouvrage relié en deux volumes :

N^o 1. — *Toile, biseaux, tr. rouges, par vol. net.* 1.60

N^o 2. — *Demi-chagrin, plats toile, tr. jaspées, par vol. net.* 2.50

N^o 3. — *Demi-chagrin, plats toile, tr. rouges, par vol. net.* 3.25

2^o L'ouvrage relié en un volume :

N^o 1. — *Demi-chagrin, plats toile, tr. jaspées, net.* 3.75

N^o 5. — *Demi-chagrin, plats toile, tr. rouges, net.* 4.50

NOVUM JESU CHRISTI TESTAMENTUM

VULGATAE EDITIONIS SIXTI V ET CLEMENTIS VIII, PONTT. MAXX.

(EXTRACTUM E BIBLIA SACRA)

1 vol. in-4^e, grands caractères et grandes marges. 4.00

CONCORDANTIARUM

UNIVERSAE SCRIPTURAE SACRAE

THESAURUS

EA METHODO QUA P. DE RAZE DISPOSUIT SUUM CONCORDANTIARUM

SACRAE SCRIPTURAE MANUALE ADORNATUS ET TABULIS SYNOPTICIS LOCUPLETATUS

AUCTORIBUS

PP. PEULTIER, ÉTIENNE ET GANTOIS

ALISQUE

E SOCIETATE JESU PRESBYTERIS

In-quarto (30 × 20 xvi-1238 pp. complectens). 25 00

Le même ouvrage, en reliure demi-chagrin. 30.00



BS
440.
.H26
v.2

HAGEN, MARTIN, ED.

BS
440.
.H26
v.2

Lexicon Biblicum.

PONTIFICAL INSTITUTE
OF MEDIAEVAL STUDIES
59 QUEEN'S PARK
TORONTO 5, CANADA

